

Wængonguī nǎnō
Apǎnegainō



New Testament in Waorani (EC:auc:Waorani)

Wængongü nänö Apænegainö

New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
9bedab5a-39ff-5163-a35b-8056cbbe8690

Contents

Määteo	1
Mäadoco	61
Odoca	97
Wäö	159
Näni Cægäinö	204
Odömänoidi	263
1 Coodintoidi	291
2 Coodintoidi	318
Gadataidi	335
Epetoidi	345
Pidipenteidi	355
Codotenteidi	362
1 Tetadönitenteidi	368
2 Tetadönitenteidi	374
1 Tīmoteo	377
2 Tīmoteo	385
Tito	391
Pidemöö	395
Ebedeoidi	397
Tantiago	419
1 Pegodo	426
2 Pegodo	434
1 Wäö	439
2 Wäö	446
3 Wäö	447
Codaa	448
Nänö Odömongäinö	451

**Itota Codito ingantedö ante
Mäateo
nänö watapæ ante
yewæmongainta**

*Itota Codito wæmæidi
(Odoca 3.23-38)*

¹ Nē Ponguingä, ante dodäni nāni nē angaingä iñömö Itota Codito inongä ingampa. Tömengä iñömö Abadäo wodi pæingä nē ingaingä inte Awënë Dabii wodi pæingä mönönö inongä ingacäimpa. Tömengä wæmæidi iimaï emongadänimpa, ante yewæmonte ongompa.

² Abadäo wodi wengä Itæca eñagacäimpa. Ayæ wææ Itæca wodi wengä Aacobo eñagacäimpa.

Ayæ wææ Aacobo wodi wënäni Oodaa nāni caipæ eñagadänimpa.

³ Ayæ wææ Oodaa wodi Tämata ingante monte Pade tönö Dada inate tapæigacäimpa.

Ayæ wææ Pade wodi wengä Etedöö eñagacäimpa.

Ayæ wææ Etedöö wodi wengä Adäma eñagacäimpa.

⁴ Ayæ wææ Adäma wodi wengä Äminadabo eñagacäimpa.

Ayæ wææ Äminadabo wodi wengä Näatöö eñagacäimpa.

Ayæ wææ Näatöö wodi wengä Tädämöö eñagacäimpa.

⁵ Ayæ wææ Tädämöö wodi pæte Adacaba ingante möninqe Boodo ingante tapæigacäimpa.

Ayæ wææ Boodo wodi pæte Odoto ingante monte Obedo ingante tapæigacäimpa.

Ayæ wææ Obedo wodi wengä Yæte eñagacäimpa.

⁶ Ayæ wææ Yæte wodi wengä Dabii eñate pædinque awënë odeye bagacäimpa.

Ayæ wææ Dabii wodi pæte Odiya wodi nänöogængä iningä ingante möninqe Tadömöö ingante tapæigacäimpa.

⁷ Ayæ wææ Tadömöö wodi wengä Doboäo eñagacäimpa.

Ayæ wææ Doboäo wodi wengä Abiya eñagacäimpa.

Ayæ wææ Abiya wodi wengä Ata eñagacäimpa.

⁸ Ayæ wææ Ata wodi wengä Ootapato eñagacäimpa.

Ayæ wææ Ootapato wodi wengä Oodäo eñagacäimpa.

Ayæ wææ Oodäo wodi wengä Otiya eñagacäimpa.

⁹ Ayæ wææ Otiya wodi wengä Ootäo eñagacäimpa.

Ayæ wææ Ootäo wodi wengä Acadæ eñagacäimpa.

Ayæ wææ Acadæ wodi wengä Etequiya eñagacäimpa.

¹⁰ Ayæ wææ Etequiya wodi wengä Mänatee eñagacäimpa.

Ayæ wææ Mänatee wodi wengä Ämöö eñagacäimpa.

Ayæ wææ Ämöö wodi wengä Ootiya eñagacäimpa.

¹¹ Ininque Ootiya wodi quëwengäñedë idægoidi inänite babidöniadi ponte ö æd gobæ wabæca mäodäni gogadänimpa.

Ayæ wææ Babidöniabæ nāni goyedë Ootiya wodi wënäni Eecöniya nāni caipæ eñagadänimpa.

¹² Mänii Babidöniabæ ö ænte godäni ate ayæ wææ Eecöniya wodi wengä Tadatiedo eñagacäimpa.

Ayæ wææ Tadatiedo wodi wengä Dodob- abedo eñagacäimpa.

¹³ Ayæ wææ Dodobabedo wodi wengä Abiodo eñagacäimpa.

Ayæ wææ Abiodo wodi wengä Ediaquimö eñagacäimpa.

Ayæ wææ Ediaquimö wodi wengä Atodo eñagacäimpa.

¹⁴ Ayæ wææ Atodo wodi wengä Tadoco eñagacäimpa.

Ayæ wææ Tadoco wodi wengä Aquii eñagacäimpa.

Ayæ wææ Aquii wodi wengä Ediodo eñagacäimpa.

¹⁵ Ayæ wææ Ediodo wodi wengä Edeadado eñagacäimpa.

Ayæ wææ Edeadado wodi wengä Mäatäo eñagacäimpa.

Ayæ wææ Mäatäo wodi wengä Aacobo eñagacäimpa.

¹⁶ Ayæ wææ Ootee wodi ingante Aacobo tapæigacäimpa.

Ayæ Ootee wodi eñate pæte wææ Itota badä inguingä ingante Mäadiya ingante mongacäimpa.

Mäadiya ingante mongä ate tömengä wææetë Itota ingante mangacäimpa. Tömengä iñömö Awënë bacæcäimpa, ante cædinque Wængongui oginguipæ gao cæcä ate edæ, Codito, ante nänö nē pemongaingä ingacäimpa.

¹⁷ Mänömai i incæ Abadäo wodi pæināni wææ nänömoidi wææ, önonpo tipæmpoga wææ mempoga go mempoga mänimpoga nāni yebæñedë ate Abadäo wodi pæingä Dabii eñagacäimpa. Ayæ wææ Awënë Dabii wodi pæināni wææ nänömoidi wææ, önonpo tipæmpoga wææ mempoga go

mempoga mänimpoga nāni yebæñedē ate Oodeoidi Inānite wabæca Babidōniabæ ænte gogadānimpā. Ayæ Babidōniabæ ænte godāni ate tōmēnāni pæināni wææ nānōmoidi wææ, ōnompō tipæmpoga wææ mempoga go mempoga mänimpoga nāni yebæñedē ate mōnō Codito nānō ponguinque ēñagacāimpā.

*Itota Codito ēñacampā
(Odoca 2.1-7)*

¹⁸ Itota Codito īmaī ēñagacāimpā. Wāānā Māadiya wodi nānō baquecāñedē Ootee wodi tōmengā ingante do, Monguimo, angā ēñēningā inte ayæ mōnāmaī īñongante Wængonguī Tæiyæ Wæmō Ōnōwoca angā ēñēninge do yædēmadā bacā adānitapā. ¹⁹ Yædēmadā ingā adinque Ootee cōwē nō cædongā inte, Piinte ānāni wæcæ wæ, ante wædinque, Awēmō pango cæcæboimpā, ante pōnēngantapā.

²⁰ Ante ōnōwēnenque pōnēninque mōwocodē wīimōñongā Wængonguī tōmengā anquedo ingante da pōnongā pōninque anquedo īñōmō īmaī angantapā. “Ootee, Awēñē Dabii pæīmi īnōmi inte bitō nānōogængā Māadiya ingante guīñēnāmaī æncæbiimpā. Tōmengā īñōmō Wængonguī Tæiyæ Wæmō Ōnōwoca angā ēñēnte beyænque ēnengā adinque bitō īñōmō tōmengā ingante ee moncæbiimpā. ²¹ Tōmengā Wēñængā onguīñængā ingante mancæcāimpā. Mangā pæcā ate tōmengā īñōmō, Botō guīdēmīni mīni wæquinque wēnæ wēnæ cæmīnīpā, ante adinque botō æmo beyænque quēwencæmīnīpā, ante cæcæcāimpā cæbii. Bitō tōmengā ēmōwo ante, Nē Ængā īnongā ingampā, ante Itota pemoncæbiimpā,” ante anquedo Wængonguī nānō nē da pōnōningā ponte Ootee ingante angacāimpā.

²² Īninque Wængonguī beyæ nē apænegaingā īmaī ante nānō yewæmongainō bai ante īinque batimpā.

²³ “Baquecā incæ yædēmadā badinque Wēñængā onguīñængā ingante mancæcāimpā. Mangā ēñacā adinque tōmengā ēmōwo, Ēmānoedo, ante godō pemoncædānimpā.

Ante nāni yewæmongainō bai cædinque tōmengā ēmōwo, “Wængonguī mōnō weca quēwengampā,” ante, Ēmānoedo, ante pemonte īnongāimpā.

²⁴ Ootee māniī wīimonte nāni ōmæmongā ate Wængonguī nānō da pōnōningā anquedo nānō āmaī ēñēnte cædinque oncōñē ænte gocā incæte guēa mōnāmaī ingadāimpā. ²⁵ Edæ bamoncadengā ēñacā ate, Itota, ante pemonte ate tōmēna māniñedē ate guēa mongadāimpā.

2

Nē ēñēnāni Itota weca ēñacæ pōnānīpā

¹ Itota Bedēē nāni quēwēñōmō ēñacā ate māniñedē edæ Edode Oodeabæ awēñē oðeye nānō īñedē edæ nē nō ēñēnāni gobæ nænque tamōnō quēwēñāni inte Eedotadēē pongadānimpā. ² Ponte āninque,

—Oode Awēñē Odeye īñōmō nōwocā ēñadingā īñōmō æyōmōnō owocāā, ante ēñencæte ante wæmōnīpā. Edæ nænque tamōnō quēwēñōmōni Awēñē nēmō ta nōngæ adinque mōnitō tōmengā weca ædæ wææninque edæ, Bitō Wængonguī imidō anguēñē, ante watapæ apæñecæ pōmōni imōnīpā, ānānitapā.

³ Ayæ, Wacā Awēñē Odeye ēñacampā, ante dededāni ēñēnte wædinque māniōmæ tōmāmæ awēñē oðeye Edode wæætē pūinte bayongā Eedotadēē quēwēñāni tōmānāni tōmengā tōnō godongāmæ guīñēnte wædānitapā. ⁴ Īninque, Wængonguī quī, ante nē godōnāni nāñænāni tōnō Wængonguī nānō wææ angainō ante nē odōmōnāni tōnō tōmānāni īnānite Edode āñecā godongāmæ pōnānitapā. Pōnāni ate tōmengā, Codito nāni angaingā īñōmō æyōmōnō ēñāquingāā, ante æbānō yewæmonte ōñō aminīi. ⁵ Āñongante, —Oodeabæ īñōmō Bedēē nāni quēwēñōmō māniñōmō ēñacæcāimpā, ante Wængonguī beyæ nē apæñecā incæ īmaī ante yewæmongacāimpā, ante apæñedānitapā.

⁶ “Oodabæ awēñē gobedōnadodoidi tæiyænāni īñōnāni mīnitō adobæca Oodabæ quēwēninque Bedēē īñōmō mīni quēwencabo īñōmō mēa pōni īmīni incæte edæ wīi ōnōmīnīque incæmīnīpā.

Īñæmpā Wēñængā adocanque ēñate pædinque nē Awēñē bate taodinque nē aacā bai īnongā inte botō guīdēnāni idægoidi īnānite aacæcāimpā.” Ante yewæmongā amōnīpā.

⁷ Ante apæñedāni ēñēnte wædinque Edode wæætē nē nō ēñēnāni īnānite awēmō āñete pōnāni ate, Nēmō æyedēñō mā pōni tamō amīnitawo. Āñongante tōmēnāni, „Māniñedē tamō atamōnīpā, ante apæñedāni.

⁸ Ēñēninque Edode īñōmō,

—Mīnitō wæætē Bedēē īñōmō māo nē ēñadingā ingante diquī diquī mīnte aedāni. Tōmengā ingante adinque wæætē adodō pōninque apæñemīni ēñēmoedāni. Edæ mīnitō gote æbānō wēñæ ingante apæñemīni bai botō adobai edæ gote ædæ wææninque edæ, Wængonguī Awēñē imidō anguēñē, ante watapæ apæñecæte ante āmopā, ante Edode ōnonque ante pōnēninque apænegacāimpā.

⁹ Angā ēñēninque nēmō nē adīnāni īñōmō Bedēē taadō gote æmō ayōnāni edæ ado nēmō tōmēnāni nænque tamōnō quēwēninque nāni adīmō incæ wo go

adinque edæ tē wocæ goyönänite nēmō Wēñæ owoyōmō oncōmanca tæcædæca inō næ gongæ adänitapa. ¹⁰ Adinque tōmēnāni edæ, Mōnō acæ pōnongā inōmō ongonampa, ante pōnēninque watapæ togadänimpa. ¹¹ Mānī nāni adincōnē go guite ayönāni Wēñængā inōmō wānā Māadiya tōnō ongonā adinque tōmēnāni Wēñængā weca ædæ wææninque, Bitō Wængongui Awēnē imidō anguēnē, ante watapæ apænedänitapa. Ayæ tōmēnāni nāni ænte pōnincoo wi æmpodinique oodo tōnō ogui waa qui tōnō tī nā ōni pæqui tōnō, Bitō qui impa, ante pædæ godōnāni ængacäimpa. ¹² Idæwaa adinque tōmēnāni mōwocodē wīimōñnānite wacā ponte apænecantapa. Minitō awēnē Edode weca ocæ emænte godāmai iedāni, angā ēñēninque tōmēnāni wæætē yaatænque godinique tōmēnāni omæ wadæ gogadänimpa.

Ooteidi Equitobæ wodii winōnānīpa

¹³ Godāni ininque edæ Ootee wīimōñongā Wængongui anquedo ingante da pōnongā ponte apænedinique, “Edode do Wēñængā ingante wænoncæte ante diqui mincæcäimpa cæbii. Ængæ gantite Wēñængā nāna badancaya inate ō ænte Equitobæ wodii goe. Ayæ gote quēwēñōmini botō āmo ate pōedāni,” angā.

¹⁴ Ēñēninque Ootee tōmēngā nānō wīimōōnæ ayaōnæñēna incæ ængæ gantidinique Wēñængā nāna badancaya inate ō æninque edæ Equitobæ gocantapa. ¹⁵ Godinique Ootee nāni wencabo inōmō Edode nānō wænguinganca quēwencæ gogadänimpa. Go quēwēnāni ininque mōnō Awēnē Wængongui iūmai ante nānō apænegainō ante inque batimpa. “Botō Wēñængā Equitobæ quēwēñongante āñebo pongantapa,” ante Wængongui beyæ nē apæncä nānō yewæmongainō bai edæ do inque batimpa.

Wēñæñāni inānite Edode angā wæñōnāni wæñānīpa

¹⁶ Edode guiquēnē, Nēmō nē nō ēñēnāni botō āninō ante ēñēnāmai inte dæ godänīpa, ante adinque edæ ængui bacantapa. Ængui badinique tōmēngā, Wēñæñāni inānite māo wæñōedāni, angantapa. Āninque tōmēngā, Mēa wadepo inōnte nēmō ta atamōnīpa, ante nē ēñēnāni nāni ānimpoga ante pōnēninque, Mēa wadepo ēñādīnāni tōnō ayæ ēñādīnāni tōnō Bedēē quēwēnāni incæ Bedēē eyequei quēwēnāni incæ onguinæñāninque inānite māo wæñōedāni, angantapa. Ininque nē wæñōnāni wæætē awēnē nānō adīnāninque inānite capo ado tedæ wæñōnāni wængadänimpa. ¹⁷ Wæñāni wædāni ininque Wængongui beyæ nē

apænegainō Eedēmiya wodi iūmai ante nānō angainō bai edæ inque batimpa.

¹⁸ “Nāmaa nāni quēwēñōmō nē Ca ca wæwēnā nānā Ca ca wæpāmo ēñēñānitapa.

Wānā nē Yæ yæ ānōnā inte, Daquedā inōmō, Botō wēñæñāni, ante wædā ēñēñānitapa.

Dæ ānāni pōnente wædinque wānā ædō cæte piyænē cæquināa,” ante Eedēmiya wodi yewæmongacäimpa.

¹⁹ Ayæ ate awēnē Edode wængā ininque Ootee inōmō Equitobæ ayæ quēwēninque wīimōñongā Wængongui anquedo ponte a ongōninque tōmēngā ingante apænecantapa. ²⁰ “Ootee ēñēmi. Wēñængā ingante wænoncæ ānōnāni incæ dobæ wæñānīpa cæbii. Ængæ gantite Wēñængā nāna badancaya inate Idægobæ adodō ænte gocæbiimpā,” angā.

²¹ Ēñēninque Ootee inōmō edæ ængæ gantidinique nāna badancaya inate Idægobæ adodō ænte gocantapa. ²² Māniñedē wæmpo Edode wængā ininque, Wæætē tōmēngā wængā Adoquedao Oodeabæ awēnē odeye bacantapa, ante tededāni ēñente wædinque Ootee inōmō, Botō Oodeabæ ædō cæte wæætē goquimoo, ante guifiente wæcantapa. Wæætē tōmēngā mōwocodē wīimōñongā wacā angā ēñēninque Oodeabæ wodo tebæ godinique Gadideabæ gocantapa. ²³ Godinique Ootee nāni wencabo Nāatadeta ponte quēwēñānitapa. Ininque, Nāatadēnō ingampa, ante pemoncædänimpa, ante Wængongui beyæ nē apænegainō nānō angainō bai cædinque wadāni nōwo mōnō Codito ingante, Nāatadēnō, ante pemonte bai apænegadänimpa.

3

Wāō ōnōmæca ponte apæncä ēñēñānīpa
(Māadoco 1.1-8; Odoca 3.1-9, 15-17; Wāō 1.19-28)

¹ Māniñedē Wāō mōnō nē æpænē guidōnongā inte Oodeabæ ōnōmæca ponte apæncä ēñēngadänimpa. ² Ponte apænedinique tōmēngā, “Ōnædē Awēnē incæ inguipoga tōmāmæ Awēnē Odeye bacæcäimpa cæminii. Minitō wēnæ wēnæ cædinō ante, Ancaa wæwente awædō, ante inmpo cæedāni,” ante Wāō apæncä ēñēñānitapa.

³ Mānōmainō ante nē apæncä ingantedō ante Wængongui beyæ nē apænegainō Itaiya wodi iūmai ante do yewæmongacäimpa.

“Ōnōmæca inōmō adocanique ogæ tedete aa pecæcäimpa.

‘Awēnē nānō ponguinō ante mīnitō tee moncate bai cæedāni.

Taadö töinö p̄inonte bai cædinque m̄initö wënæ wënæ m̄ini cædinö ante edæ wido cæedäni,' ante aa pecä ëñengæimpa,"

⁴ Ante Itaiya wodi nänö nê angaingä inte Wäö ñöwo pongantapa. Tömengä weocoo ante cæmeyo ocaguingcoo nonte badonte wëñate mongæninque pacadeyænta ante æmontai badonte encadeyænongåimpa. Tömengä cænguï ante ñawäike cæninque tömengä bequï ante guïñemænque ade bete quëwënongåimpa. ⁵ Quëwëñongä, Eedotadëë quëwëñäni tönö Oodeabæ tömão quëwëñäni tönö Oododånonga biyönæ tömão quëwëñäni tönö tömengä weca tate be téninque äñanitapa. ⁶ Bitö ämai nãwangä wënæ wënæ cæte quëwëmöni inte wæmönipa, ante wædäni ëñëninque Wäö Oododånö æpænë guidongä guiddänitapa.

⁷ Ayæ Paditeoidi tönö Tadoteoidi guiquenë Wäö nänö guidöñömö pönäni adinque tömengä ayæ wæætë tömënäni inänite angantapa. "Tæntæ pæñimäni bai inömini inte m̄initö iñömö ëñëñämai cæte quëwëminipa. Oo pönï wænonmpadäni, ante æcänö wææ angä ëñëninque wodii winonte pöm̄ini. ⁸ Iñæmpa Wængonguï Awënë gämænö m̄initö dicæ ocæ ëmænte poncæ cæm̄iniyaa. Nö cæte pöm̄ini ininque m̄initö nê ocæ ëmænte pönäni nãni waa cædö bai adobai waa cæedäni. ⁹ Ayæ nãmä wææ äninque, 'Mönitö adomönique docä Abadäö wodi pæñimöni inte möni quëwënguinque imönipa,' ante m̄ini tedewënö ante pönëñämai inguënë quëwëminipi. Iñæmpa Wængonguï, Botö pæñinäni bacædänimpa, angä bai dicacoo incæ dobæ tömengä pæñinäni bai bacædönimpa. ¹⁰ Edæ awæ yecæte ante awænca nãni mæ yequinca eyewa pönï næñänäni bai Wængonguï nänö panguinca næænte bai do edæ a ongongampa. Tömengä wainca ante a ongöñongä ömæcawæ bai wii pönente cædäni adinque awænca wægo yete godö gongapamö iya tante bai cæcæcäimpa, ante ämo ëñëmalm̄inipa."

¹¹ Ayæ, "M̄initö wënæ wënæ m̄ini cædinö ante wido cæcæm̄inimpa, ante cædinque botö m̄initö im̄inite æpænë guidömo guim̄inipa. Incæte botö mänömai cæbo ate wacä ayæ poncæcäimpa. Tömengä iñömö tæi ëmongä ewocadongä iñongante botö wæætë wædämo inömo inte tömengä awænca incæ ædö cæte godö ænte nææm̄aimoo. Tömengä da pönongä pöninque Wængonguï Tæiyæ Wæmö Öñowoca incæ pö guidinque m̄initö m̄imö mënongacæcäimpa. Ayæ m̄initö wënæ wënæ cædinö ante gonga tante bai tömengä cæcæcäimpa. ¹² Waocä, Todigo tömëmö wati wati tæñöninque botö tæñönñömö öñömancaque baquinque botö

apænte æninque waiña tömämö oncönë da wencæboimpa, ante timpodæ næænte wo ææntodö wo ææntodö cædinque ontapocoo wææincoo wadæ ñëmænte wo ëwengampa. Waocä mänömai wo ewencæte ante timpodæ næængä bai mönö nê Ponguingä iñömö adobai oo pönï apænte ancæcäimpa. Todigo waiñacooque oncönë da wente nê mangä bai tömengä adobai nê waëmö inäni inänite apænte ængä ate tömënäni tömengä nempo guicædänimpa. Wæætë wadæ ñëmænte wo ewente bai cædinque tömengä nê ontapocoo wææincoo bai inäni inänite cöwë bæcöyömö iya tangä gonte wæcædänimpa," ante Wäö apænegacäimpa.

Itota æpænë guicampa

(Mäadoco 1.9-11; Odoca 3.21-22)

¹³ Wäö ayæ apæneyongä Itota iñömö Gadideabæ quëwëninque, Wäö botö imote æpænë guidongä guicæboimpa, ante cædinque Oododånonga pongantapa. ¹⁴ Ponte, Guidömi guiboë, äñongante Wäö wæætë wææ äninque,

—Botö waëmö imopa diyæ bitö imite guidömo guiquim̄ii. Bitö wæætë botö imote guidömi guiboë bai waa incædönimpa.

¹⁵ Ante wæyongante Itota wæætë,

—Cöwë ee cæbi, ämopa. Wængonguï nänö äñö ante tömånö ëñente nö cæmö inguënëmö imompa.

Ante apæñecä ëñëninque Wäö Ao ante ee guidongä guigacäimpa. ¹⁶ Guite æpæ do tao gongænte æmö ayongä iñontobæ öönæ incæ wëä godömönte bayö Wængonguï Öñowoca incæ equemö wææ bai tömengä wææ pö guicä acantapa. ¹⁷ Wææ guicä ayongä edæ öönædë inö apænedinque, "Mäningä iñömö botö Wëñængä inongä inte botö nê waadecä ingampa. Tömengä ingante adinque botö watapæ tobopa," ante öönædë inö apæñecä ëñengacäimpa.

4

Itota incæ wënæ wënæ cæcæcäimpa, ante wënæ cæcampa

(Mäadoco 1.12-13; Odoca 4.1-13)

¹ Ayæ mäniñedë edæ, Itota iñömö wënæ angä ëñente æbänö cæqinggää, ante Wængonguï Öñowoca incæ Itota ingante öñömæca mæicä æigacäimpa.

² Æi quëwëninque tömengä wantæpiyæ coadenta öönæ mänimpoönæ itædë woyowotæ cænänämai quëwëninque gue æñente wægacäimpa. ³ Gue æñente wæyongä wënæ awënë, Wënæ wënæ cæe, ante nê änewengä inongä inte Itota weca pöninque,

—Bitö Wængonguï Wëmi imitawo. Nãwangä i ininque dica incæ päö ämi ba cæm̄aimipa.

⁴ Äñongante Itota iñömö,

—"Cænguinque cænte ædö cæte quëwënguï. Wængonguï nänö apæñedö

tömäne ēñente cædinque waocä cænguī cænte bai quēwencæcäimpa.” Mänömainö ante Wængonguī beyæ yewæmonte ongö apa änewëë, äninque Baa angantapa.

⁵ Wënæ awënë ayæ Itota ingante Eodotadëë tæiyæ waëmö nani quēwëñömö ænte mäocä gocantapa. Ayæ Wængonguī oncö ñænænconga wænömënæca ænte mæi gönongä næ gongængantapa. ⁶ Næ gongæñongante wënæ awënë wæætë,

—Bitö Wængonguī Wëmi ïmitawo. Nāwangä ï ïninque bitö to wæibi ate dodäni ïmalnö ante nani yewæmongainö bai ïinque ba abaimpa.

“Bitö beyæ ante cædinque Wængonguī tömengä anquedoidi ïnänite angä pönninque,

tömëñäni bitö ïmite wææ aate ïñæ æmpodäni ate

bitö dicaa tee tēwadämaï incæbiimpa,” ante yewæmonte ongompa cæbii.

⁷ Äñongante Itota,

—Ïñæmpa godömenque ante yewæmongatimpa.

“Bitö Awënë bitö Wængonguī ïñongante bitö wæætë edæ, ‘Ëñënämaï cæbo incæte mönö Awënë Wængonguī æbänö cæqingäa,’ ante acæte ante cædämaï incæbiimpa,” ante adobai wææ yewæmonte ongö apa änewëë, ante Itota angantapa.

⁸ Ayæ wæætë wënæ awënë Itota ingante æibæ pöni onquiyaboga mæicä æcantapa. Äi ongöñongä wënæ awënë ïñömö awënë odeye ömæcoo inguipoga tömäo ongöñömæcoo adoyömö a ongonte bai ado tedæ odömöninque awënë odeyeidi waa pöni nani ëmönö adobai odömongä acantapa. ⁹ Itota ingante apænedinque wënæ awënë,

—Bitö botö weca ædæ wææñinque, Tatänabi bitö Wængonguī Awënë bai ïnömi ïmipa, ante watapæ apænebi ëñëmoë. Mänömainö ante apænebi ëñëninque botö wæætë, Mänömainö tömäo ongöñömæ pönömo æninque bitö tömäæ Awënë babaïmipa, ante wënæ incæ änewengantapa.

¹⁰ Änewëñongante Itota wæætë,

—“Bitö Awënë Wængonguī weca ædæ wææñinque tömengä ingante, Bitö Wængonguī ïmidö angüënë, ante watapæ apæncæbiimpa. Ayæ tömengä adocanque ingante næ cæbi incæbiimpa,” ante Wængonguī beyæ yewæmongatimpa cæbii. Botö weca ongönämaï gobäwe, angantapa. ¹¹ Angä go ate Wængonguī tömengä anquedoidi pönninque Itota beyæ pönö waa cægadänimpa.

Gadideabæ ponte Itota mä apæncæmpa (Mäadoco 1.14-15; Odoca 4.14-15)

¹² Ayæ quēwëñongä, Wäö ingante dobæ tee mönedänipa, ante tededäni ëñente wædinque, Itota wæætë Gadideabæ

wadæ gogacäimpa. ¹³ Wadæ godinque tömengä Näatadeta ponte wodo pænata godinque godömenque go gäwapæ yæwedeca Tabodöoidi tönö Nempatadiidi nani owogaimæ ïñömö pönninque edæ Capënaömö nani quēwëñömö ponte quēwengantapa.

¹⁴ Itota mäniñömö ponte quēwengä ïninque Itaiya wodi Wængonguī beyæ næ apæncä nänö angainö bai mäniñedë ïinque batimpa.

¹⁵ “Tabodöömæ tönö Nempatadiibæ ingäiñömö,

Gäwapæno gämæñnö godö,

Oododänö æmæmäa ïñömö,

Gadideabæ ïñömö wii oodeoidi wadäni nani quēwëñömö impa.

¹⁶ Næ ëñënämaï ïnani wëmö ïñömö contayönäni,

tömëñäni weca ñäö guinäæ tamö bai adänitapa.

Tömëñäni nani wænguimämo oo ïñonte wëmö ïñömö contayönäni,

mönö Codito ñäö ëmongä inte do pongä adänitapa.”

Ante Itaiya wodi nänö yewæmongainö bai ante cædinque Itota mäniñömö ponte apæncä ëñënänitapa.

¹⁷ Itota mäniñedë ïmaï ante mä apæncä ëñënänitapa. “Öönädë Awënë incæ inguipoga tömäæ Awënë Odeye oo bacæcämpa cæminii. Minitö wënæ wënæ cædinö ante, Ancaa wæwente awädö, ante pönente ñimpo cæedäni,” ante cöwë apæncä ëñengadänimpa.

Në gæyæ dadöwëñäni ïnänite Itota aa pecamä

(Mäadoco 1.16-20; Odoca 5.1-11)

¹⁸ Ayæ mänü pönninque Itota gäwapæ Gadideapæ yæwedeca gote cægonte ayongä Timönö Pegodo nani änogä tönö Äntade nana caya ïnate acantapa. Næ gæyæ dadöwëna ïnana inte tömäna ñöwo dicamöñæ æpænë wo guitodonte dadöwëñöna Itota gote acantapa. ¹⁹ Tömëna ïnate Itota,

—Ïñäna, botö miñæ edæ tee empo pöeda, ämopa. Næ dadonte ænte pömïna ïnte botö weca pönöminäte botö pönö cæbo ate minatö wæætë næ apænemïna badinque woadäni ïnänite næ ænte pömïna bacæminäimpa, angantapa.

²⁰ Angä ëñëninque tömäna dicamöñæ do ëmö cæte godinque Itota miñæ edæ tee empo wadæ godatapa.

²¹ Mäniñömö ongonte wadæ godinque Itota wada ïnate Tebedeo wëna Tantiago tönö Wäö nana caya ïnate acantapa. Tömëna mæmpo tönö wipodë ongonte dicamöñæ tadömoncöna adinque Itota tömäna ïnate, Botö miñæ pöeda, angä. ²² Ëñëninque tömäna Ao äninque Tebedeo wëna Tantiago tönö Wäö wæmpocä ingante wæætë, Mæmpo ëñëmi,

ānatapa. Nē cædāni tōnō wipodē owote cæyōmīnīte mōnatō bitō īmite ēmō cæte god-
inque Itota mīñæ gomōnāpa, ānīnque ado-
daque wadæ gogadāimpa.

*Tæiyæñnāni inānīte Itota odōmonte
apænecā ēñēnānīpa*

(*Odoca 6.17-19*)

²³ Ayæ Gadideabæ tōmāmæ godinque
Itota īñōmō Wængonguī apænecā nāni
ēñente yewæmongainta ate odōmōincōnē go
guiite odōmonte apænegacāimpa. Ōōnædē
Awēnē incæ inguipoga tōmāmæ Awēnē
oo badinque waa cæte aacæcāimpa, ante
apænecā ēñengadānīmpa. Ayæ waodāni
wēnæ wēnæ inte nāni wæwēnō ante ayæ
quīēmē beyæ wæncæ cæte wædāni incæ
Itota tōmēnāni nāni wædō ante pōnō cæcā
ate tōmānāni waa badānīta. ²⁴ Adinque,
Itota mānōmaī cæcampa, ante Tidiabæ
tōmāmæ gode ānāni ēñēnīnque waodāni
pōnīnque nē wēnæ wēnæ inte wæwēnāni
inānīte tōmengā weca ænte pōnānīta.
Ayæ nantate wæwēnāni tōnō wēnæ inte
quēwēnāni inānīte ænte pōnīnque dowænte
ināni tōnō cōmāināni inānīte tōmengā weca
ænte pōnāni adinque tōmengā godō cæcā ate
nē wēnæ wēnæ īnīnāni inte tōmānāni waa
bagadānīmpa.

²⁵ Ayæ Gadideabæ quēwēnāni tōnō
Decapodibæ quēwēnāni pōñōnāni wadāni
Eedotadē quēwēnāni tōnō Oodeabæ
quēwēnāni ayæ Oododānō æmæmāa
quēwēnāni tæiyæñnāni pōnīnque tōmengā
mīñæ tee empote gogadānīmpa.

5

Itota ānanquīdī æite apænecā ēñēnānīpa

¹ Tæiyæñnāni pōnāni adinque Itota īñōmō
ānanquīdī æi tæ contayongā tōmengā mīñæ
nē godāni pōnāni. ² Ate tōmengā īñæ ænete
nangui tedete īmaī ante odōmonte apænecā
ēñengadānīmpa.

*Waocā īmaī cæte watapæ tote
quēwencæcāimpa, ante*

(*Odoca 6.20-23*)

³ “Waodāni, Botō waēmō ēwocabopa diyæ
ōōnædē Awēnē weca go guīquīmoo, ante
nē wædāni īñōmō tōmēnāni nāni watapæ to-
quinque edæ ōōnædē Awēnē Odeye nempo
tōmēnāni quēwenguīnō do ēadānīpa,” angan-
ta. ⁴ “Nē wæwente quēwēnāni īñōmō
tōmēnāni nāni watapæ toquinque
wædānīpa. Edæ Wængonguī tōmēnāni inānīte
waadete godō cæcā ate tōmēnāni wampo
pōnencædānīmpa.”

⁵ “Nē gānē pōnente ædæmō cæte
quēwēnāni īñōmō tōmēnāni nāni watapæ to-
quinque edæ inguipoga tōmāmæ ænīnque
awēnēdī baī bacædānīmpa.”

⁶ “Wængonguī nō pōnī nānō entawēnō
baī adobaī entawencæboimpa, ante æcānō
cænguī cæñente baī wæda, æcānō tepæ
gæwænte baī wæda tōmēnāni īñōmō nāni
watapæ toquinque wædānīpa. Edæ
tōmēnāni tōmo cænte baī Wængonguī nānō
nō entawēnō ænte ædæmō entawente
tocædānīmpa,” ante Itota apænecantapa.

⁷ “Wadāni quēwencædānīmpa, ante
nē godō waadete waa cædāni īñōmō
tōmēnāni nāni watapæ toquinque
cædānīpa. Edæ mānōmaī nē cædāni inānīte
wadāni wæætē, Quēwencæmīnīmpa, ante
nāēmæ apæñedinque godō waadete waa
cæcædānīmpa.”

⁸ “Mīmō ñāō baī nē entawēnāni īñōmō
tōmēnāni nāni watapæ toquinque edæ
Wængonguī ingante do acædānīmpa,” ante
apænecantapa.

⁹ “Guēadō guēa pīnāmaī iedāni, ante nē
wææ wææ ānāni īñōmō tōmēnāni nāni
watapæ toquinque edæ wææ ānānīpa.
Tōmēnāni inānīte wadāni edæ, Mīnītō
Wængonguī wēñæmīni īmīnīpa, ante do
apæñedāni ēñente tocædānīmpa.”

¹⁰ “Nō cædāni beyænque wadāni pīnte
pānāni nē wæwēnāni īñōmō edæ tōmēnāni
nāni watapæ toquinque wæwēnānīpa.
Tōmēnāni ōōnædē Awēnē Odeye nempo nāni
quēwenguīnō edæ do ēadānīpa.”

¹¹ “Wadāni botō beyæ pīnīnque mīnītō
īmīnīte babæ ante ānānitawo. Mīnītō īmīnīte
edæ togænte pānānitawo. Īnīnque edæ
mīni watapæ toquinque impa. Ayæ, Nē
wīwa cæmīni īmīnīpa, ante wadāni pīnte
ānewēnāni wæmīni īnīnque edæ mīni watapæ
toquinque impa. ¹² Edæ, Ōōnædē mōnō
ænguīnō ante nangui ongōmpa, ante
pōñēnīnque mīnītō ñōwo wadāni nāni pīnte
cæyedē incæ watapæ toedāni. Edæ mīnītō
īmīnīte pīnte pānāni baī mīnītō ayæ dæ
āñedē Wængonguī beyæ nē apænegaināni
inānīte adobaī pīnte pangadānīmpa, ante
toquēnē wæwēmīnīi,” ante Itota odōmonte
apænegacāimpa.

Cati baī īmīnīpa. Ñāō baī īmīnīpa, ante

(*Māadoco 9.50; Odoca 14.34-35*)

¹³ Godōmenque apæñedinque Itota,
“Mīnītō īñōmō inguipoga quēwēnāni beyæ
cati quīmonte cæī baī inte ongōmīnīpa.
Īnīnque mīnītō cati baī yæpæ ēmonte baī
inōmīni inte wæætē edæ nongæmonte baī
badāmaī iedāni. Cati īñōmō yæpæ ēmōnāmaī
nongæmonte ba adinque edæ æbānō cæte
wæætē yæpæ waa ēmonguīi. Waa impa
cænguīnāni anguēnē. Īñæmpa wido cæte
nāni pīnā gāwate cægonguīnque babāimpa,”
ante odōmonte apænecantapa.

¹⁴ Ayæ, “Ñāō baī ēmōmīni inte mīnītō
īñōmō edæ inguipoga quēwēnāni beyæ tīca
ēnente baī cædinque, Edonque acædānīmpa,

ante cæmīni īmīnīpa. Ānanquidi tæiyænnāni mæñonte quëwënnāni īnīnque edæ ædō cæte wë womonte inguīī. Edæ edonque abaimpa. ¹⁵ Waocā ædō cæte tī wodōnote godō cængænē boo cæcaquingāā anguënē. Edæ, Mōnō quëwëncabo edonque acæīmpa, ante cædinque waocā tī wodōnōdinque wænōmēnæcapaa cō cæcā ate edonque bæcco aquīnāni. ¹⁶ Mīnitō guiquënē, Wadāni mōnō waa cædinō adinque mōnō Mæmpo oōnædē nē quëwengā ñāō bai tōmengā nānō ēmōnō ante waa ate apæncædānīmpa, ante cædinque cōwē ñāō bai pōnēnīnque waa cæte quëwëdāni,” ante Itota odōmonte apæncæcantapa.

Wængonguī nānō wææ angāinō ante

¹⁷ Ayæ īīmaī ante godōmenque odōmonte apæncæcantapa. “Wængonguī, īīmaī cæedāni, ante Mōitee wodi ingante angā ēñēnīnque tōmengā nānō wææ yewæmongainō ante ayæ Wængonguī beyæ nē apænedāni nāni yewæmongainō ante mīnitō, Mānīnō ante Itota wido cæcæte ante pongampa, ante ædō cæte pōnēmīni. Īñæmpa wīī wido cæcæte ante pōnīmo inte botō tōmēnāni nāni angāinō bai īnque cæbo bacæīmpa, ante pōmo īmopa. ¹⁸ Edæ nāwangā āmopa. Inguipoga tōnō oōnæ īnque baganca Wængonguī, īīmaī cæedāni, ante nānō wææ angāinō īñonte adodeque pōnī wë womonte badāmaī ingæīmpa. Edæ guiyā tænoncāi incæ picæ yewæmōnī incæ adodeque cōwē wadæ cædāmaī īñonte tōmengā nānō angāinō bai tōmānō adodō īnque cæte bacæīmpa. ¹⁹ Īnīnque Wængonguī nānō wææ angāinō ante æcānō adodeque pōnī ante ēñēnāmaī cæda īñōmō tōmengā īñōmō edæ oōnædē Awēnē Odeye nempo quëwengā incæte ōnonganque pōnī inguingānō anguënē. Ayæ adobaī Wængonguī nānō wææ angāinō adodeque pōnī ante odōmōnīnque, Mānīne ante ēñēnāmaī cæedāni, ante æcānō odōmonte apænedā tōmengā īñōmō oōnædē Awēnē Odeye nempo quëwengā incæte ōnonganque inguingānō anguënē. Wæætē mānīnō Wængonguī nānō wææ angāinō ante nē ēñente cædinque æcānō adodō ante odōmonte apænedā guiquënē tōmengā wæætē oōnædē Awēnē Odeye nempo quëwëninque ñænængā pōnī inguingānō anguënē. ²⁰ Incæte mīnitō īmīnīte īīmaī āmopa. Īīmaī cæedāni, ante nāni wææ yewæmongainō ate nē odōmōnāni nāni cægancaque nō cæmīni incæte Paditeoidi nāni cægancaque nō cæmīni incæte mīnitō wīī godōmenque nō cæmīni īnīnque mīnitō edæ oōnædē Awēnē Odeye nempo ædō cæte guīite quëwëmaīmīni,” ante Itota odōmonte apæncæcantapa.

Pīnte nāni ānō ante Itota odōmonte apæncæcantapa
(*Odoxa 12.57-59*)

²¹ Mānōmaīnō ante apænedīnque Itota godōmenque odōmonte apæncæcantapa. “Mōitee wodi īñōmō, ‘Wacā ingante godō wænōnāmaī īe. Nē wænongā nānō apænte pante wæquinque impa,’ ante dodāni īnānīte tōmengā nānō wææ angāinō ante mīnitō īñōmō do ēñēnīnque Ao āmīnitawo. ²² Botō īñōmō edæ godōmenque ante nō āmopa. Nāni caipæ īñōnāni æcānō tōmengā tōnīñacā ingante pīīna īñōmō tōmengā nānō apænte pante wæquinque cæcampa. Ayæ tōmengā tōnīñacā ingante æcānō, Ēñēnāmaī īmīpa, āna edæ tōmengā ingante nē Apænte nāni Āncabo weca nānō pangūnque ænte gōnoncædānīmpa. Edæ wacā ingante æcānō, Bitō mīmō ōmædēmi inte wīī ēñēncædō, ante nē āna īñōmō tōmengā tadōmengadænguipo gonga bæcoyōmō nānō wido cæquinque angampa tōō,” ante Itota apænegacāīmpa.

²³ Ayæ, “Mānōmaī beyæ bitō, Wængonguī quī, ante nāni iya tāīmoga godoncæte ante tæcæ cædinque, Ē, botō tōnīñacā ingante edæ wænæ wænæ cæbo pīingampa, ante pōnēmi īnīnque, ²⁴ bitō godongūncōo nāni iya tāīmoga gāānē ñōnōnīnque bitō tōnīñacā weca tāno gote nō apæneyōmi minatō guēa piyænē cæmīna ate bitō īñōmō adodō ponte godōe,” angantapa.

²⁵ Ayæ, “Bitō īmite nē pīinte cæcā īñōmō nē apænte angūnāni weca gōnoncæte ante æte idōmæ goyongā bitō tōmengā ingante waa apænebi ēñēnīnque tōmengā wæætē piyænē cædinque ee abaingampa. Edæ taadō godīnque guēa waa apænedīnque piyænē cædāmaī īmīna īnīnque tōmengā īñōmō nē awēnē apænte angūngā weca æte māocā gobāīmpa. Ayæ awēnē nē apænte angā ingante pædæ godongā ænīnque tōmengā bitō īmite wæætē wææ wānongā ingante angā ēñēnīnque tōmengā wæætē bitō īmite bæi ongote do tee mōnebaingampa. ²⁶ Tee mōnecā īnīnque edæ bitō godonte æinta tōmanta pōnī pædæ godonte tabaīmīpa, ante āmo ēñēmaīmīpa,” ante Itota apænegacāīmpa.

Nāni godō towēmāmo ante Itota odōmonte apæncæcantapa

²⁷ Ayæ apænedīnque, “Mōitee wodi, ‘Bitō nānōogængā īnāmaī īñongante bitō godō mōnāmaī incæbiīmpa,’ ante nānō wææ angāinō ante ēñēnīnque mīnitō Ao āmīnitawo. ²⁸ Botō godōmenque apænedīnque nō āmopa. Onquiyængā ingante wīwa tōinente adīngā īñōmō tōmengā nānōogængā īnāmaī īñongante do godō monte bai mīmō dobæ wentamō entawengampa.”

²⁹ Ayæ, “Bitō tōmēmō īnō incæ adīnque wænæ wænæ tōinente babi īnīnque tōmēmi

adimō incæ o togæmonte bai cædinque wænæ wænæ bitō cædinō ante wido cæbi waa imaimpa. Wæætē bitō wænæ wænæ adimō wido cædāmai ininque bitō baō tōmāo tadōmengadænguipo wido cæte baquinō anguēnē. ³⁰ Adobai bitō ōnompoca tōmēmæ inō incæ wænæ wænæ cædimi inte tōmēmi cædimpo incæ aa wi æmpote bai cædinque bitō wænæ wænæ cædinō ante wido cæbi waa imaimpa. Edæ a wi æmpote wido cædāmai imi ininque bitō baō tōmāo tadōmengadænguipo wido cæte baquinō anguēnē,” ante Itota apænegacāimpa.

Nāni pāmænte wædō ante Itota odōmonte apænegacampa
(Máateo 19.9; Máadoco 10.11-12; Odoca 16.18)

³¹ Godōmenque odōmonte apænedinque Itota, “Ayæ, ‘Ōnquiyængā ingante æcānō pāmæinēna tōmengā iñōmō yewæmōinta ænte yewæmōninque, Bitō imite æmæwo pāmæmopa, ante yewæmonte onquiyængā ingante godongā æncæcāimpa,” ante dodāni nāni angaiñō ante do ēñēninque Ao aminitawo. ³² Botō edæ wadō ante iimāi ante nō amopa. Onquiyængā awēmō todāmai ee quēwēñongante tōmengā nānōogængā godō pāmængā ininque onquiyængā nē towengā nānō baquinque wacā ingante godō mōwengampa. Ayæ onquiyængā pāmænte goyongā wacā onguñængā tōmengā ingante godō mōninque adobai nē towengā bacampa, ante apænebo ēñēmaimnipa,” ante Itota apænegacāimpa.

Cōwē baquinō anguēnē, ante nāni ānewēñō ante

³³ “Ayæ wæætē edæ, ‘Botō Wængongui cōwē quēwengā bai botō ānō cōwē baquinō anguēnē, ante āmi ininque Wængongui ēñengā beyænque bitō āniñō ante cōwē cædinque bitō wadō cædāmai incæbiimpa,’ ante Mōitee wodi dodāni inānite angacāimpa. Minitō iñōmō tōmengā nānō wææ angaiñō ante ēñēninque Ao aminitawo. ³⁴ Botō wadō ante nō āmo ēñēdāni. Edæ māniñō, Botō ānō nōingā baquinō anguēnē, ante ānāmai iedāni. Ayæ māniñō ancæte ante mīnitō Wængongui ēmōwo ante apænedāmai imini incæte mīnitō, Ōōnæ tæi ongō bai impa, ante apænedāmai iedāni. Iñæmpa, Ōōnæ, ante āmīni ininque mīnitō Wængongui ōōnædē waa pōni nānō contayōmō ante apænebaimīni apa ānewēmīni. ³⁵ Ayæ Wængongui ēmōwo ante ānāmai ininque mīnitō, Iñæca cōwē ongō bai botō ānō cōwē baquinō anguēnē, ante adobai apænedāmai iedāni. Iñæmpa, Iñæca, amīni ininque mīnitō Wængongui pī cæwate nānō ongōñōmō ante apænebaimīni apa ānewēmīni. Ayæ, Eedotadēē cōwē ongō bai botō ānō cōwē baquinō anguēnē, ante

apænedāmai iedāni. Iñæmpa Eedotadēē iñōmō mōnō Tæiyæ Awēnē Odeye ongongā apa ānewēmīni. ³⁶ Ayæ adobai, Botō ānō nōingā baquinō anguēnē, ancæte ante bitō, Tōmēmo ocabo tæi ongō bai impa, ante mīni ānewēnō ante ānāmai iē. Iñæmpa bitō ocagui wentamō encabi ininque bitō ædō cæte adoguinque pōni godō cæbi nāāmænta baquii. Ayæ nāāmænta encabi ininque bitō ædō cæte adoguinque pōni godō cæbi wentamō baquii anguēnē. ³⁷ Ininque mīnitō Ao āinēmīni inte ‘Ao’ āninque māninque ædāni. Ayæ edæ Baa āinenta wædinque ‘Baa’ āninque edæ māninque ædāni. Godōmenque āninque mīnitō edæ nē wiwa cædongā angā beyænque āmīnipa tōō,” ante Itota odōmonte apænegacāimpa.

Nāemæ wænæ wænæ nāni cædō ante
(Odoca 6.29-30)

³⁸ Ayæ godōmenque odōmonte apænedinque Itota, “Iimāi ante dodāni nāni angaiñō ante ēñēninque Ao aminitawo. ‘Bitō godō cæbi beyæ wacā awinca tæigæmongā bacā ininque tōmengā nāemæ cæcā beyænque bitō awinca adobai tæigæmōmi bacæbiimpa. Ayæ bitō godō cæbi beyæ wacā бага tā tobæ gogacā ininque tōmengā nāemæ cæcā beyænque bitō бага adobai tā tobæ gogacæbiimpa.’ ³⁹ Botō wæætē wadō ante nō āmo ēñēdāni. Nē wiwa pōnō cæcā ingante nāemæ cædāmai iedāni. Edæ wacā bitō tōmempaga inō pōnō tamongā wædimi inte bitō wæætē æmæmpaga inō dadi ēmæmonte ee ongōmi wæætē tamongæ. ⁴⁰ Ayæ wacā, Bitō imite nē apænte angā weca ænte godinque botō bitō wecoo æncæboimpa, ante cæyongā bitō mānincooque tōmengā ingante pædæ godōninque wacoo bitō yabæ mongæncoo tōnō ee abi ō æncæcāimpa. ⁴¹ Ayæ wacā bitō imite, Bado, māninganca mongænte māobi goboe, angā ēñēninque bitō tōmengā nānō āninganca māobi goyongante ayæ adonganca godōmenque mongænte māobi gocæe. ⁴² Ayæ nē, Pōnōmi æmoe, angā ingante godōmi ængæe. Ayæ wacā, Bitō quınca pōnōmi ænte cæte ate wæætē pōnōmo æe, ante nē angā ingante bitō pæ gompodāmai incæbiimpa,” ante Itota apænegacāimpa.

Nē pīnte ānāni inānite waadete cæedāni, ante
(Odoca 6.27-28, 32-36)

⁴³ Ayæ apænedinque Itota, “Mīnitō dodāni nāni angaiñō ante do ēñēninque edæ Ao aminitawo. Tōmēnāni iñōmō, ‘Bitō guidengā ingante waadete cæe,’ āninque edæ, ‘Nē pīngā ingante nāemæ pīnte cæe,’ ante wææ ānānitapa. ⁴⁴ Botō iñōmō edæ wadō ante nō āmo ēñēdāni. Mīnitō imīnite nē pīnte cædāni inānite mīnitō wæætē

waadete cæedáni. Ayæ munitō iminite nē togænte pānāni beyæ ante Wængongui ingante apæneedāni. ⁴⁵ Mānōmai cædinque munitō mōnō Mæmpo oōnædē nē quēwengā wēñæmīni bacæminīpa. Edæ nē wiwa cædāni beyæ incæ nē waa cædāni beyæ incæ Mæmpo Wængongui angā nænque tamōpa. Ayæ nē nō cædāni beyæ incæ nē nō cædāmai ināni beyæ incæ Wængongui angā cōōnæ cæpa. ⁴⁶ Munitō guiquēnē munitō iminite nē waadedānique inānite waadete pōnēmīni ininque munitō mīni cædinō beyæ ante dicæ paga ænguimīniyaa. Inæmpa odōmāno awēnē beyæ nē æwēnāni incæ munitō waadete pōnenganca adoganca cædinque tōmēnāni inānite nē waadete pōnēnānique inānite waadete pōnēnānipa tōō. Bitō godōmenque cæbitawogaa. ⁴⁷ Ayæ munitō tōniñadānique inānite waadete apænedinque munitō dicæ godōmenque cæminīyaa. Inæmpa wadāni nē, Nāmā cæte quēwenguimo, ante nē ēñēnāmai cædāni incæ mīni cædō bai adoganca cædāni apa quēwēmīni. ⁴⁸ Mōnō Mæmpo oōnædē quēwengā nē nō waa cædongā ingā bai munitō adobai cædinque picæmīni badinque nō waa cæte quēwēedāni,” ante Itota odōmonte apænegacāimpa.

6

Æbānō cæte waa cæquī, ante Itota apæncampa

¹ Itota ayæ godōmenque iimāi ante odōmonte apænegacāimpa. “Munitō edæ, Wængongui nānō ānō ēñente nō cæbote, ante cæmīnitawo. Ininque munitō, Waodāni botō imote waa acædānīpa, ante ānāmai inte wīi waodāni ayōnāni cædinque waa cædāni. Edæ, Waodāni botō imote waa acædānīpa, ante pōnēninque cæmīni ininque mōnō Mæmpo oōnædē nē quēwengā iñōmō munitō cædi beyæ wæætē pōnōnāmai imaingampa,” angantapa.

² Ayæ, “Wadāni nē wadō ante wadō cædāni guiquēnē, Ōmaadāni inte nē wædāni quī, ante pædæ godoncæte ante cædinque, Botō æbānō waa pōni cæboo, ante tōmānāni ponte waa acædānīpa, ante pōnente todompeta nāni ancadeca we we oōnānipa. Tōmēnāni munitō odōmōincōnē go guīte ongōninque ayæ taadō gote cægōninque, Botō waa pōni cæbo aedāni, ante yedæ ānāni ēñente godongāmæ pōnāni ate tōmēnāni tōmānāni ayōnāni godōnānipa. Bitō iñōmō tōmēnāni nāni, Pōnō waa acædānīpa, wædō bai wædāmai inte edæ pæ wēēnete godōe. Tōmēnāni waodānique godō waa adāni ænīnque mānīnque ænānīpa. Wængongui guiquēnē waa adāmai incæcāimpa. Nāwangā āmopa. ³ Bitō iñōmō, Ōmaadāni inte nē wædāni quī, ante godoncæte ante cædinque

bitō guidengā eyequei pōni ongongā incæ adāmai incæcāimpa, ante wææ cæe. ⁴ Mānōmai wææ cædinque awēmō godōmi æncædānīpa. Mānōmai cæbi adinque bitō Mæmpo nē wēmō iñōmō nē acā inongā inte awēmō bitō godōni ante wæætē eyepæ pōnongā æncæbiimpā,” ante Itota angacāimpa.

Wængongui ingante æbānō apænequī, ante Itota apæneca

(Odoca 11.2-4)

⁵ Ayæ godōmenque apænedinque, Itota, “Wadāni Wængongui ingante apænedinque nāmanque ante nāni cæbai munitō iñōmō wīi adobainō ante Wængongui ingante apæneedāni. Mānīnāni guiquēnē, Botō apænebo adinque waodāni pōnō waa acædānīpa, ante pōnēwēninque munitō odōmōincōnē go guidinque næ gongæninque Wængongui ingante apænedānīpa. Ayæ tōmēnāni nāni quēwēñōmō ñænquedæmpo iñōmō gote næ gongæninque Wængongui ingante apænedānīpa. Nāwangā āmopa. Tōmēnāni waodānique godō waa adāni ænīnque mānīnque ænānīpa. Wængongui guiquēnē waa adāmai incæcāimpa. ⁶ Bitō iñōmō tōmēmi oncōnē guīte odemō tee mōnedinque mōnō Mæmpo nē awēmō quēwengā ingante apænee. Mānōmai cæbi adinque bitō Mæmpo wēmō iñōmō nē acā inongā inte awēmō bitō cædinō ante wæætē eyepæ pōnongā æncæbiimpā,” ante Itota odōmonte apænecantapa.

⁷ Ayæ, “Nāmā cæte quēwenguimo, ante nē ānāni ōnonque nāni tedewēnō bai tededāmai inte munitō nō cædinque Wængongui ingante apæneedāni. Tōmēnāni iñōmō, Wantæpiyæ tedebo beyænque Wængongui ēñencæcāimpa, ante babæ ante pōnēninque ōnōneque tedewēnānīpa cæmīnī. ⁸ Munitō iñōmō edæ tōmēnāni ōnōneque tedete nāni cædō bai edæ cædāmai iedāni. Inæmpa mōnō Mæmpo ingante apænedāmai iñōmonte tōmengā mōnō anguīnō ante wēēñēdē do ēñengā apa tedewēmīni. ⁹ Ininque edæ iimāi ante Wængongui ingante apæneedāni. ‘Mōnitō Mæmpo nē oōnædē quēwēnōmi inte ēñēmi.

Bitō emōwo Tæiyæ Waēmō emōmi adinque mōnitō bitō emōwo ante waa adinque apænemōnīpa.

¹⁰ Bitō oōnædē Awēnē nē ingaimi inte inguipoga Awēnē Odeyebi edæ bitō baquinque quingæ pōe.

Oōnædē owodāni ēñente cædāni bai inguipoga adobai bitō ānō ante edæ ēñente cæte bacæimpā.

¹¹ Mōnitō imōnite bitō, Cænguī, ante iimō iñō iimō iñō bitō pōnōni ñwoōnæ incæ eyepæ pōnōmi ænte cæmōnie.

¹² Mōnitō īmōnite nē waa cæquēnēnāni inte pōnō wēnæ wēnæ cædāni adinque mōnitō godō fīmpo cæmōni quēwēnāni bai bitō nē panguēnēmi incæ adobai cædinque

mōnitō nē waa cæquēnēmōni inte wēnæ wēnæ cæmōni adinque pōnō fīmpo cæbi quēwēmōnie.

¹³ Ayæ mōnitō wēnæ wēnæ cæinente wædō ante bitō pōnō wææ cæbi ate mōnitō taadō oda cædāmai inte wēnæ wēnæ cædāmai incæmōnīmpa.

Edæ nē wīwa cædongā nempo ongonte wæyōmōnite bitō gā nepyæmpote æmi quēwæcæmōnie, æmōnīpa.

Tōmēmīque edæ Awēnē Odeye tæi pīnæmi īfōmi mōnitō bitō nempo ongōmōnīpa. Nāmā nāō bai entawēmi inte bitō cōwē tæi ēmōmi īnōmi īmpa.

Amēē, ante, Nāwangā impa, ante apænemōnīpa.

Mānōmāinō ante Wængonguī ingante apænēdāni,” ante Itota odomonte apænēgacāīmpa.

¹⁴ Ayæ godōmenque odōmonte apænēdinque Itota īmāinō ante apænēgacāīmpa. “Mīnitō īmīnite wēnæ wēnæ cæyōnānite mīnitō godō fīmpo cæmīni īnīnque mōnō Mæmpo nē ōōnædē quēwēngā adobai mīnitō wēnæ wēnæ cædinō ante pōnō fīmpo cæcā quēwēmaīnīpa. ¹⁵ Wæætē mīnitō waodāni nāni wēnæ wēnæ cædinō ante fīmpo cædāmai īmīni adinque edæ mōnō Mæmpo adobai mīnitō wēnæ wēnæ cædinō ante fīmpo cædāmai inte pōnō pīncæcāīmpa,” ante Itota apænēgacāīmpa.

Wængonguī beyæ ante cæbānō cænāmai ī, ante

¹⁶ Ayæ odōmonte apænecantapa. “Wadō ante nē wadō cædāni guiquēnē īmai ante mā pōnēnīnque cædānīpa. Wængonguī beyæ ante ee ate cænāmai inte botō wæwente bai ēmōmo adinque wadāni botō imote waa acædānīmpa, ante awīnca nāmōnānīpa. Mīnitō īfōmō Wængonguī beyæ ante cædinque ee ate cænāmai īmīni īnīnque tōmēnāni nāni cæbai cædāmai īedāni. Wæætē nāmōnāmai inte Wængonguī beyænque ante cænāmai īedāni. Nāwangā mīnitō īmīnite æmōpa. Tōmēnāni waodānīque godō waa adāni ænīnque mānīnque ænānīpa. Wængonguī guiquēnē waa adāmai incæcāīmpa. ¹⁷ Bitō guiquēnē Wængonguī beyænque ante ee ate cænāmai inte cæbi īnīnque awīnca nā mēmōnte ayæ ocabo ōni pæcate cæe. ¹⁸ Bitō ee ate cænāmai īni īnīnque, Waodāni edonque acædānīmpa, ante ānāmai inte wæætē, Mæmpoque acæcāīmpa, ante mānōmai cæe. Bitō mānōmai cæbi adinque mōnō Mæmpo nē wēmō īfōmō quēwēngā īnongā inte wēmō īfōmō edonque

adinque awēmō bitō cædinō ante wæætē eyepæ pōnongā æncæbiīmpa,” ante Itota apænēgacāīmpa.

Ōōnædē mīni waa pōni manguincoo ante (Odoca 12.33-34)

¹⁹ Godōmenque odōmonte apænēdinque Itota, “Tōmēmo māincoo, ante mancæte ante wædinque mīnitō inguipogaque cayæ cænte to tamonte īfōmō cabo tē gæte da wēnāmai īedāni. Edæ nē ō ænāni bæ tate nāni ō ænguīnque inguipogaque da wēmīni apa quēwēmīni. ²⁰ Ōōnædē ongoncoo guiquēnē to tamōnāmai impa. Cayæ guīdāmai ī īnīnque māincoo wodāmai ongōmpa. Ayæ nē ō ænguīnāni adobai mānīfōmō bæ tate guīdāmai īnāni īnīnque māincoo cōwē wē wodōnāmai ee ongōmpa. Īnīnque, Waadete mīni cædincoo cabo tē gæte bai cædinque mīnitō ōōnædē waa pōni incoo mīni ænte manguīnque fīwō īfōmō waodāni īnānite waadedīnque ee cædāni. ²¹ Edæ waa pōni mīnitō māincoo ongōfōmō mīnitō mānīfōmō adoyōmō quēwæcæte ante wæmīni īmīnīpa, ante adinque botō mānōmāinō ante apænēnetabopa,” ante Itota odōmonte apænēcāntapa.

Awīnca wāinca mōnō ēmōnō ante (Odoca 11.34-36)

²² Ayæ odōmonte apænēdinque, “Baonga quēwēnīnque mōnō edonque adinque cæcæīmpa, ante mōnō awīnca ēmōmōmpa. Īnīnque awīnca wāinca ēmonte edonque ate bai bitō mīmōno adobai nāō entawēnīnque, Nō cæbote, ante pōnēmi īnīnque bitō baonga nō cæte quēwēmaīmīpa. ²³ Wæætē edæ awīnca wīī wāinca ēmōnīnque adāmai inte bai wentamō entawēmi īnīnque bitō, Wīwa cæbote, ante mīmōno pōnēfōmīte bitō baonga wīwa cæbāimīpa. Edæ mīmō nāō entawēfōmī wentamō ba īnīnque bitō quēwēnguīmāmo mæ māmonte bai baquīnō anguēnē,” ante Itota apænēcāntapa.

Wængonguī beyæ cædinque māincoo beyæ cæquī (Odoca 16.13)

²⁴ Ante apænēdinque Itota ayæ odōmonte apænēcāntapa. “Mēnaa awēnēna bayōnate waocā īfōmō mēnaa awēnēna nāna ānō ante ædō cæte ēfēnte cæquīngāā. Īnāmpa adocanque ingante pīīnīnque tōmēngā wacā ingante waadebaīngāmpa. Wæætē īngā mīnā tee empo godīnque tōmēngā mānīngā ingante edæ wīwa adinque ēmō cæte gobāīngāmpa. Mīnitō adobai Wængonguī beyæ ante nē cæmīni inte ædō cæte māincoo beyæ ante cæte quēwēnguīmīni,” ante Itota angacāīmpa.

Mæmpo Wængonguī mōnō īmonte aa-campa, ante
(*Odoca 12.22-31*)

²⁵ Ānīnque, Itota ayæ godongāmæ odōmonte apænedinque, “Mānōmaī beyæ botō mīnitō īmīnite īmaī āmopa, angantapa. Mīnitō inguipogaque mīni quēwenguīmāmo ante wædāmaī iedāni. Cænguī bequī ante ayæ weocoo ante wædāmaī iedāni. Cænguī cænte beyænque mōnō dicæ quēwēmongaa. Weocooque mōnō mongæñō beyænque dicæ quēwēmongaa. Mōnō quēwēmāmo īñōmō godōmenque impa. ²⁶ Ayamōidi awæñæca nē cæwodāni īnānite amīnitawo. Tōmēnāni dicæ tōmēmō mīnte pæ æte tā pete daga wente mānāniyaa. Incæte mōnō Mæmpo oōnædē quēwēnongā inte wæætē tōmēnāni īnānite eyepæ godongā cænāni aedāni. Mīnitō guiquēnē ayamōidi īnāmaī īñōmīnite Wængonguī mīnitō īmīnite godōmenque waa adinque eyepæ pōnongā cænte apa wæwēmīni. ²⁷ Edæ Wængonguī nānō anganca quēwenguēnēmīni inte mīnitō, Wantæ īño incæ godōmenque quēwēmote, ante wæwēmīni incæte edæ ædō cæte nāmā cædinque godōmenque wantæpiyæ quēwenguīmīni.”

²⁸ Ānīnque Itota godōmenque odōmonte apænecantapa. “Īnīnque mīnitō, Weocoo quīncōodō wēñaquīl, ante pōnente quīnante wæwēmīni. Īñæmpa ongaicoo ōmædē pæ īñōmō weocoo ante daque daque dadāmaī inte wodonte tīnāmaī tōmenque pæ aedāni. ²⁹ Incæte Awēnē Tadōmōō wodi waēmconcoo pōni ēñagaingā incæ wīl ongai bai ēñagacāmpa. Ongai īñōmō godōmenque waēmō pōni ēnodānīpa. ³⁰ Gaguīmæ īñōmō īlīmō ate edæ gongapamō guitodonte tanguinque pæ incæte ñōwoōnæ Wængonguī pōnongā waēmō wēñate ēnopa. Īnīnque, Waēmō ēnodō nē pōnongā inte Wængonguī mōnō īmonte godōmenque eyepæ pōni pōnongā ænte wēñacæimpā, ante pōnēmīniyaa. ³¹ Īnīnque mīnitō, ‘Quīmōnō impa cænguīmōō,’ ante, ‘Quīmæñō impa bequīmōō,’ ante ayæ, ‘Quīncōodō impa wēñaquīmōō,’ ante pōnēnīnque guīñente wæwēnāmaī iedāni. ³² Mānīnō ante wadāni nē ēñēnāmaī īnāni nāni cabo nāni cabo wædāni incæte mīnitō guiquēnē, Mōnō æñīnente wædō ante mōnō Mæmpo īñōmō edæ do ēñengampa, ante pōnēnīnque edæ guīñente wædāmaī incæmīnīpa. ³³ Wæætē edæ, Wængonguī Awēnē Odeye nempo quēwencæboimpā, ante nanguī cædinque mīnitō, Tōmēngā nō cæte nānō waa quēwēnō bai adobai nō cæte waa quēwencæboimpā, ante adobai nanguī cæedāni. Mānōmaī quēwencæte ante tāno wæmīni adinque Mæmpo Wængonguī mānīnō ante do edæ eyepæ pōni pōnongā æñōmīni mānīncooque

mīni wædō ante adobai eyepæ pōnongā æncæmīnīpa. ³⁴ Mānōmaī ī īnīnque, īlīmō ate æbānō cæquīl, ante guīñente wædāmaī iedāni. Edæ īlīmō ate mānīnō ante pōnēnīnque eyepæ pōnente inguimpā. Īnīnque mīnitō, Ñōwoōnæque æbānō cæquīl, ante guīñente pōnēnīnque māninganca pōnente quēwēedāni,” ante Itota odōmonte apænegacāimpā.

7

Wadāni īnānite apænte ānāmaī iedāni, ante
(*Odoca 6.37-38, 41-42*)

¹ Mānōmaīnō ante odōmonte apænedinque Itota godōmenque apænegacāimpā. “Mīnitō wacā ingante, Wēnæ wēnæ īmīpa, ante apænte ānāmaī iedāni. Edæ mīni apænte wæquinque mīnitō wadāni īnānite apænte āmīnīpa. ² Mīnitō wadāni īnānite tee mante godōmīni nāni ænganca wæætē adoganca pōñōnāni æncæmīnīpa. Ayæ mīni apænte anganca adoganca apænte ānāni wæcæmīnīpa. ³ Bitō tōniñacā wædænque wēnæ wēnæ cæcā īñongante bitō guiquēnē nanguī bitō wēnæ wēnæ cædinō ante pōnēnāmaī inte quīnante tōmēngā ingante pīnte ānewēmī. Tōmēngā edæ awīnca guiyā mæ owo ēmongā bai entawente wæyongante bitō wæætē awæmpa wææ ēmongā bai wææ entawēmi inte ædō cæte ate bai tōmēngā ingante apænte āmī. ⁴ Edæ tōmēmī awīnca awæmpa wææ ēmonte bai bitō wēnæ wēnæ adīmō ēmōmi inte bitō tōniñacā ingante, ‘Biwī, bitō awīnca guiyangā mæ owo bai ate æ wīmōmoe,’ ante edæ abīpa diyæ æ wīmonguīmī. ⁵ Īñæmpa wadō tedete wadō cædōmi inte bitō edæ tōmēmī awīnca awæ wææ ongompa tāno wido cæte ate edonque adinque bitō tōniñacā awīnca guiyā mæ owodō æmoncæbiimpā.”

⁶ Ānīnque Itota godōmenque apænedinque, “Gūntaidi īnānite, Tōmēnāni cænguī, ante tæiyæ waēmō cænguī godōnānitawoo. Edæ godōnāmaī īnāni bai mīnitō adobai Wængonguī nānō tæiyæ waēmō apænedō ante nē Baa ānāni īnānite apænedāmaī iedāni. Ayæ odæ wængānāidi weca wadāni wamoncoo waa pōni ēmoncoo wææntodōnāmaī īnāni bai mīnitō adobai Wængonguī beyæ waa pōni nāni apænegainō ante nē ēñente cædāmaī īnāni īnānite apænedāmaī iedāni. Edæ odæ wængānā pīnā gāwa baō wānā ñænte bai cædinque tōmēnāni ēñēnāmaī inte cædinque dadi ēmænte tōmēmīni baō wangō pocænte bai pīlīmānīnīpa, ante mīnitō apænedāmaī ñīne cæedāni,” ante Itota apænegacāimpā.

Pōnōmi æmoe, ante mōnō angēimpā, ante
(*Odoca 11.9-13; 6.31*)

7 Ayæ apænedinque Itota, “Pönömi æmoe, ante në angä bai cædinque minitö müni ænguino ante Wængongui ingante apæneedäni. Æyömönö ii, ante në diqui diqui mingä bai cædinque minitö, Æbänö ii, ante ædæmö eñencæte ante Wængongui ingante wede pönente apæneedäni. Odemö mönitö beyæ wi ænecæimpa, ante aa pecä bai cædinque minitö, Æbänö cæquimoo, ante eñencæte ante Wængongui ingante nangui apæneedäni. 8 Edæ, Pönömi æmoe, ante në änäni iñömö edæ do ænänipa. Në diqui diqui minäni adobai do adänipa. Ayæ odemö ponte në aa pedäni tömönäni näni guiquinque edæ do wi ænete bai bacæimpa.”

9 Ayæ, “Bitö waobi inömi inte eñëmi. Bitö wëñängä cænguü ante päö angä eñëninque bitö dicæ dicaque pædæ godömiyaa. 10 Gæyæ angä iñinque bitö tæntæ incæ dicæ pædæ godömiyaa. 11 Müni waocabo në wiwa cædömini incæ, Quinö waa i, ante eñëninque minitö wëñænäni inänite waëmoncooque godömini ænänipa. Iñinque mönö Mæmpo öönædë në quëwängä iñömö në änäni inänite waëmoncooque ante godömenque pönongampa,” ante Itota odömonte apænecantapa.

12 Ayæ, “Minitö, Waodäni botö imote waa cædäni æninque waa tobaimopa, ante wæmñitawo. Iñinque müni ante wædö bai ante minitö tömönäni inänite adobai waa cædäni. Mäninonque ante wææ ancæte ante dodäni, iñimai cædäni, ante wææ angadänimpa. Ayæ Wængongui beyæ në apænedäni adodö ante ancæte ante yewæmongadänimpa. Iñinque botö änö bai cædinque minitö tömönäni näni angainö bai do edæ cæbaiminipa,” ante Itota odömoncæte ante apænecantapa.

*Odemö guiyänemö ante
(Odoca 13.24)*

13 Itota godömenque odömoncæte ante iñimai apænecantapa. “Minitö guiyänemö guidiinque quëwenguino taadonque pöedäni. Wænguino godö guiquinemö guiquenë yabæ inö nænænemö ongö adinque tæiyænäni önonque pö guitte edæ tömönäni näni wænguinque nænænnonque godänipa. 14 Wæætë wædænque inäni guiquenë diqui minte guiyänemö adinque quëwenguino guiyänö guitte pönänipa,” ante Itota apænecantapa.

*Awæ æbänö iwæ, ante tömenca bete
eñengæimpa, ante*

(Odoca 6.43-44)

15 Itota ayæ godömenque odömonte apænecantapa. “Pancadäniya, Wængongui beyæ në apænemöni imönipa, ante në babæ apænedäni iñönänite minitö gomö ate

tömönäni inänite eñëñämaï iedäni. Tömönäni iñömö edæ mëñeidi bai inäni incæ obega æmontai bai wëñate bai babæ cædänipa. Obega ee quëwänäni bai ee cæmöni imönipa, ante edæ babæ ante pönäni tamëñedäni. 16 Edæ tömenca adinque minitö, Awæ æbänö iwæ, ante tä pete bete do eñëmüni bai, iñänäni ædänidö inänii, ante eñencæte ante tömönäni näni cædinö adinque edæ do eñencæmünimpa.”

“Yowemö æncæte ante waodäni dicæ daa mongæwäa tä pete ænäniyaa. Iigowæñeca æncæte ante waodäni dicæ wæntowäa edæ tä pete ænäniyaa. 17 Waiwæ tömawæ wainca incapa. Baawæ wæætë baaca incapa. 18 Waincawæ incæ ædö cæte baaca incaquü. Wæætë wiwa iwæ incæ ædö cæte wainca incaquü. 19 Awæ quiwæmenque wainca incadämaï i iñinque mäniwæ tömëwæ mä yete gongapamö guitodönäni gonguinque ñongæmpa. Tömönäni adobai näni gonte wæquinque babæ cædänipa. 20 Iñinque, Awæ æbänö iwæ, ante tömenca adinque do eñëñäni bai waocä nänö cædö ante adinque, Tömengä æbänö ingäa, ante edæ do eñencæmünimpa,” ante Itota apænegacäimpa.

*Wü tömönäni öönædë guiquinäni, ante
(Odoca 13.25-27)*

21 Ayæ godömenque odömonte apænedinque Itota iñimai apænecantapa. “Botö imote, ‘Awënë, bitö botö Awënë imipa,’ ante në tededäni näni tededö beyænque ædö cæte öönædë Awënë Odeye ömæ guiquinänii. Wæætë mönö Mæmpo öönædë quëwängä nänö änö bai në cædingä iñömö tömenganque guicæcäimpa. 22 Iñinque bayonte pancadäniya botö imote, ‘Awënë, Awënë,’ äninque, ‘Bitö beyæ apænegamöni ae, ancædänimpa. Ayæ, Bitö emöwo apænedinque wænæ inte wido cægamöni ae. Bitö emöwo apænedinque mönitö, Ate pönencædänimpa, ante bamönengæ cædinque nangui waa cægamöni ae,’ ancædänimpa. 23 Eñëninque botö wæætë, ‘Iñæmpa botö minitö imñite cöwë adämaï inte tæcæ abopa. Në eñëñämaï cædimüni inte botö weca ongönämaï gobæwedäni,’ ancæboimpa,” ante Itota apænegacäimpa.

*Në mænöna inate ante
(Mäadoco 1.22; Odoca 6.47-49)*

24 Ayæ wæætë odömöninque Itota iñimai apænecantapa. “Iñinque edæ botö apænebo eñëninque në eñente cædäni iñömö tömönäni waocä në eñengä inte nänö nö eñente cæi bai cædänipa. Në eñengä iñömö tæëmonca mænongampa. 25 Tæëmonca mænongä ate cöönæ nangui cæ ate æpæ eyede äninque pö tapæmpa. Ayæ woboyæ nangui pæmænte pö incæte oncö tæëmonca

mænonte ongö inique ædö cæte cabænte bobænte guiqui. Nê ëñente cædäni iñömö mäniñömö mænungä bai inte todänipa. ²⁶ Wæætê botö apænebo ëñëninque nê ëñënamai cædäni guiquenê tömënäni iñömö waocä ocai ömæcacä nänö ëñënamai cæi bai cædänipa. Nê ömæcacä iñömö ëmönaiya aquii iñömö mænungampa. ²⁷ Aquii iñömö mænungä ate cöönæ nangui cæ ate æpæ eyede ante tapæmpa. Ayæ woboyæ nangui pæmænte pö adinque mänincö öñonte ætæwo goquinque edæ do acapowate bogocæ tæ go wææmpa. Nê ëñënamai cædäni iñömö mäniñömö mænungä bai inte wædänipa,” ante Itota odömonte apænegacäimpa.

²⁸ Mäninganca ante iinque apænecä ëñëninque tömänäni, Quinö bai angää, ante guifente wædinque, ²⁹ Wii mönö imonte nê odömönäni nani odömönö bai tömengä iñömö nê angä inte bai edæ godömenque nöngä ante odömongä ëñëmompä, ante tedegadänimpa.

8

Nê baadingä ingante Itota wadæ caa-campa

(Mäadoco 1.40-45; Odoca 5.12-16)

¹ Mänii änanquidi ongöninque iinque apænete wæængä adinque tæiyænäni tömengä miñæ wæængadänimpa. ² Tömengä miñæ tee empote wææ goyönäni wacä baate ëñawengä inongä inte eyepæ pö bee téninque Itota önöwa gäänê ædæ wææninque apænecantapa.

—Awënë, Bitö Ao ämi inte wadæ caabi iinque botö waitai baabaimopa.

³ Äñongante Itota pædæ wææmpo gampo caadinque,

—Ao ämopa. Bitö waitai baacæbiimpa.

Angä iinque ñömæintai nänö ëñadintai dæ baadinge tömengä waitai edæ do baacantapa. ⁴ Itota edæ tömengä ingante,

—Botö æbänö cæbo, ante wadäni inänite mäo apænedämai imæwe. Wæætê, Näwangä impa, ante acædänimpa, ante cædinque bitö, Wængongui qui, ante nê godongä weca töngä godinque waitai bitö baadintai odömömi acæcäimpa. Ayæ Môtee wodi wææ ante nänö angaincoo bai ænte pöninque bitö waitai bitö baadi beyæ ante edæ, Wængongui qui, äninque nê godongä ingante pædæ godömi æncæcäimpa, ante Itota angacäimpa.

Capitäo ingante nê cæcä ingante Itota cæcä waa bacampa

(Odoca 7.1-10)

⁵ Mänii pöninque Capënaömö pö guiyongä odömäno tontadoidi awënë capitäo incæ, Itota pönö cæcæcäimpa, ante apænecæte ante pongantapa. ⁶ Pöninque tömengä,

—Awënë, botimote nê cæcä iñömö cömängä badinque nangui pönö nantate oncönê öñongampa cæbii.

⁷ Ante äñongante Itota,

—Gote cæbo waa bacä ae.

⁸ Angä ëñëninque,

—Awënë ëñëmi. Botö waëmö imopa diyæ bitö botö oncönê pö guiquimii. Edæ bitö adoyömö ongöninque ämi iinque botö imote nê cæcä waa bacæcäimpa. ⁹ Bitö iñömö Awënë Wængongui ingante nê ëñente cædömi imi bai botö adobai wacä awënë ingante nê ëñente cæbo imopa. Iinque botö awënë ëabo inte botö awënë beyænque ämo ëñëninque tontadoidi wæætê guifente wædinque botö äno ante ëñente cædänipa. Iinque adocanque ingante botö, Goe, ämo ëñëninque edæ do gocampa. Wacä ingante, Pöe, ämo ëñente pongampa. Ayæ botö imote nê cæcä ingante, Cæe, ämo ëñëninque edæ do cæcampa.

¹⁰ Ante tontado capitäo nangui ëñengä inte apænecä ëñente wædinque Itota wæætê tömengä miñæ tee empo pönäni inänite apænedinque,

—Minitö iminite näwangä ämopa. Mönö idægocabo iñömönte mäningä wede pönengä ingä bai adocanque incæ edæ dæ angä awædö, angantapa. ¹¹ Incæte iimainö ante apænebo ëñëdäni. Mönö wæmæidi Abadäo wodi Itæca wodi Acacabo wodi öönædê Awënë Odeye ææmæ ponte waa beyönäni edæ nænque tamönö gämænö quëwënäni tönö nænque guidö gämænö quëwënäni iñömö idægoidi inämai inäni incæ tæiyænäni adoyömö pöninque mönö wæmæidi tönö godongämæ becædänimpa. ¹² Wæætê Wængongui Awënë Odeye ömæ nê guiquenänäni guiquenê tömënäni wëmö iñömö, nani guingo imonte Yæ yæ wæyömö mäniñömö guitodonte wæquänidö angüenê.

¹³ Äninque Itota wæætê tontado capitäo ingante,

—Nöwo wadæ goe. Bitö pönönö bai do bacæimpa.

Ante äñongä adoyedê Itota nänö äniñedê incæ awënë ingä nê cæcä do waa bagacäimpa.

Pegodo nänöogængä badä ingante Itota cæcä waa bacä

(Mäadoco 1.29-31; Odoca 4.38-39)

¹⁴ Ayæ Itota mäniñömö pöninque Pegodo oncönê pö guite ayongä Pegodo nänöogængä wäänä daicawo gawænte möimoga öñongä acantapa. ¹⁵ Adinque tömengä önompo pædæ wææmpote bæi ongongä ate onquiyängä wæætê gancæ badinque ængæ gantidinque Itota beyæ pönö cæcantapa.

pönánitapa. Næænte pönáni adinque, Né næænte pönináni tönö në cömängä wede pönente pönánipa, ante adinque Itota iñömö në cömängä ingante,

—Botó wëmi ëñëmi. Wënæ wënæ bitó cædimämo ante ñowo ñimpo cætimpa.

³ Ante apænecä ëñëninque edæ në wææ odömönáni guiquënë pancadäniya nämäneque pönente tededinque, “Íngä iñömö Wængonguí ingampa diyæ mänömai cæqingäá. Edæ babæ ancædö.” ⁴ Ante pönëñönáni Itota tömënáni náni pönëwëno ante öñowëninque do ëñëninque edæ,

—Minitó mímöno quimæ wiwa ante pönëwëminii. ⁵ “Në cömängä nänö wënæ wënæ cædimämo ante do ñimpo cætimpa,” ante botó Wængonguí bai ämo ëñëninque minitó guiquënë, Wængonguí ingampa diyæ mänömai cæqingäá, ante pönëminipa. Ayæ wæætë, “Ængæ gantidinque dao dao gocæcäimpa,” ante botó Wængonguí bai cæbo adinque minitó edæ, Wængonguí ingampa diyæ mänömai cæqingäá, ante adobai pönëminii imäminipa, ante awædö. Íñæmpa mänömainö ante pönëminii ñinque minitó edæ æbänö cæquënëmo imo äminii.

⁶ Incæte waodäni náni wënæ wënæ cædimämo ante botó Waobo ëñagaímo inte inguipoga quëwëninque në ämo inte ñimpo cæbo quëwënanipa, ante minitó edæ ëñencæminimpa, ante botó íimái cæbopa.

Áninque edæ në cömängä ingante edæ,

—Ængæ gantidinque bitó möimpata topo cædinque ænte tömëmi oncönë næænte goe.

⁷ Angä ëñëninque cömängä íngä incæ edæ ængæ gantidinque tömängä oncönë wadæ gocantapa. ⁸ Dao dao gocä ate wædinque godongämæ ongönáni iñömö, Æbänö cæcäi, ante ëñënámai inte guíñente wædinque, Wængonguí pönö cæcä beyænque waocä ñowo në angä badinque mänömai cæcä amönipa, ante pönëninque, Wængonguí bitó ñäö bai ëmömi inte tæí piñænte cæbi amönipa, ante watapæ apænegadänimpa.

Máateo ingante Itota angä tee empote gompampa

(Máadoco 2.13-17; Odoca 5.27-32)

⁹ Itota edæ mäninö godömenque gocæ cæte ayongä adocanque Máateo iñömö, Odömáno awënë quí bacæimpa, ante godonte æinta náni æincönë ongonte cæcä adinque Itota guimö adinque Máateo ingante angantapa.

—Botó miñæ pöe, angä.

Ëñëninque Máateo edæ do ængæ gantidinque Itota miñæ tee empote wadæ gocantapa.

¹⁰ Ayæ ate Itota tömängä miñæ në godáni tönö Máateo oncönë go guite cængöñönáni odömáno awënë beyæ në æwënanii tönö në ëñënámai cædäni tönö nanguí ñinái ponte

godongämæ cænánitapa. ¹¹ Adinque Padi-teoidi guiquënë tömängä miñæ në godáni ñänite áninque,

—Minitó Awënë në Odömängä iñömö odömáno awënë beyæ në æwënanii tönö në ëñënámai cædäni tönö quimæ godongämæ cæwengäá.

¹² Ánani ëñëninque Itota,

—Në waa íngä guiquënë, Cæbi waa baboe, ánámai ingampa. Në wënæ wënæ inte wæcä guiquënë dotodo ingante, Cæbi waa baboe, ante do aa pecampa. ¹³ Pancadäniya, Nämä incæ nö entawëmo ímpa, ante në ánani ñänite adinque botó në dotodo bai adobai ínomö inte tömënáni ñänite aa pedämai incæboimpa. Wadäni guiquënë, Nämä wënæ wënæ cæbo ímpa, ante në ánani guiquënë, Wængonguí gämænö poncædänimpa, ante botó tömënáni ñänite aa pecä quëwënanii. “Baö, Wængonguí quí baquimpa, ante në iya tánani ñänite wíi ainëwædö, wæætë godó waadete waa cædäni ñänite ainëmo ímpa,” ante Wængonguí angä apa quëwënanii. Nöwo edæ godinque Wængonguí nänö äno æbänö ante angä ëñente pömæwedäni, ante Itota apænegacäimpa.

Ee ate cænámái ingæimpa, ante në ánani (Máadoco 2.18-22; Odoca 5.33-39)

¹⁴ Mäniñedë Wäö miñæ në godáni pöninque Itota ingante áninque,

—Padi-teoidi tönö Wäö miñæ möni gocabo tönö mönitonque Wængonguí beyæ ante ee ate wíi cæmönipa. Bitó miñæ në godáni guiquënë quínante Wængonguí beyæ ante cædämai inte edæ do cænánii.

¹⁵ Ánani ëñëninque Itota wæætë,

—Onguínængä në munguingä nänö wente ænte në pönáni bai íñönáni inte botó miñæ në godáni iñömö ædö cæte wæwente bai cænámái inguínánii. Wæætë ayæ ate guiquënë, Munguingä, náni në ánogä bai iñömote wadäni ponte botó ímote ö ænte gocædänimpa. Mänömai cædäni ate botó miñæ në godáni iñömö mäniñedë ate wæætë cænámái inte wæcædänimpa, ante apænëdinque Itota godömenque íimái ante apænegacäimpa.

¹⁶ “Waocä dicæ müncoo æninque pedæncocga pönö tadömunguingä. Mänömai cæcä ñinque edæ müncoo incæ dobæ gáni tamonte guipite ate godömenque wänä tente baquënë. Minitó, Awente bai cænámái inte waa quëwengæimpa, ante müní ánewëno guiquënë pedæncoc bai inte ëwenguincoo bai ënepa. Codito nempo watapæ quëwengæimpa, ante botó apænëdö guiquënë müncoo bai inte quëwenguine ënepa. Ñinque ëwenguine tönö quëwenguine edæ ædö cæte adoyömö ëñente cæquí. ¹⁷ Ayæ adobai yowepæ biñömæ náni ämæ mümæ æninque waodäni

ædö cæte picæ æmontaicadedë godö pe ñiñænguñanii. Edæ picæ æmontaicadedë pe ñiñæñani inique yedæ æninque ætæwo goquino anguenë. Wæætë edæ æmontai müncadedë pe ñiñænte ate yedæ æninque tæi æbænãmai ee ongõñö edæ mülmæ tönö æmontaicaade adobai ee ongongæimpa, apa quëwëminii,” ante Itota apænegacäimpa.

Gaido wëñængä beyæ cæcæ goyongante

onquiyængä Itota weocoo gampocampa (Mäadoco 5.21-43; Odoco 8.40-56)

¹⁸ Tömëñani inãnite tæcæ apæneyongä wacä tömëñani odömöincö awënë inongä inte Itota weca ponte ædæ wææninque apænegantapa.

—Botö wëñængä baquécä iñömö edæ dobæ wæncæ cæcampa cæbii. Bitö ponte tömengä ingante gampobi ate quëwencæcäimpa.

¹⁹ Angä ëñëninque Itota iñömö ængæ gantindingue tömengä tönö goyöna tömengä müñæ në godäni godongämæ godänitapa.

²⁰ Idömæ goyönani edæ wacä onquiyængä wantæpiyæ dote wadepo cöwë wepæ wantæ bidãmai wææ wæwëningä iñömö ñowo Itota önöñabæ inö pönnique tömengä weocoo yæwedecoque gampocantapa. ²¹ “Tömängä weocooque gampote waa bawënemote,” ante onquiyængä nämä pönëninque gampocantapa. ²² Gampocä ate Itota dadi ëmæmonte adinque,

—Onquiyæmi, wæwëñamai ie. Bitö wede pönëno beyæ edæ wantæ bawënëmpa.

Ante äñongä do edæ wantæ bawënegacäimpa

²³ Itota mänii godinque awënë oncönë go guite ayongä në ööña bai öönani tönö nangui inäni cægonte Yæ yæ wædäni inãnite adinque, ²⁴ tömëñani inãnite,

—Gä goedäni, äninque, iñæmpa iñömö wëñængä wodi wii æmæwo wængampa. Önonque edæ mö ñongampa.

Angä ëñëninque tömëñani, Angantedö amini, ante tömengä ingante badete todänitapa. ²⁵ Ayæ mänii angä taodäni adinque Itota pö guidinque wëñængä baquécä wodi ingante pædæ wææmpo bæi ongonte töö æmængä ate wëñængä ængæ ganticantapa. ²⁶ Mänömai cæcä adinque në adäni iñömö gode ä gode ä cædäni ate mäniiñömö quëwëñani tömëñani ëñengadänitapa.

Babetamöna inate Itota gampomongä waa adapa

²⁷ Itota wadæ gote godömenque goyongä babetamöna tee empo ponte aa pedinque,

—Awënë Dabii pæimi inömi inte mönatö imönote pönö waadete waa cæbi æmönæ, ante ancaä aa pedatapa.

²⁸ Aa peyöna tömengä edæ oncönë go guicä adinque adoyömö pö guidatapa. Guida adinque Itota tömëna inate,

—Mina äñö ante nö waa cæquimo, ante pönëmina.

Äñongante,

—Ao. Awënë, bitö äñö bai cæcæbiimpa, ante pönëmonapa.

²⁹ Apæneda ëñëninque Itota pædæ gopo gampomönnique,

—Në pönëmina inimina inte mina pönenganca do waa bacæminaimpa.

³⁰ Ante äñongä edæ tömëna awinca wi æmonte bai adatapa. Itota iñömö edæ,

—Botö cædinö ante apænëdãmai inguenë quëwëminaa. Edæ pæ wëñeyöminä ëñëñamai incædänimpa, ante nangui angantapa.

³¹ Inique wadæ godinque Itota nänö äñinö ante wii ëñente cædinque tömëna, Itota mänömai cæcä waa bamontamönapa, ante tömämæ mäo apæneda ëñengadänitapa.

Wënæ inte wido cæyongä babetadecä iningä tedecampa

³² Wadæ goyöna edæ wënæ tönö cæcä inte babetadecä inongä ingante Itota weca ænte pönäni. ³³ Adinque wënæ ingante Itota wido cæyongä babetadecä iningä iñömö edæ do tedecä adinque tömëñani ancaï guñëninque,

—Itota nänö cædö bai mönö idægocabo adocanque incæ dicæ cæcä atamongaa, ante wædänitapa.

³⁴ Paditeoidi guiquënë,

—Wënæidi awënë tönö cædingä inte tömengä wido cæcä apa änewëñani, ante piingadänitapa.

Itota waodäni inãnite waadete waa acampa

³⁵ Itota iñömö nangui nani quëwëñömö ayæ wædænque nani quëwëñömö wayömö wayömö godinque Wængongui angä nani ëñente yewæmongainta ate odömöincönë go guii go guii cædinque odömöngä adänitapa. Ayæ, Mönö Awënë Odeye inguipoga oo ponguinö anguenë, ante nänö waa pönii äñinö ante apænecä ëñëñänitapa. Ayæ quiemë daicawo cæpãmo adinque quiemë wæncæ cæte wæwëñö adinque tömengä godö cæcä waa badänitapa. ³⁶ Cæningancoo bai waodäni incæ bacoo inäni iñönäni në aadingä dæ angä bai inäni, ante acantapa. Mänömai inäni inte babæidi wiiñate wædänäni bai ængæ gantidãmai inäni bai waodäni incæ wæwëñönäni Itota tömëñani tönö godongämæ wæwente bai pönengantapa. ³⁷ Ayæ tömengä müñæ në godäni inãnite apænëdinque,

Tömëmoncoo bacoo bai inäni iñönäni te pete inäni bai në gode äñäni iñömö mënäniya pönii inäni cæminii. ³⁸ Tömëmoncodë gæquii angä Awënë iñongante münitö tömengä

ingante apænedinque, Tömëmoncodë nê gœquinãni da godömi gote gæte bai ãfete poncædãnimpa, ante Wængongui ingante apæneedãni, ante Itota apænegacãimpa.

10

Itota angã ate dote ganca inãni nê gode ãnãni badãnipa

(Máadoco 3.13-19; Odoca 6.12-16)

¹ Ayæ ate tömengã miñæ nê godãni önonmpo tipæmpoga go mënãniya mänimpodãni iñönãnite Itota ãñecã pönãni ate tömengã, Botö pönö cæbo ate minitö nê ãmini badinque wænæidi nê wentamö ewocadãni inãnite wido cæcæminimpa, angantapa. Ayæ, Quiëmë daicawo gawænãni incæ quiëmë beyæ wæncæ cæte wæwænãni incæ minitö eyepæ inte godö cæmini ate nê wæwænãni waa bacædãnimpa, ante pönö cægacãimpa.

² Itota nãnö nê da godöninãni önonmpo tipæmpoga go mënãniya mänimpodãni inãnipa, ante adinque, Dote, ante nãni gocabo inãnipa, ante tededãnipa. Tömënãni iimaï emönãni inãnipa. Tãnoda Timönö Pegodo mönö ãnogã tönö Æntate nãna caya inapa. Ayæ Tebedeo wëna Tantiago tönö Wãö nãna caya inapa. ³ Pedipe tönö Batodömëë mënãa inapa. Odömãno awënë beyæ nê æwëningã Máateo tönö Tömato mënãa inapa. Adepeo wengã Tantiago tönö Tadeo inapa. ⁴ Wacã, Mönö ömæ ingæimpa, ante nê nanguï cædingã incæ wacã Timönö ingampa. Ayæ Itota ingante odömönte nê godonguingã Codaa Icadote mönö ãnogã ingacãimpa. Mänimpodãni Itota miñæ nãni, Dote, ante gocabo inãnipa.

Wængongui Awënë ingantedö ante apæneedãni, ante Itota angã godãnipa

(Máadoco 6.7-13; Odoca 9.1-6)

⁵ Ininque Itota miñæ nãni, Dote, ante gocabo iñönãnite tömengã, “Minitö idægoidi inãmaï inãni taadó godãmaï inte edæ Tãmadiadi nãni quëwëñömö go guiddãmaï iedãni, ante da godongantapa. ⁶ Edæ cæningãidi obegaidi gueogæ gote bai inönãni inte mönö idægocabo taadó oda cædinque tömënãni nãni wë wom-önte wænguinö godãnipa, ante adinque minitö tömënãni weca gote cæedãni. ⁷ Godinque minitö, Öönædë Awënë Odeye oo poncæcãimpa cæminii, ante mao apænemini ëñencædãnimpa. ⁸ Ayæ quiëmë beyæ nantate wæwænãni adinque godö cæmini ate waa bacædãnimpa. Do wænünãni inãnite godö cæmini ate ñãni ömæmoncædãnimpa. Baate inãni inãnite godö wadæ caamini waintai baacædãnimpa. Wënæidi inte godö wido cæedãni. Botö önonque ãnãmaï inte pönö cæbo ænünini inte minitö botö cæbo bai adobaï cædinque wadãni inãnite ãnãmaï

inte önonque godö cæmini æncædãnimpa,” ante Itota angantapa.

⁹ Ayæ, “Minitö gocæ cædinque, Godonte æinta, ante tiguítamö incæ oodo incæ padata incæ edæ wente æincadedë da wente ænãmaï iedãni. ¹⁰ Edæ wadãni beyænque nê cæcã iñömö tömengã eyepæ ænte quëwencæcãimpa cæminii. Mäincoo da wenguincade ænãmaï inte goedãni, Weocoo münii ëñacooque ëñate awæncata münii ëwataque ëwate ongonto münii nææntoque næænte goedãni,” angantapa.

¹¹ Ayæ apænedinque Itota tömengã miñæ nê godãni inãnite angantapa. “Nanguï pönï nãni quëwëñömö incæ wædænque inãni nãni quëwëñömö incæ minitö mäniñömö go guiddinque waocã nê nö cæcã ingante ante digui minte adinque mäningã oncönë go guite owodinque wayömö münii go quëwenganca mänincönenque quëwëedãni.

¹² Mänincönë go guiddinque, Iñãnãni, waa quëwëedãni, æedãni. ¹³ Ayæ äninque, Minitö weca æbãno pö guite quëwenguimönii, ãñömünii Ao ãnãni ate minitö tömënãni weca go guite gånë pönëninque ee quëwëedãni. Wæætë nö cædãmaï inãni adinque minitö edæ ee quëwëñãmaï edæ wadæ gomünii wæcædãnimpa. ¹⁴ Edæ, Pöedãni, ãnãmaï inãni adinque ayæ minitö apænemini ëñenãmaï inãni ininque minitö wæætë tömënãni oncodo tao godinque, Minitö quëwëñömö nãwate awædö, ante odömoncæte ante cædinque önöwa wadæ wadæ cæwate wadæ goedãni. ¹⁵ Edæ nãwangã ämpa. Botö apænte angüönæ iñonte Todömã iñömö quëwengainãni tönö Gömoda iñömö quëwengainãni tönö nanguï pante wæwëñönãni minitö imünite nê Baa ãnãni guiquënë godömenque pante edæ wæwencædãnimpa,” ante Itota tömënãni inãnite da godongã godãnitapa.

Togænte pancædãnimpa, ante

¹⁶ Ayæ äninque Itota, “Cöwã æedãni, angantapa. Minitö iñömö nê cæningãidi bai iñöminite botö iñömö mëñe bai inãni weca da godömo godinque minitö tæntæ nãmã wææ cæcæte ante nãnö ëñente cæbaï adobaï ëñente cæedãni. Wæætë edæ equemö nãnö ee cæbaï minitö adobaï piñãmaï inte ee cæte quëwëedãni. ¹⁷ Ayæ edæ minitö imünite bæi ongöninque waodãni tömënãni nê apænte ãnãni weca mao pædæ godönãni æncædãnimpa. Ayæ godömenque tömënãni odömöincönë mao ænte godinque minitö imünite tæi tæi pancædãnimpa cæminii. Ininque minitö edæ, Æbãno cæquinãnii, ante do ëñemünii inte edæ nãmã wææ æedãni. ¹⁸ Ayæ, Awënëidi tönö nê ëñenãmaï inãni adobaï ëñencædãnimpa, ante cædinque botö ämo ëñëninque minitö imünite mao pancabaa awënëidi gobedönadodoidi weca ayæ tömãmæ awënëidi odeyeidi weca

gönönäni gongæninque minito botó beyæ apænegæminimpa. ¹⁹ Mäniñedê tömênäni nâni ænte mäo gönöñedê, Quinó bai apænequimoo, ante guiñënete wædämaï iedäni. Mäniñedê edæ quinó bai apænequii, ante do êñencæminimpa. ²⁰ Ìñæmpa wii nämä pönëninque apænequimini wæætê mönó Wæmpo Önöwoca incæ apæneecä êñëninque apænequimini ìminipa,” ante Itota apænegacäimpa.

²¹ Ayæ godömenque apænedinque Itota, “Mäniñedê edæ nâna caya ìñönote adocanque näëmæ püininque, Wænoncæ, äninque tömengä töniiñacä ingante da godongä gocæcäimpa. Nâna wencaya ìñönote mæmpocä ìñömó näëmæ püininque, Wænoncæ, äninque tömengä wengä ingante da godongä gocæcäimpa. Ayæ wëñænâni incæ wæmpoda inate näëmæ püininque mäo apænedäni êñëninque wadäni tömênäni wæmpoda inate mämó wæñönäni wæncædaimpa. ²² Ayæ, Coditoidi ìminipææ, ante tömânäni botó êmówo beyænque minito ìminite nanguï püincädänimpa. Püinâni wæwëmini incæ æcänó ìmæca ìnque baganca wæntædämaï inte botó êmówo beyæ piinte badämaï ingää tömengä ingante botó æmo beyænque quëwencæcäimpa. ²³ Mäniñedê ate waodäni togænte pancæte ante mîni quëwëñömó pönâni ate wædinque minito ìñömó wayómó wadäni nâni quëwëñömó wodii winöedäni, ämopa. Edæ näwangä ämopa. Edæ mönó Idægobæ wayómó wayómó wodii winöinque pancayómonga goyómîni botó Waobo êñagaimo inte edæ do poncæboimpa,” ante Itota apænegacäimpa.

²⁴ Ayæ, “Nê odömongä ingante piinte cæyönâni tömengä miñæ nê gocä ingante edæ ædó cæte piinte cædämaï inguinâni. ²⁵ Awënë nê odömongä wæwente quëwëñongä tömengä miñæ nê gocä guiquënë ædó cæte wæwëñämaï quëwëngüingää. Edæ nê cæcä tömengä awënë bai bacä ìninque idæwaa edæ ìmapa. Botó oncó êacä bai nê Awënë ìmo ìñömote wadäni. Wëñæ awënë Beedeboobi ìmidó angüënë, ante püinâni incæ minito botó tönó mîni quëwencabo ìñömînite wadäni godömenque wëñæ wëñæ ante püincädänimpa,” ante Itota apæneecä êñengadänimpa.

*Guiñëñämaï iedäni, ante
(Odoca 12.2-7)*

²⁶ Ayæ apænedinque, “Incæte tömênäni ìnänite guiñëñämaï iedäni. Ìñæmpa, Adämaï incädänimpa, ante quiëmê wê womonte i incæ ìncayæ ate tömäa wi ænete bayonte edonque pönî bacæäimpa. Ayæ quiëmê awëmó cæteï incæ ìncayæ ate edonque pönî acädänimpa. ²⁷ Botó

wëmó ìñömó minito ìminite apænebo êñente ate minito botó apænedó ante ñäo apäiyömó apæneecæminimpa. Ayæ godó wæntæ botó äninó êñente ate minito æibæ oncömanca æidinque ogæ tedete apænemîni êñencädänimpa. ²⁸ Ayæ nê baonque wæñönâni inte önöwoca wæñönämaï ìnâni ìnänite adinque minito tömênäni ìnänite guiñëñämaï iedäni. Wæætê edæ baó tönó önöwoca tadömengadænguipo nê ömæe ewëñongä ingante guiquënë minito tömengä ingante guiñente wædäni.”

²⁹ Äninque, Itota godömenque apæneecantapa. “Waocä ayamöidi önonpo æmæmpoque mäniimpodâni beyæ tiguitamó adotamonque ante pædæ godongä amünitawo. Incæte minito Mæmpo änämaï ìñönote ayamó adocanque incæ yæipodê wæænämaï ingampa. ³⁰ Mönó ocaguï incæ æpoguino encamó, ante Mæmpo Wængongüi do êñëninque mönó imonte aacampa. ³¹ Edæ, Ayamöidi bacoo pönî ìninque önonque ìnänipa, ante nê äningä inte mönó Mæmpo ìñömó minito ìminite wæætê waa acä apa guiñëwëminii,” ante Itota apænegacäimpa.

*Waodäni êñëñönâni mönó Itota ingante
Ao angæimpa, ante
(Odoca 12.8-9)*

³² Godömenque apænedinque Itota, “Æcänó waodäni êñëñönâni botó imote Ao äninque, Bitó botó Awënë ìnömi ìmipa, ante äna tömengä öönædê æiyongante botó tömengä ingante wæætê edæ Ao äninque, Bitó ìñömó botó miñæ nê gogalmi ìnömi ìmipa, ante botó Mæmpo êñëñongä ancæboimpa. ³³ Wæætê waodäni êñëñönâni botó imote nê Baa angaingä ingante guiquënë botó Mæmpo öönædê nê quëwengä êñëñongä botó tömengä ingante adobäi edæ Baa ancæboimpa,” ante Itota apænegacäimpa.

*Botó beyænque guëa püincädänimpa,
angampa
(Odoca 12.51-53, 14.26-27)*

³⁴ Ayæ apænedinque Itota, “Inguipoga quëwëñäni piyænê cæte wæætedó wæætê cædämaï inte quëwencädänimpa, ante cæcæte ante Itota ìmæca pongaingä ingampa, ante minito pönëmînitawo. Ìñæmpa yaëmê nææante bai pômo ìmopa. ³⁵ Botó apænedó beyæ onguiñæna nâna wæmpocaya incæ näëmæ püincädäimpa, ante pômo ìmopa. Onquiyæna adobäi nâna badancaya incæ näëmæ püincädäimpa. Nâna wæntecaya incæ näëmæ waadedämaï inte püincädäimpa, ante pômpo. Mänömaï cæbo ìmopa, ante pönëmîniyaa. ³⁶ Ìninque, botó äno beyæ nâni owocabo incæ näëmæ waadedämaï püincädänimpa,” ante apænegacäimpa.

³⁷ Ayæ apænedinque Itota iūmai apænecantapa. “Edæ æcānō mæmpo tōnō wāānā inate ædæmō waadedinque botō imote wæætē pōnōmenque waadedā iñōmō tōmengā iñōmō botō nē ēmiñængā ædō cæte baquingāā. Adobaī wēñængā ingante ædæmō waadedinque botō imote pōnōmenque nē waadecā iñōmō tōmengā wæætē botō nē ēmiñængā ædō cæte baquingāā. ³⁸ Ayæ æcānō botō miñæ pōinēna tōmengā iñōmō edæ, Awæ botō wænguiwæ, ante næænte ponte bai cædinque, Wænōnāni wæmo incæte Itota miñæ cōwē gocæboimpa, ante poncæcāimpa. Wæætē æcānō mānōmai cædāmai ina guiquēnē tōmengā ædō cæte botō nē ēmiñængā inguingāā. ³⁹ Æcānō nāmanque pōnente, Imæcaque waa quēwenguīmo, ante ānaa tōmengā iñōmō quēwēnāmai incæcāimpa. Wæætē edæ, Wæmo incæ wæwēmo incæ botō oōnædē Awēnē angā ēñente cōwē cæcæboimpa, ante æcānō āna guiquēnē tōmengā iñōmō edæ cōwē quēwencæcāimpa,” ante Itota apænegacāimpa.

*Nē pōnengā nānō waa cædinō beyæ eyepæ æncæcāimpa
(Māadoco 9.41)*

⁴⁰ Ayæ apænedinque, “Mīnitō imīnite Ao āninque waocā botō imote do edæ Ao āningā ingampa. Ayæ botō imote Ao āninque botō imote nē da pōnongaingā ingante do edæ Ao āningā ingampa. ⁴¹ Wængongui beyæ nē apænecā ingante bitō, Wængongui beyæ nē apænebi inte pōe, āmi īninque Wængongui beyæ nē apænecā nānō paga ænganca bitō adopo æncæbiimpa. Ayæ nē nō cæcā ingante, Bitō nē nō cæbi inte pōe, āmi īninque nē nō cæcā nānō paga ænganca bitō adopo æncæbiimpa. ⁴² Nāwangā āmopa. Bitō Itota miñæ nē gobi inte æpæ becæbiimpa, ante bitō guiyangā ingante pædæ godōmi ængā īninque bitō godōni beyæ eyepæ æncæbiimpa,” ante apænedinque Itota tōmēnāni inānite da godongā gogadānimpā.

11

*Wāō tōmengā miñæ nē goda inate da pōnongā pōnapa
(Odoca 7.18-35)*

¹ Ayæ tōmengā miñæ nāni, Dote, ante gocabo inānite iinque apænedinque Itota wadæ godinque tōmēnāni nāni quēwēnōmō odōmoncæte ante ayæ, Ēñencædānimpā, ante apænecæte ante wayōmō wayōmō gocantapa.

² Māniñedē edæ Wāō iñōmō tee mōnete ongōñongante wadāni tōmengā weca pōninque, Mōnō Codito iūmai cæcampa, ante tededāni ēñente wædinque Wāō wæætē tōmengā miñæ goda inate Itota weca da

godongā godatapa. ³ Īninque Wāō beyæ ancæte ante pōninque tōmēna iūmaiñō ante Itota ingante apænedatapa.

—Bitō iñōmō dodāni nāni, Nē Ponguingā, ante nē angāimi adobi imitawo. Wæætē tōmēnāni nāni nē angāimi ināmai īmi īninque bitō wæætē, Wacā ponguingā, ante wānō cōedāni, āmitawoo. Æbānō mōnitō cæquimōnii, ante ēñencæte ante wæmōnīpa.

⁴ Ante āñōnate Itota wæætē, “Mīnatō ponte ēñēñōmīna botō æbānō apænebo ēñēmīnatawo, ante ayæ, Botō æbānō cæbo aminatawo, ante mīnatō wæætē Wāō weca gote māo apænemīna ēñengāeda. ⁵ Botō godō cæbo ate babetamō inānāni incæ waa bamonte adāni amināpa. Cōmante inānāni incæ waa bate dao dao godāni amināpa. Baate inānāni incæ æmontai wæmontai baadāni amināpa. Babetamonca ināni iñōnānite botō godō cæmōmo ate onōmonca waa bamoncate ēñēnāni amināpa. Do æmæwo wænte oñōnāni iñōnānite botō godō cæbo ate nāni ōmāmōnāni amināpa. Ōmaadāni inte wæyōnānite botō Wængongui waa pōni nānō pōnō cægainō ante apænebo ēñente todāni amināpa. ⁶ Ayæ, Botō beyæ waocā wīl piunte wadæ gocā iñōmō tōmengā watapæ nānō quēwenguinque edæ oda cædāmai incæcāimpa, ante apænebo ēñēninque mīnatō Wāō ingante māo adodō ante apænemīna ēñengāeda,” ante Itota angantapa.

⁷ Angā ēñēninque Wāō beyæ nē ānīna wadæ goyōna edæ Itota wæætē tōmānāni inānite, Wāō æbānō ingāā, ante apænecantapa. “Mīnitō guiquēnē quīnō acæte ante onōmæca gomīnitapa. Cæwīpa woboyæ pæmænte ate æmæñō ædæ æmæñō ædæ gobaingā ingante mīnitō dicæ acæ gomīnitawogaa. ⁸ Īninque edæ quingānō ingante acæte ante gomīnitapa. Waocā weocoo wæmoncoo mongænongā ingante mīnitō dicæ acæ gomīnitawogaa. Īñæmpa wæmoncoo mongængā iñōmō awēnē oncōnē quēwengā apa quēwēnāni. ⁹ Īninque edæ quīnante gomīnitawo. Mīnitō mīni nē go acæ cædongā iñōmō edæ Wængongui beyæ nē apænecā ingantawo. Nāwangā impa. Wængongui beyæ nē apænecā Wāō ingampa. Incæte tōmengā wīl Wængongui beyæ nē apænegaināni bai inongā inte godōmenque nangui cæcā ingampa, ante apænebo ēñēmaiīnīpa. ¹⁰ Wængongui iūmai angampa, ante yewæmongatimpā.

‘Botō beyæ nē apænecā ingante da pōnōmo pōninque tōmengā taadō tāno beyænte bai cæcæcāimpa.

Tōmengā bitō Codito īmi beyæ ante taadō waa pīnonte bai waa cæcæcāimpa.’

Mānōmaiñō ante dodāni adocā Wāō ingant-edō ante pōnēninque yewæmongadānimpā.

11 Nōwo iñōmō āmo ēñēedāni. Īmæca mīni ēñagincabo iñōmīnite æpæñē mōnō nē guidōnongā Wāō adocanque ñæñængā iñongante wacā tōmēngā bai edæ dæ angampa. Incæte oōnædē Awēñē Odeye nempo quēwēñāni iñōñāni adocanque guiyangā pōni ingā incæte Wāō pōnōmenque wædangā ingampa,” ante Itota apæñecantapa. 12 Ayæ ĩmai ante godōmenque apæñecantapa. “Wāō tāno nānō apæñedōñedē ayæ godōmenque ñōwo ganca tæi piñænāni pogodo pōninque, Oōnædē Awēñē Odeye nempo mōnō wāānē guicæimpa, ante tee tate guite bai cædinque, Mōnō Awēñē incæcæimpa, ante edæ o ænte bai cædānipa. 13 Edæ Wængonguī beyæ nē apænegaināni tōnō, ĩmai cæedāni, ante nē wææ angaingā tōnō tōmēñāni tōmāñāni edæ, Awēñē poncæcæimpa, ante cōwē Wāō nānō ponganca apænegadānimpā. 14 Īnīnque, Ediya wodi ayæ poncæcæimpa, ante nāni nē ānongā Wāō iñōmō adocā ingampa, ante pōñēmīniyaa. 15 Ēamonca ongonte ēñēedāni,” angantapa.

16 Godōmenque apæñedinque Itota ĩmai angantapa. “Inguipogaque ante nē quēwēñāni iñōmō quingāmē bai inānīpa. Quiēmē bai edæ quēwēñānīpa. Wēñænāni mōnō godonte æiñōmō tæ contate owempodāni nāni owempodō bai edæ adobai cædānīpa, ante awædō. Wēñænāni nāni owempote cæcabo incæ ææmæ cæte bai owempote cædinque wadāni inānite aa pedānīpa. 17 ‘Mīnitō beyæ oōña we we oōñōmōni mīnitō wæætē edæ āwadāmai ĩmīnitapa tōō,’ ante owempodīnque wēñænāni piinte tedewēñānīpa. Ayæ wæætē, Waocā do wængā ate nāni wæbai ante wēñænāni nāni owempote cæcabo iñōmō, ‘Mōnitō Ca ca wæyōmōni mīnitō wæætē edæ wædāmai ĩmīni wæmōnīpa,’ ante piīnīnque aa pedāni bai ñōwodāni iñōmō edæ adobai piinte tedewēñāni inānīpa. 18 ĩmai edæ impa. Wēñænāni nāni wædō bai Wāō iñōmō cænguī cænāmai tepæ bedāmai ponte quēwēñongante ñōwodāni guiquēñē, Wēñæ tōnō Wāō quēwēngampa, ante piīñānīpa. 19 Ayæ wæætē botō Waobo ēñagaimo inte edæ ponte nē cænte bete quēwēmo adīnque botō ĩmotedō ante mīnitō iñōmō, Cæowæobi inte cæmīpa. Beowæobi inte bebīpa, ante badete tomīnīpa. Ayæ godōmenque, Odōmāno awēñē beyæ nē æwēñāni tōnō nē ēñēñāmai cædāni iñōñānite bitō tōmēñāni æmīgo ĩpīpææ, ante botō ĩmote piīnīnque mīnitō wēñænāni nāni piinte aa pedō bai ānewēmīnīpa tōō. Incæte, Nē nō ēñēñāni iñōmō nō cædānīpa, ante adīnque, Nāwangā nō ēñēñānīpa, ante mōnō ēñēngæimpa,” ante Itota apænegacæimpa.

Nē ēñēñāmai cædāni inānite Itota piīngampa (Odoca 10.13-15)

20 Ayæ, Mīnitō quēwēñōmō botō bamōnēngæ nangui cæbo adīmīni incæ mīnitō wēñæ wēñæ mīni cædinō ante, Ancaa wæwente awædō, ante dicæ wæmīnitawogaa, ante piīnīnque Itota wayōmō wayōmō tōmēngā nānō nangui cædiñōmō quēwēñāni inānite ĩmaiñō ante mā piīngantapa. 21 “Codatī iñōmō quēwēñāni ēñēedāni. Betaida iñōmō quēwēñāni ēñēedāni. Mīnitō mīni wæwēngūinque ēñēñāmai cæte quēwēñānidō anguēñē. Edæ botō mīnitō weca tæi piñænte botō cædi bai Tido nāni quēwēngaiñōmō Tidōō nāni quēwēngaiñōmō adobai cæbo bai māñiñōmō quēwēngaināni iñōmō tōmēñāni dobæ wēñæ wēñæ nāni cægainō ante ĩmpo cædinque weocoo gōmæ ēmoncoo wēñādinque gōnai ōni pæcate Ca ca wæcægadānīpa. 22 Īnīnque mīnitō ĩmīnite āmopa. Wængonguī nānō apænte anguīōnæ ĩnque bayonte Tido iñōmō quēwēngaināni tōnō Tidōō iñōmō quēwēngaināni inānite nangui pangā wæwēñāni incæte tōmēngā mīnitō ĩmīnite godōmenque pangā wæwēncæmīnīpa. 23 Ayæ Capēnaōmō iñōmō quēwēñāni ēñēedāni. Mīnitō ĩmīnite Wængonguī dicæ oōnædē wo ææntodongā æi gote toquīmīniyaa. ĩñæmpa tadōmēngadænguipo wææntodongā guī wæcæmīnīpa. Edæ botō mīnitō weca tæi piñænte botō cædi bai Todōmā nāni quēwēngaiñōmō adobai cæbo bai tōmēñāni nāni quēwēngaiñōmō edæ godōmenque ñōwo ganca edæ mæ ongoncædōnīpa. 24 Īnīnque edæ āmo ēñēedāni. Wængonguī nānō apænte anguīōnæ ĩnque bayonte Todōmā quēwēngaināni inānite nangui pangā wædāni incæte mīnitō ĩmīnite godōmenque pangā wæcæmīnīpa,” ante Itota tōmēñāni inānite piīngacæimpa.

Botō weca pō guēmæedāni, angampa (Odoca 10.21-22)

25 Ayæ māñiñedē Wængonguī ingante apæñedinque Itota, “Mæmpo ēñēmi. Wadāni nāmā ocāi encadāni tōnō nangui adīnque nē ēñēñāni tōnō māñiñō bitō ēñēngainō ante ēñēñāmai incædānīpa, ante cædinque bitō cægainō ante wē wodonte bai pæ wēñegabiimpa. Wæætē edæ wēñænāni nāni pōñēñō bai nē pōñēñāni inānite wæætē bitō edonque odōmōmi adīnque do ēñēñānīpa. Bitō oōnædē Awēñē ingaimi inte inguipoga Awēñē adobi ĩnōmi inte edæ māñōmai cæbīpa, ante adīnque botō bitō ĩmite waa ate pōñēñīnque apæñebopa. 26 Mæmpo, bitō tōmēmi ānō bai cædinque waa cæbi adīnque botō Ao āmopa,” ante Wængonguī ingante waa apæñecantapa.

27 Wængonguī ingante ĩnque apæñedinque Itota godongāmæ ongōñāni inānite wæætē

apæneantapa. “Botö Mæmpo nö eñengä inte pönö odömonga beyænque botö iñömö tömänö ante nê eñëmo imopa. Ayæ, Botö tömengä Wëñæmo iñömote botö Mæmpoque botö imote nê againgä iñongante wadäni adämaï inänipa. Wæætê edæ Mæmpocä ingante botö tömengä Wëñæmo inömo inte adoboque nê agaïmo imopa. Ìninqe, Botö abo bai iñänique adobai ate bai pönencädänimpa, ante cædinque botö mïnitö iñinite odömömo adinque mïnitö adobai Mæmpocä ingante nê ate bai pönëmini bamnipa.”

²⁸ “Teëmê mongænte bai nangæ batawëmini ininqe mïnitö botö weca pömïni ate botö wæætê teëmê mongænte mïni wæwënö ante ö æmo ate mïnitö wæætê gancæ pönente guëmancæmïnimpa. ²⁹ Edæ botö mümöno gänê pönëninque nämä beyænque änämaï quëwëmo adinque mïnitö botö weca pömïni ininqe botö mïnitö tönö iñacabo cæcæboimpa. Edæ wagadada awæmpaa goti wïmoncate äämencaque goda bai möna guëa cæcaya bayömöna botö nö eñënömo inte pönö odömote apænebo eñëninque mïnitö önöwoca wampo pönente guëmancæmïnimpa. ³⁰ Edæ botö tönö äämencaque bai cædinque bitö iñömö oo wïmoncadimpa mongænte bai edæ do cæcæbiimpa. Botö mongæncoo wodæi iñonte bitö wæætê edæ wodæi mongænte gote bai nangæ badämaï incæbiimpa,” ante Itota iñique apænegacäimpa.

12

Guëmanguïönæ iñonte tömëmö tä pete ænänipa

(Mäadoco 2.23-28; Odoca 6.1-5)

¹ Mäniñedê guëmanguïönæ iñonte Itota tömëmoncodê tæcæguendocodê gocantapa. Goyongä tömengä miñæ nê godäni guiquënê gæwænte wædinque tömëmö tä pe tä pe æninque tæcæ cænæ cædäni. ² Adinque Paditeoidi guiquënê Itota ingante wæætê,

—Bitö miñæ nê godäni æbänö cædäni, ante cöwä aquënê. Ìñæmpa, Guëmanguïönæ iñonte mäniñö bai cædämaï iedäni, ante dodäni näni wææ angäinö ante eñënämaï inte iñäni iñömö do cædänipa töö.

³ Ante püñönänite Itota,

—Mïnitö iñæmpa docä Dabii wodi tönö godongämæ godäni tönö gæwænte wædäni ininqe tömengä æbänö cægacäi ante yewæmonte ongö incæte mïnitö iñömö adämaï inte bai änewëmini awædö.

⁴ Tömengä iñömö Wængongui oncönê go guicantapa. Mänincönê, Wængongui qui, ante nê godönänique cængui impa, ante wææ näni angäinö bai cædinque tömënanï, Wængongui qui, ante päö ñoncæ ñoncæ cædönänimpa. Incæte mäniñö päö wï Dabiidi

cængui iñi incæ Dabii do cængantapa. Ayæ tömengä tönö cægönäni adobai godongämæ cængadänimpa. ⁵ Ayæ, Wængongui qui, ante nê godönäni iñömö Wængongui oncönê ñænæncönê iñömö öñönæque näni cæbai guëmanguïönæ iñonte adobai cædäni incæte wentamö entwænëmaï önonque cæcädänimpa, ante Möitee wodi wææ yewæmongacäimpa. Mïnitö iñömö mäniñö ante adämaï inte bai änewëminipa töö, angantapa.

⁶ “Ayæ apænebo eñëedäni. Mïnitö, Wængongui oncö ñænæncö waa pönï ongoncompa, ante ayömini edæ botö ñöwo mïnitö weca nê ongömo guiquënê wïi Wængongui oncö bai ongömo inte wïi önömoque ongömpa. Wæætê edæ nämä nö cædömo inte botö iñömö edæ godömenque waa pönï ongömo apa quëwëmini. ⁷ Incæte, Wængongui iñainö ante apæneantapa. ‘Wængongui qui, äninque mïni iya tånö ante pönömenque waa adinque botö nê waadete mïni godö waa cædö ante godömenque waa abopa,’ ante Wængongui angampa. Ìninqe mïnitö iñömö Wængongui näno angäinö ante eñëmini inte bai iñäni wentamö mongæñämaï iñönänite, Mïni pante wæquinque mänömaï cæmïnipa, ante apænte püñämaï incædöminimpa. ⁸ Botö iñömö Waobo nê eñagäimo iñömö Tæiyæ Awënê inömo imopa. Ìninqe botö nê guëmanguïönæ Awënê inömo inte edæ, Guëmanguïönæ iñonte edæ æbänö cæquïi, ante adobo nê Ämo imopa,” ante Itota apænegacäimpa.

Ni cömampoingä

(Mäadoco 3.1-6; Odoca 6.6-11)

⁹ Äninque wadæ godinque Itota iñömö Wængongui angä näni eñente yewæmongainta ate oodeoidi näni odömöincönê go guigacäimpa. ¹⁰ Mäniñömö ni cömampoingä a ongongä adinque Paditeoidi guiquënê, Itota wapiticæ cæcä ininqe mönö mäo pünte angæimpa, ante nê änäni inte tömengä ingante änänitapa.

—Guëmanguïönæ iñonte wacä waa bacæcäimpa, ante cædäni, ante Wængongui wææ angantawo.

¹¹ Ante Itota ingante äñönänite tömengä wæætê,

—Guëmanguïönæ iñonte waocä tömengä cæningä ontatodê goyæ guï adinque mïni waocabo iñini incæ æcämê pædæ guipote æñämaï imaingä. ¹² Cæningä önonganque iñongante waocä iñömö waëmö pönï ingampa, ante adinque guëmanguïönæ i incæte waodäni beyæ cöwê waa cæcæimpa, ante ämo eñëmaïmïnipa.

¹³ Äninque ni cömampoingä ingante wæætê,

—Pædæ pompobi, angä.

Ēñēninque tōmengā pædæ gopodinque æmæmpo bai waa emocā bacantapa. ¹⁴ Adinque edæ Paditeoidi guiquēnē wadæ godinque, Æbānō cæte tōmengā ingante wænōmō wænguingā, ante godongāmæ pōñēninque tedegadānimpa.

Codito cæbānō cæquingā, ante Itaiya nānō apænegainō

¹⁵ Tōmēnāni, Wængongæimpa, ante pōnente tededāni wædinque Itota iñōmō wadæ gocantapa. Wadæ goyongā tæiyæñāni tee empo godāni ate wædinque tōmengā godō cæcā ate nē wænæ wænæ inte wæwēnīnāni tōmānāni waa badānitapa. ¹⁶ Ayæ nē waa badīnāni inānite, Minitō, Botō æbodō imo, ante māo apænedāmai iedāni, ante wææ angantapa. ¹⁷ Īninque Itaiya wodi Wængongui beyæ nē apænecā iimainō ante nānō yewæmongainō bai iinque cætimpa.

¹⁸ “Wængongui iimai ante apænecampa. Botō imote nē cæquingā incæcāimpa, ante botō nē apænte ænongā iñōmō a ongongā aedāni.

Adocā botō nē waadedongā iñongante botō tōmengā ingante adinque watapæ tobopa.

Botō Ōnōwoca ingante da pōnōmo ænte ēwocadinque botō imo nē cæcā iñōmō,

Botō nō cæte apænte ancæboimpa, ante tōmengā oodeoidi ināmai ināni inānite māo apænecæcāimpa.

¹⁹ Incæte tōmengā wīl wæætedō wææte pīncæcāimpa. Ogæ tededāmai incæcāimpa.

Waadāni taadō godinque tōmengā dicæ Yæ yæ ante tedecā ēñēnāniyaa.

²⁰ Cæwipa bede næænimpa wā tadāmai ināni bai waocā wæwengā iñongante tōmengā adobai nē wæwengā ingante wido cædāmai ingampa.

Ayæ gongapæncade cōmencagui mīni tente tēemāmoque go adinque pī ongōmōnāmai ināni bai tōmengā adobai waocā wæntæye bayongante tōmengā ingante godō pīnāmai ingampa.

Adocā botō imote nē cædongā ingaingā inte tōmengā nē Awēnē nānō baganca cōwē nōingā ante apænte āninque cōwē waa cæcæcāimpa.

²¹ Ayæ botō imote nē cædongā nē Awēnē bacā adinque wadāni oodeoidi ināmai ināni incæ, Tōmengā emōwo beyænque mōnō quēwengæimpa, ante pōnencædānimpa,”

ante Itaiya wodi Wængongui beyæ nānō yewæmongainō bai Itota mōnō Codito nōwo ponte waa cæcā ingampa.

Wænæ tōnō cæcā iimaingampa, ante wapiticæ ānānipa

(Māadoco 3.20-30; Odoca 11.14-23, 12.10)

²² Māniñedē wacā wænæ tōnō quēwēnongā inte babetamongā babetadecā badingā iñongante wadāni tōmengā ingante ænte māmōnāni pongā adinque Itota godō cæcā ate tōmengā awinca adinque nē tedecā bacantapa. ²³ Cæcā waa bacā adinque tōmānāni, Æbānō cæcā, ante guñente wædinque, “Awēnē Dabii wodi pæingā wabānō iimaingampa,” ante pōnente wægadānimpa.

²⁴ Mānōmainō ante wædāni ēñēninque Paditeoidi guiquēnē, “Īnæmpa wænæidi awēnē Beedeboo tōnō nē cæcā inongā inte Itota wænæidi inānite wido cæbaingampa,” ante tedewēnānitapa.

²⁵ Wapiticæ tōmēnāni pōnēnō ante ēñente wædinque Itota tōmēnāni inānite, “Awēnē odeye nempo quēwēnāni iñōmō nāemæ wæætedō wææte cædāni iinque awēnē odeye nānō omædempote wæquinque tōmēnāni nāmā ēwente cæbainānipa. Ayæ adocōnē owocabo incæ adoyōmō godongāmæ quēwēnāni incæ nāemæ wæætedō wææte cædāni iinque tōmēnāni oncō woquinque nāwæ gobainānipa. ²⁶ Ayæ Tatāna nempo quēwēnāni iñōmō edæ nāemæ pīlinque wæætedō wææte cædinque tōmengā ingante wido cædāni iinque Tatāna dicæ tōmēnāni awēnē odeye iimaingā. ²⁷ Minitō, Beedeboo tōnō cædinque Itota wænæidi inānite wido cæcampa, ante tedewēminipa. Mānīnō mīni ānewēnō nāwangā i bai mīnitō mīñæ nē godāni guiquēnē æcānō tōnō cæte wido cædāni. Īninque mīnitō mīñæ nē godāni incæ mīni ānewēnō beyænque ante nāemæ pīlinque mīnitō imīnite wææte apænte āninque pīncædānimpa anguēnē. ²⁸ Botō iñōmō Wængongui Ōnōwoca tōnō cæte wænæidi inānite wido cæbo apa ānewēminī. Mānōmai i iinque botō Wængongui Awēnē Odeye inōmo inte mīnitō weca do pōmo aedāni,” ante Itota apænegacāimpa.

²⁹ Ayæ apænedinque tōmengā, “Nē tæi pīñængā ingante wīl goto wīninque waocā ædō cæte tōmengā oncōnē guite māincoo o ænguingā. Edæ nē ēacā ingante bæi ongonte goto winte ate pō guite o ænāni bai botō iñōmō wænæ inte nē bæi ongonte wido cæbo imopa,” angantapa.

³⁰ Ayæ, “Botō tōnō æcānō wīl godongāmæ cæcā iñōmō tōmengā iñōmō edæ Baa ante botō imote pīnte cæcā ingampa. Ayæ botō, Waodāni botō mīñæ poncædānimpa, ante cæyōmo waocā botō tōnō wīl cæcā iñōmō tōmengā wææte botō mīñæ poncæ cæyōnānite tatodongā wadæ godānipa,” ante apænecantapa.

³¹ Ayæ, “Īninque apænebo ēñēedāni, angantapa. Mīni waocabo wænæ wænæ cæmīni incæ Mæmpo Wængongui ingantedō ante babæ ante godō wiwa āmīni incæte

Wængongui wæætē tōmānō beyæ pōnō
 ņimpo cæcā beyænque quēwencæmīnīmpa.
 Wæætē edæ Wængongui Ōnōwoca ingante
 babæ ante godō wīwa āmīni ĩnīnque
 Wængongui mānīnō ante cōwē ņimpo
 cædāmai incæcāimpa. ³² Ayæ botō Waobo
 ēñagaīmo ĩñōmote botō ĩmotedō ante waocā
 pīīnīnque adodeque angā incæte Wængongui
 godō ņimpo cæcā ate quēwencæcāimpa.
 Wæætē botō Tæiyæ Waēmō Ōnōwoca
 ingantedō ante æcānō pīīnīnque babæ
 āna guiquēnē tōmengā inguipoga nānō
 quēwengāñedē incæ wænte ate nānō goyedē
 incæ Wængongui tōmengā nānō wēnæ
 wēnæ ānīnō ante cōwē ņimpo cædāmai
 incæcāimpa,” ante Itota apænegacāimpa.

*Awæ æbānō ĩwæ, ante tōmenca bete
 ēñengæīmpa, ante
 (Odoca 6.43-45)*

³³ Ayæ waomō mōnō cædinō ante awæ
 incate bai ĩmpa, ante odōmoncæte ante Itota
 ĩmai ante apænegacāimpa. “Awæ æbānō
 ĩwæ, ante ēñencæte ante mōnō tōmenca
 tā pete bete ēñengæīmpa. Awæ waiwæ
 ĩwæ ĩnīnque tōmenca wainca incaquiwæ
 ĩmpa. Wæætē awæ baawæ ĩwæ ĩnīnque
 edæ tōmenca baaca incaquiwæ ĩwæmpa, ante
 ēñengæīmpa. ³⁴ Mīmōnē mōnō pōnēmāmo
 eyede tate bai tao godedīnque mōnō
 mānīmāmoque ante pōnēnīnque tedemōmpa.
 ĩnīnque mīnitō tæntæ pæīmīni bai ĩmīni
 ĩñōmō wīwa cæte quēwēmīni inte mīnitō
 ædō cæte waa ante apænequīmīni. ³⁵ Ayæ
 waa pōnī māincoo da wente ate tadonte
 ænāni bai cædinque nē waa cæcā ĩñōmō
 mīmōnē waa pōnī nānō entawēnīnō ante
 pōnēnīnque waa pōnī tedete waa cæcampa.
 Nē wīwa cæcā guiquēnē mīmōnē wīwa nānō
 entawēnīnō ante pōnēnīnque wīwa tedete
 wēnæ wēnæ cæcampa.”

³⁶ “Edæ apænebo ēñēdāni. Wængongui
 tōmengā nānō apænte anguiōnæ ĩñonte,
 Mānīne quīnante ōnonque tedebitawo, ante
 angā ēñēnīnque mīni waocabo edonque
 apænequēñēmīni ĩmīnīpa. ³⁷ ĩnīnque mīni
 tedepāmo tōmāmāmo ante Wængongui
 apænte ānīnque edæ pancamīniya ĩmīnite
 ņimpo cædinque edæ pancamīniya
 ĩmīnite, Mīni panguīnque tedewēmīnīpa,
 ancæcāimpa,” ante Itota apænegacāimpa.

*Mā cæte odōmōmi amōnie, ante ānānīpa
 (Mādoco 8.11-12; Odoca 11.29-32)*

³⁸ Apænecā ēñēnīnque nē odōmōnāni
 tōnō Paditeoidi pancadāniya Itota ingante
 apænedīnque,

—Awēnē nē Odōmōmi ēñēmi. Pōnencæcāīmpa
 ante mā cæte bitō odōmōnō ante mōnitō
 aīnente wæmōnīpa.

³⁹ Āñōnāni Itota wæætē,

—Mīni nē wīwa cæcabo inte Wængongui
 ingante ēmō cæte pangote bai mīni wadæ
 godincabo ĩñōmō mīnitō, Mā cæte odōmōmi
 adīnque pōnēmāimōnīpa, ante ancaa āmīni
 awædō. Nāwangā āmo ēñēdāni. Nōwomīni
 ĩmīnite mā cæte odōmōnāmai ingæīmpa.
 Cōnāo wodi beyæ nānō cægāinō ante
 edæ mānīnque mīni aquīnque cæcæīmpa
 ānewēmīni. ⁴⁰ Mēōnaa go adoōnæque
 ĩñonte gæyæ cæncadē Cōnāo wodi nānō
 ongongai bai edæ botō adobaī Waobo
 ēñagaīmo inte edæ mēōnaa go adoōnæque
 adopoōnæ wao wodido ongongæboīmpa.
⁴¹ Cōnāo wodi Wængongui beyæ apænecā
 ēñēnīnque Nīnebaidi wēnæ wēnæ nāni
 cægāinō ante ņimpo cædinque Wængongui
 gāmæñō pongadānīmpa. Cōnāo wodi
 wædangā ĩñongante botō nē ñænæmo
 inte nō ante apænebo ēñēnīnque mīnitō
 wæætē ēñēnāmai ĩmīnīpa. ĩnīnque Nīnebaidi
 Wængongui gāmæñō nē pongāināni incæ
 Wængongui nē apænte angā weca pōnīnque
 mīni ñōwo quēwencabo tōnō godongāmæ
 gongænte ongōnīnque, Mīni panguīnque
 ēñēnāmai ingamīnīmpa tōō, ante apænte
 pīīnānō anguēñē.

⁴² “Ayæ adobaī betamonca gāmæñō ōmæ
 awēnē onquiyængā ĩñōmō awēnē Tadōmōō
 wodi nanguī ēñente nānō apænedō ante
 ēñencæte ante doōnæ quēwēnīnque pon-
 gacāīmpa. Tadōmōō wædænque ēñengā
 ĩñongante botō godōmenque nanguī ēñēmo
 inte mīnitō weca ongōñōmote mīnitō
 ĩñæmpa wīī ēñēmīnīpa tōō. ĩnīnque
 mānīngā onquiyængā incæ Wængongui nē
 apænte angā weca pōnīnque mīni ñōwo
 quēwencabo tōnō godongāmæ ongōnīnque,
 Mīni panguīnque ēñēnāmai ingamīnīmpa
 tōō, ante apænte pīīncæcāīmpa,” ante Itota
 apænegacāīmpa.

*Wēnæ waodē owote godīngā inte adodō
 pongampa, ante*

(Odoca 11.24-26)

⁴³ Ayæ apænedīnque Itota ĩmai ante
 apænecantapa. “Waocā baōnē owote ate
 tao godīnque wēnæ ĩñōmō edæ, Quīngānō
 baōnē go guīdīnque edæ guēmante
 quēwenguīmoō, ante dīqui dīqui mīnte
 ayongā ōñōmæca to amīnte ī ate wædinque
 edæ, ⁴⁴ ‘Botō tao godīncōnē adodō go
 guīte quēwencæboīmpa,’ ante pōnēnīnque
 adodō pongampa. Ponte ayongā waocā
 ōnonganque bayongante wacā ōñōwoca
 tōmengāa owodāmai ingā adīnque wēnæ
 wæætē, Æ waocā botō owodīncō bai ĩnongā
 inte ñōwo ōnonconque bai wadæ ñēmænte
 māincoo cabo tē gæte bai ōmæwocacā
 ingā abopa. ⁴⁵ Ante adīnque tōmengā
 wæætē godīnque wēnæīdi godōmenque
 wīwa cædāni tiæte ganca mānīmpodāni
 ĩnānīte ænte pongampa. Tōmēnāni

tömänäni waocä baönë godongämæ pö guite owodäni ate waocä iñomö wënæ yewæninque godömenque wæwengampa. Nöwomini guiquenë wīwa mīni cæcabo adobaī bate wæwencæminimpa,” ante Itota apænecäimpa.

*Itota badä tönö tömengä biwīdi
(Mäadoco 3.31-35; Odoca 8.19-21)*

⁴⁶ Itota oncönë a ongöninque nangui inäni inänite apæneyongä tömengä nänö biwīdi tönö tömengä wäänä tömengä ingante bee tente apænecæte ante oncodö ponte a ongönäni. ⁴⁷ Adinque wacä añecæ ponte apænecantapa.

—Bitö badä bitö biwīdi bitö imite apænecæte ante oncodö ponte yabæque ongönänipa cæbii.

⁴⁸ Äñongante Itota wæætë,

—Botö badä ædänö inää ante ämoo. Ayæ botö biwīdi ædänidö inänii ante ämoo, ante pönëminii.

⁴⁹ Äninque, Itota tömengä miñæ në godäni gämæñö oo cæmöninque,

—Iñäni iñomö botö badäidi botö biwīdi inönäni inänipa, ante mänömañö ämo abaīminipa. ⁵⁰ Mönö Mæmpo öönædë në quëwengä nänö äñö bai ëñente æcänö cæte quëwëna mäningä edæ botö biwi ingampa. Mäningä botö biwinque ingampa. Mäninä botö badä inampa, ante pönencæboimpa, ante Itota apænecäimpa.

13

Waocä nänö quiyadö ante odömonte apænecampa

(Mäadoco 4.1-9; Odoca 8.4-8)

¹ Mänionæ edæ Itota oncodö tao godinque gäwapæ wedeca godinque tæ contagacäimpa. ² Tömengä nänö tæ contate ongönömö nangui inäni tömäo goto ponte ongönäni adinque tömengä wæætë wipodë go guite tæ contate wäi wocænte owoyongä tömënäni ayæ gäwapæ yæwedecaque ömaaque ongönänitapa. ³ Ayæ ömaaque ongönäni inänite apænedinque tömengä, Wængongui Awënë nempo quëwëninque æbänö cæquii, ante ëñencæminimpa, ante botö imæca quëwëñäni nänii cædönö ante odömonte apænëbo ëñëedäni.

Äninque Itota nangui apænecantapa. “Waocä në quiyacä iñomö quiyacæ gocampa. ⁴ Gote quiyayongä pancamonga taadö iñomö wææmompä. Taadö wæænte eyepodimö öñöonte ayamöidi pöninque dobæ ade cænänipa. ⁵ Pancamonga guiquenë dicamontaa onguipoi woyedömö iñomö eyepote wææmpä. Onguipoi woyedömö öñomö inte præquinämäi quingæ tä bocate prædinque æmonga æipa. ⁶ Edæ guingo icate æmæwo näñe wæmpä. Iñinque

oguimento yæyæmë guiwadämäi inte cöñe bawadämäi iñonte nænque ti näwäñö wänä cacadinque edæ guingo icate näñe wæmpä. ⁷ Pancamonga guiquenë ömentacodë nänö eyepodimö iñomö præquinämäi tä bocate gä æiyonte ömentacoo pö incootonque ganta cæca ate näñe wæmpä. Wampo incapa præquii. ⁸ Wæmonguipoga quiyadimö guiquenë tä bocate waa prædinque tömëmö nangui pönii incapa. Incate pancawæncaa tiëë ganca, pancawæncaa tetenta ganca, pancawæncaa todëinta ganca mänimpomö incapa. Quiyacä nänö quiyadö ante edæ botö mäninque ante apænëbopa. ⁹ Ämonca ongonte ëñëedäni,” ante Itota apænecäimpa.

Önömoncaque ëñente pönëñämäi inänipa, ante

(Mäadoco 4.10-12; Odoca 8.9-10)

¹⁰ Ayæ tömengä miñæ në godäni tömengä weca ponte apænedinque, Itota ëñëmi. Bitö tömënäni inänite inguipoga quëwëñäni nänii cæinö ante odömöninque quinnante mäninque ante odömonte apænëbitawo.

¹¹ Äñönänite Itota, “Öönædë Awënë Odeye nempo æbänö quëwenguii, ante mīni waocabo wëñëñëdë mīni ëñëñämäi ingainö ante botö ñowo mīnitö iminite pönö edonque apænëbo ate mīnitö adomīnique në ëñëminii bamīnipa. Wæætë tömënäni inänite guiquenë botö mäninö ante godö apænëdämäi imopa. ¹² Edæ në ëcäcä ingante godönäni nänö godömenque æi bai botö në ëñengä ingante godö apænëbo ate tömengä godömenque waa pönii ëñente bacæcäimpa. Wæætë në ömæpocä inongä ingante wædænque nänö ëadi incæ ö æñnäi bai në ëñëñämäi ingä guiquenë adobaī wædænque nänö ëñëñö incæ ö ænte bai ewente bai baquinö angüenë. ¹³ Incæte edæ awincaque adinque në adämäi inäni inte tömënäni önömoncaque ëñëninque në ëñëñämäi inäni inte pönëñämäi inänipa. Iñinque botö, Wængongui Awënë nempo æbänö quëwenguii, ante ëñëñämäi incædänimpa, ante cædinque imæca quëwëñäni nänii cæinonque ante odömonte apænëbopa, angantapa. ¹⁴ Edæ Wængongui beyæ apænëdinque Itaiya wodi iimäi ante nänö yewæmongainö bai ñowo quëwëñäni incæ iñinque cædänipa.

‘Näwängä ëñencæte ante cædinque mīnitö önömoncaque ëñëninque pönëñämäi imīni inte ëñëñämäi incæminimpa.

Näwängä æcæte ante cædinque mīnitö awincaque adinque wæætë pönëñämäi imīni inte adämäi incæminimpa.

¹⁵ Mäninäni, Wīi ainëwædö, ante awinca mönæ guimonte bai cædinque,

Önömonca wīi ëñëñëwædö, ante tee mömoncate bai cædinque,

Mimönë wii pönëinewædö, ante mimö ömædë inäni Inäni.

Wii mänömai i bai tömëni awinca adinque önömonca ëñëninque mimönë pönencædonänimpa. Ayæ tömëni nani waa baquinque edæ dadi ëmëninque botö gämænö poncædonänimpa. 24 Ante Itaiya wodi nänö angainö bai iinque cætimpa,” ante Itota apænecäimpa.

16 Ante Itota tömengä miñæ nê godäni inäni apænecantapa. “Minitö guiquënë awinca do adinque önömonca do ëñëninque mini toquinque impa. 17 Näwangä ämopa. Wængongui beyæ nê apænecainäni tönö nê nō cægainäni tönö ñowo mini adö ante nangui ainente wædäni incæte adämi ingadänimpa. Ayæ mini ñowo ëñëno ante nangui ëñëninente wædäni incæte ëñënamai ingadänimpa,” ante Itota apænecäimpa.

Quiyacä nänö cædö ante pönente iimäi impa

(Mäadoco 4.13-20; Odoca 8.11-15)

18 Itota ayæ tömëni inäni godömenque apænecantapa. “Mänii quiyacä nänö quiyainö ante apænedinque botö, Wængongui Awënë ingante æbänö ëñënguü, ante odömoncæte ante apæneyömo minitö ëamonca ongonte ëñëdäni, angantapa. 19 Awënë Wængongui Odeye nempo æbänö cæte quëwenguü, ante mönö apænedö ante önömoncaque ëñëninque waocä mimöno pönënamai ingä ininque tömengä mimöno nänö ëñëninö incæ wënæ nê wiwa cæcä inongä inte pö ö ængampa. Mäningä nê pönënamai ingä iñömo taadö wedeca eyepodimö bai ingampa. 20 Woyedömo dicamontaa eyepodimö bai ingä guiquënë tömengä Wængongui nänö apænedö ëñëninque quingæ Ao ante watapæ tocampa. 21 Ayæ ate adocä incæ tömëmo woyedömo bai oguimento yæyæmë guiwadämai bai ingä inte wantæ iñö quëwengampa. Wængongui nänö apænedö beyæ piñäni beyongä tömengä ingante wënæ wënæ cæcæte ante togëñäni ate wædinque tömengä guifente wædinque edæ ëmö cæte gocampa,” angantapa.

22 Ayæ, “Ömentacodë wæante pædimö bai ingä guiquënë tömengä ëñëninque godömenque quëwëñongä inguipoga quëwente quïëmë beyænque mönö wæpämö pöninque ayæ, Mäincoo beyænque toquimo, ante nani oda cæte wæwëmämö pöninque ömentacoo ñancate cæ bai cæyonte Wængongui nänö apænedinö incæ incadämai bai bapa. 23 Onguipoga wainguipoga quiyadimö bai ingä guiquënë tömengä Wængongui nänö apænedö ëñente wede pönëninque edæ tömëwæ incate bai Wængongui beyæ nangui cæcampa. Pancadäniya edæ tië ganca incate bai nangui cædäni. Wädäni guiquënë tetenta

ganca incate bai cædäni. Ayæ wädäni todënta ganca incate bai cædäni,” ante Itota apænecä ëñënanitapa.

Wäimö tönö ömentacoo quiyate pæmö ante odömongampa

24 Ayæ wæætë inguipoga quëwëni nani cæinö ante odömoninque Itota godömenque apænecäimpa. “Öönædë Awënë Odeye iñömo gönea tömëmö wäimö nê quiyacä bai ingampa. 25 Tömengä quiyate gocä ate waodäni mö ñöñöni wacä nê piinte cædongä inte wæætë tömengä nänö quiyadiñömo awëmö ponte, Ömentacoo pæcæimpa, ante adoyömo pönö ni quiyate wadæ gocä. 26 Ate wäimö tänä nâ bocate waiwæ pædinque tömëmö incayö adoyömo tæcæguedë ömentacoo pæ. 27 Adinque nê cædäni guiquënë nê ëacä weca pöninque, ‘Awënë, bitö gönea quiyadiñömo tömëmö wäimö minämai imitawo. Ædönö ponte ömentacoo adoyömo pæ, ante wæmönipa.’ 28 Ante añöni, ‘Wa. Mönö piinte ängongä cæbaingampa. Wabänö ii.’ Ante pönëñongä tömëni, ‘Ininque bitö ämi godinque abæ wiquimöni, ämitawo.’ 29 Änani ëñëninque nê ëacä wæætë edæ, ‘Inämpa mänömai cæmini ininque waiwæ tönö ömentacoo guëa abæ wite babaimpa. 30 Ininque minitö ñowo edæ ömæ widämai inte to amiña peganca ee amini guëa pæcæimpa. Amiñayedë edæ nê pedäni inäni botö, Ömentacoo täno tæ gæte topo cæte iya täninque tömëmö wäimö guiquënë tä pete mämö ñönödäni, ancæboimpa,’ ante nê ëacä apænecampa.” Mänömainö ante odömoncæte ante Itota apænecäimpa.

Möotatamö guidimö ante odömonte apænecampa

(Mäadoco 4.30-32; Odoca 13.18-19)

31 Ayæ wæætë inguipoga mönö adö ante odömoninque Itota godömenque apænedinque, “Waocä möotatamö tömëmö ænte mäo tömëmoncodë quiyacä bocate pæ aminitawo. Mänimö guidimö inte ñænæ pæ bai Wængongui Awënë Odeye nempo mini quëwencabo iñömo adobai yebænte pæpa. 32 Edæ möotatamö mini ænte quiyamö guidimö pöni i bai wamö mini quiyamö adomonque incæ adobai guiyamö pöni i iñömo edæ dæ ampa. Incæte möotatamö iñömo tä bocate pædinque möotatawæ edæ ocäñequi doyæ pæwæ bapa. Wii tömää ocäñequi mini quiyadiwæ bai edæ ocäa inämai inte möotatawæ iñömo edæ ñænæ awæ i adinque ayamöidi ponte awëñëmæ ongönäni. Möotatamö guidimö incæ mänömai pæ bai Wængongui Awënë nempo quëwëni iñömo wædænque inäni incæ nangui yëbænguinäni inäni,” ante odömoninque Itota apænecäimpa.

Päo yedæ æmpoqui da wenguï ante odõmonte apænecä

(*Odoca 13.20-21*)

³³ Ayæ wæætê inguipoga quëwënäni nâni cæinõ ante odõmõninque Itota godõmenque iimäi ante apænecantapa. "Päo yedæ æmpocæimpa, ante onquiyængä ñænængade tee manguincade ænte tee mäningue ædina nâni ämõ ænte mempoga go adopoque da wëningue ayæ yedæ æmpoqui ænte pönõ da wëningue wempo wempo ædæmõ cædengä ate päõmo yedæ æmpote tõmäo näämænta bapa. Yedæ æmpote ate päõmo tõmäo näämænta ba bai õõnædê Awënê Odeye nempo mîni quëwencabo iñõmõ tõmämîni nõ ëñente bamînipa," ante odõmõninque Itota apænecacäimpa.

Inguipoga nâni cæi bai impa, ante Itota odõmongampa

(*Mäadoco 4.33-34*)

³⁴ Nanguï inâni mäniñõmõ ongõnâni iñõnânite Itota inguipoga quëwënäni nâni cæinõ ante odõmõninque mäningue ante tõmënâni inânite apænecantapa. ³⁵ Edæ Wængonguï beyæ nê apænecacäimpa. "Wængonguï æbânõ cæcää, ante botõ inguipoga quëwënäni nâni cæinõ ante odõmõninque botõ iñæ ænete apænecæboimpa.

Wængonguï nânõ badongaiñedê ayæ godõmenque ñõwo ganca nânõ wê wodonte ëñengainõ ante botõ ñõwo apænecæboimpa,"

ante docä nânõ angainõ bai ñõwo iñõmõ iñque cæquinque Itota odõmonte apænecacäimpa.

Õmentacoo ante iimäi ante impa

³⁶ Ayæ nanguï inâni inânite ëmõ cæte godingue Itota oncõnê põ guicä adinque tõmengä miñæ nê godäni guiquënë tõmengä ingante mämõ änanitapa. Gõnea õmentacoo quiyadincoo ante apænecacäimpa. Edæ edonque apænecæboimpa. Edæ edonque apænecæboimpa. Edæ edonque apænecæboimpa. Edæ edonque apænecæboimpa.

³⁷ Äñõnânite tõmengä, "Tõmëmõ waimõ nê quiyadingä botõ äningä iñõmõ botõ Waobo ëñagaimo inte mäningä bai imopa.

³⁸ Gõnea botõ äniñõmõ bai iñguipo impa. Tõmëmõ waimõ botõ änimõ bai inâni guiquënë Awënê Odeye ingante nâni ëñencabo inânipa. Õmentacoo botõ änincoo bai inâni guiquënë wënæ inte nê ëñënâni iñõnâni ³⁹ nê piinte quiyacä botõ äningä bai iñõmõ edæ wënæidi awënê ingampa. Amiña bai guiquënë inguipoga iñque bayedê ingæimpa. Ayæ amiña tä pete bai cædäni guiquënë Wængonguï anquedoidi inânipa."

⁴⁰ "Iñique edæ nâni amiña bayedê õmentacoo tê gæte topo cæte nâni iya täi

bai edæ adobai iñque bayedê baquinõ anguënë. ⁴¹ Mäniñedê edæ Waobo ëñagaimo inte botõ anquedoidi inânite ämo põninque tõmënâni gõnea iñõmõ õmentacoo tê gæte bai cæcædänimpa. Botõ nempo quëwënâni pancadäniya oda cæte ëñënämai cædäniya. Iñique, Oda cæcædänimpa, ante nê cædäni tõnõ nê ëñënämai cædäni tõnõ tõmænâni inânite botõ anquedoidi iñõmõ abæ wite bai tê gæte mäo, ⁴² gongapamõ nâni ämogate Ca ca wæyõmõ wido cæcædänimpa. ⁴³ Mäniñedê edæ nê nõ entawëmîni guiquënë mõnõ Mæmpo Awënê Odeye iñongä tõmengä nempo nê quëwëmiñi iñõmõ edæ nænque tamõ guinæ gongæ bai adobai guinæ edæ gongæncæmînimpa. Eamonca ongonte ëñeedäni," ante Itota angacäimpa.

Waëmoncoo wê wodonte mäincoo, ante

⁴⁴ Godõmenque odõmõninque Itota iimainõ ante apænecantapa. "Õõnædê Awënê Odeye nempo mîni quëwencabo iñõmõ waëmoncoo onguipodê ææ wote nâni wê wodonte mäincoo bai impa. Waocä gote mäincoo adinque adodõ ææ wote æninque wayõmõ wê wodongampa. Wodonte ate tõmengä watapæ todinque tõmengä ëadincoo tõmancoo godonte eyepæ æninque tõmengä waëmoncoo nânõ wê wodõnimæ æncæte ante õmæ nê ëadingä weca do godingue mänimæ tõmämæ beyæ ante edæ eyepæ prædæ godõninque ængampa. Waocä mänoimai tõmengä ëadincoo tõmancoo nânõ godõni bai cædinque õõnædê Awënê Odeye iñõmõ, Botõ nempo quëwencæmînimpa, ante tõmengä Wëñængä ingante eyepæ godõninque inguipoga tõmäo quëwënâni inânite ængacäimpa," ante Itota apænecacäimpa.

Wamõ adomonque põni waëmõ imõ ante

⁴⁵ Ayæ godõmenque, "Õõnædê Awënê Odeye nempo guicæte ante cæcä iñõmõ wamoncoo pededamõ nâni ämoncoo godonte æncæte ante nê diqui diqui mingä bai ingampa. ⁴⁶ Iñique wamõ pededamõ nânõ æinënimõ adomonque waëmõ põni i ate tæcæ adinque waocä wadæ gote tõmengä nânõ ëadincoo tõmancoo godonte eyepæ æninque wæætê mäniñmõ wamõ incæ godonte ængampa," ante Itota odõmonte apænecacäimpa.

Dicamõñæ ante odõmonte Itota apænecampa

⁴⁷ "Ayæ wæætê edæ, Õõnædê Awënê Odeye iñõmõ edæ dicamõñæ gäwapæ nâni dadõi bai tõmäa gæyæidi ænte bai cæcampa. ⁴⁸ Dicamõñæ eyede dadõninque yæwedeca wëa manta cõnõninque tæ contate apænte adinque, Näwaaquingä i, adinque õ æ otodê da wëningue, Baacä i, adinque wido cædäni bai Wængonguï Awënê

adobaī cæquiringänō anguēnē. ⁴⁹ Edæ īnque bayedē Wængonguī anquedoidi pōninque nē nō cædāni inānite apænte æninque nē wīwa cædāni inānite adinque nānēnē gōnongā ⁵⁰ ongōñōnānite gongapamō edæ guitodongā guicædānīmpa. Tōmēnāni edæ māniñōmō guiite ongōninque āmogate wædinque Ca ca wæcædānīmpa,” ante Itota odōmonte apænegacāīmpa.

Waëmoncoo incæ mūncoo tōnō pedæncoo ante

⁵¹ Māniñō ante īnque odōmonte apænedinque Itota tōmēnāni inānite,

—Botō odōmonte apænedō tōmānō ante edonque ēñēmīnitawo.

Āñongante,

—Ao ēñentamōnīpa.

⁵² Ante apænedāni ēñēninque tōmēngā apænegacāīmpa.

—Īnque æcānō, Ōōnædē Awēnē Odeye æbānō cæcāā, ante ædæmō ēñēninque nē odōmonte apænedā i tōmēngā īñōmō waëmoncoo nē da wente mangā bai adobaī īnongā inte Wængonguī nānō ānō ante entawengā īngampa. Ayæ edæ nē ēacā nānō da wēnincade wī ænedinque mūncoo tōnō pedæncoo tadonte odōmongā bai nē odōmonte apænegā īñōmō adobaī cæcampa. Edæ doyedē nānō ēñēnō incæ ñōwo nānō ēñēnō incæ mīmōnē waa pōni nānō entawēnō ante edonque odōmonte apænegacāīmpa, ante Itota māninque ante idæwaa apænegacāīmpa.

Nātatadeta īñōmō ponte Itota apænegacāīmpa (Māadoco 6.1-6; Odoca 4.16-30)

⁵³ Wængonguī Awēnē æbānō cæcāā, ante odōmoncæte ante Īmæca quēwēnāni nāni cæiñō ante nānō odōmōniñō tōmānō ante īnque apænedinque Itota wadæ gocantapa.

⁵⁴ Tōmēngā nānō pægaiñōmō ponte tōmēnāni odōmōincōnē pō guidinque māniñōmō quēwēnāni inānite odōmonte apænegacāīmpa. Ēñēninque tōmēnāni ancaī guīñēninque,

—Īngā īñæmpa, æbānō cæte nanguī ēñēngā īngāā, ānānitapa. Tōmēngā edæ æbānō cæte tæi piñæninque bamōnengæ cæcāā, ante ēñencæte ante wæmōnīpa.

⁵⁵ Īngā īñæmpa awæmpa nē tūmōwengā wengā īmaingā inte bamōnengæ mānōmāi cæcampa, ante awædō. Tōmēngā wāānā ēmōwo Māadiya īngampa, ante awædō. Tōmēngā biwīlidi ōnōnānique Tantiago tōnō Ootee, Timōnō tōnō Codaa īnāmai īnānitawogaa. ⁵⁶ Tōmēngā biwinqueidi mōnitō tōnō tōmānāni ongōnāni aedāni. Īnque tōmēngā wæætē æbānō cæte nanguī ēñēngā badinque edæ nanguī cæcāā.

⁵⁷ Ante pōnente wædinque tōmēnāni tōmēngā beyæ ante pīnte badānitapa. Pīnte

badāni adinque Itota tōmēnāni inānite angantapa.

—Īñæmpa Wængonguī beyæ nē apænegā īñōmō tōmēngā tōmāmæ gote apæneyongante tōmēngā ingante waa adānīpa. Wæætē tōmēngā nānō pægaiñōmō pōninque oncōnē pō guite apæneyongā edæ māniñōmonque tōmēngā ingante wīwa adānīpa tōō, ante apænegacāīmpa.

⁵⁸ Incæte, Pōnēnāmai īñōnānite botō ædō cæte nanguī mā cæquīmoo, ante pōnente wædinque tōmēngā tōmēnāni weca edæ wædænque pōni cægacāīmpa.

14

Wāō æpænē nē guidōnongā wængampa (Māadoco 6.14-29; Odoca 9.7-9)

¹ Tōmānāni māniñedē, Itota æbānō cæcāā, ante māō ānāni ēñēninque pancabaa awēnē Edode do ēñengacāīmpa. ² Tōmēngā īñōmō tōmēngā ingante nē cædāni inānite apænegacāīmpa. “Wāō wodi æpænē nē guidōningā incæ īngā Itota īñōmō adocā inte a ongongā awædō. Tōmēngā do wænte ñāni ōmæmōninque pongampa tōō. Māniñō beyænque tōmēngā tæi piñænte entawēnongā inte nē nanguī cæcā īngampa,” ante awædō, angantapa.

³ Wāō wodi īñōmō īmai wængacāīmpa. Do īñedē awēnē Edode īñōmō tōmēngā biwī Pedipe manguiwēningā Ēdodiya ingante ō ænte mōningā īnongāīmpa. Māningā Ēdodiya Wāō ingante piingā beyænque Edode īñōmō Wāō ingante bæi ongonde goti winte tee mōnedongāīmpa. ⁴ Edæ Wāō īñōmō nānō caate wænguinque Edode ingante īmaiñō ante do wææ āningā īnongāīmpa. “Edode ēñēmi, bitō Wængonguī nānō angaiñō bai ēñēnāmai inte edæ māningā onquiyēngā ingante manguiwēmīpa tōō,” ante cōwē wææ āningā īnongāīmpa.

⁵ Angā ēñente piīninque Edode, Wāō ingante botō æbānō cæte wænonguīmo, ante cædongāīmpa. Incæte tōmānāni, Wængonguī beyæ nē apænedongā Wāō īngampa, ante tededāni ēñēningā inte Edode, Botō imote piīnāni wæcæ wæ, ante guīñente wædinque Wāō ingante wænōnāmai inte ata cæpodongāīmpa.

⁶ Incæte Edode nānō ēñagañōnæ īnque bayō wadāni ponte godongāmæ bete ayōnāni edæ Ēdodiya wengā baquēcā tode pete āwacā adinque Edode wæætē nanguī todongāīmpa.

⁷ Īnque tōmēngā, Wængonguī ayongā nāwangā āmopa, ante baquēcā ingante ānongāīmpa. Waa pōni bitō tode pete āwadi beyæ bitō quīēmē ante æinente āmi adinque botō bitō ānō ante cōwē pōnōmo æncæbiīmpa, ānongāīmpa. ⁸ Angā ēñēninque baquēcā wæætē wāānā weca gote, Ēbānō anguīmoo, ante āñongā wāānā guīquēnē,

Īimaī æe, angā ēñēninque baquecā wæætē Edode ingante,

—Īimaī pōnō cæbi æmoe. Wāō æpænē guidōnongā ingante wangō tamencate tōmengā ocabo ĩni coyomēnætaca cō cæte ænte māmō pædæ pōnōmi æmoe.

⁹ Angā ēñente wædinque awēnē odeye ĩñōmō, Æ ēñente awædō. Quinō ñōwo cæquimoo, ante nangui wædongāimpa. Incæte godongāmæ becōnāni ēñēñōnānite, Wængongui ayongā cōwē godoncæboimpa, ante nē āningā inte nē wænongā ingante tōmengā, Baquecā nānō āninō bai cæedāni, ānongāimpa. ¹⁰ Angā ēñēninque nē wænongā tee mōneincōnē go guiddinque edæ Wāō ingante māo bæi ongōninque wangō tomencadongāimpa. ¹¹ Ayæ Wāō ocabo ĩni coyomēnætaca cō cædinque baquecā weca ænte māmō pædæ pōnōnāni æninque baquecā wæætē wāānā inante godongā æñōnāimpa.

¹² Ayæ Wāō wodi tōmengā miñæ nē godīnāni pōninque tōmengā baō ĩni ænte māo daga wēninque wæætē Itota weca pōninque, Wāō wodi mānōmaī wængā wæmōnīpa, ante tōmengā ingante apænegadānīpa.

5.000 ganca ĩnāni ĩnānite Itota godongā cænānīpa

(Māadoco 6.30-44; Odoca 9.10-17; Wāō 6.1-14)

¹³ Wāō wodi do wængāimpa, ante apænēdāni ēñente wædinque Itota wæætē edæ, Ōnōmæca gocæboimpa, ante wipodē guīi contate wogaa gocantapa. Gocā ate, Māññōmō gōcæ cæcampa, ante tēdēdāni ēñēninque tæiyæñāni tōmēnāni nāni quēwēñōmō wacōnē ta wacōnē ta ōmaaque oo pænta tāno gote mæ ongōnānitapa. ¹⁴ Itota ĩñōmō wipodē wogaa pō ti wæænte ayongā nangui ĩnāni dobæ ponte mæ ongōnāni adinque, Æbānō cæte quēwenguiñāni, ante tōmēnāni tōnō godongāmæ wæte bai pōnengantapa. Ayæ daicawo gawæñāni ĩnānite godō cæcā ate waa badānitapa. ¹⁵ Gāwadecæ bayō tōmengā miñæ nē godāni tōmengā weca pōninque,

—Nōwo wēmō bacæ cæpa cæbii, ānānitapa. Ayæ, Ōnōmæca incæ cængui dæ ā adinque bitō godongāmæ ongōnāni ĩnānite āmi waodāni quēwēñōmō gote cængui godonte ænte cæncædānīpa.

¹⁶ Āññōnānite Itota,

—Goquināni, ante quīnante āmīni. Mīnitō wæætē godōmīni cæncædānīpa, āmopa.

¹⁷ Āñongante,

—Īñæmpa pāō ōnompō æmæmpoque gæyæ mēa pōni ĩ. Cængui nææmōnīpa diyæ godōmōni cænguiñāni.

¹⁸ Ante wææ āññōnāni Itota ĩñōmō,

—Mānimpodānique nææmīni incæ ænte māmō pædæ pōnōmīni æmoedāni, angantapa.

¹⁹ Ayæ godongāmæ mæ ongōnāni ĩnānite angā gaguiāma tæ contadāni ate tōmengā pāō ōnompō æmæmpoque gæyæ mēa æninque ōñnædē ĩnō æmō adinque, Wængongui, bitō waa pōnōmi ænte cæmōnīpa. Ante apænēdinque pāō pā æ pā æ cædinque tōmengā miñæ nē godāni ĩnānite pædæ pōnongā æninque tōmēnāni wæætē godōmenque tōmānāni ĩnānite di mæñæ di mæñæ cædāni ænte cænānitapa. ²⁰ Mānōmaī pōnō cæcā æninque tōmānāni tōmo pōni cænānitapa. Cænte ate edæ tōmēnāni ao mæ ao mæ nāni ñōñōni ee ðñoncoo pædæ wææmpo ō æ da da wente æninque tōmengā miñæ nē godāni ĩñōmō otodē ōnompō tipæmpoga go mentodēa cængui eyedē da wēnāni contagatīpa. ²¹ Nē cænāni ĩñōmō edæ onguiñæñānique incæ tīnco mūido ganca mānimpodāni ĩñōnāni onquiyæñāni tōnō nāni wencabo tōnō godōmenque nangui ĩnāni inte cængadānīpa.

Itota æpæ yædopæno dao dao gocampa (Māadoco 6.45-52; Wāō 6.16-21)

²² Tōmānāni ĩnque cænāni ate Itota tōmengā miñæ nē godānique ĩnānite do angantapa. Mīnitō tāno wipodē guīi contate æmæ wedeca tao goyōmīni botō wæætē godongāmæ ongōnāni ĩnānite āmo godāni ate ayæ pōncæboimpa. ²³ Angā Ao ante tao goyōnāni tōmengā wæætē wadāni ĩnānite, Nōwo goedāni, angā wadæ godānitapa. Ayæ tōmengā Wængongui ingante apænecæte ante ānanquidi æicantapa. Æite apænēdinque wēmō bayō tōmengā adocanque a on-gongacāimpa. ²⁴ Tōmengā miñæ nē godāni guiquēnē taocæte ante cædinque edæ tæcætībæ wiyate cæwoyōnāni edæ woboyæ pæmænte nangui pōñō edæ æpæ incæ incæ cæte mængonta mængonta cæyonte wipo wāi wocæntapa. ²⁵ Ayæ tawadiya nānō peyedē bayonte edæ Itota ĩñōmō æpæ yædopænoque edæ dao dao pongā adānitapa. ²⁶ Yædopæno edæ dao dao pongā gomō adinque tōmengā miñæ nē godāni edæ ancai guīñēninque,

—Quiēmē ĩmaī. Waocā wænte babæningā wabānō cængōngā, ante Yæ ante guīñēnte wædānitapa.

²⁷ Ante wæyōnāni edæ Itota ĩñōmō,

—Ee piyænē cæte guīñēnāmaī ĩedāni. Botō ĩmo apa guīñēwēmīni.

²⁸ Ante āñongā, Pegodo guiquēnē,

—Awēnē, bitō ĩmitawo. Nō nō ĩmi inte bitō æpæ yædopæ bitō weca āmi pōmoe.

²⁹ Angā ēñēninque,

—Pōe.

Āñongā Pegodo wipodē ongōninque edæ ti wææninque yædopæno edæ dao dao

gote Itota weca tæcæ obo ponte ayongä, ³⁰ woboyæ nangui nangui pæmæ ate wædinqe ancai guifëningue æpænë tæi guidingue Yæ wæcantapa.

—Awënë, æpæ bete wæncæbointaye.

³¹ Ante wæcä adinqe Itota tömengä ingante edæ quingæ pædæ gopo töö æmæninque,

—Ifæmpa botonque ifönöte pönëningue pöe, antabopa. Quinante wapiticæ edæ pönëmitapa, angantapa.

³² Ayæ wipodë guida ate woboyæ ifñontobæ næ pæmæñamäi gongæ.

³³ Adinqe wipodë ongönäni wæætë Itota weca ædæ wæænte apænedinqe,

—Nawangä bitö Wængongui Wëñæmi inömi imipa, ante watapæ apænedänitapa.

Caate wædäni inänite Itota cæcä waa badänipa

(Mäadoco 6.53-56)

³⁴ Ayæ æmæmäa taodinqe tömëñäni Guënetadete bæ ti wææñänitapa. ³⁵ Ti wææñäni adinqe mänömæ quëwëñäni

guiquënë, Tömengä Itota ingampa, ante do adinqe tömämæ mäo gode ä gode ä cædäni ëñëningue wënæ wënæ inäni inänite tömännäni inänite tömengä weca ænte mämönäni pönänitapa. ³⁶ Itota ingante, Bitö weocoo ämi yæwedecooque gampote waa bacädänimpa. Änäni wædinqe tömengä Ao angä ëñëningue në gampo gampo cædäni ifñömö tömännäni edæ waa inäni bagadänimpa.

15

Mimöno tao godi beyænque waocä wentamö ewocacampa

(Mäadoco 7.1-23)

¹ Dodäni näni wææ angainta ate në odömönäni tönö Paditeoidi pancadäniya Eedotadëë quëwëningue mänifedë Itota weca pöninqe ifmäi äñänitapa.

² —Bitö miñæ në godäni ifñömö dodäni näni angainö ante quinante ëñëñamäi inte wapiticæ cædäni wæmönipa. Tömëñäni ifæmpa mempodämäi inte wentamö nampote cængui cænäni awædö.

³ Ante pünäni wædinqe Itota wæætë,

—Minitö guiquënë dodäni näni angainonque ante ëñente cæcæte ante cædinqe Wængongui nänö wææ angainö ante edæ quinante ëñente cædämäi iminii.

⁴ Wængongui, “Bitö wæmpo ingante bitö badä inante waadedinqe waa cæe,” angacäimpa. Ayæ, “Wæmpocä ingante wäänä inante në pünite wiwa angä ingante wænömini wæncæcäimpa,” ante wææ angacäimpa.

⁵ Minitö guiquënë ifmäi änewëningue edæ wææ cæminipa. Waocä mæmpocä ingante waa cæquënegä ifñongante wäänä inante adobaif waa

cæquënegä ifñongante minitö wæætë wææ äninque, Waocä wæmpocä ingante wäänä inante ifmäinö ante apæncæcäimpa, änewëminipa. Wæætë edæ “Mæmpo, bitö qui, ante, Badä, minö qui, ante botö pönömo mäna ænguëñënë incæ iföwo wæætë edæ, Wængongui qui, ante do edæ godonte impa.”

⁶ Ante apænedinqe waocä wæmpoda inate wii godonguënegä ingampa, ante minitö ifñömö edæ wææ änewëminä awædö. Ifæmpa mänömäinö ante wææ änewëningue minitö edæ dodäni näni angainonque ante cæcæte ante cædinqe Wængongui nänö wææ angainö ante edæ, Önöneque impa, ante bai cæminipa töö. ⁷ Minitö waa cæminä inte bai në änewëminä ifñöminite edæ ämo ëñëedäni. Mäni cædö ante Wængongui ifmäi ante apæncampa, ante Itaiya wodi nöingä ante yewæmongacäimpa.

⁸ “Ifnäni ifñömö botö imote önöneque waa apænete bai tededäni incæte,

tömëñäni mämönö æmæ pönente edæ gobæ ongonte bai inäni awædö.

⁹ Ayæ botö weca ædæ wæænte waa ate bai tededinqe tömëñäni, Wængongui imidö anguënë, ante önöneque tedewëningue önönque edæ cædänipa.

Waodänique näni wææ äñönö ante odömönte apænedänipa töö.”

Ante Wængongui piingampa, ante yewæmongacäimpa.

¹⁰ Mänömäinö ante apænete ate Itota wæætë nangui ongönäni inänite aa pecä pönäni adinqe apænegacäimpa.

—Botö apænebo ëñëningue ocaidë pönente ædæmö ëñëedäni, angantapa.

¹¹ Önönë guidi beyænque waocä mimö wentamö entawëñamäi ingampa. Wæætë mämönë wiwa pönëningue nänö önöne tao gode beyænque tömengä wentamö mongængampa, ante apænebo ëñëedäni.

¹² Ante apæncä ate tömengä miñæ në godäni ifñömö tömengä weca ponte äñänitapa.

—Bitö mänömäinö ante apænebi ëñëningue Paditeoidi ifñömö guingo imonte pünäni apa änewëë.

¹³ Äñönäni tömengä,

—Awæ botö Mæmpo münämäi iwæ to wite bai wido cæte bacäcäimpa. Paditeoidi ifñömö wii botö Mæmpo quinäni inönäni inte adobaif edæ wido cæte wæcædänimpa.

¹⁴ Edæ babetamönäni bai ëñëñamäi inäni inte tömëñäni ifñömö wadäni adobaif babetamönäni bai inäni inänite në ænte mäodäni inäni apa cæminii. Tömëñäni inänite gomö aedäni. Edæ babetamongä ingante wacä adobaif babetamongä inongä ingante ænte mäocä gocä ininqe tömëna nänä babetamoncaya guëa ontatodë mongæncadæ guibainapa.

¹⁵ Ante apæncä ëñëningue Pegodo,

—Mänömainö ante odömonte apænedinque bitö æbänö ante odömoncæte ante apænebitapa, ante apænebi ëñëmönie.

¹⁶ Äñongante Itota,

—Minitö incæ ocäi ömæcadäni bai inöminä inte ëñënamäi iminitawo. ¹⁷ Edæ quincoomë önöne guiddincoo incæ cæncadë guite ate goiwaa ogä mente wido cæte ba apa änewëminii. ¹⁸ Wæætë önöne waocä nänö tedewënö guiquënë mímönë nänö wiwa pönënö beyænque tao godepa. Ìninqe waocä önöwoca mäninö beyænque wentamö ewocacampa. ¹⁹ Edæ waocä mímönë nänö entawente taodinö beyæ wiwa ante pönengampa. Mímönë nänö piinte pönënö beyænque waocä godö wængongampa. Mímönë towëinente tömengä nänöogængä inämaï iñongante godö mongampa. Ayæ æcämenque iñongante mímönë towëinente beyænque waocä godö mongampa. Mímönö æinente wædinque wacä qui awëmö ængampa. Mímönë wiwa pönëninque wacä ingante godö babæ wapiticæ apænecampa. Ayæ wacä ingante piinte tedecampa. ²⁰ Ìninqe mímönö tao godi beyænque waocä wentamö ewocacampa. Wæætë mempodämaï inte nänö cænö beyæ waocä wentamö ewocadämaï ingampa, ante edæ Itota apænegacäimpa.

Onquiyængä oodeocä inämaï inte wede pönente angampa

(Mäadoco 7.24-30)

²¹ Mäniñömö quëwente wadæ godinque Itota Tido nani quëwëñömö Tidö nani quëwëñömö eyequei pongacäimpa. ²² Mäniñömö ponte quëwëñongä onquiyængä Cänäamæ në ëñate pædingä inte adoyömö quëwente tadinque tömengä weca pöninque aa pecantapa.

—Awënë bitö Awënë Dabii wodi pæimi inömi inte ëñëmi. Botö beyæ pönö waadete waa cæe. Botö wëñængä onquiyængä wënæ inte quëwente wæwengampa cæbii.

²³ Ante mänömaï aa pecä wædinque Itota pæ wëëncantapa. Pæ wëëncä adinque tömengä miñæ në godäni quieuënë tömengä weca pöninque wææ apæñënitapa.

—Mönö miñæ tee empote Yæ yæ në änewënongå ingante ämi gocæe.

²⁴ Ante wææ änäni ëñëninque Itota wæætë,

—Cæninäni obegaidi gueogæ gote wæwënanäni bai möni idægocabo adobai inte wë wömonte wædäni adinque Mæmpo Wængongui, Tömënaninque inänite cæquimi goquimi, äninque botö imote da pönongä wii pontawoo.

²⁵ Angä ëñëninque onquiyængä iñömö wæætë Itota önöwa gäänë ædæ wææninque apæñecantapa.

—Awënë, botö beyæ cæbi waa bacæe, angantapa.

²⁶ Äñongante Itota wæætë,

—Wënanäni cængui inguënë waocä dicæ quintamöidi cængui ante wææntodonguingä. Bitö edæ wabi iñömite botö bitö beyæ ædö cæte cæquimoo.

²⁷ Angä ëñente wædinque,

—Awënë iñæmpa në ëadäni nani cænte eyepodimö wæænte æñömengadæmpa inö öñöñö quintamöidi ade cæmpa.

²⁸ Äñongante Itota,

—Onquiyæmi ëñëmi. Bitö nangui pönëniimi iñömite bitö änö ante do cæte impa.

Ante tæcæ apæneyongä tömengä wengä edæ do adoyedë edæ waa bagacäimpa.

Caate wædäni inänite Itota cæcä waa badäni

²⁹ Mäniñömö quëwëninque wadæ godinque Itota Gadideapæ ömaaque pö änanquidi æi tæ contacantapa. ³⁰ Tæ contate ongöñongä nangui inäni godongämæ pöninque wënæ wënæ inte wædäni inänite ænte pönänitapa. Pæ opa pæ opa godäni tönö tente tobænte wædäni inänite babetamö inäni tönö babetade inäni inänite Itota weca ænte mämö ñö cædänitapa. Ñö cædäni ongöñönänite Itota tömänäni inänite godö cæcä ate waa badänitapa. ³¹ Godongämæ ongönäni guiquënë, Itota godö cæcä ate babetade inänäni incæ tededäni ëñëmönipa, ante guifente wædänitapa. Tente tobænte wædinäni incæ waa badäni amönipa. Pæ opa pæ opa godäni inänäni incæ waa bate godäni amönipa. Babetamö inänäni incæ waa adäni wæmönipa, ante guifente wædinque edæ Wængongui ingante apænedinque, Möni idægocabo Wængongui inömi inte edæ bitö adobique ñäö bai ëmömi inte edæ tæi piñænte cæbi amönipa, ante watapæ apænegadänimpa.

4.000 ganca inäni inänite Itota godongä cænänipa

(Mäadoco 8.1-10)

³² Mäniñedë Itota tömengä miñæ në godäni inänite aa pecä pönäni ate apæñecantapa.

—Ìinäni botö weca ongönäni iñömö mëönaa go adoönæque iñonte botö weca ongöñönäni tömënanäni cængui ömæpodäni badäni ate wædinque botö tömënanäni tönö godongämæ wæte bai pönëmopa. Cænämaï inte gue ænente wæyönänite botö, Oncönë goedäni, ämo gote bai tömënanäni edæ idömæ godinque nangæ badinque edæ bocæ bocæ cæte wæcædönänimpa.

³³ Angä wædinque tömengä miñæ në godäni wæætë,

—Ënodäni inäniyaa. Önömæca incæ päö impa æninque godömöni cænguinäni.

³⁴ Ante wæyönänite Itota,
—Minito päo æpodō nææmīni.

Åñongante,

—Päo ðonmpo æmæmpoque go mēa gæyæ guiyā pōni mēa pōni mæ ongompa, ante edæ apænedänitapa.

³⁵ Itota iñōmō godongāmæ ongōnāni nangui ināni iñōnānite angā tæ contadänitapa.

³⁶ Iñinque päo ðonmpo æmæmpoque go mēa tōnō gæyæ tōnō nāni næænincoo pædæ godōnāni æninque tōmengā Wængongui ingante, Bitō waa pōnōmi cæncæmōnimpa, ante apænedinque pä æninque tōmengā miñæ nē godāni inānite pædæ pōnongā æninque tōmēnāni wæætē wadāni inānite pædæ pædæ godōnāni ænānitapa.

³⁷ Æninque tōmānāni godongāmæ cæninque tōmo pōni cænānitapa. Idæwaa cænāni ate tōmēnāni pä ænte nāni cænte ñōnōni ee ðōncoo wente æninque Itota miñæ nē godāni otodē pōnō da wēnānitapa. Iñinque ðonmpo æmæmpoque go mentodēa cængui eyede contagatimpa. ³⁸ Nē cænināni iñōmō onguñænānique coatodo müdo ganca iñōnāni onquiyænāni tōnō nāni wencabo tōnō tōmēnāni æpodānimē godōmenque nangui pōni inōnānimpa. ³⁹ Iñinque cænāni ate Itota iñōmō, Goedāni, angā godāni ate tōmengā wipodē guii contate imæmāa Māagadabæ pongacāimpa.

16

Mä cæte odōmōmi amōnie, änānipa
(Māadoco 8.11-13; Odoca 12.54-56)

¹ Itota pongā adinque Paditeoidi tōnō Tadoteoidi iñōmō, Mōnō amō ēñēninque tōmengā oda cæbaingampa, ante cædinque Itota ingante apænedinque, Bitō, Pōnencædänimpa, ante ðōnædē mā cæi bai cæbi amōnie. ² Änāni ēñēninque tōmengā wæætē,

—Minito iñæmpa gāwadecæ iñonte æmō adinque, “Baänæ watamō hacæ wiñadæ pōni gongæmpa,” ante do ēñēmīnipa. ³ Ayæ ñāo bayō edæ, “Cōönæ cæcæ guinæ wepæ bai gongæmpa,” äninque mīnitō, Öönæ æbānō ēönæpa, ante adinque do edæ ēñēmīnipa. Iñinque, Wængongui quino cæcæ cæcampa, ante quīnante wīi ēñēmīni. ⁴ Nōwomīni iñōmō edæ nē wīwa cæmīni inte mīnitō Wængongui ingante pangocæte bai emō cæte gomīni imīnipa. Edæ, Mä cæte odōmōmi adinque pōnēmaimōnipa, ante ancaā ämīni awædō. Incæte Cōnāo wodi mā pōni nānō cægāinō ante adinque mīnitō pōnenguēñēmīni iñōmīnite māninque mīni aquinque ante odōmonte ingæimpa.

Äninque Itota tōmēnāni inānite emō cæte wadæ edæ gogacāimpa.

Wapiticæ nāni apænedō yedæ æmpoqui
bai impa, ante

(Māadoco 8.14-21)

⁵ Tōmengā miñæ nē godāni guiquēnē tao gocæ cædinque päo wīi pōnente ænāmai inte æmæmāa tao ti wæænānitapa. ⁶ Itota iñōmō māniū päo tōmēnāni nāni ænāmai inō ante wīi tededinque wadō ante pōnente iūmai apænecantapa.

—Päo yedæ æmpoqui, ante Paditeoidi tōnō Tadoteoidi nāni da wente cæi ate gomō aedāni.

⁷ Angā ēñente wædinque tōmengā nānō nē emiñænāni wæætē nāni caboque tededinque,

—Päo ænte pōnāmai imōimpa, ante Itota wabānō mānōmai beyæ ämaingampa.

⁸ Ante nāmāneque tededāni wædinque Itota iñōmō,

—Mīni pōnēegade. Päo ænāmai inte mīni pōninō ante quīmæ tedewēmīni. ⁹ Awincaque adinque adāmai imīnitawo. Edæ päo ðonmpo æmæmpoque æninque botō godōmo æninque tinco müdo ganca ināni nāni cæninō ante awincaque adimīni inte mīnitō mümōno pōnēnāmai imīni awædō. Ayæ cænte ate nāni wææntodōnincoo wente ænte mīni contadinō iñōmō cængui æpotodēnō ongotawo, ante pōnēmīniyaa.

¹⁰ Ayæ ate botō ðonmpo æmæmpoque go mēa päo ænte godōmo æninque coatodo müdo ganca ināni nāni cæninō ante adinque mīnitō iñōmō edæ ēñēnāmai imīnitawo. Ayæ edæ ñænæ otodē mīni wente ænte contadinō cængui æpotodēnō ongotawo, ante pōnēmīniyaa. ¹¹ Māniñō ñōwo botō, Gomō aedāni, ante wææ äninque botō wīi pāonque ante apænetabopa, ante quīnante wīi ēñēmīni. Incæte botō, Päo yedæ æmpoqui, ante Paditeoidi tōnō Tadoteoidi nāni da wente cæi ate gomō aedāni, ante wææ ämopa.

¹² Angā ēñente pōnente wædinque tōmēnāni, Gomō aedāni, ante apænedinque Itota wīi ðonque päo da wente cæinque ante wææ angampa. Wæætē edæ Tadoteoidi tōnō Paditeoidi wapiticæ ante nāni odōmonte apænedō ante tōmengā, Gomō aedāni, ante wææ angampa, ante do ēñēnānitapa.

Bitō Coditobi inōmi imipa, ante Pegodo
angampa

(Māadoco 8.27-30; Odoca 9.18-21)

¹³ Māniū imæmāa tate ate Tetadea Pidipobæ eyequei pōninque tōmengā miñæ nē godāni inānite apænedinque Itota,

—Botō Waobo ēñagaimo iñōmote wadāni botō imotedō ante tededinque, Æbodō imoo, ante apænedāni ēñēmīni.

¹⁴ Åñongante tōmēnāni wæætē apænedänitapa.

—Bitö imitedö ante apænedinque pancadäniya, Æpænë nê guidongaingä Wäo wodi incæ Itota adocä ïmaingampa, ante tededänipa. Wadäni guiquënê, Ediya wodi incæ Itota inongä ïmaingampa, ante apænedänipa. Wadäni guiquënê, Eedëmiya wodi ingampa, ante apænedänipa. Ayæ, Wii Eedëmiya ingä ïnninge Itota Wængongui beyæ nê apænegainäni ïñönänite adocä ïmaingä ingampa, ante tededänipa.

¹⁵ Ante tömengä miñæ nê godäni apænedäni êñëninge Itota wæætê,
—Minitö diyæ, Æbodö imoo, ante pönëminii.

¹⁶ Äñongante Timönö Pegodo wæætê,
—Wængongui nê quëwengä Wëmi ingaimi inte bitö ïñömö Coditobi inömi ïmipa.

¹⁷ Ante apænegä êñëninge Itota ïñömö,
—Timönö bitö Öönata wëmi inömi inte êñëmi. Wii waocä apænegä beyæ bitö mänömainö ante êñëmitapa. Wæætê bitö nangui toquinque edæ botö Mæmpo öönædê nê quëwengä incæ bitö ïmite pönö odömönte apænegä êñëmitapa. ¹⁸ Ayæ edæ ïmaï ante bitö ïmite ämopa. Bitö dicamö bai inömi ïmipa, ante pönëninge botö bitö êmowo ante Pegodo pönö pemömo êmömipa. Incæte dicabo tæimö i bai bitö nö äninö ïñömö edæ tæine i ïñonte botö mänimoga tæi mænonte bai pönö badömo ate minitö mini pönencabo bacæminimipa. ïnninge minitö, Itota nê Codito ingampa, ante mini pönencabo ïñömö tæi êmömüni badinque mänimoga tæi ongonte bai wede pönëñömünite nê tæi piñænäni tadömengadænguipo owote ta pönäni incæ ædö cæte godömenque mämö bæ taquänäni. ¹⁹ Edæ öönædê Awënë Odeye nempo guiquinque ante odemö wi ænequi bai botö bitö ïmite pönömö æncæbiimipa. Æmi ate bitö nê ämi badimi inte inguipoga bitö wææ änö incæ öönædê dobæ wææ angainö inte ongongæimipa. Ayæ bitö quëwë inguipoga ïimpo cæbi i ïñonte mänüi adobai öönædê dobæ ïimpo cæte ongongæimipa.

²⁰ Ante ïnninge apænedinque Itota tömengä miñæ nê godäni inänite ïmainö ante wææ angantapa. Minitö ïñömö botö imotedö ante apænedinque, Codito inongä ingampa, ante gode änamai inte edæ pæ wëneedäni, angacäimipa.

Itota, ïmaï cædäni wæncæboimpa, ante apænegacampa

(Mäadoco 8.31-9.1; Odoca 9.22-27)

²¹ Ayæ Itota mäniñedê mä odömöninge tömengä miñæ nê godäni inänite apænedinque, Botö cöwë Eedotadêë goquënêmo imopa, angantapa. Gobo ate odoeoidi nê aadäni nani Picæncabo tönö, Wængongui qui, ante nê godönäni ïænænäni tönö nê odömönäni tönö

godongämæ cædinque botö imote wënæ wënæ cædäni wæwæncæboimpa. Ayæ botö imote godömenque wænönäni wæncæboimpa. Incæte Wængongui angä beyænque botö mëöna go adoönæque ïñonte edæ ñäni ömæmonte quëwæncæboimpa, ante apænegacäimipa. ²² Mänömainö ante apænegä êñëñönäni Pegodo guiquënê Itota ingante nänënë mäo godinque Itota ingante piingantapa.

—Awënë, quimæ wæncæ änewëë. Wængongui pönö wææ aacä beyæ bitö caate wædämai incæbiimipa.

²³ Ante wææ äñongante Itota dadi êmæninge Pegodo ingante näëmæ piinque,

—Bitö Tatänabi bai inömi inte edæ botö weca ongönämai wadæ gobäwe, angantapa. Bitö wii Wængongui nänö pönënë ante pönëmi inte wæætê edæ waodänique nani pönëwënö bai pönëninge mänömainö ante bitö botö imote ægodawaqui ñönonte bai cædinque wææ änewëmi awädö, angacäimipa.

²⁴ Ayæ tömengä miñæ nê godäni inänite apænegacampa.

—Æcänö botö miñæ pöinëna ina tömengä ïñömö nämä beyæ ante pönënamai inte edæ botö miñæ tee empote poncæcäimipa. Nämä nänö wænguiwæ mongante ponte bai cædinque tömengä, Botö wæmo incæ caate wæbo incæ Itota ingante cöwë tee empote gocæboimpa, ante poncæcäimipa. ²⁵ Edæ æcänö, Nämä wææ gompodinque quëwæncæboimpa, ante cædinque botö miñæ pönämai ingä guiquënê tömengä ïñömö edæ quëwënämai incæcäimipa. Wæætê edæ, Wænönäni wæmo incæte botö Itota miñæ tee empote cöwë gocæboimpa, ante æcänö äna guiquënê tömengä wæætê quëwæncæcäimipa. ²⁶ Edæ waocä inguipoga ongoncoo tömancoo ö æncæte ante cædinque nämä öñöwoca incæ pædæ godongä wë womonte ba ïnninge edæ tömengä nänö ömæwocate wæquinqe æmaingampa. ïñæmpa eyepæ godongampa diyæ öñöwoca wæætê æmaingäa.

²⁷ Ante Itota ïñömö, “Edæ botö Waobo êñagaïmo inte botö Wæmpo ñäö tömäo guinæ gongæññonte botö edæ botö anqedoidi tönö edæ godongämæ poncæboimpa. Ayæ pömo ate botö tömämini minitö cægai ganca ante eyepæ pædæ pönömö æncæminimipa. ²⁸ Edæ näwangä ämopa. Minitö ïñömö ongömüni pancaminiya ïñömö ayæ wænämai mümini quëwëñömüni botö Waobo êñagaïmo inte Awënë Odeye bate ponte a ongömo adinque minitö botö nempo quëwæncæminimipa,” ante Itota apænegacäimipa.

17

Itota waëmō pōni ñāō bai ēmongā bacā adānīpa

(*Māadoco 9.2-13; Odoca 9.28-36*)

¹ Mānīnō ante apæneçā ate Itota ōnompō æmæmpoçque go adoðnæque iñonte Pegodo ingante ayæ Tantiago tōnō Wāō nāna caya inate mānimpodāni inānite ānanquidi mæicā adodānique æigadānīmpa. ² Æite ongōñōnāni edæ Itota awinca tōmēnāni ayōnāni edæ wīl cōwē nānō ēmōnō bai waëmō pōni ñāō bai edæ ēmongā bamongā adānīta. Edæ nænque tī nāwante ñāō bai bate ēmongā iñinque tōmēngā weocoo nāāmænta ñāō incōo ēñacā adānīta. ³ Ayæ ayōnāni edæ doyedē pōni nē æigaina iñōmō Mōitee wodi tōnō Ediya wodi incæ iñontobæ a ongōnīnque Itota tōnō godongāmæ tedegōnāni. ⁴ Adinque edæ Pegodo guiquēnē Itota ingante apæneçantapa.

—Awēnē ēñēmi. Iñōmō mōnō waa pōni ongonte awædō. Bitō Ao āni iñinque botō oncontaicoo mentaiya go adotaique mænōnīnque bitō oncontai ante adotaique Mōitee oncontai ante adotaique Ediya oncontai ante adotaique mænōmāimōpa.

⁵ Ante ayæ tedeyongā boguimāmo waëmō pōni ocabogadāni obo wææninque guinæ gongæ ayōnāni boguimāmodē ōnōnepāmoque apæneçantapa.

—Iñgā iñōmō botō Wengā inongā inte botō nē waadegaingā inongā ingampa. Tōmēngā ingante adinque botō watapæ tobopa. Mīnitō tōmēngā pōnō apæneçā ēñēdāni.

⁶ Angā wædinque tōmēngā miñæ nē æidāni iñōmō ancaī guīñēninque do do wāate bai cædinque guidōmēmæ tæ go wææñānīta. ⁷ Go wææñāni adinque Itota tōmēnāni weca ponte godō gampodinque,

—Guīñēnāmai inte ængæ gantiedāni, angantapa.

⁸ Ayæ æmō ayōnāni Itotaque adocanque onongā agadānīmpa.

⁹ Ayæ ānanquidi inō wææ pōñōnāni Itota tōmēnāni inānite angantapa.

—Mīnitō mā pōni botō ēmōnō wīl monte bai mīni adinō ante gode ānāmai pæ wēneyōmīni botō iñōmō Waobo nē ēñagaimo inte edæ wænte ate ñāni ōmæmoncæboimpa. Nāni ōmæmōmo ate mīnitō edæ māniñedē ate apæneçæmīnīmpa.

¹⁰ Angā ēñente wædinque tōmēngā tōnō nē æidānīni tōmēngā ingante ānānīta.

—Mānōmai i iñinque, Ediya wodi tāno poncæcāimpa, ante nē odōmōnāni iñæmpa quīnante apænedāni.

¹¹ Añōnāni Itota wæætē,

—Ediya wodi nāni ānongā iñōmō tāno pongā ingampa. Nāwangā impa. Pōninque tōmēngā, Doyedē ingai bai ñōwo wæætē

adobai bacæimpa, ante badongampa. ¹² Botō wæætē iñānō ante apænebo ēñēdāni. Nōwocā mōnō Ediya inongā inte do pongāimpa ante aquēnē. Do pōningā ingante edæ awincaque adinque, Æcānō ingāā, ante ēñēnāmai inte cædāni guiquēnē quīēmē nāni cæinēñō incæ edæ do cædānīpa. Ayæ adobai, Tōmēngā ingante nāni cædi bai botō Waobo ēñagaimo iñōmote botō imote adobai wēnæ wēnæ cædāni wæcæboimpa, ante apænebo ēñēdāni.

¹³ Ante apæneçā ēñēninque tōmēngā tōnō nē æidānīni iñōmō edæ, Æpæñē mōnō guidōningā Wāō ingantedō ante apæneçampa, ante tæcæ ēñēnāni inte wægadānīmpa.

Itota wēnæ ingante angā go ate wēñængā waa bacampa

(*Māadoco 9.14-29; Odoca 9.37-43*)

¹⁴ Mānīl ānanquidi æidānīni inte adodō wææninque nanguī pōni ināni weca pōnāni adinque wacā onguīñængā Itota weca ponte da guicapodinque angantapa.

¹⁵ —Awēnē ēñēmi. Botō wengā onguīñængā ingante waadete waa cæe āmōpa. Tōmēngā iñōmō edæ ancaā quidi quidi dowænte wæwēninque wantæ wantæ iñō gongapamō tæ wæætē tæ wæætē cæcampa. Ayæ æpæñē tæi guī tæi guī cæcampa. ¹⁶ Ante wædinque, Botō wengā ingante pōnō cæmīni waa bacæcāimpa, ante botō bitō miñæ nē godāni weca ænte pōmo adinque tōmēnāni ædō cæte cæquīnāni.

¹⁷ Añongante Itota tōmēnāni inānite,

—Nōwomīni mīni ædæmō cædāmai incabo mīni pōnēegade impa, angantapa. Mīnitō weca æpogadō quēwēmoī. Wapitīcæ cæmīni iñōmīnīte æpogadō piyæñē cæte wæwēmoī. Edæ wēñængā ingante iñōmō botō weca ænte māmōmīni pongædāni, angantapa.

¹⁸ Ayæ wēnæ ingante piñinque Itota, Tao gobāwe, angā tao gocā ate wēñængā iñōmō dobæ waa bacantapa.

¹⁹ Ayæ ate tōmēngā miñæ nē godāni adodānique Itota weca pōninque tōmēngā ingante,

—Mōnitō guiquēnē bitō bai wido cæcæ cædinque edæ quīnante wido cædāmai intamōni.

²⁰ Ante wæyōnānite,

—Wedē pōnēnīpa diyæt wido cæquīmīni. Edæ mīni pōnēñō mōotatamō bai guiyā pōni ēwocāmīni iñinque mīnitō ānanquidi iñōmō ongonquidi adinque, Nāñēñē gobāwe, ante āmīni bai edæ ānanquidi incæ do gā gote wayōmō gongæncædōnīmpa. Edæ quīēmē cæcæte ante āmīni iñinque tōmānō edæ do cæte babaimpa, ante nāwangā apænebo ēñēdāni. ²¹ Incæte mānīl wēnæ inte wido cæcæte ante cædinque cænguī wantæpiyæt

cænāmai inte Wængongui ingante apænete ate edæ wido cæqui impa, ante Itota apænecā ēñēnānitapa.

Wænōnāni wæncæboimpa, ante Itota adodō ante apænecā

(Māadoco 9.30-32; Odoca 9.43-45)

²² Mānī Gadideabæ pōninque godongāmæ goyōnānite Itota īlmainō ante apænecantapa. Adocanque, Waocā nē ēñagaingā īñōmō æyōmōnō ongonngāā, ante godō odōmōninque botō īmote waodāni nempo pædæ godongā æncædānīmpa. ²³ Nē ænāni wæætē botō īmote wænōnāni nāñe wæncæboimpa. Ayæ mēōnaa go adoōnæque īñonte edæ Wængongui angā beyænque botō edæ ñāni ōmæmonte quēwencæboimpa.

Itota mānōmainō ante apænecā ēñēninque tōmengā mīñæ nē godāni wæætē edæ nan-qui wæwente bagadānīmpa.

Wængongui oncō beyæ, ante Itota eyepæ godongampa

²⁴ Mānī pōninque tōmēnāni Itota tōnō godongāmæ Capēnaōmō nāni quēwēñōmō pōñōnāni wadāni guiquēñē Wængongui oncō beyæ ante tiguītamō didacōma nāni ānotamō mentamonga ante nē āñōnāni inte Pegodo weca ponte āñānitapa.

—Mīnitō Awēñē nē Odōmongā guiquēñē Wængongui oncō beyæ ante didacōma tiguītamō cōwē pōñōnāmai ingantawo.

²⁵ Āñōnānite Pegodo,

—Cōwē nē pōnongā ingampa.

Āninque oncōñē pō wāāñē guīyongante Itota tāno apænecantapa.

—Tīmōnō, æbānō ante pōñēmī, angantapa. Īmæca nē quēwēmō mōnō eyepæ ænte quēwengæīmpa, ante īmæca awēñē ōdeyēidi īñōmō edæ tōmēnāni nempo nē quēwēñāni īñānite, Pōñōmīni æmoedāni, āñānitawo. Wæætē edæ wadāni īñānite āñānitawo. Ēdānidō īñānite āñāni, ante pōñēmī, ante Pegodo ingante Itota angantapa.

²⁶ Āñongante Pegodo,

—Wadāni īñānite āñāni.

Ante apæneyongā Itota wæætē edæ,

—Māñōmai ī īninque edæ mōnō Awēñē Wængongui nempo nē quēwēñōmō inte wī godonguēñēmō īmōpa. ²⁷ Incæte wī piinte bacædānīmpa, ante botō īlmai āmōpa. Nē gāwapāa māo dadonte wēā tadōñōmī gæyæ tānocā tacā æ. Āninque gæyæ ōñōneca wī ænete ayōmī adotamonque incæ coatodo didacōma ēmontamō incæ edæ gæyæ ōñōne ongontamō adinque bitō tadonte æncæbiīmpa. Mānintamō ænte māo bitō beyæ botō beyæ eyepæ godōmī æncædānīmpa, angā gote Pegodo cægacāīmpa.

18

Æcānō ñæncængā inte nē angā inguingāā, ante tededānīpa

(Māadoco 9.33-37; Odoca 9.46-48)

¹ Māñēñedē Itota mīñæ nē godāni tōmengā weca ponte apænedinque,

—Bitō ōñædē Awēñē Ōdeye īnque bayōmī æcānō bitō nempo quēwēninque ñæñængā pōñi īnongā inte nē angā inguingāā, āñānitapa.

² Itota īñōmō wēñængā guīyangā ingante edæ aa pecā pongā ate tōmengā ingante tæcæguedē goncædinque tōmēnāni īñānite wæætē apænecantapa.

³ —Nāwangā āmo ēñēdāni. Mīnitō ōñædē Awēñē Ōdeye nempo guīcæte ante wapiticæ mīni pōñēwēñō wido cædinque wēñænāni nāni piyæñē cæte pōñēñō baī pōñēdāni. Māñōmai cædāmai īmīni īninque Awēñē Ōdeye nempo cōwē guīdāmai inte wæbāimīnīpa. ⁴ Incæte īngā wēñængā,

Ōñōmoque īmōpa, ante pōnengā baī æcānō adobainō ante pōñente quēwēna guīquēñē tōmengā īñōmō edæ ōñædē Awēñē Ōdeye nempo quēwēninque ñæñængā pōñi inte edæ nē angā ingampa. ⁵ Ayæ æcānō botō ēmōwo apænedinque māningā baī wēñængā ingante, Pōe, ante godō waa cæcā īñōmō tōmengā īñōmō edæ botō īmote edæ do, Pōe, ante pōñō waa cæcā ingampa, ante Itota apænegacāīmpa.

Wacā oda cæcæcāīmpa, ante nāni wæcquinque cædānīpa

(Māadoco 9.42-48; Odoca 17.1-2)

⁶ Itota ayæ apænecantapa. “Wadāni godō cædāni beyæ botō īmote nē pōñēñāni incæ pancadāniya edæ dobæ oda cæte wēnæ wēnæ cædānīpa. Īninque, Wēñængā adocanque guīyangā pōñi īngā incæ oda cædāmai incæcāīmpa, ante wæcæ cæcæte ante cædinque nē godō wæcæ cædingā ingante īlmai cædāni īninque tōmengā toquēnengā īmaingampa. Waodāni nāni dacæ godō dacæ godō cæquinca ñæñænca æninque tōmengā ōñōmenca æ wēmencadinque tōmengā ingante tæcætibæ wido cædāni īninque tōmengā edæ, Wēnæ wēnæ cædāmai inte becadote wæmo beyænque Wængongui botō īmote wī godōmenque pangampa, ante wædinque waa toquēnengā īmaingampa. ⁷ Quiēmē beyæ oda cædinque inguipoga quēwēñāni nāni wæquinque wēnæ wēnæ cædānīpa. Nē pōñēñāni incæ pancadāniya wī ēñente do oda cædānīpa. Cōwē māñōmai impa. Incæte, Oda cæcæcāīmpa, ante nē cæcā īñōmō edæ tōmengā nanguī nāñō caate wæquinque cæcampa,” ante apænegacāīmpa.

⁸ Ayæ, “Bitō ōñōmpoca cædinque wēnæ wēnæ cæbi īninque ōñōmpo aa wī æpote wido cæte baī cædinque wēnæ wēnæ bitō

cædinō ante wido cæbāwe. Bitō ōnōwa wæpiticæ godinque wēnæ wēnæ cæbi ininque bitō ōnōwa aa wi æwate wido cæte bai cædinque wēnæ wēnæ bitō cædinō ante wido cæbāwe. Inæmpa inguipoga quēwēninque bitō æmæmpoque empobi incæte æmæntique entibi incæte bitō ōönædē æidinque cōwē wænāmaī quēwēmi ininque waa imaimpa. Edæ tipæmpoga empobi inte tipæntiya entibi inte edæ bitō gonga cōwē bæcote wæwenguiñōmō wīl æmæwo wido cæte wæquimido anguēnē. ⁹ Ayæ bitō awinca wiwa adinque wēnæ wēnæ cæbi ininque bitō awinca oo togæmonte wido cæte bai cædinque wēnæ wēnæ bitō cædinō ante wido cæbāwe. Inæmpa inguipoga quēwēninque bitō æmæmonque êmōmi inte bitō godōmenque quēwēmi ininque waa imaimpa. Edæ wīl tipæmonga êmōmi inte edæ bitō tadōmengadænguipo gonga cōwē bæcote wæwenguiñōmō wīl wido cæte wæquimido anguēnē,” ante Itota angacæimpa.

Bodego wē womonte ba, ante odōmonte apæncampa

(*Odoca 15.3-7*)

¹⁰ Ayæ, “Ingā guiyangā inñōmō ōnonganque ingampa, ante mīnitō adocanque ingante incæ piinte adāmaī imæwedāni. Inæmpa tōmēnāni inānite nē aadāni anquedoidi incæ ōönædē quēwēninque botō Mæmpo nē ōönædē quēwēngā awinca cōwē adānīpæ cæmīni. ¹¹ Edæ botō Waobo ēñagāimo inte edæ wē womōnāni inānite diqui mīnte æncæte ante pōmo imopa,” ante Itota apæncantapa.

¹² Ayæ, “Æbānō ante pōnēmīni edæ. Waocā obegaidi tiēē ganca ēacā ongōñōnāni adocanque pangocæte nānēnē gocā adinque nē ēacā inñōmō nōobenta i nōebe ganca ināni ānāmæñē ongōñōnānite êmō cæte diqui mīncæ wīl goqingā, ante pōnēmīni. Cōwē edæ diqui diqui mīncæ gocæcæimpa. ¹³ Godinque nē pangocæ godingā ingante ēadente acā ininque nē ēacā waa tobaingampa. Edæ pangocæ godāmaī ināni nōobenta i nōebe ganca ināni inānite adinque cōwē tocā inongā inte tōmengā tæcæ nānō adingā beyæ godōmenque tocampa. ¹⁴ Mīnitō Mæmpo ōönædē nē quēwēngā adobaingā, Guiyangā wē womonte wænāmaī incæcæimpa, ante cōwē diqui diqui mingampa,” ante Itota odōmonte apænegacæimpa.

Nē wēnæ wēnæ cæcā ingante piñnāmaī inte waadecæimpa

(*Odoca 17.3*)

¹⁵ Godōmenque odōmōninque Itota apæncantapa. “Bitō tōnīfacā bitō imite wēnæ wēnæ cæcā wædinque bitō tōmengā weca gote āmi adomīnaque nānēnē gote

ongōeda. Ongōñōmīnate bitō tōmengā ingante, Mānōmaī cæbitapa, ante āmi ēñengāe. Mānōmaī āmi ēñengā ininque tōmengā waadete babaingampa,” ante apænegacæimpa. ¹⁶ Ayæ godōmenque apæncantapa. “Wæxētē tōmengā ēñēnāmaī inte waadedāmaī ingā ininque bitō Wængonguī angā ēñente nāni yewæmongainō bai cæe. Waocā æbānō cæcāā, ante adinque waoda mēnaa ina incæ mēnaa go adocanque ināni incæ adoyōmō ante apænedāni ininque tōmēnāni nāni apænedō beyænque ante mōnō, Nō impa, ante ēñengæcæimpa, ante Wængonguī beyæ yewæmongatimpa. Ininque bitō, Mōnō adoyōmō ante apænegæcæimpa, ante waoda mēnaa inate āmi incæ adocanque ingante āmi incæ æcæmōnque bitō tōnō godā tōmengā adoyōmō ante nōinō ante apænegæcæimpa.

¹⁷ Ayæ apænemīni ate nē wēnæ wēnæ cædingā cōwē ēñēnāmaī ingā ate wædinque bitō inñōmō, Itota nē Codito ingampa, ante mīni pōnencabo weca gote apænebi ēñenguiñāni. Ayæ tōmēnāni wææ ānāni ate tōmengā godōmenque ēñēnāmaī ingā ininque tōmengā, Nāmā cæte quēwengūmo, ante nē ēñēnāmaī cædāni bai ingampa. Ayæ, Odōmāno awēnē beyæ nē æwengā bai ingampa cæbii. Tōmengā ēñēnāmaī cæcāinō anguēnē, ante bitō edæ tōmengā ingante gomō ae,” ante Itota angantapa.

¹⁸ Ayæ apænedinque, “Nāwangā āmopa. Mīnitō inguipoga nē āmīni inte apænte āmīni ininque mīni apænte ānīnō incæ ōönædē do bæ apænte ante impa. Ayæ inguipoga mīnitō apænte āninque ñimpo cæmīni ininque mīni cædō bai ōönædē adobai do ñimpo cæte ingæcæimpa.”

¹⁹ Ante apænedinque Itota ayæ apænedinque, “Mīnitō imīnite iīmaī āmopa, angantapa. Inguipoga mēmīnaa guēa adoyōmō pōnente apæneyōmīna botō Mæmpo ōönædē nē quēwēngā inñōmō mīna āmaī ante tōmānō cæcæcæimpa. ²⁰ Edæ mēmīnaa imīna incæ mēmīnaa go adocanque imīni incæ æpōmīnimē inōmīni incæ mīnitō adoyōmō ponte botō êmōwo apænete ongōñōmīni edæ botō adoyōmō mīnitō tōnō godongāmæ ongoncæboimpa,” ante Itota apænegacæimpa.

²¹ Ayæ ate Pegodo tōmengā weca ponte āninque,

—Awēnē, botō tōnīfacā botō imote wēnæ wēnæ cæcā adinque botō tōmengā ingante æpogadō godō ñimpo cæbo ee goqingāā. Edæ ōnōmpo æmæmpoque go mempoga mānimpoga ñimpo cæbo ee goqingā, āmii.

²² Āñongante Itota,

—Inæmpa, wīl ōnōmpo æmæmpoque go mempogaque anguiī. Edæ godōmenque bitō ānimpoga piñnāmaī inte ñimpo cæbi

ate wæætē adopoga wæætē adopoga ayæ cōwē tetenta ganca wæætē wæætē ñimpo cædinque coatodo tiento nõobenta ganca mänimpoga piñnāmaī inte ñimpo cæbi goquingā. Mānōmaī ante Itota tōmengā miñnæ nē godāni inānite, Cōwē piñnāmaī inte ñimpo cæquimīni, angacāimpa.

Nē cædongā nānō waadedāmaī cædō ante odōmongampa

²³ Itota ayæ apænecantapa. “Māninō beyæ bitō ānō bai cædāni wædinque iñæca awēnē odeye nānō apænte āmaī oōnædē Awēnē Odeye incæ tōmengā ingante nē ēñēmiñi imīnite æbānō apænte angampa, ante odōmōmo aquimīni, angantapa.

²⁴ Iñæca awēnē iñōmō, Botō imote nē cædāni incæ botō imote debe ināni inte eyepæ pōnōnāni æncæboimpa, ante cæyongā adocanque tadento ñæñængæde nāni godonte æinta incæ diete miido ganca nānō pōnongā æni beyæ wæætē pōnōnāmaī debe ingā adinque tōmengā ingante ænte māmōnāni pongampa. ²⁵ Pongā adinque tōmengā awēnē iñōmō, Ōmæpocā inte tōmengā ædō cæte pōnongā ænguimoo, ante pōnente wædinque iñmaī angantapa. Wacā ingante nē cædāni tōmengā nāni wencabo bacædānimpā, ante cædinque botō nē pōnōnāmaī ingā nāna gæncaya nāni wencabo tōmānāni inānite bæi ongonde wacā ingante godonte eyepæ ænguimoo, angā. ²⁶ Eñente wædinque edæ nē cæcā iñōmō tōmengā weca ædæ wææñinque edæ, ‘Awēnē, waadete cædinque ee abi adinque botō ayæ ate botō debe inganca tōmanta pōnōmo æncæbiimpā.’

²⁷ Ante wæcā ēñēninque awēnē iñōmō nē cæcā ingante guæa wæte bai pōñēninque, Tōmāā edæ godonte impa, āninque godō ñimpo cæcā abæ tawænte gocantapa.

²⁸ “Incæte tōmengā tōnō wadāni nāni godongāmæ cæcabo iñōnāni wacā guiquēnē adocā ingante tiēē tigitamō ganca nānō pōnongā æni beyæ wæætē pōnōnāmaī debe iñongāimpa. Adinque nē abæ tawænte godingā incæ tōmengā ingante debe ingā ingante godō yao ongonde ñimāmencate cædinque, ‘Do bitō æninta pōnōmi æmo tōō.’ ²⁹ Ante piingā wædinque tōmengā tōnō nē cæcā inte nē debe ingā wæætē nē āningā weca da guicapodinique, ‘Bitō waadete cædinque ee abi iñinque botō ayæ ate pōnōmo æncæbiimpā.’ ³⁰ Ante wæyongā edæ Baa āninque tōmengā, Tōmanta edæ cōwē pōnōmi æmo ate tabaimpā, āninque edæ tee mōnecā ongongantapa.”

³¹ “Adinque edæ tōmēna tōnō nē cædāni guiquēnē, Mānōmaī cæcā, ante wædinque piñninque awēnē weca gote, Mānōmaī cæcampa, ante wæmōnīpa. ³² Ānāni ēñēninque wēnæ wēnæ nē cædingā ingante āñecā pongā ate tōmengā ingante awēnē,

‘Botō imo nē cædīmi inte nē wēnæ wēnæ cæbitapa tōō. Iñæmpa bitō nangui āmi beyænque botō edæ, Tōmanta edæ godonte impa, ante ñimpo cæbo abæ tawænte gobitapa. ³³ Iñinque botō guæa wæte pōnente cæbo bai bitō tōnō nē cæcā ingante bitō adobai guæa wæte pōñēmi bai waa incædōnimpā.’ ³⁴ Āninque awēnē āingā badinique, Tōmengā tōmanta nānō æninta botō imote adodō nānō pōnonguiganca botō, Tōmengā ingante ænte pancæminimpā, āmopa. Āninque tōmengā ingante tee mōnete oncōnē nē pānāni inānite pædæ godongā æñānipa.” ³⁵ Māninque ante odōmōnte apænēdinque Itota godōmenque apænecantapa.

—Edæ miñi waocabo iñōmīnite mīnitō wacā nānō wēnæ wēnæ cædinō ante godō ñimpo cædāmaī imīni adinque awēnē nānō apænte ānō bai botō Mæmpo oōnædē nē quēwengā iñōmō adobai mīnitō wēnæ wēnæ cædinō ante ñimpo cædāmaī inte tōmānō ancæcāimpa, ante apænecāimpa.

19

Nānōogængā ingante nāni pāmæñō ante (Māadoco 10.1-12; Odoca 16.18)

¹ Māniñ Gadideabæ quēwente iñinque apænete ate Itota Ododānō æmæmāa godinique Oodeabæ pongacāimpa. ² Pongā adinique nangui ināni tee empo goyōnāni tōmengā gampocā waa badānitapa.

³ Paditeoidi guiquēnē, Godō āmō ēñēninque Itota wabānō adodeque oda cædete wæcā tocæi, ante pōñēwēnāni inte tōmengā weca pōninque ānānitapa.

—Wængongui æbānō ante wææ angacāi. Wacā tōmengā nānōogængā ingante quiēmē beyænque pāmængā iñinque edæ nō cæte intawo.

⁴ Ante āñōnāni Itota,

—Mīnitō iñæmpa Wængongui beyæ ante nāni yewæmōinta adāmaī inte āmīnitawo. Wēēnēñedē edæ waocā ingante nē Badongaingā iñōmō, “Onguñængā ingampa, ante ayæ, Onquiyængā ingampa, ante badongacāimpa,” ante yewæmongatimpā. ⁵ Ayæ, “Mānōmaī beyæ waocā mæmpocā ingante ēmō cæte wāānā inante ēmō cæte godinique onquiyængā ingante, Botō nānōogængā, ante æmæwo moncæcāimpa. Iñinque mēnaa iñina incæ tōmēna nāna gæncaya badinique adocanque bai bacædaimpā,” ante yewæmongatimpā. ⁶ Iñinque tōmēna nāna gæncaya adocanque bai badinique nāñēnē mēnaa ināmaī inapa. Mānōmaī beyæ Wængongui, Adocanque bai inapa, ante nāna gæncaya nānō nē badongaina iñōnate waocā wæætē pango cædāmaī incæcāimpa.

⁷ Āñongante tōmēnāni wæætē,

—Ínínque, Æmæwo pāmæmo go-
quimi, ante yewæmónínque máninta bitō
yewæmóninta onquiyængā ingante godōmi
ængā ate bitō ónonque pāmæncæbiimpa, ante
Móitee wodi quínante wææ angacāi, ante
ēñencæte ante mōnitō wæmónipa.

⁸ Änāni ēñénínque Itota edæ,

—Íñæmpa, Mímō ömædēmini ínōmini inte
mínitō wænæ wænæ cæinēmini íminipa, ante
wædinque edæ Móitee, Nänōogængā ingante
pāmænguimi, ante yewæmongacäimpa.
Wēēñēñedē íñōmō edæ wīi mánōmai
ingatimpa. ⁹ Wæætē onquiyængā wacā
ingante godō todāmai íñongante tōmengā
ingante nē pāmæningā íñōmō tōmengā
dobæ nānō towengínque edæ wacā
onquiyængā ingante godō mongampa.
Ayæ onquiyængā pāmænte goyongā
wacā onguíñængā tōmengā ingante godō
mōnínque adobai nē towengā bacampa,
ante ämo pōnēmaimínipa.

¹⁰ Angā ēñénínque tōmengā mīñæ nē
godāni guiquēñē,

—Íñæmpa nāna gæncaya ina inte
pāmænāmai ingæimpa, ante bitō äno bai
nō í inínque edæ waocā wēmō cæcā bai waa
ímæmpa, ante pōnente wæmónipa.

¹¹ Ante wæyönānite Itota,

—Wēmō cæcā, ante míni äno bai ante
waocā ædō cæte cæqinggā. Wængonguí
nānō äñinínque máninō ante Ao ante
mōnāmai ínānipa. ¹² Edæ ædānidō mōnāmai
inguināni, ante pancadāniya guiquēñē
wānā cæncadē ēñayedē edæ ongænca
babetamiñænāni ēñagāināni inte mōnāmai
ínāni. Pancadāniya wæætē waodāni cædāni
beyænque babetamiñænāni badínque
mōnāmai ínānipa. Ayæ pancadāniya
guiquēñē öönædē Awēñē Odeye nempo
beyæ ante nāmā pōnénínque Ao ante
edæ mōnāmai ínānipa. Edæ æcānō
botō äno ēñente Ao äna, tōmengánque
mánōmai cæcæcäimpa, ante Itota odōmongā
ēñengadānimpā.

*Wēñænāni inānite gampo cæcadinque waa
apæñecampa*

(*Māadoco 10.13-16; Odoca 18.15-17*)

¹³ Ayæ ate, Wēñænāni inānite Itota
pōnō gampo cæcadinque tōmēñāni beyæ
Wængonguí ingante apæñecæcäimpa, ante
cædinque wadāni tōmengā weca ænte pō
ænte pō cædāni adínque tōmengā mīñæ
nē godāni guiquēñē, Ænte pōnāmai íedāni,
änínque Baa Baa änāni. ¹⁴ Ate wædinque Itota
íñōmō edæ,

—Wēñænāni inānite ee amíni
poncædānimpā. Edæ mánināni nāni pōñēnō
bai adobai pōñēñāni inte edæ öönædē
Awēñē Odeye nempo do quēwēñāni ínānipa.
Ínínque mínitō íñōmō wēñænāni inānite Baa
änāmai íedāni.

¹⁵ Änínque wēñænāni inānite pædæ gopo
gampo cæcadinque wadæ gogacäimpa.

*Máincoo nē nanguí éacā Itota weca ponte
apæñecampa*

(*Māadoco 10.17-31; Odoca 18.18-30*)

¹⁶ Ayæ wacā Itota weca pōnínque,

—Awēñē nē Odōmōmi apæñebi ēñēmoe,
angantapa. Botō æbānō waa cæbo inínque
cōwē wænāmai wantæpiyæ quēwēmaimoo.

¹⁷ Ante äñongā Itota edæ,

—Wængonguí adocanque nē waa cæcā
ingā incæte bitō botō ímonte änínque, Æbānō
waa cæquimo, ämii. Incæte, Quēwenguimo,
ante wæbi inínque bitō, Ílmai cæedāni, ante
Wængonguí nānō wææ angāinō ante ēñente
cæe.

¹⁸ Angā wædinque,

—Ædedō ante ämii.

Äñongante Itota wæætē,

—Ílmai. “Wacā ingante godō wænōnāmai.
Bitō nānōogængā ināmai íñongante godō
mōnāmai. Wacā quí awēmō æñāmai. Wacā
æbānō cæcā, ante godō babæ wapiticæ
änāmai. ¹⁹ Wæmpocā ingante wāñā inante
waa adínque godō waa cæe. Ayæ, Nāmā
ante bitō waadete cæbi bai wadāni inānite
adobai godō waadete cæe.”

²⁰ Angā ēñénínque edéningā íñōmō,

—Botō máninō bitō äno bai do cæte
pægāimo inte botō quínō edæ godōmenque
cæquimo.

²¹ Äñongante Itota wæætē,

—Bitō, Ædæmō nō cæbo bacæboimpa,
ämi inínque edæ öönædē bitō waëmoncoo
ænguinque edæ ñowo godínque ímæca bitō
mánincoo tōmancoo godonte ænínque bitō
æñinta wæætē ömæpodāni inte wædāni
inānite tōmanta godōmi æncædānimpā. Ayæ
edæ botō ímote tee empote pōe.

²² Angā ēñénínque edéningā íñōmō edæ,
Botō máincoo, ante nānō nanguí éacoo
ante pōnente wæwente wædinque wadæ
gogacäimpa.

²³ Gocā inínque edæ Itota tōmengā mīñæ nē
godāni inānite apæñedinque,

—Nawangā ämo ēñēedāni, angantapa.

Öönædē Awēñē Odeye nempo guíte
quēwencæte ante cædinque waodāni
ömæpodāni inte botō mīñæ pōñānipa.
Máincoo nanguí éacā guiquēñē æbānō
cæte ömæpocā inte botō mīñæ ponte
guíte quēwenguinggā, angantapa. ²⁴ Ayæ
cämeyo íñōmō guiyangā ingampa diyæ
daagō guiyampite pædæ tacā. Cämeyo
ñænængade ínogā inte pædæ tadāmai ingā
bai nē éacā adobai ingampa. Tōmengā nāmā
ayongā ñænængā ínogā inte edæ æbānō
cæte Wængonguí Awēñē Odeye nempo do
wāñē guíte quēwenguinggā.

²⁵ Ante apæñecā wædinque tōmengā mīñæ
nē godāni wæætē ancaí guíñénínque,

—Īñæmpa mänömai i Īninque æcänö wäänë guuite quëwenguingää, änänitapa.

²⁶ Itota tömënanï Īnänite cöwä adinque apæñecantapa.

—Waominique incæ nämä müni cædö beyænque ædö cæte quëwëmailmïni. Wæætë Wængonguinque nämä tömänö do cæcä ingampa.

²⁷ Angä ëñente wædinque Pegodo guiquënë,

—Mönitö Īñömö edæ möni ëadincoo owæ caate bitö müñæ ömæpomöni inte pömöni abipa. Ömæpomöni ĩmöni inte edæ quïnö ænguïmönii.

²⁸ Äñongante Itota wæætë tömënanï Īnänite angantapa.

—Näwangä ämopa. Botö badömo ate tömancoo müincooque ĩnque bayonte botö Waobo ëñagaïmo ĩñömö edæ tömëmo ñäö ëmönö ëmöninque edæ pö tæ contacæboïmpa. Īninque munitö botö ĩmote nê tee empogaimïni inte mänïñedë ate tömëmïni tæ contaimpaa tipæmpoga go memppaa pö tæ contadinque awënëidi badinque edæ idægoidi tipæmpoga go mencabodäniya ĩnänite apænte ancæmïnimpa.

²⁹ “Ayæ godömenque ämopa. Minitö näwangä oncodo tao godinque munitö tönïñadäni ĩnänite ëmö cæte godinque badä ĩnante næmpocä ingante wënäni ĩnänite botö ëmöwo beyænque ëmö cæte pöminitapa. Īninque ĩlmai ante näwangä ämopa. Æcänö botö beyænque mänömai cædinque tömengä nänö ëadi ömæ ëmö cæte goda ĩñömö tömengä nänö ëmö cæte godincoo bai adopocoo æncæcäimpa. Wïi adopogaque edæ æninque tömengä wæætë edæ godömenque adopocoo adopocoo æninque tiëë ganca mänimppoga æncæcäimpa. Ayæ botö pönö cæbo æninque tömengä cöwë wantæpiyæ wënämai quëwencæcäimpa. ³⁰ Incæte edæ täno yæcado ongöninäni pancadäniya wæætë yæmïñæ gote ongönäni bacædänimpa. Ayæ yæmïñæ ongöninäni inte wæætë yæcado ponte ongoncædänimpa,” ante Itota apænegacäimpa.

20

Në cædäni cæbänö cædänii, ante odömonte apæñecampa

¹ Itota ayæ edæ, Öönædë Awënë Odeye nempo æbänö quëwënanii, ante odömoncæte ante ĩlmai apænegacäimpa. “Waocä nê ömæ ëacä nänö cæbai Öönædë Awënë Odeye incæ adobai cæcampa. Nê ëacä ñäö bayö oncodo taodinque, Æcänö ñöwoönæ botö yowementacodë cæquïnaa. ² Ante adinque tömengä beyæ nê cæcædäni ĩnänite, Minitö tömää itädë cæmïni ate botö adocanque ingante deënadio tigitamö adotamonque pönöninque wacä ingante

wacä ingante adotamonque adotamonque pönömo æncæmïnimpa, äñongante Ao ante yowementacodë cæcæ godänipa. ³ Gote cæyönäni tömantadæ æñonte nê ëacä tömënanï nänï godonte æññömö gote ayongä wadäni önonque cædämai a ongönäni. ⁴ Adinque tömengä, ‘Minitö adobai gote cæmïni ate eyepæ godömo æncæmïnimpa.’ Angä ëñëninge Ao ante godänipa. ⁵ Ayæ tæcæbæcä ĩñonte adobai tömengä wadäni ĩnänite angä godäni ate wæætë ædæ wæicä ĩñonte adobai taodinque wadäni ĩnänite angä godäni. ⁶ Ate edæ awæncabo wæiyongante edæ adocä tao ayongä wadäni önonque a ongönäni adinque tömengä tömënanï ĩnänite, ‘Quïnante tömää itädë edæ cædämai a ongömïni.’ ⁷ Ante äñongä, ‘Īñæmpa mönitö ĩmönite, Cæedäni, änänipa cæquïmönii.’ Änäni ëñëninge, ‘Minitö adobai edæ botö yowementacodë gote cæedäni,’ angä godänitapa,” ante Itota odömonte apæñecantapa.

⁸ Ayæ, “Gäwadecæ pönï bayonte nê ëacä ĩñömö tömengä beyæ nê apæñecä ingante äninque, ‘Botö beyæ nê cædäni ĩnänite aa pebi pönäni ate bitö tömënanï nänï cædi beyæ godömi eyepæ æncædänimpa. Awæncabo wæiyongä ñöwo pönï gote cædinäni ĩnänite edæ täno godömi ænänï ate wæætë wëenë gote cædinäni ĩnänite edæ ayæ ate godömi æncædänimpa.’ ⁹ Angä ëñente aa peyongä awæncabo wæiyongä gote cædinäni inte täno pönäni ate deënadio tigitamö adotamonque adotamonque godongä ænänï. ¹⁰ Ate adinque täno gote cædinäni guiquënë, Mönö godömenque ænguï impa, ante pönëñönäni tömengä godongä æninque edæ deënadio tigitamö incæ adotamonque adotamonque adopo adopo ænänipa. ¹¹ Æninque tömënanï nê ëacä ingante piinte tededinque, ¹² ‘Mönitö tömää itädë näwancate cæmöni incæ ĩñæmpa cæbii. Ayæ pönäni guiquënë wantæ ĩñö adoque ooda ganca cædäni incæ mönitö bai adopo godömi ænänï wæmönipa töö.’ ¹³ Ante piññönäni nê ëacä wæætë adocanque ingante apænedinque, ‘Īñæmpa botö bitö ĩmite wënæ wënæ cæbogaa. Edæ, Deënadio tigitamö adotamonque pönömo æncæbiimpa, äñömo Ao änämai ĩmitawoo. ¹⁴ Bado, bitö quï incæ ænte goe. Edæ bitö æni bai ayæ ponte cædingä ingante adopo godonguënëmo intabopa. ¹⁵ Edæ botö ëadincoo incæ, Æcänö ingante godonguïmo, ante pönente wædinque ædö cæte tömömo incæ änämai inguïmo. Botö nê waa cæbo ĩñömote bitö guiquënë edæ piinte abi awædö,’ ante nê ëacä angampa.”

¹⁶ Mäninganca ante odömonte apænedinque Itota ĩñömö, “Mänömai cædäni ĩninque botö, Täno yæcado ongöninäni inte wæætë

yæmiñæ gote ongoncæðanimpa, antabopa. Ayæ, Yæmiñæ ongonināni inte wæætē yæcado ponte ongoncæðanimpa, ante apænetaþopa,” ante apænecacæimpa.

Itota, Wæncæboimpa, ante wæætē adodō ante apænecā

(*Māadoco 10.32-34; Odoca 18.31-34*)

¹⁷ Māniū godinque Eedotadēē gocæ cædinque tōmengā miñæ, Dote, ante nāni gocabo inānite Itota nānēnē ænte māodinque idōmæ goyōnāni apænecantapa.

¹⁸ —Nōwo iñōmō edæ mōnō Eedotadēē iñōmō æicæimpa. Æi gote ongōmō ate adocanque, Waocā nē ēñagaingā æyōmōnō on-gongāā, ante wadāni inānite godō odōmongā bæi ongonguināni. Ayæ, Wængongui quī, ante nē godōnāni ñænænāni tōnō nē odōmōnāni nempo tōmengā botō imote pædæ godongā æninque tōmēnāni wæætē botō imote apænte æninque, Cōwē wæncæcæimpa, ancæðanimpa. ¹⁹ Ayæ edæ, Awæ ñænquedimæ cædinque tōmengā ingante timpote wænōedāni, ante tōmēnāni oodeoidi ināmai ināni nempo botō imote wæætē māo godōnāni æncæðanimpa. Æninque tōmēnāni wæætē botō imotedō ante badete toðinque ayæ tæi tæi pāninque awāa timpodāni wæncæboimpa. Nāñe wæmo ate Wængongui angā beyænque botō mēōnaa go adoðnæque iñonte ñāni òmæmoncæboimpa, ante Itota apænecacæimpa.

Tantiago tōnō Wāō badā, Botō āmai ante cæe, angampa

(*Māadoco 10.35-45*)

²⁰ Tebedeo wēna Wāō tōnō Tantiago iñōna tōmēna badā iñōmō tōmēnā wēna tōnō Itota weca ponte ædæ wææninque edæ, Botō āmai ante cæe, ante apænecā. ²¹ Eñēninque Itota,

—Mīnō quīnō apænecæte ante pōmīl.

Åñongante,

—Bitō Tæiyæ Awēnē Odeye bate tæ con-tadinque edæ botō wēñænā inate āmi ate adocanque bitō tōmēmæmi inō adocanque dipæmæmi inō tæ contaquīna āmopa, angantapa.

²² Eñēninque Itota wæætē,

—Iñæmpa adāmai inte mīnitō āmīni awædō. Botō nantate wæwenguimæ bai becabo bai mīnatō edæ adotaca becate bai Ao ante botō beyæ nantate wæwenguimīnaa. Edæ æpænē guite bai botō wænguimæ bai guñēnāmai imīnapa diyæ botō beyæ wænguimīnaa.

Åñongante,

—Ao ante guñēnāmai cæcæmōnaimpa, ānatapa.

²³ Itota wæætē,

—Botō nanguī caate wæwēmo bai mīnatō adotaca bete bai āanque bai caate

wæcæminaimpa. Nāwangā impa. Incæte æcānō botō tōmēmæ inō æcānō botō dipæmæ inō tæ contaquīna botō edæ pōnō ānāmai imopa. Wæætē botō Mæmpo do, Mānīnaque mānimpaa tæ contaquīna, ante nē badongaingā inte tōmengā adocanque godō angā contaquīna, ante Itota apænecacæimpa.

²⁴ Mānōmāinō ante tededapa tōō, ante ēñēninque wadāni diete ganca tōmengā miñæ nē godāni guiquēnē iñāna nāna caya inate edæ pīinānitapa. ²⁵ Pīināni iñinque Itota aa pecā pōnāni ate tōmēnāni inānite iīmai apænecantapa.

—Oodeoidi ināmai ināni awēnēidi æbānō cæðanipa, ante do ēñēmīnīpa. Tōmēnāni iñōmō nāmā beyænque ante cædinque nangui pīinte ānāni wædinque tōmēnāni nempo quēwēnāni wæætē do ēñente cæðanīpa. Ayæ tōmēnāni weca nē ñænænāni inōnāni iñōmō, Tōmēmoque āmo ēñente cæðanī, ante pīinte ānāni wæðanīpa. ²⁶ Mīnitō guiquēnē tōmēnāni nāmā beyænque ante nangui ānāni bai wīi adobaī cæquēnēmīni imīnīpa. Wæætē mīni cabo iñōmīni adocanque ñænængā pōni ingā bacæte ante cædinque tōmengā wæætē edæ mīnitō beyæ nē cæcā baquēnengā ingampa. ²⁷ Ayæ yæcado ongōinente wæcā iñōmō tōmengā yæcado ongoncæte ante cædinque wæætē edæ yæmiñæ pōni gote tōmānāni inānite nē cæcā badinque tōmengā nāmā beyæ ante cæðāmai inguēnengā ingampa. ²⁸ Edæ Waobo ēñagāimo inte adobaī, Botō beyæ pōnō cæcæðanīmpa, ante wīi pōmo imopa. Wæætē wadāni beyæ godō cæcæte ante pōmoimpa. Ayæ edæ nangui ināni tee mōnete bai wæwēñōnāni botō wæætē, Tōmēnāni wibænete tacæðanīmpa, ante tōmēmo wepæ incæ godoncæte ante pōmo imopa, ante Itota apænecacæimpa.

Babetamōna iñōnate Itota gampomongā waa bamōnapa

(*Māadoco 10.46-52; Odoca 18.35-43*)

²⁹ Itota mānīnō godinque Eedicoo nāni quēwēñōmō ponte tayōnāni tōmengā miñæ nangui ināni tee empote godānitapa. ³⁰ Goyōnāni onguñænāna babetamōna iñōmō taadō wedeca tæ contate a ongōñōna, Itota pongampa, ānāni ēñēninque aa pedatapa.

—Awēnē, bitō Dabii wodi pæimi inōmi inte mōnatō imōnate pōnō waadete waa cæe.

³¹ Ante āñōna godongāmæ godāni guiquēnē, Apocænē inguēnē quēwēnaa, ānāni incæ godōmenque yedæ aa pedinque,

—Awēnē, bitō Dabii wodi pæimi inōmi inte mōnatō imōnate pōnō waadete waa cæe, ānatapa.

³² Itota iñōmō næ gongæninque āñecā pōna adinque,

—Mīnatō imīnate quīnō cæbo āmīnaa.

³³ Angā ēñēninque,

—Awënë gampomömi awinca wi ænete bai aquimöna, ante wæmöna.

³⁴ Äñöna Itota tömëna godongämæ wæte bai pönëninque edæ pædæ gopo gampomon-gantapa. Gampomongä ate tömëna waa ada badinque Itota miñæ do godatapa.

21

Itota Eedotadëë iñömö pongampa

(Mäadoco 11.1-11; Odoca 19.28-40; Wäö 12.12-19)

¹ Mänii gote Eedotadëë obo pöninque Odi-bowæñquidi ontacamö goimö Betapaguee nani quëwëñömö ganca pöñönäni Itota tömengä miñæ nê goda mënaa inate da godöñinque angantapa. ² Tömëna inate,

—Mänii nani quëwëñömö ongö amina. Tömëñömö go guite ayömïna bodo on-quiyæ nana wencaya nani ñæi a ongö acæmïnaimpa. Nani ñæi a ongö adinque minatö mänina inate ñi cæyænte botö weca ænte pöda. ³ Ayæ minatö iminate wææ änanï ëñëninque minatö wæætë edæ, Awënë nänö ænguënëno ante ænte gomönpa, ante apæneeda. Ayæ, Tömengä ñinque cæte ate do da pönongä æncæmïnaimpa, ante apæneeda, angantapa.

⁴ Do iñömö Wængongui beyæ nê apæneecä iimainö ante nänö apænegainö ante edæ ñinque baccæimpa, ante mänömai cætimpa.

⁵ “Tiöno iñömö quëwëñäni inänite iimai äädäni,

Badogaa, minitö Awënë Odeye ñöwo minitö weca pongä aedäni.

Edæ mönö mäincoo mongæwënongå bodo wengäa tæ contate mönö Awënë pongampa.

Tömengä gänë pönengä inte bodoga contate pongä aedäni, ante ancæmïnaimpa.”

Ante docä nänö apænegainö ante ñöwo ñinque cætimpa.

⁶ Mänömainö ante angä ëñente godinque tömengä miñæ nê goda iñömö Itota nänö äñinö bai do cædinque, ⁷ bodo nana wencaya inate töi töi ænte pöñinque tömëna weocoo yabæcooque æidämæ wo cæyabæda ate Itota wæñömëñæca inö æi yiyæ tæ contactantapa. ⁸ Adinque edæ nangui inäni, Itota nänö pönguinö, ante tömëñäni weocoo yabæcooque ñö cædinque bee podöwayönäni wadäni guiquëñë gönea gote yæpæma öñabo tapænte mämö bee bee podöwadäni ate tömengä podöwañnonque gocantapa. ⁹ Gocä adinque täno godäni tönö ayæ pönäni tönö godongämæ godinque nangui inäni yedæ äñinque,

—Bitö Awënë Dabii wodi pæimi inömi inte pömi adinque, Möni quëwëñinque impa, ante, Badogaa, ante tomönipa. Awënë Wængongui ëmowo beyænque pömi ñinque bitö toquinque edæ Wængongui bitö imite

waa cæcæcäimpa. Ayæ öönædë iñömö adobai, Badogaa, möni quëwëñinque, ante ingæimpa.

¹⁰ Ante mänii cædinque pöñönäni, Itota Eedotadëë pongä adinque mäniiñömö quëwëñäni ancai guñëninque,

—Mäningä æcänö ingäa.

¹¹ Ante wæyönäni godongämæ pönäni iñömö,

—Itota ingampa. Tömengä iñömö Wængongui beyæ nê apæneecä inongä inte Gadideabæ Näatadeta quëwente pongä ingampa, ante apænegadänaimpa.

Wængongui oncö tæiyæ waëmö baccæimpa, ante cæcä

(Mäadoco 11.15-19; Odoca 19.45-48; Wäö 2.13-22)

¹² Itota iñömö Wængongui oncö ñænæncönë yabæcönë pö guidinque mäniiñömö mäincoo mänäni tönö wadäni nê godonte ænänï tönö ongönäni adinque tömengä tömänäni inänite, Oncodo taoedäni, äñinque da tadongä oncodo tao godänitapa. Ayæ campio ante nani godonte æmpa tönö equemö godoncæte ante nê mänäni nani cönöimpa tönö bæ tacä tömampaa guidömëmæ tæ go wææntapa. ¹³ Ayæ tömëñäni inänite angantapa.

—Wængongui beyæ iimainö ante yewæmongatimpa. “Wadäni botö oncönë pö guidinque botö imote apæneecädänaimpa,” ante Wængongui angä incæte minitö wënæ wënæ cæmïni beyænque Wængongui oncö incæ nê awëmö ö ænänï nani womöincönë bai wentamö bapa töö.

¹⁴ Äñinque Itota ayæ Wængongui oncö ñænæncönë yabæcönë ongöñongä pæ opa pæ opa godäni tönö babetamönäni tömengä weca pönäni adinque tömengä godö cæcä ate waa badänitapa. ¹⁵ Mänömai mä cæcä waa badäni ate wædinque, Wængongui quï, ante nê godönäni ñænæñäni tönö nê odömönäni guiquëñë piinte badänitapa. Ayæ wëñænäni Wængongui oncö ñænæncö yabæque ongöñinque yedæ äñinque, “Badogaa, Awënë Dabii pæimi inömi adinque möni quëwëñinque impa,” ante Yæ äñänitapa. Äñäni ëñëninque nê godönäni ñænæñäni tönö nê odömönäni ængui badinque ¹⁶ Itota ingante äñänitapa.

—Wëñænäni æbänö äñäni ëñëñämai imitawo.

Äñönäni Itota,

Do ëñëmopa. Iñæmpa minitö guiquëñë Wængongui beyæ ante iimainö ante yewæmonte ongö adämai inte änewëmïnitawo.

“Bitö tæcæ ëñädäni tönö goömæ nê gänäni inänite apænebi ëñente, tömëñäni Ao ante nö pönï tededinque,

Wængongui tæiyæ waemō ingānō, ante wat-
apænedānīpa.”

Mānōmāinō ante yewæmonte i apa
ānewēmīnī.

¹⁷ Ānīnque Itota edæ tōmēnāni inānite
ēmō cæte wadæ godīnque Betānia nāni
quēwēñōmō gote mongacāimpa.

*Iigowæ ōmæcawæ i adīnque Itota
pīngampa*

(Māadoco 11.12-14, 20-26)

¹⁸ Nāō bayō Eedotadēē nāni quēwēnō
gāmēnō adodō pōnīnque Itota gæwæante
wæcantapa. ¹⁹ Gomō adīnque iigowæ a ongō
ponte ayongā ōñaboque ēmæ adīnque,

—Ōmæcabi imi cōwē incadāmai
incæbiimpa.

Āñongā iigowæ incæ guiñē wæniimpa.
²⁰ Guiñē wæ adīnque tōmēngā mīñæ nē
godāni iñōmō,

—Quimæ iigowæ iñontobæ guiñē wæ
amō.

²¹ Ante wæyōnāni Itota iñōmō edæ,

—Nāwangā ante mīnitō imīnite
apænebopa. Wīi æmæ pōnēmīni inte
wede pōnēmīni inīnque mīnitō iigowæ inte
botō cæbai adobai do cæbaiimīni. Ayæ
godōmenque cædinque mīnitō ānanquidi
ongō ate, “Ānanquidi ēñēmi, ānīnque, Bitō
cabænte wo gote gāwapænē guīe,” ante
āmi inīnque edæ mīnitō ānīnō bai do
babaimpa. ²² Wængongui ingante wede
pōnēmīni inīnque quīēmē incæ ante tōmēngā
ingante apænēmīni incæ mīni ānīnō tōmānō
æncæmīnīmpa, ante apænegacāimpa.

*Awēnē imīpa, ante æcānō ānāi, ante Itota
ingante ānānīpa*

(Māadoco 11.27-33; Odoco 20.1-8)

²³ Itota ayæ Wængongui oncō ñænæncōnē
yabæcōnē pō guīdinque odōmonte
apænecā ēñēñōnāni, Wængongui qui, ante
nē godōnāni ñænænāni tōnō oodeoidi
inānite nē aadāni, Nāni Picæncabo, nāni ānāni
tōnō tōmēngā weca pōnīnque ānānitapa.

—Æcānō nē angā inte bitō imite angā
cæbii. Iñæmpa, Nē āmi bacæbiimpa, ante
æcānō pōnō āna ēñente nē āmi inte bai cæbii,
ante ēñencæte ante wæmōnīpa.

²⁴ Ānāni ēñēnīnque,

—Mīni āmai botō adodeque āmo ēñēnīnque
mīnitō tāno apænēmīni ēñente ate māñīfēdē
ate botō wæætē, Æcānō nē āna inte pōnō
angā cæboo, ante apænēbo ēñēmaimīnīpa.
²⁵ Wāō wodi ingante guīquēnē, Bitō æpænē
guidoncæbiimpa, ante æcānō āna ēñente
guidongāi, ante pōnēmīnī. Wængongui
ōōmædē apænecā ēñente cæcantawo. Wæætē
edæ waodānīque ānāni ēñente cæcantawo.
Ædō ante pōnēmīnī.

Itota angā ēñēnīnque tōmēnāni
nāmāneque wæætēdō wæætē tedecōnīnque,

“Wa, æbānō anguii, ante wædānitapa.
Iñæmpa, Wængongui angā ēñēnīnque Wāō
cægacāimpa, āmō bai Itota wæætē mōnō
imonte, ‘Quīnante pōnēnāmai imīnitawo,’
ancædongāimpa,” ante wædānitapa.
²⁶ Wæætē edæ, “Waodāni tōmānāni,
Wængongui beyæ nē apænecā Wāō wodi
ingacāimpa, ante pōnēnānīpa, ante pōnente
wædinque Itota ingante nē ānāni iñōmō,
Wadāni pīnāni wæcæ wæ, ānīnque,
Waodānīque ānāni ēñente Wāō cægacāimpa,
ante mōnō ædō cæte anguii.”

²⁷ Ante pōnēnīnque tōmēnāni Itota ingante
edæ,

—Wa, ēñēnāmai imōnīpa.

Ante wæyōnāni Itota edæ,

Inīnque botō adobai, Æcānō nē angā inte
pōnō angā cæboo, ante mīni ānīnō ante
apænēdāmai incæboimpa, angacāimpa.

*Mæmpocā wēna cæbānō cæda, ante
odōmongampa*

²⁸ Itota odōmoncæte ante apænēdinque,

—Mīnitō guīquēnē odōmonte tedebō
ate āmo ēñente apænēmīni ēñēmoedāni.
Iīmāi impa. Waocā tōmēngā wēna mēnaa
iñōna adocanque weca godīnque mæmpocā
iñōmō, “Botō wēmi, bitō ñōwoonæ yowe-
mentacodē cæte pōe.” ²⁹ Āñongā edæ,
“Wīi goinēmo,” angampa. Wæætē edæ
ayæ ate pōnencōnīnque edæ, Botō ædō cæte
Baa ānīnque quēwēmo, ante pōnēnīnque
edæ mæmpocā nānō ānīnō ante ēñēnīnque
edæ cæcæ gocampa. ³⁰ Ayæ ate mæmpocā
wæætē wacā wēngā weca adobai māo
āñongā tōmēngā edæ, “Bitō mæmpobi āmi
ēñente gocæboimpa,” ante apænecā incæte
edæ godāmai ingampa. Mānīnque ante
tedebō. ³¹ Nōwo mīnitō imīnite āmopa,
Mæmpocā nānō ānō bai æcānō cæcāi, ante
pōnēmīni.

Āñongante,

—Tānocā.

Ante apænēyōnāni Itota tōmēnāni inānite
wæætē,

—Nāwangā āmopa. Mīnitō Awēnē
Wængongui Odeye nempo pō guīdāmai
iñōmīnite odōmāno awēnē beyæ nē æwēnāni
tōnō onquiyænāni māincoo beyæ ante nē
towente quēwēnāni tōnō tāno ponte do guī-
icædānīmpa. ³² Edæ Wāō wodi mīnitō weca
ponte nō cæte tōinō ante odōmōñongante
mīnitō iñōmō pōnēmīnitawogaa. Ayæ
godōmenque awēnē beyæ nē æwēnāni incæ
māincoo beyæ ante nē towente quēwēnāni
tōnō incæ do pōnēnānīpa. Ayæ mīnitō
mānōmai cædāni adīmīni incæte wæætē
wēnæ wēnæ mīni cædinō ante wædāmai
inte wīi pōnēmīnitapa tōō, ante Itota
apænēgacāimpa.

Nē aadāni inguēnēnāni incæ wiwa cædānīpa, ante

(Māadoco 12.1-12; Odoca 20.9-19)

³³ Ayæ godōmenque apænedinque Itota, “Wængonguī Awēnē æbānō cæcāā, ante eñencæminīpa, ante botō imæca quēwēnāni nāni cæinō ante odōmonte apænebō eñēdāni. Edæ iūmai impa. Ōmæ ēacā yowementacodē da da māo da caate wææ cædinque, Tōmēmō ænte pinā pinā gāwate wæ yopænte tōmēmæ ænguīñōmō ante cædinque ææ wote badongantapa. Ayæ, Yowementacodē awēmō guīdāmai incædānīpa, ante cædinque æi wæñōmēnæca gomō aquīñōmō mæñongā ate nē ēacā iñōmō wabæca gocæ cædinque wadāni ōmæ wite nē aate tā pedāni inānite apænecantapa. Botō yowementacodē incæ mīnitō ōmæ wite aedāni. Aayōmīnite botō, Mīnitō quī, ante pancamonga pōnōmo æncæminīpa, angā Ao āñōnāni wadæ gocantapa. ³⁴ Ayæ yowedeipo wodo bayonte tōmengā ingante nē cædāni inānite, Mīnitō yowementacodē nē aadāni weca godinque botō yowemō incæ pancamonga āmīni æninque botō weca wæætē māmōmīni æmōedāni, angā godānitapa. ³⁵ Angā godinque pōnāni adinque yowementacodē nē aadāni guīquēnē nē æncæ pōnāni inānite bæi ongōninque adocanque ingante nanguī tæi tæi pāninque wacā ingante godōmenque wæñōnāni wængā ate ayæ wacā ingante dicaca tacadāni. ³⁶ Adinque māo apænedāni wædinque nē ēacā iñōmō wæætē godōmenque nanguī nāni da godongā gote pōnāni adinque nē aadāni guīquēnē adobaī cædāni wædānitapa.”

³⁷ Ayæ godōmenque odōmōninque Itota apænecantapa. “Inique nē ēacā iñōmō, ‘Tōmēmō wengā ingante da godōmo gocā adinque tōmēnāni guīñente wædinque ee abāinānīpa,’ āninque tōmengā ingante da godongā tōmengā pōnī gocantapa. ³⁸ Yowementacodē nē aadāni guīquēnē gomō ayōnāni nē ēacā wengā dicæ pongā adinque, ‘Tōmengā ingampa. Wæmpocā māincoo inī edæ iingā iñōmō nē ænguīngā ingampa cæmōō. Mōnō edæ māo wæñōmō wængā ate edæ mōnō quī babaimpa.’ ³⁹ Ānewēninque tōmēnāni nē ēacā wengā ingante edæ bæi ongote yowementacodē wææ cæte iñōmō yabæque edæ, Ōmæ, ante wæñōnāni wængantapa.”

⁴⁰ Ante māninganca odōmonte apænedinque Itota iñōmō tōmengā ingante nē ānināni inānite angantapa. “Inique mīnitō iñōmō, Nē ēacā pōninque edæ yowementacodē nē aaquēnēnāni inānite æbānō cæquīngāā, ante pōnēmīni.”

⁴¹ Ante āñongante tōmēnāni wæætē,

—Ōmæ, ante nē wæñōnāni inānite tōmengā nāemæ edæ, Ōmæ, ante wæñongā wæncædānīpa. Ayæ wæætē, Ēdānidō nō cædinque yowedeipo iñō yowedeipo iñō tā pete pōnōnāni ænguīmo, ante adinque awēnē, Mīnitō wæætē aacæminīpa, angā Ao ante aacædānīpa, ante apænedānitapa.

⁴² Itota ayæ tōmēnāni inānite,

—Wængonguī angā eñente nāni yewæmongaintaa æbānō ongō ante mīnitō adāmai inte āmīni awædō, angantapa.

“Dica ænte adinque, Wēnæ wēnæ inca, ante nē mæñōnāni nāni wido cædinca incæ gomonga wæmonca inca inīnque tāno nāni ñōnōninca bæbængapa do bacapa.

Wængonguī Awēnē incæ mænōmai cæcā adinque

mōnō waocabo guīñente wædinque waa amompa,”

Ante yewæmonte impa abāimīnīpa.

⁴³ Māninō mīni eñēnāmai inō beyæ mīnitō Awēnē Wængonguī Odeye nempo quēwente mīni cæquēnēnō incæ ō ænte bai cæcā wæcæminīpa. Ayæ wæætē wadāni inānite tōmēmō wainca incate bai nō cædāni inānite godō angā eñēninque tōmēnāni wæætē tōmengā nempo quēwente waa cæcædānīpa. ⁴⁴ Botō iñōmō mānū dica wæmonca bai inōmo inte āmo eñēninque nē wæcā iñōmō tōmengā iñōmō mānincaā tæ go wææninque wædænque tobænte wæcā bai inongā inte botō ōnōwa gāānē ædæ wææncæcāimpa. Wæætē æcānō ingante Wængonguī piinte mānincaā tacacā inaa tōmengā guīquēnē quīēmē bai yaintai bai goquīnō anguēnē, ante pōnēmīniyaa.

⁴⁵ Ante nē aaquēnēnāni nāni cæinō ante odōmōninque Itota apænecā eñente wædinque, Wængonguī quī, ante nē godōnāni ñænænāni tōnō Paditeoidi iñōmō, Iñæmpa mōnō imonte piinte angā awædō, ante pōnente wædinque, ⁴⁶ Quīnō cæte tōmengā ingante bæi ongote ō ænguī, ante cōwā adānitapa. Incæte, Waodāni tōmānāni, Wængonguī beyæ nē apænecā Itota inongā ingampa, ante pōnēnānīpa, ante wædinque, Pīnāni wæcæ wæ, āninque edæ ñimpo cægadānīpa.

22

Monguīmæno ante odōmonte apænecampa (Odoca 14.15-24)

¹ Wængonguī Awēnē æbānō cæquīngāā, ante eñencæminīpa, ante imæca awēnē nānō cæinō ante Itota tōmānāni inānite wæætē odōmonte apænegacāimpa.

² “Inguipoga awēnē odeye tōmengā wēñæ beyæ monguīmæno ante nānō cæbai ōñædē Awēnē Odeye iñōmō adobaī cæcampa. ³ Inguipoga awēnē iñōmō tōmengā ingante nē cædāni inānite, Wēnē botō

ánináni inánite wente ænte pōedāni. Angā tē tē wente ænāni ēñēninque edæ, Wīl pōinēwædō, ānāni. ⁴ Ēñente wædinque awēnē wæætē wadāni tōmengā ingante nē cædāni inánite da godōninque, ‘Wēēnē botō ānināni weca godinque botō beyæ īimānō ante apænemīni ēñencædānimpā. Botō wengā monguimæno ante wagadaidi onguifænāni tōnō cænināni oguimo pōni ināni inánite do wæñōninque botō ææmænoca do eyepæ cæbopa. Botō wengā monguimæno pō beedāni, ante mæmpocā angampa, ante edæ botō beyæ apæneedāni.’ ⁵ Angā ēñēninque gote apæneyōnāni tōmēnāni ēñēnāmai inte ōnonque wadæ godinque pancadāniya gōnea ante goyōnāni wadāni godonte æncæte ante godānitapa. ⁶ Wadāni ayæ ongōnāni guiquēnē ēñēnāmai inte awēnē nānō da godonte nē cædāni inánite piinte wēnæ wēnæ cædāni wæyōnāni māo wæñōnāni wæñānitapa.”

⁷ “Mānōmai cædāni ate wædinque awēnē odeye iñōmō āngā badinque tōmengā tontadoidi inánite angā ēñēninque nē wæñōnināni inánite māo capo wæñōnāni. Wæñāni adinque godōmenque onconcoo tōmēnāni nāni éadincoo iya tānāni. ⁸ Īninque edæ awēnē wæætē tōmengā ingante nē cædāni inánite, ‘Monguimæno do eyepæ cæte ongō incæte botō nē ānināni waa cædānīpa diyæ āmo bequīnāni. ⁹ Īninque mīnitō wæætē edæ iyænopoga iyænopoga māo godinque æcāmenque ingante bee tēninque tōmēnāni tōmānāni inánite āmīni ææmæno pō becædānimpā.’ ¹⁰ Angā ēñente cædinque nē cædāni taadonque pō bee bee tēninque waa cædāni incæ wīwa cædāni incæ tōmānāni inánite āfete ænte māmōnāni pō monguimæno oncōnē pō guidinque eyede goto gongænte bedānitapa.”

¹¹ Ayæ, “Awēnē odeye iñōmō ēñacæ pō bedāni inánite acæ guiyongā edæ adocanque monguimæno bequī weocoo awēnē odeye nānō pōñōnincoo incæ wēñadāmai inte ōnoncooque ee mongængā. ¹² Adinque, ‘Æmigo, bitō ædō cæte monguimæno weocoo wēñadāmai inte ōnoncooque ee mongænte guībīi,’ ante āñongā edæ pæ wēñecā. ¹³ Adinque awēnē odeye iñōmō nē aadāni inánite āninque, ‘Nē monguimæno weocoo wēñadāmai ingā ingantē mīnitō goti wimpote wææ goti wēwate edæ wēmō iñōmō nāni guingo imonte Yæ yæ ante wæyōmō māo wido cæedāni,’ ante awēnē odeye angampa. ¹⁴ Mānōmai nāni cædō bai adobai impa. Edæ nanguī ināni inánite Wængonguī, Pōedāni, angā incæte edæ wædænque ināni inánite apænte Ao ante ængampa,” ante Itota apænegacāimpā.

Tæiyæ Awēnē nānō āntamō ante ted-edānīpa

(*Māadoco 12.13-17; Odoco 20.20-26*)

¹⁵ Itota mānōmai apænecā ēñente wædinque Paditeoidi wadæ godinque godongāmæ ponēē cōninque, Mōnō piinte apænte anguinque ante quīnō cæmō ate Itota adodeque wapiticæ tededinque oda cæquingā. ¹⁶ Ante pōñēninque tōmēnāni nē ēmīñēnāni tōnō Edodeidi inánite da godōnāni godinque Itota weca pōninque,

—Awēnē nē Odōmōmi ēñēmi. Bitō nō pōnente cæbi īmīpa, ante do ēñēmōnīpa. Ayæ bitō ayōmi mōnitō tōmāmōni ōnōmōnīque imōni adinque bitō, Waodāni æbānō anguīnāni, ante ayæ, Æbānō cæquīnāni, ante wædāmai inōmi inte edæ Wængonguī taadō ante guīñēnāmai inte nō odōmōnte apænebīpa. ¹⁷ Īninque bitō æbānō pōñēmī. Odōmāno gobiedōno beyæ ante tæiyæ awēnē Tetædo tīguitamō nānō āntamō ante æbānō wææ yewæmonte ī, ante ēñencæte ante wæmōnīpa edæ. Godonte edæ waa cæte intawo. Wæætē wēnæ wēnæ cæte intawo, ante apænebi ēñencæmōnīpa.

¹⁸ Āñōnāni Itota iñōmō tōmēnāni do, Cæmō wapiticæ tedecæcāimpā, ante nāni ānīnō ante do ēñēninque tōmēnāni inánite wæætē edæ,

—Mīni wadō tedete wadō cæcabo iñōmō edæ quīnante botō imote, Æbānō cæmō oda cæquingā, ante cæmīnī. ¹⁹ Tetædo tīguitamō nānō āntamō odōmōmīni aquīmo.

Āñongā deēnadio tīguitamō adotamonque ænte pōnāni. ²⁰ Adinque tōmēnāni inánite Itota,

—Æcānō awīnca bai yewæmonte badonte ī. Edæ æcānō émōwo ante yewæmonte ī.

²¹ Āñongante,

—Awēnē Tetædo awīnca bai yewæmonte badonte impa. Adocā émōwo ante yewæmonte ongō amōnīpa.

Ānāni ēñēninque Itota iñōmō edæ,

—Awēnē Tetædo quī ī Īninque edæ Tetædo ingante godongæimpā. Wæætē Awēnē Wængonguī quī ī Īninque Wængonguī ingante godonguī ī apa ānewēmīnī.

²² Ante Itota nānō ānīnō ēñente beyæ, Quīēmē bai angā, ante ancai guīñente wædinque wadæ gogadānīpa.

Edō cæte nāni ōmæmonguī, ante wæedānīpa

(*Māadoco 12.18-27; Odoco 20.27-40*)

²³ Mānīōnæ adoōnæ iñonte Tadoteoidi nē, Waocā wæninque nāni ōmæmōnāmai æmæwo wængampa, ante nē ānewēnāni inte Itota weca pōninque, īimānō ante ēñencæte ante wæmōnīpa, ānānitapa.

24 —Awënë nē Odömömi eñëmi. Möitee wodi mönō beyæ ante wææ yewæmōninque ïimai ante yewæmongacäimpa. Waocä möninque wëñæ tapæidämaï inte wængä ate tömengä tönïñacä wæætë owæmpoingä ingante möninque wëñæ tapæidinque, Botō tönïñacä wodi wengä ingampa, ante pæpogacæcäimpa, ante yewæmongacäimpa. 25 Nōwo ïñömō möni cabo ïñömönite adodäni nāni caipæ ònopmo æmæmpoque go mënaa ināni ïñönāni bamoncadengä möninque wëñæ tapæidämaï manguiwëninque edæ nāne wængä ate ayæmengä wæætë owæmpodingä ingante mongä. 26 Ìninque ayæmengä incæ adobai wëñæ òmæpocä nāne wængantapa. Ayæ wææ wacä ayæmengä adocä ingante monte ate wëñæ adobai tapæidämaï inte edæ nāne wængantapa. Ayæ wææ wacä adobaingä, ayæ wææ wacä tapæidämaï inte nāne, ayæ wææ wacä, ayæ wææ ayæmengä pōni adocä ingante möninque wëñæ tapæidämaï inte nāne wængantapa. 27 Onquiyængä guiquënë owæmpote wædinque tömengä pōni nāne wængantapa. 28 Ìninque, Mōnō ñāni òmæmonguiönæ, ante mīni äönæ ïñonte mäningä owæmpoingä ïñömō æcänō nānōogængä baquingä. Edæ tömengä ingante ïñömō edæ tömānāni manguiwengadānimpa. 29 Äñönānite Itota wæætë,

—Minitō ïñæmpa. Wængongui angä eñente nāni yewæmōinta adāmaï inte bai ämīni awædō. Wængongui adocanque tæi piñængä inte edæ tömää cacampa, ante pönëñāmaï inte edæ oda cæte ämīni awædō. 30 Edæ Wængongui anquedoidi öönædë cōwë owodāni bai ïñönāni inte waodāni ñāni òmæmōninque godō ññänāmaï ināni inte edæ mönāmaï inguinānidō anguënë. 31 Wæætë do wængaināni nāni ñāni òmæmonguinō ante eñencæminimpa, ante Wængongui beyæ yewæmōnte ongō adāmaï imīnitawo. 32 “Botō ïñömō Abadäo Wængonguimo ingaimo inte ayæ Itæca Wængonguimo ingaimo inte botō AACOCO Wængonguimo adobo ïmo anguënë,” angacäimpa. Ante nē angaingä inte edæ æmæwo wæñināni tömēnāni Wængonguingä ædō cæte inguingä. Wæætë edæ müi quëwëñānique tömēnāni Wængongui ïnogä ingampa. Ìninque edæ nē wænte godināni incæ ayæ müināni quëwëñāni ïñānīpa, ante pönenguënë änewëmīni.

33 Ante apænecä eñëninque godongämæ eñengönāni guiquënë, Äbänō cæte Itota waa pōni odömōnte apænecä eñëmōni, ante wægadānimpa.

*Wængongui nānō wææ angaine mënea tæïnedapōni ënepa
(Mäadoco 12.28-34)*

34 Tadoteoidi guiquënë, Ädō cæte gomonga angui, ante edæ pæ wëenedānitapa. Mänōmaï Itota nānō nō äñinō beyæ pæ wëenedānīpa, ante tededāni eñëninque Paditeoidi wæætë godongämæ pönānitapa. 35 Itota æbänō cæte wapiticæ ämaingä, ante pönëñönāni adocanque idægoidi nāni wææ angainō ante nē ate eñëñongä ïñömō Itota ingante angantapa.

36 —Awënë nē Odömömi eñëmi. Wængongui, ïimai cæedāni, ante nānō wææ angainecoo ante pönëninque æedō tæïne pōni ï ïñonte mönō nanguï eñente waa cæquï.

37 Äñongante Itota ïñömō,

—Ïmaïno ante nānō wææ angaine ïñömō edæ tæïne pōni ïñonte mönō nanguï eñente waa cæcäimpa. “Wængongui mönō Awënë ingante bitō mümō entwente waadedinque bitō ocāi encabi inte nō pönëninque bitō öñowoca ewocabi inte edæ tömengä ingante ædæmō waa waadete pönë.” 38 Mänīne nānō wææ angainō waa pōni ï ïninque mäñīne tāno waa cæquï impa. 39 Ayæ wade nānō angainō adobai nanguï waa eñente cæquï impa. “Bitō nāmā bitō waadete waa cædō bai adobai pönëninque wadāni ïñānite adobai waa waadete cæe.” 40 Ïmaï cæedāni, ante Möitee wodi nānō wææ angainō ayæ Wængongui beyæ nē apænedāni nāni angainō cæcæte ante cædinque edæ mäñīne Wængongui mënea nānō wææ angaine eñente cæte beyænque edæ tömānō edæ do eyepæ cæte impa, ante Itota apænecäimpa.

Codito æcänō pæingä ïnogä ingä, ante apænecampa

(Mäadoco 12.35-37; Odoca 20.41-44)

41 Mänīi Paditeoidi adoyömō ponte ayæ ongöñönāni Itota tömēnāni ïñānte angantapa. 42 Itota ïñömō tömēnāni ïñānite,

—Codito ïñömō æcänō ingä, ante pönëmīni. Äcänō Wengä ïnogä ingä, ante pönëmīni.

Ante äñongante Paditeoidi wæætë,

—Awënë Dabii pæingä ïnogä ingampa.

43 Äñönānite Itota edæ,

—Awënë Dabii pæingä ïnogä ïñongante edæ Dabii tömë edæ Codito ingantedō äñinque quñante, Awënë ïmīpa, angacäimpa.

44 “Awënë Wængongui incæ botō Awënë ingante apænëdinque, Botō tömëmæ ïnō tæ contayōmi, bitō ïmite nē piñāni ïñānite bæ tabo ate bitō öñowa gāänë ongöñönānite bitō pinä gāwacæbiimpa, angacäimpa.”

Ante Wængongui Öñowoca apænecä eñëninque Dabii wodi yewæmongacäimpa. 45 Codito nē Awënë ingampa, ante awënë Dabii wodi nānō nē angaingä ïnogä inte edæ adocä Codito ïñömō ædō cæte nāëmæ

Awënë Dabii wodi pæingä inguingä, ante pönenguënë änewëminii.

⁴⁶ Ante äfongä edæ tömänäni, Mönö ædö cæte wæætë anguii, äninque ëñënëmaï inte edæ pæ wëenegadänimpa. Ayæ iincayæ ate, Apænebi ëñëmönii, ante ædö cæte anguiimoo, ante edæ tömänäni guifente wædinque änämaï ingadänimpa.

23

Paditeoidi tönö nê odömönäni inänite Itota piinte angä

(Mäadoco 12.38-40; Odoco 11.37-54, 20.45-47)

¹ Pæ wëenedäni adinque tömengä miñæ nê godäni godongämæ ongönäni nanguï inäni tönö ongöñönäni Itota tömänäni inänite apænegacäimpa.

² “Nê odömönäni tönö Paditeoidi iñömö Möitee wodi nänö angainö ante nê ëñënëni inte nê nö odömönte apænedäni inänipa.

³ Mänömaï inäni adinque munitö iñömö tömënëni äniñö ante tömänö ante cöwë ëñente cæedäni. Wæætë tömënëni nani cæi bai cædämaï iedäni. Edæ, Iimaï cæedäni Iimaï cæedäni, ante nani äñö ante tömënëni nämä incæ ëñënëmaï cædänipa. ⁴ Edæ mäincoo teëmencoo mö paate wadäni önönancapæ cö cædancapænäni bai cædinque tömënëni, Wadäni guëmancædänimpa, ante cædämaï inäni inte önompogonca adopogoncaque incæ gä ænancapænämaï inänipa.”

⁵ “Quiëmë cædäni incæ tömënëni cöwë, Wadäni botö imote waa acædänimpa, ante cædänipa. Wadäni, Bitö Wængongui beyæ nani yewæmongainta nanguï abi impa, ante pönëninque mönitö imönite waa acædänimpa, ante babæ cædinque mäninta æmontaicaade ñænæ pöni badönte mini tente önöncaipoga wo cæte encapodänipa. Ayæ, Bitö Wængongui ingante nanguï apænebi imipa, ante pönencædänimpa, ante cædinque tömënëni weocoo ñä cæwate ñä cæwate doyæ guënë ewa badöninque doyæ pöni wëñate mongænänipa. ⁶ Ayæ ææmæ becæ godinque tömënëni, Botö täno bete tocæboimpa, ante waëmompaa pöni tæ contate bete todänipa. Ayæ Wængongui angä nani ëñente yewæmongainta ate odömöincönë pö guiddinque tömënëni nämanque ante pönëninque waëmompaa pöni tæ contate todänipa. ⁷ Ayæ woadäni nani godönte æiñömö wainö pancadë goyönäni wadäni pö bee téninque, Nê odömömi, bitö imite waa amönipa, ante apænedäni ëñëninque edæ nê odömönäni iñömö nanguï todänipa,” ante Itota apænecantapa.

⁸ Ayæ apænedinque, “Minitö guiquënë munitö Awënë nê Odömongä adocanque pöni iñongä mini caipæ iñöminite wadäni, Awënë nê odömömi imipa, ante änämaï

incædänimpa, ante wææ cæedäni. ⁹ Ayæ mönö Mæmpo adocanque pöni öönædë quëwengä ingä adinque munitö waocä ingantedö ante apænedinque, Mönö mæmpo ingampa, ante änämaï iedäni. ¹⁰ Ayæ, Mönö Awënë nê Odömongä iñömö adocanque pöni Codito iñongä ingampa, ante ëñëmini iñöminite wadäni, Nê ämi imipa, ante änämaï incædänimpa, ante wææ cæedäni. ¹¹ Ayæ edæ mini cabo iñöminite wacä beyæ wacä nê godö cæcä iñömö ñænængä pöni ingä incæcäimpa. ¹² Edæ nämä ængö cæte bai cædinque æcänö, Botö botö, äna tömengä iñömö edæ wææntodönte bai önönque bacæcäimpa. Wæætë æcänö, Botö botö, änämaï inte, Önömoque imopa, äna iñömö edæ tömengä ingante ængö cæte bai cædäni adinque wadäni tömengä ingante waa acædänimpa,” ante Itota tömengä miñæ nê godäni inänite apænegacäimpa.

¹³ Ayæ nê odömönäni tönö Paditeoidi inänite Itota piinte angantapa. “Minitö iñömö mini pante wæquinque edæ wadö tedete wadö cæminii iminipa. Wadäni öönædë Awënë Odeye nempo guiddämaï incædänimpa, ante munitö odemö tee mönete bai wææ cæminipa. Tömëmini guiddämaï imini inte munitö wadäni guicæ cæyönänite edæ tömënëni nani guiddämaï wæquinque edæ wææ cæminipa. ¹⁴ Nê odömömini tönö Paditeoidi imini mini wadö tedete wadö cædincabo inte mini wæquinque impa. Owæmpöinäni oncö ö æmini incæte munitö, Wantæpiyæ botö tedebö beyænque wadäni botö imote waa acædänimpa, ante Wængongui ingante wantæpiyæ nê tedemini inte godömenque mini panguinque ingæimpa,” ante Itota angacäimpa.

¹⁵ Ayæ apænedinque, “Nê odömömini tönö Paditeoidi imini mini wadö tedete wadö cædincabo inte mini wæquinque. Edæ, Adocanque incæ mönitö ëmiñængä bacæcäimpa, ante munitö æpæ tömämæ wogaa gote diqui diqui mininque inguipoga taadö tömänö gote diqui diqui minte ayömöni adocanque Ao angä adinque munitö tömengä ingante godö odömömini. Eñëninque tömengä guiquënë munitö wënë wënë goquino godömenque godinque gomonga nê wënë wënë cæcä badinque tadömengadænguipo nänö gomonga panguinque munitö miñæ tee empote gocampa töö.”

¹⁶ Ayæ, “Babetamömini mini wæquinque babæ ante mäömini ate edæ oda cæte godänipa. Iñæmpa Iimaï änewëminipa. Botö äñö nöingä baquino angüënë, ancæte ante æcänö, Wængongui tæiyæ waëmö oncö tæi ongö bai impa, äna tömengä önönque tedete apænecampa, ante änewëminipa. Wæætë edæ, Wængongui tæiyæ waëmö oncö oodö mæ ongö bai impa, ante

æcänö äna guiquënë tömengä nö angä inte cæcæcäimpa,' ante minitö iñömö babæ wapiticæ äminipa. ¹⁷ Mini babetamö incabo mimö ömædë incædö. Edæ Wængongui tæiyæ waëmö oncönë oodo öñö adinque, Oodo incæ godömenque waa pönö impa, ante babæ ante pönëminipa. Iñæmpa oodo æninqe, Wængongui oncö waëmö emonguinta, ante ænte badönäni beyænque oodo tæiyæ waëmö bapa, ante pönëminiyaa."

¹⁸ "Ayæ edæ minitö babæ apænedinque, 'Botö äno nöingä baquinö anguënë, ancæte ante waocä, Wængongui qui, ante baö näni iya täimpa tæi ongö bai impa, ante æcänö äna önonque tedecampa. Wæætë mäninö ancæte ante, Baö iya täimpa näni iya tanguingä bai impa, ante æcänö äna iñömö tömengä nö ante cæcæcäimpa,' ante minitö babæ wapiticæ äminipa. ¹⁹ Mini babetamö incabo äminä eñëmoedäni. Ædö waa intawo. Näni iya täimpa incædö tæiyæ waëmö intawo. Wæætë edæ baö näni iya tanguingä incæ tæiyæ waëmö intawo. Æbänö ante pönëmini. Iñæmpa baö æninqe, Wængongui qui, ante iya tänäni beyænque baö näwäaquinä bacampa, ante pönëminiyaa. ²⁰ Ininque, Botö äno nöingä baquinö anguënë, ancæte ante waocä, Näni iya täimpa tæi ongö bai impa, ante æcänö äna tömengä, Iya täimpa tönö baö näni iya tanguingä tönö tömäa beyæ, ante bai dobæ angampa. ²¹ Ayæ æcänö, Wængongui tæiyæ waëmö oncö beyænque ante näwangä baquinö anguënë, äna tömengä Wængongui oncö beyæ ayæ mänincönë nê owocä beyæ adobai dobæ angampa," ante apænegacäimpa.

²³ Ayæ apænedinque Itota, "Nê odömömini tönö Paditeoidi incæ mini wadö tedete wadö cædincabo inte mini wæquinque impa. Tömëmini mini minte pædimö tönö guimö ogui wayabo tönö tömëmö mini tä pete ænimö tē gæte diete ganca mini cabo tē gædincoo ñö cædinque adocooque æninque, Wængongui qui, ante godöninque waa cæminipa. Incæte edæ Wængongui, Nö cæedäni, ante näno äno ante, Godö waadete waa cæedäni, ante näno äno ante, Wede pönente cæedäni, ante näno äno ante minitö mini wæquinque eñente cædämaï iminipa. Imaï täno waa cæquënëmini inte minitö mänincoo ayæ godömenque Wængongui ingante godömini inguënëmini iminipa. ²⁴ Babetamömini babæ ante mäömini ate edæ oda cæte godänipa. Minitö, Diete ganca minitö mänincoo ongö adinque adocooque cöwë godongui i,

äninque owætaca bequifñömö guincawæ owoyö tæ wedote bai cæminipa. Wæætë edæ Wængongui näno äno bai cædämaï inte minitö edæ cämeyo ñænængade pönö owoyö önonque ade bete bai pönënamäi inte cæminipa, ante awædö," ante Itota apænegacäimpa.

²⁵ Ayæ nê odömönäni tönö Paditeoidi inänite godömenque äninque tömengä, "Mini wadö tedete wadö cæcabo inte mini wæquinque impa. Owæta tönö cængæ yabætaque ñongate bai minitö wadäni ayönäni nê waa cæmini inte wæætë edæ cæncadenta inö wentaga engate bai cæminipa. Mini wacä qui ö æinënö ayæ nämanque ante mini towënö beyæ owæta cæncadenta inö opogö tagate eyede bai impa diyæ. ²⁶ Bitö Paditeobi babetamömi eñëmi. Cæncadenta inö täno ñä mënongabi ininque yabæta inö ñongate wainta baquinö anguënë," angacäimpa.

²⁷ Ayæ, "Nê odömömini tönö Paditeoidi incæ mini wadö tedete wadö cædincabo inte mini wæquinque impa. Minitö wao wodido bai yabæque waëmö paate bai iñonte cæncadë inö wao bayetoca ñömænte öö wayömö bai entawëmini iminipææ.

²⁸ Ininque wadäni yabæque adinque, Minitö nö entawëmini iminipa, ante pönëñönäni minitö wiwa mini pönëno beyæ wadö tededinque wadö cædinque edæ mimö wentamö entawëminipa," ante Itota plingacäimpa.

²⁹ Tömënanäni inänite ayæ püininque, "Nê odömömini tönö Paditeoidi incæ mini wadö tedete wadö cædincabo inte mini wæquinque. Edæ Wængongui beyæ nê apænegainäni wodido, ante minitö do mænönominipa. Ayæ, Nê nö cægainäni wodido, ante mænöninque minitö oncontai waëmö pönö paadominipa. ³⁰ Ayæ, 'Mæmæidi näni quëwengaiñedë quëwëmöni bai mönitö tömënanäni tönö, Wængongui beyæ nê apænedönäni inänite mäo wænönämaï inte ee quëwencædömönimpa,' ante äminipa. ³¹ Mänömainö ante apænedinque minitö, Wængongui beyæ nê apænegainäni inänite nê wænongainäni pæimöni imönipa, ante nämä incæ edonque pönä apante äminipa. ³² Edæ minitö wæmæidi nê wænongainäni inte näni pe ñiñængaimämo wiï eyepæ inte bai cædinque minitö ñowo godömenque eyede pe ñiñænte bai capo wænönmäewedäni," ante Itota badete bai angacäimpa.

³³ Ayæ äninque, "Mini tæntæcabo pæimini bai imini eñëedäni. Mini obecabo pæimini bai imini eñëedäni. Minitö tadömengadænguipo mini pante wæquënëno ante æbänö cæte aamö cæte edæ tabäminiyaa. ³⁴ Ininque Wængongui beyæ nê apænedäni tönö nê nö eñënanäni tönö nê odömönäni inänite botö ñowo minitö

weca da pönömo pönänpa. Adinque munitö iñömö edæ pancadäniya inänite wænomini wæncädänimpa. Pancadäniya inänite munitö awäa timpomini wæncädänimpa. Ayæ pancadäniya inänite munitö odömöincönë bæi ongöningque tæi tæi pämini caate wædinque tömënanäni wayömö quëwënanäni weca wayömö quëwënanäni weca wodii goyönäni munitö tee empo tee empo togænte goquimini, ante awæddö. ³⁵ Mänömai wënæ wënæ cæyömini edæ ñöwomini beyænque tömäa inguipoga wepæ aa bedinque näate baquimäniñö angüenë. Edæ Adäo wodi wengä Abedo në nö cægaingä wepæ tönö ayæ quëwente në ëñente cädäni inänite godö wænönäni wængainäni tönö tömënanäni tömänäni wepæ beyæ munitö näate wæcæminimpa. Ayæ munitö Wængongui oncö ñænæncö boyæ iya täimpaa gääne ongöningque Bedequiya wengä Tacadiya ingante godö wænömini wængä ñinque tömengä wepæ näate wæminipa. ³⁶ Nöwomini mini wepæ näate wæquinque tömanguipo aa betinö angüenë, ante ämo ëñeedäni,” ante Itota tömënanäni inänite idæwaa piunte apænægacäimpa.

Eedotadëe quëwënanäni beyæ ante Itota wæcampa
(*Odoca 13.34-35*)

³⁷ Ayæ Eedotadëe iñömö quëwënanäni beyæ ante pönëningque Itota, “Eedotadëe quëwëmini ëñeedäni, angantapa. Wængongui beyæ në apænedäni inänite mini wængaincabo inte ayæ Wængongui nänö da pönönäni inänite dicaca tacamini iñöminite botö iñömö munitö iminite waadete pönö cæinente nangui wæbopa. Tawadiya wæmönä iñömö, Botö wënanäni, ante gompodinque tæcæenëmæ wëa pönö ö ænä bäi botö adobaï, Botö wënanäni pödäni, ante æpogadö äñömotë munitö, Wii pöinente awæddö, ante Baa ämini wætäbopa. ³⁸ Nöwo iñömö edæ mini quëwëñömö önonconcooque baconcoo tamëñedäni. ³⁹ Nöwo iñömö edæ botö dæ äñömo munitö, ‘Awënë Wængongui ëmowo beyænque pöninque bitö toquinque edæ waa cæcæbiimpa,’ ante mini anguinganca munitö edæ botö imote adämai incæminimpa ante ämo ëñeedäni,” ante Itota apænægacäimpa.

24

Wængongui oncö ñænæncö bæ tate bacæimpa, ante

(*Mäadoco 13.1-2; Odoca 21.5-6*)

¹ Itota Wængongui oncö ñænæncö oncodo tao gocantapa. Wadæ gocæ cæyongä tömengä miñæ në godäni iñömö, Wængongui oncö ñænæncö æbänö waa pönäni mænonte ii, ante odömoncæte ante tömengä weca pönäni.

² Ate wædinque Itota wæætë,

—Minitö guiquënë mänincoo tömancoo edæ waa aminitawo. Näwangä ante

munitö iminite apænëbopa. Mänincoo mini acoo incæ tömanca bæ tadäni wæænca adinque panguimæ panguimæ godinque dica adocaque pönäni incæ wænömënæca ongönämai ingæimpa, ante apænægacäimpa.

Oo ñinque bacæimpa, ante æbänö ate ëñenguüi, ante

(*Mäadoco 13.3-23; Odoca 21.7-24, 17.22-24*)

³ Mänii taodinque Odirowænquidi pö æite tæ contate ongöñongä tömengä miñæ në godäni adodäninque tömengä weca ponte apænedänitapa.

—Bitö äno ante æyedëno ñinque baquüi, ante ëñencæte ante wæmönipa. Edæ bitö ponque æyedëno ponguimii, ante ayæ mönö inguipoga quëwëno æyedëno æmæwo ñinque baquüi, ante ëñencæte ante wæmönipa. ñinque, Æbänö mä odömonte bäi ba adinque edæ, Oo pönäni impa, ante wædinque ëñenguimöni, ante ëñencæte ante wæmönipa.

⁴ Äñönäni Itota,

—Wapitica odömöñönäni munitö wæætë, Mönö oda cædämai ingæimpa, ante nämä wææ aquënë quëwëminii. Edæ iimäi baquüi i ataquëedäni. ⁵ Edæ wadäni nangui inäni botö ëmowo ante babæ tedete pöninque, “Botö Codito inömo imopa,” ante apænedinque wapitica mäodäni godinque edæ nangui inäni tömënanäni miñæ oda cæte wapitica gocädänimpa. ⁶ Edæ, Wabæca awënë tönö pö bee téninque wæætëdö wæætë cädapa, ante tededäni ëñencæminimpa. Ayæ wayömö nani guëadö guëa cæte wænönö ante tededäni incæte edæ guñente wædämai ledäni. Edæ mäninö botö äninö bäi cöwë bacæimpa. Ba incæte mönö inguipoga quëwëno iñömö mänifedë wii æmæwo ñinque bacæimpa. ⁷ Adobæca quëwënanäni iñönäni wæbæca quëwënanäni ponte bee téninque guëadö guëa cæquünäni inänipa. Adobæca awënë odeye nempo quëwëñönäni wæbæca awënë odeye tömengä nänö ënempodäni mämö bee téninque guëadö guëa cæte wænonte wænguinäni inänipa. Ayæ waodäni nani cæinente wænguinque cængui incæ tömäa capo wængæimpa. Ayæ wayömö wayömö goinque pö wæcädänimpa. ⁸ Incæte mänii nani wæwëno ba ñinque edæ önonque mä pönäni wæwengui inguinö angüenë.

⁹ Mänömainö ante Itota godömenque apænægacäimpa. “Mänifedë edæ munitö iminite mini wæquinque ö ænte mäo godönäni wæyömini godömenque wænönäni wæncæminimpa. Ayæ mänifedë botö ëmowo apænëminäni beyæ tömäma quëwënanäni munitö iminite piincädänimpa. ¹⁰ Ayæ adoyedë mini pönencabo incæ pancadäniya guingo imonte bäi badinque edæ

pönänāmai inte Baa anguināni. Ayæ mīni cabo incæ nāemæ pīnīnque pancadāniya, Nānō wængūinque, ante wacā ingante nāemæ godoncædānimpa. ¹¹ Ayæ nē babæ ante apænedāni ponte, Wængongūi beyæ nē apænemōni imōnipa, ante odōmōnāni adinque pancadāniya edæ oda cæte wadō pōnente baquīnāni inānipa. ¹² Ayæ ēñēnāmai inte nāni cæpāmo godōmenque yebænte bai nangui ba ate wædinque nē pōnēnīnāni inte wodo tōmānāni edæ Baa ānīnque waad-edāmai bacædānimpa. ¹³ Edæ æcānō īimæca īinque baganca wæntædāmai inte botō ēmōwo beyæ pīnte badāmai īnaa tōmengā edæ botō æmo beyænque cōwē wænāmai quēwencæcāimpa. ¹⁴ Ayæ edæ, Awēnē Odeye nempo watapæ quēwengæcāimpa, ante mīni pōnencabo tōmāmæ quēwēnāni inānite māo apænemīni ēñencædānimpa. Mānōmai apænedinque īinque cæmīni ate māniñedē ate edæ īinque baquīnō anguēnē,” ante Itota tōmengā mīñæ nē godāni inānite apænecæcāimpa.

¹⁵ Ayæ apænedinque Itota, “īinque, Wængongūi beyæ nē apænecæcāimpa Daāniedo wodi, Nōmæi bai oō wadō nāni wo ēwengūimāmo incæ Wængongūi oncō tæiyæ wæmoncōnē æte māmō cō cæquīnānidō anguēnē, angacāimpa. Daāniedo nānō yewæmongainta adinque nē adingā īñōmō tōmengā do ēñēmaingampa. Īincayæ ate mānōmai cō cædāni ongō adinque, ¹⁶ māniñedē Oodeabæ quēwēnāni īñōmō edæ ānanquidi do wodi wīnonte æibæwedāni. ¹⁷ Ayæ oncōmanca ongōmīni īinque māincoo æncæte ante oncōnē wæi guīdāmai inte oncōmancaque oncōmancaque wodi wīnōmæwedāni. ¹⁸ Ayæ tōmēmoncodē cæmīni īinque yacoo æncæte ante oncōnē ocæ ēmænāmai inte godōmenque wodi wīnōmæwedāni. ¹⁹ Māniñæ īinque bayedē nē yædēmadā ināni tōnō goōmæ nē gānōnāni tōnō tōmēnāni nāni wæquīmāmo baquīnō anguēnē. ²⁰ Ayæ mīnitō mīni wodi wīnongūiōnæ ante pōnēnīnque edæ Wængongūi ingante, Wīi edæ cōōnædepo bacæcāimpa, ante ayæ, Guēmangūiōnæ īñonte badāmai ingæcāimpa, ante ædāni. ²¹ Edæ māniñedē wadāni nangui nāni wæwēmāmo nāni angā baquīnō anguēnē. Edæ Wængongūi nānō badongaiñedē mānōmai nāni wæwēmāmo bai dæ āñonte ayæ godōmenque īñōwo ganca dæ ānōmpa. Ayæ godōmenque īinque baganca mānōmai nāni wæwengūimāmo bai dæ angūinō anguēnē. ²² Edæ wantæpiyæ nāni wæwengūi impa, ante adinque Wængongūi, Mānimpoōnæque edæ wæwencædānimpa, ante pōnōmenque ante ānāmai ingā bai quingānō quēwengūenē dæ ancædōnānimpa. Incæte, Nē quēwengūināni botō angaiñāni

wīi wantæpiyæ wæwencædānimpa, ante cædinque Wængongūi dobæ pōnōmenque ānīnque, Idæwaa impa, ancæcāimpa,” ante Itota apænecæcāimpa.

²³ Ayæ, īinque bayonte æbānō ingūi, ante apænedinque Itota godōmenque īimai ante apænecantapa. “Māniñedē wadāni mīnitō īmīnite, ‘īñōmō mōnō Codito ponte ongongā tamēñedāni,’ ante ayæ, ‘Wayōmō ponte a ongongā atamōnipa,’ ante tededāni ēñēnīnque mīnitō īñōmō edæ ēñēnāmai īmæwedāni. ²⁴ Wadāni māniñedē ponte a ongōnīnque nāmā incæ ante, Tōmēmo Codito inōmo imopa, ante babæ ante tedequināni. Ayæ, Wængongūi beyæ nē apænēbo inōmo imopa, ante babæ ante tedequināni. Tōmēnāni, Wængongūi nānō apænte ængaiñāni incæ æmæwo oda cædinque wapiticæ gocædānimpa, ante cædinque bamōngengæ bai cædinque oōnædē cæi bai cædinque nō odōmonte bai cæquīnāni inānipa. Incæte Wængongūi nē apænte ængaiñāni inte edæ ee aqingā diyæ æmæwo oda cædinque wapiticæ goquīnāni. ²⁵ Edæ īinque badāmai īñonte botō īñōwo do apænēbo ēñēdāni. ²⁶ Īinque, pōnente quēwēñōmīni wadāni, ‘Cōwā ædāni, ōnōmæca mæ ongongampa,’ ante ānāni ēñēnīnque mīnitō acæ taodāmai īedāni. Ayæ, ‘Oncō guimongacōnē a ongongā apa quēwēdāni,’ ante ānāni incæte pōnēnāmai īedāni. ²⁷ Edæ nænque tamōnō gāmæñō nāinīnque guīdō gāmæñō quingæ gote bai edæ tōmānāni edonque ayōnāni botō Waobo ēñagaīmo inte botō ponque poncæboimpa. ²⁸ Edæ abadæidi nōmæingāa wēō pōnāni bai mīnitō tōmāmīni adoyedē īñontobæ botō weca pongūimīni imōnipa,” ante Itota apænecæcāimpa.

Waocā ēñagaīgā īimai pōnīnque cæcæcāimpa, ante

(Māadoco 13.24-37; Odoca 21.25-33, 17.26-30, 34-36)

²⁹ Ayæ godōmenque apænedinque Itota, “Māniñē nāni wæwēmāmo nāni angā īinque go ate nænque īñontobæ wēmō badinque apāicā apāidāmai ingæcāimpa. Nēmōncoo oōnædē inō wææ tæ wææñinque waa tæ waa tæ wæængæcāimpa. Oōnædē tæi ongongaincoo incæ wanca wanca cæte bai wapiticæ goquīnō anguēnē. ³⁰ Māniñedē ate botō Waobo nē ēñagaīmo inte oo pōñōmo oōnædē ate bai ba adinque wabæca nāni cabo wabæca nāni cabo tōmāmæ quēwēnāni Ca ca wæcædānimpa. Wæyōnāni botō Waobo nē ēñagaīmo inte bogūimancodē māmō pōnīnque botō tæi pōni pīñæmo inte nāo apāite bai wæmō ēmonte wææmo acædānimpa. ³¹ Māniñedē todompeta mōnō ancadeca yedæ ænete bai we oōñonte botō anquedoidi inānite

da godomo godinque tömönäni boguimä æmæno betamonca æmæno betamonca nänö pö goinö godinque öönädë tömäne godinque edæ Wængongui nänö apænte ængainäni inänite äñete poncædänimpa,” ante Itota apænecantapa.

³² Ayæ, “Wængongui Awënë æyedönö ponguingää, ante botö iigowæ æbänö iwæ ante odömonte apænebo ëñeedäni. Tömewæ müwæ badinque iigowæ wayabo tänä nä boca adinque minitö, Öñabo nänö bocaïnepo inte nænque näwatedæ baquinque bocapa, ante pönëninque edæ do ëñëmïnipa. ³³ Ayæ adobai mäninö botö apænedinö bai edæ do ba adinque minitö, Waocä nä ëñagaingä iñömö edæ do odemö pöni ongöninque edæ oo poncæcäimpa, ante ëñencæminipa. ³⁴ Näwangä ämopa. Nöwomïni ayæ mümïni quëwëninque wænte godämai iñömïni mäninö botö apænedinö bai tömänö edæ do iinque baquinö anguënë. ³⁵ Öönädë ongöönö inguipoga tönö wo ewente bai dæ ba incæte botö angainonque guiquënë edæ dæ badämai inte edæ cöwë tæi ongongæimpa,” angantapa.

³⁶ Ayæ, “Mänionæ æyedönö i, ante, Mäninepo ædepodö i, ante ëñencæte ante mïni wædinö ante æcæmenque incæ ëñënämai ingampa. Tömänäni ëñënämai iñönäni edæ Wængongui anquedoidi incæ ëñënämai inänipa. Wæpocä Wëmo incæ ëñënämai iñömote Wæpocä iñömö tömengä adocanque incæ edæ nä ëñengä ingampa,” ante Itota apænegacäimpa.

³⁷ Ayæ godömenque iimäi ante apænecantapa. “Waobo nä ëñagaimo inte botö ponguionæ iinque bayedë guiquënë Nöwee wodi Docä nani angaingä nänö quëwënedë dodäni nani quëwengai bai adobai edæ quëwengünäni inänipa. ³⁸ Mäninädë æpæ ayæ änämai inädë nä quëwengainäni iñömö önonque cænte bete, Monguingä, ante godonte ate möninque tömönäni Docä Nöwee oncö bai wipo mænonte nänö guiquionæ iinque baganca quëwencægadänimpa. ³⁹ Tömönäni inänite æpæ ænte gocæ cæganca tömönäni, Äpæ anguimpa, ante ëñënämai nani quëwengai bai adobai ëñënämai cæyönäni botö Waobo ëñagaimö inte adobai edæ iñontobæ poncæboimpa. ⁴⁰ Mäninädë waoda tömëmoncodë guëa cæyöna adocanque ingante ö ænäni goyongä adocanque wæætë a ongoncæcäimpa. ⁴¹ Ayæ onquiyæna guëa apo cæyöna adocanque ingante ö ænäni goyongä adocanque wæætë a ongoncæcäimpa,” ante Itota odömonte apænecantapa.

⁴² Ayæ, “Awënë æyedönö ponguingää, ante ëñënämai imini inte minitö mümïni inte edæ cöwä aquënë quëwënanii. ⁴³ Nö

awëmö ængä æyedönö ponguingää, ante ëñente bai nä ëcäcä iñömö, Bæ tate guidämai incæcäimpa, ante wææ wänoncædongäimpa, ante ëñente quëwëedäni. ⁴⁴ Wao Wëmo ëñagaimo inte botö adobai minitö ëñënämai iñömïni do iñontobæ ponguimo imo ante minitö botö ponguinö ante wänö cöedäni,” ante Itota angacäimpa.

Awënë quincoo ante në ædæmö aacä (Odoca 12.41-48)

⁴⁵ Ayæ Itota iimäi apænecantapa. “Inguipoga awënë iñömö, Æcänö nä ëñengä inongä inte botö quincoo ante ædæmö aacä inguingää, äninque, Mänömai inte cæcä ingante adinque botö ämo ate tömengä nä angä badinque botö oncönë quëwënanii inänite ædæmö aadinque cængui eyepæ iñonte godongä cæncædänimpa, angampa. ⁴⁶ Ante awënë wayömö gote ponte ayongä, Nö cæcä botö äno ante ëñente cæcampa, ante adinque awënë wæætë tömengä ingante godö waa cæcä tömengä ingante godö waa cæcä ate nä waa cæcä iñömö edæ waa tocæcäimpa. ⁴⁷ Minitö iminite näwangä ante apænebopa. Nö ëñente cædingä ingante awënë, Bitö botö mäincoo tömancow edæ nä aabi bacæbiimpa, ancæcäimpa.”

⁴⁸ “Wæætë edæ tömengä ingante nä cæcä incæ wënæ wënæ cæcä inongä inte mümönö pönëwëninque, Botö awënë wabänö wantæpiyæ pönämai imaingampa, ante pönengä iinque æbänö babai. ⁴⁹ Tömengä edæ wadäni nani cæcabo iñönänite näëmæ püinque tæi tæi pangä iinque ayæ nä ti nämäæ bete quidi quidi dowænte badäni tönö godongämæ cænte becä. ⁵⁰ Iinque tömengä, Æönädö ponguingää, ante wædämai iñongante, Æyedönö ponguingää, ante ëñënämai iñongante edæ awënë iñontobæ pongä wæbaingampa. ⁵¹ Pöninque awënë iñömö ëñënämai cædingä ingante baö wido wido todinque tömengä ingantedö äninque, Nö wadö tedete wadö cædinäni nani panguinö gote tömönäni tönö godongämæ ongoncæcäimpa. Ante cædinque awënë tömönäni nani guingo imonte Ca ca wæyömö wido cæcä wæcæcäimpa,” ante Itota apænegacäimpa.

25

Baquedäni nani cæinö ante odömongampa

¹ Mäninganca apænedinque Itota ayæ godömenque odömonte apænegacäimpa. “Mäninädë öönädë Awënë Odeye nempo quëwënanii iñömö baquedäni diete ganca nani cæi bai adobai cæcædänimpa. Baquedäni iñömö, Edëningä nöwoönæ monguingä, ante tica ëñincade æninque tömengä ingante bee tencæte ante tao godänipa. ² Baquedäni incæ tömönäni tingo ganca inäni nä ëñënäni iñönäni

edæ adoganca tincō ganca ināni nē ēñēnāmaī ināni ināni. ³ Nē ēñēnāmaī ināni guiquēnē tōmēnāni tica ēñēncade æninque gongapæncade æñāmaī goyōnāni, ⁴ nē ēñēnāni guiquēnē gongapæncadedē godō pe ññāente gongapæ eyepæ ænte godānīpa. ⁵ Mānōmaī ænte gote ayōnāni nē monguingā wantæpiyæ pōnāmaī dæ angā adinque tōmēnāni tōmānāni edæ mōinente ædo ædo cædinque mō ññānīpa.”

⁶ “Mō ññōñāni ayaōnæñēñā pōni bayonte edæ, ‘Nē monguingā pongā ataqueedāni. Tao bee tenguenē quēwēmīni.’ ⁷ Ante aa pedāni ēñēninque edæ baquedāni tōmānāni ængæ gantidinque, Tica ēñēncade waēmō tī wodōnote bacæimpa, ante wadæ wadæ cædānīpa. ⁸ Cæyōnāni nē ēñēnāmaī ināni guiquēnē nē ēñēnāni inānite, ‘Mōnitō tica ēñēncade edæ wodo mōnæ ãmōmpa cæmīnī. Mīnitō nææñimæ incæ pancapāa pōnōmīni æncæmōnīmpa.’ ⁹ Āñōnāni, ‘Īñæmpa, mōnitō beyæ mīnitō beyæ adobai wīi eyepæ imāmpa, ante awædō. Edæ godoncæte ante nē mānāni weca gote godonte æedāni.’ ¹⁰ Ānāni ēñēnte godonte æncæ goyōnāni edæ nē monguingā do pongā adinque nē ēñēnte eyepæ nææñināni inōmō monguingā tōnō godongāmæ monguimæno oncōnē becæ guidāni ininque edæ odemō tee mōnete intapa. ¹¹ Ayæ ate edæ wadāni gongapæ eyepæ ænte pōñōnāni do tee mōnete ī adinque tōmēnāni, ‘Awēnē, awēnē ēñēmi. Odemō wī ænebi guimōnie.’ ¹² Ante wæyōnāni awēnē wæætē, ‘Mīnitō imīnite nāwangā āmōpa. Mīnitō æmīnidō imīni, ante botō cōwē adāmaī imōpa,’ angampa.” Māninque ante odōmoncæte ante Itota īmaī angantapa.

¹³ “Mīnitō guiquēnē, Æonædō ī, æyedēnō ī, ante ēñēnāmaī imīni inte edæ wānō conte quēwēedāni,” angacāimpa.

Tadento nāni godonte æinta ante odōmongampa

(Odoca 19.11-27)

¹⁴ Ayæ æbānō baquīi, ante odōmoncæte ante Itota, Waocā nē ēacā nānō cæi bai bacæimpa, ante apænegacāimpa. “Nē ēacā wayōmō gocæte ante cædinque tōmengā ingante nē cædāni inānite āñēte māmōngā pōñōnānite, Botō ēadinta incæ pōnōmō æninque mīnitō nē aamīni badinque botō beyæ godonte æncæmīnīmpa. ¹⁵ Āninque nē ēacā inōmō, Nē cædāni æbānō nanguī cædinque aaquīnānīi, ante adinque tadento ñæñængade nāni godonte æinta incæ adocanque ingante ãnōmpo æmæmpoque mānīmpota pædæ pōñōninque wacā ingante tadento mentaa mānīmpota pædæ pōñōninque wacā ingante tadento adotaque pædæ pōnongampa. Ayæ wadæ gocā. ¹⁶ Īninque tadento ãnōmpo æmæmpoque

mānīmpota nē æningā inōmō do godinque godonte æ godonte æ cædinque ãnōmpo æmæmpota tōmengā nānō ænīmpota adopota æñōngā edæ tadento ãnōmpo tipæmpoga bapa. ¹⁷ Ayæ tadento mentaa nē æningā adobai godonte æ godonte æ cædinque mentaa nānō ænīnta adopota wæætē æñōngā edæ tadento mēa go mēa bapa. ¹⁸ Wæætē adotaque nē æningā guiquēnē tōmengā wadæ godinque onguipodē ææ wodinque awēnē godonte æinta æninque tee moncate wē wodongampa,” angantapa.

¹⁹ Ayæ, “Wantæpiyæ ate tōmēnāni awēnē adodō pōninque, Botō quī eyepæ æncæboimpa, ante cædinque tōmēnāni nāni ænte aadinta ante cōwā acantapa. ²⁰ ãnōmpo æmæmpoque tadento nē æningā inōmō edæ æmæmpota adopota nānō godonte ænīnta ænte pōninque awēnē ingante, ‘Awēnē, bitō botō imote, Acæbiimpa, ante tadento ãnōmpo æmæmpoque mānīmpota pædæ pōñōmi æntabōpa. Āninque botō godonte ænte godonte ænte edæ nanguī cædinque edæ mānīmpota adopota æmæmpota dobæ æmōi ae.’ ²¹ Angā wædinque tōmengā awēnē inōmō, ‘Badogaa. Botō imote nē cæbi inōmi inte bitō ædæmō aabi inte ñōwo waa cæbi æmōpa. Bitō wædæñque æninque cōwē ædæmō aabi adinque botō ñōwo nanguī pōni botō ēadincōo pōnōmō æninque bitō wæætē edæ nē aabi bacæbiimpa. Botō bitō awēnē inōmo inte watapæ tote quēwēmo inōmote bitō edæ āññōmonque bai bitō watapæ tote quēwenguinque pōe,’ angantapa.”

²² “Ayæ mēa tadento nē æningā adobai pōninque, ‘Awēnē, bitō botō imote, Acæbiimpa, ante tadento mentaa mānīmpota pædæ pōñōmi æninque botō godonte ænte godonte ænte edæ nanguī cædinque edæ mentaa mānīmpota adopota dobæ æmōi ae.’ ²³ Angā wædinque tōmengā awēnē inōmō, ‘Badogaa. Botō imote nē cæbi inōmi inte bitō ædæmō aabi inte ñōwo waa cæbi æmōpa. Bitō wædæñque æninque cōwē ædæmō aabi adinque botō ñōwo nanguī pōni botō ēadincōo pōnōmō æninque bitō wæætē edæ nē aabi bacæbiimpa. Botō bitō awēnē inōmo inte watapæ tote quēwēmo inōmote bitō edæ āññōmonque bai bitō watapæ tote quēwenguinque pōe,’ angantapa.”

²⁴ “Ayæ ate edæ adotaque nē æningā wæætē pōninque, ‘Awēnē, bitō nē waad-edāmaī cædōmi inte bitō wīi gadīñōmō wayōmō incæ edæ do wogaabīpa. Ayæ bitō wīi mīñōmō wayōmō incæ edæ do tā pete gæte bai æmīpa, angantapa. ²⁵ Īninque botō edæ ancaī guñēnte wædinque edæ tao godinque onguipodē ææ wote bitō tadento

daga wëningue edæ wë wodontabopa. Bado, bitò qui incæ edæ do æmipa, angantapa.”

²⁶ “Angä ëñente wædinque tõmengä awënë wæætë, ‘Botò ìmote nè cæbi ìnõmi inte bitò wîwa pönëmi inte wæntæye cæbi abopa. Botò æbânõ gadämaï ìfõmõ do wogaabopa, ante bitò edæ do ëñëmitapa. Botò minämaï ìfõmõ do tä pete gæbopa, ante bitò äninõ edæ do ëñënimî inte cæbitapa tõõ. ²⁷ Ìnîque mäninõ ante do ëñënimî inte bitò edæ padata botò godonte æinta ænîque edæ nè godonte ænäni weca godonte ænguënëmi ìmitapa tõõ. Mänõmaï cæbi bai botò ocæ ëmænte pönîque edæ botò qui do ænîque wadäni näni guidõnînta tõnõ edæ do æncædõmoimpa tõõ.’ ²⁸ Änîque tõmengä ingante nè cædäni ìnänite awënë angantapa. ‘Minitò nõwo ìngä tadento adotaque tõmengä nänõ nææñînta õ ænîque edæ tadento õnõmpo tipæmpoga nè næængä ingante prædæ godõmîni æncæcäimpa. ²⁹ Edæ nè ëadäni ìnänite tõmänni ìnänite godõmenque godonte ingæimpa. Ìnîque tõmënnäni qui nangui ëacædänîmpa. Wæætë edæ ëadämaï inte õmæpocä ìngä guiquënë tõmengä nänõ ëadîncõ wædænque pönî ìncæte edæ õ ænte dæ ba wæcæcäimpa. ³⁰ Ayæ edæ mäningä botò ìmote nè cædingä incæ wæntæye ìnongä inte cædämaï ìfongante minitò wëmõ ìfõmõ näni guîngõ ìmonte Ca ca wæwëfõmõ tõmengä ingante edæ guitodonte wido cæmîni wæcæcäimpa,’ ante tõmengä awënë angampa.”

Tõmæcæ quëwënnäni ìnänite apænte angæïmpa, ante

³¹ Itota mänõmaïnõ ante odõmonte apænedîque godõmenque apænegacäimpa. “Botò anquedoidi tõnõ godongämæ pönîque botò Waobo nè ëñagaimo inte nãõ apäite bai nè ëmõmo inte poncæboimpa. Mänîfëdë botò põfëdë botò Awënë tæ contaïmpaa tæ contadîque edæ õõnædë waa pönî ongõnnäni bai waa pönî ongõncæboimpa. ³² Mänîfëdë tõmæcæ quëwënnäni botò weca godongämæ ponte a ongõncædänîmpa. Ayæ nè aacä tõmengä cæñînnäni ìnänite apænte adînque bodegoidi æmænõ cõnõnîque cabodaidi æmænõ nänõ cõnõnõ bai cædîque botò ìfõmõ edæ ìmæca quëwënnäni tõmänni ìnänite apænte adînque pancadäniya ìnänite æmænõ gõnõnîque wadäni ìnänite æmænõ gõnõmo ongõncædänîmpa. ³³ Obegaidi bai nè ëñente cædäni ìnänite botò tõmëmæ ìnõ gõnõnîque wæætë cabodaidi bai nè ëñënnämaï cædäni ìnänite botò dipæmæ ìnõ gõnõncæboimpa.”

³⁴ “Gõnõnîque botò Awënë Odeyebo ìnõmo inte botò tõmëmæ ìnõ nè ongõnnäni ìnänite ancæboimpa. ‘Botò Mæmpo nänõ nè waademîni inte pödäni. Tõmengä

inguiþoga nänõ badongäifëdë äñîque, Awënë Odeye nempo minî quëwenguinõ ìmpa, ante do badongacäimpa. Ìnîque Awënë Odeye nempo minî quëwenguënë nõwo ænte quëwëedäni. ³⁵ Edæ botò gue ænente wæyõmo minitò cængui nè pönõmîni cængaboimpa. Tepæ gæwænte wæbo adînque minitò nè pönõmîni begaboimpa. Botò Wabo ìmo inte cowodë bai põmo adînque minitò, Põ guii, ämîni ëñëninque minitò weca guiite ëñagaboimpa. ³⁶ Ayæ õmaabo inte wæyõmo minitò pönõmîni wëñagaboimpa. Wënæ wënæ inte wæyõmo minitò ponte nè waadete cægäimîni ìminîpa. Tee mõnete oncõnë ongote wæwëfõmote botò weca ëñacæ nè pongäimîni ìnõmîni inte minitò nõwo wæætë edæ botò nempo guiite quëwencæmînîmpa,’ ancæboimpa.”

³⁷ “Ämo ëñëninque edæ nè pödäni guiquënë, ‘Awënë ìñæmpa æyedëno bitò gue ænente wæyõmî dicæ pönõmõni cæmitawogaa, ancædänîmpa. Ayæ tepæ gæwæfõmî dicæ pönõmõni hebitawogaa. ³⁸ Eyedëno wacä incæ põmi adînque mõnitò dicæ, Põ guii, antamõniyaa. Ayæ õmaabi adînque dicæ pönõmõni wëñabitawogaa. ³⁹ Ayæ wënæ wënæ ìnte wæyõmî incæ tee mõnete wæyõmî incæ mõnitò dicæ acæ pontamõniyaa.’ ⁴⁰ Ante wæyõnnäni botò Awënë Odeyebo ìnõmo inte edæ tõmënnäni ìnänite, ‘Ìñæmpa botò tõññadäni ìñõnnite adocanque õnonganque ìfongante minitò waa cægäimîni inte edæ botò ìmote do waa cæte ìminîpa ämo ëñëedäni,’ ante tõmënnäni ìnänite ancæboimpa,” angantapa.

⁴¹ “Ayæ botò dipæmæ ìnõ nè ongõnnäni ìnänite botò nè Awënë ìnõmo inte ancæboimpa. ‘Minitò nè tente wæquënëmîni guiquënë nõwo edæ gä gobæwedäni. Edæ Wængongui do badõnîque, Wënæ tõnõ tõmengä anquedoidi nänõ nè ëmîñænnäni tõnõ wantæpiyæ cõwë wænämaï näni bæcote wæquifõmõ, ante nänõ badongäifõmõ minitò mänîfõmõ edæ gote guilibæwedäni,’ ante edæ ancæboimpa. ⁴² ‘Edæ botò gue ænente wæbo adînque minitò edæ dicæ pönõmîni cæntabogaa. Gæwænte wæyõmo minitò dicæ pönõmîni betabogaa. ⁴³ Ayæ Wabo ìmo inte cowodë bai põmo adînque minitò dicæ, Põ guiie, äminîtawogaa. Õmaabo ìnte wæyõmo weocõ dicæ pönõmîni wëñatabogaa. Wënæ wënæ ìnte wæbo incæ tee mõnetæ wæbo incæ minitò ìfõmõ edæ dicæ ëñacæ põminîtawogaa,’ ancæboimpa.”

⁴⁴ “Ämo ëñente wædinque nè ëñënnämaï ìnnäni ìfõmõ, ‘Awënë ëñëmi. Bitò æyedëno gue ænente tepæ gæwænte wæbitawo. Ayæ wabi bai ìnte æyedëno põmi atamõniyaa. Weocõ õmaabi ìnte wæbi adînque, daicawo gawæmi adînque, tee mõnetæ wæbi adînque mõnitò bitò beyæ dicæ

cædāmai intamōniyaa.’ ⁴⁵ Āññōnāni botō iñōmō edæ tōmēnāni inānite, ‘Īñæmpa wacā ingante ōnonganque iñongante mīnitō cædāmai ingaimīni inte botō imote edæ māninō do cædāmai ingaminimpa. Āmo ēñēmaimīnipa,’ ante piincæboimpa. ⁴⁶ Īninqe tōmēnāni nāni tente wæwenguinō incæ æmæwō wadæ gocædānimpā. Wæætē nē nō cædāni guiquēnē cōwē wænāmai nāni quēwenguinō æmæwō gocædānimpā,” ante Itota apænegacāimpā.

26

Itota ingante bæi ongongæimpā, ante cædānimpā

(Māadoco 14.1-2; Odoca 22.1-2; Wāō 11.45-53)

¹ Ayæ māninō tōmānō iinque apænete ate Itota tōmengā miñæ nē godāni inānite apænecantapa.

² —Mēōnaa go ate wodo pænta gogañōnæ bai Patowa mōnō ææmæ cænguionæ impā, ante do ēñēmīnipā. Māññōnæ iñonte botō Waobo ēñagaimō iñōmote botō imote bæi ongōninque edæ, Awæ ñænquedimæ cæte iingā ingante tōō godōninque daagō tim-pote wææ tīwadinque edæ ææñō gō cæte wænōedāni, ante botō imote pædæ godōnāni æncædānimpā, ante apænegacāimpā.

³ Māññēdē, Wængongui qui, ante nē godongā ñænægā pōñi Caiapato oncōnē godongāmæ pōninque wadāni nē godōnāni ñænænāni tōnō oodeoidi inānite nē aadāni nāni Picæncabo iñōmō, ⁴ adoyōmō pōnēninque, Mōnō æbānō babæ cæte Itota ingante awēmō bæi ongonte ænte wæñongui, ⁵ ante pōnēnāni incæte,

—Īñæmpa ææmæntedæ iñonte wænōmō bai tōmānāni ænguī bate Yæ yæ ante piinte cæcædōnānimpā, ante pōnente wædinque mōnō ædō cæte māññēdē cæqui, ante wægadānimpā.

Itota ocaboga onquiyængā ogui wapæ gao cæcacampā

(Māadoco 14.3-9; Wāō 12.1-8)

⁶ Itota māññēdē Betānia godinque nē baading Timōnō oncōnē guī ēñadinque cæncongantapa. ⁷ Cæncōñongā wacā onquiyængā iñōmō tōmengā weca pō guidinque ogui wapæ nāni nanguī godonte æñimæ dica adabatodo waincadedē pe ñiñænte nānō mānimæ incæ ñōwō ænte māmō Itota ocaboga edæ gao cæcācantapa.

⁸ Mānōmai cæcā adinque Itota miñæ nāni gocabo iñōmō piininqe,

—Īñæmpa ōnonque gao guēnente bai cæcāmpā tōō, ānānitapa. ⁹ Edæ iimæ iñōmō nanguī pōñi æñinta beyæ godonte ænguēnēmæ imæmpā. Godonte ænte bai ōmæpodāni inānite wæætē godonguēnē apa.

¹⁰ Ante piināni wædinque Itota iñōmō,

—Quimæ piwēmīni. Īingā onquiyængā iñōmō botō imote waa pōñi cæcā apa quēwēmīni. ¹¹ Īñæmpa ōmæpodāni ante mīni āññāni mīnitō weca cōwē quēwēñōnāni botō wæætē mīnitō weca wīi wantæpiyæ quēwencæboimpā. ¹² Mānimæ ogui wapæ botonga gadongadinque tōmengā botō baō daga wenguinque eyepæ iñonte edæ ōni paacantapa. ¹³ Mīnitō imīnite nāwangā ante apænebopa. Waa pōñi botō apænedō apænedinque tōmāmæ æyōmōmē apænedāni ēñēnāni māningā onquiyængā nānō cædinō ante adobāi tededāni ēñente pōnencædānimpā, ante Itota apænegacāimpā.

Itota ingante Codaa odōmonte godoncæte ante cæcāmpā

(Māadoco 14.10-11; Odoca 22.3-6)

¹⁴ Ayæ māññēdē nāni, Dote, āincabo iññōnāni adocanque Codaa Icadote nāni ānongā iñōmō, Wængongui qui, ante nē godōnāni ñænænāni weca gocantapa. ¹⁵ Godinque apænecantapa.

—Botō, Itota æyōmōnō ongongā, ante pōnō odōmō ate mīnitō bæi ongote æmīni iinque æpotadō, Eyepæ i, ante pōñōmīni æmāimoo.

Angā ēñēninque tōmēnāni padata tiguītamō incæ todēinta ganca tee mampote tōmengā ingante pædæ godōnāni. ¹⁶ Æningā inte tōmengā cōwē cōwā adinque, Æbānō cæte Itota ingante odōmonte pædæ godōmō ate ænguīnāni, ante pōnente cægacāimpā.

Pāō tōnō owæta Itota pædæ pōnongā cænte bedānipā

(Māadoco 14.12-25; Odoca 22.7-23; Wāō 13.21-30; 1 Coodintoidi 11.23-26)

¹⁷ Māññēdē oodeoidi pāō yedæ æmpoqui ōmāmō i nāni ææmæ cæte cænguionæ tæcæ ba adinque Itota miñæ nē godāni iñōmō, Wodo pænta gogañōnæ bai Patowa mōnō ææmæ cænguionæ impā, ante pōnente wædinque tōmengā weca ponte ānānitapa.

—Eyōmōnō bitō beyæ Patowa ææmæ ante cæmōni ate cænguimīi.

¹⁸ Āññōnāni tōmengā nānō ēmiñæna mēnaa iñate āninqe,

—Mīnatō waodāni nāni quēwēñōmō godinque ongūñængā botō nē āningā ingante bee tēninque mīnatō iimānō ante apænēmīna ēñægæda. “Mōnō Awēnē iimāi angampa. Botō wænguionæ oo pōñi bapa cæbii. Botō nē ēmiñæñāni tōnō botō bitō oncōnē Patowa ææmæ ponte cæncæmōnimpā, angampa,” ante āmīna ēñægæda, angā.

¹⁹ Ēñente wædinque tōmēna Itota nānō ānō bai cædinque, Patowa ææmæ cænguī impā, ante cædatapa.

²⁰ Gäwadecæ bayö Itota tönö, Dote, nani äincabo ponte godongämæ cæncæte ante ongönänitapa. ²¹ Cæncöñönäni Itota,

—Nāwangā ante apænebo eñēedāni. Mīni cabo incæ adocanque, Æncædānimpa, ante botö imote odömonte pædæ godonguingā ingampa.

²² Ante apænecā eñēinque tömēnāni wæwente bayönāni adocanque adocanque, —Awēnē, botö imotedö ante dicæ apænebitawogaa.

²³ Ante tedeyönāni Itota wæætē, —Botö tönö guēa adotaca nē mīi cædingā iñömö tömengā botö imote nē odömonte pædæ godonguingā ingampa. ²⁴ Edæ dodāni Wængonguī beyæ nāni yewæmongainö bai cædinque botö Waobo eñagaīmo inte cōwē wænte goquēnēmo imodö anguēnē. İninque edæ botö imo nē odömonte godonguingā iñömö tömengā nānō wæquinque ingæimpa. Māningā wīi eñate bai waa toquēnengā incædongäimpa.

²⁵ Ante apænecā wædinque Codaa iñömö Itota ingante nē odömonte godonguingā iñömö edæ,

—Awēnē nē Odömömi eñēmi, botö imotedö ante ämitawogaa.

Ante añongante edæ Itota,

—Tömēmi nāmā incæ, Botö imotedö, ante do tedebi ĩmpa.

²⁶ Ante apænecantapa. Ayæ cæncöñönāni Itota päö bæi ongonte æninque Wængonguī ingante waa ate apænedinque päö pä æninque tömengā miñæ nē godāni inänite pædæ godö pædæ godö cæcantapa.

—Botö baö bai ĩmpa, ante pædæ pönömo æninque mīnitö Ao ante cædedāni.

²⁷ Äninque ayæ bequimæ owætaca bæi ongonte æninque Wængonguī ingante waa ate pönente apænedinque pædæ godöninque,

—Botö wepæ bai ĩmpa, ante pædæ pönömo æninque tömämīni Ao äninque godongämæ intaca beedāni, angantapa.

²⁸ Botö wepæ ĩmæ bai ĩmpa. Wængonguī do apænedinque, Botö pönö cæbo ate mīnitö Ao ämīni İninque mönö godongämæ waa cæte quēwengæĩmpa, angacäĩmpa. Nöwo adobai mīne äninque apænebopa. Botö wepæ ante Ao ante æmīni inte mönö godongämæ waa cæte quēwengæĩmpa. Edæ nangui ĩmīni mīni wēnæ wēnæ cædinö beyæ ante nā mēnongaquimæ ĩmpa. ²⁹ Nāwangā ämopa. Botö Mæmpo Awēnē Odeye iñongā botö tömengā nempo quēwēninque mīnitö tönö godongämæ mīmæ botö beganca māmimæ yowepæ nöwo æmæwö hebo tamēñedāni, ante Itota apænegacäĩmpa.

Dicæ abogaa, ante Pegodo anguingā, ante apænecampa

(Mäadoco 14.26-31; Odoca 22.31-34; Wäö 13.36-38)

³⁰ Ayæ Wængonguī ingante ämotamīni ante tao godinque Odibowænquidi godänitapa. ³¹ Goyönänite Itota apænecantapa.

—Wængonguī beyæ yewæmöninque, “Nē aadingā ingante tacabo dæ wængā İninque edæ cæningäidi obegaidi panguimæ goquĩmpa,” ante nāni yewæmonte angainö bai cædinque mīnitö tömämīni nōwoönæ woyowotæ incæ botö dæ ämo beyæ guingo imonte badinque edæ panguimæ goquĩmīni ĩmīnīpa. ³² Panguimæ gomīni incæte botö edæ nāni ömæmonte ate Gadideabæ tāno gote a ongöñömo mīnitö ayæ pöedāni.

³³ Angā wædinque Pegodo guiquēnē,

—İñæmpa dæ ämi beyæ tömānāni guingo imonte badinque panguimæ godāni incæte edæ botö guiquēnē cōwē panguimæ godāmaĩ incæboĩmpa.

³⁴ Äñongante Itota wæætē,

—Bitö ĩmite nāwangā ante apænebo eñēe. Nöwoönæ woyowotæ incæ tawadiya pedāmaĩ iñonte bitö botö imotedö ante wadö ante apænedinque, Dicæ abogaa, ante edæ mempoga go adopoque anguĩmi ĩmpa.

³⁵ Angā eñente wædinque,

—İñæmpa bitö tönö guēa wæmo incæte botö cōwē, Dicæ abogaa, ante edæ änāmaĩ incæboĩmpa.

Äñongā tömengā miñæ nē godāni tömānāni adodö ante angadānimpa.

Guetämāni iñömö Itota Wængonguī ingante apænecampa

(Mäadoco 14.32-42; Odoca 22.39-46)

³⁶ Mānīi godinque Itota yabæ incæ Guetämāni nāni äñömö tömengā miñæ nē godāni tönö gocantapa. Māniñömö pöninque tömengā tömēnāni İñänite,

—Tæ contate ongöñömiini botö godömenque godinque Wængonguī ingante apænete pömoedāni.

³⁷ Äninque Pegodo tönö Tebedeo wēna İnate ænte mäocā goyönāni Itota iñömö nangui wæwente badinque ancai guñēninque, ³⁸ tömēnāni İñänite,

—Botö wænguĩmāmo pönö anguēnē, ante botö öñowoca incæ pæmænte wæte wænguĩ wæ, ante wæbo tamēñedāni. Mīnitö guiquēnē ämonca godongämæ wææ aacöedāni.

³⁹ Äninque Itota wædænque godömenque godinque guidömēmæ ñongænte Wængonguī ingante apænecantapa. “Botö Mæmpo, bitö Ao äninque edæ ti nā wænguĩmæ bai ö ænte bai cædinque botö imote edæ, Wænāmaĩ incæbiĩmpa, ämi İninque botö edæ waa to-baĩmopa. Incæte botö äñönö bai wīi cædinque wæætē tömēmi äñönö bai cæe,” ämopa.

⁴⁰ Ante apænecā ate tömengā miñæ nē godāni weca adodö ponte ayongā tömēnāni

mō ñōnāni adinque tōmengā Pegodo ingante,

—Botō tōnō wānō conguēnēmīni incæ mīnitō adoque ooda incæ wīl aacōmīnii. ⁴¹ Mīmōno waa cæinēmōnīpa, ante ēwocayōmīni baō aquīlīñō ēñamīni inte wæntæye bamīnīpa. Ìnīnque edæ wānō cōnīnque nāmā beyænque ante Wængonguī ingante apænedīnque edæ, Wīl wēnæ wēnæ cæinēmōni bacæmōnīmpa, ante apæneedāni.

⁴² Änīnque Itota adodō wadæ gote wæætē apænedīnque, “Botō Mæmpo, botō bedāmaī ññōmote bitō ò ænāmā ñni ñnīnque botō cōwē bitō āmaī becæboīmpa.”

⁴³ Ante Wængonguī ingante apænete ate ponte ayongante mōwo mōinente æmō cæte wædinque mō ññōnāni. ⁴⁴ Adinque edæ tōmengā wæætē adodō godīnque ññowo mempoga go adopoque nānō apænedīnō ante adodō ante Wængonguī ingante ñnīnque apæncantapa. ⁴⁵ Ayæ tōmengā miñæ nē godāni weca wæætē adodō pōnīnque,

—Ìñæmpa cōwē mōmīni edæ cōwē guēmāmīni awædō. Aquēnē quēwēedāni. Botō Waobo ēñagāimo inte botō wæwengūiōnæ do bayonte edæ botō ñmote nē wēnæ wēnæ cædāni ññānīte nē godō odōmonguīgā ññōmō do godongāi ataque-edāni. ⁴⁶ Ængæ gantite mōnō gocæīmpa. Botō ñmo nē odōmōnte godonguīgā obo pōnī pongā tamēñedāni, angacāīmpa.

Itota ingante bæi ongonte ænānīpa
(Mäadoco 14.43-50; Odoca 22.47-53; Wäo 18.2-11)

⁴⁷ Ayæ apæneyongā edæ Codaa wodi tōmēnāni nāni, Dote, ante gocabo adocabo ñnīngā incæ ññowo pongantapa. Wængonguī quī, ante nē godōnāni ññænænāni tōnō oodeoidi ññānīte nē aadāni nāni Picæncabo tōnō da pōnōnāni pōnīnque wadāni tæiyænāni adobaī yaēmē nææñnīnque canta nææñnāni inte Codaa miñæ pōnānitapa. ⁴⁸ Doyedē ññōmō nē odōmōnte godoncæ cæcā Codaa ññōmō tōmengā miñæ poncæ cædāni ññānīte ñmaī ante wēñēñedē apænedīngā ñnongāīmpa. “Botō odōmōnte quēē bemōmo adinque mīnitō wæætē, Tōmengā ingampa, ante adinque tōmengā ingante edæ bæi ongonte ò æedāni.”

⁴⁹ Ante do äningā inte Codaa ññowo ññōmō Itota weca pōnīnque,

—Awēnē nē Odōmōmi ñmi, bitō ñmi.

Änīnque edæ waa cæte bæi quēē bemon-gantapa. ⁵⁰ Adinque Itota wæætē,

—Botō miñæ nē godīmi ēñēmī. Mānīnō ante bitō ponque pō cæbāwe.

Äñongā wadāni tōmengā weca pōnīnque pædæ gopo bæi ongonte Itota ingante æññānitapa.

⁵¹ Wængonguī quī, ante nē godongā ññænængā pōnī ingante nē cæcā māññōmō ponte a ongongā adinque Itota tōnō pōnīngā adocanque pædæ guīipote yaēmē o togænte æñnīnque māññingā nē cæcā ingante tæi pānīnque ññōmonca wangō tamoncacantapa. ⁵² Adinque Itota ññōmō tōmengā ingante,

—Yaēmē adodō mīni tē, ämpo. Edæ yaēmē nē o togænte nææññāni tōmāññāni ññānīte yaēmēnca adobaī tacadāni wæncædānīmpa. ⁵³ Ìñæmpa æbānō ante pōñēmī edæ. Wængonguī anquedoidi adocobodānīque tei mīdo ganca ññōñānīte botō Mæmpo ingante apænebo bæi tōmengā do angā ñnīnque anquedoidi nāni cabo nāni cabo incæ ñnompo tīpæmpoga go menca-bodāniya botō beyæ ponte cæbāññānīpa, ante pōñēmīyaa. ⁵⁴ Incæte botō Codito ññōmo inte botō Mæmpo ingante māññōmaī apænebo ēñente cæcā bæi dodāni, Codito ñmaī wæncæcāīmpa, ante Wængonguī angā ēñente nāni yewæmongainō ante ædō cæte ñnīnque bacædōnīmpa, ante awædō, ante apænegacāīmpa.

⁵⁵ Ayæ wæætē ññowo pōñāni ññānīte Itota apæncantapa.

—Mīnitō ññæmpa, Bitō nē ò æññīmī ñmīpa, ante bæi cædinque botō ñmote canta tōnō yaēmē næænte ò æncæte ante pōmīni awædō. Botō Wængonguī oncō yabæcōñē ññō ññō ññō ññō apæñecōñōmo mīnitō botō ñmote yao ongōñāmaī ee amīnitapa tō. ⁵⁶ Incæte mīnitō Wængonguī beyæ nē apænedāni nāni yewæmongainō bæi ññowo ñnīnque baquinque cæmīni abopa.

Ante apæñecā ēññēnīnque tōmengā emīñængā nē godīnāni tōmāññāni edæ nāwæ pangūimæ cæte wodi ññonogadānīmpa.

Nē Apænte nāni Äñoncabo weca Itota on-gongampa

(Mäadoco 14.53-65; Odoca 22.54-55, 63-71; Wäo 18.12-14, 19-24)

⁵⁷ Ayæ Itota ingante nē yao ongonte æññāni guīquēñē, tōmengā ingante māo godīnque edæ, Wængonguī quī, ante nē godongā ññænængā pōnī ñnongā Calapato weca ænte godānitapa. Māññōmō do pōnīnque nē wææ ante odōmōñāni tōnō oodeoidi ññānīte nē aadāni nāni Picæncabo tōnō do a ongōñānīmpa. Māññōmō Itota ingante ænte māññōñāni pongacāīmpa. ⁵⁸ Pegodo guīquēñē tōmengā miñæ ayæ ayæ godīnque, Wængonguī quī, ante nē godongā ññænængā pōnī ñnongā oncō yacōmoyæ ññōmō pō guīdīnque, Itota ingante æbāñ cæquīñāni, ante wææ wāññōñāni weca pōnīnque tæ contate waa acongantapa.

⁵⁹ Wængonguī quī, ante nē godōñāni ññænænāni tōnō nē Apænte nāni Äñoncabo tōmāññāni, Mōnō apænte ante wæññōmō

wæncæcǣm̄pa, ante cædinque, Itota nānō wænguinqe wēnæ wēnæ cæcā ingampa, ante æcānō babæ ante anguingāā, ante diqui diqui minōnān̄m̄pa. ⁶⁰ Incæte nanguī ināni ponte babæ apænedāni incæte, Æcānō eyepæ babæ ānaa, ante edæ dæ angā wædānitapa. Ayæ ate mēnaa nē babæ wapiticæ ānōna inte awēnēidi weca pō guite, ⁶¹ apænedinque,

—Īngā, “Wængonguī tæiyæ waemō oncō ongō incæte botō ĩñōmō tæi piñæmo ĩnōmo inte godō cæbo bai wo tænguimæ wææm̄m̄m̄pa. Ayæ mēōnaa go adoōnæque ĩñonte botō wæætē do mænōm̄aim̄opa,” angā ēñentamōnapa tōō. ⁶² Ante apænedā ēñēninque nē godongā ñænængā pōni ĩnongā incæ ængæ gantidinque Itota ingante,

—Īñæm̄pa pæ wēēnebii. Tōmēna bitō ĩm̄tedō ante godō ān̄inque nāna ān̄inō ante bitō æbānō ām̄ii.

⁶³ Āñongā Itota cōwē ānām̄ai edæ pæ wēēnecā. Adinque nē godongā ñænængā pōni ĩnongā wæætē,

—Wængonguī nē Quēwengā inte tōmēngā nānō ēñēñongā edæ nāwangā ante apænebi ēñēmōnii, ām̄opa. Mōnō Codito ĩñōmō Wængonguī Wengā ĩnongā ingampa. Bitō ĩñæm̄pa māñim̄idō ĩnōmi ĩmitawo.

⁶⁴ Mānōm̄ai angā ēñēninque Itota wæætē,

—Tōmēmi bitō ān̄inō bai māñim̄odō ĩnōmo ĩm̄opa. Incæte botō godōmenque apænebo ēñēedāni. Īncayæ ate botō ĩñōmō edæ Waobo ēñagaimo inte edæ Wængonguī nē Tæi Piñængā ingā tōmēmængā ĩnō tæ contabo adinque m̄initō ayæ ate botō oōnædē boguimancodē pōmo acæm̄in̄m̄pa.

⁶⁵ Ante apæneccā ēñente wædinque nē godongā ñænængā pōni ĩnongā piinte badinque, Eñente awædō, ante bai cædinque edæ nāmā weocoo wānā ñænte,

—Wængonguī ingampa mānōm̄ai cæquingāā. Edæ tōmēngā nāmā incæ babæ ante nē wēnæ wēnæ apæneccā ĩn̄inque idæwaa. Wacā tōmēngā ingantedō, Wēnæ wēnæ cæcā atabopa, ante nē ancæcāim̄pa, ante ñōwo diqui diqui m̄inām̄ai ingæim̄pa. Tōmēngā nāmā Wængonguī Wengā inte bai babæ ante nānō ānewēñinō ante do ēñēm̄ini inte m̄initō, ⁶⁶ edæ æbānō ante pōnēm̄ini.

Ante āñongā nē apænte ānāni guiquēnē,

—Nānō wænguinqe ānewengampa tōō.

⁶⁷ Ante apænte ān̄inque edæ pancadāniya Itota tōmēngā awinca towæ t̄anōmōninque tæi tæi p̄anānitapa. Wadāni guiquēnē tōmēngā ingante tamōninque,

⁶⁸ tōmēngā ingante,

—Bitō Codito ĩmitawo. Æcānō bitō ĩmite awēmō nē pānaa, ante Wængonguī beyænque apænedinque apænebi ēñēmōnii, ante badete togadān̄m̄pa.

Pegodo incæ, Dicæ abogaa, angampa
(*Māadoco 14.66-72; Odoca 22.56-62; Wāō 18.15-18, 25-27*)

⁶⁹ Ayæ Pegodo guiquēnē māñi wæipodē yacōmōñāa contate ongōñongā onquiyængā nē cæcā ĩñōmō tōmēngā weca ponte apænedinque,

—Māningā Gadideabæ quēwēningā Itota tōnō bitō guēa cægōmitapa tōō.

⁷⁰ Ante apæneyongā tōmānāni nāni ayōmō Pegodo,

—Dicæ. Bitō ānō ante æbānō ām̄ii, ante dicæ ēñēmogaa.

⁷¹ Ante ān̄inque Pegodo yademō gāānē tao gote ongongā adinque wacā onquiyængā wæætē godongāmæ ongōnāni ĩnānite apænedinque,

—Māningā adobai Itota Nāatadeta quēwēnongā tōnō nē cægōningā ingā aedāni.

⁷² Ante apæneyongā Pegodo wæætē,

—Wængonguī ēñēñongā botō nāwangā āmo ēñēedāni. Īngā onquiyængā nānō nē āningā ingante botō dicæ abogaa, angantapa.

⁷³ Ayæ wantæ ate māñiñōmō ongōnāni Pegodo weca pōninque,

—Īñæm̄pa Itota tōmēngā tedecā bai adode nē tedebi inte bitō tōmēngā m̄iñæ m̄ini nē gocabo adobi ĩm̄ipa tōō.

⁷⁴ Āñōnāni edæ Pegodo wæætē, Wængonguī ēñēñongā apænedinque botō nōingā ām̄opa, ante Wængonguī ēmōwo ante babæ tedewēninque tōmēnāni ĩnānite,

—M̄ini nē angā ingante dicæ abogaa.

Mānōm̄ai ante tæcæ ānewēñongā edæ tawadiya dobæ petapa. ⁷⁵ Pe wædinque tōmēngā, Æ Itota nānō ān̄inō bai ĩm̄pa, ante wæcantapa. Itota, “Tawadiya pedām̄ai ĩñonte bitō botō ĩm̄tedō ante wadō ante apænedinque, Dicæ abogaa, ante edæ mempoga go adopoque anguūmi ĩm̄ipa,” angantapa. Ante Pegodo, Nōwo nānō pequinque do pecampa, ante wædinque oncodo taote edæ guingo imonte wædinque edæ Ca ca wægacāim̄pa.

27

Itota ingante Pidato weca ænte māo gōnōnān̄ipa

(*Māadoco 15.1; Odoca 23.1-2; Wāō 18.28-32*)

¹ Ayæ ñāō bayonte, Wængonguī quī, ante nē godōnāni ñænænāni tōnō ood-eoidi ĩnānite nē aadāni nāni Picæncabo tōnō apænte ān̄inque edæ, Itota ingante wæñongæim̄pa, ante godongāmæ Ao angadān̄m̄pa. ² Ān̄inque tōmēngā ingante yao ongonte goti winte æninque edæ odōmānoidi beyæ Oodeabæ awēnē gob-edōnadodo Pidato ingante māo gōnōnāni ængacāim̄pa.

Codaa wodi iimaï cædinque wængampa

³ Ayæ, Itota ingante wængongæimpa, ännäni eñente wædinque Codaa tömengä ingante nê godöningä guiquenê, Æ tömengä nänö wænguinquemê cæboinö ante pönemogaa, ante guingo imonte wæcantapa. Ayæ, Wængongui qui, ante nê godönäni ñænænäni tönö nê aadäni näni Picæncabo adodö æncædänimpa, ante todëinta padatamö tömënäni näni pönontamö adodö pædæ godoncæte ante gocantapa.

⁴ Ayæ tömënäni inänite,

—Inæmpa cæboo. Edæ Itota wënæ wënæ cædämaï iningä inñongante botö nê godönimo inte wiwa cæbo imo ante awædö.

Ante äñongante tömënäni guiquenê,

—Tömëmi wënæ wënæ cædimi inte wentamö bitö entawenö adinque mönitö ædö cæte wæquimöni. Tömëmi edæ nê cædimi inte edæ abaimipa töö.

⁵ Ännäni wædinque edæ tiguitamö incæ Wængongui tæiyæ waemö oncönê wo wææntodöninge Codaa oncodö tao godinque edæ nämä önömenca wëä æi goti guemencate dobæ wængacäimpa.

⁶ Mäninta wo wææntodongä ate wædinque, Wængongui qui, ante nê godönäni ñænænäni incæ tiguitamö yao yao ongonte æninque,

—Wepæ näadintamö adinque Wængongui Baa ancæcäimpa, ante pönente wædinque mönö, Wængongui qui, ante ædö cæte godonguimö.

⁷ Ante godongämæ pönencöninge tömënäni, Oodeoidi inämaï inäni wodido bacæimpa, ante ömæ nê dai bædongä eadiömæ incæ mänii tiguitamö godonte ængadänimpa. ⁸ Ininque wepæ näadintamö godonte näni ænimæ ante, Wepænguipo impa, ante näni pemönimæ inñomö nïwo ganca impa. ⁹ Ininque do inñomö Eedëmiya wodi Wængongui beyæ iimaï ante nänö apænegainö bai inque batimpa. “Idægoidi, Tömängä beyæ mänimpotamö godonte ængæimpa, ante näni änimpotamö incæ todëinta tiguitamö padatamö æninque, ¹⁰ tömënäni Wængongui botö imote nänö äninö bai eñente cædinque edæ dai bædongä eadiömæ godonte ænänitapa,” ante Eedëmiya nänö angainö bai do inque batimpa.

Pidato weca Itota ongongampa

(Mäadoco 15.2-5; Odoca 23.3-5; Wäö 18.33-38)

¹¹ Itota inñomö awënê gobedönadodo Pidato weca a ongöñongante awënê gobedönadodo inñomö tömengä ingante,

—Bitö oodeoidi Awënê Odeyebi imitawo.

Äñongante,

—Bitö tömëmi änö bai botö mänimodö imopa, Itota angantapa.

¹² Ayæ, Wængongui qui, ante nê godönäni ñænænäni tönö nê aadäni näni Picæncabo guiquenê Itota ingante äninque, Wënæ wënæ cæbipa töö, ante äñönäni tömengä edæ pæ wëenecä. ¹³ Ate wædinque Pidato wæætê,

—Bitö æpogadö wënæ wënæ cæbi imipa, ante nangui ännäni eñenämaï inte bitö ædö cæte edæ pæ wëenebii.

¹⁴ Äñongante Itota inñomö tömënäni näni äninö ante adodeque ante apænedämaï ingä adinque awënê gobedönadodo wæætê, Quiëmê bai pæ wëenecä awædö, ante wægcäimpa.

Itota wæncæcäimpa, ännäni

(Mäadoco 15.6-20; Odoca 23.13-25; Wäö 18.38-19.16)

¹⁵ Mänimæ awënê gobedönadodo mäninñedê wadepo inñö wadepo inñö cöwê iimaï cædongäimpa. Oodeoidi ææmæ näni cæyedê gobedönadodo inñomö, Nê tee mönete ongönäni inänite adinque mönitö æcänö ingante ämüni inñimo cæbo goquingä, ante äñongä ännäni eñëninque tömengä tömënäni näni äningä adocanque ingante inñimo cæcä godongäimpa. ¹⁶ Mäninñedê adocanque wënæ wënæ nänö cædinö beyæ tee mönete a ongongampa, ante tömänäni do eñëñönänimpa. Mäningä emöwo Badabato inongäimpa. ¹⁷ Ininque nangui inäni godongämæ pönäni ate Pidato tömënäni inänite edæ,

—Æcänö ingante mönitö beyæ inñimo cæbo abæ tawænte gocä ænguimüni. Badabato ingante inñimo cæbo gocä ænguimüni. Wæætê edæ Itota Codito möni änogä ingante inñimo cæbo gocä ænguimüni, angacäimpa.

¹⁸ Edæ do inñomö, Itota gomonga cæcä ate wædinque tömënäni tömengä ingante pünte adönänimpa. Mäninö beyæñque tömënäni Itota ingante bæi ongonte botö nempo æte mämö pædæ pönönänitapa, ante Pidato do eñengantapa.

¹⁹ Ayæ odömänoidi näni apænte anguimpaa ayæ ongöñongä Pidato nänöögängä inñomö wacä ingante da pönongä pöninge Pidato ingante nänöögängä beyæ apænecantapa. “Botö nïwoönæ möwocodê wülmöninge mäningä nê nö cædongä beyæ nangui wogæi wogæi cæwënte wæbopa cæbii. Bitö tömengä ingante gampodämaï inte gomö aquenê quëwêê, ämopa,” ante bitö nänöögängä angampa, angantapa.

²⁰ Ängä eñente wæyongä, Wængongui qui, ante nê godönäni ñænænäni tönö nê aadäni näni Picæncabo näni äincabo guiquenê wadäni nê godongämæ ongönäni inänite ännäni. Mönitö Pidato ingante iimaï äedäni. Badabato ingante inñimo cæbi gocæ. Itota ingante wæætê ämi wænönäni wængæ, ante äedäni, ännäni. Awënëidi incæ mänömaï ännäni eñëninque godongämæ

ongönäni Ao änänitapa. ²¹ Awënë Pidato iñömö tömënäni Inänite äninque,

—Mënaa ongöna iñönte mīnitō æcānō ingante ämīni ñimpo cæbo goquingāa.

Äñongante,

—Badabato ingante ämönipa.

²² Änäni wædinqe Pidato wæætē,

—Inique Itota Codito mīni äñongā ingante æbänō cæquimoo, ante ämīni.

Äñongante tömänäni edæ,

—Awæ ñænquedimæ ämi cæte gönonte wæñönäni wængæe töö.

²³ Änäni ëñëninque Pidato ayæ,

—Inæmpa quīnō wënæ wënæ cæcantawo.

Äñongā tömënäni godömenque yedæ äninque adodö,

—Ämi awāa timpote wæñönäni wængæe.

²⁴ Ante ancaa änewëñönäni Pidato iñömö, Tæcæ wæætedö wæætē änäni inte tömënäni wënæ wënæ cædäni wæquī wæ, ante guīñente wædinqe ayæ, Ædö cæte botö godömenque cæquimoo, ante pönente wædinqe edæ æpæ pi ñiñænte tömënäni ayönäni öñompo mempodinqe tömënäni inänite angantapa.

—Tömengā wënæ wënæ cædämaī iñongante botö, Wæñongæimpa, änämaī imo inte tömengā wæpæ näadämaī imo aedäni. Wæætē mīnitō guiquënë, Wæncæcäimpa, ante nē äñimīni inte edæ näate bacæmīnimpā, ante adinqe botö mempobo aedäni.

²⁵ Angā ëñëninque tömänäni Ao äninque edæ,

—Möni äñinö beyænque mönitö incæ mönitö wënäni incæ tömengā wæpæ beyæ näate bai bacæmönimpā töö.

²⁶ Änäni ate awënë gobedönadodo Pidato tömënäni näni äñinö ante ëñente cædinqe edæ Badabato ingante ñimpo cædinqe tömënäni nempo pædæ godongā æñänitapa. Wæætē edæ Itota ingante edæ Pidato angā æmontai badöimenca tæi tæi pänäni ate tömengā ingante ñænque quepote awāa näni gönonguinque edæ da godongā ænte godänitapa.

²⁷ Awënë gobedönadodo näni wææ wänönäni guiquënë Itota ingante ænte godinqe awënë gobedönadodo oncönë Podætodio näni ancönë mangui guiyongā tontadoidi bacabo Itota weca godongämæ äñete pönänitapa. ²⁸ Pöninqe tömënäni, Awënë imi inte awënë wecoo wëñacæbiimpa, ante bai cædinqe badete todinqe Itota wecoo gā tadongadinqe wæætē opatawæ ëmoncoo pönö da wëñadinqe, ²⁹ daa mongæmenca bai æninque que cædinqe, Awënë poganta wencacæbiimpa, ante bai cædinqe pönö daga wencadänitapa. Ayæ cæwipa ænte

mämö pædæ pönonte änäni æninque tömengā tömëmæmpoca pæ mangā adinqe tömënäni da guicapodinqe tömengā ingante,

—Badogaa, bitö oodeo awënë odeyebi imipææ, ante badete togadänimpa.

³⁰ Ayæ tömengāa towæ towæ tånongadinqe cæwipa æninque tæi tæi ancaa pancadänitapa. ³¹ Ayæ ñique badete todinqe tömënäni opatawæ ëmoncoo gā tadongadinqe tömengā nämā wecoo daga wëñadänitapa. Ayæ edæ tömengā ingante awæ timpote wæñoncæte ante töö æmænte ænte tao mäodäni gocacäimpa.

Itota ingante awāa timpodäni wængampa (Mäadoco 15.21-32; Odoca 23.26-43; Wäö 19.17-27)

³² Ænte mäo godinqe tömënäni Tidëne quëwengā Timönö ingante bee tëninque tömengā ingante edæ, Bitö ægodöe, Itota ingante möni timpöquiwæ ænte mongænte goe, änäni mongænte gocantapa.

³³ Mänī Itota ingante ænte mäo godinqe Godogota näni äñömö mönö tededö “Ocatainö” iñömö mäniñömö pönänitapa.

³⁴ Mäniñömö pönäni ate wadäni, Nantate beyæ becæcäimpa, ante cædinqe yowepæ biñömæ näni ämæ tönö moncapæ adoyömö wempo cædëninque pædæ pönö cæyönäni tömengā önonque yædæ bedinqe edæ Baa angantapa.

³⁵ Ayæ Itota ingante awæ ñænquedimæ näni ænte pöniwāa töö godöninque pönö timpodinqe wææ tüwadinque ængæ gantidënanitapa. Ængæ gantidënäni ate wægöñongā tömënäni wæætē tömengā wecoo inī ante, Æcänö quınca nö ta adinqe tömengā mänincoo æncæcäimpa, ante wææntodöninque adocooque adocooque æñänitapa. Mänömaī cæyönäni Wængongui beyæ näni apænægainö bai ñique cætimpa. “Botö wecoo inī ö æninque tömënäni näni caboque wacā ingā wacā ingā nënempodänitapa. Ayæ, Æcänö quınca nö ta adinqe tömengā mänincoo æncæcäimpa, ante cædänitapa.” ³⁶ Tömënäni tæ contadinqe tömengā ingante wææ aadänitapa. ³⁷ Ayæ, Itota nē wænguëñengā ingampa, ante quīnante äñäni, ante edonque acæimpa, ante cædinqe tömënäni, “Ingā Itota iñömö oodeoidi Awënë Odeye inongā ingampa,” ante yewæmöninqe edæ awæmpaa tömengā ocaboca inö tee tinte wo cædänitapa.

³⁸ Ayæ wada nē ö ænte quëwëñina inate adoyedë tömengā tönö adocanque tömëmæ inö adocanque dipæmæ inö godö timpote ængæ gantidëdäni wægongadäimpa. ³⁹ Ayæ

wodo pänta nē godāni guiquēnē Itota ingante godō wēnæ wēnæ ante badete todinque pica pica cædinque,⁴⁰ tōmēngā ingante wapiticæ apænedinque,

—Bitō iñæmpa Wængonguī tæiyæ waēmō oncō incæ bæ tate wo ewēninque edæ mēōnaa go adoōnæque iñonte do mænoncæ åmitawo. Månōmai cæcæ ånimi inte bitō tōmēmi edæ nāmā incæ cæte quēwēmāwe. Bitō nõ Wængonguī Wēmi İmi İninque edæ o togæmpote o togæwate wææe, åmōnipa tōō.

⁴¹ Åñōnāni edæ, Wængonguī quī, ante nē godōnāni nænænāni guiquēnē nē odōmōnāni tōnō ayæ oodeoidi inānite nē aadāni nāni Picæncabo tōnō adobai iūmai ante edæ badete todānitapa.

⁴² —Tōmēngā, Wadāni quēwencædānimpa, ante waa cæcantawoo. Nōwo iñæmpa ædō cæte nāmā waa cæte quēwēnguingā. Idægoidi awēnē odeye ingampa diyæ ti wæænte goquingā. Edæ ti wæænte gocā adinque mōnitō wæætē edæ, Nāwangā impa, ante pōnēmai wædō. ⁴³ Ayæ nāmā ingantedō åninque tōmēngā edæ, Botō Wængonguī Wēmo inōmo İmopa, ante angāmææ. Tōmēngā, Wængonguī cōwē pōnō cæcæcāimpa, ante wede pōngæ iñongante Wængonguī wæætē tōmēngā ingante edæ waa acampa diyæ iñimpo cæcā goquingā, ante badete todānitapa. ⁴⁴ Ayæ nē ō æna guiquēnē tōmēngā tōnō godongāmæ timpote wægōna İninque Itota ingante piinte adobai wēnæ wēnæ ante badete togadāimpa.

Itota wængampa

(Māadoco 15.33-41; Odoca 23.44-49; Wāō 19.28-30)

⁴⁵ Tæcæbæcā pōni bayō tōmāmæ iñontobæ wēmō badinque ayæ ayaōnā wæiganca mæ māmōnte bai iñimpa. ⁴⁶ Ayæ edæ ayaōnā wæiyōnte Itota nanguī pōni yedæ åninque, “Edii, Edii, nēma tabatāni,” åninque mōnō tededō, “Botō Wængonguīñaa, botō Wængonguīñaa, ædō cæte botō İmo emō cæte gobiyaa.”

⁴⁷ Ante wæcā ēñēninque godāmæ ongōnāni guiquēnē,

—E. Ediya ingante aa pecā apa.

⁴⁸ Åñōnāni adocanque do pogodo gote õnætāmō ænte pōninque biimōmæ bai õnōmænque ænte aa bedōninque næænte, Cæwipaca pædæ ææñōmo becæcāimpa, ante cæyongā, ⁴⁹ wadāni guiquēnē,

—Ee aquēnē. Ediya edæ ponte wabānō cæcā quēwēnguingā abaimpa, angadānimpa.

⁵⁰ Itota iñōmō wæætē ogæ tededinque do wængacāimpa. ⁵¹ İninque edæ Wængonguī oncō tæiyæ wæmōncōnē weocoo odemō nāni wææ wodōincoo adoyedē õnōnæca inō tæcæguedē pōni tænguimæ wææntapa. Ayæ goinque bayōnte dica incæ tæ gāmæntapa. ⁵² Ayæ wao wodido incæ wi

ænote bayōnte edæ Wængonguī quīnāni do wængaināni incæ pancadāniya fñāni õmæmōninque ⁵³ tōmēnāni wodido abæ tawænte godānitapa. Edæ nōwo iñōmō, Itota fñāni õmæmōngā ate tōmēnāni nē fñāni õmæmōnināni inte Eedotadē nāni wæmō quēwēñōmō ponte a ongōñōnāni nanguī ināni agadānimpa.

⁵⁴ Māniū goinque do pō adinque ayæ, Æbānō cætimpa, ante tōmānō adinque edæ tontado capitāō tōnō wææ wānōnāni tōnō ancai guīñēninque,

—Nāwangā impa. İngā iñōmō Wængonguī Wengā ingaiñō ante pōnenguēnē, angadānimpa.

⁵⁵ Do iñōmō Itota Gadideabæ quēwente pōñongante onquiyæñāni nanguī ināni tee empote pōninque tōmēngā beyæ nē cædināni inte nōwo adodāni adoyōmō pō gongæninque pōmō adānitapa. ⁵⁶ Māadiya Māagadadēnā tōnō wacā Māadiya İnatapa. İñā iñōmō Tantiago tōnō Ootee badā İnantapa. Ayæ Tebedeo wēna tōmēna badā tōnō wadāni adobai Itota wæññongante gobæ agadānimpa.

Itota wodi baō iñi māo daga wēnāniya

(Māadoco 15.42-47; Odoca 23.50-56; Wāō 19.38-42)

⁵⁷ Ayæ gāwadecæ bayōnte Ootee nē nanguī eacā incæ Itota miñæ nē gocā do badingā inte Adimatea iñōmō pægaingā inte pongā ingantapa. ⁵⁸ Tōmēngā iñōmō nōwo Pidato weca godinque, Itota wodi baō iñi pōnōmi æmoe, angantapa. Pidato Ao åninque nē cædāni inānite, Tōmēngā baō ee amīni æncæcāimpa, angantapa. ⁵⁹ Itota wodi baō iñi gāmiyate pædæ wææñōnte ænte godinque wæmō weocoo nincoo nāni ancoo wīni wīni caadinque, ⁶⁰ Ootee, Botō wodido baquimpa, ante dicamontaa nānō wodintatodē müintatodē māo guidō fñō cædinque daga wengantapa. Ayæ dicabo da pæñæ pōnō tee mōnodinque wadæ gogacāimpa. ⁶¹ İūmai cæyongā Māadiya Māagadadēnā tōnō wacā Māadiya tōnō Itota wodido obo contate acōnatapa.

Itota wodido iñōmō wææ wænōnāni a ongōnāni

⁶² Ayæ guēmanguīōnæ bacæ cæpa, ante nāni tāno cæōnæ İinque cædāni ate iimō ate, Wængonguī quī, ante nē godōnāni nænænāni tōnō Paditeoidi guiquēnē Pidato weca ponte ⁶³ tōmēngā ingante åninque,

—Awēnē ēñēmi. Māningā nē babæ åningā iñōmō tōmēngā mīngā iñedē apænedinque, Mēōnaa go adoōnæque iñōnte botō fñāni õmæmoncæboimpa, ante nānō åniñō ante pōnente wæmōnipa. ⁶⁴ Ayæ tōmēngā miñæ nē godīnāni incæ tōmēngā baō iñi awēmō ō æmāināni ante edæ wæmōnipa.

Ænāni iinque tōmēnāni, “Dobæ ñāni ōmæmongāimpa,” ante godōmenque babæ ānāni edæ wēnæ wēnæ babaimpa cæbii. Nōwo wææ wānōnāni Inānite āmi godinque tōmēnāni māningā nānō wodintatodē tæēmō tee mōnodinque mēōnaa go adoōnæque ganca wææ wānonte acædānimpā. Edæ wīi godōmenque wēnæ wēnæ bacæimpā, ante cæcæbiimpā, āmōnimpā.

⁶⁵ Āñōnāni Pidato wæætē,

—Bado, wææ wānōnāni mæ ongōnānimpā. Mīnitō tōmēnāni Inānite ænte māomīni goyōnāni mīnitō wæætē mīni ēñēnīnō bai do cædinque tæēmō tee mōnote cæedāni.

⁶⁶ Angā ēñente godinque tæēmō mōnodinque Itota nānō wodintatodē dai tee bædodānitapā. Ayæ, Awēnē ēmōwo adinque wi ænodāmai incædānimpā, ante dai bæyōmō aquīfēdē ongontoca da guidonte awēnē ēmōwo adimpca yewæmonte bai bagatimpā. Ayæ wææ wānōnāni Inānite ænte mǎo gō cædāni wææ wānongadānimpā.

28

Itota do wæningā inte ñāni ōmæmonte quēwengampā

(Māadoco 16.1-8; Odoca 24.1-12; Wāō 20.1-10)

¹ Mānīi guēmanguiōnæ iinque go ate wacā tēmāna baquinque ñāō ba iinque Māadiya Māagadadēnā tōnō wacā Māadiya iñōmō Itota wodido acæte ante gogadāimpā. ² Awēnē Wængongui anquedo do wææ pōninque edæ dicabo wēā godō oo wi ænocantapā. Ayæ goinque nangui ocæ ocæ cætimpā. Anquedo iñōmō dicaboga tæ contacantapā. ³ Tōmēngā awinca nāinte cæ bai ēmōnongā inte tōmēngā weocoo nāmænta pōni ēmoncōo mongænte a ongōngā. ⁴ Adinque edæ nē wææ wānōnāni guiquēnē ancai guīñente wædinque do do wāte bai badinque æmæwo wænte bai ōñōnānitapā. ⁵ Mānīi onquiæna pōñōnate Wængongui anquedo iñōmō,

—Guīñēnāmai ieda. Itota nāni awāa tim-podāni wæningā ingante mīnatō diqui diqui mīminapā, ante edæ do ēñēmopā. ⁶ Iñōmō edæ dæ angampā. Tōmēngā nānō ānīnō bai cædinque do edæ ñāni ōmæmōninque tao gocāimpā. Pō guīite aeda. Iintatodē nānō ōñōntatodē iñōmō edæ ōnontatoque impā. ⁷ Ayæ nē adīmīna inte edæ quingæ pogodo gote tōmēngā mīñæ nē godināni Inānite gode ante apænedinque, “Itota dobæ ñāni ōmæmongāimpā ataquēdāni, æda.” Ayæ iñōmō tōmēngā Gadideabæ tāno godinque a ongōñongā mīnitō gote aedāni, ante mīnatō gode ante apænedā ēñēdāni. Bado, āmo ēñēmīnapā edæ.

⁸ Angā ēñēninque tōmēngā wodido abæ tawænte wadæ godinque tōmēna, Ancai

guīñente wæte todadō, āninque watapæ todinque Itota mīñæ nē godināni Inānite gode ancæ pogodo godatapā. ⁹ Goyōna edæ Itota incæ iñōntobæ mǎo bee tēninque edæ, Mīnatō, angā ēñēninque edæ iñāna tōmēngā weca pōninque ōnōwaca ædæ wæante mō ongōwate, Wængongui Awēnē imidō anguēnē, ante watapæ apæneyōna, ¹⁰ Itota iñōmō edæ,

—Guīñēnāmai ieda, angantapā. Ayæ, Mīnatō botō biwīdi Inānite gode āninque iīmai æda. Mīnitō Gadideabæ godinque botō imote acæmīnimpā, ante tōmēnāni Inānite æda, ante Itota angacāimpā.

Nē wææ wānōnāni babæ ante apænedānimpā

¹¹ Onquiæna gode ancæ goyōna Itota wodido nē wææ wānōnāni pancadāniya wæætē tōmēnāni nāni quēwēñōmō godinque, Wængongui quī, ante nē godōnāni ñænænāni Inānite apænedinque, iīmai cætimpā, ante tōmānō ante apænedānitapā. ¹² Apænedāni ēñēninque edæ nē godōnāni ñænænāni guiquēnē nē aadāni nāni Picæcabo tōnō pōnē cōninque godongāmæ Ao āninque tontadoidi nē wææ wānōnāni iñōnānte tigitamō padatamō bacoo godōninque, ¹³ tōmēnāni Inānite iīmai angadānimpā.

—Wadāni Itota wodi baō ante wæyōnāni edæ mīnitō ōnonque, Mō cōñōmōni tōmēngā mīñæ nē godināni awēmō ponte ō ænānitapā, ante babæ apæneacæmīnimpā. ¹⁴ Ayæ mānīnō āñōmīni awēnē gob-edōnadodo ēñēninque, Quīmæ mōwēmīni, ante pīngā adinque edæ mōnitō wæætē wææ cædinque tōmēngā ingante āmōni ēñēninque tōmēngā pānāmai ñimpō cæyongā mīnitō guīñente wædāmai incæmīnimpā.

¹⁵ Āninque nē godōnāni ñænænāni iñōmō nē wææ wānōnāni Inānite nangui tigitamō godōnāni ænānitapā. Mānintamō æninque awēnēidi babæ nāni ānīnō bai adodō ante apænedinque, Tōmēngā mīñæ nē godāni ō ænānitapā, ante babæ wapiticæ apænegadānimpā. Iinque tōmēnāni nāni babæ apænedō ēñēninque edæ oodeoidi gode ante tēdinque godōmenque ñōwo ganca ayæ wapiticæ ante tēdēdānimpā.

Itota, Apæneccæ goedāni, angampā

(Māadoco 16.14-18; Odoca 24.36-49; Wāō 20.19-23)

¹⁶ Ōnompō æmæmpoque go adodānique Itota mīñæ nāni godincabo guiquēnē mānīi Itota nānō ānō bai cædinque Gadideabæ godinque ānanquidi æiyōnāni ¹⁷ Itota a ongōngā adinque tōmēngā weca ædæ wæante, Wængongui Awēnē imidō anguēnē, ante watapæ apæneyōnāni pancadāniya guiquēnē, Wabānō i, ante pōnēnāmai ingadānimpā.

¹⁸ Itota iñömö tömënäni weca pönömenque pöninque,

—Wængongui pönö cæcä beyænque botö iñömö öönædë Tæiyæ Awënë inömo inte inguipoga adobaï në Tæiyæ Awënë badinque nämä tæï piñæmo inte në ämo imopa. ¹⁹ Ante wædinque munitö guiquënë inguipoga tömämæ quëwënäni weca godinque, Itota miñæ gocædänimpa, ante apænemini ëñente botö miñæ në godäni bacædänimpa. Ayæ mönö Mæmpo ëmöwo apænedinque, ayæ Wængongui Wëmo iñömote botö ëmöwo apænedinque, ayæ Wængongui Tæiyæ Waëmö Önöwoca ëmöwo apænedinque munitö tömämæ quëwënäni inänite æpænë guidömini guicædänimpa. ²⁰ Ayæ botö munitö iminite botö äninö ante, Tömänö ante adodö cæedäni, ante odömömini ëñente cæcædänimpa. Ayæ botö edæ ñöwo incæ ayæ inguipoga inque baganca cöwë munitö tönö ongonte godongämæ cæcæboimpa. Näwangä inguinö anguënë, ante Itota angacäimpa.

Itota Codito ingantedö ante Mäadoco nänö watapæ ante yewæmongainta

*Wäö önomæca ponte apæneçä ëñëñänpa
(Mäateo 3.1-12; Odoca 3.1-9, 15-17; Wäö*

1.19-28)

¹ Ponguingä, ante nani Codito angaingä ñongä inte Wængongui Wengä Itota ingantedö ante botö Mäadocobo watapæ ante yewæmömopa.

² Doyedë ññömö Wængongui beyæ apænedinque, Codito ingante Wængongui ñmaï angäimpa, ante Itaiya wodi yewæmongacäimpa.

“Taadö bitö goquïnö waa wëwaquingä, ante bai cædinque botö,

Botö beyæ nê gode änongä ingante da godömo täno beyænte gocä ate bitö ayæ gocæbiimpa, ämopa.

³ Önomæca ññömö adocanque ogæ tedete aa pecæcäimpa.

Tömengä ññömö, ‘Awënë nänö ponguinö ante mïnitö tee moncate bai cædinque, taadö töinö pinonte bai cæädäni,’ ante aa pecä ëñengäimpa.”

⁴ Ante Itaiya wodi nänö nê angaingä ñongä inte Wäö ñöwo önomæca pöningue æpænë guidongantapa. Mänömaï cædinque tömengä mänññömö pönäni inänite apænedinque, Mïnitö, Idæwaa wënæ wënæ cæte awædö, ante ocæ ëmænte Wængongui gämænö pöningue æpænë guicæminimpa. Mänömaï cæmïni adinque Wængongui mïnitö cædinö ante nê panguënegä incæte piinämaï inte ñimpo cæcæcäimpa. ⁵ Ante Wäö mänömaï apæneyongante Oodeabæ tömæo quëwënäni Eedotadëë quëwënäni tömänäni tömengä weca pö pö bee tente ëñëñinque, Näwangä ämpa. Bitö ä bai ëñëñämaï cæte quëwëmöni inte idæwaa wënæ wënæ cæte awædö, ante wædäni ëñëñinque Wäö Oododänö æpænë guidongä guidänitapa.

⁶ Wäö ññömö weocoo ante cämeyo ocaguincoo nonte badöincoo mongænte adobai pacadeyænta ante æmontai badonte encadeyænongäimpa. Tömengä cængui ante ñwäiique cænte tömengä bequï ante guïñëmænque ade bete nê quëwënongäimpa.

⁷ ñmaï ante apæneçä ëñëñänitapa. “Ïncayæ ate nê Ponguingä guiquëñë tömengä täxi ëmongä ewocadongä inte nanguï cæcä ingampa. Botö guiquëñë wædämo pöni ñnomo inte tömengä awæncata eyepæ ñmopa godö ñi cæquïmo. ⁸ Botö önonque æpænë guidömo guimïnipa. Tömengä wæætë da pönongä ate Wængongui Täiyæ Waëmö

Önöwoca pö guicä ewocacæminimpa,” ante Wäö mänññedë apænegacäimpa.

*Itota æpænë guicampa
(Mäateo 3.13-17; Odoca 3.21-22)*

⁹ Ñinque Gadideabæ Näatadeta quëwente Itota mänññedë pongä adinque Wäö Oododänö æpænë tömengä ingante guidongä guicantapa. ¹⁰ Ñinque æpænë guidingä inte do ää ta gongæningue Itota æmö ayongä öönæ gä godonte bayö equemö wææ bai Wængongui Täiyæ Waëmö Önöwoca incæ tömengä wææ guicä acantapa. ¹¹ Ayæ ëñëñongante, “Bitö botö Wëmi ñnömi inte nê botö waadebi ñmipa, ate tobopa,” ante öönædë inö apæneçä ëñengacäimpa.

Itota incæ wënæ wënæ cæcæcäimpa, ante wënæ cæcampa

(Mäateo 4.1-11; Odoca 4.1-13)

¹² Mänññedë Itota ingante Wængongui Önöwoca incæ, Äibawë, äningue önomæca mæicä äicantapa. ¹³ Äi quëwëningue wantæpiyæ cöadanta öönæ önomæca quëwëñongante wënæ awënë Tatäna pöningue, Wënæ wënæ cæcæcäimpa, ante Itota ingante cædongäimpa. Ayæ Itota mänömaï babædi quëwëñömö quëwëñongante Wængongui tömengä anque-doidi inänite da pönongä pöningue tömëñäni tömengä beyæ pönö waa cægadänimpa.

Itota Gadideabæ pöningue tæcæ mä cæcampa

(Mäateo 4.12-17; Odoca 4.14-15)

¹⁴ Mänömaï cæte ate ayæ awënë odeye Edode dobæ Wäö ingante tee möneçä ate mänññedë Gadideabæ pöningue Itota mä Wængongui nänö waa pöni cægainö ante ñmaï ante apænegacäimpa. ¹⁵ “Ponguingä, ante dodäni nani angaiñedë botö Wængongui Awënë Odeyebö inömo inte ñöwo ñinque bayedë do pömopa, ante apænebo ëñëedäni. Mïnitö wënæ wënæ mïni cædïmämö wido cædinque waa pöni botö apænedinö mïni ëñëñö ante pönëedäni,” ante Itota angacäimpa.

Nê gæyæ dadöwënäni inänite Itota aa pecampa

(Mäateo 4.18-22; Odoca 5.1-11)

¹⁶ Ayæ mänñ pöningue Itota gäwapæ Gadideapæ yæwedeca gote cængote ayongä Timönö tönö Äntade tömengä töniñcä ñate acantapa. Nê gæyæ dadöwëna ñöna inte tömëna dicamönæ æpænë wo guitodonte dadöwëna acantapa. ¹⁷ Tömëna ñate Itota,

—Ïñäna, botö mïñæ edæ tee empo pöda, ämopa. Nê dadonte ænte pömïna inte botö weca pöñöminante botö pönö cæbo ate minatö wæætë nê apænemïna badingue waodäni inänite nê ænte pömïna bacæminäimpa,

angantapa. ¹⁸ Angä eñëninque tömëna dicamöñæ do ëmö cæte godinque Itota miñæ edæ tee empo wadæ godatapa.

¹⁹ Itota iñömö godömenque gote ayongä Tebedeo wëna Tantiago tönö Wäö adobai wipodë dicamöñæ tadömoncöna acantapa. ²⁰ Adinque Itota do, Botö miñæ pöda, angä eñëninque tömëna Ao äninque wæmpocä ingante wæætë, Mæmpo eñëmi, änatapa. Bitö nempo wipo ëmö cæte gomönapa, äninque adodaque wæmpocä ingante ëmö cæte Itota miñæ wadæ godatapa.

Itota angä eñente wënæ incæ tao gopa
(*Odoca 4.31-37*)

²¹ Ayæ tömëñani quëwëñömö Capënaömö mämongä pönänitapa. Oodeoidi guëmanguionæ bayonte Itota iñömö Wængongui apænecä nani eñente yewæmongainta ate nani odömöincönë do pö guidinque odömönte apænecä eñëñanitapa. ²² Eñëñönäni tömengä nämä tæi piñëninque nê angä inongä inte nö odömönte apænecä eñente wædinque tömëñani, Wadäni nê wææ odömöñani guiquënë mänömai odömönte apænëdäni eñëmongaa. Itotaque nämä nê eñente entawënogä inte nö pönï odömönte apænecä eñëmönipa, ante wædänitapa. ²³ Ayæ wënæ wentamö ewocacä inte nê quëwëngä mäniñedë tömëñani odömöincönë a ongönninque iñontobæ yedæ ante apænecantapa.

²⁴ —Bitö Itota Näatadeta quëwëñimi inte quïnante mönatö weca pömii. Mönatö imöñate edæ æmæwo wido cæcæte ante wabänö pömitawo. Bitö æmömido imii, ante botö do atabopa. Bitö Wængongui Tæiyæ Waëmö Wëmi inömi imipa, ante edæ do eñëmpoa.

²⁵ Ante tedeyongante Itota tömengä ingante wææ äninque,

—Apocænë quëwëngënë tedewëë. Waocä baönë quëwëñömi inte edæ tao gobäwe.

²⁶ Angä eñëninque wënæ nê wentamö ewocacä iñömö waocä ingante quidi quidi mäo tæ gotodö go wææñongante, Yæ yæ, äninque dobæ tao gotapa.

²⁷ Itota angä wënæ tao gocä adinque tömänäni guñente wædinque nani caboque wæætëdö wæætë tededinque,

—Iingä iñömö quïnö bai ante cæcä. Tömengä nê angä inongä inte edæ mä pönï odömönte apænecampa. Edæ wënæidi nê wentamö ewocadäni inänite tömengä angä eñente cædänipa, ante awædö.

²⁸ Ante pönente wædinque tömëñani, Itota mänömai cæcampa, ante tededinque Gadideabæ tömäo quëwëñani inänite tömö gode ä gode ä cædäni do eñengadänimpa.

Pegodo nänöogæ wäänä ingante Itota cæcä gancæ bacä

(*Mäateo 8.14-15; Odoca 4.38-39*)

²⁹ Mänii Itota oodeoidi odömöincönë ongönninque iinque odömönte apænecä ate tömëñani tao godinque Tantiago tönö Wäö miñæ godinque Timönö tönö Æntade oncönë go guidänitapa. ³⁰ Go guiyönänite wadäni, Timönö nänöogængä wäänä daicawo gawænte möimoga öñongampa, äñäni. ³¹ Eñente wædinque Itota tömengä weca go gongænninque pædæ wææmpote bæi ongönte töö æmængä ate tömengä ængæ ganticantapa. Ayæ gancæ badinque tömengä wæætë tömëñani beyæ cæcantapa.

Daicawo gawænäni inänite Itota cæcä waa badänipa

(*Mäateo 8.16-17; Odoca 4.40-41*)

³² Mänionæ gawadecæ pönï nænque wëmö bayö wadäni daicawo gawænäni inänite wënæ inte quëwëñani inänite tömänäni inänite Itota weca ænte pönänitapa. ³³ Ayæ mäniñömö quëwëñani tömänäni adoyömö pönninque odemö goto gongænänitapa. ³⁴ Ayæ quïëmë beyæ wënæ wënæ inte wædäni adinque Itota nanguï inäni inänite godö cæcä waa badänitapa. Ayæ wënæidi nanguï inäni inänite wido cædinque Itota, Botö æbodö imoo, ante nê adimäni inte tededämai imæwedäni, ante tömëñani inänite wææ angacäimpa.

Itota oodeoidi odömöincönë go guidinque apænecampa

(*Odoca 4.42-44*)

³⁵ Ayæ tæacæ ouqe pönente wëmö iñonte ængæ gantidinque Itota oncodo tao gote gomonga önömæca godinque Wængongui ingante apænecantapa. ³⁶ Apæneyongante Timönöidi, Ædönö gocäi, ante tee empo tee empo gote, ³⁷ adinque,

—Dæ ämi wædinque tömänäni bitö imite ante diqui diqui minänipa cæbii.

³⁸ Ante äñönänite Itota wæætë,

—Mönö wayömö gocäimpa. Eyequei nani quëwëñömö nani quëwëñömö mäo botö apænëbo eñencædänimpa, ante cæcæte ante tate pontabopa.

³⁹ Ante nê äningä inte Gadideabæ tömäo godinque oodeoidi odömöincönë go guii go guii cædinque Wængongui nänö apænëdö ante Itota apænecä eñengadänimpa. Ayæ wënæidi inänite wido cæcä gogadänimpa.

Në baadingä ingante Itota wadæ caacampa

(*Mäateo 8.1-4; Odoca 5.12-16*)

⁴⁰ Ayæ wacä cöwë baate eñawëngä inongä inte Itota weca ponte da guicapodinque,

—Bitö Ao ämi inte wadæ caabi iinque botö do waintai baabaimpa.

41 Æñongante Itota tōmengā tōnō guēa wæwente bai nanguī pōnengā inte pædæ wææmpo gampo caadinque,

—Ao ãmopa. Bitō waintai baacæbiimpa.

42 Angā ñinque ñmōmæintai nānō ēñadintai dæ baadinque tōmengā waintai edæ do baacantapa. 43 Itota edæ tōmengā ingante do da godōninque nanguī angantapa.

44 —Ēñēmi. Botō æbānō cæboo, ante edæ wadāni inānite māo apænedāmai ñmāwe. Wæætē, Nāwangā impa, ante acædānimpa, ante cædinque bitō, Wængonguī qui, ante nē godongā weca tōingā godinque waintai bitō baadintai odōmōmi ædæmō acæcāimpa. Ayæ Mōitee wodi wææ ante nānō angaincoo bai ænte pōninque bitō waintai bitō baadi beyæ ante edæ, Wængonguī qui, ãninque nē godongā ingante pædæ godōmi æncæcāimpa, ante Itota nē baadingā ingante nanguī angantapa.

45 Angā incæte nē baadingā wæætē wadæ godinque ēñēnāmai inte gode ā gode ā cædinque edæ, Itota wadæ caacā waintai baaboī aedāni, ante māo tedecā ēñēnānitapa. Mānōmai ēñēnāmai cæcā beyænque Itota, Tōmēnāni weca ñōwo ædō cæte edonque goquimoo, ante wædinque nānēñē gote ñōmæca gomonga cægongantapa. Incæte tōmengā weca æmænō quēwēnāni æmænō quēwēnāni cōwē pō pō cægadānimpa.

2

Nē cōmāingā ingante Itota angā dao dao gocampa

(Māateo 9.1-8; Odoca 5.17-26)

1 Ayæ tæðnæ quēwēninque ocæ ēmænte Capēnaomō pongā adinque wadāni, Itota oncōnē ponte ongongampa. 2 Ante tededāni wædinque nanguī ināni acæ pōnāni oncōnē eyede pōni guidinque odemō incæ tōmāo wææ ongōnānitapa. Mānōmai tōmāo goto ongōnāni inānite tōmengā Wængonguī nānō apænedō ante apænecā. 3 Ēñēñōnāni wadāni tōnō godongāmæ pōninque mengāa go mengāa ināni incæ cōmāingā nānō mōimpataa æmætæð æmætæð bæi ongonte næænte pōnānitapa.

4 Ponte ayōnāni wadāni Itota weca eyede pōni goto ongōnāni adinque nē ænte māmō pōnināni ññōmō, Ædō cæte guiquī. Ante wædinque oncōmāa ñnō æidāmæ mæi æidinque Itota ñōnæca ñnō epæ cædāni ompite gongæñō tōmēnāni cōmāingā mōimpataa bæi ongōninque tōmengā ingante Itota weca edæ pædæ wæænōnāni. 5 Wæænte ongongā adinque, Tōmēnāni æbānō wede pōnente cædānipa, ante adinque Itota cōmāingā ingante,

—Botō wēmi wædāmai ñe. Wēnæ wēnæ bitō cædimāmo ante bitō ñōwo ñimpo cæte quēwencæbiimpa.

6 Ante apænecā ēñēninque nē wææ odōmōnāni guiquēñē pancadāniya godāmæ tæ contate ongōninque nāmāneque pōnente tededinque, 7 “Quimæ ænewēē. Ñingā ññōmō Wængonguī ingampa diyæ māmōmai cæquingāa. Edæ babæ ancædō. Waomō wēnæ wēnæ mōnō cædimāmo ante Wængonguinque nē ñimpo cæcā ingampa.”

8 Ante mīmōnoque pōñēñōnāni Itota tōmēnāni nāni pōñēwēnō ante ñōwēnenque do ēñente bai pōñēninque edæ,

—Mīnitō quimæ māmōmainō ante pōñēwēminii.

9 “Botō nē cōmāingā nānō wēnæ wēnæ cædimāmo ante ñimpo cæbo quēwencæcāimpa,” ante botō Wængonguī bai ãmo ēñēninque mīnitō guiquēñē, Wængonguī ingampa diyæ māmōmai cæquingāa, ante pōñēminipa. Wæætē edæ, “Ængæ gantidinque mōimpata æninque dao dao gocæcāimpa,” ante botō Wængonguī bai ãmo ñinque mīnitō adobai, Wængonguī ingampa diyæ māmōmai cæquingāa, ante pōñēminii imāimīnipa, ante awædō. Ññæmpa māmōmainō ante pōñēminii ñinque mīnitō edæ æbānō cæquēñēmo ñmo ãmīni. 10 Incæte botō Waobo ēñagaīmo inte inguipoga quēwēninque waomīni mīni wēnæ wēnæ cædimāmo ante nē ãmo inte ñimpo cæbopa, ante mīnitō edæ ēñencæmīnimpā, ante botō ñimāi cæbopa.

Æninque edæ nē cōmāingā ingante edæ,

11 —Bitō ñmite ãmo ēñē. Ængæ gantidinque bitō mōimpata topo cæte æninque edæ tōmēmi oncōnē næænte goe.

12 Angā ēñēninque cōmāingā ñingā incæ edæ tōmānāni ayōnāni ængæ gantidinque mōimpata topo cæte nææ nææ tao gocā adānitapa. Dao dao gocā adinque tōmēnāni, Æbānō cæcāi, ante ēñēnāmai inte guīñēnte wædinque,

—Wēñēñedē māmōmai cædāni atāmōniyaa. Nōwo ññōmō mā pōni cæcā amōnipa, ante pōñēninque, Wængonguī bitō ñāo ēmōmi inte waa pōni cæbi amōnipa, ante watapæ apænegadānimpa.

Debii ingante Itota angā tee empote gocampa

(Māateo 9.9-13; Odoca 5.27-32)

13 Itota wæætē adodō gāwapæ wedeca gocantapa. Ayæ nanguī ināni adoyōmō pō pō cædāni adinque tōmengā tōmēnāni inānite odōmonte apænecā ēñēnānitapa.

14 Ayæ godōmenque cægonte ayongā Adepeo wengā Debii ññōmō, Odōmāno awēñē qui bacæimpā, ante godonte æinta nāni æincōnē awēñē beyæ æncæte ante ongongā adinque Itota tōmengā ingante,

—Botō miñæ pōe.

Angā ēñēninque Debii edæ ængæ gantidinque tōmengā miñæ wædæ edæ gocantapa.

¹⁵ Ayæ ate Itotaidi Debii oncönë pö guite cængöñönäni odömāno awënë beyæ nē æwënëni tönö nē eñënëmaï cædāni tönö nangui ināni adoyömö pö guite godongāmæ cænānitapa. Edæ tæiyæñāni tömengä miñæ nē godāni inönānimpa. ¹⁶ Paditeoidi inönāni inte nē odömönāni guiquënë ponte ayönāni nē eñënëmaï ināni tönö awënë beyæ nē æwënëni tönö Itota godongāmæ cængä adinque tömēnāni tömengä miñæ nē godāni inānite änānitapa.

—Odömāno awënë beyæ nē æwënëni tönö wadāni nē eñënëmaï cædāni tönö Itota quimæ godongāmæ cæwængä.

¹⁷ Äñönāni Itota wæætē tömēnāni inānite, —Nē waa ingä guiquënë, Cæbi waa baboe, änāmaï ingampa. Nē wënë wënë ingä guiquënë dotodo ingante do, Cæbi waa baboe, ante aa pecampa. Pancadāniya, Nämä incæ nō entawēmo imopa, ante nē änāni inānite adinque botö nē dotodo bai adobai inömo inte tömēnāni inānite aa pedāmaï incæboimpa. Wadāni guiquënë, Nämä wënë wënë cæbo imopa, ante nē änāni guiquënë, Wængongui gāmænö poncædānimpa, ante botö tömēnāni inānite aa pecæ pontabopa, ante Itota apænecäimpa.

Et ate cænāmaï ingæimpa, ante nē änāni (Mäateo 9.14-17; Odoco 5.33-39)

¹⁸ Wäo miñæ nē godāni tönö Paditeoidi tönö mǎñifedē Wængongui beyæ ante ee ate cænāmaï inönānimpa. Ininque wadāni Itota weca pöningue änānitapa.

—Wäo miñæ nē godāni tönö Paditeoidi miñæ nē godāni tönö tömēnānique, Wængongui beyæ, ante ee ate cænāmaï inānipa. Bitö miñæ nē godāni guiquënë quinate Wængongui beyæ ante cædāmaï ināni inte do cænāni.

¹⁹ Äñāni eñëningue Itota wæætē, —Onguiñængä nē monguingä nāno wente ænte nē pönāni bai inönāni inte botö miñæ nē godāni inömo ædö cæte wæwente bai cænāmaï inguināni. Edæ botö tönö watapæ quëwënëni inte tömēnāni ædö cæte wæwente bai cænāmaï inguināni. ²⁰ Wæætē ayæ ate guiquënë, Monguingä, nāni nē ängongä bai inömotē wadāni ponte botö imote bæi ongöningue ö ænte gocædānimpa. Mänömaï cædāni ate botö miñæ nē godāni inömo mǎñifedē ate wæætē cænāmaï inte wæcædānimpa, ante apænedingue Itota godömenque iūmaï ante apænecäimpa.

²¹ “Waoçä dicæ müncoo æninque pedæncoga pönö tadömonguingä. Mänömaï cæcä ininque edæ müncoo incæ do bæ gäänē tamonte guipite ate godömenque wänä tente baquënë. Minitö, Awente bai cænāmaï inte waa quëwængæimpa, ante mīni änewönö guiquënë pedæncoco bai inte

ëwenguine ènepa. Codito nempo watapæ quëwængæimpa, ante botö apænedö guiquënë müncoo bai inte quëwenguine ènepa. Ininque èwenguine tönö quëwenguine ædö cæte adoyömö èñente cæquii. ²² Ayæ adobai yowepæ biñömæ mūmæ æninque waoçä ædö cæte picæ æmontaicadedē godö pe ñiñængüggä. Edæ picæ æmontaicadedē pe ñiñængä ininque yedæ ææninque ætæwo goquino anguënë. Wæætē edæ æmontai münccadedē pe ñiñænte ate yedæ ææninque tæi æbænāmaï ee ongongui apa quëwëmini,” ante Itota apænecäimpa.

Guëmanguiönæ iñonte tömëmö tä pete cænānipa

(Mäateo 12.1-8; Odoco 6.1-5)

²³ Ayæ ate guëmanguiönæ iñonte Itota tömëmoncodē tæcæguedencodē gocantapa. Goyongä tömengä miñæ nē godāni tömëmö inca tæcæ tä pe tä pe ænte idömæ godāni.

²⁴ Adinque Paditeoidi guiquënë Itota ingante äninque,

—Bitö miñæ nē godāni æbänö cædāni, ante cöwä aquënë. Inæmpa, Guëmanguiönæ iñonte mǎñinö bai cædāmaï iedāni, ante dodāni nāni wææ angainö ante eñënëmaï inte ināni eñënëmaï inte quimæ cædāni.

²⁵ Ante püñönānite Itota,

—Docä Dabii wodi tömengä nāno nē emiñænāni tönö ömæpodāni pöni inte gæwænte wædinque æbänö cægadāni, ante yewæmonte öñö incæ minitö inæmpa adāmaï inte ämīni awædö. ²⁶ Wængongui quī, ante nē godönānique cængui impa, ante wææ nāni angainö bai cædinque dodāni päö, Wængongui quī, ante ñoncæ ñoncæ cædönānimpa. Incæte Abiatade wodi nē godongä ñæñængä pöni inongä nāno godöñedē mǎñifedē Dabii wodi Wængongui oncönë go guidinque mǎñii päö do ænte cæninque tömengä miñæ nē godāni inānite godömenque godongä cænānitapa, ante yewæmonte öñö apa änewëminii.

²⁷ Ante apænedingue Itota ayæ,

—Wængongui quinate, Guëmanguiönæ, ante badongacäi, ante pönëmini. Guëmancædānimpa, ante cædinque Wængongui waoçä beyæncæ ante, Minitö guëmanguiönæ, ante badongacäimpa, ante pönëngüenëmini imīnipa. Ädānidö mǎñiönæ iñonte cædāmaï ināni, ante pönëningue Wængongui dicæ mǎñiönæ beyæncæ ante woadāni inānite badongantawogaa. Ädö cæte mǎnömāinö ante pönëwëminii.

²⁸ Ininque botö Waobo nē eñagäimo inömo Tæiyæ Awënë inömo inte edæ guëmanguiönæ Awënë inömo imopa. Ayæ, Guëmanguiönæ iñonte edæ æbänö cæquii, ante adobo nē Ämo ingäimo imopa, ante Itota apænecäimpa.

3

Ni cōmampoinḡä

(Mäateo 12.9-14; Odoca 6.6-11)

¹ İncayæ ate Itota wæætê ood-eoidi Wængongui apæneçä nāni ēñente yewæmongainta ate nāni odōmōincōnē go guicantapa. Māniñōmō onguifñængä nī cōmampote wædongä inte a on-gongantapa. ² Māniñedē Paditeoidi pancadāniya, Itota wapiticæ cæçä İninqe mōnō wæætê piinte angæimpa, ante nē ānewēnāni inte cædōnānimpa. Nōwo iñōmō tōmēnāni, Guēmanguiōnæ i incæte Itota nī cōmampoinḡä ingante, Waa bacæcāimpa, ante cæçä İninqe mōnō māo piinte angæimpa, ante babæ cæcæte ante cōwā adānitapa. ³ Ante cōwā ayōnāni nī cōmampoinḡä ingante Itota,

—Bitō ængæ gantidinque tæcæguedē pō næ gongæe.

⁴ Äninqe wæætê nē piinte ancædāni İnānite äninque,

—Guēmanguiōnæ iñonte mōnō æbānō cæquēnēmō İmōō, ante wææ angatīi. Mōnō edæ waa cæquēnēmō İmopma, ante pōnēmīnitawo. Wæætê edæ, Wēnæ wēnæ cæquēnēmō İmopma, ante pōnēmīnitawo. Quēwencædānimpa, ante mōnō waa cæquēnēmō İmopma, ante pōnēmīnitawo. Wæætê, Wæncædānimpa, ante mōnō wæñonguēnēmō İmopma, ante pōnēmīnitawo. Mānōmai ante Itota angä İninqe tōmēnāni edæ pæ wēenedānitapa.

⁵ Adinque tōmēngä ængui badinque tōmēnāni İnānite æmætæ gomō æmætæ gomō adinque edæ, Mīmō ömædēİnāni İncædō, ante wædinque nī cōmampoinḡä ingante,

—Pædæ pompobi, angä ēñēninque pædæ pompodinque nē cōmampoinḡä incæ ædæmō waa empocā bapocantapa.

⁶ Adinque edæ Paditeoidi guiquēnē wadæ tao godinque Edodeidi tōnō bee tēninque, Mōnō æbānō cæte Itota ingante wæñōmō wænguingä, ante godongāmæ pōnēninque tedegadānimpa.

Gāwapæ wedeca nangui İnāni pōnānipa

⁷ Itota iñōmō tōmēngä nānō nē ēmiñænāni tōnō wadæ tao godinque gāwapæ wedeca godāni adinque Gadideabæ quēwēnāni nangui İnāni tee empote godānitapa.

⁸ İninqe wadāni Oodeabæ, Eedotadēē, İdōmeabæ, Oododānō æmæmāa, Tido eyequei, Tidō eyequei māniñōmō quēwente tededinque, Itota mānōmai cæcampa, ante tededāni ēñente wædinque bacoo İnāni māniōmæ tōmāo quēwēnāni inte tōmēngä weca pōnānitapa. ⁹ Adinque Itota, Goto gongænāni wæcæ wæ, ante pōnēninque tōmēngä miñæ cōwē nē godāni İnānite, Wipo

ænte pōmīni ate botō wipodē wāi wocente owocæboimpa, angantapa. ¹⁰ Wēēnē iñōmō, Itota nangui İnāni İnānite gampocā waa badānipa, ante nē adīnāni inte tōmēnāni ñōwo, Mōnō gampo cæte waa bacæimpa, ante cædinque goto gongænāni wædinque mānōmaiñō ante ānongäimpa.

¹¹ Ayæ Itota ingante adinque wēnæidi nē wentamō ēwocadāni incæ tōmēngä öñōwa gāānē ædæ wææninque,

—Bitō Wængongui Wēmi İnōmi İmipa tōō, ante Yæ ānānitapa. ¹² Ēñente wædinque Itota wæætê, Botō æbodō İmoo, ante cōwē ānāmai İnguēnē quēwēmīni, angacāimpa.

Itota angä ate dote ganca İnāni nē gode ānāni badānipa

(Mäateo 10.1-4; Odoca 6.12-16)

¹³ Ayæ ānanquidi æidinque Itota, İñāni İnānite āmo poncædānimpa, ante aa pecā tōmēngä weca pōnānitapa. ¹⁴ Pōnāni ate tōmēngä dote ganca İnāni mānimpodāni İnānite, Mīnitō botō miñæ quēwēñōmīnite botō wadāni weca da godōmo gote apænemīni ēñencædānimpa, äninque, Botō beyæ nē gode āmīni incæmīnimpa, angacāimpa. ¹⁵ Ayæ pōnō apænebo ēñēninque mīnitō tæi ēmōmīni inte wēnæidi İnānite nē āmīni badinque wido cæcæmīnimpa. ¹⁶ Tōmēngä dote ganca nānō apænte ænāni iñōmō İmaï ēmōnōnānimpa. Tānocā Timōnō ēmongä incæte Itota wawo Pegodo pemongacāimpa. ¹⁷ Tebedeo wodi wēna Tantiago tōnō Wāō nāna caya nē yedæ tededa İna adinque Itota, “Detæbo nānōmoda baï İnapa,” ante, Mæmæ beyæ, ante Boānede pemongacāimpa. ¹⁸ Ayæ Äntade, Pedipe tōnō Batodōmēē, Mäateo tōnō Tōmato, Adepeo wengä Tantiago tōnō Tadeo İnānitapa. Ayæ, Mōnō ömæ ingæimpa, ante nangui cædongä inte wacā Timōnō İngantapa. ¹⁹ Ayæ Itota ingante odōmonte nē godonguingä Codaa İcadiote nāni ānongä İngacāimpa. Mānimpodāni İnānite Itota angä nē gode ānāni bagadānimpa.

Wēnæ tōnō cæçä İmaingampa, ante wapiticæ ānānipa

(Mäateo 12.22-32; Odoca 11.14-23, 12.10)

²⁰ Ayæ ate Itota oncōnē pongacāimpa. Pongä adinque bacoo İnāni wæætê pō pō goto gongænāni adinque wadāni guiquēnē, Itotaidi quōdō cænguiñāni, ante wædōñānimpa. ²¹ Ayæ, Quimæ. Ocāi edæ ömædæcāçä pōnente baï cæçāmææ, ante pōnente tededōnānimpa. Mānōmaiñō ante tededāni ēñēninque Itota guidēnāni guiquēnē tōmēngä ingante bæi ongote æncæte ante wadæ pōnānimpa.

²² Ayæ nē wææ odōmōnāni guiquēnē Ee-dotadēē quēwente pōninque, “İñæmpa wēnæ awēnē Beedeboo tōnō quēwengä inte Itota

māningā tōnō cædinque wēnwæidi inānite wido cæcā imaingampa,” ante tedewēnāni.

²³ Eñente wædinque Itota aa pecā pōnāni ate, “Tatāna mūni ānongā iñōmō nāmā incæ ædō cæte wido cæqinggā, ante eñencæminimpa, ante botō, Inguipoga æbānō cædāni, ante odōmōmo aedāni. ²⁴ Awēnē odeye nempo quēwēnāni iñōmō piñnāni badinque nāemæ wæætedō wææte cædāni iñinque awēnē odeye nānō ōmædepote wæquinque tōmēnāni nāmā ewente cædānipa. ²⁵ Ayæ adocōnē owocabo incæ adoyōmō godongāmæ quēwēnāni incæ nāemæ wæætedō wææte cædāni iñinque tōmēnāni oncō woquinque nāwæ gobainānipa. ²⁶ Ayæ Tatāna nempo quēwēnāni iñōmō edæ nāemæ piinte badinque wæætedō wææte cædinque tōmengā ingante wido cædāni iñinque Tatāna dicæ tōmēnāni awēnē imaingā,” ante Itota odōmonte apænegacāmpa.

²⁷ Ayæ, “Nē tæi piñngā ingante wīi goto wīninque waocā ædō cæte tōmengā oncōnē guite māincoo ō ænguingā. Edæ nē ēacā ingante bæi ongonte goto winte ate pō guite ō ænāni bai botō iñōmō wēnæ inte nē bæi ongonte wido cæbo impa,” angantapa.

²⁸ Ayæ, “Nāwangā apænebo eñēedāni, angantapa. Mīni waocabo wēnæ wēnæ cæmīni incæ wadāni inānite godō babæ ānewēmīni incæte edæ Wængongui wææte tōmānō ante pōnō ñimpo cæcā beyænque quēwēncæminimpa. ²⁹ Wææte Wængongui Tæiyæ Waēmō Ōnōwoca ingante waocā godō babæ ante wēnæ wēnæ apænegā iñinque tōmengā æmæwo wentamō mongængā bagaingā iñinque cōwē wantæpiyæ wentamō mongæncæcāmpa. Mānōmāi beyæ Wængongui ñōwopāmo iñonte ñimpo cædāmāi inte iñcayæ pōmāmo iñonte adobaī ñimpo cædāmāi inte cōwē pancæcāmpa,” ante Itota apænegacāmpa.

³⁰ Āninque, Mīnitō botō imote, Bitō wēnæ nē wentamō ewocacā tōnō quēwente cæbaimipa, āmīnitawoo. Iñæmpa, Wængongui Tæiyæ Waēmō Ōnōwoca tōnō quēwente cæbo apa ānewēmīni, ante Itota apænegacāmpa.

Itota badā tōnō tōmengā biwīdi
(Māateo 12.46-50; Odoca 8.19-21)

³¹ Ayæ Itota wānā tōmengā biwīdi tōnō māñi nāni ponque pō do pōninque yabæque ayæ ongōninque, Guīi āñete tæ. ³² Ānāni eñente añecæte ante ponte apænegā eñēninque wadāni Itota weca contate ongōnāni Itota ingante wææte apænedinque,

—Bitō badā bitō biwīdi tōnō bitō imite ante oncodo ponte yabæque ongōnānipa cæbii.

³³ Ante āñōnānite,

—Botō badā ædānō ināā ante āmoo, ante pōnēmīni. Ayæ botō biwīdi ædānidō ināni ante āmoo, ante pōnēmīni.

³⁴ Āninque godāmæ contate ongōnāni inānite adinque,

—Iñāni iñōmō edæ botō badāidi botō biwīdi inōnāni inānipa, ante mānōmāinō āmo abaiminipa. ³⁵ Edæ Wængongui nānō ānō bai eñente æcānō cæte quēwēna māningā botō biwi ingampa. Māningā botō biwinque ingampa. Mānīnā botō badā inampa, āmo abaiminipa, ante Itota apænegacāmpa.

4

Waocā nānō quiyadō ante odōmonte apænegacāmpa

(Māateo 13.1-9; Odoca 8.4-8)

¹ Wææte gāwapæ yæwedeca gote odōmoncæ cæyongā nangui ināni tōmāo goto ponte ongōnāni adinque Itota wipodē go guite tæ contate wāi wocænte owoyongā tōmēnāni ayæ gāwapæ yæwedecaque ōmaque ongōnānitapa. ² Āninque tōmēnāni inānite nangui pōni odōmōninque Itota, Wængongui Awēnē nempo quēwēninque æbānō cæquīi, ante eñencæminimpa, ante botō imæca quēwēnāni nāni cæinō ante odōmonte apænebo eñēedāni.

Āninque iīmāi ante odōmonte apænegā eñengadānimpā. ³ “Apænebo eñēedāni. Waocā nē quiyadongā iñōmō quiyacæ gocampa. ⁴ Gote quiyayongā pancamonga taadō iñōmō eyepote wææmompā. Taadō wæænte eyepodimō ōñōñonte ayamōidi pōninque dobæ ade cæñānipa. ⁵ Pancamonga guiquēnē dicamentaa onguipoi woyedōmō iñōmō eyepote wææmpā. Onguipoi woyedōmō ōñōmō inte pæquīnāmāi quingæ tā bocate pædinque æmonga æipa. ⁶ Āninque oguimento yæyæmē guiwadāmāi inte cōñe bawadāmāi iñonte nænque tī nāwāñō wānā cacadinque edæ guingo icate nāñe wæmpā. ⁷ Pancamonga guiquēnē ōmentacodē nānō eyepodimō iñōmō pæquīnāmāi tā bocate gā æyionte ōmentacoo pō incootonque ganta cæca ate nāñe wæmpā. Wampo incapa pæquīi. ⁸ Wæmōnguiyoga quiyadimō guiquēnē tā bocate waa pædinque tōmēmō nangui pōni godōmenque incapa. Pancawæncaæ edæ todēinta ganca, pancawæncaæ teitenta ganca, pancawæncaæ tiēē ganca māñimpomō incapa. Quiyacā nānō quiyadō ante edæ botō māninque ante apænebopa.”

⁹ Mānōmāi impa, ante iñque apænebopa. Ēamonca ongonte edæ eñēedāni, ante Itota apænegacāmpa.

Ōnōmoncaque eñente pōnēnāmāi inānipa, ante

(Māateo 13.10-17; Odoca 8.9-10)

¹⁰ Ayæ ate nangui ongöninani dæ godäni ate Itotadi adodäni que ongöñöni edæ, Dote, ante nani gocabo tönö wadäni tömengä miñæ godäni tönö tömengä weca ponte äñanita. Itota eñëmi. Bitö mäninö ante apænedinque æbänö ante odömoncæte ante apænebitawo. ¹¹ Äñönänite, “Wængongui Awënë Odeye iñömö æbänö awëmö cæcää, ante mini waocabo wëñëñedë eñëñamäi iñinö incæte ñöwo edonque pönö apænebo ate minitö adomînique né eñëmini bamînipa. Gobæ ongönäni inänite apænedinque, Inguipoga quëwëñäni nani cæi bai impa, ante botö pancaa ante odömonte apænebo eñëñanipa. ¹² Dodäni Wængongui beyæ apænedinque iimainö ante yewæmongadänimpa. Wængongui nänö né ñimpo cæquëñëñäni inämaï inäni inte tömëñäni iñömö awincaque adinque wii ædæmö adäni inte önömoncaque eñëninque ædæmö eñëñamäi inäni inte edæ ocæ emænte pönämaï incädänimpa, ante yewæmongadänimpa. Mänömaï iñque bacæimpa, ante beyæñque botö tömëñäni inänite wii edonque apænebopa,” ante Itota apænecantapa.

Quiyacä nänö cæinö ante pönente iimainö ante eñëgæimpa

(Mäateo 13.18-23; Odoca 8.11-15)

¹³ Itota ayæ tömëñäni inänite godömenque apænecantapa. “Botö mäninö ingui-poga nani cæinö ante do odömonte apænebo eñëninque minitö eñëñamäi imînitawo. Iñinque ñöwo godömenque odömonte apænebo incæte minitö ædö cæte godömenque eñënguimîni.”

¹⁴ “Iimäi impa. Né apæneçä iñömö tömëmö quiyate bai cædinque Wængongui tömengä nänö apænedö ante apænecampa. ¹⁵ Pancadäniya guiquëñë taadö eyepote wæænîmö bai inäni inte Wængongui nänö apænedö ante eñëninque mîmönö pönëñamäi iñönänite ayamö ade cængä bai Tatäna incæ ponte ö ængampa. ¹⁶ Wadäni guiquëñë dicamontaa woyedömö iñömö eyepote wæænîmö bai inäni inte tömëñäni Wængongui nänö apænedö eñëninque quingæ Ao ante watapæ todänipa.”

¹⁷ “Ayæ ate adodäni wantæ iñö quëwëñönänite wadäni Wængongui nänö apænedö beyæ piñäni wædänipa. Ayæ wadäni wënæ wënæ cæcæte ante togænte pänäni wædänipa. Iñinque ogüimento yæyæmë guiwadämaï näñe wænte bai inäni inte tömëñäni guifente wædinque emö cæte godänipa. ¹⁸ Ayæ wadäni guiquëñë ömentacodë eyepote wæænîmö bai inänäni inte Wængongui nänö apænedö eñëñönäni, ¹⁹ ingui-poga quëwente quëmë beyænque mönö wæpämö pompa. Ayæ, Mäincoo beyænque toquïmo, ante nani oda cæte

wæwëmämö pöninque wacoo wacoo nani æñinönö pöninque edæ ömentacoo ñancate cæ bai cæyonte Wængongui nänö apænedinö incæ incädämaï bai bapa. ²⁰ Ongui-poga waingui-poga quiyadimö bai inäni guiquëñë tömëñäni Wængongui apænedinö eñente Ao äñinque wede pönëñäni inte tömëwæ incate bai Wængongui beyæ nangui cædänipa. Pancadäniya todëinta ganca incate bai nangui cæyönäni, pancadäniya godömenque teitenta ganca incate bai cædänipa. Pancadäniya nangui pönî tiëë ganca incate bai cædänipa,” ante Itota apæneçä eñëñänitapa.

Gongapæncade ante odömonte apænecampa (Odoca 8.16-18)

²¹ Ayæ tömëñäni inänite Itota iimäi odömoninque apænecantapa. “Waomîni gongapæncade ti wodönodinque dicæ owætadë boo cæcamîniyaa. Dicæ möimoga æñömengadæ inö mäo concæmîniyaa. Wæætë edæ wænömëñæcapaa concæmîni ñäö bæco amînipa. ²² Quinö ante wë wodonte bai i iñömö mäninö ante iñcayæ ate tadonte edonque ate bai eñënginque ñöwo wë wodonte impa. Quinö bee ocate bai i iñömö mäninö iñcayæ ate wi æncate edonque aquinque ñöwo bee ocate impa. ²³ Êamonca ongonte eñënguëñë cæmîni,” angantapa.

²⁴ Ayæ tömëñäni inänite godömenque apænedinque Itota, “Önömonca eñëninque eñënguëñë cæmîni. Minitö mîni tee mante godoncade incæ adocadeca tee mäninque Wængongui mînitö imînite adodö pönöninque godömenque ayæ pönongä æncæmînimpa. ²⁵ Edæ né eçäcä ingante godönäni ængä bai né eñëngä ingante godö apænebo eñente entawëninque tömengä godömenque eñente bacæcäimpa. Né eädämaï ingä guiquëñë tömengä wædænque pönî nänö mäincoo iñonte mäincoo tömancoo ö æñäni wæcä bai né eñëñamäi ingä adobai tömengä wædænque pönî nänö eñente entawëñö iñonte ö ænte bai cæbo dæ ba ate wæcæcäimpa.” Mänömaï ante Itota tömengä emîñæñäni inänite odömonte apæneçä eñëñänitapa.

Guiyamö pæpa, ante odömonte apæneçä

²⁶ Ñöwo iñömö öömaque ongönäni inänite godömenque odömoninque Itota iimäi ante apænegacäimpa. “Waocä quiyacä ate awëmö pæ bai inte Wængongui Awënë Odeye pönö cæcä ate tömengä nempo né quëwëñäni awëmö yebæñinque bacoo pönî badänipa. Apænebo eñëñäni. Waocä gönea quiyate ate, ²⁷ woyowotæ mö ñöninque baänæ ñäni ömæmönongä iimö iñö iimö iñö tömëmö nänö quiyadimö incæ awëmö tä bocate pæpa. Waocä iñömö, Æbämë cæte tä bocate pæpa, ante acantawogaa. ²⁸ Edæ

onguipo beyænque tömengä nänö quiyadimö incæ tä bocate pædinque æmonga æi cænguimæ baate ate ayæ cænguï yagapa. ²⁹ Yaga adinque, Amiñate cænguï bapa, ante edæ pete ængampa,” ante odömonte Itota apænegacäimpa.

Möotatomö guidimö ante odömonte apænegacampa

(*Mäateo 13.31-32; Odoca 13.18-19*)

³⁰ Ayæ godömenque apænedinque Itota, “Wængonguï Awënë Odeye nempo æbänö quëwëñani, ante mönö quinö odömonte ate ëñenguï. Edæ, Inguipoga quinö pæte yebænte bai i adinque, Mäninani adobai yebænänipa, ante ëñengæimpa. ³¹ Iimai impa. Möotatomö mini ænte quiyamö guidimö pöni i bai wamö mini quiyamö adomonque incæ adobai guiyamö pöni i iñömö edæ dæ ampa. ³² Incæte möotatomö iñömö tä bocate pædinque möotatawæ edæ ocäñequi doyæ pæwæ bapa. Wii tömää ocäñequi mini quiyadiwæ bai edæ ocäa inämai inte möotatawæ iñömö edæ ñænæ awæ impa. Adinque tömëwæ ibæñömö ayamöidi gänë iñömö ponte ongönänipa. Möotatomö guidimö incæ mänömai pæ bai Wængonguï Awënë nempo quëwëñani iñömö wædænque ininani incæ nangui yebænguïñani inänipa,” ante Itota odömonte apænegacäimpa.

Inguipoga nani cæi bai impa, ante Itota odömongampa

(*Mäateo 13.34-35*)

³³ Ayæ Itota, Wængonguï Awënë nempo quëwëñinque æbänö cæquï, ante ëñencädänimpa, ante imæca quëwëñani nani cæinö ante godömenque nangui pöni odöminque godongämæ ongönani nani ëñenganca apænedinque idæwaa. ³⁴ Mäninonque bai odömonte apænedinque tömëñani inänite cöwë godömenque apænedämai inongäimpa. Incæte tömengä miñæ në godäni adodänique ongöñönänite Itota edonque pöni, Mänömai impa, ante tömänö ante apænegacä ëñengadänimpa.

Itota angä ëñente woboyæ æpæ næ gongæmpa

(*Mäateo 8.23-27; Odoca 8.22-25*)

³⁵ Mänionæ gäwadecæ bayonte Itota tömengä ëmiñænani inänite,

—Gäwapæ æmæmäa taocæimpa.

³⁶ Äninqe ömaa ongönäni inänite ëmö cæte taocæ cædinque tömengä nänö apænedimpodë adopodë ayæ contayongante mantädäni taocantapa. Adinque wadäni wapodë godongämæ taodänitapa. ³⁷ Tao wogaa goyönäni woboyæ iñontobæ nangui pöni pæmæñinque æpæ mængonta mængonta pöninque gao gao wipodë äñëñö, ³⁸ Itota yæmiñæmpo bee podoncate mö

ñongantapa. Ömæmoncæcäimpa, ante tao cædinque,

—Awënë, bete wæncæ cæmompä mö iñömii.

³⁹ Änani ëñëñinque ñäni ömæmonte ængæ gantidinque,

—Woboyæ, pæmæñämai imäwe. Gäwapæ incæ cædämai næ gongæmäwe.

Ante äñongä woboyæ pæmæñämai iñö gäwapæ incæ næ gongæñinque ñancæ ñancæ gongæmænimpa. ⁴⁰ Ayæ tömëñani inänite,

—Mini pönëegade, quimæ guïñëwëminii.

⁴¹ Äñongä tömëñani ancai guïñëñinque nämäneque tededinque,

—Æcämë inte angä ëñente woboyæ incæ æpæ incæ gongæmpa, ante guïñente wægadänimpa.

5

Wænæ wentamö ewocacä tönö në quëwengä
(*Mäateo 8.28-34; Odoca 8.26-39*)

¹ Äninqe Itotaidi mäni æmæmäa tao godinque Guedatabæ pö ti wæñänitapa.

² Itota mänömai pöninque gäwapæ tao ti wæængä adinque onguïñængä wænæ wentamö ewocacä tönö në quëwengä inongä inte edæ waodänido quëwente tao bee tengantapa. ³ Tömengä waodänido cöwë në quëwengä ingante ædö cæte goto winguïñanii. Daagömenca incæ tæämö impa goto winguïñanii. ⁴ Ëno pönö goto wimænte wææ ëno pönö goto wiwate bacæcäimpa, ante anca cæyönäni tömengä daagömë wangö ñæ wangö ñæ cædongäimpa. Æcäménque incæ tæi piñængä inte tömengä ingante ænguingäa. Edæ dæ äñongäimpa. ⁵ Itädë incæ woyowotæ incæ tömengä änanquidi æite wææ waodänido pö änanquidi æite wææ ocæ ëmænte pö pö cæte Yæ yæ äninque dicaca nämä incæ äwæñonga äwæñonga cæte wencata bai ëñate quëwëñongäimpa. ⁶ Äninqe Itota go dibæ pongä adinque tömengä quingæ pogodo godinque Itota weca ædæ wææñinque, ⁷ ogæ tededinque,

—Itota ëñëmi, bitö në Äibæ Quëwengä Wængonguï Wëmi inömi incæ quimæ botö weca pöwë. Edæ, Ämogate wæcæcäimpa, ante botö imote cædämai imäwe, ante nangui angantapa.

⁸ Edæ tömengä tæcæ pö bee tëñongante wænæ ingante Itota iimai ante äningä inongäimpa.

—Wentamö në wentamö ewocabi inte ämo ëñë. Bitö waocä baonga guidëmi inte ñöwo tao gobäwe, ante Itota täno angä ëñente wædingä inte wænæ ñöwo, Cædämai imäwe, angantapa.

⁹ Äninqe Itota,

—Bitö æmömido imii.

Äñongante,

—Tontadoidi tæiyæñäni adinque, Deguiönö, äñanipa. Mönitö adobai tæiyæ pöni imönipa, ante botö emöwo adobai Deguiönö emömopa.

¹⁰ Ante apænedinque ayæ, Mönitö Imönite wabæca wido cædämai incæbiimpa, ante anca angantapa. ¹¹ Mäniñömö odæ wængänäidi nangui inäni eyequei änanquidi a cængönäni adinque, ¹² wænæidi incæ Itota ingante,

—Ii odæ wængänäidi weca ämi godinque tömënäni baönë guitte quëwëmönie.

¹³ Ante tedete äñönänite Itota Ao angä eñente wædinque wænæidi wentamö ewocadäni iñömö tao gote odæ wængänäidi baönë go guidänitapa. Inique odæncato dote miido ganca inäni incæ ontacamö cægöinque tömäne to wæi gäwapæno pogodo wæi guitte becadote capo wænänitapa.

¹⁴ Becadote wænäni adinque odæ wængänäidi nē aadinäni guiquënë pogodo wodii winonte tömënäni quëwëñömö mäo bee tente apænedinque idömæ mäo gode ä gode ä cæte, Itota mänömaï cæcä wæmönipa, ante apænedäni eñëninque wadäni, Æbänö cæcäi, ante acæte ante pönänitapa. ¹⁵ Itota weca ponte ayönäni wænæidi tönö nē quëwëningä incæ ñowo önonganque bate weocoo eñacä inte tæ contate ongonngä adinque tömënäni, Mönö Deguiönö enempocä äningä ingampa, ante guifente wægadänimpa. ¹⁶ Nē adinäni guiquënë ñowo pönäni inänite apænedinque, Wænæ enempocä iningä ingante Itota æbänö cæcäi, odæ wængänäidi inänite Itota æbänö cæcäi, ante apænedäni. ¹⁷ Eñëninque tömënäni wæætë Itota ingante, Mönitö weca quëwënamäi gobäwe, äñäni.

¹⁸ Eñente wædinque wipodë go guicæ cæyongante wænæidi inte quëwëningä iñömö, Bitö miñæ mäobi goboe. ¹⁹ Äñongante Baa äninque Itota,

—Tömëmi oncönë gote, Wængongui Awënë wænæidi inänite wido cæcä önömoque baboi amünipa, ante bitö guidänäni inänite mäo apænebi eñencädänimpa. Ayæ, Botö wæwente quëwëñömote tömengä guëa wæwente bai pönente pönö cæcä waa batabopa, ante apænebi eñencädänimpa.

²⁰ Itota angä eñëninque wadæ godinque tömengä Decapodibæ mäo, Itota waa cæcä waa batabopa, ante apæneca. Eñente wædinque tömänäni, Æ æbänö cæte mänömaï waa bacäi, ante guifente wægadänimpa.

Gaido wëñængä beyæ cæcæ goyongante onquiyængä Itota weocoo gampocampa (Mäateo 9.18-26; Odoca 8.40-56)

²¹ Mänii wipodë guite tömengä imæmäa ta ti wæængä ate nangui inäni acæte ante pö goto goto godämæ gongæñänitapa. Itota ayæ gäwapæ wedeca ongonngantapa. ²² Ayæ ongöñongä wacä oodeoidi odömöincö awënë inongä inte tömengä emöwo Gaido iñömö Itota ingante adinque pöinque tömengä öñowaca gäänë ædæ wææninque, ²³ tömengä ingante,

—Botö wëñængä baquëcä iñömö edæ dobæ wæncæ cæcampa cæbii. Bitö ponte tömengä ingante gampobi waa bate quëwëncæcäimpa, ante nangui angantapa.

²⁴ Gaido mänömaï angä eñëninque Itota wæætë tömengä miñæ gocantapa. Idömæ goyongante nangui inäni bee tente goto goto pönäni. ²⁵ Inique godämæ ongönäni tönö onquiyængä adocanque wantæpiyæ dote wadepo iñonte wepæ wantæ bidämäi cöwë wææ wæwëningä inte adobai ponte tömënäni miñæ gocantapa. ²⁶ Doyedë iñömö onquiyængä waa bawëncæte ante cædinque tömengä quincö tömancöo eyepote pædæ godongä æninque dotodoidi tæiyæñäni cædäni caate wæcä incæte tömengä waa bawëñänämaï inte godömenque wænæ wænæ bate wædongäimpa.

²⁷ Mänömaï quëwente wæyongante wadäni, Itota mänömaï cæcampa, ante tededäni eñente wædinque tömengä ñowo goto pönäni tönö pöinque Itota öñöñabæca inö ponte weocooque godö gampocantapa. ²⁸ Edæ, “Tömengä weocooque gampote waa bawëñemote,” ante pönëningä inte, ²⁹ tömengä godö gampoyongä wepæ nänö gowete wæwënimæ wantæ bi ate tömengä, Wantæ biwëñemopa, ante öñowënenque pönengantapa. ³⁰ Itota iñömö, Æ, tæi piñante botö entawëñö incæ edæ wacä beyæ cæquinque do gotimpa, ante wæwëñente awædö, äninque goto gongæñäni tæcæguedë næ gongæninque dadä emænte cöwä adinque,

—Botö weocoo æcänö pönö gampodäi, angantapa.

³¹ Äñongante tömengä nänö nē emiñæñäni guiquënë,

—Eñodäni pönänipa aquimii. Æcänö gampodäi, ante ämii.

³² Wææ äñäni incæte tömengä, Æcänö botö imote wede pönëninque gampodäi, ante godömenque tömäo cöwä cöwä acantapa.

³³ Ayongante onquiyængä guiquënë, Wampo bawëñemopa, ante pönëningä inte nangui guifëninque do do wäate wædinque Itota weca ponte ædæ wææncate tömänö ante töingä apæneca eñengantapa. ³⁴ Apæneca eñëninque Itota wæætë,

—Onquiyæmi eñëmi. Bitö wede pönëñö beyæ edæ wampo bawëñemipa. Nöwo edæ

wædāmai inte waa godinque nō bawēnente quēwēe, angantapa.

³⁵ Ante tæcæ apæneyongä oodeoidi odömöincō awēnē Gaido oncōnē quēwēnāni māniñedē pōningue edæ Gaido ingante apænedānitapa.

—Bitō wengä iñōmō ñōwo æmæwo wængampa cæbii. Ñōwo Awēnē nē Odōmongä ingante quīnante godōmenque anguii.

³⁶ Ante ponte āñōnānīte Itota tōmēnāni æbānō tededāni ante ēñēnāmai inte bai cædinque oodeoidi odömöincō awēnē Gaido ingante apænedinque,

—Guiñēnāmai inte ōnonque wede pōnēe, angantapa.

³⁷ Ayæ godongāmæ ongōnāni inānīte, Ee ongōedāni, āninque Pegodo ingante, Tantiago tōnō Wāō nāna caya inate mānimpodānīque inānīte ænte gocantapa. ³⁸ Tōmēnāni tōnō godinque Itota tōmēnāni odömöincō awēnē oncōnē ponte ayongä mānincōnē waodāni nanguī cægōninque edæ Ca ca wædinque ogæ tedete Yæ yæ ānāni acantapa. ³⁹ Adinque Itota oncōnē guīdinque,

—Quīmæ ogæ tedete cægōwēmīnīi. Quīmæ Ca ca wæmīnīi. Iñæmpa iñōmō wēñængä wodi edæ wīi æmæwo wængantapa. Edæ mō ñongampa.

⁴⁰ Ante apænecä ēñēninque tōmēnāni, Angantedō amīni, ante tōmengä ingante badete todānitapa. Itota wæætē edæ, Gā goedāni, angä oncodo tao godānitapa. Iñinque wēñængä wæmpo tōnō wāānā inate Itota tōmengä miñæ nē pōñnāni tōnō mānimpodānīque inānīte ænte manguicā wēñængä wodi nānō ōfoncōnē wāānē guīdānitapa. ⁴¹ Wēñængä wodi ingante Itota pædæ wææmpo bæi ongonte tōō æmæninque,

—Tadīta cōmi, āninque mōnō tededō, “Wēñæmi onquiyæmi ængæ gantibi,” angantapa.

⁴² Angä ēñēninque wēñængä baquēcä dote wadepo ēñadingä inte dobæ ængæ gantite dao dao gocā. Adinque tōmānāni ancai guīñente wædānitapa. ⁴³ Itota wæætē, Botō æbānō cæbo, ante mīnitō māo apænedāmai iedāni. Āninque edæ wēñængä beyæ cængui angä godōna cængantapa.

6

Nāatadeta iñōmō ponte Itota apænecampa (Māateo 13.53-58; Odoca 4.16-30)

¹ Itota wadæ godinque tōmengä miñæ nē godāni tōnō tōmengä nānō pægaiñōmō pongadānimpa. ² Ayæ, Guēmanguionæ impa, āninque Itota tōmēnāni odömöincōnē go guīdinque tæcæ odōmonte apænecä ēñēninque māniñōmō ongōnāni nanguī ināni guīñente wædinque nāni caboque tededānitapa.

—Iñgä iñæmpa ædō cæte nanguī ēñente apænecä. Æbānō cæguīi, ante æcānō tōmengä ingante godō odōmongä adinque tōmengä mānōmai bamōnengæ cæcāā, ante ēñencæte ante wæmōnīpa. ³ Iñgä iñæmpa mōnō awæmpa nē tūmōwengä imaingä inte bamōnengæ mānōmai cæcampa, ante awædō. Edæ Māadiya wengä inongä inte tōmengä iñōmō ōñōnānīque mēmō ingampa. Tantiago tōnō Ootee, Codaa tōnō Timōnō tōmēnāni mēmō ināmai ingantawogaa. Tōmengä biwinqueidi incæ mōnitō tōnō wīi ongōnāni atamōō.

Ante pōnente wædinque tōmengä beyæ ante piinte badānitapa. ⁴ Iñinque piinte badāni adinque Itota wæætē angantapa.

—Iñæmpa, Wængongui beyæ nē apænecä inte tōmāmæ gote apæneyongante tōmengä ingante waa adānīpa. Wæætē tōmengä nānō pægaiñōmō ponte apæneyongante māniñōmonque wæætē wīwa adānīpa. Tōmengä nānō guīdēnāni tōnō tōmengä oncōnē owodāni tōnō mānimpodānīque tōmengä ingante wīwa adānīpa tōō.

⁵ Āninque Itota adopoque adopoque gampocā waa badānitapa. Mānōmai wædænque cædinque tōmengä, Ædō cæte gomonga cæquīmoo. ⁶ Āninque, Mīni pōnēegade. Quīnante pōnēnāmai iñini, ante wægacāimpa.

Wængongui Awēnē ingantedō ante apæneedāni, ante Itota angä godānīpa (Māateo 10.5-15; Odoca 9.1-6)

Ayæ wayōmō nāni quēwēñōmō wayōmō nāni quēwēñōmō māo odōmōninque Itota apænecä ēñengadānimpa. ⁷ Ayæ, Dote ināni, nāni āñōnāni inānīte aa pecā pōnāni ininque, Ñōwo mīnitō æmæñō mēmīnaa æmæñō mēmīnaa goyōmīnīte botō pōnō cæbo ate mīnitō awēñēdi bai badinque edæ wēñæidi wentamō ēwocadāni inānīte nē āmīni incæmīnimpa, ante da godongä godānitapa. ⁸ Ayæ, Iīmai cæedāni, angantapa. Mīnitō taadō godinque ongontoque mīni nææntoque næænte goedāni. Cængui incæ māincoo da wenguincade incæ ænāmai inte godinque tiguitamō ōnoncamoncadēdē da wēnāmai inte ōmæpōmīni goedāni. ⁹ Awæncata mīni ēwataque ēwate weocoo mīni ēñacoque ēñadinque wacoo ænāmai goedāni, angantapa. ¹⁰ Ayæ godōmenque āninque Itota,

—Godinque æcōnēnō tāno go guīmīni owodinque mīnitō wayōmō mīni go quēwenguinganca mānincōnenque go guīi go guīi cædinque quēwēedāni. ¹¹ Āyōmōmē goyōmīnīte wadāni, Pōedāni, ānāmai inte mīnitō apænedō ante wīi ēñēnāni wædinque mīnitō wæætē tōmēnāni inānīte emō cæte iīmañō ante goedāni. Mīnitō iñæmpa,

Pöedäni, änämaï ïmini adinque monitö gomöni tamēhedäni, ante odömoncæte ante munitö önöwa wadæ wadæ cæwadinque wadæ goedäni.

¹² Äninqe Itota tömengä emiñænäni inänite, Nöwo goedäni, äninque da godongä godänitapa. Godinque tömēnāni wabæca quēwēnāni inänite mǎo, Minitö wēnæ wēnæ mīni cædinö ante wæwente pönēninque ñimpo cæedäni, ante mǎo apænedäni ēñēnānitapa. ¹³ Wēnæidi nanguï inäni inänite wido cædänitapa. Ayæ waodäni nanguï inäni wēnæ wēnæ inte wædäni inönänite oginguipæ öni öni paadäni ate waa bagadänimpa.

*Wäo æpænē nē guidönongä wængampa
(Mäateo 14.1-12; Odoco 9.7-9)*

¹⁴ Itota emöwo ante apænedäni ēñēninque tömāmæ quēwēnāni do ēñēninque gode ä gode ä cæte tedehyönäni Edode pancabaa awēnē odeye incæ, Itota æbänö cæcää, ante ēñengacäimpa. Ininque tömengä inönömö,
—Æpænē nē guidönongä Wäo wodi do bæ wænte ñäni ömæmönöngä inte inngä Itota inönömö imaingampa. Mäninö beyænque tömengä tæï piñænte entawēnongä inte nē nanguï cæcä ingampa, ante pönēmopa, angantapa.

¹⁵ Ayæ wadäni,
—Ediya wodi imaingampa.
Ante tedehyönäni wadäni wæxætē,
—Wængonguï beyæ nē apænegainäni bai tömengä adocä imaingampa.

¹⁶ Ante tededäni ēñēninque Edode inönömö,
—Botö nē wangö tamencadongä Wäo wodi adocä incæ edæ ñäni ömæmönöte a ongömaingampa, ante wædongäimpa.

¹⁷ Wäo wodi inönömö iimaï wængacäimpa. Do inedē awēnē Edode nänö töninacä Pedipe ayæ mlingä inongä Pedipe manguiwēningä Ædodiya ingante Edode inönömö, Botö nänöögængä bacæcäimpa, ante ö ænte mongä. Ininque tömengä adocä Wäo wodi ingante bæi ongonte goti winte tee mönedongäimpa. ¹⁸ Edæ Wäo inönömö nänö caate wænguinque Edode ingante iimainö ante do wææ äningä inongäimpa. “Edode ēñēmi, Wængonguï nänö angainö bai ēñēnāmaï inte bitö töninacä nänöögængä ingante edæ manguiwēmipa töö.”

¹⁹ Ante wææ angä ēñēninque Ædodiya guiquenē Wäo nänö äninö beyæ cöwē piinque tömengä ingante wænoncæ cæcä incæte ædö cæte tömengä ingante wænungingä. ²⁰ Edæ, Wäo tæiyæ waemö onguinængä inte nē nö cæcä ingampa, ante do ēñēnongä inte Edode inönömö Wäo ingante edæ guinente wædongä inongäimpa. Ininque tömengä ingante edæ wææ gompodongäimpa. Ayæ Wäo apæncä ēñēninque Edode, Angä ēñente

æbänö cæquimoo, ante nanguï wæcä incæte tömengä ingante ēñēninque todongäimpa. ²¹ Inçayæ ate Edode nänö ēñagäionæ iinque bayonte Ædodiya, Æönædö wænungimoo, ante nänö äninöæ eyepæ batimpa. Edode inönömö, Mänionæ bai ēñagaboimpa, ante ææmæ cædinque wente ængä ate tömengä miñæ awēnēidi tönö tontadoidi awēnēidi tönö Gadideabæ quēwēnāni awēnēidi tönö tömānāni bæcæ pönänitapa. ²² Ponte bete cængöñönäni Ædodiya wengä baquēcä incæ tæcæguedē pö gongænte tode pete äwacä adinque awēnē odeye Edode tönö godongämæ ongönäni nanguï todönänimpa. Ininque baquēcä ingante Edode änongäimpa,

—Waa pöni bitö tode pete äwadi beyænque bitö quiemē ante æinente ämi ate botö ēñente da pönömo æe.

²³ Äninqe ayæ godömenque äninque, Wængonguï ēñēnongä nöngä ämopa, änongäimpa. Quiemē impa bitö æinēmi botö tömää edæ do godömo æncæbiimpa. Edæ bitö æinente ämi ininque botö awēnē odeyebo inömo inte botö enempodö incæ edæ tæcæ pä cæte pönömo æmāimipa. ²⁴ Angä ēñēninque taodinque,

—Badä ēñēmi, quinö anguimoo.

Äñongante wäänä edæ do,

—Botö iimaï ämopa, änantapa. Wäo æpænē nē guidongä ocabo wangö tomençate pædæ pönömi æmoe, ancæbiimpa, ämopa.

²⁵ Änä ēñēninque awēnē weca do ponte guidinque baquēcä wæxætē,

—Wäo æpænē nē guidongä ingante wangö tomençate tömengä ocabo inï coyomēnætaca cö cæte do pönömi æmoe.

²⁶ Angä ēñente wædinque awēnē odeye inönömö, Æ ēñente awædö. Quinö ñöwo cæquimoo, ante nanguï wædongäimpa. Incæte tömengä, Botö inæmpa godongämæ becönäni ēñēñönänite, Wængonguï ayongä cöwē godoncæboimpa, ante nē änimö inte edæ ædö cæte ñöwo Baa anguimoo. ²⁷ Ante pönente wædinque tömengä nänö äninö, Cöwē godonguï impa, ante pönēninque Edode wæxætē nē wænungä ingante, Bitö godinque wangö tomençate ænte mämömi ængæ. ²⁸ Angä ēñēninque nē wænungä wæxætē tee mönincönē gote guidinque Wäo ingante wangö tomençacä wængantapa. Ayæ Wäo ocamö inï coyomēnætaca cö cædinque baquēcä weca ænte mämö pædæ pönongä æninque baquēcä wæxætē wäänä inante godongä ænönäimpa.

²⁹ Mänömaï wængäimpa, ante gode änäni ēñente wædinque Wäo wodi tömengä miñæ nē godinäni incæ pöninque tömengä baö inï ænte mǎo daga wengadänimpa.

5.000 ganca inäni inänite Itota godongä cænänipa

(Mäateo 14.13-21; Odoca 9.10-17; Wäo 6.1-14)

³⁰ Mänü Itota në nänö da godöninäni inömo ocæ emænte ponte godämæ gongænte, Mänömai cætamonipa. Mänömai odömonte apænemöni ëñenänitapa. ³¹ Ante apænedänitapa. Ayæ, wadäni nangui owentæde pænta owentæde pænta wææ cægönäni adinque tömënäni ædö cæte cæguinänii. Cængui incæ ædö cæte cæguinänii. Adinque Itota,

—Minitö adomînique botö miñæ önömæca gote wædænque guëmædäni, angantapa. ³² Angä Ao ante tömënäni adodänique Itota miñæ wadæ godinque önömæca owentæde ante wipodê wææ contate wogaa godänitapa. ³³ Goyönänite wadäni guiquënë, Itotaidi incæ godänipa, ante adinque wacönê ta wacönê ta godinque tæiyænäni tee ta tee ta go ömaaque oo pænta pogodo gote do edæ pönnique a ongönänitapa. ³⁴ Ayæ wipodê wogaa mämö tæcæ æænoncadoyönäni Itota inömo ti wæænte ayongä nangui inäni do ponte a ongönäni acantapa. Tömënäni në aacä dæ äñongä obegaidi quëwenguinämai inäni inte adodänique ongönäni bai inäni inte wæwënänipa, ante pönente tömengä tömënäni tönö godongämæ wæwente bai pönengantapa. Inique nangui odömonte apænecä ëñenänitapa. ³⁵ Ayæ gawadecæ bayö Itota miñæ në godäni tömengä weca ponte ännique,

—Nöwo wëmö bacæ cæpa cæbii, änanitapa. Ayæ, Önömæca incæ cængui dæ ampa. ³⁶ Inäni inänite ämi idömæ owodäni weca godinque ayæ nangui inäni nani quëwëñömö godinque cængui godonte cæguinänie.

³⁷ Äñönänite Itota wæætê,

Minitö wæætê godömîni cæncædänimpa, ämopa.

Äñongante,

—E, ënodäni inäniiya. Inæmpa ocho apäicä cæte beyæ paga æinta æninque mänimpota päo ante godonte æninque edæ wii eyepæ imaimpa. Mönitö wadæ gote mänimpota beyæ päo godonte æninque inömo godongämæ ongönäni inänite godömöni cæguinänii, ämitawoo.

³⁸ Ante wæyönänite Itota,

—Päo æpodö nææminii. Acæ goedäni.

Angä ate pönnique,

—Päo önompö æmæmpoque gæyæ mëa pöni mæ ongompa.

³⁹ Ante apænedäni ëñeninique Itota godongämæ mæ ongönäni inänite, Nöwo mîni cabo mîni cabo gaguimäa tæ contaedäni. ⁴⁰ Angä ëñeninique pancadäniya tiëe ganca nani cabo nänënë pancadäniya

tincoenta ganca nani cabo nänënë tömänäni nani cabo nani cabo tæ contadänitapa. ⁴¹ Tæ contadäni ate päo önompö æmæmpoque gæyæ mëa æninque öönædê inö æmö adinque, Wængongui, bitö waa pönömi æente cæmönipa, ante apænedinque päo pä æ cædinque tömengä, Nangui inäni cængui ante æente mäo cö cæedäni, ante tömengä miñæ në godäni inänite pædæ pönongä æninque mäo cö cædänitapa. Ayæ gæyæ mëa inönte adobai æninque tömengä tömänäni inänite di mæñæ di mæñæ cæcä æninque cænänitapa. ⁴² Äninque tömänäni tömo pöni cænäni, ⁴³ ate edæ tömengä ëmiñænäni päo tönö gæyæ nani ao mænte inönöni ee öñoncoo pædæ wææmpo ö æ da da wente æninque otodê önompö tipæmpoga go mentodëa cængui eyede da wënäni contagatimpa. ⁴⁴ Në cænäni inömo ongüñænäni edæ tinco mîdo ganca mänimpodäni nangui inäni nani wencabo cængadänimpa.

Itota yædopæ dao dao gocampa

(Mäateo 14.22; Wäo 6.16-21)

⁴⁵ Itota ayæ do tömengä nänö në ëmiñænäni inänite, Ägodödäni. Minitö täno wipodê guite æmæ wedeca Betaida tao goyömîni botö wæætê wadäni në cænänäni inänite ämo godäni ate pömoedäni. ⁴⁶ Angä Ao ante tao goyönäni tömengä wadäni inänite wæætê angä godäni ate adocanque ongonte Wængongui ingante apænecæte ante änanquidi æcantapa. ⁴⁷ Ayæ wëmö bayö tömënäni tæcætibæ wogaa goyönäni tömengä adocanque ömaa ongonte ayongä, ⁴⁸ tömengä nänö ëmiñænäni wiyate taocæ cæyönäni edæ woboyæ nangui pæmænte pönömenque æente pö ædö cæte goquinänii. Adinque tawadiya nänö peyedê edæ tæcæpæ pöni i gawapæ wænömænæcapæ inö edæ Itota inömo æpæno yædopæ dao dao obo ponte wodo pænta gocæ cæcantapa. ⁴⁹ Yædopæ edæ gocä gomö adinque tömënäni Yæ äninque, Waocä wænte babæningä wabänö cægongä, ante wædänitapa. ⁵⁰ Edæ tömengä ingante adinque tömänäni ancai guifiente wædänitapa. Tömengä inömo tömënäni inänite do apænedinque,

—Ee piyænê cæte guifënëmaï ledäni. Botö imo apa guifëwëminii.

⁵¹ Äninque wipodê pö guicä ate woboyæ incæ næ gongæ pæmænämai batapa. Ba adinque tömënäni godömenque guifëninque, Quinante mänömai cæ, ante wædänitapa. ⁵² Edæ, Itota æbänö inöntobæ päo nangui pöni pönö badongä, ante në adinäni incæte tömënäni mîmö ömædê inäni inte bai wii pönente wægadänimpa.

Caate wædäni inänite Itota cæcä waa badänipa

(Mäateo 14.34-36)

⁵³ Ayæ æmæmäa taodinqwe tömënäni Guënetadete bæ ti wææninqwe wipo ñä cæmencadänitapa. ⁵⁴ Mänömaï ti wæænte ñä cæmencayönäni mänññömö quëwënäni guiquënë, Tömengä Itota ingampa, ante do adänitapa. ⁵⁵ Ante adinqwe mänññömö tömäo pogodo godinqwe wënæ wënæ wæwënäni inänite ñönæmpado ñö cædinque, Itota æyömönö ongongää, ante ëñëninque tömëññömö tömengä nänö ongöññömö do ænte pönänitapa. ⁵⁶ Ayæ wadäni nani nanguï pöni quëwëññömö incæ wædænque nani quëwëññömö incæ idömæ incæ, Itota ædöme gocää, ante adinqwe wadäni wæncæ cædäni inänite mänññömö ænte mämö taadö wedeca ñö cædäni öñönänitapa. Inäni wæætë tömengä ingante, Bitö weocoo yæwedecooque ämi gampote waa hamönie. Ante wæyönänite, Ao angä ëñente nê gampo gampo cædänique tömänäni waa inäni bagadänimpa.

7

Mimöno tao godi beyænque waocä wentamö ewocacampa
(Mäteo 15.1-20)

¹ Ayæ Paditeoidi tönö nê wææ odömönäni tönö pancadäniya Eedotadëë quëwente mänññedë Itota weca ponte godongämæ gongænte ayönäni, ² Itota miñæ nê godäni pancadäniya mempodämaï inte wentamö empote cænäni adänitapa. ³ Edæ dodäni, Önompo ædæmö mempoänäni que cæncædänimpa, ante nani wææ angainö ante Ao äninque, Bapogabo cæte wæcæ wæ, ante Paditeoidi tönö oodeoidi tömänäni ancaa mempote æte cænönäni inänipa. ⁴ Ayæ, Ædæmö ädänique cængüñäni inänipa, ante pönëninque oodeoidi nani godonte æññömö gote pöninque ædæmö äte ate cænänipa. Ayæ dodäni godömenque nanguï nani wææ angainö ante pönente Ao ante cædinque tömënäni owæta cængæ tiguicade awæmpa tömancoo ancaa mënongate quëwënänipa. ⁵ Ininque dodäni nani wææ angainö ante Ao ante tömänö ante ëñente cæte quëwënäni inte Paditeoidi tönö nê wææ odömönäni ñöwo iññömö Itota ingante edæ pünthe äninque, —Bitö miñæ nê godäni iññömö quinante dodäni nani angainö ante ëñëñämaï inte wentamö nampote cængü cænänii.

⁶ Ante pünäni wædinque Itota wæætë,

—Minitö guiquënë waa cæmini inte bai nê änewëmini iññöminthe mini cædo ante Wængongü iimaï apænecampa, ante Itaiya wodi nöngä ante yewæmongacäimpa. “Inäni iññömö botö imote öñoneque waa apænete bai tededäni incæte, tömënäni mimöno æmæ pönente edæ gobæ ongonte bai inäni awædö.

⁷ Ayæ botö imote waa ate bai ædæ wæænte tededinqwe, Wængongümi imidö angüënë, ante apænädäni incæte tömënäni botö imote öñonquedö ante cædänipa.

Waodänique nani wææ äñönö ante odömonte apænädänipa töö.”

Ante Wængongü piingampa, ante yewæmongacäimpa. ⁸ Edæ Wængongü, iimaï cædäni, ante nänö wææ angainö ante Baa änimini inte munitö waodänique nani änewëno ante Ao ante cæminipa töö, angantapa.

⁹ Ante apænëdinque Itota godömenque,

—Minitö dodäni nani angainonque ante ëñente cæcæte ante cædinque Wængongü nänö wææ angainö ante wido cædinque dicæ waa cæminiyaa. ¹⁰ Möite wodi, “Bitö Wæmpo ingante bitö badä inante waadedinqwe waa cæe,” angacäimpa. Ayæ, “Waocä wæmpocä ingante wäänä inante pünthe wënæ wënæ angä ininque munitö tömengä ingante wænññömini wæncæcäimpa,” ante wææ ante yewæmongacäimpa.

¹¹ Incæte munitö iimaïno ante wææ cæminipa. Waocä wæmpocä ingante waa cæquënegä iñongante wäänä inante adobai waa cæquënegä iñongante munitö wæætë wææ äninque, Bitö wæmpocä ingante wäänä inante apænëdinque iimaï ante apænecæbiimpa, änewëminipa. Bitö, “Mæmpo, bitö quï, ante, Badä, minö quï, ante do botö pönongüënëñö incæ ñöwo wæætë Wængongü ingante do edæ godonte impa,” ante, Codobänö nani äñö impa, ante apænecæbiimpa. ¹² Äninque munitö Wæmpo beyæ wäänä beyæ nê cæquënegä ingante wææ ämini beyæ tömengä wiï cæcampa. ¹³ Mänömaï cædinque munitö dodäni nani angainö mini Ao ante æñinonque ante ëñëninque Wængongü nänö angainö ante edæ, Öñoneque impa, ante bai cæminipa töö. Ayæ adobai wapiticæ äninque munitö wadö wadö cædinque wënæ wënæ cæminipa töö, ante Itota apænecacäimpa.

¹⁴ Ayæ nanguï inäni inänite Itota aa pecä pönönänite apænecantapa.

—Minitö tömänini iminthe apænëbo ëñëninque ocaidë pönente ædæmö ëñëädäni. ¹⁵ Quincoomë yabæque ongoncoo incæ waocä öñönë guidi beyænque tömengä mimö dicæ wentamö entawengüingää. Wæætë mimönë wiwa pönëninque nänö tao godincoo beyænque mimö wentamö mongængampa, ante apænëbo ëñëädäni.

¹⁶ Eamonca ongonte ëñëädäni.

¹⁷ Ante apænëdinque Itota nanguï ongönäni inänite ëmö cæte oncönë gote wäänë guicä ate tömengä nänö nê ëmiñænäni guiquënë, Mänömaïno ante odömonte apænëdinque bitö æbänö

ante odömoncæte ante apænebitapa, ante eñencæte ante wæmönipa. ¹⁸ Ante wæyönänite Itota,

—Minitö incæ ocai ömæcadäni bai inöminii inte eñenämäi iminitawo. Cænguü incæ waocä mimönë guüpa wentamö ewocaquingäa. ¹⁹ Edæ wii mimönë guüpa. Wæætë cæncadë guüte goiwaa ogä mente wido cæquinque i apa änewëminii.

Mänömainö äninque Itota, Tömää cænguü waemö impa, angacäimpa. ²⁰ Äninque godömenque,

—Mimönë wiwa pönëninque nänö tao godincoo beyænque waocä wentamö ewocacampa. ²¹ Edæ mimönë nänö entawente taodinö beyænque waocä önöwëninque wënæ wënæ ante pönengampa. Mimönë towëinente nänö pönëno beyænque waocä godö towente quëwengampa. Mimönö æinente wædinque wacä qui awëmö ængampa. Mimönë nänö piinte pönëno beyænque godö wænnongampa. Nänöogængä inämäi iñongante waocä mimönë towëinente nänö pönëno beyænque godö mongampa. ²² Mimönë nanguü æinente wædinque mäincooque ante pönëwengampa. Mimönë nänö taodi beyæ wacä ingante piinte cæcampa. Mimönë pönëwëninque, Wacä edæ oda cæcädänimpa, ante babæ cæcampa. Wiwa nänö pönëwëno beyænque quingämë bai cæte quëwengampa. Mimönë nänö piinte adö beyæ waocä, Wacä bai ñænæmo pöni bacæboimpa, ante cæcampa, ayæ wacä ingante godö wënæ wënæ ante babæ angampa. Mimönë nämä ante waa ate nänö pönëno beyænque, Tömëmoque waemö imopa, ante nämä waa acampa. Mimö ömædengä inte eñenämäi cæte önonque quëwengampa. ²³ Mänü wiwa cæpämö tömämämö mimönë nänö pönëno beyænque waocä wentamö ewocacampa, ante Itota apænegacäimpa.

Onquiyæ oodeo inämäi inte Itota ingante pönente angä

(Mäateo 15.21-28)

²⁴ Mänüñömö quëwente godinque Itota Tido eyequei gogacäimpa. Ayæ, Awëmö guüte owoyömo wadäni adämäi incädänimpa, ante pönëninque oncönë pö wäänë guüte ongongä incæte ædö cæte wii aquinänii.

²⁵ Edæ, Itota owocampa, ante do tededäni eñëninque wacä wäänä, Botö wengä onquiyængä iñömö wënæ në wentamö ewocacä ingante ënemocampa, ante wædinque Itota weca ponte ædæ wæente apænecantapa. ²⁶ Itota eñëmi. Wënæ botö wengä tönö në quëwengä ingante wido cæquümi, angantapa. Mänü onquiyængä Tidöpënitabæ në eñagängä inte guüdiego tededö në tedecä

inongä. ²⁷ Adinque Itota, Wii oodea onquiyængä inongampa, ante wædinque angantapa.

—Wënäni cænguü inguënë waocä dicæ quintamöidi cænguü ante wææntodonguingäa. Bitö edæ wabi iñömite botö bitö beyæ ædö cæte cæquümo.

²⁸ Äñongante,

—Awënë iñæmpa wëñænäni cænguü cæninque eyepodäni wæænte ænömengadæmpa inö önöñö quintamöidi ade cæmpa.

²⁹ Ante apæneyongä Itota,

—Bitö nö apænedimi inte waa gocæbiimpa. Wënæ bitö wëñængä nänö wædö incæ dobæ edæ emö cæte wadæ gotimpa.

³⁰ Angä eñëninque oncönë go guüte ayongä tömëngä wëñængä önonganque bate möimoga ongongä agacäimpa.

Babetamoncacä ingante Itota waa cæcampa

³¹ Mänü Tido gote quëwëninque Itota wadæ godinque Tidö wodo pænta gocanque go Gadideapæ wedeca poncæ cædinque Decapodibæ yaatænque pongantapa. ³² Gadideapæ wedeca pongä adinque wacä önömonca babetamoncacä inte önöne wapiticæ tedecä ingante Itota weca ænte pöninque, Gampo cæbi waa babaingampa.

³³ Äñönäni Itota babetamoncacä ingante nänëne ænte godinque önömonca pædæ guipomoncacantapa. Ayæ nämä önonpo towæ tänompodinque wapiticæ tedecä ingante godö gampo cæguënewacantapa.

³⁴ Ayæ öönädë inö æmö adinque öö guëmante äninque babetamoncacä ingante, “Epata,” äninque mönö tededö, “Önömonca wi æmoncabæwe,” angantapa.

³⁵ Äñongä edæ önömonca tee mömoncate bai inü wi ænete bai badinque önonguënëwa ñimæncæguënëwa gote bai cæguënëwadinque töö tedecantapa. ³⁶ Itota, Botö cæbo në adimüni inte gode änämäi iedäni, äninque ancaa angä incæte në adinäni iñömö godömenque nanguü gode ä gode ä cæte tededäni ³⁷ Eñente wædinque tömänäni nanguü guüñëninque, “Edæ önömonca babetamonca ininäni inänite Itota cæcä ate önömonca eñënäni badänipa. Önöne babetade ininäni inänite cæcä ate önöne tededäni badäni atamönipa. Tömää edæ waa cæcä ingampa,” ante nanguü tedete wægadänimpa.

8

4.000 ganca inäni inänite Itota godongä cænänipa

(Mäateo 15.32-39)

¹ Mänüñedë wadäni tæiyæ pöni inäni ponte eñëñönäni tömënäni cænguü dæ ä adinque

Itota tömengä miñæ nè godäni inänite aa pecä pönäni ate,

² —Iñäni botö weca ongönäni iñömö meönaa go adoönæque iñonte botö weca ongöñönäni tömënäni cænguï òmæpodäni badäni ate wædinque botö tömënäni tönö godongämæ wæte bai nangui pönëmo ïmpa. ³ Cænämaï inte gue ænente wæyönänite botö, Oncönë goedäni, ämo gote bai tömënäni edæ idömæ godinque tepæ gæwæñinque edæ nangæ badinque bocæ bocæ cæte wæcædonänimpa. Edæ pancadäniya gobæ quëwente pönäni abopa.

⁴ Ante apænecä ëñente wædinque tömengä miñæ nè godäni wæætë,

—Iñæmpa önömæca incæ päö ïmpa æninque godömöni cænguïnäni.

⁵ Ante wæyönänite Itota,

—Päö æpodö nææmïni. Äñongante,

—Önompö æmæmpoque go mëa më on-gompa.

⁶ Ante apæneyönäni Itota godongämæ nanguï ongönäni inänite angä onguipoiya tæ contadänitapa. Ayæ päö önompö æmæmpoque go mëa näni nææñincoo pædæ godönäni æninque tömengä Wængonguï ingante, Bitö waa pönömi cæncæmönimpa, ante apænedinque pä æninque tömengä miñæ nè godäni inänite, Pædæ godö pædæ godö cæmïni cæncædänimpa, ante godongä æninque wadäni inänite godäni ænte cænänitapa. ⁷ Ayæ gæyæ mëa pönï nææñänitapa. Mänü näni nææñi æninque Wængonguï ingante apænedinque adobai angä pædæ godö pædæ godö cædäni. ⁸ Æninque tömo pönï cænänitapa. Ayæ idæwaa cænäni ate tömënäni pä ænte näni cænte ñönöni ee öñoncoo wente æninque Itota miñæ nè godäni otodë pönö da wënänitapa. Æninque önompö æmæmpoque go mentodëa cænguï eyedæ contagatimpa. ⁹ Nè cænäni iñömö onguïñænänique ante tee mampote coatodo müido ganca bai inäni inte ongönönänimpa. Ænque cænäni ate Itota angä wadæ godänitapa. ¹⁰ Godäni ate Itotaidi do wïpodë guïi contate cæwodinque imæmäa pöninque Dadämänotabæ pongadänimpa.

Mä cæte odömömi amönie, ante Paditeoidi änäni

(Mäateo 16.1-4; Odoca 12.54-56)

¹¹ Itota pongä adinque Paditeoidi ponte bee tæninque tömengä ingante, Æbänö cæbii, æbänö ämiï, ante ancaa änänitapa. Ayæ, Mönö ämö ëñente tömengä oda cæbaingampa, ante cædinque Itota ingante apænedinque, Bitö, Pönencædänimpa, ante öönædë mä cæi bai cæbi amönie. ¹² Änäni ëñëninque Itota, Ancaa änäni awædö, ante wæwente badinque öö öö ante guëmangantapa.

—Iñæmpa ñöwomïni, Mä cæte odömömi adinque pönëmaïmönipa, ante ancaa ämïni awædö. Näwangä ämo ëñëedäni. Ñöwomïni imïnite mä cæte odömönämaï ingæïmpa.

¹³ Ante äninque tömënäni inänite ëmö cæte godinque wïpodë guïite æmæmäa taocæ cæte cæwodinque wadæ gocantapa.

Wapiticæ apænedäni ëñëninque gomö aedäni, angampa

(Mäateo 16.5-12)

¹⁴ Mänü æmæmäa näni tao gocæ cæyedë tömengä miñæ nè godäni guiquënë päö wü pönente ænämaï inte godäni Æninque päö adoque pönï näni wëenëñedë ñönöninque wïpodë öñompa. ¹⁵ Itota iñömö mänü päö tömënäni näni ænämaï inö ante wü tededinque wadö ante pönente apænecantapa.

—Päö yedæ æmpoquï, ante Paditeoidi tönö Edode näni da wente cæi ate gomö aedäni.

¹⁶ Angä ëñente wædinque tömengä nänö nè ëmiñænäni wæætë näni caboque tededinque, Päö ænte pönämaï imöimpa, ante Itota wabänö mänömaï beyæ ämaingampa.

¹⁷ Ante nämäneque tededäni wædinque Itota wæætë tömënäni inänite,

—Päö ænämaï inte mïni pöninö ante quimæ tedewëmïni. Botö päö ante dicæ wæbogaa. Nanguï cæbo adimïni inte mïnitö ayæ ëñënämaï imïnitawo. Edæ mïmö ömædëmïni inte tedewëmïnipa, ante awædö. ¹⁸ Edæ awincaque adinque ayæ adämaï imïnitawoo. Önömoncaque ëñëninque ëñënämaï imïnitawoo. Edæ botö æbänö cætabopa, ante adimïni inte edæ wü pönëmïnitawo. ¹⁹ Päö önompö æmæmpoque botö pä ænte godönï incæ tinco müido ganca inäni näni cænte ñönöni ee öñöñonte æpotodëno cænguï wente æmïni.

Äñongante,

—Önompö tipæmpoga go mentodëa.

²⁰ Ayæ önompö æmæmpoque go mëa guiquënë coatodo müido ganca inäni näni cænte ñönöni ee öñoncoo æpotodëno cænguï wente æmïni.

Äñongante,

—Önompö æmæmpoque go mentodëa.

²¹ Apænedäni ëñëninque tömengä edæ,

—Iñæmpa Tadoteoidi tönö Paditeoidi wapiticæ ante näni odömönte apænedö ante botö, Gomö aedäni, ante wææ ämpa, ante mïnitö ayæ ëñënämaï imïnitawoo, angacäimpa.

Betaida iñömö babetamongä ingante gampomongampa

²² Mäninö godinque Betaida iñömö pönäni adinque wadäni babetamongä ingante Itota weca ænte pöninque, Gampomonguïmi.

²³ Änäni ëñëninque Itota babetamongä önompö bæi ongonte töö æmænte tömënäni quëwëñömö tao yabæque ænte mäocä

gocantapa. Ayæ godô towæ tânômonte gampo cæmôningue, Pancaa tæcæ abi edæ, angantapa. ²⁴ Åñongä edæ tæcæ iñæ æmante,

—Awæ cægonte bai waodäni incæ cægönäni abopa. ²⁵ Itota wæætê godô gampo cæmongä ate habetamongä iningä incæ ñowo cöwä adinque edæ waa bamôningue tömão edonque põni acantapa. ²⁶ Ìninque tömengä ingante Itota,

—Ìñömö nãni quëwëñömö yaatænque wadæ godinque tömëmi oncönê goe, angä gogacäimpa.

Bitô Codito inömi ïmipa, ante Pegodo angampa

(Máateo 16.13-20; Odoca 9.18-21)

²⁷ Itota iñömö tömengä miñæ nê godäni tönö wadæ godinque Tetadea Pidipobæ wædænque Ìnãni nãni quëwëñömö wædænque Ìnãni nãni quëwëñömö go go cædänitapa. Idömæ godinque tömengä nãnô nê ëmiñænãni Ìnãnite Itota angantapa.

—Wadäni botô ìmotedö ante tededinque, Æbodö ìmoo, ante apænedäni ëñëminii.

²⁸ Åñongante,

—Bitô ìmitedö ante apænedinque pancadäniya, Æpænê nê guidongaingä Wäo wodi incæ Itota adocä ìmaingampa, ante tededänipa. Wadäni guiquënê, Ediya wodi incæ Itota inongä ìmaingampa, ante apænedänipa. Wadäni guiquënê, Wængongui beyæ nê apænegainãni bai Itota iñömö adocä ìmaingampa, ante bitô ìmitedö ante tededänipa, äñanitapa.

²⁹ Ante tömengä miñæ nê godäni apænedäni ëñëninque Itota,

—Ayæ minitö guiquënê, Æbodö ìmoo, ante äminii.

Åñongante Pegodo iñömö,

—Bitô mönô Codito inömi ïmipa.

³⁰ Angä ëñëninque, Botô ìmotedö ante, Codito inongä ingampa, ante gode äñamai edæ pæ wëneedäni, ämopa, ante Itota wææ angacäimpa.

Itota, Ìmai cædäni wæncæboimpa, ante apænegampa

(Máateo 16.21-28; Odoca 9.22-27)

³¹ Ayæ mänñfedê Itota tömengä miñæ nê godäni Ìnãnite ìmai ante mä odömote apænegacäimpa. Botô Waobo ëñagaïmo inte nangui caate wæquënêmo ìmopa. Edæ nê aadäni nãni Picæncabo tönö, Wængongui qui, ante nê godönãni ñænænãni tönö nê odömönãni tönö mänñnãni iñömö botô imote Baa äñäni wæquënêmo ìmopa. Ayæ botô imote godömenque wænönãni wæncæboimpa. Incæte botô do wænönãni wænñimo inte edæ meönaa go adoönæque iñonte ñãni ömæmoncæboimpa. ³² Mänömaï ante Itota edonque apænegacantapa. Apænegä

ëñëñönãni Pegodo guiquënê Itota ingante nãñenê mäocä godinque, Quimæ wæncæ änewëê, wææ ante tæcæ piincæ cæyongante, ³³ Itota edæ tömengä miñæ nê godäni gämænö dadi ëmænte adinque Pegodo ingante näëmæ piinque angantapa.

—Bitô Tatänabi bai inömi inte edæ botô weca ongönamaï wadæ gobæwe. Wïi Wængongui nãnô äñönö ante põñemi inte bitô waodäniquê nãni põñewënonque ante põñëninque mänömaïnô ante tedebi awædö, angantapa.

³⁴ Ayæ tömengä ëmiñænãni tönö nangui ongönãni Ìnãnite aa pecä põñäni ate Itota tömänãni Ìnãnite apænedinque,

—Æcänö botô miñæ põinena Ìna tömengä nãmä beyænque ante põñëñamaï inte botô miñæ tee empote poncæcäimpa. Nãmä nãnô wænguiwæ ænte mongænte ponte bai cædinque tömengä, Botô wænguiimo incæ caate wæbo incæ Itota ingante cöwê tee empote gocæboimpa, äninque poncæcäimpa. ³⁵ Edæ æcänö, Nãmä wææ gompodinque quëwencæboimpa, ante cædinque botô miñæ põñamaï ingä guiquënê tömengä iñömö edæ quëwënãmaï incæcäimpa. Wæætê edæ, Wænönãni wæmo incæte botô Itota miñæ tee empote godinque tömengä waa põni nãnô cægäinö ante apænegacæboimpa, ante æcänö cæda guiquënê tömengä edæ ayæ quëwencæcäimpa. ³⁶ Edæ waocä inguipoga ongoncoo tömancoo ö æncæte ante cædinque nãmä öñowoca incæ pædæ godongä wê womonte ba ìninque edæ tömengä nãnô ömæwocate wæquinque mäincooque æmaingampa. ³⁷ Ìñæmpa eyepæ godongampa diyæ öñowoca wæætê æmaingä. ³⁸ Nöwodäni Wængongui ingante pãmænte godinque nê ëñëñamaï cædäni weca quëwëninque minitö iñömö botô Waobo nê ëñagaïmo beyæ ante guingo imonte wæminitawo. Botô apænedö beyæ ante guingo imonte wæminitawo. Ìñæmpa botô Mæmpo ñäö guinæ gongæñonte anquedoidi tæiyæ waëmö ëmönãni tönö dibæ põninque botô wæætê botô beyæ ante nê guingo imonte wædingä beyæ ante näëmæ guingo imonte wæcæboimpa.

9

¹ Mänömaïnô äninque Itota godömenque,

—Botô weca ongömiñi pancaminiya iñömö ìmai ba acëminimpa, ante näwangä ämopa. Minitö ayæ wænãmaï müimini quëwëñömiñi botô Wængongui Awënê Odeye inömo inte tæi piñëninque Tæiyæ Awënê babo acëminimpa, ante Itota apænegacäimpa.

Itota wæmö põni ñäö bai ëmongä bacä adänipa

(Máateo 17.1-13; Odoca 9.28-36)

² Mānīnō ante apæneceā ate Itota iñōmō ōnompō æmæmpoqe go adoōnæque iñque go ate Pegodo ingante Tantiago tōnō Wāō inate mānimpodānique inānite ānanquidi māicā adodānique æibæ æite ongongadānimpa. Æite ongōñōnāni edæ Itota awinca tōmēnāni ayōnāni edæ wīī cōwē nānō ēmōnō bai waēmō pōni ñāō bai edæ ēmongā bamongā adānitapa. ³ Tōmengā weocoo ñāō pōni nāāmēnta weocoo ēñacā adinque tōmēnāni, Ædō cæte iincoo bai nāāmēnta pōni yamonte cæquināni, ante edæ wædānitapa. ⁴ Ayæ ayōnāni edæ doyedē pōni nē æigaina iñōmō Mōitee wodi tōnō Ediya wodi incæ Itota tōnō edæ godongāmæ pō gongæninque tedeģona adānitapa. ⁵ Adinque Pegodo guiquēnē Itota ingante,

—Awēnē nē Odōmōmi ēñēmi. Iñōmō mōnō waa pōni ongonte awædō. Bitō āmi iñique mōnitō oncontaicoo mentaiya go adotaique mænōninque bitō oncontai ante adotaique Mōitee oncontai ante adotaique Ediya oncontai ante adotaique mænōmāimōnīpa, angantapa.

⁶ Edæ Wāō tōnō Tantiago tōnō godongāmæ guīñente wædinque Pegodo, Æbānō ante tedequimoo, ante ēñēnāmāi inte mānīnō ante ōnonque tededantapa. ⁷ Ayæ edæ boguimāmo ocabogadāni obo wææninque ganta owo iñique ōnōnepāmoqe boguimāmodē apænecantapa. “Iñgā iñōmō botō Wengā botō nē waadecā ingampa cæminīi. Tōmengā pōnō apæneceā ate ēñēdāni,” ante apæneceā ēñengadānimpa. ⁸ Ēñēninque quingæ gomō gomō ayōnāni wada edæ do dæ goda iñōnate Itota adocanque ñowo tōmēnāni weca ongongā agadānimpa.

⁹ Ayæ ānanquidi inō wææ pōñōnāni Itota tōmēnāni inānite angantapa. Mānīnō mīni adīnō ante mīnitō gode ānāmāi pæ wēneyōmīni botō Waobo ēñagaīmo inte edæ wænte ate ñāni ōmæmoncæboimpa. Ñāni ōmæmōmo ate mīnitō edæ māñīfēdē ate apænecæmīnimpa. ¹⁰ Ante angā ēñēninque tōmēnāni gode ānāmāi pæ wēnedāni incæ nāmāneque, Mānīnō tōmengā nānō ñāni ōmæmonguimāmo ante æbānō ante apæneceā, ante wædōnānimpa. ¹¹ Iñique Itota ingante,

—Mānōmāi ī iñique, Ediya wodi tāno poncæcāimpa, ante nē odōmōnāni iñæmpa quinante apænedāni.

¹² Āñōnānite Itota wæætē,

—Ediya wodi ñāni ānongā iñōmō tāno pongā ingampa. Nāwangā impa. Pōninque tōmengā, Doyedē ingai bai ñowo wæætē adobaī nō pōni bacæimpa, ante badongampa. Iñique dodāni Waocā nē ēñāquingā ingantedō ante yewæmōninque, Nanguī caate wæyongante

wadāni pūinque Baa ancædānimpa, ante quinante yewæmongadāni, ante pōnēmīni. ¹³ Incæte botō iīmāinō ante apænebo ēñēdāni. Nōwocā mōnō Ediya iñongā inte do pongāimpa ante aquēnē. Tōmengā pongā adinque wadāni edæ dodāni ñāni yewæmongainō bai adobaī cædinque quīēmē ante ñāni cæinēwēnō ante do cædānīpa, ante Itota tōmengā tōnō nē æidīnāni inānite apænegacāimpa.

Itota wēnæ ingante angā go ate wēñængā waa bacampa

(Māateo 17.14-21; Odoca 9.37-43)

¹⁴ Itotaidi mānīi wææninque tōmengā nānō nē ēmīñēnāni æidāmāi ināni weca ponte ayōnāni wadāni nanguī ināni goto gongæñāni adānitapa. Nē æidāmāi ināni tæcæguedē ongōñōnānite nē wææ odōmōnāni guīquēnē tōmēnāni tōnō wæætēdō wæætē ñāni adānitapa. ¹⁵ Itota do pongā adinque edæ goto gongæñāni tōmānāni guīñente wædinque wadæ pogodo ponte bee tēninque, Bitō pōmi, ānānitapa.

¹⁶ Āñōnānite Itota,

—Tōmēnāni tōnō quīnō ante apænedinque wæætēdō wæætē āmīni.

¹⁷ Āñongante adocanque tæcæguedē ongongā ingante wæætē apænedinque,

—Awēnē nē Odōmōmi ēñēmi. Botō wengā wēnæ babetadecā ingante ēwocampa, ante wædinque botō tōmengā ingante bitō weca ænte pontabopa. ¹⁸ Æyōmōmē ongōñongante wēnæ pō guīdinque wēñængā ingante cōwē gotodongā tæ go wæængampa. Iñique wēñængā wodi māwanta tadedinque wentoquēnē wentoquēnē angadinque pæ opate bacampa. Mānōmāi cæcā ate wædinque botō bitō mīñæ nē godāni inānite, Wēnæ inte wido cæedāni, āmo cæquēñēnāni incæ ædō cæte cæquināni.

¹⁹ Ante apæneyongā Itota tōmēnāni inānite,

—Nōwomāni mīni pōnēegade. Botō mīnitō weca æpogadō quēwēmoī. Pōnēnāmāi inte cæyōmīnite botō æpogadō piyāñē cæte wæwēmoī. Edæ wēñængā ingante botō weca ænte māmōmīni pongædāni, angantapa.

²⁰ Ænte pōnāni ate wēnæ incæ Itota ingante adinque do wēñængā ingante do do wæate bai cædinque wido cæcā tæ go wæængantapa. Ayæ māwantabo tadedinque бага wentoquēnē wentoquēnē angadinque edæ pæntæmæ pæntæmæ gocā. ²¹ Adinque wæmpocā ingante Itota,

—Æyedēnō mānōmāi bacāi.

Āñongante,

—Wēñængāñedē do badingā inte quēwengampa. ²² Quēwēñongante wēñængā ingante wantæ wantæ iñō wantæ wantæ iñō, Gongapamō guitodōmo

gonte wæncæcäimpa, ante wænæ incæ cæcä. Ayæ, Æpænë adobaï guitodömo becadote wæncæcäimpa, ante cæcampa cæbii. Näwangä tæi piñæmi iñinque bitö mönötö wæwënö ante pönente cæbaïmipa. ²³ Æñongante,

—Bitö guiquënë wabänö wede pönëmi imitawoo. Edæ wede pönëñongante edæ waocä beyæ tömäa do cæte impa.

²⁴ Angä ëñente wædinque wæmpocä iñömö yedæ äñinque,

—Bitö imite pönëmopa. Edæ botö æmæ pönönö ante bitö cæbi ate ædæmö wede pönente bacæboimpa, ante wæbopa.

²⁵ Ante äñongä nangui inäni do pogodo pönäni ate wædinque Itota iñömö wænæ në wentamö ëwocacä ingante piñte äñinque,

—Wænæbi bitö, Babetamonca babetade bacædänimpa, ante në cæbi inömi inte ñowo tao godinque wü adodö guiquimi incæbimpa, angantapa.

²⁶ Æñente wædinque nangui Yæ yæ äñinque wëñængä ingante wido cæcä do do wäate tæ go wæäñinque päntæmæ päntæmæ goyongante wænæ tao gocantapa. Gocä ate wëñængä do wæñinäni bai öñongä ate wædinque pancadäniya, Æmæwo wæmaingampa, ante wædäni. ²⁷ Æñinque Itota iñömö pædæ wææmpo önompo bæi ongonte ængæ ganticantapa.

²⁸ Itota ayæ wadæ godinque oncönë pö guiyongante tömengä nänö në ëmiñænäni awëmö äñinque,

—Mönitö guiquënë bitö bai wido cæcæte ante cædinque quñante wido cædämaï intamönii.

²⁹ Ante wæyönänite,

—Wænæ mäningä bai ingante wido cæcæte ante cædinque wantæpiyæ cæñnämaï inte Wængongui ingante nangui apænëte ate wido cæcæimpa, ante apænecä ëñengadänimpa.

Wænönäni wæncæboimpa, ante Itota adodö ante apænecä

(Mäateo 17.22-23; Odoca 9.43-45)

³⁰ Ayæ wadæ gote Gadideabæ wodo pänta godinque Itota, Wadäni adämaï iñönänite ³¹ botö ëmiñænäni adodänique ongöñönänite odömonte apænëbo ëñencædänimpa, ante cæcantapa. Ayæ tömënäni inänite iñainö ante awëmö apænecantapa.

—Adocanque, Waocä në ëñagaingä æyömönö ongongäa, ante godö odömöninque botö imote waodäni nempo pædæ godongä æncædänimpa. Në æñäni wæætë botö imote edæ wænönäni näñe wæncæboimpa. Incæte mëönaa go adoönæque iñonte botö adobo incæ ñäni ömæmoncæboimpa.

³² Ante apæneyongante tömengä ëmiñænäni önömoncaque ëñëninque

ëñëñämaï inäni inte, Æbänö ante tede-bii, ante guifente wædinque äñämaï pæ wëënegadänimpa.

Æcänö ñæñængä inte në angä inguingäa, ante tededänipa

(Mäateo 18.1-5; Odoca 9.46-48)

³³ Mänü godinque Capenäömö iñömö ponte oncönë guidique tömënäni inänite Itota,

—Idömæ pöninque æbänö ante tedominitawo.

³⁴ Æñongante edæ, Mönö cabo incæ æcänonque ñæñængä pöni inongä inte në angä inguingäa, ante tedewëñinäni inte guingo imonte wædinque pæ wëënedänitapa.

³⁵ Æñinque tæ contadique Itota iñömö, Dote, nänä äncabo inänite, Pödäni, angä pönäni ate,

—Yæcado ongömote, ante në äñongä iñömö tömengä wæætë yæmiñængä pöni gote ongote tömänäni beyæ në godö cæcä bate waa tobaingampa.

³⁶ Äñinque Itota wëñængä guiyangä ingante æñinque tæcæguedë goncæte pæ mäñinque tömënäni inänite wæætë apænecantapa.

³⁷ —Æcänö botö ëmowo apænëdinque mäningä bai wëñængä ingante, Pöe, ante godö waa cæcä iñömö tömengä iñömö edæ botö imote edæ do, Pöe, ante pönö waa cæcä ingampa. Ayæ edæ botö imote, Pöe, ante në waa cæcä iñömö tömengä iñömö wü botö adoboque imote waa cæcä ingampa. Wæætë botö imote në da pönöningä ingante Wængongui ingante adobaï edæ, Pöe, ante do waa cæcampa, ante Itota apænëgacäimpa.

Mönö imonte æcänö pünämaï ina mönö tönö cæcampa

(Mäateo 10.42; Odoca 9.49-50)

³⁸ Itota mänömaï apænecä ëñëñönäni Wäo guiquënë,

—Awënë në Odömömi ëñëmi. Wacä bitö ëmowo apænëdinque wëñæidi inte wido cæcä atamönipa töö. Ayæ, Wü mönö cabo ingampa, ante adinque mönitö tömengä ingante Baa äñinque, Cædämaï imæwe, antamönipa.

³⁹ Ante apæneyongante Itota wæætë,

—Ee amüni cæcædäni. Edæ æcänö botö ëmowo apænëdinque döñädë nänä cæi bai mä cæda, tömengä ædö cæte botö imotedö ante do wënæ wænæ anguingäa. ⁴⁰ Edæ mönö imonte æcänö pünämaï ina tömengä mönö cabo inongä inte bai mönö tönö godongämæ cæcä ingampa töö. ⁴¹ Näwangä ämopa. Bitö Codito nänö në ëmiñænömi imi ænte bee, ante wacä münitö imünite æpæ adotacaque pönongä bemüni iñinque në pönöningä wæætë tömengä nänö pönöninö beyæ eyepæ æncæcäimpa, angacäimpa.

Wacä oda cæccæcäimpa, ante nāni
wæquinque cædānīpa
(Māateo 18.6-9; Odoca 17.1-2)

⁴² Mānōmaīnō apænedinque Itota godōmenque apænecantapa. “Wādāni godō cædāni beyæ botō imote nē pōnēnāni incæ pancadāniya edæ dobæ oda cæte wēnæ wēnæ cædānīpa. Īnīnque, Wēñængä adocanque guiyangā pōnī ingā incæ oda cædāmaī incæcäimpa, ante wææ cæcæte ante cædinque nē godō cæcæ cædingā ingante ĩmaī cædāni ĩnīnque tōmēngä toquēnēngä ĩmaingampa. Waodāni nāni dacæ godō dacæ godō cæquinca ñænænca ænīnque tōmēngä önōmenca æ wēmencadinque tōmēngä ingante tæcætībæ wido cædāni ĩnīnque tōmēngä edæ, Wēnæ wēnæ cædāmaī inte becadote wæmo beyænque Wængonguī botō imote wīi godōmenque pangampa, ante wædinque waa toquēnēngä ĩmaingampa. ⁴³ Bitō önōmpoca cædinque wēnæ wēnæ cæbi ĩnīnque bitō önōmpo aa wī æmpote baī wido cæte baī cædinque wēnæ wēnæ bitō cædinō ante wido cæbāwe. Īñæmpa inguīpoga quēwēnīnque æmæmpoque empobi incæte bitō cōwē bitō wænāmaī quēwēnīnque öönædē æibi waa ĩmaīmpa. Edæ wīi tipæmpoga empobi inte edæ bitō gonga cōwē bæcote wæwēngūñōmō wīi æmæwo wido cæte wæquīmidō anguēnē. ⁴⁴ Edæ māñīñōmō tadōmengadænguīpo ĩñōmō cængota wænāmaī gonga emōnāmaī bæcoquīnō anguēnē.”

⁴⁵ Ayæ, “Bitō önōwaca wapiticæ godīnque ēñēnāmaī cæbi ĩnīnque önōwa aa wī æwate baī wido cæte baī cædinque wēnæ wēnæ bitō cædinō ante wido cæbāwe. Īñæmpa inguīpoga quēwēnīnque æmæwæque ēwabi incæte bitō cōwē bitō wænāmaī quēwēnīnque öönædē æibi waa ĩmaīmpa. Edæ wīi tipæmpoga ēwabi inte edæ bitō tadōmengadænguīpo wido cæte wæquīmidō anguēnē. ⁴⁶ Edæ māñīñōmō tadōmengadænguīpo ĩñōmō cængota wænāmaī gonga emōnāmaī bæcoquīnō anguēnē.”

⁴⁷ “Ayæ ægodawate tæ go wæænte baī cædinque bitō awinca beyæ ēñēnāmaī cæbi adīnque bitō awinca cāi cæmonte baī cædinque wēnæ wēnæ bitō cædinō ante wido cæquīmi, ämo. Edæ bitō, Botō tipæmonga emonte incæ tadōmengadænguīpo wīi goīnente awædō, ante pōnente wædinque edæ cāi cæmonte awinca æmæmonque emōni inte quēwēnīnque Wængonguī Awēñē Odeye weca æite waa tobaimīpa. ⁴⁸ Edæ māñīñōmō tadōmengadænguīpo ĩñōmō cængota wænāmaī gonga emōnāmaī bæcoquīnō anguēnē,” ante Itota apænecantapa.

⁴⁹ Ayæ godōmenque apænedinque, “Waodāni, Ööingä ñōmæñāmaī ingæimpa, ante cædinque cati ñænæ quīmōnīque gongapamō æñō cæte biyadānīpa. Waomīni tōmāmīni adobaī caate wædinque ædæmō biyate baī badīnque ñōmæñāmaī ingūīmīnīdō anguēnē. ⁵⁰ Cati quīmonte cæi ĩñōmō wæme inte gæpæ emōmpa. Incæte nongæmonte ba adīnque mīnitō wæætē æbānō nō cæmīni wæætē gæpæ emonguī ĩ. Ööingä wæme bacæimpa, ante quīmonte cæi wēä wēä pæmōnāni baī cædinque mīnitō mīni caipæ incæ piyænē cæte wacä ingä wacä ingä waa cæte quēwēdāni,” ante Itota odōmonte apænecä ēñēngadānīmpa.

10

*Nānōogcēngä ingante nāni pāmænō ante
(Māateo 19.1-12; Odoca 16.18)*

¹ Māñī Capēnānō ongōnīnque wadæ tao iguīdinque Oodeabæ ganca Oododānō æmæ wedeca pongantapa. Pongä adīnque nanguī ĩnāni wæætē pō pō cædāni adīnque Itota cōwē nānō odōmōi baī adobaī odōmonte apænecä ēñēñānitapa. ² Paditeoidi guīquēnē, Godō ämō ēñēnīnque Itota adodeque oda cædæte wæcä tocæi, ante cædinque tōmēngä weca pōnīnque, Itota ēñēmi, änānitapa. Wængonguī æbānō ante wææ angacāi. Waocä tōmēngä nānōogcēngä ingante pāmængä ĩnīnque edæ nō cæte ĩntawo.

³ Ante āñōnāni tōmēngä wæætē,

—Mōitee wodi æbānō ante yewæmōnīnque mīnitō ĩmīnīte wææ angacāi.

⁴ Angä ēñēnīnque,

—Æmæwo pāmæmo goquīmi, ante yewæmōnīnque mānīnta bitō yewæmōnīnta onquiyængä ingante godōmi ængä ate bitō önōnque pāmæncæbiīmpa, ante Mōitee wodi wææ ante yewæmongacäimpa.

⁵ Ante apænedāni ēñēnīnque Itota,

—Īñæmpa, Mīmō ömædēmīni ĩnōmīni inte mīnitō wēnæ wēnæ cæñēmīni ĩmīnīpa, ante wædinque Mōitee wodi, Māñōmaī cæedāni, ante yewæmongacäimpa. ⁶ Edæ wēñēñedē Wængonguī nānō badongāñēdē tōmēngä, “Onguīñængä ingampa, ayæ, Onquiyængä ingampa, ante badongacäimpa.

⁷ Māñōmaī beyæ waocä mæmpocä ingante emō cædinque wāänā ĩnante emō cæte godīnque onquiyængä ingante, Botō nānōogcēngä, ante æmæwo mongä ate tōmēna nāna gæncaya ĩnōna inte mōnīnque guëä quēwēncædāimpā. ⁸ ĩnīnque æmæwo mōnīnque tōmēna nāna gæncaya incæ adocanque baī bate quēwēncædāimpā,” ante Mōitee wodi nānō yewæmongāi baī cædinque tōmēna nāna gæncaya do mōnīnque nāñēñē ĩnāmaī adocanque baī do bacäimpa. ⁹ Māñōmaī beyæ Wængonguī, Adocanque

baí inapa, ante nana gæncaya nânō nē badongaína iñónate waocá wæætē pango cædāmaí incæcāimpa.

¹⁰ Angá wædinque Itota tōnō oncōnē guidiinque tōmengá miñæ nē godānique, Æbānō ante āmitawo. Godōmenque apænebi ēñēmōnie. ¹¹ Ante āñōnānite Itota,

—Æcānō nāwá nānōogængá ingante pāmæninque wacá onquiyængá ingante mōna tōmengá wíwa towengá do badinque nāwá nānōogængá ingante wíwa cæcampa. ¹² Onquiyængá guiquenē tōmengá nānōogængá ingante pāmænte godinque wacá ingante godō mongá iñinque tōmengá adobaí wíwa towengá bacampa, ante Itota apæneca ēñengadānimpa.

Wēñænāni inānite gampo cæcadinque waa apæneccampa

(Māateo 19.13-15; Odoca 18.15-17)

¹³ Ayæ ate, Wēñænāni inānite Itota pōnō gampo cæcadinque waadete apæneccāimpa, ante cædinque wadāni tōmengá weca ænte pō ænte pō cædāni adinque tōmengá miñæ nē godāni guiquenē, Ænte pōnāmaí ledāni, āninque Baa Baa ānāni. ¹⁴ Ate wædinque Itota ænguí badinque nē Baa ānōnāni inānite wængá āninque,

—Wēñænāni inānite ee amīni poncædānimpa. Edæ mānināni nāni pōnēnō baí adobaí pōnēnāni inte edæ Wængonguí Awēnē Odeye nempo do quēwēnāni inānipa. Iñinque mīnitō iñōmō wēñænāni inānite Baa ānāmaí ledāni. ¹⁵ Edæ nāwangá apænebo ēñēdāni. Wēñængá do pōnengá inte Ao angá ingá baí Wængonguí Awēnē Odeye ingante do pōnēninque nē Ao ānāni iñōmō tōmēnānique tōmengá nempo guidiinque quēwēnānipa. Wadāni guiquenē Wængonguí Awēnē Odeye ingante Baa ante pōnēnāmaí ināni guiquenē tōmēnāni ædō cæte tōmengá nempo guidiinque quēwenguiñāni, ante Itota apænegacāimpa.

¹⁶ Āninque edæ wēñænāni inānite bæi ongonte pæ māninque, Wængonguí mīnitō inānite waadete pōnō cæcæcāimpa, ante Itota gampo cæcacá gampo cæcadinque waa apænegacāimpa.

Māincoo nanguí ēacá Itota weca ponte apæneccampa

(Māateo 19.16-30; Odoca 18.18-30)

¹⁷ Ayæ godōmenque gocæ cæyongá wacá edæ Itota weca pogodo ponte da guicapod- inque,

—Awēnē nē waa Odōmōmi apænebi ēñēmoe. Botō æbānō cædinque cōwé wæñāmaí wantæpiyæ quēwēmaimoo.

¹⁸ Āñongante Itota edæ,

—Wængonguí adocanque nē waa cæcá iñongante bitō botō imote, Nē waa cæbi imipa, āmii. ¹⁹ Īmaí cædāni, ante Wængonguí

nānō wææ angainō ante bitō tōmēmi do ēñēmipa. “Wacá ingante godō wæñōnāmaí ie. Bitō nānōogængá ināmaí iñongante godō guēa mōnāmaí ie. Wacá qui adinque awēmō æñāmaí ie. Wacá wēnæ wēnæ cæcá atabopa, ante godō babæ wapiticæ ānāmaí ie. Wacá qui æncæte ante cædinque babæ cædāmaí ie. Wæmpocá ingante wāānā inante waa adinque tōmēna inante godō waadete cæe,” ante wææ yewæmongacāimpa, ante bitō edæ do ēñēmipa, angantapa.

²⁰ Ante apæneca ēñēninque nē āningá guiquenē Itota ingante wæætē,

—Awēnē nē Odōmōmi ēñēmi. Botō māninō bitō ānō baí tōmānō ēñente cædinque pægaboi æe.

²¹ Apæneca ēñēninque Itota tōmengá ingante cōwá adinque waadete pōnēninque,

—Adodeque ayæ ēñente cæquēnēmi imipa, ante āmo ēñēe. Oōnædē bitō waēmoncoo ænguinque edæ ñōwo godinque imæca bitō mānincoo tōmancoo godonte æninque bitō æninta wæætē omæpodāni inte wadāni inānite tōmanta godōmi æncædānimpa. Ayæ edæ botō imote tee empote pōe.

²² Angá ēñēninque, Botō māincoo nanguí impa, ante pōnente wædinque nē ēacá iñōmō nanguí wæwēninque wadæ gogacāimpa.

²³ Gocá adinque Itota godongāmæ adinque tōmengá nānō nē emiñænāni inānite, —Wængonguí Awēnē Odeye nempo guite quēwēncæte ante cædinque waodāni omæpodāni inte botō miñæ pōnānipa. Māincoo nanguí ēacá guiquenē æbānō cæte omæpocá inte botō miñæ ponte guite quēwenguingā, angantapa.

²⁴ Īninque tōmengá miñæ nē godāni tōmengá nānō apænedō beyæ ante, Æbānō angā, ante guñente wæyōnānite Itota wæætē,

—Botō wēmīni ēñēdāni. Wængonguí Awēnē Odeye nempo guite quēwēncæte ante cædinque ante waocá māincoo mangá beyæneque eyepæ cæcampa diyæ guiquingā. ²⁵ Edæ cāmeyo guiyangá ingampa diyæ daagō guiyampite pædæ tacā. Īninque, cāmeyo ñæñængade inongá inte pædæ tadāmaí ingá baí nē ēacá adobaí ingampa. Tōmengá nāmā ayongá ñæñængá inongá inte edæ æbānō cæte Wængonguí Awēnē Odeye nempo do wāānē guite quēwenguingā.

²⁶ Ante apæneca ēñēninque godōmenque nanguí pōni guñente wædinque tōmēnāni nāmāneque tededinque,

—Īñæmpa māñōmaí Īninque æcānō wāānē guite quēwenguingā.

²⁷ Ante nāmāneque tededāni inānite adinque Itota,

—Waomīnique incæ nāmā mīni cædō beyænque ædō cæte quēwēmaimīni.

Wængongui guiquenē wīi wao bai cædongā inte nāmā incæ tōmānō do cæcā ingampa.

²⁸ Ante apæneccā ate Pegodo tōmengā ingante āninquē,

—Mōnitō iñōmō mōni ēadincoo owæ caate bitō miñæ ōmæpomōni pōmōni æe.

²⁹ Tæcæ āñongante Itota tōmēnāni inānite wæætē,

—Mīnitō botō beyæ ante pōnēninque waa pōni botō apænebodō beyæ ante pōnēninque pōmīnitapa. Iniquē edæ botō iīmaī ante nāwangā āmopa. Æcānō mānīnō beyæ tōmengā oncodo taodīnque tōmengā tōniñadāni inānite ēmō cædinque mæmpocā tōnō wāānā inante ēmō cæte wēñænāni inānite ēmō cæte godīnque tōmengā gōneacoo ēmō cæte owæ caate godīnque botō miñæ æcānō wadæ pōna iñōmō, ³⁰ tōmengā iñōmō inguipoga quēwēnincoo wēēnē nānō ēadincoo bai adopocoo ænīnque godōmenque adopo adopo tiēē ganca mānimpoga adopo æncæcāimpa. Ayæ onconcoo ænīnque tōmengā tōniñadāni tōmengā badāidi tōmengā wēñænāni tiēē ganca bai yebænāni bai ænīnque, tōmengā gōneacoo wæætē bacoo æncæcāimpa. Incæte tōmengā ingante togænte pancædānīmpa. Incayæ pōmāmo bayonte botō, Bitō quēwenguīmāmo, ante godōmo ænīnque tōmengā cōwē wantæpiyæ wæñāmaī quēwencæcāimpa. ³¹ Incæte edæ tāno yæcado ongōnīnāni inte pancadāniya wæætē yæmiñæ gote ongōnāni bacædānīmpa. Ayæ yæmiñæ ongōnīnāni inte wæætē yæcado ponte ongōnāni bacædānīmpa, ante Itota apænegacāimpa.

Wæncæboimpa, ante Itota wæætē adodō ante apæneccampa

(Māateo 20.17-19; Odoca 18.31-34)

³² Māniī Eedotadēē ante nōwo ānāmæne æiyōnāni Itota incæ tāno beyænte æicā. Ate wædinque tōmengā ēmiñænāni guiquenē, Tōmengā nānō wænguinque tāno æicampa, ante wæyōnāni ayæ pōnāni guiquenē guiñente wædōnānīmpa. Itota iñōmō tōmengā miñæ, Dote, ante nāni gocabo inānite nānēnē ænte māocā goyōnāni tōmengā, Botō imote iīmaī cædāni bacæboimpa, ante edonque apæneccantapa. ³³ Eñēñōnānite, “Nōwo iñōmō mōnō edæ Eedotadēē iñōmō æicæiimpā. Māniñōmō æi pō gongæmō ate adocanque, Waocā nē eñagāingā æyōmōnō ongongāā, ante godō odōmongā bæi ongonguīnāni. Ayæ, Wængongui quī, ante nē godōnāni ñæñænāni tōnō nē odōmōnāni nempo tōmengā botō imote pædæ godongā ænīnque tōmēnāni wæætē botō imote apænte āninquē, Cōwē wæncæcāimpa, ānīnque oodeoidi ināmaī ināni inānite wæætē pædæ māo godōnāni. ³⁴ Ænīnque iīnāni wæætē botō imotedō

ante badete todinque botonga tawimæ towæ tānongadinque æmontaimenca tæi tæi pānāni āmogate wæyōmote botō imote godōmenque wæñōnāni wæncæboimpa. Wæætē do wæñimo inte botō mēōnaa go adōōnæque iñonte ñāni ōmæmoncæboimpa,” ante Itota wæætē apænegacāimpa.

Tantiago tōnō Wāo, Mōnatō āmaī cæe, ante wædapa

(Māateo 20.20-28)

³⁵ Ayæ Tebedeo wēca Tantiago tōnō Wāo iñōmō Itota weca pōnīnque,

—Awēnē nē Odōmōmi eñēmi. Mōnatō quiēmē āmōna cæbi waa tobaimōnapa,

³⁶ Āna eñēninque,

—Mīnatō beyæ quīnō cæbo æmīna.

³⁷ Āñongante,

—Awēnē Inōmi inte bitō ñāō ēmōmāmodē tæ contadinque mōnatō imōnate iīmaī cæcæbiimpā, ante āmōnapa. Adocanque bitō tōmēmæmi inō adocanque dipæmæmi inō āmi tæ contaquīmōna.

³⁸ Ante āna eñente wædinque Itota wæætē,

—Iñæmpa mīnatō eñēnāmaī inte māñōmaī āmīna awædō. Edæ botō nantate wæwenguīmæ bai becabo bai mīnatō edæ adobai adotaca becate bai Ao ante botō beyæ nantate wæwenguīmīnaa. Ayæ botō wænguīmāmo ante mīnatō adopænē guite bai adobai Ao ante botō beyæ guiñēnāmaī inte wænguīmīnaa.

³⁹ Ante āñongante,

—Ao ante guiñēnāmaī cæcæmōnaimpa.

Ante apæneyōnate Itota,

—Botō nanguī caate wæwēmo bai mīnatō adotaca becate bai āanque bai caate wæquīmīna imīnapa. Botō wænguīmāmo ante mīnatō adopænē guite bai adobai wænguīmīna imīnapa. Nāwangā impa. ⁴⁰ Incæte botō tōmēmæmo inō botō dipæmæmo inō æcānō tæ contaquīna, ante wīi botō godō āmo imopa. Wæætē, Awēnē contaimpaa mānīnaque tæ contaquīna, ante do badongāingā inte Mæmpo Wængongui iñōmō tōmengā adocanque godō angā contacædaimpā, ante Itota apænegacāimpa.

⁴¹ Māñōmaīnō ante tededapa tōō, ante eñēninque wadāni diete ganca tōmengā miñæ nē godāni guiquenē Tantiago tōnō Wāo inate pīñānitapa. ⁴² Pīñāni ate wædinque Itota aa pecā pōnāni ate tōmēnāni inānite wæætē apæneccantapa.

—Mīnitō, Oodeoidi ināmaī ināni æbānō cædānīpa, ante do eñēmīnīpa. Tōmēnāni nāni, Awēneidi, ante nē ānōnāni iñōmō nāmā beyænque ante cædinque nanguī plinte ānāni wædinque awēneidi nempo quēwēnāni incæ wæætē do eñente cædānīpa. Ayæ tōmēnāni weca nē ñæñænāni inōnāni iñōmō, Tōmēmōque āmo eñente cædāni, ante plinte ānāni wædānīpa. ⁴³ Mīnitō guiquenē

tömēnāni nāmā beyænque ante nanguī ānāni baī wīi adobaī cæquēnēmīni īmīnīpa. Wæætē mīni cabo īfōmīni adocanque ñænængā pōnī ingā bacæte ante cædinque tōmengā tāno edæ mīnitō beyæ nē cæcā baquēnengā ingampa. ⁴⁴ Ayæ yæcado ongōnente wæcā īfōmō tōmengā yæcado ongoncæte ante cædinque wæætē edæ yæmīñæ pōnī gote tōmānāni beyæ nē cæcā badinque tōmengā nāmā beyæ ante cædāmāi inguēnengā ingampa. ⁴⁵ Edæ Waobo ēñagāimo inte adobaī, Botō beyæ pōnō cæcædānīmpa, ante wīi pōmo īmpa. Wæætē wadāni beyæ godō cæcæte ante pōmoīmpa. Ayæ edæ nanguī īnāni tee mōnete baī wæwēñōnāni botō wæætē, Tömēnāni wībænete tadinque quēwencædānīmpa, ante tōmēmo wepæ incæ godoncæte ante pōmo īmpa, ante Itota apænægacāīmpa.

Batīmeo babetamongā ingante Itota angā waa bamongā

(Māateo 20.29-34; Odoca 18.35-43)

⁴⁶ Itota mānīnō godinque Eedicoo nāni quēwēñōmō pongadānīmpa. Tōmengā nānō nē ēmīñænāni tōnō tæiyænāni tōnō Eedicoo īfōmō wodō pænta tayōnāni wacā babetamongā Tīmeo wodi wē Batīmeo īfōmō taadō wedeca, Pōnōmī æmoe, ante ānecōngāīmpa. ⁴⁷ Īnīnque wadāni, Itota Nāatadeta pædingā inte pongampa, ante tededāni ēñēnīnque tōmengā ogæ tedete,

—Itota ēñēmi. Awēnē Dabii wodi pæīmi īnōmi inte botō wædō ante pōnente cæe.

⁴⁸ Ante tæcæ āñongante godongāmæ godāni pancadāniya, Apocænē inguēnē quēwēe, ante ānāni incæte tōmengā godōmenque yedæ aa pedinque,

—Awēnē Dabii wodi pæīmi īnōmi inte botō wædō ante pōnente cæe.

⁴⁹ Ānīnque ancaa aa pecā ēñēnīnque Itota næ gongæñinque,

—Babetamongā ingante aa pemīni pongæedāni.

Angā ēñēnīnque babetamongā ingante,

—Engæ gantidinque wædāmāi īmāwe. Bitō īmite, Pōe, angā apa quēwēe.

⁵⁰ Ānāni ēñēnīnque babetamongā incæ ayacooga gāni tadongate do ængæ gantidinque Itota weca pongā. ⁵¹ Adinque,

—Bitō beyæ quīnō cæquīmo.

Āñongante babetamongā,

—Awēnē nē Odōmōmi ēñēmi. Cæbi waa bamonte aboe.

⁵² Angā ēñēnīnque Itota,

—Waa bitō bamonguinque botō imote pōñemitapa. Ōnonque wadæ gobāwe.

Āñongante tōmengā do waa bamonte adinque Itota mīñæ taadonque gogacāīmpa.

11

Itota Eedotadēē īfōmō pongampa

(Māateo 21.1-11; Odoca 19.28-40; Wāō 12.12-19)

¹ Mānīi gote Eedotadēē obo pōnīnque Odi-bowæñquidi nāni anquidi ontacamō goinō Betapagūee nāni quēwēñōmō ganca ayæ Betānia nāni quēwēñōmō ganca pōñōnāni Itota tōmengā mīñæ nē goda īnate mēnaa īnate da godōnīnque angantapa. ² Īmāi angantapa.

—Mānīi nāni quēwēñōmō ongō amīna. Tōmēñōmō go guīte ayōmīna bodo wē picængā incæ waocā ingante mongæñāmāi īningā inte ñāni ñæingā a ongongā acæmīnāīmpa. Adinque ñī cæyænte ænte pōeda. ³ Wacā, Quīnante ñī cæyæmīnaa, ante wææ angā ēñēnīnque mīnatō wæætē edæ, Mōnō Awēnē nānō ænguēnēnō ante ænte gomōnapa. Tōmengā īnque cæte ate adodō do da pōnongā æedāni, ante æda.

⁴ Angā ēñente gote ayōna bodo wē taadō wedeca odemō awāa ñānō ñæ a ongō adinque ñī cæyænte ænte gocæte ante cæda.

⁵ Adinque māñīñōmō ongōnāni guīquēnē, —Bodo wē quīmæ ñī cæyæwēmīnaa.

⁶ Āñōnānite Itota nānō ānīnō adodō āna ēñēnīnque, Ao ānāni. ⁷ Ēñēnīnque ñī cæyænte Itota weca tōī tōī ænte pōnatapa. Ānte pōnīnque tōmēna weocoo yabæcooque æidāmæ wo cæyabæda ate Itota wæñōmēnæca inō æi yiyæ tæ contacantapa. ⁸ Adinque nanguī īnāni, Itota nānō ponguīnō, ante tōmēnāni weocoo yabæcooque pōnō bee podōwayōnāni wadāni guīquēnē gōnea gote yæpæma ōñabo tapænte māmō bee bee podōwadāni ate tōmengā podōwainonque gocantapa. ⁹ Gocā adinque tāno godāni tōnō ayæ pōnāni tōnō nanguī īnāni godongāmæ godinque yedæ ānīnque,

—Mōni quēwēnguinque īmpa, ante, Badogaa, ante tomōnīpa. Awēnē Wængonguī ēmōwo beyænque pōmi īnīnque bitō toquinque edæ Wængonguī bitō īmite waa cæcæcāīmpa. ¹⁰ Mōnō mæmæ Dabii wodi pæīmi īnōmi īmpa, ante adinque mōnitō, Awēnē odeye Dabii wodi nempo nāni waa quēwengāi baī bitō nempo mōnitō waa quēwēnguinque īmpa. Īnīnque, Badogaa, ante yedæ āñōmōni æibæ pōnī quēwēnāni incæ, Badogaa, ancædānīmpa.

¹¹ Ante yedæ āñōnāni Itota Eedotadēē pō ti wææñinque Wængonguī oncō ñænæncōnē yabæcōnē pō guīdinque māñīñōmō ongoncoo tōmāā acantapa. Ayæ, Gāwadecæ pōnī ba awædō, ante tōmengā ēmīñænāni dote ganca īnāni tōnō wadæ tao Betānia gogacāīmpa.

Iigowæ ðmæcawæ i adinque Itota püingampa

(Mäateo 21.18-19)

¹² Gote Betänia monte baðnæ pöfñonäni Itota gæwænte wædinque, ¹³ Quinö impa cænguimoo, ante gomö ayongä iigowæ öfñabo emæ incæ incate bocabaimpa, ante gote ayongä ðmæcawæ acantapa. Önöpoque i beyæ incadämaï intapa. ¹⁴ Ante iigowæ inte apænedinque,

—Iigowæ eñëmi. Incaquïnämaï inte bitö incaquïmi cænguïnäni.

Äñongante tömengä nänö nê emiñænäni edæ eñëe gongæñänimpa.

Wængonguï oncö tæiyæ wæmö baccäimpa, ante cæcä

(Mäateo 21.12-17; Odoca 19.45-48; Wäö 2.13-22)

¹⁵ Do nani ponguëñenö Eedotadëe pönänitapa. Itota iñömö Wængonguï oncö ñænæncönê yabæcönê pö guidinque mänñömö mäincoo mänäni tönö wadäni godonte æncæte ante godongämæ pönäni tönö ongönäni adinque tömänäni inänite, Oncodo tao goedäni, ante da tadongä tao godänitapa. Ayæ campio ante nani godonte æimpa tönö equemö godoncæte ante nê mänäni nani cönöimpa tönö bæ tacä tömampaa guidömëmæ tæ go wææntapa. ¹⁶ Ayæ wadäni mäincoo mongænte yacönenque gocæte ante cæyönänite Itota, Iñcodo mongænte godämaï iedäni, äninque wææ cæcantapa. ¹⁷ Ayæ tömënäni inänite angantapa.

—Wængonguï beyæ iimainö ante yewæmongatimpa. “Tömämæ quëwënäni botö oncönê pö guidinque botö imote apæñecädänimpa,” ante Wængonguï angä incæte munitö wënæ wënæ cæmini beyænque Wængonguï oncö incæ nê awëmö ö ænäni nani womöincönê bai wentamö bapa töö.

¹⁸ Ante odömonte apæneyongante, Wængonguï qui, ante nê godönäni ñænænäni tönö nê wææ ante odömönäni tönö eñëe gönänitapa. Wadäni önönänique guiquënë, Itota quinante waa pöni apæñecä eñëmönii, ante wædäni. Adinque awënëidi wæætê, Itota beyænque piñäni wæcæ wæ, ante pönëninque Itota ingante guïñente wædinque, Quinö cæmö wæmaingä, ante wænoncæte ante pönente cægadänimpa. ¹⁹ Gäwadecæ bayonte Itotaidi iñömö oncodo tao godinque godömenque yabæque tao gogadänimpa.

Iigowæ ðmæcawæ do guïñê wæ adänipa
(Mäateo 21.20-22)

²⁰ Baänæ ate iimö nani pöninö adodö ponte ayönäni iigowæ yæwaguinto ætæwowate tömëwæ æi ayawæ edæ dobæ

guingo iwate wænimpa, ante adänitapa. ²¹ Adinque Pegodo, Itota iimö nänö äni bai impa, ante pönëninque,

—Awënë nê Odömömi cöwä ae. Bitö piñte äniwæ inte iigowæ edæ dobæ guïñê wæ ataque.

²² Äñongante tömënäni inänite Itota wæætê,

—Wængonguï ingante wede pönëmæwedäni, angantapa. ²³ Ii änanquidi iñömö ongö iñonte waocä, “Änanquidi eñëmi, äninque, Bitö cabænte wo gote gäwapænê guïe,” angä eñëninque änanquidi tömê gäwapænö do wo gote guiqui i, ante pönëminitawo. Edæ näwangä ante munitö iminite apæñebopa. Äcämenque incæ edæ æmæ pönëñämaï inte, Botö änö bai do baccäimpa, ante wede pönëninque äna ininque tömengä nänö äninö bai do æmaingampa. ²⁴ Mänömaï beyæ botö munitö iminite apæñebopa. Minitö quiëmê incæ ante Wængonguï ingante apænedinque, Tömengä näwangä pönongä æncæboimpa, ante wede pönente apæñemini ininque munitö äninö tömänö edæ do æncæminimpa.

²⁵ Ayæ edæ, “Minitö, Wiwa cæbo incæte Wængonguï öönædê nê quëwëngä inte botö imote pönö ñimpo cæcä ininque botö waa tobaïmopa, ante wæminitawo. Iñæmpa, Wængonguï mänömainö cæcæcäimpa, ante cædinque munitö tömengä ingante apæñecæte ante ongöninque täno piyænê cæte cæedäni. Wacä wënæ wënæ cæcä wædömini inte munitö wæætê tömengä ingante pönö ñimpo cæedäni, ante Itota apæñegacäimpa. ²⁶ Wæætê edæ munitö pönö ñimpo cædämaï imini ininque munitö wënæ wënæ cædinö ante munitö Mæmpo öönædê nê quëwëngä inongä inte tömengä adobai ñimpo cædämaï imaingampa,” ante Itota apæñegacäimpa.

Awënë imipa, ante æcänö änaï, ante Itota ingante äñänipa

(Mäateo 21.23-27; Odoca 20.1-8)

²⁷ Eedotadëe iñömö adodö pönänitapa. Itota Wængonguï oncö ñænæncönê yabæcönê go guïite cægöfñongä, Wængonguï qui, ante nê godönäni ñænænäni tönö nê wææ ante odömönäni tönö nê aadäni nani Picæncabo, nani änäni tönö tömengä weca ponte äñänitapa. ²⁸ Tömengä ingante,

—Æcänö nê angä inte bitö imite angä cæbii, äñänitapa. Äcänö bitö imite, Nê ämi imipa, pönö äna æninque bitö nê ämi inte bai edæ mänömaï cæbii. ²⁹ Ante wæyönänite Itota näëmæ äninque,

—Botö munitö änö bai adodeque ämo eñëninque munitö wæætê apæñemini eñëmöedäni. Apæñemini eñente ate, Botö cædinö ante æcänö nê angä inte pönö äna

æninque cæboi, ante botō wæætē apænebo eñēmaimīnīpa.

³⁰ Wāō wodi ingante æcānō, Æpæne guidonguimi, āna eñēninque tōmengā wæætē guidongāi, ante pōnēmīni. Edæ Wængonguī angā eñente cæcantawoo. Wæætē waodānique ānāni eñente cæcantawoo. Æcānō Wāō ingante āna, ante apænemīni eñēmoedāni. ³¹ Angā eñente wædinque tōmēnāni, Æbānō onguīi, ante wæætēdō wæætē nāmāneque tededinque, “Wængonguī angā eñente Wāō guidongantapa, ante āmō bai Itota wæætē mōnō imonte, ‘Quīnante Wāō ingante pōnēnāmai imīnitapa,’ ancædongāimpa. ³² Ante pōnente wædinque wæætē, Wængonguī beyæ nē apæneca Wāō wodi inongāimpa, ante tōmānāni pōnēnānīpa. Ante pōnēninque awēnēidi wæætē, Waodānique ānāni eñente Wāō guidongantapa,” ante mōnō ædō cæte anguīi. Edæ pīnāni wæcæ wæ. ³³ Ante guīfente wædinque Itota ingante edæ,

—Wa. Eñēnāmai imōnīpa.

Ante wæyōnānīte Itota wæætē,

—Īninque edæ, Æcānō nē angā inte pōnō āna æninque botō cæboi, ante mīnitō ānō ante botō adobaī apænedāmai incæboimpa, ante angacāimpa.

12

Nē aadāni inguēnēnāni incæ wīwa cædānīpa, ante

(Māateo 21.33-46; Odoco 20.9-19)

¹ Ayæ mānīfēdē Itota, Wængonguī æbānō cæcāā, ante eñencædānīpa, ante imæca quēwēnāni nāni cæinō ante odōmōninque ĩmaī apænecantapa. “Waocā yowementacodē mīninque wææ da da māo da caadinque, Tōmēmoncoo ænte pīnā pīnā gāwate tōmēmæ ontatodē wæ yopænte æñōmō, ante ææ wote badongā. Ayæ yowementacodē awēmō guīdāmai incædānīpa, ante æi wæñōmēnæca gomō aquīñōmō mæñongā. Ate wabæca gocæ cædinque wadāni omæ wite nē aadāni inānīte, Botō yowementacodē incæ omæ wite aadāni, angantapa. Aayōmīnīte botō, Mīnitō quī, ante pancamonga pōnōmo æncæmīnīpa, angā Ao āñōnāni wadæ gocantapa.”

² “Ayæ yowedepo bayonte tōmengā ingante nē cæcā ingante apænedinque, Bitō yowementacodē nē aadāni weca godinque pancamonga āmi æninque botō weca wæætē māmōmi æmoe, angā gocantapa.

³ Angā godinque pongā adinque yowementacodē nē aadāni guīquēnē nē æncæ pōningā ingante bæi ongonte tæi tæi pāninque omæpocā da tadōnāni gocantapa. ⁴ Adinque nē ēacā ĩñōmō wacā ingante tōmengā ingante nē cæcā ingante angā gote pongā adinque yowementacodē nē aadāni adobaī

tæi tacadāni wæyongante, Guingo imonte wæcæcāimpa, ante tōmengā ingante godō wīwa cædānīpa. ⁵ Ayæ wæætē nē ēacā wacā ingante da godongā godinque yowementacodē pongā adinque nē aadāni wæætē tōmengā ingante wæñōnāni wængantapa. Ayæ wæætē nanguiñāni inānīte da godongā pōnāni adinque pancadāniya inānīte tæi tæi pāninque pancadāniya inānīte wæñōnāni wæñānīpa.”

⁶ “Adocanque pōni nē ēacā weca ongōnongāimpa. Māningā ĩñōmō nē ēacā wengā onguīñangā ĩñongante nē ēacā tōmengā ingante nangui wæadedongāimpa. Īninque nē ēacā ĩñōmō, ‘Tōmēmo wengā ingante da godōmo gocā adinque tōmēnāni guīfente wædinque ee abainānīpa,’ ante pōnēninque tōmengā ingante da godongā tōmangā pōni gocantapa. ⁷ Gote dicæ pongā adinque tōmēnāni, ‘Tōmengā ingampa. Wæpocā māincoo ĩni edæ ĩngā ĩñōmō nē ænguingā ingampa cæmōē. Mōnō edæ māo wæñōmō wængā ate edæ mōnō quī babaimpa.’ ⁸ Ånewēninque tōmēnāni nē ēacā wengā ingante edæ bæi ongonte wæñōninque tōmengā baō ĩni yowementacodē wææ cæte yabæwe edæ, Ōmæ, ante wido cædānīpa. Māninque apænebopa.”

⁹ Ante tededinque Itota apænegacāimpa. Ayæ mānīi nē ānīnāni inānīte wæætē ĩmaī angantapa. “Īninque yowementacodē nē aaquēnēnāni inānīte nē ēacā æbānō cæquingāā, ante pōnēmīni. Tōmengā edæ, Ōmæ, ante do pōninque nē aaquēnēnāni inānīte godō wæñōninque wadāni inānīte yowementacodē godongā æninque aacædānīpa.”

¹⁰ Åninque Itota, “Mīnitō guīquēnē dodāni nāni yewæmongainta adāmai inte botō imote āmīnitawo. Edæ ĩmaīnō ante Wængonguī angā eñente yewæmongadānīpa.

‘Dica ænte adinque, Wēnæ wēnæ inca, ante nē mæñōnāni nāni wido cædinca incæ gomonga waēmonca inca ĩninque tāno nāni ñōnōninca bæbængaca do bacapa.

¹¹ Wængonguī Awēnē incæ mānōmai cæcā adinque

mōnō waocabo guīfente wædinque waa amompa,’

Ante yewæmonte ĩ abāimīnīpa.”

¹² Mānōmai apæneca eñente wædinque awēnēidi wæætē, ĩñæmpa nē aaquēnēnāni nāni cæinō ante odōmonte apænedinque Itota mōnō imonte pīinte angā awædō, ante pōnēninque tōmengā ingante bæi ongoncæ cædānīpa. Incæte, Wadāni pīnāni wæcæ wæ, ante wædinque ee adinque bæi ongōnāmai inte tōmēnāni edæ wadæ gogadānīpa.

*Tæiyæ Awënë nānō äintamō ante ted-
edānīpa*

(*Máateo 22.15-22; Odoca 20.20-26*)

¹³ Māniū awēñēidi incæ ayæ ate Paditeoidi pancadāniya tōnō Edodeidi pancadāniya inānite da godōninque, Minitō gote Itota ingante āñōmīni wabānō tōmengā nānō pante wæquinque adodeque wapiticæ bai tedebaingampa. ¹⁴ Ānāni ēñēninque Itota weca wadæ pōninque,

—Awënë nē Odōmōmi ēñēmi. Bitō nō pōnente cæbi imīpa, ante do ēñēmōnīpa. Ayæ bitō ayōmi mōnitō tōmāmōni ōnōmōnique bai imōni adinque bitō iñōmō, Waodāni æbānō angūnānīi, ante ayæ, Ēbānō cæquinānīi, ante wædāmai imi inte Wængongui taadō ante bitō guiñēnāmai inte nō odōmonte apænebīpa. Īninque apænebi ēñēmōnie. Odōmāno gobiedōno beyæ ante tæiyæ awënë Tetædo tiguitamō nānō ānintamō ante æbānō wææ yewæmonte ī, ante ēñencæte ante wæmōnīpa.

¹⁵ Godonte edæ waa cæte intawo. Wæætē wēnæ wēnæ cæte intawo. Ante āñōnānite Itota iñōmō, Waa cæte bai tedewēnānīpa, ante do ēñente wædingā inte tōmēnāni inānite,

—Botō imotedō ante cædinque, Ēbānō cæmō ate oda cæqingāā, ante quīnante cæmīnī. Deēnadio tiguitamō ænte pōmīni aboedāni.

¹⁶ Angā ēñente ænte pōnāni adinque,

—Æcānō awīnca bai yewæmonte badonte ī. Æcānō ēmōwo ante yewæmonte ī.

Ante āñongante,

—Awënë Tetædo awīnca bai yewæmonte badonte impa. Adocā ēmōwo ante yewæmonte ongō amōnīpa.

¹⁷ Ante apænedāni ēñēninque Itota tōmēnāni inānite,

—Awënë Tetædo qui ī Īninque edæ Tetædo ingante godongæīmpa. Wæætē Awënë Wængongui qui ī Īninque Wængongui ingante godongui ī apa ānewēmīnīi.

Angā ēñēninque tōmēnāni, Æ, nō pōni ante apænecampa, ante tōmengā ingante waa adinque guiñente wægādānīpa.

*Ædō cæte nāni ōmæmonguū, ante
wædānīpa*

(*Máateo 22.23-33; Odoca 20.27-40*)

¹⁸ Ayæ Tadoteoidi nē, Waocā wæninque nāni ōmæmōnāmai æmæwo wængampa, ante nē ānewēnāni inte Itota weca pōninque, Mōni ānō ante āmi ēñēmaimōnīpa, āninque,

¹⁹ —Awënë nē Odōmōmi ēñēmi. Mōitee wodi mōnō beyæ ante wææ yewæmōnīnque Īmai ante yewæmongacāīmpa. Waocā mōninque wēñæ tapæīdāmai inte wængā ate tōmengā tōniñacā wæætē owæmpoingā ingante mōninque wēñæ tapæīdinque,

Botō tōniñacā wodi wængā ingampa, ante pæpogacæcāīmpa, ante yewæmongacāīmpa.

²⁰ “Īninque wadāni Īmai cædānitapa, ante apænemōni ēñēe. Edæ ōnōmpo æmæmpoque go mengāa nāni caipæ iñōnānite bamoncā-dengā mōninque wēñæ tapæīdāmai manguiwēninque edæ nāñe wængā. ²¹ Wængā Īninque wææ ayæmengā adocā ingante mōninque wēñæ tapæīdāmai nāñe wængā. Ayæ wææ wacā adobai wēñæ tapæīdāmai nāñe. ²² Ayæ wææ wēñæ tapæīdāmai nāñe, ayæ wææ wēñæ tapæīdāmai nāñe, ayæ wææ wēñæ tapæīdāmai nāñe, ayæ wææ ayæmengā pōni adocā ingante mōninque wēñæ tapæīdāmai nāñe wængantapa. Onquiyængā guiquēñe anca owæmpote wædinque tōmengā pōni nāñe wængantapa. ²³ Īninque, Mōnō nāni ōmæmonguiōnæ, ante mīni āōnæ iñonte māningā owæmpoingā iñōmō æcānō nānōogængā baquingāā. Edæ tōmengā ingante iñōmō edæ tōmānāni manguiwengādānīpa.”

²⁴ Āñōnānite Itota wæætē,

—Minitō iñæmpa. Wængongui angā ēñente nāni yewæmōnta adāmai inte bai āmīni awædō. Wængongui adocanque tæi piñængā inte edæ tōmāā cæcampa, ante pōnēnāmai inte edæ oda cæte āmīni awædō. ²⁵ Edæ Wængongui anquedoidi ōñædē cōwē owodāni bai inōnāni inte waodāni nāni ōmæmōninque godō nāñōnāmai mōnāmai inguinānidō anguēñe. ²⁶ Wæætē do wængāināni nāni nāni ōmæmonguiōnte ante Mōitee wodi ocāñequiya ante yewæmōninque adotaa æbānō yewæmongacāi, ante mīnitō adāmai inte āmīni awædō. Edæ Mōitee wodi ingante Wængongui Īmai angacāīmpa. “Botō iñōmō Abadāō Wængonguimo ingaimo inte ayæ Itæca Wængonguimo ingaimo inte botō Aacobo Wængonguimo adobo imo anguēñe.”

²⁷ Ante nē angāingā inte edæ æmæwo wæñināni tōmēnāni Wængongui ædō cæte inguingāā. Wæætē edæ mīi quēwēnānique tōmēnāni Wængongui inongā ingampa, pōnenguēñe quēwēmīnīi. Nē wænte godināni incæ ayæ mūnāni quēwēnāni inānīpa. Minitō edæ wadō ante tededīmīni inte edæ oda cæte wapiticæ ānewēmīnīpa, angacāīmpa.

*Wængongui nānō wææ angāine mēnea
tæīneda pōni ēnepa*

(*Máateo 22.34-40*)

²⁸ Mānōmai āñōnānite nō apænecā ēñente wædinque adocanque nē wææ ante odōmongā iñōmō Itota weca pōninque,

—Wængongui, Īmai cæedāni, ante nānō wææ angāīnecoo ante pōnēninque ædedō tæīne pōni ī iñonte mōnō nangui ēñente waa cæquūi.

²⁹ Āñongante Itota iñōmō,

—Iimaine ante nanö wææ angaine iñomö edæ tæine pöni éne iñonte monö nanguï éñente cædinque waa cæcæimpa, angantapa. “Idægoidi, ämo éñeedäni. Wængongui monö Awënë iñomö, tömengä adocanque inongä inte edæ näwä Awënë inongä ingampa.”³⁰ Mänömai Awënë Wængongui ingampa, ante adinque bitö mimö entawente tömengä ingante waadedinque önöwoca ewocabi inte ædæmö waadete pönencæbiimpa. Ayæ edæ bitö ocai encabi inte nö pönëninque bitö baö tæi piñænte éñabi inte edæ godö waadete cædinque tömengä ingante waa waadete pönë,” ante nanö yewæmongaine tæine iñonte monö nanguï éñente waa cæcæimpa.³¹ Ayæ wade nanö angaine adobai tæine iñonte monö éñente waa cæcæimpa. “Nämä bitö waadete waa cædö bai adobai pönëninque bitö wadäni inänite adobai waa waadete cæe.” Mäninque. Iimai cæedäni, ante Wængongui nanö wææ angainö ante tæineda bai wade edæ dæ ampa.

³² Ante apænecä éñëninque në wææ odömongä iñomö,

—Awënë në Odömömi näwangä edæ ante apænëbi éñëmpa. Wacä wængongui dæ äñongante adocanque monö Wængongui inongä ingampa, ante nö ämipa.³³ Iñinque tömengä ingante mimöno entawente waadedinque monö ocai encamö inte nö pönëninque monö baö tæi piñæmö inte godö Wængongui ingante waadete cædinque nämä monö pönëno bai wadäni inänite adobai waadete godö waa cæmö adinque Wængongui waa acampa. Näwangä impa. Baö bataa iya tante godömö incæ, Wængongui qui, ante monö ancaa godömö incæ Wængongui ayongä wædenque waa cæte impa. Wæætë mäninö bitö äninö bai cæmö adinque Wængongui godömenque waa acampa.

³⁴ Ante në wææ odömongä nö éñente apænecä wædinque Itota edæ,

—Bitö Wængongui Awënë Odeye nempo obo pöni ongömi inte guibaimipa, ante awædö.

Angä éñëninque tömänäni, Mönö æbänö godömenque anguii, ante guifñenete wædinque pæ wëënegadänimpa.

Codito æcänö Pæingä inongä ingää, ante (Mäateo 22.41-46; Odoca 20.41-44)

³⁵ Pæ wëënedäni adinque Itota ayæ Wængongui oncö ñænæncö yabæcönë ongöninque odömönte apænecantapa.

—Dodäni näni wææ yewæmongainö ante në odömönäni iñomö monö Codito ingantedö ante apænedinque, Awënë Dabii wodi pæingä inongä ingampa, ante quinante änanii, ante pönëminii.³⁶ Iñæmpa Dabii wodi

incæ Wængongui Tæiyæ Waëmö Önöwoca tönö apænedinque,

“Botö Awënë ingante apænedinque Awënë Wængongui incæ iimai ante apænecäimpa.

Bitö botö tömëmæ inö tæ contate ongöñömi, Bitö imite në piñäni inänite bæ tabo ate, bitö önöwa gäänë ongönäni inänite pinä gäwacæbiimpa.”

Ante Awënë Dabii wodi incæ yewæmongacäimpa.

³⁷ Codito inongä ingampa, ante awënë Dabii wodi nanö në angaingä inongä inte edæ adocä Codito iñomö ædö cæte näëmæ Awënë Dabii wodi pæingä inguingää, ante pönengüënë änewëminii. Mänömainö ante Itota odömönte apænecä éñëninque tæiyænäni godongämæ ongönäni waa éñengadänimpa.

Në wææ odömönäni inänite Itota püingampa (Mäateo 23.1-36; Odoca 11.37-54, 20.45-47)

³⁸ Itota godömenque iimai ante odömönte apænecäimpa. “Cædämai, ante wææ ante näni yewæmongainta në ate odömönäni inänite minitö gomö aedäni. Tömënanii iñomö doyæncoo waënoncoo wëñate mongæte todänipa. Waodäni näni godonte æiñomö cægöñönänite wadäni pö bee tëninque tömënanii inänite, Në odömömi, bitö imite waa amönipa, ante apænëdäni éñëninque edæ në odömönäni iñomö nanguï todänipa.

³⁹ Ayæ tömënanii odömöincönë go guidinque tömënanii nämanque ante pönëninque waëmompaa pöni tæ contate todänipa. Ayæ ææmæ becæ godinque tömënanii, Botö täno bete tocæboimpa, ante waëmompaa pöni tæ contate bete todänipa.⁴⁰ Ayæ owæmpoinäni oncö yo mongænte bai cædinque ö æwënanii inte në wææ odömönäni iñomö, Botö imote waa acædänimpa, ante cædinque Wængongui ingante nöingä apænete bai cædinque babæ cædinque wantæpiyæ tededänipa. Tömënanii godömenque näni nanguï pöni pante wæquinque mänömai nämä beyænque ante cædänipa, ante adinque minitö iñomö ee gomö aedäni,” ante Itota wææ angacäimpa.

Owæmpoingä incæ, Wængongui qui, ante godongampa (Odoca 21.1-4)

⁴¹ Mäniñedë Wængongui oncö yabæcönë iñomö, Wængongui qui, ante näni wënoncadedë da wënonänimpa. Mänincönë pö guidinque tömënanii näni da wënoncade gäänë tæ contadinque Itota a ongöñongä nanguï inäni adoyömö pöninque daga daga wënanii acantapa. Pancadäniya nanguï éadäni inte nanguï pöni da wënanii acantapa.⁴² Ayæ a ongöñongä owæmpoingä ömæpocä inte önontamonque incæ mentamonga ænte mämö daga wengantapa.⁴³ Adinque Itota

tömengä nänö nē ēmiñænāni inānite aa pecā pōnāni ate,

—Nāwangä ante apænebo ēñēedāni. Wadāni tōmānāni wædænque pōni godonte bai wī eyepæ daga wēñōnāni iingā owæmpoingā iñōmō ōmæpocā inte wædongā incæte godōmenque nanguī godonte bai godongā abopa. ⁴⁴ Edæ mānīnāni guiquēnē nanguī ēadāni inōnāni inte, Quēwenguinta impa, ante cō cædinque tōmēnāni nāni wīl æinēntaque ayæ ongōintaque godōnānīpa. Iingā ōmæpocā ingā guiquēnē tōmengā nānō quēwenguinta incæ, Wængonguī quī bacæimpa, ante tōmanta edæ daga wengampa, ante Itota apænegacāimpa.

13

Wængonguī oncō ñænæncō bæ tate bacæimpa, ante

(Mäteo 24.1-2; Odoca 21.5-6)

¹ Mānīl Wængonguī oncō ñænæncō yabæcōnē ongonte iinque apænete tao goyongā tōmengā nänö nē ēmiñængā adocanque Itota ingante,

—Awēnē nē Odōmōmi ēñēmi, angantapa. Dicacoo wainca wænōmēnæca wænōmēnæca nāni mænongaincacoo waincō ongō cōwā ae.

² Åñongante edæ,

—Bitō guiquēnē, ñænængade nāni mænongaincō ongō abii. Mānincoo mini acoo incæ tōmanca bæ tadāni wæænca adinque panguimæ panguimæ godinque dica adocaque pōni incæ wænōmēnæca ongōnāmai ingæimpa, ante Itota apænegacāimpa.

Oo iinque bacæimpa, ante æbānō ate ēñenguiī, ante

(Mäteo 24.3-28; Odoca 21.7-24, 17.22-24)

³ Mānīl taodinque Odibowænquidi go æidinque tōmēnāni Wængonguī oncō ñænæncō gomō nāni ayōmō tæ contayongā Pegodo tōnō Tantiago, Wāō tōnō Æntade mānimodāni Itota ingante awēmō ānānitapa. ⁴ Mānīl bitō āninō ante æyedēnō iinque baquī, ante ēñæncæte ante wæmōnīpa. Ayæ, Iīmaī cæbo ate mīnitō, Oo pōni impa, ante ēñæncæmīnīpa, ante Wængonguī æbānō mā cæquingā, ante apænebi ēñēmaimōnīpa.

⁵ Ante wæyōnānite Itota, “Wapiticæ odōmōñōnāni mīnitō wæætē, Mōnō oda cædāmai ingæimpa, ante nāmā wææ aquēnē quēwēmīnī. Edæ iīmaī baquī ī ataqueedāni. ⁶ Edæ wadāni nanguī ināni babæ tedete pōninque botō ēmōwo ante, ‘Botō mānimodō inōmo īmopa,’ ante apænedinque wapiticæ edæ māodāni godinque nanguī ināni tōmēnāni mīñæ

oda cæte wapiticæ gocædānīpa,” ante apænecantapa.

⁷ Ayæ, “Wabæca awēnē tōnō pō bee tēninque wæætēdō wæætē cædapa, ante tededāni ēñæncæmīnīpa. Ayæ wayōmō nāni guēadō guēa cæte wænōnō ante tededāni incæte edæ guīfēnte wædāmai iedāni. Edæ mānīnō botō āninō bai cōwē bacæimpa. Ba incæte mōnō inguipoga quēwēnō iñōmō māñīñedē wīl æmæwo iinque bacæimpa. ⁸ Adobæca quēwēnāni iñōnānite wabæca quēwēnāni ponte bee tēninque guēadō guēa cæquināni inānīpa. Adobæca awēnē odeye nempo quēwēñōnānite wabæca awēnē odeye tontadoidi māmō bee tēninque guēadō guēa cæte wænōnte wænguīnāni inānīpa. Ayæ wayōmō wayōmō goinque pō wæcædānīpa. Ayæ waodāni nāni cæinēnte wænguīnque cænguī incæ tōmāā capo wængæimpa. Mānīl wēñæ mā nantate bai wæwente bamīni incæte mīni godōmenque wæwenguinque ingæimpa.”

⁹ Ante apænedinque Itota godōmenque, “Tōmēmīni nāmā incæ wææ aadedāni. Edæ mīnitō imīnite bæi ongōninque edæ nē apænte ānāni weca māo pædæ godōnāni æncædānīpa. Ayæ godōmenque tōmēnāni odōmōincōnē māo gōnōnāni gongæñōmīni mīnitō imīnite tæi tæi pancædānīpa. Ayæ botō beyænque pancabaa awēñēidi gobedōnadodoidi weca ayæ tōmāmæ awēñēidi odeyēidi weca māo gōnōnāni gongæninque mīnitō botō beyæ apæncæmīnīpa. ¹⁰ Edæ iinque bayedē botō āñedē ayæ badāmai iñōnte, Botō æmo beyænque quēwæncæmīnīpa, ante waa pōni botō apænedō ante tōmāmæ quēwēnāni doyedē ēñæncædānīpa. ¹¹ Iinque māñīñedē mīnitō imīnite nāni bæi ongonte ænte goyedē, Nē apænte ānāni weca ongōninque æbānō ante apænequīmoo, ante wædāmai iedāni. Edæ, Æbānō waa apænequīl,

ante Wængonguī Tæiyæ Waēmō Ōnōwoca apæncæcā ēñēnte ate apæncæmīnīpa. Wīl nāmā pōnēninque wæætē Wængonguī nānō apænedō ēñēninque apæncæmīnīpa.”

¹² “Māñīñedē edæ nāna caya iñōnate adocanque nāēmæ pīininque, Wænoncæ, āninque tōmengā tōñīñacā ingante da godongā gocæcāimpa. Nāna wencaya iñōnate mæmpocā iñōmō nāēmæ pīininque, Wænoncæ, āninque tōmengā wengā ingante da godongā gocæcāimpa. Ayæ wēñænāni incæ wæmpoda inate nāēmæ pīininque māo apænedāni ēñēninque wadāni tōmēnāni wæmpoda inate māmō wænōnāni wæncædāimpā. ¹³ Ayæ, Coditoidi imīnipææ, ante tōmānāni botō ēmōwo beyænque mīnitō imīnite nanguī pīincædānīpa. Pīināni wæwēmīni incæte æcānō iīmæca iinque baganca wæntædāmai inte botō ēmōwo

beyæ piinte badāmai īnaa botō tōmengā ingante æmo beyænque quēwencæcāimpa,” ante Itota apæneantapa.

¹⁴ Ayæ, “Wadāni pō nōmæi bai ōō wadō nāni wo ēwenguimāmo incæ tæiyæ waēmō iñōmō ænte māmō cō cæcædānimpa, ante doyedē yewæmongatimpa. Docā nānō yewæmongainta adinque nē adingā iñōmō tōmengā do ēñēmaingampa. Īncayæ ate cō cædāni ongō adinque edæ māniñedē Oode-abæ quēwēmīni iñōmō ānanquidi do wodiī winonte æibæwedāni. ¹⁵ Ayæ oncōmanca ongōmīni Īninqe māincoo æncæte ante oncōnē wæi guidāmai inte oncōmancaque oncōmancaque wodiī winōmæwedāni. ¹⁶ Ayæ nē gōnea cæmīni Īninqe yacoo æncæte ante oncōnē ocæ ēmæñāmai inte godōmenque wodiī winōmæwedāni. ¹⁷ Māniñōnæ Īninqe bayedē yadēmādā Īnāni tōnō goomæ nē gānōnāni tōnō tōmēnāni nāni wæquimāmo baquinō anguēnē. ¹⁸ Ayæ mīnitō mīni wodiī winonguionæ ante pōnēninque edæ Wængonguī ingante, Wīi edæ cōōnædepo bacæimpa, ante apæneedāni. ¹⁹ Edæ māniñedē waodāni nangui nāni wæwēmāmo nāni angā baquinō anguēnē. Edæ Wængonguī nānō badongaiñedē mānōmai nāni wæwēmāmo bai dæ āñonte ayæ godōmenque ñowo ganca dæ ānompā. Ayæ godōmenque Īninqe baganca mānōmai nāni wæwenguimāmo bai dæ anguiñō anguēnē.”

²⁰ “Edæ wantæpiyæ nāni wæwenguī impa, ante adinque Wængonguī, Mānimpoōnæque edæ wæwencædānimpā, ante pōnōmenque ante ānāmai ingā bai quingānō quēwenguēnē dæ ancædōnānimpā. Incæte Wængonguī, Mānimpodāni Īnānite apænte æmo beyænque nē quēwenguīnāni Īnānīpa, ante nānō apænte ængaināni Īnānite waadete pōnēninque dobæ, Mānimpoōnæque wæwencædānimpā, ante cædinque pōnōmenque angacāimpā,” ante Itota apænegacāimpā.

²¹ Ayæ, Īninqe bayonte æbānō inguūi, apænedinque Itota godōmenque Īmai ante apæneantapa. “Māniñedē wadāni mīnitō ĩmīnite, ‘Īñōmō mōnō Codito ponte ongongā tamēñedāni,’ ante ayæ, ‘Wayōmō a ongongā atamōnīpa,’ ante tededāni ēñēninque edæ mīnitō iñōmō ēñēnāmai ĩmāwedāni. ²² Wadāni māniñedē ponte a ongōninque nāmā incæ ante, Tōmēmo Codito iñōmo ĩmopa, ante babæ ante tedequīnāni. Ayæ, Wængonguī beyæ nē apænebo iñōmo ĩmopa, ante nē babæ ante tedequīnāni. Tōmēnāni, Wængonguī nānō apænte ængaināni incæ æmæwo oda cædinque wapiticæ gocædānimpā, ante cædinque bamōnengæ bai cædinque ōōnædē cæi bai cædinque nō odōmōnte bai cæquīnāni ĩnānīpa. Incæte Wængonguī nē apænte ængaingā inte edæ ee aqingā diyæ

æmæwo oda cædinque wapiticæ goquīnāni. ²³ Edæ Īninqe badāmai ĩñonte botō ñowo do apænebo ēñente cæedāni. Oda cædāmai incæboimpā, ante nāmā wææ aabæwedāni,” ante Itota angacāimpā.

Waobo ēñagaīmo inte botō ĩmai ponte cæcæboimpā, ante

(Māateo 24.29-35, 42, 44; Odoco 21.25-36)

²⁴ Āninqe Itota ayæ godōmenque apænedinque, “Māniī nāni wæwēmāmo nāni angā Īninqe go ate nænque ĩñontobæ wēmō badinque apāicā apādāmai ingæimpā. ²⁵ Nēmoncoo ōōnædē ĩnō wææ tæ wææñinque waa tæ waa tæ wæængæimpā. Ōōnædē tæi ongongaincoo incæ wancæ wancæ cæte bai wapiticæ goquīnō anguēnē. ²⁶ Māniñedē edæ botō Waobo nē ēñagaīmo inte boguimancodē pōninque tæi pōni piñæmo Īninqe edæ ñāō apāite bai waēmō ēmōnte wææmo acædānimpā. ²⁷ Mānōmai pōninque botō anquedoidi Īnānite āmo godinque tōmēnāni æmæñō betamonca æmæñō betamonca boguimā nāni pō goinō godinque inguipoga tōmāne godinque ōōnæ tōmāne godinque Wængonguī nānō apænte ængaināni Īnānite āñete poncædānimpā.”

²⁸ Ante Itota godōmenque apænedinque, “Īgowæ æbānō iwæ, ante odōmōnte apænebo ēñēninque pōnēdāni, angantapa. Tōmēwæ mīiwæ badinque ĩgowæ wayabo tānā nā boca adinque mīnitō, Ōñabo nānō bocainepo inte nænque nāwantedæ baquinque bocapa, ante pōnēninque edæ do ēñēminīpa. ²⁹ Ayæ adobai māniñō botō apænedō bai edæ do ba adinque mīnitō, Waocā nē ēñagaingā do odemō pōni ongōninque inguipoga oo poncæcāimpā, ante ēñencæmīnīpa. ³⁰ Nāwangā āmopa. Nōwomīni ayæ mīmīni quēwēninque wænte godāmai iñōmīni māniñō botō apænedinō bai tōmānō edæ do ĩninqe baquinō anguēnē. ³¹ Edæ ōōnædē ongōñōmō inguipoga tōnō wo ēwente bai dæ ba incæte botō angainonque guiquēnē dæ badāmai inte edæ cōwē tæi ongongæimpā,” angacāimpā.

³² Ayæ, “Māniñōnæ æyedēnō ĩ, ante, Māniñepo ædepodō ĩ, ante ēñencæte ante mīni wædinō ante æcāmenque incæ ēñēnāmai ingampa. Tōmānāni ēñēnāmai iñōnāni edæ Wængonguī anquedoidi incæ ēñēnāmai ĩnānīpa. Wæmpocā Wæmo incæ ēñēnāmai iñōmote Wæmpocā iñōmō tōmengā adocanque incæ edæ nē ēñengā ingampa,” angantapa.

³³ Āninqe ayæ godōmenque apænedinque Itota tōmēnāni Īnānite ĩmai angantapa. “Īninqe, Æyedēnō baquīi, ante ēñēnāmai ĩmīni inte edæ mōnāmai mīmīni wānō cōninque edæ Wængonguī ingante apæneedāni. ³⁴ Botō pōnguīnō iñōmō

waocä äacä nänö cæi bai impa. Ìngä waocä ìñömö wabæca gocæ cædinque, Botö imote nê cædäni nê änanî badinque botö oncö waa aacædänimpa, ante adocanque ingante, Måninganca cæe, wacä ingante edæ, Måninganca cæe, wacä ingante, Måninganca cæe, ante odömöningque odemö wææ a congä ingante, Cöwä ae, äninque wadæ gocä. ³⁵ Ìninque botö nê äcä bai ìñömö mînitö, Mönitö Awënê æyedênö ponguingää, ante êñênämai ìmini inte gæwacæcæ ayaönænenä tawadiya peyedê ñäö ba, æyedemê poncæcäimpa, ante wadö congüenê cæmîni. ³⁶ Edæ, Wîi mö ñömöni ponguingä ingänö angüenê, ante cædinque müimîni quëwëmalîminîpa. ³⁷ Mînitö ìminite botö änö ante tömånäni ìnanite adobäi, Wänö congüenê quëwëmîni,” ante Itota angacäimpa.

14

Itota ingante bæi ongonte ængæïmpa, ante cæddänîpa
(Måateo 26.1-5; Odoca 22.1-2; Wäö 11.45-53)

¹ Mëönaa go ate wodo pänta gogaïönæ bai Patowa ææmæ baquimpa, ante pönëninque oodeoidi ñöwo, Pää yedæ æmpoquï ömæmö ì mönö cængüïönæ inguimpa, ante cædönänîmpa. Måniñedê, Wængonguï quï, ante nê godönäni ñænænäni tönö nê wææ ante odömönäni ìñömö, Mönö awëmö cæte Itota ingante bæi ongonte ænte mäo wæñongæïmpa, ante cædönänîmpa. ² Oo pöni impa, ante wædinque awënëidi,

—Ìñæmpa ææmæntedæ ìñonte wæñömö bai tömånäni ængüi bate Yæ yæ ante pinte cæcædönänîmpa, ante badinque mönö ædö cæte måniñedê cæquïl, ante wægadänîmpa.

Itota ocaboga onquiyængä oguï wapæ gao cæcacampa
(Måateo 26.6-13; Wäö 12.1-8)

³ Itota ìñömö Betänia godinque nê baadingä Timönö oncönê go guite êñacantapa. Guïi êñate cæncöñongä onquiyængä adoyömö pö guicantapa. Tömengä oguï wapæ nâwä nåadodopæ nâni änomæ nänö nanguï godonte ænimæ dica adabatodo waincadedê pe ñiñænte måningä inte ñöwo ænte mämö Itota weca pongantapa. Pöninque tömengä månicade wencade ao mænodinque Itota ocaboga edæ gao cæcacantapa. ⁴ Adinque godongämæ ongönäni pancadänîya ængüi badinque nâni caboque tededinque,

—Ìñæmpa oguï wapæ incæ önonque guënente bai cæcampa töö. ⁵ Edæ waocä adoque wadepo cæte beyæ paga æninque todetiento deënadiota nâni æninta ayæ godömenque æninta beyæ godonte

ængüenemæ ìmæmpa. Godonte ænte bai ömæpodäni ìnanite wæætê godongüenê apa.

Ante nämæneque tededinque onquiyængä ingante nanguï pîinte änanitapa.

⁶ Itota wæætê,

—Quimæ püiwëmîni. Ìngä onquiyængä ìñömö botö imote waa pöni cæcä apa quëwëmîni. Ee aquenê quëwëmîni. ⁷ Edæ ömæpodäni mîni äninäni mînitö weca cöwê quëwënäni adinque mînitö æyedemê tömënäni beyæ waa cæinëmîni inte edæ do waa cæbaimînipa. Botö guiquenê mînitö weca wîi wantæpiyæ ongoncæboimpa. ⁸ Adinque månimæ oguï wapæ botonga gadongadinque tömengä edæ botö baö daga wenguinque eyepæ ìñonte öni paacantapa. Ìninque tömengä nänö cæganca ante do cæcä apa änewëmîni. ⁹ Mînitö ìminite nâwangä ante apænëbopa. Tömämæ æyömömê wadäni nâni êñente toquinque botö imotedö ante apænedäni êñênänîi måningä onquiyængä nänö cædinö ante adobäi tededäni êñente pönencædänîmpa, ante Itota apænëgacäimpa.

Itota ingante odömönte godoncæte ante Codaa cæcampa
(Måateo 26.14-16; Odoca 22.3-6)

¹⁰ Ayæ måniñedê nâni, Dote, äincabo ìñönäni adocanque Codaa Icadote nâni änogä ìñömö, Itota æyömönö ongongåä, ante odömönte pædæ pönömö æncæmîminpa, ante cædinque, Wængonguï quï, ante nê godönäni ñænænäni weca wadæ gocantapa. ¹¹ Godinque tömengä, Ìmaï cæcæboimpa, ante apænecä êñëninque awënëidi nanguï todinque Ao äninque, Cæbi ate tiguïtamö pönömöni æncæbiimpa, änanî. Êñëninque Codaa Ao äninque, Æbänö cæte godö odömömo ængüinänîi, ante cöwä adinque ancaa cægacäimpa.

Awënê Itota päö tönö owæta pönongä cænte bedänîpa

(Måateo 26.17-29; Odoca 22.7-23; Wäö 13.21-30; 1 Coodintoidi 11.23-26)

¹² Oodeoidi päö yedæ æmpoquï ömæmö ì nâni cængüïönæ tæcæ ba ate tömënäni, Wodo pänta gogaïönæ bai Patowa mönö cængüïönæ impa, ante pönente cædinque, Wængonguï quï impa, ante codotedo måniönæ edæ cöwê wæñönönänîmpa. Ìninque måniönæ ìnque ba adinque tömengä nänö nê emiñænäni Itota ingante äninque,

—Ædönö ämi gote mönitö Patowa ææmæ ante cæmönî ate bitö bete cængüimîi.

¹³ Änâni êñëninque Itota tömengä nänö nê emiñænäna mënaa ìnate da godöningque,

—Måniï nanguï nâni quëwëñömö gote taadö goyöminate onguïñængä incæ cad-abodê æpæ iyænte næænte pö beë tengä adinque minatö tömengä miñæ tee empote

goeda. ¹⁴ Tömengä æcönönö guicä adinque manii oncö nê eacä ingante äninque minatö, “Mönö Awënë nê Odömongä inte iimäi angampa. Bitö oncönê guicönê æcönönö ante, Bitö oncö, ante ämi guidinque botö nê emiñænäni tönö botö Patowa ææmæ bete cænguimöni, angampa.” ¹⁵ Ante äñöminate tömengä æmongapaa mäi odömöninque ñæñæncö awæmpa nänö do cönöincö odömongä adinque minatö mänincönê mönö beyæ tömää eyepæ cæcæminaimpa.

¹⁶ Angä eñente tao godinque nani quëwëñömö ponte ayöna, Itota nänö änö bai tömää do cæte ongomp, ante adinque tömäna Patowa ææmæ ante cædatapa.

¹⁷ Gäwadecæ bayonte dote inäni nani cabo Itota miñæ godongämæ pönänitapa. ¹⁸ Ponte tæ contate cæncöñönänte Itota,

—Nawangä ante apænebo eñeedäni. Mimi cabo incæ adocanque botö tönö ñöwo godongämæ cæncongä incæ, Æncædänimpa, ante botö imote odömonte pædæ godonguingä ingampa.

¹⁹ Ante apænecä eñëninque, Wæinente awædö, ante pönëninque tömengä ingante adocanque adocanque äninque tömänäni adoyömö,

—Botö imotedö ante dicæ apænebitawogaa.

²⁰ Äñönäni Itota wæætê,

—Önompö tipæmpoga go mëminaa iñömini adocanque botö tönö guëa adotaca mi cæte cængä incæ tömengä nê cæquiringä ingampa. ²¹ Edæ dodäni Wængongui beyæ ante nani yewæmongai bai cædinque botö Waobo eñagaïmo inte cöwë wænte goquënëmo imodö angüënë. Incæte botö imote nê odömonte godöngä guiquënë tömengä nänö wæquinque cæquiringä ingampa. Mäningä wii eñate bai waa toquënegä incædongäimpa. ²² Ayæ tæcæ cæncöñönäni Itota päo bæi ongonte æninque Wængongui ingante waa ate apænedinque päo pä æninque tömänäni inänite pædæ godö pædæ godö cæcantapa.

—Botö baö bai impa, ante pædæ pönömo æninque minitö Ao ante cæedäni.

²³ Äninque ayæ bequimæ owætaca bæi ongote æninque Wængongui ingante waa ate apænedinque pædæ godöninque nënemocä æninque tömänäni bedänitapa. ²⁴ Beyönäni tömänäni inänite apænedinque,

—Botö wepæ iimæ bai impa. Wængongui do apænedinque, Botö pönö cæbo ate minitö Ao ämini ininque mönö godongämæ waa cæte quëwengæimpa, angacäimpa. Nöwo adobai miñe äninque apænebopa. Botö wepæ ante Ao ante æmini inte mönö godongämæ waa cæte quëwengæimpa. Edæ nangui inäni beyæ gowequimæ impa. ²⁵ Botö iñömö Awënë Odeye badinque ocæ æmænte pöninque miimæ botö beganca

mänimæ yowepæ ñöwo æmæwo bebo tamëñedäni, ante Itota apænegacäimpa.

Pegodo incæ, Dicæ abogaa, apænequiringä ingampa, ante

(Mäateo 26.30-35; Odoca 22.31-34; Wäo 13.36-38)

²⁶ Ayæ Wængongui ingante ämotamini ante tao godinque Odibowænquidi godänitapa. ²⁷ Goyönänte Itota iimäi ante apænecantapa.

—Dodäni Wængongui beyæ yewæmöninque, “Nê aadingä ingante tacabo dæ wængä ate cæningäidi obegaidi wæætê panguimæ goquimpa,” ante nani yewæmonte angainö bai cædinque botö dæ ämo beyæ guingo imonte wædinque tömämini edæ näwæ goquimäni iminipa, ante awædö. ²⁸ Panguimæ gomini incæte botö edæ ñäni ömæmonte Gadideabæ täno gote a ongöñömo minitö ayæ pöedäni.

²⁹ Angä eñente wædinque Pegodo guiquënë,

—Iñæmpa dæ ämi beyæ tömänäni guingo imonte badinque panguimæ godäni incæte edæ botö guiquënë cöwë panguimæ godämai incæboimpa.

³⁰ Äñongante,

—Bitö imite nawangä ante apænebo eñë. Nöwoönæ woyowotæ incæ tawadiya mempoga pedämai iñonte bitö iñömö botö imotedö ante wadö ante apænedinque, Dicæ abogaa, ante mempoga go adopoque anguimi imipa.

³¹ Angä eñente wædinque Pegodo wæætê,

—Iñæmpa botö bitö tönö wæmo incæte mäninö ante cöwë änämai incæboimpa.

Ante nangui äñongä tömänäni adodö ante apænegadänimpa.

Guetëmäni iñömö Itota Wængongui ingante apænecampa

(Mäateo 26.36-46; Odoca 22.39-46)

³² Mänii godinque yabæ incæ Guetëmäni nani äñömö pöninque tömengä miñæ nê godäni inänite Itota,

—Tæ contate ongöñömini botö godömenque gote Wængongui ingante apænete pömoedäni.

³³ Äninque Pegodo Tantiago Wäo mänimpodänique inänite ænte mäocä goyönäni Itota iñömö nangui wæwente badinque guifente wæcantapa. ³⁴ Ayæ tömänäni inänite,

—Botö wæwëmämo entawëninque pæmænte wæte wængui wædö. Minitö guiquënë tæ contadinque ëamonca wänö cöedäni.

³⁵ Äninque wædæ pö gote ædæ wæænte guidömëmæ ñongæninque Wængongui ingante, Bitö Ao ämi botö caate wæquintedæ wii ba ate waa tobaïmpa. ³⁶ Äninque,

“Mæmpo, botō Wæmpo eñēmi. Bitō tæi piñæmi inōmi ïmpa. Bitō tī nā wænguimæ bai ö ænte bai cædinque botō ïmote edæ, Wæñāmaï incæbiimpa, ämi ïninque botō edæ waa tobaïmpa. Incæte botō äñonō bai wii cædinque wæætē tōmēmi äñonō bai cæe,” ämpa.

³⁷ Äninque tōmēnāni weca adodō ponte ayongā mö ñonāni adinque tōmengā Pegodo ingante,

—Timōnō edæ mömitawo. Botō tōnō wänō conguēnēmi incæ bitō adoque oda ganca incæ wii aacōmii. ³⁸ Edæ, Mimōno waa cæinēmōnipa, ante ewocayōmīni baō aqūiñō eñāmīni inte wæntæye bamīnipa. ïninque edæ mīnitō wänō cōninque nāmā beyænque Wængongui ingante apænedinque edæ, Wii wænæ wænæ cæinēmōni bacēmōnipa, ante apæneedāni.

³⁹ Äninque Itota wæætē wadæ godinque wēenē nānō äñinō bai apænedinque Wængongui ingante adodō ante apænecantapa. ⁴⁰ Ayæ adodō ponte ayongā möwo möinente ædo ædo cædinque mö ñonāni acantapa. Acampa, ante wædinque tōmēnāni, Æbänō anguiñō, äninque edæ pæ wēenedānitapa. ⁴¹ Itota wæætē mempoga go adopoque gote apænedinque ñowo adodō pōninque edæ tōmēnāni ïñānite,

—Ayæ edæ guēmante mö ñōmīni. Edæ idæwaa. Ñowo ïnque cætimpa. Botō Waobo eñagaïmo inte edæ botō wæwenguionæ do edæ ba ïninque nē wænæ wænæ cædāni nempo nē pædæ godōmoncæ cædingā ïñōmō botō ïmote do odōmonte godongāi ataque-edāni. ⁴² Ñowo edæ ængæ gantidinque mönō gocæïmpa. Botō ïmo nē odōmonte godonguingā ïñōmō edæ obo pōni pongā tamēñedāni, angacäïmpa.

Itota ingante bæi ongonte ænte godānipa
(Mäteo 26.47-56; Odoca 22.47-53; Wäo 18.2-11)

⁴³ Ayæ apæneyongā edæ Codaa wodi tōmēnāni nāni, Dote, ante gocabo adocabo ïningā incæ ñowo pongantapa. Do ïñōmō, Wængongui qui, ante nē godōnāni ñænænāni tōnō nē wææ odōmōnāni tōnō nē aadāni nāni Picæncabo tōnō wadāni ïñānite, Codaa miñæ goedāni, ante da godōnōnānipa. Ñowo ïñōmō tōmēnāni nāni nē da godōnāni inte tæiyænāni yaēmē næænte canta næænte Codaa miñæ pōñānitapa. ⁴⁴ Doyedē ïñōmō nē odōmonte godoncæ cæcā Codaa ïñōmō tōmengā miñæ poncæ cædāni ïñānite ïmaï ante wēenēñedē apænedingā ïngāïmpa. “Botō odōmonte queē bemōmo adinque mīnitō wæætē, Tōmengā ingampa, ante adinque tōmengā ingante bæi ongonte æninque wææ cæte

māomīni gocæcäïmpa.” ⁴⁵ Ante do äningā inte Codaa ïñōmō ñowo Itota weca pōninque, —Awēñē nē Odōmōmi ïmi.

Äninque edæ waa cæte bai edæ queē bemongantapa. ⁴⁶ Māñōmaï queē bemonte odōmongā adinque tōmengā miñæ pōñāni incæ Itota ingante pædæ gopo bæi ongonte æñānitapa.

⁴⁷ Wængongui qui, ante nē godongā ñænængā pōni ïngā ingante nē cæcā incæ māñiñōmō ponte a ongongā adinque Itota gāänē ongongā adocanque pædæ guipote yaēmē o togænte æninque mäningā nē cæcā ingante tæi pāninque öñōmonca wangō tamoncacantapa. ⁴⁸ Adinque Itota ïñōmō ñowo pōñāni ïñānite,

—Mīnitō ïñæmpa, Bitō nē ö æñimi ïmpa, ante bai cædinque botō ïmote canta tōnō yaēmē næænte ö æncæte ante pōmīni awædō. ⁴⁹ ïñæmpa Wængongui oncō ñænæncōnē yabæcōnē ïmō ïñō ïmō ïñō apæncōninque botō mīnitō weca a ongōñōmote mīnitō edæ bæi ongōñāmaï ee amīnitapa tōō. Incæte Wængongui angā eñente nāni yewæmongainō bai ïnque baquinque ante cæcæïmpa.

⁵⁰ Ante apæneyongante tōmānāni edæ ëmō cæte wodi wīñōnānitapa. ⁵¹ Adocanque edëningā guiquēñē ömaacā inte yabæcooque nīnocoo nāni ancooque pōnō wīniyate Itota miñæ gocantapa. Tōmengā ingante yao ongōñānitapa. ⁵² Adinque tōmengā wæætē gā tadongate weocoo ömaacā wodi wīñongacäïmpa.

Nē Apænte nāni Änoncabo weca Itota ongongampa
(Mäteo 26.57-68; Odoca 22.54-55, 63-71; Wäo 18.12-14, 19-24)

⁵³ Wængongui qui, ante nē godongā ñænængā pōni ïngā weca ænte godinque Itota ingante gōñōnāni gongænte ongongantapa. Ayæ, Wængongui qui, ante nē godōnāni ñænænāni tōnō nē aadāni nāni Picæncabo tōnō nē wææ odōmōnāni tōnō tōmānāni pō bee bee tente godongāmæ ongōñānitapa. ⁵⁴ Pegodo guiquēñē tōmengā miñæ ayæ ayæ godinque, Wængongui qui, ante nē godongā ñænængā pōni ïngā oncō yacōmoyæ ïñōmō wäänē guicantapa. Māñiñōmō guidinque tōmengā wææ wāñōnāni tōnō gongapamō tæ contate a ootocongantapa.

⁵⁵ Wængongui qui, ante nē godōnāni ñænænāni tōnō nē Apænte nāni Änoncabo tōmānāni, Möñō apænte ante wænñōmō wæncæcäïmpa, ante cædinque, Itota nāñō wænguinque wænæ wænæ cæcā ingampa, ante æcāñō nē adingā inte godō anguingā, ante ancaa diqui diqui miñōñāni māñōmaïñō ante nē angüëngā edæ dæ angantapa. ⁵⁶ Edæ nangui ïñāni pōninque babæ apænedinque, Māñōmaï cæcā

atamönipa, ante apænedäni incæte adoyömö apænedämaï inäni inte wapiticæ wapiticæ änänitapa. ⁵⁷ Ayæ ate pancadäniya ængæ gantidinqe, Tömengä ingante apænte angæimpa, ante cædinque babæ wapiticæ ante äninque,

⁵⁸ —Iingä Iïmaï ante apæneçä eñentamönipa. “Iincö Wængongui tæiyæ waëmö oncö waodäni önompoca näni mænönincö incæte botö cæbo wo tænguimæ wæænguimpa. Ayæ meönaa go adoönæque iñonte wacö wii önompoca mænonguincö wæætë mænoncæboimpa,” ante apæneçä eñentamönipa töö, ante tededäni.

⁵⁹ Incæte adodeque ante apænedinque adoyömö äninque tömënäni godömenque äninque wadö wadö wapiticæ ante apænedänitapa.

⁶⁰ Eñente wædinque, Wængongui qui, ante nê godongä ñænængä pöni inongä guiquënë godongämæ ongönäni tönö tæcæguedë dibæ ongonte ængæ gantidinqe Itota ingante,

—Iñæmpa pæ wëenebii. Bitö æbänö cæbitapa, ante iñäni näni äninö ante bitö æbänö ämii.

⁶¹ Ante äñongante edæ Itota cöwë änämaï pæ wëeneçä. Adinque nê godongä ñænængä pöni inongä wæætë godö äninque,

—Wængongui mönö Waëmö inongä Wengä mönö Codito inongä ingampa. Bitö iñæmpa mänimidö inömi imitawo.

⁶² Äñongante Itota iñömö,

—Ao. Mänimodö inömo imopa. Iinque iincayæ ate botö Waobo eñagaïmo inte Wængongui nê Tæi Piñængä ingä tömëmængä inö tæ contabo adinque munitö ayæ ate botö öönædë boguimancodë pömo acæminimpa.

⁶³ Ante apæneçä eñente wædinque nê godongä ñænængä pöni inongä iñömö piinte badinque, Eñente awædö, ante bai cædinque edæ nämä weocoo wänä ñæninque,

—Idæwaa, angantapa. Nöwo wacä ingante, Itota wënæ wënæ cæcä atabopa, ante nê äincædongä ingante godömenque diqui diqui minämaï ingæimpa. ⁶⁴ Tömengä nämä Wængongui Wengä inte bai babæ godö tedewengampa töö. Iinque edæ tömengä babæ nänö änewëntö ante do eñëmini inte edæ æbänö ante pönëmini.

Ante äñongante nê apænte änäni tömänäni edæ, Nänö pante wænguinque edæ änewengampa töö.

⁶⁵ Ante apænte änäni ate edæ pancadäniya Itota tömengäa towæ tänongadinque tömengä awinca weocoota pönö ñäne cæmöninque tæi tæi päninque tömengä ingante,

—Æcänö pänaa, ante Wængongui beyænque apænebi eñëmönie.

Ante badete toyönäni wææ wänönäni guiquënë tömengä ingante bæi ongonte tæi tæi pangadänimpa.

Pegodo inçæ, Dicæ abogaa, angampa

(Mäteo 26.69-75; Odoca 22.56-62; Wäö 18.15-18, 25-29)

⁶⁶ Ayæ Pegodo guiquënë yæipodë yacömönäa guii contate ongöñongä onquiyængä, Wængongui qui, ante nê godongä ñænængä pöni inongä ingante nê cæcä iñömö adoyömö pö guicantapa. ⁶⁷ Ponte ayongä Pegodo gongapamö ootocæ cæcä adinque onquiyængä ædæmö cöwä adinque,

—Mäningä Näatadeta iñömö quëwëningä Itota tönö bitö guëa cægömitapa töö.

⁶⁸ Angä eñente wædinque,

—Dicæ. Bitö äno ante æbänö ämii, ante dicæ eñëmogaa.

Äninque tao yabædemö gäänë gongæñongä tawadiya wëenengä petapa. ⁶⁹ Ayæ wæætë Pegodo ingante adinque onquiyængä iñömö godongämæ ongönäni inänite,

—Mäningä adocabodäni iningä inte ongonä ataqeedäni.

⁷⁰ Ante apæneyongä Pegodo wæætë, Dicæ bitö angänö imogaa, angantapa. Ayæ wantæ ate mäninömmö ongönäni adobai,

—Iñæmpa Gadideabæ quëwënimii inte bitö näwangä Itota tönö tee empo nê pömi imipa töö.

⁷¹ Änäni eñente wædinque Pegodo wæætë, Botö Wængongui eñëñongä nöingä ämpa, ante Wængongui emöwo ante babæ tedewëninque tömënäni inänite wæætë,

—Mäni angantedö ingante dicæ abogaa. Dicæ abo ante bai änewëminipa töö.

⁷² Ante tæcæ änewëñongä iñontobæ tawadiya ayængä petapa. Ayængä pe eñente wædinque Pegodo Itota nänö äninö ante pönengantapa. Itota do iñömö, “Tawadiya mempoga pedämaï iñonte bitö botö imotedö ante wadö ante apænedinque, Dicæ abogaa, ante edæ mempoga go adopoque anguimi imipa,” änongäimpa. Ante pönente wædinque Pegodo, Nöwo nänö pequinque do pecampa, ante wædinque Ca ca wægacäimpa.

15

Itota inçæ Pidato weca ongongampa

(Mäteo 27.1-2, 11-14; Odoca 23.1-5; Wäö 18.28-38)

¹ Wængongui qui, ante nê godönäni ñænænäni tönö nê aadäni näni Picæncabo tönö nê wææ odömönäni tönö tömënäni iñömö nê änäni inönäni inte oodeoidi näni nê Apænte Änoncabo inönänimpa. Iinque mänii näö bayonte tömënäni, Æbänö cæquii, ante pönente wædinque godongämæ pönëcöninque Ao äninque Itota ingante goto winte töö æmænte ænte godinque odömäno awënë

Pidato wodi nempo máo pædæ godönäni ængantapa. ² Pidato guiquënë tömengä ingante,

—Oodeoidi Awënë Odeyebi bitö imitawoo.

Äñongante,

—Bitö tömëmi äno bai botö mänimodö imopa, ante Itota angantapa.

³ Wængongui qui, ante nê godönäni ñænænäni guiquënë, Ìngä Itota Ìñömö wënæ wënæ cæcampa, ante wadö wadö ante pïinique Pidato ingante ancaa äñänitapa.

⁴ Äñäni ëñente wædinque Pidato wæætë Itota ingante,

—Ìñæmpa pæ wëenebii. Bitö æpogadö wënæ wënæ cæbi imipa, ante nangui äñäni apa quëwëë.

⁵ Äñongante Itota tömënäni nani äniñö ante cöwë apænedämaï ingä adinque awënë gobedönadodo wæætë, Quiëmë bai pæ wëeneccä awädö, ante guñente wægacäimpa.

Itota wæncæcäimpa, äñänipa

(*Mäteo 27.15-31; Odoca 23.13-25; Wäö 18.38-40, 19.1-16*)

⁶ Mänimæ awënë gobedönadodo mänifedë wadepo Ìñö wadepo Ìñö cöwë Ìmaï cædongäimpa. Oodeoidi ææmæ cæyönänite gobedönadodo Ìñömö, Nê tee mönete ongönäni Ìnänite adinque minitö æcänö ingante ämïni ñimpo cæbo goquingä, ante äñäni ëñëninque tömengä tömënäni nani äningä adocanque ingante ñimpo cæcä godongäimpa. ⁷ Doyedë wadäni ænguï badinque, Awënë ingante wido cæcæimpa, ante cædinque wænonte cæyönäni adocanque Badabato nani änogä tömënäni tönö godongämæ cædongä Ìnogäimpa. Ìninque awënëidi nê wiwa cædäni Ìnänite bæi ongonte goto winäni ongöñönäni Badabato adobai tömënäni tönö godongämæ tee mömænete ongönongäimpa. ⁸ Ìninque ñöwo Ìñömö wadäni tæiyænäni Pidato weca pöninque, Cöwë bitö cædö bai ñöwo adobai monitö beyæ cæquïmi ante wæmönipa.

⁹ Äñäni ëñëninque Pidato Ìñömö,

—Oodeoidi Awënë Odeye ingante pönö ñimpo cæbo abæ tawængä ænguïminii. Äbänö cæbo ænguïminii.

¹⁰ Edæ do Ìñömö Itota gomonga cæcä ate wædinque, Wængongui qui, ante nê godönäni ñænænäni incæ tömengä ingante piinte adönäimpa. Mäninö beyænque tömënäni Itota ingante bæi ongonte botö nempo ænte mämö pædæ pönönänimpa. Ante pönente wædinque Pidato, Oodeoidi Awënë Odeye ingante ñimpo cæbo goquingä, äminitawoo, ante ñöwo angantapa. ¹¹ Ìninque, Wængongui qui, ante nê godönäni ñænænäni guiquënë godongämæ ongönäni Ìnänite apænedinque, Minitö Pidato ingante Ìmaï äedäni, äñänitapa. Äñäni ëñëninque oodeoidi wæætë Pidato

ingante, Wii bitö änogänö ante ämönipa. Wæætë Badabato ingante ñimpo cæbi gocæe, ante äñäni. ¹² Èñëninque Pidato godö äninque,

—Ìninque oodeoidi Awënë Odeye mïni änogä ingante æbänö cæquïmoo, ante äminii.

¹³ Äñongante tömënäni ogæ tededinque,

—Awæ ñænquedimæ ämi cæte wænönäni wængæe töö.

¹⁴ Äñäni ëñente wædinque Pidato,

—Ìñæmpa quinö wënæ wënæ cæcantawoo.

Äñongante godömenque yedæ äninque adodö,

—Ämi awäa timpote wænönäni wængæe töö.

¹⁵ Ancaa änewëñönäni Pidato Ìñömö, Mäninäni pünämaï piyænë cæcædänimpa, ante cædinque Badabato nani äningä ingante godö ñimpo cædinque tömënäni nempo pædæ godongä æñänitapa. Wæætë edæ Itota ingante edæ Pidato wodi angä æmontai badöimneca tæi tæi pänäni ate ñænque quepote awäa nani gönonguinque edæ da godongä ænte godänitapa.

¹⁶ Pædæ godongä ate nê tontadoidi tömengä ingante töö æmænte wadæ godinque awënë gobedönadodo oncönë Podætodio nani ancönë mangui guiyongä tontadoidi bacabo Itota weca godongämæ äñete pönänitapa. ¹⁷ Pöninque tömënäni, Awënë Ìmi inte awënë weocoo wëñacæbiimpa, ante bai cædinque badete todinque Itota ingante wæætë opatawæ ëmoncoo pönö da wëñadinque daa mongæmenca æninque que cædinque, Awënë poganta, ante bai pönö daga wencadänitapa. ¹⁸ Ayæ Yæ yæ äninque,

—Badogaa, bitö oodeo awënë odeyebi imipææ.

¹⁹ Ante badete todinque cæwipaca ancaa tæi tæi pancadinque tömengä towæ towæ tänogadinque da guicapote ædæ wææninque, Bitö Tæiyæ Waëmö Awënë Ìmi amönipa, ante bai badete todänitapa. ²⁰ Ayæ Ìnque badete todinque tömënäni opatawæ ëmoncoo gä tadogadinque tömengä nämä weocoo da wëñadänitapa. Ayæ edæ tömengä ingante awæ timpote gönoncæte ante töö æmænte ænte tao mäodäni gogacäimpa.

Itota ingante awäa timpodäni wængampa

(*Mäteo 27.32-44; Odoca 23.26-43; Wäö 19.17-27*)

²¹ Mänifedë Tidëne quëwënongä Timönö guiquënë Adecantodo tönö Odopo tömëna wæmpo Ìnogä inte tömengä yabæque gote pönongäimpa. Ìninque Itota ingante ænte godinque ayönäni mäningä Timönö ñöwo wodo tebæ gocæe cædinque pongä adänitapa.

Īninqe tontadoidi, Bitō ægodōe. Itota ingante mōni timpoquiwæ ænte mongænte goe, ānāni ænte mongænte gocantapa.

²² Mānōmaī godinque Godogota nāni āñōmō mōnō tededō “Ocatāinō” ĩñōmō Itota ingante ænte pōnānitapa. ²³ Māniññōmō pōnāni ate wadāni, Nantate beyæ becæcāimpa, ante cædinque biinōmæ nāni wædænque tī nāmæ tōnō mūdapæ nāni ānōmæ adoyōmō wempo cædēninque pædæ pōnō cæyōnāni tōmengā ōnonque yædæ bedinque edæ bedāmaī ingantapa. ²⁴ Ayæ tōmengā ingante awæ ñænquedimæ nāni ænte pōniwāa tōō godōninque pōnō timpodinqe wæwæ tiwadinqe ængæ gantidēnānitapa. Ængæ gantidēnāni ate wægōñongā tōmēnāni wæætē tōmengā weocoo ĩni ante, Æcānō quınca nō ta adinque tōmengā mānincōo æncæcāimpa, ante wææntodōninque adocooque adocooque ænānitapa.

²⁵ Edæ nænque tōmantadæ æñonte māniñedē incæ tōmengā ingante ĩnque timpote edæ ængæ gantidēnāni wægongacāimpa. ²⁶ Ayæ, Itota wæncæcāimpa, ante quīnante apænte ānāni, ante tōmānāni ponte adinque eñæcædānimpa, ante yewæmōninque, “Oodeoidi Awēnē Odeye ĩngā ingampa,” ante yewæmōninque awæmpaa wo cædānitapa. ²⁷ Ayæ wada nē ō ænte quēwēnina ĩnate adoyedē tōmengā tōnō adocanque tōmēmæ ĩnō adocanque dipæmæ ĩnō godō timpote gantidēdāni wægongadāimpa. ²⁸ Īninqe, Nē eñēnāmaī cædāni nāni cabo tōnō tōmengā adocā ingampa, ante Wængonguī angā eñente nāni yewæmongainō bai ñōwo ĩnque bagatimpa.

²⁹ Ayæ wodo pænta nē godāni guiquēnē Itota ingante godō babæ ante badete todinque pica pica cædinque,

—Bitō ĩñæmpa Wængonguī tæiyæ waēmō oncō incæ bæ tate wo ewēninque mēōnaa go adōōnæque ĩñonte do mænonguūmi ĩnte edæ, ³⁰ o togæmpote o togæwate tī wææninque edæ quēwēmāwe.

³¹ Ayæ, Wængonguī quī, ante nē godōnāni ñænænāni tōnō nē wææ odōmōnāni adobai nāni cabo nāmāneque godongāmæ badete todinque,

—Tōmengā, Wadāni quēwencædānimpa, ante waa cæcantawoo. Nōwo ĩñæmpa. Nāmā beyænque eyepæ cæcampa diyæ quēwenguingā. ³² Idægoidi awēnē odeye ĩngā ĩninqe tōmengā tī wæænte gocā adinque mōnitō wæætē, Tōmengā nāwā Codito ingampa, ante pōnēmaī wædō.

Ante badete toyōnāni nē ō æna tōmengā tōnō godongāmæ timpote wægōna incæ adobai Itota ingante piinque wēnæ wēnæ ante badete togadāimpa.

Itota wængampa

(Māateo 27.45-56; Odoca 23.44-49; Wāō 19.28-30)

³³ Tæcæbæcā pōni bayō tōmāmæ ĩñontobæ wēmō badinque ayæ ayaōnāa wæiganca mæ māmonte bai ĩnimpa. ³⁴ Īninqe ayaōnāa wæiyonte Itota nangui pōni yedæ āninqe, “Edoi, Edoi, nēma tabatāni,” āninqe mōnō tededō, “Botō Wængonguīñaa, botō Wængonguīñaa, ædō cæte botō ĩmote emō cæte gobiyaa.”

³⁵ Ante wæcā eñēninque godāmæ ongōnāni guiquēnē,

—Æ. Ediya wodi ingante aa pecā apa.

³⁶ Āñōnāni adocanque do pogodo gote ōnætāmō ænte pōninque biinōmæ bai ōnōmænque æninqe aa bedonte nææninque edæ, Becæcāimpa, ante cædinque cæwipaca pædæ æænongantapa.

—Ee aquēnē quēwēdāni. Ediya wabānō ponte o togænte pædæ wæænongā abāimpa.

³⁷ Angā ate Itota ĩñōmō wæætē ogæ āninqe edæ æmæwo guēmāninque wægacāimpa. ³⁸ Īninqe edæ Wængonguī tæiyæ waēmōncōnē weocoo odemō nāni wææ wodōincōo adoyedē ōnōnæca ĩnō tæcæguedē pōni tænguimæ wææntapa. ³⁹ Mānōmaī ogæ āninqe do wægā adinque tontadoidi awēnē capitāō guiquēnē,

—Nāwangā ĩmpa. Īngā ĩñōmō Wængonguī Wengā ĩngainō ante pōnenguēnē, angacāimpa.

⁴⁰ Ayæ onquiyænāni Māadiya Māagadadēnā nāni ānongā, Otite tōnō Tantiagamō badā Māadiya, Tadōmee, mānimpodāni adobai oo gote gomō a ongōnānitapa. ⁴¹ Tōmēnāni ĩñōmō Gadideabæ quēwengāñedē Itota miñæ gote pōnō waa cædināni ĩnte ñōwo pō gobæ ongōninque pōmō adānitapa. Itota Eedotadēē pō æñingante wadāni onquiyænānīque godongāmæ tee empote pōnināni ĩnte ñōwo pōninque a ongōnānitapa.

Itota wodi baō ĩni māo daga wēnānipa

(Māateo 27.57-61; Odoca 23.50-56; Wāō 19.38-42)

⁴² Oodeoidi nāni, Gāwadecæ ba ate guēmanguīōnæ ĩnguimpa, ante nāni tāno cæōnæ ĩngatimpa. Īninqe gāwadecæ oo ba ate wædinque, ⁴³ Adimatea ĩñōmō quēwēningā ĩnte Oote, Wængonguī Awēnē Odeye nempo mōnō æyedēnō quēwengæĭmpa, ante wānō conte bai quēwēnongāimpa. Tōmengā oodeoidi nāni Apænte Āncabo adocā ĩngā ĩnte ñænængā ĩngāimpa. Tōmengā ĩñōmō Pidato weca ñōwo guīñēnāmaī pō guīdinque, Itota wodi baō pōnōmi ænte wēmoe, angantapa. ⁴⁴ Angā eñēninque Pidato, Wa. Wabānō wægāi, ante pōnente wædinque awēnē capitāō ĩngante āñete

pongá adinque, Do wængái. ⁴⁵ Añongante edæ, Dobæ wængáimpa, ante apæneçá ëñëningue Pidato wæætë Ootee ingante, Itota wodi baö ini o togænte æmñawe. ⁴⁶ Angá ëñëningue Ootee iñömö edæ waëmö weocoo ñño nani ánoncoo godonte æninque Itota wodi baö ini wi æmpote wææ wi æwadinque pædæ wææñonte ænte gocantapa. Ayæ mänincoo wini wini caate dicamontaa wointatodë guidö ñö cæte daga wëninque dicabo edæ da pæñæ pönö tee mönogacáimpa. ⁴⁷ Mänömaí cæyongante Máadiya Máagadadëná nani ánogá tönö Otite badá Máadiya mänimpodaque tómengá ingante nani da wëniñömö adatapa.

16

Itota do wæningá inte ñani ömæmonte quëwengampa

(Máateo 28.1-10; Odoca 24.1-12; Wäö 20.1-10)

¹ Tömëñani guëmanguïönæ ïnque go ate Máadiya Máagadadëná nani ánogá tönö Tantiago badá Máadiya tönö Tadömee tömëñani iñömö, Itota wodi baö öni pæcæïmpa, ante cædinque ogui waqui godonte æñánitapa. ² Ænte ate wacá tëmána baquinque ñäö tæcæ bayonte iñáni do godinque nænque tæcæ mæ awæ nanö tamöñedë Itota wodido pöningue, ³ námæneque áñánitapa.

—Dicabo nani moncadodínca æcänö tæï piñængá inte pönö da tæñæna ate mönö guuite aquüí. ⁴ Ante wædinque go gongænte pömo ayönáni dicabo ñæñængade pöni nani áninca incæ dobæ dicabo ñæñængade pöni do da tæñæí a öñö adánitapa. ⁵ Adinque tómengá wodido wäänë guuite ayönáni edëningá baí ingá doyæncoo náamænta émoncoo wëñate tömëmæ iñö tæ contate a ongongá adinque onquiyænáni wæætë edæ ancaí guiñente wæðánitapa. ⁶ Edëningá iñömö,

—Guiñente wæðamáí iedáni. Minitö, Itota Náatadeta quëwëningá ingante edæ wadáni awæ timpodáni ate në wæningá ingante edæ diqui diqui mímíni awæðö. Tómengá edæ dobæ ñani ömæmonte tao gocáimpa. Iñömö edæ dæ angampa. Iñtodë nanö öñontatodë iñömö wödi öñontatoque ií ataqueedáni. ⁷ Ayæ Pegodo tönö tómengá nanö në ëmiñænínáni tömännani iñánite gode ante apænedinque munitö në adímíni inte iímaíno ante apæneçæmínimpa. “Itota iñömö táno Gadideabæ godinque a ongöñongante munitö adoyömö godinque tómengá nanö áñinö baí godinque tómengá ingante acæmínimpa,” ante gote apænedáni.

⁸ Ante apæneçá ëñëningue, Æbánö ante mänömaí angää, ante ancaí guiñente do do wæate wædinque onquiyænáni iñömö Itota wodido abæ tawæ tao wödi winöñánitapa.

Guiñente wæðönáni inte tömëñani wadáni iñánite beç téninque apænedamáí pæ wëënegadánimpa.

Itota ingante Máadiya Máagadadëná acampa

(Wäö 20.11-18)

⁹ Itota tömëñani nani guëmániönæ go ate iímö baänæque do ñani ömæmonte pó a ongöñongante Máadiya Máagadadëná tánocá agacáimpa. Ìngá onquiyængá iñömö wëëneñedë wëñæidi tæte ganca iñáni ënempoyongante Itota wido cædongáimpa. ¹⁰ Nöwo iñömö Itota miñæ nani quëwëñincabo ayæ ca wæwëñönánite Máadiya Máagadadëná incæ tömëñani iñánite máo apæneçantapa. ¹¹ Itota ayæ mlingá ingá atabopa, ante apæneçá ëñëningue tömëñani wíi pönëñanique ongongadánimpa.

Wada tómengá nanö në ëmiñænína Itota ingante adapa

(Odoca 24.13-35)

¹² Mänömaí wíi pönëñani ate tömëñani nani Itota miñæ godincabo incæ mënaa idömæ gote ayóna Itota incæ wacá baí bate cægongá adatapa. ¹³ Ate wædinque tömëna wadæ godinque Itota miñæ nani godincabo wadáni iñánite apænedinque, Mänömaí cægongá atamönapa, ána ëñëningue edæ cöwë pönëñamáí ingadánimpa.

Tómengá nanö da godönínáni iñánite Itota angampa

(Máateo 28.16-20; Odoca 24.36-49; Wäö 20.19-23)

¹⁴ Ayæ ate onte ganca iñáni nani Itota miñæ godincabo cænte tedete a cöñönáni Itota pó a ongongá adánitapa. Tómengá iñömö, Minitö pönëegade impa. Wadáni, Itota do edæ ñani ömæmonte cægongá atamönipa, ante apænedáni ëñëningue munitö mímö ömæðëmíni inte wíi pönëmíni, ante Itota piingacáimpa.

¹⁵ Ayæ tömëñani iñánite, “Wængongui nanö badongaináni inguipoga tömäo quëwëñani iñönánite munitö botö imotedö ante máo tömännani iñánite watapæ apænemíni ëñencæðánimpa. ¹⁶ Edæ æcänö wede pönëningue æpænë guüida tómengá botö godö æmo beyænque quëwencæcáimpa. Wæætë në pönëñamáí ingá guiquenë tómengá nanö apænte pante wæquinque pönëñamáí ingampa. ¹⁷ Botö cæbo ate në pönëñani adobaí edæ iímaí má cæðáni adinque wadáni do ëñencæðánimpa. Botö ëmowo apænedinque tömëñani wëñæidi iñánite wido cæcæðánimpa. Ayæ wadáni tömëñani tededö má tedecæðánimpa. ¹⁸ Ayæ tæntæ bæi ongónáni incæte wænguímæ bedáni incæte wëñæ wëñæ badamáí incæðánimpa. Ayæ caate wæðáni iñánite

gampodäni ate do waa bacædänimpa,” ante Itota apænegacäimpa.

*Itota incæ öönæde æicampa
(Odoca 24.50-53)*

¹⁹ Ìinque tømênäni Ìnänite apæneçä ëñënäni ate edæ Wængonguï öönæde ængö çæçä æidinqe Wængonguï tømengä nänö tømëmæ inö mönö Awënë Itota Ìñömö tæ contagacäimpa. ²⁰ Ìinque tømengä nänö ëmìñænìnäni wæætë edæ tømämæ wadæ godinqe wabæca mäo wabæca mäo apænedäni ëñënanitapa. Mönö Awënë incæ çæçä ate tømênäni mä çädäni adinqe në ëñënäni wæætë, Nö impa, ante wægädänimpa. Mäninque ante yewæmonte impa.

Itota Codito ingantedö ante Odoca nänö watapæ ante yewæmongainta

Odoca imo yewæmömopa, ante

¹ Nöwodäni nangui inäni incæ, Mönitö weca æbänö iinque cægatimpa, ante do yewæmoncæ cædänipa. ² Doyedë quëwënanä iñömö, Æbänö cægatimpa, ante në againäni inte mäninö ante, Nāwangä impa, ante në apænedäni badinque adode beyæ ante në cædäni bagadänipa. Tömënanä mönitö imönite adodö ante pönö apænedäni ëñentamönipa. Iinque iinäni apænedäni möni ëñenö bai nöwodäni wæætë edæ adobaï pönï ante yewæmoncæ cædäni iinque botö iñömö edæ, Adobainö ante yewæmoncæboimpa, antabopa. ³ Teopido bitö ñænæmi pönï inömi inte ëñëmi. Botö iñömö, Wëëñëhedë æbänö mä pönï cægatimpa, ante ayæ, Nöwo ganca æbänö cæte i, ante ëñencæte ante nangui cædinque ædämö ëñënimö inte botö edæ, Bitö Teopidobi acæbiimpa, ante adodö adodö ante yewæmömopa. ⁴ Wadäni odömönte apænedäni ëñëninque bitö wæætë, Nö intawo, ante ëñencæte ante cædinque botö yewæmöninta adinque edæ do ëñencæbiimpa. Mänömainö ante yewæmömö ae.

Wäö ëñaqingä, ante anquedo ponte apæneccampa

⁵ Wængongui qui, ante në godönäni pancadäniya Abiyaidi nani cabo iñönänite adocanque Tacadiya ëmongacäimpa. Tömengä iñömö Oodeabæ awënë odeye Edode wodi nänö ingaiñedë, Wængongui qui, ante në godongä ingacäimpa. Tömengä nänöogængä Aadö wodi pæingä Editabeti ingacäimpa. ⁶ Tömëna iñömö nana gæncaya inöna inte Wængongui ayongante nö cæte quëwëninque Wængongui, Iimäi cædäni, ante nänö wææ angainö ante ëñente quëwëñönte wadäni, Eñënamäi quëwënapa, ante ædö cæte anguinäni. ⁷ Editabeti owæntacä inte wëñæ manämäi quëwëñongante wëñæ dæ ä wædinque nana gæncaya picæna badinque quëwengadaiimpa.

⁸ Dæ ä wædinque quëwëñönte Tacadiya wodi tönö godongämæ nani godoncabo nani godöñedë ba iinque tömengä iñömö, Wængongui qui, ante godongantapa. ⁹ Godöñongante tömënanä, Æcänö nöwo guidinque ogui waqui tanguingäa, ante acæte ante cædänitapa. Tömënanä cöwë nani cæi bai cædinque tömënanä ëmowo wataa wataa yewæmöninque adoyömö

da wëninque adotaque tadonte adänitapa. Ayönäni, Tacadiya ëmowo impa, ante adinque änanä ëñëninque tömengä Awënë Wængongui tæiyæ waëmö oncönë guidinque ogui waqui tangantapa. ¹⁰ Woadäni tömänäni, Nöwo ogui waqui iya tangæimpa, ante yabæcönë godongämæ pöninque Wængongui ingante apænegadänipa. ¹¹ Tacadiya iñömö tæcæ tancæ cæyongä Wængongui nänö da pönöningä anquedo tömënanä nani iya täimpaa gäänë tömëmæ inö pö næ gongænte a ongongä acantapa. ¹² Adinque Tacadiya, Æbänö cæquii, ante ancai guñente wæcantapa. ¹³ Wæyongante anquedo guiquënë,

—Tacadiya, guñënamäi ie. Bitö Wængongui ingante apænebi ëñëninque tömengä bitö äno do cæcampa. Bitö nänöogængä Editabeti iñömö onguinængä ingante mancæcäimpa cæbii. Mangä ëñacä adinque bitö tömengä ëmowo, Wäö, pemoncæbiimpa. ¹⁴ Wëñængä waa pönï ëñacä adinque bitö watapæ tocæbiimpa. Wadäni nangui inäni adobaï wëñængä ëñacä ate tocædänipa. ¹⁵ Wængongui incæ, Botö ayömo bitö wengä wadäni bai guiyä inämäi ñænængä pönï ingä abopa, angä beyæ waodäni adobaï tömengä beyæ ante adinque tocædänipa. Yowepæ biinömmæ incæ wapæ incæ tömengä ti nämæ tömämæ bedämäi incæcäimpa. Wäänä cæncadë ayæ ongöñongante Wængongui Tæiyæ Waëmö Önöwoca incæ tömengäa pö guicæcäimpa. ¹⁶ Ayæ bitö wengä picængä badinque mäo apæneccä ëñëninque idægoidi nangui inäni Wængongui gämænö poncædänipa. ¹⁷ Ayæ Wængongui Önöwoca ingante Ediya wodi nänö ewocagai bai adobaï ewocadinque bitö wengä iñömö adocä nänö tæi piñængäi bai adobaï tæi piñængä incæcäimpa. Iinque tömengä iñömö mönö Awënë nänö ponguinö ante täno beyænte bai cædinque odömongä ate mæpoidi wëñënanä inänite pönente wæadete cæcædänipa. Ayæ tömengä apæneccä ëñëninque në ëñënamäi cædäni incæ nö cæte quëwënanä nani ëñenö bai nö ëñente cæcædänipa. Mänömai cædinque bitö wengä adocä apæneccä ëñente cædinque waodäni mönö Awënë nänö ponguinö ante eyepæ pönï cædinque tömengä ingante ante wänö concædänipa. Mänömainö ante anquedo Tacadiya ingante apænegacäimpa. ¹⁸ Angä ëñëninque Tacadiya wæætë anquedo ingante apænedinque,

—Iñæmpa botö nänöogænä picænä inampa. Botö adobaï picæmo imopa. Edö cæte, Nö impa, ante ëñenguimoo.

¹⁹ Äñongä anquedo wæætë,

—Botö Gabodiedo ingaimo imo apa änewëë. Wængongui weca në ongömo iñömöte tömengä iñömö, Botö watapæ

apænedo ante bito Tacadiya ingante apænete pœ, ante da pönongä pontabopa. ²⁰ Nöwo inömo botö äno pönänamaï imi inte bito babetadebi badinque tededämaï inömite botö apænedo ante inque cæbo ba ate tedecæbiimpa, ante anquedo Tacadiya ingante apænecantapa.

²¹ Mänömaï te deyöna wadäni, Tacadiya taquiringä, ante wänö cöninque, Wængongui tæiyæ waemö oncönë guidinque æiqedö taquiringä, ante wægadänimpa. ²² Tömengä tadinque tededämaï ingantapa. Ayæ godömenque tededämaï inte önompoque oo cæpo oo cæpo cæcä adinque tömënäni, Wængongui tæiyæ waemö oncönë guite ongöninque Tacadiya wüimonte bai mä pöni adingä inte nöwo edæ babetadecä inte tacampa, ante wædänitapa.

²³ Wængongui beyæ ante cæe, ante näni inque äniönæ ganca cædinque Tacadiya wodi oncönë gocantapa. ²⁴ Mäniñedë ate tömengä nänöögængä Editabeti yædemadä badinque edæ önompo æmæmpoque apäicä ganca oncönë wë womongantapa. ²⁵ Tömengä inömo edæ, "Wëñëñedë, Owæntabi imipa, ante piinäni wæbo adinque Wængongui botö imote waadete pönö cædinque nöwo wæætë, Piinämaï incädänimpa, ante cæcampa," ante pönëninque Editabeti togacäimpa.

Itota ëñaqingä, ante

²⁶ Editabeti önompo æmæmpoque go adoque apäicä yædemadä nänö inedë Wængongui tömengä anquedo Gabodiedo näni änogä ingante da pönongä pöninque Gadideabæ Näatadeta näni quëwëñömö gocantapa. ²⁷ Godinque tömengä baquécä Mäadiya näni änogä weca pongantapa. Tömengä ingante Awënë Dabii wodi pæingä Ootee, Monguimo, ante do äningä inongäimpa. ²⁸ Ininque anquedo Gabodiedo Mäadiya weca pö guidinque tömengä ingante,

—Wængongui nänö në waadebi inte ëñëe. Wængongui bitö imite waa cæcæcäimpa. Wadäni onquiyænäni inänite Wængongui pönömenque pönö waa cædongä inte bitö imite edæ godömenque waa pöni pönö cæcä acäimpa. ²⁹ Ante tæcæ apæneyongä tömengä ancai guñëninque, Quinö bai i ante botö imote apæñecä, ante wæcantapa. ³⁰ Wæyongante anquedo wæætë,

—Mäadiya, bitö guñëñämaï ië. Wængongui incæ edæ bitö imite nanguï waadete pönö acampa. ³¹ Bitö nöwo edæ yædemadä badinque bitö wëñængä onguñængä mancæbiimpa. Tömengä ëñacä ate bitö tömengä ëmowo, Itota ingampa, ante pemoncæbiimpa. ³² Tömengä inömo edæ nanguï tæi piñænte cæcä incæcäimpa. Ininque tömengä ingantedö ante, Æibæ pöni në

Quëwengä Wengä ingaingä ingampa, ante apæñecäimpa. Ayæ Awënë Wængongui incæ tömengä ingante apænedinque, Bitö Awënë bayömi mæmæ awënë odeye Dabii wodi nempo dodäni näni quëwengä bai bitö nempo adobai quëwengädänimpa, ante adocä Itota ingante pönongä ænte Awënë Odeye bacæcäimpa. ³³ Ininque Acoboidi tömengä nempo quëwëñönänite tömengä cöwë tömënäni Awënë Odeye incæcäimpa. Tömengä nänö Awënë Odeye inguimämo inömo edæ dæ badämaï ingäimpa, ante Wængongui nänö da pönöningä Mäadiya ingante angantapa.

³⁴ Mäadiya wæætë tömengä ingante,
—Botö inämpa onguñængä tönö mönämäi inte wëñæ ædö cæte manguimoo.

³⁵ Ante wæyongante anquedo wæætë edæ,

—Wængongui Tæiyæ Waemö Önöwoca incæ bitö weca poncæcäimpa. Wængongui Æibæ Quëwënongä tömengä nänö tæi piñænö incæ wææ owo bai cæcæcäimpa. Mänömaï beyæ bitö Wëñængä Onguñængä incæ Tæiyæ Waemö ëñacä ate, Wængongui Wëñængä ingampa, ante pemoncädänimpa. ³⁶ Ayæ godömenque apænebo ëñëe. Editabeti bitö guidengä inömo picængade pöni inongante, Owæntacä ingampa, ante tededänitawo. Incæte tömengä picængadecä incæ dobæ edæ önompo æmæmpoque go adoque apäicä yædemadä inte tömengä wëñængä edæ onguñængä ingante ënengampa. ³⁷ Inämpa quïëmë ante Wængongui nänö änonö ante tömää edæ cöwë cæcæcäimpa.

³⁸ Ante anquedo angä ëñente wædinque Mäadiya,

—Mönö Awënë beyænque në cæbo imopa. Bitö äno bai Ao ämo bacæcäimpa.

Ante apæñecä ëñëninque Wængongui nänö da pönöningä incæ ëmö cæte wadæ gogacäimpa.

Editabeti weca Mäadiya ëñacæ gocampa

³⁹ Mäniñedë ate Mäadiya wodi wadæ godinque änamænë quingæ æidinque Oodeabæ quëwëñäni näni quëwëñömö adoyömonque incæ pöninque, ⁴⁰ Tacadiya oncönë pö guidinque Editabeti ingante, Waa quëwëmi, angantapa. ⁴¹ Mäadiya mänömaï apæñecä ëñëninque Editabeti wodi wengä cæncadë ongöninque wogæi wogæi tocantapa. Editabeti inömo Wængongui Tæiyæ Waemö Önöwoca incæ tömengä pö guicä ininque ædæmö pöni ëwocacä bacantapa. ⁴² Mänömaï badinque adocä ogæ tededinque,

—Mönö onquiyæncabo inömonte bitö adobique bitö waa toquinque impa, angantapa. Wængongui wamöni imönite pönömenque waadedinque bitö iminite godömenque nanguï waadecampa. Bitö

nē ēnēnongā ingante Wængongui nangui waadecā beyæ tōmengā adobaī tocæcāimpa. ⁴³ Botō ōnōmoque iñōmote bitō iñōmō mōnō Awēnē badā inōmi inte edæ botō weca quīnante pōmii. ⁴⁴ Tæcæ edæ apænebi ōnōmonca ēñēñōmo botō cæncadē nē ongōnongā incæ wogæi wogæi watapæ tocā ae. ⁴⁵ Mōnō Awēnē bitō imite nānō ānīnō ante bitō iñōmō, Tōmengā cōwē cæcæcāimpa, ante pōnēninque bitō toquinque edæ nē pōnēmi imitapa.

⁴⁶ Editabeti mānōmaī apæneyongā Māadiya wæætē āmotamīni ante bai iīmāi angacāimpa.

“Botō mīmōno pōnēninque, Mōnō Awēnē iñōmō edæ waa pōni mōnō inongā ingampa, ante watapæ apænebopa.

⁴⁷ Ayæ, Quēwencæbiimpa, ante botō imote nē Engā iñongante botō Wængongui ingante ante pōnēninque edæ watapæ tote ēwocabopa.

⁴⁸ Botō tōmengā ingante nē cædōmo inte ōnōmoque pōni iñōmote tōmengā wæætē botō imote waa acampa.

Iñcayæ nānōmōidi wææ iñcayæ nānōmōidi wææ ināni tōmānāni botō imotedō ante apænedinque,

Tōmēnā iñōmō Wængongui nānō nē waadedā ingadāimpa, ante apænecædānīmpa.

⁴⁹ Wængongui nē Tæi Piñænongā inte botō imote pōnō nangui cæcā beyænque edæ apænecædānīmpa.

Tōmengā ēmōwo iñōmō edæ Tæiyæ Waēmō ēmongampa.

⁵⁰ Ayæ iñcayæ nānōmōidi wææ iñcayæ nānōmōidi wææ ināni tōmengā ingante guiñente cæyōnānite tōmengā wæætē waadete pōnō waa cæcæcāimpa.

⁵¹ Tōmengā nē tæi piñænongā inte tōmengā ōnompoca cæte bai nangui cæcantapa.

Ayæ wadāni, Tōmēmoque waēmō imopa, ante ōnōwēninque pōnēnāni inānite tōmengā angā nāwæ godānīmpa.

⁵² Ayæ awēnēidi nāni tæ contaimpaa ongōñōnānite tōmengā tōmēnāni inānite wido cæcā godānīmpa.

Wæætē ōnōnānique inānite ængō cæcā contadinque tōmēnāni wæætē awēnēidi bai badānīmpa.

⁵³ Ayæ gue ænente wædāni iñōnānite tōmengā waa pōni cængui godongā ænīnque tōmēnāni tōmo pōni cæñānīmpa.

Wæætē nangui ēadāni tōmēnāni inānite da godongā godinque ōmæpodāni inte godānīmpa.

⁵⁴ Mōnō idægocabo iñōmō tōmengā ingante nē cæmō iñōmonte tōmengā mōnō tōnō godongāmæ cæcantapa.

Ayæ, Waadete botō pōnō waa cægainō bai adodō cæcæboimpa, ante pōnēninque tōmengā ñōwo pōnō waadete waa cæcā æmompā.

⁵⁵ Abadāō wodi pæimō iñōmonte tōmengā mōnō mæmæidi inānite nānō angainō bai cædinque,

cōwē ñimpo cædāmaī inte pōnō waadete cæcampa.”

⁵⁶ Ante Māadiya wodi āmotamīni ante bai angantapa. Ayæ Editabeti weca mēa go adoque apāicā quēwente ate ayæ ate tōmengā oncōnē gogacāimpa.

Wāō ēñacampa

⁵⁷ Editabeti wodi guiquēnē oo pōni ēnēninque tōmengā wēñængā onguiñængā mangacāimpa. ⁵⁸ Ayæ tōmengā guidēnāni tōnō godongāmæ quēwēnāni iñōmō, Æ mōnō Awēnē wīi piñgā inte Editabeti ingante ædæmō waadete waa cæcampa, ante tæcæ ēñēmōnīpa, ānīnque Editabeti tōnō godongāmæ togadānīmpa. ⁵⁹ Ayæ adoque Wængongui itædē go ate wēñængā ingante æmontaique ēō togæncæ cædāni iñōmō godongāmæ pōninque tōmengā wæmpo ēmōwo bai ante, Tacadiya, ante pemoncæ cædānīmpa. ⁶⁰ Cæyōnānite wānā Baa ānīnque,

—Tōmengā ēmōwo Wāō ēmoncæcāimpa, ante wææ angadāimpa.

⁶¹ Āñongante tōmēnāni wæætē,

—Iñæmpa bitō guidēnāni Wāō ēmōnāmaī. Dæ āmōnānīpa.

⁶² Ānīnque wæmpocā ingante ōmō cædinque, Æmongānō ēmonguingā āmii, ante odōmōmi amōnii. ⁶³ Āñōnānite tōmengā tededāmaī inongā inte ōnompocaque odōmongā adinque yewæmōinta ænīnque pædæ pōnōnāni ate tōmengā iñōmō edæ,

“Tōmengā ēmōwo Wāō ēmoncæcāimpa,” ante yewæmongā adinque tōmānāni edæ guiñente wægadānīmpa. ⁶⁴ Yewæmongā ate tōmengā ōnonguēnēwa ñīmæ cæguēnēwate bai baguēnēwate ate edæ tōmengā ogæ tedinque Wængongui ingante, Waa pōni cæbi abopa, ante watapæ edæ apænecantapa. ⁶⁵ Īnīnque māniñōmō godongāmæ quēwēnāni tōnō Oodeabæ ānāmæñē quēwēnāni tōnō tōmānāni, Mānōmaī batīmpa, ante nangui tededānīmpa. ⁶⁶ Tededāni ēñēninque nē ēñēnāni wæætē, “Iñgā wēñængā iñōmō æbānō nānō baquinque edæ pæquingā,” ante tōmānāni godongāmæ wægadānīmpa. Edæ tōmengā tōnō Wængongui godongāmæ cæcā ingacāimpa.

Tacadiya āmotamīni ante angampa

⁶⁷ Wēñængā wæmpocā Tacadiya guiquēnē Wængongui Tæiyæ Waēmō Ōnōwoca ingante

ewocadinque Wængongui beyæ apænedinque
 ämotamini ante bai apænecantapa.

68 “Mönö idægocabo Wængongui iñömö
 adocä mönö Awënë iñongante mönö
 tömengä ingante waa ate watapæ
 apænecæimpa.

Tömengä iñömö, Botö quinäni bate abæ
 tawænte bai quëwencädänimpa, ante
 tömengä do æncæ pongä acæimpa.

69 ‘Önömoncawæ wææ èmoncate bai wææ
 gompcæcäimpa,’ ante cædinque
 tömengä mönö imonte nê ænguingä
 ingante da pönongä pöningue iingä
 wæætê ængä beyænque quëwëmoppa.

Wængongui ingante nê cægaingä awënë
 odeye Dabii wodi pæringä inongä inte
 tömengä mänömai cæcä beyænque
 quëwëmoppa.

70 Wængongui iñömö tömengä beyæ nê
 apænegainäni tæiyæ waëmö in-
 gainäni iñönänite tömënanäni tönö
 apænedinque,

Cöwë cæcæboimpa, ante nänö apænegainö
 bai ñowo edæ iinque cæcampa.

71 Mönö iñömö nê piinte änäni nempo
 ongöñömonte tömengä,

Piinte cädänipa, ante adinque mönö imonte
 gä pe æmpote ö ængä beyænque
 quëwëmoppa.

72 Mänömai cædinque tömengä mönö
 mæmæidi inänite nänö angainö
 bai cædinque ñowo waadete pönö
 cæcampa.

Ayæ, Botö pönö cæbo ate munitö Ao ämini
 iinque mönö godongämæ wææ cæte
 quëwengæimpa, ante tömengä tæiyæ
 waëmö nänö angainö ante cöwë
 pönënongä inte ñowo iinque cæcampa.

73 Edæ mæmæ Abadäo wodi ingante, Botö
 nê Quëwëmo ingaimo inte nöingä
 ämopa,

ante Wængongui iimainö ante nänö pönö
 cæquinö ante nö apænegacäimpa.

74 Abadäo èñëmi. Nê piinte cädäni nempo
 wæwëñöminite botö gä pe æmpote ö
 æninque

pönö cæbo ate eyepæ badinque munitö
 wæætê guifënamai inte botö
 Wængongui imo beyæ cæcæminimpa,
 ante Wængongui nê pönö cæquiringä
 inte apænegacäimpa.

75 Wængongui iñömö edæ, Minitö tæiyæ
 waëmö ewocadinque mini quëwenganca
 botö weca nö pönö cæte quëwencæminimpa,
 ante pönö cæcä ingacäimpa,” ante
 wëñængä mæmpocä Tacadiya wodi
 apænecantapa.

76 Ayæ wëñængä ingante tömengä iimai
 ante godömenque apænecantapa.

“Botö wëmi bitö imite botö wæætê apænebo
 èñë, angantapa.

Nê Æibæ Pönö Quëwengä beyæ bitö nê
 apænebi inömi imipa, ante bitö imitedö
 ante apænecädänimpa.

Mönö Awënë taadö pinongæimpa, ante bitö
 edæ täno beyænte gote bai cædinque,

77 mönö Awënë quinäni inänite iimai ante
 odömonte apænecæbiimpa.

Wënæ wënæ mini cædö ante Wængongui
 pönö ñimpo cæcä ate munitö iñömö
 edæ,

Tömengä ængä beyænque mönö quëwengui
 impa, ante do èñencæminimpa, ante
 apænebi èñencädänimpa.

78 Edæ mönö Wængongui incæ mönö wënæ
 wënæ wædönö ante waadete pönö
 waa cædinque,

öönädê Quëwengä ingante mönö weca da
 pönongä pöningue nænque tæcæ tamö
 bai èmongä acæimpa.

79 Mänömai cædinque mönö wænguimämo
 beyæ wëmö iñömö awædö,

ante wæyömonte tömengä ponte a ongongä
 adinque mönö nænque pämo oo tote
 bai quëwëmoppa.

Ayæ, Minitö mini gänê pönente quëwengüinö
 taadonque poncæminimpa,

ante tömengä töö æmænte mämongä
 pömpoppa.”

Mänömainö ante Tacadiya wodi tömengä
 wëñængä ingante apænegacäimpa.

80 Wëñængä iñömö do pædinque önöwoca
 tæi piñænte ewocagacäimpa. Idægoidi weca
 tömengä nänö ponte a ongonganca önömæca
 quëwengacäimpa.

2

Itota èñacampa (Mäateo 1.18-25)

1 Wäö idægoidi weca nänö pöñedê
 iinque bayonte awënë Tetædo Agoto
 iñömö, Æpominiidö imini, ante acæte
 ante cædinque odömäno ömæ nê

quëwënanäni inänite edæ, Minitö èmwö
 tömämäni yewæmoncæminimpa, an-
 gacäimpa. ² Tidiabæ awënë Tidënio
 ingäñedê odömäno awënë täno angä.

³ Èñëninque adocanque tömengä mæmæidi
 nani quëwengäiñömö wacä tömengä
 mæmæidi nani quëwengäiñömö tömänäni
 yewæmoncæte ante edæ go go
 cægadänimpa.

⁴ Iinque Oodeabæ Awënë wodi Dabii
 wodi pæringä inongä inte Ootee iñömö
 Gadideabæ Näatadeta nani quëwëñömö
 quëwëninque adobai tömengä mæmæ Dabii
 wodi nänö quëwengäiñömö Bedëe iñömö
 gogacäimpa. ⁵ Edæ Ootee nänöogængä in-
 guingä Mäadiya yædëmadä iñongante tömëna
 nana gæncaya inguina guëa yewæmoncæ go-
 datapa. ⁶ Bedëe ponte quëwëñöna Wëñængä
 iñömö iinque pædinque ⁷ bamoncadengä

incæ onguifnægä inte iimäi eñagacäimpa. Mäniñömö mongui incönë iñömö mäniñedë eyede pöni goti ongönäni ate wædinque tömëna wæætë cænënanäni cænguif oncontaidë guiyantaidë go guuida ate Wëñnægä eñacantapa. Ìninqe guiyantaidë eñacä ate wäänä Wëñnægä ingante weocoo wini wini caadinque cænënanäni cænguincadedë ñö cædä öñongantapa.

Obegaidi inänite në aadäni inänite anquedoidi apænedäni

⁸ Idægoidi cænënanäni obegaidi nani änonäni iñönänite në aawënäni iñömö eyepancadë adoönæ woyowotæ a cönönänimpa. ⁹ A cönönäni mönö Awënë anquedo ponte a ongöñongä mönö Awënë nänö ñäö emönö beyænque godongämæ guinæ gongæ adinque në aadäni ancai guifente wædänitapa. ¹⁰ Anquedo iñömö tömënanäni inänite, “Guifnënamäi imæwedäni. Mïni nangui eñente toquinque ante botö ñöwo watapæ apænebo eñeedäni. Minitö tönö inguipoga tömäo quëwënanäni adobaï adode beyænque watapæ tocæminimpa. ¹¹ Mönö Awënë Codito iñömö, Æmo beyænque quëwëncæminimpa, ante në Ængä baquingä ñongä inte do edæ eñacantapa. Edæ minitö beyæ ante tömengä ñöwoönæ incæ awënë Dabii wodi nänö quëwëngäiñömö eñacantapa. ¹² Nö impa, ante gote acæminimpa. Wëñnægä ingante wäänä wini wini caadinque edæ cænënanäni cænguincadedë ñö cædä ate a öñongä adinque minitö, Nö impa, ante eñencæminimpa.”

¹³ Ante anquedo äñongä wadäni nangui inäni öönædë owodäni incæ iñontobæ tontadoidi ongönäni bai tömengä tönö godongämæ ponte a ongöninque ämotamini ante bai äninque Wængongui ingante iimäi ante watapæ apænedänitapa.

¹⁴ “Wængongui æibæ pöni quëwëngongä inte edæ ñäö apäite bai emongänö angüenë.

Tömengä inguipoga iñömö waadete pönö cæcä beyænque mïni waocabo edæ gänë pönenguimnido angüenë.”

¹⁵ Ante ämotamini ante bai äninque anquedoidi öönædë adodö wadæ æite godäni ate në aawënäni iñömö nani cabo tededinque,

—Mönö Awënë mönö imonte apænecä mönö eñënö ante, Æbänö cæcäi, ante mönö Bedëë gote æedämö acæimpa. ¹⁶ Äninque pogodo ponte ayönäni Mäadiya tönö Ootee a ongöñöna Wëñnægä iñömö cænënanäni cænguincadedë a öñongä adänitapa. ¹⁷ Ìnque adinque wadæ godinque, Wëñnægä æbänö ingäa, ante anquedo apænecä nani eñënö ante gode ä gode ä cæte wayömö wayömö quëwënanäni inänite tededäni eñënanitapa. ¹⁸ Eñëninque tömänäni wæætë, Në aawënäni æbänö ante apænedäni, ante guifente

wædänitapa. ¹⁹ Mäadiya guiquënë, Wëñnægä æbänö ingä änanii, ante nämä pönëë congantapa. ²⁰ Në aawënäni guiquënë, Wængongui ñäö apäite bai emönongä inte pönö waa pöni cæcä æmönipa. Edæ anquedo nänö apænedö bai do cæcä amönipa, ante apænedinque eyepancadë ocæ emænte gogadänimpa.

Bitö Wengä, ante mæmpoda Wëñnægä ingante Wængongui oncönë ænte pönäpa

²¹ Ayæ, Adoque Wængongui itädë go ate æmontaique eö togængæimpa, ante idægoidi cöwë nani cæi bai cædinque Wëñnægä ingante eö togænänitapa. Ayæ Mäadiya yædëmadämäi nänö iñedë anquedo nänö pemöninö bai äninque mæmpoda Wëñnægä emöwo ante, Itota, pemongadäimpa.

²² Wäänä mänimpoönæ wepæ näate inampa, ante Möitee wodi nänö angaimpoönæ ñinque go ate tömëna, Wëñnægä iñömö Wængongui Awënë qui ingampa, ante mönö godongæimpa, ante tömengä ingante Eedotadëë iñömö ænte gogadäimpa.

²³ Edæ, “Onguifnënanäni bamoncadënanäni tömänäni tæiyæ waëmö bacædänimpa, ante tömënanäni Wængongui Awënë nempo pædæ godongæimpa,” ante Awënë Wængongui nänö angainö ante eñëninque Mäadiya tönö Ootee do cædatapa. ²⁴ Ayæ, Equemöna nana gæncaya, Wængongui qui, ante godongæimpa. Wii mänömai cæte tæcæ wengä wengä pæda mënaa ñate godongæimpa. Ootee tönö Mäadiya iñömö mänömai cædinque, Wængongui qui impa, ante mënaa ñate ænte pöninque pædæ godöna ængacäimpa.

²⁵ Mäniñedë adocanque edæ tömengä emöwo Timeönö Wængongui beyænque ante nö cædongä inte Eedotadëë iñömö quëwëngacäimpa. Idægoidi wampo pönente quëwëncædänimpa, ante Wængongui æyedëno æedämö cæquingäa, ante tömengä wänö cönonte quëwëngongäimpa. Ayæ Wængongui Tæiyæ Waëmö Önöwoca ingante tömengä cöwë ewocacä ñongäimpa.

²⁶ Wængongui Tæiyæ Waëmö Önöwoca do apænecä eñëninque Timeönö wodi iñömö, Botö ayæ wænämäi miiimö quëwëmoyedë mönö Awënë Codito ingante aquimo imopa, ante do eñëningä ñongäimpa. ²⁷ Nöwo iñömö Wængongui Önöwoca angä eñëninque tömengä Wængongui oncö ñænæncönë yabæcönë pö guicantapa. Mäniñedë Itota mæmpoda iñömö idægoidi wææ ante nani cægainö bai cæcæte ante cædinque Wëñnægä Itota ingante ænte pö guida. ²⁸ Adinque Timeönö iñömö edæ Wëñnægä ingante bæi ongonte pæ mäninque Wængongui ingante, Tömëmi waa toquinque mönitö imönite pönö cæbipa, ante apænecantapa.

29 “Bitō Tæiyæ Awënë inōmi inte eñēmi. Bitō imite nē cæbo iñomote bitō doyedē, Cæbo acæbiimpa, angabiimpa.

Iñinque bitō ānīnō bai ñōwo edæ iinque cæbi adīmo iñomote bitō āmi ate wænte goboe.

30 Edæ bitō, Quēwencæminimpa, ante nē Ængungā ingante ñōwo da pōnōmi ponte eñacā do abopa.

31 Mānōmāi cædinque bitō, Wadāni nāni cabo wadāni nāni cabo waodāni tōmānāni acædānimpa,

ante cædinque bitō nē Ængungā ingante ñōwo da pōnōmi ponte a ongonḡā acæimpa.

32 Idægoidi ināmai ināni incæ tōmēnāni nāni cabo nāni cabo incæ edonque acædānimpa, ante cædinque bitō da pōnōmi pōninque tōmengā ñāo apāite bai a ongonḡā acædānimpa.

Ayæ mōni idægocabo iñōmōnite bitō, Wēñængā ængā beyænque botō quimīni iñōmō ñāo bai waēmō pōni ēmōninque quēwencæminimpa, ante pōnō cæbi abopa.”

33 Ante āmotamīni ante bai Timeōnō wodi, Wēñængā æbānō cæqingā ingāā, ante tedecā eñēninque Wēñængā mæmpo tōnō tōmengā badā iñōmō guñēnte wædatapa. 34 Timeōnō wæætē, Mīna waa toquinque iingā Wēñængā ingante æmīnāpa, ante apænedinque tōmengā badā Māadiya ingante iūmai ante godōmenque apænecantapa.

—Picæyḡ badingue iingā Wēñængā cæcā beyænque idægoidi pancadāniya tæ go wæente bai wæyōnāni pancadāniya wæætē ængæ gantite bai quēwencædānimpa. Wængongui iñōmō, Wēñængā ingante ate eñencædānimpa, ante odōmonte cæyongā pancadāniya wæætē adocā ingante godō pūinte tedecædānimpa. 35 Ante apænedinque Timeōnō iñōmō Māadiya ingante apænecantapa. Mānōmāi bayonte, Nangui ināni æbānō ante mīmōno pōnēnāni, ante edonque acæimpa. Bitō iñōmō yaēmē yete bai wæwente ēwocacæbiimpa, ante apænegacāimpa.

36 Ayæ wadā iñōmō Wængongui beyæ nē apænedā iñōmō tōmēnā ēmōwo Ānā adobai onḡōnantapa. Atedoidi nāni cabo iñōnāni adocanque Pānoedo wēnā inōnā inte tōmēnā picængadedā ingadāimpa. Tōmengā iñōmō baquēcāñedē mōninque nānōogængā tōnō ōnompō æmæmpoñque go mēa wadepo quēwente ate onḡuiñængā guiquēnē nāne wængacāimpa. 37 Onquiyāñā iñōmō ñōwo otenta i coatodo wadepo nānō eñagainganca owæmpoinā quēwēnā inte tōmēnā Wængongui oncō ñæñæncōnē yabæcōnenque cōwē quēwēninque taodāmai

iñōnāimpa. Itædē woyowotæ tōmēnā cōwē, Wængongui ingampa, ante waa cædinque Wængongui ingante apænecæte ante wantæpiyæ cæñāmāi quēwēnā iñōnāimpa. 38 Tōmēnā ñōwo eyepæ pōni māmō bee tēninque Itota ingante adinque Wængongui ingante waa ate pōnēninque apænecantapa. Ayæ wadāni, Mōnitō Eedotadēē iñōmō quēwēmōni iñōmōnite Wængongui æyedēnō pōnō cæcā beyæ abæ tawænte quēwenguimōni, ante nē wānō cōnāni inānite dodā Ānā iñōmō Wēñængā ingante do adinā inte, Wēñængā nē Ængungā inte do eñate pongā atabopa, ante cōwē apænedā eñengadānimpa.

Nāatadeta ocæ ēmænte godāniya

39 Ayæ māni, Awënë Wængongui, Iūmai cæedāni, nānō angaiñō ante iinque cæte ate Ootee nāni wencabo Gadideabæ gocæte ante wadæ godinque Nāatadeta tōmēnāni nāna quēwēniñōmō pongadānimpa. 40 Wēñængā iñōmō edæ picængā pædinque tæi piñængā bacantapa. Ayæ ocāi encacā inte nangui eñēnte bagacāimpa. Ayæ Wængongui waadete pōnō apænecā eñēnte ēwocadinque tōmengā nē waadete pōnō cæcā ingacāimpa.

Wængongui oncōnē Itota gote onḡongampa

41 Wodo pænta gogaïōnæ bai Patowa mōnō ææmæ cænguïōnæ ñōwo impa, ante pōnēninque idægoidi Patowa ante Eedotadēē godinque ææmæ cædōnānimpa. Itota mæmpoda adobai Patowa nāni āmæ cōwē cæyedē wadepo iñō wadepo iñō Eedotadēē goda ingadāimpa. 42 Iñinque Itota dote wadepo iñonte Wængongui beyæ ante ææmæ cōwē nāni cædō bai Ootee nāni wencabo do gote cædānitapa. 43 Ææmæ tōmāā iinque cædinque oncōnē poncæte ante taadonque pōninque mæmpoda adāmai iñōnate Itota guiquēnē Eedotadēē iñōmō ayæ quēwengantapa. 44 Godongāmæ mōnō poncabo tōnō pongā imaingampa, ante pōnēna inte taadō tōmāā itædē pōninque tōmēna guidēnāni weca tōmēna æmīgoidi weca diqui diqui mincæ cæyōna, 45 edæ dæ angā. Ate wædinque tōmengā ingante diqui mincæte ante Eedotadēē adodō ocæ ēmænte gogadāimpa.

46 Mēōnaa go adoñnæque iñonte diqui diqui minte ate edæ Wængongui oncō ñæñæ oncōnē yabæcōnē pō guite ayōnate Itota iñōmō nē odōmōnāni weca eñēē cōninque, Æbānō i, Æbānō cæquīi, ante angā adatapa. 47 Tōmengā apænecā eñēninque tōmānāni, Æ tōmengā iñōmō ocāi nē encacā waa eñængā amōniya, ānānitapa. Ayæ, Itota ingante, Æbānō i, ante ānāni eñēninque tōmengā wæætē nō apænecampa, ante wædinque

tömänäni guñfente wæðanita. ⁴⁸ Mæmpoda iñômô mǎniñômô pô guite ayóna Itota mǎnômǎi cæcǎ adinque guñfente wæðatapa. Tömengǎ badǎ tömengǎ ingante,

—Botô Wëmi ëñëmi. Mönatô imónate quínante mǎnômǎi cæbii. Ìñæmpa bitô wæmpo tónô mönatô bitô ìmite ante ancaa diqui diqui minte wæwentamónapa.

⁴⁹ Æñongante tömengǎ wæætë,
—Mínatô ìñæmpa, Mæmpocǎ oncönë Itota ongonguënegǎ ingampa, ante ëñënamǎi ìminatawo. Quínante wayómô diqui diqui mímínatawo.

⁵⁰ Æñongante, Æbǎnô ante angǎǎ, ante æðæmô ëñënamǎi ìnatapa.

⁵¹ Tömengǎ wæætë mæmpoda mǎiñæ gote Nǎatadeta póninque tömëna nǎna äno ante cówë ëñfente cæcantapa. Wǎänǎ guiquënë tömengǎ nǎnô cæðinô ante nǎmǎ pönëë congǎ ingacǎimpa. ⁵² Itota iñômô edǎe nangui ëñengǎ bate pædongǎimpa. Picængǎ bayongante Wængongui tónô waodǎni adobai tömengǎ ingante cówë godömenque godömenque waadete adönänimpa.

3

Wǎö æpǎñë në guidongǎ önömæca quëwente apcënegǎ

(Mǎateo 3.1-12; Mǎadoco 1.1-8; Wǎö 1.19-28)

¹ Tibedio quinte wadepo tömámæ awënë nǎnô inöñedë Pontio Pidato wodi nǎni änogǎ adoyedë Oodeabæ awënë ìñongante Edode wæætë Gadideabæ awënë inongǎimpa. Adoyedë iñômô Edode wodi nǎnô tóniñacǎ Pedipe Itodeabæ Todacónitebæ awënë ìñongǎ Ditániato wodi adoyedë Abidëniabæ awënë inongǎimpa. ² Mǎnimpodǎni mǎniñômæ awënëidi iñönáni Änato wodi tónô Caiapato wodi adoyedë, Wængongui qui, ante në godöna ñæñæna póni inöna inönainpa. Tömëna nǎna inöñedë adoyedë edǎe Tacadiya wodi wengǎ Wǎö ingante önömæca iñômô ayæ quëwëñongante Wængongui apænegacǎimpa.

³ Wǎö wodi iñômô Oododǎnonga ömaaque go tömǎo cægóninque ìmǎi apcënegǎ ëñëñanita. Minitô, Idæwaa wënæ wënæ cæte awæðô, ante ocǎ ëmænte Wængongui gǎmænô pöedǎni. Ayæ, Wënæ wënæ botô cæðinô ante Wængongui pünǎmǎi inte pónô ata cæpocǎ quëwëmopa, ante edonque acǎimpa, ante odömóninque æpǎñë guiedǎni, ante Wǎö angacǎimpa.

⁴ Mǎnômǎi cæðinque Wængongui beyæ në apcënegainǎ Itaiya wodi ìmǎi ante nǎnô yewæmonte apcënegainô bai Wǎö adobai cægacǎimpa.

“Adocanque önömæca ongóninque ìmǎi ante yedæ tedecǎ ëñencæðänimpa.

‘Awënë nǎnô ponguinô ante tee monte bai cæðinque, taadô töinô pínonte bai cæðäni.

⁵ Onquiyabo incæ änanquidi incæ, Mæmô póni bacǎimpa, ante ææ wocǎimpa. Biyönæ iñômô tee möninke mæmô póni badongǎimpa.

Taadô idiquibæ iñonte töinô pínongǎimpa. Wënæ wënæ iñonte wainô póni taadô badongǎimpa.

⁶ Taadô mǎnômǎi mæmô póni ba ìninque tömámæ quëwëñäni incæ, Wængongui pónô ængǎ beyænque mönô quëwëguinô impa, ante edonque acæðänimpa, ‘ancæcǎimpa.’

⁷ Ante yewæmonte ongompa cæminii, ante Wǎö wodi æpǎñë guicæte ante pönäni nangui inäni iñönänite ìmǎi angantapa. “Minitô iñômô tæntæ pæimíni bai inte në babæ cæminii ìninque edǎe ëñenguënë quëwëmíni. Wængongui nǎnô piinte pangui mámo ante edǎe, Wænompadǎni, ante æcǎnô äna ëñëninque minitô wodi winonte pómíni. ⁸ Wængongui Awënë gǎmænô minitô ocǎ ëmænte poncæ cæmínitawo. Nô nô pómíni ìninque edǎe në ocǎ ëmænte pönäni wainca incate bai waa cæðäni bai minitô iñômô edǎe adobai waa cæðäni. Minitô nǎmáneque pönëninque, ‘Mönitô mæmæ Abadǎo wodi pæimóni ìmóni beyænque Wængongui mönitô ìmónite waa acæcǎimpa,’ ante nǎmǎ wææ ancæ cæmínitawo. Ìñæmpa Wængongui angǎ bai Abadǎo wodi pæimíni míni inô bai dicacoo incæ dobæ adobai bacæðonii apa änewëmíni. ⁹ Awæ iñômô wainca incadǎmǎi i ìninque edǎe do yete gongapamô iya tangǎimpa. Awæ yecæte ante awænca eyewa næñænäni bai Wængongui nǎnô pangui mámo iñômô edǎe oo póni pô apa quëwëmíni,” ante Wǎö apænegacǎimpa. ¹⁰ Angǎ wæðinque godongámæ ongönäni pancadániya wæætë,

Mǎnômǎi i ìninque æbǎnô cæquëñëmóni ìmónii. ¹¹ Æñönänite Wǎö,

—Weocoo mencooga në mangǎ iñômô weocoo ömaacǎ ingante adocooque godongǎ æncæcǎimpa. Cængui në ëacǎ adobai cængui ömæpocǎ ingante godongǎ æncæcǎimpa, angantapa. ¹² Ayæ odömǎno awënë nǎnô äñinta në æñäni guiquënë adobai æpǎñë guicæte ante póninque Wǎö ingante äñanita.

—Në odömóni ëñëmi. Mönitô iñômô æbǎnô cæquëñëmóni ìmónii. ¹³ Æñönänite tömengǎ wæætë,

—Minitô awënë, Mǎnimpotä, ante nǎnô änimptia ante wadäni inänite ämíni pæðæ pönönäni eyepæ æninke minitô wæætë, Tömëmóni qui, ante godömenque äñamǎi ìedäni, angantapa. ¹⁴ Ayæ tontadoidi adobai tömengǎ ingante,

—Mönitō guiquēnē æbānō cæquēnēmōni imōnii.

Åñōnānite Wāō wodi iūmai angantapa.

—Mīnitō wacā tōmengā nānō godonte æinta ō æncæte ante pæmēnēnāmai iedāni. Ayæ wacā wēnæ wēnæ cædāmai iñongante mīnitō, Wēnæ wēnæ cæbitapa, ante babæ wapiticæ ānāmai iedāni. Ayæ mīnitō cædi beyæ mīnitō awēnē eyepæ pōnongā æninque piyænē cæte godōmenque æinente wædāmai iedāni, angantapa.

¹⁵ Åñongante godongāmæ ongōnāni iñōmō, Wængonguī doyedē, Codito ponguingā, ante nānō nē angaingā iñōmō edæ iingā Wāō wabānō iūmaingampa, ante ōnōwēnenque pōnēnāni inte edæ, Wāō æbānō cæquingā, ante acæte ante a ongōnānitapa. ¹⁶ Wāō wæætē tōmānāni inānite apænedinque, “Botō guiquēnē nāwangā mīnitō imīnite æpænē guidōmo guimīnīpa. Iīncayæ ate nē Ponguingā guiquēnē tōmengā iñōmō nāwangā ñænængā pōni iñongante botō guiquēnē guiyāmo iñōmo inte tōmengā awæncata incæ ædō cæte iū cæquimoo. Tōmengā iñōmō mīnitonga gonga bæcote bai cædinque Wængonguī Tæiyæ Waēmō Ōnōwoca ingante edæ da pōnongā æncæmīnīpa. ¹⁷ Waocā, Todigo tōmēmō wati wati tænoninque botō tænoniñōmō ōnōmancaque baquinque botō waiña tōmāmō oncōnē da wencæboimpa, ante timpodæ næænte wo ææntodō wo ææntodō cædinque ontapocoo wææincoo wadæ ñēmænte wo ewencæte ante timpodæ næængā bai mōnō nē Ponguingā iñōmō adobai oo pōni apænte ancæcāimpa. Edæ waēmō ināni inānite apænte æninque tōmengā ontapocoo bai ināni inānite gonga cōwē bæcōyōmō iya tangā gonte wæcædānīpa.”

¹⁸ Mānōmainō āninque Wāō wodi godōmenque wade wade apænedinque tōmēnāni inānite, Åmo ēñēmaimīnīpa, angacāimpa. Ayæ, Codito ingantedō ante watapæ apæncæ ēñengadānīpa. ¹⁹ Incæte tōmengā pancabaa Awēnē Edode ingante, Bitō tōniñacā nānōogængā Ædodiya ingante mōmii, ante piīninque Edode nānō wīwa cædinō ante tōmānō ante piingā adinque, ²⁰ Edode wodi guiquēnē godōmenque wīwa cædinque Wāō ingante tee mōnecā wægacāimpa.

Itota æpænē guicampa

(Māateo 3.13-17; Māadoco 1.9-11)

²¹ Mānīi Wāō tōmānāni inānite æpænē nānō guidōnedē Itota ingante adobai guidongā guicantapa. Guūite ate Wængonguī ingante apæneyongā ōönæ wi ænete bai bayonte edæ ²² Wængonguī Tæiyæ Waēmō Ōnōwoca equemō wææ contate bai

tōmengāa edonque pōni wææ guicā ate ōönædē apænedinque,

—Bitō botō Wēmi botō nē waadebi imīpa. Bitō imite waa adinque waa tobopa, ante ōönædē apæncæ ēñengacāimpa.

Itota nānō mæmæidi

(Māateo 1.1-17)

²³ Todēinta wadepo nānō ēñagāñfedē iinque bayonte Itota māniñedē tāno cæcā ingacāimpa. Tōmengā ingante nē pæpogadongā iñōmō Ootee iñongante wadāni, Itota wæmpocā ingampa, ante pōnēnōnāimpa.

Ootee wodi mæmpo wææ Edii wodi ingacāimpa.

²⁴ Edii wodi mæmpo wææ Māatato, Māatato wodi mæmpo wææ Debii, Debii wodi mæmpo wææ Mēedequi, Mēedequi wodi mæmpo wææ Cāna, Cāna wodi mæmpo wææ docā Ootee wodi ingacāimpa.

²⁵ Mānīi docā Ootee wodi mæmpo wææ Māatatia

Māatatia wodi mæmpo wææ Åmoto, Åmoto wodi mæmpo wææ Nāacō, Nāacō wodi mæmpo wææ Etedi, Etedi wodi mæmpo wææ Nāagai ingacāimpa.

²⁶ Nāagai wodi mæmpo wææ Māato, Māato wodi mæmpo wææ docā Māatatia, docā Māatatia wodi mæmpo wææ Tēmei, Tēmei wodi mæmpo wææ Ooteco, Ooteco wodi mæmpo wææ Oodaa ingacāimpa.

²⁷ Oodaa wodi mæmpo wææ Owāna, Owāna wodi mæmpo wææ Deta, Deta wodi mæmpo wææ Dodobabedo, Dodobabedo wodi mæmpo wææ Tadatiedo, Tadatiedo wodi mæmpo wææ Nēedi ingacāimpa.

²⁸ Nēedi wodi mæmpo wææ docā Mēedequi, docā Mēedequi wodi mæmpo wææ Adi, Adi wodi mæmpo wææ Cotāō, Cotāō wodi mæmpo wææ Edēmadāō, Edēmadāō wodi mæmpo wææ Ede ingacāimpa.

²⁹ Ede wodi mæmpo wææ Ootowee, Ootowee wodi mæmpo wææ Ediyedede, Ediyedede wodi mæmpo wææ Oodīi, Oodīi wodi mæmpo wææ docā Māatato ingacāimpa.

³⁰ Mānīi docā Māatato wodi mæmpo wææ docā Debii, mānīi docā Debii wodi mæmpo wææ Timeōnō,

Timeōnō wodi mæmpo wææ docā Oodaa, docā Oodaa wodi mæmpo wææ wacā docā Ootee,

mānīi docā Ootee wodi mæmpo wææ Ōōnāō,

Ōōnāō wodi mæmpo wææ Ediyaquimō ingacāimpa.

31 Ediyauquimō wodi mæmpo wææ Mēedeā,
Mēedeā wodi mæmpo wææ Mēna,
Mēna wodi mæmpo wææ Māatata,
Māatata wodi mæmpo wææ Nāatāni in-
gacāimpa.

32 Nāatāni wodi mæmpo wææ Awēnē Dabii,
Awēnē Dabii wodi mæmpo wææ Yæte,
Yæte wodi mæmpo wææ Obedo,
Obedo wodi mæmpo wææ Boodo,
Boodo wodi mæmpo wææ Tāna,
Tāna wodi mæmpo wææ Nāatōō ingacāimpa.

33 Nāatōō wodi mæmpo wææ Āmīnadabo,
Āmīnadabo wodi mæmpo wææ Adāmīi,
Adāmīi wodi mæmpo wææ Adōni,
Adōni wodi mæmpo wææ Etedōō,
Etedōō wodi mæmpo wææ Pade,
Pade wodi mæmpo wææ wacā docā Oodaa
ingacāimpa.

34 Mānīi docā Oodaa wodi mæmpo wææ
Aacobo,
Aacobo wodi mæmpo wææ Itæca,
Itæca wodi mæmpo wææ Abadāō,
Abadāō wodi mæmpo wææ Tade,
Tade wodi mæmpo wææ Nāacodo in-
gacāimpa.

35 Nāacodo wodi mæmpo wææ Tedogo,
Tedogo wodi mæmpo wææ Dagao,
Dagao wodi mæmpo wææ Pedego,
Pedego wodi mæmpo wææ Eebedo,
Eebedo wodi mæmpo wææ wacā docā Tāna
ingacāimpa.

36 Mānīi Tāna wodi mæmpo wææ Caināō,
Caināō wodi mæmpo wææ Adapacadæ,
Adapacadæ wodi mæmpo wææ Temō,
Temō wodi mæmpo wææ Docā Nōwee,
Docā Nōwee wodi mæmpo wææ Nāmecco in-
gacāimpa.

37 Nāmecco wodi mæmpo wææ Māatotadēō,
Māatotadēō wodi mæmpo wææ Ēnoco,
Ēnoco wodi mæmpo wææ Aadedo,
Aadedo wodi mæmpo wææ Māadadede,
Māadadede wodi mæmpo wææ wacā docā
Caināō ingacāimpa.

38 Docā Caināō wodi mæmpo wææ Ēnoto,
Ēnoto wodi mæmpo wææ Teto,
Teto wodi mæmpo wææ Adāō,
Adāō wodi ingante nē badongaingā iñōmō
edæ monō Mæmpo Wængongui Inongā
ingacāimpa. Mānīnāni iñōmō edæ
Itota mæmæidi ingadānīmpa.

4

*Itota wēncæ wēncæ cæccæcāimpa, ante wēncæ
cæcampa*

(Māateo 4.1-11; Māadoco 1.12-13)

1 Mānīi Oododānonga quēwēninque
Wængongui Tæiyæ Waēmō Ōnōwoca ingante
ædæmō ēwocacā inongā inte Itota iñōmō
wadæ gocantapa. Goyongante Wængongui
Ōnōwoca tōmengā ingante ōnōmæca ænte

māocā gogacāimpa. ² Godinque coadenta
ēōnæ mānimpoōnæ quēwēñongante wēnæ
awēnē pōninque, Wēnæ wēnæ cæe, ante an-
caa cædongāimpa. Itota iñōmō mānimpoōnæ
cænāmai iñingā inte edæ iñique bayonte
gæwænte wæcantapa. ³ Adinque wēnæ
awēnē tōmengā ingante,

—Bitō nāwangā Wængongui Wēmi iñōmi
inte dica inçæ pāō āmi ba cæmāimipa.

⁴ Āñongante,

—“Cæntedō quēwengui i. Iñæmpa
Wængongui nānō apænedō ante tōmānō
ante ēñente quēwengæimpa,” ante
yewæmonte ongō apa, āninque Itota edæ
Baa angacāimpa.

⁵ Ayæ Itota ingante onquiyaboga ænte
mæicā æite ongōñongante wēnæ awēnē
wæætē inguipoga awēnē odeyeidi ōmæ
tōmāo ongōñōmæ adoyōmō a ongonte bai
adotedæ odōmongā acantapa. ⁶ Odōmongā
ayongante Itota ingante āninque wēnæ
awēnē wæætē,

—Awēnēidi waincōnē pōni ongōninque
waēmoncooga mongæninque tæi
piñæninque tōmēnāni nempo quēwēnāni
iñānite nangui ānāni ēñente do cædānīpa,
ante abii. Tōmēnāni waēmō pōnī nāni
ēmōmāmo ante æcānō ēmonguingā, ante,
Tæi piñænte nāni ēnepodō ante æcānō
empouingā, ante, botō iñōmō edæ do
ænte ēnepogaīmo inte tōmēmoque nē āmo
inte godōmo ænānīpa. Iñique bitō imite,
Bado, godōmo æe, āmopa. ⁷ Iñique bitō
mānīncoo æncæte ante botō weca ædæ
wææñinque, Tatānabi bitō Wængongui bai
iñōmi īmīpa, āmi adinque botō wæætē,
Bado, bitō tōmāmæ Awēnē babīpa, ante
edæ pōnōmo æmāimīpa, ante wēnæ awēnē
ānewengantapa.

⁸ Angā ēñēninque Itota,

—Īmai ante yewæmongatīmpa. “Awēnē
Wængongui weca ædæ wæænte tōmengā
ingante apænedinque, Bitō adobique
Wængonguimi imidō angūēnē, ante wat-
apæ apænecæbiīmpa. Ayæ, Wængongui
beyænque cæcæbiīmpa,” ante wææ
yewæmonte ongō apa quēwē, ante Itota
angacāimpa.

⁹ Wēnæ awēnē ayæ Itota ingante Eedo-
tadēē ænte māocā goyongante Wængongui
oncō ñænæñ oncōmāa ænte mæicā æicantapa.
Æite næ gongæñongante wēnæ awēnē
wæætē, Bitō nāwangā Wængongui Wēmi
īmīpa, ante acædānīmpa, ante bitō to
wæibāwe. ¹⁰ Āninque wēnæ awēnē
godōmenque apænedinque, “Īmai ante do
yewæmonte ongonpa, Bitō imite wææ aacædānīmpa, ante cædinque
Wængongui tōmengā anquedoidi iñānite da
pōnongā

¹¹ pōninque bitō imite iñæ æmpodāni iñinque,

bitō dicaa tee tēwadāmaī incæbiimpa,”
ante yewæmongatimpa cæbii.

¹² Āñongā Itota wæætē,

—Īñæmpa ĩmaī ante ingatimpa. “Bitō,
Mōnō Awēnē Wængonguī æbānō cæquingāā,
ante acæte ante cædāmaī incæbiimpa.
Ēñēnāmaī cæbo incæte edæ mōnō Awēnē
Wængonguī botō ĩmote cōwē wææ aaquingā,
ante acæte ante wēnæ wēnæ cædāmaī
incæbiimpa,” ante wææ yewæmonte ongō
apa ānewēē, Itota angacāimpa.

¹³ Ante Itota angā ate wēnæ awēnē incæ,
Itota wēnæ wēnæ cæcæcāimpa, ante nānō
ānewēnō ĩnque cædinque ĩncayæ ate nānō
ponte cæquinque edæ wadæ gogacāimpa.

Gadideabæ godinque Itota tāno cæcampa
(*Māateo 4.12-17; Māadoco 1.14-15*)

¹⁴ Itota ĩñōmō Wængonguī Ōñowoca nānō
tæī piñæñō ēwocadinque Gadideabæ adodō
pongacāimpa. Do pongāimpa, ante adinque
wadāni wayōmō gode ā gode ā cædāni
ēñengadānimpa. ¹⁵ Tōmengā ĩñōmō māñiōmæ
wayōmō wayōmō godinque tōmēnāni nāni
odōmōincōnē go guite go guite cædinque
odōmote apænecā adinque tōmānāni, Waa
pōñi odōmote apænecampa, ante tede-
gadānimpa.

Nāatadeta ĩñōmō ponte Itota apænecampa
(*Māateo 13.53-58; Māadoco 6.1-6*)

¹⁶ Wæætē Nāatadeta tōmengā nānō
pægaiñōmō pōninque tōmēnāni guēmanguīōnæ
ĩñonte Itota nānō cōwē cæī baī ñowo
cæcantapa. Oodeoidi Wængonguī
apænecā nāni ēñente yewæmongainta
ate odōmōincōnē go guidinque tōmengā
māninta ate apænecæte ante ængæ ganticā.
¹⁷ Adinque tōmengā ingante Itaiya wodi
Wængonguī beyæ nānō yewæmongainta
pædæ pōñōnāni ængantapa. Æninque,
Māñiñōmō yewæmonte ĩ, ante ñi cæpote
adinque, ĩmaī yewæmonte ongompa, ante
apænecantapa.

¹⁸ “Wængonguī Awēnē Ōñowoca botonga
pō guicā ate botō tōmengā ingante
ēwocabopa.

Īninque tōmengā botonga gao cæte
baī cædinque tōmengā nānō tæī
piñæmāmo da pōñōninque botō ĩmote
angantapa.

Bitō ōmaadāni wæwēnāni ĩnānite Wængonguī
Awēnē waa pōñō cæcæcāimpa, ante
watapæ apænēbi ēñencædānimpa, an-
gacāimpa.

Nē tee mōnete baī wædāni ĩnānite bitō,
Wængonguī pōñō wi ænecā beyænque
mīnitō abæ tawænte gocæmīimpa,
ante godō apænēbi ēñencædānimpa.

Nē babetamōnāni ĩnānite, Mīnitō wæætē
waa acæmīimpa, ante bitō godō
cæcæbiimpa.

Piinte cædāni ate wæwente quēwēñōnānite
bitō wæætē gā pe æmpobi abæ
tawænte baī gocædānimpa.

¹⁹ Ayæ, Wængonguī Awēnē nānō waadete
cæquīnepo do batimpa, ante apænēbi
ēñencædānimpa, ante Wængonguī botō ĩmote
do da pōñongā pōmo ĩmopa.”

²⁰ Ante Itaiya wodi nānō yewæmongainta
adinque adodō nā nā capodinque
māñiñōmō nē cæcā ingante pædæ
godōninque Itota tæ contactantapa. Māñōmaī
cæcā adinque tōmēnāni nāni odōmōincōnē
nē ongōnāni tōmānāni tōmengā ingante cōwā
adānitapa. ²¹ Ayōñānite,

—Wængonguī botō ĩmotedō ante apænecā
ēñēninque nāni yewæmongaiñō baī
ñowoñæ ēñēñōmīni edæ do ĩnque ba
amīnīpa.

²² Ante apænecā ēñēninque tōmānāni,
Tōmengā nangui waadete pōñō tedecampa,
ante apænedinque tōmengā ingante waa
adinque guīñente wædānitapa.

—Īngā ĩñæmpa Ootee wengā ĩmaingā
inte bamōnengæ māñōmaī cæcampa, ante
awædō, ante nāni caboque tededānitapa.

²³ Māñōmaī ante wæyōñānite Itota
tōmēnāni nāni pōñēnō ante ōñowēnenque
ēñēninque,

—Botō ĩmote apænedinque mīnitō, “Bitō
dotodo baī ĩñōmi inte nāmā incæ cæte waa
babāwe,” ante dodāni nāni angaiñō baī
ante tedomīni awædō. Ayæ, “Capēnaōmō
ĩñōmō bitō waa cæbi adinque tededāni
ēñēmōnīpa. Māñiñōmō bitō cædinō baī
tōmēmi ēñagaiñōmō adobaī wī cæbii,” ante
wæmīni abopa.

²⁴ Āninque Itota godōmenque apænedinque,

—Nāwangā āmopa. Wængonguī beyæ nē
apænecā ĩñōmō tōmengā quēwēñiñōmō
ponte apænēyongante, Wī ēñēñē wædō,
ante Baa āñānīpa. ²⁵ Nāwangā edæ āmo
ēñēdāni. Docā Ediya wodi quēwengāñedē
mēa go adoque wadepo ayæ tæcæ wadepo
ĩñonte tōmēnāni ōmæ tōmāo nāni gæwænte
wægaiñāmo baquinque cōñæ cædāmaī
ingatimpa. Māñiñedē Idægobæ ĩñōmō
owæmpōñāni nangui ĩnāni quēwēñōñānite,
²⁶ tōmēnāni weca Ediya ingante da
godōnāmaī inte Wængonguī wæætē edæ,
Bitō Tidōo eyequeī gote Tadezata ĩñōmō
quēwengā owæmpōingā weca goe, angā
gogacāimpa. ²⁷ Adobaī Wængonguī beyæ nē
apænegaingā Editeo wodi quēwengāñedē
Idægobæ æmontai nē baadāni nangui
ĩnāni ĩñōñānite Wængonguī tōmēnāni ĩnānite
wadæ caadāmaī inte wæætē edæ Tidiabæ
quēwengā Nāāmō ingante wadæ caacā
waintai baagacāimpa.

²⁸ Ante Itota apænecā ēñēninque
māñincōnē ongōnāni tōmānāni piinte āñāni
badānitapa. ²⁹ Āñāni badinque tōmengā

ingante tōmēnāni nāni quēwēñōmō yabæ ññō wido cædānitapa. Ayæ tōmēnāni nāni mænonte quēwenquidi tōmāne ænte māo godinque tōmēnāni, Bæ tamō guidōmēmæ tæ wææncæcāimpa. ³⁰ Ante cæyōnāni, Itota ññōmō tæcæguedē godinque aamō cæte wadæ gogacāimpa.

Itota angā ēñente wēnæ incæ tao gopa
(*Māadoco 1.21-28*)

³¹ Wadæ godinque Gadideabæ Capēnaomō nāni quēwēñōmō pōninque Itota tōmēnāni nāni guēmanguionæ bay-ontē tōmēnāni ññānte odōmonte apæncæ ēñēnānitapa. ³² Ēñēñōnāni tōmengā nāmā tæi piñæninque nē angā ñnongā inte nō odōmonte apæncæ ēñente wædinque tōmēnāni, Æ tōmengā ññōmō nō pōni odōmonte apæncæ ēñēmōnipa, ante wædānitapa.

³³ Māniñedē edæ onguñængā wēnæ wentamō ewocacā tōnō nē quēwengā ññōmō tōmēnāni odōmōincōnē a ongōninque ññontobæ yedæ ante aa pecantapa.

³⁴ —Quimæ quēwē. Bitō Itota Nāatadeta quēwēñimi inte quñante mōnatō weca pōmii. Mōnatō ñmōnate edæ æmæwo wido cæcæte ante wabānō pōmitawo. Bitō æmōmidō ñmii, ante botō do atabopa. Bitō Wængonguī Tæiyæ Waēmō Wēmi ññōmi ñmipa, ante edæ do ēñēmopa.

³⁵ Ante tedeyongante Itota wææ āninque, —Apocæñē quēwenguēñē tedewēē. Waocā baōnē quēwēñōmi inte edæ tao gobæwe.

Angā ēñēninque wēnæ guiquēñē tōmānāni ayōnāni waocā ingante māo tæ gotodō go wææñongante tōmengā baonga wēnæ wēnæ cædāmaï inte tao gotapa. ³⁶ Itota angā wēnæ tao gocā adinque tōmānāni guñfente wædinque nāmāneque tededinque,

—Tōmengā æbānō cæte nē angā ingāā. ññæmpa nē angā ñnongā inte tōmengā tæi piñæninque wēñæidi nē wentamō ewocadāni ññānte angā tao godāni awedō.

³⁷ Ante pōnente wædinque tōmēnāni, Itota māñōmaï cæcampa, ante tededinque māñiōmæ tōmāo gode ā gode ā cædāni ēñengadānimpapa.

Pegodo nāñōogæ wāñā ingante Itota cæcā gancæ bacā

(*Māateo 8.14-15; Māadoco 1.29-31*)

³⁸ Māñi tōmēnāni odōmōincōnē ongonde apænedinque Itota tao godinque Timōñō oncōnē go guicantapa. Go guiiyongante wadāni, Timōñō nāñōogængā wāñā ññōmō nangui daicawo gawænte nangæ bacampa cæbii, āñāni. ³⁹ Ēñēninque Itota tōmengā weca go gongæninque daicawo inte piinte bai āninque, Idæwaa impa, angā dæ batapa.

Īninque tōmengā gancæ badinque ængæ gantidnque tōmēnāni beyæ cæcantapa.

Nantate wæwēñāni ññānte Itota cæcā waa badānipa

(*Māateo 8.16-17; Māadoco 1.32-34*)

⁴⁰ Nænque gāwadecæ bayonte nantate wæwēñāni ññānte Itota weca ænte pōnāni adinque tōmengā wacā ingante wacā ingante godō gampocā ate tōmēnāni waa badānitapa. ⁴¹ Ayæ waodāni nangui ññāni baōñē wēñæidi quēwēñōñānte Itota angā ēñēninque tao godinque,

—Bitō Wængonguī Wēmi ññōmi ñmipa, ante Yæ āñānitapa.

Īninque Itota, Botō Codito ññōmi ñmopa, ante do ēñēñānimpapa, ante wædinque wēñæidi ññānte, Apocæñē ñmæwedāni, ante edæ wææ angacāimpa.

Itota oodeoidi odōmōincōnē go guiiite apæncæ

(*Māadoco 1.35-39*)

⁴² Ayæ bañnæ ate Itota wayōmō ññōmæca gocantapa. Gocā adinque wadāni tōmengā ingante ante diqui diqui minte tōmengā weca do pōninque, Mōñitō ñmōñite ēmō cæte godāmaï incæbiimpapa, ante wææ cæcæte ante cædānitapa. ⁴³ Ate wædinque tōmengā wææ āninque,

—Botō, Wængonguī Awēñē Odeye nempo watapæ quēwenguñō anguēñē, ante cōwē apænequēñēmo ñmopa. Wængonguī, Māñōmaïñō ante apæncæbiimpapa, ante botō ñmote da pōnongā pōñimo inte botō tōmāñāni quēwēñōmō gote apænequēñēmo inte gobopa.

⁴⁴ Ante Oodeabæ godinque tōmēnāni odōmōincōnē go guii go guii cædinque Itota apæncæ ēñengadānimpapa.

5

Gæyæ nangui pōni dadōwēñānimpapa

(*Māateo 4.18-22; Māadoco 1.16-20*)

¹ Ayæ Itota Guñetadetedepæ wedeca gote ongōninque Wængonguī nāñō apænedō ante apæncantapa. Ēñencæte ante cædinque nangui ññāni godongāmæ pō goto ongonde ēñē congadānimpapa. ² Apæncæ ēñēñōñāni tōmengā gomō ayongā gæyæ nē dadōwēñāni dicamōñæ yamoncæte ante ti wææñinque tōmēñāni nāni ti wææ godimpo mēa wipo gāwapæ wedeca ñmædempo wāi wocæ acantapa. ³ Adinque Itota adoque wipodē Timōñō wipodē guiddinque tōmengā ingante, Tæcæpæñō gāmæñō eyequei wo go wāi wocææ, angā gā go wāi wocængā Īninque Itota tæ contate tōmēñāni ññānte odōmonte apæncæ ēñēñānitapa. ⁴ Tōmēñāni ññānte ñnque apænedinque Timōñō ingante,

—Bitō wipo tæcæpæno godōmenque ænte gobi ate mīnitō dicamōñæ wo guitodonte gæyæ dadonte æncæmīnīmpa.

⁵ Æñongā Timōnō,

—Awēnē ēñēmi. Tōmāā woyowotæ gæyæ dadoncæte ante dicamōñæ ancaā guitodōñōmōni wīi datapa. Incæte bitō āmi beyænque botō Ao ante cæcæboīmpa.

⁶ Ante māo guitodōñōnāni gæyæ nanguī pōni da ate dicamōñæ wodo wægo tengatīmpa. ⁷ Ænīnque Timōnōidi wa wipodē ongōnāni ponte godongāmæ æncædānīmpa, ante omō cædāni adīnque wa wipo ænte pōnāni ate gæyæ mēa wipodē eyede pōni ñōnōnāni ate wipo emā guicæcætīmpa.

⁸ Ænīnque, Itota angā beyænque gæyæ nanguī pōni æmōnīpa, ante adīnque Timōnō Pegodo iñōmō Itota onōwa gāānē ædæ wæænīnque, —Awēnē ēñēmi. Botō wēnæ wēnæ entawēmo iñōmote bitō waemō pōni entawēmi inte nānēnē goe, angacāīmpa.

⁹ Ante guīñente wæyongante nē dadōwēnāni wadāni adobaī, Æbānō cæte nanguī pōni gæyæ dadonte æmōdō, ante wædīnque ancaī guīñēnīnque Timōnō tōnō godongāmæ wædānīta. ¹⁰ Ayæ Timōnō tōnō godongāmæ gæyæ nē dadōwēna Tebedeo wodi wēna Tantiago tōnō Wāō adobaī guīñente wægadāīmpa. Ænīnque Itota iñōmō Timōnō ingante,

—Guīñēnāmāī incæbiīmpa. Gæyæidi gæte bitō æmāī bitō iñcayæ ate waodāni inānite gæte baī cædīnque apænebi ēñēnīnque ponte quēwēncædānīmpa.

¹¹ Angā ēñēnīnque wipo emōnaiya ænte māmō ñā cæcadōnīnque tōmēnāni māincoo tōmancoo edæ emō cædīnque edæ Itota mīñæ wadæ gogadānīmpa.

Nē baadingā ingante Itota wadæ caacampa

(Māateo 8.1-4; Māadoco 1.40-45)

¹² Æncayæ ate Itota wadāni nāni quēwēñōmō gote quēwēñongante wacā cōwē baate ēñawēnongā inte tōmēngā weca ponte guidōmēmæ ædæ wæænīnque angantapa,

—Awēnē, bitō Ao āmi inte wadæ caabi iñīnque botō waintai baabāīmpa.

¹³ Æñongā Itota pædæ wææmpo gampo caadīnque,

—Ao āmpa. Bitō waintai baacæbiīmpa.

Ante tæcæ æñongā ñōmæñintai nānō ēñadintai edæ dæ baadīnque tōmēngā waintai do baacantapa. ¹⁴ Ænīnque Itota tōmēngā ingante,

—Æñēmi. Bitō waintai baadīmi inte wadāni inānite māo apænedāmāī ie. Wæætē, Nāwangā impa, ante acædānīmpa, ante cædīnque bitō, Wængonguī qui, ante nē godongā weca tōingā godīnque waintai bitō baadīntai odōmōmi ædæmō acæcāīmpa.

Ayæ Mōitee wodi wææ ante nānō angaincoo baī ænte pōnīnque bitō waintai bitō baadi beyæ ante edæ, Wængonguī qui, ænīnque nē godongā ingante pædæ godōmi æncæcāīmpa, ante wææ angantapa.

¹⁵ Wææ angā incæte, Itota mānōmāī cæcampa, ante nanguī gode ā gode ā cædāni ēñēnīnque nanguī ināni Itota apænecā ēñēncæte ante ayæ tōmēnāni nāni caate wædō waa bacæte ante goto pō goto pō cægadānīmpa. ¹⁶ Itota iñōmō wantæ wantæ iñō onōmæca nānēnē godīnque Wængonguī ingante wæætē wæætē apænegacāīmpa.

Nē cōmāingā ingante Itota angā dao gocampa

(Māateo 9.1-8; Māadoco 2.1-12)

¹⁷ Ayæ adobaī iñmō iñō iñmō iñō Itota cōwē odōmonte apænegacāīmpa. Māniñedē oodeoidi nāni wææ angāinō ante nanguī adīnque nē ēñēnāni iñōmō nē odōmōnāni inōnānīmpa. Wadāni adobaī, Mōnō wææ angāinō ante ēñēte cæcæīmpa, ante nanguī ānāni guīquēñē Paditeoidi nāni ānāni inōnānīmpa. Ænīnque Itota māniñedē odōmonte apæneyongā mānīnāni nē odōmōnāni tōnō Paditeoidi iñōmō Gadideabæ nāni quēwēñōmō ta Oodeabæ nāni quēwēñōmō ta pōnīnque ayæ Eedotadēē iñōmō ta pōnīnque Itota weca pōnīnque tæ contate a ongōnānīta. Māniñedē wadāni wa wa badīnque wēnæ wēnæ inte wædāni iñōnānīte Itota iñōmō Awēnē Wængonguī nānō tæī piñæñō entawēnīnque nanguī cæcā waa badōnānīmpa. ¹⁸ Ænīnque wadāni nē cōmāingā nānō mōīmpataa æmætætæ æmætætæ bæi ongote næænīnque, Itota weca æte mangui ñō cæcæīmpa, ante pōnānīta. ¹⁹ Ponte ayōnāni wadāni eyede pōni goto ongōnāni adīnque nē ænte māmō pōnīnāni iñōmō, Edō cæte guīquī. Ante wædīnque oncōmāa inō æidāmæ mæī æidīnque dai bæte mæñōniñōmō epæ cædāni ompite gongæñō tōmēnāni cōmāingā mōīmpataa bæi ongōnīnque tōmēngā ingante godongāmæ ongōnāni weca tæcæguedē Itota weca pædæ wæænōnāni ongongantapa. ²⁰ Mānōmāī cædāni adīnque Itota, Nāwangā wede pōnente cædānīpa, ante adīnque,

—Æmigo, wēnæ wēnæ bitō cædīmāmo ante ñōwo ñīmpo cætīmpa.

²¹ Æñongā Paditeoidi tōnō nē wææ odōmōnāni nāmāneque pōnente tēdedīnque, “Wēnæ wēnæ cædingā ingante æcāñō ñīmpo cæquingāā. Ængā iñōmō Wængonguī ingampa diyæ mānōmāī cæquingāā. Edæ babæ ancædō.”

—Æmigo, wēnæ wēnæ bitō cædīmāmo ante ñōwo ñīmpo cætīmpa.

²² Ante pōnēñōnāni Itota tōmēnāni nāni pōnēwēnō ante do ēñēnīnque, —Mīnitō mīmōno quīmæ wēnæ wēnæ pōnēwēmīni. ²³ “Nē cōmāingā nānō wēnæ wēnæ cædīmāmo ante godō ñīmpo cæbopa,”

ante botō Wængongui bai āmo ēñēninque mīnitō guiquēnē, Wængongui ingampa diyæ mǎnōmaī cæquingāā, ante pōnēmīnīpa. Ayæ wæætē, “Ængæ gantidīnque mōimpata ænte dao dao gocæcāimpā,” ante botō Wængongui bai āmo ēñēninque mīnitō adobai, Wængongui ingampa diyæ mǎnōmaī cæquingāā, ante pōnēmīnī imǎimīnīpa, ante awædō. Īñæmpa mǎnōmaīnō ante pōnēmīnī Īnīnque mīnitō edæ æbānō cæquēnēmo āmīnī. ²⁴ Incæte botō Waobo ēñagaīmo inte inguipoga quēwēninque waodāni nāni wēnæ wēnæ cædimāmo ante nē āmo inte pōnō ñīmpo cæbopa, ante mīnitō edæ ēñencæmīnīmpa, ante botō ĩīmaī cæbopa.

Ānīnque nē cōmāingā ingante edæ,

—Bitō ĩmīte āmo ēñē. Ængæ gantidīnque bitō mōimpata topo cæte ænīnque tōmēmī oncōnē næænte goe.

²⁵ Angā ēñēninque cōmāingā ĩningā incæ edæ tōmānāni ayōnāni ængæ gantidīnque, Wængongui ñāō bai ēmōnongā inte pōnō tæī piñænte cæcā æmpopa, ante apænedīnque tōmēngā nānō ōñōnīnta topo cæte tao oncōnē ænte gocantapa. ²⁶ Gocā ate wædīnque tōmānāni, Æbānō cæcāi, ante ēñēnāmaī inte guīfēnte wædīnque, Wængongui bitō ñāō bai ēmōmi inte waa pōnī cæbi amōnīpa, ante watapæ apænegadānīmpa. Ayæ,

—Ñōwo ĩñōmō mā pōnī cæcā amōnīpa, ante ancaī guīfēnte wædānīntapa.

Debii ingante Itota angā tee empote go-campa

(Māateo 9.9-13; Māadoco 2.13-17)

²⁷ Ayæ ate Itota tao gote ayongā odōmāno awēnē nānō ānīnta ante nē ængā Debii ingante acantapa. Tōmēngā ĩñōmō Awēnē nānō æīmpa gāānē tæ contate ongonā adīnque Itota tōmēngā ingante,

—Botō mīñæ pōe.

²⁸ Angā ēñēninque do ængæ gantidīnque Debii mānīncoo tōmancoo ēmō cæte Itota mīñæ wadæ gogacāimpā.

²⁹ Ayæ ate Debii, Itota beyæ, ante tōmēngā oncōnē ææmæ nanguī pōnī cæcantapa. Īnīnque ææmæ becæte ante awēnē beyæ nē æwēnāni nanguī ĩnāni pō tæ contate cæññōnāni wadāni adobai pō tæ contate cæññāni. ³⁰ Adīnque Paditeoidi tōnō tōmēnāni nē odōmōnāni guiquēnē Itota mīñæ nē godāni ĩnānīte piñte ānīnque,

—Odōmāno awēnē beyæ nē æwēnāni tōnō wadāni nē wēnæ wēnæ cædāni tōnō mīnitō quīmæ godongāmæ ponte tæ contate bete cæmīnī.

³¹ Ante pūññōnāni Itota wæætē tōmēnāni ĩnānīte,

—Nē waa ingā guiquēnē, Cæbi waa baboe, ānāmaī ĩñongante nē wēnæ wēnæ ingā guiquēnē dotodo ingante, Cæbi waa baboe, ante do aa pecampa. ³² Pancadāniya,

Nāmā incæ nē nō entawēmo ĩmpa, ante nē ānāni ĩññōnānīte botō ĩñōmō edæ nē dotodo bai adobai ĩñōmo inte tōmēnāni ĩnānīte aa pedāmaī incæboīmpa. Wadāni guiquēnē, Nāmā wēnæ wēnæ cæbo ĩmpa, ante nē ānāni ĩññōnānīte botō, Tōmēnāni, Idæwaa wēnæ wēnæ cæte awædō, ante Wængongui gāmæñō poncædānīmpa, ante cædīnque tōmēnāni ĩnānīte aa pecæ pongaboīmpa, ante Itota apænegacāimpā.

Ee ate cæñnāmaī ingæīmpa, ante nē ānāni (Māateo 9.14-17; Māadoco 2.18-22)

³³ Itota ingante ĩīmaī ante ayæ ānānīntapa. Wāō mīñæ nē godāni ĩñōmō, Wængongui beyæ, ante ee ate cæñnāmaī ĩnānīpa. Ayæ Paditeoidi mīñæ nē godāni adobai ee ate cædānīpa. Bitō mīñæ nē godāni guiquēnē do cænte bete quēwēnānīpa tōō.

³⁴ Ānāni ēñēninque Itota wæætē,

—Onguīñængā nē monguīngā wente ænte pōnāni ĩññōnānīte mīnitō wæætē, Ee ate cæñnāmaī ĩedāni, ante edæ ædō cæte wææ anguīmīnī. Monguīngā nānō wente ænte nē pōnāni bai ĩññōnāni inte botō mīñæ nē godāni ĩñōmō ædō cæte wæwente bai cæñnāmaī inguīñānī. ³⁵ Wæætē ayæ ate guiquēnē, Monguīngā, nāni nē ānongā bai ĩñōmote wadāni ponte botō ĩmote ō ænte gocædānīmpa. Mǎnōmaī cædāni ate botō mīñæ nē godāni ĩñōmō māñīfēdē ate wæætē cæñnāmaī inte wæcædānīmpa, ante Itota apænegacāimpā. ³⁶ Ayæ, Wængongui Awēnē nempo quēwēninque æbānō cæquīi, ante ēñencædānīmpa, ante Itota ĩmæca quēwēnāni nāni cæñnō ante odōmonte ĩīmaī ante apænegantapa.

—Mīncoo badonte ate waocā dicæ adocoo wānā ñænte pancacooga ænīnque pedæcooga pōnō tadōmonguīngā. Mǎnōmaī cæcā ĩnīnque edæ mīncoo incæ do wānā tente baquēnē. Ayæ pedæcoo ēmōnō bai mīncoo wīi adobai ēmōmpa. Mīnitō, Awente bai cæñnāmaī inte mōnō quēwēngæīmpa, ante mīni ānewēnō guiquēnē pedæcoo bai inte wote baquīne ēnepa. Wængongui gāmæñō pōnīnque quēwēncæmīnīmpa, ante botō apænedō guiquēnē mīncoo bai inte quēwēnguīne ēnepa. Īnīnque wote baquīne tōnō quēwēnguīne tōnō ædō cæte mēnea ante ēñente cæquīi. ³⁷ Ayæ adobai yowepæ būnōmæ mīlmæ ænīnque waocā ædō cæte picæ æmontaicadedē godō pe ñīñænguīngāā. Īñæmpa picæ æmontaicadedē pe ñīñængā ĩnīnque edæ tæi æbæ æmæwo goquēnē. ³⁸ Mīlmæ wæætē mīncadedē pe ñīñængæīmpa. Adobai botō odōmōnō mīlmæ bai ĩñonte dodāni nāni odōmōwēnō ædō cæte botō odōmōnō tōnō adoyedē ēñente cæquīi. ³⁹ Incæte, “Gōñæñīmæ ĩñōmō waēmepæ ĩmæmpa,” ante nē bedōmīni inte mīnitō mīlmæ

ædō cæte quingæ bequimīni, ante Itota angacāimpa.

6

Guëmanguïönæ iñonte tõmëmö tä pete cænānipa

(*Mäateo 12.1-8; Mäadoco 2.23-28*)

¹ Ayæ ate guëmanguïönæ iñonte Itota tõmëmoncodë tæcæguedencodë gocantapa. Goyongä tõmengä miñæ nê godāni iñömö tõmëmö inca tä pete æninqe dacæ dacæ cædinque ade cæcæ cæcæ godāni. ² Adinque Paditeoidi guiquenë,

—Iñæmpa, Guëmanguïönæ iñonte mäninö bai cædāmai iedāni, ante dodāni nāni wææ angainö ante munitö eñenāmai inte quimæ cæminii.

³ Ante piññonānīte Itota,

—Docā Dabii wodi tõmengä nānō emiñænāni tõnō òmæpodāni inte gæwænte wædinque æbānō cægadāni, ante yewæmonte õñō incæ munitö iñæmpa adāmai inte bai āmini awædō. ⁴ Wængongui qui, ante nê godōnānique cængui impa, ante wææ nāni angainö bai cædinque dodāni pāō, Wængongui qui, ante ñoncæ ñoncæ cædōnānīmpa. Incæte Dabii wodi Wængongui oncōnē go guidingque māniñ pāō do ænte cæninque tõmengä miñæ nê godāni inānīte godōmenque godongä cænānītapa, ante yewæmonte õñō apa ānewëminii.

⁵ Ante apænedinque Itota tõmënāni inānīte ayæ apænecantapa.

—Botö iñömö Waobo nê eñagāimo iñömö Tæiyæ Awënë inōmo inte edæ guëmanguïönæ Awënë inōmo ïmpa. Ìninqe botö, Guëmanguïönæ iñonte edæ æbānō cæquii, ante adobo nê Åmo ingaïmo ïmpa, ante Itota apænegacāimpa.

Ni cômampingä

(*Mäateo 12.9-14; Mäadoco 3.1-6*)

⁶ Ìncayæ ate guëmanguïönæ adobai waönæ iñonte Itota odeoidi odömöincōnē go guite odömōte apæneyongä onguñængä õnōmpo tõmëmæ inō nī cômampote wædongä inte māniñömö a ongongantapa. ⁷ Māniñedë nê odömōnāni tõnō Paditeoidi guiquenë, Itota wapiticæ cæcä Ìninqe mõnō wæætë pñinte angæïmpa, ante nê ānewënāni inōnānīmpa. Nōwo iñömö tõmënāni, Nōwoönæ guëmanguïönæ ï incæte Itota nī cômampingä ingante, Waa bacæcāimpa, ante cæcä Ìninqe mõnō mǎo piñte angæïmpa, ante babæ cæcæte ante cōwä adānītapa. ⁸ Māniñō, Mōnō piñgæïmpa, ante nāni pōnëwënō ante Itota iñömö õnōwënenque edæ do eñëninque edæ nī cômampingä ingante,

—Bitö ængæ gantidinque tæcæguedë pö næ gongæe.

Angä eñëninque ængæ gantidinque pö næ gongængantapa. ⁹ Ìninqe Itota nê piñte ancædāni inānīte,

—Åmo apænemīni eñëmoedāni. Guëmanguïönæ iñonte mõnō æbānō cæquënëmö ïmōō, ante wææ angatiï, ante pōnëmīni. Mōnō waa cæquënëmö ïmpa, ante pōnëmīnitawo. Wæætë edæ, Mōnō wënæ wënæ cæquënëmö ïmpa, ante pōnëmīnitawo. Guëmanguïönæ iñonte edæ, Quëwencædānīmpa, ante cæquënëmö ïmpa, ante pōnëmīnitawo. Wæætë mõnō edæ òmæe ewënguënëmö ïmpa, ante pōnëmīnitawo. ¹⁰ Åninqe æmætæ gomö æmætæ gomö tõmānāni inānīte adinque nī cômampingä ingante,

—Pædæ pompobi.

Angä eñente cædinque nê cômampodingä incæ pædæ æmpote edæ ædæmō waa empocä bapocantapa. ¹¹ Ìninqe tõmënāni, Guëmanguïönæ incæ mänōmai cæcampa, ante ængui badinque, Itota ingante mõnō æbānō cæquii, ante piñinque nāni cabo nāmāneque tedegadānīmpa.

Itota angä ate dote ganca ināni nê gode ānāni badānīpa

(*Mäateo 10.1-4; Mäadoco 3.13-19*)

¹² Māniñedë Wængongui ingante apænecæte ante Itota ānanquidi æidinque tõmāā woyowotæ apænecæ congantapa. ¹³ Nāō ba adinque tõmengä miñæ nê pōnināni inānīte aa pecä pōnāni ate tõmengä, Botö beyæ nê gode āmini incæmīnīmpa, ante dote ganca ināni mānimpodāni inānīte apænte ængacāimpa. ¹⁴ Tõmengä nānō nê da godōnāni baquināni iñömö edæ ïmai emōnōnānīmpa. Tānocä Timōnō emongä ingä incæte Itota wawo Pegodo pemongacāimpa. Ìngä Pegodo tõnō Æntade nāna caya, Tantiago tõnō Wāō nāna caya, Pedipe tõnō Batodömëe, ¹⁵ Mäateo tõnō Tōmato, Adepeo wengä Tantiago inōnānīmpa. Ayæ, Mōnō òmæ ingæïmpa, ante nangui cædongä inte wacä Timōnō inongäïmpa. ¹⁶ Tantiago wengä Codaa tõnō Itota ingante odömōte nê godonguingä ingaingä inte wacä Codaa Icadīote nāni ānongä inatapa. Mānimpodāni inānīte Itota apænte ængacāimpa.

Tæiyæñāni inānīte Itota gampocä waa badānīpa

(*Mäateo 4.23-25*)

¹⁷ Mānimpodāni tõnō Itota mæmō iñömö wææninque næ gongænte ongongantapa. Māniñömö tõmengä miñæ nê godāni nangui ināni do ponte a ongōnōnānīmpa. Ayæ tõmënāni tõnō wadāni Eedotadëe iñömö quëwënāni tõnō Oodeabæ tõmāō quëwënāni ayæ Tido eyequei Tidōō eyequei gāwapæ wedeca quëwënāni nangui ināni do ponte a ongōnōnānīmpa. Tõmënāni, Itota apænecä

ēñengæimpa, ante ayæ, Wēnæ wēnæ inte wæwēmō inte mōnō waa edæ bacæimpa, ante pōninque a ongōnānitapa. ¹⁸ Ayæ wēnæidi nē wentamō ēwocadāni tōnō quēwente wæwēnāni māñiñōmō ponte ongōnāni inānite Itota adoyōmō wææ pōninque godō cæcā waa badānitapa. ¹⁹ Ayæ, Itota tæi piñænte entawengā inte pōnō cæcā ate waa badānipa, ante adinque tōmānāni tōmengā ingante gampocæte ante cædānitapa.

Mini toquinque, ante ayæ, Mini wæquinque, ante
(Māateo 5.1-12)

²⁰ Ayæ Itota tōmengā miñæ nē godāni inānite gomō adinque apænecā ēñēnānitapa. “Minitō, Botō wæmō imopa diyæ Awēnē Odeye nempo guiquimoo, ante nē wæwēmīni iñōmō watapæ mīni toquinque Wængonguī Awēnē Odeye nempo mīni quēwenguīnō edæ do ēaminīpa,” angantapa.

²¹ “Inguipogaque gæwænte wæmīni inte edæ mīni watapæ toquinque Wængonguī pōnongā tōmo pōni cæncæmīnimpa,” angantapa.

“Minitō inguipogaque wæwente quēwēmīni inte edæ mīni watapæ toquinque Wængonguī pōnō waadete cæcæcāimpa,” angantapa.

²² “Botō Waobo ēñagalimo miñæ gomīni beyænque wadāni mīnitō imīnite badete todinque piinte adinque wido cædānitawo. Botō beyænque mīnitō ēmōwo ante, Wīwa ēmōwo awædō, ante Baa ānānitawo. Edæ mīni waa toquinque inguipogaque mānōmaī cædānipa. ²³ Ōōnædē mōnō ænguīnō ante nangui ongompā, ante pōnēninque mīnitō ñōwodāni nāni piinte cæyedē incæ watapæ toedāni. Iñāni nē piinte cædāni wæmæidi incæ Wængonguī beyæ nē apænegaināni inānite edæ adobai piinte cægadānimpa, ante toquēnē wæwēmīni. ²⁴ Wæætē edæ māincōo nangui nē ēamīni guiquēnē iñcayæ ate mīni wæquinque edæ inguipogaque watapæ quēwēmīnipa,” ante Itota apænecantapa.

²⁵ “Nē tōmo cæmīni guiquēnē iñcayæ ate mīni gæwænte wæquinque edæ inguipogaque tōmo cæmīnipa,” ante apænecantapa.

“Nē Ca ca tomīni adobai iñcayæ ate Ca ca mīni wæquinque edæ inguipogaque tomīnipa,” angantapa.

²⁶ “Minitō imīnite ante tōmānāni waa apænēdāni ininque edæ mīni wæquinque ingæimpa. Iñæmpa iñnāni nē waa apænēdāni adodāni mæmæidi adobai cægadānimpa. Wadāni babæ wapiticæ apænēdāni incæ, Wængonguī beyæ nē apænēbo imopa, ante nē ānewēnāni inānite iñnāni mæmæidi iñōmō adobai

waa apænēgadānimpa,” ante Itota apænēgacāimpa.

Nē piinte cædāni inānite waadete cæcæcāimpa, ante

(Māateo 5.38-48, 7.12)

²⁷ Ayæ godōmenque apænēdinque Itota, “Minitō nē ēñēmīni iñōmīnite āmo ēñēedāni. Minitō imīnite nē piinte cædāni inānite mīnitō wæætē waadete cædāni. Minitō imīnite nē piinte adāni inānite mīnitō wæætē waa cædāni. ²⁸ Wēnæ wēnæ bacæmīnimpa, ante nē ānāni inānite mīnitō wæætē waa apænēte godō cædāni. Minitō imīnite nē wēnæ wēnæ cædāni inānite mīnitō wæætē tōmēnāni beyæ ante Wængonguī ingante apænēdāni. ²⁹ Wacā bitō imite imæmpaga inō tamongā wædīmi inte bitō wæætē æmæmpaga inō dadi ēmæmonte ee ongōmi tamongæ. Ayæ yogui beyæ bitō yabæcoo ō ængā adinque ōnōncapæncōo tōnō ee abi ō ængæ. ³⁰ Māincōo ante nē angā ingante tōmengā nānō ānoncōo edæ ee godōmi ængæ. Ayæ bitō māincōo nē ō ængā ingante, Wæætē adodō pōnōmi æmoe, ānāmaī incæbiimpa. ³¹ Minitō, Wadāni botō imote waa cæcædānimpa, ante wæmīnitawo. Edæ māñinō ante mīni wædō bai adobai wædānipa, ante pōnēninque mīnitō wæætē wadāni tōmānāni inānite waa cædāni,” ante Itota angacāimpa.

³² Ayæ apænēdinque, “Minitō imīnite nē waadedānique inānite waadete pōnēmīni inte wadāni inānite waadedāmaī imīni adinque edæ Wængonguī dicæ mīnitō imīnite waadete pōnō aqingāa. Iñæmpa nē ēñēnāmaī cædāni incæ nē waadete pōnēnānique inānite waadete pōnēninque mīnitō cæganca do cædānipa tōō. ³³ Ayæ adobai mīnitō imīnite waa cædānique inānite waa cæmīni inte wadāni inānite waa cædāmaī imīni adinque Wængonguī mīnitō imīnite dicæ waa aqingāa. Iñæmpa mīnitō cædō bai nē ēñēnāmaī cædāni incæ adobai do cædāni apa cæmīni. ³⁴ Ayæ, Adodō pōnongā æncæboimpa, ante pōnēwēninque mīnitō nē adodō pōnongungā ingante godōmīni inte wadāni inānite godōnāmaī imīni adinque Wængonguī mīnitō imīnite dicæ waa aqingāa. Iñæmpa nē ēñēnāmaī ināni nāni cabo incæ, Adodō pōnongā æncæboimpa, ante pōnēwēninque nē adodō pōnongungā ingante godōninque mīnitō cædō bai adobai cædānipa tōō.”

³⁵ “Wæætē mīnitō imīnite nē piñāni inānite waadete pōnēninque waa cædāni. Ayæ tōmēnāni nāni ānō ante, Adodō pōnōmi æmoe, ante ānāmaī inte ee godōmīni æncædānimpa. Mānōmaī waadete cæmīni ininque mīnitō iñcayæ ate mīni waadete cægāinō beyæ nangui æmaimīnipa. Ayæ mōnō Mæmpo Æibæ pōni nē Quēwengā

iñongante tömengä ingante në waa ate pönënamäi inäni inänite tömengä godö waadete cæcampa. Nê wîwa cædäni inänite tömengä godö waadete cæcampa. Ìninque mînitö tömengä nänö cæi bai adobaï waadete cæmîni Ìninque Mæmpocä waadete nänö entawëno bai mînitö adobaï entawëninque tömengä wëmîni Ìmämînipa. ³⁶ Mönö Mæmpo pönö waadete nänö waa cægai bai mînitö adobaï wadäni inänite godö waadete waa cædäni,” ante Itota angacäimpa.

Wadäni inänite apænte änämaï Ìedäni, ante (Mäateo 7.1-5)

³⁷ Ayæ wæætë Itota Ìïmaï ante apænecantapa. “Wacä ingante apænte änämaï Ìmîni Ìninque mönö Mæmpo wæætë mînitö Ìmînite apænte änämaï incæcäimpa. Ayæ, Wacä nänö tente wæquinque wënæ wënæ cæcampa, ante änämaï Ìmîni ate mönö Mæmpo wæætë, Mîni tente wæquinque wënæ wënæ cæmînipa, ante apænte änämaï incæcäimpa. Wacä wënæ wënæ cæcä ingante mînitö Ìmpo cæmîni ee gocä ate mönö Mæmpo adobaï mînitö Ìmînite Ìmpo cæcä quëwencæmînipa. ³⁸ Wadäni inänite ee godödäni. Mînitö ee godöminäi ænänäni Ìninque wadäni wæætë mînitö Ìmînite ee pönönäni æncæmînipa. Nê pönönäni Ìñömö tömënanäi nänäi tee mäincadedë da wëninque da wæxnonte wancæ wancæ cædinque eyepote wæænguinque eyede pönäi da wëninque mînitö ængucadedë pönö wänæ cædäni edæ æncæmînipa. Edæ mînitö tee mante mîni godöincade incæ adocadeca tee mante bai cædinque Wængonguï mînitö Ìmînite eyepæ pönongä æncæmînipa,” ante Itota apænegacäimpa.

³⁹ Ayæ, Wængonguï Awënë nempo quëwëninque æbänö cæquï, ante ëñencædänimpa, ante Itota Ìmæca quëwënanäi nänäi cæinö ante odömöninque Ìïmaï apænecantapa. “Babetamongä ingante wacä babetamongä incæ ædö cæte mäo odömongä goquingä. Ìñæmpa mänömaï cædinque nänäi babetamoncaya ompite adopiticæ guëa go wææ guibainapa. ⁴⁰ Nê odömönte apæneca Ìñömö nê ëñengä inte odömönongante tömengä nänö nê ëmîñengä guiquënë dicæ godömenque ëñengä ingä. Incæte Ìninque odömönte apæneca ëñëninque tömengä nänö nê ëmîñengä abæ tawëninque wæætë nê odömongä bai bacæcäimpa,” ante Itota apænegacäimpa.

⁴¹ Ayæ apænedinque, “Bitö tönïñacä wædænque wënæ wënæ cæcä iñongante bitö guiquënë nangui bitö wënæ wënæ cædinö ante wædämaï inömi inte tömengä ingante quïnante piinte änëwëmi. Ìñæmpa tömëmi awinca gäänë awæmpa wææ ongompa,

ante adämaï inte bai cæbipa töö. ⁴² Tömëmi awinca gäänë awæmpa wææ ongompa, ante bitö adämaï inte bitö tönïñacä ingante, ‘Biwi, bitö awinca guiyä mä owö bai ate æ wimömoe,’ ante edæ abipa ænguiimii. Ìñæmpa bitö nê wadö tedete wadö cædömi inte edæ tömëmi awinca gäänë wææ ongompa täno wido cæte ate edonque adinque bitö tönïñacä awinca guiyä owodö æncæbiimpa,” ante Itota angacäimpa.

Awæ æbänö iwæ, ante tömenca bete ëñengcäimpa, ante

(Mäateo 7.17-20, 12.33-35)

⁴³ Ayæ godömenque apænedinque Itota, “Waincawæ incæ ædö cæte baaca incaquï. Wæætë wîwa iwæ incæ ædö cæte wainca incaquï. ⁴⁴ Awæ æbänö iwæ, ante ëñencæte ante mönö tömenca tä Pete Bete ëñengcäimpa. Ìgowæñeca æncæte ante waodäni dicæ daa mongæwäa edæ tä Pete ænänäyaa. Yowemö æncæte ante waodäni dicæ daacæña tä Pete ænänäyaa. ⁴⁵ Mönö waocabo Ìñömö adobaï inömi inte cæmompä. Mîmönë mönö pönëmämo eyede tate bai tao godëdinque mönö mänimämoque ante pönëninque tedemompä. Waocä nê waa cæcä guiquënë waa pönäi tömengä nänö pönëno ante entawëninque waa tedecampa. Nê wîwa cæcä guiquënë tömengä nänö wîwa pönëno ante entawëninque wîwa tedecampa,” ante Itota apænegacäimpa.

Nê mænöna ante

(Mäateo 7.24-27)

⁴⁶ Ayæ godömenque apænedinque, “Mînitö Ìñömö botö imote, ‘Awënë, mönitö Awënë Ìmpa,’ ante tedemîni incæte botö änö ante quïnante wîi ëñente cæmîni.

⁴⁷ Nöwo Ìñömö edæ apænebo ëñëdäni. Botö gämæno ponte ëñëninque waocä botö änö ante do ëñente cæcä Ìñömö tömengä Ìïmaï ingampa. ⁴⁸ Waocä adocanque oncö mænnoncæte ante guibæ ææ wodinque dicaboga mænnoncæte ante gönongä bai nê ëñente cæcä Ìñömö adobaï cæcä ingampa. Tömengä oncö tæi mænnoncæte ongö Ìninque æpæ äninque quingæ pö incæte oncö ædö cæte wancæ wancæ cæquï. Ìñæmpa tæi mænnoncæte ongompa. ⁴⁹ Wæætë waocä guibæ ææ wote gönönämaï yabæque oncö mænongä ate yabæque mænnoncæte æpæ äninque pö ate oncö dobæ bogo cæte tæ wææninque æmæwo gopa. Botö apænebo ëñëninque waocä nê ëñënamäi cæcä Ìñömö tömengä nê yabæque mænongä bai inte ocaï incädämaï inte bai ëñënamäi cæcampa,” ante Itota Ìninque apænegacäimpa.

7

Capitāo ingante nē cæcā ingante Itota cæcā waa bacampa

(Māateo 8.5-13)

¹ Ayæ tōmēnāni inānite iinque apænedinque Itota Capēnaōmō nāni quēwēñōmō gogacāimpa. ² Māniñōmō quēwēñinque odōmāno tontadoidi awēnē capitāo ingante nē cæcā iñōmō wēnæ wēnæ badinque æmæwo wæncæ cæcā ingantapa. Awēnē capitāo ingante nē cæcā iñongante awēnē wæætē tōmengā ingante nangui waadecantapa. ³ Iinque, Itota waa cæcā ingampa, ante māmō apænedāni ēñēningā inte tontado capitāo iñōmō oodeoidi inānite nē aadāni nāni Picæncabo inānite apænedinque, Minitō Itota weca godinque tōmengā ingante āmini ēñente pōninque tōmengā wæætē botō imote nē cæcā ingante cæcā waa bacæcāimpa. ⁴ Angā ēñente godinque nē aadāni nāni Picæncabo guiquēnē Itota weca pōninque tōmengā ingante nangui ānānitapa.

—Mōnō oodeocabo iñōmonte māningā tontado capitāo iñōmō mōnō imonte waa cæcampa, ante wædinque bitō tōmengā beyæ waa cæcæbiimpa. ⁵ Tōmengā iñōmō mōnō oodeocabo iñōmonte waadete cædinque, Wængongui apæncæ nāni ēñente yewæmongainta ate mīnitō odōmōincō impa, ante do mænonte pōnongā æmompæ cæbii.

⁶ Ānāni ēñēninque Itota nē aadāni nāni Picæncabo tōnō wadæ gocantapa. Oncō obo pōñōnānte tontado capitāo iñōmō tōmengā guiddēnāni inānite, Go bee tēninque botō beyæ Itota ingante iimāi ante apæneedāni, angantapa. “Awēnē ee ongōe. Botō waēmō imopa diyæ bitō botō oncōnē pō guiquimii, ante capitāo bitō imite angampa,” ante apæneedāni, angā ponte apænedānitapa. ⁷ Ayæ adobaī, “Botō wii waēmō inōmo inte edæ bitō weca pōnāmai intabopa. Incæte bitō adoyōmō ongōninque āmi iinque botō imote nē cæcā waa bacæcāimpa. ⁸ Bitō iñōmō Awēnē Wængongui ingante nē ēñente cædōmi imi bai botō adobaī wacā awēnē ingante nē ēñente cæbo imopa. Iinque botō awēnē ēabo inte botō awēnē beyænque āmo ēñēninque tontadoidi wæætē guñente wædinque botō āno ante cædānipa. Iinque adocanque ingante botō, Goe, āmo ēñēninque edæ do gocampa. Wacā ingante, Pōe, āmo ēñēninque edæ do pongampa. Ayæ botō imote nē cæcā ingante, Cæe, āmo ēñēninque edæ do cæcampa.” Mānōmāinō ante Itota ingante botō beyæ ante apænemini ēñengædāni, ante tontado capitāo iñōmō tōmengā guiddēnāni inānite angā godinque tōmēnāni wæætē capitāo

nāno āno bai ante Itota ingante adodō ante apænedānitapa.

⁹ Mānōmāinō ante tontado awēnē beyæ apænedāni ēñēninque Itota wæætē, Māningā tontado awēnē iñōmō waa pōni ēñengampa, ante wædinque godongāmæ ongōnāni inānite,

—Nāwangā āmopa. Mōnō idægocabo iñōmonte māningā wede pōnengā ingā bai adocanque incæ edæ dæ angā awædō, angantapa.

¹⁰ Ayæ nē bee tencæ pōnināni oncōnē wadæ gote ayōnāni capitāo ingante nē cæcā iñōmō do waa bacā agadānipa.

Æmæwo wæningā ingante Itota angā ñāni omæmongampa

¹¹ Itota iñōmō iimō ate Nāino nāni quēwēñōmō gocæte ante goyongante tōmengā nāno nē ēmiñænāni tōnō wadāni nangui ināni godongāmæ gogadānipa. ¹² Māniñōmō yabædemō obo pōñongā onguiñængā æmæwo wæningā ingante næænte pōnānitapa. Tōmengā badā owæmpoingā inongā inte tōmengā wengā adocanque wængā wædinque pongantapa. Ayæ māniñōmō quēwēnāni nangui ināni wāānā tōnō godongāmæ pōnāni acantapa. ¹³ Wāānā ingante adinque Itota tōmengā tōnō guā wæwente bai pōnēninque,

—Wædāmai iē.

¹⁴ Āninque do wæningā ingante tōmēnāni nāni daga wenguimpa gāānē ponte gam-pocā ate nē næænīnāni næ gongænānitapa. Itota iñōmō,

—Edēnīmi, bitō imite āmopa. Ængæ gantie, angantapa.

¹⁵ Ēñēninque nē wæningā incæ ængæ gantidinqe tæcæ tedecā adinque Itota wāānā ingante pædæ godongā ængantapa. ¹⁶ Itota mānōmai cæcā adinque tōmānāni nangui guñente wædinque Wængongui ingante wat-apæ apænedinque,

—Wængongui beyæ nē apæncæ tæi ēmongā inongā inte mōnō weca a ongon-gā amompæ, ānānitapa.

Ayæ,

—Wængongui quimō iñōmonte Wængongui incæ mōnō weca ponte godongāmæ cæcampa. Nāwangā impa, ante nangui todānitapa.

¹⁷ Ayæ Oodeabæ tōmāo quēwēnāni inānite wayōmō gomonga quēwēnāni inānite māo gode ā gode ā cæte, Itota æbānō cæcā, ante apænedāni ēñengadānipa.

Wāo tōmengā miñæ nē goda inate da pōnongā pōnapa

(Māateo 11.2-19)

¹⁸ Wāo miñæ nē godāni adobaī, Itota æbānō cæcā ingāā, ante ēñēninque Wāo ingante māmō apænedāni ēñengantapa. Māniñō ante apænedāni ēñente wædinque

Wäo iñōmō tōmengā mīñæ nē goda mēnaa inate āñecā pōnatapa. ¹⁹ Pōna adinque Wäo tōmēna inate, Mīnatō mōnō Awēnē weca godinque botō beyæ ante iīmaī ante äeda, angantapa. Awēnē ēñēmi. Bitō iñōmō dodāni nāni, Nē Ponguingā, angaiīmi adobi imitawo. Wæætē tōmēnāni nāni nē angaiīmi ināmaī imi iñinque bitō wæætē, Wacā ponguingā, ante wānō cōedāni, āmitawo. Æbānō mōnitō cæquimōnii, ante botō beyæ ante ēñencæte ante äeda. Ante Wäo mēnaa inate Itota weca da godongā godatapa. ²⁰ Godinque Itota weca pōninque iīmaī ante apænedatapa.

—Wäo æpænē nē guidōnongā iñōmō mōnatō imōnate da pōnōninque bitō imite iīmaī angampa. Awēnē ēñēmi. Dodāni nāni, Nē Ponguingā, angaiīmi bitō iñōmō adobi imitawo. Wæætē tōmēnāni nāni angaiīmi ināmaī imi iñinque bitō wæætē, Wacā ponguingā, ante wānō cōedāni, āmitawo. Æbānō mōnitō cæquimōnii, ante ēñencæte ante Wäo mōnatō imōnate da pōnongā pontamōnāna, ānatapa.

²¹ Māñīfēdē incæ daicawo gawænāni tōnō wēnæ wēnæ inte wæwēnāni nangui ināni inānite Itota godō waa cæcā waa badānitapa. Wēnæidi nē wiwa ewocadāni inānite tōmengā wido cæcā ate waodāni nangui ināni waa badānitapa. Babetamōnāni nangui ināni inānite tōmengā gampomongā waa bamōnānitapa. ²² Iñinque mǎnōmaī cæcā waa ayōnate ñowo pōna inate Itota,

—Botō godō cæbo ate babetamō inīnāni incæ do adāni amīnāna. Cōmante inīnāni incæ waa bate dao dao godāni amīnāna. Baate inīnāni incæ ñowo æmontai waemontai baadāni amīnāna. Babetamonca ināni iñōnānite botō godō cæbo ate òmōmonca ēñēnāni badāni amīnāna. Do æmæwo wænte òñōnāni iñōnānite botō godō cæbo ate ñāni òmæmonte quēwēnāni amīnāna. Ōmaadāni inte wæwēnāni inānite botō Wængongui Awēnē pōnō waa cæcæcāimpa, ante watapæ apænebo ēñencædānāna. Iñinque mīnatō ponte ēñēñōmīna botō æbānō apænebo ēñēmīnatawo, ante ayæ, Botō æbānō cæbo amīnatawo, ante mīnatō ñowo wæætē Wäo weca gote mǎo apænemīna ēñengæda, angantapa.

²³ Ayæ, “Botō beyæ waocā wīl piinte wadæ gocā iñōmō tōmengā nānō watapæ toquinque oda cædāmai incæcāimpa, ante Wäo ingante mǎo apænemīna ēñencæcāimpa,” ante Itota angantapa. ²⁴ Angā ēñēninque Wäo beyæ nē āniina wadæ goda adinque Itota wæætē godongāmæ ongōnāni inānite, Wäo æbānō ingāā, ante apænecantapa. “Mīnitō guiquēnē quīnō acæte ante ònōmæca gomīnitapa. Cæwīpa woboyæ pæmænte ate æmæñō ædæ æmæñō ædæ gobaingā

ingante mīnitō dicæ acæ gomīnitawogaa. ²⁵ Iñinque edæ quingānō ingante acæte ante gomīnitapa. Edæ waocā weocoo waemconcoo mongænongā ingante mīnitō dicæ acæ gomīnitawogaa. Iñæmpa weocoo waemconcoo nē mongænāni iñōmō nāmanque ante pōnente nāni ænte mǎincoo beyæ ante nē towēnāni inte tōmēnāni iñōmō awēnē oncōnē quēwēnāni apa quēwēnāni.

²⁶ Iñinque edæ quīnante gomīnitawo. Mīnitō mīni nē go acæ cædongā iñōmō edæ Wængongui beyæ nē apæñecā ingantawo. Nāwangā impa. Wængongui beyæ nē apæñecā Wäo ingampa. Incæte tōmengā wīl Wængongui beyæ nē apænegaināni bai inongā inte godōmenque nangui cæcā ingampa, ante apænebo ēñēmaimīnāna. ²⁷ Wængongui iīmaī angampa, ante yewæmongatimpa.

‘Botō beyæ nē apæñecā ingante da godōmo godinque tōmengā taadō tāno beyænte bai cæcæcāimpa.

Tōmengā bitō Codito imi beyæ ante taadō waa pinonte bai waa cæcæcāimpa.’

Mǎnōmaīnō ante dodāni adocā Wäo ingantedō ante pōnēninque yewæmongadānāna.

²⁸ Ñowo iñōmō āmo ēñēdēni. Imæca mīni ēñagaincabo iñōmīnate æpænē mōnō nē guidōnongā Wäo adocanque ñæñængā iñongante wacā tōmengā bai edæ dæ angampa. Incæte Wængongui Awēnē Odeye nempo quēwēnāni iñōnāni adocanque guiyangā pōni ingā incæte Wäo pōnōmenque wædangā ingampa,” ante Itota apæñecantapa.

²⁹ Itota mǎnōmaīnō ante apæñecā nē ēñēnāni iñōmō odōmāno awēnē beyæ nē æwēnāni incæ wadāni incæ tōmānāni Wäo nānō nē guidongainānique inōnānāna. Iñinque tōmēnāni, Wængongui nō cæcā ingampa, ante tōmānāni apænedānāna.

³⁰ Paditeoidi tōnō idægoidi nāni wææ angainō ante nē ate ēñēnāni guiquēnē Wäo nānō guidongaināni ināmai inōnānāna. Iñinque tōmēnāni guiquēnē Wængongui gāmæñō ponguēnēnāni incæte edæ Baa ānānitapa.

³¹ Godōmenque apænedinque Itota iīmaī angantapa. “Mǎnōmaī i iñinque inguipogaque ante nē quēwēnāni iñōmō quingāmē bai inānāna. Quiēmē bai edæ quēwēnānāna. ³² Wēñænāni mōnō godonte æñīñōmō tæ contate owempodāni nāni owempodō bai edæ adobai cædānāna, ante awædō. Wēñænāni nāni owempote cæcabo incæ æmæmæ cæte bai owempote cædinque wadāni inānite aa pedānāna. ‘Mīnitō beyæ òñña we we òññōmōni mīnitō wæætē edæ āwadāmaī imīnitapa tōō,’ ante owempod-inque wēñænāni piinte tedewēnānāna. Ayæ wæætē, Waocā do wængā ate nāni wæbai,

ante wēñænāni nāni owempote cæcabo iñōmō, 'Mōnitō Ca ca wæyōmōni mīnitō wæætē edæ wædāmaī iīmīni wæmōnipa,' ante pīlinque aa pedāni bai ñōwodāni iñōmō edæ adobai pīinte tedewēnāni inānīa."

³³ "Edæ iīmaī impa. Wēñænāni nāni wædō bai Wāō æpænē mōnō nē guidōnongā iñōmō cænguī cænāmaī yowepæ biīnōmæ nāni wædænque tī nāmæ bedāmaī ponte quēwēñongante mīnitō guiquēnē, Wēñæ tōnō Wāō quēwengampa, ante pīiminīpa. ³⁴ Ayæ wæætē botō Waobo ēñagaīmo inte tōmāā cænguī cænte yowepæ biīnōmæ bete mīnitō weca ponte quēwēñōmote mīnitō guiquēnē, Cæowæobi inte cæmīpa. Beowæobi inte bebīpa, ante badete tominīpa. Ayæ godōmenque, Odōmāno awēnē beyæ nē wēñænāni tōnō wadāni nē ēñēnāmaī cædāni iñōnānite bitō tōmēnāni æmīgo imipææ, ante botō imote pīlinque mīnitō wēñænāni nāni pīinte aa pedō bai ānewēmīnīpa tōō. ³⁵ Incæte, Nē nō ēñēnāni iñōmō nō cædānīpa, ante adīnque, Nāwangā nō ēñēnānīpa, ante mōnō ēñengæīmpa," ante Itota apænegacāīmpa.

Paditeocā Timōnō oncōnē Itota go guīite ēñacampa

³⁶ Ayæ ate adocanque Paditeocā incæ Itota ingante, Botō oncōnē pō cæe, angā Ao ante Paditeocā oncōnē godīnque pō guīite cæ congantapa. ³⁷ Tōmēnāni quēwēñōmō onquīyængā nē wēñæ wēñæ cæte quēwengā inongāīmpa. Tōmēngā iñōmō, Paditeocā oncōnē Itota cæncongampa, ante tededāni ēñēninque oguī wapæ dīca adabatoto waincadēde pe ñīñænte nææante pongantapa. ³⁸ Pō guīidīnque tōmēngā Itota ōñōwaca inō pō næ gongæīnque Ca ca wæcantapa. Ca ca wæyongā Itota ōñōwaca inō ōmæ petæ petæ wææ aa bee adīnque onquīyængā wæætē tōmēngā ocaguīncōca wadæ cæwacantapa. Ayæ queē bewadīnque oguī wapæ gao cæwacantapa. ³⁹ Mānōmaī cæcā adīnque, Pō cæe, nē āningā inte Paditeocā iñōmō nāmāneque pōnēninque, "Itota iñōmō Wængonguī beyæ nē apæneccā inte bai tōmēngā, Æcānō botō imote gam-pocāā, ante ayæ, Quīēmē bai onquīyængā ingāā, ante ēñencædongāīmpa. Iñæmpa nē wēñæ wēñæ cædongā ingampa, ante do ēñencædongāīmpa." ⁴⁰ Ante pōnēñongā Itota wæætē,

—Timōnō, bitō imite adodeque apænebo ēñēe.

—Åñongante Paditeo wæætē,

—Ao, nē Odōmōmī īmī, apænebi ēñēmoe.

⁴¹ Angā īnque Itota,

—Onguīñængā adocanque nē godōwengā inte quēwēñongante onguīñæna mēnaa īnante godongā ate debe badapa. Adocanque ingante nanguī quīnīento ēmō

godongā ate nanguī debe bayongante wacā ingante wædænque tincoenta ēmō godongā ate wædænque debe bacampa. ⁴² Nē godōningā nānō ānīmpota ōmæpoda inte tōmēna, Ædō cæte wæætē adodō pōnonguīmōnaa, ante wæyōnate nē godōningā iñōmō edæ, Ōmæpomīna inte mīnatō ædō cæte adodō pōnōmīna ænguīmoo, ante botō æñāmaī inte ñīmpo cæcæboīmpa, angampa. Īnque Timōnō bitō imite āmpa. Mēnaa īnate ñīmpo cæte ānāmaī ingā adīnque nē godongā ingante æcānō godōmenque nanguī waadete pōnengūngāā, ante pōnēmīi.

⁴³ Åñongante Timōnō,

—Wa. Godōmenque nanguī ēmō debe ingā iñōmō tōmēngā wabānō godōmenque waadete pōnēngā īmaingampa, āmpa.

Angā ēñēninque Itota,

—Nāwangā ante pōnēmīpa.

⁴⁴ Ānīnque Itota onquīyængā gāmæñō dadi ēmænte adīnque Timōnō ingante apænedīnque,

—Īngā onquīyængā ingante edæ abi. Botō bitō oncōnē pō guīyōmote bitō, Mēwaquīmæ, ante bitō dīcæ pōnōmīyaa. Tōmēngā guīquēnē ōmæ wææmōnte aa bewadīnque tōmēngā ocaguīncā wadæ cæwacā ae. ⁴⁵ Bitō guīquēnē waadedāmaī inte queē bemōnāmaī iñōmite tōmēngā iñōmō botō pō guīyedē tāno queē bewadīnque cōwē queē bewacā ae. ⁴⁶ Bitō guīquēnē oguīngūipæ gao cæcadāmaī iñōmite tōmēngā iñōmō oguī wapæ gao cæwacā ae. ⁴⁷ Īnque botō, Tōmēngā mānōmaī cæcampa, ante odōmōnīnque bitō imite āmo ēñēe. Edæ tōmēngā nanguī wēñæ wēñæ cæcā īñongante Wængonguī godō ñīmpo cæcā ate tōmēngā wæætē nanguī waadete pōnengampa. Bitō iñōmō edæ wædænque wēñæ wēñæ cæbi iñōmite Wængonguī pōnō ñīmpo cæcā ate bitō wæætē wædænque waadete pōnēmī abopa.

⁴⁸ Ānīnque onquīyængā ingante apænedīnque Itota,

—Wēñæ wēñæ bitō cædīnō ante pōnō ñīmpo cæbo æe.

⁴⁹ Angā ēñēninque wadāni godongāmæ cæ cōnāni guīquēnē godō wæntæ wæntæ ānīnque,

—Īngā iñōmō edæ waocā wēñæ wēñæ nānō cædīnō ante, Pōnō ñīmpo cæbo æe, ante nē angā iñōmō edæ æcānō ingāā.

⁵⁰ Ante wædīnque tedeyōnāni Itota iñōmō onquīyængā ingante,

—Bitō wede pōnēnō beyænque quēwēncæbiīmpa. Nōwo edæ wædāmaī inte goe, angacāīmpa.

8

Itota beycē, ante onquiyænāni godongāmæ cædānīpa

¹ Ayæ ate Itota nanguī ināni nāni quēwēñōmō wayōmō wædænque ināni nāni quēwēñōmō wayōmō wayōmō godinque, Awēnē Wængonguī Odeye nempo watapæ quēwencæmīnīpa, ante waa apænecā ēñengadānīpa. Ayæ tōmēngā tōnō dote ganca ināni mānīpodāni godongāmæ godānitapa. ² Ayæ onquiyænāni adobaī Itota miñæ godānitapa. Tōmēnāni pancadāniya wēnæidi nē wīwa ēwocadāni tōnō nē quēwēngaināni iñōnānite wadāni nantate wæwēngaināni iñōnānite Itota cæcā ate tōmānāni do waa badīnāni inte nōwo tōmēngā miñæ tee empote godāni inōnānīpa. Adocanque Māadiya Māagadadēnā nāni angaingā tōmēngā baonga wēnæidi tiæte ganca ināni tao godāni iñinque tōmēngā ōnonganque badīngā inte Itotaidi tōnō godinque pōnō cæcā inongāimpa. ³ Wacā onquiyængā Wāōnā nānōogængā Tiota guiquēnē Edode nānō ēadincoo nē aacā iñongante Wāōnā iñōmō Totānā tōnō ayæ wadāni onquiyænāni nanguī ināni tōnō adobaī Itotaidi tōnō godongāmæ godinque pōnō cædōnānīpa. Tōmēnāni nāni ēadincoo incæ ænte pōninque Itotaidi beyæ ante pōnō cædōnānīpa.

Waacā nānō quiyadō ante Itota odōmonte apænecampa

(Māateo 13.1-9; Māadoco 4.1-9)

⁴ Nanguī ināni wayōmō nāni quēwencabo wayōmō nāni quēwencabo bacoo ināni godongāmæ ponte a ongōñōnānite Itota apænecantapa. Wængonguī nānō apænedō ante waodāni æbānō ēñēnānīi, ante ēñencædānīpa, ante inguipoga quēwēnāni nāni cæinō ante iīmāinō ante apænecantapa. ⁵ “Waacā nē quiyadongā iñōmō quiyacæ gocampa. Gote quiyayongā pancamonga taadō iñōmō wææmompā. Taadō wæænte eyepodīmō ōñōñonte pinā gāwadāni ædō cæte pæquīi. Ayæ ayamōidi pōninque dobæ ade cæñānīpa. ⁶ Pancamonga guiquēnē dicamontaa iñōmō wææñinque pæquīnāmai gā æidinque oguīmento guiwapa pæquīi. Guiwadāmai inte edæ guingo icadinque tōmencaguī nāñe wæncaguīpa. ⁷ Pancamonga guiquēnē ōmentacodē nānō eyepodīmō iñōmō pæquīnāmai tā bocate gā æiyonte ōmentacoo adoyōmō pō incootonque ganta cæca ate nāñe wæmpa. Wampo incapa pæquīi. ⁸ Wææmonguipoga quiyadīmō guiquēnē tā bocate waa pædinque tōmēmō tiēē ganca mānīpomō nanguī pōni incapa. Quiyacā nānō quiyadō ante edæ botō māninque ante apænebopa.”

Mānōmāinō ante apænedinque Itota ogæ tededinque, “Ēamonca ongonde edæ ēñēedāni,” angacāimpa.

Ōnōmonque ēñente pōnēnāmai inānīpa, ante (Māateo 13.10-17; Māadoco 4.10-12)

⁹ Tōmēngā miñæ nē godāni iñōmō, Itota ēñēmi, ānānitapa. Mānīnō ante apænedinque bitō æbānō ante odōmoncæte ante apænebitawo. ¹⁰ Āññōnānite tōmēngā, “Wængonguī Awēnē Odeye nempo æbānō quēwenguīi, ante mīni waocabo wēēnēñedē mīni ēñēnāmai ingainō ante botō nōwo edonque pōnō apænebo ate mīnitō adomīnique ēñēmīni iīmīnīpa. Wæætē wadāni inānite edæ botō inguipoga quēwēnāni nāni cæinonque ante odōmōinque apænebopa. Edæ tōmēnāni, Awīncaque adinque wīi ædæmō adāni inte ōnōmoncæque ēñēninque ædæmō ēñēnāmai incædānīpa, ante dodāni Wængonguī beyæ ante nāni yewæmongainō bai iñinque bacæimpa, ante botō tōmēnāni inānite mānōmalinonque ante apænebopa,” ante Itota apænecantapa.

Quiyacā nānō cæinō ante pōnente iīmāinō ante ēñengæimpa

(Māateo 13.18-23; Māadoco 4.13-20)

¹¹ Itota ayæ godōmenque apænecantapa. “Botō nē quiyacā nānō cæinō ante apænedinque iīmāinō ante odōmoncæte ante apænetabopa. Tōmēmō quiyadīmō iñōmō Wængonguī nānō apænedō bai impa. ¹² Taadō wæænte ōñōmō botō ānōmō guiquēnē nē ēñēnāni bai impa. Tōmēnāni Wængonguī nānō apænedō ante tæcæ ēñēñōnānite wēnæ awēnē pōninque, Quēwēnāmai incædānīpa, ante cædinque Wængonguī nānō angainō ante ō ængā iñinque tōmēnāni ōmætawēnāni inte ædō cæte pōnente quēwēngūnānīi. ¹³ Dicamontaa wæænte pædīmō bai ināni guiquēnē Wængonguī nānō apænedō ante watapæ ēñente todinque nē Ao ānāni inānīpa. Tōmēnāni iñōmō oguīmento guiwadāmai bai ināni inte wantæ iñō pōnēnāni ate tōmēnāni nāni pōnēnō beyæ ante wadāni piñte cædāni ate tōmēnāni wæætē guīñente wædinque emō cæte godānīpa. ¹⁴ Ōmentacodē wæænte pædīmō bai ināni guiquēnē tōmēnāni ēñēninque godōmenque quēwēñōnāni inguipoga quēwente quīēmē beyænque mōnō wæpāmo pō ate guīñente wædinque pædāmai inānīpa. Māincocoo beyæ ayæ ōnonque towente nāni wædō beyæ tōmēnāni ōmentacoo incootonque nā caate bai cæ iñinque edæ wampo encadānīpa pæquīnānīi. ¹⁵ Onguipoga wainguipoga quiyadīmō bai ināni guiquēnē tōmēnāni nō pōnente waa cæte quēwēnāni inānīpa. Tōmēnāni iñōmō edæ Wængonguī nānō apænedō ante ēñēninque do bæi ongonde

wede pönēnāni inānīpa. Wæntæye ināmai ināni inte tōmēnāni ee cædinque tōmēwæ incate bai waa cædānīpa. Botō mānōmāinō tōmānō ante odōmoncæte ante nē quiyacā nānō cædō ante apænetabopa,” ante Itota apænegacāimpa.

Gongapæncade, ante odōmonte apæncampa

(*Māadoco 4.21-25*)

¹⁶ Ayæ, “Gongapæncade ti wodōnodinque woadāni dicæ owætadē boo cæcadāniyaa. Mōimoga ænōmengadæ inō dicæ concæcadāniyaa. Wæætē, Māniñōmō nē pō guidāni acædānīpa, ante cædinque gongapæncade awæmpa æmongapaa concædāni nāō bæco adānīpa. ¹⁷ Quiēmē ante wē wodonte i inōmō māniñō tōmānō ante inçayæ ate edonque ate bai ēñgæmpa. Quinō nōwo bee ocate bai i inçæ māniñō tōmānō inçayæ ate wī æncate bai inçonte edonque acæmpa,” ante Itota apænegacāntapa.

¹⁸ Ayæ, “Nē eacā ingante godōnāni ængā bai nē ēñgā ingante godō apæneho ēñente entawēninque tōmengā godōmenque ēñente bacæcāimpa. Nē eadāmai ingā guiquēnē tōmengā, Æabopa, ante pōnēninque nānō wædænque pōni ēadincoo inçonte ò ænāni wæcā bai nē ēñēnāmai ingā adobai tōmengā, Entawēmopa, ante pōnengā ininque wædænque pōni nānō entawēnō inçonte edæ ò ænte bai cæbo dæ ba ate wæcæcāimpa cæminii. Æamonca ongonte ēñenguēnē quēwēmīnii,” ante Itota apænegacāimpa.

Itota wānā tōnō tōmengā biwīdi pōnānīpa
(*Māateo 12.46-50; Māadoco 3.31-35*)

¹⁹ Māniñedē tōmengā wānā tōnō tōmengā biwīdi pōninque tōmengā weca guicæte ante cæyōnāni wadāni goto ongōnāni ate wædinque, Ædō cæte guiquīi. ²⁰ Ante wædāni adinque wacā,

—Itota ēñēmi. Bitō badā tōnō bitō biwīdi bitō imite ante oncodo ponte yabæque ongōnānīpa cæbii.

²¹ Ante apæncā ēñēninque Itota,

—Wængonū nānō ānō ēñēninque nē ēñente cædāni inçōmō tōmēnāni botō badā bai botō tōniñadāni bai inānīpa, angacāimpa.

Itota angā ēñente woboyæ æpæ næ gongæmpa

(*Māateo 8.23-27; Māadoco 4.35-41*)

²² Māniñedē tōmengā miñæ nē godāni inānīte Itota,

—Gāwapæ æmæmāa taocæmpa.

Angā ēñente cædinque tōmengā tōnō wipodē guidinque tæcæ taocæ wogaa godānitapa.

²³ Tao wogaa goyōnāni Itota wipodē nāñe ñongæninque edæ mō ñongantapa. Mānōmai mō ñōñongā goyōnānīte woboyæ nangui

pōni pæmæninque edæ æpæ mængonta mængonta pōninque wipodē baguimæ guii adinque tōmēnāni, Æpæ bete wænguī wæ, ante Yæ wædānitapa. ²⁴ Itota weca gote, Æmæmoncæcāimpa, ante tao cædinque,

—Awēnē, mōni Awēnē, ēñenguēnē quēwēe. Bete wæncæ cæmompā cæbii.

Ānāni nāni òmæmonte ængæ gantidinque, Woboyæ æpæ idæwaa mængonta cæbīpa. Næ gongæmāwe, angā. Næ gongæninque ñancæ ñancæ gongæmæmpa. ²⁵ Ayæ tōmēnāni inānīte,

—Mīni pōnēgade inçæ quīnante wīi pōnēmīnii.

Āñongante tōmēnāni ançai guīñēninque, Æbānō anguimōō, ante nāmæneque tede-gadānīpa.

—Inçā inçōmō æcānō inçongā inte mānōmai angā ēñēninque woboyæ inçæ æpæ inçæ næ gongæmpa, ante wæmōnīpa, ante tede-gadānīmpa.

Guedatabæ inçōmō wēncæ inte nē ēnemocā
(*Māateo 8.28-34; Māadoco 5.1-20*)

²⁶ Māniñ Gadideabæ ēmō cæte godinque Itotaidi æmæmāa wogaa tao godinque Guedatabæ pō ti wæænānitapa. ²⁷ Wipodē manta wo cæyōnāni Itota ti wæænte tæcæ òmaa goyongante onguīñængā wēnæidi tōnō nē quēwengā inçōmō māmō bee tengantapa. Inçā inçōmō tōmēnāni quēwēñōmō nē quēwengā ingā inte nōwo wantæpiyæ onçonē quēwēnāmai inte òmaacā quēwēninque woadānidoco cōwē quēwengā inçongāimpa. ²⁸ Itota ingante adinque tōmengā ònōwa inō ædæ wæænīnque edæ Yæ angantapa.

—Itota ēñēmi, bitō Æibæ Quēwengā Wængonū Wēmi inçōmi inçæ quimæ botō weca pōwēē. Botō imote edæ, Æmogate wæcæcāimpa, ante cædāmai imāwe, ante nanguī angantapa.

²⁹ Edæ tæcæ pōñongante tōmengā wentamō nānō nē ēwocadongā ingante Itota, Gobāwe, ante dō angā ēñente wædingā inte nōwo mānōmai angantapa. Māniñ wēncæ inçōmō wantæ wantæ inçonte onguīñængā ingante bæi ongonte bai cædongāimpa. Ininque māningā onguīñængā ingante woadāni daagōmenca edæ ēno pōnō goto wimænte wææ ēno pōnō goto wīwadinque wææ wāñōñōnānīpa. Inçæte tōmengā daagōmē wangō ñæ wangō ñæ cædongāimpa. Ayæ tōmengā ingante wēncæ wæætē wæætē da godongā ònōmæca wodii wīnçonte quēwēñongā inte adocā nōwo Itota weca ponte angacāimpa. ³⁰ Angā ēñēninque Itota wæætē,

—Æmōmidō imii.

Āñongante,

—Botō ēmōwo Deguiōñō ēmōmopa, angantapa.

Edæ tontadoidi Deguiönö nāni ānocabo bacoo ināni bai botö nē ěnemopdāni adobai wēnæidi bacoo inānīpa, ante adinque, Deguiönö ěmōmopa, ante onguiñængā angantapa. ³¹ Wēnæidi guiquēnē Itota ingante wæætē wæætē āninque, Mōnitö ĩmōnite tadōmengadænguiopoga wido cædāmai ĩmāwe, ancaa ānānitapa.

³² Māniñömö odæ wængänāidi nangui ināni ānanquidi a cængōnāni adinque, ĩñömö odæ wængänā baönē āmi go guite quēwenguimōni, ānāni ěñēninque Itota, Ao angā. ³³ ěñēninque waocā baönē quēwente tao godinque wēnæidi odæ wængänā baönē wæætē go guiidāni ate odēncato wæætē ontadāa wæxnōmēmö ĩñömö gāwapæno pogodo wæi guite becadote capo wængadānīpa.

³⁴ Itota mānōmai cæcā ate wædinque odæ wængänāidi nē aadināni guiquēnē pogodo wodii winonte tōmēnāni quēwēñömö māo bee tente apænedinque idōmæ māo gode ā gode ā cæte, Itota mānōmai cæcā wæmōnīpa, ante apænedānitapa.

³⁵ ěñēninque wadāni wæætē, Ābānō cæcāi, ante acæte ante pōnānitapa. Itota weca ponte ayōnāni wēnæidi tōnō nē quēwēningā incæ ñōwo ōnonganque bate weocoo ěñacā inte Itota ōnōwa gāānē ěñē cōngā adinque guñēnte wægadānīpa.

³⁶ Wēnæ tōnō quēwēningā ingante Itota mānōmai cæcā ante nē adināni ĩñömö ñōwo pōnāni inānite, Mānōmai cæcantapa, ante do apænedānitapa. ³⁷ ěñēninque Guedatabæ quēwēnāni tōmānāni ancaī guñēnte wædinque Itota ingante, Mōnitö weca quēwēnāmai ñōwo gobāwe, ānāni ěñēnte wædinque tōmēngā wipodē ĩmāmāa poncæte ante guicā. ³⁸ Adinque wēnæidi tao godāni ate nē ōnonganque bate quēwēngā ĩñömö Itota ingante, Bitö miñæ māobi goboe, angā ěñēninque Itota wæætē, Bitö ee quēwēmi, āninque,

³⁹ —Tōmēni oncōnē adodö godinque, Wængongui æbānō nangui cæcā waa batawo, ante māo apænebi ěñencædānīpa. Angā ěñēninque oncōnē godinque tōmēnāni nāni quēwēñömö tōmāo cægōninque tōmēngā, Itota mānōmai cæcā ate waa batābopa, ante māo apænecā ěñengadānīpa.

Gaido wēñængā beyæ cæcæ goyongante

Itota weocoo onquiyængā gampocampa
(Māateo 9.18-26; Māadoco 5.21-43)

⁴⁰ Itota ĩmāmāa ocæ ěmænte pongā adinque, Āyedēñō ponguingā, ante nē wædināni inte tōmānāni tōmēngā ingante waa ate togadānīpa. ⁴¹ Māniñedē wacā oodeoidi odōmōincō awēnē ĩnongā inte tōmēngā ěmōwo Gaido ĩñömö pō Itota

ōnōwaca ĩnō ædæ wææninque tōmēngā ingante, Botö oncōnē quingæ pōe, ante nangui angantapa. ⁴² Edæ botö wēñængā onquiyængā adocanque ĩnongā inte dote wadepo nānō ěñagai ĩñonte edæ wæncæ cæcampa cæbii, ante wæcantapa.

Īninque Itota tōmēngā miñæ gocantapa. Idōmæ goyongante nangui ināni goto goto pōninque wodo mō ñongæñāni wæcantapa. Wampo ĩmpa goqingā. ⁴³ Māniñedē wacā onquiyængā pongantapa. Tōmēngā ĩñömö wantæpiyæ dote wadepo ĩñonte wepæ wantæ bidāmai cōwē wææ wædinque waa bawēncæte ante cædinque tōmēngā quincōo tōmancōo eyepote pædæ godongā æninque dotodoidi æcāmenque incæ onquiyængā beyæ ædō cæte waa cæquinānii. ⁴⁴ Mānōmai quēwente wædongā inte tōmēngā ñōwo Itota ōnōñabæca ĩnō pōninque tōmēngā weocoo yæwedecooque godö gampo cæyongā wepæ ĩñontobæ edæ wantæ bitapa.

⁴⁵ Itota ĩñömö edæ,

—Ēcānō botö ĩmote pōnō gampodai.

Āñongante tōmānāni, Ēcānō gampodatawogaa, ante adoyōmō ante ānāni ate wædinque Pegodoidi wæætē,

—Awēnē ěñēmi. Bitö weca tōmānāni goto goto godāni apa āmii.

⁴⁶ Itota wæætē,

—Īñempa adocanque botö ĩmote wede pōnēninque gampocantapa. Tæi piñænte botö entawēñō incæ edæ wacā beyæ cæquinque do gotimpa, ante wæwēnente awædō.

⁴⁷ Āñongante onquiyængā ĩñömö, Ēdō cæte wē womonguimoo, ante pōnente wædinque do do wāate bai guñēninque Itota weca ædæ wæncæte tōmānāni ayōnānīte apænedinque, Botö waa bawēncæte ante bitö ĩmote pōnō gampotābopa. Tæcæ pōnō gampo cædinque waa babo ae. ⁴⁸ Ante apænecā ěñēninque Itota,

—Onquiyæmi ěñēmi. Bitö wede pōnēñō beyæ edæ wantæ bawēñēmi. Ñōwo edæ nō bawēñēmi inte wampo pōnente waa goe, ante godö ædæmō apænecantapa.

⁴⁹ Ante tæcæ apæneyongā oodeoidi odōmōincō awēnē Gaido oncōnē quēwēngā māniñedē pōninque edæ Gaido ingante apænecantapa.

—Bitö wēngā ĩñömö ñōwo æmæwo wængampa cæbii. Nē Odōmongā ingante ñōwo bitö godōmenque ānāmai incæbiimpa.

⁵⁰ Ante ñōwo pōningā Gaido ingante angā ěñēninque Itota wæætē,

—Gaido, guñēñāmai ĩe. Bitö wede pōnēmi adinque bitö wēngā muingā quēwēncæcāimpa.

⁵¹ Āninque Itota godōmenque godinque awēnē oncōnē pō guicæ cædinque Pegodo ingante Tantiago tōnō Wāö ĩnate wēñængā

wæmpo tönö wäänä inate mänimpodänique inänite ænte manguicā wäänē guiidänitapa. Wadäni inänite wæætē wææ cæcā guiidāmai inänitapa. ⁵² Tömänäni Ca ca wædinque wēñængä wodi ingante ante pönente wæwēnāni adinque Itota tömēnāni inänite,

—Ca ca wædāmai iedāni. Iñæmpa iñömō wēñængä wodi edæ wii æmæwō wængantapa. Mō edæ ñongampa.

⁵³ Angä ēñente wædinque tömēnāni, Æmæwo wænte ðñongampa, ante do adināni inte wæætē edæ, Antedō amīni, ante tömengä ingante badete todänitapa. ⁵⁴ Iñinque Itota wēñængä ingante pædæ wæmpo bæi ongonte tōō æmæninque ogæ tedinginque,

—Wēñæmi, ængæ gantibi, angantapa.

⁵⁵ Åñongä tömengä do wæningä inte ñāni ömæmonte quēwēninque ængæ ganticantapa. Itota wēñængä beyæ cængui angä godöna cængantapa. ⁵⁶ Adinque mæmpoda, Æbänō cæte mänömai cæcāā, ante guifñente wædatapa. Incæte Itota wæætē, Botō æbänō cæboo, ante mīnatō wadāni inänite apænedāmai incæmīnaimpa, angacäimpa.

9

Wængongui Awēnē ingantedō ante apæneedāni, ante Itota angä godänipa
(Mäteo 10.5-15; Mäadoco 6.7-13)

¹ Tömengä miñæ nē godāni, Dote ināni, nāni änönāni inänite Itota angä pönāni ate, Botō nē ämo inte botō tæi piñænō ante ñowo pönōmo ænte entawēninque mīnitō tæi piñæninque nē ämīni bacæminimpa. Iñinque mīnitō ämīni ate wēnæidi tömänāni do gocædänimpa. Adobaī ämīni ate wēnæ wēnæ inte wæwēnāni waa bacædänimpa. ² Mīnitō, Wængongui Awēnē Odeye inguipoga do pongäimpa, ante apænemīni ēñencædänimpa. Ayæ wēnæ wēnæ ināni inänite godō cæmīni waa bacædänimpa, ante Itota mänimpodāni inänite da godongä gogadänimpa.

³ Iñimai angacäimpa.

—Mīnitō ömæpomīni taadō goedāni. Ongonto incæ mäincoo da wenguincade incæ cængui incæ godonte æinta incæ tömancoo edæ ænāmai inte ömæpomīni godinque edæ ēñacooque ēñate goedāni, angantapa. ⁴ Ayæ, Godinque æcönēnō tāno go guimīni owodindque mīnitō wayömō mīni go quēwenganca mänincönenque go guii go guii cædinque quēwēedāni. ⁵ Æyömömē goyömīnite wadāni, Pöedāni, änāmai inte mīnitō apænedō ante wii ēñēnāni wædinque mīnitō wæætē tömēnāni inänite emō cæte iñainō ante goedāni. Mīnitō iñæmpa, Pöedāni, änāmai iñini adinque mönitō gomōni tamēñedāni, ante odōmoncæte ante

mīnitō önöwa wadæ wadæ cæwadinque wadæ goedāni.

⁶ Angä godinque tömēnāni quēwēñömō wayömō tömēnāni quēwēñömō wayömō tömāo godinque Itota nänō da godönināni iñömō mönō Awēnē ingantedō ante mæo watapæ apænedāni ēñēnānitapa. Ayæ wēnæ wēnæ ināni inänite godō cædāni ate waa bagadänimpa.

Itota æcänō ingää, ante Edode wæcampa
(Mäteo 14.1-12; Mäadoco 6.14-29)

⁷ Tömänāni mänifñedē, Itotaidi æbänō cædāni, ante tedeyönānite pancabaa awēnē odeye Edode incæ do ēñengantapa. Itota iñömō æcänō ingää, ante wædinque pancadāniya, Wäo wodi do wænte ñāni ömæmönningä inte iñgä Itota iñaingampa, ante tededāni ēñente wædinque awēnē Edode guifñente wæcantapa. ⁸ Wadāni guiquēnē, Ediya wodi ponte a ongömaingampa, ante tedeyönāni wadāni guiquēnē, Wængongui beyæ nē apænegināni incæ adocanque docä incæ do ñāni ömæmönningä inte a ongömaingampa, ante tededāni. ⁹ Èñente wædinque Edode wæætē,

—Botō tömēmo ämo ēñēninque Wäo wodi ingante wido tamencadāni wængantapa. Iñinque mäningä Itota nāni nē tededongä guiquēnē æcänō ingää.

Ante wædinque Edode, Æbänō cæte Itota ingante aquimoo, ante nangui cægacäimpa.

5.000 ganca ināni inänite Itota godongä cæñänipa

(Mäteo 14.13-21; Mäadoco 6.30-44; Wäo 6.1-14)

¹⁰ Itota nänō da godönināni iñömō tömengä weca adodō pöninque, Mänömai mänömai cætamönipa, ante nangui tededāni ēñengacäimpa. Èñente ate tömengä tömēnāni inänite nänēñē Betaida eyequei ænte mäocā. ¹¹ Goyönānite wadāni do ēñēninque tee empote pönāni adinque Itota, Waa pömīni abopa, ante waadete apænedinque, Mīnitō Wængongui Awēnē Odeye nempo watapæ quēwencæmīnimpā, ante apænecantapa. Ayæ, Pancadāniya waa baquēñēnāni ināniya, ante adinque tömengä godō cæcā ate waa badänitapa.

¹² Ayæ gawadecæ bayonte edæ, Dote, ante nāni Itota miñæ gocabo iñömō tömengä weca pöninque änänitapa.

—Iñömō önömæca impa cæbii. Bitō godongāmæ ongönāni inänite ämi idömæ owodāni weca godinque ayæ nangui ināni nāni quēwēñömō godinque oncō eyepæ i ate cæñinque moncædänimpa.

¹³ Åñönānite Itota,

—Mīnitō wæætē godömīni cæncædänimpa. Åñongante,

—Īñæmpa pāō ōnompō æmæmpoquæ gæyæ mēa pōnī mānimpoquæ nææmōnīpa tōō. Īninque bitō wæætē, Tōmānāni beyæ cænguī gote ænte pōedāni, āmitawoo.

¹⁴ Onguīñænānīque tīncō mīido ganca ĩnāni edæ mæ ongōnōnānīpa. Incæte Itota tōmēngā mīñæ nē godāni ĩnānite angantapa.

—Mīnitō tōmānāni ĩnānite, Tincoenta ganca cāni cabo nānēnē tīncōenta ganca mīni cabo nānēnē āmīni tæ contacādānīpa.

¹⁵ Angā ēñēnīque ānāni tæ contadānītapa. ¹⁶ Itota pāō ōnompō æmæmpoquæ ænīnque gæyæ mēa ænīnque ōōnādē æmō adīnque Wængonguī ingante, Bitō waa pōnōmī ænte cæmōnīpa, ante apænecantapa. Ayæ pāō tōnō gæyæ pā æ pā æ cædīnque tōmēngā mīñæ nē godāni ĩnānite pædæ godongā ænīnque tōmēnāni tōmānāni ĩnānite dī mæñæ dī mæñæ cædāni ænte cængadānīpa. ¹⁷ Tōmānāni eyepæ ænte tōmō pōnī cænānītapa. Ayæ ao mæ ao mæ cæte ñōnōnāni ate Itota mīñæ nē godāni wæætē ao mæ nāni ñōnōnī ē ōñoncoo pædæ wææmpo ō ænīnque ōnompō tīpæmpoga go mentodēa cænguī eyede da wēnāni contagatīpa.

Bitō Coditobi ĩnōmī ĩmīpa, ante Pegodo apænecampa
(Māateo 16.13-19; Māadoco 8.27-29)

¹⁸ Ayæ ate Itota nānēnē godīnque Wængonguī ingante apæneyongā tōmēngā mīñæ nē godāni tōmēngā tōnō godongāmæ ongōnōnānīpa. Tōmēnāni ĩnānite angantapa.

—Wadāni botō ĩmotedō ante apænēdīnque, Æbodō ĩmoo, ante apænēdāni ēñēmīnī.
¹⁹ Āñongante tōmēnāni wæætē,
—Bitō ĩmitedō ante apænēdīnque pancadānīya, Wāō æpænē nē guidongāingā incæ Itota adocā ĩmaingā ingampa, ānānīpa. Wadāni pancadānīya wæætē, Edīya wodi ingaingā incæ Itota adocā ĩmaingā ingampa, ānānīpa. Pancadānīya wæætē, Wængonguī beyæ nē apænēgaingā adocānque do wængāingā ĩnte ñāni ōmæmonte quēwēnongā incæ Itota adocā ĩmaingā ingampa, ante tēdēdānīpa.

²⁰ —Mīnitō guīquēnē, Botō æbodō ĩmoo, ante pōnēmīnīi.

Āñongante Pegodo,
—Wængonguī nānō nē angāīmī ĩnōmī ĩnte bitō ĩñōmō edæ nē Coditobi ĩnōmī ĩmīpa, angantapa.

Itota, Īmāi cædāni wæncæboīmpa, ante apænecampa
(Māateo 16.20-28; Māadoco 8.30-9.1)

²¹ Pegodo mānōmāīnō ante apænecā ēñēnīque Itota wæætē angantapa. Mīnitō botō ĩmotedō ante apænēdīnque, Coditō ĩnōngā ingampa, ante gode ānāmāi ĩedāni

āmopa, ante nanguī ānīnque edæ wææ angacāīmpa. ²² Ānīnque,

—Botō Waobo ēñagāīmo ĩnte nanguī caate wæquēnēmo ĩmopa. Nē aadāni nāni Picæncabo tōnō, Wængonguī quī, ante nē godōnāni ñænænāni tōnō nē odōmōnāni tōnō mānīnāni edæ botō ĩmote Baa ānāni wæquēnēmo ĩmopa. Ayæ botō ĩmote godōmenque wæñōnāni wænguēnēmo ĩmopa. Incæte Wængonguī angā beyænque botō mēōnaa go adōōnæque ĩñonte edæ ñāni ōmæmonte quēwēncæboīmpa, ante apænēgacāīmpa.

²³ Ante apænēdīnque Itota tōmānāni ĩnānite godōmenque apænēdīnque,

—Æcānō botō mīñæ pōīnēna ĩna tōmēngā nāmā beyænque ante pōnēnāmāi ĩnte ĩmō ĩñō ĩmō ĩñō botō mīñæ tee empote poncæcāīmpa. Nāmā nānō wænguīwæ næænte ponte baī cædīnque tōmēngā, Botō wænguīmo incæ caate wæbo incæ Itota ingante cōwē tee empote gocæboīmpa, ānīnque poncæcāīmpa. ²⁴ Edæ æcānō, Nāmā wææ gompodīnque quēwēncæboīmpa, ante cædīnque botō mīñæ pōnāmāi ĩngā guīquēnē tōmēngā ĩñōmō edæ quēwēnāmāi incæcāīmpa. Wæætē edæ, Wæñōnāni wæmō incæte botō Itota mīñæ tee empote cōwē gocæboīmpa, ante æcānō āna guīquēnē tōmēngā wæætē quēwēncæcāīmpa. ²⁵ Edæ waocā ĩnguīpoga ongoncoo tōmancoo ō æncæte ante cædīnque nāmā ōnōwoca incæ pædæ godongā wē womonte ba ĩnīnque edæ tōmēngā ĩñæmpa quēwēngampa diyæ māīncoo ēaquinḡā. ²⁶ Mīnitō pancamīnīya botō beyæ ante botō apænēdō beyæ ante guīngo ĩmote wæmīnitawo. Īñæmpa botō Mæmpo nānō ēmōnō tōnō anquedoidi tæiyæ wæēmō ĩnāni nāni ēmōnō guīñæ gongæññonte botō Waobo nē ēñagāīmo ĩnte edæ nāmā ñāō apāite baī dibæ pōnīnque botō wæætē nē guīñente wægaingā beyæ ante nāēmæ guīngo ĩmote edæ wæcæboīmpa. ²⁷ Nāwāngā āmopa. Botō weca ongōmīni pancamīnīya ayæ wæñāmāi edæ mīlīmīni quēwēñōmīni botō Wængonguī Awēñē Odeyēbo babo ate botō nempo guīicæmīnīmpa, ante Itota apænēgacāīmpa.

Itota wæēmō pōnī ñāō baī ēmongā bacā adānīpa

(Māateo 17.1-8; Māadoco 9.2-8)

²⁸ Mānōmāīnō ante apænēdīngā ĩnte Itota adoque Wængonguī ĩtædē go ate Wængonguī ingante apænecæte ante ædīnque Pegodo ingante Wāō tōnō Tantiago ĩnate mānīmpodāni ĩnānite ānanquidi ænte mæicā æidānītapa. ²⁹ Eite go apænēyongā tōmēngā awīnca ĩñōmō edæ wīi cōwē nānō ēmōnō baī wæēmō pōnī ñāō baī edæ ēmongā bamongā adānītapa. Ayæ tōmēngā weocco nānō ēñacoo ĩñōmō edæ nānte baī ēmoncoo

badinque näämænta pōni ēñacantapa. ³⁰ Ayæ ayōnāni edæ onguifñæna mēnaa edæ Mōitee wodi tōnō Ediya wodi incæ ifñontobæ a ongōninque Itota tōnō tededatapa. ³¹ Tōmēna ifñōmō fñāo apāite bai ēmōna inte Itota tōnō godongāmæ apēnedatapa. Godongāmæ apænedinque tōmēnāni, Itota æbānō fñōwo Eedotadēē godinque iinque cædinque oo wænte wadæ gocæcāimpa, ante tededānitapa. ³² Mānōmainō ante tedeyōnāni Pegodoidi guiquēnē mōinente a ongōninque ædæmō fñāni omæmōnte æmō ayōnāni Itota fñāo apāite bai ēmongā adinque tōmengā tōnō onguifñæna mēnaa godongāmæ adiyæ ongōnāni adānitapa. ³³ Onguifñæna ifñōmō Itota ingante tæcæ emō cæte gocæ cæyōna Pegodo guiquēnē,

—Awēnē ēñēmi. Ifñōmō mōnō waa pōni ongonte awædō. Bitō āmi ate mōnitō oncon-taicoo mentaiya go adotaique mænōninque bitō oncontai ante adotaique Mōitee oncon-tai ante adotaique Ediya oncontai ante adotaique mænōmai mōnīpa.

Mānōmainō ante tededinque Pegodo, Æbānō ante tedequēnēmo imoo, ante ēñēnāmāi inte ononque tedecantapa. ³⁴ Mānōmai tedeyongā boguimancoo obo wæænte wææ owoyō adāmai ināni inte, Boguimancoo ganta cæ wæcæ wæ, ante Pegodoidi guifñente wædānitapa. ³⁵ Ayæ boguimancodē onōnepāmoque apænecantapa. “Iingā botō Wengā botō nē apænte ængaingā ingampa cæmīni. Tōmengā pōnō apænecā ate ēñēdāni.”

³⁶ Ante apænecā ēñente ayōnāni Itota fñōwo adocanque a ongongā adānitapa. Iinque tōmengā miñæ nē godāni nē adinānique inte pæ wēenedinque tōmēnāni nāni adinō ante māñifgē wadāni inānite apænedāmai ingadānimpa.

Itota wēncæ ingante angā go ate wēñcængā waa bacampa

(Māateo 17.14-21; Māadoco 9.14-29)

³⁷ Mānīi ānanquidi æi iimō ate wææ pōñōnāni Itota ingante bee tencæte ante nanguī ināni pōnānitapa. ³⁸ Godongāmæ ponte nanguī ināni ongōñōnāni onguifñængā adocanque edæ ogæ tededinque,

—Nē Odōmōmi ēñēmi. Botō wengā onguifñængā ingante pōnō waa æ. Tōmengā adocanque botō wengā ingampa cæbii. ³⁹ Tōmengā nānō nē ewocadongā inte wēnæ incæ tōmengā ingante edæ bæi ongongā ate tōmengā ifñontobæ Yæ yæ angampa. Ayæ godō cæcā ate botō wengā edæ do do wāadinque onōne māwanta tadecampa. Wēnæ ifñōmō wantæ ifñō tao godinque adodō pō guite edæ cōwē quēwēninque botō wengā ingante edæ ewencæ cæcampa cæbii. ⁴⁰ Bitō miñæ nē godāni inānite botō, Wēnæ inte wido cædāni, ancaā āñōmo

tōmēnāni nē cæquēnēnāni incæ ædō cæte wido cæquināni, ante wæbopa.

⁴¹ Ante wæyongante Itota,

—Nōwomīni mīni ædæmō cædāmaincabo mīni pōnēegade impa. Mīnitō weca æpogadō quēwēmoī. Wapiticæ cæyōmīnite botō æpogadō piyænē cæte wæwēmoī. Āninque mæmpocā ingante apænedinque, Bitō wengā ingante botō weca ænte pōe.

⁴² Angā ēñente ænte māmongā pōñongante wēnæ incæ yæipodē bæ tacā do do wāate wæwengantapa. Tōmengā wentamō nānō nē ewocadongā ingante Itota ifñōmō edæ, Ee æ, ante wææ angantapa. Ayæ wēñængā ingante pōnō cæcā ate tōmengā wæætē ononganque bayongante mæmpocā ingante Itota pædæ godongā ængacāimpa. ⁴³ Mānōmai cæcā adinque, Wængonguī incæ tæi piñængā ingante mēnō mānōmai cæcampa, ante pōnēninque tōmānāni ancaī guifñente wægadānimpa.

Īmai cædāni wæncæboimpa, ante adodō ante apænecā

(Māateo 17.22-23; Māadoco 9.30-32)

Mānōmai cæcā ate guifñente wæyōnāni tōmengā miñæ nē godāni inānite Itota iimāi ante apænegacāimpa.

⁴⁴ —Nōwo āmo ēñenguēnē quēwēmīni. Adocanque, Waocā nē ēñagaingā æyōmōnō ongongāā, ante godō odōmōninque botō imote wadāni nempo pædæ godōnāni æncædānimpa.

⁴⁵ Āninque tōmengā nānō apænedō æbānō i, ante wædānitapa. Wē womonte i iinque tōmēnāni ædō cæte ēñenguifñāni. Ayæ, Æbānō ante āmi, ante anguēnēnāni incæ edæ guifñēnete wædinque pæ wēñegadānimpa.

Æcānonque nē angā inguingāā, ante ted-edānipa

(Māateo 18.1-5; Māadoco 9.33-37)

⁴⁶ Tōmengā miñæ nāni nē gocabo ifñōmō, Mōni cabo incæ æcānonque fñæñængā pōni inongā inte nē angā inguingāā, ante wædinque nāmā incæ wæætēdō wæætē tedeyōnānite ⁴⁷ Itota onōwēnenque do ēñengantapa. Ēñēninque wēñængā adocanque ingante bæi ongōninque tōmengā gāānē ifñōmō gō cæcantapa. ⁴⁸ Tōmēnāni inānite apænecantapa.

—Waocā botō emōwo beyænque iingā wēñængā ingante, Pōe, ante waa cæcā ifñōmō tōmengā botō imote adobai edæ, Pōe, ante do waa cæcampa. Botō imote æcānō, Pōe, āninque waa cæda tōmengā adobai botō imote nē da pōnongā ingante Wængonguī ingante edæ adobai, Pōe, ante do waa cæcampa. Edæ mīni waocabo wædāmīni ifñōmīnite waocā guiyangā pōni inongā nānō entawēnō bai nē entawengā ifñōmō

tömengä ñænængä pöni ñongä ingampa,
ante apænegacäimpa.

*Në piunte cædämaï ingä ññömö godongämæ
cæcä ingampa*

(*Mäadoco 9.38-40*)

⁴⁹ Wäö ññömö Itota ingante apænedinque,
—Awënë ëñëmi. Wacä incæ mönö cabo
inämaï ñongä inte bitö ëmöwo apænedinque
wënæidi inänite wido cæcä atamönipa.
Ïnque mönitö wæætë edæ, Bitö mönitö tönö
gobi ñimpa Itota ëmöwo apænequimii, ante
tömengä ingante edæ wææ antamönipa.

⁵⁰ Ante apæneyongante Itota,
—Ïñæmpa minitö iminite në piunte cædämaï
ingä ññömö tömengä wæætë minitö tönö
godongämæ cæcä ingampa cæminii.
Tömengä ingante wææ änämaï incæminipa,
angacäimpa.

*Tantiago tönö Wäö ñnate Itota wææ
angampa*

⁵¹ Oo pöni nänö æiquiönæ bacæ
cæyonte Itota, Eedotadëë ññömö botö
cöwë gocæboimpa, ante gocæ cæcantapa.
⁵² Wadäni inänite tömengä, Poncæcäimpa,
ante minitö täno beyænte goedäni, ante da
godongä godänitapa. Godinque tömënäni
ññömö Tämadiabæ godinque tömengä beyæ
cæcæte ante Tämadiadi nänäi quëwëñömö
gocæ cæyönäni, ⁵³ Tämadiadi wæætë edæ,
Eedotadëë gämænö Itota gocä awædö, ante
adinque, Mönitö weca pönämaï incæcäimpa,
ante wææ änänitapa. ⁵⁴ Ïmaï cædäni
adinque Wäö tönö Santiago tömengä nänö
ëminäna ññömö,

—Awënë ëñëmi. Baa änäni adinque
öönædë gonga ämöna wææ gonte
wænguinäni, ämi, änatapa.

⁵⁵ Äñönte Itota wæætë edæ dadi
ëmæmonte wææ ante tömëna ñnate,
“Ïñæmpa minatö iminate æwocadö angä
ëñente äminäa, ante minatö edæ ëñënämaï
imäna awædö. ⁵⁶ Ïñæmpa botö Waobo
ëñagaïmo imo ññömö edæ waodäni inänite
ömæe ewencæte ante wii pongaïmo
imopa. Wæætë edæ, Botö æmo beyænque
quëwëncædänimpa, ante pongaboimpa,”
ante piingacäimpa. Ayæ wadäni nänäi
quëwëñömö gogadänimpa.

Itota miñæ në goinënäni

(*Mäteo 8.19-22*)

⁵⁷ Taadonque goyönäni Itota ingante
wacä angantapa.

—Awënë, bitö ædömë goyömite botö bitö
miñæ pö gocæboimpa.

⁵⁸ Angä ëñëninque Itota wæætë,
—Babæ guintaidi ññömö ontatodë
mongui eädäni inänipa. Ayamöidi ongonta
eädäni inänipa. Botö Waobo ëñagaïmo
wæætë edæ mongui ömaabo imopa poncæ
ämii, angacäimpa.

⁵⁹ Ayæ wacä ingante Itota,

—Botö miñæ pöe.

Angä ëñente wædinque tömengä,

—Awënë ëñëmi. Botö täno gote botö
wæmpo wængä ate daga wente ate pömoe.

⁶⁰ Äñongante Itota wæætë,

—Ïñæmpa në wæwocadäni incæ tömënäni
guidënäni wænäni ate ee abi daga
wencædänimpa. Bitö wæætë, Wængongui
Awënë Odeye do pongäimpa, ante gote
apænebi ëñencædänimpa. ⁶¹ Ayæ wacä
adobaï,

—Awënë bitö imite tee empote goinëmo
incæ ee ongöñömi täno gote botö guidënäni
inänite, Gobopa, ante apænete pömoe.

⁶² Äñongante Itota wæætë,

—Ömæ në mangæ mangæ cædongä ññömö
töo pöni minte pæquimpa, ante cæquëngä
ingampa. Tömengä dadi ëmænte adinque
töo pöni cæcampa diyæ töo minte pæquii.
Ayæ adobaï Wængongui Awënë Odeye
nempo quëwëninque në cæquëngä ññömö
tömengä dadi ëmænte inguipogaque ante
acä ñnque Awënë beyæ ante ædö cæte
cæquingä.

10

*72 ganca ñnani inänite Itota da godongä
godänipa*

¹ Ayæ ate mönö Awënë godömenque
tetenta i doo ganca inäni mänimpodäni
inänite ñmaï angantapa. Minitö æmænö
mëmïnaa æmænö mëmïnaa godinque
botö në goquññömö ante wayömö nänäi
quëwëñömö mäo wayömö nänäi quëwëñömö
mäo täno beyænte gomïni ate botö
ayæ poncæboimpa, äninque da godongä
gogadänimpa. ² Ïmaï ante da godongä
godänitapa. “Näwängä ämopa. Waocä
tömencaodé do pequinaa nangui inca baï
Awënë nempo në quëwëngüëñänäni adobaï
nangui inäni inänipa. Incæte në tä pedäni
wædænque inäni baï në gode änäni ññömö
adobaï mënäniya pöni inänipa cæminii.
Minitö Wængongui ingante apænedinque,
Awënë, bitö tömencaodé në ëabi inte ämi
ëñëninque gote apæncædänimpa, ante
ædäni. ³ Nöwo minitö ññömö goedäni, ämopa.
Mëñeidi weca ongöñinque codotodoidi
ññömö tæëmö inänipa diyæ nämä wææ
aquinänäni. Minitö ññömö codotodoidi
aquinänäni baï adobaï aquiiimni ññöminite
botö ämo mëñe baï inäni weca edæ gomïni
ataqueedäni. ⁴ Godonte mini ænguinta
wente æï ænämaï inte mäincoo mongænte
godämaï ledäni. Awæncata nææante godämaï
ledäni. Taadö godinque wacä ingante
bee téninque apænedämaï inte goedäni.
⁵ Ecönëmenque go guuite, Mini quëwëncabo
gänë pönente waa quëwëedäni, äminä
ëñencædänimpa. ⁶ Mänincönë quëwëngä

Ao angä İninque tömengä gänë pönente waa quëwëmaingampa. Wæætë Baa angä İninque mīnitō adomīnique gänë pönente waa quëwëmaİminīpa. ⁷ Mānīncōnë mīni go guīdīncōnë quëwëñōmīnite mānīncōnë quëwëñāni pædæ pōñōnāni ænte cænte bete quëwëedāni. Edæ në cæcä İñōmō tömengä nānō cædī beyæ eyepæ ænguënenğā ingampa. Mīnitō adocōnenque quëwëñīnque wacōnë wacōnë godāmaİ İedāni. ⁸ Æyōmōmë goyōmīni mānīñōmō quëwëñāni, Pōedāni, ānāni ëñente wædīnque mīnitō tömëñāni cænguİ pōñōnāni æñīnque cæedāni. ⁹ Wënæ wënæ wæwëñāni İñānite godō cæmīni waa bacædānīmpa. Ayæ tömëñāni İñānite, 'Wængonguİ Awënë Odeye mīnitō weca oo pongä acæmīnīmpa,' ante apæneedāni. ¹⁰ Ayæ tömëñāni quëwëñōmō go guīyōmīnite Baa ānāni İninque mīnitō wæætë tömëñāni taadonque tao godīnque tömëñāni İñānite, ¹¹ 'Mīnitō quëwëñōmō onguīpoi wadæ cæwate gomōna tamëñedāni. Incæte Wængonguİ Awënë Odeye mīnitō weca oo pongä acæmīnīmpa,' ante æedāni. ¹² Edæ mīnitō İmīnite āmpa. Wængonguİ nānō apænte anguīōnæ İnque bayonte Todōmä İñōmō quëwengāñāni guīquënë nanguİ pante wæwëñōñāni mīnitō İmīnite në Baa ānāni guīquënë godōmenque nanguİ pante wæwenguñāni İñānīpa," ante İtota angacāīmpa.

Në ëñëñāmaİ quëwëñāni İñānite İtota pīngampa

(Māteoo 11.20-24)

¹³ Āninque İtota në ëñëñāmaİ quëwëñāni İñānite pīñīnque İmaİ angantapa. "Codatī İñōmō quëwëmīni ëñëedāni. Betaida İñōmō quëwëmīni ëñëedāni. Mīnitō mīni wæwenguīnque ëñëñāmaİ cæte quëwëmīnidō anguënë. Edæ botō mīnitō weca tæİ pīñænte botō cædī baİ Tido nāni quëwengāİñōmō Tidōō nāni quëwengāİñōmō adobaİ cæbo baİ mānīñōmō quëwengāñāni İñōmō wënæ wënæ nāni cægāñō ante dobæ ñīmpo cædīnque gōmæ ëmoncoo da wëñadīnque gōnaİboga tæ contadīnque Ca ca wæcægadānīmpa. ¹⁴ İninque Wængonguİ nānō apænte anguīōnæ İnque bayonte Tido İñōmō tōnō Tidōō İñōmō quëwengāñāni İñānite nanguİ pangä wæwëñāni incæte tömengä mīnitō İmīnite godōmenque pangä wæwencæmīnīmpa. ¹⁵ Ayæ Capënaōmō İñōmō quëwëmīni ëñëedāni. Wængonguİ mīnitō İmīnite dicæ öönædë wo ææntodongä æi gote toquīmīniyaa. İñæmpa tadōmengadænguīpo wææntodongä guİ wæcæmīnīmpa," angantapa. ¹⁶ Āninque İtota wæætë tetenta İ doo İñāni İñānite apænedīnque, "Mīnitō apæneyōmīni æcānō ëñengä tömengä İñōmō edæ botō İmote do ëñengä ingampa. Wæætë

mīnitō İmīnite në Baa angä İñōmō tömengä edæ botō İmote do Baa angä ingampa. Ayæ botō İmote në Baa āningä İnte tömengä botō İmote në da pōñōningä ingante do Baa angampa," ante apænedīnque tömëñāni İñānite İtota angä godānītapa.

Tetenta İ doo İñāni do godīñāni İnte ocæ ëmænte pōñāni

¹⁷ Angä godīñāni İnte tetenta İ doo ganca İñāni adodō ocæ ëmænte pōñīnque watapæ todīnque İtota ingante apænedīnque,

—Awënë, bitō ëmōwo apænedīnque mōnitō wënædī İñānite āmōni ëñëñīnque bitō ëmōwo beyænque godānīpa.

¹⁸ Ante todāni ëñëñīnque İtota wæætë,

—Nānte quingæ cæ baİ Tatāna İñōmō wënæ awënë incæ öönædë İnō wæængä në agaİmo İnte botō adobo āmpa. ¹⁹ Botō pōñō āmo ate mīnitō İñōmō në āmīni badīnque edæ tæntæ tōnō emëñe ingante pīñä gāwadāni baİ adobaİ tæİ ëmōmīni İnte tæntæ baİ në cædāni İñānite wido cæcæmīnīmpa. Ayæ mōñō İmonte në pīnte cædongä incæ tæİ pīñænte cæcä incæte mīnitō İñōmō godōmenque tæİ ëmōmīni İnte māningä nānō tæİ pīñænte cæpāmo ante tömāmāmo ante edæ wido cæcæmīnīmpa. Edæ æcāmenque incæ mīnitō İmīnite æmæwo wido cædāmaİ incæcāīmpa. ²⁰ Incæte mīnitō āmīni ëñëñīnque wënædī do ëñente cædāni beyænque todāmaİ İedāni. Wæætë, Mōnitō ëmōwo öönædë dobæ yewæmonte ongōmpa, ante adīnque mīnitō māñōmaİ beyænque watapæ toedāni, angacāīmpa.

Mæmpo Wængonguİ ingante apænedīnque İtota tocampa

(Māteoo 11.25-27, 13.16-17)

²¹ Āninque Wængonguİ Tæiyæ Waëmō Öñōwoca ingante ëwocadongä İnte İtota māñīñedë edæ watapæ todīnque Wængonguİ ingante İmaİ ante apænecantapa. "Mæmpo ëñëmi. Bitō, Wadāni nāmā ocāi encadāni tōñō nanguİ adīnque në ëñëñāni tōñō māñīñō bitō cægāñō ante ëñëñāmaİ incædānīmpa, ante cædīnque bitō cægāñō ante wë wodongābīmpa. Wæætë wëñæñāni tæcæ ëñadāni baİ İñāni İñānite bitō edonque odōmōmi adīnque do ëñëñānīpa. Bitō öönædë Awënë ingāīmi İnte inguīpoga Awënë adobī İñōmi İnte edæ māñōmaİ cæbīpa, ante adīnque botō bitō İmīte waa ate pōñëñīnque apænebōpa. Mæmpo, bitō tömëmi āñō baİ cædīnque waa cæbī adīnque botō Ao āmpa, ante apænebōpa," ante Wængonguİ ingante apænegacāīmpa.

²² Ayæ, "Botō Mæmpo incæ, Bitō Awënë İñōmi İnte aacæbīmpa, ante tömāo İñōmō ongoncoo botō nempo pædæ pōñōñīnque tömāo İñōmō quëwëñāni tömāñāni İñānite adobaİ botō nempo pædæ pōñōngä

æninque botō iñōmō edæ tōmancoo ēnempodique tōmāo iñōmō quēwēnāni inānite nē ēnempobo iŋopa. Wængonguī Wēmo iñōmote, Æbodō iŋoo, ante Mæmpoque ēñengā iŋampa. Botō wæætē tōmengā Wēmo iñōmo inte, Wængonguī æcānō iŋgāā, ante adoboque nē ēñēmo iŋopa. Ayæ, iñānique nē ēñēnāni incædānimpa, ante botō nē angaināni inānite odōmonte botō apænebo ēñēninque tōmēnāni wæætē, Wængonguī æcānō iŋgāā, ante nē ēñēnāni badāni ate mōnitō adomōnique āanque bai nē ēñēmōni iŋōnīpa.”

²³ Ante apænedinque Itota dadi ēmæninque tōmengā miñæ nē godānique inānite apænedinque, “Nōwo mīni adīnō adinque nē ēmōmīni inte mīnitō mīni watapæ quēwenguinque impa. ²⁴ Iŋimai impa, ante apænebo ēñēdāni. Wængonguī beyæ nē apænegaināni nanguī ināni tōnō iŋæca awēñēdi nanguī ināni incæ mīni adīnō bai ante aiŋente wægaināni incæte edæ adāmai iŋgadānimpa. Mīni ēñēnīnō ante adobai ēñēnīnente wægaināni incæte tōmēnāni ēñēnāmai iŋgadānimpa,” ante māninganca Itota apæneca ēñengadānimpa.

Tāmadiabæ quēwengā incæ nē waa cæcā iŋampa, ante

²⁵ Ayæ ate adocanque idægoidi nāni wææ angainō ante nē ate ēñengā iñōmō, Itota æbānō wapiticæ apænebaingāā, ante cædinque ængæ gantidinque tōmengā iŋampa iŋimai angantapa.

—Awēnē nē Odōmōmi ēñēmi. Botō æbānō cæte cōwē wænāmai wantæpiyæ quēwenguiŋoo, ante wæbopa.

²⁶ Āñongante Itota,

—Mōitee wodi, iŋimai cæedāni, ante wææ yewæmōninque æbānō ante yewæmongā ongō abii.

²⁷ Āñongante nē odōmongā wæætē,

—Iŋimai ante yewæmongacāimpa. Bitō mīmō entawēmi inte Wængonguī mōnō Awēnē iŋante waadedinque bitō ōnōwoca ēwocadinque ædæmō waadete pōnencæbiimpa. Bitō baō tæi piñante ēñabi inte godō waadete cædinque bitō ocai encabi inte nō pōnēninque waa waadete pōnē. Ayæ adobai bitō nāmā bitō waadete waa cædō bai adobai pōnēninque godongāmæ quēwēnāni inānite adobai waa waadete cæe.

²⁸ Ante apæneca ēñēninque Itota tōmengā iŋante wæætē,

—Bitō nō ēñēmi inte nōingā apænebitapa. Mānīnō bitō ānīnō bai cæbi iŋinque bitō wænāmai quēwēmaimipa.

²⁹ Angā ēñēninque guiñente wædinque nē odōmongā iñōmō, Botō cæquēnēnō ante wīi cæbopa, ante Itota ēñēnāmai incæcāimpa, ante nāmanque ante wææ āninque,

—Iñæmpa wa. Godongāmæ quēwēnāni, ante bitō ānīnāni iñōmō ædānidō ināni.

³⁰ Āñongante Itota wæætē, Mōnō guidengā æcānō iŋgāā, ante odōmoncæte ante iŋimai apænegacāimpa.

—Onguīñengā adocanque Eedotadēē quēwente Eedicoo wæidō cægōñongante nē ō ænāni tōmengā iŋante iñontobæ bæi ongonte weocoo gāni tadongadinque tæi tæi pānāni nangæ bacā iŋinque wadæ godāni.

³¹ Ate, Wængonguī qui, ante nē godongā adocanque adodō wæidō godō godinque nē nangæ bate ōñongā iŋante gomō adinque ee wodo pænta æmæ wedeca gocampa.

³² Ayæ ate Debii wodi pæñnāni nāni Wængonguī oncōnē cæcabo incæ adocanque adobai adoyōmō wææ pōninque nē nangæ bate ōñongā iŋante gomō adinque ee wodo pænta gocampa. ³³ Ayæ ate wacā Tāmadiabæ nē quēwēnongā incæ ado wæidō godinque nē nangæ ōñongā weca adoyōmō ponte gomō adinque, Tōmengā ædō cæte quēwenguiŋgāā, ante tōmengā wædō ante bai nanguī pōnente cæcantapa. ³⁴ Iŋingā iñōmō nē nangæ bate ōñongā weca pōninque tæi tæi pānāni nānō æbādīñōmō oguinguipæ tōnō yowepæ tī nāmæ biñōmæ nāni āmæ gao caadinque weocoo wīni caacampa.

Ayæ, Tæ contate gocæcāimpa, ante adocā Tāmadiabæ quēwengā iñōmō nāmā nānō nē mongænte goquēnengā bodo ōñōñabæ nē nangæ badingā iŋante ængō cæcā tæ contayongante bodo iŋante tōō tōō ænte gocampa. Ayæ taadō pōnāni nāni cænte guiite mōincō ganca ænte māo guidinque nē nangæ badingā iŋante waa cæcampa.

³⁵ Iŋimō ate padata nāni godonte æinta mentaa tadōninque mānincōnē nē acā iŋante pædæ godōninque, Bitō nē nangæ badingā iŋante waa cæe. Quiēmē æiŋengā adinque bitō godōmi ængā ate botō bitō weca adodō pōninque bitō godōnimpo adopo wæætē pædæ pōnōmo æncæbiimpa, ante gocampa. Mānōmai cæcampa. ³⁶ Āninque Itota tōmengā iŋante nē āningā iŋante godōmenque angantapa. Bitō imite fiŋowo āmo ēñēninque bitō wæætē apænebi ēñēmo. Nē nangæ bate ōñongā weca pōnāni mengā go adocanque ināni incæte æcānō tōmengā tōnō godongāmæ quēwēnāni bai inte waa cæcantawoo, ante pōnēmi.

³⁷ Āñongante nē odōmongā wæætē,

—Tōmengā iŋante nē waadete godō waa cædongā incæ tōmengā guidengā bai cæcampa.

Ante apæneca ēñēninque Itota wæætē,

—Tōmengā nānō cædō bai bitō adobai godinque cæbæwa, angacāimpa.

Māadota tōnō Māadiya nāna caya oncōnē Itota ēñacampa

³⁸ Ayæ taadö goyönäni tömönäni quëwëñömö pongä adinque onquiyængä tömengä ëmöwo Mäadota iñömö Itota ingante angä tömengä oncönë pö guitte ëñacantapa. ³⁹ Mäadota töniñacä Mäadiya iñömö Itota önöwaca inö tæ contadinque tömengä apæneçä ëñëë congantapa. ⁴⁰ Mäadota guiquenë nê ëñadäni beyæ ante nangui cæte wædinque Itota weca pönninque,

—Awënë, botö töniñacä ëmö cæte gocä ate botö adoboque nangui cæbo ate wædämaï imitawo. Edæ ämi pö cæcæe.

⁴¹ Äñongante Itota,

—Mäadota, Mäadota, bitö wa wa wa cæcæte ante wæwëmi awædö. ⁴² Wæætë adoque pöni cædinque edæ eyepæ impa. Mäadiya do, Quinö waa cæquimoo, ante apænte pönëningä inte botö önöwaca inö pö tæ contate ëñëë congä adinque botö wæætë tömengä ingante, Goe, änämaï incæboimpa, angacäimpa.

11

Wængongui ingante æbänö apænequii, ante Itota apæneçä

(Mäateo 6.9-15, 7.7-11)

¹ Itota ayæ ate wayömö gote Wængongui ingante apæneçantapa. Inque apæneçä adinque tömengä nänö nê ëmiñængä adocanque tömengä ingante apænedinque,

—Awënë ëñëmi, Wäö tömengä nänö ëmiñænäni inänite odömonte, Wængongui ingante æbänö ante apænequii, ante nänö apænedö bai bitö mönitö imönite adobai ante odömonte apænebi ëñguimöni.

² Ante wæyönäni Itota,

—Wængongui ingante apæneçæte ante iimaï ante apæneedäni, “Mönitö Mæmpo nê öönædë quëwënömi inte ëñëmi.

Mönitö bitö ëmöwo tæiyæ waëmö ëmömi adinque bitö ëmöwo ante waa adinque apænemönipa.

Bitö öönædë Awënë nê ingaïmi inte inguipoga Awënë Odeyebi bitö baquinque edæ quingæ pöe. Öönædë owodäni ëñente cædäni bai inguipoga adobai bitö äno bai ëñente cæcæimpa.

³ Mönitö imönite bitö, Cængui, ante iimö iñö iimö iñö eyepæ pönömi ænte cæmönie.

⁴ Mönitö wænæ wænæ cæmöni incæte bitö nê panguënëmi incæ pönö ñimpo cæbi quëwëmönie. Mönitö adobai edæ wadäni mönitö imönite wænæ wænæ cædäni adinque ñimpo cæmöni quëwënäni ae.

Mönitö wænæ wænæ möni cæinënö godö gocæte ante cæmöni adinque bitö wææ cæbi ate mäninö godö godämaï inte mönitö wæætë wænæ wænæ

cædämaï incæmönimpa, Wæætë edæ nê wiwa ewocadongä nempo ongönömönite bitö gä pe æmpobi quëwëmönie.”

Mänömaïno ante apænete Wængongui ingante apæneedäni, Itota angantapa.

⁵ Äninque tömönäni inänite godömenque apænedinque Itota,

—Bitö iimaï cæbi ininque bitö æmigo æbänö cæbaingäa, ante pönëdäni. Ayaönænëña incæ bitö æmigo weca godinque bitö, “Botö æmigo ëñëmi. Päömo bodogaa tånoque pönömi ænimö inte ayæ ate botö adopo pönömo æncæbiimpa. ⁶ Edæ wacä botö æmigo incæ wayömö gocæte ante botö weca pongampa cæbii. Botö, Quinö impa diyæ godömo cæuingäa, ante wædimo inte bitö imite ämopa.” ⁷ Äñömi tömengä guicönë öñönninque, “Botö odemö ædæmö tee mönedinque botö wëñænäni tönö möimoga öñömo inte diyæ ædö cæte ængæ gantite godömo ænguimii. Ee ae.” ⁸ Äninque bitö æmigo incæ bitö ämi beyænque ængæ gantite pönönämaï ingampa. Incæte wæætë wæætë äñömi tömengä, Ancaa ëñente awædö, äninque ængæ gantidinque bitö imite do pönongä æmaïimpa. ⁹ Ante apænedinque botö iñömö mönitö iminute iimaï ämopa. Pönömi æmoe, ante nê angä bai cædinque mönitö möni ænguimö ante Wængongui ingante apæneedäni. Eyömöno ii, ante nê diqui diqui mingä bai cædinque mönitö, Æbänö ii, ante ædæmö ëñencæte ante Wængongui ingante wede pönente apæneedäni. Odemö mönitö beyæ wi æneçäimpa, ante aa pecä bai cædinque mönitö, Æbänö cæquimoo, ante ëñencæte ante Wængongui ingante nangui apæneedäni. ¹⁰ Edæ, Pönömi æmoe, ante nê änäni iñömö edæ do ænänipa. Nê diqui diqui minäni iñömö do adänipa. Ayæ odemö ponte nê aa pedäni tömönäni näni guiquinque edæ do wi ænete bai bacäimpa.

¹¹ Ante apænedinque Itota godömenque apæneçantapa.

—Wëñæ mæmpobi imi, ëñëmi. Bitö wëñængä päo ante angä ëñëninque bitö dicæ dicamö incæ godömi ængäa. Gäyæ ante angä ëñëninque bitö tæntæbo incæ dicæ godömi ængäa. ¹² Enquëmo angä ëñëninque bitö emëñe incæ dicæ godömi ængäa. ¹³ Ininque mönitö nê wiwa cædömiini incæ, Wëñængä beyæ quinö waa i, ante ëñëmini inte do godömiini ængampa. Mönö Mæmpo iñömö waa pöni cædongä iñongante änäni ëñëninque tömengä nê änäni inänite tömengä Tæiyæ Wæmö Önöwoca ingante da pönongä æncædänimpa, ante Itota apænegacäimpa.

Wænæ tönö cæcä imaingampa, ante wapiticæ änänipa

(Mäateo 12.22-30; Mäadoco 3.20-27)

14 Ayæ wænæ nē babetadecā iñōmō waocā baō do guite ongōnongante Itota tæcæ wido cæcantapa. Wænæ tao gocā ate onguifængā tededāmai iñingā incæ do tededā ate wædinque godongāmæ ongōnāni wæætē guifente wædinque waa agadānīpa. 15 Pancadāniya guiquēnē, “Iñæmpa wænæ awēnē Beedeboo tōnō godongāmæ cædinque Itota wænæidi inānite wido cæcā iμαingampa tōō,” ante tedewēnānitapa.

16 Wadāni guiquēnē, Æbānō cæmō ate Itota oda cæquingāā, ante cædinque tōmengā ingante, Bitō dōnædē nāni cæi bai mā odōmōmi ate pōnēmaimōnīpa, ānānitapa. 17 Mānōmai babæ cæcæte ante ānewēnānīpa, ante Itota do ēñēningā inte iμαai angantapa. “Awēnē odeye nempo quēwēnāni nāēmæ wæætēdō wæætē cædāni iñinque awēnē nānō ōmædempote wæquinque tōmēnāni nāmā ēwente cædānīpa. Ayæ adocōnē owocabo incæ adoyōmō godongāmæ quēwēnānī incæ nāēmæ wæætēdō wæætē cædāni iñinque tōmēnāni oncō woquinque nāwæ gobainānīpa. 18 Mīnitō, Wænæ awēnē Beedeboo tōnō cædinque Itota wænæidi inānite wido cæbaingampa, ante ānewēmīnīpa tōō. Iñæmpa awēnē Tatāna nempo quēwēnāni iñōmō nāēmæ wæætēdō wæætē piñnāni iñinque adocabodāni ināmai iñōnānite tōmengā dicæ tōmēnāni inānite ēnempobaingāā. 19 Mīnitō, Beedeboo tōnō cædinque Itota wænæidi inānite wido cæcampa, ante tedewēmīnīpa. Māniñō mīni ānewēnō nāwangā i bai mīnitō miñæ nē godāni guiquēnē æcānō tōnō cæte wido cædānīi. Iñinque mīnitō miñæ nē godāni incæ mīni ānewēnō beyænque ante nāēmæ piñinque mīnitō imīnite wæætē apænte āninque piñcædānīpa anguēnē. 20 Botō iñōmō Wængongui tōnō godongāmæ cædinque wænæidi inānite wido cæbo apa ānewēmīni. Mānōmai i iñinque botō Wængongui Awēnē Odeye iñōmo inte mīnitō weca do pōmo aedāni,” ante Itota apænegacāimpā.

21 Ayæ, “Iμαai impa. Nē tæi piñængā iñōmō tæēmōncoo wēnate mongæninque, Wææ godō cæinca, ante tæēmōnca nææante tōmengā oncō boyæ wææ godō wææ godō cæyongā tōmengā ēadincoo iñōmō edæ ee ongompā. Tatāna iñōmō mānōmai ingampa. 22 Incæte wacā godōmenque tæi emongā inte pōninque māningā ingante edæ bæ tacampa. Ayæ tæēmōnca, Wææ godō botō cæinca, ante māningā nānō āninca ñōwo pōningā iñōmō gā pe æmpote ō æninque tōmengā nānō ēadincoo adobai gā pe æmpote ō ænte māo nēnempocampa. Botō iñōmō nē tæi emōmo pōni iñōmo inte edæ godōmenque tæi emongā nānō gānā cæbai cæbopa,” angantapa.

23 Ayæ, “Botō tōnō æcānō wīi godongāmæ

cæcā iñōmō tōmengā iñōmō edæ botō imote Baa ante piñte cæcā ingampa. Ayæ botō, Waodāni botō miñæ poncædānīmpa, ante cæyōmo waocā botō tōnō wīi cæcā iñōmō tōmengā wæætē botō miñæ poncæ cæyōnānite tatodongā wadæ godānīpa,” ante Itota apænegacantapa.

Wænæ waodē owote godingā inte adodō pompa, ante

(Māateo 12.43-45)

24 Ayæ apænedinque Itota iμαai ante apænegantapa. “Waocā baōnē owote ate tao godinque wænæ wentamō nānō ēwocadingā iñōmō edæ, Quingānō baōnē go guidinque edæ guēmante quēwenguimoo, ante diqui diqui mīnte ayongā ōnōmæca to amīnte i ate wædinque edæ, ‘Botō tao godincōnē adodō go guite quēwencæboimpā,’ ante pōnēninque adodō pongampa. 25 Ponte ayongā waocā ōnonganque bayongante wacā ōnōwoca tōmengāā owodāmai ingā adinque wænæ wæætē, Æ waocā botō owodincō bai inongā inte ñōwo wadæ ñēmænte māincoo cabo tē gæte bai ōmæwocacā ingā abopa. 26 Ate adinque tōmengā wæætē godinque wænæidi godōmenque wentamō ēwocadāni tiæte ganca mānimpodāni inānite ænte pongampa. Tōmēnāni tōmānāni waocā baōnē godongāmæ pō guite owodāni ate waocā iñōmō wænæ yewæninque godōmenque wæwengampa,” ante Itota apænegacāimpā.

Æbānō cæte watapæ quēwenguī, ante

27 Itota tæcæ apæneyongante onquiyængā iñōmō godongāmæ ongōnāni tōnō ongōninque ogæ tededinque,

—Bitō imite nē mangāinā inte edæ tōmēnā nānā toquinque impa. Bitō imi goōmæ gānongāinā inte edæ tōmēnā watapæ nānā quēwenguinque impa.

28 Ante ogæ tededā ēñēninque Itota wæætē,

—Iñæmpa Wængongui nānō ānō ēñēninque nē cædāni guiquēnē tōmēnāni wæætē nāni watapæ quēwenguinque ēñente cædānīpa, ante apænegacāimpā.

Ōnædē nāni cæi bai cædinque mā cæbi amōnie, ānānīpa

29 Māniñedē godōmenque nangui ināni pōnāni adinque Itota, iμαai ante apænegantapa. “Mīnitō wīi cæte mīni cæcabo imīnīpa. Mīnitō edæ, Mā cæte odōmōmi adinque pōnēmaimōnīpa, ante ancaā āmīni awædō. Nāwangā āmo ēñēedāni. Cōnāō wodi beyæ cædinque Wængongui bamōnengæ nānō cægaīnō ante mīnitō pōnēnāmai iñōmīnite edæ māninque mīni aquinque cæcæimpā ānewēmīnīi. 30 Nīnebaidi pōnencædānīmpa, ante Cōnāō wodi ingante Wængongui angā quēwengacāimpā.

Ñowomīni pōnencæmīnīmpa, ante adobai cædinque Wængongui botō Waobo ēñagaimo iñōmote adobai angā quēwēmo acæmīnīmpa. ³¹ Doyedē iñōmō betamonca gāmæñō òmæ awēnē inongā inte onquiyængā incæ awēnē Tadōmōō wodi nanguī ēñente nānō apænedō ante ēñencæte ante doōnæ quēwēnīnque pongacāīmpa. Tadōmōō wædænque ēñengā iñongante botō godōmenque nanguī ēñēmo inte mīnitō weca ongōñōmote mīnitō iñæmpa wīī ēñēmīnīpa tōō. Inīnque māningā onquiyængā incæ Wængongui nē apænte angā weca pōnīnque mīni ñōwo quēwēncabo tōnō godongāmæ ongōnīnque, Mīni pante wæquinque ēñēnāmāī ingamīnīmpa tōō, ante apænte piīngūngā ingampa. ³² Cōnāō wodi Wængongui beyæ apæñecā ēñēnīnque Nīnebaidi wēnæ wēnæ nāni cægāinō ante wæwente pōnēnīnque ñīmpo cægadānīmpa. Cōnāō wodi wædangā iñongante botō wæætē nē ñænæmo inte apænebo ēñēnīnque mīnitō iñōmō ēñēnāmāī iñīnīpa. Inīnque Nīnebaidi incæ Wængongui nē apænte angā weca pōnīnque mīni ñōwo quēwēncabo tōnō godongāmæ gongænte ongōnīnque, Mīni pante wæquinque ēñēnāmāī ingamīnīpa tōō, ante apænte piīnānidō anguēnē,” angantapa.

Mōnō awīnca gomō aquīnemō bai ēmōmpa, ante

(Māateo 5.15, 6.22-23)

³³ Ayæ godōmenque apæñecantapa. “Gongapæncade tī wodōnodīnque waodāni dicæ awēmō iñōmō wē wodōnānīyaa. Owæta boo cæcadānīyaa. Wæætē, Māniñōmō nē pō guīdāni acædānīmpa, ante cædinque gongapæncade awæmpa æmongapaa cō cædāni ñāō bæco adānīpa. ³⁴ Mōnō baō tōmāo beyæ mōnō awīnca tīca ēnente bai ēmōmōmpa. Mōnō nō pōnēnīnque amō iñīnque mōnō ñāō tīca ēnente cægonte bai waa cæte quēwēmōmpa. Wæætē wīwa pōnente amō iñīnque mōnō wēmō iñōmō cægonte bai inte wīwa cæte quēwēmōmpa. ³⁵ Mānōmāī beyæ bitō, Wēmō ewocadāmāī incæboīmpa, ante bitō ònōwoca cōwā adīnque nāmā wææ cæe. ³⁶ Inīnque bitō baō tōmāo ñāō entawēnīnque bitō ònōwoca adobai ñāō ewocabi iñīnque quīōmenque incæ wēmō entawēnāmāī īmāīmpa. Gongapæncade ñāō bæco edonque abi bai edæ ñāō ædæmō entawēnīnque edonque adīnque waa quēwēmaīmpa,” ante Itota apæñegacāīmpa.

Paditeoidi tōnō nē wææ odōmōnāni iñānīte Itota piīngā

(Māateo 23.1-36; Māadoco 12.38-40; Odoca 20.45-47)

³⁷ Inīnque apæñecā ate adocanque Paditeocā tōmengā ingante, Pō cæe, angā ēñente pō guīte cæncæte ante ongongā. ³⁸ Adīnque Paditeocā iñōmō, Itota quīnante mempodāmāī inte cængāā, ante guīñente wæcā. ³⁹ Inīnque mōnō Awēnē tōmengā ingante,

—Mīnitō Paditeoidi iñōmō edæ owæta tōnō podato cæncadē inō wentamō ēnencō ee adīnque yabæque mēnongate bai cæmīni iñīnīpææ. Māīncooque ænīnente mīni wædō beyæ ayæ wīwa mīni cædō beyæ edæ mīmōno wentamō entawēmīni iñīnīpa. ⁴⁰ Mīni ēñēngadē. Nē badongā iñōmō yabæque badōnīnque cæncadē inō badōnāmāī ingantawogaa. Inīnque mōnō baō nē badongāingā iñōmō adocā mōnō ònōwoca badongacāī apa quēwēmīni. ⁴¹ Inīnque mīnitō wæætē wadāni iñānīte ædæmō waadedīnque mīnitō māīncoo pædæ godō pædæ godō cæmīni iñīnque tōmāncōo edæ ñā mēnongate bai ba adīnque mīnitō wæætē edæ ñāō bai entawēncæmīnīmpa.

⁴² Paditeoidi mīni wæquinque iīmāī cæmīnīpa. Māīncoo diete ganca māīnīmpocōo ænte cō cædinque, Adocōoque Wængongui quī impa, ante mōnō godongāīmpa, ante cæmīnīpa. Mīnitō mānōmāī cædinque edæ òñabo mīni mīnte pæyabo, Oguī waa cængui, ante mīni tā pete æñābo incæ edæ, Wængongui quī impa, ante pancayaboga godōmīnīpa. Māīnīnganca cædinque mīnitō waa cæmīni incæte wadāni iñānīte nō cædāmāī iñīni inte Wængongui ingante waadete pōnēnāmāī iñīnīpa tōō. Inīnque mānīnō òñabo godonguēnēmīni inte mīnitō godōmenque waadete pōnēnīnque nō cæquēñēmīni iñīnīpa.

⁴³ Ayæ Paditeoidi mīni wæquinque impa. Mīnitō odōmōīncōnē go guīdīnque nāmanque ante pōnēnīnque wæmōmpaa pōnī tæ contate tomīni awædō. Ayæ waodāni nāni godonte æīmāncadē godīnque mīnitō nāmanque pōnēnīnque, Wadāni, Waa quēwēdāni, ante apæñedinque mōnītō imōnīte waa acædānīmpa, ante mīni wæquinque edæ ānewēmīnīpa tōō.

⁴⁴ Ayæ waocā wōdīdo ñōmāī ongō bai mīnitō iñōmō mīni wæquinque edæ wentamō entawēmīnīpa. Mānōmāī entawēmīnīpa, ante ēñēnāmāī inte wadāni edæ mīni ānō ante ēñente cædinque edæ oda cædānīpa, ante Itota piīngantapa.

⁴⁵ Inīnque adocanque idægōidi nāni wææ angāinō ante nē ate ēñengā iñōmō Itota ingante apæñedinque,

—Awēnē, mānōmāī ānīnque bitō mōnītō imōnīte adobai piīnte ānewēmī awædō.

⁴⁶ Āñongante,

—Mīnitō dodāni nāni wææ angāinō ante nē adīmīni inte edæ mīni adobai

wæquinque impa. Edæ, Cædāmaī cædāmaī, ante ancaa wææ āninque mīnitō iñōmō edæ māincoo teēmencoo mō paate wadāni ōnōnancapæ cō cædancaþænāni bai cæmīnīpa tōō. Ayæ wæætē ōnompogonca adopogoncaque incæ gā ænancapænāmaī cæte bai cædinque mīnitō mīni wæquinque edæ, Æbānō cæte waa quēwenguī, ante odōmonte apænedāmaī imīnīpa tōō, ante Itota apænecantapa.

⁴⁷ Ayæ godōmenque apænedinque, “Wængonguī beyæ nē apænegaināni Inānite mīnitō mæmæidi incæ nē wænōnāni ingadānīpa. Mīnitō iñōmō, Nē wængongaināni nānōmōidi imōnīpa, ante bai cædinque, Wængonguī beyæ nē apænegainānido, ante mænōnomīnīpa tōō. Mīni wæquinque edæ mænōmaī cæmīnīpa. ⁴⁸ Īnīnque, Mōnitō mæmæidi wængongadānīpa, ante ēñēnimōni inte tōmēnāni wodido ante mænōnomōnīpa, āninque mīnitō mæmæidi nāni cægāinō ante Ao āninque cæmīnīpa tōō,” ante Itota piingantapa.

⁴⁹ Ayæ iīmaī ante apænecantapa. “Mānōmaī beyæ Wængonguī mōnō nē ēñengaingā īnongā incæ iīmaī ante apænegacāīpa. ‘Botō beyæ nē apænedāni tōnō botō nē da godōnāni inānite botō, Idægoidi weca gote apæneedāni, āmo gocædānīpa. Āmo gote pōnāni adīnque idægoidi wæætē pancadāniya inānite wænōnāni wæncædānīpa. Ayæ pancadāniya inānite togænte pānāni wæcædānīpa,’ ante Wængonguī do apænegacāīpa. ⁵⁰ Īnīnque ñōwo quēwēmīni iñōmīnite, Quīnante wænōmīni, ante Wængonguī edæ mīnitō imīnite ancæcāīpa. Wængonguī beyæ nē apænegaināni inānite tōmēngā nānō badongaiñedē dodāni mā pōnī wænōnāni beyæ ayæ iīncayæ ate ñōwo ganca wænōnāni beyæ īnīnque edæ nē wænāni tōmānāni wepæ nāni nāgāinō ante, Ñōwo quēwēmīni mānīnāni tōmānāni wepæ nāate bai imīnīpa. ⁵¹ Edæ tōmānāni nāni wængongaiñō ante edæ ñōwomīni mīni pante wæquinque impa. Edæ mā pōnī wænōnīnque docā Abedo wodi ingante adocanque wæñongā wængacāīpa. Īncayæ ate Wængonguī oncō ñænæncō boyæ nāni iya tāimpaa gāānē ongōñongante Tacadiya wodi ingante wænōnāni nānō wænganca wadāni nanguī Ināni inānite wænōnāni wængadānīpa. Incæte Wængonguī, Mīnitō mæmæidi nānōmōidi ingaimīni inte tōmēnāni nāni wængongai beyænque wepæ nāate bai wentamō entawēñōmīnite botō wæætē ñōwomīni imīnite pāmo wæcæmīnīpa, ante Wængonguī angampa,” ante Itota apænegacāīpa.

⁵² Ayæ apænedinque, “Dodāni nāni wææ angāinō ante nē adīmīni iñōmō mīnitō nē

ēñenguēnēmīni inte edæ mīni wæquinque nō pōnente ēñēnāmaī imīnīpa. Ayæ wadāni, Nō pōnente ēñengæīmpa, ante odemō guīite bai tæcæ cædāni adīnque mīnitō odemō tee mōnete yabæ wido cæte bai cædinque tōmēnāni inānite edæ wææ cæmīnīpa tōō,” ante Itota apænegacāīpa.

⁵³ Īnīnque apænete tao goyongā nē odōmōnāni tōnō Paditeoidi tōmēngā ingante nanguī piīnte badīnque, Āmōni ēñēnīnque apænebi ēñēmōni, apænebi ēñēmōni, ante ancaa ānānīta. ⁵⁴ Ayæ, Tōmēngā wabānō oda cæte tedecā īnīnque mōnō wæætē pāmō wæbaingampa, ante wææ wānonte bai cægadānīpa.

12

Wadō tedete wadō nāni cædōnō ante

¹ Māniñedē nanguī ināni æpodō mūido ganca ināni adoyōmō pō bee tē bee tē cædinque goto gongæñōnāni Itota tōmēngā mīnæ nē godāni inānite tāno apænedīnque, “Paditeoidi iñōmō wadō tedete wadō cæyōnāni mīnitō wæætē wadō nāni cædō ante, Pāō yedæ æmpoqui bai wodō wodō cæpa, ante gomō adīnque tōmēnāni nāni cæinō bai cædāmaī iedāni. ² Adāmaī incædānīpa, ante quīēmē wē wodonte ī incæ iīncayæ ate tōmāā wi ænete bayonete edonque pōnī bacæīmpa. Ayæ quīēmē awēmō cæte ī incæ iīncayæ ate edonque pōnī acædānīpa. ³ Wēmō iñōmō mīni tededō incæ edæ ñāō iñōmō edonque pōnī ēñengæīmpa. Ayæ guīicōnē mīnitō wæntæ apænedō incæ iīncayæ ate oncōmanca īnō æi edæ ogæ tedete edonque ēñengæīmpa,” ante Itota apænecantapa.

Æcānō ingante guīñente wæquī, ante (Māateo 10.26-31)

⁴ Ayæ, “Botō æmigoidi āmo ēñēedāni. Waocā baonque wænōnāni ate tōmēngā ingante ædō cæte godōmenque cæquinānī. Īnīnque mīnitō iñōmō, Baonque wænōnāni wæncæ wæ, āninque edæ guīñēnāmaī iedāni. ⁵ Wæætē edæ, Æcānō ingante guīñente wæquēnēmīni imīni, ante botō odōmonte apænebo ēñēedāni. Waomīni imīnite wænōnte ate nē angā īnongā inte tadōmengadænguipo nē wido cæcā ingante iñōmō mīnitō tōmēngā ingante edæ guīñēedāni. Ao. Māningā ingante guīñente wæedāni,” ante Itota apænecantapa.

⁶ Ayæ, “Waodāni ayamōidi ōnompō æmæmpoque mānimpodāni beyæ tiguitamō mentamonga ante pædæ godonte ænāni amīnitawo. Incæte ayamō adocanque ingante edæ Wængonguī cōwē wææ aacampa. ⁷ Edæ, Ayamōidi bacoo pōnī ināni incæte ōnōnānique inānīpa, ante nē āningā inte mōnō Mæmpo iñōmō mīnitō imīnite

wæætē godōmenque waa acampa. Īñæmpa mōnō ocagui incæ æpoguīnō encamōō, ante Wængongui ĩñōmō edæ do ēñente aacā apa guīñwēmīnii,” ante Itota angantapa.

Waadāni ēñēñōnāni mōnō Itota ingante Ao angæimpa, ante

(Māateo 10.32-33, 12.32; Māadoco 10.19-20)

⁸ Ayæ apænedinque, “Nāwangā āmopa, angantapa. Æcānō waodāni ēñēñōnāni botō imote Ao āninque, Bitō botō Awēnē ĩnōmi ĩmipa, ante āna botō Waobo nē ēñagaimo inte tōmengā ingante wæætē Ao āninque, Bitō ĩñōmō botō mīñæ nē gogaīmi ĩnōmi ĩmipa, ante Wængongui anquedoidi ēñēñōnāni ancæboimpa. ⁹ Wæætē edæ waodāni ēñēñōnāni botō imote nē Baa angaingā ingante botō wæætē Wængongui anquedoidi ēñēñōnāni tōmengā ingante edæ Baa ancæboimpa,” angantapa.

¹⁰ Āninque, “Botō Waobo ēñagaimō ĩñōmote waocā babæ ante wīwa angā incæte Wængongui wæætē edæ pōnō ĩmpo cæcā quēwēncæcāimpa. Wæætē Wængongui Tæiyæ Waēmō Ōnōwoca ingante godō babæ ante nē ānewengā ingante Wængongui wæætē edæ ĩmpo cædāmai inte cōwē pancæcāimpa,” ante Itota apænegacampa.

¹¹ Ayæ, “Mīnitō ĩmīnite bæi ongonte tōmēnāni odōmōincōnē ænte godinque gō cædāni incæte mīnitō māñīñedē, Æbānō ante apænequīmoo, ante wædāmai ĩedāni. Awēñēidi weca incæ nē ānāni weca incæ mīnitō ĩmīnite ænte māo goncædāni incæte mīnitō māñīñedē, Pīñāni ēñente wædinque æbānō ante nāmā wææ anguīmoo, ante ayæ, Æbānō ante apænequīmoo, ante guīñente wædāmai ĩedāni. ¹² Īñæmpa Wængongui Tæiyæ Waēmō Ōnōwoca māñīñedē incæ, Æbānō wææ anguī, ante odōmonte angā ēñēninque mīnitō wæætē māñinō ante wææ ancæmīnīmpa,” ante Itota apænegacampa.

Māincoo nāni æñēmāmo ante

¹³ Tæcæ apæneyongā godongāmæ ongōnāni ongōninque adocanque Itota ingante,

—Awēnē, botō wæmpo wodi mangaincoo incæ mæmpo wodi ōmæ ingaimæ incæ botō mēmō ingante tæcæguedē āmi pā cæcā æmōe.

¹⁴ Āñongante Itota,

—Botō nē apænte āmo ĩmopa diyæ āmo pā cæquingā.

¹⁵ Āninque godongāmæ ongōnāni ĩnānite apænedinque,

—Wīi māincoo nanguī ænte beyænque mōnō quēwengæīmpa cæmīnii. Mīni māincoo æñēmāmo ante edæ ĩmpo cædinque ee aedāni.

¹⁶ Āninque Itota, Wængongui Awēnē æbānō cæquingā, ante ēñencædānīmpa, ante ĩmæca quēwēnāni nāni cæñinō ante odōmōninque ĩmai apænegacampa.

—Adocanque nē nanguī ēcāa inte tōmengā ōmæ wainguipoga nanguī pōñi pæ. ¹⁷ Adinque tōmengā ĩñōmō, “Æbānō cæquīmoo. Botō cænguī da wenguincō ĩñænencō ĩmpa diyæ da wente mangūmoo.” ¹⁸ Āninque, “Īmai cæcæboimpa. Guiyancō oncō bæ tate ĩñænencō wæætē mænoncæboimpa. Mæñōninque tōmēmōncō tōnō māincoo wæætē māñincōnē tōmāncō da wencæboimpa. ¹⁹ Ayæ nāmanque apænedinque botō, Botō cænguī tōnō māincoo nanguī wædepo ba beyæ eyepæ māñimo inte botō guēmancæboimpa. Ōnonque cænguī nanguī cænte nanguī bete tocæboimpa,” ²⁰ Ante nāmanque pōñēñongā wæætē nē māningā ingante Wængongui, “Ēñēnāmai cæbipa tōō. Nōwo woyowotæ incæ edæ, Īdæwaa quēwēmīpa, āmo wæncæbiimpa. Wæmi adinque edæ bitō māincoo ĩni edæ æcānō māincoo baquīi,” ante Wængongui angampa, ante Itota, Māninque ante apænebopa, angacāimpa. ²¹ Ayæ tōmēnāni ĩnānite wæætē, “Wængongui māñōmai angā ēñente wædinque mīnitō wæætē ĩmai ante pōnencæmīnīmpa. Æcānō, Tōmēmoque quī, ante da da wente māna ĩñōmō tōmengā Wængongui ayongā nē ōmæpocā bai inte ōmæwocacā ingampa. Nē ēcāa wodi nānō wænō bai tōmengā adobai bate wæquīnō anguēñē,” ante Itota apænegacampa.

Tōmengā wēñæñāni ĩnānite Wængongui aa-campa, ante

(Māateo 6.25-34)

²² Itota māñīñedē tōmengā mīñæ nē godāni ĩnānite, “Īninque botō mīnitō ĩmīnite āmopa. Inguipoga mīni quēwenguīmāmo ante wædāmai ĩedāni. Quīmōnō ĩmpa cænguīmoo, ante, Quincōdō ĩmpa wēñaquīmoo, ante wædāmai ĩedāni. ²³ Cænguīnque cæñinque dicæ quēwēmōngaa. Weocooque wēñadinque dicæ quēwēmōngaa. Mōnō quēwenguīmāmo ĩñōmō godōmenque ĩmpa. ²⁴ Gapatai ĩñōmō cænguī ante dicæ mīnte pæ ate tā pete māñāniyaa. Incæte Wængongui eyepæ godongā cæñāni aedāni. Mīnitō guīquēñē ōōmā ēadāni bai ĩnāmai ĩñōmīnite Wængongui mīnitō ĩmīnite godōmenque waa adinque eyepæ pōnongā cæmīnīpa. ²⁵ Wængongui nānō anganca quēwēninque mīnitō nanguī cædinque wantæ ĩñō incæ ædō cæte godōmenque quēwenguīmīnii. ²⁶ Māñinō wædænque cæquī incæte wīi eyepæ cæmīni ĩninque mīnitō, Botō quēwenguīnō ante wadō wadō cæcæboimpa, ante quīnante wæmīnii,” ante Itota angantapa.

²⁷ Ayæ, “Ongai guiquenê weocoo ante daque daque dadamaï inte wodonte tinamaï iññänite Wængongui weocoo waëmoncoo bai godongä waa põni ênopa. Awenê Tadomö wodi waëmoncoo êagainä incæ wii ongai bai êñagacäimpa. Ongai iññomö godömenque waëmö põni ênopa. ²⁸ Gaguimæ iññomö iimö ate edæ gongapamö nè tanguinque ñowoönæ pæ incæte Wængongui waëmö põngä ênopa. Iñinque, Waëmö ênodö nè põngä inte mönö imonte godömenque eyepæ põni põngä ænte êñacæimpa, ante põneminiyaa. ²⁹ Minitö cængui ante bequ ante æñinte wædämaï iedäni. Edæ, Æbänö cæte ænguimö, ante wædämaï iedäni. ³⁰ Inguipoga wayömö nani êñênämaï incabo wayömö nani êñênämaï incabo mäninö ante wæyönäni minitö guiquenê, Mönö ænguênênö ante mönö Mæmpo iññomö edæ do êñengampa, ante põneninque guñente wædämaï iedäni. ³¹ Wæætê Awenê Odeye nempo quëwencæte ante nangui cæyöminite tömengä wæætê minitö ænguênênö ante do edæ eyepæ põni põngä æncæminimpa,” ante Itota apæñecantapa.

Mönö êaquincoo ööncädê do êamompa, ante (Mäateo 6.19-21)

³² Godömenque apænedinque Itota, “Botö nè aabo iññomote minitö botö miñæ mini gocabo iññomö wædenque põni imini incæte edæ guñente wædämaï iedäni. Iñæmpa minitö Mæmpo iññomö, Awenê Odeye nempo quëwencæminimpa, ante põnö cædinque waa tocampa cæminii. ³³ Minitö iññomö, Ö ænani dæ äñomö cayæ cænämaï iññomö botö maincoo wodämaï inguicoo inte edæ cöwê mæ ongongæimpa, ante cædinque öönædê iññomö wo æentodonte bai cædäni. Wodämaincadedê da wente bai cædinque minitö maincoo godonte æninque ömæpodäni wæwänäni inänite wæætê godömini æncædänimpa. ³⁴ Mini waocabo iññomö minitö maincoo ongöñomö mäninö quëwencæte ante wæmini iminipa, ante adinque botö, Öönædê iññomö wo æentodonte bai cæte mäedäni, antabopa,” ante Itota apæñecantapa.

Tömää eyepæ cædinque wänö cöedäni, ante

³⁵ Ayæ apænedinque, “Waadäni, Awenê beyæ ante cæcæimpa, ante weocoo eyepæ wëñadinque, Gongapæncade waëmö bæcocæimpa, ante eyepæ põni cædäni bai minitö adobaï eyepæ põni cædinque, Awenê poncæcäimpa, ante wänö cöedäni. ³⁶ Edæ waodäni tömênäni awenê wayömö gote ææmæ bete ocæ êmænte ponte aa pecä êñëninque quingæ wi ænecæte ante wänö cönäni bai cædinque minitö adobaï, Awenê poncæcäimpa, ante wänö cöedäni.

³⁷ Edæ awenê ponte ayongä tömengä ingante nè cædäni wänö cönäni adinque tömengä wæætê edæ põnö waa cæcä æninque tömênäni iññomö tocædänimpa. Minitö iminite näwangä ämopa. Nè wänö cönäni inänite awenê põnö angä ate tæ contadäni ate tömengä nè awenê inongä incæ, Nangui cæcæimpa, ante weocoo wëñadinque tömênäni weca põninque edæ põnö cæcä æncædänimpa. ³⁸ Edæ woyowotæ tæcæ bæcä incæ ayatadäa wæicä incæ põninque tömengä nè wänö cönäni inänite waa adinque põnö waa cæcä adinque tömênäni iññomö watapæ edæ tocædänimpa. ³⁹ Wæætê oncö nè êacä guiquenê, Nè awemö æncæ cædongä æyedênö ponguingää, ante êñëninque do wææ cæcä bai nè awemö æncæ cædongä wæætê edæ pö guite ænämaï incædongäimpa, ante apænebo êñente põnedäni. ⁴⁰ Minitö adobaï, Waocä nè êñagainä æyedênö ponguingää, ante êñênämaï imini inte edæ tömånö eyepæ cædinque edæ wänö cöedäni,” ante Itota angacäimpa.

Awenê ingante nè cæda, ante (Mäateo 24.45-51)

⁴¹ Mänömaï angä êñëninque Pegodo, —Mäninö odömonte bitö apænedö ante mönitö adomönique êñencæmönimpa, ante apænebitawo. Wæætê edæ, Wadäni tömånäni êñencædänimpa, ante apænebitawo.

⁴² Äñongante mönö Awenê wæætê odömoncæte ante apænedinque, “Inguipoga awenê iññomö, Æcänö nè êñengä inongä inte botö quincoo ante ædæmö aacä inguingää, äninque, Mänömaï inte cæcä ingante adinque botö ämo ate tömengä nè angä badinque botö oncönê nè cædäni inänite ædæmö aadinque cængui eyepæ iññonte godongä cæncædänimpa, angampa.

⁴³ Iñinque awenê wayömö gote ponte ayongä, Nè cæcä botö äno ante êñente cæcampa, ante adinque awenê wæætê tömengä ingante godö waa cæcä ate nè waa cæcä iññomö edæ waa tocæcäimpa. ⁴⁴ Minitö iminite näwangä ante apænebopa. Nè êñente cædingä ingante awenê, Bitö botö maincoo tömåncoo edæ nè aabi bacæbiimpa, ancæcäimpa.”

⁴⁵ “Incæte nè cæcä wæætê, Botö awenê æiquedö ponguingää, ante põneninque tömengä tönö awenê ingante nani godongämæ cæcabo onguñänäni incæ onquiyänäni incæ tömênäni inänite tæi tæi päninque cængui nangui cæninque ti nämæ nangui bete quidi quidi dowænte bacä. ⁴⁶ Iñinque tömengä, Æönædö ponguingää, ante wædämaï iññongante, Æyedênö ponguingää, ante êñênämaï iññongante edæ awenê iññontobæ pongä wæbaingampa. Ponte adinque awenê wæætê mäningä nè

ēñēnāmai cædingā ingante wido wido tod-
inque nē pōnēnāmai ināni weca māo wido
cæbaingampa,” ante Itota apænecantapa.

⁴⁷ Ayæ, “Awēnē ingante nē cæcā
incæ awēnē nānō ānō ante onōmoncaque
ēñēninque wī eyepæ cædinge ēñēnāmai
cæcā ininque awēnē iñōmō tōmengā ingante
nanguī tæi tæi pancæcāimpa. ⁴⁸ Ayæ wæætē
edæ, Awēnē æbānō angāā, ante ēñēnāmai
inte ēmoncā guiquēnē tōmengā nānō pan-
guingue wēnæ wēnæ cæcā incæte tōmengā
ingante wædænque tæi tæi pancæcāimpa,
ante Itota apænecāimpa. Edæ awēnē
æcānō nempo nanguī pōnongā ænte
næængā iñōmō tōmengā ingante Awēnē
wæætē, Bitō adodō nanguī pōnōmi æmoe,
ancæcāimpa. Ayæ, Botō māincoo nanguī on-
goncoo iñonte bitō aacæbiimpa, ante æcānō
ingante awēnē angāā tōmengā ingante,
Bitō godōmenque nanguī cæcæbiimpa, ante
awēnē ancæcāimpa,” ante odōmōninque Itota
apænecāimpa.

*Nāwæ gocædānimpā, ante cæcæte ante
pōmopa, angampa*

(Māateo 10.34-36)

⁴⁹ Āninque Itota godōmenque apænedinque,
“Botō inguipoga gonga bai tānoncæte
ante pongaimo inte edæ, Do tānonte
bai edæ waa tocædōmoimpa. ⁵⁰ Ayæ
botō nantate wæwencæte ante pongaimo
inte botō nantate wæganca nantate botō
wæquēnēnō ante iinque cæcæte ante
wæbopa. ⁵¹ Minitō, Inguipoga quēwēnāni
piyænē cæte wæætēdō wæætē cædāmai inte
quēwæcædānimpā, ante cæcæte ante Itota
pongaingā ingampa, ante pōnēmīnitawo.
Iñæmpa wadō āmo ēñēdāni. Botō ingui-
poga pōmo beyænque wæætēdō wæætē
piincædānimpā. ⁵² Iincayæ ate onompo
æmæmpoqe nāni owocabo mānimpodāni
iñōnānite mengāā go adocanque ināni
iñōmō botō beyænque mēnaa inate nāēmæ
piinte bacædānimpā. Ayæ wæætē mēnaa
īna incæ mengāā go adocanque ināni
inānite wæætē nāēmæ piinte bacædāimpā.
⁵³ Botō ēnōwo beyæ mæmpocā tōmengā
wengā onguīñengā ingante nāēmæ piinte
bacæcāimpa. Wēñængā wæætē mæmpocā
ingante nāēmæ piinte bacæcāimpa. Wāānā
tōmēnā wengā onquiyængā ingante wæætē
nāēmæ piinte bacædāimpā. Wæætē wāānā
ingante wēñængā incæ nāēmæ piinte
bacæcāimpa. Biyongā ingante nānō
wæntedā incæ nāēmæ piinte bacædāimpā.
Nānō wæntedā inante biyongā ingante
nāēmæ wæætē piinte bacæcāimpa,” ante
Itota tōmengā mīñæ nē godāni inānite
apænecāimpa.

*Æbānō oo baquimpā, ante ēñengæimpā,
ante*

(Māateo 16.1-4, 8.11-13)

⁵⁴ Ayæ godongāmæ ongōnāni inānite
apænedinque, “Nænque guidō gāmænō
boguimā wentamō pō adinque mīnitō,
Cōōnæ wentamō wocæmpa, āñōmīni edæ do
cæpa. ⁵⁵ Ayæ wæætē woboyæ betamonca
inō pæmæ pō adinque, Ocoi nāwanca
cæpa, ante tedeyōmīni dobæ ocoi nāwampa.
⁵⁶ Inguipoga gomō adinque oōnædē æmō
adinque mīnitō, Æbānō cæcæte ante
ēmōō, ante edæ do ēñēmīnīpa. Wæætē,
Inguipoga wayōmō wayōmō æbānō cædānī,
ante adinque mīnitō, Wængonguī oo pōni
cæqingānō anguēnē, ante quīnante wīi
ēñēmīni. Edæ wadō tedete wadō cæmīni
imīnīpa tōō,” ante Itota tōmēnāni inānite
piingacāimpa.

*Nē piingā ingante waadete apænecāimpā,
ante*

(Māateo 5.25-26)

⁵⁷ Ayæ edæ, “Æbānō cæte nō cæquīi,
ante mīnitō tōmēmīnique apænte ante
cæquēnēmīni imīnīpa. ⁵⁸ Nē piinte angā
iñōmō bitō imite edæ, Wīwa cæbīpa, ante
awēnē weca ænte māocā idōmæ godinque
bitō guiquēnē tōmengā ingante waadete
apænēbi ēñēninque tōmengā wæætē piyænē
cædinge ee abaingampa. Wæætē edæ
wīi waadete apænēbi ininque tōmengā
nē apænte angā weca godōmenque ænte
gobaingampa. Nē apænte angā wæætē bitō
imite wææ wānongā ingante pædæ godongā
æninque wææ wānongā wæætē tee
mōnebaingampa. ⁵⁹ Tee mōnecā ininque bitō
quīēmē beyæ debe imi ininque edæ tōmanta
pōni di godonte ate tabaimīpa, ante āmo
ēñēmaīmīpa,” ante Itota apænecāimpa.

13

*Ocæ ēmænte Wængonguī gāmænō
ponguēnēmīni imīnīpa*

¹ Māniñedē wadāni Itota weca pōninque
iūmai ante apænēdāni ēñengantapa. Ga-
dideabæ quēwēnāni, Wængonguī quī, ante
cæningā ingante tæcæ wæñōñōnānite
Pidato guiquēnē tōmēnāni inānite iñontobæ
wæñōninque tōmēnāni wepæ cæningā
wepæ tōnō dibæ cæcantapa. ² Ante
tedeyōnāni Itota wæætē, “Gadideabæ
quēwēnāni wadāni pōnōmenque wēnæ
wēnæ cædāni iñōnāni mānimpodānique
godōmenque wēnæ wēnæ cædāni inte
mānōmai wæñānīpa, ante mīnitō pōnēmīni
awædō. Iñæmpa Gadideabæ quēwēnāni
tōmānāni adobai wēnæ wēnæ cædāni
iñōnāni mānīnānique edæ wæñānīpa.
³ Wīi mānōmai impā, āmo ēñēmaīmīnīpa.
Tōmēnāni wīi godōmenque wēnæ wēnæ
cædināni inte wæñānitapa. Mīnitō guiquēnē
wēnæ wēnæ mīni cædinō ante wæwente
pōnēninque iūmpo cædāmai imīni ininque

mūnitō tōmāmīni adobaī wæmāimīnīpa,” āngantapa.

⁴ “Ayæ Eedotadēē iñōmō tōmēnāni nāni gomō aquincō Tidoeē nāni ānōncō tæ wææñonte waodāni dietiocho ganca iñāni capo wænāni iñinque mīnitō, Tōmēnāni godōmenque wēnæ wēnæ cædāni inte wænānīpa, ante pōnēmīni awædō. Iñæmpa Eedotadēē quēwēnāni tōmānāni adobaī wēnæ wēnæ cædāni iñōnāni mānimpodānique edæ wænānīpa. ⁵ Wīi mīnitō pōnēnō baī impa, āmo ēñēmaimīnīpa. Tōmēnāni wīi godōmenque wēnæ wēnæ cædināni inte wænānīpa. Mīnitō guiquēnē wēnæ wēnæ mīni cædinō ante wæwente pōnēninque iñimpo cædāmaī iñimīni iñinque mīnitō tōmāmīni adobaī wæmāimīnīpa,” ante Itota apæneantapa.

Iigowæ òmæca ongompa, ante odòmōnte apæneantapa

⁶ Ayæ Itota, Wængonguī Awēnē æbānō cæcāā, ante ēñencædānīpa, ante iñæca quēwēnāni nāni cæinō ante odòmōninque iñimāi apæneantapa. “Waocā tōmencodē iigowæ mīnte pæ ate tōmenca ante ponte ayongā edæ dæ òmæcawæ ongompa. ⁷ Ate wædinque tōmengā ocæ ēmænte godinque tōmencawæncō nē aacā ingante apænedinque, ‘Edæ mēa go adoque wadepo tōmenca ante gote ayōmo edæ mānīi iigowæ cōwē òmæcawæ ònonque wææ ongompa cæbii. Òmæcawæ wææ ongōwæ adinque wido tate æmæwo wido cæe.’ ⁸ Āñongā tōmencawæncō nē aacā wæætē, ‘Awēnē, ee ongōe. Botō iigowæ ònōwa gāānē ææ wodinque māmō wagada goi ænte wempo cædente tee moncabo ate wadepo ate bitō ongōñōmi edæ, ⁹ do incabaimpa. Wæætē wadepo ate ayōmite òmæcawæ ate wædinque edæ æmæwo wido tate wido cæbaimpa,’ ante nē cæcā angampa.” Māninque ante odòmōnte apæneantapa, ante Itota apænegacāimpa.

Itota bocæ bocæ wædingā ingante cæcā ate waa bacampa

¹⁰ Guēmanguiōnæ iñonte Itota oodeoidi odòmōincōnē go guiddinque odòmōnte apæneantapa. ¹¹ Onquiyængā māniñōmō ongongā iñōmō tōmengā dietiocho wadepo iñonte wēnæ guicā ate bocæ bocæ wæwēningā inte ædō cæte adiyæ ængæ gantiquingāā. ¹² Tōmengā ingante adinque Itota aa pecā pongā ate,

—Onquiyæmī, bitō bocæ bocæ wædō ante ñōwo botō ñimæncæpote baī cæbo ate bitō waa babīpa.

¹³ Ānīnque tōmengā ingante gampocā ate ñimæncæpote baī badinque onquiyængā iñōmō adiyæ gantidinque wæætē, Wængonguī bitō ñāō baī ēmōmi inte

waa pōni pōnō cæbi æmopa, ante watapæ apæneantapa. ¹⁴ Guēmanguiōnæ iñonte Itota mānōmaī cæcā waa bacā adinque tōmēnāni odòmōincō awēnē guiquēnē pīnte badinque godongāmæ ongōnāni inānite,

—Quimæ quēwēmīni. Ònompo æmæmpoque go adōōnæque mōnō cæōnæ iñonte mīnitō waa bacæte ante ponguēnēmīni iñimīpa. Guēmanguiōnæ iñonte edæ cædāmaī inguēnē quēwēmīni.

¹⁵ Ante pīiñongante mōnō Awēnē wæætē, —Mīnitō wadō tedete nē wadō cædōmīni inte ēñēdāni. Mīnitō cæningā iñōmō wagada incæ bōdo incæ gue ænente wæyongante mīnitō guēmanguiōnæ i incæte cōwē ñi cæyænte æpæ wedeca ænte māo gōnōmīni gongænte becampa. ¹⁶ Wæætē māningā onquiyængā iñōmō Abadō wodi pæingā iñongante Tatāna dietiocho wadepo iñonte goti winte baī cæcā wædingā iñongante mīnitō iñæmpa guēmanguiōnæ i beyænque edæ, Tōmengā ñimæncæpodāmaī incæcāimpa, ante quīnante wææ āmīni.

¹⁷ Angā ēñente wædinque nē pīnte ānāni guingo imonte wæyōnāni godongāmæ ongōnāni guiquēnē, Bamōnengæ pōni Itota waa pōni cæcampa, ante adinque nangui togadānīpa.

Mōotatamō guidimō ante odòmōnte apæneantapa

(Māteō 13.31-32; Māadocō 4.30-32)

¹⁸ Iñinque Itota tōmēnāni inānite, “Wængonguī Awēnē Odeye nempo nāni quēwencabo iñōmō quīnō baī ināni. Edæ, Ābānō nangui yebænte badāni, ante botō inguipoga quīnō pæte yebente baī i adinque, Mānināni adobaī yebænānīpa, ante ēñenguī. ¹⁹ Iñimāi impa. Waocā mōotatamō tōmēmō ænte māo tōmēmōncodē quiyacā bocate pæ iñinque ñæñæñeque bayonte ayamōidi pōninque awæñēmæ ongōnānīpa. Mōotatamō guidimō incæ mānōmaī pæ baī Wængonguī Awēnē nempo quēwēnāni iñōmō wædænque iñināni incæ nangui yebænguīnāni inānīpa,” ante Itota odòmōnte apænegacāimpa.

Pāō yedæ æmpocūi da wengui ante odòmōnte apæneantapa

(Māteō 13.33)

²⁰ Itota ayæ angantapa. “Wængonguī Awēnē iñōmō tōmengā nempo quēwēnāni inānite æbānō cæcāā, ante odōmoncæte ante botō, Iñimāi cæcampa, ante odòmōnte apænebo ēñenguīmīni. ²¹ Edæ iñimāi impa. Onquiyængā ñæñængade tee manguincade ænte tee māninque ædīna nāni āmō ænte mempoga go adopoque da wēninque ayæ, Pāō yedæ æmpocāimpa, ante adoyōmō pōnō da wēninque wempo wempo ædæmō cædengā ate pāōmo yedæ æmpote tōmāo nāāmænta bapa. Yedæ æmpote ate pāōmo

tömäo näämænta ba bai öönædê Awënë nempo mini quëwencabo iñömö tömämîni nô ëfiente bamînipa,” ante Itota odömonte apænecantapa.

*Odemö guiyänemö, ante
(Máateo 7.13-14, 21-23)*

²² Itota mäniñedê Eedotadêë taadö godinque nangui nâni quëwëñömö wodo pænta godinque wædænque nâni quëwëñömö wodo pænta godinque wayömö wayömö gote odömonte apænecäimpa.

²³ Goyongante adocanque,
—Awënë, bitö æmi beyænque nê quëwenguinâni iñömö wædænque inânipa, ämitawo.

Äñongante Itota,

²⁴ —Odemö guiyänemö guicæte ante edæ nangui cæedâni. Edæ nangui inâni incæ guicæte ante cædinque guidâmaï incædânimpa, ämo ëñëmaïmînipa. ²⁵ Iïmaï impa. Oncö nê ëacâ ængæ gantidingque odemö tee mönecâ adinque mînitö iñömö tömengä oncö boyæ gote ongöningque aa pedinque, “Awënë, wi ænebi guiquimöni.” Ante wæyöminite tömengä, “Æminidö imîni, ante ayæ, Ædönö gämæñö quëwente pömîni imîni, ante botö adâmaï imopa,” ancæcäimpa.

²⁶ Angä ëñëningque mînitö wæætê, “Iñæmpa mönitö bitö tönö godongämæ cænte becongämönimpa. Ayæ bitö mönitö taadö ponte cægöningque odömonte apænëbi ëñengamöni ae,” ancæmînimpa. ²⁷ Äñömîni tömengä iñömö, “Æminidö imîni, ante, Ædönö gämæñö pömîni imîni, ante botö ëñënamâi imopa. Edæ do antabopa. Nöwo nê wîwa cægäimîni inte edæ botö weca ongönâmaï. Edæ wadæ goedâni, ämopa,” ancæcäimpa, ante Itota apænecantapa.

²⁸ “Iinque mînitö gomö ayömîni Wængongui beyæ nê apænëgäinâni tönö dodâni Abadäö wodi Itæca wodi Aacobo wodi tönö tömânâni Wængongui Awënë Odeye ömæ godongämæ ongöñönâni mînitö imînite edæ yabæque wido cæcâ ate wædinque mînitö wæætê guingo imonte piinte wædinque edæ Ca ca wæcæmînimpa. ²⁹ Wadâni wæætê edæ nænque tamönö pönâni tönö nænque guidö pönâni ayæ betamonca æmatæ æmatæ pönâni tönö Wængongui Awënë Odeye oncönê ponte tæ contadinque ææmæ bete cængoncædânimpa. ³⁰ Iinque ayæ ate ëñëñâni incæ pancadâniya yæcado ongönâni bate toyönâni mînitö guicüenê do ëñënimîni inte yæcado ongöminî incæte pancamîniya wæætê yæmiñæ gote ongonte wæcæmînimpa,” ante Itota apænecäimpa.

*Eedotadêë quëwëñâni beyæ ante Itota
wæcampa
(Máateo 23.37-39)*

³¹ Mäniñedê Paditeoidi pancadâniya tömengä weca pöninque,

—Awënë Edode bitö imite wænoncæ angantaye. Bitö ongönâmaï wayömö wadæ goe.

³² Änâni ëñëningque Itota,

—Edode congäñe bai babæ cædongä iñongante mînitö tömengä weca godinque, Itota iïmaï angampa, ante apænemîni ëñengædâni. “Edode ëñëmi. Botö ñöwoñæque baönæque wënæidi inânite iinque wido cædinque iinque godö cæbo waa badâni ate iñabæ guingä iñonte botö edæ mäniñedê edæ idæwaa cægäimo bacæboimpa, ante Itota apænecampa,” ante apænemîni ëñengædâni, ämopa. ³³ Incæte botö ñöwoñæ godinque baönæ godömenque godinque edæ waönæ godömenque botö goquëñêno godinque Eedotadêë gocæboimpa. Edæ Wængongui beyæ nê apænëgäinâni incæ Eedotadêë iñömö tömënâni nâni wængaiñömö iñonte botö Wængongui beyæ nê apænëbo adobo inömo inte edæ ædö cæte wayömö ongonte wænguimoo.

³⁴ Ante apænëningque Itota Eedotadêë iñömö quëwëñâni beyæ ante pönente wædinque, “Eedotadêë quëwëminî ëñëdâni, angantapa. Wængongui beyæ nê apænëdâni inânite mîni wænongaincabo inte ayæ Wængongui nanö da pönönâni inânite dicaca tacamîni iñömöminite botö iñömö mînitö imînite waadete pönö cæinente nangui wæbopa. Tawadiya wæmönâ iñömö, Botö wënâni, ante gompingque tæcæñëñæ wëa pönö ö ænâ bai botö adobai, Botö wënâni pödâni, ante æpogadö äñömote mînitö, Wîi pöinente awædö, ante Baa ämîni wætabopa. ³⁵ Nöwo iñömö mînitö onconcoo edæ önonconcooque baconcoo tamëñedâni. Nöwo edæ botö dæ äñömo mînitö, ‘Awënë Wængongui ëmöwo beyænque pöninque bitö toquinque edæ waa cæcæbiimpa,’ ante mîni anguinganca mînitö edæ botö imote adâmaï incæmînimpa ante ämo ëñëdâni,” ante Itota apænecäimpa.

14

*Æpæ ëñate nê wædongä ingante Itota cæcâ
waa bacä*

¹ Itota guëmanguiönæ iñonte Paditeoidi awënë oncönê cæncæte ante go guiyongante godongämæ ponte ongönâni guicüenê, Itota æbänö cæquingäa, ante waa agönânitapa. ² Tömengä weca adocanque æpæ ëñate nê wædongä inte a ongongä. ³ Adinque idægoidi nâni wææ angainö ante nê ate ëñëñâni tönö Paditeoidi inânite apænëningque Itota iïmaï angantapa.

—Wængongui æbänö ante wææ angacäi. Waa bacædânimpa, ante guëmanguiönæ iñonte mönö waa cæquëñemö imöo, ante pönëminî. Wæætê edæ, Guëmanguiönæ

iñonte cædāmaī inguēnēmō imōō, ante pōnēmīni.

⁴ Āñongā edæ pæ wēenedānitapa. Itota iñōmō edæ nē æpæ ēñate wædongā ingante gamcopā waa bacantapa. Ayæ, Goe, angā gocantapa. ⁵ Angā gocā ate Itota wæætē tōmēnāni inānite iñmaī angantapa.

—Mīnitō waocabo iñōmīnite adocanque tōmengā wēñengā onguīñengā incæ tōmengā wagada onguīñengā incæ æpæ ante nāni ææ wodīñōmō goyæ guicā iñinque mæmpocā iñōmō guēmanguīñæ iñonte edæ dicæ tōō tadōnāmaī inguingāā. Mānōmaī goyæ guicā wædinque mīnitō tōmāmīni guēmanguīñæ i incæte do gote nāwæ gongæñinque edæ quingæ tōō tadōmāimīnīpa.

⁶ Ante Itota āñongante tōmēnāni ædō cæte wæætē anguīnīni. Edæ pæ wēenedānitapa.

Monguimæno ante awēnē beyæ gote nē wente cēnāni, ante

⁷ Ayæ Paditeo awēnē nānō nē āñedīnāni pōninque nāmanque ante pōnēninque. Yæcado ongōñōmote botō imote waa acædānimpa, ante cædinque waa pōnī tæ contaī iñōmō tæ contadāni Itota acantapa. Īninque tōmengā, Wængonguī Awēnē nempo quēwēninque æbānō cæquīī, ante ēñencædānimpa, ante imæca quēwēnāni nāni cæinō ante odōmōninque iñmaī apæñecantapa.

⁸—Bitō imite, Monguimæno pō bee, ante nē wente ængā ēñēninque bitō pōninque yæcado inō waēmō iñōmō tæ contadāmaī incæbiimpa. Īñæmpa wacā tōmengā nānō nē waadecā pongā Īninque ⁹ mīnatō imīnate nē wente ængā iñōmō bitō weca pōninque, “Bitō gā goyōmī botō nē waadecā wæætē tæ contaquingā,” ante āmaingampa. Īninque bitō gā godinque wīī waēmō iñōmō wæætē tæ contadinque guingo imonte wæbaīmpa. ¹⁰ Wæætē nē wente ængā ēñēninque bitō monguimæno pōninque yæmīñæ pōnī wēnæ wēnæ iñōmō tæ contæ. Edæ nē wente ængā ponte ayongā bitō wēnæ wēnæ iñōmō tæ contabi adinque tōmengā wæætē bitō imite, “Botō nē waadebi inōmī inte bitō ñowo yæcado pōnī pō tæ contæ, āmopa,” āmaingampa. Mānōmaī angā ēñēninque godongāmæ cæ cōnāni iñōmō, Nē ēacā nānō nē waadebi bitō imī amōnīpa, ante bitō imite waa abaīnānīpa. ¹¹ Edæ, Botō nāmā nē waa cæbo inōmo inte edæ yæcado ongonguēnēmō ĩmopa, ante nē cæcā iñōmō tōmengā iñōmō wææntodonte baī guingo imonte wæcæcāimpa. Wæætē edæ, Botō ōnōmoque ĩmopa, ante yæmīñæ nē ongongā iñōmō tōmengā guiquēnē ængō cæte tocæcāimpa, ante Itota apæñecantapa.

¹² Tōmēnāni inānite ĩnque apæñedinque nē wente æningā ingante Itota godōmenque angantapa.

—Bitō, Pō cæe, ante ææmænocā wente æninque bitō æmigoidi inānite wente ænāmaī ĩe. Bitō tōñīñadāni inānite wente ænāmaī ĩe. Bitō guīdēnāni inānite wente ænāmaī ĩe. Eyequeī owote māincoo nē ēadāni inānite wente ænāmaī ĩe. Edæ bitō tōmēnāni inānite wente æmī ĩninque tōmēnāni wæætē bitō imite wente æmāinānīpa, ante wææ cædinque bitō iñōmō, Botō godōnō wæætē eyepæ pōnōnāni māninque æninque ōñædē wæætē ænāmaī ĩmaīmopa, ante wædinque edæ tōmēnāni inānite wente ænāmaī ĩe. ¹³ Wæætē ææmæno ante wente æninque ōmæpōdāni inte wæwēnāni inānite cōmante wæwēnāni inānite bee ñante wæwēnāni inānite babetamōnāni inānite wente æe. ¹⁴ Mānīnāni inānite wente æninque edæ bitō toquinque ingæĩmpa. Tōmēnāni wæætē ædō cæte adopo pōnōnāni ænguīmīi. Edæ nē nō cædāni nāni ñāni ōmæmonguīñæ ĩnque bayonte edæ mōnō Mæmpo Wængonguī incæ bitō imite adopo pōnongā æncæbiimpa, ante Itota apæñecāĩmpa.

Æcæmæ ante Itota odōmoncæte ante apæñecampa

(Māateo 22.1-10)

¹⁵ Angā ēñēninque Itota tōnō nē cængongā adocanque tōmengā ingante apæñecantapa.

—Wængonguī Awēnē Odeye pongā ate tōmengā tōnō godongāmæ nē cængā iñōmō edæ tōmengā nānō watapæ toquinque cænguingā.

¹⁶ Apæñecā ēñēninque Itota wæætē tōmengā ingante odōmoncæte ante apæñecantapa.

—Waocā ææmæno ante cædinque nangūī ĩnāni inānite māo apæñedinque, Īncayæ ate āmo ate pō bete cæedāni, ante cæcantapa. ¹⁷ Ææmæno beyedē ĩnque bayonte tōmengā ingante nē cæcā ingante āninque, “Īñōnæ ææmæno ĩnque cætimpa. Pōedāni,” ante bitō tē tē wente ænte pōe, ante da godongā.

¹⁸ Godinque wente ængā ēñēninque do nānō nē āñedīnāni wæætē, Ædō cæte ponguīmōnīi, ante tōmānāni adoyōmō wædānīpa. Tānocā iñōmō, “Botō ōmæ ante tæcæ godonte æninque botō acæ goquīmo inte botō ææmæ becæ godāmaī ĩmopa. Incæte nē wente æningā weca adodō gote bitō botō beyæ apæñebi ēñēninque tōmengā wæætē botō imote pīñāmaī incæcāĩmpa,” angampa. ¹⁹ Wacā guiquēnē, “Wagada onguīñæna nāna goti wimencacaya nāna goti wimencacaya ōnempo æmæmpoque ganca mānīmpōdāni ĩnāni inānite godonte ænīmo inte botō, Æbānō cædānīi, ante acæ gocæ cæbopa. Īninque botō ææmæ becæ pōnāmaī imo incæte awēnē ingante āmī botō imote pīñāmaī incæcāĩmpa,” angampa. ²⁰ Wacā guiquēnē, “Botō tæcæ mōnīmo inte ædō cæte ponguīmo,” angā. ²¹ Ēñēninque nē

cæcā iñōmō awēnē weca adodō pōninque tōmēnāni nāni cædōnō ante tōmāā apænecā ēñente wædinque nē ēacā iñōmō ænguī badingque tōmengā ingante nē cæcā ingante, “Bitō mōnō quēwēñōmō wacā taadō wacā taadō ñænæñō incæ guiyānō incæ tōmāo gote adinque nē ōmæpodāni inānite, nē cōmāināni inānite, nē biyaate ināni inānite, nē babetamōnāni inānite adinque ænte pōe.”²² Angā ēñente cædinque nē cæcā wæætē awēnē ingante, “Awēnē, bitō ānīnō ante do cæbo incæte bitō oncō wīī eyede impa.”²³ Ante apænecā ēñente wædinque awēnē wæætē, “Ōnōmæca iñōmō ñænæñō incæ guiyānō incæ gote diquī diquī mīnte wadāni inānite ate āmi pōnāni iñinque botō oncō eyede ponte cæncædānīmpa.”²⁴ Edæ bitō īmite āmopa, Wēñēñēdē botō wente æñīnāni incæ bedāmai incædānīmpa,” ante nē ēacā angampa. Māninque ante apænebopa, ante Itota apænegacāmpa.

Itota miñcæ gocæte ante æbānō cæquīī, ante

(Māateo 10.37-38)

²⁵ Itota tōnō nangūī ināni godongāmæ godānitapa. Tōmēnāni inānite apænecæte ante tōmengā dadi ēmænte adinque apænecantapa.

²⁶ “Mīnitō iñōmō, Itota gāmæñnō ponguīmo, āmīnitawo. Īñæmpa botō weca pōninque waocā mæmpo tōnō wāānā inate ante wædāmai incæcāmpa. Tōmengā nānōogængā ingante ante wædāmai inte tōmengā wēñænāni tōnō tōmengā nānō tōñīñadāni inānite ante wædāmai incæcāmpa. Mānipodāni inānite piinte bai pōñēninque tōmengā, Nāmanque ante quēwencæboimpa, ante wædāmai inte piinte bai pōñēninque botō īmote wæætē godōmenque nangūī waadete pōnenguēnengā ingampa. Mānōmai ante pōñēnāni iñōmō tōmēnānique edæ botō miñcæ nē godāni badānīpa.”²⁷ Ayæ botō miñcæ poncæ cædinque waocā, Awæ botō wænguīwæ, ante nææente ponte bai cædinque, Wæñōñāni wæmo incæte Itota miñcæ cōwē gocæboimpa, ante poncæcāmpa. Mānōmaīnō ante wīī cæcā iñōmō tōmengā iñōmō edæ botō nē ēmiñcængā ædō cæte baquingāā.²⁸ Æi gomō aquīncō mænoncæ cædinque bitō, Æpodō godonte æninque iñinque mænonguīmo. Botō eyepæ mantawo, ante tāno pōñēnāmai inte edæ ædō cæte mænonguīmīī.²⁹ Tāno pōñēē cōnāmai īmi iñinque bitō ongonto ontowæ do nāñe ñongæñinque godōmenque ænguī ante ōmæpobi badingque iñinque edæ mæñōnāmai īmaiñīpa. Ayæ edæ mæñōnāmai īmi adinque godongāmæ ongōñāni wæætē,³⁰ Æ bitō mænoncæ cædimi incæ iñinque mæñōnāmai īmpa tōō,’ ante badete tobāñānīpa,” angantapa.

³¹ Ayæ, “Īmæca awēnē wabæca awēnē ingante guēadō guēa piinte cæcæte ante cædinque ædō cæte tāno pōñēnāmai inte cæquingāā. Īmai pōñente cæquēnengā ingampa. Botō tontadoidi guīquēñē diete mīdo ganca iñōñāni wabæca awēnē tōmengā tontadoidi guīquēñē bæinte mīdo ganca ināni awædō. Tōmengā tontadoidi nangūī ināni tōnō piincæte ante pōñongante botō æbānō cæte edæ wææ cæquīmo, ante tāno pōñēē congūēñē ingampa.”³² Ayæ, Botō iñōmō tæī piñæmo īmpa diyæ tōmēnāni inānite wido cæquīmo, ante pōñengā iñinque tōmengā edæ wabæca awēnē gobæ ongōñongante māo wææ angūēnengā ingampa. Edæ, Botō æbānō cæbo ate bitō wæætē piyænē cæte ee ate gobi quēwēmoē, ante wææ angūēnengā ingampa.”³³ Mīni cabo adobaī īmīñīpa. Māincooque impa, ante godonte bai cædinque mīnitō tōmancoo ēmō cædinque tōmānāni inānite ēmō cædinque botō miñcæ poncæmīñīmpa. Īñæmpa ēmō cædāmai īmīni iñinque mīnitō botō nē ēmiñcæmīni ædō cæte baquīmīni,” ante Itota angacāmpa.

Cati incæ nongæ bapa, ante

(Māateo 5.13; Māadoco 9.50)

³⁴ Ayæ apænedinque Itota, “Cati quīmonte cæī iñōmō waēme inte gæpæ ēmōmpa, angacāmpa. Incæte nongæmonte ba adinque mīnitō wæætē æbānō nō cæmīni wæætē gæpæ ēmongūīī.”³⁵ Īñæmpa gōnea inguipoga cati wāne cædāni iñinque tōmēmō cati beyæ pædāmai ingæimpa. Ayæ wagada goi tōnō wempodente wāne cædāni iñinque tōmēmō cati beyæ pædāmai ingæimpa. Īninque edæ cati nongæ ba ate wido cædānīpa. Mānōmai apænebo ēñēninque ēamonca ongonte ēñēdāni,” ante Itota apænegacāmpa.

15

Cæningā wē womōñīmpa, ante

odōmōñinque apænecampa

(Māateo 18.10-14)

¹ Odōmāno awēnē beyæ nē æñāni tōnō Wængongūī ingante ēñēñāmai inte nē cædāni tōnō tōmāñāni Itota apænecā ēñēncæte ante godongāmæ pōñāni inōñānīmpa.”² Adinque Paditeoidi tōnō nē odōmōñāni guīquēñē Itota ingante ante piīninque,

—Īngā iñōmō, Pōedāni, āninque nē ēñēñāmai cædāni tōnō cæ congā awædō.

³ Ante piinte tededāni wædinque Itota, Wængongūī Awēnē nempo quēwēninque æbānō cæquīī, ante ēñēncædānīmpa, ante īmæca quēwēñāni nāni cæīnō ante odōmōñinque īmai apænecantapa.”⁴ “Mīnitō iñæmpa. Mīni waocabo iñōmīnite adobi iñōmō bitō obegaidi tiēē ganca ēabi iñōmī obega adocanque incæ wē womonte edæ

dæ bacā ñinque bitō ññömō æbānō cæbāimii. Edæ nōobenta i nōebe ññāni ayæ ongoncoo ññānite yabæque ãmō cæte godinque ññömæca gote wē womōningā ingante bitō ædō cæte diqui diqui mināmai ññimii. Bitō aganca cōwē edæ diqui diqui mīmāimipa. ⁵ Ayæ diqui diqui minte ēadente ate, Ñōwo ēadēmopa, ante todirque ññōnancapæ wo ææntodōninque, ⁶ oncōnē mongænte pōninque bitō guidēñāni tōnō bitō æmigoidi tōnō ññete pōñāni ate, 'Badogaa, botō wē womō wædō dobæ ēadente i abopa. Edæ mōnō watapæ toquinque impa,' ante nē ēabi ññömō ññāimipa. ⁷ Ōñædē quēwēñāni ññömō adobai cædānipa, ante apænebo ēñēdāni. Waodāni nōobenta i nōebe ganca ññāni nē nō cædōñāni inte wē womōñāmai inte ayæ ongōñāni adinque ññōñædē quēwēñāni wædænque todānipa. Wæætē waocā adocanque incæ nē womōningā ññömō tōmengā edæ wēñæ wēñæ nānō cædinō ante wæwente pōñēninque ññimpo cæte pongā adinque ññōñædē quēwēñāni ññömō godōmenque watapæ todānipa," ante Itota apænegacāimipa.

Onquiyængā tiguitamō nānō wē wodōñintamō ante

⁸ Godōmenque apænedinque Itota odōmongantapa. "Ayæ wæætē onquiyængā tiguitamō diete ganca māñongā adotamonque wē wodonte ba adinque, Nāō gongængæimipa, ante tica wodōnodinque tōmengā oncō tōmāo wædæ ññēmæ wædæ ññēmæ cæte diqui diqui minte ængampa. ⁹ Do æninque tōmengā guidēñāni tōnō tōmengā æmigoidi tōnō ññete pōññānite, 'Botō wē womontamō wædō dobæ ēadente abopa. Mōnō edæ watapæ toquinque impa,' angampa. ¹⁰ Ñinque mūnitō ññimite apænebopa. Adocanque incæ wēñæ wēñæ nānō cædinō wæwente pōñēninque ññimpo cædinque pongā adinque Wængongūi anquedoidi incæ watapæ todānipa," ante Itota apænegacāimipa.

Māincoo nē ēwengā ingante mæmpocā waadete pōnō cæcā

¹¹ Ayæ godōmenque apænedinque Itota, "Mæmpocā tōmengā wēñæñāna mēñāa ññōñate, ¹² ayæmengā ññömō wæmpocā ingante apænedinque, 'Mæmpo, bitō ēacoo incæ æmæncocooque pā cæte botō ængūenencocooque pōñōmi æmoe.' Angā Ao ññinque wæmpocā pā cædinque wacā ingā pædæ wacā ingā pædæ godongā æna. ¹³ Ate wantæ ate ayæmengā ññömō ænte næænte wabæca godinque quingāmē bai ññonque towente quēwēninque wæmpocā nānō pōññincoo incæ eye cæpote ba. ¹⁴ Ate māññōmæ cængūi dæ ba ate nāni gæwænte wæpāmo pō ññinque tōmengā māincoo ængūenengā inte wæwengā.

¹⁵ Ñinque tōmengā māñññömō quēwengā weca gote æninque, Bitō ññi nē cæbo bacæboimpa, ññongante Ao ññinque, Botō ññmæ odæ wængāñāidi nāni cæmancadē gote nē aabi bacæbiimpa, ante da godongā. ¹⁶ Gote aadinque tōmengā gue ænente ññmædengā inte odæ wængāñāidi nāni cæntapodē incæ cæññente wæyongante cængūi dicæ pōñññāniyaa."

¹⁷ "Ante wædinque tōmengā nāmanque pōññē cōninque, 'Ññæmpa botō wæmpo ingante nē cædāni ññömō ññōñānique incæ eyepæ pōñi cæñññāni botō ññömō edæ gæwænte wængūi wæ. ¹⁸ Botō mæmpo weca edæ wadæ gocæboimpa. Gote pōninque botō tōmengā ingante, Mæmpo ēññēmi. Ōñædē quēwengā ingante botō godō ēññēñāmai cædinque bitō ayōmite pōñō wēñæ wēñæ cæbo ññōmote, ¹⁹ bitō ññōwo edæ, Botō wēmi, ante ædō cæte angūimii. Wæætē edæ, Bitō botō imote, Nē cæbi bae, ññi ate botō bitō imite nē cæbo bacæboimpa, ancæboimpa.' ²⁰ Ante pōññinque wadæ godinque wæmpocā weca gocantapa," ante apænedinque Itota godōmenque odōmonte apæñecantapa.

"Ayæmengā māññōmai gote gobæ pōñi dibæ pōññongante wæmpocā ññömō gomō adinque ññontobæ pōñō waadete wæcampa. Pogodo pōñi godinque tōmengā wengā ingante waa waadedinque bæi ongante quē bémongampa. ²¹ Tōmengā wengā ññömō, 'Mæmpo ēññēmi. Ōñædē nē quēwengā ingante botō godō ēññēñāmai cædinque bitō ayōmite pōñō wēñæ wēñæ cæbo ññōmote bitō ññōwo edæ, Botō wēmi, ante ædō cæte angūimii.' ²² Ante tæcæ apæneyongante mæmpocā ññömō nē cædāni ññāñite ññinque, 'Weocoo wæmōncocoo quingæ ññō ænte māmō daga wēñāquimīni. Ōñompo timpoi ænte pōninque godō da timpodinque awæncata ññō ænte godō da wēwædāni. ²³ Ayæ wagada wēñængā nangui cænte ogūimo pōñi ññongā inte wæñonnte æñññimīni ate mōñō cænte tocæimipa. ²⁴ Edæ botō wengā ññömō do wænte bai ññongā incæte ññōwo mīngā pongā aedāni. Botō nē wē womongā wædongā incæ edæ ññōwo dobæ ēadente tobopa.' Ante wæmpocā angā ēññēninque ææmæ cædinque nangui todānitapa," ante Itota godōmenque odōmonte apæñecantapa.

²⁵ "Ææmæ cæte toyōñāni bamoncadengā guiquēñē gōnea ayæ cædongāimipa. Ññinque cæte ate obo ponte ēñññongā ññotamīni ante āwadāni. ²⁶ Ëññente wædinque nē cæcā ingante ññēcā pōññongante, Æbānō cædāñi, ante wæcampa. ²⁷ Æññongante, 'Bitō biwi incæ do pongā adinque bitō wæmpo, Botō wengā mīngā ēññadente tobopa, ante adinque wagada wengā ogūimo pōñi ññongā ingante do angā wæñonnte ææmæ cæte

todānipa.’ ²⁸ Ante apænecā ēñēninque bamoncadengā iñōmō edæ ænguī bādinque oncōnē guiidāmai, Baa angā. Wædinque wæmpocā iñōmō oncodō taodinque tōmengā ingante waadete apænedinque, Oncōnē pō guie, angampa. ²⁹ Bamoncadengā wæætē, iñāmpa bitō beyæ ante wadepo iñō wadepo iñō botō ancaa cædinque bitō ānō tōmānō ante do cæbo iñōmote bitō wæætē, Bitō æmigoidi tōnō cænte tocæmīnimpā, ante dicæ āmiyaa. Caboda wengā incæ dicæ pōnōmi æmogaa. ³⁰ Wæætē māningā bitō wengā guiquēnē onquiyænāni māincoo beyæ ante nē towente quēwēnāni tōnō quēwēninque bitō ēadincoo incæ nē ēwēnengā inte pongā adinque bitō wæætē wagada wē oguīmo pōni iñongā incæ māningā beyæ do wænōmipa, ante awædō, angantapa.”

³¹ “Ante piñongante wæmpocā, ‘Botō wēmi ēñēmi. Bitō iñōmō cōwē edæ botō weca ongōmi iñipa. Botō māincoo iñi edæ bitō māincoo cōwē impa. ³² Incæte māningā bitō biwī, Do wæmai ingampa, ante mōnō nē pōnēnongā inte ñōwo mīngā ingā pongā ae. Nē wē womōningā ingante do ēadente ate edæ ææmæ cæte toquēnē iñimpā,’ ante bamoncadengā ingante mæmpocā angampa.” Māninque ante apænebopa, ante Itota apænegacāimpā.

16

Nē aaquēnengā incæ nō cædāmai ingampa, ante

¹ Itota tōmengā miñæ nē godāni iñānite godōmenque apænedinque, “Waocā adocanque māincoo nanguī ēacā iñongante wadāni, Bitō māincoo nē aaquēnengā incæ ōnonque pōni wido cæcā ae. ² Ānāni ēñēninque nē ēacā iñōmō nē aaquēnengā ingante āñecā pongā ate iñāi angampa. ‘Bitō quimæ cæbii, ante adinque tededāni edæ ēñēmopa. Ñōwo idæwaa botō māincoo inte nē aadimi inte edæ abæ tawæ gocæbiimpā. Āmo ate ēñente wædinque bitō botō māincoo iñi ante edæ, Æbānō aadinque cæboo,’ ante apænebi ēñēmoe.”

³ “Ante piñte angā ēñente wædinque nē aadingā iñōmō nāmāneque tedinque, ‘Botō awēnē, Gobāwe, angā ēñēninque botō abæ tawænte gote awædō. Botō cæte ænguēnenta ñōwo ænāmai iñinque æbānō cæte ænte quēwēnguīmo. Botō, Wadāni beyæ onguipoi ææ wofo ate pōnōnāni ænte quēwēncæboimpā, ante pōnēmo bai edæ tæi piñæmopa diyæ ææ woquīmo. Ayæ, Ōnonque pōnōmīni æmoedāni, ante ædō cæte anguīmo. Guñēnete awædō.

⁴ Æ. Tæcæ pōnēmopa. Botō awēnē angā botō abæ tawænte goyōmote wadāni wæætē, Botō oncōnē pō guie, ancædānimpā, ante cædinque botō ñōwo iñāi cæcæboimpā,’ ante

iñāi cæcampa,” ante apænedinque Itota godōmenque apænecantapa.

⁵ “Wadāni iñōmō iñgā awēnē pōnongā æninque adodō pōnōnāmai iñāni inte debe iñōnānimpā. Iñāni iñānite adocanque adocanque tōmānāni iñānite angā pōñōnānite nē aadingā iñōmō tāno pōningā ingante apænedinque, ‘Botō awēnē ingante bitō ayæ æpodō pōñōnāmai iñāi.’ ⁶ Āñongante, ‘Oguinguiþæ incæ botō tiēē ganca tanquebo encadedē awēnē ingante pōñōnāmai inte debe iñopa.’ Ante apænecā ēñēninque ‘Mānimpodadedē debe iñipa,’ ante awēnē nānō yewæmōninta pædæ godōninque nē aadingā iñōmō, ‘Bado, bitō iñta ænte pōnōmenque ante yewæmōninque edæ, Botō tincoenta ganca encadedē debe iñopa, ante edæ quingæ tæ contate yewæmōe,’ angā ēñente cæcampa. ⁷ Ayæ pōningā ingante nē aadingā angantapa. ‘Bitō guiquēnē æpodō pōñōnāmai iñāi.’ Āñongante, ‘Todigo incæ tee manguincaede ñænængade pōni tiēē ganca encadedē botō debe iñopa.’ Ante apænecā ēñēninque awēnē nānō yewæmōninta pædæ godinque nē aadingā, ‘Bado bitō iñta ænte pōnōmenque ante yewæmōninque, Otenta ganca debe iñopa, ante yewæmōe,’ angā cæcampa.”

⁸ “Iñinque nē aaquēnengā mānōmai ōnonque wiwa cæcā wædinque awēnē tōmengā ingante, Bitō ocai nanguī encabi inte nāmanque ante pōñēwēninque cæbitapa, angampa, ante Itota nē aaquēnengā ingante ante māninque apænecantapa. Ayæ godongāmæ ongōnāni iñānite godōmenque apænedinque, Inguipogaque ante quēwēnāni iñōmō nāni caboque nanguī ēñente cæyōnāni botō ñāō iñōmō nē quēwēnāni nāni cabo guiquēnē wīi nanguī ēñente cædānipa,” ante Itota odōmoncæte ante apænecantapa.

⁹ Ayæ, “Minitō iñānite ñōwo āmo ēñēedāni. Māningā nē aacā ocai encate cæcā bai minitō iñōmō adobaī inguipogaque wiwa cæcæte ante nāni godonte æinta māmiñi iñinque ocai encate tōingā pōnente cæedāni. Inguipoga iñinque bayedē māninta iñōmō edæ dæ bacæiñpā, ante pōnente wædinque, wadāni beyænque ante godō waa cæedāni. Mānōmai cæmiñi iñinque minitō ōmæpomīni inte ōñædē nāni cōwē wantæpiyæ quēwēncōnē æite godinque pōñōmīnite, Oncōnē pōedāni, āmāinānipa,” ante Itota apænecantapa.

¹⁰ Ayæ, “Waocā māincoo wædænque pōni æninque ædæmō aacā iñinque tōmengā wæætē nanguī māincoo æninque adobaī ædæmō aaquingā ingampa. Wæætē edæ māincoo wædænque pōni aaquēnengā incæ babæ cæcā iñinque tōmengā wæætē nanguī æninque cōwē babæ cæquingā iñaingampa. ¹¹ Iñinque māincooque ante

mīni wædoncoo æninqe mīnitō ædæmō aadāmaī īmīni adinqe mīnitō īmīnite, Wo ēwēnāmāincoo aacæbiimpa, ante dicæ pōnōnāni ænguimīniyaa. ¹² Ayæ wacā mīnitō īmīnite, Botō qui ædæmō aedāni, ante pōngā ænīmīni inte mīnitō ædæmō aadāmaī īmīni adinqe, Tōmēmīni qui, ante mīnitō īmīnite pōnōnāmaī incædānīmpa,” ante Itota apænegacāimpa.

¹³ Ante apænedinqe Itota godōmenque apænecantapa. “Mēnaa awēnēna ina beyæ waocā ædō cæte cæquingāa. Adocanque awēnē ingante pīinīnque wacā ingante waadebaingampa. Wæwætē adocanque mīnæ godinqe wacā ingante wīī waa abaingampa. Mīnitō adobaī īmīni inte Wængonguī ingante nē cæmīni īnīnque māincooqwe ante ædō cæte cæquimīni,” ante Itota angacāimpa.

¹⁴ Itota apænecā ēñēnīnque Paditeoidi guiquēnē māincooqwe ante nē wæwēnāni īnōnāni inte, Quīmæ ānewēē, ante badete togadānīmpa. ¹⁵ Adinqe Itota wæwætē tōmēnāni īnānīte, “Mīnitō īñæmpa, Mōnitō īmōnīte adinqe waodāni, Nē nō cædāni īnānīpa, ante pōnencædānīmpa, ante nē babæ cæmīni īmīnīpa. Incæte Wængonguī mīnitō mīmōnē mīni entawēnō ante edæ do acampa. Waodāni nāni waa adō ante Wængonguī wæwætē, Wentamō pōnī i awædō, ante pīngampa,” ante Itota apænecantapa.

Wængonguī Awēnē nānō wæce angainō cōwē ongōmpa

¹⁶ Ānīnque Itota, “Wēēnēñedē īñōmō Wāō nānō ponganca dodāni Mōītee wodi nānō wæce angainō ante ayæ Wængonguī beyæ nē apænedāni nāni angainō ante apænete quēwengadānīmpa. Nōwo guiquēnē, Wængonguī Awēnē Odeye nempo guīite quēwengæīmpa, ante watapæ apænete impa. Īne ante ēñēnīnque tōmānāni Awēnē nempo guīicæte ante edæ pæ pagænte cædinque da godō guīidānīpa,” ante apænecantapa.

¹⁷ Ayæ apænedinqe, “Incæte oōnæ tōnō inguipo æmæwo edæ dæ nāni baganca edæ Wængonguī nānō wæce angainō īñōmō edæ cōwē mæ ongongæīmpa. Mānīne ante yewæmōnīnque dodāni nāni tænoncagai īñōmō edæ guīyā pōnī incæ cōwē wadæ cædāmaī ingæīmpa,” ante Itota apænegacāimpa.

Nāni pāmænte wædō ante Itota apænecampa

(Māateo 19.1-12; Māadoco 10.1-12)

¹⁸ Ayæ godōmenque apænedinqe Itota, “Æcānō nāwā nānōogængā ingante pāmænīnque wacā onquiyængā ingante godō mōna īñōmō tōmēngā edæ wīwa towēngā do bacampa. Adobaī,

tōmēngā nānōogængā īningā īñongante wacā mōnīnque edæ do towente bacampa,” ante apænecantapa.

Tæce wodi tōnō Datado, ante Itota odōmonte apænecā

¹⁹ Godōmenque odōmonte apænecæte ante Itota īmaī ante apænegacāimpa. “Onguīñængā adocanque nē ēacā inte cæncadencōo waēmoncoo wēñadinque awēnēidi nāni opatawæ ēmoncoo baī yabæque wēñadongāimpa. Tōmēngā tæce wodi īnongā inte waēme cænguīncooqwe ænīnque īmō īñō īmō īñō ææmæ cædinque nanguī todīnque quēwēnongāimpa. ²⁰ Tæce wodi yabædemō īñō wacā tōmēngā ēmōwo Datado ingante ænte māmō nō cædāni nōngængantapa. Īngā īñōmō, Pōnōmī æmoe, Pōnōmī æmoe, ante nē ānewēnongā inte quēmoncoo tōmāo baate wædongāimpa. ²¹ Ayæ tæce wodi weca cænīnque eye-podāni wæænte oñoncoo adinqe tōmēngā ænte cæncæte ante wæwēnongāimpa. Ayæ edæ tōmēngā nanguī baate nōmænte wæyongā guīntaidi incæ pō yædæ yædæ beyadōnānīmpa. ²² Tōmēngā nē, Pōnōmī æmoe, Pōnōmī æmoe, ante ānewēnongā inte nāne wængā adinqe Wængonguī anquedoidi tōmēngā onōwoca ingante Abadāō wodi weca ænte mæīdāni æicantapa. Ayæ ate tæce wodi adobaī nāne wængā adinqe tōmēngā baō īnī daga wēnānītpa.”

²³ Ante apænedinqe Itota tæce wodi ingante ante godōmenque apænecantapa. “Tōmēngā onōwoca guīdōmēmō taadō wæce gote mæ māmōnte baī īñōmō ongōnīnque nanguī āmogate wæwēnongā inte gomō ayongā Abadāō wodi a ongongā acantapa. Datado wodi adobaī Abadāō wodi weca a ongongā acantapa. ²⁴ Adinqe tæce wodi īñōmō Abadāō ingante aa pedīnque, Mæmpo Abadāō ēñēmi. Botō gonga bæcōyōmō guīite nanguī āmogate wæwēmō cæbīi. Botō āmogate wædō ante pōnō waadete waa cædinque bitō Datado ingante da pōnōmī pōnīnque tōmēngā æpæ ada ipomencacā botō cōñe bamen-caboe.’ ²⁵ Āñongante Abadāō, ‘Botō wēmi, Datado imæcayedē wēnæ wēnæ āmogate wæwēñongante bitō māincoo waēmoncooqwe ænte todīnque quēwēnōmīmpa. Nōwo diyæ bitō āmogate wæwēñōmīte Datado ingante wæwætē ædæmō cæbo ate wampo pōnēnīnque tōmēngā nōwo īñōmō watapæ quēwēnte tocampa. ²⁶ Ayæ godōmenque āmo ēñē. Nānēnē ī apa ānewēē. Botō weca ongongā inte ædō cæte bitō weca goquingāa. Wæwætē bitō weca ongongā inte botō weca ædō cæte ponguingāa. Guīibæ pōnī īñōmō taadō impa taquīi. Edæ dæ ampa,’ ante Abadāō wodi angampa, angantapa.”

27 “Angä ēñente wædinque tæcæ wodi wæætē, ‘Mæmpo Abadäo ēñēmi. Datado ingante ämi ēñente tōmengä botō mæmpo oncōnē adodō gocæcäimpa. 28 Māniñōmō botō tōniñadāni ōnompō æmæmpoque ganca mānimpodāni inānīpa. Īnīnque bitō Datado ingante ämi tōmēnāni weca gote, Wæñompadāni, ante wææ angä ēñēninque tōmēnāni wæætē ĩñōmō nangui pōni ämogate wæwēñōmō pōnāmai incædānīpa.’ 29 Āñongante Abadäo wæætē, ‘Mōitee wodi nānō wææ ante yewæmongainta Wængongui beyæ nē apænedāni nāni yewæmongainta do mānāni inte edæ bitō tōniñadāni ĩñōmō mānīnta adīnque, Æbānō ĩ, ante do ēñenguēñēnāni inānīpa.’ 30 Ante apæneyongä tæcæ wodi wæætē, ‘Īñæmpa mæmpo Abadäo ēñēmi. Wacä nē wængaingä inte ñāni ōmæmōnte tōmēnāni weca gote apæñecä ēñēninque botō tōniñadāni tōmēnāni wēnæ wēnæ cædīnō ante wæwente pōnēninque do edæ ñīmpo cæbāinānīpa.’ 31 Ante wæyongante, ‘Īñæmpa Mōitee wodi nānō wææ angainō ante Wængongui beyæ nāni apænegainō ante ēñēnāmai ĩnāni inte tōmēnāni nē wænte ñāni ōmæmōningä apæneyongante cōwē ēñēnāmai ĩmāinānīpa,’ ante Abadäo wodi angantapa.” Tæcæ wodi ingante ante apænedīnque Itota mānīnque ante apænegacäimpa.

17

Wacä oda cæcæcäimpa, ante nāni wæquinque cædānīpa

(Māteao 18.6-7; Māadoco 9.42)

1 Ayæ tōmengä miñæ nē godāni ĩnānīte apænedīnque Itota, “Nē pōñēnāni incæ pancadāniya wīi ēñente do oda cædānīpa. Cōwē māñōmai ĩmpa. Incæte, Oda cæcæcäimpa, ante nē cæcä ĩñōmō edæ tōmengä nangui nānō caate wæquinque cæcampa. 2 Īnīnque edæ, Wēñængä adocanque guiyangä pōni incæ oda cæcæcäimpa, ante nē godō cæcæ cædingä ĩñōmō edæ, Wīi cæcæcäimpa, ante mōnō edæ wææ cæcæcäimpa. Waodāni nāni dacæ godō dacæ godō cæquinca ñæñænca ænīnque nē godō cæcæ cæcä ōñomenca æ wēmcadīnque tōmengä ingante tæcætībæ wido cædāni ĩnīnque tōmengä edæ, Wēnæ wēnæ cædāmai inte wæmo beyænque Wængongui botō imote pānāmai ĩngampa, ante tōmengä waa toquēnægä ĩmaingampa. 3 Māñōmai ämo ēñēmīni inte mīnitō, Oda cæcæcäimpa, ante nē cæcä bai cædāmai incæboīmpa, ante edæ nāmā wææ aedāni,” ānīnque Itota ĩmai apæñecantapa.

“Wacä wēnæ wēnæ cæcä adīnque bitō wæætē tōmengä ingante, Cædāmai incæbiīmpa, ante wææ æ. Ämi ēñēninque tōmengä wēnæ wēnæ nānō cædīnō beyæ guingo imonte wædinque, Wīwa cætābopa,

ante apæñecä ēñēninque bitō wæætē piyænē cædinque tōmengä ingante ñīmpo cæbi ee gocæcäimpa. 4 Tōmengä wæætē adōñæque ĩñonte ōnompō æmæmpoque go mempoga mānīmpoga bitō ĩmite wīwa cædingä inte tōmengä guingo imōnīnque, ‘Bitō ĩmite wīwa cætābopa,’ ante adopoga apæñecä ēñēninque bitō wæætē tōmengä ingante adopoga ñīmpo cæbi ee gocæcäimpa,” ante Itota angantapa.

Mōnō tēi piñante entawengūnque wede pōñēmōmpa

5 Mōnō Awēñē tōmengä nānō nē da godōñīnāni ĩñōmō tōmengä ingante ānīnque, —Wædænque pōñēmōni ĩñōmōnīte bitō pōnō cæbi ænīnque mōnitō ædæmō wede pōñēmōni bacæmōnīmpa.

6 Ānāni ēñēninque mōnō Awēñē wæætē, —Mōotatamō guiyāmō pōni nānō inganca mīnitō pōñēñō māninganca wædænque pōñēmīnitawo. Māningancaque pōñēmīni incæte mīnitō mōodedawæ nāni āwæ inte apænedīnque, “Awæ ēñēmi. Bitō bæ wite godō gāwapæ mīnte pæbāwe,” ante āmīni bai awæ incæ dobæ edæ ēñente cæcædōnīmpa, ante Itota apæñecantapa.

Wacä ingante nē cæcä incæ ĩmai cæquēnægä ĩngampa

7 Ayæ godōmenque apænedīnque, “Mīni waocabo ĩñōmīnīte adobi nē ēabi ĩmi ĩnīnque bitō ĩmite nē cæcä ingante edæ æbāñō cæbāimīi. Tōmengä gōnea mangæ mangæ wodinque ayæ cæñīnāni ĩnānīte ĩnque aadīnque pō guicä adīnque bitō ĩñōmō edæ, ‘Pō tæ contate cæe,’ ante edæ dicæ āmīyaa. Edæ nē ēacä ĩngampa diyæ tāno cænguīgāā. 8 Wæætē nē ēabi ĩñōmi inte bitō, ‘Botō beyæ cænguī æñōnīnque bitō weocoo topo cædinque pōñōmi ænīnque botō cænte bebo ate bitō māniñedē ate edæ cænte becæbiīmpa,’ ante cōwē āmāīmpa. 9 Ayæ, Cæe, ante bitō āñinō ante tōmengä ēñente cæcä beyænque bitō, Waa cæbi æmōpa, ante dicæ anguīmīi. 10 Īnīnque mōnō Awēñē, Cæedāni, ante nānō angainō ante eyepæ pōni cædinque mīnitō adobai ante pōñenguēñēmīni ĩmīnīpa. ‘Mōnitō nē cæmōnīnque inte ōñōmōnīnque ĩñōmōni inte wēnæ wēnæ cæte awædō. Mōnitō tōmengä nānō āñonque mānīnque cæte ate tōmengä beyæ ante dicæ godōmenque nangui cæmōnīyaa,’ ante pōnente wæquēñēmīni ĩmīnīpa,” ante Itota tōmengä miñæ nē godāni ĩnānīte apænegacäimpa.

Itota angä ate diete ganca ĩnāni waintai baadānīpa

11 Māñī Eedotadēē ĩñōmō gocæte ante godīnque Itota Tāmadiabæ æmætæ Gadideabæ æmætæ tæcæguedē pōni godīnque, 12 waodāni nāni quēwēñōmō tæcæ pōñongä

nē baate wædāni ōnompo tipæmpoga ināni pō bee tēnānitapa. Pō gobæ næ gongæninque pōmō adinque,¹³ aa pedānitapa.

—Itota nē Awēnē inōmi inte ēñēmi. Mōnitō wædō ante pōnō waadete waa cæe, āmōnipa.

¹⁴ Āñōnānite gomō adinque Itota,

—Minitō guiquēnē Wængongui oncōnē godinque, Wængongui quī, ante nē godōnāni inānite mīnitō æmontai māo odōmōmīni acædānimpa.

Angā ēñente tōmēnāni idōmæ godinque iñontobæ waintai baagadānimpa.¹⁵ Ininque adocanque watapæ todinque, Wængongui bitō nāō apāite bai inōmi inte edæ waa cæbi æmopa, ante yedæ apænedinque adodō pongantapa.¹⁶ Tōmengā iñōmō wabæca Tāmadiabæ nē quēwēningā incæ pō Itota ōnōwa inō guidōmēmæ ñongæninque waa ate pōnēninque, Bitō pōnō cæbi ate waintai baabopa, ante apæneca.¹⁷ Ēñēninque Itota wæætē angantapa.

—Inæmpa mīni cabo ōnompo tipæmpoga mānimpomīni inōmīni inte edæ wīi tōmāmīni waintai baamīnitawo. Ininque wadāni ōnompo æmæmpoque go mēnaa go mēnaa ināni iñōmō edæ ædōnō gote dæ ānāni.¹⁸ Ingā iñōmō wabæca quēwēningā incæ adocanque Wængongui ingante waa pōni apæneceate ante ponte quēwēñongā wadāni guiquēnē tōmānāni pōnāmai inānitawo.

¹⁹ Āninque Itota tōmengā ingante,

—Bitō wede pōnēnō beyænque waintai baadīmi inte ængæ gantite goe, angantapa.

Īmaī inque bayonte Awēnē Odeye poncæcāimpa, ante

(Māateo 24.23-28, 36-41)

²⁰ Paditeoidi Itota ingante, Wængongui Awēnē æyedēnō ponte Awēnē Odeye baquingāā, ante wæyōnānite tōmengā wæætē, Inæmpa wīi waomīni ayōmīni Wængongui Awēnē Odeye pongā ingampa.²¹ Ininque, “Tōmengā iñōmō ponte on-gongampa,” ante ayæ wæætē, “Tōmengā wayōmō gote on-gongampa,” ante edæ ædō cæte anguūi. Minitō weca nē quēwēngā incæ Awēnē Odeye bayongante waodāni tōmengā nempo do quēwēnāni apa ānewēmīni, ante Paditeoidi inānite angacāimpa.

²² Ayæ tōmēnāni inānite inque apænedinque Itota tōmengā nānō nē ēmiñæñāni inānite wæætē apæneccantapa.

—Inçayæ ate mīnitō, Waocā nē ēñagaingā ingante adoōnæque incæ aīnēmōnīpa, ante wæcæmīnīpa. Wæmīni incæte adāmai incæmīnīpa.²³ Wadāni mīnitō imīnite, “Inōmō on-gongā tamēñedāni,” āninque ayæ, “Wayōmō on-gongā tamēñedāni,” āñōnāni mīnitō acæ godāmai iedāni. Tōmēnāni mīñæ edæ godāmai imæwedāni.²⁴ Botō ponguionæ inque bayonte botō iñōmō edæ

Waobo nē ēñagaīmo inte edæ nāō æmatæ æmatæ nāite bai ēmōninque edæ edonque pōni ponte a ongoncæboimpa.²⁵ Incæte botō ñōwo guiquēnē tāno nanguī āmogate wæwencæboimpa. Ayæ ñōwodāni iñōmō botō imote edæ Baa āninque wido cæcædānimpa, ante Itota apæneccantapa.

²⁶ “Botō Waobo nē ēñagaīmo inte botō ponguionæ inque bayedē guiquēnē Nōwee wodi Docā nāni angaingā nānō quēwēñedē dodāni nāni quēwēngāi bai adobai edæ quēwēngūnāni inānīpa.²⁷ Docā Nōwee wodi ñænæ wipoboga oncō bai mænōninque tōmengā nānō guiganca tōmēnāni ōnonque cænte bete monte quēwēngadānimpa. Monguūna, ante ñānonte quēwēngadānimpa. Māniñedē edæ tōmēnāni nāni capo bedō wænguinque edæ æpæ do angatimpa.²⁸ Dooto wodi nānō quēwēngāiñedē dodāni adobai cænte bete quēwēngadānimpa. Nē mānāni godongadānimpa. Ēinēnāni wæætē godonte ængadānimpa. Mīnte pæcæimpa, ante cædinque onconcoo mænonte quēwēngadānimpa.²⁹ Incæte Dooto wodi Todōmā iñōmō quēwente nānō tao gogaionæ iñonte gonga tōnō atopodemō nanguī ocoi bæcomō cōōnæ cæ bai wææninque māo bæco ininque māniñōmō quēwēnāni tōmānāni gonte wængadānimpa.³⁰ Botō Waobo ēñagaīmo inte edonque botō a ongōñedē māniñō nāni bæco gonte wængāi bai adobai bacæimpa, ante āmo ēñēmaimīnīpa,” ante Itota angacāimpa.

³¹ Ayæ godōmenque apænedinque, “Māniñōnæ iñonte mīnitō oncōmanca ongōninque, Botō māincoo, ante oncōnē wæi guidinque ænāmai inte wodi wīnōmæwedāni. Ayæ gōnea cædinque māincoo ante oncōnē ocæ emænte æncæ pōnāmai imæwedāni.³² Inæmpa, Dooto nānōogængā wodi æbānō dadi emænte adinque edæ gonte wængacāi, ante pōnēmīniyaa.³³ Inguipogaque cōwē quēwencæboimpa, ante nē pōnengā iñōmō tōmengā iñōmō edæ quēwēnāmai incæcāimpa. Wæætē edæ inguipoga mōnō guēmante quēwēngūimāmo ante nē wædāmai ingā guiquēnē tōmengā iñōmō edæ cōwē wænāmai quēwencæcāimpa, ante āmo ēñēmaimīnīpa,” ante Itota apænegacāimpa.

³⁴ Ayæ, “Māniñedē woyowotæ i ininque mēnaa āñōmonque ōñōna adocanque ingante bæi ongote goyōnāni adocanque ingante emō cæte godāni a ongoncæcāimpa.³⁵ Ayæ onquiyæna cængui ante guēa dicaca dacæ dacæ cæte godō wēñōna adocanque ingante bæi ongote goyōnāni adocanque ingante emō cæte godāni a ongoncæcāimpa.”³⁶ “Ayæ onguīñæna gōnea guēa cæyōna adocanque ingante bæi ongote goyōnāni adocanque emō cæte godāni a ongoncæcāimpa.”

³⁷ Ante apæneca ēñente wædinque tōmēnāni wæætē,
—Awēnē, bitō ānō æyōmōnō incæ mānōmaī baquīī.

Āñōnānite,

—Baō æyōmōmē wænte oññōmonte abadæidi wē ongonte edæ do godongāmæ pōnāni bai waodāni, Mōnitō Awēnē pongampa, ante do ēñēninque godongāmæ poncædānimpa, ante Itota apænegacāimpa.

18

Nē apænte ānongā tōnō owæmpoingā æbānō cædaī, ante

¹ Ayæ tōmengā miñæ nē godāni cōwē Wængonguī ingante apænedinque wæntæte badāmai incædānimpa, ante cædinque Itota inguipoga quēwēnāni nāni cæinō ante odōmonte apænegacāimpa.

² “Wayōmō nāni quēwēñōmō adocanque waodāni nāni nē apænte ānongā inte quēwēnongāimpa. Wængonguī ingante guīñēnāmaī Inongā inte tōmengā iñōmō, Waodāni æbānō ānāni, ante wædāmaī Inongāimpa.

³ Adoyōmō tōmēnāni quēwēñōmō onquiyængā adocanque owæmpoingā inte nē wædongā inte quēwēnongāimpa. Tōmengā guiquēnē māningā nē apænte adongā weca wæætē wæætē pōninque, Botō imote adocanque nē piingā iñongante bitō āmi ēñente wæætē nō cæcæcāimpa.

⁴ Ante ancaa pōninque ānā ēñente wædinque nē apænte ānongā iñōmō edæ cōwē Baa Baa angā. Incæte ayæ ate nāmāneque tededinque tōmengā, ‘Onquiyængā iñōmō ancaa angā awædō, āninque, Wængonguī ingante guīñēnāmaī imo inte botō, Waodāni æbānō ānāni, ante wædāmaī imo incæte, ⁵ māningā owæmpoingā pō pō cæcā wædinque botō, Ancaa ponte angā wæcæ wæ, ante wæætē tōmengā ingante waa cæcæboimpa. Tōmengā ingante nē piingā ingante botō, Nō cæe, ante wææ āmo wæcæcāimpa.’ Āninque nē Baa āningā incæte owæmpoingā beyæ do waa cæcampa. Māninque ante odōmōmopa.”

⁶ Ante odōmonte apænedinque mōnō Awēnē iñōmō godōmenque apænegantapa. “Nē apænte angā iñōmō wīwa cæcā incæte, Tōmengā æbānō apænecaā, ante mīnitō ēñente pōnēmæwedāni. ⁷ Wængonguī nānō nē apænte ængāimīni inte mīnitō itædē woyowotæ wæætē wæætē aa pe aa pe cæyōmīni Wængonguī edæ ædō cæte Baa anguingāā. Wææ āmi ate nō cæcædānimpa, ante āñōmīnite tōmengā iñōmō edæ. Īncayæ ate cæcæboimpa, ante ædō cæte anguingāā.

⁸ Wæætē quingæ edæ do cæcæcāimpa. Nē piinte cædināni iñōnānite Wængonguī wææ angā ate tōmēnāni mīnitō imīnite wæætē nō cæcædānimpa, ante āmo ēñēmāimīnīpa. Incæte Wao Wēmo ēñagāimo inte botō ponte

ayōmo wede pōnēnāni wabānō inguipoga mā ongōnāni aquīmoo, ante wæbopa,” ante Itota angacāimpa.

Paditeo tōnō awēnē beyæ nē cænongā æbānō cæda, ante

⁹ Ayæ pancadāniya, Wadāni ōnōnāninque iñōnāni mōnonque nō cæmō imopa, ante pōnēwēninque wadāni inānite piinte adānīpa. Mānōmainō ante nē ānewēnāni inānite Itota, Wængonguī ingante æbānō apænequīī, ante ēñecædānimpa, ante imæca quēwēna nāna apæneinō ante odōmōninque apænegantapa. ¹⁰ “Waoa mēnaa Paditeo tōnō odōmāno awēnē beyæ nē æwengā iñōmō Wængonguī ingante apænegæte ante Wængonguī oncō ñænæncō yabæcōnē æi guīdatapa. ¹¹ Paditeo iñōmō adiyæ gongæninque nāmā incæ apænedinque, ‘Wængonguī ēñēmi. Wadāni bai wīī imopa. Botō iñōmō godōmenque waēmō imopa, ante todinque botō mānōmaī beyæ bitō imite waa ate apænebopa, ānewengampa. Edæ wadāni guiquēnē wacā quī ō ænānīpa. Wadāni inānite wīwa cædānīpa. Tōmēnāni nānōogængā ināmaī iñongante godō guēa mōnānīpa. Botō iñōmō mānināni bai ināmaī inōmo inte botō māniñōmō ongongā odōmāno awēnē beyæ nē æwengā bai wīī imopa, ante adinque botō Wængonguī bitō imite waa ate pōnēninque apænebopa. ¹² Botō iñōmō, mēōnaa go mēōnaa iñonte, mēōnaa go mēōnaa iñonte bitō imite apænegæte ante cænāmaī quēwēmopa. Ayæ botō ænincoo tōmancoo ate adinque botō ōnomo tipæmpoga mānimpocoo mā ongōñoncoo adocooque æninque, Wængonguī quī, ante cōwē pædæ pōnōmo ae,’ ante apænewengampa.”

¹³ “Odōmāno awēnē beyæ nē ænongā guiquēnē guingo imōninque nāmā tæi tæi yatawēninque, ‘Wængonguī ēñēmi, botō nē wīwa cæbo adinque bitō waadete pōnō piināmaī incæbiimpa, āmopa,’ angā. Māninque angampa. ¹⁴ Mānōmainō ante odōmoncæte ante apænedinque Itota, Nōwo āmo ēñēedāni, angantapa. Īngā awēnē beyæ nē æwengā mānōmaī āñongante Wængonguī do, Botō ayōmo bitō nō cæbi babīpa, ante godō badōngā ate tōmengā edæ nō pōnēnongā inte tōmengā oncōnē gocampa. Wæætē Paditeo, Nāmanque waēmō imopa, ante nē ānewēningā ingante Wængonguī, Nō cæbi bacæbiimpa, ante godō badōnāmaī incæcāimpa, ante āmo ēñēmāimīnīpa. Edæ, Nāmanque waa cæbo imopa, ante nē ængō cæcā guiquēnē edæ wææntodonte bai inte wæcæcāimpa. Wæætē, Nāmanque wēnæ wēnæ cæbo imopa, ante nē apæneca guiquēnē edæ ængō cæte bai inte tocæcāimpa,” ante Itota apænegacāimpa.

Wēñænāni inānite gampo cæcadinque Itota waa apæneccā

(*Māateo 19.13-15; Māadoco 10.13-16*)

¹⁵ Ayæ ate wadāni, Wēñænāni inānite Itota pōnō gampo cæcadinque waa apæneccāimpa, ante cædinque tōmengā weca guiyānāni inānite ænte pō ænte pō cædāni adinque tōmengā miñæ nē godāni guiquēnē, Ænte pōnāmaī iedāni, ante Baa ānāni. ¹⁶ Adinque Itota wæætē wēñænāni inānite aa pecā pōñōnāni tōmengā miñæ nē godāni inānite apæneccantapa.

—Wēñænāni inānite botō weca ee amīni poncædānimpā. Ìñæmpa mānīnāni nāni pōnēnō bai adobai pōnēnāni inte edæ Wængonguī Awēnē Odeye nempo do quēwēnāni inānīpa. Ìnīnque mīnitō ìñōmō wēñænāni inānite Baa ānāmaī iedāni. ¹⁷ Edæ nāwangā apænebo ēñēdāni. Wēñængā do pōnengā inte Ao angā ingā bai Wængonguī Awēnē Odeye ingante do pōnēninque nē Ao ānāni ìñōmō tōmēnānique tōmengā nempo guīdinque quēwēnānīpa. Wadāni guīquēnē Wængonguī Awēnē Odeye ingante Baa ante pōnēnāmaī ināni guīquēnē tōmēnāni ædō cæte tōmengā nempo guīdinque quēwēngūnāni, ante Itota apænegacāimpa.

Māincoo nanguī ēacā inte Itota weca ponte apæneccampā

(*Māateo 19.16-30; Māadoco 10.17-31*)

¹⁸ Māniñedē Itota ingante wacā awēnē angantapa.

—Awēnē nē waa Odōmōmi apænebi ēñēmoē. Botō æbānō cædinque wæñāmaī wantæpiyæ quēwēmaīmoo.

¹⁹ Æñongante Itota tōmengā ingante,

—Wængonguī adocanque nē waa cæcā ìñongante bitō botō imote, Nē waa cæbi ìmīpa, amīi. ²⁰ Ænīnque Itota godōmenque apæneccantapa. Ìmaī cæedāni, ante Wængonguī nānō wææ angaiñō ante bitō tōmēmi edæ do ēñēmīpa. “Bitō nānōogængā ināmaī ìñongante bitō godō guēa mōnāmaī iē. Wacā ingante godō wæñōnāmaī iē. Wacā quī adinque awēmō æñāmaī iē. Wacā wēnæ wēnæ cæcā atabopa, ante godō babæ wapiticæ ānāmaī iē. Wæmpocā ingante wāānā inante waa adinque tōmēna inate godō waadete cæe.” ante wææ yewæmongacāimpa, ante bitō edæ do ēñēmīpa, angantapa.

²¹ Ante apæneccā ēñēninque māningā awēnē wæætē,

—Botō mānīnō bitō ānō bai tōmānō ante ēñēnte cædinque pægaboī ae.

²² Ante apæneccā ēñēninque Itota wæætē,

—Adodeque ayæ ēñēnte cæquēnēmi ìmīpa, ante āmo ēñē. Ònædē bitō waēmōncoo ængūinque edæ ìmæca bitō mānīncoo tōmāncoo godonte ænīnque bitō ænīnta wæætē òmæpodāni inte wædāni inānite

tōmanta godōmi æncædānimpā. Ayæ edæ botō imote tee empote pōe.

²³ Angā ēñēnte wædinque tōmengā māincoo nanguī ēadongā inte mānīncoo beyænque ante pōnēninque māningā awēnē ìñōmō wæwente bacantapa. ²⁴ Ìnīnque Itota tōmengā ingante gomō adinque,

—Wængonguī Awēnē Odeye nempo guīte quēwēncæte ante cædinque waodāni òmæpodāni inte botō miñæ pōnānīpa. Māincoo nanguī ēacā guīquēnē æbānō cæte òmæpocā inte botō miñæ ponte guīte quēwēngūngāā, angantapa. ²⁵ Cāmeyo ìñōmō guiyangā ingampā diyæ daagō guiyampite pædæ tacāā. Ìnīnque cāmeyo pædæ tadāmaī ingā bai nē ēacā ìñōmō adobai ingampā. Tōmengā nāmā ayongā ñænængā inongā inte edæ æbānō cæte Wængonguī Awēnē Odeye nempo do wāānē guīte quēwēngūngāā.

²⁶ Mānōmaīnō ante Itota apæneccā ēñēninque nē ēñēnāni wæætē,

—Ìñæmpa mānōmaī ìnīnque æcānō wāānē guīte quēwēngūngāā.

²⁷ Ante wæyōnānite,

—Waomīni mīni, Ædō cæte cæquīi, ante mīni wædō incæ Wængonguī ìñōmō do cæcampā, ante Itota apæneccā.

²⁸ Æñēnte wædinque Pegodo,

—Awēnē ēñēmī. Mōnitō ēadincoo owæ caate bitō miñæ tee empo pōmōni abīpa.

²⁹ Æñongante Itota tōmēnāni inānite wæætē,

—Mīnitō nāwangā oncodo tao godīnque mīnitō nānōogængā ingante mīnitō tōñīñadāni inānite wæmpoda ìnate wēñænāni inānite emō cæte botō miñæ pōmīnitapa. Ìnīnque ìmaī ante nāwangā āmopa. Æcānō Wængonguī Awēnē Odeye beyænque botō miñæ mānōmaī pōna ìñōmō, ³⁰ tōmengā ìñōmō inguīpoga quēwēninque nānō emō cædincoo adopocoo ænīnque ayæ wæætē godōmenque nanguī æncæcāimpā. Ayæ ìncayæ ate ònædē godīnque edæ tōmengā cōwē wantæpiyæ wæñāmaī quēwēncæcāimpā, ante āmo ēñēmaīmīnīpa, angacāimpā.

Itota, Wænceboimpā, ante wæætē adodō ante apæneccā

(*Māateo 20.17-19; Māadoco 10.32-34*)

³¹ Ænīnque tōmengā miñæ, Dote, ante nāni gocabo inānite Itota nānēnē ænte māocā goyōnāni ìmaī ante apæneccantapa. “Ñowo ìñōmō mōnō edæ Eedotadēē ìñōmō æicāimpā. Wængonguī beyæ nē apænegaiñāni ìmaīnō ante yewæmōnīnque, Nē Waocā ìncayæ ate ēñate pæcā adinque tōmengā ingante æbānō cæquīnāni, ante yewæmongadānimpā. Ñowo mōnō Eedotadēē ìñōmō æi pō gongæmō ate edæ

mānīnō dodāni nāni angainō bai edæ do
 īnque bacæīmpa. ³² Botō edæ mānīmodō
 ēñagāīmo īñōmote oodeoidi botō īmote
 ō ænīnque wadāni īnānīte pædæ māo
 godōnāni ō ænīnque tōmēnāni wæætē
 tawīmæ botonga towæ tānongadinque botō
 īmote badete todirque pūīnīnque wīwa
 angūīnāni īnānīpa. ³³ Ayæ æmontaimenca
 tæi tæi pānāni āmogate wæyōmote botō
 īmote godōmenque wæñōnāni wæncæboīmpa.
 Wæætē mēōnaa go adoōnæque īñonte edæ
 botō do wæñīmo īnte edæ nāni ōmæmōte
 wæætē quēwēncæboīmpa,” angantapa.

³⁴ Tōmēngā mīñæ nē godāni īñōmō
 mānīnō, Tōmēngā æbānō bate wæquīngāā,
 ante adodeque incæ edæ ēñēnāmaī īn-
 gadānīmpa. Tōmēngā nānō apænedō edæ wē
 wodonte bai īñonte tōmēnāni ōmōncaque
 ēñēnīnque, Æbānō ante apæñecāā, ante wīī
 edonque ēñēnānitapa.

*Itota angā ate babetamongā īngā incæ
 do waa acampa*

(Māteoo 20.29-34; Māadoco 10.46-52)

³⁵ Itota mānīnō godīnque Eedīcoo īñōmō
 obo pōñongā onguīñængā babetamō īnte
 nē wædongā īnte taadō wedeca, Pōnōmi
 æmoe, ante ānecōnongāīmpa. ³⁶ Nanguī īnāni
 cægōnāni ēñēnīnque babetamongā īñōmō,
 Quīnante cægōnāni, ante wæyongante,
³⁷ Itota Nāatadeta quēwēningā īnte edæ nōwo
 wodo tebæ gocampa, ante apæñedāni.

³⁸ Ēñēnīnque tōmēngā īñōmō aa pedīnque,
 —Itota ēñēmi. Bitō Awēnē Dabii wodi
 pæīmi īnōmi īnte botō wædō ante edæ nōwo
 waadete pōnō waa cæe.

³⁹ Āñongante tāno godāni wæætē tōmēngā
 īngante, Apocænē īnguēnē ānewēē, ante
 wææ āñōnāni tōmēngā godōmenque nanguī
 ānīnque,

—Awēnē Dabii pæīmi īnōmi īnte edæ botō
 wædō ante pōnō waadete waa cæe, ante
 wæcā.

⁴⁰ Wædirque Itota næ gongæñīnque,
 Tōmēngā īngante ænte māmōmīni
 pongædāni. Angā obo ænte māmōnāni
 pōñongante Itota,

⁴¹ —Æbānō ante āmīi. Bitō beyæ quīnō
 cæquīmoo.

Āñongante,

—Awēnē, wēēnē botō ēmongā bai cæbi
 acæboīmpa.

⁴² Angā ēñēnīnque Itota wæætē,

—Wēēnē bitō ēmongā bai abāwe. Edæ
 wede pōñēmi īnte edæ waa bamōmīpa.

⁴³ Ante nānō āñedē nē babetamōningā
 do waa bamōnīnque Itota mīñæ godīnque
 Wængonguī īngante, Bitō nāō apāite bai
 ēmōmi īnte edæ waa cæbi æmōpa, ante to-
 gacāīmpa. Mānōmaī cæcā adīnque tōmānāni
 adobaī Wængonguī īngante waa adīnque,

Bitō nāō bai ēmōmi īnte waa cæbīpa, ante
 togadānīmpa.

19

Itota tōnō Taqueo

¹ Itota mānīī Eedīcoo pōnīnque tæcæ
 wodo tebæ gocā īngantapa. ² Mānīñōmō
 adocanque Taqueo nāni ānongā īñōmō
 tōmēngā odōmāno awēnē beyæ nē ænāni
 awēnē īnongā īnte nanguī māīncoo ēadongā
 īnongāīmpa. ³ Tōmēngā nōwo, Itota æcānō
 īngāā, ante acæte ante ponte ayongā wadāni
 nanguī īnāni wææ ongōnāni adīnque, Botō
 ocāa pōnī īnōmo īnte edæ Itota īngante ædō
 cæte aequīmoo, ante wæcantapa. ⁴ Adāmaī
 īnte wæyongante wadāni, Itota īnō gāmæñō
 pō wodo tebæ goquīngā, ante tededāni
 ēñēnīnque tōmēngā Itota īngante acæte
 ante pogodo tāno gote awāa ticāmōdōwāa
 nāni āwāa daēwa æi næ gongænte a
 ongongantapa. ⁵ Itota obo pōnīnque æmō
 ayongā Taqueo a ongongā adīnque tōmēngā
 īngante,

—Taqueo, quīngæ wææe. Nōwoōnæ edæ
 pō bitō oncōnē ēñaquēnēmo īmopa.

⁶ Angā ēñēnīnque Taqueo quīngæ wææ
 ti wææñīnque, Ao, botō oncōnē waa
 poncæbīīmpa, ante watapæ todirque edæ
 tōmēngā oncōnē māmōngā pongacāīmpa.
⁷ Itota mānōmaī cæcā adīnque wadāni, Æ
 nē wīwa cæcā weca Itota quīmæ ēñacæ
 gocāā, ante tōmānāni pīnte tedegadānīmpa.
⁸ Taqueo īñōmō edæ tōmēnāni ayōnāni ængæ
 gantite adīyæ ongōnīnque mōnō Awēnē
 īngante,

—Awēnē ēñēmi. Botō māīncoo
 tæcæguedencoo pā cædirque ōmæpodāni
 īnte wæwēnāni īnānīte nōwo godōmo ænāni
 ae. Ayæ botō wacā quī ante babæ
 ānīnque ō æmo wæcā īnīnque wēēñēdē
 botō ō ænīncoo adopocoo bai incæ
 godōmenque mempoga go mempoga
 godōmo æncæcāīmpa.

⁹ Ante apæñecā ēñēnīnque Itota wadāni
 īnānīte apæñedinque,

—Taqueo adobaī Abadāo wodi pæīngā
 īñongante botō nē æmo īnōmo īnte tōmēngā
 oncōnē nāni owocabo quēwēncædānīmpa,
 ante nōwoōnæ pontabopa. ¹⁰ Botō
 Waobo ēñagalīmo īñōmō æmo beyænque
 quēwēncædānīmpa, ante cædirque wē wom-
 onte bai īnāni īnānīte dīquī dīquī mīncæ
 pontabopa, ante Itota apæñegacāīmpa.

*Mīnata nāni godonte cēinta ante
 odōmongampa*

(Māteoo 25.14-30)

¹¹ Mānōmaī apæñecā ēñēnāni īnte
 tōmēnāni, Itota Eedotadēē obo pongampa,
 ante adīnque, Wængonguī Awēnē Odeye
 nempo mōnō oo pōnī quēwēngūnque
 īmpa, ante pōnente edæ oda cædānitapa.

Īninque Itota, Wængongui Awenē æbānō cæqinggā, ante ēñencæðānimpā, ante ĩmæca quēwēnāni nāni cæinō ante odōmōninque apæñecantapa.

¹² Īmaīnō ante apæñecantapa. “Waocā adocanque awenē odeye pæringā ĩnongā inte, Botō gobē wabæca gote ĩmæca pancabaa awenē odeye bate pōmoedāni. ¹³ Āninque tōmengā ingante nē cæðāni diete ganca ĩnāni ĩnānite āñete pōnāni ate tōmengā oodo mīnata nāni āinta wantæpiyæ cæte nāni æinta incæ æninque adocanque ingante adotaque pædæ wacā ingante adotaque pædæ godōninque tōmānāni ĩnānite godongā adopota adopota ænānīpa. ‘Mīnitō mānīnta æninque godonte æi godonte æi cædinque, Yebængæimpā, ante botō gote pompoga cæedāni.’ ¹⁴ Ante wadæ gocā adinque tōmengā nempo quēwēnāni guiquēnē tōmengā ingante piinte cædinque pancadāniya ĩnānite āninque, Mīnitō tōmengā miñæ godinque awenēidi ĩnānite gode āninque, Māningā ĩñōmō wīl mōnitō awenē odeye bacæcāimpā, ante wææ āmīni ēñencæðānimpā, ante da godōnāni godānitapa,” ante apæñedinque Itota ayæ godōmenque apæñecantapa.

¹⁵ “Incæte awenēidi do ānāni ate awenē odeye badinque tōmengā omæ pongantapa. Pōninque tōmengā, Botō beyæ nē cæðāni ĩñōmō godonte æi godonte æi cædinque æbānō godōmenque nangui edæ ænte mānāni, ante acæte ante cædinque, Botō oodo mīnata nē ænīnāni ĩnānite āñete pōedāni, angā. ¹⁶ Āñete pōnāni ate tōmengā weca tāno pōningā ĩñōmō, ‘Awenē ēñēmi. Bitō oodo mīnata adotaque incæ onompo tipæmpoga mānīmpota edæ ñōwo yebænte bapa.’ ¹⁷ Ante apæñecā ēñēninque tōmengā ingante, ‘Botō imote nē cæbi ĩmi waa cæbi æmopa. Wædænque incæ ænīmi inte bitō ædæmō aate cæbipa, ante adinque botō onompo tipæmpoga nāni quēwēñōmō quēwēnāni ĩñōnānite bitō nempo pōnōmo æninque nē āmi inte aabi æmoe.’ ¹⁸ Ante tōmēnāni awenē angā ate ayængā pōninque, ‘Awenē ēñēmi. Bitō oodo mīnata adotaque incæ onompo æmæmpoque mānīmpota ñōwo yebænte bapa.’ ¹⁹ Ante apæñecā ēñēninque tōmengā ingante adobaī apæñedinque, ‘Ōnompo æmæmpoque nāni quēwēñōmō quēwēnāni ĩñōnānite botō bitō nempo godōmo ænte aabi æmoe,’ angantapa,” ante Itota apæñecantapa.

²⁰ Ayæ godōmenque apæñedinque Itota, “Awenē angā ate tōmengā guiquēnē pōninque, ‘Awenē ēñēmi, tōmēmi mīnata æe. Botō weocodē ædæmō wīni caadinque wææ aate mantabopa. ²¹ Āninque, Bitō wīl bitō ñōnōni incæ wacā ñōnōni incæ ō ænte māmi awæðō. Ayæ wīl bitō mīmi pæ incæ wacā

mingā pædi incæ tā pebi ĩmipa, ante pōnente wædinque cætabopa. Bitō tæēmō ĩnōmi ĩmipa, ante guiñente wædinque botō oodo mīnata botō ænīnta wīni caapote weocodē ædæmō wææ aabo ae.’ ²² Āñongante tōmengā awenē ĩñōmō, Īñæmpa bitō nē wīwa cæbi ĩmi nāmā bitō tededō beyænque bitō imite apænte ancæboimpā. Botō tæēmō ĩmo inte wīl botō ñōnōni incæ wacā ñōnōni incæ ō æmopa. Wīl botō mīmo pædi incæ wacā mingā pædi incæ edæ do tā pebo ĩmopa. Mānōmaī ĩmpā, ante bitō dicæ ēñēnāmā ĩmitawogaa. ²³ Do ēñēnīmi inte bitō ēñente edæ cæquēnēmi ĩmitapa tōō. Botō oodo mīnata godonte æinta æninque edæ nē godonte ænāni weca baanco weca quīnante wīl guidonte æmitawo. Mānōmaī cæbi baī botō ocæ ēmænte pōninque edæ botō quī do æninque wadāni nāni guidōnīnta tōnō edæ do æncæðōmoimpā tōō,’ angampā.”

²⁴ “Āninque godongāmæ ongōnāni ĩnānite awenē apæñecantapa. ‘Mīnitō ñōwo ĩngā mīnata nānō næænīnta ō æninque edæ mīnata onompo tipæmpoga nē næængā ingante pædæ godōmīni æncæcāimpā.’ ²⁵ Angā ēñēninque tōmēnāni, ‘Awenē ĩñæmpā, ĩngā diete ganca mīnata do mangā apa āmīi.’ ²⁶ Ante wæyōnāni awenē wæætē, ‘Īñæmpā nē ēadāni ĩnānite tōmānāni ĩnānite godōmenque godonte ingæimpā. Wæætē edæ ēadāmāi inte omæpocā ĩngā guiquēnē tōmengā nānō ēadīncōo wædænque pōnī ĩ incæte edæ ō ænte dæ ba wæcæcāimpā. Ante apænebo ēñēmaīmīnīpa. ²⁷ Ayæ botō imote nē piināni guiquēnē botō imotedō ante apæñedinque, Bitō wīl mōnitō awenē odeye bacæcāimpā, ante nē Baa ānāni guiquēnē, tōmēnāni ĩnānite botō weca ænte pōninque botō ayōmo wænōmīni wæncæðānīmpā, āmopa,’ awenē angantapa. Māninque ante odōmonte apænebopa,” ante Itota apænegacāimpā.

Eedotadē ĩñōmō Itota pongampā

(Māateo 21.1-11; Māadoco 11.1-11; Wāō 12.12-19)

²⁸ Māninganca apæñedinque Itota Eedotadē æicæte ante tāno gocantapa. ²⁹ Godinque Odibowænquidi nāni anquidi ontacamō goinō Betapaguee nāni quēwēñōmō obo pōninque Betānia ganca pōninque Itota tōmengā miñæ nē goda mēnaa ĩnate da godōninque, ³⁰ ĩmaī angantapa.

—Mānīlī nāni quēwēñōmō ongō amīna. Tōmēñōmō go guite ayōmīna bodo wē picængā incæ waocā ingante mongæñāmāi ĩngā inte ñāni ñæingā a ongongā acæmīnāimpā. Adinque ñī cæyænte ænte pōeda. ³¹ Ayæ wacā mīnatō ĩmīnate, Quīnante ñī cæyæmīnaa, ante wææ angā ĩninque mīnatō wæætē, Mōnō Awenē nānō

ænguēnēnō ante æmōnāpa, ante apæneeda, angantāpa.

³² Tōmēngā nānō nē da godōna wadæ gote ayōna Itota nānō āni bai bodo wē a ongō.

³³ Adinque nī cæyæñōna bodo wē nē ēadāni tōmēna inate,

—Bodo wē quīmæ nī cæyæwēmīna.

³⁴ Wææ āñōnānite tōmēna wæætē,

—Mōnō Awēnē nānō ænguēnēnō ante æmōnāpa.

³⁵ Ante āna ēñēninque Ao ānāni īninque awæ nā cæyæñōmō nī cæyænte bodo ingante tōi tōi ænte pōnatāpa. Ayæ ænte pōninque tōmēna weocoo yabæcooque æidāmæ wo cæyabædinque āna ate Itota wæñōmēnæca inō æi tæ contate gocantāpa.

³⁶ Bodoga æi tæ contate taadonque goyongā tōmēngā nānō goquīnō ante waodāni weocoo wæænō bee podōwadānitāpa.

³⁷ Odibowænquidi wæænōmēmō īñōmō pōnōmenque pōñongante tōmēngā miñæ nē godāni godongāmæ nāni poncabo tōmānāni īñontobæ nangui todinque ogæ tededānitāpa. Itota bamōnengæ nangui cæcā atamōnipa, ante nāni adinō ante pōnēninque Wængongui ingante waa ate apænedānitāpa.

³⁸ —Mōni quēwēnginque impa, ante, Badogaa, ante tomōnipa. Awēnē Wængongui ēmōwo beyænque pōmi īninque bitō to-quinque edæ Wængongui bitō imite waa cæcæcāimpa. Ōñædē nē quēwēngæ pōnō piyænē cæcānō anguēnē. Æibæ pōni quēwēnongā īñōmō nāō bai ēmongānō anguēnē. ³⁹ Ante nangui ināni godongāmæ godinque āmotamīni ante bai āñōnāni pancadāniya Paditeoidi inōnāni inte Itota ingante,

—Nē Odōmōmi ēñēmi. Bitō miñæ nē godāni inānite wææ āmi apocænē inānie.

⁴⁰ Āñōnānite tōmēngā wæætē,

—Mīnitō īminite nāwangā āmopa. Waodāni pæ wēenedāni īninque dicacoo incæ botō imote waa ate bai edæ yedæ āmainānipa, ante Itota apænegacāimpa.

⁴¹ Ayæ pōnōmenque pōninque Eedotadēē gomō adinque Itota māniñōmō quēwēnāni inānite ante pōnēninque Ca ca wædinque, ⁴² īmāi angantāpa. “Mīnitō īñōmō edæ nōwoōnæ mīni gānē pōnēnginque botō imote edonque pōni adinque Ao āmīni bai waa incædōnīmpa. Incæte mīnitō, Æbānō cæte gānē pōnēngimōō, ante edæ wē wodonte bai īninque mīnitō adāmāi īmīnipa. ⁴³ Īncayæ ate mīnitō īminite nē pīnāni incæ mīnitō wææ cæinca gāānē pōnō tee mongate godāmæ wææ ongōnāni adinque mīnitō edæ ædō cæte tao wodii winonguimīni.

⁴⁴ Botō mīnitō weca pōmo incæte mīnitō awincaque adinque, Wængongui nōwoōnæ ponte æncæcāimpa, ante dicæ amīniyaa. Mānōmāi beyænque nē pīnāni īñōmō mīnitō

īmīnite bæ tadāni tæ go wææñōmīnite wæñōnāni wæncæmīnīmpa. Ayæ wēñæñāni wææ cæte īñōmō quēwēñōnānite tōmēnāni inānite edæ wæñōnāni wæncædānīmpa. Dica mīni mænongainca incæ bæ tadāni ate dica adocaque incæ wæñōmēnæca inō ongōnāmāi ingæimpa,” ante Itota apænegacāimpa.

Wængongui oncō tæiyæ waēmō bacæimpa, ante cæcampa

(Māateo 21.12-17; Māadoco 11.15-19; Wāō 2.13-22)

⁴⁵ Ayæ Wængongui oncō nānæncōnē yabæcōnē go guidinque Itota māniñōmō nē godonte æncæte ante nē mānāni inānite da tadongā tao goyōnānite, ⁴⁶ Ayæ tōmēnāni inānite angantāpa.

—Wængongui beyæ īmāinō ante yewæmongatīmpa. “Waodāni botō oncōnē pō guidinque botō imote apænecadānīmpa,” ante Wængongui angā incæte mīnitō wēnæ wēnæ cæmīni beyænque Wængongui oncō incæ nē awēmō ō æñāni nāni womōincōnē bai wentamō bapa tōō.

⁴⁷ Ayæ īmō īñō īmō īñō Wængongui oncō nānæncōnē yabæcōnē go guidinque Itota odōmonte apænecā ēñēnānitāpa. Māniñōmō, Wængongui quī, ante nē godōnāni nānæñāni tōnō nē odōmōnāni tōnō tōmēnāni awēñēidi guiquēnē, Itota ingante wænonte wido cæcæcāimpa, ante ancaa cæyōnāni, ⁴⁸ wadāni tōmānāni, Tōmēngā æbānō odōmongāā, ante ēñēē cōnāni adinque awēñēidi wæætē, Tōmēngā ingante mōnō ædō cæte wido cæquī, ante wædinque nīmpo cægadānīmpa.

20

Awēnē īmīpa, ante æcānō ānāi, ante Itota ingante ānānipa

(Māateo 21.23-27; Māadoco 11.27-33)

¹ Īncayæ ate Itota Wængongui oncō nānæncōnē yabæcōnē go guiite waodāni inānite odōmonte apænedinque Wængongui Awēnē ingantedō ante watapæ apænecā ēñēnānitāpa. Apænecā ēñēñōnāni, Wængongui quī, ante nē godōnāni nānæñāni tōnō nē odōmōnāni īñōmō nē aadāni nāni Picæncabo tōnō tōmēngā weca ponte ānānitāpa. ² Ponte apænedinque,

—Æcānō nē angā inte bitō imite angā cæbii. Bitō imite æcānō, Nē āmi babīpa, āna ēñēninque cæbii.

³ Ante āñōnānite Itota,

—Botō wæætē mīnitō īminite āmo ēñente apænemīni ēñēmoedāni. ⁴ Wāō wodi īñōmō quīnante æpænē guidongantawo, ante pōnēmīni. Ōñædē nē owocā angā ēñente cæcantawoo. Waodāni que ānāni ēñente

cæcantawoo. Æbānō ante pōnēmīni. Mīnitō wæætē apænemīni ēñēmoeđāni.

⁵ Æñongā tōmēnāni iñōmō nāni caboque tedinginque, “Iñæmpa mōnō, Wængongui ōōnæde inō angā Wāō ēñente cæcampa, āmō bai Itota wæætē, ‘Quinante tōmengā ingante pōnēnāmai imīni,’ ante mōnō imonte piincædongāimpa. ⁶ Ayæ wæætē, Waodānique ānāni ēñente cægacāimpa, āmō bai godongāmæ ongōnāni iñōmō, Wængongui beyæ nē apænecā Wāō wodi ingacāimpa, ante nē pōnēnāni inte tōmānāni mōnō imonte dicaca tacadāni wæncædomōimpa.”

⁷ Ante pōnente wædinque tōmēnāni wæætē Itota ingante, Wa. Æcāmē angā ēñēninque Wāō wodi cægacāi, ante ēñēnāmai Imōnīpa, ānāni. ⁸ Wædinque Itota wæætē,

—Botō adobai, Æcānō nē angā inte pōnō āna ēñēninque botō mānōmai cæboo, ante mīnitō imīnite apænēdāmai incæboimpa, an-gacāimpa.

Nē aadāni inguēnēnāni incæ wīwa cædānīpa, ante

(Māateo 21.33-44; Māadoco 12.1-11)

⁹ Ayæ godongāmæ ongōnāni inānite Itota, Wængongui Awēnē æbānō cæcāā, ante ēñēcædānīpa, ante imæca quēwēnāni nāni cæinō ante odōmōninque Iīmai apænecantapa. “Onguīñængā adocanique yowementacodē mīnte pæyonte wadāni ōmæ wite aate nē tā pedāni inānite, Botō yowementacodē incæ ōmæ wite aadāni. Aayōmīnite botō, Mīnitō quī, ante pancamonga pōnōmo æncæmīnīpa, angā Ao ānāni ate nē ēacā iñōmō edæ wantæpiyæ wabæca quēwēncæ gocantapa. ¹⁰ Yowedepo iinque bayedē nē cæcā ingante nē ēacā iñōmō, Bitō yowementacodē nē aadāni weca godinque pancamonga āmi æninque botō weca wæætē māmōmi æmoe, angā. Gote pongā adinque yowementacodē nē aadāni guiquēnē nē æncæ pōningā ingante bæi ongonte tæi tæi pāninque da tadōnāni ōmæpocā inte gocantapa. ¹¹ Ayæ wæætē nē ēacā iñōmō wacā tōmengā ingante nē cæcā ingante angā gote pongā adinque yowementacodē nē aadāni adobai tæi tæi pānāni wæyongante, Guingo imonte wæcæcāimpa, ante godō wīwa cædāni wæyongante da tadōnāni ōmæpocā inte gocampa. ¹² Ayæ mēnaa inate da godongā ōmæpoda pōna adinque nē ēacā iñōmō wacā nē cæcā ingante angā gote pōñongante tōmēnāni godō mæ yete wido cædānīpa,” ante odōmōninque Itota godōmenque apænecantapa.

¹³ “Mānōmai cædānīpa, ante ēñente wædinque yowementacodē nē ēacā iñōmō, ‘Botō iñōmō æbānō cæquēnēmo imoo, ante wædinque, Botō edæ Iīmai cæcæboimpa.

Botō wengā onguīñængā botō nē waadecā iñongante da godōmo gocæcāimpa. Tōmēmo wengā da godōmo gocā adinque tōmēnāni wabānō guīñente wædinque ee abainānīpa,’ ante pōnēninque da godongā. ¹⁴ Gote dicæ pongā adinque yowementacodē nē aadāni guiquēnē, ‘Tōmengā ingampa. Wæmpocā māincoo iñi edæ iingā iñōmō nē ænguīgā ingampa cæmōō. Mōnō edæ māo wænōmō wængā ate edæ mōnō quī babaimpa.’ ¹⁵ Ånewēninque tōmēnāni tōmengā ingante wææ cæte iñōmō yabæque wido cædinque godōmenque wænōnāni wængantapa.”

Ante Itota, Māninque ante apænebopa, ante tōmēnāni inānite angantapa. “Mānōmai cædāni adinque yowementacodē nē ēacā iñōmō tōmēnāni inānite æbānō cæquīgāā, ante pōnēmīni. ¹⁶ Tōmengā edæ do pōninque nē aaquēnēnāni inānite godō wænōninque wadāni inānite wæætē yowementacodē godongā æninque nē aadāni bacædānīpa.”

Itota mānōmai angā ēñente wædinque godongāmæ ongōnāni iñōmō,

—Mānōmai cædāmai inguēnē ānewēē, ante wædānīpa.

¹⁷ Iinque Itota tōmēnāni inānite gomō ad-inque,

—Iñæmpa ēñēnāmai cæmīni iñōmīnite Wængongui pānāmai inguīgāā, ante pōnēmīnitawo. Iinque mīnitō, Iīmai ante quīnante yewæmongatimpa, ante pōnēmīni. “Dica ænte adinque, Wēnæ wēnæ inca, ante nē mænōnāni nāni wido cædinca incæ gomonga wæmonca inca iinque tāno nāni ñōnōnīca bæbængapa do bacapa,”

ante yewæmongadānīpa. ¹⁸ Botō iñōmō māniū dica wæmonca bai inōmo inte āmo ēñēninque nē wæcā iñōmō tōmengā iñōmō mānincaā tæ go wææninque tobænte wæte bai botō ōnōwa gāānē ædæ wææncæcāimpa. Wæætē æcānō ingante Wængongui piinte mānīncaca tacacā inaa tōmengā guiquēnē quīēmē bai yaintai bai goquīgānō anguēnē, ante pōnēmīniyaa, ante Itota apænecāimpa.

¹⁹ Ante nē aaquēnēnāni nāni cæinō ante odōmōninque Itota apænecā ēñente wædinque nē odōmōnāni tōnō, Wængongui quī, ante nē godōnāni ñænænāni iñōmō, Iñæmpa mōnō imonte piinte angā awædō, ante pōnēnānīpa. Iinque tōmēnāni, Mōnō ñōwo pōni tōmengā ingante bæi ongongæimpa, ante cædānīpa. Incæte tæcæ bæi ongoncæ cædinque, Wadāni piināni wæcæ wæ, ante wædinque ee adānīpa.

Tæiyæ Awēnē nānō āintamō ante ted-edānīpa

(Māateo 22.15-22; Māadoco 12.13-17)

²⁰ Ìnrique, Mönö Itota ingante bæi ongöninque odömáno gobedónadodo awënë nempo godömö ænrique tömengä wæætë në angä inte edæ Itota ingante apænte ancæcäimpa, ante ñænænäni incæ tömengä ingante cöwä adänitapa. Ayæ wadäni Ìnänite äninque, Minitö Itota müñæ tee empote gote nöngä ante bai apænedinque wæætë babæ cæedäni. Babæ cæmïni beyæ tömengä adodeque incæ wapiticæ tedecä ëñëinque mïnitö ocæ ëmænte ponte apænemïni ëñencæmönimpa, änäni ëñente godinque ñænænäni näni äninö bai babæ cædänitapa. ²¹ Ìnrique ñænænäni näni në da godöninäni iñömö Itota weca pöninque,

—Awënë në Odömömi ëñëmi. Bitö apænedö nö impa, ante do ëñëmönipa. Bitö ayömi mönö waocabo adoyömö pönï ìmönipa, ante adinque bitö tömämöni ìmönite adoyömö pönï cæbi æmönipa. Ayæ, Wængongü taadö ante bitö nö pönï odömömi ìmpa, ante ëñëmönipa. ²² Ìnrique apænebi ëñëmönii. Odömáno gobiedöno beyæ ante tæiyæ awënë Tetædo tigitamö nänö änantamö ante æbänö wææ yewæmonte ì, ante ëñencæte ante wæmönipa edæ. Godonte edæ waa cæte intawo. Wæætë wënæ wënæ cæte intawo.

²³ Äñönänite Itota iñömö, Tömënanï wënæ wënæ ancæte ante babæ cædänipa, ante do ëñente wædinque,

²⁴ —Deënadïo tigitamö odömömi aboedäni. Æcänö awinca bai yewæmonte badonte ì. Æcänö ëmöwo ante yewæmonte ongö, ante edæ apænemïni ëñëmoeädni.

Äñongante,

—Awënë Tetædo awinca bai yewæmonte badonte impa. Adocä ëmöwo ante yewæmonte ongö amönipa.

²⁵ Ante apænedäni ëñëinque,

—Awënë Tetædo qui ì Ìnrique edæ Tetædo ingante godongæimpa. Wæætë Awënë Wængongü qui ì Ìnrique Wængongü ingante godongü ì apa änewëmïni.

²⁶ Ante Itota tömänäni ayönänite nö apæncä ëñente wædinque ñænænäni näni da pönöninäni wæætë, Mönö ædö cæte piingüi, ante guingo imonte wædinque pæ wëënegadänimpa.

Ædö cæte ñäni ömæmongüi, ante wædänipa

(Máateo 22.23-33; Máadoco 12.18-27)

²⁷ Tadoteoidi në, Waocä wænrique ñäni ömæmönämaï æmæwo wængampa, ante në änewënanï inte Itota weca pöninque, Mönï änö ante apænebi ëñëmaïmönipa, änanitapa.

²⁸ —Awënë në Odömömi ëñëmi. Mönö beyæ ante Möitee wodi iïmaï ante wææ yewæmongacäimpa. Ongüiñængä monte ate wëñæ tapæidämaï inte wængä Ìnrique tömengä tönïñacä incæ owæmpoingä ingante

möninque, Botö tönïñacä wodi wënäni wæætë pæcædänimpa, ante tapæicæcäimpa, ante yewæmongacäimpa. ²⁹ Ìnrique wadäni iïmaï cædänitapa, ante apænemöni ëñëe. Edæ önopmo æmæmpoque go mengäa näni caipæ iñönänite bamoncadengä möninque wëñæ tapæidämaï mangüiwëninque edæ näñe wængä. ³⁰ Ate ayæmengä wææ adocä ingante möninque wëñæ tapæidämaï inte näñe wængä. ³¹ Ayæ wææ wacä möninque adobai näñe wængä, ayæ wææ wacä möninque näñe wængä, ayæ wææ wacä möninque näñe, ayæ wææ wacä möninque näñe, ayæ wææ wacä möninque näñe wængampa. Önopmo æmæmpoque go mënaa Ìnänï owæmpoingä ingante möninque edæ wëñæ tapæidämaï inte edæ tömänäni näñe wænänï. ³² Ate onquiyængä tömangä näñe wængä. ³³ Ìnrique, Mönö näni ömæmongüönæ, ante mïni äönæ iñonte mäningä owæmpoingä iñömö æcänö nänöogængä baquingäa. Edæ tömengä ingante iñömö edæ tömänäni mangüiwengadänimpa.

³⁴ Äñönänite Itota,

—Inguipoga quëwëninque edæ mïni waocabo iñömö do mömïnipa. Wacä ingante do godö ñänömi mongampa. ³⁵ Wæætë, Mïnguipoga bayonte ìnänique eyepæ inte ñäni ömæmonte öönædë æite quëwencædänimpa, ante Wængongü nänö në angainäni iñömö tömënanï mönämäi Ìnrique wadäni Ìnänite godö ñänönämäi incædänimpa. ³⁶ Ayæ Wængongü anquedoidi bai inönäni inte tömënanï Wængongü nänö në angainäni iñömö ædö cæte wæætë wængüinäni. Tömënanï në ñäni ömæmongainäni inönäni inte edæ Wængongü wëñænäni Ìnänipa. ³⁷ Wæætë Möitee wodi incæ ocäñeque bæcoñeque ante nänö yewæmongainta adotaa yewæmöninque, Waodäni dobæ ñäni ömæmonte quëwencædänimpa, ante edonque odömongacäimpa. Tömengä iïmaï ante yewæmongacäimpa. Mönö Awënë ìnongä iñömö Abadäo Wængongü ingaingä inte ayæ Itæca Wængongü ingaingä inte adocä Acobo wodi Wængongü ingänö angüëñë, ante yewæmongacäimpa. ³⁸ Ìnæmpa Wængongü iñömö në quëwënanï Wængongü ìnongä inte tömengä në wængainäni Wængongü inämaï ingampa. Wæætë tömengä ayongante do wængainäni incæ tömänäni müñäni quëwënanipa.

³⁹ Ante apæneyongante në odömönäni pancadäniya,

—Awënë në Odömömi ëñëmi. Bitö nöngä ante apænebi awædö, ante apænedänitapa.

⁴⁰ Ayæ wadäni tömänäni güñente wædinque godömenque änämaï ingadänimpa.

Codito æcänö Pæingä Inongä ingää, ante (Mäateo 22.41-46; Mäadoco 12.35-37)

⁴¹ Ayæ tömënanî inänite Itota, —Awënë Dabii wodi Pæingä Inongä wææ Codito ingampa, ante quinante änänii, ante pönëmini, angantapa. ⁴² Inæmpa Dabii wodi incæ tömengä nänö ämotamini äintaai iimaî ante yewæmongacäimpa.

“Botö Awënë ingante apænedinque Awënë Wængonguî incæ iimaî ante apænegacäimpa.

Bitö botö tömëmæ inö tæ contate a ongöe.

⁴³ Ongöñomite botö bitö imite në piinani inänite bæ tate cæbo ate,

bitö önöwa gäänë ongönäni inänite pinä gäwacæbiimpa,” ante Awënë Wængonguî apænegacäimpa.

⁴⁴ Codito në Awënë ingampa, ante awënë Dabii wodi nänö në angaingä inongä inte edæ adocä Codito inömo ædö cæte näëmæ Awënë Dabii wodi Pæingä inguingää, ante pönenguënë änewëminii, ante Itota angacäimpa.

Në wææ odömönäni inänite Itota püingampa (Mäateo 23.1-36; Mäadoco 12.38-40; Odoca 11.37-54)

⁴⁵ Ayæ tömënanî eñëe cönönänite tömengä miñæ në godänique inänite Itota apænegantapa.

⁴⁶ “Cædämaî, ante wææ ante nani yewæmongainta në ate odömönäni inänite munitö gomö aedäni. Tömënanî inömo doyæncoo wæmoncoo wëñate mongænte todänipa. Waodäni nani godonte æinömo cægöñönänite wadäni pö bee téninque tömënanî inänite, Në odömömi, bitö imite waa amönipa, ante apænedäni eñëninque edæ në odömönäni inömo nanguî todänipa. Ayæ tömënanî odömöincönë go guidingque tömënanî namanque ante pönëninque wæmompaa pöni tæ contate todänipa. Ayæ ææmæ becæ godinque tömënanî, Botö täno bete tocäimpa, ante wæmompaa pöni tæ contate bete todänipa. ⁴⁷ Ayæ owæmpoinäni oncö yo mongænte bai cædinque ö æwënanî inte në wææ odömönäni inömo, Botö imote waa acædänimpa, ante cædinque Wængonguî ingante nöingä apænete bai cædinque babæ cædinque wantæpiyæ tededänipa. Tömënanî edæ nani nanguî pöni pante wæquinque mänömaî nämä beyænque ante cædänipa, ante adinque munitö inömo ee gomö aedäni,” ante Itota wææ angacäimpa.

21

Owæmpoingä incæ, Wængonguî qui, ante godongampa (Mäadoco 12.41-44)

¹ Itota Wængonguî oncönë ongonte gomö ayongä në nanguî eadäni, Wængonguî qui, ante nani wënoncadedë pö daga daga wënanî

acantapa. ² Ayæ ayongä onquiyængä owæmpoingä ömæpocä inte önontamonque mentamonga pö daga wengä. ³ Adinque Itota iimaî ante apænegantapa.

—Näwangä ante apænebo eñëedäni. Wadäni tömënanî wædænque pöni godonte bai wii eyepæ daga wëñönäni iingä owæmpoingä inömo ömæpocä inte wædongä incæte godömenque nanguî godonte bai godongä abopa. ⁴ Tömënanî nanguî eadäni inönäni inte, Quëwenguinta impa, ante cö cædinque tömënanî nani wii æinentaque ayæ ongöintaque godönänipa. Iingä ömæpocä ingä guiquënë tömengä nänö quëwenguinta incæ, Wængonguî qui bacæimpa, ante tömanta edæ daga wengampa, ante Itota apænegacäimpa.

Wængonguî oncö ñæncæncö bæ tate bacäimpa, ante

(Mäateo 24.1-2; Mäadoco 13.1-2)

⁵ Wëenënedë Wængonguî oncö ñæncæncö mænöninque wadäni dicacoo wæmoncoo pöni tee bædäni waa ongoncadompa. Ayæ wacoo wæmoncoo pöni ænte pöninque, Wængonguî qui impa, ante pædæ godönäni ongönompa. Nöwo inömo Itota miñæ në godäni pancadäniya gomö ayönäni, Dicacoo tönö wadäni waa pöni nani ænte pönoncoo wæmoncoo pöni ongö amönipa, ante tededänitapa. Tedyönänite Itota,

⁶ —Mänincoo mini acoo incæ iincayæ ate tömanca bæ tadäni wæænca adinque panguimæ panguimæ godinque dica adocaque pöni incæ wænömënæca ongönämaî ingæimpa, ante apænegacäimpa.

Oo iinque bacäimpa, ante æbänö ate eñenguî, ante

(Mäateo 24.3-28; Mäadoco 13.3-23)

⁷ Mänömaî apænegä eñëninque tömënanî wæætë,

—Awënë në Odömömi eñëmi. Mänü bitö äninö ante æyedëno iinque baquüi, ante eñencæte ante wæmönipa. Ayæ, iimaî cæbo ate munitö, Oo pöni impa, ante eñencæminimpa, ante Wængonguî æbänö mä cæquingää, ante apænebi eñëmönie.

⁸ Äñönäni Itota, “Wapiticæ odömöñönäni munitö wæætë, Mönö oda cædämaî ingæimpa, ante nämä wææ aedäni. Edæ iimaî baquüi i ataqeedäni. Wadäni nanguî inäni ponte botö emöwo ante apænedinque, ‘Coditobo imopa,’ ante babæ ante tedequinäni inänipa. Ayæ, ‘Oo pöni impa,’ ante ponte nanguî inäni tedequinäni inänipa. Mänömainö ante ponte tedyönänite munitö wæætë tömënanî miñæ tee empote godämaî imæwedäni. ⁹ Ayæ, Wabæca awënë tönö pö bee téninque wæætëdö wæætë cædapa, ante tededäni eñencæminimpa. Ayæ, Adobæca quëwëninque incæ awënë ingante

wido cæcæte ante ængæ gantidānīpa, ante tededāni ēñēninque mīnitō iñōmō edæ guīñēnāmaī iedāni. Mānōmaī edæ tāno cōwē bacæīmpa. Incæte iinque baōnæ botō āōnæ æiuedō ponguīi.”

¹⁰ Ante apænedinque Itota godōmenque apænegacāīmpa. “Adobæca quēwēnāni iñōnānite wabæca quēwēnāni ponte bee tēninque guēadō guēa cæquīnāni inānīpa. Adobæca awēnē odeye nempo quēwēñōnānite wabæca awēnē odeye nempo quēwēnāni māmō bee tēninque guēadō guēa cæte wæñonte wænguīnāni inānīpa. ¹¹ Ayæ wayōmō wayōmō goinque nanguī pōnī ocæ ocæ cæcæīmpa. Ayæ waodāni nāni cæñinente wænguinque cænguī incæ tōmāā capo wængæīmpa. Ayæ quingæ nāni wodonte wēnæ wēnæ inte wæwenguīmāmo incæ edæ do pongæīmpa. Edæ ancaī nāni guīñenguīmāmo edæ pongæīmpa. Ōōnædē iñōmō nāni wo go wo go cæwēnenguīmāmo edæ ate bai bacæīmpa.”

¹² Ayæ apænedinque Itota, “Mānīmāmo nāni guīñenguīmāmo tōmāmāmo ayæ pōnāmaī iñonte mīnitō imīnite togænte yao ongonte tōmēnāni odōmōincōnē ænte go guīdinque apænte āninque mīnitō imīnite māo tee mōnecædānīmpa. Ayæ botō ēmōwo beyæ mīnitō imīnite tōmāmæ awēñēidi odeyēidi weca ayæ pancabaa awēñēidi gobedōnadodoidi weca ænte māodāni gote gongæncæmīnīmpa. ¹³ Mīnitō awēñēidi weca godinque gongænte apænemīni ēñēninque awēñēidi incæ, Itota æcānō ingāā, ante ēñencædānīmpa. ¹⁴ Iinque mīnitō imīnite awēñēidi weca ayæ ænte godāmaī iñēdē incæ mīnitō iīmaī ante nāmāneque pōñēdāni. Botō awēñē weca ongōninque æbānō ante wææ anguīmoo, ante edæ wædāmaī incæboīmpa, ante piyænē cæedāni. ¹⁵ Iñæmpa botō pōnō nō apænebo ēñēnimīni inte mīnitō wæætē adodō ante apæncæmīnīmpa. Mānōmaīnō ante apænemīni ēñēninque nē pīnāni guiquēnē nō pōnī mīni apænedō ante ædō cæte wido cæquīnāni. Wæætēdō wæætē ædō cæte anguīnāni. ¹⁶ Mīnitō mæmpoidi incæ mīnitō tōñīñadāni incæ mīnitō guīdēnāni incæ mīnitō æmigoidi incæ, Iingā ingampa, ante godō odōmōninque mīnitō imīnite wadāni nempo pædæ godōnāni ō æncædānīmpa. Æninque pancamīniya imīnite godōmenque wæñōnāni wænguīmīni iñnīpa. ¹⁷ Ayæ, Coditoidi imīnipææ, ante tōmānāni botō ēmōwo beyænque mīnitō imīnite nanguī pīncædānīmpa. ¹⁸ Incæte mīnitō baō incæ ocaguī incæ adoguinque incæ æmæwo ēwēnāmaī ingæīmpa. ¹⁹ Iinque mīnitō botō imote pīnāmaī inte wæntædāmaī inte ee cæmīni iinque botō æmo beyænque quēwēncæmīnīmpa.”

²⁰ Ante apænedinque Itota godōmenque apænegacāīmpa. “Wabæca tontadoidi pōninque Eedotadēē godongāmæ wææ ongōnāni adinque mīnitō, Bæ tate nāni wido cæquīmāmo oo pompa, ante do edæ ēñencæmīnīmpa. ²¹ Mānōmaī cædāni adinque Oodeabæ quēwēmīni iñōmō ānanquidi do wodii winonte æibæwedāni. Ayæ Eedotadēē quēwēmīni iñōmō edæ yabæque taobæwedāni. Ayæ yabæque quēwēmīni inte Eedotadēē iñōmō pō guīdāmaī imæwedāni. ²² Māñīñedē edæ Wængonguī nānō panguiōnæ incæ Wængonguī beyæ nāni yewæmōnte angaiōnæ incæ iinque baquīnō anguēnē. ²³ Māñiōnæ iinque bayedē edæ yædēmadā ināni tōnō goōmæ nē gāñōnāni tōnō tōmēnāni nāni wæquīmāmo baquīnō anguēnē. Imæca quēwēnāni edæ māñīñedē nanguī pōnī caate wæquīnāni inānīpa. Idægoidi inānite edæ nanguī pōnī pīinte cæquīnō anguēnē. ²⁴ Pancadāniya inānite yaēmēnca wido tadāni wænguīnāni inānīpa. Ayæ pancadāniya inānite bæi ongonte māo wabæca ænte goquīnāni inānīpa. Wængonguī doyedē apænedinque, Oodeo iñāmaī ināni iinque nāni cæpoga cæcæedānīmpa, angacāīmpa. Iinque tōmēngā nānō angaimpoga iinque baganca oodeoidi ināmaī ināni incæ Eedotadēē iñōmō pōninque nanguī cægōninque pīnā gāwate bai bæ tadāni wæquīmīni imīnīpa, ante apænebo ēñēmaīmīnīpa,” ante Itota apænegacāīmpa.

Waobo ēñagaīmo inte botō iīmaī ponte cæcæboīmpa, ante

(Māateo 24.29-35, 42-44; Māadoco 13.24-37)

²⁵ Ayæ, “Oo pōnī impa, ante edæ ēñencæmīnīmpa, ante cædinque Wængonguī angā ate nænque tōnō apāicā nēmoncoo mā pōnī edæ wacoo bai bacæīmpa. Inguipoga guiquēnē iñænængade pōnī gāwapæntibæ tadōmēngadæ mængonta mængonta cædinque nanguī ā ēñente wædinque tōmāmæ quēwēnāni edæ, Æbānō cæquīmō, ante edæ nanguī pōnī guīñente wæquīmīni inānīpa. ²⁶ Ayæ waodāni æmō ayōnāni oōnædē tæi ongongaincoo incæ wancæ wancæ cæte bai wapiticæ go ate adinque tōmēnāni ancaī guīñente wædinque, Inguipoga mōnō quēwēñōmō edæ quīēmē bai bacæīmpa, ante wædinque iñontobæ nangæ bate wæcædānīmpa. ²⁷ Māñīñedē edæ botō Waobo nē ēñagaīmo inte boguīmancodē pōninque tæi pōnī pīñæmo iinque edæ ñāo apāite bai waēmō ēmōnte wææmo acædānīmpa. ²⁸ Iinque māñōmaī tæcæ ba ate wædinque mīnitō ocabo guīni æmencadinque, Badogaa, āninque edæ, Oo pōnī mōnō abæ tawænte goquinque impa, ante āmæwedāni,” ante Itota apænegacāīmpa.

²⁹ Ayæ, Wængonguī Awënë oo poncæcäimpa, ante æbänö ëñenguī, ante ëñencædänimpa, ante Itota ïmæca quëwëñäni nāni cæinö ante odömöninque ïmaī apænecantapa. “Iigowæ aedäni. Ayæ quiwæmë inca tömawæ aedäni. ³⁰ Öñabo tånä nä boca adinque munitö ïñömö, Öñabo nänö bocaïnepo inte nænque näwatedæ baquinque bocapa, ante pönëninque edæ do ëñëminipa. ³¹ Ayæ adobaī mäninö botö apænedö bai do edæ ba adinque minitö, Wængonguī Awënë Odeye do odemö pönī ongöninque inguipoga oo poncæcäimpa, ante ëñencæminipa,” angacäimpa.

³² Ayæ apænedinque Itota, “Nāwangä ämopa. Nöwomini mümini quëwëninque wænte godāmaī ïñömöni edæ mäninö botö äninö bai tömānö edæ do ïnque baquinö angüenë. ³³ Edæ öönædë ongöñömö inguipoga tönö wo ëwente bai dæ ba incæte botö angainonque guiquenë dæ badāmaī inte edæ cöwë tæi ongongæimpa,” ante apænecantapa.

³⁴ Ayæ, “Minitö ïñömö edæ, Mönö quingämë bai wīwa quëwëmö ïnque mönö mümö ömædëmö bate wæcæ wæ, ante nāmā wææ aedäni. Ti nāmæ bete quidi quidi dowäninque mümö ömædëmö bæcæ wæ, ante nāmā wææ aedäni. Ayæ, Inguipoga quëwëmö inte quiwëmë beyænque wædinque mümö ömædëmö bæcæ wæ, ante nāmā wææ cæedäni. Mümö ömædëmö inte wæyömönte mänionæ wī ïñontobæ pö wæcæimpa, ante mümö ömædëmö badāmaī ingæimpa, ante nāmā wææ cæedäni. ³⁵ ïñæmpa waodäni tömānāni inguipoga tömāmæ quëwëñönänite edæ ïñontobæ ba wæcædänimpa. ³⁶ ïnque woyowotæ itædë cöwë wänö cöninque munitö Wængonguī ingante cöwë apæneedäni. Minitö, Mäninö ïnque ba adinque mönö eyepæ inte aamö cæte wodi winongæimpa, ante Wængonguī ingante apæneedäni. Ayæ, Waocā në ëñagaingä weca mönö eyepæ gongængæimpa, ante adobaī edæ Wængonguī ingante apæneedäni,” ante Itota angacäimpa.

³⁷ Itota mäniñedë Wængonguī oncö ñænæncönë ïmö ïñö ïmö ïñö yabæcönë go guite odömönte apænecä ëñëñäni ate tömengä wæætë gāwædecæ ïñö gāwædecæ ïñö tao godinque Odibowænquidi æite owodongäimpa. ³⁸ Ayæ tömengä Wængonguī oncö ñænæncönë yabæcönë ongönte apænecä ëñencæte ante tömānāni wæætë baänæ ïñö pö baänæ ïñö pö bee tönönänimpa.

22

Itota ingante bæi ongongæimpa, ante

cædänipa

(Mäateo 26.1-5, 14-16; Mäadoco 14.1-2, 10-11; Wäö 11.45-53)

¹ Pää yedæ æmpoquī ömæmö ï nāni cænguionæ ante oodeoidi, Patowa mönö wodo pænta gogaiönæ ææmæ oo pönī bacæimpa, ante cædönänimpa. ² Wængonguī quī, ante në godönāni ñænæñäni tönö në odömönāni ïñömö, Itota ingante mönö wido cæcæimpa, ante cöwë cædönänimpa. Incæte, Wadāni pīināni wæcæ wæ, ante guifente wædinque tömëñäni mäniñedë, Mönö æbänö cæte awëmö bæi ongongæimpa, ante wægadänimpa.

³ Ayæ Itota müñæ nāni, Dote, ante gocabo ïñönāni Codaa Icadote nāni änongä adocä ïnogäimpa. Tatāna mäniñedë tömengä

pö guicantapa. ⁴ ïnque në godönāni ñænæñäni tönö Wængonguī oncö në wææ wänönāni awënëidi ïñömö godongämæ ongöñönāni Codaa tömëñäni weca godinque ïmaī ante apænecantapa. Itota æyömönö ongongä, ante botö æbänö odömönte pædæ pönömo ate ænguimīni. Angä ëñëninque tömëñäni tömengä tönö mäninö ante godongämæ tedegadänimpa. ⁵ Tömengä, Odömönte pædæ pönömo æncæminipa, ante apæneyongante tömëñäni nangui todinque wæætë, Tiguitamö padatamö pönömöni æncæbiimpa, ante apænedäni. ⁶ Ëñëninque tömengä Ao ante wadæ godinque, Wadāni adāmaī ïñönänite botö æbänö cæte ïñäni ïñänite awëmö odömönte godömo ænguñänii, ante cöwä adinque cægacäimpa.

Awënë Itota pöö tönö owæta godongä cænte bedänipa

(Mäateo 26.17-29; Mäadoco 14.12-25; Wäö 13.21-30; 1 Coodintoidi 11.23-26)

⁷ Pää yedæ æmpoquī ömæmö ï nāni cænguionæ ïñonte wodo pænta gogaiönæ bai ï ïnque Patowa ææmæ bete cænguionæ do ïnque batimpa. Mänionæ ïñonte oodeoidi cöwë cæningä codotede ingante wænöninque, Wængonguī quī, ante godonguënëñäni ïñönänimpa. ⁸ ïnque Pegodo tönö Wäö ïnate da godöninque Itota ïmaī angantapa.

—Minatö ïñönö gote, Patowa ææmæño impa, ante æñömīna ate mönö cængæimpa.

⁹ Angä ëñëninque tömëna,

—Ecönönö go guite æænonguimöna, ämii.

¹⁰ Äñönate tömengä wæætë,

—Waa aeda. Minatö mänii nāni quëwëñömö go guiyömīna onguñængä incæ cadabodë æpæ iyænte næænte gocä adinque tömengä ingante edæ tee empote goeda. Tee empo goyömīna tömengä oncönë go guicä adinque, ¹¹ minatö wæætë oncö në eacä ingante ïmaī ante äeda. “Mönö Awënë në Odömongä incæ bitö ïmite ïmaī angampa.

Bitō æcōnēnō āmi guiidinque botō nē ēmiñænāni tōnō Patowa ææmæ ante cænguimōnii, angampa,” ante apæneeda. ¹² Mānōmainō ante apænemīna ēñēninque nē oncō ēacā iñōmō æmongapaa mæi goyōmīnate oncō ñænæncō awæmpaa do nānō cōnōincō odōmongā adinque mīnatō mānincōnē tōmāā eyepæ cæcæmīnaimpa, ante Itota da godongā godatapa.

¹³ Mānōmaī angā godinque apæneyōna, Itota nānō ānō bai adobaī tōmāā batimpa, ante adinque tōmengā nānō nē ēmiñænā, Patowa ææmæno impa, ante cædatapa.

¹⁴ Īnque ææmæno nāni cæñedē ĩnque bayonte Itota awæmpaa gāānē pō tæ contayongā tōmengā nānō nē da godōnīnāni godongāmæ pō tæ contadāni. ¹⁵ Adinque Itota tōmēnāni ĩnānite apænecantapa.

—Botō iñōmō caate wæte wæñāmaī iñedē mīnitō tōnō godongāmæ Patowa ante cænte tocæimpa, ante cæñente nangui wætabopa. ¹⁶ Apænebo ēñēedāni. Botō Wængongui Awēnē ĩnōmo ĩnte Awēnē Odeye badinque māniñedē ate waodāni ĩnānite æmæwo pōni ata cæpocæboimpa. Māninganca botō ata cæpoganca botō ñōwo, Wængongui Awēnē dodāni ĩnānite ata cæpodingne wodo pænta gogacæimpa, ante Patowa ææmæno ñōwo ĩnque cæncæ cæbopa. ¹⁷ Āninque ayæ Itota bequimæ owætaca bæi ongonte æninque Wængongui ingante waa ate apænedinque tōmēnāni ĩnānite angantapa.

—Mīnitō owæta ĩnta æninque godongāmæ beedāni. ¹⁸ Āmo ēñēedāni. Yowepæ ñōwo bedinque botō Wængongui Awēnē ĩnōmo ĩnte Awēnē Odeye botō baganca edæ ñōwo æmæwo bebopa.

¹⁹ Ante apænedinque Itota pāo æninque Wængongui ingante waa ate pōnente apænedinque pā æninque pædæ godōninque apænecantapa.

—Īi pāo botō baō bai impa. Botō, Mīnitō quēwæcæmīnimpā, ante botō baō godonte bai cædinque wæncæboimpa. Botō pā ænte pædæ pōnōmo bai mīnitō ĩncayæ ate botō ĩmote ante pōnēninque adobaī cæte wacā ĩngā wacā ĩngā pædæ godonte cæedāni, angantapa. ²⁰ Mānōmaī angā ĩnque cæñāni ate owæta adobaī ænte apænedinque tōmengā,

—Botō wepæ ĩimæ bai impa. Wængongui do apænedinque, Botō pōnō cæbo ate mīnitō Ao āmīni ĩnque mōnō godongāmæ waa cæte quēwengæimpa, angacæimpa. Ñōwo adobaī botō wepæ mīnitō beyæ pædæ godōmo ate mīnitō Ao ante æmīni ĩnque mōnō godongāmæ waa cæte quēwengæimpa. ²¹ Incæte botō ĩmote nē pōnō odōmonte pædæ godonguingā iñōmō botō ōnōmpo gāānē cænguimpaa adoyōmō ongō aedāni. ²² Wængongui do nānō angainō bai botō nē Waobo ēñagaimo

ĩnte wænte gocæboimpa. Nāwangā impa. Incæte botō ĩmote nē pōnō odōmonte pædæ godonguingā iñōmō edæ tōmengā nānō nangui wæwenguingue edæ mānōmaī cæcā ingampa tōō.

²³ Ante Itota apæneyongā tōmēnāni nāni caboque tededinque edæ, Æcānō ingante ante apænecāā, ante wædānitapa.

Æcānō yæcado ongonguingāā, ante tededānīpa

²⁴ Ayæ adobaī, Mōnō cabo iñōmonte æcānō ñænængā ĩnte edæ yæcado ongonte bai nē angā baquingāā, ante wædinque tōmēnāni wæætedō wæætē āninque nangui tedewēnāni. ²⁵ Adinque Itota tōmēnāni ĩnānite, “Idægoidi ĩnāmaī ĩnāni awēnēidi iñōmō tōmēnāni nempo quēwēnāni ĩnānite, Botō āmo ēñente cæedāni, ante nangui piinte ānewēnānīpa. Incæte nē piinte ānewēnāni iñōnānite tōmēnāni nempo quēwēnāni wæætē, Mōnitō awēnēidi nē Pōnō Cædāni ĩnānīpa, ante babæ ante pemōwēnānīpa. ²⁶ Wæætē mīnitō guiquēnē ĩnguipoga awēnēidi nāni cæi bai cædāmaī ĩedāni. Mīni cabo incæ nē yæcado ongongā ĩnte yæmiñængā bai baquēnengā ingampa. Ayæ nē angā ĩngongā ĩnte wacā beyæ nē cæcā bai baquēnengā ingampa. ²⁷ Æbānō ante pōnēmīnī. Æcānō ingante, Awēnē bai ingampa, ante nangui waa adānī. Nē cænguimpaa gāānē tæ contate cængā ingante waa adānitawo. Wæætē awēnē beyæ ante ænte māmō pōnongā ingante waa adānitawo. Īñæmpa nē contacā ingante nāwangā waa adānīpa. Incæte botō iñōmō ōnōmoque bai cædōmo ĩnte mīnitō weca pōninque nē ænte māmō pōnongā bai ĩnte nē pōnō cædōmo ĩmopa,” ante Itota apænecantapa.

²⁸ Ayæ apænedinque, “Botō caate wæwēñōmote mīnitō iñōmō botō tōnō godongāmæ ĩñacabo cædimīni ĩmīnīpa. ²⁹ Īnque botō Mæmpo botō ĩmote, Awēnē Odeye bacæbiimpa, ante nānō pōnō cægāi bai botō wæætē, Botō tōnō ĩñacabo cædimīni ĩnōmīni ĩnte mīnitō awēnē odeyeidi adobaī bacæmīnīpa, ante pōnō cæcæboimpa. ³⁰ Ayæ, Botō nē Awēnē Odeye bayōmote mīnitō botō awæmpaa gāānē tæ contadinque godongāmæ edæ cænte becæmīnīpa, āmopa. Ayæ idægoidi ōnōmpo tipæmpoga go mencabodāniya iñōnānite mīnitō awēnē tæ contaimpaa tæ contadinque tōmēnāni ĩnānite nē apænte āmīni bacæmīnīpa,” ante tōmengā mīñæ nē godāni ĩnānite Itota apænecacæimpa.

Pegodo incæ, Dicæ abogaa, ante anguingā ingampa, ante

(Māateo 26.31-35; Māadoco 14.27-31; Wāō 13.36-38)

³¹ Itota ayæ,

—Timönö, eñēmi. Timönö, bitö imite ämopa. Waocä tömēmö ænte wancæ wancæ cæcä ontapo wææ bai munitö iminite Tatäna incæ bæi ongonte wënæ wënæ cæcæte ante angampa. ³² Wæætē, Bitö wede pönëningue nangæ badämaï incæbiimpa, ante botö do edæ Wængonguï ingante apænetabopa. Ìninqe bitö iñömö edæ ìncayæ ate botö gämænö ocæ èmænte ponguïmi ìmipa. Pöninque, Bitö tönñadäni wæætē tæi piñænäni bacædänimpa, ante tömënäni inänite godö töö æmænte bai cæe.

³³ Ante apæneca eñëninque Timönö wæætē,

—Awënë eñēmi. Bitö imite tee mönedäni ìninqe botö do bitö tönö go guibaïmopa. Bitö imite wænönäni wæmi ìninqe edæ botö bitö tönö do wæmaïmopa.

³⁴ Ante apæneca eñëninque Itota angantapa.

—Pegodo, bitö imite ämo eñēe. Tawadiya ñöwoönæ ayæ pedämaï iñonte bitö botö imotedö apænedinque, Dicæ abogaa, ante mempoga go adopoque anguïmi ìmipa, ante Itota apænegacäimpa.

Botö caate wæquimämo oo bacæïmpa, angampa

³⁵ Ayæ wæætē tömënäni inänite, —Botö wëenëñedē munitö iminite da godöningue, Godonte æinta da wente ænguincadedē ænämaï inte goedäni, antabopa. Mäincoo da wente ænguï næænämaï inte awæncata næænämaï inte goedäni, ante botö da godömo godinque munitö ænguënëmini inte wæminitawo.

Äñongante, —Ænguënte wædämaï intamönipa, änänitapa.

³⁶ Itota wæætē tömënäni inänite, —Nöwo iñömö æcänö godonte æinta da wente ænguincade mäna tömengä mänincade næænte gocæcäimpa. Ayæ mäincoo da wente ænguï adobai næænte gocæcäimpa. Ayæ yaëmē mänämaï ingä inte weocoo yacoo në mäningä wacä ingante godonte æninque wæætē yaëmē godonte æncæcäimpa. ³⁷ Ìimaï ante dodäni näni yewæmongainö bai botö imote cæcædänimpa. “Në eñënämaï näni cæcabo iñönänite tömengä adocä ìnogä ingampa, ante änänitapa,” ante yewæmongatimpa. Mänömaï impa, ante pönëninque botö ìimaï ämopa. Botö imote æbänö cæquinänii, ante näni yewæmongainö bai botö imote tömänö ìninqe cæquïnö ænguënē. Botö imote ante näni yewæmongainö bai cædinque ñöwo iñömö edæ eyepæ ba aedäni.

³⁸ Ante apæneyongante tömënäni, —Awënë, yaëmē mēa mæ ongö ae. Änänitapa. Tömengä wæætē, —Idæwaa, angacäimpa.

Guetämäni iñömö Itota Wængonguï ingante apænecampa

(Mäateo 26.36-46; Mäadoco 14.32-42)

³⁹ Ìninqe apænedinque Itota wadæ godinque cöwē nänö æidö bai æidinque Odi-bowænquidi go æiyongante tömengä miñæ në godäni tee empo æigadänimpa. ⁴⁰ Äi cöwē nänö æi ongöñömo pöninque tömënäni inänite,

—Munitö ñöwo Wængonguï ingante nämä beyænque apænedinque, Mönitö wii wënæ wënæ cæinëmöni bacæmönimpa, ante apæneedäni.

⁴¹ Äninqe Itota wadæ godinque dica mönö wido cæganca mäninganca godinque da guicapodinque Wængonguï ingante apænecantapa. ⁴² Apænedinque, “Mæmpo eñēmi. Bitö Ao äninque edæ ti nä wænguimæ bai ö ænte bai cædinque botö imote edæ, Wænämaï incæbiimpa, ämi ìninqe botö edæ waa tobaïmopa. Incæte botö änönö bai wii cædinque wæætē tömëmi änönö bai cæe, ämopa.”

⁴³ Ante apæneyongä Wængonguï öönädē nänö da pönöningä anquedo Itota weca ponte a ongöninque, Tæi piñænte entawencæbiimpa, ante cædinque pönö töö æmænte bai cæcantapa. ⁴⁴ Incæte Itota iñömö edæ nangui wæwente badinque Wængonguï ingante ancaa apæneca ìninqe edæ tömengä owæmæ wepæ gowete bai tadinque onguipoiya petæ petæ wææntapa.

⁴⁵ Ayæ ìninqe apænedinque tömengä ængæ gantite godinque tömengä miñæ në pöninäni weca ponte ayongä tömënäni nangui wæwente wædinque mö ñönäni. ⁴⁶ Adinque edæ tömengä tömënäni inänite,

—Ïñæmpa möwo mömïni. Edæ ængæ gantidinque, Wënæ wënæ cæinente badämaï incæmönimpa, ante Wængonguï ingante apæneedäni, angacäimpa.

Itota ingante bæi ongonte ænte godänipa
(Mäateo 26.47-56; Mäadoco 14.43-50; Wäö 18.2-11)

⁴⁷ Ante tæcæ apæneyongä nangui inäni iñontobæ ponte a ongönänitapa. Itota miñæ näni, Dote, ante gocabo ìingä incæ Codaa iñömö täno beyænte pöninque Itota ingante waa cæte bai queë bemoncæte ante pongä. ⁴⁸ Adinque Itota tömengä ingante,

—Codaa iñæmpa, botö Waobo eñagaïmo iñömote bitö, Ìingä ingampa, ante queë bemöninque odömonte pædæ godömi ænguïnänii, angantapa.

⁴⁹ Mänömaï cæcæ cædänipa, ante adinque tömengä miñæ në godäni guiquënē,

—Awënë, yaëmenca godö tao cæquimöni ämii, änänitapa.

⁵⁰ Wængonguï qui, ante në godongä ñænængä pönï ìnogä ingante në cæcä iñömö mäniñömö ponte a ongongä

adinque Itota miñæ nē pōningā ado-
canque wæætē yaēmē æningā māningā
ōnōmonca tōmēmonca inō wangō tamonca
wæcantapa. ⁵¹ Adinque Itota wæætē,

—Idæwaa, āninque gampo cæmoncā waa
bamoncagacāimpa. ⁵² Ayæ, Wængongui
qui, ante nē godōnāni ñænænāni incæ
Wængongui oncō ñænæncō ante nē wææ
wānōnāni incæ nē aadāni nāni Picæncabo
incæ tōmengā ingante æncæte ante nē
pōnināni iñōnānite Itota tōmēnāni inānite,
Botō miñæ nē godāni tōnō botō dicæ
awēnē ingante wido cæcæte ante cæbogaa.
Incæte mīnitō, Nē wido cæcā ingampa, ante
baī cæmīni awædō. Edæ canta teēmenca
mīni badōinca tōnō yaēmē næænte botō
weca pōmīni. ⁵³ Ìñæmpa botō æpogadō
Wængongui oncō ñænæncōnē iimō iñō iimō
iñō yabæcōnē go guidingque mīnitō weca a
ongōñōmote mīnitō wæætē bæi ongoncæte
ante pædæ gopodāmai imīnitapa. Edæ
ñōwo wēmō mæ māmonte baī iñonte edæ
mīni nē wænæ wænæ cæyedē impa, ante
apænecacāimpa tōō.

Pegodo incæ, Dicæ abogaa, angampa

(Māateo 26.57-58, 69-75; Māadoco 14.53-
54, 66-72; Wāō 18.12-18, 25-27)

⁵⁴ Ìnīnque Itota ingante bæi ongonte ænte
māo, Wængongui qui, ante nē godongā
ñænængā pōni inongā weca ænte godānitapa.
Gobæ godāni Ìnīnque Pegodo iñōmō ayæ ayæ
gocantapa. ⁵⁵ Nænæ oncō yacōmoyæ iñōmō
wææ wānōnāni gonga tānonte godāmæ pō
tæ contadāni adinque Pegodo tōmēnāni
weca pō tæ contacā. ⁵⁶ Adinque nē cæcā
onquiyængā tōmengā gongapamō ongongā
adinque tōmengā ingante cōwā adinque,

—Ìngā adobaī māningā miñæ tee empo
gocā ingantapa.

⁵⁷ Ìñongante Pegodo,

—Onquiyæmi ēñēmi. Botō māningā ing-
gante dicæ abogaa, angantapa.

⁵⁸ Ayæ wantæ ate wacā pōninque Pegodo
ingante waa adinque,

—Bitō adobaī tōmengā miñæ nē gobi
imitapa tōō.

Ante apænecā ēñēninque,

—Onguīñæmi ēñēmi. Botō dicæ tōmengā
miñæ gobogaa. Edæ wabo imopa.

⁵⁹ Ayæ wacā adobaī wantæ wantæ
adoque ooda go ate āninque,

Ìngā iñōmō Itota miñæ nē godingā
ingampa. Nāwangā impa. Gadideabæ
quēwēningā inte edæ pongā aedāni.

⁶⁰ Angā ēñēninque Pegodo,

—Onguīñæmi, quiēmē baī apænēbipa,
ante botō ēñēnāmai imopa.

Ante tæcæ mēnea āñongante tawadiya
iñontobæ aa aa pecantapa. ⁶¹ Itota incæ
tōmengā gāmænō dadi emænte pōmō acā
adinque Pegodo iñontobæ, Æ, āninque,

“Tawadiya ñōwoonæ pedāmai iñonte bitō
botō imotedō ante wadō ate apænēdinque,
Dicæ abogaa, ante tēdēdinque mempoque
go adopoque anguimi imipa,” ante Itota
wēēñēnedē apænecā ēñentabopa. ⁶² Nōwo
nānō pequinque do pecampa, ante pōnente
wædingque Pegodo oncodo tao godinque Ca
ca wægacāimpa.

Itota ingante badete todirque cædānīpa
(Māateo 26.67-68; Māadoco 14.65)

⁶³ Itota ingante nē wææ wānōnāni iñōmō
tōmengā ingante māñēnedē badete todirque
edæ tæi tæi pānānitapa. ⁶⁴ Ayæ tōmengā
awinca wīni cæmōninque tōmēnāni,

—Æcānō bitō imite tæi tæi pānaa, ante
Wængongui apænecā ēñente ate apænēbi
ēñēmōnie.

⁶⁵ Ante badete todirque quiēmē baī ante
godō babæ ānewēnānitapa.

Nē apænte ānāni weca Itota ongoncampa
(Māateo 26.59-66; Māadoco 14.55-64; Wāō

18.19-24)

⁶⁶ Nāō bayedē, Wængongui qui, ante nē
godōnāni ñænænāni tōnō nē odōmōnāni
iñōmō idægoidi inānite nē aadāni nāni
Picæncabo inōnāni inte edæ godongāmæ
go bee tēninque tōmēnāni nāni apænte
anguimpaa gāānē ongōñōnāni Itota ingante
tōmēnāni weca tōō æmænte ænte māo
gōnōnāni gongængantapa.

⁶⁷ Tōmengā ingante nē apænte ānāni
iñōmō,

—Apænēbi ēñēmōnie, āninque, Bitō
mōnitō Codito inōmi imitawoo.

Āñōnānite Itota wæætē,

—Botō apænēbo Ìnīnque mīnitō wæætē
ēñēnāmai imāimīnīpa. ⁶⁸ Ayæ wæætē
botō ēñencæte ante āmo Ìnīnque mīnitō
wæætē botō imote apænēdāmai imāimīnīpa.

⁶⁹ Incæte āmo ēñēdāni. Botō iñōmō nē
Wabo ēñagāimo inte Ìncayæ ate Wængongui
nē tæi Piñængā tōmēmæ inō tæ contate
ongoncæboimpa.

⁷⁰ Ante apænecā ēñēninque tōmānāni,

—Ìñæmpa, bitō Wængongui Wēmi imitawoo.

Āñōnānite,

—Botō mānimodō imopa. Tōmēmīni edæ
mānōmai āninque edæ nō apænēmīnīpa.

⁷¹ Ante apænecā ēñēninque,

—Idæwaa. Tōmengā nāmā incæ edæ,
Wængongui Wēmo imopa, ante wænæ wænæ
apænecā do ēñentamopa. Ìnīnque mōnō
ñōwo edæ, Wādāni, Itota wænæ wænæ
cæcampa, ante apænecædānīmpa, ante
quinante godōmenque diqui diqui mingui,
ante wægadānīmpa.

23

Pidato weca gote Itota ongongampa

(*Mäateo 27.1-2, 11-14; Mäadoco 15.1-5; Wäo 18.28-38*)

¹ İninque mäniñömö ongönäni tömänäni godongämæ ængæ gantidinque Itota ingante awënë Pidato weca ænte gogadänimpa. ² Godinque tömänäni, Itota iimaï nê wënæ wënæ cæcä ingampa, ante püinique,

—Mönitö cöwä ayömöni iingä iñömö wapiticæ odömönte apæneçä eñëninque mönitö ömæ quëwëñäni oda cæte eñëñämaï cædäni wæmönipa. Edæ odömäno awënë Tetædo nänö äñinta godönämaï iedäni, ante tömengä wææ angampa. Ayæ tömengä, Botö iñömö Awënë Odeye Coditobo inömo imopa, ante nämä ante angampa töö.

³ Ante godö püinäni eñëninque Pidato iñömö Itota ingante,

—Bitö oodeoidi Awënë Odeyebi imitawoo.

Äñongante Itota wæætë,

—Bitö tömëmi äno bai botö mäniimodö imopa, angantapa. ⁴ İninque nê godönäni ñænænäni tönö wadäni godongämæ ongöñönäñite Pidato wæætë,

—Botö ayömöte iingä dicæ eñëñämaï cæte wentamö mongængä abogaa, angantapa.

⁵ Ante Pidato apæneçä incæte tömänäni godömenque äñinque,

—İñæmpa tömengä Gadideabæ täno odömöñinque ñöwo iñömö ganca pöñinque Oodeabæ tömäo godinque odömönte apæneçä eñëninque waodäni edæ püinte badäni apa cæbbi, äñanitapa.

Edode weca Itota gote ongongampa

⁶ Mänömainö äñäni eñente wædinque Pidato wæætë, iingä iñömö näwangä Gadideabæ quëwëningä inte pongantawoo.

⁷ Äñongante, Mäningänö ingampa, ante apænedäni eñëninque tömengä, Gadideabæ nê quëwëningä inte tömengä awënë Edode nänö nê enempodongä ingampa, ante tæcæ eñengantapa. Ayæ, Edode ñöwo Eedotadëe ponte quëwengampa, ante do eñëningä inte Itota ingante Edode weca Pidato da godongä gocantapa. ⁸ Doyedë iñömö wadäni, Itota æbänö cæcää, ante tededäni eñëninque Edode, Itota botö weca pöñinque wabänö bamönengæ pöni cæcä abaimopa, ante pönëninque tömengä ingante wantæpiyæ äinengä inongäimpa. İninque Itota ingante ñöwo adinque Edode nanguï togacäimpa. ⁹ İninque, Apænebi eñëmoe, ämi eñëmoe, ante Edode wæætë wæætë äñongante Itota iñömö edæ pæ wëënete apænedämaï ingacäimpa.

¹⁰ Edode weca adoyömö ongöñinque nê godönäni ñænænäni tönö nê odömönäni guiquënë ænguï badinque, Itota wënæ

wënæ cæcä ingampa töö, ante nanguï püinte angadänimpa. ¹¹ Ayæ Edode tönö tömengä tontadoidi tönö Itota ingante püinique, Waa cæte bai cæcantedö abi, ante badete todänitapa. Önonque badete tocæte ante tömänäni waëmö pöni weocoo daga wëñadinque tömengä ingante adodö Pidato weca da godönäni gogacäimpa. ¹² İninque do nänä guëadö guëa plincaya inäna inte edæ Edode tönö Pidato mäniönæ edæ guëa piyænë cæte nänä æmigocaya bagadäimpa.

Itota wæncæcäimpa, äñäñipa

(*Mäateo 27.15-26; Mäadoco 15.6-15; Wäo 18.39-19.16*)

¹³ Pidato iñömö nê godönäni ñænænäni tönö awënëidi tönö öñönäñinque inäñite äñecä pönäni ate tömengä, ¹⁴ tömänäni inäñite äñinque,

—İingä ingante botö weca ænte pöñinque munitö, Tömengä wapiticæ odömönte apæneçä eñëninque wadäni oda cædinque eñëñämaï cædäñipa, ante püimünipa. Incæte munitö edonque ayömöñite botö, Itota æbänö cæcää, ante eñencæte ante cöwä ayömo edæ tömengä wënæ wënæ nänö cædö ante muni änewënö ante edæ dæ ä abopa.

¹⁵ Ayæ Edode adobai tömengä ingante apænte äñinque wënæ wënæ nänö cædinö ante adämaï inte wædinque adodö botö weca da pönongä ponte a ongongä aedäni. Edæ, Tömengä nänö wænginque, ante nänö cædinö edæ dæ ä apa änewëmünii.

¹⁶ İninque botö önonque tæi tæi päninque ñimpo cæbo gocæcäimpa, ante Pidato angantapa. ¹⁷ Wadepo iñö wadepo iñö tömänäni ææmæ nani cæyedë, Nê tee mönete ongongä adocanque gocæcäimpa, ante cöwë godö ñimpo cæquëngä inongä inte awënë Pidato ñöwo mänömainö ante cæcantapa. ¹⁸ Mänömainö ingä eñëninque tömänäni adoyömö ogæ tededinque,

—Itota ingante widö cædinque Badabato ingante wæætë pönö ñimpo cæbi æmönie, äñanitapa.

¹⁹ Badabato guiquënë tömänäni nani quëwëñömö awënë ingante wido cæcæte ante cædinque godömenque waocä ingante wænönningä inte edæ ñöwo tee mönete ongöñongäimpa. ²⁰ Pidato iñömö, Itota ingante æbänö cæte ñimpo cæbo goquingä, ante wædinque tömänäni inäñite wæætë aa aa peyongante, ²¹ Oodeoidi wæætë,

—Awæ ñænquedimæ ämi cæte gönönte wænönäni wængæe töö, ante wæætë wæætë adodö äñinque Yæ äñanitapa.

²² Quimæ änewëmünii, ante do mempoga äningä inte Pidato ñöwo mempoga go adopoque äñongä inte,

—Quinö wënæ wënæ cæcantawogaa, angantapa. İñæmpa, Quinö wënæ wënæ cæcantawo, ante cöwä ayömo edæ dæ ampa.

Īnque botō āmo ate edæ tōmengā ingante tæi tæi pānque űimpo cædāni gocæcāimpa, āmopa, angantapa.

²³ Incæte awēnēidi tōnō wadāni godōmenque Yæ ānque, Awæ űænquedimæ āni cæte gōnonte wæñōnāni wæncæcāimpa, ante, Cōwē wæñongæimpa, ante ancaā aa pedānitapa. Īnque tōmēnāni nāni Yæ yæ ānō beyænque Pidato űimpo cæcantapa. ²⁴ Īnque ancaā wææ ānāni ēñente wædinque tōmengā, Tōmēnāni nāni ānō bai godō cæcæboimpa, ante nāmāneque pōngantapa. ²⁵ Māniñedē Badabato nē, Awēñē ingante wido cæcæimpa, ante cædinque nē wæñōningā inte ayæ tee mōnete ongōngæimpa. Pidato űōwo, Īngā guiquēnē oodeoidi nāni nē āningā ingampa, ante godō űimpo cæcantapa. Itota ingante wæætē, Oodeoidi nāni ānō bai cæcæimpa, ante cædinque Itota ingante wæætē tontadoidi nempō pædæ godongā ænte godānitapa.

Itota ingante awāa timpodāni wængampa (Māteo 27.32-44; Mādoco 15.21-32; Wāō 19.17-27)

²⁶ Itota ingante ænte goyōnāni Tidēnebæ nē quēwengā Timōnō wayōmō gote pōninque eyepæ pōni māmō bee tengantapa. Tōmengā ingante adinque bæi ongōninque tōmēnāni, űænquedimæ mōni cædiwæ Itota miñæ ænte goe, ānque űō cædancapæñāni næænte gocantapa.

²⁷ Goyongante Itota miñæ nanguī ĩnāni godānitapa. Onquiyæñāni incæ Yæ yæ ante wo ca wo ca wædinque tee empote godānitapa. ²⁸ Īnque Itota dadi ēmænte adinque tōmēnāni ĩnānite,

—Onquiyæmīni, Eedotadēē quēwēmīni inte mīnitō botō beyæ ante wædāmai ĩedāni. Wæætē tōmēmīni nāmā beyænque ante wæedāni. Ayæ mīnitō wēñæñāni beyæ ante pōnente wæedāni, āmopa. ²⁹ Īncayæ ate mīnitō caate wædinque ĩmai ante wæquimīni ĩmīnīpa. “Wēñæ nē mānāmai ĩngā ĩñōmō edæ tōmengā nānō waa toquinque. Goōmæ nē gāñōnāmai ĩngā ĩñōmō edæ tōmengā nānō toquinque impa,” ante wæquimīni ĩmīnīpa. ³⁰ Māniñedē edæ, “Waadāni ĩmai ante wæcædānīpa. Onquiyabo onguipo æmæwo cabæñō goyæ guimōnie. Ānanquidi wææ mōnitonga capo űongæñō wē womonte bamōnie, ante wæcædānīpa,” ante dodāni nāni yewæmōngainō bai edæ bacæimpa. ³¹ Edæ awæ mīiwæ ĩfōnte gonga wædænque wo cædāni bai űōwo ĩñōmō waodāni wīi nanguī wēnæ wēnæ cædānīpa. Wæætē awæ amīmō bayonte tī wodōnyōñāni dobæ wo bæco bai waodāni ĩncayæ ate quingāmē bai cæquīnāni ĩnānīpa, ante Itota mānīnō godinque apænegacāimpa.

³² Ayæ, Māo wæñongæimpa, ante nē ænte godāni ĩñōmō mēnaa nē wēnæ wēnæ cædāni ĩnate tōmengā tōnō godongāmæ ænte godadānīpa. ³³ Ocatañō, nāni āñōmō ænte pōninque awæ űænquedimæ nāni badōñiwāa Itota ingante tōō godote timpodinque wææ tiwadinque ængæ gantidēñānitapa. Ængæ gantidēñāni ate wægōñongā tōmēnāni nē wēnæ wēnæ cædāni ĩnate adobai Itota tōmēmæ ĩnō adocanque tōmengā dipæmæ ĩnō adocanque timpote gōñōnāni gongæñatapa. ³⁴ Māñōmai cædāni adinque Itota,

—Mæmpo ēñēmi. Tōmēnāni ēñēnāmai ĩnāni inte ĩmai cædānīpa cæbii. Wēnæ wēnæ nāni cæñō ante bitō wæætē edæ űimpo cæbi quēwencædānīpa āmopa, angacāimpa.

Māniñedē tōmengā weocoo ĩni ante, Æcānō quinca nō ta adinque tōmengā badincoo æncæcāimpa, ante tōmēnāni wæntodōninque adocooque adocooque æñānitapa. ³⁵ Wadāni, Æbānō cæquingā, ante acæte ante godongāmæ a ongōñānitapa. Awēnēidi incæ tōmengā ingante ante badete todinque,

—Tōmengā, Quēwencædānīpa, ante wadāni ĩnānite ængā quēwēñānitawo. Ayæ Wængonguī ĩñōmō, Codito ingampa, ānque tōmengā ingante ængantawo. Īnque tōmengā Wængonguī nānō nē ængaingā ĩnongā inte edæ nāmā aamō cæte quēwencæcāimpa, ante badete togadānīpa.

³⁶ Tontadoidi guiquēnē obo pōninque tōmengā ingante badete tote bai cædinque edæ, Yowepæ tī nāmæ becæcāimpa, ante pædæ æññōninque, ³⁷ tōmengā ingante,

—Oodeoidi Awēñē Odeyebi ĩmi ĩnque bitō nāmā aamō cædinque quēwēmāwe, ante towengadānīpa.

³⁸ Ayæ, “Īngā oodeoidi Awēñē Odeye ĩnongā ingampa,” ante yewæmōninque tōmēnāni tōmengā dæca ĩnō wo cædāni owotapa.

³⁹ Nē wēnæ wēnæ cædāni guiquēnē tōmengā tōnō ongōñōna adocanque tōmengā ingante godō wēnæ wēnæ ante badete tocantapa.

—Bitō ĩñæmpa, Codito ĩñōmo ĩmopa, āmitawo. Mānīmi ĩñōmi ĩnque bitō tōmēmi aamō cæte gote quēwēñinque mōnatō ĩmōnate adobai űimpo cæbi aamō cæte gomōnae.

⁴⁰ Āñongante wacā wææ ānque,

—Īñæmpa tōmēmi adobai bitō wænguinque ongōmi inte Wængonguī ingante guññēnāmai inte āmi awædō. ⁴¹ Mōnatō wēnæ wēnæ cæmōna ĩñōmōnate nē apænte ānāni edæ nōingā cæte pānāni wæmōnāpa. Mōnatō wēnæ wēnæ cædinō beyæ eyepæ tente wæmōnāpa. Tōmengā guiquēnē wēnæ wēnæ cædāmai ĩnongā inte wængā apa ānewēē.

⁴² Äninqe adocä wæætē Itota ingante apænedinqe,

Awënë ēñēmi. Bitō Awënë Odeye bad-
inque botō imote pōnente cæbi ämopa.

⁴³ Äñongante Itota,

—Nāwängä ämopa. Bitō ñōwoönæ incæ
wænte godinque do wænte gogainäni nāni
watapæ quëwēñōmō botō tōnō guëa on-
gongcæbiimpa, angacäimpa.

Itota wængampa

(*Mäateo 27.45-56; Mäadoco 15.33-41; Wäö 19.28-30*)

⁴⁴ Mäniñedē edæ tæcæbæcä iñedē mæ
mämonte bai tæcæ badinque ayaönäa
wæiganca tōmämæ iñōmō edæ wēmō in-
gatimpa. ⁴⁵ Edæ nænque nāwänämäi iñinque
wēmō ingatimpa. Ayæ Wængongui tæiyæ
wæmoncōnē odemō nāni wææ wodōincoo
adoyedē edæ önönæca inō tæcæguedē pōni
tænguimæ wææntapa. ⁴⁶ Mäniñedē Itota ogæ
tededinque,

—Mæmpo ēñēmi. Ñōwo edæ botō önōwoca
bitō önönempo pædæ pōnōmo æe.

Äninqe edæ æmæwo guëmāninqe
wængacäimpa.

⁴⁷ Mänōmai cæte wængä adinque odömāno
tontado capitäo incæ,

—Nāwängä impa. İngä iñōmō edæ nō pōni
cæcä inongä inte edæ wængä abopa, äninqe,
Wængongui ñäo apäite bai emōnongä inte
mänōmai cæcä abopa, ante apænegacäimpa.

⁴⁸ Ayæ, Äbänō cæquii, ante godongämæ
ponte a ongönāni iñōmō tōmänāni,
Itota mänōmai wængä awædō, ante
wædinque edæ nāmä önontawē tæi tæi
tompotawēninqe wadæ gogadānimpä.

⁴⁹ Wæætē Itota ingante nē do adināninqe
iñōmō gobæ ongote pōmō agönānitapa.
Wēñēñedē tōmengä Gadideabæ quëwente
pōñongante onquiyæñāni tōmengä miñæ nē
pōñināni inte tōmēñāni ñōwo adobai gobæ
ongote pōmō agönānitapa.

Itota wodi baö ini mão daga wēñānipa

(*Mäateo 27.57-61; Mäadoco 15.42-47; Wäö 19.38-42*)

⁵⁰ Oodeoidi nāni Apænte Äincabo
iñōñānite adocanque tōmengä emōwo
Ootee inongäimpa. Tōmengä cōwē waa
cædinque nē nō cædongä inongäimpa. ⁵¹ Do
iñōmō, Itota ingante wæñongæimpa, ante
oodeoidi nāni Apænte Äincabo godongämæ
pōnente cæyönānite adocä Ootee iñōmō
edæ Baa ante tōmēñāni tōnō godongämæ
cædāmai inongäimpa. Tōmengä, Wængongui
Awënë Odeye nempo monō æyedēnō
quëwængæimpa, ante wänō conte bai
quëwēñongä inongäimpa. Tōmengä Oodeabæ
Adimatea iñōmō nē quëwēñongä inte ñōwo
pōningä ingantapa. ⁵² Mäningä Ootee iñōmō
awënë Pidato weca do gote apænedinqe,

Itota wodi baö ini pōnōmi ænte daga wēmoe.
⁵³ Angä ēñēninqe awënë Ao angä ēñente
gocantapa. Godinque tōmengä Itota wodi
baö ini wi æmpote wææ wi æwadinque
pædæ wææñonte ænte godinque waēmō
weocoo ñino nāni änoncoo wini wini caate
dicamontaa wointatodē önontatoque iñōmō
daga wengantapa. Do nāni wēñāmai inta-
tocæ iñonte daga wengantapa. ⁵⁴ Oodeoidi
nāni, Gäwadecæ ba ate guëmanguiönæ
inguimpa, ante täno nāni cæönæ i ininque
Ootee mänōmai täno cægacäimpa.

⁵⁵ Do iñōmō Gadideabæ quëwente
Itota tōnō godongämæ nē pōñināni inte
onquiyæñāni ñōwo Ootee miñæ tee empote
pōñinque Itota wodido adinque, Tōmengä
baö æbänō ñō cædāni, ante do adānitapa.
⁵⁶ Adinque tōmēñāni oncōñē godinque
ogui wapæ ogui wayabo tōnō ænte ponte
ōni pæcæte ante cædānitapa. Incæte,
Guëmanguiönæ impa, ante wædinque
waönæ ate nāni goquinque tōmēñāni
Wængongui nānō wææ angainō bai cædinque
täno guëmangadānimpä.

24

*Itota do wæningä inte ñāni ömæmonte
quëwængampa*

(*Mäateo 28.1-10; Mäadoco 16.1-8; Wäö 20.1-10*)

¹ Ayæ guëmanguiönæ iñque go ate baänæ
ate ooque pōnente bayonte mänināni on-
quiyæñāni ogui waqui nāni cædincoo ñōwo
ænte nææñinque Itota wodido pōñānitapa.

² Ponte ayönāni dicabo ñæñængade pōni do
da tæñæi a öñō adānitapa. ³ Ayæ ontatodē
guiite ayönāni edæ monō Awënë Itota
wodi baö edæ dæ antapa. ⁴ Önontatoque i
awædō, ante adinque guñente wæyönāni
edēñina bai ina iñōmō weocoo näämænta
pōni näinte bai emoncoo mongæna inte
edæ iñontobæ tōmēna weca a ongōna.

⁵ Ate wædinque onquiyæñāni iñōmō ancai
guñente wædinque ædæ wæænte onguipoga
bigui tēmōñānitapa. Edēñina bai ina iñōmō
onquiyæñāni inānite,

—İñæmpa minitō do wæñināni weca
ponte nē quëwängä ingante ante quñante
diqui diqui miminii. ⁶ Tōmengä iñōmō
edæ dobæ ñāni ömæmonte godingä inte
edæ iñtatodē iñōmō dæ angä aedāni.
Tōmengä wēñēñedē Gadideabæ minitō
weca nānō ayæ quëwēñedē minitō iminute
iñmai ante apæñecä ēñēmīni inte ñōwo
adodō ante pōñēdāni. ⁷ Tōmengä iñōmō,
Botō Waobo ēñagaimo iñōmote nē wēñæ
wēñæ cædāni nempo odōmonte mão
pædæ godōñāni æñinque tōmēñāni wæætē
wæñōñāni wænguēñemo imopa, ante
apæñecä ēñēmīnitapa. Ayæ mēōnaa go
adoönæque iñonte botō ñāni ömæmonte

quëwenguënëmo ïmopa, ante apænecä ëñëmini inte pönenguënë quëwëedäni.

⁸ Ante edëniina bai ïna äna ëñente wædinqe onquiyænäni ïñömö, Itota æbänö angacäi, ante tæcæ pönente wædänitapa.

⁹ ïninqe ontatodë tao wadæ godinqe onquiyænäni ïñömö Itota tömengä miñæ në godinäni önonpo tipæmpoga go adocanque inäni inänite mao apænedinqe wadäni tömänäni inänite apænedäni ëñënanitapa.

¹⁰ Mänömainö ante Itota nänö në da godongainäni inänite në gote apænedäni ïñömö Mäadiya Mäagadädënä nani änongå tönö Wäönä, Tantiago wäänä Mäadiya ayæ wadäni onquiyænänique tönö godinqe tömënanäni inänite apænedäni ëñënonänimpa.

¹¹ Incæte, Mänömai ïmpa, ante mao apænedäni ëñëninque, Onquiyænäni ïñömö önonquedö ante tededäni awædö, ante Itota nänö në da godöninäni ïñömö edæ pönënamäi ingadänimpa. ¹² Pegodo guiquënë quingæ ængæ gantidinqe pogodo godinqe Itota wodido pongantapa. Ponte ædæ wææninque guimö ayongä wini wini cædincooque öñö adinqe tömengä nämæneque pönëninque, Æbämë cætimpä, ante wædinqe wadæ gogacäimpa.

*Ëmaodö taadö godänipa
(Mäadoco 16.12-13)*

¹³ Edotadëë ongöninque wædænque inäni nani quëwëñömö Ëmao goinö ïñömö onte quidömetodo ganca mäninganca taadö ïmpa. Mänöñæ adöönæque ïñonte Ëmao ïñömö gocæte ante waoda mënaa idömæ godatapa.

¹⁴ Æbänö cætimpä, ante tömänö ante tede-godatapa. ¹⁵ Tedegoyöna Itota incæ mämö bee téninque godongämæ gocä. ¹⁶ Incæte, Tömengä æcänö ingää, ante wë wodonte bai i beyæ tömëna adämai ëmöna inte ëñënamäi ïnatapa. ¹⁷ Itota ïñömö,

—Æbänö ante wæætëdö wæætë tede gomünatawoo.

Angä ëñente wædinqe tömëna wæwente bai ëmöna inte edæ næ gongænatapa. ¹⁸ Adocanque tömengä ëmöwo Codeopato ïñömö tömengä ingante apænedinqe,

—Edotadëë quëwënanäni tömänäni, Æbänö ñowo mäniñömö cætimpä, ante ëñëñönäni bitö adobique adoyömo quëwëninque edæ ëñënamäi ïmitawoo.

¹⁹ Äñongante Itota,

—Ædö ämina.

Äñongä tömëna wæætë,

—Itota Näatadeta quëwëningä ingante ante tedemönapa. Wængongui beyæ në apænecä ïnongä inte mäningä onguiñængä ïñömö Wængongui ayongä ayæ waodäni ayönäni adobäi tæi piñænongä inte waa pöni apænedinqe nangui cæcä ïnongäimpa. ²⁰ Mänömai ïñongante në godönäni ñænænäni tönö mönö ömæ awënëidi

guiquënë wadäni nempo pædæ godöninque, Itota ingante apænte äninque mao wæñömöni wængädäni, änanäni ëñëninque ïñäni wæætë tömengä ingante ñænquedimæ cæte timpote wææ tiwadinqe edæ göñönäni wængantapa. ²¹ Mönatö guiquënë, Tömengä mönö idægocabo Awënë badinqe pönö ængä beyænque mönö abæ tawænte quëwenguimö ïmopa, ante pönënimöna inte edæ ñowo wæmönapa. Ayæ, Tömënanäni mänömai nani cædiönæ edæ ñowo mëönaa go adöönæque ïmpa, ante edæ mönatö godömenque wæmöna ae. ²² Mänömai i incæte möni cabo incæ onquiyænäni pancadäniya tömengä wodido gote pöninque, ïmai atamönipa, ante apænedäni ëñente wædinqe mönatö wæætë ancai guiñente wæmönapa. ²³ Tömënanäni ïñömö tömengä baö ïni adämai inäni inte edæ wadæ pöninque ïmai ante apænedäni wætamönapa. Mönitö wüimonte bai Wængongui anquedoda ïnate mä pöni atamönipa, änanitapa. Ayömönite anquedoda ïñömö, Itota ñäni ömæmonte edæ müngä quëwengampa, ante apæneda ëñëninque edæ wadæ pömönipa, ante onquiyænäni apænedäni ëñentamönapa.

²⁴ Mänömainö ante apænedäni ëñëninque möni cabo incæ pancadäniya Itota wodido gote adinqe, Onquiyænäni nani äninö bai edæ näwangä ïmpa, ante adäni incæte Itota ingante adämai inäni wæmönapa.

²⁵ Ante apæneda ëñëninque Itota wæætë tömëna ïnate,

—Mínatö pönëegade i apa änewëminäa. Mímö ömädëminä ïmüna inte mínatö Wængongui beyæ në apænëgainäni nani apænedö ante tömänö ante edæ ëñënamäi ïmüna awædö. ²⁶ Codito ïñömö edæ cöwë caate wæquëngä ingacäimpa. Ayæ wænte ñäni ömæmöninque tömengä nämä nänö ñäö ïñömö æiquëngä ingacäimpa, ante pönëminäa.

²⁷ Ayæ, Codito æbänö cæquingää, ante Möitee wodi æbänö apænete yewæmongacäi, ante täno apænedinqe Itota mümönoque pönëninque, Wængongui beyæ në apænedäni tömänäni æbänö apænëgadäni, ante, Codito æbänö cæquëngä ingacäi, ante edonque odömonte apænecä ëñënatapa.

²⁸ Mänü tömëna nana quëwëñömö tömëna nana gocæ cæyömo pöñönäni Itota wodo tebæ gocæ cæte bai cæcä. ²⁹ Adinqe tömëna nangui äninque tömengä ingante edæ,

—Ñowo gäwadecæ pöni inte wëmö ba apa. Mönatö oncönë go guite cænte monte baänæ ate goe.

Ante ancaa äñöna tömëna oncönë pö ëñacæ guicantapa. ³⁰ Ayæ tömëna tönö cæncæte ante tæ contadinqe tömengä päö pä æninque Wængongui ingante waa ate

pönente apænedinque tõmëna inate tæcæ pædæ godoncæ cæyongä. ³¹ Tõmëna awinca wi ænete bai bayö, Tõmengä ingampa, ante edæ tæcæ adatapa. Tõmengä iñömö edæ adoyedë tõmëna ayöna edæ dæ goca. ³² Adinque tõmëna guëa tededinque,

—Nåwangä intawo. Wængongui mõnõ Codito ingantedö ante apænecä ëñëninque æbänö yewæmongadänimpa, ante tõmengä ponte odõmongä ëñëninque mõnõ mimö edæ gonga bæco bai totamompa. Wüi edæ mänõmaï intawo.

³³ Ante tededinque tõmëna adodö taadö quingæ godinque Eedotadëë ponte ayõnate edæ Itota miñæ nê godinani iñömö onte ganca mánimpodäni iñõnani tõmënani tönö wadäni godongämæ pö bee tente a ongõnani adatapa. ³⁴ Iñäni guiquëñë,

—Mõnõ Awënë iñömö ñäni õmæmonte müngä quëwengampa. Nåwangä edæ impa. Tõmengä ingante Timõnõ Pegodo do acantapa, ante godongämæ tededäni adatapa.

³⁵ Mänõmainö ante tededäni ëñëninque tõmëna wæætë, Mõnatö taadö goyõmõnate wacä pö bee téninque iïmaï cæcantapa, äninque, Æbänö cæcantapa, ante adodö adodö ante apænedatapa. Ayæ godõmenque apænedinque, Oncõnë go guiyõmõni tõmengä päö pä ængä adinque mõnatö, Itota ingampa, ante do ëñentamõnapa, ante tõmänö ante apæneda ëñengadänimpa.

Tõmengä miñæ nê godinani weca Itota pongampa

(Måateo 28.16-20; Måadoco 16.14-18; Wäö 20.19-23)

³⁶ Mäninö ante ayæ tæcæ tedeyõnani Itota incæ edæ tõmënani weca tæcæguedëñäni do pö guuite a ongõninque,

—Guiñënamäi gänë pönëedäni.

³⁷ Angä ëñëninque tõmënani, Önõwoca badï iïmaï, ante ancaï guiñente wædinque, Yæ äñäni. ³⁸ Adinque Itota,

—Quinante guiñëwëminii. Mimõno quinante æmæ æmæ pönente wæminii. ³⁹ Bado botö õnompõ empobo edæ aedäni. Botö õnõwa ëwabo aedäni. Botö baö edæ gampo caate aedäni. Iñæmpa õnõwoca badï imo bai ædö cæte baö tõnõ bamë ëaquëñëmöö. Baö tõnõ bamë ëadõmo inte botö imo apa guiñëwëminii.

⁴⁰ Äninque Itota õnompõ tõnõ õnõwa tõmënani inänite odõmongä. ⁴¹ Adäni incæte tõmënani guiñente todinque wede pönënamäi iñõnänite tõmengä,

—Minitö weca cængui æbänö mämïni.

⁴² Äñongante gæyæ baö do awëñi ëadäni inte pædæ godõnani ⁴³ æninque tõmënani ayõnani edæ ade cængantapa. ⁴⁴ Ayæ tõmënani inänite apænedinque Itota,

—Botö imotedö ante Mõitee wodi wææ äninque æbänö yewæmongacäi, ante

botö munitö weca ayæ quëwëninque do apænetabopa. Botö imotedö ante Wængongui beyæ nê apæneganäni æbänö yewæmongadäni, ayæ ämotamini äninque æbänö yewæmongadäni, ante apænetabopa. Mänine botö anguedö ante tõmänö edæ iñinque baquinö angüëñë.

⁴⁵ Ante apænedinque Itota, Ocäi encate ëñencädänimpa, ante pönö cædinque tõmënani inänite Wængongui angä ëñëninque ñäni yewæmongainö ante odõmonte apænecä ëñëninque tõmënani edonque edæ ëñëñänitapa. ⁴⁶ Ayæ godõmenque apænedinque,

—Mõnõ Codito cõwë nantate wæninque mëõnaa go adoõnæque iñõnte ñäni õmæmonguëngä incæcäimpa, ante edæ edonque yewæmongatimpa. ⁴⁷ Ayæ, Codito ëmõwo ante Eedotadëë iñömö täno apænete ate tõmämæ quëwëñäni inänite iïmaï ante apænecäimpa. Tõmënani inänite apænedinque, Wëñæ wëñæ mini cædinö ante ñimpo cædinque Wængongui gämæñö pödäni. Põmïni adinque tõmengä wæætë pänämaï inte pönö ñimpo cæcæcäimpa, ante apænëquinäni incädänimpa, ante yewæmongatimpa. ⁴⁸ Minitö iñömö, Æbänö cætimpa, ante nê adimni inte edæ nê apænëquimni iminipa. ⁴⁹ Ayæ edæ Wængongui, Botö Tæiyæ Wæmõ Önõwoca ingante da pönõmo æncæminimpa, angacäimpa.

Iñinque botö Mæmpo nänö nê angaingä ingante botö oo da pönõmo æncæminimpa. Mänõmaï i iñinque Wængongui nänö tæï piñænö æncæte ante munitö, Wængongui Önõwoca ingante ëwocacäimpa, ante Eedotadëë iñömö wänö cõedäni, angacäimpa.

Öönædë Itota æicampa

(Måateo 16.19-20)

⁵⁰ Itota ayæ tao godinque Betänia obo põninque tipæmpoga pædæ æmpodinque, Minitö iminite Wængongui waa cæcæcäimpa, ante waa apænecä ëñengadänimpa. ⁵¹ Tæcæ apænecä ëñëñõnani edæ tõmengä iñontobæ inque ingä edæ õönædë æigacäimpa.

⁵² Adinque tõmengä miñæ nê godinani iñömö ædæ wæænte apænedinque, Nåwangä Wængongui Wengä inongä inte æicampa, ante watapæ apænedinque Eedotadëë wadæ godinque nangui togadänimpa. ⁵³ Wængongui oncö ñæñæncõnë yabæcõnë iïmõ iñö iïmõ iñö pö pö cædinque Wængongui ingante, Bitö ñäö bai ëmõmi inte waa pönï cæbipa, ante cõwë waa apænëgadänimpa.

Itota Codito ingantedö ante Wäo nänö watapæ ante yewæmongainta

*Wængongui nänö Angainö ante në
ëmongaingä Waocä bagacäimpa*

¹ Wëenëñedë pöni Wængongui nänö mä badöñedë Wængongui nänö Angainö ante në ëmongaingä iñömö do ingacäimpa. Tömengä Wængongui weca quëwengacäimpa. Ayæ adocä adobaï në Wængongui inongä ingacäimpa. ² Wëenëñedë pöni tömancoo badönämaï iñedë mäningä do Wængongui weca quëwengacäimpa. ³ Wængongui angä ëñëningue adocä tömancoo badongacäimpa. Tömengä wii badongä bai Wængongui nänö badongaincoo tömancoo edæ dæ ancædönimpa. ⁴ Mäningä iñömö mönö quëwenguinö entawengacäimpa. Ayæ mönö quëwenguinö edæ entawëningue tömengä waodäni beyæ në ñäö bai inongä ingacäimpa. ⁵ Tömengä në ñäö bai ingaingä inte mönö wëmö iñömö ta tamongä ate adoyömö ñäö bai bayonte edæ mönö wëmö iñömö edæ mäniï ñäö ædö cæte mönæ ëmonguiï.

⁶ Onguiñængä adocanque ingante Wængongui da pönongä pöningä ingampa. Tömengä ëmowo, Wäo, ante pëmonte ingacäimpa. ⁷ Tömengä iñömö Wængongui nänö ñäö ëmömämo ante edonque pöni bacæimpa, ante në ñäö bai ingaingä ingantedö ante apænecæte ante pongacäimpa. Adocä apænecä beyænque waodäni tömänäni tömengä nänö në apænedongä ingante pönencædänimpa, ante pongacäimpa. ⁸ Incæte mäningä wii ñäö bai ingaingä ingampa. Wæætë tömengä, Wacä waodäni beyæ në ñäö bai ingaingä ingampa, ante apænecæte ante pongacäimpa. ⁹ Në nö ñäö bai në ingaingä iñömö waodäni tömänäni inänite tömengä nänö ñäö ëmömämo pönoncæte ante inguipoga wææ pongacäimpa.

¹⁰ Tömengä inguipoga iñömö quëwengacäimpa. Ayæ tömengä inguipoga në badongaingä iñongante inguipogaque quëwëñäni wæætë Baa äninque tömengä ingante ædö cæte ate bai pönenguinäni. ¹¹ Tömengä edæ tömengä qui weca pongacäimpa. Pongä ate tömengä quidëñäni incæ tömengä ingante ænämaï ingadänimpa. ¹² Incæte tömengä ingante në ængainäni iñömö tömengä ëmowo, Codito, ante në wede pönëñäni iñönänite tömengä tömëñäni inänite Ao äninque edæ, Wængongui wëñäni bacædänimpa, ante pönö cægacäimpa. ¹³ Ayæ Wængongui wëñäni iñömö wii waocä ëñate bai inänipa. Waocä, Botö wë manguinque, ante äñämaï iñongante

ëñadänipa. Wii nänöogængä angä beyænque inänipa. Wæætë Wængongui tömenganque cæcä ate tömëñäni tömengä wëñäni badänipa.

¹⁴ Tömengä iñömö edæ, Wængongui nänö Angainö, ante në ëmongaingä ininque Waocä ëñate bagacäimpa. Waocä ëñate badinque tömengä mönö weca quëwengacäimpa. Mæmpo Wængongui Wengä adocanque inte adocä godömenque ñæñængä inte në cædongä ingä atamönipa. Adocä Mæmpo weca quëwente në pongä iñömö tömengä nanguï waadete pönö cædongä inte nöingä änonngä ingampa. ¹⁵ Wäo iñömö, Mäningä æbänö ingä, ante apænecäimpa. “Mäningä botö në apænedongä ingantedö ante iïmaï apænetabopa. Botö täno pömo imopa. Tömengä në ayæ Ponguingä iñömö godömenque ñæñængä inte cædongä ingampa. Edæ botö ëñadämaï iñedë tömengä do ingacäimpa,” ante nanguï pöni yedæ äninque Wäo apænecäimpa.

¹⁶ Mäningä në ayæ Ponguingä iñömö nanguï pöni waadete pönö cædinque tömengä wæætë wæætë nänö entawëñö ante pönongä æninque tomompa. ¹⁷ Edæ Wængongui tömengä nänö wææ angainö ante apænecä ëñëningue Môtee wodi wæætë adodö ante yewæmöninque waodäni inänite godongacäimpa. Wængongui nänö waadete pönö cægainö ante nöingä nänö angainö ante guiquëñë Itota Codito beyænque ëñëmompa. Itota Codito iñömö mönö në Ponguingä ingaingä ingampa. ¹⁸ Möñö waocabo tömämo incæ Wængongui ingante cöwë adämaï imompa. Incæte tömengä adocanque Wengä Wængongui weca në quëwëñongä inte, Mæmpo æbänö ingaingä ingä, ante tömengä odömongä ate pönëmompa.

*Wäo æpænë guidönongä, Botö wii Codito
imopa, angä*

(Mäate 3.11-12; Mäadoco 1.7-8; Odoca 3.15-17)

¹⁹ Oodeoidi awëñëidi Eedotadëë quëwëñäni iñömö Wængongui qui, ante në godönäni tönö Debii wodi pæinäni inänite da godönäni Wäo weca godänipa. Gote pöninque adodäni, Æbidö inömi iïmi, ante apænëbi ëñëmönie, äñönäni Wäo iïmaï äninque ²⁰ nämä wææ äñämaï inte wæætë, Botö wii Codito inömo imopa, ante edonque pöni angantapa.

—Botö wii Codito inömo imopa.

²¹ Äñongante tömëñäni wæætë tömengä ingante,

—Æbidö inömi iïmi, Ediya wodi inömi iïmi.
Apænëbi ëñëmönie.

Ante äñäni ëñëningue tömengä,

—Wabo imopa.

Ante äñongä tömëñäni wæætë,

—Wængongui beyæ nê apænebi ayæ Ponguimi inōmi imitawo.

Änāni ēñēninque tōmengä,

—Wabo imopa.

Ante angantapa.

²² Tömēnāni iinque äninque,

—Æbidō inōmi imii, ante apænebi ēñēmōnie tōō. Mōnitō imōnite nê da pōnōnināni weca godinque mōnitō tōmēnāni inānite, Æbidō imii, ante ancæmōnimpa. Iinque bitō nāmä incæ æbānō ämii.

²³ Äñōnāni Wäo wæætē tōmēnāni inānite, Itaiya wodi nê Wængongui beyæ nê apæneca nānō angainō bai ante iimaï ante apænebo ēñencæminimpa.

—Önömæca incæ nê aa pebo inōmo inte botō tōmēmo pepāmo iimaï nāni ēñēnō impa. “Awēnē nānō ponguinō ante tōinō pīnonte bai tee mōedāni,” ante aa pebopa, angantapa.

²⁴ Paditeoidi nê wadō tedete wadō cædāni nāni cabo inōnāni inte tōmēnāni pancadāniya inānite da godōnāni Wäo weca nê godānipa.

²⁵ Gote pōninque mänināni quiquēnē,

—Bitō wii Codito inōmi inte wii Ediya wodi inōmi inte ayæ wii Wængongui beyæ nê apænebi ayæ Ponguimi inōmi imipa. Bitō ædō cæte waodāni inānite æpæne guidōmi imii.

²⁶ Ante äñōnāni Wäo wæætē,

—Botō önonque æpæne guidōnōmo imopa. Wæætē mīnitō weca adocanque a ongonä iñongante, Tōmengä æcānō ingää, ante mīnitō ēñēnāmaï imīnipa. ²⁷ Botō tāno pōmo imopa. Tōmengä nê ayæ Ponguingä ingampa. Botō önonque wædænque cæbo inte ædō cæte tōmengä awæncata incæ ñi cæte cæbo imoo.

²⁸ Betānia nāni quēwēñōmō Oododānō æmæmāa Wäo æpæne nānō guidōñōmō mänōmaï bagatimpa.

Itota Wængongui Codotedo

²⁹ Baänæ ate Itota bee tente pongä adinque Wäo apænecantapa. “Aedāni, iingä Wængongui da pōnongä pōningä ingampa. Ayæ tōmengä waodāni inguipoga quēwēnāni nāni wēnæ wēnæ cægāinō ante æninque teēmē mongænte wænguingä ingampa, ante Wængongui tōmengä ingante, Codotedo, ante pōnō pemongacäimpa. ³⁰ Māningä iñōmō botō nê apænedongä iñongante botō iimaï apænetabopa. ‘Botō tāno pōmo imopa. Onguiñængä nê ayæ Ponguingä iñōmō godōmenque ñæñængä inte cædongä ingampa. Edæ botō ēñadāmaï iñedē tōmengä do ingacäimpa.’ ³¹ Botō incæ adobaï, Tōmengä æcānō ingää, ante ēñēnāmaï intabopa. Mōnō idægocabo iñōmonte, Mīnitō tōmengä ingante ēñencæminimpa, ante botō æpæne guidōninque pōmo intabopa.”

³² Ayæ Wäo, Tōmengä ingampa, ante äninque, “Botō æmō ayōmote Wængongui

Önōwoca incæ öönædē owote equemō bai wææt tōmengä næ gongængä atabopa.

³³ Wængongui, Waodāni inānite æpæne guidōe, ante botō imote nê da pōnōningä wii botō imo angä bai botō, Itota æcānō ingää, ante ēñēnāmaïmo incædōmoimpa. Incæte tōmengä botō imote iimaï angantapa. “Wængongui Önōwoca incæ æcānō onguiñængä wææt næ gongængä ayōmi māningä iñōmō nê æpæne guidōnāni bai Wængongui Tæiyæ Waemō Önōwoca ingante da pōnongä waodāni mīmōnoque pō guiquingä, ante cæcä ingampa.” ³⁴ Māninō botō adinō impa. Mānōmaï beyæ iimaï ämopa, Māningä iñōmō Wængongui Wengä inongä ingampa,” ante Wäo apænegacäimpa.

Itota miñæ nê tāno godāni

³⁵ Baänæ ate Wäo tōnō tōmengä emiñæna mēnaa adoyōmō ongoñōnāni ³⁶ Itota wodo tebæ cægongä adinque Wäo angantapa.

—Aeda, tōmengä iñōmō Wængongui Codotedo inongä ingampa.

³⁷ Māninō angä ēñēninque Wäo nānō nê emiñæna inina incæ Itota ingante tee empo godaïmpa. ³⁸ Itota dadi emænte ayongä tee empo pōna adinque angantapa.

—Quinante pōmīnaa.

Ante äñongä tōmēna wæætē,

—Mætodo, æyōmōnō owobi. Apænebi ēñēmōnae.

Änatapa. Māniñe, Mætodo, ante mōnō tededō, Nê Odōmongä, ante impa.

³⁹ Äna ēñēninque tōmengä,

—Ægodōeda go aeda.

Äñongä tōmengä miñæ godatapa. Goyōna ædæ wææicä intapa. Ayæ nānō owocōnē gote adinque tōmēna adoönæ tōmengä weca a ongonapa.

⁴⁰ Wäo nānō äninō ēñēninque Itota ingante tee empo goda mēnaa iñōnate adocanque Æntade iñōmō Timōnō Pegodo tōniñacä ingantapa. ⁴¹ Tōmengä nānō tōniñacä Timōnō ingante ancæte ante diqui diqui minte gote adinque angantapa.

—Mæetiya mōnō änonä ingante atamōnapa, angantapa. Tōmengä iñōmō Wængongui nānō nê Pōnongaingä Codito inongä ingampa.

⁴² Ayæ Timōnō ingante Itota weca ænte māmongä pongä adinque Itota angampa.

—Bitō Wäo wē Timōnōmi imi abopa. Botō wæætē, Bitō tæimō dicabo bai imipa, ante bitō imite mōnō tededō, Quepata, pōnō pemōmopa. Önonque adowo emōwo incæ guidiego tededō, Pegodo, änanipa.

Pedipe tōnō Nāatānaedo inate Itota angä tee empo goda

⁴³ Baänæ ate Itota, Gadideabæ ante gocæboimpa, ante pönengäimpa. Pedipe ingante adinque Itota tömengä ingante,

—Botö miñæ pöe, ämo, angacäimpa.

⁴⁴ Pedipe iñömö Æntade tönö Pegodo bai Betaida nana quëwëñömö adoyömö quëwëningä inongäimpa. ⁴⁵ Pedipe Nätánaedo weca gocä adinque tömengä ingante iimaï äninque,

—Wængongui nänö wææ angainö ante yewæmöninque Möitee wodi nänö nê yewæmongaingä ingante mönitö atamöniþa. Wængongui beyæ nê apænegainäni adobai mäningä ingantedö ante yewæmongadänimpa. Tömengä iñömö Itota Nätadeta quëwëñongä inte Ootee wengä ingampa, ante angantapa.

⁴⁶ Ante äñongä Nätánaedo wæætë, —Nätadeta quëwëñömö adocanque waa quëwente pongä, ante mönitö dicæ ëñëmöniyaa.

—Nätadeta quëwëñömö adocanque waa quëwente pongä, ante mönitö dicæ ëñëmöniyaa.

Angä ëñëninque Pedipe iñömö, —Pö ae, angantapa.

⁴⁷ Itota ayongä Nätánaedo pongä adinque tömengä, —Ingä iñömö näwä idægocä inongä inte tömengä nê nõ entawëñongä inte babæ cædämaï inongä ingampa, ämopa.

⁴⁸ Angä ëñëninque Nätánaedo, —Æbänö imoo, ante bitö æbänö cæte do ëñëmi,

Ante äñongä Itota wæætë tömengä ingante,

—Pedipe iñömö bitö imite ayæ aa pedämaï iñedë bitö iigowæncawa tæ contabi iñömite botö bitö imite do atabopa, angacäimpa.

⁴⁹ Ayæ Nätánaedo,

—Awënë nê Odömömi imi, bitö Wængongui Wëmi inömi imipa. Idægoidi mönö cabo iñömönte bitö mönitö Awënë Odeyebi inömi imipa, ämopa.

⁵⁰ Äñongä Itota wæætë,

—Bitö iigowæncawa tæ contabi iñömite botö bitö imite atabopa, ämo beyænque pönëmi imipa. Mäninö ante adinque bitö godömenque botö bamönengæ cæbo acæbiimpa, ämopa.

⁵¹ Tömengä godömenque angantapa.

—Bitö imite näwangä ämopa. Öönædë wi ænete bayö Wængongui anquedoidi Waocä ëñagängä weca wææninque æiyönäni bitö acæbiimpa.

2

Cänaa quëwëñömö nani monguimæno cæte bedäni

¹ Mëönaa go adoönæque iñönte Cänaa quëwëñömö Gadideabæ iñömö monguimæno ante bedänipa. Itota wäänä adoyömö ponte ongoncäimpa. ² Itota tömengä ëmiñænäni tönö tömënäni inänite

adobai, Monguimæno mini bequinque, ante tē wente ænte pongadänimpa. ³ Ayæ yowepæ wædænque ti nämæ biñömæ nani ämæ dæ bedäni adinque Itota wäänä tömengä Wengä ingante,

—Tömënäni biñömæ dæ ämæmpa.

⁴ Äñongä Itota wæætë,

—Badä ëñëmi. Botö cæquëñenö tömëmoque cæquinö impa. Botö cæyedë wii eyepæ impa, ämopa.

⁵ Tömengä wäänä iñömö nê cædäni inänite, —Minitö iminite æbänö angä ëñente cædäni, angantapa.

⁶ Ayæ önompo æmæmpoque go adocadeque æpæncade dica inte badöincade iñömö cö cædäni ongoncädepa. Wængongui weca guicæte ante waëmö bacæmöimpa, ante äate cædänipa, ante oodeoidi nani äagaincade incädepa. Æncade pancacadea otenta ditodo næ ongoncädepa. Ayæ pancacadea tiëë ditodo næ ongoncädepa. ⁷ Nê cædäni inänite Itota,

—Æpæncadecoo iñömö æpæ eyede pönï pe ñiñætedäni.

Angä ëñëninque pe ñiñængadänimpa.

⁸ Ayæ tömënäni inänite,

—Owæta ænte wædænque mä iyænte monguimæno ante nê cædongä ingante godömini æncæcäimpa, ämopa.

Angä ëñëninque mänömaï cægadänimpa.

⁹ Ayæ monguimæno ante nê cædongä æpæ inimæ incæ biñömæ badimæ æninque, Æbänö imæ, ante bedinque tömengä, Itota nänö badönimæ impa, ante ëñëñämaï inongäimpa. Nê cædönäni Itota weca æpæ pe ñiñænänique ëñëñönänimpa. Ayæ monguimæno ante nê cædongä iñömö nê monguingä ingante, Nänënë pöe, aa pecä pongä ate, ¹⁰ iimaï angantapa.

—Wadäni tömänäni waimæ biñömæ täno godönäni bedänipa. Ayæ ate ææmæ becæ pönäni tömo pönï bedäni adinque tömënäni biñömæ wædænque godonte nani ænimæ wæætë godönäni bedänipa. Bitö guiquënë ñöwoyedë waimæ biñömæ bitö nänënë concædimæ ænte pömipa.

¹¹ Itota, Acædänimpa, ante mänömaï cædinque tömengä Cänaa quëwëñömö Gadideabæ iñömö mäniï mä nänö bamönengæ cægacäimpa. Mänii tæi piñænte bamönengæ cæcä adinque waodäni, Tömengä waëmö pönï inte cæcampa, ante edonque agadänimpa. Ayæ tömengä ëmiñænäni iñömö tömengä ingante godömenque wede pönëni bagadänimpa.

¹² Ayæ ate Capënaömö quëwëñömö Itota tömengä wäänä tönö tömengä biwidi tönö tömengä ëmiñænäni tönö wææ gogadänimpa. Mäniiñömö godinque wædænque ëönæ quëwengadänimpa.

Wængonguī oncō tæiyæ waēmō
baccæimpa, ante cæcā
(Māteo 21.12-13; Mādoco 11.15-18;
Odoca 19.45-46)

¹³ Wodo pænta gogaiōnæ, ante ood-
eoidi Patowa nāni ææmæ cænguīōnæ
oo pōni bayedē Itota Eedotadēē iñōmō
æigacæimpa. ¹⁴ Tōmengā iñōmō Wængonguī
oncō ñænæncōnē yabæcōnē pō guidinque
ayongā wagadaidi obegaidi tōnō equemōidi
inānite godonte æncæte ante nē mǎnāni
inānite acantapa. Ayæ wadāni campio
næænte nē godonte ænōnāni iñōmō nāni
godonte æimpaa tæ contayōnānite tōmengā
acantapa. ¹⁵ Yæguincamē ñænæmōmō nāā
wēnēninque que cæte ate æninque tōmengā
Wængonguī oncō ñænæncōnē yabæcōnē nē
ongōnāni inānite tatodongā tao godānitapa.
Adobaī obegaidi tōnō wagadaidi inānite,
Tao gobæwedāni, angā tao godānitapa.
Ayæ campio næænte nē godonte ænōnāni
tōmēnāni tiguītamō æninque tōmengā wido
cæcā gueogæ gotimpa. Ayæ adodāni nāni
æimpaa bæ tacā guidōmēmæ go wææntapa.
¹⁶ Ayæ equemōidi godonte æncæte ante nē
mǎnāni inānite Itota,

—Minitō equemōidi ænte tao gobæwedāni.
Botō Mæmpo oncōnē incæ mīnitō ædō cæte,
Mōnō godonte æiñōmō bai impa, ante
cæminitapa tōō, angacæimpa.

¹⁷ Māninō angā eñēninque tōmengā
ēmiñænāni Awēnē Dabii nānō yewæmongainō
ante iīmai ante pōnente wædānipa. “Bitō
oncō ante waodāni waa acædānimpa, ante
cæcæboimpa, ante botō nangui cæinente
wænguī wæ,” ante yewæmongatimpa.

¹⁸ Ayæ oodeoidi awēnēidi pancadāniya
tōmengā ingante,

—Bitō mǎnīl tōmāā awēnē bai cæbi incæ
æbānō bitō bamōnengæ cæte odōmōmi ad-
inque mōnitō, Māningā nē angā ingampa,
ante eñæncæmōnimpā, æmōnipa.

¹⁹ Añōnāni Itota wæætē tōmēnāni inānite,
—Wængonguī tæiyæ waēmō oncō incæ
mīnitō iincō bæ tate ewēmīni ininque
botō mēōnaa go adōnæque iñō mīincō
mænoncæboimpa, æmōpa.

²⁰ Angā eñēninque oodeoidi awēnēidi pan-
cadāniya,

—Wængonguī tæiyæ waēmō oncō coad-
enta i tei wadepo ganca mænongadānimpa.
Bitō iñōmō ædō cæte, Botō mēōnaa go
adōnæque iñō mīincō mænoncæboimpa,
āmii, ānānitapa.

²¹ Itota iñōmō nāmā baō incæ ante,
Wængonguī tæiyæ waēmō oncō bai impa,
ante apænecā inongāimpa. ²² Tōmengā
iincayæ wængā ate Wængonguī, Nāni
ōmæmōe, angā ñāni ōmæmongā ate,
Æbānō angacāi, ante tōmengā ēmiñænāni
pōnēnānitapa. Ayæ, Wængonguī angā

eñente nāni yewæmongainō nō impa, ante
pōnēnāni inte ayæ Itota tōmēnāni inānite
nānō āninō ante adobaī pōnengadānimpa.

*Itota, Mōnō waocabo æbānō iñōō, ante
eñengampa*

²³ Patowa nāni ææmæ cæyedē Itota
Eedotadēē iñōmō ponte quēwēninque,
Acædānimpa, ante bamōnengæ nangui
cæcā adinque waodāni tæiyænāni iñōmō,
Māningā mōnō Codito ingampa, ante
pōnengadānimpa. ²⁴ Itota edæ, Waodāni
tōmānāni æbānō entawēnāni ināni, ante do
eñēnongā inte tōmengā, Wabānō pōnēnāni,
ante tōmēnāni inānite gomō adongā
ingantapa. ²⁵ Edæ tōmengā waodāni nāni
entawēnō ante do eñēnongā ingantapa.
Iñinque waocā iñōmō, Waodāni æbānō
cædāni, ante apænecæcæimpa, ante Itota
tōmengā ingante, Bitō botō imo adodō
ancæbiimpa, ante ānāmā ingacæimpa.

3

Itota tōnō Niicodemō

¹ Paditeocā adocanque tōmengā ēmōwo
Niicodemō tōmengā iñōmō oodeoidi awēnēidi
tōnō nē godongāmæ cæcā ingacæimpa.

² Adocā woyowotæ Itota weca pōninque,

—Awēnē nē Odōmōmi eñēmi. Wængonguī,
Odōmoncæbiimpa, ante bitō imite da
pōnongā pōnīmi iñipa, do eñēmōnipa.
Edæ Wængonguī waocā tōnō godongāmæ
cædāmāi ingā iñinque māningā ædō cæte bitō
bai bamōnengæ cæcā aquimōnii.

³ Angā eñēninque Itota wæætē,

—Bitō imite nāwangā æmōpa. Nē mem-
poga eñadinganque Wængonguī Awēnē Odeye
nempo guite aquingā ingampa.

⁴ Añongā Niicodemō,

—Waocā picængā ba ate ædō cæte mem-
poga eñaquingā. Tōmengā nānō wānā
cæncadē ædō cæte mempoga guii æidinque
eñaquingā.

⁵ Angā eñēninque Itota angantapa.

—Bitō imite nāwangā æmōpa. Waocā
æpænē guidengā iñongante Wængonguī
Ōnōwoca cæcā beyænque mempoga
eñadinganque Wængonguī Awēnē Odeye
nempo guite quēwengingā ingampa.

⁶ Baonga beyænque nē eñadāni iñōmō
edæ baonque eñate quēwēnānipa. Wæætē
Wængonguī Ōnōwoca cæcā beyænque
nē eñadāni iñōmō Wængonguī Ōnōwoca
ingante ewocate quēwēnānipa.

⁷ Botō, Bitō mempoga eñaquēnēmi iñipa, ante
botō ānō eñēninque, Æbāmē impa, ante
ānāmā incæbiimpa. ⁸ Woboyæ nānō cægāi
bai wayōmō wayōmō pæmænte gopa.
Woboyæ nānō pæmæmāmo eñēmō incæ,
Ædonō pæmænte pō, ædonō pæmænte
go, ante eñēnāmāi iñmōpa. Wængonguī

Önöwoca cæcä beyænque nê eñadäni tömänäni Inänite tömengä æbänö cæcäa, ante adobai eñenāmai imopä, ämopä, ante Itota apæneantapä.

⁹ Apæneccä eñëninque Nicodemö,
—Æbänö inguüi.

¹⁰ Äñongä Itota wæætë,

—Idægoidi Inänite nê odömömi İmi incæte mäninö ante ædö cæte eñenāmai İmii.
¹¹ Bitö İmite näwangä ämopä. Mönitö quiëmë ante eñënimöni inte mäninö ante apænemönipä. Mönitö quiëmë ante adimöni İninque, Mänömai impä, ante apænemönipä. Mönitö quiëne möni äno ante apænemöni eñëninque ayæ Baa ämini inte pönënamai İminipä. ¹² Botö münitö İminite, Inguipoga quëwëñäni weca æbänö İ, ante apænedimo İmo incæte münitö eñenāmai İminipä. İninque Wængongui cæcä beyænque öönæde İmini quëwënguino ante æbänö İ, ante apænebo bai ædö cæte pönënguimİni, ante apæneantapä.

¹³ Ayæ apænedinque, “Wadäni tömänäni öönæde æidämai ingadänipä. Waobo nê eñagaİmo inte öönæde quëwente nê wææ pömo İñömö botö adoboque öönæde æibo İmopä. ¹⁴ Möitee wodi önömæca tæntæ nani badöninto æninque awäa İä cædinque gö cæcä a ongongatimpä. Waobo eñagaİmo İmote adobai awäa İmpodinque İtiwadinque gö cædäni wængonguënemo İmopä. ¹⁵ Mänömai botö İmote cædäni adinque botö İmote nê wede pönëñäni İñömö tömänäni cöwë wænāmai quëwencædänipä,” ante Itota apænegacäimpä.

Wængongui nänö waadete pönëno

¹⁶ “Edæ Wængongui incæ inguipoga quëwëñäni Inänite nê waadete pönengä inte tömengä Wengä adocanque onguinængä İñongante pönongä pongacäimpä. İninque æcänö tömengä ingante nê wede pönëna İñömö tömengä wë womönāmai inte cöwë wænāmai quëwencæcäimpä. ¹⁷ Edæ Wængongui incæ tömengä Wengä ingante inguipoga İñömö da pönongä pongacäimpä. Incæte, Inguipoga quëwëñäni nani pante wæquinque, ante apænte ancæte ante wii pongacäimpä. Wæætë inguipoga quëwëñäni Inänite tömengä ængä beyænque quëwencædänipä, ante tömengä ingante da pönongä pongacäimpä.”

¹⁸ “Æcänö tömengä ingante nê wede pönëna İñömö Wængongui tömengä ingante, Bitö pante wæquinque cæbipa, ante apænte äñāmai incæcäimpä. Æcänö quiëne wede pönëñāmai İna İñömö Wængongui tömengä ingante, Botö Wengä adocanque İñongante bitö tömengä emöwo ante pönëñāmai İnömi inte wæcæbiimpä, ante do apænte angä ingampa. ¹⁹ Wængongui nänö apænte äno İñömö İimäi impä. Nê İäo bai İnogä

İñömö, Wængongui æbänö ingäa, ante inguipoga İñömö ancæte ante pongacäimpä. Incæte waodäni tömëñäni nani cædimämo wënæ wënæ İ beyænque wëmö İñömö ante waadete pönëñäni İnanipä. Wæætë nê İäo bai İnogä ingante waadedämai İnanipä. ²⁰ Nê wënæ wënæ cædönäni inte İäo İñömö ante İininque Baa äninque, Mönö cædinö edonque pöni badāmai ingæimpä, ante İäo İñömö pönāmai İnanipä. ²¹ Waodäni Wængongui näwangä nänö ämai nê cædönäni quiëne, Mönö cædinö ante Wængongui mönö tönö godongämæ cæcä beyænque cætamopä, ante edonque pöni acædänipä, ante cædinque İäo İñömö pöninque cædänipä.”

Wäo nê guidönongä Itota ingantedö ante apæneccä

²² Ayæ ate Itota tömengä emiñænäni tönö Oodeabæ wædænque nani quëwëñömö godänitapä. Gote pöninque mäniñömö tömëñäni tönö wædænque quëwëninque Itota angä beyænque tömëñäni waodäni Inänite æpænë guidönäni guigadänipä. ²³ Ènöö quëwëñömö æpæ nangui mæ adinque Wäo mäniñömö guidongä guigadänipä. Ayæ waodäni, Wäo mönitö İmönite æpænë guidongingä, ante cöwë tömengä weca pönäni Inänite guidongä guidänipä. Ènöö quëwëñömö Tadii quëwëñömö eyequei İnimpä. ²⁴ Mäniñedë Wäo ingante ayæ tee mönedämai ingadänipä.

²⁵ Wäo emiñænäni pancadäniya oodeocä adocanque tönö apænedinque, Mönö oodeocabo æbänö cæte Wængongui weca quiëte ante waëmö bacæmöimpä, ante tömëñäni nani pönëno ante guëadö guëa ante tedewëñäni. ²⁶ Adodäni Wäo weca ponte apænedinque,

—Nê odömömi eñëmi. Oododänö æmæmäa bitö weca nê pöningä ingantedö ante bitö, Mäningä ingampa, ante apænebitawo. Edæ mäningä onguinængä İñömö adobai æpænë guidongä guidänipä töö. Waodäni tömänäni tömengä weca godänipä, ante wædänitapä.

²⁷ Ante wædäni eñëninque Wäo,

—Wængongui öönæde quëwëñongä pönö angä æninque waocä mänömai beyæ cæcampä. ²⁸ Botö wii Codito İnömo İmopä. İñæmpä Wængongui botö İmote täno da pönongä pönimo İmopä. Tömengä ayæ Ponguingä, ante apænetabopä. Mänömainö ante apænebo eñënimöni inte münitö tömëminä mäninö ante nê apænequëñëminä İminipä. ²⁹ Monguingä İñömö mongä ate tömengä onquiyængä nänöogængä bacampä. Tömengä guidengä İñömö nê monguingä ante wänö cöninque eñëñongä monguingä apæneccä eñëninque, Monguingä apæneccä eñëmpä, ante watapæ

tocampa. Botö adobai Codito apæneacă êñēmopa, ante mäningä bai nangui watapæ tobo ïmopa. ³⁰ Tömengä ïñömö godömenque ñænængä inte cædongä baquênengä ingampa. Botö guiquênë pönömenque wæðämo inte cæðömo baquênëmo ïmopa, ante Wäo apænegacäimpa.

Öönædë nê quëwente wææ pongä

³¹ Ayæ Wäo godömenque apænegantapa. Öönædë nê quëwente wææ pongä ïñömö tömengä ïñömö wii wadäni bai wædangä inte wæætë ñænængä inte cædongä ingampa. Öönædë nê quëwente wææ pongä ïñömö tömengä godömenque ñænængä inte cædongä ingampa. Inguipoga ïñömö nê êñacä guiquênë waodäni bai quëwënongå inte inguipogaque ante apænegantapa. ³² Tömengä Wængongui weca quiëmë adingä inte quiëmë êñëningä inte mäninö ante apæneacă êñëninge wadäni wæætë, Näwangä impa, ante äñamai ïñäni töö. ³³ Mäninö ante nê Ao angä guiquênë tömengä, Wængongui näwangä angä ingampa, ante edonque pönï angä ïnogä ingampa. ³⁴ Edæ Wængongui nänö da pönöningä ïñömö Wængongui nänö äñö ante apænegantapa. Tömengä ingante Wængongui ïñömö tömengä Öñöwoca ingante godongä æningque tömengä ædæmö êwocate quëwengampa. ³⁵ Mæmpo Wængongui ïñömö tömengä Wengä ingante nê waadete pönengä ingampa. Wængongui tömengä ingante, Bitö nempo quino ïnincöo tömancoo pönömo æningque bitö awënë bacæbiimpa, ante pönö cægacäimpa. ³⁶ Êcänö Wængongui Wengä ingante nê wede pönëna ïñömö tömengä cöwë wænämai quëwencæcäimpa. Êcänö Wængongui Wengä ingante nê Baa ante pönëñamai ïna guiquênë tömengä wii cöwë wænämai quëwencæcäimpa. Edæ Wængongui tömengä ingante ængui nänö panguiämö cöwë cædongä ingampa, ante Wäo mäññedë ïnque apænegacäimpa.

4

Itota Tämadiabæ onquiyængä ingante apæneacă

¹ Paditeoidi ïñänite ïimai ante tededäni êñëñanitapa. Itota pönö cædinque æpænë guidongä guidinque tömengä nänö emiñænäni ïñömö wii Wäo emiñænäni bai wæðænque badäni inte nangui ïñäni badäni, ante tededänitapa. ² Mänömai äñäni incæte wii Itota nê guidongä ïnogäimpa. Wæætë tömengä emiñænäni waodäni ïñänite guidönäni guigadäniimpa. ³ Mäninö ante Paditeoidi do êñëñäni, ante äñäni êñëninge Awënë Itota Oodeabæ quëwëninge wæð go Gadideabæ ïñömö ocæ êmænte gogacäimpa.

⁴ Gadideabæ taadö Tämadiabæ ïñömö tæcæguedë ïñö godö tömengä goquênengä ïnogäimpa. ⁵ Tämadiabæ ïñömö godinque tömengä Ticada näni äñömö pongantapa. Mänii Ticada quëwëñömö eyequei docä Aacobo wodi tömengä wengä Ootee wodi ingante, Pancabaa bitö ömæ baquïñömö, ante tömengä ingante nänö godongäimæ ïnimpa. ⁶ Ayæ æpämönicæ Aacobo wodi nänö ææ wogäimönicæ adoyömo ïnimpa. Itota taadö gobæ ïñö godinque nangæ badinque æpämönicæ ïñömö pö tæ contayongä mäññedë tæcæ bæcä bagatimpa. ⁷ Tæ contate ongöñongä Tämadiabæ quëwengä onquiyængä æpæ iyænte tadonte æncæte ante pongä adinque Itota tömengä ingante, —Æpæ pönömi beboe, angantapa. ⁸ Edæ tömengä miñæ nê godäni mäññäni quëwëñömö cængui godonte æncæ godäni ïñönäimpa.

⁹ Tämadiadi ïñänite oodeoidi cöwë gomö adäni ïñäni, ante êñengä inte Tämadiabæ quëwengä onquiyængä ïñömö Itota ingante, —Bitö oodeobi ïmi incæte botö Tämadiabæ quëwëmo ïñömote bitö ædö cæte botö ïmote, Æpæ pönömi beboe, ämii, ämopa.

¹⁰ Äñongä Itota wæætë,

—Bitö, Wængongui quino nänö pönöni i, ante êñente bai ayæ, Æbodö ïñömo inte bitö ïmite, Æpæ pönömi beboe, ante apæneboo, ante êñente bai bitö wæætë botö ïmote, Æpæ pönömi beboe, ancæðömiimpa. Ayæ botö bitö ïmite æpæ quëwenguimæ pönömo becæðömiimpa, ämopa.

¹¹ Angä êñëninge onquiyængä,

—Awënë, bitö æpæ mä iyæncæde dæ ampa. Ayæ æpämönicæ guibæ impa. Mänimæ æpæ quëwenguimæ bitö nê apænedimæ ædönö mä iyænte ænguiimii. ¹² Mönö docä mæmpo Aacobo wodi ïñömö, Botö æmæwo wæmo adinque botö æpämönicæ munitö qui bacäimpa, ante ïmönönicæ mönö ïmonte godongacäimpa. Tömengä adomönicæ æpæ begacäimpa. Tömengä wënäni tönö tömengä cæningäidi adobai adopæ begadäniimpa. Adocä mönö docä wædangä ïñongante bitö godömenque ñænæmi inte nê cæðömi ïmitawogaa, ämopa.

¹³ Äñongä Itota wæætë,

—Êcämenque ïñömö mäñimæ bedinque wæætë gæwænte bacæcäimpa. ¹⁴ Êcämenque botö godonguimæ nê becä guiquênë tömengä gæwænämai cöwë quëwencæcäimpa. Wæætë botö tömengä ingante tömëmo godonguimæ godömo bedinque tömengä botö quëwëñö entawente quëwencæcäimpa. Æpämönicæ cöwë cægö bai botö tömengä mimmöno godonguimæ beyænque tömengä wænämai nänö quëwenguinö do æningque quëwencæcäimpa, ämopa.

¹⁵ Onquiyængä tömengä ingante,
—Awënë, äninque, Botö gæwæñämaï
bacæboimpa, ante mänimæ botö imote
pönömi beböe, ämopa. Ayæ mänifñömö cöwë
æpæ iyæncæ pönämaï incæboimpa.

¹⁶ Ante äñongä tömengä wæætë,
—Goe, bitö nänöogængä ingante aa ped-
inque ænte mämömi pongæe, angantapa.

¹⁷ Äñongä tömengä wæætë,

—Botö nänöogængä dæ ampa.

Angä ëñëninque Itota tömengä ingante,

—Bitö, Botö nänöogængä dæ angampa,
äninque nö ante ämipa. ¹⁸ Inæmpa bitö
nänöogæidi önonpo æmæmpoque inñänite
bitö tömëñäni inänite mönimi imipa töö.
Ayæ nöwoyedë onguifñængä bitö weca nê
quëwengä inñömö wii bitö näwä nänöogængä
ingampa. Ininque ñöwo bitö äñö inñömö edæ
näwangä impa, ämopa.

¹⁹ Angä ëñëninque onquiyængä,

—Awënë, Bitö Wængongui beyæ nê
apænebi imi adinque ëñëmopa. ²⁰ Mönitö
dodäni mæmpoidi wodi, li onquiyabo
inö gote Wængongui ingante, Bitö Awënë
Wængongui imidö anguënë, ante ædæ
wææñinque angadänimpa. Minitö nê
oodeoidi imini guiquënë, Wængongui
ingante waa ate apæñecæte ante Eedotadëe
quëwëñömö mänifñomonque godinque ædæ
wæænte apæñecæimpa, äminipa töö.

²¹ Äñongä Itota wæætë,

—Onquiyæmi ëñëmi. Botö äñö ëñëninque
pönë. Minitö inñömö ædæ wææñinque botö
Mæmpo ingante, Bitö Awënë Wængongui
imidö anguënë, ante li onquiyabo inö
incæ Eedotadëe mänifñömö incæ minitö
mäninö ante äñämaï anguiönæ oo pönï
impa. ²² Minitö tamadiadi inñömö nê
Wængongui ingante, Bitö Awënë Wængongui
imidö anguënë, ante ædæ wææñinque
apæñemini incæte adocä ingante, Æbänö
ingäa, ante ëñëñämaï iminipa töö. Mönitö
guiquënë nê ædæ wææñinque Wængongui
ingante waa ate apæñemöni inte adocä,
Æbänö ingäa, ante do ëñëmöni imönipa.

Edæ, Nê wënæ wënæ cædäni wæncæ
cædinäni incæ quëwencædänimpa, ante
nê Ängä inñömö oodeocä inongä ingä apa
änewëë. ²³ Botö Mæmpo ingante, Bitö
Awënë Wængongui imidö anguënë, ante ædæ
wææñinque näwangä ante apæñedönäni
inte apæñecædänimpa. Adodäni, Näwangä
impa, ante nö pönente ëwocadäni inte ædæ
wææñinque Wængongui ingante mäninö
ante watapæ apæñecædänimpa. Mäninö
ante näni apæñequiönæ inñömö edæ oo pönï
impa. Edæ do inque batimpa. Wængongui,
Mänömaï entawente nö pönëñäni bai inäni
inänite diqui diqui mininque, Mäninänique
botö imote, Bitö Awënë Wængongui imidö
anguënë, ante ædæ wææñinque watapæ

apæñecædänimpa, angampa. ²⁴ Wængongui
Öñöwocaque ëwocate quëwengä ingampa.
Ininque nê ædæ wæænte tömengä ingante
watapæ apæñedäni inñömö tömëñäni,
Näwangä impa, ante nö pönente ëwocadäni
inte ædæ wææñinque tömengä ingante
watapæ apæñequëñëñäni inänipa, ämopa.

²⁵ Angä ëñëninque onquiyængä,

—Botö, Mëetiya näni Codito äñongä
poncæcäimpa, ante do ëñëmopa. Tömengä
pongä ate, Æbänö inguii, ante möñö imonte
tömäñö odömonte apæñecä ëñëncæmönimpa.

²⁶ Äñongä Itota wæætë,

—Botö nê apænebo inñömö Codito inömo
imo apa cæbii, ämopa.

²⁷ Tæcæ apæneyongante tömengä miñæ
nê godäni ocæ ëmænte ponte ayönäni
tömengä inñömö onquiyængä ingante
apæñecä adinque, Æbänö cæ wæmönii, ante
guifñente wædänitapa. Incæte, Æbänö ämi,
ante, Quinante tömengä ingante tedebii, ante
adocanque incæ äñämaï ingantapa. ²⁸ Ayæ
onquiyængä tömengä iyæncæde ëmö cæte
näni quëwëñömö ocæ ëmænte gote pöninque
waodäni inänite apæñedinque,

²⁹ —Ægodöedäni, onguifñængä inñömö botö
imote tæcæ adinque, Botö æbänö cæboo,
ante tömäñö ante botö imo nê apæñecä in-
gante pö aedäni. Mäningä wabänö möñö
Codito inongä ingantawo, ante ämopa.

³⁰ Angä ëñëninque tömëñäni näni
quëwëñömö tao godinque tömengä weca
gogadänimpa. ³¹ Onquiyængä näni
quëwëñömö tæcæ goyongä Itota nänö nê
ëmiñæñäni inñömö tömengä ingante,

—Awënë nê Odömömi imi wædænque cæe,
ämönipa.

³² Ante äñönäni tömengä wæætë tömëñäni
inänite,

—Botö cængui botö ëadö ante quinö i, ante
minitö guiquënë tömäa ëñëñämaï iminipa
töö.

³³ Angä ëñëninque tömengä ëmiñæñäni
godongämæ nämanque apæñedinque,

—Wabänö wacä tömengä ingante cængui
ænte pongantawo.

³⁴ Äñönäni Itota,

—Botö imote nê da pönongä nänö äñö bai
botö cædö inñömö mänii tömëmo cængui bai
impa. Ayæ, Tömengä nänö cædö ante tömäñö
inque cæbopa, ante botö cædö inñömö botö
cængui bai adobaï impa. ³⁵ Minitö inñömö,
Mëa go mëa apäicä bayonte amiñayedë
tömemconcodë gæcæmönimpa, ante wii
äminitawo. Botö guiquënë minitö iminite
ämopa. Waodäni inänite wi æmonte aedäni.
Edæ mäninäni tömëmoncoo gæyedë bai
inänipa. ³⁶ Itota, Botö beyæ ante waodäni
inänite nê gædongä ingante botö, Bitö
cæbipa, ante paga cædinque ñöwoyedë incæ
do pönömo ængampa. Wæñämaï wantæpiyæ

quëwencædänimpa, ante cædinque ñöwoyedë incæ tömengä tömënnäni Inänite do gædongä ingampa. Ininque botö äno ante waodäni mïmöno nê quiyadingä tönö nê gædingä tönö guëa tocædaïmpa. ³⁷ Mänömai wëñëñedë nani angainö ante, Waocä adocanque tömëmö quiyacä ate wacä guiquënë nê gædongä ingampa, ante näwangä ante impa. ³⁸ Tömëmoncodë iñömö cædäni bai cædämai imïni incæte munitö tömëmoncoo gæquïnäni bai bacæminimpa, ante botö, Waodäni botö quïnäni Inänite gæcæminimpa, ante munitö imïnite da godömö gominitapa. Wadäni iñömö do mänincodë nanguï pönï quiyate cædinque botö äno ante waodäni Inänite apænecadänimpa. Minitö guiquënë mïni cædämai iñömö incæ önonque gædimïni imïnipa, ante Itota apænecadänimpa.

³⁹ Onquiyængä guiquënë tãmadiadi mïniñömö nani quëwëñömö quëwënnäni Inänite, “Tömengä iñömö botö imote tæcæ adinque, Botö æbänö cæboo, ante tömänö ante botö imote apænecantapa,” ante apænecä ëñëninque tömënnäni nanguï Inäni Itota ingante pönengadänimpa. ⁴⁰ Tãmadiadi tömengä weca godinque, Bitö mönitö weca a ongöe, ännäni ëñëninque tömengä mëönaa iñonte tömënnäni weca owocantapa. ⁴¹ Tömengä nänö owoyedë tömengä nänö äno beyænque godömenque tæiyænäni iñömö tömengä ingante wede pönente badänitapa. ⁴² Adodäni onquiyængä ingante, —Wü bitö apænete änonque ante ëñëninque pönëmöni inte mönitö tömengä apænecä adobai ëñënimöni imönipa. Ayæ, Mäningä iñömö inguipoga mönö quëwencabo iñömönte tömengä näwangä mönö imonte nê Ænongä ingampa, ante do ëñëmönipa, apænecadänimpa.

Itota cæcä beyænque awënë tönö cæcä wengä waa bacäi

⁴³ Mëönaa go ate tömengä mïniñömö quëwëninque wadæ godinque, Gadideabæ gocæboïmpa, ante gocantapa. ⁴⁴ Itota incæ wëñëñedë, Iïmai impa, ante änogäïmpa. Wængongü beyæ nê apænecä inte tömengä nänö pægainæ incæ mïniñömö apæneyongä tömengä tönö pægainäni guiquënë tömengä ingante wü waa adänipa töö, ante änogäïmpa. ⁴⁵ Tömengä mïni Gadideabæ nänö ponque pongä adinque gadideaidi edæ Eedotadëe iñömö Patowa nani ææmæ cæyedë Itota bai mïniñömö gote ongöñönäni, Tömengä æbänö cæcäa, ante tömäa adinäni inte, Bitö pömi waa amönipa, ante tömengä ingante apænecadänimpa.

⁴⁶ Ayæ Gadideabæ godinque Itota wæætë Cänaa nani quëwëñömö, Æpæ incæ biïnomæ bacæïmpa, ante wëñëñedë nänö cædiñömö adoyömö gocantapa. Capënaömö nani äñömö quëwëninque adocanque pancabaa

awënë tönö godongämæ cæcä iñömö tömengä wëñængä onguïñængä wënæ wënæ inongäïmpa. ⁴⁷ Adocä onguïñængä iñömö, Itota Oodeabæ quëwente Gadideabæ pongä, ännäni ëñëninque tömengä Itota weca gote angantapa. Botö wëñængä onguïñængä wænæ cæcä iñongante bitö tömengä ingante cæbi waa bacæ. Ægodöe. ⁴⁸ Itota tömengä ingante,

—Botö, Acæminimpa, ante bamönengæ cæbo ate wæmïni inte munitö mïniñö beyænque botö imo pönëmïni awædö.

⁴⁹ Ante apænecä ëñëninque pancabaa awënë tönö godongämæ cæcä,

—Awënë, botö wëñængä ayæ wænämai iñedë ægodöe gocæïmpa.

⁵⁰ Ante äñongä Itota wæætë,

—Ñowo wadæ goe. Bitö wëñængä iñömö quëwencæcäïmpa, ämopa. Angä ëñëninque onguïñængä, Itota nänö äno nö impa, ante pönëninque wadæ gogacäïmpa. ⁵¹ Tömengä, Botö oncö, ante taadonque goyongante tömengä beyæ nê cædönäni tömengä ingante apænecæte ante pö bee ténänitapa. Pö bee téninque,

—Bitö wëñængä waa bacäi.

⁵² Ante apænecäni ëñëninque tömengä tömënnäni Inänite, Botö wëñængä æyedëno waa bacäi, ante äñongä tömënnäni wæætë tömengä ingante,

—Iïmö ædæ gowayedë mïniñedë tömengä gancæ bacantapa, ante apænecadänitapa. ⁵³ Ayæ wëñængä mæmpo, Bitö wëñængä quëwencæcäïmpa, ante Itota botö imote nänö äniñedë adoyedë botö wëñængä do waa bacantapa, ante wædinque tömengä tönö tömengä nani quëwencabo tömancabo Itota ingante wede pönënnäni bagadänimpa. ⁵⁴ Itota oodeoidi weca quëwente Gadideabæ ocæ ëmænte pöninque tömengä mïniñömö iï bamönengæ cædinque mempoga nänö cædö bamönengæ bagatimpa.

5

Itota cæcä beyænque pæ opa pæ opa gocä waa bacäi

¹ Ayæ ate oodeoidi, Mönö Wængongü beyæ, ante nani ææmæ cæyedë Itota Eedotadëe iñömö æidinque ado ante gogacäïmpa. ² Eedotadëe wææ cæte iñömö obegaidi nani pö guidemö gäänë gäwapæ impa. Mänimæ gäwapæ ebode tededö Betadapæ nani ämæ yæwedeca önonpo æmæmpoque ñoncæce inoncöïmpa. ³ Mänincönë wënæ wënæ Inäni tæiyænäni cöwë öñönönänimpa. Pancadäniya babetamönäni inte pancadäniya pæ opa pæ opa godönäni inte pancadäniya cömante inönäni Inäni. ⁴ Adodäni, Æpæ incæ gopæ, ante wänö cönönäni inönänimpa. Edæ Wængongü anquedo wæætë wæætë, Mänimæ incæ incæ gopængæïmpa, ante

wææ pönnique cædongäimpa. Gäwapæ incæ incæ go cæpæ adinque æcänö tåno mänimænë guida inte adocä quiëmë wënæ wënæ i waa badongäimpa. ⁵ Mäninömö öñönäni weca adocaque në öñönongä inömö todëinta i ocho wadepo ganca wënæ wënæ inte wægainingä inongäimpa. ⁶ Adocä mäninömö öñongä ingante Itota ponte ayongä wadäni, Mäningä wantæpiyæ mänömaï wënæ wënæ inte wægainingä ingampa, ante apænëdäni ëñëninque Itota tömengä ingante,

—Bitö, Waa bänëmo, ämitawo.

⁷ Ante añongä në wënæ wënæ ingä wæætë,

—Awënë, gäwapæ incæ incæ gopæñedë æcänö botö imote ænte guiquinaa edæ dæ angampa. Ayæ botö, Æpænë guicæboimpa, ante goyömo wacä pönnique do tåno guicä.

⁸ Ante wæyongante Itota,

—Ængæ gantie, bitö bee podonte möïmo ænte goe. ⁹ Añongä onguifængä inömö infontobæ waa badingä inte tömengä bee podonte möïmo ænte cægonte gocantapa. Oodeoidi näni guëmanguionæ infonte Itota mänömaï cæcantapa. ¹⁰ Mänömaï beyæ oodeoidi awënëidi inömö onguifængä në waa badingä ingante,

—Nöwoönæ guëmanguionæ infonte mönö æbänö cæquï, ante do wææ yewæmonte impa cæbii. Bitö bee podonte möïmo næænämaï incæbiimpa.

¹¹ Ante pünönäni tömengä wæætë,

—Botö imote, Waa bae, ante në cædingä inömö adocä incæ, Bitö bee podonte möïmo ænte goe, angä cætabopa.

¹² Angä ëñëninque tömënanï tömengä ingante,

—Mäningä inömö bitö imite, Bitö bee podonte möïmo ænte goe, ante në angä inömö æcänö ingää. Apænëbi ëñëmönë, änänitapa.

¹³ Itota guiquënë do waodäni nanguï inäni ongönäni tæcæguedë go wadæ godongäimpa. Mänömaï beyæ onguifængä në waa badingä inömö, Në cædingä æcänö ingää, ante ëñënämaï ingantapa. ¹⁴ Ayæ ate Itota Wængonguï oncö ñænæncö yabæcönë go guidingque tömengä ingante bee téninque,

—Ëñëmi, bitö wæætë waa babi imipa. Ininque godömenque wënæ wënæ cædämaï incæbiimpa. Bitö mäninö wënæ wënæ bitö cægainö ante ñimpo cædämaï imi ininque wabänö bitö wæwenguinque godömenque babaïmipa, ämopa.

¹⁵ Angä ëñëninque onguifængä wadæ gote oodeoidi awënëidi weca pönnique angantapa. Botö imote, Waa bae, ante në cædingä inömö Itota ingampa, ante apænecantapa. ¹⁶ Mänömaï beyæ Itota mäninö nänö cædinö ante guëmanguionæ infonte cæcä adinque

oodeoidi awënëidi inömö tömengä ingante togænte wënæ wënæ cædänitapa. ¹⁷ Itota tömënanï inänite,

—Botö Mæmpo ñöwoönæ ganca tömengä nänö cædö ayæ cæcä ingampa. Ayæ botö adobaï cæbo imopa, ante apænecantapa.

¹⁸ Mäninö angä ëñëninque tömënanï godömenque püninque, Mönö tömengä ingante æbänö cæte wæñömö wænguingää, ante godömenque nanguï cægadänimpa. Tömënanï, Tömengä guëmanguionæ infonte do cæcä ingampa. Ayæ godömenque, Wængonguï botö Mæmpo inongäimpa, ante tededinque tömengä, Botö Wængonguï bai imopa, ante bai cæcampa töö, ante tömënanï godömenque pünigadänimpa.

Tömengä Wengä ingante Wængonguï pönö cæcä ate Awënë bacampa

¹⁹ Itota adodäni inänite iïmaï äninque, “Botö minitö iminite näwangä ämopa. Botö Wængonguï Wëmo inömo incæ ædö cæte adoboque nämanque cæbo imoo. Botö Mæmpo æbänö cæcää adinque botö adodonque cæbopa. Edæ botö Mæmpo nänö cædö bai botö Wængonguï Wëmo inte adobaï cæbopa. ²⁰ Edæ Mæmpocä Wëmo inömote tömengä botö imote waadete pönëninque tömengä nänö cædö tömännö ante botö imote odömongä abo imopa. Ayæ minitö, Æbänö cæcä wæmöö, ante wæcæminimpa, ante cædinque tömengä godömenque hamönengæ nänö cædö ante botö imote odömongä ate botö wæætë cæbo acæminimpa. ²¹ Edæ botö Mæmpo inömö æmæwo wængainäni inänite, Näni ömæmöninque minitö müminï quëwencæminimpa, ante pönö cæcä bai botö tömengä Wëmo inömö adobaï cæbo imopa. Æcänö ingante, Bitö mü quëwencæbiimpa, ante äinëmo inte botö tömengä ingante pönö cæbo ate müngä quëwencæcäimpa. ²² Adobaï botö Mæmpo inömö waodäni inänite adinque, Æcänö waa cæcantawo, ante, Æcänö wënæ wënæ cæcantawo, ante apænte änämaï ingampa. Wæætë edæ botö tömengä Wëmo inömote tömengä, Bitö mäninö ante waodäni tömännäni inänite apænte ancæbiimpa, ante cægacäimpa. ²³ Mänömaï cædinque botö Mæmpo, Waodäni botö imo näni waa abai adobaï botö Wengä ingante tömännäni waa acædänimpa, ante cægacäimpa. Botö tömengä Wëmo inömote në waa adämaï ingä inömö tömengä botö Wæmpocä botö imote da pönongä ingante adobaï waa adämaï ingampa töö,” ante Itota apænecantapa.

²⁴ Ayæ apænëdinque, “Minitö iminite näwangä ämopa. Waocä botö änö ëñëninque botö imote në da pönongaingä ingante në wede pönengä inömö tömengä nänö apænte pante wæwenguinö godämaï incæcäimpa. Wæætë tömengä nänö

wæñamāi quëwenguinö gocæcäimpa. Edæ tömängä mönö æmæwo wænguino ñimpo cædinque wæñamāi mönö quëwenguinö do gocäimpa. ²⁵ Minitö iminite näwangä ämopa. Waodäni nê quëwëñäni incæ tömëñäni æmæwo wængainäni bai inönäni inte tömëñäni iñömö Wængongui Wëmo botö tedepämo oo ëñencädänimpa. Nöwoönæ tömëñäni nāni ëñenguionæ do batimpa. Nê ëñëñäni iñömö tömëñäni nāni wæñamāi quëwenguinö gocädänimpa. ²⁶ Wængongui nāmā nê quëwëñongä inte tömāñäni nāni quëwëmāmo ante nê godongä ingampa. Māñomāi beyænque botö tömängä Wëmo adobai nāmā nê quëwëñomö inte tömāñäni nāni quëwëmāmo ante nê godomö imopa. ²⁷ Ayæ Waobo ëñagaimo iñomote tömängä pönö cæcä beyænque botö nê ämo badinque nāmā tæi piñænte cædinque edæ, Æcänö waa cæcantawo, ante, Æcänö wënæ wënæ cæcantawo, ante nê apænte angulimö imopa. ²⁸ Botö māñomāinö ante apænebo ëñëñinque minitö, Æbänö angä wæmöö, ante änāmāi incæminimpa. Edæ æmæwo wængainäni tömāñäni tömëñäni nāni wodido nê öñongainäni iñönäni edæ botö tedepämo incæ tömëñäni nāni ëñenguionæ oo pönö impa. ²⁹ Botö tedepämo ëñëñinque tömëñäni tömāñäni ta poncädänimpa. Nê waa cægainäni iñömö wæñamāi nāni quëwenguinö nāni goquinque ñāni ömæmoncädänimpa. Nê wënæ wënæ cægainäni guiquënë nāni apænte pante æmæwo wæwenguinö nāni goquinque ömæmoncädänimpa cæminii,” ante Itota apænegacäimpa.

Æcänö äna ëñente cæbii, ante Itota ingante änänipa

³⁰ Ayæ godömenque apænedinque Itota iimāi apænecantapa. “Botö ædö cæte nāmanque adoboque cæbo imoo. Wæætë Wængongui botö imote æbänö angä ëñëñinque botö māñinö ante, Æcänö waa cæcantawo, ante, Æcänö wënæ wënæ cæcantawo, ante apænte ämopa. Ayæ botö apænte äno iñömö cöwë nöinö ante impa. Edæ botö tömëmö ämāi cædamāi imopa. Wæætë botö Mæmpo botö imote nê da pönongaingä nāno ämāi cæbo imopa. ³¹ Botö nāmanque äninque, Æbänö cæboo, ante apænebo bai minitö, Önonquedö ante impa, ancædöminimpa. ³² Botö æbänö cæboo, ante wacä botö beyæ ante nê apæñecä ingampa. Tömängä botö imotedö ante nāno apænedö iñömö edæ nö impa, ante ëñëmopa. ³³ Minitö botö imotedö ante, Æbänö cæcää, ante ëñencæte ante Wäo nê æpæñë guidönongä weca wadäni inänite da godöminitapa. Ayæ Wäo māñināni inänite botö imotedö ante nö apæñecä ëñëñänitapa. ³⁴ Botö æbänö cæboo, ante waodäni botö

beyæ apæñecädänimpa, ante botö änāmāi imopa. Wæætë, Minitö botö æmo beyænque quëwencæminimpa, ante cædinque botö māñomāinö ante apænetabopa. ³⁵ Wäo nê æpæñë guidönongä tömängä iñömö ti wodönoincade bæco bai ingacäimpa. Ayæ, Tömängä nāno angainö ñäo bai impa, ante adinque minitö wantæyö iñonte, Waa impa, ante watapæ tomñitapa. ³⁶ Botö æbänö cæboo, ante Wäo nê æpæñë guidönongä nāno angainö beyæ waodäni māñinö ante do ëwocadäni ingadänimpa. Ayæ botö Mæmpo, Bitö iimāi cæe, ante, Tömää iinque cæcæbiimpa, ante botö imote nāno angainö bai ante do cædömo imopa. Botö Mæmpo botö imote da pönongaingä ingampa, ante wadäni botö cædinö beyæ do ëñëñänimpa. ³⁷ Ayæ botö Mæmpo botö imote nê da pönongaingä iñömö adobai, Botö æbänö cæboo, ante apæñecä ëñengadänimpa. Minitö guiquënë tömängä ingante adāmāi imini inte tömängä nāno tedepämo incæ cöwë ëñëñämāi iminipa töö. ³⁸ Ayæ botö Mæmpo botö imote da pönongä pönimo imopa, ante minitö pönëñämāi imini inte edæ tömängä nāno angainö ante entawëñämāi quëwëmīni iminipa. ³⁹ Wængongui angä ëñëñinque nāni yewæmongainta ædæmö adöminni inte edæ minitö, Māñinö nāni yewæmongainta amöni beyænque mönitö wæñamāi möni quëwenguinö gocæmönimpa, ante pönëmīni iminipa. Iñæmpa māñintaa yewæmöninque botö imotedö ante apænedinque yewæmongadäni apa quëwëmīni. ⁴⁰ Botö, Minitö wæñamāi mīni quëwenguinö ante pö æedäni, äñömote minitö wæætë Baa äninque botö weca pönämāi iminipa,” ante Itota apæñecantapa.

⁴¹ Ayæ apænedinque tömängä, “Waodäni botö imote waa adinque apæñecädänimpa, ante änāmāi imopa, angantapa. ⁴² Iñæmpa, Minitö æbänö cæminii, ante botö do ëñëmopa. Wængongui nāno waadete pönente entawëñö minitö entawëñämāi quëwëmīni, ante do ëñëmopa. ⁴³ Wængongui angä ëñëñinque botö wææ pönimo adinque minitö Baa ante botö imote pönëñämāi iminipa. Wacä guiquënë nāmā äninque pongä iinque minitö māñingä ingante Ao ante pönëmaimīni, ante awædö. ⁴⁴ Minitö wacä ingä wacä ingä, Botö imote waa adinque waa apæñecädänimpa, ante cæminni awædö. Incæte minitö, Mönö Wængongui nê adocanque ingaingä ingampa, ante, Tömängä mönö imonte waa adinque apæñecæcäimpa, ante cædamāi iminipa. Māñomāi beyæ minitö botö imote ædö cæte pönëmīni iminii. ⁴⁵ Botö Mæmpo weca ongöninque minitö iminitedö ante botö, Iñänāni wënæ wënæ cædäni inänitapa, ante ancæboimpa, ante minitö

pönēmīnitawo. Mänömainö ante edæ pönēnāmai iedāni. Wæætē Mōitee wodi nānō angainō ēfente beyænque mōnō quēwengæimpa, ante pönēmīnīpa. Īñæmpa adocā Mōitee wodi mīni nē pönēnongā ĩñōmō, Nē wēnæ wēnæ cæmīni ĩmīnīpa, ante ancæcāimpa cæmīnī. ⁴⁶ Mīnitō Mōitee wodi ingante pōnente bai adobai botō ĩmote pōnencædōmīnīpa. Edæ tōmengā botō ĩmotedō ante yewæmongacāimpa. ⁴⁷ Mōitee wodi nānō yewæmongainō ante pönēnāmai ĩmīni ĩnīnque mīnitō ædō cæte botō apænedō ante ēñēnīnque pōnenguīmīnī,” ante Itota māniñedē ĩnque apænegacāimpa.

6

5.000 ganca ĩnāni ĩnānite Itota godongā cæñānīpa

¹ Mānīnō ĩnque apænete ate wantæyō ĩñonte Itota wadæ godīnque gāwapæ Gadideapæ nāni āmæ æmæmāa tao gogacāimpa. Mānīmæ Tibediapæ nāni āmæ ĩmpa. ² Tōmengā wogaa tao gocā adīnque waodāni tæiyæñāni pō tee empo godānitapa. Tōmengā, Acædānīpa, ante cædīnque wēnæ wēnæ ĩnāni ĩnānite bamōnengæ cæte odōmongā do adīnāni ĩnte godānitapa. ³ Ayæ Itota tōmengā nānō ēmīñæñāni ĩnānite ānanquidi ænte mæicā ædīnque tōmēnāni tōmengā tōnō tæ contadānitapa. ⁴ Wodo pænta gogaiōnæ, ante oodeoidi Patowa nāni ææmæ cæōnæ oo pōni ĩngatīpa. ⁵ Itota gomō ayongā waodāni tæiyæñāni tōmengā weca pōnāni adīnque tōmengā Pedipe ĩngante,

—Mānīnāni waodāni beyæ ædōnō gote pāo godonte ænīnque godōmōni cænguīnānī, angantapa.

⁶ Edæ Itota ĩñōmō, Æbānō cæbaīmoo, ante do ēñēnīngā ĩnte mānīnō ante, Pedipe æbānō cæquīngā, ante acæte ante angantapa. ⁷ Pedipe wæætē tōmengā ĩngante,

—Īñæmpa pāo ante tōmānāni wædænque cæncædānīpa, ante ocho apāicā cæte beyæ paga æinta ænīnque mānīpota godonte ænīnque edæ wī eyepæ ĩmaīpa, angantapa. ⁸ Ayæ tōmengā ēmīñængā Timōnō Pegodo biwī Æntade ĩñōmō Itota ĩngante,

⁹ —Mōnitō weca nē ongongā edēnīngā ĩñōmō tebada nāni awēñēnīmō guiyā pāo ōnompō æmæmpoque tōnō guiyā gæyæ mēa pōni næængā ĩngampa. ĩncæte mānī cænguī tæiyæñāni beyæ ædō cæte eyepæ ĩ, ante wæbopa.

¹⁰ Angā ēñēnīnque Itota,

—Mīnitō tæiyæñāni godongāmæ ongōnāni ĩnānite āmīni tæ contadāni, angantapa. Tōmengā nānō āmai ānāni ēñēnīnque waodāni ōnōmæcaque ĩnō nangūi gagūimæ pæyōmō do tæ contadānitapa. Ongūiñæñāni ĩncæ ōnompō æmæmpoque mīdo ganca ĩnāni

ĩnte tæ contadāni ĩngadānīpa. ¹¹ Itota pāo ænīnque, Wængongūi, Bitō waa pōni pōnōmi ænte cænguīmōni, ante apænedīnque tōmengā nānō ēmīñæñāni ĩnānite godongā ænīnque tōmēnāni wæætē tæ contadāni ĩnānite di mæññæñāni cæñānitapa. Ayæ tōmengā gæyæ ænīnque adobai cæcantapa. Tōmānāni ĩñōmō nāni cæñēnō ante eyepæ cængadānīpa.

¹² Tōmēnāni tōmo pōni cæñāni ate tōmengā ēmīñæñāni ĩnānite tōmengā,

—Cænguī nāni ao mæ ao mæ ñōnōni ee ōñoncoo wote badāmai ĩngæimpa, ante pædæ wææmpo ō ædāni.

¹³ Angā ēñēnte cædīnque nē cæñāni pāo ōnompō æmæmpoque tebada nāni awēñēnīmō nāni ao mæ ao mæ ñōnōni ee ōñoncoo ō ænte da wēnāni ate edæ otodē tipæmpoga go mentodēa cænguī eyede da wēnāni contagatīpa. ¹⁴ Waodāni ĩñōmō Itota bamōnengæ nānō cædi adīnque,

—Nāwangā ĩngā ĩñōmō Wængongūi beyæ nē apænecā ĩngampa. Tōmengā ĩnguipoga Pongūngā, ante nāni angaingā ĩnongāimpa, ante tæcæ ānānitapa.

¹⁵ Tōmēnāni, Bitō mōnitō Awēñē Odeye bacæbiīpa, ante botō ĩmote bæi ongoncæte ante poncæ cædānīpa, ante wædīnque Itota wadæ godīnque adocanque ānanquidi wæætē æigacāimpa.

Itota tæpæ yædopæ dao dao gocā

(Māateo 14.22-27; Māadoco 6.45-52)

¹⁶ Gāwadecæ pōni bayō tōmengā ēmīñæñāni ĩñōmō gāwapæ yæwedeca wæi gogadānīpa. ¹⁷ Itota angā ēñēnīnque māniñōmō wæi wipodē guidīnque tōmēnāni, Gāwapæ æmæmāa Capēnaōmō nāni quēwēñōmō mōnō taocæñāpa, ante tæcæ wogaa tao goyōnāni dobæ wēmō bayō Itota ayæ tōmēnāni weca pōnāmai ĩnongāimpa. ¹⁸ Ayæ woboyæ nangūi pæmænte pōñō æpæ mæ conta mæ conta cæyonte, ¹⁹ tōmēnāni wodo tīnco quidōmetodo wiyate cæyōnāni Itota ĩñōmō wipo gāmæñō pōnīnque æpæ yædopæ wæñōmēncapæ dao dao pongā adīnque ancaī guīñēñānitapa. ²⁰ Ancaī guīñēñōnānite Itota ĩñōmō tōmēnāni ĩnānite,

—Botō ĩmopa. Guīñēñāmai iedāni, angantapa.

²¹ Ante āñongā tōmēnāni Ao ante tōmengā ĩngante wipodē ænīnque tōmēnāni nāni goīñēñōmō ēmōnaiya do tao gogadānīpa.

Waodāni Itota ante diqui diqui mīnte pōnāni

²² Īmō ate tæiyæñāni gāwapæ ĩmæ wedeca a ongōñōnānīpa. ĩnīnque tōmēnāni, Wipo adoque pōni māniñōmō wāi wocæ ĩncæte Itota ĩñōmō māniñōmō guīdāmai ĩñongante tōmengā mīñæ godāni adodānīque guīi wadæ tao godānitapa, ante adīnque

wædānitapa. ²³ Awënë Itota do Wængongui ingante, Bitō waa pōni pōnōmi cængulmōni, ante apænecā ate waodāni nāni pāo cæniñōmō pancadāniya ayæ ongōnānimpā. Nōwo iñōmō wapocoo Tibedia nāni quēwēñōmō wo cæwodinque māniñōmō tōmēnāni nāni cæniñōmō eyequei pōnāni adānitapa. ²⁴ Iñinque Itota tōnō tōmēngā nānō ēmiñænāni edæ dæ ānāni wædinque tæiyænāni iñōmō wipodē guite Capēnaōmō godinque Itota ante diqui diqui mincæte ante wogaa gogadānimpā.

Itota, Mōnō quēwenguinque, ante cængui bai ingampa

²⁵ Adodāni gāwapæ æmæmāa tao godinque tōmēngā ingā adinque,

—Awënë nē Odōmōmi İmi æyedēnō iñōmō pōmitawo, ānānitapa.

²⁶ Āñōnāni Itota wæætē,

—Minitō iminite nāwangā āmopa. Minitō tōmo pōni pāo cæniñmīni inte botō imote ante diqui diqui mincæ pōminitapa tōō. Wæætē edæ botō, Acæminimpā, ante bamōnengæ cæbo beyæ minitō wīi pōmīni awædō. ²⁷ Minitō, Mōnō cængui, ante æncæte ante cæmīni incæte inguipogaque mīni woquīnonque ante æncæ cædāmaī quēwēdāni. Wæætē edæ, Mōnō cængui iñque bayedē cængui mæ òñongæimpā, ante cædinque minitō, Mōnō wænāmaī quēwenguinque gocæmōimpā, ante pōnente quēwēdāni. Botō nē Waobo ēñagaīmo İmo māniñ cængui minitō iminite pōnōmo æncæminimpā. Botō Mæmpo botō imotedō ante, İngā nō cæcā ingampa, ante odōmongacāimpā.

²⁸ Angā ēñēninque tōmēnāni tōmēngā ingante,

—Mōnitō, Wængongui nānō cæquīmāmo ante cæcæte ante quīnō cæquēñēmōni İmōni, ante wæmōnīpa.

²⁹ Āñōnāni Itota wæætē,

—Botō Wængongui nānō nē da pōnongaīmo iñōmote minitō botō imote mīni wede pōnēnō iñōmō edæ māniñō Wængongui nānō cædō impā, angantapa.

³⁰ Mānōmaī beyæ tōmēnāni godōmenque tōmēngā ingante,

—Bitō, Ēñencædānimpā, ante bamōnengæ bitō cædō ante æbānō cæte odōmōmi adinque pōñēmaīmōnīpa. Æbānō cæquīmīi, ante ānewēñānitapa. ³¹ Mōnō wæmæīdi ònōmæca nāni quēwēñedē cængui mānāā nāni angāi cængadānimpā. İmaīnō ante yewæmongatimpā. “Tōmēngā, Minitō cængui, ante tōmēnāni İnānite òñnædē İnō māwææ godongacāimpā,” ante nāni yewæmongaīnō bai impā, ante apænecānitapa.

³² Itota wæætē tōmēnāni İnānite,

—Nāwangā āmopa. Minitō iminite òñnædē māwææ cængui nē pōnongaingā iñōmō tōmēngā wīi Mōitee wodi ingacāimpā. Wæætē botō Mæmpo iñōmō tōmēngā minitō iminite òñnædē nāni nāwā cængui bai pōnongā cæncæminimpā. ³³ Òñnædē quēwente wææ pongaingā iñōmō tōmēngā iñōmō, Cængui bai ingampa, ante Wængongui nānō nē angaingā ingampa. Adocā inguipoga quēwēñāni İnānite, Mīni wantæpiyæ wænāmaī quēwenguīnō ante pōnongā æninque quēwēñānīpa.

³⁴ Ante Itota apænecā ēñēninque tōmēnāni,

—Awënë, nōwo māniñ cængui İmō İñō İmō İñō pōnōmi cæmōniē.

³⁵ Āñōnāni Itota godōmenque apænedinque,

—Botō iñōmō, Mīni quēwenguinque, ante mīni cængui bai İnōmo İmopa. Botō weca nē pongā iñōmō cōwē cængui gue æñēnāmaī bai quēwēncæcāimpā. Ayæ botō imote nē wede pōnēngā iñōmō cōwē tepæ gæwænāmaī bai quēwenguingā ingampa, ante apænecantapa. ³⁶ Ayæ wæætē, Minitō iminite do botō ānō bai impā. Botō imote do adīmīni incæte minitō ayæ wede pōnēnāmaī İmīnīpa. ³⁷ Botō Mæmpo, Bitō quīnāni bacædānimpā, ante cædinque botō imote pōnongā æmo İnīnque botō quīnāni nē badāni inte tōmēnāni tōmānāni iñōmō botō weca edæ do pōnānīpa. Ayæ æcāmenque botō weca pōna İnate, Botō weca pōnāmaī İmīpa, ante cōwē ānāmaī incæboimpā. ³⁸ Edæ òñnædē quēwēninque botō wīi tōmēmo āmaī cæcæboimpā, ante wææ pontabopa. Wæætē botō imote nē da pōnongaingā nānō āmaī cæcæboimpā, ante wææ pontabopa. ³⁹ Ayæ botō imote nē da pōnongaingā botō İmo nānō angaīnō iñōmō İmaī impā. Waodāni bitō quīnāni bacædānimpā, ante pōnōmo æninque bitō quīnāni badinque adocanque incæ wē womonte wænāmaī incæcāimpā. Wæætē iñque baquīōnæ İñonte bitō, Nāni òmæmōedāni, āmi ēñēninque bitō quīnāni tōmānāni edæ nāni òmæmoncædānimpā. ⁴⁰ Edæ botō Mæmpo nānō angaīnō iñōmō İmaī impā. Botō Wængongui Wēmo iñōmote botō imote ædæmō adīnāni inte edæ botō imote nē pōnēnāni tōmānāni cōwē wænāmaī wantæpiyæ quēwēncædānimpā. Mānōmaīnō ante impā. Ayæ iñque baquīōnæ İñonte botō māniñāni İnānite, Minitō nāni òmæmōedāni, āmo ate òmæmoncædānimpā. Itota mānōmaī apænecantapa.

⁴¹ Apænecā ēñēninque oodeoidi iñōmō, Tōmēngā, “Botō cængui bai İmopa, ante òñnædē İnō wææ pontabopa,” angampa, ante tōmēngā ingantedō ante tæcæ piinte tedewēñānitapa. ⁴² Tōmēnāni,

—İngā iñōmō wīi Ootee wēngā Itota ingantawo. Tōmēngā mæmpo tōnō wāānā wīi mōnō adōna İnatawo. Tōmēngā ædō cæte,

Botö öönædë quëwente wææ pontabopa, angä änewëë.

⁴³ Ante püññönäni Itota wææte,

—Minitö nämanque godongämæ piinte tededämai iedäni. ⁴⁴ Botö Mæmpo botö imote nê da pönongaingä wii pönö cæcä bai æcämenque incæ botö weca pönämai incædongäimpa. Ayæ iinque baquïönæ iñonte botö weca nê pongä ingante, Näni ömæmïö, ämo ñäni ömæmoncæcäimpa. ⁴⁵ Wængongui beyæ nê apænegainäni näni yewæmongaintaa iimäi ante yewæmongadäniimpa. “Wængongui waodäni tömänäni inänite odömonte apænecä ëñencädäniimpa.” Botö Mæmpo apænecä nê ëñenäni iñömö tömengä nänö odömonte apænedö ante nê ëñenäni inönäni iinque tömënäni tömänäni botö weca pönäni, ante Itota apænecantapa.

⁴⁶ Ayæ apænedinque, “Mini waocabo tömäini incæ botö Mæmpo ingante cöwë adämai iminitapa. Botonque iñömö Wængongui weca nê quëwente pömo inte botö Mæmpo ingante nê adimo iñömö adoboque pönö imopa. ⁴⁷ Minitö iminute näwangä ämopa. Botö imote nê wede pönengä iñömö tömengä cöwë wantæpiyæ nänö quëwengüimämo do entawente quëwengä ingampa. ⁴⁸ Botö iñömö, Mini quëwenguinque, ante mini cængui bai imopa. ⁴⁹ Mini wæmæidi önomæca quëwëñedë cængui mänää näni angai cængainäni incæte edæ do wængadäniimpa. ⁵⁰ Botö iñömö cængui bai inömo inte öönædë quëwente wææ pömo imopa. Iinque waocä, Cængui cænte bai quëwengäimpa, ante botö imote pönengä iinque tömengä cöwë wænämäi quëwëmaingampa. ⁵¹ Botö cængui bai imo inte öönædë quëwengäimo incæ wææ pontabopa. Æcänö cængui cænte bai botö imote pönëna tömengä iñömö cöwë wænämäi quëwencæcäimpa. Ii cængui botö godongui botö nämä baö impa. Inguipoga quëwënäni inänite, Minitö quëwengüimäni, ante botö nämä baö incæ godoncæboimpa,” ante Itota mänömai apænecantapa.

⁵² Mäninö angä ëñente wædinque oodeoidi näni cabo iñömö godongämæ nämanque tededinque wææte godö wææte godö änewëñänitapa.

—Mäningä iñömö mönö imö tömengä nämä baö ædö cæte pönongä cængüimöni.

⁵³ Ante tedewëñönäni Itota wææte tömënäni inänite,

—Minitö iminute näwangä ämopa. Botö Waobo ëñagäimo iñömöte minitö botö baö cænämäi inte botö wepæ bedämai imini iinque ædö cæte Wængongui wantæpiyæ nänö quëwengüimämo entawëmini ingüimäni. ⁵⁴ Botö baö nê cængä ayæ botö wepæ nê becä tömengä iñömö Wængongui

wantæpiyæ nänö cöwë quëwengüimämo do entawente quëwengä ingampa. Ayæ iinque baquïönæ iñonte botö mäningä ingante, Bitö ñäni ömæmïö, ämo ñäni ömæmoncæcäimpa. ⁵⁵ Edæ botö baö näwä cængui bai impa. Ayæ botö wepæ näwä bequï bai impa. ⁵⁶ Botö baö nê cængä inte ayæ botö wepæ nê becä iñömö tömengä botö nempo ee quëwënongä ingampa. Ayæ adobai tömengä botö imote entawënongä ingampa. ⁵⁷ Botö Mæmpo nê Quëwënongä inte botö imote da pönongä pönimo imopa. Tömengä pönö cæcä ate quëwëmo imopa. Botö imote nê cængä iñömö adobai botö cæbo beyænque quëwencæcäimpa. ⁵⁸ Botö cængui bai imo inte öönædë wææ pönimo iñömö mänüi cængui bai imopa. Mönö wæmæidi cængui mänää näni angai cængainäni incæ edæ do wængadäniimpa. Wææte ñöwo wææ pömo iñömote, Cængui impa, ante nê cænongä iñömö tömengä cöwë wænämäi quëwencæcäimpa, ante Itota apænegacäimpa.

⁵⁹ Tömengä mäninö ante Capënaömo näni quëwëñömö näni odömöincönë ongöninque tömënäni inänite odömonte apænegacäimpa.

Itota nänö äno beyænque mönö wænämäi quëwengäimpa

⁶⁰ Mäninö odömonte apænecä ëñëninque tömengä ëmiñänäni nangui inäni,

—Tömengä nänö odömonte apænedinö iñömö waadedämainö impa. Edæ æcänö ëñëmaïnaa, ante äñänitapa.

⁶¹ Mäninö nänö odömonte apænedinö ante tæcæ piinte tedewëñäni wædinque Itota tömënäni inänite,

—Minitö botö äninö ante oda cæmini inte püimäni iminitawo, angantapa. ⁶² Ayæ godömenque apænedinque, Botö Waobo ëñagäimo imo öönædë quëwente wææ pongäimo inte adodö adoyömö æibo adinque minitö æbänö ante ämaïminii. ⁶³ Wængongui Öñöwoca pönö cæcä beyænque waocä quëwengä iinque tömengä baonque nänö ëñayö beyænque ædö cæte quëwëmaingää. Botö Wængongui Öñöwoca töno apænedinque minitö iminute botö apænedinö beyæ minitö öñöwoca ëwocate quëwencæmïniimpa. ⁶⁴ Incæte minitö weca pancadäniya iñömö botö imo pönënamäi inäni, ante Itota apænecantapa.

Edæ tömënäni weca æcänö tömengä ingante pönënamäi ingää, ante Itota do ëñënongäimpa. Ayæ tömengä ingante nê godö odömongüingä æcänö imaingää, ante tömengä adobai do ëñënongäimpa. ⁶⁵ Itota godömenque apænedinque,

—Botö mänüi beyæ minitö iminute do antabopa. Botö Mæmpo wii pönö cæcä bai æcämenque incæ botö weca pönämäi incædongäimpa, ante apænegacäimpa.

⁶⁶ Mäniönæ ganca tömengä miñæ nê godäni incæ nangui inäni wadæ godinque tömengä miñæ ayæ tee empo godämaï ingadänimpa. ⁶⁷ Tömënäni wadæ godäni adinque Itota önonpo tipæmpoga go mäa ganca inäni inänite,

—Minitö diyæ æbänö cæquimīni. Minitö tömënäni bai adobai botö imote emö cæte, Wadæ goinëmönipa, ämīnitawo.

⁶⁸ Äñongä Timönö Pegodo wæætë,

—Awënë, æcänö miñæ gobaimönii. Wacä mönitö imönite nê emiñængä iñömö edæ dæ angampa. Wantæpiyæ wæñämaï möni quëwenguñö ante æbänö gocæmönimpa, ante wæyömöni bitö iñömö nê apænebi imipa. ⁶⁹ Bitö iñömö Wængongui nänö da pönönömi inte tömengä nänö Tæiyæ Waëmö inömi imipa, ante pönömöni inte eñëmönipa.

⁷⁰ Ante apæncä eñëningue Itota,

—Minitö önonpo tipæmpoga go mäa ganca imini inte wii botö apænte ænömīni imīnitawo. Incæte müni cabo incæ adocanque iñömö wënæ qui ingampa, ante apænegacäimpa.

⁷¹ Timönö Icadiote wengä Codaa ingantedö ante Itota mänömaï angacäimpa. Tömengä önonpo tipæmpoga go mënaa nāni cabo adocanque inongä incæte ayæ ate Itota ingante odömönte nê godonguingä inongäimpa.

7

Itota biwüdi tömengä ingante pönënamäi inäni

¹ Ayæ ate Itota Gadideabæ tömämæ wayömö wayömö gocä ingacäimpa. Oodeabæ iñömö oodeoidi awënëidi botö imote wænoncæ cädänipa, ante wædinque Itota, Oodeabæ wii goinëmopa, ante mäniömæ godämaï inongäimpa. ² Oodeoidi, Mönö wæmæidi oncontaicoo mænöninque quëwengadänimpa, ante pönëninque tömënäni ææmæ oo pöni ingatimpa. ³ Itota biwüdi tömengä ingante,

—Bitö emiñænäni bitö bamönengæ cæbi acädänimpa, ante cæcæte ante bitö iñömö ongönämaï inte wæætë Oodeabæ goquëni imipa. ⁴ Waodäni tömännäni ayönäni cæbo edonque acädänimpa, ante cæinngä iñömö tömengä wii awëmö cæcampa. Bitö mäni cædinö do cæbi inte waodäni tömännäni bitö imite edonque pöni acädänimpa, ante odömönte cæe, ämönipa.

⁵ Edæ tömengä biwüdi incæ tömengä ingante pönënamäi inäni inönänimpa. ⁶ Mänömaï beyæ Itota tömënäni inänite,

—Botö wii ñöwo goquëni mo imopa. Minitö guiquënë æyedemë gomīni incæ cöwë waa impa. ⁷ Inguipogaque quëwënäni mīnitö imīnite ædö cæte piinte badänii. Wæætë botö tömënäni inänite, Minitö wënæ wënæ cæmīni

imīnipa, ante apænebo beyæ tömënäni botö imo piinänipa. ⁸ Minitö ææmæ cädäni weca æite goedäni. Botö goquionæ wii eyepæ impa, ante pönëninque botö ayæ mäni mæ cädäni weca godämaï imopa.

⁹ Mäninö äninque tömengä godömenque Gadideabæ ongönte quëwengacäimpa.

Itota nāni ææmæ cæyömö gote pon-gacäimpa

¹⁰ Incæte tömengä biwüdi ææmæ ante godäni ate tömengä adobai godinque wii waodäni nāni ayömö gocampa. Wæætë awëmö gocantapa. ¹¹ Ayæ nāni ææmæ cæyömö oodeoidi awënëidi iñömö,

—Māningä onguñængä æyömönö ingää, ante tömengä ingante ante diqui diqui minte wææ wänönänitapa.

¹² Tæiyænāni ponte a ongönäni godongämæ nāmā tededinque tömengä ingantedö ante wæntæ wæntæ tededänitapa. Pancadäniya, “Tömengä waa cæcä ingampa.” Äñönäni wadäni iñömö, “Baa, māningä waodäni inänite wapiticæ mäodinque, Oda cæquänänimpa, ante cæcä ingampa,” ante apænedönänimpa.

¹³ Oodeoidi awënëidi inäni adinque guñente wædinque wadäni tömännäni tömengä ingantedö ante waodäni eñëñönäni apænedämaï inönänimpa.

¹⁴ Tömënäni ææmæ do cæyedë Itota iñömö Wængongui oncö ñænæncönë yabæcönë æite pö guidinque waodäni inänite mä odömönte apæncä eñengadänimpa. ¹⁵ Tömengä odömönte apæncä eñëningue oodeoidi ancai guñëninque,

—Æbänö cæte nangui eñengä ingää. Edæ tömengä ecoeda adämaï inongä ingampa.

¹⁶ Äñönäni Itota wæætë,

—Botö odömönte apænedö ante wii nāmā pönëninque odömönte apænebo imopa. Wæætë Wængongui botö imote nê da pönongaingä nänö angainö ante odömönte apænebopa. ¹⁷ Minitö, Wængongui nänö angainö ante Itota odömönte apæncampa, ante pönëmīnitawo. Wæætë, Nāmā pönëninque Itota odömönte apæncampa, ante pönëmīnitawo. Iñæmpa waocä, Wængongui nänö ämaï cæcæboimpa, ante æcänö änaa tömengä iñömö, Äcänö angä eñëninque Itota odömönte apæncä, ante do eñencæcäimpa. ¹⁸ Nê nāmā pönëninque apæncä iñömö tömengä nāmā ante, Botö imo waa acädänimpa, ante äinente apæncä ingampa. Wæætë edæ, Botö imo nê da pönongainganque ingante waa acädänimpa, ante nê äinente cæcä iñömö tömengä edæ nê nö cæte quëwënongä ingampa.

Adocä, Waodäni oda cæquänänimpa, ante tömënäni inänite wii wapiticæ mäocä ingampa, ante Itota apæncantapa. ¹⁹ Ayæ apænedinque, “Wængongui nänö wææ

angainō ante Mōitee wodi wīi mīnitō beyæ ante yewæmongacāi. Incæte mīnitō tōmāmīni Wængonguī nānō wææ angainō adinque ēñente cædāmai imīnīpa tōō. Mīnitō quīnante botō imote, Wæñōinēmōnimpa, ante pōnēninque cæmīnīi.”

²⁰ Ante awēnēidi inānite āñongante nangui ināni adoyōmō ongōnāni wæætē,

—Bitō wēnæ tōnō cæbi imipææ, ante tōmēngā ingante āninque, Bitō imite æcānō wæñōinente cæcāā.

²¹ Ante ānāni ēñēninque Itota godōmenque tōmēnāni inānite,

—Guēmanguiōnæ iñonte botō adopoque bamōnengæ cæbo adinque mīnitō tōmāmīni ancaī guīfente wæmīnīpa edæ. ²² Mōitee wodi iñōmō, Mīnitō wēñængā ēñacā ate ōnomo æmæmpoque go mēōnaa go adoōnæque iñonte māniōnæ tōmēngā yabæque ēō togæncæmīnīpa, ante mīnitō imīnite odōmonte apænegacāimpā. Wīi Mōitee wodi mānōmai mā cæcā ingacāimpā. Wæætē wēñēñedē incæ mīnitō wæmæidi do adodō cægadānīpa. Incæte Mōitee wodi, Māniōnæ iñonte ēō togæncæmīnīpa, ante pōnō angā beyænque mīnitō guēmanguiōnæ i incæte mīnitō wēñængā onguīñængā ingante ēō togæmīni imīnīpa tōō. ²³ Mōitee wodi nānō wææ yewæmongainō wido cædāmai ingæimpā, ante cædinque mīnitō guēmanguiōnæ iñonte edæ wēñængā onguīñængā ingante do ēō togæmīnīpa. Incæte edæ guēmanguiōnæ iñonte botō wēnæ wēnæ iñingā ingante āmo ate tōmēngā baō tōmāñō waa bacā beyænque quīnante botō imote pīimīni imīnīi. ²⁴ Waocā wabānō nānō cædi wēnæ wēnæ i, ante pōnēninque ædæmō ēñēnāmai imīni inte mīnitō tōmēngā ingā, Bitō wēnæ wēnæ cæbi imīpa, ante apæntē ānāmai iedāni. Wæætē, Æbānō i, ante ædæmō ēñēninque nōingā ante ancæmīnīpa, ante Itota mānōmai apænegacāimpā.

Itota iñōmō Codito mōnō nē Ponguingā ingampa

²⁵ Mānōmai beyæ Eedotadēē quēwēnāni pancadāniya,

—Māningā ingante wæñōmōni wæncæcāimpā, ante awēnēidi wīi ānānitawo, ante māniñedē tæcæ tedewēnānitapa. ²⁶ Aedāni, tōmēngā iñōmō edonque pōni a ongōninque waodāni inānite apæneyongā incæ mōnō awēnēidi tōmēngā ingante ānāmai pæ wēnete inānīpa tōō. Tōmēnāni wabānō, Māningā iñōmō nāwangā Codito mōnō ānongā ingampa, ante pōnēnānitawo. ²⁷ Iñæmpā, Māningā onguīñængā æyōmōnō quēwente pongā ingāā, ante do ēñēmōpa. Mōnō Codito, Nē Ponguingā, ante nāni angaingā iñōmō æyōmōnō quēwente pongāā,

ante mōnō waocabo tōmāmō incæ ēñēnāmai inguimō imōmpa, ānānitapa.

²⁸ Ayæ Itota Wængonguī oncō ñænæncōnē yabæcōnē odōmonte apænedinque aa pecantapa.

—Ao, Botō æbodō imoo, ante mīnitō ēñēmīniyaa. Ayæ botō, Æyōmōnō quēwente pōmoo, ante mīnitō adobaī ēñēmīniyaa. Botō wīi nāmā pōnēninque pontabopa. Botō imote nē da pōnongaingā nāwangā inongā ingampa. Mīnitō, Tōmēngā æbānō ingāā, ante ēñēnāmai imīnīpa tōō. ²⁹ Botō wæætē edæ tōmēngā weca quēwēmo iñōmote tōmēngā botō imote da pōnongā pōnīmo inte edæ botō iñōmō edæ tōmēngā ingante do agaīmo inōmo imōpa, angacāimpā.

³⁰ Mānīnō angā ēñēninque tōmēnāni, Quīnō cæte tōmēngā ingante bæi on-gonguimōnimpa, ante pōnengadānīpa. Incæte tōmēngā nānō wænguīōnæ wīi eyepæ i beyæ tōmēngā ingante ō æñāmai ingadānīpa. ³¹ Tæiyæñāni adoyōmō pō ongōnāni weca ongōninque nangui ināni tōmēngā ingante wede pōnēnānitapa. Tōmēnāni,

—Māningā onguīñængā iñōmō nangui bamōnengæ cæcā inongāimpā. Mōnō Codito iñōmō tōmēngā pongā ate godōmenque bamōnengæ cæquingā ingantawogaa.

Itota ingante bæi ongoncæte ante cædāni

³² Tæiyæñāni māniñōmō ongōnāni iñōmō Itota ingantedō ante mānōmainō ante wæntæ wæntæ tedeyōnāni Paditeoidi ēñēnānitapa. Ayæ, Wængonguī quī, ante nē godōnāni ñænæñāni tōnō Paditeoidi iñōmō Wængonguī oncō ñænæncō wææ wānōnāni inānite, Mīnitō goedāni. Tōmēngā weca godinque tōmēngā ingante bæi ongonte æte pōedāni, ānānitapa. ³³ Itota godōmenque apænedinque,

—Mīnitō weca wantæyō quēwēninque botō ayæ ate botō imote nē da pōnongaingā weca ocæ ēmænte gocæboimpā. ³⁴ Botō ocæ ēmænte gobo ate mīnitō botō imote ante diqui diqui mīmīni incæte adāmai inguimīni imīnīpa. Ayæ botō go quēwēñōmō mīnitō adoyōmō ædō cæte ponguimīni imīnīi.

³⁵ Angā ēñēninque oodeoidi awēnēidi nāmanque tededānitapa.

—Māningā, Gocæboimpā, ante ædōnō goyongante mōnitō diqui diqui mīninque adāmai inguimōni imōnīi. Tōmēngā, Edæ mōnō guīdēnāni do panguiæþ godinque guidiegoidi weca wayōmō wayōmō nāni quēwēñōmō tōmēngā wabānō goquingāā. Ayæ guidiegoidi māniñōmō quēwēnāni inānite odōmonte apænebo ēñencædānīpa, ante apænequingāā. ³⁶ Tōmēngā iñæmpā, “Botō imote ante diqui diqui mīmīni incæte mīnitō botō imote adāmai inguimīni imīnīpa, angampa tōō. Ayæ, Botō go quēwēñōmō

münitö adoyömö dicæ ponguimüniyaa,” ante mäninö ante æbänö ante apæñecantawo, angadänimpa.

Waemö æpæ tayömö ta gopæ mönö quëwenguimcæ impa

³⁷ Ayæ tömëñäni näni ææmæ iinque cæönæ iñonte, Ñænæ ææmæ impa, ante godömenque nanguü cæyönäni Itota iñömö ængæ gantidinqe yedæ yedæ tedecantapa.

—Në gæwænte wæcä iñömö tömengä botö weca poncæcäimpa. Ayæ botö tönö godongämæ becæcäimpa. ³⁸ Æcämenque botö imote në wede pönengä iñömö tömengä quëwenguimæ ænte entawencæcäimpa. Ayæ waemö æpæ tayömö ta gote cægömæ bai tömengä adobai tömengä nänö entawënö godonte bai cædinque, Wadäni bete bai quëwencædänimpa, ante godö cæcæcäimpa. Wængonguü angä ëñente näni yewæmongainö bai ante mänömainö ante impa.

³⁹ Mänömainö ante Itota iñömö, Botö imote në wede pönëñäni inte ayæ ate Wængonguü Öñowoca ingante ænte entawenguinäni inänipa, ante pönëñinqe mäningä Wængonguü Öñowoca ingantedö ante apænegacäimpa. Edæ Itota ayæ wænämaï inte öönædë ocæ ëmænte æidämaï nänö iñedë Wængonguü iñömö Tæiyæ Waemö Öñowoca ingante ayæ da pönönämaï inongäimpa.

Waadäni wæætë godö wæætë godö näni änewënö

⁴⁰ Mäninö nänö äñö ëñëñinqe waodäni pancadäniya,

—Näwängä impa. Mäningä iñömö, Wængonguü beyæ në apæñecä në Ponguingä, ante näni angaingä adocä inongä ingampa.

⁴¹ Ante äñönäni wadäni guiquënë,

—Mönö Codito në Ponguingä, ante näni angaingä mäningä ingampa.

Änäni ëñëñinqe wæætë wadäni,

—Mönö Codito ædö cæte Gadideabæ quëwente pongä ingäa, äñänitapa. ⁴² Iñæmpa mönö Codito iñömö Awënë Dabii pæingä inguingäimpa. Ayæ Bedëë Dabii nänö quëwengaiñömö adoyömö ëñaquingä ingampa, ante Wængonguü angä ëñente näni yewæmongainö ongo adämaï imünitawo.

⁴³ Angä ëñëñinqe waodäni, Itota æcänö ingäa, ante mänömaï wadö wadö ante pönente tedewengadänimpa. ⁴⁴ Pancadäniya, Tömengä ingante bæi ongoïnëmönipa, äñäni incæte tömengä ingante bæi ongonte æñämaï ingadänimpa.

Awënëidi Itota ingante pönëñämaï inönäni

⁴⁵ Wængonguü onco tæiyæ waemö oncönë wææ wänönäni iñömö, Wængonguü quü, ante në godönäni ñænænäni tönö Paditeoidi

weca ocæ ëmænte pönäni. Ocæ ëmænte pönäni adinque tömëñäni,

—Quinante tömengä ingante ænte pönämaï imüni.

⁴⁶ Ante äñönäni wææ wänönäni wæætë,

—Mäningä onguüñængä waa apæñecä bai æcänö adobai tedecä iñömö edæ dæ angampa.

⁴⁷ Änäni ëñëñinqe Paditeoidi guiquënë,

—Tömengä münitö imünite adobai wapiticæ mäocä oda cæte gobaimüni bamünitawo. ⁴⁸ Äñinqe tömëñäni godömenque, Awënëidi incæ Paditeoidi incæ adocanque tömengä ingante pönengä ingantawogaa. ⁴⁹ Nanguü inäni iñömö ongonäni guiquënë tömëñäni në önönäni

inte Wængonguü nänö wææ angainö ante ëñëñämaï inäni inte tömengä ingante pönëñäni inänipa. Mänömaï beyæ tömëñäni Wængonguü nänö pangaimämo ante wæquinäni inänipa.

⁵⁰ Niicodemö iñömö wëñëñedë Itota weca në godingä adobai tömëñäni bai Paditeocä inongä inte apæñecantapa.

⁵¹ —Waocä, Æbänö cæboo, ante nämä beyæ wææ äñämaï iñongante mönö, Tömengä ingante pangæimpa, ante ædö cæte apænte angüü. Edæ, Wææ äñämaï iñongante pangæimpa, ante dicæ wææ yewæmongadäniñäa.

⁵² Ante äñongä tömëñäni,

—Bitö adobai Gadideabæ quëwente ponte bai tedebipææ. Wængonguü beyæ näni yewæmongainta ae. Adinque bitö, Wængonguü beyæ në apæñecä wü Gadideabæ quëwente pongä ingampa, ante dö ëñencæbiimpa, ante angadänimpa.

Onquiyængä nänö towënö

⁵³ Mäninö äñäni ate tömänäni oncönë ocæ ëmænte gogadänimpa.

8

¹ Itota guiquënë Odibowænquidi näni anquidi gocantapa. ² Iimö ate ñäö bayedë tömengä Wængonguü onco ñænænconë yabæconë wæætë pö guicä adinque waodäni tömänäni tömengä nänö ongoñömö goto pönäni adinque Itota tömëñäni inänite odömonte apæñecæte ante tæ contacantapa.

³ Mäniñedë onquiyængä adocanque tömengä nänöogængä inämaï iñongante wacä onguüñængä tönö tæcæ godö guëa mongä adäni ate në odömönäni tönö Paditeoidi iñömö mäningä onquiyængä ingante ænte pönänitapa. Tömengä ingante tæcægedë gö cædäni ongoñongä ⁴ tömëñäni Itota ingante,

—Awënë në Odömömi Imi, iingä onquiyængä iñömö wacä ingante tæcæ godö guëa mongä adäni wæmönipa. ⁵ Wængonguü nänö angainö ante Möitee wodi iimaï ante wææ yewæmongacäimpa. Onquiyænäni

mäningä onquiyængä bai cädäni iñönänite mīnitō tōmēnāni inānite dicaca tacamīni wæncädänimpa. Bitō guiquēnē quīnō ämii.

⁶ Mānīnō ante tōmēnāni iñōmō, Æbānō apæneccā, āninque, Wabānō pancadea wapiticæ tedecæcäimpa, ante cädänitapa. Edæ wapiticæ tedecä iñinque mōnitō, Adocā wēnæ wēnæ cæcä ingampa, ante ancæmōnimpa, ante cädänitapa. Itota guiquēnē ædæ wæænīnque onguipoga tōmengä ōnongompoga yewæmongacäimpa. ⁷ Tōmēnāni godōmenque tōmengä ingante ēñencæte ante āñönāni Itota ængæ gantite tōmēnāni inānite,

—Mīnitō weca adocanque ongōninque nē wēnæ wēnæ cädāmai ingä iñinque mäningä tāno onquiyængä ingante, Wænguimi, ante dicaca tacacæcäimpa, ante angantapa.

⁸ Äninque wæætē ædæ wæænīnque onguipoga yewæmongacäimpa. ⁹ Mānīnō angä nē ēñēnāni iñōmō adocanque wadæ go wacä wadæ go wacä wadæ go tōmānāni wadæ godāni. Picænāni tāno wadæ godāni ayæ wadāni wadæ godānitapa. Tōmānāni dæ godāni adinque Itota adocanque ee ongōñongä onquiyængä ayæ adoyōmō næ gongængantapa. ¹⁰ Itota ængæ gantidinque onquiyængä ingante,

—Æyōmōnō ināni. Bitō imite apænte äninque tacadāmai inānitawo.

¹¹ Äñongä tōmengä wæætē,
—Awēnē, tōmānāni mānōmai cädāmai inānitapa.

Angä ēñēninque Itota,
—Botō adobai bitō imite apænte äninque tacadāmai incæboimpa. Nōwo goe ämopa. Bitō wēnæ wēnæ cæte quēwēnimāmo ñimpo cæte waa quēwē, angacäimpa.

Inguipoga quēwēnāni beyæ Itota ñāo bai iñongäimpa

¹² Ayæ Itota wæætē waodāni inānite apænedinque,

—Botō iñōmō inguipoga quēwēnāni beyæ ñāo bai imodō anguēnē. Æcānō botō miñæ tee empo goda tōmengä wēmō iñōmō cōwē cægōnāmai ingampa. Wæætē tōmengä nānō quēwēnō taadō edonque acæcäimpa, ante botō tōmengä beyæ ñāo bai imopa, ante apænecantapa.

¹³ Paditeoidi guiquēnē tōmengä ingante,
—Bitō iñōmō nāmā äninque, Æbānō imoo, ante apænebi imipa tōō. Mānōmai nāmanque ante apænebi beyæ bitō ānīdō ōnonquedō ante impa, ämōnīpa, pīñānitapa.

¹⁴ Itota wæætē,
—Botō iñōmō nāmā äninque, Æbānō imoo, ante apænebo incæ botō apænedō nāwangä impa. Edæ, Botō æyōmōnō quēwente pōmo imoo, ante ayæ, Ædōnō gobo imoo, ante do ēñēmopa. Mīnitō guiquēnē, Botō æyōmōnō quēwente pōmo imoo, ante ayæ,

Ædōnō gobo imoo, ante wīi ēñēmīnīpa tōō. ¹⁵ Waodānique, Iīmai cädäni, ante nāni wææ ante cægai bai mīnitō wacä ingante apænte ämīni iñinīpa. Botō guiquēnē waodāni tōmānāni inānite adinque, Æcānō waa cæcantawo, ante, Æcānō wēnæ wēnæ cæcantawo, ante apænte ānāmai imopa. ¹⁶ Incæte botō mānōmai apænte ämo bai, Æbānō apænte ämoo, ante pōñēninque tōmēmo nō ante apænte ämopa. Edæ wīi botonque apænte ämopa. Wæætē botō Mæmpo botō imote nē da pōnongaingä iñōmō tōmengä iñōmō botō tōnō godongāmæ cæcä ate apænte ämopa. ¹⁷ Mīnitō mīni wææ yewæmongaintaa iīmai ante wææ yewæmongatimpa. Mēnaa onguīñæna nē adīna inte tōmēna nāna adīnō ante apæneda ēñēninque mīnitō wæætē, Nō impa, ante ēñencæmīnīpa. ¹⁸ Botō iñōmō nāmā äninque, Æbānō imoo, ante apænebo imopa. Ayæ botō Mæmpo botō imote nē da pōnongaingä iñōmō tōmengä botō imotedō ante, Æbānō ingää, ante adobai apæneccā ēñencæmīnīpa.

¹⁹ Angä ēñēninque tōmēnāni tōmengä ingante,

—Bitō Mæmpo æyōmōnō quēwengää.

Äñönāni Itota wæætē,

—Mīnitō iñōmō, Botō incæ æbānō imoo, ante, Botō Mæmpo incæ æbānō ingaingä ingää, ante ēñēmīni iñinīawogaa. Botō æbodō imoo, ante ēñēmīni inte bai mīnitō, Botō Mæmpo æbānō ingaingä ingää, ante adobai ēñēmīni incædōmīnīpa, ante apænegacäimpa.

²⁰ Itota Wængonguī oncō ñæñæncōnē yabæcōnē go guidinque, Wængonguī quī, ante nāni da wencade gäänē ongonte apænedinque mānīnō ante apænegacäimpa. Incæte tōmengä nānō wænguīōnæ wīi oo pōni i beyænque tōmengä ingante bæi ongonte æñāmai ingadānīpa.

Itota, Botō goquīñōmō mīnitō ædō cæte goquīmīni, angä

²¹ Itota wæætē tōmēnāni inānite äninque,

—Botō wadæ goquīmo imopa. Gobo ate mīnitō botō imote ante diqui diqui mīnguīmīni iñinīpa. Mīnitō wēnæ wēnæ cædōmīni inte wæncæmīnīpa. Botō goquīñōmō mīnitō ædō cæte ponguīmīni, angantapa.

²² Mānīnō beyæ oodeoidi awēnēidi, Tōmengä iñōmō, Botō goquīñōmō ante mīnitō ædō cæte ponguīmīni, ante quīnante angää. Tōmengä nāmā incæ, Wængonguīmo, ante pōñēninque iīmai angantawo, ante āñānitapa.

²³ Itota godōmenque,

—Mīnitō iñōmō inguipoga quēwēmīni iñinīpa. Botō guiquēnē ōōnædē quēwente pōmo imopa. Mīnitō iñōmō iñ inguipogaque

näni quëwencabo tönö adomüni imüni. Botö guiquëné ü inguipogaque näni quëwencabo tönö adobo inämaü imopa. ²⁴ Mänömaü beyæ botö, Minitö wënæ wënæ cædömini inte wëncæminüpa, ante münitö imünite apænëtabopa. Botö, Æbänö imoo, ante ämo ëñëninque pönënamäü imüni ünique münitö wënæ wënæ cædömini inte nö wæmaüimüpa.

²⁵ Ante apænecä ëñëninque tömënanü,
—Æbidö imitawo.

Ante äñönäni Itota wæætë,

—Botö do münitö imünite, Æbodö imoo, ante në äniimo imopa. ²⁶ Botö münitö imünitedö ante nanguü angüëñëmo imopa. Münitö imünitedö ante ämo bäi mänüü botö äno müni apænëte angüinque imaimpa. Incæte botö imote në da pönongaingä ünömo tömengä nöingä inte tömengä, Quinö botö imote angäü, ante botö ëñëninö ante botö adodö ante inguipoga quëwënanü inänite apænëbo imopa, angantapa. ²⁷ Incæte tömënanü, Itota tömengä Mæmpo ingantedö ante mönitö imönite apænëcampa, ante ëñënamäü ingadänüpa. ²⁸ Mänömaü beyæ Itota,

—Botö Waobo ëñagäimo ünömo münitö botö imote awäa timpödinque üwadinque gö cæmini wægöñömo münitö mänüñedë edæ, Botö æbodö imoo, ante ëñëncæminüpa. Ayæ botö nämä pönëninque cædämaü imopa. Wæætë Wæmpo näno odömonte apænëdö ante botö imote apænecä botö ëñëninö ante adodö ante apænëbopa, ante münitö adobäü mänüñedë ëñëncæminüpa. ²⁹ Botö imote në da pönongaingä botö imote ëmö cædämaü inte cöwë botö tönö godongämæ ongongä ingampa. Edæ botö cöwë, Æbänö cæbo ate tömengä waa aquingäü, ante cæbopa, ante Itota apænëgacäüpa.

³⁰ Mänünö äñongä nanguü ünäni ünömo tömengä ingante pönëngadänüpa.

Wënæ beyænque në cædäni

³¹ Oodeoidi pancadäniya në pönënanü ünönänite Itota ünömo,

—Münitö cöwë botö odömonte apænëdinö bäi cæmini ünique botö müñæ nö gomüni imaimüpa. ³² Ayæ botö äno nöünö impa, ante ëñëncæminüpa. Mänünö nö botö äno beyænque münitö ünümpo cæte quëwëncæminüpa.

³³ Ante äñongä tömënanü wæætë,

—Mönitö ünömo Abadäo näno pæimöni imönü inte mönitö cöwë wæocä æcämëncque beyænque në cæmöni ünämaü intamönüpa töö. Bitö ünömo, Wacä beyænque münitö godömenque cædämaü inte ünümpo cæte quëwëncæminüpa, ante ædö cæte ämüi.

³⁴ Äñönäni Itota wæætë,

Münitö imünite näwangä ämopa. Në wënæ wënæ cæcä ünömo tömengä wacä beyænque cæte në quëwengä bäi wædongä inte edæ

tömengä näno wënæ wënæ cægäinque ante cædinque ædö cæte aamö cæte goquingäü.

³⁵ Wacä beyænque cæte në quëwengä ünömo tömengä awënë näni wencabo tönö wü cöwë godongämæ quëwengä ingampa. Awënë wengä guiquëné tömengä mæmpo tönö näna wencaya ünä beyænque tömengä awënë tönö cöwë guëa quëwengä ingampa.

³⁶ Mänömaü beyæ Wængongü Wengä münitö imünite ünümpo cæcä ünique münitö nö ünümpo cæte quëwëninque wacä beyænque në cæcä bäi ünämaü inte quëwënguimüni imaimüni.

³⁷ Münitö ünömo Abadäo näno pæimüni imünüpa, ante do ëñëmpo. Incæte botö äno ante mümönë entawënamäü quëwëminü beyæ münitö botö imote, Wænömöni wëncæcäüpa, ante pönëminü imünüpa. ³⁸ Botö ünömo botö Mæmpo weca tömëmo adünö ante münitö imünite apænëbo imopa. Münitö guiquëné müni mæmpo näno angäünö müni ëñëninö ante cæminü imünüpa.

³⁹ Ante apænëyongä tömënanü wæætë,

—Abadäo mönö docä mæmpo ingaingä ingampa.

Änänü ëñëninque Itota,

—Münitö nö Abadäo wëminü inte bäi münitö tömengä näno cægäünö bäi adobäü cæcædöminüpa töö. ⁴⁰ Nöwo ünæmpa botö, Wængongü näwangä näno angäünö ante botö ëñëninö ante münitö imünite në apænëbo ünömotë münitö, Mönitö æbänö cæte wænömöni wænguingäü, ante pönëminü imünüpa. Abadäo mänü müni cægäü bäi cædämaü ingacäüpa. ⁴¹ Münitö ünömo tömëminü mæmpo näno cægäü bäi adobäü cædöminü imünü awëdö.

Äñongante tömënanü,

—Mönitö wü wegöwæ wëmönü imönüpa töö. Wængongü incæ tömengä adocanque mönitö Mæmpo ünongäüpa.

⁴² Änänü ëñëninque Itota tömënanü ünänite,

—Wængongü näwangä münitö Wæmpocä ingä bäi münitö botö imote waadetë pönëncædöminüpa. Edæ botö Wængongü weca quëwente münitö weca ünöwo wææ pontabopa. Botö wü nämä pönëninque pontabopa. Wæætë tömengä botö imote da pönongä pongäümo imopa. ⁴³ Münitö imünite botö quinö apænëbo, ante münitö quünante ëñënamäü imünü. Edæ botö äno ante, Quinö apænëbo, ante münitö babetamö ünäni bäi ünöminü inte ædö cæte ëñënguimünü.

⁴⁴ Wënæ ünömo münitö mæmpo ünongäüpa. Ayæ münitö mæmpo näno cæünëwëno ante münitö adodö ante, Mönitö cæünëmönüpa, ante cæminüpa. Wëëñëdë inguipoga mä badöñedë tömengä, Botö wænongümo, ante do entawengä ingacäüpa. Tömengä, Quinö näwangä impa, ante cöwë änämaü ingampa. Ayæ edæ, Quinö äno nöünö impa, ante tömengä entawënamäü ünongäüpa. Adocä

babæ tededinque tömengä babæ nänö entawënonque ante tedewengä ingampa. Edæ tömengä nē babæ äongä ingampa. Ayæ tömengä iñömö mä babæ angaingä ingampa. ⁴⁵ Incæte botö nāwangä ämo beyænque mīnitö botö äno ante pönēnāmai imīnīpa töö. ⁴⁶ Mīnitö weca ongongä iñömö æcāmenque incæ botö imote apænte äninque, Bitö wēnæ wēnæ cæbi imīpa, ante, Nāwangä impa, ante odömönatawogaa. Botö nāwangä ämo bai mīnitö quīnante botö angainö ante pönēnāmai imīnīpa. ⁴⁷ Wængongui wēnāni nē inönāni iñömö Wængongui nänö angainö ante eñēnāni inānīpa. Mīnitö guiquēnē tömengä wēmīni ināmai imīni beyæ, Tömengä quīnö angää, ante eñēnāmai imīnīpa, ante Itota apænegacäimpa.

Abadäo ayæ eñadāmai iñedē mönö Codito do ingaingä

⁴⁸ Oodeoidi wæætē tömengä ingante,

—Bitö Tämadiabæ quēwēmi imīpææ. Ayæ wēnæ tönö cæbi imīpææ, ante wīl nāwangä ämöni intamönii.

⁴⁹ Ante piñāni eñēninque Itota wæætē apænedinque,

—Botö wīl wēnæ tönö cædömo imopa. Wæætē botö iñömö, Botö Mæmpo ingante waa acæboimpa, ante cæbo imopa. Mīnitö guiquēnē botö imote waa adāmai imīnīpa töö. ⁵⁰ Waodāni, Bitö waëmö imīpa, ante botö imote apænegacädānīpa, ante botö cædāmai imopa. Wæætē wacä iñömö, Waodāni bitö imite apænedinque, Waëmö imīpa, ante apænegacädānīpa, ante nē cæcä ingampa. Māningä nē apænte äongä ingampa. ⁵¹ Mīnitö imīnite nāwangä ämopa. Botö angainö ante nē eñente cæcä tömengä iñömö wantæpiyæ wænāmai quēwencæcäimpa, angantapa.

⁵² Ante apænegä eñēninque oodeoidi,

—Bitö wēnæ tönö cæbi imīpa, ante ñowo ædæmö eñēmönīpa. Abadäo wodi iñæmpa do wængacäimpa. Ayæ Wængongui beyæ nē apænedāni adobai do wængadānīpa. Incæte bitö, “Botö angainö ante nē eñente cæcä tömengä iñömö wantæpiyæ wænāmai quēwencæcäimpa, ante apænebi töö.” ⁵³ Mönö docä mæmpo Abadäo wodi ñænængä inte cægaingä incæte bitö iñömö edæ, Abadäo wædangä iñongante botö iñömö godömenque ñænæmo inte cædömo imopa, ämitawo. Tömengä iñömö edæ do wængacäimpa. Ayæ Wængongui beyæ nē apænedāni adobai do wængadāni apa änewē. Bitö nāmā äninque, Æcāmē bai imoo, ante ämi.

⁵⁴ Äñönāni Itota wæætē,

—Botö nāmā äninque, Waodāni, Bitö waëmö imīpa, ante botö imote apænegacädānīpa, ante eñēnīte wæbo bai waodāni botö imote nāni waa apænedö

wæætē önonquedö ante incædönīpa. Botö Mæmpo incæ mīnitö, Mönö Wængongui ingampa, ante mīni äongä guiquēnē tömengä iñömö, Bitö waëmö imīpa, ante botö imote pönö apænegäcä apa quēwēmīni. ⁵⁵ Mīnitö tömengä ingante wīl ädinque pönēnāmai imīnīpa töö. Botö guiquēnē tömengä ingante do agaïmo inte pönēmo imopa. Botö tömengä ingante adāmai imopa, ante bai botö mīnitö bai babæ ante ancædömoimpa. Wæætē tömengä ingante do adinque nē pönegaïmo inte botö iñömö edæ tömengä nänö angainö bai nē cæbo imopa. ⁵⁶ Inguipoga botö ponguionæ ante mīnitö docä mæmpo Abadäo wodi incæ, Codito ponguionæ pongä acæboimpa, ante pönēninque do edæ watapæ togacäimpa. Ininque tömengä mänionæ Codito nänö ponguionæ ädinque godömenque togacäimpa, ante Itota apænegacäntapa.

⁵⁷ Oodeoidi tömengä ingante,

—Bitö eñagäi iñömö tincoenta wadepo ināmai i incæte bitö ædö cæte, Botö Abadäo ingante atabopa, ante ämii.

⁵⁸ Ante piñönāni Itota wæætē,

—Mīnitö imīnite nāwangä ämopa. Abadäo wodi ayæ eñadāmai iñedē botö iñömö edæ do quēwēmo ingaimo imopa, ante apænegacäntapa.

⁵⁹ Mäninö ante apænegä eñēninque tömēnāni iñömö tömengä ingante dicaca tacacæte ante cædinque dicacoo wææmpo ænānitapa. Incæte Itota wē womöninque Wængongui oncö ñænæncodo tao wadæ gogacäimpa.

9

Babetamö eñagaingä incæ waa bamonte acampa

¹ Itota gomonga godinque onguñængä babetamö eñagaingä ingante acantapa.

² Tömengä emiñænāni iñömö tömengä ingante,

—Awēnē nē Odömömi imi, māningä onguñængä incæ tömengä mæmpoda incæ æcänö wēnæ wēnæ cæda beyæ tömengä babetamö eñacantawo, ante eñencæte ante änānitapa.

³ Itota tömēnāni inānite,

—Inga onguñængä incæ tömengä mæmpoda incæ tömānāni wēnæ wēnæ cædāmai inānitapa. Wæætē tömengä babetamö eñagaingä inte quēwēñongante Wængongui nänö cædö iñömö edonque pönī acäimpa, ante māningä mänömai ingacäimpa. ⁴ Inānāni eñēdāni. Botö imote nē da pönongaingä tömengä nänö cædö ante mönö miñ quēwenganca mönö cæquēnēmö imopa. Mönö wænguionæ iñonte mönö ædö cæte ayæ cæquimö. ⁵ Botö inguipoga

quëwëñedë botö inguipoga quëwënäni beyæ ñäö bai inömo imopa.

⁶ Mäninö ante äninque Itota onguipoga towæ tänöningue wëä wëä gopodinique aquimæ bayonte æninque babetamongä awinca öni öni pæmongantapa. ⁷ Ayæ tömengä ingante,

—Goe. Gäwapæ Tidoeë nani ämæ godinque bitö awinca ñäö mëmöe, ämopa, angantapa. Tidoeppæ nani ämæ iñömö mönö tededö, Da godömæ, ante impa.

Angä ëñente godinique onguïñængä ñä mëmöningue tömengä oncönë ocæ ëmænte pöningue do acä ingacäimpa. ⁸ Tömengä mänömaï do acä inte pongä adinique godongämæ quëwënäni tönö wëñëñedë tömengä, Pönömi æmoe, äñongante në adinani tönö,

—Æ, iingä onguïñængä diyæ, Pönömi ämoedäni, ante në äneconingä wïi adocä ingantawo.

⁹ Änani ëñëninque pancadäniya, —Mäningä ingampa, äñanitapa.

Wadäni guiquënë, —Wïi tömengä ingä, önonque tömengä nänö ëmö bai ëmönongä ingampa.

Ante tedeyönäni onguïñængä tömenganque, —Botö mänimodö inömo imopa, angantapa.

¹⁰ Ayæ tömënäni, —Æbänö cæte bitö waa bamonte abii.

¹¹ Äñönäni tömengä wæætë, —Onguïñængä iñömö tömengä ëmöwo Itota iñömö onguipoga towæ tänöningue wëä wëä gopodinique aquimæ bayonte æninque botö awinca öni öni pæmongantapa. Ayæ botö imote, “Goe. Gäwapæ Tidoeppæ nani ämæ godinique bitö awinca ñä mëmöe” angantapa. Angä ëñëninque botö wadæ gote ñä mëmöningue do waa bamonte abopa, angantapa.

¹² Tömënäni tömengä ingante, —Iingä onguïñængä bitö änogä iñömö æyömönö ingä.

Ante äñönäni tömengä wæætë, —Botö ëñëñämaï imopa, angacäimpa.

Babetamö iingä ingante Paditeoidi ancaä äñäni

¹³ Ayæ Paditeoidi weca onguïñængä në babetamö ëñagaingä ingante ænte mämönäni pongantapa. ¹⁴ Itota mänïi aquimæ badöningue babetamö iingä awinca wi æmonte bai nänö cæönæ iñömö oodeoidi guëmanguïönæ inönimpa. ¹⁵ Mänömaï beyæ Paditeoidi iñömö adobäi ëñencæte ante babetamö iingä ingante edæ, Æbänö cæte bitö waa bamonte abii, ante äñönäni tömengä wæætë,

—Mäningä iñömö aquimæ æninque botö awinca öni öni pæmongantapa. Ayæ botö

tömëmo awinca ñä mëmöningue ñöwo waa bamömo inte abopa, angantapa.

¹⁶ Paditeoidi pancadäniya,

—Iingä onguïñængä iñömö wïi Wængonguï weca quëwente pongä ingampa. Edæ tömengä mönö guëmanguïönæ iñonte guëmänämaï inte do cæcampa, äñanitapa.

Wadäni guiquënë,

—Iñæmpa waocä në wënæ wënæ cæcä inongä inte ædö cæte mänömaï, Acæminimpa, ante mä cæxungä, äñanitapa.

Iininque tömënäni wadö wadö ante pönente tedewengadäniimpa. ¹⁷ Ayæ tömënäni wæætë babetamö iingä ingante,

—Tömengä cæcä ate bitö waa abi inte bitö edæ tömengä ingantedö ante quinö ämii.

Ante äñönäni onguïñængä wæætë,

—Tömengä Wængonguï beyæ në apæneccä ingampa, angantapa.

¹⁸ Babetamö iingä iñömö, Waa bamömo imopa, ante apæneccä ëñëninque oodeoidi awënëidi ayæ pönëñämaï inänitapa töö. Tömengä mæmpoda inate aa pedäni ponte apænedä ate mänïñedë pönëñänitapa. ¹⁹ Tömënäni tömëna inate,

—Iingä onguïñængä edæ minatö wengä ingantawo. Mäningä në babetamö ëñagaingä minatö änogä adocä ingantawo. Æbänö cæte tömengä ñöwo waa bamonte acäi.

²⁰ Ante äñönäni tömengä mæmpoda wæætë, Në babetamö ëñagaingä iñömö tömengä mönatö wengä ingampa, ante ëñëmönäpa. ²¹ Incæte mönatö, Æbänö cæte tömengä ñöwo waa bamonte acäa, ante, Æcänö tömengä awinca wi æmonte bai cæcäa, ante ëñëñämaï imönäpa. Minitö tömengä ingante ëñencæte ante äedäni. Tömengä do picængä ingampa. Tömenganque apæneccä ëñencæminimpa, änatapa.

²² Tömengä mæmpoda oodeoidi awënëidi inänite guïñëninque mäninö ante apænedatapa. Edæ oodeoidi awënëidi iïmaï ante do apænedönäniimpa. Æcänö Itota ingante Ao ante, Mönö Codito ingampa, äna ëñëninque edæ, Mönitö odömöincönë ongönämaï incæbiimpa, ante tömengä ingante da tadömöni tao gocæcäimpa, ante godongämæ pönente apænedönäniimpa.

²³ Mänömaï beyæ tömengä mæmpoda, “Tömengä do picængä ingampa. Minitö tömengä ingante ëñencæte ante äedäni,” angadäimpa.

²⁴ Onguïñængä në babetamö iingä ingante wæætë aa pedäni pongä ate tömengä ingante,

—Bitö Wængonguï ëñëñongä näwangä ante apænee, ämönäpa. Edæ iingä onguïñængä mäninö në cædingä wënæ wënæ cæcä ingampa, ante edæ do amönäpa.

²⁵ Ante piñönäni tömengä wæætë,

—Mäningä wənæ wənæ cæcä incæ wii wənæ wənæ cæcä incæ botö ëñënamai imopa. Botö babetamömo inimo incæ ñöwo waa bamonte abopa. Mäninque ëñëmo imopa.

²⁶ Ante apæncä ëñëninque tömënanï tömengä ingante,

—Tömengä iñömö bitö imite æbänö cæcantawo. Æbänö cæte bitö waa bamonte abii, änänitapa.

²⁷ Tömengä wæætë,

—Minitö iminite do antabopa. Botö äñömote minitö ëñënamai iminipa töö. Quinante wæætë adodö ante ëñëniminï. Minitö adobai, Mönitö tömengä ëmiñæmöni baquimöni, ante äminitawo, ante angantapa.

²⁸ Ayæ tömënanï tömengä ingante piinte wənæ wənæ badete todinque,

—Bitö mäningä ëmiñæmi imipa töö. Mönitö guiquënë Mõitee ëmiñæmöni imöni apa quëwëmii, änänitapa. ²⁹ Wængongui Mõitee ingante apænegacäimpa, ante do ëñëmönipa. Ìngä guiquënë æyömönö quëwente pongäa, ante ëñënamai imönipa.

³⁰ Äñönäni onguifñängä wæætë,

—Mäninö minitö äninö wiwa impa äminï. Tömengä pönö cæcä waa bamonte abo incæte tömengä æyömönö quëwente pongäa, ante minitö ëñënamai iminipa. ³¹ Nè wənæ wənæ cædäni iñömö Wængongui ingante apæneyönäni tömengä tömënanï inänite ëñënamai ingampa, ante do ëñëmompä. Wæætë Wængongui ingante, Bitö adobique mönö Wængongui imidö anguënë, ante nè apæncä iñömö tömengä Wængongui nänö angainö nè ëñente cædongä inte apæneyongante Wængongui tömengä ingante ëñencæcäimpa. ³² Waocä nè babetamö ëñagaingä iñongante wacä tömengä awinca wi æmonte bai cæcä ante æyedëmenque incæ inguipoga quëwënanï dicæ änäni ëñënanitawogaa. ³³ Ìngä onguifñängä iñömö wii Wængongui nänö da pönongä pongaingä inte bai tömengä tömänö cædämai incædongäimpa, angantapa.

³⁴ Mäninö angä ëñëninque tömënanï wæætë,

Bitö ëñagaiñedë do wənæ wənæ cæte ëñagaiimi imipa. Incæte bitö mönitö imönite ædö cæte, Æñencæminimpa, ante odömönte apænebi imipa töö.

Änäni ininque tömënanï, Bitö mönitö odömöincönë ongönämai tao gobäwe, ante tömengä ingante da tadönäni tao gogacäimpa.

Nè babetamö bai inäni inänite ante Itota apæncæcampa

³⁵ Tömënanï tömengä ingante da tadönänipa, ante tededäni ëñëninque Itota tömengä ingante ante diqui diqui minite gote adinque.

—Bitö Waocä nè ëñagaingä ingante pönëmitawo.

³⁶ Angä ëñëninque onguifñängä,

—Awënë, mäningä æcänö inaa. Botö tömengä ingante pönencæboimpa, ante apænebi ëñëmoe.

³⁷ Ante äñongä Itota wæætë,

Bitö tömengä ingante do abitapa. Ayæ bitö imite nè apænebo iñömö tömëmo imopa.

³⁸ Angä ëñëninque onguifñängä,

—Awënë, botö wede pönëmo imopa. Ayæ, Bitö Wængongui Wëmi imidö anguënë, ante tömengä Itota weca ædæ wææninque apæncæcampa.

³⁹ Itota iñömö edæ,

—Botö, Inguipoga quëwënanï æbänö cædäni, ante apænte ancæte ante pöninque iimäi cæbopa. Botö nè babetamönäni bai inäni waa bacædänimpa, ante cædinque pontabopa. Ayæ wæætë, Mönitö waa amönipa, ante nè änäni inänite, botö, Babetamömini bai iminipa, ante edonque odömönæte ante pontabopa.

⁴⁰ Mäninö angä ëñëninque Paditeoidi pancadäniya tömengä weca nè ongönäni guiquënë tömengä ingante,

—Æbänö ämii. Ìñæmpa mönitö adobai babetamömöni bai imönitawogaa.

⁴¹ Ante äñönäni Itota wæætë,

—Minitö babetamömini bai inte bai wənæ wənæ cædämai incædöminimpa. Wæætë minitö, Mönitö waa amönipa, ante nè änömöni inte mini wentamö mongæncoo ee mongæmini inguimimidö anguënë, ante apænegacäimpa.

10

Nè aacä tönö tömengä obegaidi

¹ Itota ayæ iimäi apæncæcantapa. “Minitö iminite näwangä ämpa. Onguifñängä obegaidi nani wææ cæyömö guidëmö nè guidämai inte wæætë wayömö da ëwa æi guicä iñömö tömengä iñömö nè awëmö ö ængä inongä inte adobai wadäni ayönäni nè pö ö ænte gocä ingampa. ² Odëmö nè guicä guiquënë tömengä obegaidi inänite nè aacä ingampa. ³ Nè aacä beyæ odëmö nè wææ cæcä wi ænecampa. Wi ænecä ate nè aacä pö guite tedeyongä obegaidi tömengä nänö tedepämo ëñente inänipa. Tömengä obegaidi inänite nani ëmöwo nani ëmöwo ante aa pecä pönönänite tömengä tömënanï inänite ænte taocampa. ⁴ Tömengä obegaidi tömänäni inänite ænte taodinque tömengä onömæca iñömö täno beyænte gocä ate tömengä obegaidi tömengä nänö tedepämo ëñëninque tömengä ingante tee empo godänipa. ⁵ Wacä ingante guiquënë tömënanï tee empote godämai inänipa. Wæætë wacä nänö tedepämo ëñënamai inäni inte tömënanï tömengä weca

ongönāmai wodii gocædānimpā,” ante Itota apænecantapa.

⁶ Tömengä mänōmai tōmēnāni inānite odōmoncæte ante, Nē aacā æbānō cæcāā, ante odōmonte apænecā incæte tōmēnāni tōmengä nānō āninō ante ēñēnāmai ingadānimpā.

Itota mönō imonte nē Aacā ingä

⁷ Mänōmai beyæ Itota wæætē āninque, “Botō mīnitō imīnite nāwangä āmopa. Botō iñōmō nē obegaidi bai ināni nāni wææ cæyōmō, Guicædānimpā, ante odemō bai imopa. ⁸ Wēēñēfēdē botō ayæ pōnāmai iñēdē wadāni odōmonte apænecæ pongadānimpā. Tōmēnāni tōmānāni waodāni inānite nē awēmō ò ænāni bai inōnāni inte adobai wadāni ayōnāni nē pō ò ænte gogaināni bai ingadānimpā. Incæte waodāni iñōmō nē botō obegaidi bai inōnāni inte nē ò æinēnāni inānite wæætē ēñēnāmai ingadānimpā. ⁹ Botō nē odemō bai imopa. Odemō nē guicā bai iñōmō tōmengä botō imote pōnengä iñongante botō æmo beyænque quēwencæcāimpā. Adocā nē obega bai inte tōmēnāni nāni wææ cæyōmō guidēmō nē guicā bai inique tōmengä piyænē cæte quēwencæcāimpā. Ayæ tōmengä wæætē nē taocā bai inique tōmengä nānō cængui mæ òñō adinque eyepæ cæncæcāimpā,” ante Itota apænecantapa.

¹⁰ Ayæ apænedinque, “Nē awēmō ængä guiquēnē tōmengä iñōmō awēmō æncæte ante pōngä inongä inte adobai wænoncæte ante wo ēwencæte ante māninganca cæcæte ante pōngä ingampa. Botō iñōmō, Waodāni quēwencædānimpā, ante ayæ, Tōmēnāni nāni quēwenguinque ante watapæ pōni quēwencædānimpā, ante pontabopa. ¹¹ Botō obegaidi bai ināni inānite nē waa aacā bai imopa. Nē waa Aacā iñōmō nāmā incæ obegaidi beyænque wæncæcāimpā. ¹² Godonte æinta ante wacā ingante nē cæcā iñōmō tōmengä iñōmō obegaidi nē ēacā ināmai inongä inte nē aacā ināmai ingampa. Mänōmai beyæ adocā iñōmō mēñe bai ingä pōngä adinque tōmengä obegaidi inānite ēmō cæte wodii winongampa. Tōmengä wodii winongä adinque mēñe bai ingä wæætē obegaidi weca pogodo ponte obega ingante yao ongōninqe, Obegaidi pangocæ go-quināni, ante cæcampa. ¹³ Godonte æintaque ante nē cæcā iñōmō, Æbānō cæte obegaidi waa quēwenguināni, ante ānāmai inongä inte edæ wodii winongampa,” ante Itota apænecantapa. ¹⁴⁻¹⁵ Ayæ apænedinque, “Obegaidi inānite waa aacā bai edæ botō iñōmō nē waa Aabo imopa. Botō Mæmpo edæ botō imote do ate pōnengä bai botō adobai tōmengä ingante do adinque pōnēmopa. Ayæ tōmēmo obegaidi bai ināni inānite do adinque tōmēnāni inānite pōnēmopa. Ayæ

tōmēnāni guiquēnē botō imote do adāni inte botō imote pōnēnānimpā. Botō nāmā incæ obegaidi bai ināni beyænque wæncæboimpā. ¹⁶ Ayæ wadāni iñōmō botō obegaidi bai nē ināni incæ wii māniñōmō wææ cæyōmō quēwēnāni inānimpā. Botō māniñāni inānite adobai ænte māmō pōnguēnēmo imopa. Adodāni adobai botō tedepāmo, Æbānō āmoo, ante ēñēnguināni inānimpā. Mänōmai beyæ māniñāni iñōmō do botō quināni tōnō tōmānāni adocabodānique baquināni inānimpā. Ayæ nē Aabo adoboque iñōmō tōmānāni beyæ cæcæboimpā.” ante Itota apænecantapa.

¹⁷ Ayæ apænedinque, “Botō nāmā incæ Ao ante wæninque ñāni òmæmoncæboimpā, ante cædinque wæætē tōmēmo mii quēwengui mo incæboimpā. Mänōmai beyæ botō Mæmpo botō imote waadete pōnengä ingampa. ¹⁸ Waodāni iñōmō ædō cæte botō imote wænonguināni. Botō nāmā incæ Ao āninque wæncæboimpā. Botō nāmā tæi piñæmo iñōmō, Wænguimo, ante nē āmo inōmo imopa. Ayæ adobai botō nāmā tæi piñænte nē āmo inte botō, Ñāni òmæmoncæboimpā, ante cædinque wæætē tōmēmo mii quēwengui mo incæboimpā. Botō Mæmpo iñōmō botō imote nānō wææ angainō botō ēñēninō ante ēñente cæbopa,” ante apænecantapa.

¹⁹ Māniñō apænecā ēñēninque oodeoidi wæætē wadō wadō ante pōnente tedewengadānimpā. ²⁰ Oodeoidi nangui ināni iñōmō, —Tōmengä wēnæ tōnō cæcā inte edæ òmæcacā inongä ingampa. Ædō cæte tōmengä ingante ēñēmīni imīnii.

²¹ Āñōnāni oodeoidi incæ wadāni guiquēnē,

—Tōmengä wēnæ tōnō cæcā inte bai tōmengä iñōmō nānō āninō ante wii angä incædongāimpā. Nē wēnæ inte quēwente cæcā iñōmō babetamōnāni awinca wi æmonte bai cæcā waa bamōnāniyaa.

Oodeoidi Itota ingante Baa ānāni

²² Yogueite tedæ iñonte waodāni Eedotadēē quēwēnāni, Wængongui oncō tæiyæ waēmō oncō ante dodāni mænongadānimpā, ante pōnente ææmæ cæyōnāni. ²³ Itota Wængongui oncō ñænæncōnē yabæcōnē Tadōmōō nāni ānoncōnē iñōmō cægongantapa. ²⁴ Oodeoidi tōmengä weca pō godongāmæ gongænte tōmāni,

—Bitō æbānō imii, ante æpoñædō ayæ āinēnāmai imii. Bitō mōnitō Codito imi inique mōnitō imōnite edonque pōni apænebi ēñēmōnii.

²⁵ Ante āñōnāni Itota wæætē,

—Mīnitō imīnite do antabopa. Incæte mīnitō pōnēnāmai imīnimpā tōō. Botō edæ botō Mæmpo ēmōwo ante bamōnengæ

cæbo adinque mīnitō, Botō æbānō imoo, ante ēfenguēnēmīni Iminīpa. ²⁶ Mīnitō wīl botō obegaidi bai inōmīni inte botō imote pōnēnāmaī imīnīpa tōō. ²⁷ Waodāni botō obegaidi bai nē ināni inte botō tedepāmo, Æbānō āmoō, ante do ēfēnāni. Ayæ botō tōmēnāni inānite adinque pōnēmo iñōmote tōmēnāni wæætē botō imote tee empote godānīpa. ²⁸ Botō adodāni inānite wantæpiyæ nāni quēwenguīnō godōmo ænīnque quēwencædānīmpa. Ayæ cōwē wænāmaī incædānīmpa. Tōmēnāni tōmēmo ōnōnempo ongōñōnānite æcānō tōmēnāni inānite gā pe æmpoda iñōmō edæ dæ angampa. ²⁹ Botō Mæmpo edæ adodāni inānite botō imote nē pōnongaingā inongā ingampa. Tōmānāni wædānāni iñōnāni tōmengā iñōmō godōmenque ñæñængā inte nanguī cædongā ingampa. Inīnque tōmengā ōnōnempo ongōñōnānite æcānō tōmēnāni inānite gā pe æmpoda iñōmō edæ dæ angampa. ³⁰ Botō iñōmō botō Mæmpo tōnō āwocaque bai ēwocamōna imōnāpa, ante Itota apænegacāimpa.

³¹ Mānīnō angā ēfēnīnque oodeoidi wæætē tōmengā ingante dicaca tacacæte ante cædinque dicacoo wææmpo ænānīpa. ³² Tōmēnāni dicacoo wææmpo æñōnānite Itota tōmēnāni inānite,

—Botō mīnitō weca botō Mæmpo nānō angāi bai nanguī bamōnengæ odōmote cætabopa. Ædō botō bamōnengæ cædinō ante adinque mīnitō botō imote dicaca tacacæ cæmīnī.

³³ Ante āñongā oodeoidi wæætē,

—Mānīnō bitō waa cædinō beyæ ante mōnitō wīl bitō imite dicaca tacacæ cæmōnīpa. Wæætē bitō babæ ante Wængonguī ingante godō wēnæ wēnæ āmīpa, ante bitō imite tacacæ cæmōnīpa. Edæ mōnitō waomōni bai inte bitō adobaī waobi imi incæte bitō, Botō Wængonguīmo inōmo imōpa, ante āmīpa tōō.

³⁴ Ante wæyōnāni Itota wæætē tōmēnāni inānite,

—Mīnitō mīni wææ yewæmongainō wīl iīmaī ante yewæmongatīl. “Mīnitō iñōmō wængonguīdi Iminīpa, ante do antabopa,” ante yewæmongadānīmpa. ³⁵ Wængonguī angā ēfēnte nāni yewæmongainō ante waodāni ædō cæte Baa ānīnque wido cæquīnānī. Wængonguī nānō angainō ante apænecā nē ēfēnāni iñōnānite tōmengā, Mīnitō wængonguīdi Iminīpa, angantapa. ³⁶ Ayæ botō Mæmpo botō imote inguīpoga da pōnoncæte ante, Botō adoboque quīmi imīpa, ante botō imote apænte ængacāimpa. Inīnque edæ botō tōmengā quīmo inōmo inte tōmengā nānō nē da pōnongaīmo iñōmote edæ botō imote edæ æbānō anguīl. Iñæmpa botō iñōmō Wængonguī Wēmo inōmo imōpa,

āñōmote edæ mīnitō wæætē, Bitō babæ ante Wængonguī ingante godō wēnæ wēnæ āmīpa, ante quīnante āmīnitawo. ³⁷ Botō edæ Mæmpo nānō cædō bai cædāmaī imo bai mīnitō māñīfēdē botō imote pōnēnāmaī imīni bai waa incædōnīmpa. ³⁸ Mīnitō botō imote pōnēnāmaī imīni incæte botō guīquēnē botō Mæmpo nānō cædō bai adobaī cæbo inīnque mīnitō, Botō æbānō cæboo, ante adinque pōnencæmīnīmpa. Mānōmaī cædinque Botō Mæmpo ingante botō ēwocabo imōpa, ante ayæ, Botō adobaī botō Mæmpo nempo quēwēmōpa, ante ēfēnguīmīni inte ayæ ēfēnīnque pōnencæmīnīmpa, ante Itota angacāimpa.

³⁹ Mānīnō angā ēfēnīnque tōmēnāni wæætē tōmengā ingante bæi ongoncæ cæyōnāni tōmengā do aamō cæte gocantapa.

⁴⁰ Ayæ Eedotadēē wadæ godīnque Oododānō æmæmāa ocæ ēmænte taodīnque tōmengā Wäo wēñēfēdē waodāni inānite æpænē nānō guīdōniñōmō adoyōmō gote ongongā ingantapa. ⁴¹ Ayæ tōmengā māñīñōmō ongōfēdē waodāni nanguī ināni tōmengā weca goto pōnīnque ānānitapa.

—Ate ēfēncæmīnīmpa, ante Wäo wodi cōwē bamōnengæ cædāmaī ingā incæte tōmengā māningā Itota ingantedō ante nānō angainō tōmānō nāwangā ante angantapa, ante apænedānitapa.

⁴² Ayæ māñīñōmō ongōnīnque waodāni nanguī ināni Itota ingante wede pōnēnāni bagadānīmpa.

11

Datado wængāimpa

¹ Māñīfēdē wacā onguīñængā tōmengā ēmōwo Datado wēnæ wēnæ badīnque ōñōnongāimpa. Māadiya tōnō Māadota tōmengā tōñīñada nāna quēwēñōmō tōmengā adoyōmō Betānia iñōmō quēwēnongāimpa.

² Inīngā Māadiya guīquēnē ayæ ate oguī wapæ ænte Awēnē Itota ingante ōni pædinque nāmā ocaguī inte tōmengā ōnōwa amīmō cæquīngā adocā Māadiya iñongā tōmengā tōñīñacā Datado ñōwo wēnæ wēnæ bacā inongāimpa. ³ Inīnque Datado tōñīñada iñōmō, Itota ingante aa pebi pongæ, āna ēfēnte wacā gote,

—Awēnē ēfēni, Bitō nē waadecā iñōmō wēnæ wēnæ ingampa cæbīi, ante ānāpa, ante apænecantapa.

⁴ Mānīnō nāna ānō ante apænecā ēfēnīnque Itota,

—Mānīnō wēnæ wēnæ inte nānō wædō iñōmō wīl wænguī impa. Wæætē waodāni, Wængonguī ñāō apāite ēmōnongā ingampa, ante acædānīmpa. Ayæ botō imote, Bitō Wængonguī Wēmi adobaī ñāō apāite ēmōnōmi imīpa, ante apænecædānīmpa, ante māningā wēnæ wēnæ ingampa, angantapa.

⁵ Mäadota tönö tömengä tönifnacä Mäadiya nana caya inate ayæ Datado ingante Itota tömënäni inänite waadete pönënongäimpa.

⁶ Datado wënæ wënæ ingampa, ante apænecä ëfngä incæte Itota nänö ongönömö adoyömö meönaa ayæ ongongantapa. ⁷ Tömengä ayæ ate tömengä ëmiñänäni inänite,

—Egodöedäni, wæætë Oodeabæ mönö gocæimpa.

⁸ Äñongä tömënäni wæætë tömengä ingante,

—Awënë në Odömömi imi, wantæyö intapa oodeoidi bitö imite dicaca tacacæ cædäni incæte bitö ñowo wæætë, Mänifnömö goquimo, ämitawo.

⁹ Ante änäni Itota wæætë,

—Inæmpa nænque wii tömä itædë apätawo. Itædë në gocä mönö nænque inguipoga apäicä ate beyæ tewardamaï gocampa. Botö inömö itædë gocä bai adobaï mümo botö quëwenganca botö cæquënëno inque cæquinque gobopa. ¹⁰ Woyowotæ në gocä bai guiquënë tömengä wæætë ñäo dæ ä beyæ tewardë bai gocampa, angacäimpa.

¹¹ Mäninö angä ate tömengä godömenque tömënäni inänite,

—Mönö æmigo Datado inömö mö ñongä. Botö ñowo tömengä weca gote, Nani ömæmöe, ämo ñäni ömæmonguingä, ante apænecantapa.

¹² Tömengä ëmiñänäni wæætë tömengä ingante,

—Awënë Itota, tömengä mö ñongä ininque edæ gançæ baquingä, apænecantapa.

¹³ Itota Datado nänö æmæwo wänimämo ante apænecä incæte tömengä ëmiñänäni guiquënë, Datado önonque mö ñongampa, ante Itota apænecampa, ante pönënonänimpa. ¹⁴ Mänömaï beyæ Itota tömënäni inänite,

—Datado æmæwo wängäimpa, ante edonque pöni apænecantapa. ¹⁵ Minitö pönencæminimpa, ante botö, Tömengä wæncæ cæyongä botö tömengä weca ongönämaï intabopa, ante munitö beyæ ante tobopa. Egodöedäni, tömengä weca mönö gocæimpa, angantapa.

¹⁶ Ayæ Tömato Äncadënaque nani äñongä inömö Itota ëmiñänäni wadäni inänite,

—Egodöedäni, äninque, Tömengä tönö godongämæ wæncæte ante tömengä miñæ gocæimpa, angacäimpa.

Itota mönö ömæmonguimämo mönö mü quëwenguimämo ante në pönongä ingampa

¹⁷ Ayæ Itota ponte ëñëñongä, Datado baö tömënäni nani wodintatodë meönaa go meönaa do daga wënanitapa, ante apænecäni ëñengacäimpa. ¹⁸ Betänia inömö nani taadö godö Eedotadëe nani quëwëñömö godö eyequei inönimpa. Mänii

taadö wodo tedete quidömetodo ganca inönimpa. ¹⁹ Oodeoidi nangui inäni inöto Mäadota tönö Mäadiya weca pöninque, Minatö tönifnacä wängä ate wæwëmina incæte piyænë cæte quëwencæminimpa, ante waadete apænecæte ante pönänitapa. ²⁰ Itota oo pöni pongampa, ante änäni ëñëninque Mäadota tömengä ingante bee tæcæte ante gocantapa. Mäadiya guiquënë oncönë ee ongongantapa. ²¹ Mäadota Itota weca pöninque tömengä ingante,

—Awënë Itota, bitö munitö weca ongömi bai botö tönifnacä wii wæncædongäimpa.

²² Tömengä æmæwo wängä incæte bitö ñowo Wængongui ingante quiemë ante apænebi tömengä pönö cæcä ænguimi imipa, ante botö ëñëmopa, ante apænecantapa.

²³ Angä ëñëninque Itota tömengä ingante,

—Bitö tönifnacä wodi ñäni ömæmonguingä.

²⁴ Ante apænecä ëñëninque Mäadota wæætë,

—Ao, inguipoga inque bayedë mönö ñäni ömæmöñedë tömengä do wängäingä incæte ñäni ömæmoncæcäimpa, ante botö do ëñëmopa, angantapa.

²⁵ Itota tömengä ingante äninque,

—Botö në ñäni ömæmonguimo inömo inte cæbo beyænque munitö ñäni ömæmoncæminimpa. Mini wantæpiyæ quëwenguinque ante në Quëwëmo inömo imopa. Botö imote në wede pönängä inömö do wängä incæte ayæ ate wantæpiyæ quëwencæcäimpa. ²⁶ Ayæ në mü quëwängä inte botö imote wede pönängä inömö tömengä cöwë wänämaï quëwencæcäimpa. Bitö mäninö ante pönemitawo.

²⁷ Angä ëñëninque Mäadota tömengä ingante,

—Awënë Itota Ao ämopa, ante apænecantapa. Bitö munitö Codito inömi imipa, ante pönëmopa. Wængongui Wëmi inömi inte bitö inömö edæ, Inguipoga në Ponguingä, ante nani angaimi imipa, ante pönëmopa, ante apænecantapa.

Itota Datado wodintatodë gote wæcä

²⁸ Mänömaï ante apænedinque Mäadota ocæ ëmænte gote Mäadiya ingante aa pecä pongä ate Mäadota tömengä ingante awëmö äninque,

—Mönö në Odömongä do pöninque bitö imite aa pecampa.

²⁹ Angä ëñëninque Mäadiya quingæ ængæ gantite tömengä weca gocantapa.

³⁰ Itota Betänia inömö ayæ guidämaï inongäimpa. Mäadota tömengä ingante nänö bee tēniñömö tömengä adoyömö ayæ a ongönongäimpa. ³¹ Oodeoidi Mäadiya tönö oncönë godongämæ ongöninque, Tömengä piyænë cæcæcäimpa, ante tæcæ waadete apæneyönäni tömengä quingæ ængæ gantidinqe taocä adinque tömënäni,

Tömengä Datado wodi nänö wodintatodē wæcæte ante gocampa, ante pönente tömengä ingante tee empote godänitapa.

³² Itota nänö ongöñömö pöninque Mäadiya tömengä ingante adinque tömengä önöwa ædæ wæænte apænedinque,

—Awënë Itota, bitö mönitö weca ongömi bai botö tönifacä wii wæncædongäimpa, ante wæcantapa.

³³ Mäadiya mänömaï wæyongä oodeoidi tömengä tönö godongämæ nè pöninäni adobaï wædäni adinque Itota wæwente entawëninque wæcantapa. ³⁴ Ayæ,

—Datado wodi baö æyömönö da wëminitawo,

Angä ëñëninque tömëni,

—Awënë Itota, pö æ.

³⁵ Ante äñönäni Itota Ca wæcantapa.

³⁶ Tömengä mänömaï wæcä adinque oodeoidi,

—Aedäni, tömengä Datado wodi ingante nö waadete pönengä ingantapa.

³⁷ Ante tedeyönäni pancadäniya,

—Tömengä iñæmpa nè babetamongä awinca wi æmonte bai cædingä inte adocä Datado wodi ingante cæcä bai tömengä wii wæncædongäimpa, ante wægadänimpa.

Datado nänö ñäni ömëñömömö

³⁸ Itota wæætë wæwente entawëninque Datado wodintatodē pongacäimpa. Tömengä wodido ontatodē i iñonte dicabo ñænængade da pæñæ pönö tee mönodäni. ³⁹ Adinque Itota,

—Dicabo da tæ ñæedäni, äñongä Datado wodi tönifacä Mäadota wæætë,

—Awënë Itota, ëñëmi. Mëönaa go mëönaa tömengä wodido öñöninque tömengä wodi do öö wadingä ingampa.

⁴⁰ Ante wææ angä ëñëninque Itota,

—Bitö wede pönëmi iñinque edæ Wængongi æbänö ñäö apäite ëmönongä inte cæcäa, ante bitö acæbiimpa, ante bitö imite wii antawo, angacäimpa.

⁴¹ Iñinque tömëni dicabo tæ ñænänitapa. Ayæ Itota æmö adinque,

—Mæmpo botö apænedinö ante do ëñëmitapa, ante adinque botö bitö imite waa ate pönëninque apænebopa.

⁴² Botö apænedö ante æyedëmë apænebo incæ bitö cöwë ëñëmpa, ante botö do ëñëmopa. Wæætë edæ waodäni botö weca godongämæ gongænäni beyæ ante botö mäninö ante apænetabopa. Bitö botö imote da pönömi pontabopa, ante tömëni pönecädänimpa, ante apænetabopa.

⁴³ Mänömaïno ante Wængongi ingante apænedinque Itota,

—Datado ta pöe, ante yedæ aa pecantapa.

⁴⁴ Në wæningä iñömö edæ do ta pongantapa. Tömengä önompo weocoo inte nänäni wini wini cædincoo ayæ empodinque

önöwa nänäni wini wini cædincoo ayæ ëwadinque tömengä awinca weocoo nänäni ñäne cæmönincoo ayæ ëmongä inte ta pongä adinque Itota tömëni inänite,

—Mänincoo ñi cæmini gocæe, angacäimpa.

Itota ingante bæi ongonte ængæimpa, ante tedewëñäni

(Mäateo 26.1-5; Mäadoco 14.1-2; Odoca 22.1-2)

⁴⁵ Mänömaï beyæ oodeoidi nanguï inäni Mäadiya weca ëñacæ nè pöninäni inte iñäni iñömö Itota mänömaï cæcä adinque tömengä ingante wede pönëni bagadänimpa.

⁴⁶ Pancadäniya guiquënë Paditeoidi weca godinque, Itota quinö cæcäa, ante adodö angadänimpa. ⁴⁷ Iñinque Wængongi quï,

ante nè godönäni ñænænäni tönö Paditeoidi iñömö wæætë tömëni ömæ nänäni Apænte Äincabo tömännäni inänite, Mönö godongämæ apæñecäimpa, ante adoyömö pödäni, ante äñönäni pönäni adinque tömëni,

—Iñgä iñömö, Acædänimpa, ante nanguï bamönengæ cæcä ingä. Mönö quinö cæquimö.

⁴⁸ Ante wædinque mönö tömengä ingante, Bitö mänömaï godömenge cædämaï incæbiimpa, ante wii wææ ämö iñinque waodäni tömännäni tömengä ingante pönëmaïnäni.

Tömengä ingante pönëni iñinque, Itota oodeoidi Awënë bacæte ante cæcampa, ante pönente wædinque odömänoidi incæ edæ wææ cæbainäni. Iñinque tömëni pöninque mönö tæiyæ waëmö oncö wo ëwëmaïnäni. Ayæ mönö ömæ iñömö mönö quëwencabo incæ nämä nè ämö iñömö tömëni pö ö ænte bai cædinque tömëni nique nè änäni babaïnänipa, äñänitapa.

⁴⁹ Tömëni weca adocanque Caiapato mänii wadepo, Wængongi quï, ante nè godongä ñænængä pöni inongä inte tömengä iñömö,

—Minitö tömänö ante ëñënamäi iminipa töö, apænetapapa. ⁵⁰ Mönö ömæ quëwencabo wii tömämo wængæimpa, ante wæætë tömëmö beyæ ante adocanque onguïñængä wængä iñinque godömenge waa imaimpa, ante minitö ëñënamäi imini inte tedewëñäni awædö.

⁵¹ Mänömaïno ante apænedinque Caiapato mä nänö pönënonque ante wii angacäimpa. Wæætë tömengä mänii wadepo iñonte, Wængongi quï, ante nè godongä ñænængä pöni inongä inte Wængongi beyæ apænedinque, Itota iñömö oodeoidi beyæ ante wæncæcäimpa, ante apænegacäimpa.

⁵² Ayæ wii Oodeabæ quëwënanique beyæ ante wængungä. Wæætë, Wængongi wëñäni wayömö wayömö pangote godinäni inte adodänique badinque adoyömö godongämæ poncädänimpa, ante tömengä wæncæcäimpa. ⁵³ Caiapato mäninö ante

nänö äniönæ iñonte täno godongämæ pönëninge oodeoidi ömæ nani Apænte Äincabo iñömö, Æbänö cæte Itota ingante wænömö wænguingää, ante cöwë tedewënönänimpa.

⁵⁴ Mänömai beyæ Itota ayæ oodeoidi weca wii edonque gocä inongäimpa. Wæætë wadæ godingue tömengä önomæca eyequei Epadaimë nani äñömö godingue mäniñömö tömengä emiñænani tönö ongönongäimpa.

⁵⁵ Wodo pænta gogaiönæ, ante Patowa nani cæönæ oo pöni inönimpa. Mäniñedë Oodeabæ wayömö wayömö quëwënäni nangui inäni Eedotadëë quëwëñömö pö æidinke tömënäni Patowa nani ææmæ ayæ cædämai iñedë dodäni angai bai cædinque, Mönö wënæ wënæ cægainö ante mönö mënongate bai waëmö bacæimpa, ante nämä incæ äcæte ante cædinque æi gogadänimpa. ⁵⁶ Adodäni Wængongui oncö ñænæncönë yabæcönë pö guidinke adiyæ gongæninque, Itota æyömönö ingää, ante pönente gomö adinque nämæneque godongämæ apænedinque,

—Mäningä iñömö ææmæ beyæ ante edæ pönämai ingantawo. Æbänö ante pönëminii, ante apænedönänimpa.

⁵⁷ Wængongui qui, ante godönäni ñænænäni tönö Paditeoidi wæætë waodäni inänite wææ änonänimpa. Æcänö Itota nänö a ongönömö ante në ëñengä iñömö tömengä mönitö imönite angä ëñëninque mönitö wæætë Itota ingante yao ongonte æmaimönipa, ante do wææ änonänimpa.

12

Awënë Itota önöwa ogui wapæ gao cæwacampa

(Mäateo 26.6-13; Mäadoco 14.3-9)

¹ Önompö æmæmpoque go adoönæque ate Patowa nani ämæ bacæ cæyedë Itota Betänia iñömö pongantapa. Itota do angä ate në ñäni ömæmönningä Datado iñömö tömengä adoyömö Betänia quëwëñongäimpa.

² Itota pongä adinque waodäni mäniñömö quëwënäni, Itota ingante waa amönipa, ante tömengä beyæ ææmæ cægadänimpa. Wadäni tönö Datado adobai Itota tönö godongämæ tæ contate cæñönänite Mäadota iñömö tömënäni inänite cængui godongä cæñänitapa. ³ Ayæ Mäadiya iñömö mëedio ditodo ganca nani ogui wapæ öni pæquimæ näadodopæ nänö nangui godonte ænimæ incæ æente mämö Itota önöwa gao cæwadinke tömengä ocagui inte amimö cæcä iñinque oncönë tömancönë ogui waacönë ingatimpa. ⁴ Itota miñæ në gocä adocanque Codaa Icadote nani äñongä iñömö edæ, Itota ingante æncædänimpa, ante odömönte në godonguingä inte ñöwo wææ apænecantapa.

⁵ —Iimæ nänö ogui wapæ quinante ömæpodäni beyæ ante godonte ænämai ingantawo. Iñæmpa waocä adoque wadepo cæte beyæ paga æninque todetiento deënnadiota nänö æñimpota beyæ mänimæ godonte ænimæ imæmpa, ante wæcantapa.

⁶ Tömengä dicæ ömæpodäni beyæ ante pönëninque mäñömainö ante apænecantawogaa. Wæætë tömengä në awëmö æñongä inte mäñinö ante apænecantapa. Tömënäni da wente æintaa nææñongä inte tömengä iñömö, Tömënäni da wëninta incæ pancataa botö qui bacæimpa, ante awëmö æñongä inte mäñömai apænecantapa. ⁷ Itota wæætë tömengä ingante,

—Onquiyängä ingante piinte änewëñämai incæbiimpa. Mänimæ bitö daga wenguiönæ ante manguëñengä inte tömengä botö baö nani daga wenguinque ante eyepæ iñonte öni paacantapa. ⁸ Ömæpodäni cöwë minitö weca quëwënäni inänipa. Botö guiquënë wii cöwë minitö weca quëwëmo imopa, ante apænegacäimpa.

Datado ingante wæñongæimpa, ante tedewëñäni

⁹ Itota Betänia ponte ongongampa, ante apænedäni ëñëninque oodeoidi nangui inäni tömengä weca pönäni incæte wii tömengä beyænque pönänitapa. Wæætë adobai Datado ingante angä në ñäni ömæmönningä ingante acæte ante pongadänimpa. ¹⁰ Mänömai beyæ Wængongui qui, ante në godönäni ñænænäni iñömö, Æbänö cæte Datado ingante adobai wænömö wænguingää, ante godongämæ tedewëñänitapa. ¹¹ Iñæmpa oodeoidi nangui inäni, Datado beyæ mönitö imönite emö cæte Itota ingante pönëninque tömengä gämæñö godänipa, ante wægadänimpa.

Itota Eedotadëë iñömö pongä

(Mäateo 21.1-11; Mäadoco 11.1-11; Odoco 19.28-40)

¹² Iimö ate, Eedotadëë iñömö poncæte ante Itota idömæ pongampa, ante apænedäni ëñëninque ææmæ beyæ ante tæiyænäni pöninäni iñömö, ¹³ yædëmæmäa wangö tate mäo beë tente taodinke yedæ aa pedinque,

—Möni quëwenguinque ante, Badogaa, ante tomönipa. Bitö Awënë Wængongui emöwo beyænque pömi iñinque bitö toquinque edæ Wængongui bitö imite waa cæcæcäimpa. Bitö idægoidi Awënë inömi inte bitö toquinque ingæimpa.

¹⁴ Ante yedæ äñönäni Itota iñömö bodo wengä ate æninque tömengä æi contate pongantapa. Wëñëñedë Wængongui beyæ iimäi ante nani yewæmonte angainö bai iñinque cædinque pongantapa.

15 “Tiöno iñömö quëwëmini iñömö edæ guifënamai ledäni.

Minitö Awënë Odeye ñowo minitö weca pongä aedäni. Edæ bodo wengäa æi contate pongampa,”

ante yewæmongadänimpa.¹⁶ Tömënanî dodäni nâni angai bai cædîngue Itota ingante bee tencæ taodäni adîngue Itota nânö nê emiñænâni iñömö, Æbânö cædâni, ante mânîfedê ëñënamai inte wædönânimpa. Wæætê edæ Itota Wængongui ñäö emöñömö ocæ emænte gocä adîngue tîmengä emiñænâni mânîfedê ate edæ, Itota ingante waodäni ñowo nâni cædönö ante dodäni wëñëñedê yewæmongadänimpa, ante pönente wædönânimpa.

¹⁷ Datado wodi ontatodê ongöñongante Itota, Ta pöe, ante aa pecä ëñëninque nê wæningä incæ ñâni ömæmönîngue ta pongä adîngue Itota weca godongämæ ongönînâni nangui inâni iñömö, Itota mânömai cæcä atamönîpa, ante gode ä gode ä cædönânimpa.

¹⁸ Ìnîngue edæ, Itota mânömai bamönengæ cæcampa, ante apænedäni ëñente beyænque waodäni tæiyænâni Itota weca bee tencæ pönânitapa.¹⁹ Mânömai beyæ Paditeoidi iñömö nâmanque godongämæ tedewëñanitapa.

—Waodäni tîmânâni æbânö tîmengä miñæ tee empo godäni ante aedäni. Mânî beyæ ante, Mönö cædîno wîi eyepæ impa, ante adîngue, Mönö æbânö cæte godömenque cæquimöö, ante wægadänimpa.

Guidiegoidi pancadäniya Itota ingante diqui minâni

²⁰ Eedotadê iñömö tîmënanî ææmæ cæyedê Wængongui ingante waa ate apænecæte ante nê pönâni pancadäniya iñömö guidiegoidi inönânimpa.²¹ Mânînanî iñömö Pedipe weca pönîngue edæ,

—Awënë, ëñëmi. Mönitö Itota ingante ainëmönîpa, ante änânitapa. Mânîngä Pedipe iñömö Betaida quëwëñömö Gadideabæ quëwente pongä ñongäimpa.

²² Tîmengä iñömö Æntade weca gote tîmengä ingante guidiegoidi nâni äñinö ante apænecä ate tîmëna wæætê Itota weca guëa godîngue tîmengä ingante äñöna,²³ Itota wæætê,

—Wængongui nânö cæönæ do ba ñîngue tîmengä pönö cæcä beyænque botö Waobo ëñagäimo iñömö ñäö apäite ëmoncæboimpa.²⁴ Minitö Ìminite nâwangä ämopa. Tîmëmö onguipo quiyadîmö incæ yabæque ñömädämai î bai ædö cæte tä bocate pædîngue tîmëmö nangui pönî ñonguü. Wæætê tîmëmö yabæque ñömäate ate tä bocate pædîngue nangui pönî ñompa. Botö adobai wænguëñemo ñompa. Botö wîi wæmo bai ædö cæte waodäni tæiyænâni botö quînanî baquînanî.²⁵ Nê, Nâmanque

pönente quëwëmote, ante pönengä iñömö edæ tîmengä nânö quëwëngüimämo incæ wo ëwente bacæcäimpa. Inguipoga quëwëñedê nê, Wîi nâmanque pönente quëwëmote, ante pönengä quëwëñê tîmengä nânö wantæpiyæ quëwëngüinö ante do ëdingä inte tîmengä nânö wæñämai quëwëngüinque gocæcäimpa.²⁶ Æcânö botö ñmote nê cæda ñna tîmengä iñömö edæ botö ñmote tee empo goquëñengä ingampa. Ayæ æyömönö botö quëwëmo botö ñmote nê cædongä adoyömö quëwëncæcäimpa. Botö Mæmpo iñömö botö ñmote nê cædongä ingante waa acæcäimpa, ante Itota apænegacäimpa.

Itota, Botö wæncæboimpa, ante apænecä

²⁷ Ayæ godömenque apænedîngue Itota ñîmai apænecantapa. “Botö guifëñämö entawëñîngue wæbo inte quîno angüimoo. ‘Botö Mæmpo ëñëmi, äñîngue, Botö nantate wæwëngüönæ oo pönî ba incæte bitö pönö ö æmi ate wæwëñämai bacæboimpa,’ ante botö wîi mânömainö ante ancæboimpa. Edæ botö wæwëngüinö beyæ ante pontabopa.²⁸ Mæmpo, Bitö æbânö ñäö apäite ëmömî ñmîi, ante odömömi acædänimpa,” angantapa.

Äñongä öönädê ñö tedepämo apænedîngue, “Botö æbânö ñäö apäite ëmömö ñompa, ante do odömöntabopa. Ayæ wæætê adodö cæcæboimpa,” ante apænecä ëñëñanitapa.

²⁹ Mânîiñömö godongämæ ongönâni nangui inâni iñömö mânîmämö ëñëñîngue edæ, Detæbo tæi tîmämö bai impa, ante wædänitapa. Wadäni guiquëñê,

—Anquedo iñömö tîmengä ingante apænecantapa, ante äñânitapa.

³⁰ Itota iñömö wæætê,

—Mânîmämö wîi botö beyæ ante apænecampa. Wæætê minitö beyæ ante apænecampa.³¹ Nöwoyedê Wængongui

inguipoga quëwëñâni inänite apænte nânö panguinö iñömö edæ oo baquîno angüëñê. Inguipogaque quëwëñâni awënë ñîngante wëna ingante Wængongui ñöwoyedê, Gobäwe, angä gocæcäimpa.³² Botö ñmote awäa tîmpodîngue ængæ gantidëñâni wægömo ate botö waodäni tîmânâni inänite, Minitö botö weca poncæmînimpa, ante aa pecæboimpa, ante Itota apænecantapa.

³³ Mânömainö ante apænedîngue tîmengä, Æbânö wænguimoo, ante ëñëncædänimpa, ante apænecantapa.

³⁴ Æñëñîngue mânîiñömö ongönâni nangui inâni,

—Mönitö ñîñæmpa, Mönö Codito cöwê ee ongoncæcäimpa, ante dodäni nâni wææ angainö ante yewæmonte ongompa, ante ëñentamönîpa. Incæte bitö iñömö nâmanque äñîngue, Botö Waobo ëñagäimo iñömote botö ñmote awäa tîmpodîngue gö cædäni wængüimö ñompa, ante ædö cæte ämi.

Äninqe, İngä Waocä nê eñagaingä iñæmpa ee ongönämai wænte goquingäa.

³⁵ Ante wæyönäni Itota tömënäni inänite, —Botö, Waodäni mímönê ñäo bai entawëninque quëwencädänimpa, ante pontabopa. Wæðænque ayæ iñö botö mînitö weca quëwëninge mînitö imînite odömönte apænebopa. Mönitö taadö wëmö badämaï ingæimpa, ante mînitö taadö ayæ ñäo iñedê goedäni. Edæ wëmö iñömö nê gocä iñömö tömengä edæ, Ædönö goboo, ante eñënamäi ingampa. ³⁶ Botö ñäo bai emönömo imopa. Ñäo iñömö nê cægömöni incæmönimpa, ante bacæte ante cædinque mînitö iñömö botö mînitö weca ayæ ongönömöte botö imöte pönëedäni ämopa, angantapa.

Tömengä iinque apænete ate wadæ godinque wê womönte ongongacäimpa.

Oodeoidi Itota ingante iïmai cæte pönënamäi inänipa

³⁷ Itota oodeoidi weca nanguï bamönengæ cæte odömöngä incæte tömënäni ayæ tömengä ingante pönënamäi inänitapa. ³⁸ Wængonguï beyæ nê apæneçä Itaiya wodi iïmai ante do nänö angainö bai iinque baquinque tömënäni mänömaï cædönänimpa.

“Awënë Wængonguï eñëmi. Mönitö apænemöni tömënäni nani eñënö ante edæ æcänö eñente pönengäa. İñæmpa nê pönengä iñömö edæ dæ angä awædö.

Ayæ Awënë Wængonguï nänö tæi piñænte cægainö ante æcänö ada iñömö edæ dæ angampa.”

³⁹ İninque tömënäni ædö cæte pönenguïnänii, ante Itaiya wodi edæ wayömö yewæmöninque, Wængonguï iïmainö ante cæcä beyæ pönënäni inänipa, ante yewæmongacäimpa.

⁴⁰ “Tömënäni botö gämænö ocæ emænte pönäni bai botö wæætê, Waa bacæminimpa, ante godö cæcædömoimpa.

Incæte mänömaï cædämaï incæboimpa, ante Wængonguï iïmai cægacäimpa.

Tömengä godö cæcä beyænque waodäni babetamönäni bai adämaï bagadänimpa. Adobaï mímönê nani pönënö ömædê badinque eñënamäi bagadänimpa.

Edæ, Tömënäni nani adinö ante eñënamäi incädänimpa, ante cædinque ayæ edæ, Tömënäni nani eñënö ante eñënamäi incädänimpa,” ante wææ cægacäimpa.

ante Itaiya wodi yewæmongacäimpa. ⁴¹ Itaiya wodi Itota nänö ñäo emömämo æbänö inguï, ante do ate bai ingaingä inte edæ Itota ingantedö ante mäninö ante doyedê angacäimpa.

⁴² Nöwo guiquëne oodeoidi awënëidi tæiyæñäni Itota ingante pönënanimpa.

Incæte Paditeoidi beyæ guïñënanii inte, Mönö odömöincönê go guiyömönite tömënäni mönitö imönite wii tatodoncädänimpa, ante wææ cædinque tömënäni nê pönënäni incæ waodäni eñëñönäni pæ wëñete tededämaï inänimpa. ⁴³ Edæ mäninäni, Waodäni mönitö imönite waa ate apæneçädänimpa, ante nanguï äinente wædäni inönänimpa. Adodäni, Wængonguï mönitö imönite waa ate apæneçæcäimpa, ante pönömenque äinente wædäni inönänimpa.

Itota nänö äno beyænque waodäni apænte wæcädänimpa

⁴⁴ Itota yedæ äninque aa pecantapa. “Botö imöte nê pönengä iñömö wii botö adoboque imöte pönënongå ingampa. Wæætê edæ botö imöte nê da pönongaingä ingante tömengä adobaï pönengä inongäimpa. ⁴⁵ Adocä botö imöte nê acä iñömö tömengä botö imöte nê da pönongaingä ingante adobaï acä ingampa. ⁴⁶ Botö imöte nê wede pönënäni iñönäni adocanque incæ wëmö iñömö wii godömönque ee ongoncæcäimpa, ante cædinque botö iñömö inguipoga quëwënanii weca ñäo bai inömo inte pontabopa.”

⁴⁷ “Waocä botö äno eñëninge wii eñente cæcä ingä incæte botö tömengä ingante apænte änamäi imopa. Edæ botö wii inguipoga quëwënanii inänite apæneçæte ante pontabopa. Wæætê inguipoga quëwënanii inänite æmo beyænque quëwencæminimpa, ante pontabopa cæminii. ⁴⁸ Botö imöte nê Baa angä iñömö tömengä botö änonö ante, Dicæ pönëmogaa, angä iñongante tömengä ingante nê apænte äno incæ edæ mæ ongompa. Inguipoga iinque baquïönæ iñönte botö äninö incæ nê apænte anguingä bai ba iinque mäningä ingante, Bitö pante wæquingue Baa angabiimpa, ante bai apænete ingæimpa. ⁴⁹ Edæ botö wii namanque pönëninge apænetabopa. Wæætê, Botö quïnö apænequimoo, ante, Æbänö ante apænequimoo, ante botö Mæmpo botö imöte nê da pönongaingä iñömö tömengä botö imöte wææ angä eñëninge apænetabopa. ⁵⁰ Tömengä nänö wææ angainö eñente cæbo beyænque mînitö wantæpiyæ cöwê quëwencæminimpa, ante do eñëmopa. İninque botö Mæmpo botö imöte nänö angainö ante botö adodö ante apænebopa,” ante Itota mäniiñedê iinque apænegacäimpa.

13

Itota incæ tömengä emiñëñäni önöwa mënöwacä

¹ Patowa nani ämæ wantæyö bacäimpa, ante nani cæyedê Itota iñömö, Botö inguipoga quëwente emö cæte botö Mæmpo weca ocæ emænte æi goquïönæ do

bacæimpa, ante do eññongäimpa. Itota ingante pönänani në inguipoga quëwënanani iññänante tömengä tömënanani inänite waadete pönëninque ñöwoyedë, Botö æbänö nangui waadete pönëmo imoo, ante odömongäimpa.

²Gäwadecæ bayö Itota tömengä ëmiñænänani tönö godongämæ cæññönani wënæ awënë cæcä beyænque Timönö wengä Codaa Icadote iññömö, Itota ingante odömonte godoncæboimpa, ante pönenge iñongäimpa. ³ Itota iññömö, Quincoomë ongoncoo incæ Wængongui pönö cæcä beyænque botö tömancoo awënë badinque nämä tæi piñænte në ämo imopa, ante eññongäimpa. Ayæ edæ Wængongui weca quëwente wææ pönimo inte botö Wængongui weca ocæ ëmænte goquimo imopa, ante do eññongäimpa. ⁴ Mäninö ante eññongä incæ tömengä iinque cænte ate ængæ gantidique yabæcoo gä tadongadinque wadæ caaincoo æninque õnõncadeyæ inö goti padengantapa. ⁵ Ayæ ate æpæ mënongaquintadë pe ñiñænininque tömengä ëmiñænänani tömänani õnõwa mënõwadinque wadæ caaincoo goti padëincoo inte wadæ cæwacæ tæcæ cæcantapa.

⁶ Mänömai cædinque tömengä Timönö Pegodo weca pongä adinque adocä iññömö tömengä ingante,

—Bitö botö Awënë imi incæte botö õnõwa mënõwacæ pömitawo.

⁷ Ante äñongä Itota wæætë,

—Ñöwoque botö æbänö cæboo, ante eññänamai imipa. Incæte ayæ ate eññencæbiimpa.

⁸ Angä eññëninque Pegodo,

—Botö õnõwa cöwë mënõwadämai incæbiimpa, ante Baa ämopa cæbii.

Ante äñongä Itota godömenque,

—Botö bitö õnõwa mënõwadämai imo bai bitö wii botö quimi imaimipa, ante angantapa.

⁹ Mäninö angä eññëninque Timönö Pegodo wæætë,

—Awënë, Mänömai i iinque bitö wii botö õnõwaque mënõwaquimi. Wæætë botö õnõmpo adobai mënõmpodinque botö ocabo mënõncae.

¹⁰ Ante äñongä Itota wæætë,

—Æpæ në ädingä iññömö tömengä baö eññayö tömäñö waëmö impa. Iinque tömengä õnõwaque nämanque mënõwacä inte eyepæ impa. Minitö do mimö mënongate waëmö entawënomini iminipa. Incæte wii tömämini waëmö entawëmini iminipa, angantapa.

¹¹ Edæ, Æcänö botö imote në odömonte godonguingä ingäa, ante tömengä do eññongäimpa. Mänömai beyæ tömengä, “Minitö wii tömämini do mënongate waëmö entawënomini iminipa,” angantapa.

¹² Ayæ tömënanani õnõwa iinque mënõwadinque tömengä yabæcoo wëññadinque tömengä adodö gote tæ contadinque tömënanani inänite,

—Botö mänömai cædinque munitö beyæ ante quinö cæboo, ante eññëmunitawo, ante äninque Itota godömenque, ¹³ Minitö botö imote, Në Odömömi imipa, äninque ayæ adobai, Awënë imipa, ämini iminipa. Edæ botö munitö Awënë inõmo iinque munitö mänömaïno ante näwangä ante äminipa. ¹⁴ Botö iññömö munitö Awënë inõmo inte në munitö iminite Odömömo imo incæ munitö õnõwa do mënõwabo aminipa. Iinque botö mänömai mënõwabo bai munitö adobai wacä õnõwa wacä õnõwa mënõwaquënimini iminipa. ¹⁵ Botö cæbo bai munitö adobai cæcæminimpa, ante cædinque botö munitö beyæ ante cæbo aedäni. ¹⁶ Minitö iminite näwangä ämopa. Awënë ñænængä inongä iññongante tömengä ingante në cæcä iññömö wii godömenque ñænængä ingampa. Awënë në da godongä ñænængä iññongä tömengä nänö në da godöningä wæætë wii godömenque ñænængä ingampa. ¹⁷ Minitö ñöwo mäninö ante eññëminini inte edæ ado ante cæmini iinque mini toquinque bacæimpa, ante Itota apæñecantapa.

¹⁸ Ayæ apæñëdinque, “Botö wii tömämini beyæ antabopa. Botö apænte æñinani ædänidö inänii, ante botö në eññëmo imopa. Wængongui angä eññente nani yewæmongaiñö bai iinque bacæimpa, ante iimaï bacæ cæpa. ‘Botö tönö godongämæ në cængongä iññömö botö imote në piinte cæcä bacantapa.’ ¹⁹ Mänömai ba adinque edæ munitö botö imotedö ante apæñëdinque, Tömengä mönö Codito inongä ingampa, ante pönencæminimpa, ante cædinque botö ñöwo ayæ badämai iññedë munitö iminite ämopa. ²⁰ Minitö iminite näwangä ämopa. Æcämenque botö në da godongaingä ingante æna tömengä iññömö edæ botö imote adobai ængä ingampa. Ayæ æcämenque botö imote æna tömengä iññömö botö imote në da pönongaingä ingante ængä ingampa cæminii,” ante Itota apæñecäcäimpa.

Itota ingante Codaa në godonguingä ingampa, ante

(Mäateo 26.20-25; Mäadoco 14.17-21; Odoca 22.21-23)

²¹ Mäninö angä ate Itota iññömö tömengä nänö wæwënamo entawëninque wæcä inte, Näwangä ante apænebo eññëdäni. Mini cabo incæ adocanque, Æncædänimpa, ante botö imote odömonte pædæ godonguingä ingampa.

²² Ante apæñecä wædinque tömengä ëmiñænänani, Æcänö ingante apæñecäa, ante eññänamai inte godongämæ wacä ingä wacä ingä adänitapa. ²³ Itota

ëmiñænäni adocanque iñömö Itota nänö në waadete pönengaingå inongäimpa. Tömengä iñömö Itota tönö äññömonque tæ contate ongönaimpa. ²⁴ Timönö Pegodo iñömö iingä ingante ömö ömö cædinque angampa. Bitö Itota ingante, Æcänö ingää, ante ämi angä ëñente ate apænebi ëñëmönie. ²⁵ Angä ëñëninge mäningä Itota tönö äññömonque në tæ contacä iñömö,

—Awënë, æcänö ingää, ante apænebi ëñëmönie, ante tömengä ingante äñongä.

²⁶ Itota wæætë,

—Botö iï päö owætaca müi cæte godömo në ænguingä iñömö tömengä në cæquingä ingampa.

Ayæ päö owætaca müi cædinque Timönö wë Codaa Icadote ingante godongantapa. ²⁷ Codaa päö ængä ate Tatäna iñömö tömengä do guigacäimpa. Ìnninge tömengä ingante,

—Bitö quinö cæcæ cæbii edæ quingæ cæe, ante Itota angantapa.

²⁸ Wadäni adoyömö në cænäni iñömö, Itota quinante mäniñö ante tömengä ingante angää, ante ëñëñämaï inönänimpa. ²⁹ Edæ Codaa tömëñäni da wente æinta nææñongä ingä beyæ tömëñäni pancadäniya, Ææmæ beyæ ante mönö cængui wii eyepæ ëamöni inique, Bitö godonte æncæbiimpa, ante Itota angampa, ante pönëñänimpa. Adobaï ömæpodäni inänite, Godömi ænguiñänimpa, ante Itota angampa, ante pönëñänimpa.

³⁰ Codaa päö ænte ate tao gogacäimpa. Do woyowotæ inönimpa.

Itota nänö wææ äñönö ante ñöwo angampa

³¹ Codaa dæ gocä adinque Itota,

—Botö Waobo ëñagaïmo inte æbänö ñäö apäite ëmönömo imoo, ante ñöwo edonque bacæimpa. Botö cæquinö beyæ Wængongui æbänö ñäö apäite ëmongä ingää, ante edonque bacæimpa. ³² Ayæ botö cæquinö beyæ Wængongui ñäö apäite nänö ëmönö edonque ba inique Wængongui cæcä ate botö ñäö apäite botö ëmönö adobaï edonque bacæimpa. Ayæ mänömaï Wængongui wantæyö cæcæcäimpa. ³³ Botö wëmüni botö munitö weca wantæyö quëwëninge gobopa. Minitö botö imote ante diqui diqui mingüimüni imünipa. Ayæ odeoidi inänite botö angaiñö bai ñöwo munitö imünite adodö ämopa. Botö goquiñömö ante munitö ædö cæte ponguimüni imünii. ³⁴ Botö wææ äñönö ante ñöwo munitö imünite ämopa. Wacä ingä wacä ingä waadete pönencæmünimpa. Botö munitö imünite waadete pönëñömo bai munitö adobaï wacä ingä wacä ingä waadete pönenguëñemüni imünipa. ³⁵ Minitö wacä ingä wacä ingä waadete pönemüni adinque wadäni tömëñäni, Minitö Itota nänö në

ëmiñæmüni imünipa, ante ëñencædänimpa, ante Itota apænegacäimpa.

Pegodo incæ, Dicæ abogaa, anguingä ingampa, ante

(Mäteo 26.31-35; Mäadoco 14.27-31; Odoca 22.31-34)

³⁶ Timönö Pegodo tömengä ingante,

—Awënë, ædömë gobii.

Ante äñongä Itota wæætë,

—Botö goquiñömö ante bitö ædö cæte botö imote ñöwo tee empo ponguimüni imii. Ayæ ate guiquënë bitö botö imote tee empo ponguimüni incæbiimpa, angantapa.

³⁷ Pegodo godömenque,

—Awënë, äninque, Botö quinante bitö imite ñöwo tee empo godämaï imoo, ante wæcampa. Botö Ao äninque bitö beyæ ante nämä wænguimo imopa.

³⁸ Ante äñongä Itota wæætë,

—Bitö Ao äninque botö beyæ ante näwangä wænguimüni imiyaa. Bitö imite näwangä ante apænebo ëñëe. Tawadiya pedämaï iñonte bitö iñömö botö imotedö, Dicæ abogaa, ante mempoga go adopoque anguimü imipa, ante apænegacäimpa.

14

Mæmpo weca mönö godö ante Itota taadö bai ingampa

¹ Itota tömengä ëmiñænäni inänite, “Mimönë guñente wædämaï iedäni. Wæætë Wængongui ingante wede pönëedäni, angantapa. Ayæ adobaï botö imote wede pönëedäni. ² Botö Mæmpo nänö quëwëñömö onconcoo bacoo pönii mæ ongompa. Mänömaï impa, ante wii näwangä i bai botö munitö imünite ancædömoimpa. Minitö beyæ ante botö, Müni ponte quëwengui onconcoo ante tömää ædæmö badoncæte ante mäniñömö gocæboimpa. ³ Ayæ munitö quëwengui onconcoo tömää ædæmö mænoncæte ante gobo inique botö ocæ ëmænte poncæboimpa. Pönninge munitö botö quëwëñömö adoyömö botö tönö godongämæ quëwencæmünimpa, ante botö munitö imünite ænte mæibo æicæmünimpa. ⁴ Botö goquiñömö æyömönö i, ante ayæ mäniñömö gocæte ante taadö godö ante munitö do ëñëñämaï,” ante Itota apænecantapa.

⁵ Apæncä ëñëninge Tömato iñömö tömengä ingante,

—Awënë, Ædömë goquimii, ante mönitö ëñëñämaï imöni inte mönitö mäniñö bitö goquinö ædönö i, ante taadö ædö cæte ëñenguimünii.

⁶ Äñongä Itota wæætë,

—Botö iñömö tömëmo në taadömo bai inömo imopa. Ayæ botö adobo në näwangä äñö bai inömo bai iñömotë munitö æbänö näwangä impa, ante ëñenguimünii

imīnīpa. Botō edæ nē Quēwēmo inte pōnō cæbo beyænque mīnitō quēwenguimīni imīnīpa. Botō wīl pōnō cæbo bai waocā æcāmenque incæ botō Mæmpocā weca godāmai incædongāimpa. ⁷ Botō imote do ate pōnēmīni īninque mīnitō botō Mæmpo ingante adobai ate pōnēmīni imāimīnīpa. Nōwo tōmengā ingante tæcæ ate bai pōnēmīni inte mīnitō tōmengā ingante cōwē nē agāimīni incæmīnīpa, ante apænecantapa.

⁸ Māninō apænecā ēñēninque Pedipe iñōmō,

—Awēnē, Mæmpocā ingante odōmōmi amōnie. Māninque adinque idæwaa. Eyepæ impa.

⁹ Āñongā Itota wæætē,

—Pedipe ēñēni. Botō mīnitō weca wantæpiyæ quēwēmo incæ bitō ayæ botō imote adāmai inte bai pōnēnāmai imitawo. Nē botō imote acā iñōmō tōmengā adobai Mæmpocā ingante nē acā ingampa. Īninque bitō iñōmō, Mæmpocā ingante odōmōmi amōnie, ante ædō cæte botō imote āmii.

¹⁰ Wæmpocā nempo botō nē quēwēmo imopa, ante ayæ, Wæmpocā ingante botō entawēmo imopa, ante bitō pōnēnāmai imitawo. Botō mīnitō imīnite, Æbānō apæneboo, ante wīl nāmanque pōnēninque apænebopa. Wæætē botō Wæmpocā incæ botō tōnō nē āawocaque bai quēwēnongā inte edæ tōmengā nānō cædō ante nē cæcā ingampa.

¹¹ Tōmengā nempo quēwēmo imopa, ante ayæ, Tōmengā ingante botō entawēmo imopa, ante mīnitō imīnite apænebo ēñēninque pōnēdāni. Wæætē edæ mīnitō botō ānō beyænque ayæ pōnēnāmai imīni incæte botō bamōnengæ nanguī cædinō adinque māninō beyænque pōnēdāni. ¹² Mīnitō imīnite nāwangā āmopa. Botō imote nē wede pōnengā iñōmō tōmengā botō cæbai adobai cæcæcāimpa. Ayæ botō Mæmpocā weca ocæ ēmænte gobo beyæ nē wede pōnengā iñōmō edæ wīl ōnonque botō cæbai cædinque godōmenque cæquingā ingampa.

¹³ Mīnitō botō emōwo ante apænedinque quēmē æncæte ante apænemīni ēñēninque botō Wængonguī Wēmo īnōmo inte edæ, Mæmpocā nānō nāō emōmāmo edonque pōnī acædānīpa, ante cædinque mīnitō ānō bai edæ do cæcæboimpa. ¹⁴ Mīnitō, Ānguimōni, ante quēmē beyæ ante botō emōwo ante botō imo apænemīni ēñēninque do cæcæboimpa, ante Itota apænegacāimpa.

Wængonguī Tæiyæ Waēmō Ōnōwoca poncæcāimpa, ante

¹⁵ Ayæ godōmenque apænedinque Itota īmai ante apænecantapa. “Mīnitō botō imote waadete pōnēmīni īninque botō wææ angainō ante ēñente cæquimīni imāimīnīpa. ¹⁶ Ayæ, Wacā botō beyæ ante mīnitō tōnō godongāmæ cæquingā, ante

botō iñōmō botō Mæmpocā ingante, Da godōmi gocæe, ante apænecæboimpa. Ayæ tōmengā botō ānō ante do ēñente cædinque edæ, Tōmengā mīnitō tōnō cōwē ongonte godongāmæ cæcæcāimpa, ante cædinque adocā ingante mīnitō weca do pōnongā ponguingā ingampa. ¹⁷ Wængonguī nē nō cæcā ingampa, ante nāwangā impa, ante Wængonguī Tæiyæ Waēmō Ōnōwoca incæ nē odōmōngā īnongā ingampa. Incæte waodāni nē inguipogaque quēwēnāni iñōmō tōmengā ingante adāmai īnāni inte pōnēnāmai īnōnāni inte edæ ædō cæte tōmengā ingante Ao ante ænguīnānīi. Wæætē edæ tōmengā mīnitō weca quēwēnongā iñongante mīnitō tōmengā ingante nē entawenguimīni inte tōmengā ingante do ate bai pōnēmīni imīnīpa,” ante Itota apænecantapa.

¹⁸ Ayæ apænedinque, “Botō wīl mīnitō nōwamīni bai mīni baquinque ante edæ emō cæte goquimo imopa. Wæætē mīnitō weca ocæ ēmænte poncæboimpa. ¹⁹ Wantæ ate waodāni nē inguipogaque quēwēnāni iñōmō edæ botō imote adāmai inguīnāni īnānīpa. Mīnitō guiquēnē botō imote aquimīni imīnīpa. Edæ botō quēwēmo beyænque mīnitō adobai quēwēncæmīnīpa.

²⁰ Ayæ Wængonguī Tæiyæ Waēmō Ōnōwoca nānō ponguīōnæ īnōnte mīnitō iñōmō edæ, Mōnō æbānō āanque bai quēwēmo imōo, ante ēñencæmīnīpa. Edæ, Botō Mæmpocā nempo quēwēmo imopa, ante ayæ edæ, Mīnitō botō nempo quēwēmīni imīnīpa, ante ayæ, Mīnitō imīnite adobai botō entawēmo quēwēnōmīni imīnīpa, ante mīnitō ēñencæmīnīpa. ²¹ Æcānō botō wææ angainō ō æninque ēñente cæda tōmengā iñōmō botō imote nē waadete pōnengā ingampa. Botō imote nē waadete pōnengā ingante botō Mæmpo nāēmæ waadete pōnencæcāimpa. Ayæ botō adobai māningā ingante waadete pōnencæboimpa. Ayæ, Botō æbānō imoo, ante tōmengā ingante odōmōmo acæcāimpa,” ante Itota apænecantapa.

²² Codaa iñōmō edæ wīl Codaa Icadote wacā Codaa iñōmō edæ Itota ingante apænecantapa.

—Awēnē iñēmpa bitō mōnitō imōnīte apænedinque, Botō æbānō imoo, ante odōmōmo acæmīnīpa, āninque quīnante wæætē, Inguipogaque quēwēnāni īnānīte odōmōnāmai incæboimpa, ante pōnēninque cæbitawo, angantapa.

²³ Itota wæætē,

—Wacā botō imote nē waadete pōnengā īninque tōmengā iñōmō botō odōmōnte apænēdō ante ēñente cædongā imaingampa. Botō Mæmpo adocā ingante waadete pōnenguingā ingampa. Ayæ mōnatō tōmengā tōnō cōwē godongāmæ quēwēncæte ante tōmengā weca ponguimōna imōnāpa.

24 Botó imote në waadete pönēnāmai ingā guiquēnē tömēngā iñōmō botó odōmonte apānedōnō ante ēñēnāmai cædongā ingampa. Mānīnō botó odōmonte apānebo mīni ēñēnīnō iñōmō wīi botó nāmā pönēninque apānedīnō impa. Wæætē botó imote në da pōnongaingā nānō angaiñō impa, ante Itota apānecantapa.

25 Ayæ apānedinque, “Mīnitō weca botó quēwēñedē botó mānīnō ante mīnitō imīnite apānetabopa. 26 Botó Mæmpocā botó ēmōwo beyæ ante tömēngā Tæiyæ Wæmō Ōñowoca ingante da pōnongā ponguingā inte tömēngā mīnitō tōnō godongāmæ në cædongā ingampa. Adocā mīnitō imīnite tömānō ante odōmonte apānecā ēñēncæmīnīmpa. Ayæ botó apānedō mīni ēñēnīnō tömānō ante tömēngā adodō apānecā wæætē pōnencæmīnīmpa,” ante Itota apānecantapa.

27 Ayæ apānedinque, “Botó pōnō cæbo beyænque mīnitō gānē entawente quēwēñedāni, ante pōnō cædinque gobopa. Botó gānē entawēmāmo incæ mīnitō imīnite pōnōmo æninque mīnitō gānē pōnente quēwēncæmīnīmpa. Botó inguipogaque quēwēñāni nāni godōñō bai wīi pōnōmo imopa. Nō cæte pōnōmo imopa. Mīnitō mīmōnē guīñente wædāmai inte piyāñē cæte quēwēncæmīnīmpa. 28 Botó mīnitō imīnite ēmō cæte godinque mīnitō weca ocæ ēmænte poncæboimpa, ante botó apānebo ēñēmīnitapa. Botó edæ, Botó Mæmpocā weca gocæboimpa, ante apānebo ēñēnīmīni inte mīnitō botó imote waadete pönēmīni inique botó beyæ ante watapæ tobaīmīnīpa. Edæ botó wīi botó Mæmpo bai inōmo inte wædāmo inōmo imopa. 29 Mānōmai iinque ba adinque mīnitō, Nāwangā impa, ante pōnencæmīnīmpa, ante botó ñowoque ayæ badāmai iñedē mīnitō imīnite apānetabopa,” ante Itota apānecantapa.

30 Ayæ apānedinque, “Ii inguipogaque quēwēñāni awēñē iñōmō wēnæ inongā inte oo poncæ cæcampa. Iinque botó mīnitō imīnite wīi wantæpiyæ ayæ apānebopa. Edæ tömēngā ædō cæte botó imote nāmā tæi piñēnte në angā inguingā. 31 Incæte botó, Waodāni inguipogaque quēwēñāni iñōmō iīmai ante ēñēncædānīmpa, ante cæbopa. Botó Mæmpo ingante botó waadete pönēmopa, ante ayæ, Botó Mæmpo botó imo wææ angā bai botó adodō cæbo imopa, ante tömēñāni ēñēnguēñēñāni inānīpa,” ante Itota iinque apānegacāimpa.

Ayæ, “Ñowo edæ ængæ gantidinque mōñō gocæimpa,” angacāimpa.

15

Itota nāwā yowementa bai ingampa

1 Ayæ godōmenque apānedinque Itota iīmai apānecantapa. “Botó nāwā yowementa bai imopa. Ayæ botó Mæmpo yowementa në aacā bai ingampa. 2 Botó imote pönēñāni tömāñāni iī yowementa gædēmænto bai inānīpa. Æcāñō wīi botó ēmīñængā bai cæda tömēngā iñōmō gædēmænto ōmæcato bai ingampa. Botó Mæmpo gædēmænto ōmæcato bai iñongante wangō topæte bai cædinque tömēngā ingante wido cæcampa. Æcāñō botó ēmīñængā bai cæda guiquēnē tömēngā gædēmænto tömenca incato bai ingampa. Gædēmænto tömenca incato incæ godōmenque waa pædinque nanguī incacæimpa, ante wææ topæ wææ topæ cædāni bai botó Mæmpo iñōmō adobai cæcampa. Botó në ēmīñængā wīi eyepæ cæcā adinque tömēngā ingante wadæ cæcampa. 3 Botó äñō ante mīnitō imīnite botó apānedīnō beyæ mīnitō mīmōnē do mēnongate quēwēñāni imīnīpa. 4 Mīnitō botó nempo ee quēwēñōmīni incæmīnīmpa. Ayæ adobai mīnitō botó imote cōwē entawente quēwēñōmīni imīnīpa. Gædēmænto yowementa adoyōmō ibænte odæ yate bai pæte incate bapa. Edæ gædēmænto adotoque iñonte ædō cæte nāmā cædinque incaquintoo. Mīnitō iñōmō, Tömenca incate bai mōñō nanguī cæcæimpa, ante cædinque botó nempo ee quēwēnguēñēmīni imīnīpa,” ante Itota apānecantapa.

5 Ayæ apānedinque, “Botó yowementa bai imopa. Mīnitō guiquēñē gædēmænto bai imīnīpa. Waocā botó nempo ee quēwēñōngā inte ayæ botó imote cōwē entawēñōngā ingā iinque tömēngā tömenca incate bai nanguī cæbaingampa. Wæætē edæ botó nempo quēwēñāmai imīni iinque mīnitō tömāā cædāmai imāīmīnīpa tōō. 6 Nē botó nempo ee quēwēñāmai ingā iñōmō tömēngā gædēmænto nāni wido cædinto bai ingampa. Mānīnto amīmō bayonte gæte māmō gongapamō ñō cædāni wo bæco bai cædinque tömēngā ingante botó Mæmpo adobai wido cæcā ingampa,” ante Itota apānecantapa.

7 Ayæ apānedinque, “Mīnitō guiquēñē botó nempo ee quēwēñinque botó angaiñō ante ee entawente quēwēñāni iinque mīnitō quiēmē æncæte ante äñēmīni incæ Wængonguī ingante apāñēmīni inte tömēngā wæætē pōnongā æmaīmīnīpa. 8 Mīnitō nanguī pōñi tömenca incate bai imīni inte, Mīnitō botó ēmīñæmīni imīnīpa, ante edonque pōñi ingæimpa. Mānōmai cæmīni iinque, Botó Mæmpo ñāō apāite ēmōnongā ingampa, ante odōmonte ingæimpa. 9 Botó Mæmpo iñōmō botó imo waadete pönēngā ingaingā bai botó adobai mīnitō imīnite waadete pönēmo intabopa. Botó në waadete pönēmo iñōmote mīnitō iñōmō botó

nempo ee ongödäni. ¹⁰ Botö Mæmpo në waadecä iñongante botö tömengä nänö wææ angainö ante ëñente cædimö inte tömengä nempo ee ongömpa. Minitö adobaï botö në waadete pönëmo iñömote minitö botö wææ angainö ante ëñente cæmini iñinque edæ botö nempo ee ongömini imaiminipa,” ante Itota apænegacantapa.

¹¹ Ayæ apænedinque, “Botö watapæ topämo ante minitö mïmönë entawëninque watapæ tocæmininipa, ante ayæ, Mïni watapæ topämo eyepæ ingæimpa, ante botö minitö iminite mäninö ante apænetabopa. ¹² Botö wææ äno iñömö iïmai ante impa. Minitö iminite botö waadete pönëninö bai minitö adobaï wacä ingä wacä ingä waadete pönëedäni. ¹³ Æcänö nänö æmigoidi beyæ ante, Botö Ao äninque nämä incæ tömënäni beyæ ante wænguimö, ante cæcä iñömö tömengä nänö waadete pönëmämo wïi waodäni tömänäni waadete pönëmämo bai impa. Tömengä iñömö edæ godömenque nanguï waadete pönengä ingampa. ¹⁴ Minitö botö wææ angainö ëñente cæmini iñinque botö guidëminï imaiminipa. ¹⁵ Minitö botö imo në cædöminï iminipa, ante botö minitö iminite godömenque apænedämai imopa. Edæ awënë ingante në cæcä iñömö, Awënë æbänö cæcä, ante ëñënamaingä ingampa. Wæætë edæ botö Mæmpo nänö angainö ante botö ëñëninö tömänö ante minitö iminite apænebo ëñëminï beyæ botö, Minitö botö guidëminï iminipa, ante apænedimo imopa. ¹⁶ Minitö wïi botö imote apænte ænimini iminipa. Wæætë botö iñömö, Minitö botö ëmïñæminï inöminï inte tömenca nanguï incate bai nanguï cæcæmininipa, ante minitö iminite apænte ænimö imopa. Minitö botö ëmïñæminï inöminï inte cöwë cæmini iñinque minitö qulëmë ante botö ëmöwo beyænque apænemini ëñëninque Mæmpocä iñömö do pönongä æncæmininipa. ¹⁷ Botö wææ äno iñömö iïmai ante impa. Minitö wacä ingä wacä ingä waadete pönëedäni,” ante Itota apænegacäimpa.

Inguipogaque në quëwënäni Itotaidi inänite nani pïimämo

¹⁸ Mänömaïno ante apænedinque Itota godömenque iïmai ante apænegacantapa. “Inguipogaque në quëwënäni iñömö minitö iminite pïinäni adinque minitö guïñënamäi inte edæ, Itota ingante do pïngadänimpa, ante pönëminï iminipa. ¹⁹ Waodäni në inguipogaque quëwënäni nani cabo wacä ingä wacä ingä waadete pönënanï inänipa. Minitö inguipogaque nani quëwencabo tönö adomini imini bai tömënäni minitö iminite adobaï waadete pönencædönänimpa. Wæætë minitö inguipoga nani quëwencabo tönö adomini inämai iminipa. Iñæmpa wëñëñedë minitö

inguipoga quëwëñöminite botö do minitö iminite apænte æntabopa. Mänömai beyæ në inguipogaque quëwënäni iñömö minitö iminite pïinäni inänipa. ²⁰ Botö äno ante minitö iminite, Æbänö apæneboo, ante ñöwo wæætë pönëedäni. ‘Awënë ñænængä inongä iñongante tömengä ingante në cæcä iñömö wïi godömenque ñænængä ingampa.’ Waodäni botö imote pïinäni wæwëmo bai minitö iminite adobaï pïinäni wæwëminï incæmininipa. Botö odömonte apænegainö ante ëñente cædäni bai minitö odömonte apænedö ante adobaï ëñente cæcædänimpa. ²¹ Minitö botö quimini iñöminite edæ botö ëmöwo beyænque iïnäni, Botö imote në da pönongaingä, Æbänö ingä, ante ëñënamäi inäni inte mänömai edæ cæquïnäni inänipa,” ante Itota apænegacantapa.

²² Ayæ apænedinque, “Botö tömënäni inänite wïi ponte apænebo bai tömënäni nani wentamö mongænguimämo mongænämäi incædönänimpa. Ñöwo iñömö, Botö apænebo në ëñëninäni inte tömënäni nani wentamö mongæmämo do mongænänipa. Iñæmpa Itota apænegä ëñënamäi imönipa, ante adö cæte anguinäni. ²³ Botö imote në pïingä iñömö tömengä adobaï botö Mæmpocä ingante pïingä ingampa. ²⁴ Wacä, Botö bamönengæ botö cæbai adobaï cæcä iñömö cöwë dæ angampa. Iñinque botö wïi tömënäni weca bamönengæ cæbo bai tömënäni nani wentamö mongænguimämo mongænämäi incædönänimpa. Incæte, Botö æbänö cæboo, ante do adäni incæ tömënäni botö imote pïiniquë botö Mæmpo ingante adobaï pïinänitapa. ²⁵ Dodäni nani wææ yewæmongaintaa yewæmöninque iïmai ante nani apænegainö bai ñöwodäni nani cædö beyæ edæ iñque batimpa. ‘Botö imote önonque pïinänitapa,’ ante yewæmongadänimpa,” ante Itota apænegacantapa.

²⁶ Ayæ apænedinque, “Botö edæ botö Mæmpo weca ocæ ëmænte gote ate minitö beyæ ante minitö tönö godongämæ cæquingä ingante da pönoncæboimpa. Mäningä iñömö Wængonguï Tæiyæi Waëmö Önöwoca inongä inte edæ, Æbänö näwangä i, ante apænegä ëñencæmininipa. Tömengä botö Mæmpo weca quëwente ponguingä ingampa. Pöninque tömengä, Botö æbänö cæboo, ante apænegä ëñencæmininipa. ²⁷ Minitö adobaï wëñëñedë botö mä cæyedë do botö miñæ godimini imini inte edæ, Botö æbänö cæboo, ante apænequëñëminï iminipa,” ante Itota tömengä nänö në ëmïñænäni inänite apænegacäimpa.

16

¹ Godömenque apænedinque Itota iïmai apænegacantapa. “Minitö oda cædämai

tæi gongænte ongoncæminimpa, ante cædinque botō mīnitō imīnite mānīnō ante tōmānō apænetabopa. ² Mīnitō odōmōincōnē go guiyōmīnite wadāni, Mōnitō tōnō godongāmæ ongōnāmai iedāni, ante mīnitō imīnite tatodōnāni gocæminimpa. Wī mānīnonque cæquīnānimpa. Wæætē iincayæ ate æcāmenque mīnitō imīnite nē wænonguīna ina iīōmō tōmengā, Botō Wængonguī nānō cædō ante cæbopa, ante pōnencæcāimpa. ³ Botō Mæmpo ingante wī adinque pōnēnāmai ināni inte ayæ botō imote adāmai inte bai pōnēnāmai ināni iīōmō tōmēnāni iīōmō mīnitō imīnite mānīnō cæquīnāni inānipa. ⁴ Edæ mānīōnæ bayonte mīnitō, Botō wææ angainō ante æbānō āmo, ante wæætē pōnencæminimpa, ante botō mīnitō imīnite mānīnō ante do apænetabopa,” ante Itota apænegacāimpa.

Wængonguī Tæiyæ Waēmō Ōnōwoca nānō cædō

Ayæ godōmenque apænedinque Itota iīmai apænecantapa. “Mīnitō tōnō wēēñēdē godongāmæ ongōmo beyæ botō mānīnō ante māñīñedē apænedāmai intabopa. ⁵ Botō imo nē da pōnongaingā weca botō ñōwo pōni ocæ ēmænte goquīmo incæte, Bitō æyōmōnō goquīmi, ante mīnitō tōmāmīni botō imote ānāmai imīnipa. ⁶ Botō mānīnō āmo beyæ mīnitō nangui pōni wæwēmīni imīnipa. ⁷ Incæte botō mīnitō imīnite nāwangā āmopa. Mīnitō beyæ waa ingæimpa, ante botō goquīmo imopa. Botō wadæ godāmai imo bai mīnitō tōnō godongāmæ nē cæqingā iīōmō mīnitō weca pōnāmai incædongāimpa. Wæætē edæ cōwē goquīmo inte godinque botō tōmengā ingante mīnitō weca da pōnōmo ponguingā ingampa. ⁸ Pōninque Wængonguī Tæiyæ Waēmō Ōnōwoca cæcā beyænque inguipogaque quēwēnāni, Mōnō wēnæ wēnæ cædōmō inte wentamō mongæmō awædō, ante wæcædānimpa. Ayæ tōmengā cæcā beyænque, Wængonguī weca æcānō nō cæte quēwēna ina, ante ēñencædānimpa. Ayæ Wængonguī apænte ante pancæcāimpa, ante adobai ēñencædānimpa. ⁹ Edæ botō imote nāni pōnēnāmai iñō beyænque inguipogaque quēwēnāni iīōmō edæ, Mōnō wēnæ wēnæ cædonque ante cædinque pōnēnāmai imopapa, ante wæcædānimpa, ante adocā cæcæcāimpa. ¹⁰ Ayæ edæ, Botō iīōmō botō Mæmpo weca gote quēwēñomote mīnitō botō imote adāmai inguīmīni imīnipa. Iīnque botō Mæmpo weca gote quēwēmo beyæ Wængonguī Tæiyæ Waēmō Ōnōwoca incæ, Æbānō nō cæte quēwengūi, ante inguipogaque quēwēnāni inānite odōmōnte apænecā ēñencædānimpa. ¹¹ Ayæ inguipogaque quēwēnāni awēñē iīongante wēnæ ingante

Wængonguī, Botō pancæboimpa, ante do apænte angacāimpa, ante Wængonguī Tæiyæ Waēmō Ōnōwoca godō odōmōnte apænecā beyænque ēñencædānimpa,” ante Itota apænecantapa.

¹² Ayæ apænedinque, “Botō mīnitō imīnite nangui ayæ apæneinente wæbo incæte mīnitō ñōwo ganca ædō cæte ēñenguīmīni. ¹³ Wængonguī Tæiyæ Waēmō Ōnōwoca pongā ate tōmengā iīōmō, Æbānō nāwangā impa, ante tōmānō ante mīnitō imīnite odōmōnte apænecā ēñencæminimpa. Adocā, Æbānō apænequīmo, ante wī nāmā pōnēninque apænecæcāimpa. Wæætē Wængonguī tōmengā ingante angā nānō ēñēñinō ante Wængonguī Ōnōwoca iīōmō mānīnonque ante mīnitō imīnite odōmōnte apænecā ēñencæminimpa. Ayæ, iincayæ ate æbānō baquī, ante tōmengā mīnitō imīnite apænecā ēñencæminimpa. ¹⁴ Botō æbānō ñāō apāite emōnōmo imopa, ante edonque pōni bacæimpa, ante cædinque tōmengā iīōmō botō entwawēnō ante mīnitō imīnite odōmōnte apænecā ēñencæminimpa. ¹⁵ Botō Mæmpo nānō ēadoncoo iīōmō edæ tōmancoo botō quīncoo impa. Mānōmai beyæ iīmai apænetabopa. Tōmēmo entwawēncoo ante Wængonguī Ōnōwoca iīōmō mīnitō imīnite odōmōnte apænecā ēñencæminimpa, ante apænetabopa,” angantapa.

¹⁶ “Ayæ wantæ ate mīnitō botō imote adāmai inguīmīni imīnipa. Ayæ ate wantæyō iīonte botō imote wæætē acæminimpa,” ante Itota apænegacāimpa.

Mīni wæwēmāmo incæ wæætē mīni toquinque bacæimpa

¹⁷ Tōmengā ēmīñēnāni pancadāniya nāmanque godongāmæ apænedinque,

—Mānīnō āninque tōmengā, Mīnitō wantæ ate botō imote adāmai inguīmīni imīnipa, ante æbānō ancæte ante apænecā, ante wædānitapa. Ayæ, Wantæ iīonte mīnitō botō imote wæætē acæminimpa, ante ayæ, Botō Mæmpo weca gote quēwēmo beyæ impa, ante Itota apænecā awædō, ante apænedānitapa. ¹⁸ Tōmēnāni wæætē wæætē, Mānīnō tōmengā, Wantæyō, ante nānō ānō iīōmō edæ æbānō ante apænecā, ante wædānitapa. Tōmengā æbānō ancæte ante apænecā, ante ēñēnāmai imōnipa, ante wædānitapa.

¹⁹ Tōmēnāni mānīnō ante pōnēninque botō imote ēñencæte ante āñēnāni inānipa, ante wædinque Itota tōmēnāni inānite,

—Wantæ ate mīnitō botō imote adāmai inguīmīni imīnipa, ante botō ānō ante ayæ, Wantæyō iīonte mīnitō botō imote wæætē acæminimpa, ante botō æbānō āmo, ante mīnitō nāmanque godongāmæ tedemīnitawo. ²⁰ Mīnitō imīnite nāwangā āmopa. Inguipogaque quēwēnāni iīōmō watapæ

toyönäni munitō caate wæquimīni inte Ca ca wæcæmīnīmpa. Minitō wæwengulmīni imīnīpa. Incæte mīni wæwēmāmo incæ mīni toquinque bacæīmpa. ²¹ Onquiyængā iñōmō tōmēngā wēñæ ēñacæ cæyēdē nangui nantate wæcā inte wæwēngā bacā incæte tōmēngā wēñæ ēñacā adinque tōmēngā, Botō wē ēñacā ingampa, ante watapæ tote beyæ tōmēngā nāno wædinō ante edæ pōnēnāmaī ingampa. ²² Minitō tōmēngā bai adobai imīnīpa. Nōwoyēdē mīni caate wæyēdē impa. Incæte botō wæætē munitō imīnite aquīmo imōpa. Mānōmaī beyæ munitō watapæ tocæmīnīmpa. Māniñedē, Minitō todāmaī incæmīnīmpa, ante æcāmenque incæ wææ cædāmaī incæcāīmpa.

²³ Godōmenque apænedinque Itota, “Māniñedē munitō botō imote, Æbānō ī, ante ēñencæte ante godōmenque ānāmaī incæmīnīmpa. Minitō imīnite nāwangā āmōpa. Botō Mæmpo ingante munitō quiēmē æncæte ante botō ēmōwo ante apæneyōmīni tōmēngā iñōmō do pōnongā æncæmīnīmpa. ²⁴ Nōwo ganca munitō quiēmē æncæte ante botō ēmōwo ante apænedāmaī imīmīni imīnīpa. Nōwo iñōmō edæ, Pōnōmi æmōnie, ante Wængongui ingante apæneedāni. Apænemīni ēñēninque tōmēngā pōnongā æninque munitō eyepæ pōni mīni watapæ toquinque ænguimīni incæmīnīmpa,” ante Itota apænegacāīmpa.

Itota nē tæi ēmōnongā ingampa

²⁵ Mānōmainō ante apænedinque Itota iīmaī apænecantapa. “Minitō imīnite inguipoga quēwēnāni nāni cæbainō ante odōmote apænedīmo incæte botō wantæyō baquionæ iinque bayonte mānōmainō ante godōmenque odōmote apænedāmaī incæboīmpa. Wæætē botō tōmēmo Mæmpo ingantedō ante apænedinque munitō imīnite edonque pōni apænecæboīmpa. ²⁶ Māniñōnæ munitō botō Mæmpo ingante botō ēmōwo beyænque apænequimīni imīnīpa. Iinque botō, Minitō beyæ ante botō Mæmpo ingante apænequimo imōpa, ante mānōmaī beyæ botō ānāmaī imōpa. ²⁷ Edæ botō Mæmpo incæ munitō imīnite waadete pōnēngā ingampa. Botō imō waadete pōnēninque munitō iñōmō edæ, Wængongui weca quēwēninque Itota pongaingā ingampa, ante pōnēnimīni beyæ botō Mæmpo adobai munitō imīnite waadete pōnēngā ingampa. ²⁸ Botō edæ Mæmpocā weca quēwente inguipoga iñōmō pōnimo inte nōwo pōni inguipoga quēwēninque wadæ godinque Mæmpocā weca ocæ ēmænte goquimo imōpa,” ante Itota apænecantapa.

²⁹ Tōmēngā emiññāni,

—Nōwo inguipoga quēwēnāni nāni cæbainō ante odōmote apænedāmaī inte bitō edonque pōni apænebi ēñēmōnīpa.

³⁰ Bitō tōmānō ante ēñēmi imīpa, ante nōwo ēñēmōnīpa. Iinque mōnitō, Æbānō ī, ante ēñencæte ante bitō imite ānāmaī iñōmōni bitō iñōmō do nē ēñēmi imīpa. Mānōmaī beyæ mōnitō, Bitō Wængongui weca quēwente pōnimī inte nē ēñēmi imīpa, ante do pōnēmōni imōnīpa.

³¹ Ante āñōnāni Itota wæætē,

—Nōwo tæcæ pōnēmīni imīnitawo.

³² Wantæyō bayedē iñōmō edæ nōwo pōni batīmpa. Māniñedē munitō botō imote ēmō cæte panguimæ panguimæ wodii winōninque tōmēmīni oncōnē go guiquimīni imīnīpa. Botō imō adoboque ēmō cæte gomīni incæte botō iñæmpa wīi adoboque ongōmōpa. Edæ botō Mæmpo botō tōnō godongāmæ ongongampa. ³³ Minitō iñōmō botō nempo quēwēmīni inte gānē pōnente quēwēncæmīnīmpa, ante cædinque botō māniñō ante munitō imīnite apænetabōpa. Ī inguipoga quēwēninque munitō caate wæcæmīnīmpa. Incæte mīni wæwengulmāmo ante guñēnāmaī iedāni. Edæ inguipogaque ante nāni wēnæ wēnæ cædōnō ante Baa āninque botō godōmenque tæi ēmōnōmo inte nē gānā cægaimo imōpa. Mānōmainō ante Itota tōmēngā nāno emiññāni inānite iinque apænecā ēñengadānīmpa.

17

Itota Mæmpo ingante mōnō beyæ ante apænecampa

¹ Itota mānōmainō ante iinque apænedinque oōnædē æmō adinque iīmaī apænecantapa. “Mæmpo ēñēmi. Bitō, Æbānō baquīi, ante bitō angainō bai do batīmpa. Botō edæ, Bitō Wēmo inōmo iñōmote bitō pōnō cæbi ate botō ñāo apāite bai botō ēmōnō iñōmō edonque pōni bacæīmpa, ante apænebōpa. Mānōmaī cæbi adinque botō wæætē bitō beyæ pōnō cæbo ate bitō ñāo ēmōmāmo edonque pōni bacæīmpa. ² Bitō pædæ pōnōmi botō nē ængaināni inānite botō cōwē wantæpiyæ nāni quēwengulnō ante godōmo æncædānīmpa, ante bitō botō tōnō godongāmæ cæbi beyænque botō woadāni tōmānāni inānite nē āmo batabōpa. ³ Woadāni cōwē wantæpiyæ nāni wænāmaī quēwengulnō ante iīmaī imōpa. Mæmpo, bitō adobique nāwā Wængongui inōmi iñōmote tōmēnāni bitō imite ate bai pōnecædānīmpa. Ayæ botō Itota Coditobo bitō nē do pōnongaimo iñōmote do adinque tōmēnāni pōnecædānīmpa. Tōmēnāni mānōmaī nāni pōnēnō beyænque edæ cōwē wantæpiyæ nāni wænāmaī quēwengulmāmo edæ do ēadānīpa,” ante Itota apænecantapa.

⁴ Ayæ Mæmpo ingante godōmenque apænedinque, “Bitō, iīmaī cæe, ante bitō angainō ante botō inguipoga quēwēninque do iinque cæbo beyæ bitō ñāo ēmōmāmo

edonque pöni bagatimpa. ⁵ Wëenëñedë pöni inguipoga badönämaï ñnedë bitö weca ongöninque botö ñäo ëmongaïmo inte ñöwo bitö weca ocæ ëmænte pömo adinque bitö pönö cæbi ate botö adobo ñäo apäite bai ëmömo ate edæ edonque pöni acæimpa," Mæmpo ingante apæncantapa.

⁶ Ayæ, "Inguipoga quëwëñäni bitö quinäni inänipa, ante bitö pædæ pönömi æninque botö wæætë, Wængongui æcänö ingää, ante tömëñäni inänite odömömo ëñëñänitapa. Adodäni bitö quinäni iñönänite bitö tömëñäni inänite pædæ pönömi æntabopa. Tömëñäni bitö angainö ante ëñente cædinäni inänipa. ⁷ Bitö pönömi æninque botö ewocagaincoo ante iñäni iñömö edæ, Mäincoo tömancoo edæ Mæmpocä pönongä æninque Itota ewocacampa, ante ñöwo do ëñëñänipa. ⁸ Edæ Mæmpo bitö pönö apænebi botö ëñente ængainö ante botö adodö ante edæ tömëñäni inänite godö apænebo ëñëñinque tömëñäni do æñänitapa. Botö bitö weca quëwente pongaïmo imopa, ante ëñëñinque tömëñäni ædæmö ëñëñänitapa. Ayæ, Bitö botö imote da pönömi në pongaïmo imopa, ante pönëñänitapa," ante Itota Mæmpocä ingante apæncantapa.

⁹ Ayæ, "Mæmpo, botö tömëñäni beyæ ante bitö imite apænebopa. Botö wii inguipogaque quëwëñäni beyæ ante apænebopa. Wæætë edæ, Bitö në pædæ pönömi botö ængainäni iñömö edæ bitö quinäni inänipa, ante botö tömëñäni beyæ ante bitö imite apænebopa. ¹⁰ Botö quinäni tömännäni bitö quinäni inänipa. Ayæ bitö quinäni tömännäni botö quinäni adobai inänipa. Tömëñäni cædäni beyænque botö ñäo ëmömämö edonque pöni batimpa."

¹¹ Ante apænedinque Itota godömenque apæncantapa. "Botö inguipoga iñömö godömenque ongönämaï incæboimpa. Wæætë bitö weca ocæ ëmænte ponguïmo imopa. Botö ëmiñëñäni guiquënë inguipoga iñömö ayæ ongönäni inänipa. Mæmpo bitö në Tæiyæ Waëmö inömi inte ëñëmi. Bitö ëmöwo bitö pönö pemongaïwo beyænque botö tæi piñante në ämo imopa. Ñinque mönatö äawoqaque bai ewocate quëwëmöna bai mäninäni adobai äawoqaque bai ewocate quëwencædänimpa, ante cædinque bitö tæi piñämi inte tömëñäni inänite wææ aacæbiimpa, ante bitö imite apænebopa. ¹² Mäninäni weca botö quëwëñedë botö iñömö bitö ëmöwo bitö pönö pemongaïwo beyænque botö tömëñäni inänite wææ aatabopa. Ayæ, Wë womönämaï incædänimpa, ante adodäni inänite wææ gampotabopa. Ñinque tömëñäni tömännäni wë womönämaï inänipa. Önonque adocanque iñömö æmæwo wë womonguëñengä incæ

tömengä iñömö edæ Wængongui angä ëñente nani yewæmongainö bai ñöwo ñinque baquinque ante edæ æmæwo wë womongantapa," ante Itota Mæmpocä ingante apæncantapa.

¹³ Ayæ, "Botö ñöwo bitö weca ocæ ëmænte ponguïmo imopa. Tömëñäni bitö watapæ topämö tömämämö entawëñinque quëwencædänimpa, ante botö mäninö ante inguipoga ayæ quëwëñedë apænebo imopa. ¹⁴ Mæmpo, bitö angainö ante bitö tömëñäni inänite godö apænebo ëñëñänitapa. Botö inguipogaque nani quëwencabo tönö adobo inämaï imo bai tömëñäni edæ adobai inguipogaque nani quëwencabo tönö adodäni inämaï inäni adinque inguipogaque quëwëñäni wæætë tömëñäni inänite piñänitapa. ¹⁵ Mæmpo ëñëmi. Bitö botö ëmiñëñäni inänite, Minitö inguipoga iñömö ayæ quëwëñämaï incæmiñimpa, ante ænte mäobi gocædänimpa, ante botö bitö imite apænedämaï imopa. Wæætë, Wëñæ awënë në wiwa cædongä iñömö tömëñäni inänite, Oda cæcædänimpa, ante cæyongante bitö wææ aabi ate tömëñäni wæætë oda cædämaï incædänimpa, ante bitö imite apænebopa. ¹⁶ Botö inguipogaque nani quëwencabo tönö adobo inämaï imo bai tömëñäni edæ adobai inguipogaque nani quëwencabo tönö adodäni inämaï inänipa. ¹⁷ Bitö äno iñömö edæ näwangä ante impa. Ñinque bitö godö cæbi ate näwangä bitö äno beyænque tömëñäni iñömö tömëmi cædonque ante cædinque tæiyæ waëmö ewocate quëwëñäni incædänimpa, ante bitö imite apænebopa. ¹⁸ Bitö botö imote inguipoga iñömö bitö da pönömi pömo bai botö adobai tömëñäni inänite inguipoga quëwëñäni weca da godömo godänitapa. ¹⁹ Tömëñäni iñömö bitö cædonque ante cædinque tæiyæ waëmö ewocate quëwëñäni incædänimpa, ante botö iñömö edæ bitö cædonque ante Ao äninque, Botö nämä incæ tömëñäni beyæ ante wænguïmo imopa," ante Itota apæncantapa.

²⁰ "Mæmpo ëñëmi. Botö wii botö ëmiñëñäninque beyæ ante bitö imite apænebopa. Wæætë tömëñäni botö angainö ante apænedäni ëñente pönëñinque wadäni në wede pönenguñäni iñönänite botö iñäni beyæ ante adobai bitö imite apænebopa. ²¹ Mæmpo, Bitö imite botö entawëmo imo bai ayæ botö bitö nempo quëwëmo imo bai mäninäni tömännäni adobai äawoqaque bai ewocate quëwëmäñänipa, ante cæcæbiimpa, ante bitö imite apænebopa. Ayæ inguipoga quëwëñäni iñömö, Bitö bitö imote da pönömi pongaïmo imopa, ante pönencædänimpa, ante cædinque bitö godö cæbi ate tömëñäni mönatö nempo quëwencædänimpa, ante bitö imite apænebopa. ²² Bitö pönö cæbi

beyænque botō ñāō bai entawēninque, Mōnatō āawocaque bai ēwocate quēwēmōna bai tōmēnāni adobai āawocaque bai ēwocate quēwencædānimpā, ante botō iñōmō bitō pōnōnimāmo botō ñāō entawēmāmo tōmēnāni inānite adopāmo godōmo ænte entawēnānīpā. ²³ Tōmēnāni āawocaque bai ēwocate quēwencædānimpā, ante tōmēnāni botō imote entawēnānīpā. Ayæ botō bitō imite entawēmo imopa. Tōmēnāni mānōmai āawocaque bai ēwocadāni adinque inguipoga quēwēnāni iñōmō, Bitō botō imote nē da pōnōmi pongaiṃo imopa, ante ēñencædānimpā, ante apænebopa. Ayæ botō imote waadete pōnengaiṃi imi bai bitō tōmēnāni inānite adobai waadete pōnengaiṃi imipa, ante ēñencædānimpā, ante apænebopa,” ante Mæmpocā ingante Itota apænegantapa.

²⁴ Ayæ, “Mæmpo, Bitō pædæ pōnōmi botō nē ængaināni iñōmō botō ñāō emōmāmo acædānimpā, ante botō, Tōmēnāni botō quēwēñōmō adoyōmō quēwencædānimpā, ante ainente wæbopa. Wēēñēñedē pōni inguipoga badōnāmai iñedē bitō iñōmō edæ botō imote waadete pōnēninque botō ñāō emōmāmo pōnōmi botō ængaiṃmāmo tōmēnāni adopāmo acædānimpā, ante ainente wæbopa. ²⁵ Mæmpo nē nō cædōmi imi ēñēmi. Inguipogaque quēwēnāni bitō imite wīl adinque pōnēnāmai ināni incæte botō iñōmō edæ bitō imite do ate pōnēmo imopa. Botō emiñænāni iñōmō, Bitō botō imote da pōnōmi nē pongaiṃo imopa, ante do ēñēnānitapa. ²⁶ Botō cæbo beyænque mānināni iñōmō, Bitō imite ate bai pōnēnānitapa. Botō imote bitō waadete pōnēno ante adodō waadete pōnēno tōmēnāni mīmōnē entawente quēwencædānimpā, ante ayæ, Tōmēnāni botō imote entawencædānimpā, ante botō ayæ cæbo beyænque tōmēnāni iñōmō, Bitō imite ate bai pōnencædānimpā,” ante Itota Mæmpo ingante iinque apænegacāimpā.

18

Itota ingante bæi ongonte ænte godānīpā
(Māateo 26.47-56; Māadoco 14.43-50;
Odoca 22.47-53)

¹ Wængongui ingante iinque apænedinque Itota tōmengā emiñænāni tōnō wadæ godinque Quedodō biyōnæ æmæ wedeca godānitapa. Æmæ wedeca odibowæncodē nāni ancodē i iinque Itota tōmengā emiñænāni tōnō mānincodē pō guidānitapa.

² Itota ingante nē odōmonguingā Codaa iñōmō Itota tōmengā emiñænāni tōnō mānincodē wantæ iñō wantæ iñō gote ongōnāni iinque Itota ingante nē odōmonguingā Codaa iñōmō mānincodē do adingā inongāimpā. ³ Iinque tontadoidi adocaboque inānite æninque Codaa iñōmō

edæ tāno beyænte adocodē pongantapa. Ayæ, Wængongui qui, ante nē godōnāni ñænænāni tōnō Paditeoidi nāni wææ wānōnāni inānite Codaa nempo godōnāni æningā inte tōmengā tōmēnāni inānite tontadoidi tōnō ænte māmongā pōnānitapa. Pōninque tōmēnāni gonga ticainē næænte gongapæncade ticainē nææninque yaēmē næænte Codaa miñæ pōnānitapa. ⁴ Itota nāmā ante, Æbānō bate wæquimoo, ante tōmāā ēñēnongā inte awænē tao godinque tōmēnāni inānite,

—Æcānō ingante ante diqui diqui minte pōmīni.

⁵ Ante āñongā tōmēnāni wæætē,

—Itota Nāatadeta nē quēwēningā ingante āmōnīpā.

Ānāni ēñēninque,

—Botō tōmēmo imopa, ante Itota apænegantapa.

Ayæ nē odōmonguingā Codaa iñōmō tōmēnāni weca a ongōnongāimpā. ⁶ Itota iñōmō, “Botō tōmēmo imopa,” ante āñongā tōmēnāni gā godinque onguipoga tæ go wæænānitapa. ⁷ Tæ go wæænāni adinque tōmengā adodō,

—Æcānō ingante ante diqui diqui minte pōmīni.

Ante āñongā tōmēnāni wæætē,

—Itota Nāatadeta quēwēningā ingante āmōnīpā.

⁸ Ānāni ēñēninque Itota wæætē,

—Botō tōmēmo imopa, ante do antabopa. Mīnitō iñōmō botō imote ante diqui diqui minte pōmīni bai mānināni inānite bæi ongōnāmai iedāni.

⁹ Itota Mæmpocā ingante do apænedinque, “Bitō edæ pōnōmi botō ængaināni inānite wææ aabo beyæ adocanque incæ wē womōnāmai inānitapa,” ante nānō angainō bai ñōwo iinque bacæimpā, ante mānōmai angantapa. ¹⁰ Timōnō Pegodo iñōmō nē yaēmē næængā inte pædæ guipote yaēmē æninque, Wængongui qui, ante nē godongā ñænængā pōni inongā ingante nē cæcā ingante tæi pāninque tōmēmonca iñō wangō tamoncacantapa. Pegodo nānō nē wangō tamoncadingā emōwo Māadoco emongā inongāimpā. ¹¹ Itota wæætē Pegodo ingante,

—Bitō yaēmē adodō da wēe, āninque, Botō wæwenguimāmo ante botō Mæmpo pōnongā ænimo inte wæwenguēnēmo imopa, angacāimpā.

Itota ingante bæi ongōninque Ānato weca ænte godāni

(Māateo 26.57-58; Māadoco 14.53-54;
Odoca 22.54)

¹² Ayæ odōmāno tontadoidi tōnō tōmēnāni awēnē ayæ oodeoidi awēnēidi tōnō Itota ingante bæi ongōninque ænānitapa. Æninque tōmengā ingante goto wimpote cædānitapa.

¹³ Ayæ adodäni Änato nänöwäa Caiapato weca Itota ingante ænte mäo godänitapa. Edæ Caiapato iñömö, Wængongui qui, ante nê godongä ñænængä pöni inongä mänii wadepo iñonte inongäimpa. ¹⁴ Caiapato wêñêñedê oodeoidi awênêidi inänite iimäi ante nê äñongä inongäimpa. Mönö waocabo beyæ ante adocanque onguiñængä wængä iñinque waa imaimpa.

Pegodo incæ, Dicæ abogaa, angampa
(Mäateo 26.69-70; Mäadoco 14.66-68; Odoca 22.55-57)

¹⁵ Itota nänö emiñængä wacä tönö Timönö Pegodo iñömö tömëna iñömö Itota ingante tee empo godatapa. Mäningä iñömö Itota nänö emiñængä iñömö, Wængongui qui, ante nê godongä ñænængä pöni nänö nê adingä inongäimpa. Iñinque Itota tönö pöninque tömengä Wængongui ingante nê godongä ñænængä pöni inongä oncö yacömöñäa iñömö pö guicantapa. ¹⁶ Pegodo guiquênê odemö yabæ inö a ongönongäimpa. Wacä Itota miñæ nê gocä iñömö, Wængongui qui, ante nê godongä ñænængä pöni inongä nänö nê adingä iñömö tömengä ocæ emænte pöninque baquécä odemö nê wææ aacä ingante apæñecantapa. Pegodo ingante ämi guicæ, angä eñëñinque baquécä wi ænecä ate tömengä Pegodo ingante ænte mangucä guicantapa. ¹⁷ Mangucä guiyongä baquécä odemö nê wææ aacä iñömö Pegodo ingante,

—Bitö adobai mäningä onguiñængä nänö nê emiñænömi imipa töö.

Äñongä tömengä wæætê,

—Botö wabo imopa, angantapa.

¹⁸ Yogui ingatimpa. Ayæ nê cædönäni tönö oodeoidi awênêidi wææ wänönäni gongapamö ootoqui, ante näni tadöni gäänê adiyæ ongonte ootodönänimpa. Pegodo adobai tömënanäni tönö godongämæ adiyæ ongonte ootocantapa.

Nê godongä ñænængä Itota ingante angampa

(Mäateo 26.59-66; Mäadoco 14.55-64; Odoca 22.66-71)

¹⁹ Mäniñedê Änato iñömö, Wængongui qui, ante nê godongä ñænængä pöni iñömö Itota ingante, Bitö nê emiñænäni diyæ, äñongäimpa. Ayæ Itota nänö odömönte apænegainö ante, Äbänö i, ante tömengä ingante adobai angantapa. ²⁰ Itota wæætê,

—Waadäni eñëñönänite botö edonque pöni apænebo eñëñänitapa. Botö cöwê munitö odömöincönê incæ Wængongui oncö ñænæncönê incæ oodeoidi tömänäni näni pöincönê pö guiidingue odömönte apænebo eñëñänitapa. Botö cöwê awëmö apænedämaï intabopa. ²¹ Bitö botö imote, Äbänö i, ante quinante ämii. Botö imote nê eñëñänäni

iñänite ämi eñente apænedäni eñencæbiimpa. Edæ mäniñäni ædæmö eñëñäni inänipa.

²² Mänömainö angä eñëñinque wææ wänongä adocanque iñömö Itota gäänê ongöñinque tömengä ingante tæi tamöñinque apæñecä,

—Wængongui qui, ante nê godongä ñænængä pöni inongä ingante ædö cæte mäñömai ante wæætê änewêê töö.

²³ Ante äñongä Itota wæætê,

—Botö wænæ wænæ äñimo imo bai bitö botö wænæ wænæ äñinö ante, Äbänö i, ante apænebi eñëmoe. Wæætê edæ näwangä ante apænebo iñinque bitö quinante botö imote tæi tamömipææ, angantapa.

²⁴ Ayæ, Wængongui qui, ante nê godongä ñænængä pöni Caiapato weca gocæcäimpa, ante Änato iñömö Itota ingante ayæ goto wimpoingä iñongante angä eñëñinque tömengä ingante ænte gogadänimpa.

Pegodo incæ, Dicæ abogaa, wæætê angampa

(Mäateo 26.71-75; Mäadoco 14.69-72; Odoca 22.58-62)

²⁵ Timönö Pegodo ayæ adiyæ ootoyongante wadäni,

—Bitö tömengä emiñænömi adobai imipa töö.

Änäni eñëñinque tömengä,

—Wabo imopa, angantapa.

²⁶ Wængongui qui, ante nê godongä ñænængä pöni inongä ingante nê cædäni iñönänite adocanque iñömö Pegodo nänö nê wangö tamoncingä guidingä inongäimpa. Tömengä iñömö Pegodo ingante,

—Bitö tömengä miñæ odibowæncodê ongöñedê bitö imi atabopa. Bitö wi imitawo.

²⁷ Ante äñongä Pegodo wæætê, Wabo imopa, ante tæcæ änewëñongä tawadiya dobæ pegatimpa.

Pidato weca Itota ongongä

(Mäateo 27.1-2; Mäadoco 15.1-5; Odoca 23.1-5)

²⁸ Tæcæ näö bayonte Itota ayæ Caiapato weca ongöñongante oodeoidi iñömö, Mönö tömengä ingante odömäno gobedönadodo awênê Pidato weca ænte gocæimpa, ante cædinque awênê oncö boyæ mäodäni gocantapa. Incæte tömënanäni dodäni näni wææ angainö beyæ ante guñente wædinque, Pidato oncönê guite bai mönitö mimö wentamö ewocamöni incædömönimpa. Iñæmpa mäñömai cæmöni iñinque mönitö Patowa mönö ææmæ cæyedê cængui ædö cæte cængulmönii, ante wædinque guidämaï inänitapa. ²⁹ Iñinque Pidato tömënanäni weca oncö boyæ taodique tömënanäni inänite,

—Iñgä onguiñængä iñömö quinö wænæ wænæ cæcantawo.

³⁰ Äñongä tömënanäni wæætê,

—Mäningä wii wənæ wənæ cæcä inte bai mōnitō tōmēngä ingante wii ænte māmō pædæ godōmōni æncædōmiimpa.

³¹ Änāni ēñēninque Pidato,

—Minitō tōmēmīni tōmēngä ingante ænte godinque mīni wææ yewæmongainō bai ante cædinque, Tōmēngä ingante pangæimpa, ante apænte ædāni.

Äñongä oodeoidi awēñēdi,

—Īñæmpa mīnitō wææ ämīni iñōmīni mōnitō cōwē tacamōni wənāni mōni cægainō bai ædō cæte æcæmenque ingante wənōmōni wænguīgää, ante wædānitapa.

³² Odōmānoidi māniñedē wənæ wənæ cædāni inānite awāa tōō godōmænte tim-podinque wææ tiwadinque godō wənōnāni inōnānimpa. Īnīnque odōmānoidi inānite pædæ godōninque oodeoidi wæætē Itota, Äbānō cædāni wænguimoo, ante do nānō angainō bai ñōwo ĩnque baquinque cædānitapa.

³³ Māniñō äñāni ēñēninque Pidato wæætē oncōnē ñænæncōnē guidinque Itota ingante añcæ pongä adinque, Pidato,

—Bitō oodeoidi Awēñē Odeyebi imitawo.

³⁴ Angä ēñente Itota wæætē,

—Bitō nāmä pōnēninque apænebitawo. Wabānō wacä botō imotedō ante bitō imite apæncæ äñēmitawo.

³⁵ Ante äñongä Pidato,

—Botō dicæ oodeobo imogaa. Tōmēmī guidēñāni tōnō Wængongui quī, ante nē godōñāni ñænænāni iñōmō bitō imite māmō pædæ pōnōñāni æntabopa tōō. Bitō quīnō wənæ wənæ cæbitawo.

³⁶ Äñongante Itota wæætē apænedinque,

—Wii inguipoga quēwēñāni äñāni beyæ botō Awēñē Odeyebō nē ingaiimo imopa. Botō inguipoga quēwēñāni Awēñē Odeyebō inte nē ämo imo bai botō nempo quēwēñāni iñōmō botō imote, Bæi ongonte ænte godāmaï incædānimpa, ante wææ cædinque oodeoidi tōnō guäa wæætēdō wæætē cæcædōñānimpa. Incæte wii inguipoga quēwēñāni äñāni beyæ wæætē edæ wayōmō quēwēngaiimo inte botō tōmēmō nāmä incæ Awēñē Odeyebō nē ingaiimo imopa.

³⁷ Mānōmaïñō ante Itota apæncæ ĩnīnque Pidato,

—Īñæmpa Awēñē Odeyebi bitō imitawo.

Äñongante Itota wæætē,

—Bitō tōmēmī äñō bai botō Awēñē Odeyebō inōmoimpa. Nāwangä ämipa. Botō iñōmō Wængongui nāñō angainō ante, Nāwangä impa, ante inguipoga quēwēñāni inānite apæncæte ante edæ māñī beyænque ante inguipoga iñōmō pō ēñagaïmo imopa. Wængongui nāwangä ante nāñō angainō ante Ao ante ēñente nē cædāni iñōmō edæ tōmēñāni tōmāñāni botō imote nē ēñēñāni ināñāni, angantapa.

³⁸ Äñongante Pidato,

—Æcämē nāwangä angäa, angacäimpa.

Itota wæncæcäimpa, äñāñāni
(Mäate 27.15-31; Mäadoco 15.6-20; Odoca 23.13-25)

Pidato māñōmaï apænedinque wæætē oodeoidi weca oncō boyæ taodinque apæncantapa.

—Īngä quīnō wənæ wənæ cæcä ingampa, ante ēñēñāmaï imopa. Īnīnque botō dicæ tōmēngä ingante apænte anguimo imogaa. ³⁹ Wadepo iñō wadepo iñō Patowa mīni ææmæ cæōnæ mīnitō, Ädāñidō tee mōnete ongōñāni, ante pōnēninque adocanque emōwo ante botō imote apænedinque, Īngä ingante ñimpo cæbi goquingä, ante cōwē ämīnipa. Īnīnque adocanque ingante, Īngä iñōmō mīni apænedongä ingampa, ante botō tōmēngä ingante ñimpo cæbo ate ænte gomīni inōmīnimpa. Īnīnque ñōwo diyæ. Minitō, Oodeomōni Odeye iñongante pōñō ñimpo cæbi abæ tawænte goguinga, ämīñitawo.

⁴⁰ Äñongante tōmēñāni yedæ tededinque,

—Mäningä ingante dicæ ämōñiyaa. Wæætē Badabato ingante ñimpo cæbi gocæe, ante tedewengadānimpa.

Badabato wēñēñedē wadāni tōnō, Odōmāno tæiyæ awēñē ingante wido cæcæimpa, ante cædingä inongäimpa.

19

¹ Ayæ Pidato angä ate Itota ingante bæi ongonte mäo æmontaiya tæi tæi pāñānitapa. ² Tontadoidi daa mongæmenca æninque que que cædinque, Awēñē poganta, ante pōñō da wencadānitapa. Awēñē weocoo wēñacæbiimpa, ante badete tote bai cædinque Itota ingante opatawæ ēmoncoo pōñō daga wēñadānitapa. ³ Daga wēñadinque tōmēñāni wæætē wæætē tōmēngä weca ponte äninque,

—Badogaa, bitō oodeo awēñē odeyebi imipææ.

Ante badete todinque tōmēngä ingante tæi tamōñānitapa.

⁴ Pidato tōmēñāni weca oncō boyæ adoquoque ayæ tadinque oodeoidi inānite apænedinque,

—Īngä iñōmō æbāñō cæcantawo, ante ēñencæte ante cæbo ate tōmēngä wənæ wənæ nāñō cædō ante dicæ abogaa. Minitō māñōmaïñō ante ēñencæmīnimpa, ante botō tōmēngä ingante mīnitō weca ænte mantabo tacä aedāni, angantapa.

⁵ Itota daa mongæmenca poganta encad-inque opatawæ ēmoncoo mongænte tayongä Pidato tōmēñāni inānite,

—Īngä onguñængä ongongä aedāni.

⁶ Tōmēngä ingante adinque, Wængongui quī, ante nē godōñāni ñænænāni tōnō

adodäni inänite nē wææ wänönäni iñömö yedæ tedewëningue,

—Awæ ñænquedimæ cæte ämi wænönäni wængæe. Ämi wænönäni wængæe.

Ante ancaa änewënäni ëñëningue Pidato wæætë,

—Minitö iñæmpa tömengä ingante æningue awæ ñænquedimæ cæte wænömïni wængæe. Botö guiquënë lingä wënæ wënæ nänö cædö ante dicæ abogaa.

⁷ Pidato äñongä oodeoidi wæætë iimaï tedewënanitapa.

—Mönitö wææ yewæmongainö ante ëñente quëwëmöni imöni. Iñgä iñömö edæ nämä ante edæ, Wængonguï Wëmo inömo imopa, ante cædinque edæ mäninö möni wææ yewæmongainö ante ëñënamäi cæcampa. Mänömaï ëñënamäi inte cæcä beyæ tömengä nē wænguëngä ingampa.

⁸ Mänömainö änäni ëñëningue Pidato godömenque guñente wædinque, ⁹ oncönë ñænæncönë adodö pö guidinque Itota ingante,

—Bitö ædönö quëwente pömi imii.

Ante äñongä Itota guiquënë pæ wëenecä.

¹⁰ Adinque Pidato tömengä ingante,

—Bitö quñante botö imo tededämaï imii. Botö nämä nē tæï piñænte ämo inömo inte ämo ininque ñimpo cædäni gobaimipa. Botö wadö ante ämo ininque bitö imite do awæ ñænquedimæ cæte wænönäni wæmaïmipa, ante ëñënamäi imitawo.

¹¹ Äñongante Itota wæætë,

—Wængonguï bitö tæï piñænte ämämö ante godönämaï ingä bai bitö tömëmi tæï ämi imi diyæ botö imote anguïmiyaa. Mänömaï beyæ bitö imite, Wænömi wæncæcäimpa, ante botö imote nē pædæ pönöningä iñömö edæ godömenque wënæ wënæ cæcä ingampa, ante apæñecantapa.

¹² Mänömainö angä ëñëningue Pidato, Æbänö ñimpo cæbo goquingä, ante cædongäimpa. Cæyongä oodeoidi wæætë godömenque yedæ änonänimpa,

—Bitö mäningä ingante ñimpo cæbi bai bitö odömäno tæiyæ awënë Tetædo æmigo dicæ imiyaa. Æcämeneque iñömö edæ, Botö awënë inömoimpa, ante nē angä inte tömengä iñömö Tetædo ingante nē piñongä ingampa.

¹³ Mäninö änäni ëñëningue Pidato iñömö, Itota ingante ænte tao godinque awënë nänö apænte ämpaa gote tæ contacantapa. Pidato nänö tæ contayömö iñömö, Dicacoo ayadi bai nani caayömö impa, ante nani äñömö ininque ebedeo tededö, Gabata, nani äñömö inönimpa. ¹⁴ Patowa nani ææmæ cæyedë inque bayö oodeoidi, ñimö ate guëmanguionæ inguimpa, ante mönö ñowöönæque cæcæimpa, ante nani cæönæ inönimpa. Iñönæ wodo tæcæ bæcä bayonte Pidato oodeoidi inänite,

—Iñgä iñömö minitö Odeye inongä ingampa.

¹⁵ Äñongante yedæ äninque tömënäni,

—Tömengä ingante wænömi wængæe. Tömengä ingante wænömi wængæe. Awäa timpote ämi wænönäni wængæe.

Ante ancaa änewëñönäni Pidato wæætë,

—Botö iñömö minitö Odeye iñongante awäa timpote ämo wænönäni wængæe, ante änewëminitawo.

Angä ëñëningue Wængonguï quï, ante godönäni ñænænäni iñömö,

—Tetædoque incæ mönitö awënë odeye inongä apa cæbii, änewënonänimpa.

¹⁶ Ancaa änewëñönäni Pidato, Awäa ämo timpote wænömïni wængæedäni, ante Itota ingante tontadoidi inänite pædæ godongä ængadänimpa. Ayæ tömënäni Itota ingante ænte gogadänimpa.

Itota ingante awäa timpodäni wængäimpa (Mäateo 27.32-44; Mäadoco 15.21-32; Odoca 23.26-43)

¹⁷ Itota incæ tömengä timpoquiwæ æningue mongænte taodique “Ocatäinö” mönö äñömö pongantapa. Mäninö ante ebedeo tededö, Godogota, nani äñömö impa. ¹⁸ Mäninö mönö pöñongante tömënäni awæ ñænquedimæ cædinque tömengä ingante töö godonte timpodinque wææ tiwadinque ængæ gantidënäni ongongantapa. Ayæ wada inate tömengä weca æmatæ inö æmatæ inö mämö adobai cæte ængæ gantidënäni wægöñona Itota tæcæguedë wægongä ingantapa. ¹⁹ Pidato angä yewæmöinta, Näni ëñënguinta, ante yewæmonte æningue ñænquedimæ iwäa wo cædänitapa. “Itota Näatadeta quëwëngä oodeoidi Awënë Odeye inongä ingampa,” ante yewæmonte wo cæte ongongatimpa. ²⁰ Itota ingante nani timpodinö mönö eyequei i ininque oodeoidi nangui inäni tömënäni nani quëwëñömö ta pöninque Pidatoidi nani yewæmöninta adänitapa. Mäninta iñömö ebedeo tededö datü tededö guidio tededö ante yewæmonte ingatimpa. ²¹ Oodeoidi beyæ ante, Wængonguï quï, ante nē godönäni ñænænäni iñömö Pidato weca godinque tömengä ingante,

—Bitö, “Oodeoidi Awënë Odeye inongampa,” ante yewæmönämaï inguënë quëwëe. Wæætë tömengä nämä nänö angäinö bai, “Botö oodeoidi Awënë Odeyebö inömoimpa, ante nē änewëningä ingampa,” ante yewæmöe.

²² Ante änewëñönäni Pidato wæætë,

—Botö yewæmöninö ante yewæmönimo inte botö wæætë wadö ante yewæmönämaï incæboimpa.

²³ Tontadoidi iñömö tömengä ingante awäa timpote ængæ gantidënäni wægöñongä tömënäni tömengä weocoo

ĩni æninque mencooga go mencooga cõnõnque adocanque adocooque adocanque adocooque æninque tõmånani ænõnånimpa. Tåno mongæincoo guiquenê ayæ õñoncoopa. Månincoo iñõmõ bæbængapaa badõnåmai incoo tõmancoo adocooque da wẽñaque badõi inimpa. ²⁴ Adocooque wånå ñænåmai ingæimpa, ante adodåni godongåmæ tededinque, —Æcånõ quınca nõ ta adinque tõmengå månincoo æncæcåimpa, ante wææntodõnånitapa.

Edæ Wængongui angå ãñente dodåni iĩmai ante nani yewæmongainõ bai ñõwo iĩque baquinque tontadoidi månõmai cædånitapa. “Edæ botõ weocoo iĩi õ æninque tõmẽnani nani caboque wacå ingå wacå ingå nẽnempodånitapa. Ayæ, Æcånõ quınca nõ ta adinque tõmengå månincoo æncæcåimpa, ante wææntodõninque ænånitapa,” ante nani yewæmongainõ bai tontadoidi ñõwo cædånitapa.

²⁵ Itota ingå nani ængæ gantidẽñõmõ tõmengå wäänå tõnõ wäänå tõniĩcå nana caya ayæ Codeopato nanõogængå Mãadiya tõnõ wacå Mãadiya Mãagadadẽnå mõiñõmõ põninque eyequei a ongõnånitapa. ²⁶ Itota iñõmõ tõmengå wäänå inante acantapa. Ayæ botõ tõmengå miĩñæ nẽ godiĩmo iñõmõ tõmengå nanõ nẽ waadebo inõmo inte tõmẽnå weca ongõmo adinque Itota tõmengå wäänå inante,

—Badå ãñẽmi. Måningå iñõmõ miĩnõ wengå bacæcåimpa.

²⁷ Åninque tõmengå emiĩñænimo iñõmote, —Botõ emiĩñænimi ãñẽmi, Måninå iñõmõ botõ badå incæ bitõ badå bacædåimpa, angacåimpa.

Iĩnque botõ Itota nanõ nẽ emiĩñænimo inte tõmengå nanõ ånõñedẽ tåno ænte mãmõmo põninque tõmengå wäänå iñõmõ botõ oncõnẽ cõwẽ owodõnånimpa.

Itota incæ wængåimpa
(Måateo 27.45-56; Måadoco 15.33-41; Odoca 23.44-49)

²⁸ Quĩnõ bacæimpa, ante ñõwo iĩnque batimpa, ante nẽ ãñẽnongå inte Itota iñõmõ edæ, Wængongui angå ãñente nani yewæmongainõ bai ñõwo iĩnque bacæimpa, ante cædinque,

—Botõ gæwænte awædõ, ante apæñecantapa.

²⁹ Adoyõmõ biĩnõmæ nani åmæ bai wædænque godonte nani ænimæ owætadẽ engate ongõ adinque tõmẽnani dayõmõ bai æninque månimæñẽ pædæ guidonte aa beyonte wẽå tadonte æninque iĩtopowænca nani åwænca ongontoca goto wencadod- inque Itota õnõne pædæ æænõ pæ månånitapa. ³⁰ Pæ mõiñõnani Itota oo guẽmante bedinque,

—Ñõwo iĩnque batimpa.

Ante apæñedingue tõmengå ocabo ædæ wææncadinque tõmengå õñõwoca wadæ goyõwoca do wængåimpa.

Itota betagonta inõ tontado boo tæñongå

³¹ Iĩmõ ate, Mõnõ guẽmanguiõnæ iñõmõ Patowa inguiõnæ beyæ godõmenque waa õõnæpa, ante oodeoidi, Ñõwoõnæque cæcæimpa, ante nani cæõnæ iĩnampa. Oodeoidi awẽñedi, Awåa nẽ ongõnani baõ mõiñwåa guẽmanguiõnæ ongõnåmai incædånimpa, ante Pidato weca godinque tõmengå ingante, Iĩnani nani timpodiwåa nẽ ongõnani quingæ wæncædånimpa, ante cædinque bitõ tõmẽnani õnõmẽnẽ bamẽ åmi wadani taa mænani do wæncædånimpa. Ayæ tõmẽnani baõ o togænte pædæ wææñonte åmi ænånie, ånånitapa. ³² Månii beyæ tontadoidi põninque Itota weca tåno nani nẽ ængæ gantidẽningå õnõmẽnẽ bamẽ taa mæninque edæ ayæ nani nẽ timpodingå wængongå õnõmẽnẽ bamẽ taa mænånitapa. ³³ Taa mæninque Itota weca põninque tõmengå do wængåi adinque tõmengå õnõmẽnẽ taa mænåmai inõnånimpa.

³⁴ Wæætẽ tontado adocanque Itota betagonta inõ boo tæñõngå wepæ tõnõ æpæ gui gotimpa. ³⁵ Botõ mõiñõ bayonte nẽ adimo inte, Æbånõ nåwangå batimpa, ante nõ apæñebopa. Ayæ, Botõ ånõ ante nåwangå impa, ante do ãñẽmopa. Minitõ adobai ãñente põñencæminimpa, ante apæñebopa. ³⁶ Edæ, “Tõmengå bamẽ adomenque incæ taa mænte wædåmai incæcåimpa,” ante Wængongui angå ãñente nani yewæmongainõ bai bacæimpa, ante månõmai batimpa. ³⁷ Ayæ edæ, “Waadani nani nẽ boo tæñõningå ingante aquinani inånipa,” ante Wængongui angå ãñente wataa nani yewæmongainõ bai iĩnque bacæimpa, ante månõmai batimpa.

Itota wodi baõ ini mõi daga wẽnånipa
(Måateo 27.57-61; Måadoco 15.42-47; Odoca 23.50-56)

³⁸ Ayæ ate Adimatea quẽwengå Ootee iñõmõ oodeoidi awẽñedi inånite guĩñente awædõ, ante awẽmõ Itota emiĩñæningå inongåimpa. Tõmengå iñõmõ Pidato Awẽñẽ ingante, Itota wodi baõ põnõmi ænte wẽmoe, angantapa. Pidato Ao angå ãñẽninque Ootee do põninque Itota wodi baõ timpodiwåa ongõñongante o togænte pædæ wææñonte ængantapa. ³⁹ Ayæ Niicodemõ wẽẽñẽñedẽ Itota weca woyowotæ ãñacæ nẽ põningå iñõmõ Ootee miĩñæ pongantapa. Tõmengå mõiadamõ nani ånõmõ nangui iĩ namõ tõnõ aadoemõ nani ånõmõ nangui ogui wamõ tõnõ adoyõmõ nani wempo cædimõ todẽinta quido ganca ænte pongantapa. ⁴⁰ Ootee tõnõ Niicodemõ iñõmõ Itota wodi baõ

æninque nīnoco nāni ancoo guiancoo incæ doyæncoo mānīncoo ogui wamō nāna ænte pōnīmō ænte wāne cædedatapa. Ayæ oodeoidi daga wencæte ante nāni cægai bai adobai cædinque tōmēna nāna wāne cædincoo inte tōmengā baō wīni wīni cægadaiapa. ⁴¹ Itota ingante nāni timpodīñōmō eyequei gōnea īnīmpa. Adodea īñōmō mīintatodē nāni ææ wodiñōmō ōnotatoque īnīmpa. ⁴² Īimō ate guēmanguīōnæ inguīmpa, ante oodeoidi, Nōwoōnæque cæcæīmpa, ante nāni cæōnæ īmpa, ante beyæ, Ontato eyequei īmpa, ante tōmēnāni Itota wodi baō māniñōmō daga wengadānīmpa.

20

Itota nē wæningā incæ nāni ōmæmonte quēwengā

(Māateo 28.1-10; Māadoco 16.1-8; Odoca 24.1-12)

¹ Oodeoidi guēmanguīōnæ Tabado go ate mōnō Dominco tæcæ ooque pōnente bayedē Māadiya Māagadadēnā Itota wodido ponte ayongā dicabo ontato tee mōnocæte ante nāni da pæñæninca incæ do wēā godō concaē intapa. ² Botō Itota nānō nē waadedīmo tōnō Timōnō Pegodo īñōmō Itota miñæ mōna nē godincaya īñōmōnate Māadiya Māagadadēnā wæætē, Mānōmai īmpa, ante adīnque mōnatō weca pogodo ponte apænecantapa,

—Awēnē Itota wodi baō ontatodē ōñōñongante ænte taodīnque ædōnō māo ñō cædānii, ante ēñēnāmai īmōnīpa.

³ Ante apæneyongā Pegodo tōnō botō Itota miñæ mōna nē godincaya īñōmō tōmengā wodido quingæ goe pogodo pontamōnāpa. ⁴ Guēa pogodo gomōna incæte tōmengā ēmiñænīmo botonque quingæ tōmengā wodido tāno pontabopa. Pegodo ayæ pongantapa. ⁵ Māniñōmō tāno pōnīnque ædæ wæænte guīte ayōmo īñāna nāna wīni caadīncooque ōñō abo incæte guidāmai intabopa. ⁶ Timōnō Pegodo botō miñæ ayæ nē pōningā Itota wodido ontatodē ponte wāānē guīcantapa. Wāānē guīyongante doyæncōoque īñāna nāna wīni caadīncooque māniñōmō ōñō acantapa. ⁷ Ayæ Itota wodi ocabo nāna ñāni cæcadīncoo adobai ōñō acantapa. Mānīncoo doyæncōo tōnō wīi adoyōmō ñōnonte intapa. Wæætē īlīncoo nāā wēnente nānēnē ñō cæte ōñō acantapa. ⁸ Īnīnque botō tōmengā wodido ontatodē tāno nē pōnīmo incæte ñōwo tæcæ adobai wāānē guītabopa. Guīte ayōmo, Itota nānō ōñōniñōmō æbānō ī, ante adīnque, Tōmengā ñāni ōmæmonte quēwengā ingampa, ante pōnentabopa. ⁹ Edæ Wængonguī angā ēñente yewæmōnīnque dodāni, Mōnō Codito īñōmō do wæningā incæ ñāni ōmæmonte quēwengūenengā

incæcāīmpa, ante mōnatō māniñedē ayæ ēñēnāmai īñōmōnāīmpa. ¹⁰ Ayæ mōnatō tōmengā miñæ nē godimōna īñōmō wadæ godīnque tōmēmōna oncōnē ocæ ēmænte gotamōnāpa.

Itota īñōmō Māadiya Māagadadēnā weca pongā

(Māadoco 16.9-11)

¹¹ Māadiya guīquēnē Itota wodido ontatodē yabæ īnō a ongonte wædongāīmpa. Mānōmai wædīnque tōmengā, Abote, ante ædæ wæænte guīte ¹² adīnque Wængonguī anquedoda nāāmæntacoo mongæna inte Itota wodi baō ōñōniñōmō tæ contada īna acantapa. Adocanque Itota wodi ocabo ōñōniñōmō tæ contayongā wacā Itota wodi ōnōwa ōñōniñōmō tæ contate ongongā acantapa. ¹³ Tōmēna īñōmō tōmengā ingante,

—Ōnquiyæmī, minō quīnante wæmintawo.

Āna ēñēnīnque tōmengā wæætē,

—Botō Awēnē wodi baō īni ō ænte godāni awædō. Ædōnō māo ñō cædānii, ante ēñēnāmai wæbopa.

¹⁴ Mānīnō ānīnque Māadiya dadi ēmænte ayongā Itota māniñōmō a ongongā adīnque Itota incæcā tōmengā ēñēnāmai ingantapa.

¹⁵ Itota īñōmō,

Minō quīnante wæmintawo. Æcānō ingante ante dīqui dīqui mīmīntawo.

Ante angā ēñēnīnque Māadiya, Īngā īñōmō wabānō gōnea ōmæ wite nē aacā ingampa, ante ōnōwēnenque pōnēnīnque,

—Ēñēmi, bitō tōmengā wodi baō īni wayōmō ænte māobi inte bai ædōnō gote ñō cæbitapa, ante apænebi ēñēmoē. Apænebi ēñēnīnque botō tōmengā wodi baō do gote æmaīmpa.

¹⁶ Āñongante Itota tōmengā ingante,

—Māadiya, angantapa.

Angā ēñēnīnque tōmengā weca dadi ēmænte ebēdeo tēdedō ānīnque,

—Adabōni, angantapa. Mānīnō mōnō tēdedō, “Awēnē nē Odōmōmi īmi,” ante īmpa.

¹⁷ Itota īñōmō,

—Edæ botō ayæ botō Mæmpo weca ocæ ēmænte godāmai īmpa, ante adīnque minō botō īmo pæ mānāmai iedā, angantapa. Wæætē minō botō tōniñādāni weca godīnque tōmēnāni inānite īīmai apænebi ēñēcædānīmpa. Botō ñōwo botō Mæmpo weca ocæ ēmænte goquīmo īmpa. Tōmengā īñōmō mīnitō Mæmpo adobai īnongampa. Botō ñōwo botō Wængonguī weca ocæ ēmænte goquīmo īmpa. Tōmengā īñōmō mīnitō Wængonguī adobai īnongampa, angantapa.

¹⁸ Itota angā ate Māadiya Māagadadēnā īñōmō Itota nānō nē ēmiñænīnāni weca pōnīnque, Awēnē Itota ingante atabopa, ānīnque, Tōmengā īīmainō ante apænecā

ēñentabopa, ante tōmēnāni īnānite māo apænegacāimpa.

Itota īñōmō tōmēngā ēmiñænīnāni weca pongā

(*Māateo 28.16-20; Māadoco 16.14-18; Odoca 24.36-49*)

¹⁹ Guēmanguīōnæ go ate īmō ate wēmō bayō tōmēngā ēmiñænīnāni adoyōmō pōninque, Oodeoidi awēnēidi īnānite ancai guiñente awædō, ante odemō tee mōnete ongōnānitapa. Itota tōmēnāni weca pō guīite tæcæguedē a ongōninque,

—Guiñēnāmai inte gānē pōnencæmīnīmpa, angantapa.

²⁰ Mānīnō angā ate tōmēngā ōnompō odōmōninque tōmēngā betagonta odōmongā adānitapa. Īninque mōnō Awēnē ingante adinque tōmēngā ēmiñænīnāni nangui watapæ todānitapa. ²¹ Itota wæætē adodō,

—Guiñēnāmai inte gānē pōnencæmīnīmpa, angantapa. Botō Mæmpo īñōmō botō ĩmote nānō da pōnongāimo ĩmo bai botō adobai mīnitō ĩmīnite da godōmo goquīmīni ĩmīnīpa.

²² Ante apænedinque tōmēnāni baonga woo ōngate apæneca,

—Botō ñōwo pōni mīnitonga Wængongui Tæiyæ Waēmō Ōnōwoca ingante pōnō pōnōmo æedāni. ²³ Nē wēnæ wēnæ cæcā ingante adinque mīnitō tōmēngā ingante godō ñimpo cæmīni ĩninque Wængongui adobai tōmēngā ingante godō ñimpo cæcā quēwēmaingampa. Mīnitō wæætē nē wēnæ wēnæ cæcā ingante godō ñimpo cædāmai ĩmīni ĩninque Wængongui adobai cædāmai inte tōmēngā ingante pōnō ñimpo cædāmai ĩmaingampa.

Itota ñāni ōmæmonte nē quēwēngā ingante Tōmato acā

²⁴ Itota ēmiñænīnāni adoyōmō a ongōñōnāni tōmēngā pō guīite tōmēnāni weca tæcæguedē a ongōñongā tōmēngā ēmiñæningā adocanque Tōmato mēwoga ēmongā Åancadēnaque īñōmō dæ angampa. ²⁵ Ayæ ate Itota nānō nē ēmiñænīnāni wadāni īñōmō,

—Mōnō Awēnē ingante atamōnīpa, ante Tōmato ingante apænedāni ēñēninque tōmēngā wæætē,

Botō īñōmō tōmēngā ōnōnempō nāni daagō timpodīñōmō, Åyōmōnō empocā, ante adinque ōnongompoca gampodinque ayæ tōmēngā betagonta ĩnō nāni tapa tænonte codīñōmō botō tōmēmo ōnongompoca gampote ate pōnēmai wædō, angantapa.

²⁶ Wacā tēmāna go ate Itota ēmiñænīnāni wæætē oncōnē adoyōmō pō guīite a ongōñōnāni Tōmato tōmēnāni tōnō godongāmæ pō guīite a ongongan-tapa. Odemō tee mōnete ongō incæte

Itota īñontobæ pō guīite tōmēnāni weca tæcæguedē a ongōninque,

—Guiñēnāmai inte gānē pōnencæmīnīmpa, angantapa.

²⁷ Ayæ Tōmato ingante,

—Bitō tōmēmi ōnongompoca pædæ pom-podinque botō ōnompō æe. Pædæ guīipote botō betagonta ĩnō gampoe. Ayæ, Wabānō incædō, ante ānāmai incæbiimpā. Wæætē pōnēe.

²⁸ Ante āñongā Tōmato,

—Botō Awēnē ĩnōmi ĩmīpa. Ayæ adobai botō Wængongui ĩnōmi ĩmīpa, angantapa.

²⁹ Ayæ Itota tōmēngā ingante,

—Botō ĩmote ate pōnēmi ĩmīpa. Wæætē nē adāmai ĩnāni incæ botō ĩmote pōnēnāni ĩninque tōmēnāni nāni toquinque ingæiimpā, angacāimpa.

Wāo nānō yewæmongainta quīnante yewæmongacāi

³⁰ Tōmēngā ēmiñænīnāni weca Itota, Ēñencædānīmpa, ante wadō wadō cædinque tōmēngā nānō bamōngæ ayæ godōmenque nangui pōni cægacāimpa. Botō īñōmō ĩntaa yewæmōninque mānīnō tōmēngā nānō cægāinō ante wīi tōmāā yewæmontabopa. ³¹ Wæætē mānīnō ante yewæmōninque botō, Itota mōnō Codito ĩnongāiimpā, ante ayæ, Tōmēngā Wængongui Wēngā ĩnongā ingampa, ante mīnitō pōnencæmīnīmpa, ante yewæmontabopa. Edæ tōmēngā ēmōwo beyænque mīnitō mānōmāinō ante pōnēninque cōwē wæñāmai quēwēncæmīnīmpa, ante botō ĩnta yewæmōmpa.

21

Itota tōmēngā ēmiñænīnāni 7 ganca ĩnāni weca pongā

¹ Ayæ ate tōmēngā ēmiñænīnāni Tibedi-apæ nāni āmæ yæwedeca ēmōnai-boga ongōñōnāni Itota īñōmō tōmēnāni weca pōninque a ongongā adānitapa. Edæ ĩmai batīmpa. ² Timōnō Pegodo adocanque,

Tōmato Åancadēnaque nāni ānongā tōnō Gadideabæ Cāna nē quēwēngā Nāatānaedo mēnaa, Tebedeo wēna nāna caya mēnaa, ayæ Itota nānō nē ēmiñænīna wada mēnaa mānimpodāni adoyōmō ongōñōnānīmpa. ³ Timōnō Pegodo īñōmō tōmēngā tōnō ongōñāni ĩnānite,

—Botō ñōwo gæyæ dadoncæ tao gobopa.

Angā ēñēninque tōmēnāni īñōmō,

—Bitō mīñæ gocæmōnīmpa.

Āninque, Ågodōedāni gomompā, ante tao godinque wipodē godongāmæ guīidinque tōmāā woyowotæ gæyæ dadoncæ cædāni incæte gæyæ dæ æñāmai ĩnōnānīmpa. ⁴ Nāō bayonte Itota īñōmō ēmōnaiya yæwedeca a ongongā adinque, Itota ingampa, ante

tömengä emiñæniniñani incæ eñhënamai inänitapa. ⁵ Ayæ tömengä tömëñani inänite yedæ aa pedinque,

—Inänani, gæyæ æmñitawo.

Åñongante,

—Ænämäi imönipa.

⁶ Änani eñëninque tömengä wæætë,

—Minitö dicamonca wipo tömëmæ inö æpæñë wo guitodonte gæyæ dadonte æedäni.

Tömengä nänö ämai cædinque tömëñani nangui pönï gæyæ dicamonca date owo adinque ædö cæte dicamonca wëä pönonte ænguñäni. ⁷ Itota emiñænimo tömengä nänö në waadebo inömo inte botö Pegodo ingante apænedinque,

—Ingä iñömö mönö Awënë Itota ingampa.

Ämo eñëninque Timönö Pegodo iñömö tömengä yabæcoo nänö gä tadongate cönönincoo æninque daga wëñate æpæñë to go ti wææninque ömaa taocantapa.

⁸ Wadäni Itota nänö në emiñæniniñani iñömö yæwedeca obo pönï tiëë mëetodo ganca bai iñömö wäi wocädäni ininque wipodë ayæ owodäni iñömö Pegodo miñæ wogaa godinque dicamö gæyæ eyede pönï wëä pönö pönänitapa. ⁹ Tömëñani wipodë inte pædæ æænoncado ponte ayönäni, Æænongui, ante gonga emöñömö gæyæ öñö adinque adoyömö wædænque päö cö cæte öñö adänitapa. ¹⁰ Itota tömëñani inänite,

—Gæyæ müni ñowo æñi wædænque ænte pödäni.

¹¹ Angä eñëninque Timönö Pegodo wipodë pö guidinque dicamö ænte emönaiya wëä tadongantapa. Edæ tiento tincoenta i todee ganca inäni mänimpodäni gæyæ ñænægade dicamö iñömö eyede owodäni incæte dicamö wangö tëmönämäi inimpa. ¹² Itota iñömö tömëñani inänite,

—Pö cætedäni,

Åñongante tömengä emiñæniniñani tömänäni, Mönö Awënë Itota ingampa, ante eñëninque, Æbidö imii, ante tömengä ingante ædö cæte ænguñäni. ¹³ Itota gongapamö iñömö pöninque päö ænte tömëñani inänite pædæ godongä æñäni ininque tömengä ayæ gæyæ öñö æninque tömëñani inänite pædæ godongä cænänitapa.

¹⁴ Mänömaï cædinque Itota do wæningä incæ ñäni ömæmonte quëwente mempoga do ponte a ongöningä inte ñowo tömengä emiñæniniñani weca mempoga go adopoque pongacäimpa.

Timönö Pegodo ingante Itota apæñecä

¹⁵ Tömëñani inque cænäni ate Itota iñömö Timönö Pegodo ingante,

—Timönö Wäo wëmi eñëmi. Botö imo mäninani pönömenque waadete pönëñänäni

bitö iñömö näwangä botö imote godömenque waadete pönëmitawo.

Åñongä,

—Awënë, Ao ämopa. Bitö imite botö waadedö ante bitö do eñëmipa.

Angä eñëninque Itota,

—Waadäni iñömö botö obegaidi wëñäni bai iñönänite bitö tömëñani inänite botö angainö ante odömonte apæñebi eñencädänimpa, angantapa.

¹⁶ Ayæ wæætë,

—Timönö Wäo wëmi eñëmi. Bitö näwangä botö imote waadete pönëmitawo.

Åñongä,

—Awënë, Ao ämopa. Bitö imite botö waadedö ante bitö do eñëmipa.

Angä eñëninque Itota,

—Waadäni botö obegaidi bai iñönänite bitö tömëñani inänite aacæbiimpa, angantapa.

¹⁷ Itota mempoga go adopoque tömengä ingante,

—Timönö Wäo wëmi eñëmi. Bitö botö imote waadete pönëmitawo, ante angantapa.

Itota mempoga go adopoque tömengä ingante, Bitö botö imote waadete pönëmitawo, ante angä eñëninque Pegodo wæwente inongäimpa. Incæte Itota ingante,

—Awënë bitö tömää eñëmi imipa. Bitö imite botö waadedö ante bitö do eñëmipa.

Ante wæyongä Itota wæætë,

—Waadäni iñömö në botö obegaidi bai iñönänite bitö tömëñani inänite botö angainö ante odömonte apæñebi eñencädänimpa. ¹⁸ Bitö imite näwangä ämopa. Bitö wëñæmiyedë tömëmi nämä daga wëñadinque, Ædönö goinëmo, ante bitö goinënonque do gobi imitapa. Ñowo iñömö bitö picæmi bayedë bitö pædæ gopoyömi wacä incæ bitö imite godö daga wëñadinque bitö goinëñämäi iñömö mänñömö bitö imite mäocä gocæbiimpa.

¹⁹ Pegodo ingante mänömainö ante apænedinque Itota iñömö, Tömengä ingante æbänö wænönäni wæñongä Wængongui ñäö apäite bai nänö emönö edonque bacæimpa, ante odömonte ante apænegacäimpa. Ayæ godömenque tömengä ingante,

Botö miñæ tee empo pöe, angacäimpa.

Itota emiñænningä nänö në waadecä

²⁰ Pegodo guiquënë dadi ëmænte botö Itota emiñænimo nänö në waadebo iñömö tömëna miñæ tee empo pömo acantapa. Mänimo iñömö do möni cæñedë Itota tönö äññömonque tæ contadinque, “Awënë bitö imi æcänö godö odömonguinaa, apæñebi eñëmönie,” ante në apænedimo inömoimpa.

²¹ Pegodo botö imo adinque Itota ingante,

—Ingä iñömö në tee empo pongä diyæ æbänö tömengä beyæ bacæimpa.

²² Åñongä Itota wæætë,

—Botö ocæ emænte ponguinganca tōmengä ayæ quēwencæcäimpa, ämo bai bitö wæætē ædö cæte nē ämi inguimii. Botö iñömö nē anguimo imopa. Bitö guiquēnē botö miñæ tee empo ponguēñemi imipa, angantapa.

²³ Mänömaï beyæ pancadäniya möni tönñadäni weca godinque gode ä gode ä cædinque botö imotedö ante apænedinque, Ìngä iñömö cōwē wænāmaï quēwenguingä ingampa, ante tedewengadänimpa. Itota iñæmpa, Ìngä iñömö wænāmaï quēwencæcäimpa, ante änāmaï ingacäimpa. Wæætē, “Botö ocæ emænte ponguinganca tōmengä ayæ quēwencæcäimpa, ante ämo bai bitö ædö cæte anguimii. Botö anguimo imopa,” ante mäninque angacäimpa.

²⁴ Tömēnāni, Ìngä wænāmaï quēwengä ingampa, ante nāni nē apænedimo iñömö edæ botö tōmengä nänö nē emiñænimo adobo imopa. Tömēmo, Æbänö batimpa, ante botö apænedö iñömö näwangä ante nē apænedimo inte botö adodö ante tōmänö ante nē yewæmönimo imopa. Mäninö ante botö angainö iñömö näwangä impa, ante mönitö ēñēmönipa.

²⁵ Itota iñömö nanguï pönï godömenque wadö wadö cægacäimpa. Æbänö cæcää, ante tōmää nänö cægainö ante adinque yewæmömöni bai mänintacoo möni yewæmönintacoo ñönonguï ante edæ inguipoga tōmäo incæ wii eyepæ incädönimpa, ante pönēmopa. Mäninque ante yewæmömopa.

Itota nānō da godongaināni Nāni Cægaīnō

Wængonguī Tæiyæ Waēmō Ōnōwoca
poncæcāimpa, ante

¹ Teopido bitō acæbiimpa, ante botō do yewæmōninque, Itota æbānō mā cægacāi, ante, Itota æbānō mā odōmonte apænegacāi, ante yewæmontabopa. Mānōmaīnō ante do yewæmōnimo inte botō adobo Odoca īnōmo inte nōwo godōmenque yewæmōmo ae. ² Itota do īñōmō, Īnāni botō Īmotedō ante nē apænequināni īnānipa, ante cædinque tōmēnāni īnānite apænte æninque da godongacāimpa. Īninque tōmēngā nānō æite goquīōnæ īñonte tōmēnāni tōnō godongāmæ ongōninque Itota īñōmō Wængonguī Tæiyæ Waēmō Ōnōwoca tōnō cædinque tōmēnāni īnānite, Botō dæ gobo ate mīnitō Īmaī cæcæmīnimpa, ante apænegacāimpa. Īnque apænecā ate tōmēngā ingante Wængonguī do ænte mæicā inque ingā æigacāimpa. Īninque māninganca tōmēngā nānō cægaīnō ante do yewæmōnimo inte botō īñōmō, Bitō Teopidobi godōmenque acæbiimpa, ante nōwo wæætē yewæmōmopa.

³ Itota adocā incæ nantate wægaingā inte nāni ōmæmonte ate coadenta eōnæ manimpōnæ inguipoga quēwēninque tōmēnāni weca mīngā inte wæætē pō wæætē pō cædinque mā pōni cædongāimpa. Īninque, Tōmēngā nāwangā mīngā inte mānōmaī cæcampa, ante adinque tōmēnāni ædō cæte wadō ante pōnenguīnāni. Ayæ tōmēnāni weca a ongōninque tōmēngā tōmēnāni īnānite, Wængonguī Awēnē Odeye nempo quēwencæmīnimpa, ante tōmānō ante adodō adodō ante apænecā ēñengadānimpa.

⁴ Tōmēnāni tōnō godongāmæ ongōninque Itota Īmaī angantapa.

—Wīi wayōmō goedāni, Eedotadēē īñōmō ee quēwēdāni, angantapa. Botō Mæmpo īñōmō, Wacā ingante da pōnōmo æninque ēwocacæmīnimpa, ante do apænebo ēñēmīnitawo. Tōmēngā, Da pōnonguīmo, ante nānō nē angaingā ingante ante æte ēwocacæte ante mīnitō nōwo wānō cōedāni. ⁵ Edæ Wāo wodi īñōmō apænē guidongacāimpa. Wængonguī Tæiyæ Waēmō Ōnōwoca guiquēnē mīnitō baonga wantæ īñō pō guīcæcāimpa, ante Itota apænegacāimpa.

Itota ōōncædē æicampa

⁶ Ayæ Itota tōnō godongāmæ ponte ongōnāni īñōmō tōmēngā ingante ānānitapa.

—Itota ēñēmi. Mōnō idægocabo mōnō quēwēngāmæ īñonte wadāni do ō ænāni incæte bitō nōwo wæætē adobæ æninque

mōnitō Awēnē Odeyebi oo bacæ cæbitawo. Edæ, Bitō nempo oo pōni godongāmæ quēwencæmōnimpa, ante cæbitawo, ante ēñencæte ante wæmōnipa.

⁷ Ancaā āñōnāni,

—Īñæmpa mīnitō ante wæinō bai, Āyedēnō baquīi, ante, Āpogadō baquīi, ante mīnitō wīi ēñenguēnēmīni Īmīnipa. Mæmpoque nē angaingā inte mānīnō ante ēñengampa. ⁸ Wæætē Wængonguī Tæiyæ Waēmō Ōnōwoca pō guīdinque pōnō cæcā ate mīnitō wæætē tæi pīñænte ēwocamīni edæ bacæmīnimpa. Īninque, Botō æbānō cægaboī, ante nē adimīni inte mānīnō botō cægaīnō ante mīnitō tāno Eedotadēē īñōmō quēwente apænedinque ayæ Oodeabæ māo apænedinque ayæ Tāmadiabæ māo apænedinque godōmenque tōmāmæ māo apænemīni ēñencædānimpa, ante Itota angacāimpa.

⁹ Mānōmaīnō ante apænecā ēñente a ongōñōnāni Itota māniñōmō ongonte æi boguīmancodē ingæ æicā æmō agadānimpa.

¹⁰ Ōōncædē æite ingæ gocā æmō ayōnāni edæ onguīñæna nāāmænta weocoo mongæna tōmēnāni weca a ongōninque edæ, ¹¹ tōmēnāni īnānite apænedinque,

—Gadideabæ quēwēmīni inte onguīñæmīni ēñēedāni. Quīnante æmonga a cōmīni. Edæ Itota mīnitō tōnō ongōninque ōōncædē æicā amīnitawo. Edæ ōōncædē æicā mīni adi bai adocā Itota Īncayæ ate ocæ ēmænte poncæcāimpa, ante apænedatapa.

*Codaa nānō cæquēnēnō wacā
cæccæcāimpa, ante cædāni*

¹² Oodeoidi nāni guēmanguīōnæ cōwē nāni goganca māningancaque ĩ ĩninque wīi gobæ ĩ ĩninque tōmēnāni Odibowænquidi nāni anquidi ongōninque ocæ ēmænte wææ Eedotadēē pōnānitapa. ¹³ Tōmēnāni ēmōwo Pegodo tōnō Wāo, Tantiago tōnō Āntade, Pedipe tōnō Tōmato, Batodōmēē tōnō Māateo, Adepeo wengā Tantiago, wacā, Mōnō ōmæ ingæimpa, ante nē ānōngā Timōnō, Tantiago wengā Codaa. Mānōmaī ēmōnāni inte pō guīdinque tōmēnāni nāni wānoncōnē æmongapaa æi guīdānitapa. ¹⁴ Ayæ ĩnāni tōnō wadāni Wængonguī ingante godongāmæ apænecæte ante cōwē pō pō cægadānimpa. Onquiyæñāni adobāi Itota badā Māadiya tōnō ayæ Itota biwīidi tōnō cōwē ponte apænedōnānimpa.

¹⁵ Māniñedē Itota ingante nāni tee empote quēwēnāni tiento bæinte ganca ĩnāni inte ongōñōnāni Pegodo tæcægedē ængæ gantite apænecantapa. ¹⁶ “Īñānāni ēñēedāni. Nōwocā Codaa wodi Itota wodi ingante nē æncædāni īnānite nē godō odōmongā ingantawo. Edæ tōmēngā ingante ante Wængonguī Tæiyæ Waēmō Ōnōwoca

wēēñēdē apānecā ēñēninque awēnē Dabii wodi nānō yewæmongainō bai cōwē iñque baquinō anguēnē. ¹⁷ Edæ Itota mōnitō imōnite apænte æninque Codaa ingante adobai apænte ængacāimpa. Iñinque mōnō cabo mōnō nē cæquēnēnō ante Codaa wodi adocā incæ mōnō tōnō godongāmæ cæcā ingacāimpa. ¹⁸ Tōmengā wīwa cæte tigitamō nānō ænintamō incæ adodō godongā ænānitapa. Tōmēnāni wæætē tigitamō æninque, Waodānido bacæimpa, ante omæ godonte ænānitapa. Tōmengā iñōmō guidōmēmæ wæænte omengō tæi æbæ godente æmæwo wængantapa. ¹⁹ Mānōmai wængā ēñēninque Eedotadēē quēwēnāni tōmānāni, ‘Wepæ onguipo ba awædō,’ ante tōmēnāni nāni tededō Atedānæ pemōnānitapa. ²⁰ Edæ Åmotamīni nāni Angaintaa iīmai ante dobæyedē yewæmongatimpa.

‘Tōmengā oncō æmæwo ōnonconque bacæimpa.

Wacā mānincōnē cōwē quēwēnāmai incæcāimpa.’

Ante nāni Åmotamīni Angainta bai do batimpa. Ayæ,

‘Tōmengā nē aacā bate nānō cæquēnēnō incæ wacā badinque cæcæcāimpa,’

ante yewæmonte ongompa.’

²¹ Ante apænedinque Pegodo godōmenque iīmai ante apænecantapa. ‘Mānōmai iī iñinque Codaa wodi nē nānō cæquēnēnō incæ edæ wacā cæcæcāimpa, ante ñowo mōnō apænte angæimpa. Awēnē Itota imæca mōnō tōnō guēa cægongāñedē wadāni godongāmæ nē cægōnināni inānite adinque mōnō iīmaiñō ante apænte ængæimpa.

²² Wāō wodi nānō guidōñedē cægōninque ñowoñæ Itota nānō æite goōnæ ganca æcānō æcānō mōnō tōnō godongāmæ cægōnināni ināni, ante adinque mōnō adocanque ingante apænte ængæimpa. Apænte æmō ate tōmengā, Itota dobæ ñāni omæmongantapa, ante nē againgā inte wæætē mōnō tōnō godongāmæ apānecā incæcāimpa.” ²³ Ante Pegodo angā ēñente cædinque tōmēnāni wæætē, Æcānō æcānō nē agaiñāni ināni, ante adinque mēnaa inate apænte ænānitapa. Adocanque Ootee, Badatabato nāni ānongā inte tōmengā mæmæ beyæ, Yoto, ante nāni pemongaingā iñongante tōmēnāni tōmengā ingante apænte æninque edæ wacā ingante Māatiya ingante apænte ænte gōnōnānitapa. ²⁴ Mānōmai apænte æninque Wængongui ingante apænedānitapa. ‘Awēnē ēñēmi. Mōnitō æbānō pōnēmōni, ante tōmāā ēñēmi inte bitō iīna inate adinque æcānō ingante do apænte ængabiī, ante odōmōmi amōni. ²⁵ Edæ Codaa wodi tōmengā nānō pante wænguinque oda cæcantapa.

Iñinque bitō ñowo wacā ingante da godōmi godinque Codaa wodi nānō cæquēnēnō ante cæcæcāimpa, ante āmii, ante wæmōnīpa.”

²⁶ Ante Wængongui ingante apænedinque tōmēnāni, Æcānō inaa, ante ēñencæte ante cædinque dicamō æninque, Wo godō wo godō cæyōmō to ta wææ acæi, ante cæte ayōnāni Māatiya nānō cæ to ta wæænca adinque, Mōnō imonte Itota da godongā nē godimō ōnomo tipæmpoga go adocanque iñōmonte tōmengā mōnō cabo badinque godongāmæ cæcæcāimpa, ante cægadānīmpa.

2

Wængongui Tæiyæ Waēmō Ōñowoca pongampa

¹ Tōmēmō incadepo ba ate Pentecotee ææmænoca nāni āōnæ iñonte tōmēnāni nāni cabo adoyōmō ponte godongāmæ ongōnānitapa. ² Ongonte ēñēñōnāni woboyæ nangui pæmænte ā bai iñontobæ oōnædē pō ēñēñōnāni oncōnē nāni ongōncōnē tōmancōnē wææ guiite bai woboyæ nangui pæmænte ā bai ēñēnānitapa. ³ Ayæ waodāniya incæ gonga bai onguēnē onguēnē bæco adānitapa. ⁴ Ayōnāni Wængongui Tæiyæ Waēmō Ōñowoca incæ tōmānāniya pō guicā ēwocadānitapa. Pō guidinque Wængongui Ōñowoca pōnō cæcā beyænque tōmēnāni wadāni nāni tededō bai wadāni nāni tededō bai mā apænedānitapa.

⁵ Māniñedē oodeoidi Wængongui ingante guiñente quēwēnāni inte edæ wabæca wabæca tōmāmæ quēwēninque ñowo Eedotadēē ponte quēwēnōnānīmpa. ⁶ Iñāni iñōmō woboyæ nangui pæmænte bai ā ēñente wædinque ponte ēñēñōnāni Itota ingante nē pōnēnāni iñōmō ñowo pōnāni nāni tededō bai tededāni ēñēnānitapa. Adocanque nānō tededō bai wacā nānō tededō bai tededāni ēñēninque tōmēnāni, Æbānō cæte tōmāmō tededō bai tededāni ēñēmōni, ante wædānitapa. ⁷ Tōmēnāni nāmæneque apænedinque,

—Iñæmpa Gadideabæ quēwēninānique inte iñāni mānōmai tededāni awædō.

⁸ Iñinque ædō cæte mōnō ēñagāiōmæ mōnō tededō bai tededāni ēñēmō, ante ancai guiñente wædānitapa. ⁹ Edæ iñōmō nē ongōmō iñomonte pancadāniya Padatiabæ quēwēte pōñōmō wadāni guiquēnē Mēediabæ, Edāmæ, Mēetopotāmiabæ, Ood-eabæ, Capadotiabæ, Pontobæ, Atiabæ quēwēte pōnāni inānīpa. ¹⁰ Wadāni guiquēnē Pidiguiabæ, Pampidiabæ, Equitobæ quēwēte pōnāni inānīpa. Wadāni guiquēnē dibiabæidi ināni inte Tidēne iñōmō quēwēte pōnānīpa. Wadāni guiquēnē Odōmā iñōmō quēwēninque ēñacæ ante ponte owodānīpa. ¹¹ Odōmā iñōmō nē

quēwēnināni īfōmō pancadāniya oodeoidi ēñagaīnāni īfōnāni pancadāniya wæætē wadāni incæ oodeoidi pōnēnāni bai adodō pōnente oodeoidi bai bagaīnāni īnānīpa. Ayæ wadāni guiquēnē codetenteidi tōnō adabeidi inte pōnāni īnānīpa. Īnīnque mōnō wabæca wabæca quēwēnīnque wadāni nāni tededō bai wadāni nāni tededō bai nē tedemō īmōmpa. Incæte īnāni guiquēnē, Wængonguī waa pōnī cæcā ingampa, ante mōnō tededō bai mā pōnī tededīnque apænedāni ēñēmōmpa tōō.

¹² Ante wædīnque tōmēnāni nāni cabo nāmāneque apænedīnque,

—Ēbānō ēñēmōō, ante wæmōnīpa tōō.

¹³ Ante wæyōnāni pancadāniya babæ apænedīnque,

—Bīnōmæ mīmæ tōmo pōnī bedīnque dowæñāni inte tededānīpa, ante badete togadānīmpa.

Pegodo tōmēnāni īnānīte apænecampa

¹⁴ Mānōmāi tedeyōnāni Pegodo īfōmō ōnōmpo tīpæmpoga go adocanque īnāni tōnō ængæ gantīdīnque nanguī tedecā ēñengadānīmpa. “Oodeoidi ēñēedāni. Ayæ wamīni guiquēnē Eedotadēē īfōmō nōwo ponte owomīni inte mīnitō oodeoidi tōnō tōmāmīni ēamonca ongonte ēñēedāni. Botō, Ēbānō ī, ante edonque apænebo ēñencæmīnīmpa,” angantapa.

¹⁵ “Gāwadecæ īmpa diyæ tī nāmæ bete dowænte baquīnānīi. Īñæmpa nænque ayaōnā ææñongā ædō cæte mīni ānō bai bete dowænte baquīnānīi. ¹⁶ Wæætē Wængonguī beyæ nē apænegaingā Oeodo wodi do nānō angaīnō bai nōwo cædānīpa, ante apænebo ēñēedāni. Oeodo wodi īfōmō īmāinō ante yewæmōngacāīmpa.

¹⁷ ‘Wængonguī īmāi angampa, angacāīmpa. Īnīnque bayedē botō Ōnōwoca īngante tōmānāniya āmo pō guīcā ēwocæcædānīmpa.

Mānīfēdē onquīyænāni incæ onguīñænāni incæ

mīnitō wēnāni īnōnāni inte botō beyæ apænecædānīmpa.

Edēnīnāni īfōmō ate bai mā pōnī acædānīmpa.

Picænāni guiquēnē nō wīlmonēte bai acædānīmpa.

¹⁸ Ayæ botō Ōnōwoca īngante āmo pō guīcā ēwocadīnque

onguīñænāni incæ onquīyænāni incæ botō beyænque nē cædāni īnōnāni inte botō beyæ apænecædānīmpa.

¹⁹ Edæ mīni ææmō ate pōnengīnque ante botō ōōnædē mā cæbo acæmīnīmpa.

Ayæ īmæca adobai pōnō cæbo ate wepæ gonga tēemā nanguī mongæ adīnque ēñencæmīnīmpa.

²⁰ Edæ nænque tāno wentamō bayō apāicā wepæ ēmō ba acæīmpa.

Ayæ ate tōmengā nānō ponguīōnæ īfōnte Wængonguī Awēnē incæ tæī piñængā īnongā inte

ñāō apāite bai ēmōnīnque poncæcāīmpa.

²¹ Īnīnque botō ēmōwo ante nē aa pedāni īfōmō

tōmānāni botō æmo beyænque quēwencædānīmpa. Ante Wængonguī Awēnē cæcæcāīmpa, ante Oeodo wodi yewæmōngacāīmpa.”

²² Ante apænedīnque Pegodo godōmenque īmāi ante apænecantapa. “Idægoidi, apænebo ēñēedāni. Itota Nāatadeta

nē quēwengaingā nāwangā botō nē da pōnongā ingampa, ante pōnencæmīnīmpa,

ante mā cædīnque Wængonguī Itota tōnō godongāmæ tæī piñænte nanguī cæcā ate

Itota mīnitō weca bamōnengæ cædīnque nanguī cægacāīmpa. Īnīnque mānōmāi cæcā

nē agaīmīni inte mīnitō, Nāwangā Itota īngante Wængonguī da pōnongā ponte

cæcampa, ante do ēñēmīnīpa. ²³ Wængonguī nāmā pōnēnīnque, Codito īngante tōmēnāni

nēmpo pædæ godoncæboīmpa, ante do angaingā inte, Mīnitō tōmengā īngante

ænīnque mānōmāi cæcæmīnīmpa, ante do ēñengacāīmpa. Īnīnque mīnitō īfōmō Itota īngante

bæi ongonte ænīnque ēñente cædāmāi īnāni nēmpo pædæ godōnīnque, Mīnitō

tōmengā īngante awāa tīmpodīnque wææ tīwate wæñōedāni, ante āmīni wæñōnānītapa.

Mānōmāi ōnōnecaque tedete beyæ mīnitō tōmēmīni edæ nē wæñōmīni bai bamīnīpa

tōō. ²⁴ Mīnitō mānōmāi wadāni tōnō cædīnque wæñōmīni beyæ Itota īfōmō mōnō

wænguēnēmāmo teēmē mongænte caete wædīnque wængacāīmpa. Ayæ pæ opate

ōñōñongante Wængonguī wæætē, Idæwaa, ante wī ænote bai cædīnque angā ate Itota

ñāni ōmæmonte ta pongantapa. ²⁵ Adocā Codito beyæ ante apænedīnque awēnē

Dabīi wodi īmāi ante yewæmōngacāīmpa. ‘Botō, Mōnō Awēnē cōwē botō weca mæ ongongampa,

ante atabopa.

Īnīnque tōmengā botō tōmēmæ īnō tōō æmænte ongongā īnīnque botō īmote

ædō cæte bæ tadāni wæquīmoo.

²⁶ Mānōmāi beyæ botō, Watapæ bacæīmpa, ante mīmōnē pōnēmo inte botō

ōnōneca āmotamīni ante bai nanguī tobopa.

Botō ñāni ōmæmōngūnque nē wæwocabo īmopa, ante pōnēmo inte botō

guīñēnate wædāmāi inte baō ēñate quēwencæboīmpa.

²⁷ Wængonguī ēñēmi. Botō waodāni nāni wænte ongōñōmō ōñōñōmote bitō

ēmō cæte godāmāi incæbīīmpa. Bitō īmīte nē cæbo inte botō tōmēmī cædō ante cōwē cæbo īfōmote bitō ædæmō

wææ aabi ate botō baō ñōmāādāmai incæboimpa, ante edæ botō do ēñēmopa.

²⁸ Taadō botō quēwenguīnō ante bitō do odōmōmi agaboimpa.

Bitō weca æidnque bitō awinca adinque watapæ tocæboimpa,

ante awēnē Dabii wodi āmotamīni ante bai apænegacāimpa.”

²⁹ Ante apænedinque Pegodo godōmenque apæneantapa. “Iñānāni ñōwo edonque apænebo ēñenguēnē quēwēmīni. Mōnō mæmæ Dabii wodi do wængacāimpa. Tōmengā māo do daga wengadānimpā. Edæ tōmengā wodido nāni wengāñōmō ñōwo ganca a ongō amīnīpa.

³⁰ Incæte tōmengā ingante Wængonguī, Dabii ēñēmi, angacāimpa. Bitō pæñnāni wææ pæyōnāni adocanque ingante botō bitō awēnē contaimpaa pōnō cōnōmo contadinque tōmengā iñōmō nē Awēnē bacæcāimpa, ante apæneccā ēñēninque awēnē Dabii wodi Wængonguī beyæ nē apænegaingā inongā inte edæ, Wængonguī tōmengā nānō ānō bai cōwē cæcæcāimpa, ante do ēñengacāimpa. ³¹ Ayæ, Æbānō cæquingā, ante do ēñengaingā inte tōmengā, Mōnō Codito iñōmō waodāni nāni wæante ongōñōmō ōñōñongante Wængonguī ēmō cæte godāmai inte wææ aacā beyænque tōmengā baō incæ ñōmāādāmai ingæimpa, ante apænegacāimpa. Mānōmāinō ante apænedinque awēnē Dabii wodi, Mōnō Codito ñāni ōmæmoncæcāimpa, ante do apænegacāimpa. ³² Itota ingante Wængonguī, Nāni ōmæmōe, angā ñāni ōmæmongantapa. Iñinque māñinō tōmengā nānō ñāni ōmæmongainō ante nē adimōni inte mōnitō tōmāmōni edæ, Nāwangā impa, ante nē apænemōni Imōnīpa.”

³³ “Iñinque Wængonguī angā beyænque Itota inque ingā ōönædē æidinque Wængonguī tōmēmæ inō tæ contate ongongampa. Ayæ Mæmpo Wængonguī, Botō Ōnōwoca ingante æncædānimpā, ante nānō nē angaingā ingante do godongā æninque Itota wæætē mōnitō imōnite ñōwo da pōnogā ænte ēwocamōnīpa. Iñinque mīnitō guiquēnē gonga bæco ate wæmīnitawo. Wadāni nāni tede bai tedemōni ēñente wæmīnitawo. Edæ Wængonguī Ōnōwoca pōnō cæcā beyænque gonga bæco amīnīpa. Wængonguī Ōnōwoca pōnō cæcā beyænque wadāni nāni tede bai tedemōni ēñēmīnīpa. ³⁴ Itota ōönædē inque ingā æicā bai awēnē Dabii wodi wīi adobai æigacāimpa. Incæte tōmengā godōmenque apænedinque iīmai ante yewæmongacāimpa.

‘Awēnē Wængonguī incæ botō Awēnē ingante apænedinque,

Nē Awēnē imi ēñēmi. Botō tōmēmæ inō tæ contayōmi,

³⁵ botō bitō imite nē piinte cædāni inānite bæ tabo ate bitō tōmēnāni inānite pinā gāwate bai cæcæbiimpā,’ ante Awēnē Wængonguī angacāimpa,” ante Dabii wodi yewæmongacāimpa.

³⁶ Ante apænedinque Pegodo godōmenque iīmai angantapa. “Mānōmai beyæ mīni idægocabo tōmāmīni, Iīmainō ante nāwangā pōni impa, ante ēñencæmīnimpā. Māningā Itota ingante mīnitō ñænquedimæ gōnonte wænōmīni nē wæningā ingante ante apænedinque Wængonguī incæ, Itota nē Awēnē inongā ingampa, ante ayæ, Nē Codito inongā ingampa, ante edæ do cægacāimpa.”

³⁷ Ante Pegodo apæneccā ēñēninque tōmēnāni, Æ, wænæ wænæ cæte awædō, ante ancai guīñente wædinque Pegodoidi inānite, —Iñānāni, æbānō cæquēnēmōni Imōnīi.

³⁸ Añōnānite Pegodo wæætē,

—Iīmai cæedāni. Mīnitō wænæ wænæ mīni cædinō ante Wængonguī pōnō ñimpo cæcæcāimpa, ante cædinque, Æmæwo wænæ wænæ cætabopa, ante Itota Codito ēmōwo ante apænedinque æpæñē guiedāni. Mānōmai cæmīni adinque Wængonguī tōmengā Ōnōwoca ingante da pōnogā ænte ēwocacæmīnimpā. ³⁹ Edæ mīnitō imīnite aa pecā incæ mīni wēnāni inānite aa pecā incæ ayæ ate quēwēnāni inānite aa pecā incæ mōnō Awēnē Wængonguī nānō nē aa pedāni inānite apænedinque, Botō ānō bai cōwē cæcæboimpa, angampa.

⁴⁰ Ante apænedinque Pegodo godōmenque nangui āninque, Èñenguēnē quēwēnānīi, ante wantæpiyæ apæneantapa.

—Nōwodāni iñōmō nāmanque nāni cæñēnō ante idiquibæ nāni cæi bai mīnitō adobai cædāmai inte nōingā cæte waa quēwēdāni.

⁴¹ Ante Pegodo ancaa angā ēñēninque pancadāniya Ao āninque æpæñē do guidānitapa. Iñinque edæ māñiōnæ todee miido ganca ināni mānimpodāni wede pōñēninque do pōnengāñāni tōnō adocabodāni bagadānīpa. ⁴² Iñāni iñōmō adocabodāni badīnāni inte cōwē ñimpo cædāmai Iñinque godongāmæ pō pō cæyōnānite Itota nānō da godongāñāni apænedāni ēñēñōnānīpa. Ayæ nāni pōnencabo inōnāni inte wacā ingā wacā ingā watapæ apænedinque pāō pā ænte godongāmæ cæninque Wængonguī ingante cōwē apænete quēwēñōnānīpa.

Nāni pōnencabo godongāmæ waa cæte quēwēñānīpa

⁴³ Iñinque edæ tōmānāni guīñente wædinque ee quēwēñōnānīpa. Ayæ Itota nānō da godongāñāni iñōmō, Tōmānāni pōnencædānīpa, ante cædinque Wængonguī

Tæiyæ Waemō Ōnōwoca tōnō cædinque tōmēnāni nāni pōnēninque ante mā cædinque bamōnengæ nanguī cædōnānimpā. ⁴⁴ Nē pōnēnāni tōmānāni adoyōmō pō pō cædinque tōmēnāni nāni mānincōo incæ, Tōmāmō qui impā, ante nē pōnēninque, Wacā ingā wacā ingā mōnō godongāmæ godonguinque māmompā, ante cædōnānimpā. ⁴⁵ Mānincōo tōnō ōmæ nāni ēadincoo incæ godonte æ godonte æ cædinque wadāni nē ōmaadāni inte wædāni inānite pancæ pancæ godōnānimpā. ⁴⁶ Ī Īnincue Īimō Īñō Īimō Īñō adoyōmō pōninque Wængonguī oncō ñænæncōnē yabæcōnē nē guī guī cædāni inte mīmōno nō pōnēninque tōmēnāni oncōnē adobaī pāo pā ænte watapæ todinque godongāmæ cædōnānimpā. ⁴⁷ Tōmēnāni edæ Wængonguī ingante, Waa pōnī nē cæbi ĩmpā, ante ancaā āñōnāni wadāni edæ tōmēnāni inānite waa adōnānimpā. Ayæ mōnō Awēnē pōnō cæcā ate tōmēnāni edæ, Itota Codito ængā beyæunque mōnō quēwengæimpā, ante pōnēninque Īimō Īñō wacabomō Īimō Īñō wacabomō nē pōnēnāni badinque edæ tæiyæñāni bagadānimpā.

3

Cōmāwaingā ingante āna waa bawacampa

¹ Īncayæ ate nænque ædæ wæicā ate oodeoidi nāni cōwē Wængonguī ingante apænedōñedē Pegodo tōnō Wāō Īñōmō Wængonguī oncōnē ñænæncō yabæcōnē guīcæte ante æidatapa. ² Æite ayōna wadāni pōninque cōmāwaingā ēñate nē pædingā ingante næænte māmōnāni pongā adatapa. Īngā cōmāwaingā Īñōmō nē pō guīdāni inānite, Pōnōmi æmoe pōnōmi æmoe, ancæcāimpā, ante cædinque tōmēnāni tōmengā ingante Īimō Īñō Īimō Īñō næænte pō næænte pō cædinque edæ Wængonguī oncō ñænæncō boyæ yabædemō, Wainemō, nāni ānemō yabæque cō cædōnānimpā. ³ Īnincue ñōwo Pegodo tōnō Wāō Wængonguī oncō ñænæncōnē yabæcōnē pō guīcæ cæda adinque tōmengā tōmēna Īnate, Pōnōmīna æmoeda, angantapa. ⁴ Angā ēñēninque Wāō tōnō tōmengā ingante cōwā adinque Pegodoque apænecantapa.

—Mōnatō ĩmōnate ææmō ae.

⁵ Angā ēñēninque cōmāwaingā, Botō ĩmote wabānō pōnōna ænguīmo, ante pōnēninque ææmō ayongā ⁶ Pegodo Īñōmō,

—Quīnō māmopa pōnōmo ænguīmīi. Edæ oodo incæ tiguītamō incæ ōmæpobo ĩmpa. Wæætē tæiyæ waemō botō ēwocadō ante bitō ĩmote pōnō apænebo ate bitō æe. Nāatadeta quēwengāingā Itota Codito ēmōwo beyæunque bitō dao dao goe, angacāimpā.

⁷ Ānincue Pegodo cōmāwaingā tōmēmæ ĩnō pædæ wææmpo bæi ongonte tōō

æmængā ate cōmāwadingā ōnōwa tōnō ōnoncāiwa tæī piñæwacā. ⁸ Ate Īñontobæ ængæ gantite dao dao gocantapa. Ayæ Wāō tōnō Pegodo miñæ Wængonguī oncō ñænæncōnē yabæcōnē godongāmæ go guīdinque dao dao go togæi togæi godinque Wængonguī ingante waa ate apænedinque, Wængonguī, bitō cōwē waa pōnī ĩnōmi inte pōnō cæbi æmopa, ante nanguī apænecantapa. ⁹ Wængonguī māmōmai waa cæcampa, ante nanguī pōnī tededinque dao dao gocā adinque edæ tōmānāni, ¹⁰ Æ, Īngā Īñōmō, Pōnōmi æmoe pōnōmi æmoe, ante Wængonguī oncō ñænæncō boyæ yabædemō, Wainemō, mōnō ānemō gāānē mōnō nē ānecōningā adocā ingampa. Ante adinque, Quīnō bai cæte waa bacāi, ante ancaī guīñente wægadānimpā.

Tadōmōō yabætaa ongonte Pegodo apænecampa

¹¹ Mānīi cōmāwaingā Īngā incæ Pegodo tōnō Wāō Īnate wīnīmā wīnīmā cæcā adinque wadāni tōmānāni guīñente wædinque Tadōmōō yabætaa nāni āñōmō pogodo ponte tōmēnāni weca guīdānitapa. ¹² Guīdāni adinque Pegodo, “Mīni idægocabo ēñēdāni. Mōnatō ĩmōnate quīnante waa amīnīi. Māmōmai waa bawacā adinque edæ quīnante guīñente wæmīnīi. Mōnatō edæ, Tōmengā dao dao gocæcāimpā, ante cædinque tæiyæ waemōna ĩmōnāna diyæ tæī piñænte cæquīmōnaa. ¹³ Abadāō wodi Itæca wodi AACOCO wodi tōmēnāni, Mōnō Wængonguī ĩngā ingampa, ante nāni nē angāingā inte Wængonguinque cæcā ate waa bawacampa. Mōnō wæmæidi Wængonguī incæ, Itota botō ĩmote nē cædongā ñāō bai ēmōñongante tōmengā ingante waa acædānimpā, ante māmōmai cæcampa. Adocā Itota ingante mīnitō Īñōmō, Wængongæimpā, ānincue pædæ godōmīnitapa. Ayæ Pidato, Īmpo cæbo gocæcāimpā, ante apænte angā ate mīnitō wæætē Pidato weca ongōninque adocā ingante ante Baa āmīnitapa. ¹⁴ Īnincue nē Tæiyæ Waemō ĩngā inte nō cæyongante mīnitō Baa ānincue wæætē nē wæñōningā ingante ante ānincue, Īngā ingante ĩmpo cæbi pongæ, āmīnitapa tōō. ¹⁵ Īnincue mōnō quēwengūimāmo nē pōnongā ingante Baa ānincue mīnitō nē wæñōnīmīni ĩmīnīpā. Īncæte Wængonguī tōmengā ingante, Nāni ōmæmōe, angā nāni ōmæmongantapa. Īnincue tōmengā ñāni ōmæmongā nē adīmōni inte mōnitō. Æbānō cægacāimpā, ante adodō ante nē apænemōni ĩmōnīpā. ¹⁶ Adocā Itota ēmōwo ante apænemōna ēñente pōnēninque māningā cōmāwadingā mīni nē adingā Īñōmō ñōwo tæī piñæwacampa. Edæ Itota pōnō cæcā beyæ mānīi onguīñængā nē pōnengā badinque Itota ēmōwo beyæunque ædæmō

waa bawate tæi piñængä bacä aminipa,” ante Pegodo apænegantapa.

¹⁷ Ayæ godōmenque apænedinque Pegodo, “Nōwo botō tōniñamini ēñēedāni. Minitō awēñēdi ēñēnāmai nāni cæi bai cædinque mīnitō iñōmō adobai, Æbānō nō cæquī, ante ēñēnāmai inte cæminitapa, ante awædō. ¹⁸ Incæte mīnitō mānōmai ēñēnāmai cædinque Wængongui beyæ nē apænegaināni tōmānāni nāni apænegai bai do iñque cæminipa. Tōmēnāni, Mōnō Codito caate wæte wæncæcäimpa, ante nāni angainō bai mīnitō cædi beyæ ñowo iñque batimpa. ¹⁹ Iñique mīnitō wēnæ wēnæ mīni cædinō ante wæwente pōnente ñimpo cædinque wentamō mīni mongæñō mīni ñā mēnongaquinque Wængongui gāmæñō pōedāni. ²⁰ Mōnō Awēñē weca mīni wampo pōnenguinque pōedāni. Ayæ Wængongui, Minitō Codito poncæcäimpa, ante do nānō angaingä inongä inte Itota mīnitō weca poncæcäimpa, ante tōmengä gāmæñō pōedāni.”

²¹ “Incæte edæ, Tōmancoo do ingai bai adobai bacoocäimpa, ante Wængongui badoncæcäimpa, ante tæiyæ waēmō ingaināni Wængongui beyæ doyedē apænegadānimpa. Wængongui mānōmai nānō badompoga Itota iñōmō mānimpoga oñædē quēwencæcäimpa anguēñē. ²² Edæ Mōitee wodi, ‘Botō wænte gobo ate mīnitō Awēñē Wængongui wæætē mīnitō beyæ cædinque mīni cabo iñōmīnite adocanque ingante apænte Ao ante æncæcäimpa. Tōmengä ingante äinque, Mōitee wodi botō beyæ nē apænegä ingaingä bai bitō adobai edæ botō beyæ nē apænebi bacæbiimpa, ancæcäimpa. Wængongui mōnō Codito ingante mānōmai angä iñique tōmengä wæætē nē apænegä bagacäimpa. Iñique mīnitō iñōmō tōmengä quīēmē ante apæneyongä äamonca ongonte tōmānō ante ēñēcæminimpa.

²³ Iñique edæ mäningä Wængongui beyæ nē apænegä ingante æcāñō ēñēnāmai ina iñōmō, tōmengä guidēñāni weca quēwēñāmai edæ wæncæcäimpa,’ ante Mōitee wodi apænegacäimpa,” ante Pegodo apænegantapa.

²⁴ Ayæ apænedinque Pegodo, “Æpodānidō Wængongui beyæ nē apænegaināni ināni. Edæ tōmēñāni Tāmoedo tōnō ayæ pōñāni tōnō tōmāñāni adoyōmō apænedinque Codito ñowoñæ nānō cædō ante apænegadānimpa.

²⁵ Iñique mīnitō quīquēñē Wængongui beyæ nē apænegaināni wēmīni inōmīni inte tōmēñāni nāni angainō ante nē ænguimīni iminipa. Ayæ edæ Wængongui, Botō pōñō cæbo ate Ao ämīni iñique mōñō godongāmæ waa cæcæimpa, ante nānō angainō ante mīnitō edæ mīni quēwenguinque ēñente quēwencæminimpa. Abadäo wodi ingante

apænedinque Wængongui, ‘Abadäo ēñēmi. Minitō mīni quēwencabo tōñō wadāni tōmāmæ quēwēñāni nāni cabo nāni cabo tōñō tōmāmīni iñōmīnite bitō Pæingä pōñō wadæte cæcä beyæñque waa quēwēñinque tocæminimpa,’ ante apænegacäimpa. ²⁶ Wængongui, Botō Wengä pōñō aa pecä ēñēñinque mīnitō wæætē wēnæ wēnæ cæte mīni gogainō ocæ ämænte wadæ pōinque wæætē waa quēwenguñō cægōinque waa tocæminimpa. Ante cædinque tōmengä tāno mīnitō beyæ ante tōmengä ingante nē cædongä mōñō Codito ingante da pōnongä pongacäimpa,” Ante Pegodo iñque apænegacäimpa.

4

Pegodo tōñō Wäo awēñēdi weca gongænte apænedapa

¹ Pegodo tōñō Wäo tōmāñāni inānite tæcæ apæneyōna wadāni tōmēna weca māo godongāmæ pōñānitapa. Ināni iñōmō nē, Wængongui quī, ante godōñāni tōñō Tado-teoidi tōñō Wængongui oncō ñæñæncō ante nē wææ wāñōñāni awēñē tōñō māñināni pongadānimpa. ² Itota ñāni omæmongä bai mōñō adobai ñāni omæmongæimpa, ante Pegodo tōñō Wäo apænedapa, ante do wædōñāni inte tōmēñāni ñowo piñte māmō pōñānitapa.

³ Pōinque tōmēñāni iñāna inate bæi ongōñānitapa. Ayæ wēmō ba iñinque bañæ ate nāna taquinque tōmēna inate tee mōnedāni guiidatapa. ⁴ Incæte tōmēna äna nē ēñēñināni quīquēñē pancadāniya nangui ināni incæ nē pōñēñāni bagadānimpa. Iñique onguñæñāni nāni nē pōñencabo iñōmō wodo tincō mīdo ganca ināni mānimpodāni bai bagadānimpa.

⁵ Bañæ ate oodeoidi awēñēdi tōñō tōmēñāni inānite nē aadāni nāni Picæncabo tōñō nē odōmōñāni tōñō Eedotadēē iñōmō godongāmæ ponte ongōñānitapa. ⁶ Wængongui quī, ante nē godongä ñæñængä pōñi Anato ponte a ongōñongä tōmengä guidēñāni Caiapato Wäo Adecantodo tōñō wadāni tōmengä guidēñāni incæ tōmengä weca godongāmæ pō guiidānitapa. ⁷ Pō guiidinque edæ Wäo tōñō Pegodo inate tæcæguedē māmō gōñōñāni gongæñōna äñānitapa.

—Mīnatō æcāñō tōñō tæi piñænte cæmīna ate cōmāwadingä waa bawacantawo. Edæ æcāñō emōwo apænete cæmīnai.

⁸ Ante äñōñāni Pegodo iñōmō Wængongui Tæiyæ Waēmō Öñowoca tōñō apænedinque,

—Awēñēdi imīni ēñēedāni, nē aamīni mīni Picæncabo ēñēedāni. ⁹ Cōmāwaingä æbāñō cæte waa bawacāi, äminitawo. Edæ cōmāwaingä ingante mōna waa cædi beyæñque mīnitō ñowoñæ pōñō

apænte āmīni awædō. ¹⁰ Īnīnque mīnitō tōnō idægōidi wadāni tōnō botō tōmāmīni imīnite adoyōmō apænebo ēñencæmīnīmpa. Itota Codito Nāatadeta quēwēningā ingante awæ ñenquedīmæ cæte mīni nē wæñōningā ingante Wængonguī angā do ñāni ōmæmōngacāīmpa. Tōmēngā adocā Itota ēmōwo beyænque cōmāwaingā Īningā tæī piñængā badīnque mīnitō weca a ongongā apa ānewēmīnīi. ¹¹ Edæ wainca nē mæñōnāni nāni wido cædinca incæ wacā, Tæcæ manca pōni tæī manguīmpa, ante cōnongampa. Itota ĩñōmō mānīnca baī æāmōnga pōni ongongampa.

¹² Īnīnque Itota, Quēwencæmīnīmpa, ante mōnō imonte ængā baī wacā ædō cæte adobaī ængūngāā. Itota ēmōwo beyænque quēwencæmīnīmpa, ante pōnō cægaīngā inte Wængonguī wæætē, Wawo adobaī i, ante dicæ pōnō cæcantawogaa. Īñæmpa inguīpoga tōmāmæ ĩñōmō edæ æcāmēnque incæ adobaī nē tæī piñænte ēmōnōngā ĩñōmō edæ dæ angampa, ante apænedatapa.

¹³ Ayæ Pegodo tōnō Wāō ōnōnaque ĩna inte nanguī adāmāi ĩna incæte edæ guñēnāmāi edonque apænedapa, ante adīnque tōmēnāni, Æbānō cæte edæ do ēñēnatawoo, ante wædinque, Itota miñæ nē godīna inte do ēñēnapa. Nāwangā ĩmpa, ante wædānitapa. ¹⁴ Edæ cōmāwadingā Īningā tōmēnāni weca a ongongā adīnque tōmēnāni ædō cæte wadō ante tedequīnāni. ¹⁵ Īnīnque tōmēna ĩnate, Mōnitō godongāmæ Apænte Āncabo weca ongōnāmāi godōmenque goeda, ānāni goda ĩnīnque, Tōmēna ĩnate æbānō cæquīi, ante pōnēnīnque godongāmæ tededōnānitapa. ¹⁶ Īīmāi ante apænedānitapa.

—Mānīna ĩnate quīnō cæquīmōō. Īñæmpa tōmēna tæī piñænte bamōnēngæ cædatapa, ante Eedotadēē quēwēnāni, Nāwangā ĩmpa, ante tōmānāni do ēñēnānīpa. Īnīnque, Waa cædāmāi ĩnatapa, ante mōnō ædō cæte angūīi. ¹⁷ Incæte mānīnō nāni apænedō ante wadāni wīi godōmenque ēñencædānīmpa, ante wææ cædinque mōnō tōmēna ĩnate wææ angæīmpa. Mānīi ēmōwo ante mīnatō mīna wæquīnque apænemīnāpa. Wacā æcāmēnque ingante apænedāmāi ĩmæweda, ante mōnō wææ angæīmpa, ante nāmāneque tededānitapa.

¹⁸ Ayæ ĩnīnque tededīnque Wāō tōnō Pegodo ĩnate āñete māmōnāni pōna adīnque tōmēna ĩnate wæætē, Ēñenguēnē quēwēmīnaa, ānānitapa. Edæ mīna panguīnque ante Itota ēmōwo ante apænemīna. Īncayæ ate tōmēngā ēmōwo ante apænedīnque edæ adopoque incæ odōmōnāmāi ĩmæweda. ¹⁹ Ante āñōnānīte Pegodo tōnō Wāō wæætē,

—Īñæmpa æcānō ingante ēñente cæquīmōna, ante pōnēmīnīi. Mīnitō ānō ēñēnīnque wæætē Wængonguī nānō ānō ēñēnāmāi inte cæmōna adīnque Wængonguī edæ, Nō cæmīna abopa, angūngāā. ²⁰ Edæ mōna adīnō ante mōna ēñēnō ante ædō cæte apænedāmāi inguīmōnaa.

²¹ Ante apænedā ēñente wædinque awēnēidi wæætē, Mīni panguīnque, ante ancaa apænedānitapa. Incæte wadāni, Cōmāīnīngā ingante Wængonguī waa pōni cæcantapa, ante watapæ apænedāni ate wædinque awēnēidi wæætē Wāō tōnō Pegodo ĩnate pancæte ante cædināni inte, Īñæmpa waodāni piñāni ĩnīnque mōnō æbānō cæte panguīmōō, ante guñēnte wædinque pānāmāi inte ĩmīpo cædāni godatapa. ²² Edæ waa nē bawadingā ĩñōmō do coadenta wadepo ayæ godōmenque tōmēngā nānō ēñādi ĩñonte Wængonguī bamōnēngæ cæcā waa bacā adīnque tōmānāni ædō cæte wadō ante pōnēnguīnāni.

Wede pōnente tæī piñænte cæcæmōnīmpa, ante Wængonguī ingante apænedānīpa

²³ Mānīi ĩmīpo cædāni godīnque Pegodo tōnō Wāō ĩñōmō tōmēna tōnō godongāmæ pōnēnāni weca ponte apænedīnque, Wængonguī quī, ante nē godōnāni ñænænāni tōnō nē aadāni nāni Picæncabo ĩñōmō mōnatō ĩmōnate ĩīmāi ānāni wætāmōnāpa, ante tōmānō ante adodō ante apænedā. ²⁴ Ēñēnīnque tōmēnāni nāni pōnencabo adoyōmō pōnēnīnque Wængonguī ingante adotedæ tedete apænegadānīmpa. “Awēnē Wængonguī ēñēmi. Tæiyæ Awēnē ĩnōmi inte bitō ōnæ owocoo tōmancoo inguīpoga tōmāmæ gāwapæntibæ tōmāmæ badōnīnque ōnædē owodāni wæipodē quēwēnāni gāwapāa owodāni æyōmōmē quēwēnāni tōmānāni ĩnānīte bitō adobīque badongabiīmpa. ²⁵ Īnīnque mōnitō mæmæ Dabīi wodi ingante apænedīnque bitō, Dabīi ēñēmi, Bitō botō ĩmote nē cædōmi ĩñōmite botō Tæiyæ Waēmō Ōnōwoca apænecā ēñēnīnque bitō wæætē ĩīmāi ante apænecæbīmpa.

‘Wadāni nē ēñēnāmāi ĩnāni incæ quīnante ænguī badīnque wido cæcæte ante cædāni.

Waodāni nāni cabo waodāni nāni cabo incæ ĩdīquībæ ante quīnante pōnēnānitawo.

²⁶ Inguīpoga awēnē odeyeidi, Wido cæcæīmpa, ante tæī gongænte ongōnānīpa.

Pancabaa awēnēidi adobaī, Æbānō cæquīmōō, ante godongāmæ pōnēnīnque

mōnō Awēnē ingante ayæ tōmēngā nānō nē ōni pæcadongā Codito ingante piinte ānewēnānīpa tōō, ante apænebi

ēñēninque mæmæ Dabii wodi wæætē
bitō beyæ apænegacāimpa.”

²⁷ Ante Wængongui ingante apænedinque
ñowodāni nāni pōnencabo godōmenque
apænedānitapa. “Wængongui ēñēmi. Tōmēmi
Wengā bitō Tæiyæ Waēmō Inongā iñongante
bitō, Botō imote nē cæbi bacæbiimpa, ante
ōni pæcagabiimpa. Nāwangā impa. Incæte
bitō imite nē cædongā iñongante Itota bitō
nē ōni pæcadongā ingante edæ Edode tōnō
Pontio Pidato tōnō idægoidi tōnō wadāni
tōnō piinte adoyōmō ponte mōni quēwēñōmō
incæ ongōninque bitō imite nē cædongā
ingante, Æbānō cæte wido cæquī, ante do
cædānitapa. ²⁸ Edæ bitō tæi piñæmi inōmi
inte nāmā pōnēninque edæ, Iimāi baquīnō
anguēnē, ante do angabiimpa. Tōmēnāni
guiquēnē bitō angaiñō bai wæætē cædinque
piinte pō gongænte cædānitapa. ²⁹ Nōwo
iñōmō bitō imite nē cæmōni iñōmōnite
ñowodāni pōnō piinte ānāni ate wædinque
bitō wæætē pōnō cæbi ate mōnitō tæi
piñæninque bitō ānō ante guīñēnāmāi
apænegacāmōnimpa. ³⁰ Ayæ nē wēnæ wēnæ
ināni inānite bitō ōnompoca pōnō gampobi
ate waa bacædānimpa, āmōnipa. Ayæ
bitō Wengā Itota Tæiyæ Waēmō iñongante
mōnitō tōmengā ēmōwo apænedinque,
Wadāni pōnencædānimpa, ante mā cædinque
bamōnengæ cæmōni adinque tōmēnāni
guīñente wæcædānimpa āmōnipa,” ante
Wængongui ingante apænedānitapa.

³¹ Inque apænedāni ate tōmēnāni nāni
godāmæ ongōñōmō incæ iñontobæ ocæ ocæ
cætapa. Cæyō tōmānāni inānite Wængongui
Tæiyæ Waēmō Ōnōwoca pō guicā æninque
ædæmō ēwocadinque tōmēnāni Wængongui
nānō ānō ante guīñēnēdāmāi inte edonque
apænegadānimpa.

*Tōmāmō mōnō quincoo impa, ante
cædānipa*

³² Ayæ tōmānāni nāni pōnencabo incæ
tōmēnāni nāni ēwocadō adodō ēwocate bai
ināni inte mīmōnē adodō ante pōnēninque
tōmēnāni ēadincoo incæ, Botō qui impa,
ante ānāmāi ināni inte, Tōmāmō mōnō qui
impa, ante pæ gompodāmāi inōnānimpa.
³³ Ayæ Itota nānō da godongaināni iñōmō
tæi piñænte apænedinque, Itota Codito ñāni
ōmæmongantapa, ante cōwē nāni apænedi
bai apænedōnānimpa. Edæ Wængongui
tōmēnāni inānite waadete pōnō cæcā ate
watapæ quēwēñōnānimpa. ³⁴ Ayæ tōmēnāni
nāni cabo incæ æcāmenque ōmæpocā i iñōmō
edæ dæ angantapa. Edæ ōmæ nāni ēadi
incæ godonte æninque oncō mænonte
nāni ēadi incæ godonte æninque tōmēnāni
nāni godonte æninta ænte pōninque ³⁵ Itota
nānō da godongaināni weca ænte māmō
ñō cædāni æninque tōmēnāni wæætē
ōmæpodāni inānite godōnāni eyepæ eyepæ

æñōnānimpa. ³⁶ Inque Itota nānō da godon-
gaināni iñōnāni adocanque Debiu wodi
pæingā Ootee ingacāimpa. Tōmengā iñōmō,
Wadāni wampo pōnente quēwencædānimpa,
ante nē ædæmō apænedongā iñongante
wadāni tōmengā ingante Bedēnabee ante
pōnō pemongadānimpa. Iñgā Ootee
Bedēnabee nāni pemōningā iñōmō Tipidebæ
quēwente pōningā inte edæ, ³⁷ tōmengā
ōmæ ēadi godonte æninque tōmengā nānō
godonte æninta Itota nānō da godongaināni
weca māmō ñō cægacāimpa.

5

Ānāniya tōnō Tapidæ

¹ Māniñedē Ānāniya nāni ānongā tōmengā
nānōogængā Tapidæ tōnō tōmēnāni nāni cæi
bai cædinque ōmæ nāna ēadīmæ godonte
ænatapa. ² Ayæ nānōogængā ēñēñongā
tōmēna godonte nāna æninta incæ Ānāniya
iñōmō pancataa pæ gompote æninque
wæætē pancataa ænte māmō Itota nānō da
godongaināni weca ñō cæcantapa. ³ Nō cæcā
adinque Pegodo,

—Ānāniya ēñēmi. Tatāna ingante ædæmō
entawēmi inte ōmæ beyæ bitō æninta pan-
cataa, Botō qui, ante awēmō ñō cædinque
edæ pancataa ænte māmō ñō cædinque bitō,
Tōmanta impa, ante quimæ ānewē. Iñæmpa,
babæ cædimi inte bitō Wængongui Tæiyæ
Waēmō Ōnōwoca ingante babæ āmipa tōō.
⁴ Edæ bitō ōmæ ini incæ bitō qui cōwē in-
tapa. Ayæ ñōwo māninta æninque, Æbānō
cæquī, ante tōmēmi nē āmi iimitapa. Inque
edæ mīmōnō pōnēninque quimæ wapiticæ
cæbitawo. Bitō mānōmāi cædinque waodāni
inānite wīi babæ apænedinque Wængongui
ingante babæ apænebitapa tōō.

⁵ Angā ēñente wædinque Ānāniya iñōmō
tæ wæænte æmæwo wængantapa. Wængā
adinque tededāni ēñēninque tōmānāni
guīñente wædānitapa. ⁶ Wængā inique
edēnāni ponte wīni caete næænte māo
daga wēnānitapa. ⁷ Dobæ wængā ate todee
ooda go ate tōmengā æbānō wængā ante
ēñēnāmāi iningā inte tōmengā nānōogængā
incæ pō guicā. ⁸ Adinque Pegodo tōmengā
ingante,

—Apænebi ēñēmo. Mīnatō ōmæ
godōninque mānimpota æmīnatawo. Āñongā,
Ao, mānimpota.

⁹ Angā ēñēninque Pegodo wæætē,
Mīnatō iñæmpa edæ guēa pōnēninque,
Mōnō Awēnē Ōnōwoca æbānō panguingā,
ante quimæ cæmīnatawo. Edæ bitō
nānōogængā baō ini nē daga wēnīnāni incæ
do dao pōnāni ēñēmīi. Edæ bitō baō
adobai ænte gocædānimpa tōō.

¹⁰ Tæcæ ante āñongā onquiyængā iñōmō
tōmengā ōnōwa gāānē tæ wææninque nāñe

wængantapa. Wængā ate māniī edēnināni pō guite ayōnāni dobæ wænte a ðōngā adinque tōmengā baō īni æninque tōmengā nānōogængā wodido gāānē māo daga wēnānitapa. ¹¹ Mānōmai nāne wænapa, ante tededāni ēñēninque Codito ingante nāni nē godongāmæ pōnecabo tōnō wadāni tōmānāni ancai guiñente wægadānimpa.

Ate ēñecædānimpa, ante bamōnengæ nan-gui cædānipa

¹² Māniñedē Itota nānō da godongaināni iñōmō Wængongui Ōnōwoca tōnō cædinque, Ate pōnecædānimpa, ante wadāni ayōnāni mā cædinque bamōnengæ nangui cædōnānimpa. Ayæ adoyōmō pōñēninque tōmānāni Wængongui oncō Tadōmōō yabæcōnē nāni ānoncōnē pō guī pō guī cædōnānimpa. ¹³ Wadāni tōmēnāni īnānite adinque, Nē pōnēnāni waa quēwēnāni īnānipa, ante pōnēnāni incæte guiñente wædinque godongāmæ pō guidāmai gomō adōnānimpa. ¹⁴ Pancadāniya guiquēnē onguiñēnāni tōnō onquiyænāni tōnō nangui īnāni mōnō Awēnē ingante ñōwo pōñēnānitapa. Īnāni iñōmō dō pōñēnāni tōnō adocabodāni bacoo īnāni bagadānimpa. ¹⁵ Īninque māniī bamōnengæ cædāni adinque wadāni wēnæ wēnæ īnāni īnānite ænte pōninque mōimoga mōincodē ñō cædānitapa. Edæ, Pegodo nænque pāmo wodo pænta goyongā tōmengā gāñēñōmō ðñōninque adocanque adocanque waa bacædānimpa, ante cædinque Pegodo nānō goquinō ante ænte māmō ñō cædāni ðñōnānitapa. ¹⁶ Ayæ adobai Eedotadēē eyequeī wayōmō nāni quēwēñōmō wayōmō nāni quēwēñōmō quēwēninque wadāni wēnæ wēnæ īnāni īnānite næænte māmō næænte māmō cōnōnāni ate tōmānāni waa badānitapa. Ayæ wēnæ nē wentamō ēwodadāni inte yewænte wæwēnāni īnānite adobai ænte māmō pōninque waa badānitapa.

Itota nānō da godongaināni īnānite piñte tee mōnedānipa

¹⁷ Wængongui quī, ante nē godongā ñænængā pōni īnongā tōnō wadāni tōmengā tōnō godongāmæ cædāni incæ Tadoteoidi īnōnāni inte, Nāni ðmæmōnāmai ingæimpa, ante nē pōñēnāni īnōnānimpa. Īninque Itota nānō da godongaināni mānōmai waa cædāni ate wædinque awēnē tōnō Tadoteoidi iñōmō tōmēnāni īnānite piñte gadānimpa. ¹⁸ Īninque Itota nānō da godongaināni īnānite yao ongonte æninque tōmānāni ayōnāni tee mōnedānitapa. ¹⁹ Tee mōnedāni wæcōñōnānite Wængongui anquedo woyowotæ ponte odemō wi ænete mantacā tayōnānite apænecantapa. ²⁰ “Goedāni. Wængongui oncō ñænæncō yabæcōnē go guite næ gongæninque mīnitō māniñōmō

pōnāni īnānite apænedinque, Wængongui pōnō cæcā beyænque mōnō quēwengæimpa, ante ædæmō apænemīni ēñecædānimpa.” ²¹ Angā ēñente cædinque tōmēnāni baōnæ ñāō bayonte Wængongui oncō ñænæncō yabæcōnē do go guidinque odōmonte apænedāni ēñēnānitapa.

Mānōmai do go guite apænedānipa, ante ēñēnāmai īnāni inte edæ, Wængongui quī, ante nē godongā ñænængā pōni īnongā guiquēnē tōmengā tōnō godongāmæ cædāni tōnō adoyōmō pō guidānitapa. Pōninque tōmēnāni idægoidi īnānite nē aadāni Picænāni godongāmæ nāni Apænte Ānoncabo tōmānāni īnānite āñete pōnānitapa. Īnāni wæætē tontadoidi awēñēdi īnānite āninque, Mīnitō tee mōneincōnē gote Itota nānō da godongaināni īnānite āñete māmōmīni poncædānimpa. ²² Ānāni tee mōneincōnē gote ayōnāni edæ dæ ānāni ante wædinque wææ wānōnāni awēñēdi gode ancæ pōninque, ²³ Īmai ante apænedānitapa.

—Gote ayōmōni oncō ædæmō tee mōnete intapa. Ayæ tontadoidi odemō pōni a ongōnāni adinque mōnitō go wi ænete guiyōmōni edæ dæ ānāni ate wædinque wadæ pōmōnipa. ²⁴ Ante tededāni ēñēninque, Wængongui quī, ante nē godōnāni ñænæñāni tōnō Wængongui oncō ñænæncō ante nē wææ wānōnāni tæiyæ awēnē tōnō guiñente wædinque, Ñōwo quīēmē bai bacæimpa. ²⁵ Ante wæyōnāni wacā do pō guidinque tōmēnāni īnānite,

—Aquēnē quēwēmīni. Māniñāni mīni tee mōnedāni incæ Wængongui oncō ñænæncō yabæcōnē go guite a ongōninque māniñōmō pōnāni īnānite odōmonte apænedāni ēñēnāni ataqueadāni.

²⁶ Ante apænecā ēñente wædinque wææ wānōnāni awēnē tōmengā nānō wææ wānoncabo tōnō Itota nānō da godongaināni īnānite æncæ godinque, Godongāmæ ongōnāni incæ piñte tacadāni wæcæ wæ, āninque pānāmai inte ee ænte pōnānitapa. ²⁷ Ænte pōninque nē aadāni Picænāni godongāmæ nāni Apænte Ānoncabo weca ænte māmō gōñōnāni gongæñōnānite, Wængongui quī, ante nē godongā ñænængā pōni īnongā iñōmō tōmēnāni īnānite angantapa.

²⁸ —Māningā Itota ēmōwo apænedinque wadāni īnānite odōmōnāmai imæwedāni, ante ancaā antamōnipa tōō. Incæte mīnitō māniñe mīni odōmonte ānewēnō ante Eedotadēē tōmāo odōmonte apænemīnipa. Ayæ godōmenque tedewēninque mīnitō, Māningā nē wængaingā ingante awēñēdi nē wēnæ wēnæ cædināni īnānipa, ante mōnitō imōnitedō ante ānewēmīnipa tōō.

²⁹ Ante nē ñænængā piññongā Pegodoidi wæætē,

—Mōnitō guiquēnē waomīni imīnite ēñēnāmaī inte Wængonguī ingante ēñente cæquēnēmōni imōnīpa. ³⁰ Mīnitō Itota ingante ñanquedīmæ timpote wænōmīni wængā ate mōnō wæmæidi Wængonguī incæ angā ñāni ōmæmongantapa. ³¹ Ayæ nē ñāni ōmæmōningā ingante apænedīnque Wængonguī, Bitō, Quēwencædānīmpa, ante nē Ærni bacæbiīpa, angacāīmpa. Nē Ærni iñōmite idægoidi tōmānāni, Idæwaa wēnæ wēnæ cæte quēwente awædō, ante botō gāmæñō poncædānīmpa, ante cæcæbiīpa. Bitō æmi beyæncæ botō tōmēnāni inānite pōnō waadete ñīmpo cæcæboīmpa. Ante cædinque edæ Itota nānō Awēnē baquinque Wængonguī æmōnga ænte mæicā æidinque Wængonguī tōmēmæ inō tæ contate on-gongampa. ³² Itota ingante Wængonguī ænte mæicā æigacāīmpa, ante nē adīmōni inte mōnitō mānīnō ante nē apænēmōni imōnīpa. Ayæ nē ēñēmō cæmō iñōmōnte Wængonguī tōmēngā Tæiyæ Waēmō Ōnōwoca ingante da pōnōngā ænte ēwocamōmpa. Tōmēngā Ōnōwoca adobai mōnitō tōnō godongāmæ nē apænecā ingampa, ante Pegodoidi apænedānīpa.

³³ Mānōmaī apænedāni ēñēnīnque awēnēidi ænguī badīnque tōmēnāni inānite edæ wænoncæ cædānīpa. ³⁴ Mānīñedē adocanque Paditeocā incæ tōmēngā ēmōwo Gāmadiēdo tōmēnāni nāni wææ angainō ante nē ēñēngā iñongante tōmānāni tōmēngā ingante waa adōnānīmpa. Inīnque tōmēnāni nāni Apænte Äincabo wænoncæ cæyōnāni māningā iñōmō tōmēnāni nāni nē waadecā inōngā inte ængæ gantidinque, Itota nānō da godongaināni inānite oncodo mantamīni wantæ ongoncædānīmpa. ³⁵ Angā dæ godāni inīnque Gāmadiēdo wæætē awēnēidi inānite apænecantapa.

—Idægoidi ēñēdāni. Mānīnāni inānite æbānō cæquīl, ante ædæmō pōnente ate edæ ee cædāni. ³⁶ Edæ doyedē wacā Teodo adobaingā ængæ gantidinque, Botō nē nanguī cæbo imopa, ante āñongante edæ tōmēngā mīñæ coatodo tiento ganca ināni godānīpa, ante pōnēdāni. Tōmēngā ingante wadāni māo wænōnāni wængā ate tōmēngā ēmīñænīnāni wæætē nāwæ godāni ate edæ dæ batīmpa. ³⁷ Ayæ ate edæ awēnē, Mīnitō ēmōwo ponte yewæmoncæmīnīmpa, ante nānō ānīñedē wacā Gadideabæ quēwēningā Oodaa adobai awēnē ingante wido cæcæte ante ængæ gantiyōngā nanguī ināni tōmēngā mīñæ goyōnāni tōmēngā ingante wænōnāni wængā ate nāwæ adobai gogadānīmpa. ³⁸ Inīnque, Mānōmaī batīmpa, ante pōnente cædāni. Nōwo iñōmō ināni adobai ængæ gantidāni adīnque mīnitō tōmēnāni inānite ee ate gomō aedāni āmopa. Tōmēnāni waodānīnque inte

cædāni bai ædō cæte cæquīnāni. Edæ dæ bacæīmpa. ³⁹ Wæætē Wængonguī angā ēñente cædāni bai mīnitō ædō cæte Baa ante wido cæquīmīni. Edæ mīnitō mānōmaī cædinque Wængonguī ingante pūmīni inte wæbaimīnīpa.

Ante wææ angā ēñente wædinque Ao ante tōmēngā nānō ānō bai cædānīpa. ⁴⁰ Itota nānō da godongaināni inānite aa pedāni pōnāni ate awēnēidi, Pædāni, ānāni ēñēnīnque nē wææ wānōnāni æmontaimenca tæi tæi pānānīpa. Ayæ awēnēidi godōmenque, Itota ēmōwo ante apænedāmaī imæwedāni, ante ānīnque Itota nānō da godongaināni inānite ñīmpo cædāni godānīpa. ⁴¹ Nē Apænte nāni Äincabo weca ongonce tao godīnque tōmēnāni wæætē, Wængonguī mōnō imonte adīnque, Botō Wēñængā ēmōwo beyæ wadāni wēnæ wēnæ ānāni ate mīnitō eyepæ inte caate wæcæmīnīpa, ante do cæcampa, ante pōnēnīnque edæ nanguī togadānīpa. ⁴² Inīnque Wængonguī oncō ñænæncō yabæcōnē incæ waodāni oncōnē incæ tōmēnāni ñīmpo cædāmaī inte cōwē go guī go guī cædinque cōwē odōmōnte apænedīnque, Itota tōmēngā nāwangā mōnō Codito ingampa, ante watapæ apænedāni ēñēngadānīpa.

6

Tiæte ganca ināni nē nēnempodāni badānīpa

¹ Itota ingante nē tee empote quēwēnāni mānīñedē nanguī ināni badāni ate pancadāniya guidiego tededō nē tededāni iñōmō ebēdeo tededō nē tededāni inānite pīnte ānīnque, Mīnitō mīni cabo owæmpōināni inānite iīmō iñō iīmō iñō cænguī eyepæ godōnīnque mōni cabo owæmpōināni inānite pōnōnāmaī imīnīpa tōō, ante ānāni. ² Itota nānō nē da godongaināni iñōmō dote ganca ināni iñōnānite wadāni, Dote inānīpa, ante pemonte bai apænedōnānīpa. Ināni iñōmō guidiegoidi mānōmaīnō ante wædānīpa, ante ēñente wædinque wadāni Itota ingante nē tee empote quēwēnāni inānite āñete godongāmæ pōnāni ate tōmēnāni inānite,

—Wængonguī nānō apænedō ante nē apænequēnēmōni inte mōnitō ædō cæte mōni cæquēñēnō ante ñīmpo cædinque cængūnque ante godonguīmōni. ³ Inīnque botō tōnīñāmīni ēñēdāni. Mīni pōnencabo nāmā cōwā adīnque, Äcānō æcānō Wængonguī Ōnōwoca tōnō āawoacque bai ēwocate nō cædāni ināni, ante adīnque mīnitō tiæte ganca ināni mānīmpodāni inānite apænte ædāni. Apænte æmīni adīnque mōnitō tōmēnāni inānite, Cænguī nē godōmīni bacæmīnīpa, āmōni ēñente cæcædānīpa. ⁴ Mōnitō wæætē Wængonguī ingante cōwē

apænedinque Wængonguī nānō apænedō ante godōmenque odōmonte apænedinque mānīnonque cæte quēwencæmōnīmpa.

⁵ Mānōmaīnō ante ēñēninque tōmēnāni nanguī īnāni īnōnāni inte tōmānāni Ao ante edæ, Īnāni mānōmaī īnānīpa, ante adīnque īīmaī ēmōnāni īnānīte apænte ængadānīmpa. Adocanque Etebā nē wede pōnengā inte Wængonguī Tæiyæ Waēmō Ōnōwoca tōnō āawocaque baī ēwocacā īnongāīmpa. Tōmēngā tōnō Pedipe, Podocodo tōnō Nīcānodo, Tīmōnō tōnō Padōmēna, ayæ Antioquiya īñōmō nē quēwēningā Nīicodato. Īngā īñōmō oodeoidi nāni pōnēnō baī pōnengā inte do oodeo baī bacā īnongāīmpa. Mānīmpodāni īnānīte apænte ænānītapa. ⁶ Apænte ænīnque Itota nānō nē da godongāīnāni weca ænte māmō gōnōnāni ongōñōnānīte īīnāni īñōmō, Mīnitō nē godōmīni bacæmīnīmpa, ante cædīnque tōmēnāni īnānīte gampodīnque Wængonguī ingante apænedānītapa.

⁷ Īnīnque Wængonguī nānō apænedō ante gode ā gode ā cædīnque māo apænedāni ēñēnōnānīmpa. Īnīnque Ee-dotadēē īñōmō Codito mīñæ nāni tee empote quēwencabo tæiyæñāni yebænte bagadānīmpa. Wængonguī quī, ante nē godōnāni incæ adobaī nanguī īnāni wede pōnēninque ēñēnte bagadānīmpa.

Etebā ingante bæi ongōnānīpa

⁸ Etebā īñōmō Wængonguī waadete pōnō cæcā ate tæī piñænte ēwocadongā inte bamōnengæ nanguī cædongāīmpa. Ayæ, Cæbo ate pōnencædānīmpa, ante mā cæcā adīnque godongāmæ ongōnāni pancadāniya, Æbānō cæcāā, ante wædānītapa. ⁹ Wadāni guīquēnē Etebā tōnō guēa wæætēdō wæætē ancæte ante cædānītapa. Īnāni īñōmō oodeoidi īnōnāni incæ pancadāniya Tidēnebæ quēwēnīnāni īñōnāni pancadāniya Adecantodia īñōmō quēwēnīnāni īñōnāni pancadāniya Tiditiabæ quēwēnīnāni īñōnāni pancadāniya Atiabæ quēwēnīnāni īnōnānīmpa. Tōmēnāni doyedē wadāni īnānīte nē cægaīnāni īnōnāni inte īñōwo abæ tawænte godīnāni īnōnāni inte godongāmæ pōnīnque adocabodāni baī badīnāni īnōnānīmpa. Tōmēnāni odōmōīncō ante, Mōni nē Abæ Tawænte Gocabo Odōmōīncō īmpa, ante pemōnōnānīmpa. Īnīnque tōmēnāni pancadāniya Etebā ingante wæætēdō wæætē ante cæyōnāni, ¹⁰ tōmēngā nē nō ēñēnongā inte Wængonguī Ōnōwoca tōnō godongāmæ apæncæcā ēñēninque tōmēnāni, Æ mōnō wæætē ædō cæte wææ anguī, ante wædānītapa.

¹¹ Īnīnque nē wæætēdō wæætē ānāni adodāni incæ wadāni īnānīte godō awēmō ānānītapa. Mīnitō babæ ante ī incæte, Mōitee

wodi ingante ante Etebā godō wēnæ wēnæ apæncæcā ēñentamōnīpa, ante ōnonque æedāni. Ayæ Wængonguī ingante adobaī tōmēngā godō wēnæ wēnæ ante babæ apæncæcā ēñentamōnīpa tōo, ante incæ æedāni, ante nē abæ tawænte godīnāni ānānītapa. Mānōmaīnō ānāni Ao ante tōmēnāni nāni angāīnō baī cædīnque Etebā ingante ante babæ ante pīīnānītapa. ¹² Mānōmaīnō ante babæ ante pīīnāni ēñēninque wadāni ōnōnānīnque incæ nē aadāni nāni Picæncabo incæ nē odōmōnāni incæ tōmānāni ænguī badānītapa. Mānōmaī ænguī badīnque tōmēnāni Etebā wodi ingante bæi ongante nē Apænte nāni Āincabo weca ænte māo gōnōnāni ongongantapa. ¹³ Pancadāniya Etebā ingante ante babæ apænedīnque īīmaī ānānītapa. Īngā īñōmō ĩmpo cædāmaī inte cōwē Wængonguī oncō tæiyæ wæēmō oncō īñōnte wīwa tedewēnīnque tōmēngā godōmenque Mōitee wodi nānō wææ angāīnō ante godō wīwa ante babæ apæncæcā ēñentamōnīpa. ¹⁴ Īñōmō oncō ante apænedīnque adocā Etebā īñōmō, Itota Nāatadeta nē quēwēningā īī oncō bæ tadete wido cæcæcāīmpa, ante ānewengampa. Ayæ adocā Itota īñōmō, Īīmaī cæedāni, ante Mōitee wodi nānō wææ angāīnō ante Ao ānāmaī inte edæ, Wadō ante cæquēnēmīni īmīnīpa, ante odōmōngampa, ante īngā Etebā īñōmō adobaī ānewengā ēñentamōnīpa tōo, ante babæ apænegadānīmpa.

¹⁵ Mānōmaī babæ apænedāni ēñēninque nē Apænte nāni Āincabo incæ Etebā ingante cōwā ayōnāni tōmēngā awīnca Wængonguī anquedo nānō ēmōnō baī ēmongā agadānīmpa.

7

Etebā nāmā wææ apæncæcampa

¹ Īnīnque, Wængonguī quī, ante nē godongā ñænængā pōni īnongā īñōmō Etebā ingante ānīnque, Bitō ĩmitedō nāni ānīnō nāwanga intawoo. ² Āñongante Etebā wæætē īīmaī ante nāmā wææ apæncæcantapa. “Botō wæmpoidi ēñēedāni. Botō tōnīñāmīni ēñēedāni. Mōnō wæmæ Abadāo wodi Mēetopotāmiabæ ayæ quēwēnīnque Cadāna īñōmō ayæ quēwencæ godāmaī īñongante Wængonguī nē ñāo apāite baī ēmōnongā inte Abadāo weca ponte a ongongā agacāīmpa. ³ Ayæ Abadāo ingante apænedīnque Wængonguī, ‘Bitō guīdēnāni īnānīte ēmō cæte bitō ōmæ ēmō cæte godīnque wabæca botō odōmōnguīmæca æmæwo wadæ goe,’ angacāīmpa. ⁴ Angā ēñēnte cædīnque Abadāo wodi mānīōmæ Cadeabæ ēmō cæte wadæ godīnque Cadāna nāni quēwēñōmō ganca pōnīnque quēwengacāīmpa. Ayæ tōmēngā wæmpo wodi wængā ate Wængonguī

tömengā ingante angā ēñēninque Abadāō īlmæca mōnō fīwo quēwēmæ ponte quēwengacāimpa.”

⁵ “Incæte Wængonguī, Tömēmi ōmæ, ante Abadāō wodi ingante cabo incæ ōmæ pōnōnāmai ingacāimpa. Wæætē Abadāō wodi wēñængā mæmpo ināmai īñongante Wængonguī, īlmæ incæ bitō ænguīmæ īñonte bitō pæināni adobæ tōmāo quēwencædānimpā, ante odōmongacāimpa. ⁶ Ayæ godōmenque apænedinque Wængonguī, Bitō pæināni īñōmō wabæca gote mānimæ quēwēnāni weca quēwēñōnānite īnāni wæætē bitō pæināni inānite eðæ ō ænte bai cædinque, Mōnitō beyænque cædāni, ante nanguī ānāni wæcædānimpā. Ayæ tōmēnāni nempo wantæpiyæ coatodo tiento wadepo ganca mānimpoga quēwēñōnānite adodāni wēnæ wēnæ cædāni beyæ caate wæcædānimpā. ⁷ Ante Wængonguī godōmenque apænedinque, ‘Bitō pæināni inānite nē ō ænte wēnæ wēnæ cædāni inānite botō wæætē apænte āninque pancæboimpā. Ayæ īncayæ ate bitō pæināni māniōmæ tōmēnāni nāni caate wædiōmæ ēmō cæte wadæ pōninque īlmæca wæætē pōninque botō Wængonguīmo īñōmote botō beyæ cæquīnāni inānipā.’ ⁸ Āninque Wængonguī, Mōnō godongāmæ cæcæimpā, ante pōnō cæbo ate mīnitō wæætē Ao ante ēñente cæcæmīnimpā. Mānōmai ante cædinque mīnitō onguīñæmīnique eō togænte caate wædinque ēñencæmīnimpā. Angā ēñēninque Abadāō wodi wēñængā Itæca ēñacā ate tōmengā nānō ēñadī adoque Wængonguī itædē go ate tōmengā ingante eō togængacāimpa. Itæca wodi pæte wææ Acobo wæmpo bagacāimpa. Acobo wodi pæte wææ dote ganca ināni tapæicā wææ mōnō wæmæidi wodi baquinque pægadānimpā.”

⁹ Ante apænedinque Etebā godōmenque, “Mānināni mōnō wæmæidi ingānāni īñōmō tōmēnāni biwī Ootee ingante ante adinque pīinte wædinque tīguitamō beyænque pædæ godōnāni ō æninque Equitobæ ænte māodāni gogacāimpa. Equitobæ pōninque tōmēnāni godonte æncæte ante cædinque Ootee wodi ingante māniñōmō quēwengā nempo pædæ godōnāni awēnē beyænque cæte quēwengatāna. Mānōmai quēwengā incæte tōmengā tōnō godongāmæ Wængonguī cōwē cægacāimpa. ¹⁰ Īninque Ootee wodi ingante nanguī wīwa cædāni wæyongante Wængonguī cōwē wææ aacā quēwengacāimpa. Ayæ Wængonguī pōnō apænecā ēñēninque nē ēñente bayongante Equitobæ tæiyæ awēnē Padaōnō incæ tōmengā ingante waa adinque, Botō tæiyæ awēnē imo bai bitō wodo adobai badinque

Equitobæ wædænque awēnē bacæbiimpā. Ayæ adobai botō awēnē onconcoo bitō aacæbiimpā, angacāimpa.”

¹¹ Ante apænecā ēñēñōnāni Etebā godōmenque, “Māniñedē Equitobæ tōmāo Cānaāmæ tōmāo to aminte bayonte tepæmpo gæwænte wædōnānimpā. Mōnō wæmæidi cænguī æncæte ante cædinque ænāmai inōnānimpā. ¹² Īninque, Equitobæ cænguī ayæ mæ ōñompā, ante tededāni ēñēninque wæmpocā Acobo wodi mōnō mæmæidi nē baquīnāni inānite āninque, Botō wēmīni, Equitobæ godinque cænguī ænte pōedāni, angā mā gogadānimpā. ¹³ Gote pōninque ayæ wæætē mēmpoga gote a ongōnāni adinque Ootee wodi incæ tōmengā mēmōidi inānite, Botō mīnitō biwīmo ēñagālmō īmopa, angā wægadānimpā. Ayæ, Ootee guīdēnāni do pōnānipā, ante tededāni ēñēninque awēnē Padaōnō ingante gode ānāni edonque ēñengacāimpa. ¹⁴ Ayæ ate Ootee wodi tōmengā wæmpo Acobo wodi nāni pæincabo tēntēni a tīnco ganca mānimopodāni āñecā gogadānimpā. ¹⁵ Acobo wodi mānōmai Equitobæ gote quēwēninque wængacāimpa. Ayæ tōmengā pæināni wææ mōnō wæmæidi ingānāni inte adobai māniñōmō gote quēwēnte wængadānimpā. ¹⁶ Abadāō wodi wēēñēdē, Mōnitō wodido, ante Caāmōdo wēnāni nāni ānimpota mānimpota godonte æninque Tiqemō īñōmō ōmæ godonte ænongāimpā. Ante do agānāni inte mōnō wæmæidi fīwo Acobo wodi bayetoca ingāi Cānaāmæ ænte pōninque, ayæ īncayæ ate wææ tōmengā wēnāni bayetoca ingāi Abadāō wodi nānō ængālmæ tōmēnāni wodido ingāiñōmō māmō daga wengadānimpā.”

¹⁷ Ante apænedinque Etebā godōmenque apænecantāpa. “Abadāō wodi ingante Wængonguī wēēñēdē nānō, Botō wantæpiyæ ate bitō pæināni inānite adodō ænte māmōmo poncædānimpā, ante nānō angāñedē wodo īnque bayonte tōmēnāni Equitobæ quēwēninque nanguī bacoo yebænte bagadānimpā. ¹⁸ Māniñedē wacā onguīñængā fīwocā incæ, Ootee wodi æcānō ingacāi, ante ēñēnāmai īnongā inte Equitobæ awēnē bagacāimpa. ¹⁹ Tōmengā īñōmō mōnō guīdēnāni wodi inānite wapiticæ ante wēnæ wēnæ cægacāimpa. Tōmengā, Mīnitō wēñēnāni tæcæ ēñadāni inānite wido cædāni, ante pīingā ēñente wædinque mōnō wæmæidi wodi incæ tæcæ ēñadāni inānite yabæque wido yabæque wido cædāni wængadānimpā.”

²⁰ “Tōmēnāni mānōmai nāni cægāñedē incæ Mōitee wodi ēñate pægacāimpa. Tōmengā waēmō wēñæ īñongante Wængonguī waa acampā, ante pōnēninque mēa go adoque apāicā go ate tōmengā

ingante mæmpo oncōnē pæ gompote pæpogada pæcantapa. ²¹ Ayæ, Wænonāni wæncæ wæ, ante guifente cædinque tōmēna tōmengā ingante yabæque gāwapæ yædopæ wo cæda ongōñongante awēnē Padaōnō wengā onquiyængā adinque, Botō wē, ante cædinque Mōitee ingante ænte pæpogacā pægacāimpa. ²² Mānōmai cæcā beyæ equitoidi nāni ēñengainō ante tōmānō ante odōmōnāni ēñente pædinque Mōitee wodi nē angā baquinque nanguī cæcā baquinque tæi piñænongā inte pægacāimpa.”

²³ Ante Etebā godōmenque apænedinque, “Ayæ æmæwo pædinque coadenta wadepo nānō ēñagailfēdē Mōitee wodi, Idægoidi botō tōniñadāni inānite ēñacæ gobote, ante ēñacæ gocantapa. ²⁴ Gote ēñayongā, Equito onguifængā incæ botō guidengā ingante wiwa cæcā caate wæcampa, ante adinque Mōitee wodi tōmengā guidengā ingante wææ cæcæte ante cædinque tiyænō tiyæ cædinque Equito onguifængā ingante wænongā wægacāimpa. ²⁵ Edæ, Wængongui botō imote āninque, Bitō idægoidi inānite ō ænte māobi wadæ gocædānimpa, ante do angā ēñentabopa, ante do ēñēningā inte Mōitee wodi, Idægoidi adobaī ante ēñente pōnencædānimpa, ante pōnente cæyongā tōmēnāni wæætē māniñō ante ēñēnāmai ingadānimpa. ²⁶ Mānōmai ī inique Mōitee wodi iimō ate ponte ayongā idægoda wæætēdō wæætē cæda adinque, ‘Īñāna, mīna guidencaya incæ wacā ingante quimæ wēnæ wēnæ cæte quēwēmināa.’ ²⁷ Ante, Guēa waa waadete quēwencædāimpa, ante cæyongā adocanque tōmengā guidengā ingante nē wēnæ wēnæ cædingā guiquēnē Mōitee wodi ingante bæ tadinque angantapa. ‘Īñæmpa, Bitō mōnitō awēnē inōmi ĩmpa, ante, Nē apænte āmi ĩmpa, ante æcānō bitō imite nē ānāi. ²⁸ Edæ Equito ingante iimō bitō wænōmi bai ñowoñæ adobaī botō imote wænoncæte ante pōnēmi awædē.’ ²⁹ Angā ēñente wædinque Mōitee wæætē wodii winongacāimpa. Wodii winonte wabæca Māadiāmæ gote wadāni ōmæ quēwēninque wēñæna mēnaa wæmpocā bagacāimpa.”

³⁰ Ante apænedinque Etebā godōmenque awēnēidi inānite iimāi ante apænecantapa.

“Ayæ wæætē coadenta wadepo go ate Mōitee wodi ōnōmæca cægōninque onquiyabo Tinaiquidi gāmænō gote dadi ēmænte ayongā ocāñequiwæ gonga bæcoyōmō Wængongui anquedo ponte a ongongā agacāimpa. ³¹ Ate wædinque Mōitee wodi, Quinō bai inte bæco ante botō wiimonte bai aboo, ante acæte ante pōnōmenque pōñongante mōnō Awēnē tōmengā ingante iimāi ante apænegacāimpa. ³² ‘Bitō wæmæidi Wængonguimo inōmo inte botō Abadāō wodi Itæca wodi Aacobo

wodi Wængonguimo inōmo ĩmpa.’ Ante apænecā ēñente wædinque Mōitee wodi do do wæate guifente wædinque, Wīi aīnente awædō, ante cægacāimpa. ³³ Mānōmai cæyongante mōnō Awēnē wæætē, ‘Bitō næ gongænte ongōñōmō botō adoyōmō ongōmo beyænque onguipoi tæiyæ waēmō ĩmpa, ante pōnēninque bitō awæncata gā tadōwæe āmpa. ³⁴ Botō edæ cōwā adinque, Botō quināni inānite equitoidi æbānō wēnæ wēnæ cædāni, ante do abopa. Tōmēnāni caate ō ō wædāni do ēñente wædinque botō, Ñimpo cæbo ate abæ tawænte gocædānimpa, ante wææ pōmo ĩmpa. Nōwo iñōmō edæ ægodōe. Botō, Equitobæ gocæbiimpa, ante bitō imite adodō da godōmo gocæbiimpa,’ ante Wængongui Mōitee wodi ingante angacāimpa.”

³⁵ Ante apænedinque Etebā iimāi ante godōmenque apænecantapa. “Adocā Mōitee ingante piīninque idægoidi doyedē, ‘Īñæmpa, Bitō mōnitō awēnē inōmi ĩmpa, Nē apænte ānōmi ĩmpa, ante æcānō bitō imite nē ānāi,’ ante ānōnānimpa. Nōwo iñōmō Wængongui anquedo ocāñequi iñōmō pōninque tōmēnāni nāni nē piingāngā adocā Mōitee ingante, Bitō idægoidi awēnē bacæbiimpa, angacāimpa. Bitō tōmēnāni inānite ō æninque ænte māobi abæ tawænte gocædānimpa, ante cædinque Wængongui bitō imite da godongā gocæbiimpa, ante Wængongui beyæ apænedinque Wængongui anquedo angacāimpa. ³⁶ Mōitee iñōmō, Ate pōnencædānimpa, ante mā cædinque ayæ Wængongui tōnō bamōnengæ nanguī cædinque idægoidi inānite ænte māocā gogadānimpa. Equitobæ ēmō cæte wadæ pōninque gāwapæntibæ Opatawæmæ yæwedecapæ pō ongōninque adocā Mōitee mantacā imæmāa pongadānimpa. Ōnōmæca ta pōninque coadenta wadepo ganca cægōñōnāni tōmengā, Ate pōnencædānimpa, ante mā cædinque bamōnengæ nanguī cægacāimpa,” ante Etebā wodi apænecantapa.

³⁷ Ayæ, “Adocā Mōitee, Idægoidi ēñēdāni. Botō Wængongui beyæ nē apænebo imo bai wacā edæ mīnitō tōniñacā incæ adobaī edæ Wængongui beyæ nē apænecā bacæcāimpa. Tōmengā ponte apænecā ēñēninque mīnitō tōmengā ingante ædæmō ēñente cæcæminimpa, ante Mōitee wodi apænegacāimpa. ³⁸ Godongāmæ nāni Wængongui ingante apæneincabo tōnō Mōitee wodi ōnōmæca cægōnongāimpa. Mōnō mæmæidi tōnō cægōñōnāni Wængongui anquedo wēēñēdē Tinaiquidi nē ponte āningā incæ adocā tōnō Mōitee wodi ōnōmæca cægōnongāimpa. Māniñēdē mōnō imonte ante pōnō cædinque Wængongui, Mōitee

ēñēmi, angacāimpa. Īncayæ quēwenguināni ēñēnte quēwecādānimpā, ante cædinque botō, Mīnitō cæte quēwenguimīnii, ante apænebo ēñēninque bitō adodō ante yewæmōncæbiimpā, ante apænegacāimpā,” ante Etebā apænecantapā.

³⁹ Ayæ, “Mōitee wodi mǎnōmaī cæyongante mōnō wæmæidi guiquēnē ēñēnāmaī ĩnāni inte tōmēngā ingante Baa āninque Equitobæ mōnō adodō gocæimpā, ante ōnōwēnenque pōnente wægadānimpā. ⁴⁰ Mǎnōmaī nē wædōnāni inte tōmēnāni wæætē Aadōo wodi ingante apænedinque, ‘Aadōo ēñēmi. Māningā, Equitobæ nē ēmō cæte mōnō ĩmōnte māmōningā Mōitee wodi ædōnō gote dæ angāā, ante adāmaī ĩmōnipā cæbii. Wængonguīdi ĩnānipā, ante mōnō ĩmōnte nē tōō æmæante ænte goquīnāni ante bitō badōmi æmōnie.’

⁴¹ Āninque māniñedē, Mōnō wængonguī ingampā, ante cædinque tōmēnāni wagadā wē bai badongadānimpā. Ayæ, Mōnō wængonguī quī impā, ante cædinque cænināni wænōninque baō tōmēnāni nāni badōinca gāānē ænte māmō nō cædinque ōnopoca nāni badōinca adinque ææmæ bai cæte togadānimpā. ⁴² Mǎnōmaī cædāni ate wædinque Wængonguī nāēmæ, Pōnē cæminiyā, ante pīngacāimpā. Ayæ, ĩnāni ōōnædē owocooque ante, Wængonguīdi ĩnānipā, ante oda cæcædānimpā, ante cædinque idægoidi ĩnānite nīmpo cædinque dadi ēmæninque aadāmaī ingacāimpā. Edæ māniñō tōmēnāni nāni cægainō bai ante pōnente yewæmōninque wacā wantæpiyæ ate Wængonguī beyæ ĩmaī ante yewæmongacāimpā.

‘Idægoidi ēñēdāni. Ōnōmæca gote coadenta wadepo ganca cægōninque mīnitō, Wængonguī quī, ante pōnōncæte ante cædinque cænināni wænōninque baō tōnō mǎincoo ænte pō ænte pō cæminii incæte

dicæ botō ĩmote ante pōnēninque pōnōmīni æntawogaa.

⁴³ ĩnæmpā, Mōnō wængonguīdi ĩñōnānite ædæ wæante apænecæimpā, ante cædinque mīnitō mīni badōinca adoca Mōnoco mīni ānonca beyæ æmōntaicō oncō næænte godinque wocæ wocæ cædōmīni awædō.

Ayæ wacā, Mōni wængonguī Adempaō nēmō bai owocæimpā, ante mīni badōinca næænte æmōnga cō cæ cō cæ cædōmīnimpā tōō.

Ante adinque Wængonguī, Mǎnōmaī cæminii beyæ botō mīnitō ĩmīnite Babidōnia ganca da godōninque godōmenque gobæ da godōmo gocæmīnimpā,’ angampā, ante yewæmongatimpā.” Ante apænedinque Etebā, Mōnō wæmæidi

ĩmaī cægadānimpā, ante godōmenque apænecantapā.

⁴⁴ “Wængonguī doyedē Mōitee wodi ingante apænedinque, Mīnitō æmōntaicō mænonte ate botō wææ ante yewæmōninca cō cæte mancæmīnimpā. ĩmaī mænōncæmīnimpā, ante odōmōngā adinque Mōitee wodi wæætē mōnō wæmæidi ĩnānite odōmōngā ate ēñēninque tōmēnāni wæætē Wængonguī nānō odōmōnō bai mǎnōmaīnonque æmōntaicō mænongadānimpā. Mǎnōmaī mænonte ate dica wææ ante Wængonguī nānō yewæmōngainca incæ mānincōnē cō cægadānimpā. Ayæ ōnōmæca wayōmō wayōmō gocæte ante æmōntaicō capote mōngænte māo wocæ wocæ cægadānimpā. ⁴⁵ Ayæ wadāni māniōmæ nē quēwēnāni ĩñōnānite Wængonguī wido cæcā ate mōnō wæmæidi Ootowee wodi miñæ ponte ōmæ æninque Wængonguī oncō æmōntaicō nāni ænte mōngængaincō māmō wodongadānimpā. Wodōnāni ate Awēnē Dabii wodi nānō ēñate quēwenguimpoga mānincō æmōntaicō incæ ayæ a owogatimpā. ⁴⁶ Awēnē Dabii ingante Wængonguī pōnō waa agacāimpā. ĩninque Dabii wæætē Wængonguī ingante apænedinque, Bitō Acobo wodi Wængonguī ĩnōmi ĩmipā, ante adinque botō, Bitō quēwenguīñōmō, ante oncō āni mænōnguīmo, āñongante Wængonguī Baa angacāimpā. ⁴⁷ Wæætē Tadōmōo wodi Wængonguī beyæ nē oncō mænōngā ingacāimpā. ⁴⁸ Mǎnōmaī cægaināni incæte Wængonguī ĩñōmō edæ æmōnga pōni nē ongōngā inte waocā nānō ōnopoca mænōnincōnē ædō cæte pōnō Ao ante guite quēwenguīngāā. Mǎnōmaīnō ante pōnente wædinque Wængonguī beyæ nē apænegaingā ĩmaī ante apænegacāimpā.

⁴⁹ ‘Botō nē Tæiyæ Awēnē ĩnōmo ĩñōmote ōōnæ incæ botō Awēnē tæ contaquī bai impā,

inguipoga wæætē botō ōnōwā podōwate quī bai impā.

Mǎnōmaī nē ongōmo beyæ mīnitō botō oncō ante ædō cæte mænōnguimīnii.

Inguipoga æcōnēnō guīdinque guēmanguīmo, ante Wængonguī angampā.

⁵⁰ Botō ĩnæmpā tōmēmo ōnopoca tōmāā nē badongāimo ĩnōmo ĩmopā,’ ante Wængonguī Awēnē angampā, ante wacā yewæmōngacāimpā.”

⁵¹ Ante apænedinque Etebā godōmenque ĩmaī ante apænecantapā. “Nōwo ēñēdāni. Mīnitō mīmō ōmædē ĩmīni inte wīi pōnencædō. Ōnōmōncaque ēñēninque wīi ædæmō ēñēmīni ĩmīni awædō. Mīnitō wæmæidi nāni cægainō ante ēñēmīnitawo. ĩnæmpā tōmēnāni nāni cægāi bai adobāi cædinque mīnitō Wængonguī Tæiyæ Wæmō

Ōnōwoca ingante Baa āninqe cōwē wææ āminipa tōō. ⁵² Mīnitō wæmæidi doyedē Wængonguī beyæ nē apænegaināni inānite togænte pāninqe adocanque ingante ata cæpodāmaī inte tōmānāni inānite togænte pangadānīpa. Edæ nē apænedāni, Nē nō antawēnongā inte ponguingā ingampa, ante apæneyōnānite tōmēnāni inānite do wæñōnāni wængadānīpa. Nōwo iñōmō tōmēnāni nāni, Ponguingā, angaingā incæ do pongā adinque mīnitō godō wæñōmīnitapa tōō. ⁵³ Edæ, Iīmaī cæedāni, ante Wængonguī wææ angampa, ante Wængonguī anquedoidi ānāni ēñēninqe yewæmōnāni ate mīnitō nē adōmīni incæ Baa āninqe ēñēnāmaī cōwē cæmīnīpa tōō,” ante Etebā iinque apænecantapa.

Etebā ingante wæñōnāni wængampa

⁵⁴ Māniī awēnēdi guiquēnē Etebā nānō apænedō ante ēñente wædinque āināni badinque бага wentoquēnē wentoquēnē angate piīnānitapa. ⁵⁵ Etebā iñōmō Wængonguī Tæiyæ Waēmō Ōnōwoca ingante ædæmō ēwocadinque oōnædē inō æmō adinque Wængonguī ñāō apāite bai nānō ēmōnō acantapa. Ayæ nē Waocā ēñagaingā inte Itota incæ Wængonguī tōmēmæ inō adiyæ ongonḡā acantapa. ⁵⁶ Adinque, —Badogaa, oōnædē wi ænete bai ba abopa. Waocā nē ēñagaingā incæ Wængonguī tōmēmæ inō adiyæ ongonḡā abopa.

⁵⁷ Ante apænecā ēñente wædinque tōmēnāni pīinte Yæ yæ āninqe ēñēnāmaī cææte ante ōnōmonca ñī māmoncate cædānitapa. Godongāmæ pīinte quingæ tōmengā weca pogodo pōninqe, ⁵⁸ tōmengā ingante bæi onḡoninqe tōmēnāni nāni quēwēñōmō yabæque ænte māo dicaca tæi tacacæ cædānitapa. Tōmengā æbānō angāā, ante ēñēnāni inte nē apænedāni iñōmō edæ tacacæ cædinque tōmēnāni weocoo yabæcooque gā tadongate tæcæ æmæwo pædingā Taodo nāni ānonḡā ōnōwoca inō ñō cædōnānīpa. ⁵⁹ Dicaca tacayōnāni Etebā iñōmō Wængonguī ingante apænedinque, “Awēnē Itota, bitō botō ōnōwoca æncæbiīpa.” ⁶⁰ Ante da guicapod- inque yedæ āninqe, “Awēnē, tōmēnāni nāni wēnæ wēnæ cædōnō ante ee ae,” āninqe edæ mō ñonte bai wængacāiīpa.

8

¹ Etebā wodi ingante wænoncæte ante dicaca tacadāni adinque Taodo guiquēnē, Waa wæñōmīni wængampa, ante Ao ante onḡongacāiīpa.

Nē godongāmæ pōnēnāni inānite Taodo togænte pangā

Māniōnæ incæ mā togænte pāninqe Eedotadē iñōmō Codito ingante nāni nē

godongāmæ pōnencabo inānite godōmenque nanguī togænte pīinte pangadānīpa. Ate wædinque Itota nānō nē da godongainānīque godāmaī onḡōñōnāni wadāni iñōmō nāwæ wodi winōninqe Oodeabæ Tāmadiabæ æmæñō æmæñō gogadānīpa. ² Māniī Etebā wodi ingante æmæwo wæñōnāni wængā ate Wængonguī ingante nē waa adāni incæ Ca ca wædinque māo daga wenānitapa. ³ Taodo guiquēnē, Itota ingante nē pōnēnāni inānite wido cæcæiīpa, ante nanguī wēnæ wēnæ cædinque wacōnē pō guīi wacōnē pō guīi cædinque onguīñæñāni tōnō onquiyēñāni inānite bæi onḡonte wēā māo tee mōnegadānīpa.

Tāmadiabæ godinque Pedipe apænecā ēñēnānīpa

⁴ Māniī nē wodi winōnāni iñōmō ædōmē godinque Codito ingantedō ante cōwē watapæ apænedāni ēñēñōnānīpa. ⁵ Iinque Pedipe iñōmō Tāmadiā nāni nanguī quēwēñōmō gote apænedinque, Mōnō Codito æbānō do ponte cægacāi, ante apænecā ēñēñānitapa. ⁶ Mānōmainō ante apænedinque tōmengā, Ate pōnencædānīpa, ante mā cæcā adinque nanguī ināni adoyōmō pōnēninqe, Mōnō ēñengæiīpa, ante cædānitapa. ⁷ Waodāni nanguī ināni wēnæidi wentamō ēwocadāni tōnō quēwēñāni adinque Pedipe angā ēñēninqe wēnæidi incæ Yæ āninqe dæ tao godāni ate ōñōnānīque badānitapa. Ayæ cōmāināni incæ cabæiñāni incæ tæiyæñāni inānite Pedipe cæcā ate waa badānitapa. ⁸ Ante adinque māniñōmō quēwēñāni wæætē watapæ togadānīpa.

⁹ Wacā idō tōmengā ēmōwo Timōnō iñōmō tōmengā adoyōmō quēwēninqe wēnæ tōnō wantæpiyæ cæcā inongāiīpa. Iinque Tāmadiabæ quēwēñāni tōmānāni, Ebbānō nanguī cæcāā, ante guīñente wæyōnānite tōmengā, Nē idōmo inōmo inte botō iñōmō edæ nanguī cæte beyæ ñæñæmo pōni imo aedāni. ¹⁰ Angā ēñēninqe awēnēdi incæ ōñōnānīque incæ tōmānāni adoyōmō pōnēninqe, “Wængonguī nānō tæi piīñēñō bai entawēninqe ingā idō iñōmō nē Tæi Piīñēnongā ingampa,” ante pōñewēninqe, Nē Nænængā pōni inongā ingampa, ante pemongadinque tōmengā apænecā ate ædæmō ēñēñōnānīpa.

¹¹ Ayæ tōmengā wantæpiyæ wēnæ tōnō wæætē wæætē mā cæcā adinque tōmēnāni, Tōmengā ingante mōnō ēñengæiīpa, ante tee empo tee empo godōnānīpa. ¹² Mānōmaī cæyōnānite Pedipe guiquēnē, Wængonguī Awēnē Odeye nempo mōnō quēwengæiīpa, ante watapæ apænecā ēñēñānitapa. Ayæ, Mōnō Codito iñōmō tōmengā ēmōwo Itota ēmongampa, ante apænebo ēñēdāni. Ante apænecā

ēñēninque onguiñænāni incæ onquiyænāni incæ wede pōnēninque æpænē guiddānitapa. ¹³ Īninque Timōnō incæ adobai pōnēninque æpænē guiddinque Pedipe miñæ tee empo tee empo gocantapa. Pedipe, Ate pōnencædānimpā, ante mā cædinque tæi piñænte nangui cæcā ate wædinque Timōnō adocā cōwē guñfente wægacāimpā.

¹⁴ Īninque, Tāmadiabæ quēwēnāni Wængongui nānō apænedō ante ēñēninque do Ao ānānīpa, ante Eedotadēē ponte tedeyōnānīte Itota tōmengā nānō da godongaināni incæ do ēñēnānitapa. Ēñēninque Pegodo tōnō Wāō inate Tāmadiabæ da godōnāni godatapa. ¹⁵ Godinque Tāmadiabæ pōninque tæcæ mā pōnēnāni beyæ ante tōmēna Wængongui ingante Īmaī ante apænedatapa. Wængongui ēñēmi. Bitō Tæiyæ Waēmō Ōnōwoca ingante tōmēnāniya da pōnōmi pō guicāi ate ēwocæcādānimpā, āmōnāpa. ¹⁶ Edæ Awēnē Itota ēmōwo apænedinque tōmēnāni mā æpænē guiyōnānīte bitō Tæiyæ Waēmō Ōnōwoca tōmēnāniya wææ guiddāmai ingantapa cæbii. Nōwo āmi pō guicæcāimpā. ¹⁷ Ante apænedinque Pegodo tōnō Wāō tōmēnāniya pōnō gampote apæneyōna Wængongui Tæiyæ Waēmō Ōnōwoca pō tōmēnāni baonga guicantapa.

¹⁸ Mānōmai pōnō gampoyōna Wængongui Tæiyæ Waēmō Ōnōwoca tōmēnāniya pō guicāi ate wædinque Timōnō guiquēnē tōmēnāni godonte æinta pædæ pōnōninque, ¹⁹ tōmēna inate,

—Minatō bai botō adobai nē cæbo bacæboimpā āmōpa. Pōnō cæmīna ate botō nē cæbo badinque wadāniya pōnō gampobo ate Wængongui Ōnōwoca adobai pō guicæcāimpā, āmōpa.

²⁰ Āñongante Pegodo,

—Bitō mīni godonte æintaque pædæ godōninque, Wængongui Ōnōwoca nānō da pōnōnongā ingante æncæboimpā, ante pōnēwēmii. Edæ tōmēmi tīguitamonque nææñinque edæ bitō ōmæē ēwenguinque gobāwe. ²¹ Īñæmpā, Wængongui Ōnōwoca nānō da pōnōnongā ingante æninque godongāmæ cæcæboimpā, āmitawoo. Wængongui ayongā nō pōnente cæbipa ænguimii. Edæ mōnatō tōnō ædō cæte cæquimii. ²² Nōwo edæ mānīnō bitō wīwa cædinō ante wæwente pōnēninque ñimpo cæe. Ayæ mōnitō Awēnē ingante apænebi ēñēninque tōmengā wabānō pōnō waadete cædinque mīmōno bitō pōnēwēnō ante wadæ cædinque ñimpo cæbaingampā. ²³ Bitō nāmā beyænque ante nē æinēmi inte bitō mīmōnē guinæmæ entawente bai quēwēmpā. Ayæ bitō tōmēmi wīwa cædō beyænque ñā cæyænte bai quēwēmpā, ante awædō.

²⁴ Angā ēñēninque Timōnō wæætē,

—Æ āmi awædō, āninque Pegodo ingante, Botō mīnatō ānō bai wīi bacæboimpā, ante cædinque mīnatō botō beyæ Wængongui ingante apæneeda, angantapa.

²⁵ Ayæ Wāō tōnō Pegodo ĩñōmō, Itota incæ mōnō Codito ingaingā ingampā, ante māññōmō quēwēnāni ĩnānīte mōnō Awēnē nānō ānō ante apæneda ēñēnānitapa. Īnque apænedinque adodō Eedotadēē gocæte ante wadæ gote Tāmadiabæ godinque tōmēna wayōmō wayōmō māo wædænque quēwēnāni weca pō pō cædinque nangui ĩnāni ĩnānīte apænedinque Codito ingantedō ante watapæ apæneda ēñēnānitapa.

Etiopææ awēnē ingante Pedipe bee tengampa

²⁶ Māningā Pedipe ingante anquedo ayæ ate ponte āninque, “Bitō ægodōe, Eedotadēē wæi Gata goquīnō pædæ taoquinque betamonca gocæbiimpā,” angantapa. Mānīnō ōnōmæcaque wæidō ĩnompā. ²⁷ Mānōmānō angā ēñēninque Pedipe ængæ gantidinque wadæ godinque anquedo nānō āninque cægonte ayongā onguiñængā Etiopææ quēwēningā pō eyepæ bee tengā acantapa. Īngā ĩñōmō Etiopææ tæiyæ awēnē onquiyængā Cantate beyæ tōmēnāni godonte æinta nē aacā ĩnongā inte ñænæ awēnē ĩnongāimpā. Tōmengā ñōwo Wængongui weca ædæ wææñinque watapæ apænecæte ante Eedotadēē æidingā inte ocæ ēmænte pōninque Pedipe ingante eyepæ māmō bee tengantapa. ²⁸ Īngā ĩñōmō cabayo nānō wēā pōnōncadea æi tæ contate ocæ ēmænte pōninque Itaiya wodi Wængongui beyæ nē apænegaingā nānō yewæmongainta næænte a congantapa.

²⁹ Mānōmai a conte pōñongante Pedipe ingante Wængongui Ōnōwoca, “Goe, Ī cabayo nānō wēā pōnōncade eyepæ godinque guēa goe,” angantapa. ³⁰ Angā ēñēninque Pedipe pogodo godinque obo ponte ēñēñongā Etiopææ awēnē ĩñōmō Itaiya wodi nānō Wængongui beyæ yewæmongainta adinque apænecā ēñēninque,

—Bitō ate apænedō ante ædæmō ēñēmitawo.

³¹ Āñongante,

—Īñæmpā ēñēmogaa. Botō imote apænedāniya ēñēnguimoo.

Ante apænedinque Pedipe ingante, Bitō botō weca ææ guite tæ contae, angā ææ guii tæ contactantapa.

³² Mānīnta Wængongui angā ēñēnte nāni yewæmongainta Etiopææ awēnē nānō aintaa ĩmaī ante yewæmonte ongōnōnimpā.

“Codotedo ingante wæñongæimpā, ante bæi ongote æninque tōō godonte bai cædinque

tömengä ingante adobai wænoncæte ante bæi ongonte ænte godānitapa.

Obegaidi ocaguincoo eō toyōnāni wædāmai pæ wēnecā bai

tömengä adobai wædāmai inte pæ wēnecantapa.

³³ Piinte ānāni wæyongante nē apænte anguēnēnāni incæ, Pangæimpa, ante cædinque nōingā ante ānāmai īnānitapa.

Tömengä ingante æmæwo wænonāni wængaingā īñongante,

Tömengä nānō pæīnāni, ante ædō cæte apænequīi.”

³⁴ Ante nāni yewæmongainō adingā inte Etiopæbæ awēnē nōwo Pedipe ingante,

—Apænebi ēñēmoe. Nē Wængongui beyæ apænegaingā īñōmō æcānō ingante ante nē apænegacāi. Tömengä nāmā ingante ante yewæmongantawo. Edæ wacā ingante ante yewæmongantawo, ante ēñencæte ante wæbopa.

³⁵ Ante āñongante Pedipe īñōmō Etiopæbæ awēnē nānō adinta adotaa ate apænedinque ayæ wataa wataa adinque Itota ingantedō ante watapæ apænecā ēñengantapa. ³⁶ Apæneyongā taadō godinque wapæ ganca pōnatapa. Equitobæ awēnē mānimæ adinque Pedipe ingante, Waa ae. Īñōmō gāwapæ impa. Apænē guidāmai inguīmo, āmitawoo.

³⁷ Angā ēñēninque, —Bitō mīmōno wede pōnēmi ate botō Ao āmaimopa, angantapa. Āñongante, —Ao botō, Itota Codito nāwangā Wængongui Wengā inongā ingampa, ante wede pōnēmpa.

³⁸ Āninque Etiopæbæ awēnē angā cabayo næ gongæ ate Pedipe tōnō guēa æpæñē ti wæxna ate Pedipe tömengä ingante æpæñē guidongā guicantapa. ³⁹ Ayæ æpæñē guīte ate tömengä tao gongæñongā Wængongui Awēnē Ōnōwoca Pedipe ingante īñæ æænonte ō ængā. Ate æmæwo adinque Etiopæbæ awēnē watapæ todinque oncōnē goinō gocantapa. ⁴⁰ Pedipe guiquēnē Atota īñōmō īñontobæ a ongōninque godōmenque wadāni nāni quēwēñōmō go apænedinque wayōmō nāni quēwēñōmō go apænedinque Tetadea ganca godinque Codito ingantedō ante watapæ apænecā ēñengadānimpa.

9

Awēnē Itota ingante Taodo acampa
(Nāni Cægainō 22.6-16, 26.12-18)

¹ Taodo guiquēnē mōnō Awēnē ingante nē tee empote quēwēñōmō īnānīte piīninque, Wænongæimpa, ante bæi ongō bæi ongō cædinque cōwē ñimpo cædāmai ingacāimpa. Nōwo godōmenque cæcæte ante Wængongui oncōnē gote nē godongā ñænængā pōni

inongā ingante apænedinque, ² Awēnē ēñēmi, angantapa. Bitō Ao āmi īninque botō Daāmaco nāni quēwēñōmō gote ayōmo, Onguīñæñāni incæ onquiyæñāni incæ æcāmenque Itota Taadō ante nē godāni īnāni, ante adinque tömēnāni īnānīte bæi ongote goti winte Eedotadēē ænte pōmaimopa. Īninque bitō, Taodo mānōmai cæcæcāimpa, ante botō beyæ cadota ante yewæmōninque pædæ pōnōmi æninque botō wæwætē Daāmaco īñōmō māo oodeoidi odōmōincōnē awēnēidi weca gote pædæ godōmo ænte adinque tömēnāni Ao āñōnāni mānōmai cæbaimopa. ³ Āñongā awēnē Ao ante yewæmōninque pædæ pōnongā æninque Taodo Daāmaco obo gote ayongante īñontobæ ōōnædē inō nānīte bai cædinque tömengä nānō ongōñōmō tömāo guīnæ gongæ. ⁴ Adinque Taodo guidōmēmæ tæ go wæængantapa. Ayæ wæænte ōñōñongante tömengä ingante, “Taodo. Taodo. Quīnante botō ĩmote togænte pāmii.”

⁵ Angā ēñēnte wædinque Taodo wæwætē, “Awēnē, æmōmidō inōmi ĩmii.” Ante ēñēñongā, “Botō Itotabo inōmo inte bitō nē togænte pānīmo mānīmotō ĩmpa cæbii. Īñæmpa wagada pāntoca bai bitō nāmā īñæ æwate bai cædinque cowate bai edæ caate bai wæbipa tōō.” ⁶ Mānōmai apænecā ēñēninque Taodo ancai guīñēnte do do wāadinque, “Awēnē, æbānō cæquīmo āmii.” Āñongante mōnō Awēnē wæwætē apænecantapa. “Bitō ængæ gantidinque īñāni nāni quēwēñōmō goe. Botō, Taodo ĩmai cæcæcāimpa, ante wacā ingante Daāmaco īñōmō nē quēwengā ingante do apænebo ēñengampa cæbii. Bitō Daāmaco īñōmō gote ongōñōmi tömengä wæwætē bitō ĩmite apænecā ēñēnte cæcæbiimpa.”

⁷ Taodo tōnō godongāmæ godāni guiquēnē waocā ingante adāmai īnāni incæte, Ōnonque tempa, ante pōnēninque ancai guīñēnte wædānitapa. ⁸ Taodo īñōmō onguipoga ayæ a ōñongā inte ængæ gantidinque awinca adāmai ingā adinque wadāni tömengä ingante ōnonpo bæi ongōninque Daāmaco ganca ænte māodāni gocantapa. ⁹ Māniñōmō gote ongōninque tömengä adāmai inongā inte cænāmai bedāmai mēōnaa go adoōnæque īñonte wæwengacāimpa.

¹⁰ Ayæ wacā nē pōnengā Ānāniya Daāmaco īñōmō quēwengā inte mā pōni wīmonte bai ayongā mōnō Awēnē, “Ānāniya,” angā ēñēninque, “Awēnē, botō ēñē cōmpa.”

¹¹ Āñongā mōnō Awēnē wæwætē, “Taodo nōwo Wængongui ingante apænecampa cæbii. Bitō ængæ gantidinque taadō nāni Tōiñō ānōnō godinque Codaa oncōnē gote āninque, Tadoto nē quēwēningā Taodo īñōmō owocantawo, ante acæbiimpa. ¹² Wængongui ingante nōwo apænedinque ate bai ayongā

wacā Ānāniya pō guindingue, Nōwo edonque acæbiimpa, ante gampocampa, ante ate bai Taodo wæcantapa cæbii. Tömengā wūimonte bai adinque nānō wædō bai cædinque bitō nōwo gote cæcæbiimpa.”

¹³ Angā ēñente wædinque Ānāniya wæætē, “Awēnē iñæmpa botō, Māningā Taodo iñōmō quīnō bai onguīñængā ingāā, ante nangui tededāni do ēñēmopa. Ayæ, Eedo-tadēē iñōmō tömengā bitō quīnāni inānite wēnæ wēnæ cæcampa, ante tededāni ēñente wæbopa. ¹⁴ Ayæ nē godōnāni nænænāni Ao ante yewæmōnāni æninque tömengā iñæmpa nē angā badinque bitō émōwo ante nē apænemōni iñōmōnite bæi ongonete tee mōnecæte ante pongampa cæbii.”

¹⁵ Ante wæyongante mōnō Awēnē wæætē Ānāniya ingante, “Īngā ingante do apænte æmo apa ānewēē. Tömengā ingante, Bitō wabæca gote wadāni inānite botō émōwo ante apænedinque ayæ tömēnāni awēñēdi inānite botō émōwo ante apænedinque idægoiidi inānite adobai botō émōwo apænebi ēñencædānimpā, ante tömengā ingante do antabopa cæbii. Nōwo tömengā weca gobāwe. ¹⁶ Ayæ botō nē æningā inte tömengā æbānō botō émōwo beyæ nangui caate wæquēnengā ingāā, ante odōmōmo ate ēñencæcāimpā.”

¹⁷ Angā ēñēninque Taodo nānō owoyōmo go guindingue Ānāniya tömengā ingante gampomōninque,

—Taodo botō tōniñabi ēñēmi. Bitō taadō pōninque Itota ingante abitawo. Tömengā iñōmō nē Awēnē inongā inte botō imote apænecantapa. Bitō Taodo weca godinque cæbi ate tömengā wēñēñēdē nānō émōnō bai adinque Wængongui Tæiyæ Waēmō Ōnōwoca ingante da pōnōmo æninque ēwocæcāimpā, ante mōnō Awēnē angā ēñēninque botō bitō weca pontabopa.

¹⁸ Ante Ānāniya tæcæ apæneyongā Taodo tömentagæ nānō émōnintagæ tæ wæænte iñontobæ edonque acantapa. Ayæ ængæ gantiyongante Ānāniya tömengā ingante æpæñē guidongā guicantapa. ¹⁹ Ayæ cængui cæninque tömengā baō wæætē tæi piñængā bacantapa. Ayæ Daāmaco iñōmō Itota ingante nē tee empote quēwēnāni weca godōmenque tæōnæ quēwengantapa.

Daāmaco iñōmō Taodo apænecā ēñēnānīpa

²⁰ Māniñōmō quēwēninque Taodo do oodeoidi odōmōincōnē go guī go guī cædinque, Itota Codito nāwangā Wængongui Wengā ingampa, ante apænecā ēñēnānitapa. ²¹ Mānōmaī apænecā ēñēninque tömengā ingante nē ēñēnāni iñōmō ancaī guīñēninque, “Æ. Īngā adocā Eedotadēē iñōmō Itota émōwo ante nē apænēdāni inānite nē wido

cæcā ĩmaingampa. Tömengā adocā nē wido cæcā incæ adodāni inānite bæi ongonete æninque, Wængongui quī, ante nē godōnāni nænænāni weca māo pædæ godoncæte ante nōwo iñōmō pōninque cæcā awædō. Edæ adocā ingānō anguēñē.”

²² Ante wædāni incæte Taodo godōmenque tæi piñænte entawēninque ĩmaī ante apænecantapa. Awēnē bacæcāimpā, ante Wængongui nānō nē gao cæcadongā iñōmō mōnō Codito iñōmō edæ Itota adocā inongā ingampa, ante, Nāwangā impā, ante nōingā pōni apænecā. Adinque Oodeoidi Daāmaco iñōmō quēwēnāni guīquēñē, Ædō cæte wadō angui, ante wægadānimpā.

Oodeoidi wænoncæ cæyōnāni Taodo aamō cæte gocampa

²³ Īninque tæōnæ go ate oodeoidi godongāmæ pōnente Ao āninque, Taodo ingante wærongæimpā, ante cædānitapa. ²⁴ Mānōmaī ante cæyōnāni Taodo māniñō nāni āniñō do ēñengantapa. Tömēnāni guīquēñē, Mōnō quēwēñōmō wææ cæinēmō tacā ate wæñōmō wæncæcāimpā, ante itædē woyowotæ wææ wāñōnānitapa. ²⁵ Wææ wāñōñōnāni tömengā ingante nē tee empote quēwēnāni wæætē yabæ wææ cæte iñōmō Taodo ingante woyowotæ mæi ayacōmoyāā inō otodē pædæ wæænōnāni ti wæænte gocantapa.

Taodo Eedotadēē ponte apænecampa

²⁶ Mānōmaī godinque Taodo Eedotadēē pōninque, Itota ingante nē tee empote quēwēnāni weca gobote, ante pongā. Adinque tömānāni, Nāwangā Itota ingante nē pōnengā ingantawogaa, ante guīñente awædō, ante pōnēninque wææ adānitapa. ²⁷ Bedēnabee guīquēñē Taodo ingante bæi ongōmænte æninque Itota nānō nē da godongaināni weca ænte māmongā pongantapa. Ayæ tömēnāni inānite Bedēnabee apænecantapa. Taodo nōwo taadō godinque mōnō Awēnē ingante dobæ acāimpā. Mōnō Awēnē tömengā ingante do apænecantapa. Daāmaco gote quēwēninque Itota émōwo ante tömengā guīñēnāmaī apænedingā inte nōwo iñōmō pongā apa quēwēminii. ²⁸ Bedēnabee mānōmaī angā ēñēninque Ao āñōnāni Taodo Eedotadēē iñōmō quēwēninque tao guīte ta tao guīte ta cædinque tömēnāni tōnō godongāmæ cædinque mōnō Awēnē émōwo ante guīñēnedāmaī apænecantapa. ²⁹ Ayæ wadāni oodeoidi incæ guīdiego tededō nē tededāni māniñōmō quēwēnōnānimpā. Īnāni inānite Pabodo mōnō Awēnē émōwo ante nangui apænedinque wæætedō wæætē āñongante tömēnāni wæætē wænoncæte ante cædānitapa. ³⁰ Mānōmaī cædānīpa, ante ēñente wædinque tömengā

nānō tōniñadāni bai badīnāni inte pan-cadāniya Taodo ingante Tetadea ganca māo ēmōninque, Godōmenque Tadoto iñōmō wodii wīnonte goe, ante da godōnāni gogacāimpa.

³¹ Īninque Codito ingante nāni godongāmæ pōnencabo incæ Oodeabæ Gadideabæ Tāmadiabæ tōmāo quēwēninque māniñedē wædāmaī inte guēmānānitapa. Ayæ tæi piñænte entawēnāni badānitapa. Ayæ Wængongui Tæiyæ Waēmō Ōnōwoca ædæmō apænecā ate tōmēnāni wampo pōnēnāni badinque yebænte nanguī ināni bagadānimpā. Ayæ mōnō Awēnē ingante ædō cæte ēñēnāmaī cæquī, ante guīñente wægadānimpā.

Ēnea ingante Pegodo angā waa bacampa

³² Mānōmaī tōmēnāni nāni pōnencabo nanguī yebænte bayōnāni Pegodo guiquēnē wayōmō wayōmō wodo tebæ wodo tebæ godinque Dida iñōmō pōninque mōnō Awēnē quīnāni weca ēñacæ pongantapa. ³³ Māniñōmō ponte apæneyongā wacā tōmengā ēmōwo Ēnea do ocho wadepo ganca mōimoga cōmāingā inte nē ongōningā ingā. ³⁴ Adinque Pegodo tōmengā ingante,

—Ēnea ēñēmi. Itota Codito cæcā ate waa babipa cæbii. Ængæ gantidinqe tōmēmi mōimo ni capoe.

Āñongā Ēnea iñōmō do edæ ængæ gantica. ³⁵ Adinque Dida quēwēnāni tōnō Tadōō quēwēnāni tōnō wēēnē nāni pōnēwengainō ante ēmō cædinque Wængongui Awēnē gāmæñō pōnānitapa.

Dodoca wodi ingante Pegodo angā nāni ōmēmongampa

³⁶ Māniñedē wacā onquiyængā nē pōnengā Tabita iñōmō Cope nāni quēwēñōmō quēwēnongāimpa. Tōmengā ēmōwo guidiego tededō Dodoca incæ mōnō tededō Cowāñe ēmongā inongāimpa. Tōmengā iñōmō nē waa cædongā inte ōmæpodāni wæwēnāni inānite nanguī waa cædongā inte Cope iñōmō quēwēnongāimpa. ³⁷ Tōmengā māniñedē nangæ badinque æmæwo wængā. Ate tōmengā baō inī æpæ ādēninque wæñōmēñæcapaa mæi nō cædānitapa. ³⁸ Cope iñōmō quēwēninque Dida wī gobæ impa, eyequei impa. Mānōmaī beyæ, Pegodo Dida iñōmō ongongampa, ante tededāni ēñente wædinque Itota ingante do tee empote quēwēnāni iñōmō onguīñæna mēnaa inate da godōninque, Cope iñōmō gote Pegodo ingante, “Quingæ pōe, ante æda.”

³⁹ Ānāni gote āñete pōñōnate Pegodo godongāmæ pongā adinque tōmengā ingante wæñōmēñæcapaa mæidāni guite acantapa. Owæmpoināni godongāmæ pōninque doyæncōo tōnō yabæcōo Dodoca mīingā quēwēngāñedē nānō badongaincōo odōmōninque Ca ca wædāni. ⁴⁰ Adinque

Pegodo tōmānāni inānite angā tao godāni adinque da guicapote Wængongui ingante apænecantapa. Ayæ dobæ wænte onguite a ōñongā gāmæñō dadi ēmænte adinque,

—Tabita, ængæ gantibi āmo.

Āñongā Tabita wodi awinca wi æmōninque Pegodo ingante adinque ængæ gantite contacantapa. ⁴¹ Ængæ ganti contayongante tōmengā ōnompō bæi ongōninque Pegodo tōō æmængā ate ædæmō ængæ gantite adiyæ gongængantapa. Ayæ owæmpoināni tōnō mōnō Awēnē quīnāni inānite Pegodo aa pecā pō guidāni ate mīingā ingā odōmengā adānitapa. ⁴² Īninque, Mōnō Awēnē mānōmaī cæcantapa, ante Cope iñōmō nāni quēwēñōmō tōmāo gote tededāni ēñēninque nanguī ināni mōnō Awēnē ingante nē pōnēnāni badānitapa. ⁴³ Pegodo māniñedē æmontai nē aminengā Timōnō weca owodinque Cope iñōmō tæñōnæ quēwengacāimpa.

10

Pegodo tōnō Codōnedio

¹ Tetadea nāni quēwēñōmō odōmāno tontadoidi Itadiadi nāni ānoncabo inte quēwengadānimpā. Īninque tontadoidi tiē ganca nāni cabo tiē ganca nāni cabo iñōnānite adocabodāni capitāo tōmengā ēmōwo Codōnedio ēmongacāimpa. ² Tōmengā nāni wencabo nāni owocabo owodinque, Mōnō wadō pōnēñōmonte Wængongui pangā wæcæ wæ, āninque Wængongui nānō ānō ante ēñente quēwēñōnānimpā. Ayæ pæ gompodāmaī inte Codōnedio, Ōmæpodāni wæwēnāni quī, ante pædæ godō pædæ godō cæcā æñōnānimpā. Ayæ Wængongui ingante ñimpo cædāmaī cōwē apænedongāimpa. ³ Tōmengā iñōmō ædæ wæicā ate mā pōni wīlmonite bai acantapa.

Edonque wīlmonite bai ayongante Wængongui anquedo tōmengā weca pō guidinque, “Codōnedio bitō imi.” ⁴ Angā wædinque Codōnedio tōmengā ingante cōwā adinque ancai guīñente wædinque, “Awēnē, æbānō ante āmii. Āmi ēñēmoe.” Āñongante, “Bitō Wængongui ingante nē apænebi imitawo, ōmæpodāni wæwēnāni inānite nē godōmi imitawo. Māniñō bitō apænedō ante māniñō bitō godōnō ante adinque bitō imite waa abopa, Wængongui angampa, angantapa. ⁵ Nōwo wadāni inānite āmi Cope iñōmō gote Timōnō Pegodo nāni ānongā ingante āñete poncædānimpā. ⁶ Adowo ēmōnongā Timōnō weca Timōnō Pegodo gāwapæntibæ wedeca owocampa. Māningā Timōnō æmontai nē aminēnongā ingampa.”

⁷ Ante apænedingā inte Wængongui anquedo ingæ gocā adinque Codōnedio wæætē tōmengā ingante nē cæda mēnaa inate aa pecā pōnatapa. Ayæ tontadoidi incæ

pancadāniya tōmengā ingante nē cædāni inōnānimpā. Īnque adocanque tontado incæ Codōnedio ingante nē cæcā incæ Wængonguī ingante nē ēñengā Īnongāimpā. Tōmengā ingante Codōnedio adobaī aa pecā pongantapa. ⁸ Mānōmai aa pecā ate tōmēnāni godongāmæ pōnāni ate Codōnedio, Wængonguī æbānō angantawoo, ante tōmānō ante adodō apænedinque, Nōwo Cope ĩñōmō goedāni, angantapa.

⁹ Angā godinque ĩimō wææñō taadō godinque Cope ĩñōmō obo pōñōnāni māniñedē incæ tæcæbæcā incæ Pegodo guiquēnē Wængonguī ingante apæncæte ante oncōmanca æicantapa. ¹⁰ Ayæ ate gue ænente wædinque wadāni ĩnānite, Cæinente awædō, āñongante cænguī ĩnque æænōnāmai ĩnte cōnōnāmai ĩñōnānite tōmengā wīimonte ate baī cæwēnengantapa. ¹¹ Ate baī æmō ayongante oōnædē wī ænete baī bayō mōincoo baī ñænæncoo pōni ĩñonte æmæncoco baī æmæncoco baī ongōnete baī inguipoga pædæ wæænonte baī wææ wāi wocæ acantapa. ¹² Wāi wocæñō nē ocaguī mongænāni incæ, nē ocaguī ōmaadāni incæ, nē oōmā ēmænte æidāmæ godāni incæ babæidi tōmānāni weocoo cæncadencocoo ĩnō ongōnāni acantapa. ¹³ Ayongante wacā āninque, “Pegodo, ængæ gantidinque wænonte cæe.”

¹⁴ Angā ēñēninque Pegodo, “Awēnē, ēñēmi. Ōnōnānique ĩñōnānite botō, Baacā awædō, āninque cōwē cænāmai ĩmo apa ānewēē.” ¹⁵ Āninque wæætē ēñēñongā, “Wængonguī nānō ædæmō mēnongadongā incæ bitō ædō cæte baacā āmii.”

¹⁶ Āninque nē apænedingā ĩñōmō wæætē adodō adodō angā ēñēninque Pegodo wæætē, Baacā awædō, ante Baa angantapa. Ayæ mempoga go adopoque wæætēdō wæætē adodō āna ate ñænæncoo pōni weocoo incæ oōnædē ĩnō wēā æænongā baī acantapa. ¹⁷ Īnque, Mānōmainō ante wīimonte baī adimo ĩnte botō quīnō baī cæquimoo, ante Timōnō Pegodo pōnēē congantapa. Pōnēē cōñongā Codōnedio nē nānō da pōnōñāni guiquēnē, Timōnō oncō æyōmōnō ĩ, ante diqui diqui minte adinque yabædemō ĩnō næ gongæninque, ¹⁸ Timōnō Pegodo nāni ānongā ĩñōmō owocāā, ante ēñencæte ante aa pedānitapa.

¹⁹ Pegodo wīimonte baī nānō adinō ante ayæ pōnēē cōñongante Wængonguī Ōñowoca, “Timōnō ēñēmi, bitō ĩmite ante onguīñænāni mengā go adocanque diqui diqui minānīpa quēwēmii. ²⁰ Tōmēmo āmo pōnānīpa cæbii. Bitō ængæ gantidinque yæipodē wæidinque tōmēnāni tōnō ee goe,” angantapa.

²¹ Angā ēñēninque Pegodo yæipodē wæidinque tōmēnāni ĩnānite, Botō mīnitō nē

diqui diqui mīnōmo adobo ĩmopa. Mīnitō quīnante pōmīnii.

²² Āñongante,

—Mōnitō awēnē capitāō Codōnedio incæ angā pōmōnīpa. Tōmengā ĩñōmō Wængonguī ayongante nō cæcā ĩnongā ĩnte Wængonguī ingante guīñente quēwengampa. Nē nō cæcā ĩngampa, ante pōñēninque oodeoidi tōmānāni tōmengā ingante waa adānīpa. Īnque Wængonguī anquedo tæiyæ wæmō ĩnongā ĩnte wæætē Codōnedio ingante, Bitō wadāni ĩnānite āmi gote Pegodo ingante āñete poncædānīpa. Tōmengā ĩñōmō bitō weca pōninque apæncā ēñencæbiimpā, angā ēñente wædinque Codōnedio wæætē mōnitō ĩmōnite da pōnongā pōmōni æe.

²³ Ante apænedāni ēñēninque Pegodo angā pō guīite tōmengā weca owodānitapa. ĩimō ate Pegodo tōmēnāni tōnō tao goyongante Cope ĩñōmō quēwente nē pōñēnāni incæ pancadāniya godongāmæ tao wadæ godānitapa.

²⁴ Mānōmai godinque Pegodo ĩñabæ wæængā Tetadea pongantapa. Codōnedio guiquēnē, Ōo ponguīgā, ante pōñēninque tōmengā guīidēnāni tōnō tōmengā æmigoidi ĩnānite do āñecā ponte godongāmæ ongōnānitapa. ²⁵ Īnque Pegodo ĩñōmō oncōnē pō guīicæ cæyongā Codōnedio wæætē oncodo tao bee tēninque, Æ, bitō Wængonguī anquedo ĩnōmi ĩmīpa, ante baī cædinque ædæ wæænte Pegodo ōñōwa gāānē guīdōmēmæ ñongængā. ²⁶ Adinque Pegodo wææ āninque,

—Īñæmpa bitō waobi ĩmi baī botō adobaī waobo ĩnōmo ĩmopa. Ængæ gantibi, āninque Pegodo angā ængæ ganticantapa.

²⁷ Ayæ Codōnedio tōnō guēa tededinque Pegodo oncōnē guīite ayongante nangūi ĩnāni godongāmæ mæ ongōnāni. ²⁸ Adinque tōmēnāni ĩnānite,

—Mīnitō do ēñēmīnīpa. Oodeoidi ĩnōmōni ĩnte mōnitō Mōitee wodi nānō wææ angainō ante Ao ante ēñente cæmōnīpa. Īnque, Oodeo ĩnāmai ĩnāni tōnō godongāmæ cædāmai incæmīnīpa, ante ayæ, Tōmēnāni weca go guīidāmāi incæmīnīpa, ante mōnitō ēñengainō ante cæmōnīpa, ante mīnitō do ēñēmīnitawoo. Incæte Wængonguī wæætē botō ĩmote ĩmai ante odōmongantapa. Bitō, Baacā awædō, ante tedete baī waocā ĩngantedō ante tededinque, Wentamō mongængampa, ante ānāmai incæbiimpā. Ayæ, Ōnonganque ĩngampa, ante ānāmai incæbiimpā, ante Wængonguī botō ĩmote do odōmongā atabopa. ²⁹ Āñete pōñāni ate botō, Wængonguī mānōmainō ante odōmongā atabopa, ante pōñēninque ee pontabopa. Īnque quīnante botō ĩmote aa pemīnii, ante ēñencæte ante wæbopa.

³⁰ Āñongante Codōnedio wæætē,

—Do meōnaa go meōnaa īfōnte botō tōmēmo oncōnē cænāmai īnte Wængongui ingante apænetabopa. Botō mānōmai ñōwo bai ædæ wæicā apæneyōmo onguīñægā weocoo nāāmænta pōni mongægā ponte botō weca a ongongā atabopa. ³¹ Ayæ botō īmote apænedinque, “Codōnedio, bitō Wængongui ingante apænebitawo, angantapa. Mānīnō bitō apænedō ante Wængongui do ēñengantapa. Ōmæpodāni wæwēnāni qui, ante bitō godōmitawo. Mānīnō bitō godōnō ante adinque Wængongui cōwē pōnengampa cæbii. ³² Ñōwo āmi Cope gote Timōnō Pegodo nāni ānongā ingante āñete poncædānīmpa. Tōmēngā wacā Timōnō æmontai nē amīnēngā weca gāwapæntibæ wedeca owocampa.” ³³ Angā ēñēninque botō wæætē bitō īmite ante, Āñete pōedāni, antabopa. Ñōwo bitō do pōmi waa abopa. Īninque ñōwo īñōmō Wængongui ayongā tōmāmōni godongāmæ a ongōñōmōni bitō, Wængongui Awēnē mōnitō beyæ ante bitō īmite æbānō angāā, ante apænebi ēñencæte ante ongōmōnīpa, angantapa.

Codōnedio oncōnē ongōninque Pegodo apænecampa

³⁴ Codōnedio mānōmai apænecā ēñēninque Pegodo īlmai ante apænecantapa.

—Wængongui, Adoyōmō pōni īminīpa, ante tōmāmō īmote pōnō adoyōmō pōni cæcampa, ante botō, Nāwangā impa, ante ñōwo tæcæ ēñēmopa. ³⁵ Īninque īlmæca quēwēnāni incæ wayōmō wabæca wabæca quēwēnāni incæ æcānō Wængongui ingante guīñente wædinque nō cæte quēwēna ante adinque Wængongui māningā ingante Ao ante do ængampa. ³⁶ Mānōmai cæbopa, ante idægoidi īnānite apænemīni ēñencædānīmpa, ante Wængongui mōnitō īmōnite da godongā gote īlmai ante apænemōni ēñēnānīpa. Tōmāmæ quēwēmō īñōmote mōnō Tæiyæ Awēnē īñōmō Itota Codito ingampa. Tōmēngā waa pōni pōnō cæcā beyænque Wængongui piyænē nānō cægaīnō ante watapæ mōni apænedō impa. ³⁷ Wāō wodi, Æpænē mōnō guidongæīmpa, ante apænecā ēñēnāni ate Itota Codito īñōmō Gadideabæ īñōmō mā cædinque Oodeabæ tōmāo cægonte æbānō cægaīcāi, ante do ēñēmīnīpa. ³⁸ Īlmai ingatīmpa. Wængongui tōmēngā Ōnōwoca ingante angā Itota Nāatadeta nē quēwēngāngā baonga wææ guīgacāīmpa. Wææ guīcā ate Itota tæī piñænte entawēninque wayōmō wayōmō gote tōmāo cægōninque waa cægaīcāīmpa. Edæ Wængongui tōmēngā tōnō godongāmæ quēwēnte cæcā beyæ Itota īñōmō, Wadāni wēnæ angā ēñēninque goti winte bai wæwēnānīpa, ante adinque wēnæidi īnānite

angā tao godānitapa. Ayæ wadāni wēnæ wēnæ īnte wæyōnānite tōmēngā godō cæcā ate edæ waa īnāni bagadānīmpa.

³⁹ Pabodo mānōmaiñō ante godōmenque apænecantapa. “Oodeoidi ōmæ cægōninque ayæ Eedotadēē īñōmō quēwēninque, Itota Codito æbānō cægaīcāi, ante nē adīmōni īnte mōnitō īñōmō mānīnō tōmānō ante nē apænemōni īmōnīpa. Tōmēngā ingante awæ ñænquedīmæ cæte godō wænōnāni wængacāīmpa. ⁴⁰ Incæte

Itota do wæningā īnte meōnaa go adoōnæque ōñongante Wængongui angā ñāni ōmæmōnte mīngā īnte edonque pōni a ongongā agadānīmpa. ⁴¹ Wīī tōmānāni adānitapa. Pancamōniya atamōnīpa. Itota ñāni ōmæmongā ate tōmēngā tōnō nē godongāmæ cænte bedīmōni īñōmōnī

Wængongui, Mānimpodānique Itota mīngā ongongā ingampa, ante nē adīnāni īnte nē apænedāni incædānīmpa, ante mōnitō īmōnite apænte ængacāīmpa. Mōnitō adomōnique tōmēngā ingante atamōnīpa. ⁴² Ayæ mōnitō īmōnite āninque Wængongui, Mīnitō īñōmō do ēñēnīmīni īnte nē apænemīni badinque woadāni īnānite mānōmaiñō ante apænedinque īlmai ante apænecāmīnīmpa. Mīī quēwēnāni īnānite do wænīnāni īnānite Itota Codito īñōmō edæ tōmānāni īnānite edæ nē apænte angūngānō

anguēnē, ante apænemīni ēñencædānīmpa, ante Wængongui mōnitō īmōnite angacāīmpa. ⁴³ Ayæ, Mōnō Codito poncæcāīmpa, ante do ēñēngānīni īnte tōmānāni Wængongui beyæ adoyōmō apænegadānīmpa. Tōmēnāni, Codito ingante nē pōnēnāni wēnæ wēnæ nāni cædō ante adocā Codito ēmōwo beyænque Wængongui pōnō waadedinque ñimpo cæcā quēwēncædānīmpa, ante doyedē apænegadānīmpa.” ante Pegodo

Codōnedioidi īnānite apænecā ēñēnānitapa.

Oodeoidi īnāmai īnāni Wængongui Ōnōwoca ingante cēnāni

⁴⁴ Pegodo mānīnō ante tæcæ apænecā ēñēē cōñōnānite Wængongui Tæiyæ Waēmō Ōnōwoca tōmēnāni tōmānāni baonga wææ guīcantapa. ⁴⁵ Pegodo tōnō godongāmæ pōnīnāni guīquēnē nē pōnēnāni īnāni incæte, Mōnō ēō togænte quēwēngæīmpa, ante nē ānōnāni ingadānīmpa. Īninque tōmēnāni, Oodeoidi īnāmai īnāni īnānite Wængongui Tæiyæ Waēmō Ōnōwoca do wææ guīcampa, ante adinque edæ guīñente wædānitapa. ⁴⁶ Edæ Codōnedioidi Wængongui Ōnōwoca ingante ēwocadinque wadāni nāni tede bai wadāni nāni tede bai īñontobæ apænedinque Wængongui ingante waa adinque waa todāni ēñente wædinque oodeoidi mānōmai guīñente wædānitapa. ⁴⁷ Adinque Pegodo tōmēngā tōnō nē pōnīnāni īnānite,

—Tömēnāni mōnō bai Wængongui Tæiyæ Waēmō Ōnōwoca do ænināni inānite adinque tōmēnāni, Æpænē guidimō guiliboe, āñōnānite mōnō ædō cæte wææ anguii.⁴⁸ Āninqe Pegodo angā ēñēninque tōmēnāni Itota Codito emōwo apænedinque æpænē guidōnāni guidānitapa. Æpænē nē guidēnāni iñōmō ayæ Pegodo ingante, Tæōnæ mōnitō weca quēwencæbiimpa, ānāni Ao ante quēwengacāimpa.

11

Eedotadēē iñōmō nē pōnēnāni inānite Pedogo apæneccā

¹ Oodeoidi ināmai ināni incæ Wængongui nānō ānō ante do Ao ante ēñēnānīpa, ante wadāni Oodeabæ tōmāo cægonte tededānitapa. Īninqe Itota nānō da gogaīnāni tōnō wadāni nē pōnēnāni tōnō mānīnō ante do ēñēnānitapa. ² Īninqe Pegodo Eedotadēē iñōmō æite quēwēñongante nē pōnēnāni incæ pancadāniya, Mōnō ēō togængæiimpa, ante nē ānōnāni inte tōmengā ingante piīninqe,³ iīmai ante ānānitapa.

—Quimæ bitō togæñāmai ināni weca incæ go guidinque cæmitapa tōō.

⁴ Āñōnānite Pegodo, Æbānō cæte ī, ante adodō adodō ante apæneccā ēñēnānitapa.

⁵ —Botō Cope nāni quēwēñōmō gote quēwēninque Wængongui ingante apænedinque cæwēnente ongōninqe wīimonte bai atabopa. Wīimonte bai ayōmote weocoo ñænæncoo mōincoo bai æmænecoo yao æmænecoo yao oncōnete bai oōnædē īnō pædæ wæænonte bai ayōmote botō weca wææ wāi wocæ atabopa. ⁶ Wāi wocæñō botō acæte ante guimō ayōmo babæidi bai ināni inte ocagui mongæñāni, æmōntaique mongæñāni, oōmā emæñāni yæmiñæncoo īnō ongōnāni bai atabopa. ⁷ Ayæ wacā botīmote, “Pegodo, ængæ gantidinque wænonte cæte.” ⁸ Angā ēñēninque botō, “Awēnē ēñēmi. Baacā ingā ānewēē. Nāwaaquingā ināmai iñongante cōwē cænāmai īmōi ae.” ⁹ Ante wæyōmote oōnædē apæneccā botō nē ēñēningā godōmenque āninqe, “Wængongui nānō ædæmō mēnongadongā ædō cæte baacā āmii.” ¹⁰ Āninqe tōmengā wæætē wæætē mempoga go adopoque adodō angā ate ñænæncoo bai adodō oōnædē ingæ æi atabopa. ¹¹ Māniñedē Tetadea nē quēwengā da pōnongā pōninqe ongūñænāni mengāa go adocanque botō īmote ante diqui mīncæte ante botō owocō boyæ tæcæ pōninqe næ gongæñānitapa. ¹² Ayæ Wængongui Ōnōwoca incæ botō īmote angā ēñēninque botō, Wadāni inānīpa, ante piīnāmai īmo inte guīñēnāmai tōmēnāni tōnō ee gotabopa. Ayæ botō tōnō iīnāni iñōmō

tei ganca ināni mānimpodāni godongāmæ godānitapa. Gote ayōmōni, Codōnedio oncō impa, ante adinque go guitamōnīpa, ante Pegodo apæneccantapa. ¹³ Ayæ, Go guite ēñēñōmōnite Codōnedio iñōmō, Æbānō cætīmpa, ante apænedinque mōnitō īmōnite iīmai ante apæneccantapa. Botō oncōnē Wængongui anquedo a ongongā atabopa. Ayæ botō īmote āninqe anquedo iñōmō, “Bitō Cope iñōmō āmi wadāni gote Timōnō Pegodo nāni ānongā ingante āñete poncædānīmpa. ¹⁴ Tōmengā pōninqe, Mīni quēwencabo æbānō cæte wæñāmai quēwenguimīni, ante bitō īmite apæneccā ēñencæbiimpa.” Mānōmāinō ante Wængongui anquedo apæneccā ēñente cætābopa, ante Codōnedio mōnitō īmōnite apæneccā ēñentamōnīpa.

¹⁵ Māninganca apænedinque Pegodo iīmai angantapa. “Wængongui Tæiyæ Waēmō Ōnōwoca mā pōninqe mōnitō īmōnite nānō guidō bai ñōwo iñōmō botō tæcæ apæneccæ cæyōmo adocā edæ tōmēnāniya adobai wææ guicantapa. ¹⁶ Īninqe botō, Mōnō Awēnē Itota æbānō angacāi, ante adodō ante pōnentabopa. ‘Wāō wodi iñōmō æpænē guidongacāimpa. Wængongui Tæiyæ Waēmō Ōnōwoca guiquēnē mīnitō baonga pō guicæcāimpa,’ ante Itota do apænegacāimpa, ante botō ōnōwēnenque pōnentabopa. ¹⁷ Ayæ, Mōnō Awēnē Itota Codito ingante wede pōnēmōni ate Wængongui tōmengā Tæiyæ Waēmō Ōnōwoca ingante da pōnongā æntamōnīpa. Ñōwo tōmēnāni adobai wede pōnēnāni ate Wængongui mōnitō īmōnite nānō da pōnongāingā ingante tōmēnāniya adobai da pōnongā ænānīpa, ante pōnentabopa. Mānōmai cæcampa, ante pōnēninque botō, Ædō cæte Wængongui ingante Baa anguimoo.”

¹⁸ Ante Pegodo, Æbānō cætīmpa, ante tōmānō ante edonque apæneccā ēñēninque tōmēnāni wæætē. Mōnō ædō cæte godōmenque piīnte anguii, ante piyænē cæte apænedānitapa.

—Ñōwo idæwaa āmōnīpa. Wadāni oodeoidi ināmai ināni incæ mōnō bai, Idæwaa wēnæ wēnæ cæte awædō, ante guingo imonte wædāni ate Wængongui pōnō waadete cæcā ate quēwēnānīpa, ante ñōwo tæcæ mā ēñēmōnīpa, ante todinque Wængongui ingante edæ watapæ apænegadānīmpa.

Antioquiya iñōmō Itota ingante nāni pōnencabo

¹⁹ Māningā Etebā wodi ingante wæñōninqe oodeoidi godōmenque wadāni nē pōnēnāni inānite wēnæ wēnæ togænte pānāni wædinque nē pōnēnāni iñōmō wodii wīnōninqe nāwæ gote Pēnitia ganca Tipidebæ ganca Antioquiya ganca

godānitapa. Godinque tōmēnāni, Itota Codito æbānō cægacāi, ante oodeoidique inānite apænedinque wadāni inānite apænedāmaī ingadānimpā. ²⁰ Incæte Tipidebæ iñōmō quēwēnāni tōnō Tidēnebæ iñōmō quēwēnāni pancadāniya Antioquiya iñōmō godinque guidiegoidi inānite adobaī Itota Codito ingantedō ante watapæ apænedāni ēñēnānitapa. ²¹ Iñinque mōnō Awēnē tōmēnāni tōnō godongāmæ cæcā beyænque nanguī ināni tæcæ pōnēninque tōmēngā gāmæñō pōnānitapa.

²² Mānōmaī pōnēnānīpa, ante tededāni ēñēninque Eedotadēē iñōmō Codito ingante nāni godongāmæ pōnencabo incæ Bedēnabee ingante, Bitō Antioquiya iñōmō godinque ate pōe, ānāni. ²³ Māniñōmō gote pōninque Bedēnabee iñōmō, Antioquiya iñōmō quēwēnāni inānite Wængongui waadete pōnō cæcampa, ante adinque nanguī todinque tōmānāni inānite, Minitō mīmōno wede pōnēninque mōnō Awēnē miñæ cōwē quēwēdāni, ante nanguī angantapa. ²⁴ Bedēnabee iñōmō Wængongui Tæiyæ Waēmō Ōnōwoca ingante ēwocadinque nē wede pōnēngā inongā inte nē waa cæcā inongāimpā. Iñinque tōmēngā apæneccā ēñēninque tōmēnāni nanguī ināni mōnō Awēnē gāmæñō pongadānimpā.

²⁵ Bedēnabee wæætē Taodo ingante diqui mincæte ante Tadoto iñōmō gote, ²⁶ adinque tōmēngā ingante Antioquiya iñōmō ænte pongantapa. Pōninque adoque wadepo quēwēninque tōmēnāni Codito ingante nē tee empote quēwencabo tōnō cōwē godongāmæ ponte apænedinque nanguī ināni inānite odōmonte apæneda ēñēnānitapa. Ayæ Antioquiya iñōmō quēwēnāni Codito ingante nē tee empote quēwēnāni inānitedō ante apænedinque, Coditoidi inānīpa, ante mā pemōninque apænedōnānimpā.

²⁷ Ayæ Wængongui beyæ nē apænedāni pancadāniya māniñedē Eedotadēē quēwēninque Antioquiya pōnānitapa. ²⁸ Tōmēnāni nāni Wængongui beyæ apæneincabo incæ adocanque Agabo nāni ānongā iñōmō Wængongui Ōnōwoca ingante ēwocate apænedinque, Mōnō waocabo quēwēñōmō tōmāmæ cængui oo dæ ba adinque mōnō gæwænte wæquimāmo baquīnō anguēnē, ante angacāimpā. Iñinque iincayæ ate Codaodio Awēnē ingāñedē Agabo nō nānō ānīno baī do batimpā. ²⁹ Ba adinque Antioquiya nāni pōnencabo godongāmæ pōnēninque, Mōnō tōniñadāni iñōmō Oodeabæ quēwēninque edæ tepæmpo gæwænte wædānīpa cæmōō. Tōmēnāni beyæ mōnō godonte æinta pædæ godōninque adocanque eyepæ inte nānō godonganca wacā eyepæ inte nānō godonganca godongæimpā, ante

godongāmæ Ao ānānitapa. ³⁰ Āninque eyepæ pædæ pōnōninque Bedēnabee tōnō Taodo inate, Ænte māo godinque nē pōnēnāni inānite nē aadāni nē Picānāni nempo pædæ godōmīna æncædānimpā, ante da pōnōnāni ænte gote godōna ængadānimpā.

12

Tantiago wængā ate Pegodo ingante tee mōnedānīpa

¹ Māniñedē Codito ingante nāni godongāmæ pōnencabo iñōnānite awēnē odeye Edode iñōmō pancadāniya inānite wēnæ wēnæ cæcæte ante angā bæi ongonte ængadānimpā. ² Mānōmaī cædinque tōmēngā angā ēñēninque Wāō tōniñacā Santiago ingante yaēmenca wæñōnāni wængacāimpā. ³ Santiago wodi mānōmaī wængā adinque oodeoidi todāni ate wædinque Edode, Godōmenque cæbo ate nanguī todinque botō imote waa acædānimpā, ante cædinque Pegodo ingante adobaī bæi ongongantapa. Edæ pāo yedæ æmpoqui ōmæmō i nāni ææmæ cæyedē māniñedē tōmēngā ingante bæi ongonte ængantapa. ⁴ Mānōmaī æninque Edode iñōmō, Oodeoidi Patowa ææmæ iinque bedāni ate botō Pegodo ingante ænte tadonte tōmānāni ayōnānite apænte ancæboimpā, ante pōnēninque tōmēngā ingante tee mōnecantapa. Tee mōnedinque Edode godōmenque angā ēñēninque tontadoidi mēngāa go mēngāa nāni cabo pō wææ wānonte goyōnāni wacabo adopotāni pō wææ wānonte godōnānimpā. Mānōmaī wacabo pō wacabo pō cædinque menca-bodāniya go mēncabodāniya wæætē wæætē ponte wææ wānonte godōnānimpā. ⁵ Iñinque Pegodo ayæ tee mōnete ongōnongāimpā. Incæte tōmēnāni Codito ingante godongāmæ nāni pōnencabo Wængongui ingante tōmēngā beyæ cōwē nanguī apænegadānimpā.

Pegodo ingante Wængongui incæ ñimpo cæcā gocampa

⁶ Pegodo ingante tontadoda mēnaa tōnō æmæncaipo æmæncaipo yaēmēngō tæi goti wincapodāni wæyongante wada odemō cōwē wānō cōnōnāimpā. Iñinque Edode tōmēngā nānō apænte anguiōnæ ado woyowotæ Pegodo mānōmaī goti winte wædongā inte mō ñongantapa. ⁷ Iñontobæ Wængongui Awēnē nānō da pōnōningā anquedo a ongongantapa. Tee mōnete oncōnē ñāō gongæntapa. Pegodo mō ñōñongante Wængongui nānō da pōnōningā iñōmō æmætæ inō tao cædinque, “Pegodo, ñāni ōmæmonte quingæ ængæ gantūbi.” Āñongā daagōmē nāni tæi wīni incæ tōmenque ñimænca tæ wæængatimpā. ⁸ Ayæ, “Bitō wecooga pacadeyænta pacadeyænte awæncata wēwabi.” Angā ēñente cæcā

adinque Wængongui anquedo godōmenque, “Yacoo wīni caadinque botō miñæ pōe.”

⁹ Angā ēñēninque Pegodo, Awīi cæmonte awædō. Anquedo dicæ ponte cæcā. Mānōmaī ponte cæcampa, ante botō wīlmonte bai aboimpa, ante wawique pōnengā incæte anquedo miñæ tee empote tao gocantapa. ¹⁰ Mānōmaī tao godinque guīcōnē nē wānōna ongōñona wodo tebæ tao godinque yabæcōnē tamongademō nē wānōna ongōñona wodo tebæ tao godinque yaēmewæ odemō tōmēnāni quēwēñōmō ante nāni tao goquīnemō ganca pōnatapa. Mānīnemō ganca ponte ongōñona yaēmewæ odemō incæ tōmenque æ ænete bayō tao godinque taadō adodonque cægōna ate anquedo iñōmō ingæ gocā ate Pegodo guīquēnē adocanque a ongonantapa.

¹¹ Adoboque a ongōmopa, ante wædinque tōmengā wæætē nāmā pōnengā badinque, “Æ. Nāwangā incæ do tate ēñēmopa. Edode nempo wæwēninque botō oodeoidi nāni pīnō wæquēnēmo imo adinque Wængongui angā ēñēninque tōmengā anquedo ponte botō imote gā pe æmpote ō ængā ate aamō cæbopa, ante tæcæ pōnēmopa.”

¹² Ante pōnente wædinque Pegodo wadæ godinque Wāō Māadoco nāni ānongā tōmengā badā Māadiya oncō boyæ ponte næ gongægantapa. Mānīncōnē wadāni nē pōnēnāni incæ do pōninque Wængongui ingante godongāmæ apænee cōnōnānimpa. ¹³ Pegodo iñōmō yabædemō ongonte aa peyongā baquēcā nē ēacā ingante nē cæcā inte tōmengā ēmōwo Adoda iñōmō ēñencæte ante pongantapa. ¹⁴ Ponte ēñēñongā Pegodo incæ aa pecā ēñēninque watapæ tote wædinque tōmengā wīi pōnēninque odemō wi ænedāmaī pogodo gote edæ wadæ guīdinque, Pegodo incæ oncodō a ongonā tamēñedāni. ¹⁵ Ante apænecā ēñēninque tōmēnāni wæætē,

—Adoque antedō amīni.

Ante wæyōnāni tōmengā, Nāwangā impa, ante anca angā ēñēninque tōmēnāni,

—Wa. Pegodo ingante nē aacā anquedo īmaingampa.

¹⁶ Ante tedeyōnāni Pegodo iñōmō ayæ aa pete ongōnongāimpa. Ayæ ponte wi ænete ayōnāni Pegodo ingante adinque ancaī guīñente wædānitapa. ¹⁷ Tōmengā wæætē, Apocænē iedāni, ante ōnopocaque compo cæcā adinque pæ wēñeyōnāni tōmēnāni inānite apænecantapa. Botō tee mōnete wæyōmote Wængongui æbānō pōnō cæcā ate tate pōmoo, ante tōmānō ante adodō ante apænedinque,

—Botō apænebo mīni ēñēnō ante mīnitō wæætē wacā Tantiago ingante apænedinque wadāni mōnō tōniñadāni inānite apænemīni ēñecædānimpa.

Åninque Pegodo wayōmō wadæ gocantapa.

¹⁸ Īimō wæñō nāō bayonte tontadoidi guīquēnē, Pegodo ædōnō gote dæ angā, ante nangui Yæ yæ ante cædānitapa. ¹⁹ Mānōmaī cætimpā, ante apænedāni ēñente wædinque Edode angā diquī diquī mīñōnāni Pegodo ayæ dæ angantapa. Īininque nē wææ wānōnīnāni inānite Edode, Æbānō cætiī, ante anca angā wædinque tōmēnāni, Mōnō ædō cæte anguiī, ante wæyōnānite tōmengā wadāni inānite angā capo wæñōnāni wængadānimpa. Edode tōmē Oodeabæ wadæ tao godinque Tetadea gote quēwengacāimpa.

Edode wængampa

²⁰ Tido iñōmō quēwēnāni tōnō Tidōō iñōmō quēwēnāni inānite awēnē Edode wodi māñīnedē ēnagate ængui bacā adinque tōmēnāni wæætē godongāmæ pōnente Ao āninque Edode weca apænecæ pōnānitapa. Tōmēnāni, Mōnō iñōmō awēnē odeye Edode ōmæ quēwēnāni pōnōnāni æninque māñinonque cænte quēwēmōmpa, ante wædōnāni inte tōmengā ingante, Bitō pīnāmaī inte piyænē cæbi quēwēmōnie, ante ancæte ante pōnānitapa. Pōninque tōmēnāni Edode oncōnē owodāni inānite nē aacā Bodato ingante waa cædinque tōmengā ingante ānāni Ao ante tōmengā wæætē Awēnē Edode ingante tōmēnāni beyæ apænecā ēñengacāimpa. ²¹ Edode iñōmō, Īiōnæ ba ate botō ponte apænecæboimpa, ante tōmengā nānō āñiōnæ ĩnque ba ate tōmengā awēnē weocoo wæmoncoo wēñate pōninque awēnē nāō apænte ante contaimpaa tæ contadinque tōmānāni ayōnāni tōmēnāni inānite apænecantapa. ²² Apænecā ēñēninque tōmānāni Yæ yæ āninque, “Wīi waocanque tedecā ēñēmōmpa. Wængonguīdi nāni tedepāmo bai tedecā ēñēmōmpa.” ²³ Ante Yæ āñōnāni Edode wodi wæætē, Nāwā Wængonguinque nē waa cæcampa, ante anguēnengā incæte ānāmaī pæ wēnecā adinque tōmengā ingante Wængongui anquedo wæætē godō cæcā ate ayago cæ æmæwo wængacāimpa.

²⁴ Incæte Wængongui nānō angāinō ante māñīnedē wayōmō māo wayōmō māo apænedāni ēñēninque nangui ināni mōnō Awēnē ingante nē wede pōnēnāni badānitapa.

²⁵ Bedēnabee tōnō Taodo iñōmō Eedotadēē iñōmō godinque tōmēna nāna cæquēnēnō tōmānō ĩnque cædinque wadæ godinque Wāō Māadoco nāni ānongā ingante tōmēna tōnō æninque adodō godānitapa.

13

Wængongui angā ēñente Bedēnabee tōnō Taodo godapa

¹ Antioquiya īñōmō Itota Codito ingante nāni godongāmæ pōnencabo īñōnāni īñōmō pancadāniya Wængonguī beyæ nē apænedāni īñōnāni pancadāniya guiquēnē nē odōmonte apænedāni īñōnānīmpa. Bedēnabee tōnō wacā Timōnō Nēegodo nāni ānongā īñōnānīmpa. Tidēnebæ nē quēwēningā Dotio īnongāīmpa. Pancabaa awēnē Edode tōnō godongāmæ nē pædingā Mānāēnē tōnō Taodo īñōnānīmpa. Mānīmpodāni īngadānīmpa. ² Īnīnque tōmānāni godongāmæ mōnō Awēnē ingante, Tæiyæ Waēmō īmpa, ante watapæ apænecæte ante cæñāmaī apæneyōnānīte Wængonguī Tæiyæ Waēmō Ōnōwoca īncæ īmaī āngacāīmpa. “Bedēnabee tōnō Taodo mīnitō tōnō nē cæda īñōnate āmīni botō beyænque cædinque nānēnē godinque botō ānīnō ante cæcædaīmpa,” āngacāīmpa.

³ Īnīnque īnīnque cæñāmaī īnte apænedīnque tōmēnāni Bedēnabee tōnō Taodo īnate gampocadinque Wængonguī ingante apænedīnque ānāni ate wadæ gogadāīmpa.

Wāā tēiwæñē Tipidebæ gote apæneda ēñēnāni

⁴ Bedēnabee tōnō Taodo īñōmō Wængonguī Tæiyæ Waēmō Ōnōwoca mānōmaī āngā godīna īnte Tedeotia īñōmō wæi wipodē ñænæmpodē go guīdinque wogaa godīnque wāā tēiwæñē Tipidebæ nāni āmæ godatapa. ⁵ Tadamīna nāni quēwēñōmō pōnīnque oodeoidi odōmōīncōnē wacōnē go guī wacōnē go guī cædinque Wængonguī nānō apænedō ante nōīngā apæneda ēñēngadānīmpa. Ayæ Wāō tōmēna mīñæ godīnque tōmēna beyæ nē cæcā īnongāīmpa.

⁶ Mānōmaī wāā tēiwæñē tæcæguedē wodo tēbæ cægōnīnque yæcado godīnque Papo nāni quēwēñōmō ganca pōnānītapā. Pōnīnque tōmēnāni wacā idō tōmēngā ēmōwo Baditota ingante mānō beē tēnānītapā. Tōmēngā īñōmō oodeocā īnongā īnte, Wængonguī beyæ nē apænebo īmpa, ānīnque nē babæ ānongā īnongāīmpa. ⁷ Tōmēngā wāā tēimæ awēnē Tedeguo Pabodo nāni ānongā tōnō godongāmæ nē cædongā īnongāīmpa. Awēnē Tedeguo guiquēnē nē ocāi encadongā īnte Wængonguī nānō ānō ante ēñēīnente wædinque Bedēnabee tōnō Taodo īnate āñete māmōngā pōnatapa. ⁸ Tōmēna ponte apæneyōnate idō Baditota guiquēnē guidiego tededō Edīma nāni ānongā īnongā īnte edæ, Awēnē nē pōnēngā badāmaī īncæcāīmpa, ante wææ cæcæte ante piīnte cæcantapa. ⁹ Īnīnque Taodo Pabodo nāni ānongā īñōmō Wængonguī Tæiyæ Waēmō Ōnōwocaque ēwocadinque idō ingante gomō adīnque, ¹⁰ tōmēngā ingante āngantapa.

—Bitō īñōmō wēnæ awēnē nānōmōmi baī imidō anguēnē. Īñæmpa, Wadāni quīēmē nō īmpa, ante oda cæcædānīmpa, ante bitō piīnte pōnēwēnonque entawēnīnque bitō nē babæ cædōmi īmpa tōō. Wængonguī nānō tōīnō ponguīnō ante idīquībæ bacāīmpa, ante bitō æpogamē īncæ cæbīi. ¹¹ Nōwo īñōmō Wængonguī Awēnē nē piñængā īnongā īnte bitō īmite pancæcāīmpa. Tōmēngā pōnō gampomōngā ate bitō babetamōmi badīnque nænque ñāō tamōnō wantæpiyæ tōmēngā nānō ānīmpoga adāmaī īncæbīīmpa.

Āñongā boguīmā baī do wææ īnīnque wēmō ēmōnīnque Edīma Baditota nāni ānongā gampo gampo cædinque, Ēcānō botō īmote tōō æmænte māoda goquīmoo, ante dīquī dīquī mīngantapa. ¹² Mānōmaī bacā adīnque wāā tēimæ awēnē wæætē Wængonguī Awēnē īngantedō ante īñāna nāna odōmonte apænedō ante pōnente guīñente wædinque nē pōnēngā bagacāīmpa.

Pitidiabæ Antioquiya godīnque cædapa

¹³ Pabodoidi īñōmō Papo īñōmō wadæ godīnque wipodē ñænæmpodē wogaa taodīnque Pampidiabæ pōnīnque Pedegue īñōmō ti wææññōnāni Wāō wæætē adodō Eedotadēē gocæte ante tōmēna īnate ēmō cæte wadæ gogacāīmpa. ¹⁴ Tōmēna wæætē Pedegue wadæ godīnque Pitidiabæ pōnīnque Antioquiya nāni quēwēñōmō pōnatapa. Ayæ tōmēnāni guēmangūōnæ īnīnque bayō oodeoidi odōmōīncōnē pō guītte tæ contadatapa. ¹⁵ Tæ contate a cōñōna Mōītee wodi nānō yewæmōngainta adīnque Wængonguī beyæ nē apænegāīnāni nāni yewæmōngainta ate apænedānītapā. Ayæ mānīñōmō awēnēīdi īñōmō tōmēnāni weca ongōngā adocanque īngante apænedīnque, —Bitō ñōwo pōna īnate māo ānīnque īmaī apænecæbīīmpa, Īñāna, mōni tōnīñāmīna ēñēmīna. Īñōmō ongōnāni wampo pōnēnīnque tæī gongænte ongoncædānīmpa, ante cædinque mīnatō ædæmō apænemīna ēñēnguīnānīi, ante āmī apænebaīnapa.

¹⁶ Ānāni ēñēnte māo āngā ēñēīnīnque Pabodo īñōmō ængæ gantīdīnque ōnompoca compo compo cædinque tōmēnāni īnānīte apænecantapa.

—Mīnitō, pancamīniya idægoidi īñōmīnīte pancamīniya wamīni īncæ, Nāwā Wængonguī īnongā īngampa, ante nē guīñente wæmīni īñōmīnīte botō tōmāmīni īmīnīte apænebo ēñēedāni. ¹⁷ Idægoidi, mīnitō īmīnīte tāno apænebo ēñēedāni. Mōnō idægocabo Wængonguī īncæ mōnō mæmæīdi īnānīte apænte ængā ate wadāni nēmæ Equitobæ īñōmō quēwēñōnānīte tōmēngā pōnō cæcā ate tōmēnāni tæiyæñāni yebængadānīmpa. Ayæ Wængonguī tæī piñæñongā īnte īngæ æmænīnque tōō æmænte māocā wadæ gogadānīmpa.

18 Godinque tōmēnāni coadenta wadepo mānimpoga ōnōmæca cægōninque æbāmē wēnæ wēnæ cæte quēwēnāni ate wæcā incæte tōmengā pānāmai inte ata cæpote æte māocā gogadānimpā. 19 Ayæ wadāni Cānaāmæ quēwēnāni ōnompō æmæmpoque go mēncabodāniya iñōnānite wido cædinque Wængonguī, Tōmēnāni ōmæ ini mīnitō ōmæ wæætē bacæimpa, ante mōnō wæmæidi inānite pōnongā ængadānimpā. 20 Edæ coatodo tiento tincoenta wadepo mānimpoga wabæca quēwēnāni ate māniñedē ate Wængonguī, Mīnitō ōmæ, āninque mōnō wæmæidi inānite pōnongā æninque quēwengadānimpā.

Ante apænedinque Pabodo, Idægoidi dodāni æbānō cægadānii, ante godōmenque apænecantapa. “Mānimæca ponte wantæpiyæ quēwēnāni ate pancadāniya nē apæntē ānāni iñōnānite Wængonguī angā ate adodāni awēnēidi bai badinque wayedē wacā adocanque wayedē wacā adocanque wayedē wacā adocanque aagadānimpā. Tāmoedo Wængonguī beyæ nē apænecā nānō ponte apæneganca māniñānique aagadānimpā. 21 Iñcayæ ate mōnitō dodāni iñōmō Wængonguī ingante apænedinque, Bitō adocanque ingante āmi ate tōmengā tæiyæ awēnē bacæcāimpa, ante ancaa ānāni ēñente wædinque tōmengā wæætē Beencaminō wodi pæingā incæ Titæ wengā Taodo ingante angā bagacāimpa. Tæiyæ awēnē badinque tōmengā coadenta wadepo mānimpoga iñonte aagacāimpa. 22 Ayæ ate Wængonguī wæætē, Idæwaa, ante Taodo wodi ingante wido cædinque Dabii wodi ingante wæætē angā tæiyæ awēnē bagacāimpa. Adocā Dabii ingantedō ante apænedinque Wængonguī, Botō waa pōni entawēmo bai Yæte wengā Dabii iñōmō adobai entawengā abopa. Tōmengā iñōmō botō ānō bai edæ tōmānō cæquingā ingampa, ante apænegacāimpa.”

23 “Wængonguī doyedē, Codito ængā beyænque idægoidi quēwēncædānimpā, ante do nānō angainō bai ñōwo cædinque adocā Dabii pæingā Itota Codito ingante da pōnongā pongacāimpa. 24 Itota ayæ pōnāmai iñongā Wāō wodi idægoidi tōmānāni inānite apænedinque, Mīnitō, Idæwaa wēnæ wēnæ cæte awædō, ante Wængonguī gāmæñō wadæ pōninque æpænē guiedāni, ante apænecā ēñengadānimpā. 25 Ayæ adocā Wāō incæ, ‘Botō æbodō imoo, ante pōnēmīni. Mīnitō pōnēnō bai wīl imopa. Botō do pōnīmo iñōmote mīni nē pōnēnongā iñōmō ayæ poncæcāimpa. Tōmengā ingante adinque botō waēmō imopa diyæ tōmengā awæncata godō ñi cæquimoo.’ Ante Wāō tōmengā nānō cæquēnēnō wodo iñque cæyedē apænegacāimpa.”

26 Ante apænedinque Pabodo godōmenque apænecantapa. “Iñānāni, pancamīniya Abadāō wodi pæimīni iñōmīni pancamīniya wamīni incæ Wængonguī ingante guñēmīni iñōmīni edæ botō tōmānīni imīnite apænebo ēñēdāni. Māniñō, Codito ængā beyænque quēwēncæmīnimpā, ante Wængonguī tōmāmō beyæ pōnō apænegacāimpa. 27 Eedotadēē quēwēnāni tōnō tōmēnāni awēnēidi iñōmō, Itota æcānō ingāā, ante pōnēnāmai ingadānimpā. Iñinque guēmanguiōnæ iñō guēmanguiōnæ iñō Wængonguī beyæ nē apænegaināni nāni yewæmongainta cōwē adāni incæte tōmēnāni, Itota nānō wænguinque wēnæ wēnæ cæcā ingampa tōō, ante babæ ante apænte ānewēninque edæ dodāni nāni yewæmonte angainō bai iñque cædānitapa. 28 Tōmēnāni, Itota nānō wænguinque æbānō wentamō mongængāā, ante cōwā ayōnāni edæ dæ ampa. Ante wædinque awēnē Pidato ingante apænedinque tōmēnāni, Itota ingante āmi wænōnāni wængæe, ante ancaa ānāni ēñēninque Pidato Ao angā wænōnāni wængacāimpa. 29 Iñinque Itota ingante awāa timpote wænōninque tōmēnāni dodāni tōmengā ingante ante nāni yewæmonte angainō bai tōmānō ante iñque cædānitapa. Mānōmai cædāni ate wængā ate tōmēnāni ānāni ate tōmengā mīñæ godināni wæætē tōmengā nānō ongōwāa pædæ æmpodinque ōnompō o togæmpote wæi ōnōwa o togæwadinque pædæ wæænōninque edæ ænte māo daga wengadānimpā.”

30 “Incæte Wængonguī guiquēnē do wæningā ingante, Nāni ōmæmōe, angā ñāni ōmæmonte quēwengampa. 31 Nāni ōmæmōninque tōmengā tæōnæ iñonte pō pō cædinque a ongōñongante edæ tōmengā tōnō wēēñēdē Gadideabæ quēwēninque Eedotadēē iñōmō nē pongaināni iñōmō edæ tōmengā ingante wæætē adānitapa. Iñinque tōmēnāni iñōmō nē adināni inte waodāni inānite, Itota nāwängā ñāni ōmæmonte mīngā quēwengampa, ante nē apænedāni ināniya.”

32 Ante apænedinque Pabodo, “Dodāni inānite Wængonguī, Mīnitō beyæ botō cōwē pōnō cæcæboimpa, ante apænegacāimpa, ante ēñēmīnitawo. Māniñō ante watapæ nānō apænegainō ante mōnitō ñōwo iñmai ante apænemōnīpa. 33 Māniñō tōmengā dodāni inānite nānō angainō bai ñōwo tōmēnāni mōmōidi beyæ iñque cædinque Wængonguī Itota ingante, Nāni ōmæmōe, angā ñāni ōmæmongacāimpa. Tōmengā ñōwo iñque cæcampa, ante Ámotamīni nāni Angainta tānota gao wæintaa Wængonguī beyæ iñmai ante yewæmongatimpa. ‘Botō Wēmi inōmi imīpa. Nōwoñæ bitō Mæmpobo

babopa.’³⁴ Ayæ mānīnō, Tōmengā Wengā do wæningā īfongante Wængonguī angā nāni ōmæmōninge baō nōmāadāmaī incæcāimpa, ante pōnēninge Itaiya wodi īlmaī ante Wængonguī beyæ ante yewæmongacāimpa. ‘Awēnē Dabii wodi ingante apænedinque botō, Tæiyæ waēmō botō cædō bai cædinque cōwē ædæmō aate cæcæboimpa, ante nō botō angaīnō bai cædinque mīnitō īmīnite pōnō adobaī cæcæboimpa,’ ante Wængonguī angampa, ante yewæmongacāimpa.³⁵ Ayæ mānīnō ante wataa adobaī Wængonguī ingante apænete bai Dabii wodi yewæmongacāimpa. ‘Bitō īmite nē Cæcā īfōmō bitō cædō ante cōwē cædongā inte wængā adinque bitō ædō cæte tōmengā ingante ænāmaī inte ee abi baō nōmāaquinḡā,’ ante yewæmongacāimpa.”

³⁶ “Awēnē Dabii wodi guiquēnē Wængonguī nānō ānōnō ante ēfēninge adoyedē quēwēnāni beyæ waa cædingā inte edæ nāne wæninge tōmengā mæmæidi weca æiyongā tōmengā baō īni nōmænte bagatimpa. ³⁷ Wæætē Wængonguī, Nāni ōmæmōe, angā ēfēnte nē ōmæmongaingā īfōmō tōmengā baō nōmāadāmaī ingatimpa. ³⁸ Īnīnque onguīfæmīni botō tōnīfāmīni ēñēdāni. Itota pōnō cæcā beyænque mōnitō mīnitō īmīnite apænedinque, Wēnæ wēnæ mōnō cædō ante adinque Wængonguī pōnō fīmpo cæcā ate quēwēmōmpa, ante apænemōni ēñēmīnīpa. Mōitee wodi nānō wææ angaīnō ante ēfēnte beyænque mōnō īfōmō dicæ nō cæte quēwēmō īmongaa. ³⁹ Wæætē māningā onguīfængā īfōmō Itota īfōmō tōmengā nō pōni nānō entawēnō ante pōnongā ænte entawēmō beyænque mōnō nē pōnēmō tōmāmō wæætē Wængonguī ayongā edæ nō cæte quēwēmō īnōmō īmpo. ⁴⁰ Īnīnque Wængonguī beyæ nē apænegaināni īlmaī ante nāni apænegainō ante pōnēninge mīnitō īfōmō, Mōnitō īmōnite wīi bacæimpa, ante nāmā wææ aquēnē quēwēdāni. Īlmaī ante edæ āmotamīni ante bai yewæmongadānimpa.

⁴¹ ‘Mīnitō nē badete towēmīni inte cōwā aquēnē quēwēdāni.

Botō cæbo adinque mīnitō ancai guīfēnte wæcæmīnimpa.

Mīnitō ayæ mīmīni quēwēfōmīni edæ botō mā pōni cæcæboimpa, ante pōnēmīniyaa.

Wængonguī mānōmaī cæcæcāimpa, ante edonque pōni apænedāni bai mīnitō wæætē, Babæ ancædō, ante wæcæcædōmīnimpa.’

Ante nāni yewæmongaīnō ante adinque edæ badete todāmaī iedāni,” ante Pabodo apæncantapa.

⁴² Mānōmainō ante īnīnque apænedinque Pabodo tōnō Bedēnabee tōmēnāni

odōmōincōnē ongonde oncodō tao goyōnate Antioquiya īfōmō quēwēnāni īfōmō, Wacā guēmanguīōnæ bayonte mīnatō nōwoōnæ mīna apænedō bai godōmenque apænemīna ēfēncæmōnimpa, ānānitapa. ⁴³ Ayæ godongāmæ nāni ponte ongōnincabo tao goyōnāni oodeoidi pancadāniya ayæ oodeoidi bai nē bagaīnāni adobaī Wængonguī ingante guīfēnte quēwēnāni nangui īnāni īfōmō Pabodo tōnō Bedēnabee īnate edæ tee empote godāni. Adinque īfāna wæætē tōmēnāni īnānte apænedinque, Wængonguī waadete nānō pōnō cædōnō ante pōnēninge mīnitō cōwē fīmpo cædāmaī tæī ongōnīnque edæ waa quēwēdāni, ante nangui apænedatapa.

⁴⁴ Ayæ adoque Wængonguī itadē go ate tōmēnāni nāni guēmanguīōnæ bayonte māniīfōmō quēwēnāni wodo tōmānāni Wængonguī Awēnē nānō ānō ēfēncæte ante godongāmæ pōnānitapa. ⁴⁵ Nanguī īnāni mānōmaī pōnāni ate wædinque oodeoidi guiquēnē piinte badinque, Babæ ante ānewengampa, ante Pabodo ingante godō piinte tedewēnānitapa. ⁴⁶ Mānōmaī tedewēfōnānīte Pabodo tōnō Bedēnabee wæætē guīfēnedāmaī inte apænedatapa.

—Mīnitō oodeoidi īmīni inte edæ tāno ēfēncæmīnimpa, ante cædinque mōnatō Wængonguī nānō ānō ante edæ mā apænedinque mīnitō īmīnite tāno apænequēnēmōna intamōnāpa. Mīnitō īfāmpa mīni cōwē wænāmaī quēwenguīnō ante apæneyōmōna mīni apænte pangā wæquinque edæ Baa āmīnīpa. Ante wæmōna inte mōnatō nōwo ēmō cæte godinque edæ oodeoidi īnāmaī īnāni weca edæ apæneceæ gomōna tamēfēdāni. ⁴⁷ Mōnitō Awēnē īlmaī ante mōnatō īmōnate angacāimpa.

“Quēwencæmīnimpa, ante botō cægaīnō ante bitō inguipoga tōmāmæ māo apænedinque

Oodeoidi īnāmaī īnāni beyæ tica ēnente bai cæcæbiimpa,

ante cædinque botō bitō īmite da godōmo apæneceæ gocæbiimpa.”

Ante nē apænegaingā inte Wængonguī mōnatō īmōnate angā ēfēnte apænemōnāpa.

⁴⁸ Mānōmainō ante apæneda ēfēninque oodeoidi īnāmaī īnāni īfōmō, Awēnē nānō apænedō waa ēñēmōniya, ante watapæ apænedānitapa. Ayæ mōnō Awēnē doyedē apænedinque, Mānimpodāniye wede pōnēninque cōwē wædāmaī quēwenguīnāni incædānimpa, ante tōmengā nānō nē angaīnāniye nōwo pōnēnānitapa. ⁴⁹ Īnīnque mōnō Awēnē tōmengā nānō apænedō ante māo apæneyōnāni māniōmæ tōmāo quēwēnāni ēfēnānitapa.

⁵⁰ Oodeoidi guiquēnē, Pabodo tōnō Bedēnabee īnate mōnō wido cæcæimpa, ante

cædinque iīmaī cædānitapa. Onquiyænāni nāni nē waa adāni inte Wængongui ingante guifente quēwēnāni iñōnānite tōmēnāni tōnō onguīñænāni māniñōmō quēwēnāni awēnēidi bai inte ñænænāni iñōnānite oodeoidi, Badogaa, ante nangui ānāni ēñēnānitapa. Oodeoidi nangui ānāni ēñēnte cædinque mānināni wæætē Pabodo tōnō Bedēnabee inate togænte pāninque, Mōnitō ōmæ quēwēnāmai, ante wido cædāni godatapa. ⁵¹ Mānōmai cædāni godinque tōmēna iñōmō, Mānimæ nāwate awædō, ante bai cædinque piwacæ piwacæ cædinque Icōnio iñōmō gocæte ante wadæ godatapa. ⁵² Itota ingante nē tee empote quēwēnāni guiquēnē watapæ todāni badinque Wængongui Tæiyæ Waēmō Ōnōwoca ingante ænte ēwocadinque edæ waa quēwengadānimpa.

14

Pabodo tōnō Bedēnabee Icōnio iñōmō godapa

¹ Māniī godinque Icōnio nāni quēwēñōmō pōninque Pabodo tōnō Bedēnabee cōwē nāna cæi bai cædinque oodeoidi odōmōincōnē go guīdatapa. Go guite apæneyōna, Nō apæneda, ante pōnēninque oodeoidi tōnō oodeoidi ināmai ināni tōnō nangui ināni nāni wede pōnenginque ēñēnānitapa. ² Wæætē oodeoidi incæ pancadāniya nē Baa ānāni inte babæ wapiticæ apænedinque, Iñāna nē wēnæ wēnæ apæneda inate wīi ēñengæimpa. Ante tedewēnāni ēñēnte wædinque wadāni oodeoidi ināmai ināni wæætē piinte badinque mōnō tōniñada inate ante wīa adānitapa. ³ Incæte iñāna wantæpiyæ māniñōmō quēwēninque guīñēnedāmai inte mōnō Awēnē beyæ apænedatapa. Apæneyōna mōnō Awēnē incæ, Pabodo tōnō Bedēnabee iñōmō botō pōnō waadete cægainō ante nē nō apæneda iñōnapa, ante wadāni pōnencædānimpa, ante cædinque tōmēna tōnō godongāmæ cæcā ate tōmēna, Ate pōnencædānimpa, ante mā cædinque bamōnengæ cædatapa.

⁴ Mānōmai cæda incæte māniñōmō quēwēnāni pancadāniya, Oodeoidi bai pōnēmōnīpa, āñōnānite wadāni guiquēnē, Itota da godongā nē pōna bai pōnēmōnīpa, ante pancadāniya wadō pancadāniya wadō cædānitapa. ⁵ Iñinque oodeoidi tōnō oodeoidi ināmai ināni tōnō tōmēnāni awēnēidi tōnō godongāmæ pōnēninque, Pabodo tōnō Bedēnabee inate mōnō piinte cædinque dicaca tacamō wæncædaimpa. ⁶ Ante Ao ante cæyōnāni Pabodo tōnō Bedēnabee iñōmō, Mānōmai ante cædāniya, ante ēñēnte wædinque wodii wīnōnatapa. Wodii wīnōnte godinque Dicaōniabæ pōninque tōmēna Ditada nāni quēwēñōmō Dedebe nāni quēwēñōmō wayōmō wayōmō godinque,

⁷ mōnō Awēnē ingantedō ante watapæ māo godōmenque apæneda ēñēnōnānimpa.

Ditada iñōmō Pabodo ingante tacadāniya

⁸ Māniñōmō Ditada iñōmō edæ wacā cabæwaingā tōmēngā ōnōwa tipæwaa wēnæ wēnæ ēwacā ēñagaingā inte dao dao godāmaingā pægaingā inte tæ contate a ongongantapa. ⁹ A ongōñongā Pabodo ponte apænecā ēñēe congantapa. Pabodo wææmō adinque ōnōwēnenque pōnēninque, Iñgā nānō waa bawāquinque nē pōnēngā ingampa, ante do pōnente wædinque, ¹⁰ tōmēngā ingante ogæ tedete,

—Engæ gantidique adiyæ gongæmi āmopa.

Angā ēñēninque nē cabæwaingā incæ quingæ ængæ gantidique dao dao gocantapa. ¹¹ Māniñōmō ongōnāni guiquēnē Pabodo mānōmai cæcā ate wædinque dicaōniāidi tōmēnāni tededō yedæ āninque,

—Iñāna iñōmō wængonguīna incæ waoda bai bate mōnō weca wæænte ongōna abaimpa.

¹² Ante pōnente wædinque Bedēnabee ingantedō ante apænedinque, Mōnō wængongui Deoto ingānō anguēnē, ante Deoto pōnō pōmōninque, Iñgā wæætē nē apænecā ingampa, ante pōnēninque Pabodo ingante, Mōnō wængongui Edēme ingānō anguēnē, ante pemōnānitapa. ¹³ Ayæ tōmēnāni quēwēñōmō yæcado tōmēnāni wængongui Deoto oncō mænonte ongōnimpa. Deoto quī, ante nē godongā iñōmō edæ, Pabodo tōnō Bedēnabee nē wængonguīna inapa, ante wapiticæ pōnēninque, Mōnō wængonguīna quī, ante tōmānāni tōnō godoncæ cæcantapa. Mānōmaiñō ante cædinque tōmēngā nāni que cædi ongai ænte pōninque wagadaidi onguīñænāni inānite yabædemō ænte ponte wænoncæ cæcantapa. ¹⁴ Mānōmai cæcā ate wædinque nē ponte apæneda Bedēnabee tōnō Pabodo iñōmō, Wīwa cæminīpa, ante bai cædinque nāmā weocoo wānā ñænēninque pogodo mānō nangui ongōnāni weca tæcæguedē næ gongæninque,

¹⁵ —Iñānāni, quimæ quēwēmīni. Minitō waomīni iñinīpa, mōnatō mīnitō bai adobai waomōna iñōna apa quēwēmīni. Mōnatō iñæmpa watapæ mōna ēñēnō ante apænecæte ante pōniñōna inte mīnitō iñinīte iīmaī ante āmōnapa. Iñcoo mīni waa adincoo incæ edæ, Ōnoncooque impa, ante adinque mīnitō mānincooque wido cædinque Wængongui nē Quēwēngā gāmæñō pōedāni. Tōmēngā iñōmō ōnōnæ inguipoga gāwapæntibæ nē badongaingā inte ōnōædē quēwēnāni tōmānāni inguipoga quēwēnāni tōmānāni gāwapāa quēwēnāni tōmānāni inānite nē badongaingā Wængongui inongā ingampa. ¹⁶ Tōmēngā wēñēñedē tōmāmæ

quëwënnäni nämä pönëninque näni go-
quïnonque ee acä gogadänimpa. ¹⁷ Incæte
tömënnäni inänite wïl æmæwo ëmö cæte
gogacäimpa. Wæætë edæ, Wængonguï
æbänö ingää, ante ëñencädänimpa, ante
cædinque tömëngä ñimpo cædämaï cöwë
odömogacäimpa. Edæ mïnitö imïnite pönö
waadete cædinque Wængonguï cöönæ angä
inguipoga wææ ininque incadepo incadepo
cænguï eyepæ pönongä cæninque mïnitö
watapæ todinque quëwëmïnipa.

¹⁸ Mänömainö ante Pabodo tönö
Bedënabee wææ cæcæte ante apæneda
ëñënnäni incæte godongämæ ongönäni
guiquënë, Mïnatö wængonguïmïna qui,
ante cöwë pönoncæmönimpa, ante waw-
ique pönëninque cædänitapa. Wodo edæ
pönöñönänite inäna godömenque wææ äna
ëñëninque ñimpo cæte wïl pönönänitapa.

¹⁹ Ayæ ate oodeoidi Antioquiya inömo
quëwëninque Icönio inömo quëwëninque
pö Ditada inömo pöninque mäniñömö
godongämæ ongönäni inänite, Ina
onguïænäna inate mönö wïl ëñengæimpa,
ante ännäni. Ëñëninque godongämæ Ao
äninque Pabodo ingante dicaca tacadäni
wæyongä, Æmæwo wængampa, ante
pönëninque tömënnäni quëwëñömö yabæ
inö wëä mäo wido cædänitapa. ²⁰ Incæte
Itota ingante tee empote quëwënnäni
godongämæ ponte æænïmæ gongænte
ayönäni Pabodo yabæque æmæwo wænte
bai öñönïngä inte ængæ gantidinque adodö
tömënnäni quëwëñömö pongantapa. Ayæ
iimö ate tömëngä Bedënabee tönö wæætë
Dedebe näni quëwëñömö adodö gocæte ante
wadæ godatapa.

²¹ Godinque Dedebe inömo pöninque
Codito ingantedö ante watapæ apæneda
ëñëninque tömënnäni nanguï inäni Itota
mïñæ quëwënnäni bagadänimpa. Ininque
tömëna mäniñömö idæwaa apænete wadæ
godinque Ditada inömo adodö pö godinque
Icönio inömo adodö pö godinque Antio-
quiya näni quëwëñömö wæætë pönatapa.
²² Mänömaï wayömö wayömö godinque Itota
ingante nê tee empote quëwënnäni inänite
bee téninque Pabodo tönö Bedënabee nanguï
apæneda ëñëninque inäni godömenque
tæï piñænte entawënnäni badänitapa. Ayæ
tömënnäni inänite, Mïni pönëñö ante ñimpo
cædämaï inte godömenque wede pönëninque
tæï ongoncæmïnimpa, ante ædæmö
apæneda ëñënnänitapa. Ayæ waadete
apænëdinque, Mönö nanguï nantate
wædinque Wængonguï Awënë Odeye nempo
guicæimpa, ante apænëdatapa. ²³ Ayæ
wayömö wayömö tömäo godinque Itota
ingante godongämæ näni pönencabo weca
go guiite ongöninque Pabodo tönö Bedënabee
inömo iimäi cædatapa. Nê nö cædäni inänite

adinque tömëna, Itota Codito ingante mïni
godongämæ pönencabo inömïnite inäninque
edæ nê aadäni bacädänimpa, ante äna ate
mäniñäninque nê Picænäni näni äñönäni
badänitapa. Ayæ cænämaï inte Wængonguï
ingante apænete ate tömënnäni inänite
inäna, Mïnitö mönö Awënë ingante wede
pönëmïnitawoo. Tömëngä mïni nê pönëñongä
incæ mïnitö imïnite wææ aacæcäimpa, ante
apænëdatapa.

*Tidiabæ Antioquiya inömo ocæ ëmænte
godapa*

²⁴ Pabodo tönö Bedënabee ayæ Pitidi-
abæ wodo tebæ godinque Pampidiabæ
pönatapa. ²⁵ Mäniñömö ponte Pedegue
näni quëwëñömö mönö Awënë nänö
angainö ante apænëdinque Ataya näni
quëwëñömö wææ pönatapa. ²⁶ Mäniñömö
pöninque tömëna imæmäa Antioquiya
inömo adodö tacæte ante ñænæ wipodë
guidatapa. Doyedë inömo tömëna näna
mäniñömö quëwente tao goyedë wadäni
nê pönënnäni inte tömëna inate, Wængonguï
pönö waadete godongämæ cæcä ate mïnatö
eyepæ cæcæmïnainpa, ante da godongainäni
inönänimpa. Nöwo inömo tömënnäni näni
äninö do ñinque eyepæ cædäna inte tömëna
adoyömö näni da godiñömö ocæ ëmænte
pönatapa. ²⁷ Mäniñömö pöninque tömëna
Itota ingante godongämæ näni pönencabo
inänite äñete pönäni ate tömënnäni inänite
apænëdinque Wængonguï tömëna tönö
nänö cædinö ante adodö adodö tömänö
ante apænëdatapa. Oodeoidi inämaï inäni
wede pönëninque guicædänimpa, ante
Wængonguï odemö wi ænete bai cæcä
ate do pönente badänipa, ante apæneda
ëñënnänitapa. ²⁸ Ayæ mäniñömö Itota ingate
nê tee empote quëwënnäni tönö wantæpiyæ
quëwëngadäimpa.

15

*Eedotadë inömo pöninque wæætëdö
wæætë ännäni*

¹ Mäniñedë onguïænänäni Oodeabæ
quëwënnäni pancadäniya Antioquiya inömo
wææ pöninque nê pönënnäni inänite iimäi
ante odömönte wææ angadänimpa. Mïnitö
bagäamini inte Möitee wodi nänö wææ
angainö bai wïl cæmïni adinque Wængonguï
dicæ ængampa quëwënguïmïni. ² Ante wææ
änewënnäni ëñente wædinque Pabodo tönö
Bedënabee inömo, Quimæ änewëmïni, ante
näëmæ wææ änatapa. Ininque Antioquiya
inömo quëwënnäni guiquënë Pabodo tönö
Bedënabee tönö wadäni nê pönënnäni inänite,
Mïnitö Eedotadë godinque Itota nänö da
godongainäni tönö nê aadäni Picænäni
inänite bee téninque, Oodeabæ quëwënnäni
näni wææ äñönö ante æbänö cæquï, ante
ëñencæte ante äedäni.

³ Āninqe Itota Codito ingante godongāmæ nāni pōncabo incæ Pabodoidi inānite da godōnāni wadæ godānitapa. Ayæ godinque Pēnitiabæ wodo tebæ godinque mānimæ quēwēnāni inānite apænedinque godōmenque Tāmediabæ adobai wodo tebæ gote apænedinque, Wængongui pōnō cæcā ate oodeoidi ināmai ināni incæ mōnō Awēnē gāmæno do pōnānīpa, ante Pabodoidi apænedāni. Ēñēninque mōnō tōniñadāni mānimæ quēwēnāni incæ watapæ todānitapa.

⁴ Pabodoidi Eedotadēē iñōmō pōnāni adinque Codito ingante nāni godongāmæ pōncabo tōnō Itota nānō da godongaināni tōnō nē pōnēnāni inānite nē aadāni nē Picænāni tōnō godongāmæ ponte ongōninque Pabodoidi inānite, Waa pōmini amōnīpa. Ante āñōnānīte Pabodo tōnō Bedēnabee iñōmō, Wængongui iīmai mōnatō tōnō godongāmæ cæcampa, ante tōmānō ante adodō adodō apænedā ēñēnānitapa. ⁵ Māniñedē Paditeoidi incæ pancadāniya nē pōnēnāni badināni inte ængæ gantidinque iīmai ante apænedānitapa.

—Iñæmpa oodeoidi ināmai ināni inānite, Cōwē ēō togænguēnēmīni iiminīpa, ante mōnō wææ angæiīmpa. Ayæ Mōitee wodi, iīmai cædāni, ante nānō angainō ante ēñenguēnēmīni iiminīpa, ante mōnō cōwē angæiīmpa.

⁶ Ānāni ate Itota nānō da godongaināni tōnō nē pōnēnāni inānite nē aadāni Picænāni tōnō godongāmæ pōninque, Oodeoidi ināmai ināni inānite mōnō æbānō anguii, ante tedecōnānitapa. ⁷ Māniñō ante wæætedō wææte apænedāni adinque Pegodo guiquēnē ængæ gantidinque godongāmæ ongōnāni inānite iīmai ante apæncantapa.

—Botō mēmōidi, mīnitō iīmaiñō ante do ēñēmīnīpa. Wængongui do inōñedē, Oodeoidi ināmai ināni incæ Codito ingantedō ante watapæ ēñēninque edæ nē pōnēnāni bacædānīmpa, ante cædinque mōnō Imote apænte æninque botō Imote angā gote māniñō ante apænebo ēñēnānitapa. ⁸ Da godongā gote apæneyōmo Wængongui, Waocā æbānō mīmōno pōngæ ingāā, ante nē ēñēnongā inte edæ tōmengā Tæiyæ Wæmō Ōnōwoca ingante oodeoidi ināmai ināni inānite da pōnongā ænte ēwocadānīpa. Iñinque mōnō Imote pōnō cæcā bai tōmēnāni inānite adobai cædinque tōmengā edæ, Oodeoidi ināmai ināni inānite botō Ao ante do æmopa, ante odōmongā abaimpa. ⁹ Tōmēnāni wede nāni pōnēnō beyænque Wængongui tōmēnāni mīmō nā mēnongadinque, Oodeoidi ināmai ināni incæ mīnitō bai adobai ināni apa ānewēmīni, angampa. ¹⁰ Mōnō iñōmō mōnō mæmæidi tōnō teēmē mongænte bai wædinque edæ,

Mōitee wodi nānō wææ angainō ante mōnō ædō cæte ēñente cæquiī, ante godongāmæ wægāmōimpa. Nōwo guiquēnē Oodeoidi ināmai ināni incæ tæcæ pōnēñōnānīte mīnitō iñōmō teēmē cōnōncapænte bai cædinque tōmēnāni inānite, Cædāni, ante wææ āminīpa tōō. Mānōmai cædinque mīnitō, Wængongui ōnonque cæcampa, ante bai cæminīpa tōō. ¹¹ Iñæmpa mōnō Awēnē Itota pōnō waadete ængā beyænque tōmēnāni wænāmai inte quēwēnāni bai mōnō adobai māniñō beyænque wænāmai inte quēwēmōmpa, ante pōnēmōnīpa. Mānōmaiñō ante Pegodo iñque apæncā ēñēnānitapa.

¹² Ayæ Bedēnabee tōnō Pabodo wææte tōmēnāni inānite apænedā ēñēninque godongāmæ ongōnāni tōmānāni edæ tededāmai inte ēñē cōnānitapa. Tōmēna iñōmō, Wængongui mōnatō tōnō godongāmæ cædinque edæ, Mīnatō mā cæmīna adinque Oodeoidi ināmai ināni incæ pōncædānīmpa, ante cædinque bamōngæ wææte wææte cæcantapa, ante adodō adodō ante apænedatapa. ¹³ Iñque apænedā ate Tantiago wææte tōmangā apæncantapa.

—Botō biwiidi, botō nōwo apænebo ēñēdāni. ¹⁴ Wængongui tāno waadete pōnō cædinque oodeoidi ināmai ināni pancadāniya inānite apænte æninque, Botō quimīni bacæminīmpa, ante cæcantapa, ante Timōnō do apæncā ēñentamōmpa. ¹⁵ Ayæ Wængongui beyæ nē apænegaināni incæ, Iñcayæ ate Wængongui mānōmai cæcæcāimpa, ante pōnēninque adoyōmō ante iīmaiñō ante do yewæmongadānīmpa.

¹⁶ “Awēnē Dabii nempo nē quēwengaināni nāwæ godāni adinque botō iñōmō oncō wodintai wææte tæi mānōnte bai cædinque, iñcayæ ate adodō pōninque pōnō cæbo ate nāwæ gogaināni iñōmō Awēnē nempo adodō pōninque quēwencædānīmpa.

¹⁷ Mānōmai cæbo ate edæ wadāni tōmāmæ quēwēninque oodeoidi ināmai ināni incæ botō ēmōwo ante nē ēwocadāni inte nāwā Awēnē ingante ante diqui diqui minte acædānīmpa,

¹⁸ ante mōnō Awēnē iñōmō edæ māniñō ante nē cægaingā inongā inte, do cæcā nāni ēñengainō ante apæncampa.”

¹⁹ Ante yewæmongatimpa, ante Tantiago godōmenque apæncantapa. “Botō Wængongui nānō apænegainō ante pōnente wædinque, iīmai cæcæimpa, ante pōnēmōpa. Oodeoidi ināmai ināni, Idæwaa wapiticæ pōnente awædō, ante wædinque ocæ ēmænte nāwā Wængongui gāmæno pōñōnānīte mōnō edæ ee cædinque tōmēnāni taadō ganta cædedāmai ingæiīmpa. ²⁰ Ōnonque,

Tōmēnāni acædānīmpa, ante īīmaī ante yewæmongæīmpa, Wadāni, Wængongūīdi qui, ante cænguī nāni cōnōni cæñāmaī incæmīnīmpa. Ayæ nānōogængā īnāmaī īñongante godō mōnāmaī incæmīnīmpa. Ōōingā nē wērencate wæningā ate cæñāmaī incæmīnīmpa. Baō wepæ owemōingā ī adīnque cæñāmaī incæmīnīmpa, ante mōnō yewæmongæīmpa, āmpa. ²¹ Edæ doyedē pōnī oodeoidi nāni quēwēñōmō nāni quēwēñōmō tōmāā īñōmō māo Mōītee wodi nānō wææ angaīnō ante apænedāni ēñegadānīmpa. Ayæ nōwo ganca adobainō ante guēmangūōnæ īñō guēmangūōnæ īñō mōnō odōmōincōnē go guīite apænedāni ēñente mānōmaīnō ante ēñente cæquēñēnāni īnānīpa. Mānīnonque ante mōnō yewæmongæīmpa, āmpa,” ante Tantiago īnque apænecantapa.

Oodeoidi īnāmaī īnāni acædānīmpa, ante yewæmōnānīpa

²² Mānōmaīnō ante apænecā ēñēnīnque Itota nānō da godongānīnō tōnō nē aadāni Picæñāni tōnō Itota Codito īngante godongāmæ nāni pōnencabo tōmancabo tōnō godongāmæ pōnēnīnque, Mōnō cabo incæ mēnaa īnate apænte ænīnque tōmēna īnate, Mīnatō Pabodo tōnō Bedēnabee mīñæ Antioquiya goeda, āmō gocædānīmpa. Ante Ao ānīnque tōmēnāni, Mōnō pōnencabo īñōmonte Codaa Badatabato mōnō ānongā tōnō Tidato īñōmō nē āna īnāpa, ante adīnque tōmēna īnate apænte æñānīta. ²³ Ayæ, Cadota ante ænte gocædānīmpa, ante īīmaī ante yewæmongadānīmpa.

Mōnitō pancamōniya Itota nānō da godongāimōni īñōmōni pancamōniya nē pōnēnāni īnānīte nē aamōni Picæmōni īmōnīpa. Mānōmaī īmōni īnte mōnitō mīnitō tōnīñānī mōnīpa. Mīnitō oodeoidi īnāmaī īmīni īnte Antioquiya īñōmō Tidīabæ īñōmō Tidītibæ īñōmō quēwēnīnque mīni pōnencabo mīni pōnencabo īñōmīnīte mōnitō, Waa quēwēncæmīnīmpa, āmōnīpa.

²⁴ Īīmaī ante tēdedāni ēñentamōnīpa. Mōnitō, Goedāni, ānāmaī īñōmōni wadāni mōni cabo incæ pancadāniya wadæ gote mīnitō weca pōnīnque mīnitō īmīnīte, Eō togædāni, ante wææ ānāni. Eñēnīnque mīnitō tōmēnāni nāni wææ ānīnō beyænque teēmē mongænte baī, Eñānō cæquīī, ante wæmīnīpa, ante tēdedāni ēñēmōnīpa. ²⁵ Mānōmaīnō ante tēdedāni ēñente wædīnque mōnitō godongāmæ pōnēnīnque onguīñæna mēnaa īnate apænte ænīnque tōmēna īnate īīmaī antamōnīpa. Mīnatō Bedēnabee tōnō Pabodo mōnō nē waadedā tōnō godongāmæ godīnque oodeoidi īnāmaī īnāni weca goeda, ante cætamōnīpa. ²⁶ Bedēnabee tōnō

Pabodo īñōmō mōnō Awēnē Itota Codito ēmōwo beyænque cædīnque nāna nāmā wodo wængūīnque cædatapa. ²⁷ Īnīnque, Īī cadota mōni yewæmōnō nāwāngā īmpa, ante adodō ante apænecædānīmpa, ante cædīnque mōnitō Codaa tōnō Tidato īnate da godōmōni godīnque mīnitō weca pōna aedāni. ²⁸ Edæ, mōnitō Wængongūī Tæyīæ Waēmō Ōñōwoca tōnō godongāmæ pōnēnīnque, Mīnitō godōmēnque teēmē mongæñāmaī incæmīnīmpa, antamōnīpa. Īnīnque, Mīnitō īīmaī cædīnque idæwaa, ante pōnēmōnīpa.

²⁹ Wadāni, Wængongūīdi qui, ante cænguī nāni cōnōnīncoo ante cæñāmaī gomō aedāni. Wepæ owemōingā adīnque ōōingā nē wērencate wæningā adīnque cæñāmaī īedāni. Ayæ nānōogængā īnāmaī īñongante godō mōnāmaī īedāni. Mīnitō mānīnque ante ee ate cædāmaī īmīni īnīnque waa quēwēmaīmīnīpa. Mānīnque ante yewæmōmōnīpa.

³⁰ Ante yewæmonte pædæ pōnōnāni ænte wadæ godīnque Antioquiya īñōmō wædīnque nē pōnēnāni īnānīte āñete godongāmæ pōnāni ate Eedotadēē quēwente pōnāni tōmēnāni nāni yewæmōnīnta pædæ pōnōnāni ænte adānīta. ³¹ Eedotadēē quēwēnāni, Mīnitō godōmēnque teēmē mongæñāmaī incæmīnīmpa, ante nāni yewæmonte ānīnō adīnque oodeoidi īnāmaī īnāni īñōmō wampo pōnīnque todānīta. ³² Codaa tōnō Tidato īñōmō Wængongūī beyæ nē apænedā īnte adobāi, Tæī pīñænte entwæncæmīnīmpa, ante cædīnque ædæmō apænedā ēñēnīnque tōmēnāni nāni pōnencabo mīmōnē ganca batawente wede pōnēnānīta. ³³ Īnīnque tæñōnæ quēwēna ate mānīñōmō quēwēnāni nāni pōnencabo wæætē tōmēna īnate waa apænedīnque, Nōwo gānē pōnēnīnque waa goeda, ante tōmēna īnate nē da pōnōnāni weca wæætē adodō da godōnāni godatapa. ³⁴ Tidato guīquēnē, Īñōmō ongoncæboīmpa, ante ayæ ongantapa. ³⁵ Pabodo tōnō Bedēnabee guīquēnē Antioquiya īñōmō ayæ quēwēnīnque wadāni nangūī īnāni tōnō godongāmæ odōmōnīnque Wængongūī nānō ānō ante watapæ apænedā ēñegadānīmpa.

Pabodo īngante wæætē da godōnāni gocampa

³⁶ Īncayæ ate Bedēnabee īngante Pabodo, —Wēēñēfēdē Wængongūī nānō ānō ante mōna gote apænedīñōmō wæætē adoyōmō gote mōnatō tōnīñādāni weca gote ēñādīnque, Eñānō quēwēnāni, ante acæmōnānīmpa.

³⁷ Āñongā Bedēnabee Ao angantapa. Ayæ tōmengā, Wāō Māadoco nāni ānongā īngante mōnatō tōnō godongāmæ gocæcāīmpa, ante cæcantapa. ³⁸ Pabodo guīquēnē,

Īnæmpa wēnēñedē Pampidiabæ īñōmō pōñōmōnate ĩngā Māadoco īñōmō mōnatō tōnō godōmenque cædāmaī inte edæ wadæ gocantapa, ānīnque, Nōwo wīl ænte gocæimpa, ante Baa angantapa. ³⁹ Īnīnque tōmēna wæætēdō wæætē ānīnque tōmēna wadō wadō gote panguimæ godatapa. Bedēnabee guiquēnē Māadoco ingante ænte ñænæ gāwapāa gote wipodē ñænæmpodē guite wogaa godinque wāā tēiwænē Tipidebæ tao gocantapa. ⁴⁰ Pabodo guiquēnē Tidato ingante apænte ænte gocæ cæyongante tōmēnāni nāni pōnencabo īñōmō tōmēna inate apænedinque, Wængonguī minatō beyæ pōnō waadete cæcæcāimpa, ānāni ēñēnīnque wadæ godatapa. ⁴¹ Ayæ Tidiabæ tōmāo godinque Tiditiabæ tōmāo godinque Pabodo īñōmō Codito ingante nāni godongāmæ pōnencabo ĩnānīte apænecā ēñēnīnque tōmēnāni wede pōnēnīnque tæī piñænte batawengadānīmpa.

16

Pabodo tōnō Tidato miñæ Tīmoteo go-campa

¹ Mānīi godinque Pabodo Dedebe īñōmō ponganque go Ditada īñōmō pongantapa. Itota ingante tee empote nē gocā Tīmoteo mānīñōmō quēwengacāimpa. Tōmēngā wāānā oodea ĩnōna incæ nē ædæmō cæte pōnēnā ĩnōnāimpa. Tīmoteo mæmpo wæætē guidiego ĩnogāimpa. ² Tīmoteo īñōmō Itota ingante pōnente quēwēngā adinque nē pōnēnāni Ditada īñōmō quēwēnāni incæ ĩcōnio īñōmō quēwēnāni incæ, Tīmoteo nē waa quēwēnongā ingampa, ante adoyōmō apænedānitapa. ³ Īnīnque Pabodo, Botō tōnō Tīmoteo guēa gocæcāimpa, angantapa. Wæætē, Oodeoidi mānīmæ quēwēnāni tōmānāni, Tīmoteo mæmpo guidiego ingampa, ante do ēñēnāni inte piñāni wæcæ wæ. Ānīnque Pabodo angā yæcadogæ ēō togæñāni ate Tīmoteo ingante ænte gocantapa. ⁴ Godinque Pabodoidi wayōmō nāni quēwēñōmō wayōmō nāni quēwēñōmō godinque ĩmaī ante apænedānitapa. Mīnitō oodeoidi ĩnāmaī ĩmīni inte æbānō ēñente cæte quēwēnguimīnīi, ante Eedotadēē īñōmō nē aadāni Picæñāni tōnō Itota nānō da godongānāni tōnō godongāmæ pōnēnīnque do ānānīpa. Ante apænedinque Pabodoidi wæætē tōmēnāni nāni ānīnō ante adodō ante apænedāni ēñēnānitapa. ⁵ Mānōmaī apænedāni ēñente wædinque Codito ingante nāni godongāmæ pōnencabo īñōmō wayōmō nāni cabo wayōmō nāni cabo tōmānāni wede pōnēnīnque edæ tæī piñænte badinque ĩmō ĩñō godōmenque ĩmō ĩñō godōmenque nanguū yebænte bagadānīmpa.

Māatedōniabæ quēwēngā ingante Pabodo wīlmonte acā

⁶ Pabodoidi Atiabæ gocæ cæyōnānīte Wængonguī Tæiyæ Waēmō Ōnōwoca ĩmaī ante apænecantapa. Mīnitō botō ānō ante mānīmæ apænecæ godāmaī incæmīnīmpa, ante wææ angā ēñente wædinque tōmēnāni wæætē Gadatiabæ incæ pancabaa Pidiquiabæ tōmāo cægōnīnque godānitapa. ⁷ Mānīmæ cægōnaque go Mīitiyabæ ganca pōnīnque Bitiniabæ gocæ cæyōnānīte Itota Tæiyæ Waēmō Ōnōwoca incæ, Godāmaī, Baa angā wædinque tōmēnāni mānīñōmō ĩmpo cæte godōmenque godāmaī ĩnānitapa. ⁸ Mānōmaī beyæ tōmēnāni Mīitiyabæ wodo pænta go Todoa īñōmō wæi godānitapa.

⁹ Mānīñōmō wæi gote ongōnīnque woy-owotæ ba ate Pabodo wīlmonte baī ayongā Māatedōniabæ onguīñængā a ongōnīnque tōmēngā ingante ĩmaī ante apænecantapa. “Māatedōniabæ pōnīnque bitō mōnitō ĩmōnīte pōnō cæquīmi āmōnīpa,” ante Pabodo ingante angā ēñengantapa. ¹⁰ Īnīnque Pabodo, Mānōmaī wīlmonte baī atabopa, ante apænecā ēñente wædinque mōnitō wæætē, Mīnitō Māatedōniabæ gote māo apænemīni ēñæcædānīmpa, ante Wængonguī incæ cæbaingampa. Ante pōnente wædinque botō Odocabo tōnō wadāni Pabodo tōnō nē godongāmæ cædāni tōnō wæætē, Mōnō mānīñōmō gote Codito ingantedō ante watapæ apænecæimpa, ante pōnēnīnque gocæte ante cætamōnīpa.

Pabodo tōnō Tidato Pidipoto īñōmō ponte cædapa

¹¹ Mānōmainō ante pōnēmōni inte mōnitō Todoa īñōmō gāwapæ wedeca quēwēnīnque ñænæ wipodē guite wogaa tao godinque wāā tēiwænē Tāmotate tōingā gote mōnīnque ĩmō ate tao Nēapodi pontamōnīpa. ¹² Mānīñōmō pō ti wææñīnque taadonque godinque mōnitō Pidipoto odōmānoidi nāni ponte quēwēñōmō adoyōmō pōnīnque tæñōnæ quēwentamōnīpa. Māatedōniabæ incæ pancabaa quēwēnāni nāni yæcado quēwēñōmō Pidipoto ĩmpa. ¹³ Mōnitō mānīñōmō ponte quēwēnīnque guēmanguōnæ ĩnque bayonte tōmēnāni nāni quēwēñōmō yabædemō tao godinque, Ōnō wedeca Wængonguī ingante godongāmæ apænebānānīpa, ante ōnōwēnēnque pōnēnīnque mānīñōmō gotamōnīpa. Mānīñōmō ponte ayōmōni onquiyæñāni do godongāmæ ponte a ongōnāni adinque mōnitō tæ contadinque tōmēnāni ĩnānīte apænetamōnīpa. ¹⁴ Mānīñōmō nē ēñēnāni tōnō adodanque tōmēnā ēmōwo Didia īñōmō Tiatida quēwēnōnā inte weocoo awēnēidi nāni opatawæ ēmoncoo godonte ænte quēwēnōnāimpa. Tōmēnā Wængonguī ingante nē waa ate pōnēnā

īnonāimpa. Īnīnque Pabodo apæneceā ēamonca ongonte ēñēñōnante mōnō Awēnē tōmēnā mīmō wi ænete bai cæcā ate tōmēnā wede pōnēnantapa. ¹⁵ Īnīnque tōmēnā nāni owocabo pōnēnīnque godongāmæ æpænē guīdāni ate tōmēnā ĩñōmō mōnitō ĩmōnite apænedantapa.

—Botō ĩmote ante adīnque mīnitō, Mōnō Awēnē ingante Didia ædæmō cæte pōnengā ingampa, ante pōnēmīnitawoo. Mānōmāīnō ante pōnēmīni inte mīnitō botō oncōnē ponte owoedāni, āmopa.

Ante ancaa apænedā ēñente wædīnque mōnitō Ao ante gote owotāmōnīpa.

¹⁶ Māniñfēdē wacā onquīyængā obe badā ĩnongā inte wadāni nempo quēwēnīnque tōmēnāni beyænque nē cæte quēwēngā ĩnongāimpa. Tōmengā ĩñōmō nē cæwēnengā inte wadāni ĩnānite, ĩncayæ ate æbānō baquī, ante yewænte tedecā ĩnongāimpa. Tedecā ēñēnīnque nē ēñēnāni wæætē tōmēnāni nāni godonte æīnta bacoo pædæ pōnō pædæ pōnō cædāni ĩncæte tōmengā awēnēdi wæætē ō æ ō æ cædōnānīmpa. Īnīnque māniñfōmō quēwēnīnque mōnitō ayæ ate Wængonguī ingante nāni apæneñfōmō adodō gocæ cæyōmōnite māningā onquīyængā māmō bee tengantapa. ¹⁷ Mānōmāī bee tēnīnque tōmengā mōnitō Pabodo tōnō mōni gocabo ĩñōmōnite tee empo tee empo pōnīnque yedæ angantapa.

—Īnāni Wængonguī Æibæ pōni Quēwēngā ingante nē cædāni inte mīnitō ĩmīnite apænedīnque, Æcānō ængā beyænque quēwēngūī, ante apænedānīpa.

¹⁸ Ānīnque tæñōnæ ĩñonte tōmengā tōmēnāni ĩnānite tee empote godīnque Yæ yæ ānewengā ēñente wædīnque Pabodo, Ancaa ēñente awædō, ante dadi ēmænte wēnæ ingante ānīnque,

—Bitō ĩmite botō Itota Codito ēmōwo apænedīnque, Tao gobāwe, āmopa.

Ante tæcæ apæneyongā wēnæ ĩncæ baquecā ingante ēmō cæte tao gocantapa.

¹⁹ Pabodo mānōmāī angā ate tao go ate wædīnque onquīyængā awēnēdi guīquēnē, Æ tōmengā yewængā beyæ mōnō æīncædō ĩncæ dæ gotīmpa. Nōwo æbānō cæte nangūī ængūīmōō. Ante pīnte wædīnque tōmēnāni, Mōnō tōmēna ĩnate odōmāno awēnēdi weca ænte gocæīmpa, ante Pabodo tōnō Tidato ĩnate bæi ongonte wēā māo tōmēnāni nāni godonte æñfōmō ænte godānīpa. ²⁰ Ayæ odōmāno awēnēna tōmēnāni quēwēñfōmō nē apænte āna ĩñōnate nē pīnte cædāni māniina awēnēna weca Pabododa ĩnate ænte māmō gō cædīnque,

—Īina ĩñōmō edæ oodeoda ĩnōna inte mōnitō quēwēñfōmō ponte wēnæ wēnæ apænedā ēñēnīnque tōmānāni ængūī badīnque Yæ yæ ānānīpa. ²¹ Mōnō odōmānocabo

mōnō wīī cæquēnēnō ante odōmōnte apænedīnque tōmēna ĩñōmō, Māniñonque cæedāni, ante ancaa ānewēnāpa.

²² Ante tæcæ apæneyōnāni godongāmæ ongōnāni ĩñacabo cædīnque Pabodo tōnō Tidato ĩnate pīnte cædānīpa. Ayæ odōmāno awēnēna ĩñōmō, Tōmēna weocoo gā tadongate tæi tæi pædāni. ²³ Āna ēñente tæi tæi pānāni wæyōnate awēnēna godōmenque āna ēñente cædīnque tōmēna ĩnate bæi ongonte māo tee mōnedīnque tee mōneīncō nē aacā ingante, Īina ĩnate bitō ædæmō wææ ae, ānatapa. ²⁴ Īnīnque mānōmāī ānāni ēñente wædīnque nē wææ wānongā wæætē Pabodo tōnō Tidato ĩnate guīmōngacōnē mangūicā guīdatapa. Ayæ godōmenque tōmēna ōnōwa awæmpaa goti guīdōwate tæi tee mōneceā ongōñōna wadæ taocantapa.

²⁵ Ayaōnæñēna bayō Pabodo tōnō Tidato mānōmāī goti guīdōwate wægōnīnque Wængonguī ingante apænedīnque āmotāmīni ānecōñōnate wadāni nē tee mōnete ongōnāni ēñē cōnānīpa.

²⁶ ĩñontobæ goīnque nangūī ocæ ocæ pōnīnque tee mōneīncō tæñōnīnca ĩncæ wanæcæ wanæcæ cæyō odemō tōmānēmō wi æmænete gotapa. Ayæ tōmānāni ĩnānite nāni tæi pōni yaēmengō nāni nāni næñīmē ĩncæ nīmæncæ nīmæncæ wææntapa. ²⁷ Tee mōneīncō nē aacā guīquēnē ĩñontobæ nāni ōmæmōnte ayongā, Odemō dobæ wi æmænete gotīmpa, ante wædīnque tōmengā, Æ tee mōnete ongōnīnāni dobæ tao wodīi wīnōnānīpa, ante pōnente wædīnque, Botō awēnēdi pīnte pānāni wængūī wæ, ante pōnēnīnque nāmā wænonnte wæncæte ante yaēmē o togænte ængā. ²⁸ Ate wædīnque Pabodo ĩñontobæ ogæ tededīnque,

—Nāmā wēnæ wēnæ cædamāī. Ee ae. Tōmāmōni ayæ ongōmōni apa quēwē.

²⁹ Angā ēñēnīnque nē wææ wānongā ĩñōmō edæ, Tīca wodōnoī ænte pōdāni, angā ænte pōnāni ænīnque tōmengā pogodo pōnīnque ancaī guīñente wædīnque do do wāate wædīnque Pabodo tōnō Tidato ōnōwa ĩnō wæængantapa. ³⁰ Ayæ ængæ gantīdīnque edæ tōmēna ĩnate oncodo ænte māocā tayōnate,

—Mīnatō nē āmīna inte apænemīna ēñēmoeda. Botō æbānō cæte quēwēngūīmoo, ante wæcā.

³¹ Ēñēnīnque tōmēna wæætē,

—Awēnē Itota ingante edæ wede pōnēmi ate tōmengā ængā beyænque quēwēncæbīmpa. Mīni owocabo tōmāmīni adobaī wede pōnente quēwēncæmīnīmpa, ānatapa.

³² Ānīnque tōmēna nē wææ wānongā ingante godōmenque Wængonguī Awēnē nānō apænegāīnō ante apænedīnque tōmengā oncōnē nāni owocabo tōmānāni

inānite apænedā eññēnāitapa. ³³ Ayæ woyowotæ incæ tōmēna inate æninque nē wææ wānongā iñōmō tōmēna inate tæi tæi pānāni nāna æbāate wæðinōmō ñā mēnongacantapa. Ayæ tōmengā nāni wencabo do æpænē guiidānitapa. ³⁴ Ayæ tōmengā oncōnē ænte mængā ææ guiyōna tōmēna inate cænguī godongā cænatapa. Ayæ tōmengā nāni wencabo nē Wængonguī ingante pōnēnāni badināni inte watapæ todānitapa.

³⁵ Baānæ ate odōmāno awēnēna guiquēnē poditiyaidi inānite nē wææ wānongā weca da godōninque, Pabodo tōnō Tidato inate ñimpo cæbi gocædaimpa, āmīni eññēngæda, angā eññēninque godānitapa. ³⁶ Ponte odōmāno awēnēna ēmōwo ante apænedāni eññēninque nē wææ wānongā wæætē Pabodo ingante apænedinque,

—Poditiyaidi ñōwo ponte apænedinque, Pabodo tōnō Tidato inate ñimpo cæbi gocædaimpa, ante odōmāno awēnēna ānāpa, ante apænedānīpa. Ininque mīnatō ñōwo taote godinque piyæñē cæte ee goeda.

³⁷ Angā eññēninque Pabodo wæætē poditiyaidi inānite apænedinque,

—Mōnatō odōmānomōna imōna incæte nē apænte āna weca apænedāmaī iñōmōnate tōmēna āna tōmānāni ayōnāni edæ mōnatō imōnate tæi tæi pāninque tee mōnedānitapa tōō. Tee mōnedāni wæyōmōna ñōwo wæætē mōnatō imōnate awēmō wido cæcæte ante cædānīpa tōō. Mōnatō iñāmpa edæ Baa āmōnāpa. Awēnēna incæ iñōmō pōninque mōnatō imōnate ænte māoda gocæmōnāmpa.

³⁸ Mānōmainō ante apæneçā eññēnte wædinque poditiyaidi tōmēnāni awēnēna weca adodō godinque Pabodo nānō apænedō ante adodō ante apænedānitapa. Ayæ, Pabodo tōnō Tidato odōmānoda ināpa, ante apænedāni eññēninque odōmāno awēnēna guiquēnē guīñēnte wædatapa. ³⁹ Ayæ guīñēnte wædinque awēnēna incæ Pabodo tōnō Tidato weca ponte waadete apænedinque, Mōnatō oda cæðinō ante mīnatō odōmānomīna imīna inte pīinte ānāmaī ieda, ante āninque Pabodo tōnō Tidato inate ænte māoda taoda adinque tōmēna inate, Nōwo mōnitō quēwēñōmō ēmō cæte wadæ goeda, āmōnāpa. ⁴⁰ Āna eññēnte taodinque onquiyæñā Didia oncōnē go guiidinque Pabodo tōnō Tidato iñōmō, Nē pōnēnāni wampo pōnēninque tæi ongoncædānīpa, ante cæðinque ædæmō apænedinque wadæ gogadāimpa.

17

Tetadōnica iñōmō quēwēnāni Yæ yæ ānānīpa

¹ Mānū godinque Pabodo tōnō Tidato Ampipodi nāni quēwēñōmō wodo tebæ

godaque go Apodōnia nāni quēwēñōmō wodo tebæ godaque go Tetadōnica nāni quēwēñōmō pōnatapa. Māniñōmō oodeoidi Wængonguī apæneçā nāni eññēnte yewæmongainta ate odōmōincō nāni mænongaincō mæ ongō. ² Adinque Pabodo cōwē nānō cæi bai cæðinque guēmanguiōnæ bayō guēmanguiōnæ bayō mēōnaa go

adoōnæque iñonte tōmēnāni odōmōincōnē go guiidinque edæ Wængonguī angā eññēnte nāni yewæmongaintaa ate adinque tōmēnāni inānite, Iīmāi impa quēwēmīni, ante nō apæneçantapa. ³ Tōmēnāni inānite edonque apænedinque Pabodo, Wængonguī beyæ nē apænegaināni iīmāi ante do yewæmongadānīmpa, angantapa. Mōnō Codito iñcayæ ate pōninque cōwē caate wæquēñengā ingampa. Ayæ adocā wæente ate cōwē nāni omæmōnte quēwenguēngā ingampa, ante yewæmongadānīmpa, ante Pabodo apæneçantapa. Ayæ godōmenque apænedinque,

—Itota botō nē ānongā incæ adocā mōnō Codito inongā ingampa, ante apæneçantapa.

⁴ Mānōmaī apæneçā eññēninque oodeoidi pancadāniya, Nō impa, ante pōnēninque Pabodo tōnō Tidato miñæ godānitapa. Ayæ guidiegoidi nanguī ināni Wængonguī ingante nē guīñēnāni inte adobaī pōnēninque tōmēna miñæ godānitapa. Ayæ awēñēdi bai ināni onquiyæñāni incæ nanguī ināni adobaī pōnēninque tōmēna miñæ godānitapa. ⁵ Mānōmaī pōnēnānīpa, ante wædinque oodeoidi guiquēnē pīinte wædinque iīmāi cæðānitapa. Tōmēnāni nāni godonte æiññōmō gote ayōnāni nē wīwa cæðāni ongōnāni adinque tōmēnāni inānite ānāni Ao ante godongāmæ pōninque oodeoidi tōnō iñacabo cæðinque Yæ yæ ante pīinānitapa. Mānōmaī yedæ ānāni eññēnte wædinque māniñōmō quēwēnāni tōmānāni godongāmæ pīinte badinque Yæ yæ ānānitapa. Oodeoidi iñōmō, Mōnō Yatōnō oncōnē guiidinque Pabodo tōnō Tidato inate da tadōninque nē pīinte cæðāni inānite da godōmō æncædānīmpa, ante cæðinque diqui diqui mincæte ante tee gāwade guiidānitapa. ⁶ Wāānē guiidinque tōmēna inate adāmaī ināni inte oodeoidi wæætē oncō nē ēaçā Yatōnō ingante yao ongōninque wadāni nē pōnēnāni inānite yao ongōnte wēā tadō māo tōmēnāni nāni quēwēñōmō awēñēdi weca ænte godānitapa. Ayæ, ogæ tededinque,

—Iīna onguīñæna iñōmō tōmāmæ quēwēnāni inānite wapiticæ nē apænedāni inte ñōwo wæætē iñōmō pōna tamēnedāni.

⁷ Ayæ Yatōnō guiquēnē, Botō oncōnē pōeda, ante manguicā guiidatapa. Iñāni tōmānāni edæ odōmāno tæiyæ awēñē Tetædo nānō ānīnō ante Baa āninque wacā Itota nāni

ānongā ingantedō ante, Tōmengā nē Awēnē Odeye ingampa, ante ānewēnānīpā cæmīnī.

⁸ Ante pīnānī ēñente wædīnque godongāmæ ongōnānī tōnō awēnēidi adobaī pīnīnque, Quīnō cæquīl, ante wædīnque Yæ yæ ānānitapa. ⁹ Īnīnque Yatōnōidi Īnānīte ānīnque awēnēidi, Mīnītō nōwo mānīmpota pōnōmīnī ænte māñōmōnī mīnītō wēnæ wēnæ cædāmaī ĩmīnī adīnque mōnītō ĩncayæ ate wæætē adodō pōnōmōnī æmāimīnīpā, ante tōmēnānī godonte æinta ānānī pædæ godōnānī ænīnque nīmpo cædānī abæ tawænte gogadānīmpā.

Bedeā ĩñōmō quēwēnānī ēñente pōnēnānīpā

¹⁰ Ayæ tæcæ wēmō bayonte nē pōnēnānī wæætē Pabodo tōnō Tidato ĩnate, Bedeā ĩñōmō goeda, ante da godōnānī godatapa. Māñīñōmō gote pōnīnque tōmēna oodeoidi odōmōncōnē go guīdatapa. ¹¹ Māñī Tetadōnīcā ĩñōmō quēwēnānī nē pīnte cædānī ĩñōnānīte bedēaidi guīquēnē pīnāmaī ĩnānī inte mōnō Awēnē nānō apænedō ante do ēñēnānīpā. Ayæ ēñēnīnque, Wængonguī angā ēñente nānī yewæmongaīnō baī Pabodo nō apænecantawo, ante pōnente wædīnque bedēaidi ĩñōmō, Wængonguī æbānō angā ēñente yewæmongadānī, ante ēñencæte ante ĩmō ĩñō ĩmō ĩñō mānīnta ænīnque cōwā adānitapa. ¹² Māñōmaī cædīnque oodeoidi tæiyæñānī wede pōnēnānī badānitapa. Ayæ guīdiegoidi awēnēidi baī ĩnānī onquīyæñānī incæ nanguī ĩnānī pōñēñōnānī guīdiegoidi onguīñæñānī adobaī tæiyæñānī nē wede pōnēnānī badānitapa.

¹³ Incæte wadānī Tetadōnīcā ĩñōmō godīnque oodeoidi ĩnānīte apænedīnque, Pabodo nōwo Bedeā godīnque māñīñōmō quēwēnānī ĩnānīte apænecā ēñēnānīpā, ante tededānī. Ēñēnīnque oodeoidi wæætē Bedeā ĩñōmō pōnīnque, Pabodo wīwa apænecā apa ēñencæ quēwēmīnī, ānīnque wapīticæ tededānī ēñēnīnque godongāmæ ongōnānī guīquēnē ænguī badānitapa. ¹⁴ Māñōmaī ænguī badānī adīnque nē nānī pōnencabo ĩñōmō Pabodo ingante æpæ yæwedeca do ænte māodānī godīnque tōmengā wīpodē ñæñæmpodē go guīdīnque godōmenque wogaa goyongante Tidato tōnō Tīmoteo wæætē Bedeā ĩñōmō ayæ ongōnatapa. ¹⁵ Pabodo tōnō godongāmæ godānī ĩñōmō Atēna ganca māodānī gocā ate tōmengā wæætē, Mīnītō adodō Bedeā ĩñōmō godīnque Tidato tōnō Tīmoteo ĩnate apænedīnque tōmēna eyepæ inte ate botō weca quīngæ āmīnī pōnæ, angā ēñēnīnque tōmēnānī adodō Bedeā ĩñōmō godīnque Pabodo nānō ānīnō baī ĩñāna ĩnate apænedānitapa.

Atēna ĩñōmō Pabodo apænecā ēñēnānīpā

¹⁶ Māñōmaīnō ante ānīngā inte Pabodo tōmēna nāna ponguīnō ante ee ongongantapa. Ee ongōnīnque ayongā māñīñōmō quēwēnānī, Wængonguīdī ĩnānīpā, ante badonte nānī cō cægaīnca bacoo mæ ongō ate wædīnque Pabodo wæwēwocate quēwēngantapa. ¹⁷ Māñōmaī beyæ oodeoidi odōmōncōnē go guīdīnque oodeoidi ĩnānīte apænedīnque ayæ guīdiegoidi incæ Wængonguī ingante nē guīñēnānī ĩnānīte apænedīnque Pabodo, Māñōmaī ĩmpā. Apænebo ēñēmāimīnīpā, ante apænecantapa. Ayæ tōmēnānī nānī godonte æñīñōmō adobaī ĩmō ĩñō ĩñō ĩñō godīnque māñīñōmō ponte ongōnānī ĩnānīte adobaī nō apænecā ēñēnānīpā. ¹⁸ Māñōmaī cæyongā wadānī Epicodeoidi, Mōnō tote quēwēngæĭmpā, ante nē ānewēnānī nānī cabo tōnō wadānī Etoicoidi, Waa ĩmō incæ caate wæmō incæ mōnō piyæñē cæte quēwēngæĭmpā, ante nē quēwēnānī nānī cabo tōnō tōmānānī adoyōmō ponte bee tēnīnque Pabodo ingante wæætēdō wæætē ānānitapa.

Pabodo ĩñōmō Itota ěmōwo ante apænecā beyæ ayæ Itota nānō ñānī òmæmongaīnō ante apænecā beyæ Epicodeoidi nānī cabo tōnō Etoicoidi nānī cabo tōnō pancadānīya guīquēnē,

—Īngā ĩñōmō ònonque ante tedewēnongā inte æbāmē ante tedewēngā.

Ante wæyōnānī adodānī incæ pancadānīya guīquēnē,

—Tōmengā wabānō, Wabæca wængonguīdī ĩnānīte pōnencæmīnīpā, ante cæcā ĩmaingampa, ante wædānitapa.

¹⁹ Īnīnque Pabodo ingante bæi ongonte tōō æmænte ænte godīnque tōmēnānī Adeopagoidi nānī ānōnānī nānī godongāmæ ēñente pōnencōñōmō māodānī gocantapa. Go guīte ongōñongante,

—Mā bitō odōmōnte apænedō æbānō ĩ. Edæ apænebi ēñēmōnīe. ²⁰ Edæ bitō odōmōnte apænedō ante tæcæ ēñēmōnī inte mōnītō, Æbānō ante apænebi, ante ēñencæte ante wæmōnīpā, ānānitapa.

²¹ Edæ atēnāidi tōnō wadānī Atēna ĩñōmō nōwo ponte quēwēnānī tōnō tōmānānī wadō cædāmaī inte ònonque, Wadānī æbānō mā apænete pōnēnānī, ante wædīnque māñīnōnque ante tedete quēwēñōnānīmpā.

²² Pabodo ĩñōmō Adeopagoidi godongāmæ nānī ēñente pōnencōncabo tæcæguedē ængæ gantīdīnque tōmēnānī ĩnānīte apænedīnque,

“Atēnāidi, ēñēedānī. Wængonguīdī, mīnī ānōnānī ĩnānīte waa ate baī mīnītō nanguī pōnī cæmīnī abopa. ²³ Botō mīnītō quēwēñōmō tōmāo cægōnte ayōmo, Wængonguīdī ĩnānīpā, ante mīnī waa adoncacoo nanguī ongō atabopa. Ayæ mīnī

waa adonca adocaque iñōmō mīni pōnō yewæmōnimpaa iīmai ante yewæmōnte ongō atabopa. ‘Wacā wængonguī æcāmē ingāā, ante mōnō ēñēnāmai nē inongā beyæ mōnō waa adonca impa,’ ante mānimpaa yewæmōi ongō atabopa. Mānimpaa yewæmōi ongō adimo inte botō mīni, Æcāmē ingāā, ante ēñēnāmai inte mīni waa adongā ingante ante ñōwo, Æcānō ingāā, ante ñōwo apænebo ēñēedāni.”

²⁴ Ante apænedinque Pabodo godōmenque, “Wængonguī inguipoga nē badongaingā inongā inte tōmāā iñōmō ongoncoo nē badongaingā inongā inte tōmengā inguipoga tōmāmæ Awēnē inongā ingampa. Tōmengā adocā iñōmō oōnædē Awēnē ingampa. Iñinque Tæiyæ Awēnē inongā inte tōmengā waomō ōnopoca mæñōnincōnē ædō cæte guīite quēwengingāā. ²⁵ Ayæ waomō iñōmōnte tōmengā mōnō quēwenguīmāmo pōnongā æmompaa. Ayæ mōnō guēmanguīmāmo adocā pōnongā guēmāompaa. Ayæ tōmengā adocā nānō pōnōnonque tōmānō æninque quēwēmompaa. Mānōmai nē pōnōnongā inte tōmengā mōnō waocabo iñōmōnte, Pōnōmi æmoe, ante ædō cæte anguingāā. Iñinque tōmengā beyæ ante mōnō waomō ōnopoca ædō cæte cæquimōō.”

²⁶ Ante apænedinque Pabodo godōmenque apænecantapa. “Wængonguī waocā adocanque ingante badōninque, Tōmengā nānō pæināni nanguī ināni yebæninque nāni cabo nāni cabo tōmancabodāni bacædānimpa, angacāimpa. Ayæ edæ, Adocanque pæināni inōnāni inte mānincabodāni iñōmō nānēneto nānēnē godinque adocaboque wabæca wacabo wabæca godinque inguipoga tōmāo go go cædinque wayōmō wayōmō quēwencædānimpa, ante cægacāimpa. Mānōmainō ante badōninque tōmengā tōmancabodāni inānite ante pōnēninque, Æyōmōnō quēwenguīnāni, ante cædinque, Iñāni iīmæca mānimpoga quēwencædānimpa, āninque, Wadāni wabæca mānimpoga quēwencædānimpa, ante doyedē angacāimpa. ²⁷ Edæ tōmāmæ quēwēnāni botō imote ante diqui diqui mincædānimpa. Ayæ botō imote ante pædæ æmpo cædinque wabānō bee tenguināni, ante cædinque Wængonguī mānōmai badōninque angacāimpa. Incæte Wængonguī mōnō tōmāmō weca ongōninque wī gobæque quēwengampa. ²⁸ Wængonguī tōmāo quēwengā iñongante mōnō waomō iñōmō inte wayōmō wayōmō gomō incæte tōmengā nempo edæ cōwē quēwēmompaa. Mīni cabo incæ āmotamīni ante bai nē tededāni pancadāniya, ‘Wængonguī pæimō adomō iompaa,’ ante do nāni ānō bai edæ mānōmai impa,” ante Pabodo

apænecantapa.

²⁹ Ayæ, “Mānōmai beyæ mōnō Wængonguī pæimō iñōmō inte edæ iīmainō ante wīi pōnenguēnēmō iompaa. Mōnō, Waocā nanguī pōnēninque dicaa yewæmōninque waa pōni nānō badōinca bai Wængonguī adobai ingampa, ante ædō cæte ānewenguī. Oodo tōnō padata waocā nānō badōi bai Wængonguī ingampa, ante mōnō wīi mānōmainō ante pōnenguēnēmō iompaa. ³⁰ Incæte wēēnēñedē mānīnō nāni ēñēnāmai ingainō ante adinque Wængonguī pōnō waadete ata cæpogacāimpa. Ñōwo guīquēnē tōmāmæ quēwēnāni inānite, Mīnitō ēñēnāmai cædō ante, Ancaā wæwente awædō, ante ñimpo cæedāni. ³¹ Ante Wængonguī nē apænte anguingā inongā inte iīmai angampa. Iñonæ iinque bayonte botō inguipoga tōmāmæ quēwēnāni inānite apænte ancæboimpa, ante mānīonæ æonædō i, ante do angacāimpa. Ayæ, Waocā adocanque tōnō botō godongāmæ cæyōmo tōmengā nōingā ante apænte ancæcāimpa, ante Wængonguī māningā onguīñængā ingante do apænte ængacāimpa. Ayæ tōmānāni, Wængonguī nānō angainō bai cōwē bacæimpa, ante pōnencædānimpa, ante cædinque Wængonguī māningā Onguīñængā dobæ wængā ate, Nāni ōmæmōe, angā iñinque māningā iñōmō edæ do ñāni ōmæmōnte quēwengampa.”

³² Ante Pabodo mānīnō Itota nānō ñāni ōmæmongainō ante apæncā ēñēninque pancadāniya, Babæ ancædō, ante badete todānitapa. Wadāni guīquēnē,

—Iñcayæ ate mānīnō ante adodō apænebi ēñēmōnie, ānānitapa.

³³ Mānōmainō ante cædāni adinque Pabodo iñōmō tōmēnāni inānite emō cæte godinque tao gogacāimpa. ³⁴ Incæte pancadāniya tōmengā mīñæ godinque nē pōnēnāni badānitapa. Adeopagoidi nāni ēñente pōnē concabo iñōnānite adocanque Diōnitio adobai nē pōnengā bacantapa. Ayæ onquiyængā tōmengā emōwo Daāmadi tōnō wadāni adobai nē pōnēnāni bagadānimpa.

18

Coodinto iñōmō pōninque Pabodo apænecampa

¹ Atēna iñōmō ongonte apæncā ēñēninque mānōmai cædāni ate Pabodo wadæ godinque Coodinto nāni quēwēñōmō pongantapa. ² Doyedē iñōmō odōmānoidi tæiyæ awēnē Codaodio oodeoidi inānite piinte āninque, Mōnitō quēwēñōmō Odōmā iñōmō ñōwo quēwēnāmai inte tōmāmīni wadæ goedāni, angā ēñente wædinque tōmānāni nāwæ wadæ godōnānimpa. Adocanque tōmengā emōwo Aquidæ Pontobæ ēñagaingā inte Itadiabæ gote māñifedē

quēwēnongāimpa. Tōmengā adocā oodeocā īnongā inte awēnē nānō ānō ante ēñente wadæ godinque tōmengā nānōogængā Piditida tōnō nōwo Coodinto īñōmō wadæ ponte quēwēnōnaimpa. Īnīnque Pabodo nōwo Aquidæ ingante tæcæ adinque tōmēna weca ēñacæ pongantapa. ³Tōmēna weca ponte ayongā tōmēna tōmengā nānō tadōmōnō bai adobai æmontai cadopa tadōmonte godonte ænte quēwēna adinque Pabodo tōmēna weca ee owoadinque tōmēna tōnō godongāmæ tadōmōnānitapa. ⁴Mānōmai cæte quēwēninque Pabodo guēmanguīōnæ īñō guēmanguīōnæ īñō oodeoidi odōmōincōnē go guīidinque, Oodeoidi incæ oodeoidi ināmai īnāni incæ ēñente pōnencædānimpa, ante cædinque, Īlmai impa ante apænebo ēñēmaīmīnīpa, ante nanguī apænecantapa.

⁵Ayæ Tidato tōnō Tīmoteo Māatedōniabæ quēwēnte wadæ pōninque Coodinto īñōmō nāna wæcæ pōñedē Pabodo māniñedē æmontaicō nānō badōnīnō ĩimpo cædinque wæætē, Wængonguī nānō apænedō ante ēñencædānimpa, ante nanguī cæinente wædinque nanguī apænedinque māninque cæte quēwengantapa. Mānōmai cædinque tōmengā, Codito mōnō nē ānongā incæ Itota adocā īnongā ingampa, ante botō nē agaiwo inte apænebo ēñēmaīmīnīpa, ante oodeoidi inānite apænecantapa. ⁶Mānōmai apæneyongante oodeoidi wæætēdō wæætē godō wēnæ wēnæ ante pīlnāni wædinque Pabodo wæætē, Wīl ēñēnē wædō, ante bai cædinque nāmā weocō wancæ wancæ cæcantapa. Ayæ tōmēnāni inānite,

—Wængonguī weca mīni goquēnēnō ante apænebo ēñēninque mīnitō pōnō wææ āninque tōmēmīni wænguinque wentamō mongæmīnīpa. Botō wæætē mīnitō ĩmīnite edonque pōnī apænedīmo inte mīni cædō wentamō mongæñāmai ĩmopa tōō. Īnīnque botō Wængonguī taadō mīnitō ĩmīnite idæwaa odōmōninque edæ oodeoidi ināmai īnāni weca nōwo wadæ gobo tamēñedāni.

⁷Āninque Pabodo wadæ tao godinque oodeoidi odōmōincō gāānē wacā oncōnē go guīi go guīi cædinque cōwē apænecantapa. Mānīncō nē ēacā Titio Yoto nāni ānongā īñōmō Wængonguī ingante nē waa ate pōnengā īnongāimpa. ⁸Oodeoidi odōmōincōnē nē aacā Codipo guīquēnē mōnō Awēnē ingante nē pōnengā bayongā tōmengā oncōnē nē owodāni tōmānāni pōnēnānitapa. Ayæ coodintoidi nanguī īnāni pō ēñēē pō ēñēē cædinque adobai wede pōnēninque æpæñē guīgadānimpa. ⁹Māniñedē woyowotæ īñō Pabodo wīlimate bai ayongante mōnō Awēnē tōmengā ingante apænecantapa. “Bitō guīñedāmai inte apænebi ēñencædānimpa.

Pæ wēenedāmai incæbiimpa. ¹⁰Coodinto īñōmō botō quīnāni nanguī īnāni inānīpa, ante cædinque botō īñōmō edæ bitō tōnō godongāmæ cōwē cæcæboimpa. Īnīnque wadāni bitō ĩmite māmō pīlinque wēnæ wēnæ cædāmai incædānimpa.” ¹¹Ante mōnō Awēnē tōmengā ingante apæneca ēñēninque Pabodo adoque wadepo go tæcæ ĩlonte Coodinto īñōmō ongōinque Wængonguī nānō apænedō ante tōmēnāni inānite odōmonte apæneca ēñēnōnānimpa.

¹²Māniñedē odōmānoidi ānāni ate Acayabæ awēnē Gadīōno īnongāimpa. Tōmengā awēnē nānō ĩnōñedē oodeoidi godongāmæ pōnēninque Ao āninque Pabodo ingante quingæ māmō bæi ongonte æninque awēnē Gadīōno nānō cōwē apænte ānōñōmō ænte māodāni gocantapa. ¹³Awēnē weca pōninque Pabodo ingantedō ante pīinte āninque,

—Īngā īñōmō, Mōnō wadō bai cædinque Wængonguī ingante waa ate apænecaēimpa, ante odōmōninque mōnitō awēnēidi nāni wææ ānōnō ante wido cæcampa. Mānōmai wapiticæ cædinque ancaa ānewengā ēñēninque tōmānāni adobai wapiticæ cædānīpa cæbīi.

¹⁴Ānāni ate Pabodo tæcæ apæneca cæyongante Gadīōno oodeoidi inānite ĩlmai ante wææ apænecantapa.

—Oodeoidi ēñēdāni. Mīnitō botō weca ponte apænedinque, Odōmāno awēnē nānō wææ ānō bai ĩngā ēñēnāmai cæcampa, āmīni bai, Waocā ingante ædæmō wīwa cæcampa, ante āmīni bai botō mīni ānō do ēñēninque apænte ancædōmoimpa. ¹⁵Mīnitō ĩñæmpa, Tōmengā tededonque ante oda cæcampa, āmīnīpa. Mīnitō ēmōwo ante oda cæcampa, āmīni. Mīnitō wææ angāinō ante oda cæcampa, ante pīimīnīpa. Mānīnonque ante oda cæcampa, ante ancaa tedewēmīni wædinque botō wæætē tōmengā ingante apænte ānāmai incæboimpa. Tōmēmīnīque tōmengā ingante apænte ædāni.

¹⁶Ante pīinte āninque awēnē tōmēnāni inānite, Botō apænte āñōmō ongōnāmai gobæwedāni. ¹⁷Ante wido cæcā tao godinque tōmānāni oodeoidi odōmōincōnē nē aacā Totēnē ingante wæætē bæi ongonte tæi tæi pānāni incæte nē apænte angūēngā incæ Gadīōno īñōmō ōnonque adāmai inte bai ee acā pangadānimpa.

Pabodo Antioquiya ponte gocampa

¹⁸Īnīnque tæōnæ quēwēnte ate Pabodo Coodinto īñōmō nāni pōnencabo inānite, Gobopa, āninque wadæ godinque Tidiabæ gocæte ante Tencodea ganca pongantapa. Tōmengā do apænedinque, Botō mānīmpoga ocaguī tocadāmai inte Wængonguī beyænque cædinque botō tōmēmo ānīnō ante cōwē cæcæboimpa, ante doyedē ānongāimpa.

Ōwo iñōmō tōmengā nānō āninō bai iinque cædingā inte Tencodea iñōmō pōninque ocagui ēō tocacantapa. Ayæ ēō tocacā ate tōmengā Pidotida tōnō Aquidæ nāna gæncaya tōnō godongāmæ ñænæ wipodē go guiddinque tōmēnāni Tidiabæ gocæte ante wogaa godānitapa. ¹⁹ Mānōmai godinque Epeto iñōmō go ti wæænānitapa. Tōmēna nāna gæncaya māniñōmō ti wææninque tæ contayōna Pabodo iñōmō oodeoidi nāni odōmōincōnē go guiddinque oodeoidi inānite, iīmai impa apænebo ēñencæminimpa, ante apæneccā. ²⁰ Ēñēninque tōmēnāni, Bitō mōnitō weca wantæpiyæ quēwēngūmi, āñōnāni tōmengā Baa āninque, ²¹ wæætē, Gobopa, angantapa. Ayæ, “Ōwo Eedotadēē iñōmō ææmæ bequinque goquēnēmo iimo incæte Wængongui Ao angā ate botō mīnitō weca ayæ ate wæætē ocæ ēmænte poncæboimpa. Ōwo gobo tamēñedāni.”

Āninque Epeto iñōmō ñænæ wipodē go guii tæ contadinque Pabodo wogaa gocantapa. ²² Godinque Tetadea pō ti wææninque Eedotadēē iñōmō Itota Codito ingante godongāmæ nāni pōnencabo weca ēñacæte ante æicantapa. Ayæ ate Antioquiya wæicantapa. ²³ Ayæ ate māniñōmō tæōnæ quēwēninque wadæ godinque Gadatiabæ adodō godinque Pidiquiabæ tōmāo wayōmō wayōmō cægonte godinque Itota miñæ nē tee empote quēwēnāni tōmānāni inānite māo apænedinque, Mōnō ñimpo cædāmai inte tæi piñænte cæcæimpa, ante apæneccā ēñēninque tōmēnāni tæi piñænte entawēninque quēwengadānimpa.

Epeto iñōmō Apodo apæneccā ēñēnānipa

²⁴ Māniñedē wacā oodeo tōmengā ēmōwo Apodo iñōmō Equitobæ Adecantodia nāni quēwēñōmō ēñate pægaingā inte űowo Epeto nāni quēwēñōmō pongantapa. Tōmengā iñōmō nangui adinque nē ēñēnongā inte Wængongui angā ēñente nāni yewæmongainō ante do ēñēninque waa pōni apæneccā inongāimpa. ²⁵ Mōnō Awēnē taadō ante apæneyōnāni do ēñēningā inte māninō ante ædæmō ēwocadinque tōmengā, Ēñencædānimpa, ante nangui apæneccantapa. Ayæ Itota nānō cægainō ante nō ante odōmōnte apæneccā incæte Apodo iñōmō Wāo æpænē nānō guidongainonque ante māningancaque ēñēningā inte māningancaque ante tōingā odōmongā ēñēnōnānimpa. ²⁶ Tōmengā űowo oodeoidi odōmōincōnē go guii go guii cædinque guīñēnedāmai inte apæneccantapa. Pidotida tōnō Aquidæ nāna gæncaya guiquēnē tōmengā mānōmai apæneccā tæcæ ēñēninque edæ Apodo ingante, Mōnatō weca pōe, āna pōñongante, Wængongui taadō iīmai inompa, ante tōingā apænedā tæcæ mā ēñengantapa.

²⁷ Mānōmai cæda ate Apodo wæætē Acayabæ gocæte ante cæyongante tōmēnāni nāni pōnencabo tōmengā ingante, Waa goe, ānānitapa. Ayæ, Acayabæ iñōmō Itota ingante nē tee empote quēwēnāni acædānimpa, ante iīmai ante cadota ante yewæmōnānitapa. Mīnitō, Apodo pongā adinque tōmengā ingante waa cædāni, ante yewæmōninque tōmengā ingante pædæ pōnōnāni ænte godinque māo Acayabæ quēwēnāni inānite pædæ godongā adānitapa. Tōmēnāni Wængongui waadete pōnō cæcā ate nē pōnēnāni iñōnānite Apodo nē waa pōni apænedongā inte māniñōmō ponte apænedinque tōmēnāni tōnō godongāmæ cægacāimpa. ²⁸ Edæ tōmānāni ayōnāni Apodo oodeoidi inānite nangui wæætēdō wæætē apænedinque gomonga apæneccā wædānitapa. Tōmengā, Mōnō Codito æbānō cæqingāā, ante Wængongui angā ēñente nāni yewæmongainta adinque mōnō ēñengāimpa, angantapa. Ayæ, Itota māninō nāni yewæmongainō bai nē cædongā inte nāwangā mōnō Codito inongā ingampa, ante nō apæneccā ēñēninque tōmēnāni ædō cæte wadō ante apænequānāni.

19

Epeto iñōmō Pabodo ponte apæneccampa

¹ Apodo ayæ Coodinto iñōmō ee ongōñongā Pabodo nānō cægōniæ tæcæguedē ānanquidi owēñaque pō Epeto iñōmō wæangantapa. Ponte ayongā Itota ingante nē tee empote quēwēnāni pancadāniya a ongōnāni. ² Adinque tōmengā tōmēnāni inānite,

—Mīnitō pōnente bayōmīni Wængongui tōmengā Tæiyæ Waēmō Ōnōwoca ingante da pōnongā æmīnitawo.

Āñongā tōmēnāni wæætē,

—Īñæmpa māningā Tæiyæ Waēmō Ōnōwoca ingantedō ante apænedānipa ēñēngūmōni.

³ Ante apænedāni ēñēninque Pabodo wæætē,

—Īninque æcānō ēmōwo ante æpænē guimīnitawo.

Āñongante,

—Wāo wodi nānō æpænē guidongainō ante guītamōnipa.

⁴ Mānōmainō ante apænedāni ēñēninque Pabodo wæætē,

—Wāo wodi nānō guidongainō ante guīgaimīni inte mīnitō, Idæwaa wēnæ wēnæ cæte awædō, ante Wængongui Awēnē gāmænō ocæ ēmænte pongaimīni imīnipa. Incæte Wāo wodi, Īncayæ ate nē Ponguingā ingante pōnencæminimpa, āninque tōmēnāni inānite æpænē guidongacāimpa. Māningā iñōmō Wāo nānō, Nē Ponguingā, ānongā iñōmō Itota inongā ingampa.

⁵ Ante apæneca ēñente wæyōnāni Pabodo wæætē mōnō Awēnē Itota ēmōwo apænedinque æpæne guidongā guiddānitapa. ⁶ Ayæ tōmengā gampocā ongōñōnāni Wængonguī Tæiyæ Waēmō Ōnōwoca wæætē tōmēnāni baonga guican-tapa. Guicā ate tōmēnāni wadāni nāni tede bai mā tededinque Wængonguī beyæ apænedānitapa. ⁷ Mānināni onguīænāni æpæne nē guiddēnāni iñōmō ōnompō tipæmpoga go mengāa inōnānimpā.

⁸ Pabodo apāicā mengāa go adocanque pāmonque adoyōmō quēwēninque oodeoidi odōmōincōnē go guīi go guīi cædinque guīñēdāmaī apænedinque, Wængonguī Awēnē Odeye do pongāimpā, ante apænebo ēñēdani, ante nōingā ante apæneca ēñēnānitapa. ⁹ Apæneca ēñēñōnāni pancadāniya guiquēnē, Wīi pōnēnente awædō, ante Baa āninque Wængonguī Awēnē taadō ante wiwa tedewēnānitapa. Mānōmaī tedewēnāni ēñente wædinque Pabodo iñōmō ēmō cæte godinque Itota ingante nē tee empote quēwēnāni inānite ænte wadæ gocantapa. Ayæ iimō iñō iimō iñō Tidānō nānō apæneincōnē go guīi go guīi cæte apænedinque Pabodo māniñōmō pō guiddāni tōnō guēadō guēa apænedānitapa. ¹⁰ Ayæ mēnepoga wadepo ganca Pabodo mānōmaī cæyongā oodeoidi incæ guidgeoidi incæ Atiabæ quēwēnāni tōmēnāni mōnō Awēnē nānō apænedō ante ēñēnānitapa.

¹¹ Ayæ Pabodo tōnō godongāmæ cædinque Wængonguī tæi piñænongā inte nanguī cæcantapa. ¹² Īninque tōmēnāni Pabodo weocoo wadæ cæcadoquincoo incæ padēincoo incæ æninque wēnæ wēnæ ināni inānite ænte māmō wo caayōnāni waa badānitapa. Ayæ mānōmaī cæyōnāni wēnæidi nē wiwa ēwocadāni tōmēnāni nāni nē ēwēnēnāni tao godānitapa.

¹³ Māniñedē oodeoidi Itota ingante pōnēnāmaī ināni incæ pancadāniya wayōmō wayōmō godinque wēnæidi nē wiwa ēwocadāni inānite nē wido cædāni inōnānimpā. Tōmēnāni nāmā mā pōnēwēninque, Nōwo Awēnē Itota ēmōwo apænedinque mōnō wēnæ ingante wido cæcæimpā, ante cædinque wēnæidi inānite iimāi ānōnānimpā. Pabodo nānō nē apænedongā Itota ēmōwo apænedinque botō, Wēnæbi tao gobāwe āmopa, ānewēnōnānimpā.

¹⁴ Māniñedē oodeoidi beyæ, Wængonguī quī, ante nē godongā ñænængā adocanque Etequeba iñongā tōmengā wēnāni tiæte ganca inānitapa. Īnāni iñōmō Itota ingante pōnēnāmaī ināni incæte adobai cæcæ cædānitapa. ¹⁵ Tæcæ cæcæ cæyōnānite wēnæ nē wiwa ēwocadongā incæ tōmēnāni

inānite nāemæ tededinque, “Itota ingante do abopa. Ayæ Pabodo æcānō ingāa, ante do ēñēmopa. Wæætē mīnitō guiquēnē æmīnidō imīni.”

¹⁶ Āñongā wēnæ wiwa inongā ingante nē ēwēnengā inte wiyaemæ tōmēnāni inānite to māo yao ongōninque bæ tacantapa. Mānōmaī cædinque tōmēnāni weocoo gā tadongadinque tæi tæi pangā ate tōmēnāni weocoo ōmaadāni inte wepæ taate wædinque oncodo tao wodii winōnānitapa. ¹⁷ Mānōmaī batimpā, ante tedeyōnāni Epeto iñōmō quēwēnāni oodeoidi incæ guidgeoidi incæ tōmēnāni ēñēninque ancaī guīñente wædānitapa. Īninque mōnō Awēnē Itota ēmōwo wīi ōnonque ante tededāni inte tōmengā ēmōwo æwocæte bai cædinque, Tæi piñængā inte ēmōngampā, ante wædānitapa.

¹⁸ Ayæ nanguī ināni iñōwo wede pōnente badinque adoyōmō pōninque tōmēnāni ēñēñōnāni tōmēnāni nāni wēnæ wēnæ cædinō ante tōmānō ante edonque apænedinque, Idæwaa wēnæ wēnæ cæte awædō, ante wido cædānitapa. ¹⁹ Ayæ idō inte nē yewænināni incæ pancadāniya adobai pōnente badinque tōmēnāni, Æbānō cæte yewænguī, ante yewæmōninta incæ adoyōmō ænte pōninque tōmēnāni āñōnāni nē tānānitapa. Māniñacoo æpodō itædē cædinque padata nāni æinta beyæ godonte ænāni, ante cōwā ayōnāni tincoenta mīdo ganca mānimpota nāni godonte æninta incæ nē tānāni agadānimpā. ²⁰ Mānōmaī nē pōnēnāni badinque waa cædāni Īninque mōnō Awēnē nānō ānō ante godōmenque wayōmō wayōmō māo gode ānāni ēñēninque tōmengā ingante nāni pōnencabo incæ yebæninque tæi piñænāni bagadānimpā.

²¹ Mānōmaī cædāni ate Pabodo ōnōwēnenque pōnēninque, Māatedōniabæ ēñacæ godinque botō Acayabæ ēñacæ godinque Eedotadēē gocæboimpā, ante pōnēninque, ayæ, Māniñōmō gote ate Odōmā nāni quēwēñōmō cōwē goquēnēmo ĩmopa, angantapa. ²² Īninque tōmengā beyæ nē cædāni iñōnānite mēnaa ĩnate ĩmoteo tōnō Edaato ĩnate apænedinque, Māatedōniabæ gote ongōñōmīna botō Atiabæ wantæ quēwente pōmoeda, ante da godongā godatapa.

Epetoidi nanguī Yæ yæ ānānīpa

²³ Māniñedē Epeto iñōmō quēwēnāni iñōmō, Itota Taadō mōnō wido cæcæimpā, ante nanguī Yæ yæ ānānitapa. ²⁴ Tōmēnāni, Mōnitō wængonguīnā Diānā ĩnampā, ante onquiyænā ēmōnō bai badōninque māninca weca ædæ wæænte nē apænedāni inōnānimpā. Tōmēnāni quēwēñōmō adocanque Deēmetedio nāni ānongā iñōmō padata aca podonte nē badongā ĩnongāimpā.

Tömengā iñōmō padatagæ æninque aca podonte badōninque, Mīni wængonguinā Diānā inante mīni tæiyæ waēmō apæneincō bai impa, ante guianconque badonte quëwëngäimpa. Mänōmai badōñongā tömengā tönō godongāmæ cædāni wæætē wadāni inānite godonte æninque mänincoo beyæ tömēnāni godonte æinta nanguī æninque quëwëñōnānimpa. ²⁵ Ininque tömengā tönō nē cædāni inānite ayæ wadāni adobai cædāni inānite æñete pōnāni ate Deēmetedio iñōmō tömēnāni inānite apæneantapa.

“Iñānāni, do eñēmīnīpa. Mōnō badonte godōninque wadāni nāni pōnōninta nanguī æmompa. ²⁶ Ayæ nanguī ināni Epeto iñōmō quëwëñāni incæ Atiabæ wodo tömāmæ quëwëñāni incæ iingā Pabodo guiquēnē wapiticæ apæneccā eñēnīque edæ oda cædinque tömengā miñæ godānīpa, ante do eñēmīnīpa. Tömengā iñōmō, Ōnonpoca badōninca wīi wængonguīdi inānīpa, ante tedecā apa quëwëmīni. ²⁷ Mänōmai tedecā beyæ mōnō badōnō ante wadāni nanguī ināni piinte anguināni awædō. Ayæ Diānā ñænænā wængonguinā iñōnante tömengā ingante mōnō apæneincō incæ, Ōnonconque impa, anguināni awædō. Ayæ godōmenque, Mōnō wængonguinā Diānā waa pōni wængonguinā inampa, ante Atiabæ tömāo quëwëñāni tönō inguipoga tömāo quëwëñāni nāni waa adōnā iñōnante wabānō wapiticæ tededinque godō piinguināni badānīpa, ante awædō.”

²⁸ Ante Deēmetedio mänōmāinō ante apæneccā eñēninque tömēnāni ænguī badinque ogæ tededinque, “Epetoidi wængonguinā Diānā ñænænā inampa,” ante wæætē wæætē ancaā ānānīpa.

²⁹ Mänōmai padata nē badōnāni Yæ yæ ānāni eñēnte wædinque māniñōmō quëwëñāni tömānāni, Quiēmē bai cædānīpa, ante acæte ante wadō pō wadō pō pogodo pōnānīpa. Ponte ayōnāni Māatedōniabæ quëwente Pabodo tönō godongāmæ nē pōnīna Gayo tönō Aditadoco a ongōna adinque tömēnāni tömēna inate bæi ongonte quingæ māo tömēnāni nāni aincōnē ñænænāncōnē go guīdānīpa. ³⁰ Pabodo guiquēnē mänōmai cædāni ate wædinque, Godongāmæ ongōnāni weca go guīdinque apæneccāboimpa, ante cæyongante Itota ingante nē tee empote quëwëñāni wæætē, Wænonmpa, ante, Go guīdāmai incæbiimpa, ante wææ cædānīpa. ³¹ Ayæ mānimæ awēñēdi pancadāniya Pabodo æmigoidi ināni inte adobai māmō tömengā ingante gode āninque, Bitō ædō cæte māniñōmō go guīquimīi, ante wææ ānānīpa.

³² Iñonte godongāmæ ongōnāni guiquēnē, Quinante pōmōi, ante wodo tömānāni

eñēnāmai inānīta. Pancadāniya, Iñāi cæcæimpa, āñōnānite wadāni guiquēnē, Wadō bai cæcæimpa, ante wæætēdō wæætē ante ogæ tededinque nanguī pōni Yæ yæ ānānīta. ³³ Yæ yæ āñōnāni odeoidi guiquēnē Adecantodo ingante yæcodo gō cædāni ongongā adinque godongāmæ ongōnāni pancadāniya tömengā ingante, Iñāi cæcæimpa, ānānīta. Tömengā guiquēnē tömēnāni inānite wææ apæneccæte ante, Apocænē iedāni, ante bai cædinque pipo pipo cæcantapa. ³⁴ Oodeo inongā inte mānōmai cæcampa, ante wædinque tömengā ingante eñēnāmai inte tömānāni adoyōmō ogæ tededinque, “Epetoidi wængonguinā Diānā ñænænā inampa,” ante mēa ooda ganca adodō adodō adodō ante nanguī ānānīpa.

³⁵ Ayæ ate tömēnāni awēnē Tequetetadio incæ ancaā tömēnāni inānite angā eñēnte apocænē cæyōnāni tömengā, “Epetoidi eñēmīni. Tömāo quëwëñāni mānōmāinō ante do eñēnānīpa. Mōnō Epeto iñōmō quëwencabo mōnō wængonguinā Diānā apæneincō nē aamō imompa. Ayæ tömengā awinca bai yewæmōinca öönædē mōnō wæængainca adobai nē wææ cæmō imompa, ante adinque tömāmæ quëwëñāni do eñēnānīpa cæmīni. ³⁶ Māniñō ante nāwangā pōni impa, ante adinque, Babæ impa, ante ædō cæte anguināni. Ininque mīnitō eñēnāmai mīni Yæ yæ ānewēñō ñimpo cædinque piyænē cæquēñēmīni imīnīpa. ³⁷ Iñā mīni bæi ongote ænte pōnōnīna iñōmō mōnō wængonguinā Diānā apæneincōnē guīdāmai ina inte wēnæ wēnæ cædāmai inapa. Ayæ mōnō wængonguinā Diānā inantedō ante wīi wēnæ wēnæ ante piñā apa quëwëñāni.”

³⁸ “Deēmetedio padatagæ nāni badoncabo incæ wacā ingante, Wiwa cæbitapa, piinte wædānitawo. Edæ nē apænte nāni āincō cōwē wi ænete ongompa. Mānīncōnē nē apænte ānāni cōwē ongōnānīpa. Ininque Deēmetedioidi nē nāni piinongā ingante māniñōmō ænte gote ānāni eñēninque nē apænte ānāni wæætē tömengā ingante do apænte anguēñēnāni inānīpa. ³⁹ Ayæ apænte ānāni, Iñōnæ tömāmīni godongāmæ pōedāni, nāni āñiñōnæ bayonte mīnitō godōmenque piinte āñēmīni inte māniñōnæ ponte āmīni eñēnte apænte ānāni ate mīnitō piyænē cæquēñēmīni imīnīpa. ⁴⁰ Edæ ñōwoñnæ mīni Yæ yæ ānewēñō ante awēñēdi pōninque, Quinante mānōmai cæmīni, ante āñōnāni wæætē, Quiēmē beyæ cætimpa, ante mōnō angæimpa. Tömēnāni wæætē mōnō imonte āninque, Mīnitō awēñē ingante wido cæcæte ante cæmīnīpa, ante piñāni wæcæ wæ.”

⁴¹ Āninque godongāmæ ponte ongōnāni inānite tömengā angā gogadānīpa.

20

*Māatedōniabæ godinque Pabodo Guide-
tiabæ gocampa*

¹ Mānī Yæ yæ ante nāni ānewēnō īnque cædāni ate Itota ingante nē tee empote quēwēnāni īnānite wæætē āñete pōñōnānite Pabodo, Minitō gancæ pōnente godōmenque cæcæmīnīmpa, ante godō ædæmō apænecantapa. Ayæ, Nōwo gobopa, ante Māatedōniabæ gocantapa. ² Godinque tōmengā mānīñōmō quēwēnāni īnānite, Minitō gancæ pōnente godōmenque cæcæmīnīmpa, ante godō ædæmō apænecā ēñēnānitapa. Mānōmāi nangūi apænedinque tōmengā mānīmæ tōmāo cægōnīnque wayōmō māo wayōmō māo apænecā ēñēnāni ate Guidetiabæ gote pongantapa. ³ Mānīñōmō pōnīnque mēa go adoque apāicā quēwengantapa.

Ayæ, Tidiabæ goquimo, ante tæcæ ñæñæ wipodē guicæ cæyongante wadāni, Oodeoidi bitō īmite wænoncæte ante cædānīpa атаque. Ante wææ ānāni wædinque tōmengā, Botō wæætē adodō godinque Māatedōniabæ wodo tebæ gocæboīmpa, ānīnque taadonque gocantapa. ⁴ Goyongā tōmengā tōnō godongāmæ godāni īñōmō, adocanque Bedea quēwēningā inte Pidido wengā Topatēde, ayæ wæætē Tetadōnica quēwēnīna Aditadoco tōnō Tegonto mēnaa, ayæ wæætē Dedebe quēwēningā Gayo tōnō Tīmoteo mēnaa, ayæ wæætē Atiabæ quēwēnīna Tīquico tōnō Todopīmo mēnaa, mānīmpodāni īnānitapa. ⁵ Tōmēnāni tāno godinque Todoa nāni quēwēñōmō pōnīnque mōnitō wipodē ponguīmōni ante ee ongōnānitapa. ⁶ Mōnitō guiquēnē oodeoidi pāo yedæ æmpoquī ōmæmō ī nāni cænguīōnæ īnque baganca Pidipo īñōmō quēwēnīnque wipodē ñæñæmpodē go guidinque wogaa godinque ōnompō æmæmpoquē ēōnæ gote ate tōmēnāni weca Todoa pōnīnque ōnompō æmæmpoquē go mēōnaa quēwentamōnīpa.

Todoa īñōmō Pabodo ponte apænecampa

⁷ Tōmēnāni nāni guēmanguīōnæ go ate mōnitō, Nōwo gāwadecæ bayō Wængongūi itædē impa, ante pāo godongāmæ cæncæte ante æmongapaa æi wænōmēnæcapaa æi guidinque tæ contatamōnīpa. Pabodo īñōmō baānæ ate gocæ cædingā inte æi guīi tæ contadinque wantæpiyæ ayaōñæñēña pōnī ayæ apænecā ēñentamōnīpa. ⁸ Wænōmēnæcapaa mōni godongāmæ ēñengoncōnē gongapæncade bacoo ti wōdōnote mæ ongōnīmpa. ⁹ Adocanque edēningā tōmengā ēmōwo Eotico ayamōnecāa tæ contate ongongantapa. Īnīnque Pabodo wantæpiyæ apæneyongā edēningā īñōmō mōwocodē nangūi mōinente ayæ wangæ monte wænōmēnæcapaa ongōnīnque

yæipodē tæ go wæængantapa. Go wæænte do wængā adinque tōmengā ingante yao ongonte mānānitapa. ¹⁰ Nāñe wænte ōñōñongā Pabodo yæipodē wææñinque, Quēwencæcāīmpa, ante cædinge wīni ænte pæ mangantapa. Ayæ nē pōnēmōni mōni caipæ īmōnite apænedinque,

—Mīi quēwengā ingampa. Guīñente wædāmāi īedāni, angantapa.

¹¹ Ānīnque Pabodo wæætē adodō æmongapaa æidinque pāo ænte pā ænte mōnitō tōnō godongāmæ cæñinque wantæpiyæ godōmenque apænecōñongā edæ ñāō batīmpa. Nāō ba ate Pabodo ñīmpo cæte wadæ gocantapa. ¹² Ayæ, Edēningā mīingā quēwengampa, ante ænte wadæ godinque tōmēnāni wampo pōnēnīnque nangūi togadānīmpa.

*Ōmaaque godinque Pabodo Mīideto ganca
pongampa*

¹³ Pabodo guiquēnē taadonque gocæ cædinque mōnitō īmōnite apænecantapa. Minitō wipodē ñæñæmpodē go guidinque māodāmæ wipodenque godāmæ goyōmīni, botō ōmaaque nāñe tebæ pōmoedāni. Atōnō īñōmō pō wāi wocænte owoyōmīni botō īñōmō ōmaaque pō adopodē guīibo ate gocæīmpa, angā Ao ante mōnitō tāno go guīi tæ contadinque ōme tagamōnīmpa. ¹⁴ Mānōmāi godinque Atōnō īñōmō pō wāi wocænte owoyōmōni tōmengā ōmaaque pō bee tēnīnque ñæñæ wipodē adopodē pō guīite tæ contacā ate mōnitō godongāmæ wogaa godinque Mīitidēne nāni quēwēñōmō pontamōnīpa. ¹⁵ Mānīñōmō wāi wocænte monte ate ñāō ba wogaa godinque mōnitō Quiyo ganca pōnīnque wōnæ ate wodo pænta godinque wæætē Tāmo īñōmō pōmōnīnque go Todoguidio īñōmō pōmōnīnque go īñabæ guingā ate Mīideto pontamōnīpa. ¹⁶ Edæ, Ææmæ Pentecotee nāni ānōmæ botō bequinque Eedotadē eyepæ pncæte ante quingæ goquēnēmo īmopa, ante do āningā inte Pabodo ñōwo, Atiabæ wantæpiyæ ongōnīnque ædō cæte Eedotadē eyepæ pōmāimoo. Ante pōnente wædinque, Epeto īñōmō ti wææñāmāi yaatænque gocæboīmpa. Āñongā mōnitō tōmengā tōnō Epeto wodo tebæ godinque Mīideto īñōmō pontamōnīpa.

*Epeto īñōmō nē Picæñāni īnānite Pabodo
apænecampa*

¹⁷ Mānīi wipo ñæñæmpo Mīideto īñōmō wogaa pō wāi wocæ ate ti wææñinque Pabodo wadāni īnānite da godōnīnque, Minitō Epeto īñōmō tōmæwæ æidinque Itota Codito ingante nē godongāmæ pōnēnāni weca godinque tōmēnāni īnānite nē aadāni Picæñāni īnānite āñete pōedāni. ¹⁸ Angā āñete pōñōnānite tōmengā, “Botō Atiabæ mā ponte quēwēnīnque botō goganca

æbānō mīnitō weca waa cæte quēwēnōmoī, ante do ēñēmīnīpa. ¹⁹ Edæ oodeoidi, Wænoncæ, ānāni ēñēnīnque nanguī guīñente wæbo incæte botō, Ōnōmoque bāi īmopa, ante pōnēnīnque Wængonguī beyænque nanguī cædinque Ca ca wædinque ee cætabopa. ²⁰ Īnīnque botō, Mīnitō beyænque quīnō waa inguī, ante pōnēnīnque pæ wēenedāmaī inte do apænebo ēñēmīnīta. Ayæ edæ tōmānāni ayōnāni odōmonte apænedīnque botō wacōnē māo wacōnē māo go guīdīnque apænebo ēñēmīnīta. ²¹ Ayæ pancamīniya oodeoidi īñōmīnīte pancamīniya guīdiegoidi īñōmīnīte botō tōmāmīni īmīnīte apænedīnque īmaī ante apænetabopa. Mīnitō, Idæwaa wēnæ wēnæ cæte awædō, ante pōnente wædinque Wængonguī gāmæñō pōnīnque mōnō Awēnē Itota Codito ingante pōnencæmīnīpa, ante āmo ēñēmīnīta. Mānōmaī tōmāā cætabopa, ante do ēñēmīnīpa.”

²² “Nōwo guīquēnē Wængonguī Ōnōwoca angā ēñēnīnque Eedotadēē gocæboīpa. Mānīñōmō pōñōmote quīēmē bāi bacæīmpa, ante pōnente wædīmo incæte ee gocæboīpa. ²³ Ōnonque botō nōwo wayōmō wayōmō nāni quēwēñōmō pōñōmote wadāni Wængonguī Tæyīæ Waēmō Ōnōwoca tōnō apænecā ēñēnāni inte do botō īmote īmaī ante wææ ānānīpa. Bitō tee mōnete nanguī caate wæquinque Eedotadēē gobīpa, ānāni ēñēnīnque mānīnque ante ēñēmopa. ²⁴ Incæte, Wængonguī waadete pōnō cædinque nānō cægainō ante watapæ apænedīnque bitō, Nō pōnī impa, ante apænebi ēñencædānīpa, ante mōnō Awēnē Itota doyedē botō īmote angacāīpa. Īnīnque tōmengā nānō anganca īnīnque cæcæte ante cæyōmote wænōnāni wæmo incæte botō, Godōmenque inguīpoga quēwenguēnēmo īntabopa, ante wædāmaī incæboīpa. Ayæ pogodo gote bāi botō goquīnō tōmānō gocæte ante nanguī cæcæboīpa, āmopa,” ante Pabodo apænecantapa.

²⁵ Ante apænedīnque tōmengā ayæ godōmenque apænecantapa. “Botō, Mōnō Awēnē Odeye do pongāīpa, ante apænedīnque wayōmō māo wayōmō māo apænebo ēñēmīnīta. Idæwaa apænebo ēñēmīnīni inte mīnitō nōwo æmæwo botō awīnca amīnīpa. ²⁶ Mānōmaī beyæ botō nōwoonæ apænedīnque mīnitō īmīnīte īmaī āmopa. Botō, Quēwencæmīnīpa, ante cædinque ancaa apænebo incæte pancadāniya tōmēnāni nāni wīī ēñēnō beyænque wentamō mongænte nāni wænguīnque goyōnāni botō wæætē mānīnō beyæ wentamō mongænāmaī īmopa. ²⁷ Wængonguī, īmaī cæbo bacæīmpa, ante nānō ānō ante botō īñōmō edæ pæ wēenedāmaī inte mīnitō īmīnīte tōmānō edonque pōnī apænebo

ēñēmīnīta.”

²⁸ “Mīnitō īñōmō edæ nāmā wææ aadīnque waa cæte quēwēedāni. Wængonguī Ōnōwoca mīnitō īmīnīte ānīnque, Īnāni cæningāīdi bāi īnānīpa, ante nānō nē angaināni īñōnānīte mīnitō wæætē nē aamīni īnōmīni inte tōmēnāni īnānīte ædæmō wææ aedāni. Mōnō Awēnē Codito ingante nāni godongāmæ pōnencabo īnānīte æncæte ante tōmengā nāmā wepæ godonte ængā ate Wængonguī quīnāni bagadānīpa cæmīnī. Mīnitō tōmēnāni īnānīte nē aamīni inte waa aedāni. ²⁹ Edæ botō do ēñēmopa. Babæīdi gāwæī ecate ade cæñāni amīnīpa. Edæ botō ēmō cæte gobo ate waodāni incæ babæīdi cædāni mīni abai adobai wēnæ wēnæ cædinque mīni pōnencabo īñōmīnīte ata cæpodāmaī incædānīpa. Tōmēnāni babæ wapiticæ ānāni ēñēnīnque mīni cabo incæ pancadāniya ēñēnāmaī bādīnque wadæ godāni wæcæmīnīpa. ³⁰ Ayæ tōmēmīni mīni pōnencabo incæ pancadāniya, Mōnitō mīñæ poncæmīnīpa, ante cædinque babæ wapiticæ odōmoncædānīpa cæmīnī. ³¹ Edæ wææ cædāni. Botō, Mānōmaī bacæīmpa, ante wadepo mēnepoga go adodepoque īñōnīte itædē incæ woyowotæ incæ nīmpo cædāmaī inte Ca ca wædinque mīnitō tōmāmīni īmīnīte apænebo ēñēnōmīnīpa. Mānōmaīnō ante pōnēedāni,” ante Pabodo apænecā ēñēnānīta.

³² Ānīnque tōmengā, “Īñānāni, botō mīnitō īmīnīte Wængonguī nempo nōwo ēmō cæte gobo tamēñedāni. Tōmengā waadete nānō pōnō cædīnō ante mōnī apænedō ante ēñēte ēwocamīni īñōmīnīte tōmengā mīnitō īmīnīte godongāmæ cæcā ate tæī pīñænte bacæmīnīpa. Ayæ Wængonguī quīmōni tōmāmōni tōnō mīnitō adocabomīni bayōmīnīte tōmengā eyepæ da pōnongā ate mīnitō mōnitō tōnō godongāmæ æncæmīnīpa. ³³ Botō īñōmō æbānō quēwēmoī aedāni. Edæ wacā quī tīguitamō incæ oodo incæ weocco incæ, Botō quī bacæīmpa, ante cōwē æīnēnāmaī Īnōmoīpa. ³⁴ Edæ tōmēmō ōnompoca botō cædīnō beyænque quīēmē ænguēnēmo ante eyepæ ænīnque quēwēnōmoīpa. Ayæ botō tōnō godongāmæ cædāni nāni ænguēnēnō inte adīnque adobai botō tōmēmō ōnompoca cædīnō beyænque ænīnque tōmēnāni īnānīte da godō da godō cæbo ænīnque quēwēnōnānīpa. Mānōmaī botō cædīnō ante do ēñēmīnīpa. ³⁵ Mōnō Awēnē Itota incæ īmaī ante apænegacāīpa. ‘Māincoo ænīnque mōnō wædænque tomōpa. Wæætē wacā ingante pædæ godōnīnque mōnō nanguī toquinque impa.’ Ante Itota nānō apænegainō ante pōnēnīnque botō, Mānōmaī mōnō ōnompoca nanguī cædinque ænīnque wadāni nē ænguēnēnāni

īnānite mōnō pædæ godongæīmpa, ante mīnitō īmīnite cōwē odōmonte apænebo ēñēmīnitapa.”

³⁶ Mānōmaīnō ante īnque apænedīnque Pabodo tōmēnāni tōnō da guīcapodīnque Wængonguī īngante apænecantapa. ³⁷ Ayæ tōmēnāni Ca ca wædīnque, Waa goe, ancæte ante godongāmæ goto pōnīnque tōmengā īngante yaagō yaagō cædānitapa. ³⁸ Tōmengā nānō, Botō īmote æmæwo aminīpa, nānō ānīnō beyæ godōmenque nangūi wædānitapa. Ayæ tōmengā īngante ñænæ wīpo ganca ænte māodāni gogacāīmpa.

21

Pabodo Eedotadēē gocampa

¹ Mōnitō tōnīñadāni tōnō godongāmæ wægōnīnque Pabodo tōnō mōni goquīncabo īñōmō, Wīpo ñænæmpo do wogaa gocæ cæpa, ante adīnque edæ, Nōwo gomōnīpa, ante tōmēnāni īnānite emō cæte godīnque mānīmpodē go guītamōnīpa. Guīdīnque mōnitō tōīngā wogaa godīnque Coto nāni quēwēñōmō ponte tōmæwæ æite monte ate īimō ate Ododata gomōnīque go Patada nāni quēwēñōmō pontamōnīpa. ² Patada īñōmō pō tī wæænte ayōmōni, Wīpo ñænæmpo Pēnitā goquīmpo īmpo, ante adīnque mānīmpodē go guīdīnque wogaa gotamōnīpa. ³ Wogaa godīnque dipæmæ īnō gomō ayōmōni wāā tēiwæñē Tipīdebæ a ongō adīnque tæcæpæ īnō wodō tebæ wogaa gomōnīque go Tīdiabæ pontamōnīpa. Ayæ ñænæmpo mōni goīmpo Tīdo īñōmō māīncoo owāaqū īmpa, ante ēñēnīnque mōnitō mānīñōmō adobai tī wææntamōnīpa.

⁴ Tī wææñīnque mōnitō tōmēnāni quēwēñōmō ponte ayōmōni Itota īngante nē tee empote quēwēnāni a ongōnāni adīnque mōnitō onōmpo æmæmpoque go mēōnaa īñonte tōmēnāni tōnō godongāmæ quēwentamōnīpa. Tōmēnāni guīquēñē, Wængonguī Tæiyæ Waēmō Ōnōwoca apænecā ēñēnīnāni īnte Pabodo īngante, Bītō wæquīnque Eedotadēē īñōmō gocæ cæbīpa, ante wææ ānānitapa. ⁵ Mānōmaī ante wææ ānāni ēñēmōni incæte mōnitō, Mānīmpoñæque quēwēñōmōni īntamōnīpa, ante adīnque wadæ gotamōnīpa. Īnīnque tōmēnāni nāni quēwēñōmō yabæ īnō tōmēnāni nāni wencabo tōmānāni ænte māodāni godīnque mōnitō emōnaiya pōnīnque godongāmæ da guīcapodīnque Wængonguī īngante apænetamōnīpa. ⁶ Apænete ate mōnitō, Gomōnīpa, ānīnque go ñænæ wīpodē adopodē guīdīnque wogaa gocæ cæyōmōnīte tōmēnāni wææte, Waa goedāni, ānīnque ocæ emænte tōmēnāni oncō godānitapa.

⁷ Mōnitō īñōmō Tīdo īñōmō wadæ tao wogaa godīnque Todēmaida īñōmō

pō tōmæwæ æīdīnque mānīñōmō nāni pōnencabo īnānite adīnque mōnitō, Pōmōnīpa, ānīnque tōmēnāni tōnō adoōnæque quēwentamōnīpa. ⁸ Īimō ate wadæ godīnque Tetadea nāni quēwēñōmō pōnīnque Pedīpe oncōnē pō guīte quēwentamōnīpa. Wēēñēñēdē Itota nānō nē ēmīñænāni, Mōnō pōnencabo beyæ ante nē cædāni tīæte ganca īnāni incædānīmpa, ante nāni Tīæte ānōnāni īñōnāni adocā Pedīpe tōmēnāni nāni pōnencabo beyæ ante nē cæcā īnongā īnte Codīto waa pōnī nānō pōnō cægaīnō ante nē apænecā īnongāīmpa. ⁹ Tōmengā wēnāni baquedānīque mengāa go mengāa īñōnānīte Wængonguī Ōnōwoca pōnō cæcā ate tōmēnāni Wængonguī beyæ nē apænedāni īnōnānīmpa. ¹⁰ Mōnitō Pedīpe weca tæōnæ quēwēmōni ate wacā ongūīñgā tōmengā emōwo Agabo Wængonguī beyæ nē apænedongā īnte Oodeabæ quēwente wææ pongantapa. ¹¹ Mōnitō weca pōnīnque tōmengā Pabodo pacadeyænta ænīnque nāmā onōmpo gotī wīmpote wæi onōwa gotī wēwadīnque īmaī ante apænecantapa.

—Wængonguī Tæiyæ Waēmō Ōnōwoca botō īmote æbānō ante apænecāā, ante apænebo ēñēedāni. Oodeoidi Eedotadēē nē quēwēnāni īñōmō īī pacadeyænta nē ēādīngā īngante mānōmaī gotī wīnīnque oodeoidi īnāmaī īnāni nēmpo pædæ godōnāni æncædānīmpa, ante do apænecā ēñēmopa, ante Agabo apænecantapa.

¹² Mānōmaī apænecā ēñēnīnque mōnitō Tetadea quēwēnāni tōnō Pabodo īngante wææ wææ apænedīnque, Eedotadēē godāmaī īmāwe. ¹³ Ante wææ āñōmōnīte Pabodo wææte,

—Mīnitō īñæmpa Ca ca wæmīni ēñente wædīnque wætawente awædō. Edæ Eedotadēē goyōmote bæi ongote gotī wīnāni incæte wænōnāni wæmo incæte botō īñōmō ñīmpo cædāmaī īnte mōnō Awēñē Itota emōwo beyænque cōwē gocæboīmpa.

¹⁴ Ante mānōmaī apænecā ēñēnīnque mōnitō ancaa wææ āñōmōnīte Pabodo, Cōwē gocæboīmpa, ante ñīmpo cædāmaī īnte angā wædīnque mōnitō wææte edæ, Wængonguī nānō ānō bai bacæīmpa, ante adīnque mōnitō ee ate pæ wēēnetamōnīpa.

¹⁵ Īnīnque mānīmpoñæ mānīñōmō quēwēnīnque, Nōwo mōnō Eedotadēē gocæīmpa, ante cædīnque Pabodo tōnō godongāmæ ee gotamōnīpa. ¹⁶ Goyōmōni Tetadea īñōmō quēwēnāni īnte Itota īngante nē tee empote quēwēnāni pancadāniya mōnitō tōnō godongāmæ godīnque, Nāatōō oncōnē owocæmīnīmpa, ante mānīnganca ænte māmōnāni pō guītamōnīpa. Tōmengā īñōmō wāā tēiwæñē Tipīdebæ nē quēwēnīngā īnte dobæyedē

Itota nānō nē ēmiñængā badingā inte quēwēngāimpa.

Tantiago weca Pabodo ēñacæ gocampa

¹⁷ Tömengā oncōnē pō guii mōmōnique go Eedotadēē pōñōmōni māniñōmō quēwente nē pōnēnāni iñōmō, Waa pōmīni amōnīpa, ante todānitapa. ¹⁸ Ayæ iimō ate Pabodo tōnō godongāmæ mōni cæcantapa, Tantiago weca ēñacæ gotamōnīpa. Tömengā weca pōñōmōnite nē pōnēnāni inānite nē aadāni nē Picænāni tōmānāni adoyōmō pōnānitapa. ¹⁹ Adinque Pabodo, Waa quēwēmīni, āninque godōmenque iimāi ante apænecantapa. Mēmōidi ēñēdāni, āninque, Botō oodeoidi ināmai ināni weca gote cæyōmote Wængonguī iimāi godongāmæ waa cæcantapa, ante Wængonguī nānō cædinō ante tōmengā adodō adodō ante apænecā ēñēnānitapa. ²⁰ Ēñēninque nē aadāni Picænāni guiquēnē, Wængonguī, Bitō waa pōni cæbitapa, ante godongāmæ watapæ apænēdānitapa. Ayæ Pabodo ingante wæætē apænēdinque,

—Biwi ēñēmi. Oodeoidi æpodō miido ganca ināni ñōwo do pōnente badāni abitapa. Tömēnāni iñōmō Wængonguī nānō wææ angainō ante tōmānāni ēñente cōwē cædāni abitawo. ²¹ Ayæ edæ bitō Pabodobi wēnæ wēnæ cædāmai iñōmite wadāni bitō imitedō ante babæ wapiticæ godō oodeoidi inānite iimāi ante tedewēnāni ēñēnānīpa. Tömēnāni, Pabodo wayōmō wayōmō godinque oodeoidi wabæca quēwēnāni inānite bee tente odōmōninque iimāi ante apænecampa, ante tedewēnānīpa. Pabodo, Minitō wēnāni inānite ēō togænāmai iedāni, āninque, Dodāni nāni angainō mīni ēñēnō ante ñimpo cæedāni, ante ānewengampa, ante tedewēnānīpa. Ayæ godōmenque āninque, Mōitee wodi nānō wææ angainō ante wido cæedāni, ante Pabodo ānewengampa tōō. Ante tōmēnāni bitō imitedō ante babæ ante tedewēnānīpa. Iñæmpa bitō mǎnōmǎinō ante ānāmai iñōmite tōmēnāni oodeoidi inānite babæ ante apænēdāni ēñēnānīpa cæbii. ²² Īninque, Pabodo do pongāimpa, ante oodeoidi do ēñenguīnāni inānīpa, ante pōnente wædinque mōnitō ñōwo, Æbānō cæte wææ cæquīi, ante wæmōnīpa. ²³ Īninque, Pabodo nō cæcā iñongante wadāni babæ wapiticæ tededānīpa, ante oodeoidi ēñēncædānīpa, ante wææ cædinque bitō iimāi cæcæbiimpa āmōnīpa.

“Pabodo ēñēmi, ānānitapa. Mōnitō weca onguīñænāni mengāa go mengāa ināni ñōwo ongōninque, Wængonguī beyænque ante cōwē cæcæmōnīpa, ante nē ānīnāni inte tōmēnāni nāni ānīnō bai iñque cæquīnāni inānīpa. ²⁴ Tömēnāni, Mōnitō ānīnō ante do iñque cædimōni inte wentamō mongænāmai iimōni acædānīpa, ante cædinque, Wængonguī quī, ante godoncæ

cædānīpa. Īninque bitō iñōmō mānīnāni inānite ænte godinque tōmēnāni tōnō godongāmæ, Wængonguī quī, ante godōe. Ayæ bitō eyepæ pædæ godōmi āninque tōmēnāni nāni godonguēnencōo godonte æninque, Wængonguī quī, ante godōninque tōmēnāni ocaguī tōmanguī ocāa pōni ēō tocate incædānīpa. Bitō mǎnōmai tōmēnāni tōnō iñacabo cædinque Mōitee wodi nānō angainō bai cæbi adinque oodeoidi wæætē, Æ, Pabodo nō cæcā iñongante wadāni iñōmō babæ wapiticæ tededānīpa, ante ēñēncædānīpa,” ante nē Picænāni ānānitapa.

²⁵ “Ayæ oodeoidi ināmai ināni guiquēnē nē pōnēnāni badinque æbānō cæquēñēnāni inānīpa, ante pōnente wædinque mōnitō do godongāmæ pōnēninque tōmēnāni inānite iimāi ante yewæmontamōnīpa. Wadāni, Wængonguīdi quī, ante cænguī nāni cōnōnincoo ante mīnitō cænāmai gomō aedāni. Wepæ owemōingā adinque cæningā ñē wimencate wæningā adinque cænāmai iedāni. Ayæ nānōogængā ināmai iñongante mīnitō godō guēa mōnāmai iedāni, ante do yewæmontamōnīpa,” ante nē aadāni Picænāni Pabodo ingante apænēgadānīpa.

Wængonguī oncōnē Pabodo ingante bæi ongōnānīpa

²⁶ Iimō ate ñāō bayonte nē aadāni Picænāni nāni ānīnō bai ēñente cædinque Pabodo mengāa go mengāa ināni inānite ænte māocā gote cæyōnāni tōmengā nānō tæiyæ wæmō baquinque ante tōmēnāni tōnō Mōitee wodi nānō wææ angainō ante ēñente cæcantapa. Mǎnōmai cædingā inte tōmengā Wængonguī oncō ñænæncō yabæcōnē go guidinque māniñōmō cædāni inānite apænēdinque, Mōnitō adoque Wængonguī itædē go ate Mōitee wodi nānō angainō iñque cæmōni ate iñnāni iñōmō, Wængonguī quī, ante baō pædæ pōnōnāni æninque tancæmīnīpa, ante Pabodo tōmēnāni beyæ ante apænecantapa.

²⁷ Ayæ ōnompō æmæmpoque go mēōnaa nānō ānimpoñæ wodo iñque ba ate oodeoidi Atiabæ quēwente nē pōnīnāni guiquēnē Wængonguī oncō ñænæncō yabæcōnē ponte ayōnāni Pabodo a ongongā. Adinque māniñōmō ōnonque ongōnāni inānite, Mōnō piinte cæcæiimpa, ante ānāni ēñēninque iñāni wæætē ænguī badānitapa. Ayæ Pabodo ingante bæi ongonte, ²⁸ aa pedinque tōmengā ingante nē piinte ānāni iñōmō, “Idægoidi cōwā aedāni” ante, “Īngā ingampa cæmīnī. Pō godongāmæ cæedāni. Tömengā inguipoga tōmāo godinque tōmāmæ quēwēnāni inānite māo apænēdinque iimāinō ante tedewengampa. Idægoidi wēnæ wēnæ cædāni inānīpa,

ante cōwē ānewengampa. Wængonguī oncō ñæñæncō incæ ōnonconque impa, angampa. Ayæ Wængonguī nānō wææ angainō ante mōnō ēñēnāmaī ingæīmpa, ante tōmengā ānewengampa tōō. Ayæ īñōmō oncō tæiyæ waēmō oncō īñonte tōmengā wæætē guidiegoidi inānite ænte māmō īncōnē guīdinque otānē ōñō bai cæcantapa cæminii,” ante pūinānitapa.

²⁹ Do edæ wacā Todopīmo īñōmō Epeto īñōmō quēwēningā inte Eedotadēē pōninque Pabodo tōnō cægōna īnōnāīmpa. Mānōmaī guēa cægōna adinque oodeoidi, Æ, īngā oodeocā īnāmaī īñongante Pabodo do Wængonguī oncō ñæñæncō yabæcōnē ænte māmōngā wāānē guībaingampa, ante wawique pōnēninque mānīnō ante wapiticæ apænedānitapa.

³⁰ Mānōmaī ante ānewēnāni ēñēninque Eedotadēē quēwēnāni tōmāo īñōmō Yæ yæ āninque pogodo pōnānitapa. Ponte Wængonguī oncō ñæñæncō yabæcōnē māo pō guīdinque Pabodo ingante bæi ongonte æninque oncodō wēa mantao godinque odemō do tee mōnedānitapa.

³¹ Ayæ godōmenque, Wængongæīmpa, ante tæcæ cæyōnāni adocanque mæi odōmāno tontadoidi awēnē cōmantante ingante apæñecantapa. Eedotadēē tōmāo Yæ yæ āninque pogodo pōnānīpa cæbii. ³² Ante mæi angā ēñente wædinque awēnē cōmantante īñōmō tontado capitāōidi tontadoidi inānite, Pōedāni, āninque nē Yæ ānāni weca pogodo wææ do pōnānitapa. Īninque awēnē cōmantante tōnō tontadoidi do wæænte pōnānīpa, ante adinque wadāni wæætē Pabodo ingante nē tæi tæi pānīnāni inte ñōwo ñimpo cædinque ee adānitapa. ³³ Pabodo weca pōninque awēnē cōmantante angā ēñēninque tontadoidi wæætē Pabodo ingante bæi ongōninque yaēmēngō mēmēña goti wīnānitapa.

Awēnē cōmantante īñōmō, Æcānō ingāi, ante ayæ, Quīnō wēnæ wēnæ cæcāi.

³⁴ Āñongante pancadāniya, Īmaī cæcantapa, āñōnāni wadāni wæætē, Wīi Īmaī wadō cæcantapa, āninque wææ wææ āñōnānite tontadoidi awēnē cōmantante īñōmō, Nōingā ante æbānō cæte ēñenguīmo, ante wædinque tontadoidi inānite angā ēñēninque Pabodo ingante tōmēnāni wææ cæte īñōmō ænte mæicæte ante cædānitapa. ³⁵ Ænte godinque tēwaimpa ganca tæcæ pōñongante godongāmæ ongōnāni godōmenque ænguī badinque wīwa cæcæ cædāni wædinque tontadoidi wæætē Pabodo ingante wææ cædinque ōñōnāncapæi ængō cædinque adīmōngā næænte mæidāni tēwaimpaa æicantapa. ³⁶ Ayæ tōmānāni edæ tee empote pōnāni īñōmō Yæ yæ āninque, “Cōwē wido cæcæīmpa,” ante ancaā ānānitapa.

Pabodo nāmā wææ apæñecampa

³⁷ Wææ cætiñōmō tæcæ mangui guicæte ante cæyōnāni Pabodo īñōmō tontadoidi awēnē cōmantante ingante apæñedinque,

—Bitō Ao āmi ēñente ate botō adodeque bitō imite apæñecæboīmpa.

Āñongante,

—Īñæmpa bitō guidiego tededō tedebi imitawo. ³⁸ Bitō Īñæmpa equitobi inōmi inte edæ doyedē, Wido cæcæīmpa, ante cædinque nē, Wængongæīmpa, ante nāni ānincabo īñōnānite coatodo mūido ganca ināni inānite ōñōmæca ænte māobi godānitapa. Botō ayōmo bitō adobi imitapa tōō.

³⁹ Āñongante Pabodo wæætē,

—Īñæmpa botō waobo ēñagaīmo inte ood-eobo inōmo ĩmopa. Botō wīi ōñōñōmonque ēñagaīmo ĩmopa. Tiditiabæ Tadoto nāni nangui quēwēñōmō ēñagaīmo ĩmopa cæbii. Ao āmi ate botō Īnāni inānite apæñebo ēñēmainānīpa.

⁴⁰ Āñongante Ao angā ate tēwaimpaa adiyæ gongæninque godongāmæ ongōnāni inānite Pabodo, Apocænē iedāni, ante bai cædinque compo compo cæcā. Adinque tededāmaī ongōnāni ate tōmengā ebēdeoidi nāni tededō tededinque ĩmaī ante apæñecā ēñēnānitapa.

22

¹ “Botō tōñīñamīni ĩmīni ēñēedāni. Botō wæmpomīni ĩmīni botō nāmā wææ apæñebo ēñēedāni.”

² Ante Pabodo ebēdeo tededō apæñecā ēñēninque tōmēnāni, Æ mōnō tededō apæñecampa, ante wædinque godōmenque ēamonca nōwæ ongōñōnāni tōmengā ĩmaī ante apæñecantapa.

³ “Botō īñōmō oodeobo ingaīmo ĩmopa. Tiditiabæ Tadoto īñōmō ēñagaīmo inte botō Eedotadēē pante pægabōi aedāni. Īñōmō pædinque Gāmadiedo nē odōmōngā weca adimo inte botō mōnō mæmæidi nāni wææ angainō ante ædæmō ēñēninque adodō ante ēñente cæte pægabōīmpa. Mīnitō, Wængonguī beyæ ante mōnō cōwē cæcæīmpa, ante ñōwoōnæ cæminīpa. Mīnitō cæminī bai botō adobai Wængonguī beyæ ante cæcæte ante cōwē nangui cædinque quēwengaboīmpa. ⁴ Īninque, Itota ōñædē godō Taadō bai ingampa, ante nē pōnēnāni inānite botō, Pāmo wæncædānīpa, ante togænte pangaboīmpa. Onguīñænāni incæ onquiyæñāni incæ tōmānāni inānite bæi ongōninque botō wadāni nempo pædæ godōmo æninque tōmēnāni wæætē nē pōnēnāni inānite māo tee mōnedāni wægadānīmpa.”

⁵ “Mānōmaī cædinque botō, Godōmenque Daāmaco īñōmō godinque botō, Taadō, ante nē pōnēnāni inānite bæi ongonte goti winte adodō Eedotadēē īñōmō ænte māmō pædæ

godōmo æninque awēnēidi wæætē tōmēnāni inānite pānāni wæcædānimpā, ante cætabopā. Mānōmāi cæcæte ante cæbo adinque, Wængonguī quī, ante nē godongā ñænængā pōni inongā tōnō nē aadāni nāni Picæncabo tōnō Ao āninque, Mōnitō tōñiñadāni Daāmaco iñōmō quēwēnāni acædānimpā, ante cadota ante yewæmōnāni ænte gotabopā. Īninque, Botō æbānō cæboo, ante nē againāni inte awēnēidi incæ edæ, Pabodo nāwangā angampā, ante ñowo nē apænequēnēnāni inānipā,” ante Pabodo angantapā.

Botō wēēnē pōnēwengainō ante ñimpo cædinque wadō ante pōnēmopā, ante Pabodo apæncampā

(Nāni Cægainō 9.1-19, 26.12-18)

⁶ Āninque Pabodo, Īimāi cægaboimpā, ante godōmenque apænecantapā, “Botō taadō godinque tæcæbæcā iñonte Daāmaco obo ponte ayōmote oōnædē iñontobæ ñāō botō weca pō godongāmæ guinæ gongæ ate wædinque, ⁷ botō guidōmēmæ tæ go wææntabopā. Ayæ ēñēñōmote, ‘Taodo, Taodo. Botō imote quīnante togænte pāmii.’ ⁸ Āñongante, ‘Awēnē, æbidō inōmi imii.’ Ante wæyōmote tōmēngā, ‘Itota Nāatadeta quēwēnimo inte māniomodō bitō nē togænte pānōmo imopā,’ ante apænecantapā. ⁹ Mānōmāi apæneyongā botō tōnō godongāmæ godāni guiquēnē ñāō gongænque adinque botō imote nē apæncā nānō tededō ante ēñēnāmāi inānitapā. ¹⁰ Botō iñōmō, ‘Awēnē, quīnō cæquēnēmo imoo, ante āmi ēñēmoe.’ Āñōmote mōnitō Awēnē wæætē, ‘Bitō ængæ gantidineque Daāmaco iñōmō goe. Botō, Taodo iimāi cæcæcāimpā, ante wacā ingante Daāmaco iñōmō nē quēwēngā ingante do apænebo ēñengampā cæbii. Bitō Daāmaco iñōmō gote ongōñōmi tōmēngā wæætē bitō imite apæncā ēñente cæcæbiimpā,’ angantapā. ¹¹ Ayæ ñāō gongæ adinque botō bee wodōmonte bāi bayōmote botō tōnō godongāmæ godināni wæætē tōō æmænte Daāmaco iñōmō māodāni gotabopā,” ante Pabodo apænecantapā.

¹² Mānōmāinō ante apænedinque Pabodo godōmenque apænecantapā. “Māniñōmō gote ongōñōmo wacā tōmēngā emōwo Ānāniya botō weca pongantapā. Tōmēngā iñōmō Wængonguī ingante guīñente wædongā inte dodāni nāni wææ angainō ante cōwē ēñente cæcā inongāimpā. Īninque oodeoidi māniñōmō quēwēnāni tōmānāni tōmēngā ingante waa adōnānimpā. ¹³ Tōmēngā iñōmō botō weca pō næ gongæninque, ‘Taodo, bitō botō biwī imi, ñowo waa bamonte ae.’ Tæcæ āñongante botō æmō adinque tōmēngā ingante waa atabopā. ¹⁴ Tōmēngā ayæ apænedinque, ‘Mōnō mæmæidi Wængonguī incæ, Botō

æbānō cæquimo imoo, ante botō pōnente angainō ante bitō ēñencæbiimpā, ante cædinque bitō imite apænte ængampā. Ayæ, Mōnō nō cædongā ingante tōmēmi acæbiimpā. Adocā apæncā ēñencæbiimpā, ante cædinque Wængonguī bitō imite do apænte ængampā. ¹⁵ Īninque nē adīmi inte nē ēñēmi inte bitō iñōmō edæ bitō adinō ante bitō ēñēnīnō ante, Nāwangā impā, ante tōmāmæ quēwēnāni inānite māo apænebi ēñencædānimpā. ¹⁶ Ñowo iñōmō quīnante a ongōmii. Ēngæ gantidineque Itota emōwo apænedinque, Wēnæ wēnæ botō cædō pōnō ñā mēnongabi quēwēmoe, āninque æpænē guīe.’ Ante Ānāniya angā ēñēninque botō æpænē guīitabopā,” ante Pabodo apænecantapā.

Oodeoidi weca gotabopā, ante Pabodo apæncampā

¹⁷ “Ayæ ate adodō Eedotadēē pontabopā. Ayæ Wængonguī oncō ñænæncō yabæcōnē go guīdinque Wængonguī ingante apænedinque botō ate bāi cæwēnente ayōmō, ¹⁸ mōnō Awēnē botō imote iimāi ante apænecantapā. ‘Bitō botō imote ante nō apænebi incæte iñāni ēñēnāmāi ināni inte Baa anguināni inānipā cæbii. Ñowo Eedotadēē quingæ wodii tao gobāwe.’ ¹⁹ Āñongante botō, ‘Awēnē ēñēmi, antabopā. Oodeoidi odōmōincōnē wacōnē wacōnē go guīdinque botō bitō imite nē pōnēnāni inānite māo tee mōnedinque tæi tæi pānimo imopā. Mānōmāi impā, ante iñāni do ēñēnānipā. ²⁰ Ayæ, Itota incæ nāwā Awēnē inongā ingampā, ante nē apæncā iñongante Etebā wodi ingante wæñōnāni wæñongā botō edæ Ao āninque nē wæñōnāni weocoo aate a ongontabopā, ante tōmēnāni do againāni inte botō imote waa aquīnāni inānipā.’ ²¹ Ante wææ apænebo incæte Wængonguī Awēnē wæætē, ‘Ñowo goe, āmopā, angantapā. Gobæ oodeoidi ināmai ināni weca bitō imite da godōmo gocæbiimpā,’ ante da godongā gotabopā,” ante Pabodo apænecantapā.

Pabodo tontadoidi awēnē cōmantante weca ongongampā

²² Pabodo, Oodeoidi ināmai ināni weca angā gotabopā, ante nānō apænedī ganca godongāmæ ongōnāni ēñēē gōñānitapā. Wæætē māniye apæncā ēñente wædinque tōmānāni yedæ āninque, “Oodeoidi ināmai ināni weca godingā iñōmō edæ quēwēnāmāi ingūēngā awædō. Tōmēngā ingante mōnō wo ewēngæimpā.” ²³ Āninque tōmēnāni godōmenque ænguī badinque Yæ yæ āninque nāmā weocoo yabæcooque gāni tadongadinque wanæ wanæ cædinque onguipo guidimō ō æninque wo ææntodō wo ææntodō anca cædānitapā.

24 Mānōmaī ænguī bate wēnæ wēnæ cædāni adinque tontadoidi awēnē cōmantante angā ēñēninque Pabodo ingante wææ cæte īñōmō manguidāni guicantapa. Ayæ, Quīnō wēnæ wēnæ cæcāi ante piinte ānānii, ante ēñencæte ante tontadoidi īnānite apænedinque, Mīnitō cōwē cædinō bai cædinque tæi tæi pāmīni caate wædinque Pabodo tōmāā tōmengā cædinō edonque pōnī apæncēcā ēñencæboimpa, angantapa. 25 Ēñēninque tōmengā ingante pancæte ante æmontaimenca tæcæ goti wīninque ñō cæyōnāni Pabodo īñōmō tontado awēnē capitāō māniñōmō ongongā ingante apænedinque,

—Īñæmpa apænte ānāmaī īñōnāni botō odōmāno onguīñæmo īñōmote quīmæ pāwēmīni. Mānōmainō cædinque mīnitō awēnēidi nāni wææ angāinō ante dicæ ēñente cæmīniyaa.

26 Āñongā capitāō wæætē awēnē cōmantante weca godinque,

—Īngā īñōmō odōmāno onguīñængā īnogā ingā атаque. Ñōwo æbānō cæquīmii.

27 Angā ēñente wædinque cōmantante īñōmō Pabodo weca pōninque tōmengā ingante,

—Bitō nāwangā odōmāno onguīñæmi īmitawo.

Āñongante Pabodo,

—Ao, bitō ā bai botō māniñōdō īmopa, angantapa.

28 Pabodo apæncēcā ēñēninque cōmantante wæætē,

—Botō guiquēnē odōmāno īnāmaī ēñagaīmo inte māniñō bacæte ante cædinque nanguī godōmo æninque odōmānoidi wæætē botō īmote, Odōmānobi īmipa, ante yewæmōnāni bagaboimpa.

Apæncēcā ēñēninque Pabodo wæætē,

—Botō guiquēnē odōmānobo ēñagaīmo inte edæ odōmānobo īnōmo īmopa, ante apæncēcāntapa.

29 Mānōmaī apæneyongā nē pancæ cædināni guiquēnē do tōmengā ingante emō cæte wadæ godānitapa. Ayæ cōmantante īñōmō, Pabodo odōmāno onguīñængā īñongante botō āmo yaēmengonca goti wīnānīpa tōō, ante guīñente wædinque, Botō awēnēidi pīīnāni wæcæ wæ, ante wægacāimpa.

Oodeoidi nāni Apænte Āincabo weca Pabodo ongongā

30 Īmō ate cōmantante īñōmō, Quīnō Pabodo wēnæ wēnæ cæcāi ante oodeoidi piinte ānānii, ante ēñencæte ante Pabodo ingante āñecā ta pongantapa. Ayæ, Wængonguī quī, ante nē godōnāni ñæñæñāni tōnō oodeoidi tōmēnāni nāni nē Apænte Āincabo īnānite

āñete godongāmæ ponte ongōñōnāni Pabodo ingante ænte māwæ tōmēnāni weca gō cæcā gongængantapa.

23

1 Pabodo īñōmō oodeoidi nāni nē Apænte Āincabo īnānite gomō adinque,

—Botō mēmōidi ēñēedāni. Botō

mīmō entawente nāmā apænte cædinque Wængonguī beyæ botō cæquēnēnō ante wēēñēñedē īnque cædinque cōwē ñōwo ganca adobai cædinque quēwēmopa.

2 Ante mānōmaī apæncēcā ēñente wædinque, Wængonguī quī, ante nē godongā ñæñængā pōnī īnogā Ānāniya guiquēnē Pabodo gāānē ongōnāni īnānite apænedinque, Ōñoneca tæi tæi tadeedāni, angantapa.

3 Āñongā Pabodo wæætē,

—Bitō īñæmpa botō imote apænte ancæte ante Mōitee wodi nānō wææ angāinō ante cæbitawo. Incæte adode nānō wææ angāinō ante ēñēnāmaī inte bitō edæ, Tæi tadeedāni, ante pōnō āmi awædō. Bitō weocoo wæmoncoo ēñabi incæte mīmō wentamō entawēninque cæyōmite Wængonguī bitō imite nāēmæ tæi tadecæcāimpa tōō.

4 Ante apæncēcā ēñēninque Pabodo gāānē ongōnāni wæætē,

—Bitō īñæmpa, Wængonguī quī, ante nē godongā ñæñængā pōnī īñongante quīmæ tedewēmii.

5 Āñōnānite Pabodo wæætē,

—Botō tōniñadāni ēñēedāni. Botō, “Waadāni awēnē īñongante tōmengā ingante wēnæ wēnæ tededāmaī incæbiimpa,” ante do wææ yewæmongatimpa, ante do ēñēmopa. Īninque botō, Īñōmō ongongā, Wængonguī quī, ante nē godongā ñæñængā pōnī īnogā ingampa, ante ēñēnāmaī inte botō mānōmainō ante apænetabopa.

6 Ante apænedinque Pabodo, Īnāni pancadāniya Tadoteoidi īñōnānite pancadāniya Paditeoidi īnānīpa, ante adinque tōmēnāni nāni nē Apænte Āincabo īnānite aa pedinque,

—Botō mēmōidi ēñēedāni. Botō Paditeo wēmo nē ēñagaīmo inte botō mæmpo Paditeo nānō ingai bai botō adobai Paditeobo īnōmo īmopa. Māniñōmō īnōmo inte botō, Mōñō ñāni omæmōnte watapæ quēwengæimpa, ante pōnēmopa. Īninque māniñe botō pōnēnō beyænque botō imote apænte āninque mīnitō pancæ cæmīni awædō, angantapa.

7 Pabodo mānōmainō ante apæncēcā ēñente wædinque Paditeoidi tōnō Tadoteoidi dodāni nāni pōnengāinō ante wæætēdō wæætē ānewēninque Paditeoidi nānēñē Tadoteoidi nānēñē nāni cabo nāni cabo badānitapa. 8 Īmaī impa. Tadoteoidi guiquēnē, Mēwoga waomō ēwocamō inte mōnō ñāni omæmongæimpa, ante, Babæ ancædō, ante Baa āninque, Ōñōwocaidi tōnō

anquedoidi Wængonguī weca owodānīpa, ante adobaī edæ Baa ānāni īnōnānīpa. Paditeoidi guiquēnē mēnea ante pōnēnīnque Ao ānāni īnōnānīpa. ⁹ Īnīnque wadō wadō tedete ogæ tedeyōnānīte Paditeoidi tōmēnāni nē odōmōnāni pancadāniya ængæ gantīdīnque,

—Īngā īñōmō mōnitō ayōmōni wēnæ wēnæ cædāmaī ingampa tōō. Wæætē edæ anquedo incæ wacā ōnōwoca incæ Wængonguī weca owocā īnongā inte tōmēngā ingante apænecā īmaingampa ānewēmīnīi.

¹⁰ Ante nangūī ogæ tedeyōnāni tōmānāni godōmenque Yæ yæ ānāni ate wædīnque tontadoidi awēnē cōmantante īñōmō, Pabodo ingante æmæmæ īnō tōō godō æmæmæ īnō tōō godō cædīnque æi guīñænāni wæmaingampa. Ante pōnente guīñente wædīnque tontadoidi īnānīte angā wæænāni ate, Pabodo ingante bæi ongonte ō ænīnque wææ cæte īñōmō ænte mæi tee mōneedāni, angā ēñente tee mōnedānītapa.

¹¹ Īmō ate woyowotæ mōnō Awēnē īñōmō Pabodo weca ponte apænecantapa. “Pabodo, Guīñente wædāmaī incæbiīpa. Bitō doyedē Eedotadēē īñōmō botō īmotedō ante apænedīnque, Nāwā Awēnē īnongā ingampa, ante apænebitawo. Nōwo īñōmō do bitō apænedō bai Odōmā īñōmō godīnque adobaī apænecæbiīpa,” angantapa.

Pabodo ingante wængongæīmpa, ante cædānīpa

¹² Nāō bayonte Oodeoidi pancadāniya guiquēnē godongāmæ pōnēnīnque īmaīnō ante Ao ānānītapa. Cænāmaī bedāmaī īñimo inte mōnō Pabodo ingante wængongæīmpa, ante cædīnque, Pabodo mīī quēwēñongante mōnō cabo incæ æcānō cæna æcānō beda māningā nānō wængūinque cæcampa. ¹³ Onguīñænāni nē ānāni īñōmō coadenta ganca īnāni ayæ godōmenque nangūī īnāni godongāmæ pōnēnīnque mānōmaī ānewēnīnque cædāni īnānītapa. ¹⁴ Īñāni īñōmō, Wængonguī quī, ante nē godōnāni ñænænāni tōnō nē aadāni nāni Picæncabo weca godīnque īmaī ante apænedānītapa.

—Mōnitō godongāmæ Ao ānīnque, Pabodo ingante wængongæīmpa. Edæ mīī quēwēñongante æcānō cæna æcānō beda nānō wængūinque, ante āmōnīpa cæmīnīi. ¹⁵ Mīnitō tōnō wadāni mīni Apænte Āincabo īnōmīni inte mīnitō īñōmō, Pabodo æbānō cæcāi, ante ædæmō ēñencæte ante wæte bai apænedīnque tontado awēnē cōmantante ingante babæ ante āmīni ēñēnīnque tōmēngā wæætē Pabodo ingante mīnitō weca ænte poncæ cæcæcāīmpa, āmōnīpa. Mānōmaī babæ āmīni ēñente cædīnque cōmantante wæætē Pabodo ingante māwængā tæcæ wææñongante mōnitō guiquēnē taadō wææ

wānōnīnque bæi ongonte edæ wæñōmōni wæncæcāīmpa āmōnīpa.

¹⁶ Āñōnāni Pabodo nānōwāa īñōmō edæ do ēñēngantapa. Ēñēnīnque tōmēngā tontadoidi nāni wææ cæte īñōmō do go guīdīnque Pabodo ingante apænecā. ¹⁷ Ēñēnīnque Pabodo wæætē tontadoidi awēnē capitāō ingante apænedīnque,

—Īngā edēningā ingante mīnitō awēnē cōmantante weca ænte manguībi guīcæe. Tōmēngā cōmantante ingante adodeque apænecæcāīmpa.

¹⁸ Angā Ao ānīnque capitāō wæætē māningā edēningā ingante ænte guīdīnque cōmantante ingante apænecantapa.

—Pabodo mōnō nē tee mōnedongā īñōmō botō īmote aa pedīnque īmaī angantapa. Īngā edēningā ingante awēnē cōmantante weca ænte māobi guīdīnque tōmēngā awēnē ingante adodeque apænecæcāīmpa, angantapa.

¹⁹ Ante apænecā ēñēnīnque cōmantante īñōmō edēningā ingante tōō æmænte nānēnē māocā goyongante,

—Botō īmote æbānō apænecæte ante pōmīi.

²⁰ Āñongante,

—Awēnē ēñēmi. Oodeoidi godongāmæ pōnēnīnque īmaī babæ cæcæte ante cædānīpa. Tōmēnāni, Pabodo æbānō cæcāi, ante ædæmō ēñencæte ante bai apænedīnque bitō īmite babæ ante apænecæ cædānīpa. Bitō īmō ate Pabodo ingante tōmēnāni nāni nē Apænte Āincabo weca ænte poncæbiīpa, ante cædīnque babæ cæcæte ante cædānīpa. ²¹ Tōmēnāni īñōmō, Pabodo mīingā quēwēñongante æcānō cæna æcānō beda nānō wængūinque, ante nē ānōnāni inte edæ, Wængongæīmpa, ānīnque cædānīpa. Adodāni nāni cabo incæ coadenta ganca onguīñænāni wænoncæte ante taadō do wææ wānōnīnque edæ, Wæñōmō wæncæcāīmpa, ante edæ a ongōnānīpa cæbīi. Tōmēnāni, Bitō æbānō Ao angūīmi, ante ēñencæte ante ponte ānewēñōnāni bitō īñōmō wæætē tōmēnāni nāni ānō bai cædāmaī incæbiīpa āmōpa.

²² Ante edēningā apænecā ēñēnīnque cōmantante īñōmō, Bitō, Awēnē ingante ante mānōmaī apænetabopa, ante wacā ingante apænedāmaī pæ wēenecæbiīpa. Nōwo edæ goe, angantapa.

Pedīque weca Pabodo ingante ænte māodāni gocampa

²³ Edēningā ingante mānōmaī angā gocā ate cōmantante wæætē awēnēna capitāōna mēnaa īnate aa pecā pōñōnate tōmēna īnate īmaī angantapa. Mīnatō nōwo tontadoidi ōnōwa nē godāni dotiento ganca īnāni tōnō cabayo mongænte nē godāni tetenta

ganca īnāni ayæ tapa nē næænāni dotiento ganca īnāni tōnō mānimpodāni īnānite īlmaī ancæmīnaimpa. Mīnitō nōwoōnæ eyepæ cædinque wantæ wantæ guīfongā wadæ godinque Tetadea ganca goedāni, ante da godmīna tao gocædānimpā. ²⁴ Ayæ Pabodo beyæ cabayoidi āmi ænte gocædānimpā. Tōmengā ingante wææ aadinque pancabaa awēnē gobedōnadodo Pedique weca āmīna ænte māodāni cabayo mongænte adīmōngā gocæcāimpā. ²⁵ Ānīnque awēnē cōmantante īfōmō cadota ante īlmaī ante yewæmōngantapa.

²⁶ Pedique ēñēmi.

Bitō acæbiimpā, ante botō Codaodio Ditia īnōmo inte nōwo yewæmōmopa. Bitō nē gobedōnadodo awēnē īnōmi inte waēmō pōnī īmpā, āmopa. Waa quēwencæbiimpā, āmopa.

²⁷ Īngā ingante oodeoidi bæi ongonte wænoncæ cæyōnānite botō wæætē, Īnæmpā īngā īfōmō odōmāno onguīfongā ingampa, ante do ēñēnte wædīmo inte tontadoidi tōnō godinque tōmengā ingante gā pe æmpote ō ænte wææ aatabopa. ²⁸ Ayæ oodeoidi, Pabodo wēnæ wēnæ cæcāi, ante quīnante piinte ānāni. Ante ēñēncæte ante cædinque botō tōmengā ingante tōmēnāni nāni nē Apænte Āincabo weca ænte gotabopa. ²⁹ Ænte gote ēñēñōmo tōmēnāni dodānīque nāni angainonque ante, Pabodo ēñēnāmaī cæcampa, ante piinte ānāni wætabopa. Īnīnque botō ayōmote tōmēnāni, Pabodo nānō wængūnque nānō tee mōnequinque wēnæ wēnæ cæcampa, ante pīlīnque ōnonquedō ante cædānīpa, ante awædō.

³⁰ Nōwo īfōmō, Īngā onguīfongā ingante wænoncæte ante oodeoidi awēmō cædānīpa, ante tededāni ēñēnīmo inte botō tōmengā ingante bitō weca do da godōmo gocampa. Tōmengā ingante nē piinte ānāni īnānite bitō weca adobāi da godōmo godānīpa. Mānīnque ante yewæmōmopa.

Ante cadota ante yewæmōnīnque, Awēnē gobedōnadodo Pedique acæcāimpā, ante tontado awēnē cōmantante da godongā ænte godānitapa.

³¹ Īnīnque cōmantante nānō ānīnō ēñēnte cædinque tontadoidi woyowotæ tao godinque Pabodo ingante Antipati ganca adīmōngā māodāni gocantapa. ³² Īmō ate, Cabayo mongænte nē godāni tōnō Pabodo adīmōngā gocæcāimpā, ānīnque tōmēnāni nempo emō cæte godinque ōnōwa nē godānīque tōmēnāni nāni cæte quēwencōnē ocæ ēmænte godānitapa. ³³ Cabayo mongænte nē godāni wæætē Pabodo ingante godōmenque ænte godinque Tetadea īfōmō pōnīnque awēnē gobedōnadodo

ingante cadota pædæ godōnīnque Pabodo ingante awēnē nempo pædæ godōnāni ængantapa.

³⁴ Awēnē gobedōnadodo īfōmō cadota ænte adinque, Bitō æbædō ēñagabiimpā. Āfōngā Pabodo, Tīditiabæ ēñagaboimpā. ³⁵ Ante apænecā ēñēnīnque gobedōnadodo wæætē,

—Bitō īmite nē piinte ānīnāni pōnāni ate mānīfēdē ate botō, Bitō æbānō apænequīmi, ante ēñencæboimpā.

Ānīnque wææ wānōnāni īnānite apænedīnque, Mīnitō Awēnē Edode wodi nānō apænte angaincōnē Pabodo ingante ænte gote wææ wānōedāni, ante gobedōnadodo angā ænte godānitapa.

24

Pedique weca ongōnīnque Pabodo nāmā wææ apænecā

¹ Ōnōmpo æmæmpoque īfōnæ go ate, Wængonguī qui, ante nē godongā fænængā pōnī īnongā Ānāniya īfōmō Eedotadēē quēwēnīnque wæætē Tetadea gocantapa. Ayæ wacā tōmengā emōwo Tedetodo tōmēnāni nāni wææ angāinō ante ædæmō adīngā inte wadāni beyæ ante nē wææ apænecā īnongā inte nē abogado nāni ānongā īnongāimpā. Tōmengā tōnō oodeoidi nē aadāni nāni Picæncabo pancadāniya adobāi Ānāniya tōnō godongāmæ godānitapa. Godinque pancabaa awēnē gobedōnadodo weca ponte apænedīnque, Pabodo nē wēnæ wēnæ cædongā ingampa tōō, ānānitapa. ² Pabodo ingante āñēte māmōnāni pongā ate nē abogado Tedetodo īfōmō gobedōnadodo Pedique weca ongōnīnque apænecantapa.

—Awēnē gobedōnadodo ēñēmi. Bitō nempo quēwēnīnque mōnitō wantæpiyæ wæætēdō wæætē cædāmaī inte godongāmæ piyænē cæte waa quēwēmōnīpa. Ayæ bitō nē aabi īnōmi inte, Æbānō cæcæimpā, ante do ēñēnīnque mōnitō ōmæ īfōmō waa cæbi ate mōnitō godōmenque waa pōnī quēwēmōnīpa.

³ Awēnē Pedique, bitō waēmō pōnī īnōmi inte īmæca tōmāo waa cæbi ænīnque mōnitō bitō īmite cōwē waa ate pōnēnīnque waa apænēmōnīpa. ⁴ Incæte, Botō wantæpiyæ apænebo baī bitō wæcædōmiimpā, ante pōnente wædinque botō, Ao āmi ate wantæ īfō apænebo pōnō ēñēe, ante abogado Tedetodo angantapa.

⁵ Ayæ, “Mōnitō ayōmōni īfōmō ongongā īfōmō nē wēnæ wēnæ cædongā inte tōmāo godinque wapiticæ apænecā ēñēnīnque oodeoidi ænguī badīnque Yæ yæ ānāni wæmōnīpa. Edæ Nāatadēnōidi wapiticæ nāni cæcabo īfōnānīte īngā īfōmō adocā īnongā inte nē angā ingampa tōō. ⁶ Ayæ Wængonguī oncō fænæncō incæ ōnonconque baī baquinque tōmengā wēnæ wēnæ cæcā

adinge mōnitō tōmengā ingante bæi on-gontamōnipa. Ayæ mōnitō mæmæidi nāni wææ angainō ante Pabodo æbānō ēñente cæcāi, ante mōnitō apænte ancæte ante cætamōnipa. ⁷ Mānōmai ante tæcæ cæyōmōni tōmengā mōnitō nempo ongōñongante cōmantante Ditia iñōmō māmō gā pe æmpote ò ængantapa. ⁸ Ayæ mōnitō adocā Pabodo ingantedō ante nē piinte āmōni iñōmōnite adocā cōmantante Ditia angā ēñēninque bitō weca ponte ongōmōni ae. Bitō Pabodo ingante āmi ēñēninque tōmengā, Æbānō cæboi, ante nāmā wææ apænecæcāimpa. Tōmengā mānōmai wææ apæncā ēñēninque bitō, Mōnitō æbānō nāwangā āmōnipa, ante do ēñencæbiimpa.”

⁹ Ante Tedetodo mānōmainō ante apæneyongante oodeoidi godongāmæ apænedinque, Tedetodo nāwangā angampa. Pabodo wēnæ wēnæ cæcā ingampa tōō, ante adoyōmō ante apænedānitapa. ¹⁰ Gobedōnadodo Pedique guiquēnē Pabodo gāmæñō opo cæpoyongante Pabodo wæætē iīmai apænecantapa.

—Awēnē Pedique ēñēmi. Tæiyæ wadepo iñonte bitō iīmæca nē apænte angaiimi inte mōni oodeocabo æbānō cæmōni iīmōni, ante do ēñēnipa, ante adinque botō, Bitō weca ponte nāmā beyæ wææ apæncæboimpa, ante tobopa. ¹¹ Bitō iñōmō ēñencæte ante cæbi iinque iīmāinō ante do ēñēnguimi iīmāimpa. Botō ōnompō tipæmpoga go mēōnaa mānimpoñæque iñonte Wængongui weca ædæ wææñinque tōmengā ingante waa apæncæcæte ante Eedotadēē æitabopa. ¹² Māniñōmō æi pōninque botō tōmēnāni ayōnāni quīnō wēnæ wēnæ cæboi ae. Botō Wængongui oncōnē ñæñæncō yabæcōnē go guībo incæ, oodeoidi odōmōincōnē go guībo incæ taadō gobo incæ wadāni tōnō guēadō guēa piinte āmo dicæ adāniyaa. Botō ædōmē godinque Yæ yæ āmo dicæ ēñēnāniyaa. ¹³ Iinque tōmēnāni nāni, Pabodo wēnæ wēnæ cæcampa, ante nāni piinte ānewēnō ante edæ, Nāwangā impa, ante quīnō impa odōmonguīnāni. Edæ dæ ampa, ante Pabodo nāmā wææ apænecantapa.

¹⁴ “Incæte mōnitō, Quēwenguīnō Taadō impa, ante mōni pōnēnō ante oodeoidi wæætē, Wapiticæ goquīnō impa, ante piīnānipa. Iinque, Pabodo māniñōnō ante pōnengampa, ante iīnāni nō ante apænedānipa. Nāwangā impa, ante bitō iīte āmopa. Botō māniñōnō ante pōnēninque mōnitō mæmæidi Wængongui ingante waa ate cædinque quēwēmopa. Ayæ Mōitee wodi nānō wææ angainō ante botō Ao āninque Wængongui beyæ nē apænedāni nāni yewæmongainō ante adobaī Ao āninque quēwēmopa. ¹⁵ Wængongui angā ate mōnō waocabo edæ nō cæmō incæ

wīwa cæmō incæ tōmāmō wænte ate ñāni ōmæmōninque mōnō quēwengæimpa, ante iīnāni pōnēnānipa. Botō tōmēnāni nāni pōnēnō baī adobaī ante pōnente tobopa. ¹⁶ Mānōmai beyæ botō, Wængongui ayongā incæ waodāni ayōnāni incæ botō nāmā apænte botō pōnēnō tæiyæ wæmō entawencæboimpa, ante cōwē nangui cæbopa.”

¹⁷ Āninque Pabodo godōmenque apænecantapa. “Botō wayōmō gote tæiyæ wadepo quēwente ate tōmēmo ōmæ adodō pōninque, Ōmæpodāni wæwēnāni qui, ante ænte pōninque botō guidēnāni oodeoidi iñānite wæætē pædæ godōmo æñānitapa. Ayæ, Wængongui qui, ante baō pædæ godontabopa. ¹⁸ Mānōmai cæyōmo ayōnāni botō iñōmō tæiyæ wæmō bacæte ante Mōitee wodi nānō angainō baī do eyepæ cædīmo inte Wængongui oncō ñæñæncō yabæcōnē pō guīdinque, botō, Wængongui qui, ante godōmo adānitapa. Wīi nangui iñāni tōnō cædinque botō Yæ yæ ānāmai inte cæbo adānitapa. ¹⁹ Incæte botō iīmotedō ante nāni piinte āniñō nāwangā i baī wadāni guīquēnē oodeoidi incæ Atiaba quēwēte pōnāni iñōmō, tōmēnāni wæætē bitō weca do ponte anguēnēnāni iñānipa. ²⁰ Botō oodeoidi nāni nē Apænte Āncabo weca ongōñōmote, Pabodo æbānō nō cædāmai ingāā, ante apænte āñōnānite bitō weca ñōwo ongōnāni guīquēnē māniñō ante nē ēñēnāni iñānipa. Iinque wadāni dæ ānāni adinque iīnāni wæætē edæ tōmēnāni nāni ēñēniñō ante nē anguēnēnāni iñānipa. ²¹ Botō awēnēidi weca ongōninque yedæ āninque, ‘Mōnō wænte ate ñāni ōmæmongæimpa, ante botō apænedō beyænque mīnitō ñōwoōnæ botō iīmote apænte āninque piīmīnipa,’ ante apænetabopa. Iinque iñōmō ongōnāni wabānō adobaī adode botō āniñō beyænque piinte ānānipa,” ante Pabodo nāmā wææ ante iinque apænecantapa.

²² Pabodo māninganca apæncā ēñēninque Pedique, Taadō ante nē quēwēnāni æbānō ante pōnēnāni, ante do ēñēningā inte, Idæwaa, āninque tōmēnāni iñānite,

—Cōmantante Ditia pongā ate wæætēdō wæætē mīni āniñō ante apænte ancæboimpa.

²³ Āninque tontadoidi capitāō ingante apænedinque, Pabodo ingante tee mōnedāmai inte wææ wānōedāni. Ayæ tōmengā quīēmē ante ænguēnengā ingā adinque tōmengā æmigoidi ponte pædæ pōnōnāni ængā iinque mīnitō ee amīni æncæcāimpa, angantapa.

²⁴ Tæōnæ go ate Awēnē Pedique tōmengā nānōogængā Dodotida tōnō nāna gæncaya pōnatapa. Tōmengā nānōogængā oodea onquiyængā inongāimpa. Pedique iñōmō Pabodo ingante āñete mānōnāni pōninque

Pabodo wæætē, Codito Itota ingante mōnō wede pōnente quēwengæīmpa, ante apænecā ēñēē cōnatapa. ²⁵ Ayæ Pabodo godōmenque apænedinque, Mōnō nō cæte quēwengæīmpa, ānīnque, Mōnō nāmā wææ aate waa cæte quēwengæīmpa, angantapa. Ayæ, Wængongui Awēnē nānō apænte anguiōnæ oo baquīnō anguēnē, ante apænecā ēñēninque Pedique wæætē guīñente wædinque, Idæwaa, ānīnque,

—Nōwo gobāwe, angantapa. Waōnæ ate botō eyepæ īmo inte āmo bitō īmite āñete māmōnāni ponte apænebi ēñēmāimopa, angantapa.

²⁶ Mānōmaī ānīnque tōmengā, Pabodo wabānō, Nīmpo cæbi gocæboīmpa, ante cædinque godonte æīnta pōnōmaingampa, ante pōnengantapa. Īnīnque tōmengā wantæ wantæ īñō Pabodo ingante angā pōñongā guēa tededatapa. ²⁷ Mānōmaī ancaa cæyongā wadepo mēnepoga ba ate Pedique gobedōnadodo awēnē īnīnque bayongante wacā Pontio Peto nāni ānongā pōnīnque wæætē awēnē gobedōnadodo bacantapa. Īnīnque Pedique īnīnque awēnē bayedē, Botō īmaī cæbo ate oodeoidi botō īmote waa acædānīmpa, ante pōnente cædinque Pabodo ingante tee mōneincōnē oncodo tadōnāmaī ee adīnque wadæ gogacāīmpa.

25

*Gobedōnadodo Peto weca Pabodo on-
gonte apæncæmpa*

¹ Peto īñōmō pancabaa awēnē gobedōnadodo tæcæ badingā inte mānīmæ pōnīnque Tetadea nāni quēwēñōmō mēōnaa go adōōnæque quēwēninque Eedotadēē go æicantapa. ² Eedotadēē īñōmō ponte ongōñongante, Wængongui quī, ante nē godōnāni nānānāni tōnō oodeoidi awēñēidi tōmengā weca pōnīnque, Pabodo īmaī wēnæ wēnæ cæcantapa tōō, ante apænedāni ēñengantapa. ³ Tōmēnāni doyedē adoyōmō pōnēninque, Gobedōnadodo Peto ingante āmō ate tōmengā wæætē Pabodo ingante Eedotadēē īñōmō da pōnongā pōñongante mōnō taadō wææ wānonte ō ænte wæñongæīmpa. Ante nē pōñēwēnāni inte tōmēnāni nōwo Peto weca pōnīnque īmaī ānānitapa. Gobedōnadodo Peto ēñēmi, Bitō Ao ante mōni āmaī pōnō cæquīmi. Bitō Pabodo ingante āni Eedotadēē īñōmō ænte māmōnāni pongāe, ante ancaa ānāni. ⁴ Ēñēninque Peto wæætē tōmēnāni īnānite edæ, Pabodo īnæmpa Tetadea īñōmō tee mōnete ongongantawo. Botō tōmēmo edæ oo adoyōmō wæi gocæboīmpa. ⁵ Ānīnque,

—Mānōmaī beyæ mīnitō mīni cabo īñōmīnite nē ānāni pancadāniya īnānite da godōmīni botō tōnō godongāmæ Tetadea wæi gocædānīmpa. Pabodo wēnæ wēnæ

cæcā ingā īnīnque tōmēnāni mānīñōmō pōnīnque ancædānīmpa.

⁶ Ānīnque tōmēnāni tōnō wodo ōnompō tipæmpoga īñōnæ godōmenque quēwēninque Peto wadæ godīnque Tetadea wæi gocantapa. Pōnīnque tōmengā īimō ate awēñēidi apæncæte ante nāni contaīmpaa tæ contadīnque angā ate Pabodo ingante ænte māmōnāni pongā. ⁷ Ate oodeoidi Eedotadēē quēwente nōwo wææ pōnīnāni inte pō godongāmæ godongānīnque, Pabodo mānōmaīnō wīwa cæcampa, wadō wīwa cæcampa, īmaīnō wīwa cæcampa, ante ancaa ānewēnānitapa. Incæte Petoidi īnānite, Nāwangā ante apænemōnīpa, ante odōmoncæte ante tōmēnāni quīnō īmpa ante odōmōnāni aquīnāni. ⁸ Pabodo īñōmō nāmā wææ apænedīnque,

—Oodeoidi nāni wææ angaiñō ante Baa ānāmaī īnōmo inte botō ēñente cæte quēwēnīmo īmopa. Wængongui oncō nānāncō waa adīnque botō mānīncōnē yabæcōnē guīte wēnæ wēnæ cædāmaī intabopa. Odōmānoidi tæiyæ awēnē Tetædo nānō ānō ante ēñente cædinque wadō ante cōwē cædāmaī intabopa.

⁹ Āñongante Peto, Oodeoidi tōmēnāni nāni ānīnō baī cæbo ate botō īmote waa acædānīmpa, ante babæ cædinque Pabodo ingante,

—Botō Eedotadēē go æibo ate adīnque bitō botō weca pōñōmi īnāni pūnte nāni ānīnō ante apænte ancæboīmpa. Bitō Ao ante, Gocæboīmpa, āmitawo.

¹⁰ Āñongante Pabodo wæætē,

—Botō īnæmpa odōmāno tæiyæ awēnē Tetædo nānō Apænte ante Contaīmpaa gāānē nōwo incæ ongōmo ae. Mīnitō īñōmō Tetædo beyæ ante nē apænte āmīni īnōmīni inte edæ botō īmote nē apænte anguēnēmīni īmīnitapa tōō. Bitō tōmēmi īñōmō edæ, Pabodo oodeoidi īnānite wēnæ wēnæ cædāmaī īningā ingampa, ante edæ do ēñēmīpa. ¹¹ Īnīnque wēnæ wēnæ cædinque botō tente wænguēnēmo īmo baī botō edæ Baa ānāmaī inte edæ dobæ wæncædōmoīmpa. Wæætē edæ, Wēnæ wēnæ cæbiya, ante īnāni oodeoidi nāni ānewēnō guīquēnē ōnongedō ante ī īnīnque waocā æcāmenque incæ ædō cæte tōmēnāni nempō pædæ godonguēnengā ingāā. Īnīnque botō, Odōmāno tæiyæ awēnē Tetædo ingante āmo botō īmote pōnō apænte ancæcāīmpa, angantapa.

¹² Pabodo mānōmaī angā ēñente wædinque Peto tōmengā tōnō godongāmæ nē apænte ānāni tōnō, Ēbānō cæquīmōō, ante adoyōmō pōnēnāni ate tōmengā Pabodo ingante,

—Ao āmōnīpa. Tæiyæ awēnē Tetædo incæ apænte ancæcāīmpa, ante do ānīmi inte bitō Tetædo weca edæ gocæbiīmpa, angacāīmpa.

Awēnē odeye Agodipa ingante Peto apæncampa

¹³ Tæðonæ go ate wacā awēnē odeye Agodipa tōnō onquiyængā Bedēnite iñōmō gobedōnadodo awēnē Peto ingante, Bitō iimæca waa pōmi amōnāpa, ante apæncæate ante Tetadea iñōmō pōninque Peto weca eñacæ pōnatāpa. ¹⁴ Pōninque tæðonæ quēwēna ate awēnē Peto guiquēnē awēnē odeye Agodipa ingante, Pabodo ingante iimāi cætāmōnīpa, ante apænedinque,

—Gobedōnadodo awēnē Pedique wodi nānō nē tee mōnete ēmō cæte godingā iñōmō onguifnængā adocanque ayæ a ongonampa. ¹⁵ Īninque botō Eedotadēē æite quēwēñōmote, Wængonguī quī, ante nē godōnāni ñænænāni tōnō oodeoidi Īnānite nē aadāni nāni Picæncabo guiquēnē botō Īmote āninque, Māningā iñōmō wīwa cæcā ingā adinque bitō tōmengā ingante apænte āninque āmi wæñōnāni wæncæcāimpa, ānānitāpa. ¹⁶ Eñēninque tōmēnāni Īnānite botō wæætē iimāi antabopa. Waocā nāmā beyæ apænedāmaī iñongante mōnitō mōni odōmāncabo iñōmō nē pānāni Īnānite pædæ godōnāmaī Īmōnīpa. Wæætē wadāni, Īngā iimāi cæte wēnæ wēnæ cæcampa, ante piinte ānāni ēñente wædinque mōnitō māningā tōnō nē piināni Īnānite āmōni godongāmæ pōnānīpa. Ponte awincadō awinca adinque wæætēdō wæætē āñōnānite mōnitō iñōmō, Tōmēnāni nāni piinte āninō ante tōmengā æbānō nāmā wææ apæncæcā, ante ædæmō ēñente ate nōingā ante apænte āmōnīpa. Mānōmaīnō ante botō tōmēnāni Īnānite apænetabopa, ante awēnē Peto apæncantāpa.

¹⁷ Ayæ, “Mānōmaī ante apænebo eñēninque nē piinte ānāni botō tōnō wææ Tetadea iñōmō godongāmæ pōnānitāpa. Īninque botō a ongōnāmaī dō mōni apænte āimpaa iimō ate go tæ contadinque, Māningā ingante ænte pōedāni, āmo ænte pōnānitāpa. ¹⁸ Botō iñōmō, Pabodo wadāni Īnānite wīwa cæcampa, ante piinguināni Īmāinānīpa, ante pōnentabopa. Incæte nē piinte ānāni ængæ gantite apænedinque edæ botō ante pōnēnīnō bai wī piinānitāpa. ¹⁹ Wæætē edæ wadō ante piināni ēñente wætābopa. Wængonguī ingante æbānō cæte waa aquī, ante tōmēnāni Pabodo tōnō wæætēdō wæætē piinānitāpa. Ayæ tōmēnāni mæmæidi nāni wææ angāinō ante tōmēnāni, Pabodo eñēnāmaī ingampa tōō, ante piinānitāpa. Ayæ adocanque Itota wodi dō wængaingā incæte Pabodo, Mīingā quēwēngampa, ante tedecampa tōō, ante piinānitāpa. ²⁰ Īninque botō, Quiēmē bai āwēwēnāni, Æbānō cæte nō ēñente apænte anguimoo, ante wædinque botō Pabodo ingante iimāi antabopa. Tōmēnāni nāni

piinte āninō ante bitō Ao āninque Eedotadēē gote ongōñōmite botō apænte ancæboimpa, antabopa.”

²¹ “Āñōmō tōmengā wæætē, Botō Īmote ee wææ wānōñōmīni, Botō æbānō cætawoo, ante tæiyæ awēnē Empedadodo mōnō ānongā apænte ancæcāimpa, āmopa. Angā eñēninque botō, Æyedēmē eyepæ Ī ate Pabodo ingante tæiyæ awēnē Tetædo weca da godōmo gocæcāimpa, ante pōnēninque, Tōmengā ingante mānimpoga wææ wānōedāni, antabopa,” ante Peto apæncantāpa.

²² Mānōmaī apæncæcā eñēninque awēnē Agodipa ingante,

—Īngā onguifnængā æbānō apæncæcā, ante tōmēmo eñēinente wætābopa.

Āñongante Peto,

—Īmō ate tōmengā apæncæcā eñencæbiimpa, angantāpa.

²³ Īmō ate awēnē odeye Agodipa tōnō Bedānite iñōmō waēmō pōni weocoo wēñate mongæninque tōmēnāni nāni eñēincōnē ñænæncōnē pōninque, Mōnatō awēnēmōna iñōmōnate waa aedāni, ante bai cædinque wæñæe da da pō guidatāpa. Ayæ tontadoidi tæiyæ awēnēidi tōnō māniñōmō quēwēnāni awēnēidi ñænænāni tōnō tōmēna miñæ dao dao pōnānitāpa. Ayæ Peto angā eñēninque nē wææ wānōnāni wæætē Pabodo ingante ænte māmōnāni pō guite ongōñongante, ²⁴ Peto iñōmō,

—Awēnē odeye Agodipa eñēmi, angantāpa. Īñōmō ongōmīni tōmāmīni edæ eñēedāni. Īngā ingante amīnī. Tōmengā ingante āninque Eedotadēē quēwēnāni incæ iñōmō quēwēnāni incæ oodeoidi tōmānāni botō Īmote yedæ āninque, Īngā nē wēnæ wēnæ cæcā inte godōmenque wī quēwēnguēnengā ingampa cæbii, āninque, Bitō apænte ancæbiimpa, ante wædānīpa. ²⁵ Īninque, Adocā Pabodo nānō wænguīnque wēnæ wēnæ cæcantawoo, ante botō cōwā ayōmo edæ dæ antāpa. Ante wæyōmo tōmengā guiquēnē, Tæiyæ awēnē empedadodo incæ botō Īmote apænte ancæcāimpa, angā ēñente pōnēninque botō, Ao, tæiyæ awēnē Tetædo weca da godōmo gocæbiimpa, antabopa. ²⁶ Incæte, Īngā nānō cædinō ante tæiyæ awēnē aquinō ante botō ædō cæte yewæmōnguimoo, ante wæbopa. Mānōmaī beyæ botō, Mīnitō tōmāmīni apænte amīni eñencæboimpa, antabopa. Ayæ, odeye Agodipa bitō tōmēmi apænte āmi nō ēñente ate yewæmoncæboimpa, ante cædinque botō nōwo Pabodo ingante ænte māmōmo ponte a ongongā aedāni. ²⁷ Īñampa botō, Mōnō nē tee mōnete ongongā wēnæ wēnæ nānō cædinō ante yewæmōnāmaī inte mōnō ædō cæte

da godonguī, ante awædō, ante Peto apænegacāimpa.

26

Agodipa weca ongonte Pabodo nāmā wææ apænegacāimpa

¹ Awënē odeye Agodipa wæætē Pabodo ingante,

—Bitō ñōwo nāmā beyænque wææ apænegacāimpa, āmopa.

Angā ēñēninque Pabodo compo compo cædinque nāmā beyænque ante wææ apænegacæcantapa. ² “Awënē odeye Agodipa, ēñēmi. Oodeoidi nāni pīinte āninō tōmānō ante nāmā beyænque wææ apænedinque botō bitō awënē imi weca ongonte apænebopa, ante adinque botō waa edæ tobopa. ³ Mōni oodeocabo dodāni nāni cægaī bai mōni cæinō ante bitō iñōmō edæ do ēñēmipa, ante tobopa. Ayæ adobaī, Oodeoidi ñōwodāni æbānō ante wæætēdō wæætē ante tēdēdāni, ante do ēñēmi iñōmi inte bitō botō wææ apænedō ante edonque ēñenguīmi imipa, ante pōnēninque botō godōmenque tobopa. Iñinque bitō Ao ante ee ongōninque ēñencæbiimpa, āmopa.”

Īmaī quēwengaboimpa, ante Pabodo apænegacāimpa

⁴ Ante apænedinque, “Botō ñōwo ganca æbānō quēwēmoī, ante oodeoidi tōmānāni do ēñēnānipa. Edæ do wēñæmoyedē botō ēñagaīmæ quēwente pædinque botō edēnimoyedē ñōwo ganca æbānō Eedotadēē iñōmō quēwengaboī, ante do ēñēnānipa.

⁵ Mōni oodeocabo incæ pancadāniya Wængonguī ingante wædænque ēñente quēwēñōnāni mōni Paditecaboque wæætē, Dodāni nāni wææ angaiñō ante mōnō ēñente cæcāimpa, ante ēñente quēwēmōnipa. Botō iñōmō Paditeobo inōmo inte māninō ante cōwē Ao ante godōmenque nanguī cæte quēwentabopa. Iñinque oodeoidi do agaiñāni iñōnāni inte Ao ante bai, Nāwangā Pabodo ēñente quēwengampa, ante apænegacædōnānimpa. ⁶ Mōnitō mæmæīdi inānite apænedinque Wængonguī, Minitō beyæ cōwē pōnō waa cæcæboimpa, ante nānō angaiñō bai cæcā beyænque mōnō watapæ bacāimpa, ante botō pōnēmopa.”

“Ñōwo iñōmō mānīne botō pōnēnō beyænque iñāni, Pabodo ingante apænte ancæmīnimpa, ante ænte māmōnāni pōninque botō mīnitō weca a ongōmo aedāni. ⁷ Wængonguī, Minitō beyæ pōnō waa cæcæboimpa, ante nānō angaiñō ante iñinque bacāimpa, ante mōni pōnēnō beyænque mōni oodeo pægaincabo ōnompō tipæmpoga go mencaboga mānimpomōni imōni iñōmō woyowotæ itadē, Wængonguī ingampa, ante tōmēngā beyæ cæte quēwēmōnipa.

Incæte awënē odeyebi, ēñēmi. Wængonguī, Cōwē cæcæboimpa, ante nānō angaiñō ante mōni pōnēnō beyænque oodeoidi incæ botō imote, Wiwa cæbipa tōō, ante pīinānipa. ⁸ Minitō imīnite āmo apænemīni ēñēmoedāni. Do wæñināni iñōnānite Wængonguī, Botō pōnō cæbo ate ñāni ōmæmoncædānimpa, angacāimpa. Minitō iñæmpa, Wængonguī ædō cæte māñōmai cæquingāā, ante pōnente wædinque quīnante Baa ānewēmīni,” ante Pabodo angacāimpa.

Pabodo, Coditoidi inānite togænte pantabopa, angampa

⁹ Äninque Pabodo godōmenque apænegacāimpa. “Botō wēñēñedē edæ oodeoidi nāni pōnēwēnō bai pōnengaboimpa. Māniñedē botō Itota wodi Nāatadeta quēwengaiñā ēmōwo ante nāni pōnēnō ante pīinte cædinque nanguī wido cæquēnēmo imopa, ante pōnēwentabopa. ¹⁰ Iñinque botō Eedotadēē iñōmō quēwēninque māninonque ante cægaboimpa. Māniñedē edæ, Wængonguī quī, ante nē godōnāni ñænænāni inānite antabopa. Åmo Ao ante tōmēnāni nē ānāni inte yewæmonte pædæ pōnōnāni æninque botō Wængonguī Awënē quīnāni nanguī ināni inānite bæi ongonte æninque nē tee mōnebo ingaboimpa. Ayæ tōmēnāni inānite wæñoncæ cæyōnāni botō cōwē godō Ao angaboimpa. ¹¹ Botō wayōmō wayōmō godinque oodeoidi odōmōincōnē wantæ wantæ iñō go guidinque, Wængonguī Awënē quīnāni tōmēngā ingante godō wēnæ wēnæ ante pīincædānimpa, ante cædinque pædāni, ante nanguī āmo pangadānimpa. Ayæ tōmēnāni inānite nanguī pīininque godōmenque ænguī badinque botō tōmēnāni inānite pancæte ante wabæca nāni quēwēñōmō wabæca nāni quēwēñōmō incæ togænte gogaboimpa,” ante Pabodo wææ apænegacāimpa.

Wadō ante pōnente babopa, ante Pabodo adodō angampa

(Nāni Cægaīnō 9.1-19, 22.6-16)

¹² Ante apænedinque Pabodo godōmenque, “Māñōmai wabæca go wabæca go cædōmo inte Daāmāco iñōmō gocæte ante cætābopa. Cæyōmō, Pabodo iñmaī cæcæcāimpa, ante Ao āmōnipa, ante, Wængonguī quī, ante nē godōnāni ñænænāni nē ānāni iñōnāni inte botō beyæ cadota ante yewæmōninque pædæ pōnōnāni ænte gotabopa. ¹³ Awënē odeyebi, ēñēmi. Māñōmai gote idōmæ goyōmo tæcæ bæcā pōni bayonte nænque nānō nāwā bai godōmenque nāwā ōñædē inō botonga mōni godongāmæ gocaboga pō tōmāo guīnæ gongæ. ¹⁴ Ate wædinque tōmāmōni guidōmēmæ go go wææñōmōni adocanque mōni ebēdeo tēdēdō tēdete ōñædē

apæneçā botō adoboque eñentabopa. 'Taodo. Taodo āmo. Botō ìmote quínante togænte pāmii. Ìnæmpa wagada pāintoca bai bitō nāmā ìnæ æwate cowate bai bitō caate wæquinque cæbipa,' angacāimpa."

¹⁵ "Angā eñente wædinque botō, 'Awënë, æbidō ìnōmi ìmii.' Ante eñente wæyōmote, 'Botō Itota ìnōmo inte bitō nē togænte pānimo mānimodō ìmopa cæbii. ¹⁶ Nōwo edæ ængæ gantidínque adiyæ næ gongæmi āmopa. Botō beyæ nē pōnō cæbi āmo edæ bacæbiimpa. Ayæ, Botō ìmote æbānō abii, ante bitō adinō ante nē apænebi āmo bayōmite botō ìncayæ ate godōmenque odōmōmo ate bitō aquinō ante bitō nē apænebi āmo bacæbiimpa. Mānōmainō ante āmo bacæbiimpa, ante apæneçæte ante botō bitō weca ponte a ongōmopa. ¹⁷ Ayæ bitō guiddēnāni oodeoidi incæ wadāni wabæca quëwēnāni incæ bitō ìmite wēnæ wēnæ cæcæ cæyōnāni ate botō bitō ìmite gā pe æmpote wææ gompobo beyænque bitō wæætē quëwencæbiimpa. Tōmēnāni weca botō bitō ìmite da godōmo gocæbiimpa. ¹⁸ Tōmēnāni botō ìmote wede pōnēnāni ate botō wēnæ wēnæ nāni cædinō ante godō ñimpo cæbo ate tōmēnāni do botō tæiyæ waēmō badongaināni tōnō adocabodāni bai badōmo badínque quëwencædānimpā, ante cæbopa. Mānōmainō cæcæte ante botō, Bitō Taodobi ìñōmō tōmēnāni awinca wi æmōnte bai cædinque apænebi eñēninque tōmēnāni wæætē edonque adínque ñāō ìnō gāmæñō poncædānimpā, ante cæbopa. Tatāna nempō quëwēñōnānīte bitō wæætē gā pe æmpote bai cædinque odōmōnte apænebi eñēninque tōmēnāni wæætē edæ ocæ ēmænte pōninque Wængongui nempō quëwencædānimpā, ante bitō ìmite da godōmo gocæbiimpa.' Ante Awënë Itota botō ìmote angā eñente gotabopa," ante Pabodo apæneçantapa.

Pabodo, Öönædē apæneçā eñente cætabopa, angampa

¹⁹ Mānōmaī apænedínque Pabodo godōmenque, "Awënë odeyebi Agodipa, eñēmi. Botō wīlmonēte bai ayōmo öönædē ìnō nē angā nānō angainō ante botō ædō cæte eñēnāmaī cæquimoo. Edæ do cætabopa. ²⁰ Tāno Daāmaco ìñōmō quëwēnāni ìnānīte apænedínque botō ayæ Eedotadēē ìñōmō godínque māniñōmō quëwēnāni ìnānīte apænedínque Oodeabæ quëwēnāni ìnānīte go apæneboque go wayōmō oodeo ìnāmaī ìnāni ìnānīte māo apænedínque ìmañnō ante apænebo eñēnānitapa. Mīnitō wēnæ wēnæ mīni cædō ante, Anca wæwente awædō, ante ñimpo cædinque Wængongui gāmæñō edæ pōedāni. Ayæ pōninque mīnitō, Māniñō wēnæ wēnæ botō cædinō edæ æmæwo ñimpo cæbopa, ante edonque acæimpa, ante

cædinque waa cæte quëwēdāni, ante āmo eñēnānitapa."

²¹ "Ìninque botō mānōmaī cæbo beyænque Wængongui oncō ñæñæncō boyæ ongōñmōte oodeoidi botō ìmote bæi ongōninque edæ wænoncæ cædānitapa. ²² Mānōmaī wēnæ wēnæ cædāni incæte Wængongui ñōwoonæ ganca botō tōnō cōwē godongāmæ cæcampa. Ìninque botō, Wængongui Awënë æbānō cæcāā, ante guññēnāmaī inte næ gongæninque awēñēidi ìnānīte öñōnānīque ìnānīte apænedínque apæneboi aedāni. Mōitee wodi tōnō wadāni Wængongui beyæ nē apænegaināni tōnō, Æbānō baquū, ante apænegadānimpā, ante apænebopa. Māniñe tōmēnāni nāni apænegainēque adodō ante apænedínque botō godōmenque apænedāmaī ìmo inte edæ ìmañnō ante apænebopa. ²³ Mōiteedi ìñōmō, Mōnō Codito cōwē caate wæqingā ingampa, ante apænegadānimpā. Ayæ, Wænte ate tōmengā tānocā nē ñāni ömæmōningā ìnogā ìnte, Acædānimpā, ante cædinque ñāō tica ēnente bai tōmengā guiddēnāni ìnānīte wadāni ìnānīte edæ odōmoncæcāimpā, ante yewæmongadānimpā. Botō ìñōmō, Mōiteedi nāni angainō do edæ ìnque batimpa, ante apænedínque wadō ante apænedāmaī ìmopa," ante Pabodo apænegacāimpa.

Agodipa, bitō Codito ingante pōnenguēñēmi ìmipa, angā

²⁴ Pabodo mānōmaī nāmā beyænque tæcæ wææ apæneyongante awënë Peto do ogæ tededínque,

—Ìnæmpa Pabodo ocāi ömæcabi inte tedeabi awædō. Nangui wantæpiyæ dibodo adimi inte idiquibæ pōnente bābiimpa tōō.

²⁵ Ante wææ tedecā eñēninque Pabodo,

—Awënë Peto bitō waa pōni awënë gobedōnadodo ìmi incæte botō wīi bitō ānō bai ìmopa. Botō wīi idiquibæ pōnēmo ìnte tōingā pōnēninque nāwangā ante apænebopa. ²⁶ Awënë odeye Agodipa guiquēñē tōmengā māniñō botō apænedō ante tōmāā eñengā ìñongante tōmengā ingante edonque apænebo eñengampa. Edæ māniñō botō āniñō wīi awēmō cætimpā, ante pōnēninque botō, Awënë odeye incæ do adingā ìnte ædō cæte eñēnāmaī ingungāā, ante awædō. ²⁷ Awënë odeyebi Agodipa, ñōwo bitō ìmite apænebo eñē. Wængongui beyæ nāni apænegainō ìnte bitō pōnēmitawo. Do pōnēmi ìmitapa, ante eñēmpo.

²⁸ Æñongante Agodipa wæætē,

—Ìnæmpa bitō botō ìmote wantæ ìñō tededínque, Agodipa bitō Codito ingante do pōnencæbiimpa, ante cæcæte ante cæbitawo.

²⁹ Æñongā Pabodo wæætē,

—Wantæ īñō apænebo incæ wantæpiyæ apænebo incæ bitō botō bai pōnēmi waa tobaīmopa. Edæ bitō tōnō godongāmæ ēñēē cōnāni tōnō mōnitō tōmāmīni botō bai entawencæmīnīmpa, ante botō Wængonguī ingante apænebopa. Incæte, Botō bai baedāni, ānīnque botō, Yaēmengoncoo empocæmīnīmpa, ante apænedāmaī intabopa.

³⁰ Ante Pabodo mǎnōmaī apæneca ēñēnīnque awēnē odeye Agodīpa ængæ ganticantapa. Ayæ pancabaa awēnē Peto, Bedānite, godongāmæ ongōnāni adobai tōmengā tōnō ængæ gantīdīnque, ³¹ mānīncōnē tao godīnque īīmaī ante tededānitapa.

—Īngā Pabodo wēnæ wēnæ cædāmaī īñongante quīnante wææ wānonguū. Quīnante apænte wænonguū. Edæ wēnæ wēnæ nānō cædīnō dæ ampa.

³² Ante tedeyōnāni Peto ingante Agodīpa apænecantapa.

—Tetædo incæ botō īmote apænte ancæcāīmpa, ante Pabodo wīī angā bai botō edæ tōmengā ingante do ñīmpo cæcædōmoīmpa, angacāīmpa.

27

Pabodo ingante Odōmā īñōmō da godōnāni gocampa

¹ Mǎnōmaīnō ante wædīnque mānīmæ awēnēīdi, Pabodoidī īnānite ñōwo Itadiabæ āmō wogaa gocædānīmpa, ante godongāmæ Ao ānānitapa. Mǎnīñōmō tontadoidī īñōmō tæiyæ awēnē empedadodo beyænque nāni wææ wānoncabo īñōnāni inte Empedadodoidī nāni ānoncabo īñōnānīmpa. Tōmēnāni capitāō Codio nempo Pabodo tōnō wadāni nē tee mōnete ongōnīnāni īnānite pædæ godōnāni ō ænīnque ænte gocantapa. Ayæ botō Odocabo nē yewæmōmo tōnō wadāni adobai Pabodo tōnō godongāmæ gotamōnīpa. ² Gāwapæntībæ wedeca gote ayōmōni wīpo ñæñæmpo Adadāmītio wāi wocænte nāni ænte pōnīmpo inte ñōwo Atiabæ godīnque wayōmō go tī wææ wayōmō go tī wææ nāni goquīmpo adīnque mōnitō mānīmpodē go guīte gāwapæntībæ wogaa gotamōnīpa. Ayæ wacā Aditadoco Māatedōniabæ Tetadōnica īñōmō quēwēningā inte mōnitō tōnō pō āampodenque gocantapa.

³ Īmō ate Tidōō nāni quēwēñōmō pō wāi wocæñōmōni Pabodo ingante capitāō Codio waa cædīnque pōnō apænecantapa. Bitō æmigoidī weca quīēmē bitō ænguēnēnō ante gote ænte pōe, ānīnque ee acā tōmæwæ gote ēñadīnque ænte pongantapa. ⁴ Ayæ mānī Tidōō īñōmō ēñate wogaa goyōmōnite mōni nē gocæ cædō woboyæ betamonca pæmæ ate wædīnque mōnitō wāā tēiwænē Tipīdebæ nāni ānīwænē wææ cæteīnō wogaa gotamōnīpa. ⁵ Wāā tēiwænē go wodo

tebæ gomōnīque go tæcæpæ pōni wogaa godīnque Tidītiabæ wodo tebæ pōmōnīque go Pampīdiabæ wodo tebæ pōmōnīque go Dītiabæ godīnque Mīīda nāni quēwēñōmō pō wāi wocæntamōnīpa.

⁶ Mǎnīñōmō wacā wīpo ñæñæmpo Adecantodia nāni ænte pōnīmpo adīnque capitāō Codio, Itadiabæ goquīmpo impa, ānīnque mōnitō īmōnite angā godongāmæ guīte wogaa gotamōnīpa. ⁷ Tæōnæ īñonte wæñēe godīnque mōnitō, Æīquedō goquīmōnī, ante ancaa cæmōnīque go Gōnīdo nāni quēwēñōmō go wodo tebæ gotamōnīpa. Ayæ woboyæ cōwē mōnitō gocæ cædō īnō nangū pōni pō ate wæmōnīque go wāā tēiwænē Tadamōne wodo tebæ godīnque wawænē Cædeta nāni ānōwænē yaatænque gotamōnīpa. ⁸ Mǎnīwænē wææ cæteīnō yæwedecaque ancaa cædīnque wæñēe godīnque mōnitō Datea wēmōnca wodōīñōmō nāni Waa Wodōīñōmō nāni ānīñōmō pontamōnīpa. Mǎnīñōmō pōmōni ate wīpodē nē cædāni īñōmō, Wīpo ñæñæmpo wāi wocæñōmpo nāmā godāmaī ingæīmpa, ante cædīnque teēmēnca gæguīncamē inte nāni ñā cæcadōnica gūitodōnāni nāñe ñongæ ate wīpo godāmaī wāi wocæntapa.

⁹ Mǎnīñōmō wāi wocænte owodīnque mōnitō, Quīngæ pongamō incæ wæñēe pōmōmpa, ante wædīnque mōnitō, Woboyæ nangū pæmæ tedæ baquinque mōnitō Wængonguī beyæ ante mōnō cænāmaī ēōnæ do īnque batīmpa, ante pōnentamōnīpa. Īnīnque mōnitō, Nōwo mōnō wængūinque wīpodē godōmenque gomōmpa, ante wæyōmōni wīpo ñæñæmpo nē ænte godāni īnānite Pabodo nō pōnēnīnque wææ angantapa.

¹⁰ —Īñānāni, botō ayōmo mōnō ēwente wæquinque godōmenque gomōmpa. Māīncoo mīni ænte gocoo wīdo cæquinque wīpo nā tobæ go ate mōnō becadote wængūinque impa cæmīnī.

¹¹ Āñongā wīpo ñæñæmpo nē ēacā tōnō wīpo capitāō wadō ante apæneda ēñēnīnque tontado capitāō Codio īñōmō Pabodo nānō āñīnō ante ēñēnāmaī cæcantapa. ¹² Wæætē edæ, Īñōmō ponte mōnō wodōīñōmō woboyæ pæmæ tedæ īñonte wīī owōīnente wæmōmpa. Ante wædīnque wodo tōmānāni, Pēnite nāni wēmōnca wodōīñōmō nænque tamōnō imætæ īnō ongōnīnque woboyæ ante wææ cæte impa cæmōō. Nōwo wadæ godīnque Pēnīque nāni wēmōnca wodōīñōmō go tī wæænte quēwēnīnque woboyæ pæmæ tedæ īnque pæmænte go ate mōnō gomonga gocæīmpa, ante adoyōmō ānānitapa.

Wīni cai pompa

¹³ Mǎnōmaīnō, Gocæīmpa, āñōnāni ñæñæ wīpo goquinque woboyæ dipæmæ īnō betamonca wædænque pæmæ ate wædīnque,

Mōnō āninō bai ñowo mōnō waa goquinque impa, ante todānitapa. Ayæ wipo ñænæmpo wāi wocæñño teēmenca nāni guitodōninca ñowo gæguincamenca quingæ iñæ æænō ñænæ wipodē cō cædāni ate mōnitō wogaa go Cædeta nāni ānōwænē yæwedecaque gotamōnipa.

¹⁴ Māninō tæcæ gocæ cæyōmōni do woboyæ wīni cai Yodocodōno nāni ānō wāā tēiwænē ayaēnēmāa inō māmō pæmæ pōninque, ¹⁵ wipo ñænæmpo māmō ō ænimpā. Mōnitō, Mōnō wodōiñōmō adodō gocæimpā, ante cædinque woboyæ pōnō gāmæñō ædō cæte wiya wēnente goquī. Ante wædinque mōnitō ee amōni woboyæ betamonca inō quingæ māmō dadi wēnente da godō māo gotamōnipa. ¹⁶ Wāā tēiwænē guiyāwænē Caoda nāni ānōwænē dipæmæ inō yæwedeca woboyæ wææ cæteinō godinque mōnitō guiyampo mōni wēā wēā ænte pōnimpo ante, Tobænāmai impacæimpā, ante pæ pagænte ancaā cædinque wēā pōnonte pæ mantamōnipa. ¹⁷ Ayæ nē cædāni guiyæmpo gæguincamenca wēā æænonte ñænæmpodē da wēnānitapa. Guiyæmpo da wēnente ate tōmēnāni, Ñænæmpo awæmpacoo wīi bede wæncæcæimpā, ante cædinque ñænæ wipo incæ gæguincamenca wīni wīni cæte goto winānitapa. Ayæ, Ōnætāmō Tidite nāni ānantāmō impa, ante adinque tōmēnāni, Æ quingæ gomō bai mōnō wænguinque Tidite emōnaiboga go nāñe ñongæncædōnimpā. Ante pōnente guīñente wædinque wæñee gocæte ante cædinque weocoo ñænæmpodē pæmænte māo nāni gocoo incæ wēā wænonte ñō cædinque ee adāni woboyænque wæñee māo gotamōnipa.

¹⁸ Wīni cai iñōmō godōmenque woboyæ pæmæninque æpæ mængonta mængonta ante cæ wædinque wipo ñænæmpo incæ æmætæ dadūmæ æmætæ dadiimæ go wætāmōnipa. Iñinque iimō ate tōmēnāni, Wipo ōmædē bate wodæi bacæimpā, ante cædinque mæincoo ñænæmpodē ongōnincoo incæ æpænē edæ wido wido cædāni gotapa. ¹⁹ Waonæ bayonte tōmēnāni, Ñænæ wipo quincoo, ante nāni cæincoo incæ nāmā ōnompoca pancacooga æpænē wido cædāni gotapa. ²⁰ Ayæ tæōnæ iñonte nænque edæ tamōnāmai nēmō tamōnāmai i ate mōnō, Ædōmē gomompā, ante ēñēnāmai inte edæ wætāmōnipa. Ayæ woboyæ godōmenque māmō pæmæñño æpæ nangui mængonta mængonta cæ wædinque mōnitō, Ñowo quēwenguināmai iomompā, ante edæ pōnēninque wætāmōnipa.

²¹ Mānināni wantæpiyæ cænāmai iñāni adinque Pabodo tæcægedē ængæ gantidinque tōmāmōni ayōmōni tōmēnāni iñānite iimāi apæncantapa.

—Iñānāni, botō āmo ēñēninque Cædeta nāni ānōwænē emō cæte pōnāmai inte ee owoquēnēmīni imīnitapa. Edæ mænōmai ee ongōmīni bai wipo tobænāmai iñonte mīnitō mæincoo ēwēnāmai inte wædāmai incædōmīnimpā. ²² Ñowo quiquēnē guīñēnāmai piyænē cæte quēwēedāni. Ñænæ wipo mōnō goimpo incæ tobænte bacæimpā. Nāwangā impā. Incæte waomō iñōmō wænāmai tōmāmō mīimō quēwenguimō iomompā. ²³ Botō iñōmō edæ Wængongui quīmo inōmo inte botō, Wængongui ingampā, ante tōmengā beyæ cæbopa. Ñowoōnæ woyowotæ tōmengā anquedo botō weca pōninque, ²⁴ botō imote apæncæcā ēñentabopa. “Pabodo, guīñēnāmai ie. Tæiyæ awēnē Tetædo weca bitō cōwē gote gongæncæbiimpā. Ayæ bitō beyæ waadete pōnō cædinque Wængongui bitō tōnō adopodē godongāmæ godāni iñānite do angā quēwencædānimpā.” ²⁵ Ante mænōmai mīnitō apæncæcā ēñēnimo inte botō wæætē mīnitō imīnite, Guīñēnāmai imīni inte pōnencæmīnimpā, āmopa. Tōmengā nānō apænedō baquino anguēnē, ante botō Wængongui ingante nē wede pōnēmo inte āmopa. ²⁶ Incæte wipo ñænæmpoque wāā tēiwænē wawænē godinque tobænte ba wæcæimpā, ante Pabodo angantapa.

²⁷ Iñinque mēa Wængongui itædē iñonte woboyæ ayæ pæmæ māo godinque mōnitō Adodiaticopæ nāni ānōmāa wadō wadō wogaa gotamōnipa. Mānimpoōnæ iinque go ate woyowotæ ayāōnæñēña iñonte wipo ñænæmpodē nē cædāni iñōmō, Onguipoiya obo pōmompā, ante pōnēnānitapa. ²⁸ Tōmēnāni, Ægancadō iī, ante acæte ante cædinque pædæ guidonte adinque todēinta i tei mēetodo impa, ante adinque ayæ godōmenque godinque pædæ guidonte adinque tōmēnāni, Ñowo edæ pōnōmenque bæintitiæte mēetodo impa, ante wædānitapa. ²⁹ Dicaboga pōni edæ gomō tamēñedāni, ante guīñente wædinque, Ñænæ wipo wāi wocængæimpā, ante teēmenca nāni guitodōninca menca go mencaā yæmiñæmpo inō edæ guitodōnānitapa. Ayæ, Ñāō ba waa tobaimpā, ante Wængongui ingante apænedinque edæ wāi wocænte a owotāmōnipa. ³⁰ Wipo ñænæmpo nē cædāni quiquēnē, Mōnō wodui winongæimpā, ante awēmō cædinque waca nāni guitodōninca yæcadopo inō guitodōncæte ante cæte bai babæ cædinque, Mōnō awēmō goquimpo, ante guiyā wipo incæ pædæ wæænōncæ cædānitapa. ³¹ Guiyæmpo tæcæ pædæ wæænōñōnāni Pabodo iñōmō tontado capitāō tōnō tontadoidi iñānite angantapa.

—Iñāni wipo ñænæmpo nē cædāni inte ñænæ wipodē ongōnāmai iñāni bai mīnitō ædō cæte nāmā cæte quēwenguimīni.

³² Angā ēfente wædinqe tontadoidi guiquēnē ñænæ wipo nē cædāni nāni awēmō gocæ cædimpo gæguincamē aa wiyæñwō īninque guiyæmpo tæi guiite æmæwō gotimpa.

³³ Tæcæ oqe pōnente īñonte Pabodo īñōmō, Tōmāmini cænguī cædēdāni, ante nanguī āninque,

—Nōwo mēa Wængonguī itædē īñonte mīnitō ancai guīfente wædinqe ee ate cænāmaī quēwēmīni abopa. ³⁴ Nōwo īñōmō mīnitō īmīnite, Cædēdāni, āmopa. Cænte quēwenguēnē cæmīni, āmopa. Mīnitō æcāmenque incæ tōmāmini wænāmaī incæmīnimpā.

³⁵ Āninque tōmānāni waa ayōnāni Pabodo pāō æninque Wængonguī ingante, Waa pōnōmi cæmōnīpa. Ante apænēdinqe ao mænte cængā. ³⁶ Adinque tōmēnāni, Mōnō quēwengæimpa, ante gancæ pōnente wædinqe tōmānāni cænānitapa. ³⁷ Wipodē mōni adopodē gocabo īñōmō dotiento tetenta ī tei mānīpomōni intamōnīpa. ³⁸ Mānōmaī cædinqe tōmēnāni eyepæ cænāni ate edæ, Wipo teēmē ēmīfænte ōnætāmō īñōmō gobaimpa, ante guīfente wædinqe, Wodæī bacæimpa, ante cædinqe mōnitō cænguī tōmēmō incæ æpæñē gāwapæñē wido cægadānimpā.

Wipo ñcænæmpo incæ goyæ guīpa

³⁹ Mānī ñāō bayō ōmæ adinque ñænæ wipo nē cædāni īñōmō, īlīmæ quīmæmē impa, ante ēñēnāmaī īnāni īnānitapa. Wæætē cōwā ayōnāni, Æpæ wedeca togaa paodāmæ īñōmō ēmōnai impa, ante adinque, Eyepæ imō īninque mōnō ēmōnai boga wipo nāñe ñongæimpa. ⁴⁰ Ante cædinqe teēmenca nāni guītōdōnīncacoo ēmō cæte gocæte ante gæguincamē aa wiyæñninque ñimpo cædāni tadōmengadæ ee ongontapa. Ayæ wiyaimpa mempaa tōmēnāni wāi wocæñedē yæmīñæmpoya īnō nāni goti wīnimpā incæ ñōwo wæætē edæ, Wipo tōō gocæimpa, ante ñī cædinqe æpæñē wæætē pædæ guīdōnānitapa. Ayæ, Woboyæ pæmænte māō gocæimpa, ante ñænæ wipo weocoo adocooque yæcadopo pædæ ææñonte wo cædāni ate ēmōnai boga togaa paodāmæ īñōmō tōingā māō gotamōnīpa. ⁴¹ Incæte tæcæ goyōmōni ōnætāmō īñōmō nāñe ñongæntapa. Wipo yæcādo nāñe ñongæ adinque mōnitō, Mōnō ædō cæte goquī, ante wæyōmōni æpæ nanguī mængonta mængonta cæ beyænque yæmīñæmpo nā tobæñninque pangūimæ pangūimæ æmæwō gopōtapa.

⁴² Tæcæ tobæñō tontadoidi guiquēnē, Nē tee mōnete ongōnāni wīi tæi tæi pante wodīi wīnongūnāni, ante wææ cædinqe tōmēnāni īnānte wænōncæ cædānitapa. ⁴³ Adinque tontado capitāō īñōmō, Pabodo

cōwē quēwencæcāimpa, ante cædinqe tōmēnāni nāni cæcæ cædīnō ante wææ angā ēfente ñimpo cædānitapa. Ayæ mōnitō īmōnite, Nē ipo cæmīni īñōmō tāno æpæñē tæi guīdinqe ōnopoca compo go tōmæwæ ōmaa goedāni, angā ēfente gotamōnīpa. ⁴⁴ Wadāni ipo cædāmaī īnāni īnānte tōmengā, Mīnitō guīquēnē awæmpaa incæ wipopa tobæñnimpaa incæ nāñe ñongæninque wiyacæ wiyacæ goedāni, angā ēfente godānitapa. Mānōmaī ēfente cædinqe mōnitō edæ tōmāmōni æpæmpo becadote wænāmaī inte ōmaa edæ tōmæwæ pongamōnīpa.

28

Wāā tēiwænē Mānatābæ Pabodo ponte quēwengampa

¹ Æpæmpo becadote wænāmaī inte tōmāmōni ōmaa taote ēñēñōmōnite, Wāā tēiwænē īiwænē Mānatābæ impa, ante apænēdāni ēñentamōnīpa. ² Māñōmæ quēwēnāni īñōmō wīi wadāni baī cædinqe mōnitō īmōnite waadete cædānitapa. Cōōnæ ayæ nanguī cæ ate yoguite wæyōmōnite tōmēnāni gonga tānōninque, Pō ootoedāni, ānāni gonga tōmāmōni bæcōyōmō oototamōnīpa. ³ Pabodo īñōmō ōnopoca gæte tēnewæ bacoo ænte māōmō ñō cæyongā gonga ocoi ā wædinqe tæntæ gongapamō manta Pabodo ōnopmo æo pocænte ñinga cædāmaī ee engate owo wæcā. ⁴ Adinque īñōmō quēwēnāni wæætē nāni cabo nāmāneque tededinqe, “īngā īñōmō waocā ingante nē wæñingā ingā awædō. Tōmengā æpæmpo becadote wænāmaī īñongante edæ mōnō nō cæte pānongā incæ tōmengā ingante ata cæpodāmaī inte angā ate ñōwo quēwengūnāmaī incæcāimpa.”

⁵ Ante wapiticæ ante pōnente tedeyōnānite Pabodo īñōmō pongadāmaī ingā inte pipo cæcā tæntæ ñingacæ gongapamō togodo guite gonga gonte wængantapa. ⁶ Adinque tōmēnāni, Tīncadō pæncæ pæncæ mempoqinggā, ante ayæ, Tīncadō īñontobæ tæi go wæænte wænguinggā, ante acæte ante wantæpiyæ cōwā ayōnāni, Ayæ dæ pongadāmaī ī inque ingampa, ante adinque tōmēnāni wæætē edæ, Æ īngā wacā wængonguī īnongā inte ponte a ongongampa, ante wapiticæ ante pōnēnānitapa.

⁷ Ayæ māñīwænē awēnē Pobidio īñōmō tōmengā quīncodē mōni ōmaa pōñōmō eyequei intapa. Tōmengā, Oncōnē pō guite quēwēdāni, angā pō guite mōnitō mēōnaa go adōōnæque quēwēñōmōni tōmengā waadete pōnō cæcā ate waa quēwentamōnīpa. ⁸ Pobidio māñōmaī waa cæcā quēwēñōmōni, Tōmengā mæmpo wepæ tōnō gōmæ cæte daicawō gawænte

mōimoga a oñongampa. Ante apænedāni wædinque Pabodo tōmengā weca guiddinque Wængonguī ingante apænedinque gampocā ate waa bacantapa. ⁹ Pabodo mānōmaī cæcā adinque māniwænē tōmāo gode ānāni ēñente wædinque nē wænæ wænæ ināni inānite Pabodo weca ænte māmō ænte māmō cæyōnāni tōmānāni Wængonguī cæcā waa badānitapa. ¹⁰ Māniñōmō quēwēnāni mōnitō imōnite wæætē pōnō waa apænedinque cōwē waa cædānitapa. Ayæ wogaa tæcæ gocæ cæmōni adinque quīēmē mōni ænguēñēnō ante adinque tōmēnāni, Mīnitō ænte goquī, ante eyepæ pōni ænte māmō da wēnāni ænte gotamōnipa.

Odōmā iñōmō Pabodo pongampa

¹¹ Ayæ mōnitō Mānatabæ iñōmō mengāa go adocanque māmonque quēwēninque gocæte ante cædinque, Åancadēnaquepo, Adecantodia iñōmō quēwēnāni nāni pemonte ānimpodē go guitamōnipa. Tōmēnāni wængonguīna Catodo tōnō Podoco awinca bai ante badōninque tōmēnāni ñænæ wipocado gō cædinque wipo ñænæmpo emōwo, Åancadēnaquepo impopa, ante pemōnōhānipa. Mānimpo Mānatabæ wēmonca wodōiñōmō do pōninque pæmæ tedæ wāi wocæ adinque mōnitō iñōmō mānimpodē go guiddinque wogaa gotamōnipa. ¹² Godinque Tidacota iñōmō nāni wēmonca wodōiñōmō pō wāi wocæninque mōnitō mēōnaa go adoñæque quēwentamōnipa. ¹³ Ayæ wadæ godinque Odeguio nāni quēwēñōmō pontamōnipa. ñimō ate dipæmæ gāmæñō woboyæ betamonca wædænque pæmæ wædinque mōnitō wadæ godinque waōnæ ate Poteodi quēwēnāni nāni wēmonca wodōiñōmō æmæwo pō ti wææninque tōmæwæ gotamōnipa.

¹⁴ Tōmæwæ godinque Poteodi nāni quēwēñōmō ponte ayōmōni nē pōnēnāni nāni cabo ongōnāni atamōnipa. Tōmēnāni, Adoche Wængonguī itædē mōnitō tōnō ee owoedāni, ānāni Ao ante mōnitō tōmēnāni nāni ānimpoga māniñōmō quēwentamōnipa. Ayæ ate Odōmā taadonque gotamōnipa. ¹⁵ Odōmā iñōmō quēwēntē nē pōnēnāni iñōmō, Pabodoidi oo pōnānipa, ante do ēñēnāni inte doñæ tadinque mōnitō imōnite bee tencæte ante pōnānitapa. Pancadāniya iñōmō Apio nāni godonte æiñōmō ganca pōninque mōnitō imōnite māmō bee tēnāni ate godongāmæ gotamōnipa. Godinque, Cæincō, ante Menconga go Adoconque, nāni āñōmō māniñōmō pōñōmōni wadāni māmō bee tēnānitapa. Mānināni inānite adinque Pabodo iñōmō, Ñowo iñōmō wampo pōnēmopa, āninque Wængonguī ingante waa ate pōnēninque apænecantapa. ¹⁶ Ayæ odōmānoidi nāni nanguī quēwēñōmō Odōmā

nāni āñōmō pōñōmōni tontado capitāo iñōmō nē tee mōnedināni wadāni inānite tōmengā awēnē nempo pædæ godōninque Pabodo ingante tee mōnedāmaī ingantapa. Wæætē wacōnē nānēñē ænte māodāni quēwēñongante tontado adocanque tōmengā ingante wææ wāñōngāimpa.

Odōmā iñōmō Pabodo quēwengampa

¹⁷ Māniñōmō ponte ate Pabodo mēōnaa go adoñæque ate oodeoidi nē ānāni inānite āñecā godongāmæ pōnāni ate tōmēnāni inānite,

—Botō tōniñamāni, ēñēedāni. Mōnō guiddēnāni inānite wēnæ wēnæ cædāmaī inte botō dodāni nāni angainō ante wido cædāmaī iñōmote oodeoidi incæ Eedotadēē iñōmō botō imote bæi ongōninque æninque odōmānoidi nempo pædæ godōnāni gotabopa. ¹⁸ Odōmānoidi guiquēñē botō imote apænte āninque, Åebānō cæcantawo, ante anca ante adinque, Pabodo dicæ tōmengā nānō wænguinque wēnæ wēnæ cæcāa, ante adinque botō imote ñimpo cæcæte ante cædānitapa. ¹⁹ Odōmānoidi botō imote ñimpo cæcæte ante cæyōnāni oodeoidi wæætē anca Baa ānāni ēñente wædinque botō iñōmō edæ, Odōmānoidi tæiyæ awēñē Tetædo incæ botō imote apænte anguēnengā ingampa, antabopa. Mānōmaī ānimo incæte botō awēñē Tetædo weca ongōninque, Botō guiddēnāni wēnæ wēnæ cædānitapa, ante wæætē piunte ānāmaī incæboimpa. ²⁰ Mānōmaī beyæ mīnitō imīnite apænecæte ante botō, Pōedāni, antabopa. Ñowo apænebo ēñēedāni. Mōnō idægocabo iñōmō, Mōnō nē pōnguingā Codito pōnō cæcā beyænque watapæ bacæimpa, ante mōnō pōnēmoppa. Māniñō mōnō pōnengainō beyænque botō daagōmē ñānoncapoimo a ongōmo aedāni.

²¹ Ante apænyongante tōmēnāni wæætē Pabodo ingante apænedinque,

—Oodeabæ quēwēnāni bitō imite ante yewæmōninque cadota pædæ pōnōnāni dicæ æmōniyaa. Mōnitō tōniñadāni Oodeabæ quēwēntē pōninque bitō imitedō ante dicæ wīwa ānāniyaa. Bitō wīwa cædinō ante yewæmōninque odōmōnāmaī inōnānipa. ²² Mānōmaī i incæte wayōmō wayōmō tōmāmæ quēwēnāni, Māniñāni Coditoidi iñōmō wēnæ wēnæ cædāni inānipa, ante piunte tededāni do ēñēñōni ininque mōnitō, Bitō ayōmi Coditoidi æbānō cædāni ināni. Åebānō pōnēmii, ante ēñencæte ante wæmōnipa.

²³ Āninque tōmēnāni, ñiōnæ godongāmæ bee tēninque ēñengæimpa, āninque wadæ godānitapa. Ayæ wæætē māniōnæ nāni āniōnæ inque ba ate ocæ emænte pōñōnāni tæiyæñāni bee tēninque Pabodo weca godongāmæ pōnānitapa. Pōnāni adinque

Pabodo īñōmō baānæ contadingā gāwadecæ pōnī apænedinque, Wængonguī Awēnē Odeye nempo mōnō quēwengæīmpa, ante apænecantapa. Ayæ, Mōitee wodi tōnō Wængonguī beyæ nē apænegaināni, Mōnō Codito ponte cæcæcāīmpa, ante nāni angainō bai Itota īñōmō ñōwo ponte tōmānō ante do īinque cægacāīmpa. Nāwangā impa, ante botō apænebo ēñēmaimīnīpa, ante Pabodo oodeoidi īnānite apænecantapa. ²⁴ Angā ēñēninque pancadāniya, Pabodo nāwangā angampa, ānānitapa. Pancadāniya guiquēnē, Wīi pōnēnente awædō, ānānitapa. ²⁵ Nāni cabo incæ mānōmaī wæætedō wæætē apænete wadæ gocæ cæyōnānite Pabodo wæætē æmæwo apænecantapa.

—Wængonguī Tæiyæ Waēmō Ōnōwoca apænecā ēñēninque Itaiya wodi doyedē mīnitō mæmæidi īnānite nāwangā ante apænegacāīmpa.

²⁶ “Itaiya ēñēmi, bitō oodeoidi weca godinque īīmaī ante apænebi ēñencædānīmpa.

Mīnitō ōnōmoncaque ēñēninque ēñēnāmaī incæmīnīmpa.

Awıncaque adinque cōwē adāmaī incæmīnīmpa, ante apænebi ēñencædānīmpa.

²⁷ Īnāni edæ mīmō ōmædēnāni inte wīi ēñēnente wæwædō,

āninque ædō cæte ēñenguīnāni.

Awinca wīi aīnente awædō, ānāni inte ædō cæte aquīnāni.

Edæ mīmō ēnēnāni inte bai tōmēnāni awınca wi æmōnte adinque

ōnōmonca wi æmoncate ēñencædōnānīmpa.

Edæ mīmō nō pōnēninque dadi ēmænte botō gāmæñō pōnāni bai

botō do godō cæbo waa bacædōnānīmpa.”

Ante Itaiya wodi mīnitō mæmæidi beyæ āmotamīni ante bai yewæmongacāīmpa.

²⁸ Īninque mīnitō oodeoidi īnōmīni inte ēñēnāmaī imīni adinque Wængonguī ñōwo wæætē, Botō pōnō æmo beyænque quēwencæmīnīmpa, ante oodeo īnāmaī īnāni īnānite do apænecæ cæcampa. Tōmēnāni guiquēnē ædæmō waa ēñenguīnāni īnānīpa, ante apænebo ēñēmaimīnīpa, ante Pabodo apænecantapa.

²⁹ Mānōmaī apænecā ēñente wædinque oodeoidi nāni cabo nanguī pōnī wæætedō wæætē āninque wadæ godānitapa. ³⁰ Pabodo īñōmō oncō ænte quēwencæte ante tōmēnāni nāni godonte æinta pædæ godōninque wacā oncō incæ tōmengā oncō bai bayō mānīncōnē wadepo mēnepoga quēwengantapa. Ayæ, Æcānō ēñacæ pōlnēna cōwē botō weca waa ponguimīni, ante quēwēninque tōmengā nē pōnāni īnānite apænecā ēñēnōnānīmpa. ³¹ Ayæ nē wææ wānōnāni cōwē Baa ānāmaī īñōnāni tōmengā

guīñēnāmaī apænedinque, Wængonguī Awēnē Odeye nempo mōnō quēwengæīmpa, ante apænedinque, Mōnō Awēnē Itota Codito æbānō cægacāī, ante edonque odōmonte apænecā ēñengadānīmpa.

Odömānoidi inānite Pabodo nānō cadota ante yewæmongainta

Waa quēwencæminimpa, ante

¹ Itota Codito ingante nē cædōmo inte botō Pabodobo inōmo inte ï cadota ante nē yewæmōmo imopa. Wængongui botō imote apænte æninqe iimainō ante aa pegacāimpa. Bitō Pabodobi gote botō pōnō cædō ante watapæ apænebi ēñencædānimpā, ante angacāimpa.

² Māninō, Wængongui æbānō pōnō cæquingā, ante watapæ apænedinque tōmengā beyæ nē apænegaināni wēnēñedē pōni nāni tæiyæ waēmō yewæmongainō ante botō māninō ante nē apænebo imopa.

³ Māninō waa pōni nānō cæquinō ante inque cæcæte ante cædinque Wængongui tōmengā Wengā ingante da pōnongā pongacāimpa. Tōmengā inōmō waocā onguināngā nānō baquinque Awēnē Dabii wodi Pæingā inte ēñagacāimpa.

⁴ Adocā Itota inōmō botō Wengā inongā ingampa, ante tōmānāni edonque acædānimpā, ante odōmoncæte ante cædinque Wængongui tæi piñænongā inte iimāi cægacāimpa. Ingā Itota Codito mōnō Awēnē inōmō Tæiyæ Waēmō ewocacā inte do wæningā inongante Mæmpo Wængongui wæætē nangui angā ate ñāni ōmæmongacāimpa.

⁵ Ayæ adocā tōnō godongāmæ cædinque tōmengā emōwo beyæ mōnitō imōnite Wængongui pōnō waadete cægacāimpa. Ayæ, Minitō wabæca wabæca gote apænemini ēñēninque tōmāmæ quēwēnāni Itota Codito emōwo ante wede pōnēninque nē ēñente cæte quēwēnāni bacædānimpā, ante cædinque Wængongui adobaī Itota ōnompō inte mōnitō imōnite da godongā gotamōnipā. ⁶ Ininque tōmāmæ quēwēnāni inānite Itota Codito, Botō gāmænō pōedāni, ante aa pedinque mīnitō imīnite adobaī aa pecampa. ⁷ Minitō botō quimīni badinque botō ayōmō tæiyæ waēmō ewocate quēwēmīni bacæminimpā, ante Wængongui cægacāimpa. Ininque mīnitō Odōmā inōmō quēwēninque Wængongui quimīni inōmīnite botō, Acæminimpā, ante iimāi ante yewæmōmopa. Mōnō Mæmpo Wængongui tōnō Awēnē Itota Codito waadete pōnō cæyōnate mīnitō wæætē gānē pōnente bacæminimpā, āninque yewæmōmopa.

Odōmā inōmō ēñacæ pōinēmpo, ante

⁸ Minitō æbānō wede pōnēmīni, ante tōmāmæ quēwēnāni tededāni ēñēnānipā. Ininque botō inōmō Itota Codito emōwo apænedinque Wængongui ingante waa ate apænebopā. Wængongui bitō adobique

pōnō cæbi ate odömānoidi wede pōnēnānipā, ante apænebopā. ⁹ Wængongui Wengā ingantedō ante watapæ apænedinque botō Wængongui ingante nē cædōmo inte tōmengā nānō ānō ante ædæmō ewocadinque apænebo ēñēnānipā. Botō mānōmāi cæbopā, ante nē adingā inte Wængongui inōmō edæ, Odömānoidi beyæ ante Pabodo botō imote woyowotæ incæ itædē incæ apænecampa, ante nē ēñengā ingampa. ¹⁰ Edæ, Wængongui, bitō Ao āni ate botō ñōwo odömānoidi weca ēñacæ gobaimopā, ante Wængongui ingante mīnitō beyæ ante botō cōwē apænebopā. ¹¹ Wængongui Ōnōwoca beyæ apænebo ēñēninque mīnitō tæi piñænte ewocæcæminimpā, ante cæcæte ante botō mīnitō weca ēñacæboimpā, ante wæbopā. ¹² Edæ mīnitō botō wede pōnēnō beyæ wampo pōnente bayōmīni botō wæætē, Minitō wede pōnēmīnipā, ante adinque adobaī wampo pōnēmo ininque mōnō pōnecabo godongāmæ wampo pōnēninque godōmenque tæi piñænte entawengæimpā, ante pōnēninque botō mīnitō imīnite aīnente wæbopā.

¹³ Botō wabæca quēwēnāni weca gote apænebo ēñēninque pancadāniya wede pōnēnāni badānitapā. Ininque, Botō mīnitō weca gote apæneyōmo wadāni pancadāniya adobaī wede pōnencædānimpā, ante cædinque botō æpogamē incæ poncæ cæyōmo edæ wææ cæte intapā. Ininque botō, Tæmpo poncæ cætabopā, ante yewæmōmo ate ēñencæminimpā, ante yewæmōmopa. ¹⁴ Edæ guidiegoidi incæ wadāni incæ, ocai encadāni incæ ocai ōmæcadāni incæ ædānimē inōnānite botō debe inte baī edæ tōmānāni inānite odōmonte apænequēnēmo inōmo imopa. ¹⁵ Mānōmāi beyæ mīnitō Odōmā inōmō quēwēmīni inōmīnite botō mīnitō imīnite adobaī mōnō Codito ingantedō ante watapæ apænecæte ante nangui cæinente wæbopā.

Mōnō tæi piñænte ewocadō Codito beyænque impa, ante

¹⁶ Mōnitō oodeomōni inōmōnīte tāno apænedinque Wængongui inōmō mīnitō oodeoidi ināmai inōmīnite ayæ adobaī apænedinque, Minitō wede pōnēmīni adinque Codito waa pōni pōnō ængā beyænque quēwencæminimpā, ante tæi piñænte cægacāimpa. Ininque māninō Codito ingantedō ante botō inōmō watapæ apænedinque, Wængongui tæi piñænte nānō cægainō impā, ante pōnente wædinque edæ guinēnedāmai inte do apænebopā. ¹⁷ Mōnō wede pōnēmo inōmonte Wængongui mānīne ante odōmonte watapæ apænecā beyænque mōnō nō cæte quēwēmō bagamōimpā. Mānīne beyænque godōmenque wede pōnente badinque mōnō wede pōnēnō

beyænque quëwëmopma. Ìninqe docä ìñömö Wængonguï beyæ yewæmōninque, “Në nõ cæte quëwënongå incæ tõmengä nänö wede pönëñö beyænque quëwëncæcäimpa,” ante nänö yewæmongainö bai edæ do batimpa.

Mönö waocabo wentamö mongænte wæmopma, ante

¹⁸ Në wiwa cædäni guiquënë wiwa nāni cædö beyænque wadāni edæ Wængonguï nõ pōni nänö apænegainö ante ædö cæte ëñguināni. Ìninqe Wængonguï ingante në wiwa cædāni nāni ëñëñāmaï ìninö ante godö piininqe tõmengä öönædë ongōninque wiwa nāni cædinö beyænque do pangä wædāni edonque amopma. ¹⁹ Wængonguï, Botö æbodö imoo, ante tõmāmini edonque pōni ëñencæminimpa, ante cædinque tõmāmö imonte odömōninque tõmënāni inānite adobaï edonque pōni odömōngä wægädānimpa. ²⁰ Wëenëñedë pōni në quëwëngaināni tõnō ñöwo ganca quëwëmö adobaï, Wængonguï mõnō në adāmaï ìnogä inte æbänö quëwëngä, ante ëñencæte ante wægäimö ìnömö inte mõnō tõmengä nänö badongaincooque adinque edæ edonque pōni acäimpa. Edæ, Tõmengä ñimpo cædāmaï inte cōwë në tæï piñænongä ingampa, ante ayæ, Në Wængonguï ìnogä ingampa, ante wædinque mõnō waocabo edonque aquënëmö imopma. Ìñæmpa ëñëñāmaï intabopa, ante ædö cæte anguï.

²¹ Wængonguï ingante do ate bai ingaināni incæte waodāni tõmengä ingante edæ, Bitö Wængonguï ñäö emōnōmi imipa, ante edæ änāmaï inōnānimpa. Wængonguï ingante waa ate pōnente apænëdāmaï inōnānimpa. Mänōmaï ocai ömæcädāni bai mīmō ömædënāni bai badinque tõmënāni wentamö entawënāni bagadānimpa. ²² Ocai encamōni imōnipa, ante änāni incæte tõmënāni wæætë mänōmaï cædinque ocai ömæcädāni bagadānimpa. ²³ Edæ Wængonguï wænāmaï në Quëwëngaingå ìñongante tõmënāni wæætë godö Baa angadānimpa. Tõmengä nänö ñäö emōnō ante piinte cædinque tõmënāni wæætë waomö në wæwocamö mõnō emōnō bai badōninque, öömä ëñadāni nāni emōnō bai badōninque, ocaguï ëñadāni nāni emōnō bai badōninque, ocaguï ömaadāni nāni emōnō bai badōninque tõmënāni, Mōnitö wængonguï ingampa, ante cædōnānimpa.

²⁴ Mänōmaï cædāni ate wædinque Wængonguï, Minitö mīni cæinente wædö ante ee abo cæcæminimpa, ante da godongä wadæ godinque tõmënāni baonga nāni ñōmæï mongænte quëwënguinque cædōnānimpa. Ìninqe nāna gæncaya nāna gæncaya nāni monguënënö ante Baa ante guñëñadāmaï inte cædinque wacä ingä wacä ingä godö wiwa cædōnānimpa. ²⁵ Wængonguï

nāwangä pōni nänö apænegainö ante tõmënāni Baa äninque mä pönëninque ante babæ apænegainonque ante Ao änōnānimpa. Mänōmaï cædōnāni inte tõmënāni wæætë Wængonguï nänö në badongaincoo weca ædæ wææninqe, Mōnitö wængonguï impa, ante cædinque në Badongaingå ingante edæ ëmö cæte wadæ gogadānimpa. Incæte tõmengä në Badongaingå ìñongante mõnō waocabo inguipoga mõnō quëwëñedë ayæ ate mīnguipo bayonte wantæpiyæ mõnō quëwëñedë Wængonguï ingante, Bitö tõmëni toquinque pōnō waa cæbi æmōnipa, ante mõnō apænecæimpa. Mänōmaï impa, ante Amëë, ämopa.

²⁶ Mänōmaï cæyönānite Wængonguï, Minitö guñëñadāmaï mīni toinente wædonque gobæwedāni, ante da godongä gogadānimpa. Ìninqe onquiyænāni incæ, Në onquiyæmo inōmo inte botö onguñængä tõnō monguënëmö imopa, ante änāmaï ināni inte godö wacä onquiyængä tõnō towente mõwënōnānimpa. ²⁷ Ayæ onguñænāni incæ adobaï cædinque, Botö onguñængä inōmo inte onquiyængä tõnō monguënëmö imopa, änāmaï ināni inte godö wacä onguñængä tõnō mõnente gonga bæco bai toinente wædāni bagadānimpa. Ìninqe cōwë nāni waa quëwëngüenënö ante Baa äninque nāni onguñænæcabo inōnāni inte wiwa cædōnānimpa. Mänōmaï cæyönānite Wængonguï eyepæ pōni godö pangä wædinque tõmënāni wiwa nāni cædö beyænque nāmä baonga caate wæwengadānimpa.

²⁸ Wængonguï ingante mõnō pōnente ëñengæimpa, ante tõmënāni, Önonquedö ante impa, ante tedeyönānite Wængonguï wæætë, Ocaidë wentamö encadōmīni inte edæ waomīni mīni wīi cæquënënö incæ ee abo cæbæwedāni, ante da godongä gogadānimpa.

²⁹ Tõmënāni ìñömö nõ cæquïnāmaï ināni inte do wiwa cædāninque badinque ñimäi cædānimpa. Wacä ingä godö towëninque tõmënāni wadāni inānite në wënæ wënæ cædāninque inānipa. Mäincoo ante æinente wæwënāni inte tõmënāni, Wacä gomonga ængä ingante godö piinte adānipa. Ayæ edæ, Mönö godö wænongæimpa, ante cædinque do cædānipa. Guëadö guëa piinte cædānipa. Wacä oda cæcæcäimpa, ante ancaa cædinque tõmënāni godö babæ cædānipa. Ayæ në wiwa pönëwënāni inte tõmënāni, Wadāni wæcædānimpa, ante godö piinte cædānipa. Godö wæntaa godö wæntaa tedewënāni inānipa. ³⁰ Ayæ wadāni inānite piininqe ñināni ìñömö godö babæ ante tedewënāni inānipa. Wængonguï ingante piinte cædāni inānipa. Ayæ, Tõmëmoque waëmö imopa, ante nāmä ængö cæte bai cædinque wadāni

īnānite wææntodonte bai āninque, Ōnonquedō cæcantedō abii, ante godō piinte todāni īnānipa. Edæ, Æbāno godōmenque wēnæ wēnæ cæte toquimoo, ante edæ pōnēē cōninque edæ nanguī cædānipa. Mæmpocā tōnō badā, Cædāni, āñōnate tōmēnāni ēñēnāmai cædānipa. ³¹ Mīmō ōmædēnāni inte tōmēnāni ocai ōmæcadāni bagadānimpa. Cæcæboimpa, āninque edæ īnque cædāmai īnōnānimpa. Wacā caate wæcā bai adinque godō waadedāmai īnōnāni inte tōmēnāni edæ godōmenque piīnāni inte cædōnānimpa.

³² Mānōmai cædāni īñōmō nāni wænguīnque cædānipa, ante Wængonguī nō pōni nāno angainō ante tōmēnāni ōnōmoncaque nē ēñēnāni inte tōmēnāni nāni wēnæ wēnæ cæinēnonque ante cædānipa. Ayæ tōmēnāni wīwa nāni cædō bai wadāni adobai cædāni adinque tōmēnāni, Waa cæminipa, āninque nē cædāni īnānite waa adānipa.

2

Nōingā ante Wængonguī apænte angampa, ante

¹ Tōmēnāni mānōmai cædānipa. Incæte bitō adobai wīwa cædōmi inte tōmēmi pante wæquinque tōmēnāni īnānite apænte āmipa. Īninque bitō wacā ingante, Bitō pante wæquinque wīwa cæbipa, ante apænte āmi inte bitō īñæmpa adobai wīwa cædōmi inte edæ æbānō cæte nāmā ante wææ anguīmii. ² Wīwa cædāni īnānite apænte āninque Wængonguī cōwē nōingā ante apænte angampa, ante edæ do ēñēmompā. ³ Īninque waobi ōnōmique īfōmi inte bitō īñæmpa tōmēnāni īnānite apænte āmi incæte tōmēnāni nāni cædō bai adobai cædōmi inte edæ, Wængonguī botō īmote pānāmai inte ata cæpocæcāimpa, ante pōnēmītawo. ⁴ Bitō wīwa cæbi inte Ca ca wæquēnēmi īñōmite Wængonguī wæætē ee pānāmai inte nanguī waadete pōnō cæyongante bitō wæætē edæ piīninque Baa āmitawo. Īñæmpa tōmēngā, Bitō, Æmæwo wēnæ wēnæ cætabopa, ante wædinque botō gāmænō poncæbiimpa, ante Wængonguī pōnō waadete cæcampa, ante pōnēmīyaa.

⁵ Incæte bitō mīmō ōmædēmi inte ancaa Baa āninque edæ wēnæ wēnæ bitō cædō ante ñimpo cædāmai īñōmite Wængonguī nāno ænguī baquīōnæ īnque bayonte tōmēngā ænguī pōni badinque godōmenque pangā wæcæbiimpa. Tōmēngā æbānō nō apænte angāā, ante māniñedē ate edæ edonque acæimpa. ⁶ Edæ, Tōmāno mōnō cægai ganca ante Wængonguī eyepæ pōni pædæ pōnongā æncæmōimpa, ante dodāni nāni yewæmongainō bai edæ īnque bacæimpa.

⁷ Īninque, Mōnō ñāo bai entawengæimpa, ante cædinque ayæ, Wængonguī mōnō

imonte waa adinque pōnō cæcā ate mōnō wæwocadāmai ēwocacæimpa, ante cædinque mōnō wæntædāmai inte ee waa cæte quēwēmō īnque Wængonguī pōnō cæcā ate mōnō cōwē wæñāmai quēwēmaimompā. ⁸ Wæætē, Wængonguī nāwangā nāno apænedō ante Baa āninque, Tōmēno beyænque quēwencæboimpa, ante nē ānāni īnānite ayæ wadāni wīwa nāni cæquīnonque ante nē tee empote godāni īnānite Wængonguī ænguī badinque godō piinte cæcæcāimpa. ⁹ Edæ mōnō waocabo wēnæ wēnæ cæmō adinque Wængonguī oodeomōni īñōmōnite tāno pāninque oodeomīni īnāmai īmīni īmīnite adobai pāñongā nē wēnæ wēnæ cæmō tōmāmō īñōmō edæ caate wæwencæmōimpa. ¹⁰ Wæætē waa cæmō adinque Wængonguī oodeomōni īmōnite tāno pōnō waadete cædinque oodeomīni īnāmai īmīni īmīnite adobai pōnō waadete cæyongā nē waa cæmō wæætē gānē entawēninque ñāo apāite bai entawēñōmonte edæ Wængonguī tōmāmō imonte waa acæcāimpa.

¹¹ Edæ mōnitō oodeomōni īmōni incæ mīnitō oodeomīni īnāmai īmīni incæ Wængonguī tōmāmō imonte adoyōmō pōni adinque wadō wadō ate pōnente cædāmai ingampa. ¹² Mōitee wodi, Īmai cædāni, ante nāno wææ angainō ante ōmæmoncadāni inte wīwa cædāni īnque tōmēngā nāno wææ angainō dæ ante bai mānināni wæncædānimpa. Wæætē Mōitee wodi nāno wææ angainō ante do ēñente ēmoncadīnāni incæte wīwa cædāni adinque Wængonguī mānīne ante ēñēnāmai cædāni beyænque apænte āninque pangā wæcædānimpa. ¹³ Edæ Mōitee wodi nāno wææ angainō ante ōnōmoncaque ēñēnāni inte tōmēnāni nāni ōnōmoncaque ēñēno beyænque Wængonguī ayongā dicæ nō cædāni badāniyaa.

Wæætē edæ mānīne ante ēñente cædāni īnānite guiquēnē Wængonguī pōnō angā ate tōmēnāni īñōmō nō cædāni bacædānimpa. ¹⁴ Edæ Mōitee wodi nāno wææ angainō ante ōmæmoncadāni inte oodeoidi īnāmai īnāni incæ pancadāniya tōmēnāni dodāni nāni wææ angainōnque ante Ao ante cædinque Wængonguī nāno wææ angainō bai edæ do cædānipa. Mānōmai ēñente bai cædinque tōmēnāni mīmō entawēnāni inte mānīne ante ōmæmoncadāni īnāni incæte nāmā nāni wææ ānonque ēñente cædānipa. ¹⁵ Edæ, Tōmēnāni dodāni nāni wææ angainō ēñēninque waa cædāni inte tōmēnāni Wængonguī nāno wææ angainō bai do entawēnānipa, ante edonque acæimpa. Mīmō entawēnāni inte tōmēnāni nāni caboque godongāmæ pōnēninque wēnæ wēnæ nāni cædōno ante nāēmæ apænte wææ ānānipa. Ayæ wæætē waa cædāni ate

tömēnāni nāēmæ apænte ñimpo cædānīpa.

¹⁶ Codito ingantedō ante watapæ ēñgāimo inte botō ñimāi ante apænebopa. Wængonguī angā ēñente cædinque Itota Codito wæætē waomō mōnō awēmō entawēnō ante edonque pōni adinque apænte ancæcāimpa. Tōmengā nānō apænte anguūōnæ ñinque bayedē edæ mānīnō ante botō yewæmonte apænedō bai edæ ñinque bacæimpa.

Mōitee nānō wææ angainta adinque oodeoidi wīi ēñēnāni

¹⁷ Bitō ññōmō edæ, Oodeobo ññōmō ñmopa, ante āmīpa. Ayæ, Mōitee wodi nānō wææ angainta nē ēñēmo inte botō Wængonguī ayongante waa quēwēmo ñmopa, ante edæ nāmā ængō cædinque āmīpa. ¹⁸ Wængonguī æbānō angāā, ante do ēñēmīpa. Ayæ tōmengā nānō wææ angainō ante do ēñēmi inte bitō, Quīnō waa ī, ante do ēñēninque Ao ante æmīpa. ¹⁹ Bitō, Wadāni babetamō bai ēwocayōnānite botō tōō æmænte māobo godānīpa. Wēmō ññōmō quēwente bai adāmai ññōnānite botō ññōmō, Acæmīnīmpa, ante tīca ēnente bai odōmonte apænebopa, ante edæ, Nāwangā āmopa, ante bitō apænebitawo. ²⁰ Ayæ adobai, Mōnō Mōitee wodi nānō wææ angainō ante ēñente beyænque mōnō ēñenguēñēnō ante entawēninque mōnō nō cæquēñēnō ante adobai tōmānō ante entawængæimpa, ante bitō pōnēmitawo. Ayæ mānōmainō ante bitō pōnēnō beyæ bitō, Nē oda cædāni ñnānite botō nē tōingā odōmōmō ñmopa, ante pōnēmitawo. Wēñēnāni bai wædænque ēñēnāni ññōnānite botō nē odōmonte apænebo ñmopa, ante pōnēmitawo.

²¹ Ññæmpa mānōmai ññōmi inte bitō edæ dicæ nāmā odōmonte apænete ēñēmitawogaa. Wadāni ñnānite odōmonte apænedinque, Awēmō ænāmai ñedāni, ante odōmonte apænedōmi inte tōmēmi awēmō æmitawo. ²² Bitō wadāni ñnānite odōmonte apænedinque, Nānōgængā ñnāmai ññongante godō guēa mōnāmai ñe, ante nē wææ āmi inte bitō adobai wacā tōnō guēa mōmitawo. Ayæ, Wængonguī ingampa, ante nāni badōinca ante nē pīmi inte bitō edæ tōmēnāni nāni apæneincōnē go guīdinque edæ ō æmitawoo. ²³ Ññæmpa bitō, Mōitee wodi nānō wææ angainō ante botō ēñente cæbo ñmopa, ante tededinque nāmā ængō cædōmi inte edæ māñine ante ēñēnāmai cæbi adinque wadāni wæætē Wængonguī ingante waa adāmai ñnānīpa tōō. ²⁴ Edæ, “Mīnitō cædinō beyæ oodeoidi ñnāmai ñnāni incæ Wængonguī ēmōwo ante godō babæ ante wēnæ wēnæ ānewēnānīpa,” ante tōmengā beyæ dodāni nāni yewæmongainō bai do batīmpa.

²⁵ Edæ Wængonguī nānō wææ angainō ante ēñente cæbi ñinque bitō, Nāwā oodeobo ñmopa, ante nē ēō togæimi badinque waa ñmāmpa. Wæætē edæ ēñēnāmai cæbi ñinque oodeo ñnāmai ingā bagāacā ingā bai bitō ññōmō edæ do babaimīpa. ²⁶ Oodeoidi ñnāmai ñnāni guiquēnē bagāadāni ñnāni incæte tōmēnāni Wængonguī nānō wææ angainō ante ēñente cædāni ñinque Wængonguī ayongā tōmēnāni do ēō togæñnāni bai ññōnāni inte oodeoidi bai ñnānīpa. ²⁷ Bitō ññōmō Mōitee wodi nānō wææ yewæmongainta māñimi inte nē ēō togæimi ñmitawo. Bitō mānōmai ñmi incæte ēñēnāmai cæbi ññōmi wacā wæætē bagāacā ñngā inte ēñente cæcā ñinque tōmengā ēñente nānō cædō beyænque Wængonguī wæætē bitō ñmīte apænte āninque pancæcāimpa.

²⁸ Ññæmpa oodeo ēñagaingā inte baō beyænque oodeocā ingā incæte tōmengā wīi mānōmai ingā beyænque nāwā oodeocā ingampa. Adobai nē ēō togæingā ññōmō baonque nānō ēō togæñnō beyænque tōmengā Wængonguī ayongā ædæmō ēō togæingā bai wīi ingampa. ²⁹ Wængonguī Ōñōwoca ingante nē ēwocacā guiquēnē tōmengā ññōmō edæ nāwā oodeo bai badinque Wængonguī wēñægā ingampa. Edæ Mōitee wodi nānō wææ yewæmongainō ante ēñente ēō togæninque waocā tōmengā wentamō nānō antawēnō dicæ wido cæquingāā. Wængonguī Ōñōwoca guiquēnē pōnō wido cæcā beyænque waocā wæætē waēmō entawengampa. Mānōmai entawengā ingante wadāni waa adāmai ñnāni incæte Wængonguī wæætē, Bitō waa entawēmi abopa, āninque tōmengā ingante waa apænecampa.

3

¹ Ñinque oodeocā ññōmō edæ, Oodeobo ñmopa, ante toquēngā ingantawo. Ayæ adobai, Botō ēō togæimo ñmopa, ante toquēngā ingantawo. ² Ao āmopa. Nē oodeoidi ññōnāni inte tōmēnāni cōwē nangūi toquēñēnāni ñnānīpa. Edæ Wængonguī apænecā ēñgāñnāni inte edæ oodeoidi tōmengā nānō apænedō ante nē mangāñnāni inte nē toquēñēnāni ñnānīpa. ³ Mānōmai ī incæte pancadāniya ññōmō edæ wede pōnēnāmai ñnānīpa. Ñinque mōnō æbānō angūi. Tōmēnāni nāni pōnēnāmai ñnō beyænque Wængonguī tōmēnāni ñnānite dicæ ñimpo cædinque ædæmō aadāmai ingantawogaa. ⁴ Edō cæte mānōmai ingūi. Mōnō waocbo tōmāmō nē babæ apæñemō ññōmonte Wængonguī ññōmō nō pōni cæcā ingainō anguēnē. Edæ tōmengā beyæ ñimāi ante yewæmongatīmpa.

“Wængonguī bitō æbānō apænebiī, ante apænte ancæ cædāni incæte

tömēnāni, Wængonguī nō pōni ante apæncampa, ante edonque acædānimpā.

Bitō nē tæi emōmi inte edæ bitō imite nē apænte ancæ cædāni inānite nāemæ edæ wææntodonte bai cædinque edæ gānā cæcæbiimpā.”

Ante nāni yewæmongainō bai edæ bacæimpā.

⁵ Waodāni mā pōnēninque iīmai ante tedewēnānimpā. Mōnitō wīwa cæyōmōnite Wængonguī nō cæcā adinque wadāni, Wængonguinque nē nō cædongā ingampā, ante godōmenque edonque acædānimpā. Ininque wīwa cæyōmōnite Wængonguī quīnante piinte pangāā, ante tedewēnānimpā. Mānōmai tedewēnāni adinque mōnō wæætē æbānō anguēnēmō imōō. Inæmpā waodānique nāni ānewēnō bai dicæ anguēnēmō imongāā. ⁶ Edō cæte mānōmai ānewenguī. Mānīnō nāni tedewēnō nāwangā i bai inguipoga quēwēmō imonte Wængonguī apænte ānāmai inguēnengā.

⁷ Wadāni guiquēnē iīmai ante tedewēnānimpā. Wængonguī cōwē nāwangā ante apæneyongante botō babæ apænebo adinque wadāni, Wængonguinque nāwangā ante apæncampa, ante tōmengā ingante godōmenque wā acædānimpā. Ininque babæ botō apænedō beyænque Wængonguī godōmenque nāō apāite bai emongā ingampā. Ininque, Bitō nē wēnæ wēnæ cæbi imipā, ante Wængonguī quīnante botō imote apænte angāā, ante tedewēnānimpā. ⁸ Tömēnāni, Wængonguī ingante godōmenque wā acædānimpā, ante mōnō godōmenque wēnæ wēnæ cæcæimpā, ante tedewēnānimpā. Tömēnāni nāni tedewēnō nāwangā i bai mōnitō adobai ante ancædōmōnimpā. Edæ, Tömēnāni nāni tedewēnō bai edæ Pabodoidi adobai ante apænedānimpā, ante pancadāniya pōnō wēnæ wēnæ ante babæ apænedānimpā. Mānōmai ante nē apænewēnāni inānite pāninque Wængonguī nō cæte pangampā.

Tōmāmō mōnō pante wæquinque wentamō mōngæmompā

⁹ Ininque æbānō ante anguī. Mīnitō oodeoidi ināmai ōnōmīninque inōmīnite mōnitō mōni oodeocabo dicæ godōmenque wā pōni imōniyāā. Inæmpā mōnitō oodeomōni incæ mīnitō oodeomīni ināmai imīni incæ tōmāmō nē wēnæ wēnæ cædōmō imompā, ante do odōmonte yewæmōmōni abaimīnimpā. ¹⁰ Edæ iīmai ante Wængonguī beyæ ante āmotamīni ante bai yewæmongatimpā.

“Nē nō cædongā inōmō edæ dæ angampā. Adocanque incæ edæ dæ angampā.

¹¹ Nē ēñente pōnengā inōmō edæ dæ angampā.

Wængonguī ingante ante nē diqui diqui mīnongā inōmō edæ dæ angampā.

¹² Tömānāni edæ oda cæte wapiticæ god-inque,

nāni wāā cædāmai incaboque badānitapā. Nē wāā cædongā inōmō edæ dæ angampā. Adocanque incæ edæ dæ angampā.

¹³ Waodāni inānite wænoncæte ante ææ ænete bai emencadinque, tōmānāni babæ ante enguēnēwate tedewēnānimpā.

Edæ tæntæ tōmēmæ ēnete bai, Wængongæimpā, ante ēnedānimpā.

¹⁴ Tömēnāni piinte nāni tedewēnō beyænque moncapæ tī nā bai enguēnēwadānimpā.

¹⁵ Tömēnāni wængonguīwaque pogodo gōquīwaque ēwadānimpā.

¹⁶ Tömēnāni nē godō wæñōnāni inte māincoo wido cæni godāni ate edæ mī quēwēnāni ponte adinque caate bai wæwēnānimpā.

¹⁷ Nē piinte cædōnāni inte tōmēnāni Wængonguī taadō tōmengā gānē entawente nānō godōnō ante adāmai inte cædānimpā.

¹⁸ Tömēnāni, Wængonguī ingante mōnō guīñente ēñengæimpā, ante pōnēnāmai inānimpā.”

Ante dodāni nāni yewæmongainō bai impā.

¹⁹ Ecānō Mōitee wodi nānō wææ angainō ante nē ēñente quēwenguēnēna ināā tōmengā beyænque ante wææ yewæmongatimpā. Mānōmai i beyæ, Botō eyepæ cæbo imopā, ante mōnō ædō cæte anguī. Edæ guīñēnete mōnō pæ wēnecæimpā. Ayæ inguipoga tōmāō quēwēmō tōmāmō Wængonguī nē apænte angā wecā ongōninque edæ, Æbānō cætaboo, ante Wængonguī ingante mōnō edonque apænequēnēmō imompā. Mānōmaīnō ante edæ do ēñēmompā.

²⁰ Mānōmai beyæ Wængonguī, Mōitee wodi nānō wææ angainō ædæmō ēñente cæbi beyæ bitō botō ayōmō nē nō cæbi babipā, ante adocanque ingante edæ ānāmai incæcæimpā. Wæætē mānīne nānō wææ angainō ēñente beyæ mōnō, Nē wēnæ wēnæ cæmō imompā, ante edonque amompā.

Mōnō wede pōnēnō beyænque nō cæte quēwēmompā, ante

²¹ Wī Mōitee wodi nānō wææ angainō ante ēñēmīni beyæ wæætē edæ Wængonguī incæ pōnō badongā beyænque mōnō tōmengā ayongā nō cæmō hamompā, ante nōwo pōni odōmongatimpā. Dodāni Mōitee wodi tōnō Wængonguī beyæ nē apænegaināni inōmō, Incayæ ate mānōmai bacæimpā, ante do yewæmongadānimpā.

²² Wængonguī pōnō badongā ate mōnō nē wede pōnēmō inōmō Itota Codito ingante mōnō wede pōnēnō beyænque edæ tōmāmō tōmengā ayongā nō cæmō hamompā. Edæ

mōnō adoyōmō ingaimō inte ōnōmonque īmōmpa. ²³ Īnīnque mōnō tōmāmō wēnæ wēnæ cæmō inte Wængonguī nānō nāō bai quēwēñōmō guicæte ante cædinque wīī eyepæ cæmō inte wīī guimōmpa. ²⁴ Incæte Itota Codito ængā beyænque abæ tawænte gote bai quēwēmō īñōmonte Wængonguī ōnonque ānāmaī inte waadete pōnō badongā ate mōnō tōmengā ayongā nō cæmō bamōmpa. ²⁵ Wængonguī īñōmō Itota Codito ingante da pōnōninque, Tōmengā mūnitō wēnæ wēnæ cædō ante teēmente wængā beyænque botō wæætē piyænē cædinque mūnitō īmīnite pānāmaī incæboimpa, ante cægacāimpa. Īnīnque tōmengā, Mānōmaī pōnō cæbo ate mūnitō, Itota wepæ mōnō beyæ pe tæ pe tæ wæænīmpa, ante wede pōnēninque wede mīni pōnēnō beyænque quēwencæmīnīmpa, ante pōnō cægacāimpa.

Mānōmaī cædinque Wængonguī wēēnēñedē mōnō waocabo mōnō wēnæ wēnæ cægainō ante ee adinque nē pānāmaī ingaingā incæte edæ, Botō cōwē nōingā ante apænte ānōmo īmōpa, ante ēñencæmīnīmpa, ante odōmongacāimpa. ²⁶ Īnīnque, Wængonguī nē nō cæcā īnongā ingampa, ante mōnō acæīmpa. Ayæ adobaī, Itota ingante nē pōnēmō īñōmonte Wængonguī nē panguēnengā ingā incæ mōnō īmonte ata cæpōdinque pōnō badongā ate mōnō wæætē tōmengā ayongā edæ nē nō cæmō bamōmpa, ante mōnō acæīmpa. Īnīnque tōmengā mānōmaī cædinque tōmengā nō nānō cædō ante odōmoncæte ante nōwo cægacāimpa.

²⁷ Īnīnque mōnō waocabo īñōmō nāmā ængō cæte bai cædinque mōnō, Nāmā cædinque nō cæmō bamōmpa, ante ædō cæte anguīmōō. Īñæmpa mānōmaī ānīnque cædāmaī ingæīmpa. Quīnante nāmā wīī ængō cæquīī, ante wæmīnitawo. Mōītee wodi nānō wææ angainō ædæmō ēñente cæmō inte bai mōnō, Tōmēmō cætamōmpa, ancædōmōimpa. Incæte ædæmō ēñente dicæ cæmongaa. Wæætē tōmengā ingante wede mōnō pōnēnō beyænque tōmengā ayongā nō cædōmō bamōmpa, ante adinque mōnō, Tōmēmō cætamōmpa, ante ædō cæte anguīī. ²⁸ Īñæmpa waocā Wængonguī nānō wææ angainō ante ēñente cæcā incæ wīī tōmengā nānō ēñente cædō beyæ nē nō cæcā bacampa. Wæætē wede nānō pōnēnō beyænque Wængonguī ayongā edæ nē nō cæcā bacampa, ante do edæ apænebo ēñēmaīmīnīpa.

²⁹ Oodeomōni īñōmōnite Wængonguī mōnitō Wængonguī īnongā ingampa. Oodeomīni īnāmaī īmīni guiquēnē, Wīī mōnitō Wængonguī ingampa, ante pōnēmīnitawo. Īñæmpa oodeomīni īnāmaī īñōmīnite adocā Wængonguī mūnitō Wængonguī ingampa. ³⁰ Edæ adocanque Wængonguī īnongā

ingampa. Īnīnque nē ēō togæīmōni īmōni mōni wede pōnēnō beyænque tōmengā pōnō badongā ate tōmengā ayongā edæ nō cæmōni bamōnīpa. Adobaī bagāamīni mīni wede pōnēnō beyænque Wængonguī adocanque īnongā inte pōnō badongā ate mūnitō adobaī tōmengā ayongā nō cæmīni bamīnīpa. ³¹ Mōnō pōnēnō beyænque impa, ante apænedinque mōnitō Wængonguī nānō wææ angainō ante dicæ wēā godonte bai cæmōniyaa. Wīī mānōmaī cæmōnīpa. Wæætē mānōmainō ante apænedinque tōmengā nānō wææ angainō ante Ao ānīnque mōnitō, Ēñēedāni, ante odōmonte apænemōnīpa.

4

Abadāō wodi æbānō cægacāī, ante pōnengæīmpa

¹ Mānīnō ante mōnitō mæmæ Abadāō wodi īñōmō æbānō ante ēñengacāī, ante mōnō nōwo pōnente apænecæīmpa. ² Abadāō wodi nē ēñente cæcā ingaingā incæte tōmengā nānō ēñente cædō beyænque dicæ nō pōni entawengā bacantawogaa. Mānōmaī cædinque nō cæcā bagacāimpa, ante nāwangā ī bai tōmengā waodāni ēñēñōnānīte, Waa cæbo īmōpa, ante do ancægacāimpa. Incæte tōmengā Wængonguī ēñēñongante mānīnō ante cōwē ānāmaī inguēnengā ingacāimpa. ³ Wængonguī æbānō ante apænecā ēñente yewæmongadāni, ante amīnīi. Edæ īīmaī ante apænecā ēñente yewæmongadānīmpa. “Wængonguī nōingā ante apænecampa, ante Abadāō wede pōnengacāimpa. Īnīnque tōmengā wede nānō pōnēnō beyænque Wængonguī wæætē edæ, Botō ayōmo Abadāō nē nō entawengā ingā abopa, angacāimpa,” ante yewæmongadānīmpa.

⁴ Edæ wadāni beyæ waocā nanguī cæcā ate tōmēnāni debe badīnāni inte edæ, Ōnonque pōnōmōni æe, ante ædō cæte anguīnānīi. Īñæmpa wīī ōnonque godonte impa. Wæætē tōmengā nānō nanguī cædinō beyænque paga ante nē godonguēñēnāni inte awēñēidi, Bitō nanguī cæbitapa, ante godōnāni ængampa. ⁵ Wængonguī guiquēnē ōnonque pōnō cæcā æmōimpa. Waocā wīwa cæcā incæ wede pōnengā adinque Wængonguī pōnō badongā ate tōmengā Wængonguī ayongante wæætē nō cæcā bacampa. Īnīnque waocā waa cædāmaī incæ edæ wede pōnengā adinque Wængonguī wæætē tōmengā ingante pōnō badōninque, Nō pōni bitō entawēngūnīnque bitō wede pōnēmi abopa, angampa. ⁶ Waocā waa cædāmaī īñongante Wængonguī pōnō badongā ate tōmengā Wængonguī ayongā nō pōni entawengā īnīnque tōmengā watapæ quēwencæcāimpa, ante apænedinque

Dabii wodi adobaï ämotamini ante bai yewæmongacäimpa.

⁷ Adocä yewæmöninque,

“Waodäni eñënamai cädäni inänite Wængongui pönö ñimpo cæcä ate

tömënanï wæætë watapæ quëwëncädänimpa. Edæ tömënanï eñënamai nani cædö ante ö ænte mäo tee moncate bai cæcä adinque nangui tocädänimpa.

⁸ Ecänö ingante Wængongui, Bitö pante wæquinque wënæ wënæ cæbipa, ante cöwë piinte änämaï ingä ñinque mäningä waocä wæætë nangui tocæcäimpa.”

⁹ Ante Awënë Dabii wodi, Eö togænünänique tocädänimpa, ante dicæ yewæmongantawogaa. Bagäadäni

adobaï tocädänimpa, ante ancæte ante yewæmongacäimpa. Abadäo wodi Wængongui ingante wede nänö pönëno beyænque Wængongui, Botö ayömo Abadäo nê nõ entawengä ingä abopa, angacäimpa. Mänömainö ante edæ botö do yewæmömo abaiminipa. ¹⁰ Abadäo wodi æbänö engæñongante Wængongui mänömaï angacäi. Dicæ eö togæningä ñiongante

angantawogaa. Wæætë bagäacä ñiongante angacäimpa. ¹¹ Ñinque, Abadäo bagäacä inte wede pönengä beyænque botö pönö badömo ate nõ cæcä bacampa, ante eñencädänimpa, ante cædinque Wængongui angä eö togænte bagacäimpa.

Mänömaï cæcä beyæ minitö bagäamini inte wede pönëmini ñömöni Abadäo wodi minitö wæmængä bai bagacäimpa. Abadäo wodi pæimini bai wede pönëmini adinque Wængongui adobaï, Nö entawëmini bamini acæboimpa, ante pönö badongacäimpa. ¹² Mönitö wæmæ Abadäo wodi doyedë bagäacä ingäñedë incæ wede pönengä ingacäimpa. Möni idægocabo ñömö nê eö togæimöni inte edæ tömengä wede pönente nänö cængainö adodö tee empote gomönipa. Ñinque mäninönö möni wede pönente godönö gomöni beyænque möni eö togæncabo wæmængä adocä Abadäo wodi ingacäimpa.

Mönö wede pönëno beyænque Wængongui nänö angainö ante cæcampa, ante

¹³ Wængongui, Inguipoga incæ bitö nê ænguiimi incæbiimpa, äninque Abadäo wodi tönö tömengä nänömoidi inänite pönö angä ængadänimpa. Mänömainö äninque Wængongui dicæ, Botö wææ angainö ante eñente cädänique æncädänimpa, ante angantawogaa. Wæætë edæ wede pönente tömengä ayongä nõ entawënanï badäni beyænque Wængongui, Inguipoga incæ pönömo æncæminimpa, ante apænegacäimpa. ¹⁴ Wængongui dicæ, Botö wææ angainö eñente nê cädänique nê

ænguünäni inänipa, ante angantawogaa. Edæ mänömainö angä bai mönö wede pönëno ante önonque pönencädömöimpa. Tömengä nänö angainö incæ wo ewente bai bacädönimpa. ¹⁵ Edæ mäninö tömengä nänö wææ angainö ante eñënamai cädäni beyænque Wængongui ængui badinque pangampa. Wæætë wææ änämaï inte bai Wængongui, Botö wææ angainö ante eñënamai cæbipa, ante ædö cæte anguingä. Edæ dæ ancädönimpa.

¹⁶ Mänömaï beyæ Wængongui, Botö waadete pönö cædö beyænque æminipa, ante edonque acæimpa, ante cædinque Abadäo wodi wede nänö pönëno beyænque ante, Pönömo æncæminimpa, angacäimpa. Mönitö Möitee wodi nänö wææ angainö ante nê eñëmöni ñömönite wii adomönique imönite angacäimpa. Wæætë Abadäo wodi nänö wede pönengä bai adobaï wede pönëmö ñömönte mönö tömämö imonte Wængongui, Cöwë pönömo æncæminimpa, angacäimpa. Edæ mönö wede pönencabo ñömönte Abadäo wodi tömämö wæmængä bai ingacäimpa. ¹⁷ Wængongui edæ do wængainäni inänite pönö cæcä ate tömënanï ñömö ñäni ömæmonte edæ münäni quëwënanipa. Dæ angaincoo incæ tömengä do badongä ate edæ a ongoncoopa. Wængongui mänömaï nê badongä ñiongante Abadäo wodi tömengä ingante nê wede pönengä ingacäimpa. Ñinque Wængongui, “Abadäo eñëni. Botö pönö badömo ate bitö pæinäni yebëninque wacabodäni nani cabo wacabodäni nani cabo nangui inäni ñönänite edæ bitö adobique tömënanï wæmæmi incæbiimpa.” Ante Wængongui beyæ ante yewæmongatimpa. Ñinque Wængongui ayongante mönö wede pönëmö ñömönte Abadäo wodi mönö wæmængä bagacäimpa.

¹⁸ Tömengä ingante, “Bitö pæinäni edæ mänimpodäni bacädänimpa,” ante Wængongui do angacäimpa. Mänömainö angä eñëninque, Adö cæte baquii, ante wædongä incæ Abadäo wodi, Wængongui cöwë cæcä beyæ watapæ bacæimpa, ante wede pönengä ingacäimpa. Ñinque tömengä wede nänö pönëno beyænque “wacabodäni nani cabo wacabodäni nani cabo nangui inäni bayönänite tömënanï wæmængä” Abadäo bagacäimpa.

¹⁹ Tömengä, Botö picængadebo wodo tiëë wadepo quëwengaimo inte edæ botö baö wænte bai eñäbo inte edæ ædö cæte wëñæ tapæiquimoo, ante eñengacäimpa. Ayæ, Tada adobaï wëñæ cöwë mänämaï ingaingä inte picængadecä badinque ædö cæte wëñæ manguingä, ante pönengacäimpa. Incæte mäninö nänö wædö beyænque guñëñadämaï inte Abadäo wodi Wængongui

nānō āninō ante godōmenque pōnengacāimpa.²⁰ Tōmengā, Wængonguī wabānō cæbaingāā, ante wædāmai inte wæætē Wængonguī nānō, Cōwē pōnō cæcæboimpa, āninō ante wede pōnengacāimpa. Ayæ, Wængonguī bitō nāō entawēmi inte tæī ēmonte waa cæcæbiimpa, ante godōmenque tæī piñænte entawēninque Abadāō wodi wede pōnengacāimpa.²¹ Edæ, Wængonguī nē tæī piñængā inte, Cōwē cæcæboimpa, ante nē angaingā inte edæ cōwē cæcæcāimpa, ante Abadāō do ēñēninque edæ wede pōnengacāimpa.²² Tōmengā mānōmai wede pōnengā beyænque Wængonguī, Abadāō bitō nō entawēmi imi abopa, angacāimpa.

²³ Mānīne, Bitō nō cæbi imi abopa, ante nānō angaine iñōmō wīī tōmengā beyænque yewæmongatimpa.²⁴ Wæætē mōnō beyæ adobai yewæmongatimpa. Edæ, Mōnō Awēnē Itota ingante Wængonguī angā nāni ōmæmongacāimpa, ante nē angaingā ingante wede pōnēmō iñōmonte Wængonguī, Botō ayōmo mīnitō nō cæmīni imīni abopa, ante badongampa.²⁵ Wēnæ wēnæ mōnō cædō beyænque mōnō Awēnē Itota ingante Wængonguī pædæ godongā wængacāimpa. Ayæ mōnō beyæ ante cædinque tōmengā mōnō Awēnē Itota ingante, Bitō nē nō cædōmi inte nāni ōmæmōmi beyænque tōmēnāni botō ayōmo nō entawēnāni bacædānimpa, ante cædinque angā nāni ōmæmongacāimpa.

5

Wængonguī badongā ate mōnō nō cæmō bamompa

¹ Mōnō wede pōnēnō beyænque Wængonguī pōnō badongā ate mōnō tōmengā ayongante edæ nō cæmō bamompa. Īninque mōnō Awēnē Itota Codito nānō cægainō beyænque Wængonguī piyænē cæcā ate mōnō tōmengā tōnō godongāmæ gānē entawente quēwēmompa.² Mōnō wede pōnēnō beyæ adocā Codito mōnō imonte pōnō ænte māmongā ate Wængonguī waadete pōnō cædinque mōnō imonte ængampa. Ayæ Wængonguī nē nāō ēmongā weca ongōñōmō tōmengā pōnō badongā ate mōnō godongāmæ nāō ēmonte mōnō watapæ bacæimpa, ante wede pōnēninque tomompa.

³ Ayæ wīī māninque beyæ tomompa. Īñæmpa, Waocā nānō wæntædāmai inte ee cæquinque caate wæcampa, ante ēñēmō ĩninque mōnō caate wæmō incæte caate mōnō wædō beyæ adobai tomompa.⁴ Ayæ nē wæntædāmai inte ee cæmō adinque mōnō Wængonguī ayongā nē waa cæmō edæ bamompa. Mānōmai bamō ĩninque mōnō, Watapæ bacæimpa, ante pōnente tomompa.⁵ Mānōmainō ante nē pōnente tomō iñōmō

edæ mōnō ænguēnēnō ante do æninque mōnō guingo imonte wædāmai imompa. Edæ Wængonguī tōmengā Tæiyæ Waēmō Ōnōwoca ingante da pōnōninque tōmengā nānō waadete pōnēnō adobai do pōnongā æninque mīmōnē entawēmompa.

⁶ Edæ ĩmai impa. Mōnō aquīimō pōnī ĩnōmo inte, Ēdō cæte cæmōō, ante wæyōmonte mōnō Codito iñōmō eyepæ pōnī pōninque, Mīnitō Wængonguī ayongante wīwa cæmīni imīnīpa, ante adinque wīwa mōnō cædō ante teēmente wæætē wængacāimpa.⁷ Waocā guiquēnē wacā nē nō cædongā ingā adinque tōmengā beyæ wæætē dicæ wænguingā. Incæte, Nē waa cædongā wæætē quēwencæcāimpa, ante cædinque adocanque adocanque wabānō Ao ante tōmengā beyæ wæætē wæmāinānīpa.⁸ Incæte, Wængonguī mīnitō imīnīte nangūi waadete pōnengampa, ante odōmoncæte ante cædinque mōnō Codito iñōmō nē wēnæ wēnæ cæmō iñōmonte mōnō beyænque wæætē wængacāimpa.⁹ Codito wepæ mōnō beyæ pe tæ pe tæ wææ beyænque mōnō Wængonguī ayongante nō entawēmō do batomompa. Codito mōnō beyæ mānōmai wængaingā inte cōwē godōmenque cæcæcāimpa.

Āmo ēñēedāni. Wængonguī nē piñte panguēnengā iñongante adocā Codito gā pe æmpote ængā beyænque Wængonguī wæætē mōnō imonte edæ ata cæpocā quēwencæmōimpa.¹⁰ Mōnō edæ Wængonguī tōnō mōnō godongāmæ piñcabo iñōmonte tōmengā Wengā mōnō beyæ wæætē wængā beyænque mōnō Wængonguī tōnō godongāmæ piyænē cæmō bagamōimpa. Mōnō Wængonguī tōnō godongāmæ piyænē cæmō ĩninque tōmengā Wengā iñōmō cōwē godōmenque cæcæcāimpa. Āmo ēñēedāni. Tōmengā adocā do wængaingā inte nāni ōmæmonte mīngā quēwēninque mōnō imonte ængā beyænque mōnō wæñāmai inte cōwē quēwencæmōimpa.¹¹ Ayæ mōnō godōmenque ĩmaiñō ante ēñengæimpa. Mōnō Awēnē Itota Codito ængā beyænque Wængonguī piyænē cæcā ĩninque mōnō ōwō Wængonguī nempo quēwēninque edæ Itota Codito beyæ ante watapæ tomompa.

Tānocā Adāō wodi bai Codito adobai Tānocā ingampa

¹² Docā mæmæ adocanque tānocā incæ ēñēnāmai cæcā ĩninque mōnō wēnæ wēnæ cæpāmo inguipoga do pongatimpa. Ayæ tōmengā nānō ēñēnāmai cægainō beyænque nē wæwocacā bagacāimpa. Tōmengā wēnæ wēnæ cæcā ingaingā bai mōnō tōmāmō adobai nē wēnæ wēnæ cæmō imō ĩninque edæ mōnō waocabo tōmāmō nē wæwocamō edæ do bagamōimpa.¹³ Edæ wēēñēdē Mōitee wodi nānō wææ ānāmai ĩñēdē

incæ waodāni do wēnæ wēnæ cædāni ingadānimpā. Wēnæ wēnæ cædāni incæte Wængonguī, Botō wææ änō ante ēñēnāmai cæmīnīpā, ante ædō cæte apænte anguingāā. Īñæmpā māniñedē ayæ wææ änāmai ingacāimpā. ¹⁴Nē Ponguingā, ante dodāni nāni nē angaingā ĩñōmō Tānocā nānō ingai bai docā Adāō wodi adobai tānocā ingacāimpā. Incæte Adāō wodi Wængonguī nānō wææ änō ante ēñēnāmai cædinque wēnæ wēnæ cægacāimpā. Wæætē Wængonguī edæ Mōitee wodi nānō quēwenganca wææ änāmai ĩñongante Adāō wodi pæñināni guiquēnē wēnæ wēnæ cædāni incæte tōmengā nānō ēñēnāmai cægai bai wīi adobai ēñēnāmai cægadānimpā. Incæte tōmēnāni nē wæwocadāni inte wægadānimpā.

¹⁵Incæte Wængonguī nānō wææ angainō ante adocanque nānō ēñēnāmai cægai bai Wængonguī nānō pōnongai ĩñōmō wīi adobai impā. Edæ adocanque nānō ēñēnāmai cægai beyænque nangui ĩnāni inte wægadānimpā. Incæte Wængonguī guiquēnē nangui pōni waadete pōnō cædinque Itota Codito ingante da pōnongā pōninque tōmengā adocanque ĩnongā waadete eyepæ pōni pōnō cæcā ate mōnō nangui pōni ĩmō inte quēwēmōmpā. ¹⁶Onguiñængā adocanque wēnæ wēnæ nānō cægai beyæ nē wæwocadāni bagadānimpā. Wængonguī nānō pōnongai ĩñōmō edæ wīi adobai impā. Adocanque nānō adopoque ēñēnāmai cægainō ante adinque Wængonguī tōmengā ingante apænte āninque edæ, Bitō tente wæquinque impā, angacāimpā. Wæætē Wængonguī nānō wææ angainō ante ēñēnāmai wæætē wæætē cæmō incæte tōmengā, Botō ayōmō mīni nō entawēnguinque impā, ante ōnongæ pōnongā ænte entawēmōmpā.

¹⁷Waocā adocanque incæ Wængonguī nānō wææ angainō ante ēñēnāmai cæcā ĩnque tōmengā adocanque nānō ēñēnāmai cægai beyænque mōnō wæwocamō do bagamōimpā. Wængonguī guiquēnē godōmenque eyepæ pōni waadete pōnō badongā ate tōmengā ayongā mōnō nō entawēmō bagamōimpā. ĩnque Itota Codito adobai Adocanque ĩñongante mōnō tōmengā nempo wæwocadāmai inte quēwēninque awēñēdi bai badinque quēwēmōmpā.

¹⁸Mānōmai beyæ adocanque adopoque ēñēnāmai cæcā beyænque Wængonguī mōnō tōmāmō ĩmonte apænte āninque, Mīni wænguinque wēnæ wēnæ cæmīnīpā, angampā. Ayæ adobai Adocanque adopoque nānō nō cægainō beyænque mōnō Wængonguī ayongā nō cæmō bamō ĩnque Wængonguī apænte āninque mōnō tōmāmō ĩmonte, Mīni quēwēnguinque mīnitō botō ayōmō nō entawēmīni bamīnīpā, angampā. ¹⁹Edæ adocanque nānō

adopoque ēñēnāmai cægai beyænque mōnō nangui ĩmō incæ edæ nē wēnæ wēnæ cæmō bagamōimpā. Adobai Adocanque nānō adopoque ēñente cægai beyænque mōnō nangui ĩmō incæ edæ Wængonguī ayongā nō cæmō bagamōimpā.

²⁰Mōnō waocabo wēnæ wēnæ cæyōmonte Wængonguī, Botō wææ änō ēñēnāmai inte cæmīnīpā, ante edonque acæmīnīmpā, ante wææ angacāimpā. Wææ angā ate edonque adinque mōnō waocabo wæætē, Nanguī ēñēnāmai inte cæte awædō, ante wæyōmonte Adocā incæ godōmenque nangui waadete pōnō cæcā æmōmpā. ²¹Īnque mōnō ēñēnāmai cægai beyæ mōnō nē wæwocamō bagamōimpā. Wæætē mōnō Awēñē Itota Codito waadete pōnō nō cæte badongā ate mōnō cōwē wæñāmai quēwēnguinque Wængonguī ayongā nō entawēmō bagamōimpā.

6

Codito nempo quēwēninque mōnō nē wīwa cædongā nempo wīi quēwēmōmpā

¹Īnque mōnō æbānō anguiī. Pancadāniya ĩmai ānewēñānīpā. Wængonguī godōmenque waadete pōnō cæcæcāimpā, ante cædinque mōnō godōmenque wēnæ wēnæ cæcāimpā, ante tedewēñānīpā. Mōnō ĩñōmō dicæ māñōmainō ante tedewēngūñēmō ĩnongā.

²Īñæmpā ædō cæte māñōmainō ante tedewēnguiī. Wēnæ wēnæ mōnō cæte quēwēmāmo pædæ godōmo æninque Codito teēmē mongæninque wæñongante mōnō tōmengā tōnō godongāmæ wænte bai ĩnōmo inte ædō cæte godōmenque wēnæ wēnæ cæte quēwēnguiī. ³Mōnō Itota Codito nempo quēwēngæimpā, ante æpæñē guiidinque mōnō tōmengā tōnō godongāmæ wængaimō bai batamōmpā, ante mīnitō ĩñōmō ēñēnāmai ĩmīnitawo.

⁴Tōmengā wænte ōñōñongante Mæmpo Wængonguī nē ñāō entawēnongā inte tæi ēmōnongā inte, Nāni ōmæmōe, angā ñāni ōmæmongacāimpā. ĩnque mōnō ĩñōmō edæ, Codito tōnō ñāni ōmæmonte bai mōnō mīimō quēwēngæimpā, ante cædinque æpæñē guiidinque tōmengā wodido godongāmæ guite bai wænte bai ōñontamōmpā.

⁵Edæ tōmengā wængā ate godongāmæ wænte bai bagaimō ĩnque mōnō tōmengā ñāni ōmæmongā ate tōmengā tōnō āawocaque bai ēwocate ñāni ōmæmonte bai quēwēmaimōmpā. ⁶Waocā nānō nē ō æñināni inte tōmengā beyænque cæte nē quēwēñāni bai mōnō adobai wēnæ wēnæ mōnō cædō beyænque wægāmōimpā. Māñōmai inte wæyōmonte mōnō Codito ĩñōmō, Aamō cæte gocæmīnīmpā, ante cædinque wēnæ wēnæ cæte mōnō wentamō

mongæñño ö ænte teemē mongængantapa. Ee mongæñngante tõmengä ingante awäa timpodāni wængä adinque baonque ante mõno wænæ wænæ cæpāmo iññomö ewente bai ba ïnninge mõno do aamö cæte bai mǎnino ante emö cæte gomompa. ⁷ Waocä æmæwo wængaingä inte edæ ædö cæte wænæ wænæ cæqinggää. Edæ tõmengä nāno wænæ wænæ cægainö ante emö cæte aamö cæte bai gogaingä ingampa.

⁸ Mõno Codito tõno äawocaque bai ewocadinque adopoque wængaimö inte mõno tõmengä tõno godongāmæ quëwengæimpa, ante wede pönemompa. ⁹ Edæ do wænte ñāni ömæmonte müingä quëwëningä inte Codito wæætē mempoga wænguingä ināmaï ingampa. Tõmengä nõwo wæwocadāmaï iñngante tõmengä ingante, Wæmāwe, ante ædö cæte anguiï. Iñæmpa, wæñāmaï incæcäimpa, ante do eññemompa. ¹⁰ Tõmengä adopoque wæninque mõno wænæ wænæ cægainö ante æmæwo wido cæcæte ante teemē mongænte wængacäimpa. Wæætē ñāni ömæmonte müingä quëwëninque tõmengä, Wængongui beyænque cæte quëwencæboimpa, ante quëwengampa. ¹¹ Minitö adobai Codito nempo quëwënomini inte wiwa mini cægainö ante æmæwo wido cæcæte ante cædinque, Itota Codito tõno adopoque wængaimö imompa, ante wæætē, Mõno Wængongui beyænque cæte quëwengæimpa, ante pönëninque quëwëedāni.

¹² Mānōmaï beyæ minitö, Baonga mõno ñomænguifño quëwëninque mõno wænæ wænæ cæinënö ante mõno eññente cædāmaï ingæimpa, ante nāmā wææ aadinque edæ wænæ wænæ mini cæinëwëno ante edæ eññenāmaï inte quëwëedāni. ¹³ Ayæ minitö, Bado, ante edæ, Botö baonca wiwa cæcæimpa, ante edæ minitö baö quiomē i incæ wænæ wænæ cæquinque ante edæ godö cædāmaï iedāni. Wæætē do wæwocagaimini inte ñāni ömæmonte müimini quëwëninque minitö wæætē Wængongui ingante nāmā godömini æncæcäimpa. Edæ, Botö baö ini edæ tõmāo Wængongui qui impa, ante pædæ godöninque müimini quëwëñominite tõmengä wæætē minitö tõno godongāmæ cædinque nõ pōni cæcæcäimpa. ¹⁴ Edæ Mõitee wodi nāno wææ angainö ante eññimini incæte wiï mǎnino beyænque quëwëminipa. Wæætē Wængongui waadete pōno cæcä beyænque quëwëmini inte minitö wænæ wænæ mini cæinëwëno ante eññente cædāmaï inte quëwencæminimipa.

Wiwa mõno cæinëwëno ante mõno eññenāmaï ingæimpa

¹⁵ Mõitee wodi nāno wææ angainö ante eññente beyænque wiï quëwëmö inte mõno Wængongui waadete pōno cæcä beyænque

quëwëmompa. Nāwangä impa. ïnninge mõno æbāno cæquif. Wadāni iññomö idiquibæ ante pönëninque, Wængongui pōno cæcä beyænque nē quëwënomö inte mõno wæætē wænæ wænæ cæcæimpa, ante tedewëñānipa. Mõno iññomö ædö cæte mǎnōmaïno ante cæquimö.

¹⁶ Wacä ingante nē cæte quëwëmini bacæte ante cædinque minitö, Bado, bitö botö awënë badinque edæ ämi eññente nē cæbo baboe, ämini ïnninge edæ mǎningä minitö iminite ö ængä ate tõmengä beyænque cæte quëwëmaiminiipa. Mǎnino ante pönëminiyaa. Ayæ adobai minitö wænæ wænæ cæinente mini wædö ante Ao ante cæmini ïnninge mini wænguinque edæ mǎnino beyænque cæte nē quëwëmini inte wæbaiminiipa. Wæætē Wængongui ingante, Bado, bitö botö Awënë inōmi inte edæ ämi eññente nē cæbo baboe, äninque minitö nõ cæte mini quëwënguinque tõmengä beyænque nē cæmini babaiminiipa. ¹⁷ Minitö doyedē mini wænæ wænæ cæinëwënonque ante cædinque minitö awënë beyænque cæte nē quëwëmini bai ingaminimipa. Nõwo guiquënë Wængongui nõ nāno äno ante odömömöni eññëninque minitö ïnonque ante edæ nē eññente cæmini baminitapa. Mānōmaï baminiipa, ante adinque botö Wængongui ingante waa ate pönëninque apænebopa. ¹⁸ Ayæ wænæ wænæ mini cædö beyænque cæte nē quëwëmini inte wæyöiminite Wængongui ñimpo cæcä ate minitö abæ tawænte ee gote bai quëwëminipa. Nõwo wæætē tõmengä nāno nõ cædonque ante eññente cæmini ïnninge minitö edæ nē nõ cædongä nempo quëwëninque tõmengä beyænque cæte nē quëwëmini baminipa.

¹⁹ Minitö önöminique inte æiquedö ædæmö eññënguimini, ante wædinque botö, Waocä nāno cæi bai impa, ante tædedinque odömömo aedāni. Wëenëñedē wænæ wænæ cædinque godömenque quingamē bai quëwencæte ante minitö, Bado, ante quiomē incæ mini baonga wiwa cæquinque pædæ godö cæminitapa. Mānōmaï beyænque eññenāmaï mini cæinëwëno ante eññente cædinque edæ minitö mǎnionque ante nē cæte quëwëmini ingaminimipa. Nõwo guiquënë tæiyæ waëmö mini ewocate quëwënguinque ante minitö baö ini edæ, Wængongui qui impa, ante tõmāo pædæ godöedāni. Ayæ mini nõ cæquinque ante edæ tõmengä beyænque nē cæmini inte quëwëedāni. ²⁰ Wëenëñedē iññomö minitö wænæ wænæ mini cæinënö beyænque cæte nē quëwëmini bai inte wægaminimipa. Māniñedē minitö nē nõ cædongä nempo quëwëñāmaï ingaimini inte tõmengä nāno angainö ante edæ eññenāmaï ingaminimipa. ²¹ Māniñedē quingamē bai mini cægainö

ante pōnente wædinque mīnitō ñōwo iñōmō guingo imonte bamīnīpa. Edæ mānīnō mīni wīwa cægainō beyæ ante dicæ watapæ tote bamīniyaa. Iñæmpa edæ mīni wænguinque mānōmaī cægamīnīmpa.

²² Ñōwo guiquēnē, Wēnæ wēnæ mīni cæinēwēnō ante idæwaa ēñencæmīnīmpa, ante cædinque Wængonguī gā pe æmpote ængā ate mīnitō abæ tawænte bai Wængonguī nempo wæætē ee pongamīnīmpa. Iñinque nē gā pe æmpocā nempo quēwēninque mīnitō tōmengā ingante cæte nē quēwēmīni inte mīni cōwē wænāmaī quēwēnguinque tæiyæ wæmō ēwocamīni bamīnīpa. ²³ Mōnō waocabo mōnō wēnæ wēnæ cædō beyæ ante paga cæte bai cædinque Wængonguī mōnō imonte pōnō pangā wænguēnēmō imōmpa. Wæætē, Wantæpiyæ quēwēncæmīnīmpa, ante adocā incæ mōnō Awēnē Itota Codito tōnō godongāmæ cædinque mōnō imonte ōnonque pōnō ængā beyæcæte mōnō cōwē wænāmaī quēwēmōmpa.

7

Ēñente cæquēnēmō inte ñā cæyænte bai ingamōīmpa

¹ Iñānāni ēñēedāni. Mōitee wodi nānō wææ ante yewæmongainō ante do adīmīni imīni incæte mīnitō iīmaī ante ēñēmīniyaa. Edæ, Ēñente cæedāni, ante tōmengā mīlnāni quēwēnāni que inānite wææ ante yewæmongacāīmpa. Iñinque waocā do wæningā iñongante, Cæe, āñōmō tōmengā mīngā ingampa diyæ cæquingāā. Edæ dobæ wængāīmpa.

² Iīmaīnō ante pōnēedāni. Onquiyængā ingante ñānōnāni mongā ate tōmengā nānōogængā mīngā nānō quēwenganca onquiyængā iñōmō tōmengā nānōogængā ingante ēñente quēwēncæcāīmpa, ante wææ ante yewæmongatīmpa. Wæætē edæ tōmengā nānōogængā wængā ate onquiyængā owæmpoingā inte adocanque quēwēñongante mānōmaīnō ante edæ ædō cæte wææ anguī. ³ Iñinque nānōogængā ayæ mīngā quēwēñongante onquiyængā wacā ingante godō guēa mongā adinque, Bitō nānōogængā mīngā iñongante bitō wacā ingante guēa godō mōmīpa tōō, ante pīnānīpa. Incæte tōmengā nānōogængā wængā ate abæ tawænte gote bai tōmengā adocanque quēwēñongante, Wacā ingante mōnāmaī incæbiīmpa, ante ædō cæte wææ anguīnānīi. Do owæmpoingā inte wacā ingante mongā adinque tānocā quēwengampa diyæ wææ anguīnānīi. Edæ owæmpoingā inte tōmengā do mongampa.

⁴ Mānōmaī beyæ botō tōñīnāmīni, Mōnō adobaī imōmpa, ante āmo ēñēedāni.

Ñānōnāni nē mōningā iñōmō ēñente cæquēnēngā ingā bai mīnitō wēēñēñedē adobaī Mōitee wodi nānō wææ angainō ante ēñente cæquēnēmīni inte ñā cæyænte bai ingamīnīmpa. Mānōmaī inte wæyōmīnite Codito iñōmō, Mīnitō botō nempo quēwēninque waincate bai cæmīni badinque Wængonguī beyænque ante ēñente cæcæmīnīmpa, ante pōnō cægacāīmpa. Tōmengā baonga ponte ēñadinque mōnō beyæ wæninque ñāni ōmæmongacāīmpa. Iñinque mōnō tōmengā tōnō adobaī wænte bai ingaimō inte mōnō wēēñēñedē mōnō ēñenguēngainō ante edæ ædō cæte wæætē ēñenguēnēmō inguīmōō. Wæætē edæ nē ñāni ōmæmongaingā nempo quēwēnōmo inte mōnō tōmengā quīmō iñōmō imōmpa.

⁵ Doyedē iñōmō mōnō nē wæwocamō iñōmō inte baonque ante pōnente mōnō quēwēñedē Mōitee wodi nānō wææ angainō ante ēñente wædinque godōmenque wīwa cæinēwente wæmō batamōmpa. Iñinque mōnō baaca incate bai cædinque mōnō wænguinque wēnæ wēnæ cætamōmpa. ⁶ Wēēñēñedē wææ ānāni ate mōnō, Ēdō cæte ēñente cæquī, ante ñā cæyænte bai wægainō inte mōnō edæ Codito tōnō adopoque wænte bai ñī cæyænte bai bagamōīmpa. Ñōwo guiquēnē adopoque wængaimō inte mōnō Mōitee wodi pedæne ante nānō wææ ante yewæmongainō ante wīi ēñente cæquēnēmō inte abæ tawænte bai gomōmpa. Wæætē edæ Wængonguī Tæiyæ Wæmō Ōñōwoca beyæ quēwēmō iñōmō inte mōnō tōmengā mīne nānō ānonque ante ēñente cæmō imōmpa.

Wēnæ wēnæ botō cædō beyæ ante wæbopa, ante

⁷ Iñinque æbānō ante anguīmoo. Mōitee wodi, Wēnæ wēnæ cæquī, ante yewæmongacāīmpa, ante botō dicæ antawogaa. Ēdō cæte edæ mānōmaī anguī. Iñæmpa tōmengā wææ ānāmaī ingā bai botō, Quīnō wēnæ wēnæ cæte ī, ante ēñēñāmaī incædōmōīmpa. Botō edæ, Wacā quī æinente wæbo incæte botō ænāmaī inte ee abo inte waa cæbopa, ante pōnengaboīmpa. Mōitee wæætē, “Wacā quī ante æinente wædāmaī ie,” ante wææ angā beyænque botō, Ē æinente botō wædō incæ wēnæ wēnæ impa, ante tæcæ ēñentabopa. Mānīnō ante ānāmaī ingā bai botō, Wēnæ wēnæ impa, ante ēñēñāmaī incædōmōīmpa. ⁸ Iñinque nē wēnæ wēnæ cædōmo inte botō Mōitee nānō wææ angainō ante ōnōmoncaque ēñente ate botō quingāmē bai tōmancoo ante godōmenque æinente wætabopa. Edæ tōmengā wææ ānāmaī ingā bai mōnō wēnæ wēnæ cædō iñōmō edonque ināmaī inte edæ dæ ante bai incædōnīmpa.

⁹ Mōitee wodi wææ ante nānō yewæmongainō ante botō adāmaī īmoyedē botō ōnonque wædāmaī quēwengaboimpa. Wæætē, īīmaī wææ ante yewæmonte ongompa, ante adinque botō, Æ, wēnæ wēnæ cæbo īmopa, ante tæcæ ēñēninque, ¹⁰ edæ nāñe wænte bai botō, Wæwocabo īmopa, ante wætabopa. Edæ, īīmaī cædinque quēwencæminimpa, ante wææ ante nānō yewæmongainta adinque botō edæ, Botō wænguinque wīī ēñente cæbopa, ante tæcæ ēñēninque wætabopa. ¹¹ Edæ Mōitee wodi wææ ante nānō yewæmongainta do adīmo inte mānīnō ante ēñēnāmaī cædinque botō pante wænguinque wēnæ wēnæ cætabopa. Edæ, Ōnonque wēnæ wēnæ cæte tocæī, ante wapiticæ pōnente cæyōmote tōmengā nānō wææ angainō ante odōmōnāni ēñēmo beyænque botō, Æ, botō wænguinque wēnæ wēnæ cæbopa, ante wægaboimpa.

¹² Wængonguī nānō wææ angainō īñōmō tæiyæ waēmō īnepa. Ayæ Mōitee wodi adōbai māñine tæiyæ waēmō īnedō ante apænedinque, īīmaī cæedāni, ante wææ āninque, Mīni waa cæte quēwenguinque ēñente cæcæminimpa, ante nōingā pōni angacāimpa.

¹³ Īninque tōmengā, Mīni waa quēwenguinque impa, ante nānō wææ angainō incæ botō īmote ædō cæte wængonguī. Wængonguī wæætē, Quinō wēnæ wēnæ cæte ī, ante edonque acæminimpa, ante pōnō waa cædinque, Mīnitō ēñēnāmaī īmīni beyænque mīni wænguinque impa, ante wææ angacāimpa. Īninque Wængonguī nānō wææ angainō beyænque botō īñōmō, Wēnæ wēnæ cægaboimpa, ante edonque atabopa.

¹⁴ Mīnitō tæiyæ waēmō ēwocacæminimpa, ante Wængonguī mōnō ōnōwoca beyænque ante wææ angacāimpa, ante do ēñēmopa. Incæte botō wīwa cædōnō beyænque cæte nē quēwēmo inte botō edæ ōmæwocate bai inte wæbopa. ¹⁵ Edæ botō waa cæinente wædō ante cædāmaī inte botō wæætē edæ, Wīī cæinente awædō, ante botō piinte adō incæ edæ do cæte wæbopa. Īninque botō, Æbānō cæboo, ante ēñēnāmaī īmopa. ¹⁶ Wængonguī nānō wææ angainō ante ēñēnāmaī cæbo incæte botō ēñēnāmaī botō cædō ante wīī cæinēmopa. Mānōmaī botō wīī cæinēnō beyænque botō, Wængonguī waa cædinque wææ angacāimpa, ante bai cædinque tōmengā nānō wææ angainō ante edæ Ao ante bai cæbopa. ¹⁷ Incæte botō wodi wīī tōmēmo ānō ante cæbopa. Wæætē edæ botō wīwa entawēnō beyæ wīī cæinente botō wædō ante do ēñente cædinque wæbopa. ¹⁸ Edæ anca waa cæinente wæbo incæte botō dicæ waa cæbogaa. Mānōmaī beyæ botō, Botō baonga quēwēninque botō waa cæquīnō īñōmō edæ dæ ampa, ante do

ēñēmopa. ¹⁹ Waa pōni botō cæinēnō incæ cædāmaī inte wæbopa. Wæætē edæ wēnæ wēnæ cæte botō wīī cæinente wædō ante anca cæte wæbopa. ²⁰ Īninque botō wīī cæinēmo inte do cæbo īninque wīī tōmēmo cæbopa. Wæætē wīwa cæquīnque botō entawēnō beyænque edæ wēnæ wēnæ cæte wæbopa.

²¹ Waa cæinente wæbo incæte botō wēnæ wēnæ cæquīnō edæ do entawente wæbopa. Īninque botō nā cæyænte bai īmopa, ante do abopa. ²² Edæ botō Wængonguī nānō wææ angainō ante mīmōnē pōnēninque watapæ tobopa. ²³ Incæte, Wængonguī nānō wææ angainō ante botō pōnēnō incæ ēñēnāmaī ingæimpa, ante botō edæ wade wææ ante entawente bai inte wæbopa. Īninque nāmā wææ ante bai mīmōnē botō pōnēnō tōnō wade, Ēñēnāmaī ingæimpa, ante wææ ante botō entawēnō tōnō nāēmæ guēadō guēa cæ bai inte wæbopa. Edæ māñine beyæ wīwa botō cæquīnō entawēninque botō yæguincamenca nā cæyænte bai inte wæwēmopa.

²⁴ Edæ cætawente wængui wæ. Botō wīwa cæquīnō entawente beyæ botō wænguiñō ēñate wæyōmote æcānō edæ æna beyænque quēwēmaīmoo, ante wæbopa. ²⁵ Edæ, Itota Codito beyænque quēwēngūmo īmopa, ante botō Wængonguī ingante waa ate pōnente apænebopa. Īninque Wængonguī nānō wææ angainō ante ēñēninque botō tōmēmo mīmōnō tōmengā beyænque cæte nē quēwēmo īnōmo īmopa. Incæte botō ēñayō beyæ botō wīwa cæinēnō beyænque cæte nē quēwēmo inte wæbopa.

8

Wængonguī Ōnōwoca ingante ēwocate quēwēngæimpa

¹ Īninque mōnō Itota Codito nempo quēwēninque mōnō wīwa cæinente wæwēnō ante cædāmaī īnōmō inte wæætē tōmengā Ōnōwoca pōnō angā ēñēninque cæte quēwēmo adinque Wængonguī īñōmō, Mīni wænguinque, ante apænte ānāmaī ingampa. ² Edæ wīwa cæinente mōnō wæwēnō ante mōnō wænguinque ēñente cæyōmonte Itota Codito īñōmō pōnō gā peyæmpote bai ō ængā beyænque mōnō abæ tawænte ee gote bai quēwēmopa. Ayæ tōmengā Ōnōwoca nē quēwēnongā nānō wææ ānō ante wæætē mōnō ēñente cæinente quēwēmopa.

³ Edæ Mōitee wodi, īīmaī cæedāni, ante wææ āñongā mōnō īñōmō wīwa cæinente mōnō wæwēnō beyænque aquī piñænāmaī ēñadōmō inte, Mōnō ædō cæte ēñente cæquī, ante wægāmōimpa. Mōnō waocabo mānōmaī wēnæ wēnæ cædōmō inte wæyōmō Wængonguī wæætē, Waocā

bacæcäimpa, ante tömengä Wengä ingante da pönongä pöninque mönö wīwa cæinentai bai adotai bai ēñate pægacäimpa. Eñate pædinque tömengä nämä baö nänö ēñayö ante edæ, Wængongui qui impa, ante pædæ godonte bai cædinque wænæ wænæ mönö cædö beyænque ante wægacäimpa. Mänömai cædinque Wængongui mönitö imönite apænedinque, Mini wænguinque minitö baonga eñadinque wænæ wænæ cæmini awædö, ante apænte angacäimpa. ⁴ Mänömai pönö cædinque tömengä, Wīwa cæinente mini wæwënö ante ēñente cædämai inte minitö ñowo wæætê botö Önowoca ingante ewocadinque tömengä beyænque quëwëminipa. Ininque nö pönī botö wææ angainö ante tömänö ante ēñëninque nö cæte quëwëncæminipa, ante cægacäimpa.

⁵ Adopoque eñadinque baonque në eñadäni guiquënë wīwa cæinente nāni wæwënö ante pönente cædänipa. Mempoga eñadinque Wængongui Önowoca ingante në ewocadäni guiquënë tömengä nänö änonque ante pönente cædänipa. ⁶ Wīwa cæinente nāni wæwënö ante cæcæte ante në pönëwënäni guiquënë tömënäni nāni wænguinque mäninö ante pönëwënänipa. Wæætê Wængongui Önowoca angä ēñente në pönënäni guiquënë tömënäni nāni gänë entawente quëwënguinque edæ mänömai pönënanipa. ⁷ Waodäni wīwa nāni cæinente wæwënö ante cæcæte ante në pönëwënäni iñömö edæ Wængongui ingante piinte cædänipa. Wængongui nänö wææ äno ante tömënäni önömoncaque eñënäni inte edæ wī eñente cædänipa. Iñæmpa tömengä Önowoca ingante ewocadänipa diyæ ēñente cæquīnäni. ⁸ Wīwa cæinente nāni wæwënö ante cæcæte ante në cædäni iñömö, Wængongui waa acæcäimpa, ante ancaa cædäni incæte Wængongui wæætê edæ waa todämai incæcäimpa.

⁹ Minitö guiquënë Wængongui Önowoca ingante ewocamini ininque edæ wīwa cæinente mini wæwëninö ante cædämai inte quëwëmini imaiminipa. Wæætê edæ tömengä Önowoca angä ēñente cæte quëwëmalminipa. Incæte waocä æcämenque incæ Codito Önowoca ingante ewocadämai ingä ininque tömengä wæætê Codito nempo quëwënämai imaingampa. ¹⁰ Minitö guiquënë Codito ingante entawëmini ininque wænæ wænæ mini cægäinö beyænque minitö baö incæ tömengä tönö adopoque wæente bai eñämīnipa. Incæte Codito nänö nö cædönö entawëmini inte minitö önöwoca mempoga eñate bai mīwoca ewocaminipa. ¹¹ Itota ingante Wæmpocä, Nāni ömæmoe, angä eñëninque ñāni ömæmongacäimpa. Ayæ mini baö ñömæintai eñayöminite tömengä Önowoca

pö guidinque quëwengä ininque Wæmpocä wæætê minitö iminite, Nāni ömæmoe, ante adobai angä ñāni ömæmoncæmininipa. Edæ tömengä Önowoca mini në ewocadongä tönö tömengä pönö cæcä ate minitö baö incæ ñömænämai intai bacæimpa.

¹² Ininque botö tonīñāmini eñëedäni. Wængongui Önowoca angä ate mönö ēñente cæquëñemö imompa. Wæætê wīwa cæinente mönö wæwënö ante wī eñente cæte quëwëngüëñemö inömö imompa. ¹³ Iñæmpa wīwa cæinente mini wæwënö ante ēñente cæmini ininque mini æmæwo wænguinque cæbaiminipa. Wæætê Wængongui Önowoca ingante ewocadinque minitö wīwa mini cædinö ante wido cæmini ininque mini quëwënguinque imaimpa.

¹⁴ Ädänidö inänite Wængongui Önowoca töö æmænte angä ate ēñente goda iñömö tömënäni iñömö edæ Wængongui wënäni inänipa. ¹⁵ Minitö guñente mini wægäinö beyænque ñā cæyænte bai në quëwëngaimini inte ñowo wæætê Wængongui Önowoca ingante æninque wī adobai guñente wæmini iminipa. Wæætê Wængongui Önowoca pönö cæcä beyænque minitö näwä wëmini bamīnipa. Ayæ tömengä Önowoca pönö cæcä ænte ewocadinque mönö guñënedämai inte edæ, Mæmpo, botö Wæmpo, ante apænemompa. ¹⁶ Edæ mönö mimönë ponte apænedinque Wængongui Önowoca incæ, Bitö Wængongui näwä wëmi inömi imipa, ante apænecampa. ¹⁷ Ininque mönö Wængongui wëmö inömö inte tömengä nänö pönonguincoo në ængüimö imompa. Edæ Codito tönö äanque bai caate wæmö ininque mönö tömengä ñäö bai nänö emö bai ñäö adobai emöninque tömengä tönö edæ godongämæ ængüimö imaimompa.

Ñäö bai mönö entawëngüimämo

¹⁸ Botö iūmai ante pönëmopa. Ñowo caate mönö wæpämö iñömö pönömenque iñonte iincayæ ate ñäö bai mönö emongüimämo guiquënë wī adobai wædænque inte godömenque nangui pönī ingæimpa. ¹⁹ Äyedönö Wængongui wënäni tæi emonte badinque edonque a ongonguinäni, ante acæte ante edæ Wængongui nänö badongaincoo incæ nangui äinente wædinque wänö conte bai ongoncoopa. ²⁰ Edæ wænæ wænæ cædämai incoo iñonte mönö waocabo mönö eñënämai cægäinö beyæ Wængongui nänö badongaincoo önoncooque bai bagatimpa. Wī nämä äno beyæ mänömai bagatimpa. Wæætê Wængongui në, Iincayæ ate watapæ bacæimpa, ante angaingä inte adocä angä beyænque önoncooque bai bagatimpa. ²¹ Edæ Wængongui nänö badongaincoo ñömængüincooque inte

yæguincamenca nã cæyænte bai wæyoncoote Wængongui gã pe æmpote bai godõ cæcã beyænque nômæxnãmai inguincooque bacæcoimpa. Mõnõ Wængongui wêñæmõ iñõmonte tõmengã põnõ nimpõ cæcã ate mõnõ abæ tawænte bai tæi emonte bamõ bai tõmengã nãnõ badongaincoo adobai abæ tawænte bai müncooque bacæcoimpa. ²² Wêñæ nantate, Æiquedõ êñaqingää, ante nãni wæ bai Wængongui nãnõ badongaincoo incæ nõwo ganca godongãmæ nantate bai, Æiquedõ waa baquii, ante õ õ wæconcoopa.

²³ Ayæ Wængongui mõnõ imonte mã põnõninque tõmengã Önõwoca ingante põnongã ante do êwocamõ iñõmõ inte mõnõ adobai, Mõnõ baõ müñõ êñaquinque æiquedõ Wængongui wêñæmõ ædæmõ baquii, ante nangui æinente wãnõ conte õ õ wæmompã. ²⁴ Edæ Codito, Botõ iincayæ ate badõmo ate watapæ bacæimpa, ante põnëedãni, åninque mõnõ imonte edæ ængã beyænque quëwëmompã. Æinque mãninõ edæ, Watapæ bacæimpa, ante nãnõ angainõ iñõmõ iñque ba acæte ante mõnõ ayæ wãnõ cõmompã. Mãninõ watapæ do ba amõ bai mõnõ, Ayæ ate watapæ ba acæimpa, ante ånãmai incædõmõimpa. Waocã do æningã inte, Æinente wæbopa, ante quĩnante anguingää. Æñæmpã edæ dobæ ængantapa. ²⁵ Æinque mõnõ æinente wædõ ante mõnõ cõwë ængæimpa, ante wede põnëmõ Æinque mõnõ wæntædãmai inte ee wãnõ cõmompã.

²⁶ Ayæ adobai mõnõ aquimõ põni iñõmonte Wængongui Önõwoca mõnõ beyæ cæcampa. Æbãnõ cæte Wængongui ingante apænequii, ante êñênãmai inte wæyõmonte tõmengã wii waomõ tededõ ante apænedinque tõmengã õnõwënenque mõnõ beyæ apænecampa. Mãninõ tõmengã nãnõ tededõnõ ante mõnõ quiquëñõnõ inte õnõneca ædõ cæte tedequii. ²⁷ Mõnõ Wængongui quimõ tæiyæ wæmõ êwocamõ iñõmonte Wængongui Önõwoca iñõmõ mõnõ beyæ apænedinque, Mæmpo Wængongui nãnõ angainõ bai bacæimpa, ante põnëninque apænecampa. Æinque mõnõ mímõno do adongã inte Mæmpo Wængongui iñõmõ edæ, Botõ Önõwoca æbãnõ põnëninque apænecää, ante do êñengampa.

Në tæi emõninque mõnõ gãnã cæmõ imompã, ante

²⁸ Wængongui, Botõ ånõ bai iñque bacæimpa ante cæcæminimpã, ante mõnõ imonte aa pegacäimpã. Æinque tõmengã nãnõ ånõ bai nê cæmõ inte mõnõ tõmengã ingante waadete põnëmõ iñõmonte Wængongui wæætë mõnõ beyænque cõwë waa põnõ cæcã ate mõnõ edæ, Inguipoga æbãmë ba incæte mõnõ waa põni quëwënguinque impã, ante edæ do êñëmompã. ²⁹ Doyedë

badõninque Wængongui iñõmõ, Botõ Wengã Bamoncädengã iñongante iñãni tõmengã biwiidi badinque nangui iñãni yebænte bacædãnimpa, angacäimpã. Æinque tõmengã mãnõmai cæcæte ante cædinque, Do botõ nê againãni iñõmõ tõmënninque botõ Wengã nãnõ entawëñõ bai adobai entawencædãnimpa, ante badongacäimpã. ³⁰ Ayæ, Botõ Wengã nãnõ entawëñõ bai entawencæminimpã, ante nãnõ nê againãni iñõnãnite do aa pegacäimpã. Ayæ tõmengã nãnõ aa pegainãni adodãni inãnite, Botõ ayõmo munitõ nõ cæminõ bacæminimpã, ante badongacäimpã. Tõmengã ayongã nõ cædãni nê bagainãni inãnite tõmengã, Minitõ tæi emonte badinque nãõ bai emonte bacæminimpã, ante do badongacäimpã.

³¹ Æinque æbãnõ ante anguimoo. Edæ Wængongui mõnõ tõnõ godongãmæ cæcã iñongante æcãnõ mõnõ imonte bæ taquingää. Edæ dæ angampa. ³² Tõmengã Wengã adocanque iñongante Wængongui pæ gompodãmai inte da põnongã põninque tõmengã wæætë mõnõ tõmãmõ beyæ teëmente wæætë wængacäimpã. Mãningã ingante da põnõninque Wængongui tõmengã nãnõ êagaincoo ante ædõ cæte põnõnãmai inguingää. Edæ, Botõ Wengã tõnõ godongãmæ entawencæminimpã, ante Wængongui tõmancoo do põnongã æmompã. ³³ Wængongui mõnõ imonte apænte ængã ongõñõmonte æcãnõ, Wiwa cæbipa tõõ, ante apænte anguingää. Æñæmpã Wængongui incæ, Botõ ayõmo munitõ edæ nõ cæminõ iminipã, ante badongã bamõimpa. ³⁴ Itota Codito nê wængaingã inte godõmenque nãni õmæmongaingã inte Wængongui tõmëmæ inõ do tæi contate a ongongampa. Ayæ mõnõ beyæ Wængongui ingante cõwë apænecampa. Tõmengã mãnõmai cæcã adinque mõnõ imonte æcãnõ, Bitõ wænguinque, ante apænte anguingää. Æñæmpã wii eyepæ inãnipã.

³⁵ Codito mõnõ imonte waadete põnente aayongã æcãnõ gã pe æmpote õ ænguingää. Edæ, Ædõ cæte cæquimõõ, ante wæmõ incæ caate wæwëmõ incæ mõnõ imonte togænte pãnãni wæmõ incæ mãnõmai wæyõmonte mõnõ Codito dicæ mãniñedë edæ waad-edãmai inguingää. Mõnõ wænguinque gue ænente wæmõ incæ weocoo õmaamõ inte wæmõ incæ tõmengã mõnõ imonte dicæ waadedãmai inguingää. Quiëmë beyæ, Mini wænguinque, ante wææ ånãni wæyõmonte yaëmenca tacadãni wæyõmonte Codito mãniñedë dicæ waadedãmai inguingää. ³⁶ Edæ Wængongui ingante åmotamini ante bai yewæmongatimpã.

“Bitõ beyænque wæñõnãni wængui wæ, ante mõnitõ tõmää itædë wæmõnipã.

Obegaidi inånite, Wænongæimpa, ante ånåni bai,

mõnitõ imõnite adobai, Wænongæimpa, ante piinåni wæmõnipa,”

ante yewæmonte ongõ aedåni.

³⁷ Edæ månimåmo mõnõ wæpåmo tõmåmåmo põ ate wædõmõ incæte mõnõ imonte nê waadete põnengå nempo ongõninque mõnõ tæi emonte godõmenque gånå cæte ongõmõmpa. ³⁸ Botõ do eñente põnemõpa. Mõnõ nê waadete põnengå nempo ongõñõmonte mõnõ wænguimåmo incæ mõnõ quëwenguimåmo incæ anquedoidi incæ wënæidi incæ ñõwopåmo incæ iincayæ ponguimåmo incæ tæi nåni piinæmåmo incæ månimåmo tõmåmåmo ædõ cæte mõnõ imonte gå pe æmpote õ ænguui. ³⁹ Ayæ edæ æibæ mõnõ æite wæquimåmo incæ guibæ mõnõ wæænte wæquimåmo incæ quiemê Wængongui nånõ badongaimåmo incæ månimåmo tõmåmåmo iñõmõ mõnõ Codito nempo ongõñõmonte ædõ cæte gå pe æmpote õ ænguui. Edæ Wængongui nånõ waadete põnõnõ entawëninque mõnõ Awënê Itota Codito iñõmõ mõnõ imonte waadete põnëninque pæ gompoyongante månimåmo tõmåmåmo incæ gå pe æmpote õ ænåmål ingæimpa. Åmo eñemåimnipa.

9

Idægoidi inånite Wængongui apænte angacåimpa, ante

¹ Botõ iñõmõ edæ mimmõ entawëmo inte nånå apænte põnëñõmote Wængongui Tæiyæ Wæmõ Onõwoca adoyõmõ ante apænecå iinque botõ ædõ cæte babæ wapiticæ anguimoo. Edæ Codito nempo quëwënõmo inte botõ nõ põni apænedinque iimål åmõpa. ² Mimõnõ cõwê cæwënente wæwëmo inte botõ iimål ante põnëninque nanguui wæbõpa. ³ Botõ guidënanåni botõ tõnõ adodånå inõnanåni iñõnanåte Wængongui ængå beyænque quëwencædånimpa, ante botõ nanguui åninque wæbõpa. Iinque Wængongui tõmënanåni inånite, Quëwencæmånimpa, ante æninque wæætê botõ Codito nempo quëwëñõmote botõ imote piininque tatodonte wido cæcå bai botõ Ao ante piyænê cæcædõmoimpa.

⁴ Tõmënanåni iñõmõ idægoidi inånipa. Wængongui pæpogacå pædånå iinque tõmënanåte tõmengå wënånå ingadånimpa. Tõmënanåni inånite Wængongui ñåõ entawente nånõ tæi emõnõ ante odõmongå adinque tõmënanåte nê agånånåni inånipa. Tõmënanåni inånite apænedinque Wængongui, Botõ põnõ cæbo ate minitõ Ao åmånå iinque mõnõ godongåmæ wåa cæcæimpa, ante cægacåimpa. Iimål cæedånå, ante tõmengå tõmënanåni inånite tånõ wææ angå eñente måninõ nånõ wææ angånõ

ante tõmënanåte nê mangånånåni inånipa. Wængongui oncõnê ñænæncõnê wadånå guidåmål iñõnanåte idægoidique guite tõmengå ingante wåa ate ædæ wæænte apænecånipa. Tõmënanåte inånite Wængongui, Cõwê wåa cæcæboimpa, ante må apænecåimpa. ⁵ Mõnitõ, Mæmæidi, ante mõni nê angånånåni incæ idægoidi mæmæidi adodånå inånipa. Iinque tõmënanåni Pæingå badinque mõnõ Codito inguipoga eñagacåimpa. Tõmengå iñõmõ tõmåmõ Wængongui inongå ingampa, ante adinque mõnõ tõmengå ingante apænedinque, Tõmëni toquinque põnõ wåa cæbi æmõnåpa, ante mõnõ cõwê ñimpo cædåmål apænecæimpa. Månõmål impa, ante botõ, Amëê, åmõpa.

⁶ Idægoidi quëwencædånimpa, ante nånõ angånõ bai Wængongui cædåmål ingacåimpa, ante botõ dicæ åmogaa. Wæætê edæ iimål impa. Nåwå idægoidi nånå wede põnëñõ bai pancadånåya põnënanåmål inånå iñõnanåte botõ tõmënanåni inånite, Nåwå idægoidi inånipa, ante apænecåmål imõpa. ⁷ Edæ Abadåõ wodi pæinånåni incæ pancadånåya iñõmõ, Abadåõ wodi wënånå, mõnõ ånõnanåni wui inånipa. Wæætê, “Botõ ayõmo Itæca wënånåte bitõ pæinånåni inguånånåni inånipa,” ante mæmæ Abadåõ ingante Wængongui angampa, ante yewæmongatimpa. ⁸ Månõmål i iinque Abadåõ tapæicå nê eñate pædånå inånite Wængongui, Abadåõ wënånå, ante angantawogaa. Wæætê Abadåõ wodi ingante apænedinque, Bitõ wënånå bacædånimpa, ante Wængongui nånõ nê angånånåni guiquënê tõmënanåte tõmengå wënånå inånipa. ⁹ Edæ, “Iñedê impa, ante botõ ånõnedê botõ adodõ põmo ate månifedê ate edæ Tada incæ wëñængå onguinængå ingante mancæcåimpa,” åninque Wængongui, Måninõ botõ ånõ bai cõwê cæcæboimpa, angacåimpa.

¹⁰ Wui måninque impa, ante eñengæimpa. Godõmenque iimål ante mõnõ põnengæimpa. Wæmpocå adocanque tapæicå ate Adebeca wodi wëna åancadënaque eñagadåimpa. Måninå wæmpocå iñõmõ mõnõ wæmæ Itæca wodi ingacåimpa. ¹¹ Tõmënanå wëna ayæ eñadåmål iñedê ædõ cæte wënæ wënæ cæquånå, ædõ cæte wåa cæquånå. Incæte edæ Wængongui, Iingå ingante apænte æncæboimpa, ante nånõ angånõ ante cõwê bacæimpa, ante cædinque, ¹² tõmënanå ayæ cædåmål iñõnate Wængongui nê aa pedongå inte, “Bamoncadengå incæ ayæmengå ingante nê cæcå incæcåimpa,” ante Adebeca wodi ingante apænecåimpa. ¹³ Adobånõ ante Wængongui beyæ yewæmongadånimpa. “Aacobo ingante waadete põnengaboimpa. Etawoo ingante guiquënê piinte agaboimpa,” ante

yewæmongatimpa.

¹⁴ Ìninqe mõnõ æbānõ anguii. Wængongui dicæ nõ cædāmai ingantawogaa. ¹⁵ Wæætê Mõitee wodi ingante apænedinque Wængongui iimāi angacāimpa. “Waocā adocanque ingante botõ, Wii pāinewædõ, āninque tõmengā ingante do godõ ñimpo cædinque pānāmai incæboimpa. Adocanque ingante nê waadete cæinemo inte botõ tõmengā ingante do godõ waadete waa cææboimpa,” angacāimpa, ante yewæmongatimpa. ¹⁶ Ìninqe waocā nangui cæinengā incæte waocā nangui cæcā incæte Wængongui wii waocā nānõ cædõ beyænque apænte ængampa. Wæætê nāmā nānõ waadete waa cæinēnõ beyænque Wængongui waocā ingante godõ apænte ængampa. ¹⁷ Edæ awēnē Padaõnõ wodi ingante apænedinque Wængongui, “Botõ iimāi ante cæcæte ante bitõ imite ængõ cætabopa. Edæ bitõ imite ængõ cædinque tæi piñænte pōnõ cæbo adinque waodāni, Wængongui tæi piñængā inte māmõmai cæcampa, ante botõ emõwo ante inguipoga tõmāo apænedāni do æñcædānimpa, ante cætabopa.” Wængongui māmõmainõ ante Padaõnõ ingante apænecantapa, ante yewæmongatimpa. ¹⁸ Ìninqe Wængongui, Adocanque ingante godõ waadete ñimpo cææboimpa, āninque tõmengā ingante do godõ waadete ñimpo cæcampa. Wæætê wacā ingante guiquēnē, Godõ cæbo ate mimõ omædengā bacæcāimpa, āninque Wængongui tõmengā ingante do cæcā ate edæ mimõ omædengā bate wæcampa.

¹⁹ Māmõmainõ ante yewæmõmo adinque bitõ wabānõ iimāi anguimi, ante awædõ. “Ìñæmpa mõnitõ Wængongui nānõ ānõ ante Baa ānāmā iñõmõnite tõmengā, Minitõ beyænque impa, ante quĩnante piĩnte angāā.” Māmõmainõ ante amitawoo. ²⁰ Bitõ iñæmpa õnõmique inõmi inte Wængongui ingante wæætēdõ wæætē āmii. Nē badongā ingante tõmengā nānõ nē badõninca incæ dicæ, “Botõ imote quĩnante māmõmai badõwēmii,” ante dicæ anguii. ²¹ Nē bædongā iñõmõ daibo pancaiya æninque waa pōni wamõncade bædinque ado daibo pancaiya æninque õnonque ewenguincade bæyongante cæcānõ nē bædingā ingante Baa anguingāā. Nē bædongā iñõmõ nē ānongā inte bæcampa. Edæ Baa anguiimii.

²² Wængongui nānõ nē piĩnāni iñõmõ tõmēnāni nāni omæxe ewente wæquinque wiwa cæyõnānite tõmengā piyænē cædinque wantæpiyæ pānāmai inte ee ongongantawo. Ìñæmpa tõmengā nānõ piĩmāmo ante adinque do wæcædānimpa, ante cædinque ayæ tõmengā nānõ tæi piĩñæmāmo ante edonque acædānimpa, ante cædinque Wængongui māmõmai ee ongongā apa ānewē. ²³ Ayæ

wæætē, Botõ waadete godõ waa cæbo ænāni inte edæ tõmēnāni iñõmõ botõ ñāo bai botõ emõnõ ante acædānimpa, ante cædinque Wængongui māmõmai pānāmai inte edæ ee cæcampa. Wæætē, Tõmēnāni ñāo iñõmõ quēwengædānimpa, ante tõmengā godõ badongā ate tõmēnāni ñāo bai emõnānipa. ²⁴ Edæ mõni oodeocabo iñõmõnite munitõ oodeomini ināmāi iñõmõnite Wængongui mõnõ tõmāmõ imonte māmõmai cæcæte ante aa pegacāimpa. ²⁵ Wængongui iimāi angampa, ante Ootea wodi yewæmongacāimpa. “Botõ guidēnāni ināmāi iñõnānite botõ wæætē,

Botõ guidēmīni, ante apænecæboimpa.

Onquiyaengā botõ nē waadedāmai ingaingā iñongante botõ wæætē,

Botõ nē waadebi iimpa, ancæboimpa.

²⁶ Ayæ, ‘Botõ guidēmīni ināmāi imīnipa,’ ante botõ ongonte āñõmõ adoyõmõ ongõninque

botõ wæætē edæ, ‘Botõ Wængonguimo nē Quēwēmo wēmīni imīnipa,’ ancæboimpa.”

Ante adocā Wængongui nānõ ānõ ante yewæmongacāimpa. ²⁷ Idægoidi inānitēdõ ante yedæ āninque Itaiya wodi iimāi apænegacāimpa. “Gāwapæ wedeca emõnaicoo nangui pōni õñõ bai idægoidi adopodāni nangui pōni ināni incæte pancadāniya guiyā wææntodõni bai māmimpodānique quēwengædānimpa. ²⁸ Edæ Wængongui, Inguipoga quēwēnāni inānite apænte āninque botõ angainõ bai do edæ cæcæboimpa, ante nē apænegaingā inte tõmengā adocā, Idæwaa, ante quingæ pōni edæ iinque cæcæcāimpa,” ante Itaiya wodi yewæmongacāimpa. ²⁹ Adocā Itaiya wēnē iimāinõ ante nānõ apænegainõ bai impa.

“Mõnõ Awēnē nē Tæiyæ Awēnē tæi piĩñængā inte dodāni inānite, Minitõ pæināni yebænte nangui ināni bacædānimpa, ante cædinque pancadāniya inānite ata cæpocā quēwengadānimpa. Māmõmai ante cædāmai ingā bai,

mõnõ wæætē Todõmā quēwengaināni bai dæ badinque Gõmoda nāni quēwēñõmõ dæ ba bai mõnõ adobai edæ dæ bacædõmõimpa,” ante nānõ angainõ bai impa.

Idægoidi adobai pōnēninque quēwenguēnēnāni inānipa

³⁰ Ìninqe æbānõ ante anguii. Oodeo ināmāi ināni guiquēnē, Nõ entawēmõni bacæmõnimpa, ante ānāmāi ingadānimpa. Incæte Wængongui godõ cæcā beyænque tõmēnāni wede pōnēninque wede nāni pōnēnõ beyænque Wængongui ayongā nõ entawēnāni do badānipa. ³¹ Idægoidi

guiquënë, Nō cædāni, ante mōni wææ angainō beyænque nō entawēmōni bacæminimpa, ante nē angaināni inte eyepæ cædāmaī inānīpa. ³² Quinante eyepæ cædāmaī inānīi. Tōmēnāni wede pōnēnāmaī ināni inte wæætē edæ, Mōnō nanguī cædinque nō cæmōni bacæmōnīpa, āninque oda cæte nāni pōnēnō beyænque dicaboga tee tēwate bai cædinque eyepæ cædāmaī ingadānīpa. ³³ Edæ do Wængonguī beyæ yewæmongatīpa.

“Aquënë quēwēnānīi. Botō Codito ingante Tiōno nāni quēwēnōmō dica bai gō cæbo gongængā adīnque edæ waodāni dicaboga tee tēwate bai pōnēnāmaī ināni inte tæ go wææncædānīpa.

Tōmēngā adocā ingante nē pōnēngā guiquënë cōwē edæ guingo imōnāmaī inte quēwēncæcāīpa,” ante yewæmongatīpa.

10

¹ Botō tōniñamīni ēñēdāni. Idægoidi quēwēncædānīpa, ante botō mīmōnē nanguī aīnente wædinque Wængonguī ingante apænedīnque botō, Bitō æmi beyænque quēwēncædānīpa, ante cōwē apænebopa. ² Wængonguī beyæ nō cæcæīpa, ante cæinente wædānīpa, ante nāwangā īpa. Incæte tōmēnāni, Wængonguī beyæ nō cæcæte ante æbānō cæquīi, ante ēñēnāmaī ināni inte ōnonque cæte wædānīpa. Botō, Mānōmaī īpa, ante nē apænebo inōmo īmopa. ³ Edæ Wængonguī pōnō badongā ate mōnō tōmēngā ayongā nō entawēmō bamōpa, ante ēñēnāmaī ināni inte idægoidi īñōmō, Nāmā mōnō cædō beyænque nō cæmō bacæīpa, ante cædinque edæ oda cægadānīpa. Mānōmaī cædinque tōmēnāni Wængonguī nānō nō cægāinō ante edæ Baa angadānīpa. ⁴ Nō cæmō bacæte ante Wængonguī nānō wææ angainō ante ēñente cæquēnēmō inte mōnō tōmāmō wīi eyepæ inte wægāmōīpa. Mānōmaī inte wæyōmonte Codito īñōmō, Mīni pōnencabo Wængonguī ayongā nō entawēmīni bacæminīpa, ante cædinque mānīnō Wængonguī nānō wææ angainō ante tōmānō ante īnque cægacāīpa. Īnīnque tōmēngā mānōmaī īnque cæcā adīnque Wængonguī mōnō īmonte wæætē wææ ānāmaī ingāmpa.

⁵ Īmaī cædāni, ante botō wææ angainō ēñente cædinque nō cædāni badānīpa, ante Mōitee wodi īmaī ante yewæmongacāīpa. “Nē ēñente cæcā īñōmō tōmēngā nānō ēñente cædō beyænque quēwēncæcāīpa,” ante yewæmongacāīpa. ⁶ Wæætē, Mōnō wede pōnencabo æbānō cæte Wængonguī ayongā nō entawēmō imōō, ante īmaī ante adocā yewæmongacāīpa. “Bitō, Æcānō ōñædē

æi āñete wæænguingāā,’ ante nāmāneque ānāmaī ie.” Mānōmaī ante tōmēngā, Codito ingante æi āñete wææncæte ante mōnō pōnēnāmaī ingæīpa, ante ancæte ante yewæmongacāīpa. Īñæmpa Codito pōnāmaī ingāmpa diyæ æite māwæmi wæænguingāā. Dobæ edæ inguīpoga pongacāīpa. ⁷ “Ayæ, Æcānō tadōmēgadæ wæi āñete ænguingāā,’ ante ānāmaī ie.” Īñæmpa Codito ayæ ōñongāmpa diyæ wæite māmi æænguingāā. Edæ Codito dobæ ñāni ōmæmonte quēwēngāmpa.

⁸ Īnīnque, Mōnō wede pōnencabo æbānō nō cæmō bamōō, ante æbānō ante yewæmongacāī. Edæ, Wede pōnēngæīpa, ante mōnītō apænemōni mīni ēñēnīne ante adode ante īmaī ante yewæmongacāīpa. “Wængonguī nānō nō ānōne īñōmō edæ bitō weca eyequēi pōni ēnepa. Edæ bitō ōnōne tedeyōmi bitō mīmōno pōnēñōmi tōmēngā nānō nō ānōne edæ adoyōmō pōni ēnepa.” ⁹ Æbānō cæte quēwēngūi, ante īmaī ante ēnepa. Itota Codito Tæiyæ Awēnē īnongā ingāmpa, ante bitō ōnōneca apænedīnque, Itota Codito wæente ōñōñongante Wængonguī angā ñāni ōmæmongacāīpa, ante bitō mīmōno pōnēmi adīnque tōmēngā ængā beyænque quēwēncæcāīpa, ante adode incæ ēnepa. ¹⁰ Mīmōno edæ wede pōnēnīnque mōnō Wængonguī ayongā nō entawēmō bamōpa. Mānōmaīnō ante wede pōnēmopa, ante ōnōneca apæneyōmonte tōmēngā ængā beyænque mōnō quēwēmōpa.

¹¹ Codito ingantedō ante apænedīnque, “Tōmēngā ingante nē wede pōnēngā īñōmō tōmēngā edæ guingo imōnāmaī incæcāīpa,” ante Wængonguī angā ēñente yewæmongadānīpa. ¹² Edæ mōnītō oodeomōni īñōmōnīte mīnītō wæætē oodeomīni ināmaī īñōmīnīte mōnō tōmāmō īmonte adīnque mōnō Awēnē īñōmō edæ, Adoyōmō pōni īmīnīpa, ante acāmpa. Īnīnque tōmēngā adocā tōmāmō Awēnē īnongā ingāmpa. Ayæ tōmēngā ingante aa pemō ēñēnīnque tōmēngā īñōmō edæ tōmāmō īmonte nanguī pōni pōnō cæcā æmōpa.

¹³ Īmaī ante Wængonguī beyæ ante yewæmongatīpa. “Mōnō Awēnē ēmōwo ante apænedīnque aa pedāni ēñēnīnque mōnō Awēnē īñōmō edæ tōmēnāni tōmānāni inānīte ængā beyænque quēwēncædānīpa.”

¹⁴ Īnīnque tōmēngā ingante nē pōnēnāmaī ināni īñōmō ædō cæte tōmēngā ingante aa pequīnānīi. Ayæ tōmēngā ēmōwo ante ēñēnāmaī ināni īñōmō tōmēngā ingante ædō cæte pōnēngūinānīi. Ayæ tōmēngā ēmōwo ante wadāni gote apænedāmaī īñōnāni tōmēnāni ædō cæte ēñēngūinānīi. ¹⁵ Ayæ edæ wadāni da godōnāmaī īñōnāni nē apænequēñēnāni wæætē ædō cæte

gote apænequinānii. Iimainō ante edæ Wængongui beyæ ante yewæmongatimpa. “Tömengä waa pōni nānō cægāinō ante nē watapæ apænedāni iñōmō tömēnāni nāni apænecæ gote cægōniwa iñōmō edæ waa pōni ēwadānīpa,” ante nāni yewæmonte angāinō bai impa. Edæ nē apænecæ godāni inānite Wængongui waa acampa.

¹⁶ Mōnō Awēnē ingantedō ante watapæ apænedāni ēñēninque idægoidi pancadāniya Ao angadānīpa. Pancadāniya guiquēnē Baa angadānīpa. Tömēnāni mānōmainō nāni cædinō ante Itaiya wodi iimāi ante yewæmongacāimpa. “Awēnē Wængongui ēñēmi. Mōnitō apænemōni tömēnāni nāni ēñēnō ante edæ acānō ēñente pōnengāā. Iñæmpa nē pōnengā iñōmō edæ dæ angā awædō,” ante yewæmongacāimpa.

¹⁷ Iñinque gode ānāni ate nē ēñēnānique wede pōnēnāni badānīpa. Ayæ Codito nānō ānōnō ante gode ante apænedāni beyænque nē ēñēnāni badānīpa. ¹⁸ Iñinque botō, Māninō ante idægoidi gobæ ongōnānīpa diyæ ēñēnāmai inguinānii, āmopa. Do ēñēnānitapa, ante edæ iimāi ante Wængongui beyæ yewæmongatimpa.

“Nē apænedāni inguipoga tōmāo gote tededāni ēñēnānīpa.

Waadāni inguipoga nāni quēwenganca quēwēñōnānite māninō tömēnāni nāni apænedō ante do ēñēnānīpa,” ante yewæmongatimpa.

¹⁹ Ayæ wæætē, Idægoidi ōnōmonca ēñēninque ōmæcadāni inānīpa diyæ ēñēnāmai inguinānii. Do ēñēnānitapa. Edæ Mōite wodi incæ iimāi ante yewæmongacāimpa.

“Wadāni ōnōnānique iñōnānite botō godō waa cæbo adinque

mīni idægocabo wæætē, Mōnitō Imōnite wīi pōnō cæbii, ante piinte wæcæminīpa.

Ayæ wadāni ocai ōmæcadāni iñōnānite botō godō waa cæbo adinque mīnitō wæætē nē piinte amīni bacæminīpa,”

Ante cæcæte ante Wængongui pōnō cægacāimpa. ²⁰ Itaiya wodi guiquēnē Wængongui beyæ ante guīñēnāmai inte apænecacāimpa.

“Wadāni iñōmō botō imote ante diqui diqui mīnāmai ināni incæte do adānitapa.

Ayæ, Wængongui ingante aīnēmōnīpa, ante ānāmai iñōnānite, Botō imote aedāni, ante botō odōmōmo adānitapa.”

²¹ Āninque Itaiya wodi idægoidi inānitedō ante apænedinque, “Ēñēnāmai inte Baa ānōnāni iñōnānite botō, Pōedāni, ante tōmāā itædē ōnompō compo compo cæbo incæte pōnāmai inānitapa.”

11

Idægoidi pancadāniya inānite Wængongui apænte ængā

¹ Iñinque botō iimāi ante apænebopa. Tömengä quīnāni iñōnānite Wængongui dicæ idægoidi inānite Baa angantawogaa. Iñæmpa botō adobo nāwā idægobo imopa. Abadāo wodi pæimo inōmo inte botō edæ Beencaminō wodi pæimo inōmo inte tömengä pæināni tōnō adocabobo tömēmo inōmo imopa. ² Idægoidi botō quīnāni incædānīpa, āninque Wængongui wēēnēnedē pōni mōnitō imōnite adinque do apænte ængacāimpa. Iñinque mōnitō tömengä nānō nē agāimōni iñōmōnite tömengä cōwē Baa ānāmai ingacāimpa. Idægoidi inānite piinte āninque Ediya wodi Wængongui ingante apænecacāimpa, ante æbānō yewæmonte ongompa, ante mīnitō adāmai imīnitawo.

³ “Awēnē ēñēmi. Bitō beyæ nē apænedāni inānite wæñōninque idægoidi godōmenque cædinque, Wængongui quī, ante nāni iya tāinca bæ tadinque edæ wido cædānitapa. Ayæ botō adoboque inte edæ ayæ quēwēñōmote botō imote wæñoncæte ante cædāni wæbo abi.”

⁴ Āñongante Wængongui, “Iñæmpa botō tiæte mūido ganca mānīmpodāni inānite, Botō quīnāni inānīpa, ante wææ gompobo quēwēnāni apa quēwē. Wadāni nāni, Mōnitō wængongui Baado ingampa, nāni ānongä weca botō quīnāni iñōmō edæ da guicapodāmai inānīpa cæbii,” angacāimpa, ante nāni yewæmongainta adāmai imīnitawoo.

⁵ Nōwo iñōmō edæ adobaī impa. Idægomōni mōni cabo incæ mēa pōni imōni inte Wængongui ingante Baa ānāmai iñōmōnite tömengä mōnitō imōnite waadete pōnō cædinque, Botō quīmīni imīnīpa, ante apænte ængampa.

⁶ Iñinque, Wængongui waadete pōnō cædinque apænte ængampa, ante adinque tömēmonque waa cæmō beyæ ædō cæte Wængongui apænte ænguingāā. Iñæmpa tömēmonque waa cæmō beyæ Wængongui mōnō imonte apænte ængā bai, Wængongui waadete pōnō cæcampa, ante ædō cæte anguēnē i. Wæætē edæ tömēmonque waa cæmō beyæ Wængongui apænte ængā bai tömengä adocā ædō cæte nānō waadete pōnō cædō beyænque mōnō imonte apænte ænguēnengāā. Iñæmpa Wængongui waadete pōnō cædinque apænte ængā iñinque, Tömēmonque waa cæmompā, ante ædō cæte anguī.

⁷ Mānōmai i iñinque æbānō ante anguī. Edæ idægoidi tömēnāni nāni nangui æinēnō ante diqui diqui mīnte ænāmai iñōnāni mōnō iñōmō Wængongui nānō nē apænte ængāimō imō iñōmō edæ do æntamompā. Nē ænāmai ināni inānite Wængongui ee ayongante mīmō ōmædēnāni bagadānīpa. ⁸ Iimāi ante Wængongui beyæ nāni yewæmongainō bai ingatimpa.

“Tömēnāni inānite Wængongui godō cæcā ate mōwo mōinente bai wædāni inte tōmēnāni awinca ēmōnāni incæ ñōwo ganca adāmai inte wædānipa. Ōnōmonca ēmoncadāni incæ edæ ēñēnāmai inte wædānipa,” ante yewæmongatimpa. ⁹ Ayæ awēnē odeye Dabii wodi Wængongui ingante apænedinque iimainō ante apænegacāimpa. “Wængongui ēñēmi. Waodāni nāni wænguinque gote ææmæ bedāni bai cædinque iināni iñōmō edæ wapiticæ nāni towēnōnō ante gote towēnānipa. Incæte bitō godō cæbi ate tōmēnāni nāni towēnō beyæ edæ wæncædānipa, āmopa.

Tömēnāni tee tēwate bai oda cæte wæyōnāni bitō godō pāmi wæcædānimpa, āmopa.

¹⁰ Bitō godō cæbi ate tōmēnāni awinca edæ mæ māmonte bai bamōninque adāmai incædānimpa.

Ayæ teēmē mongæninque bocæ ñongænte cōwē wæcædānimpa, āmopa,” ante awēnē Dabii wodi Wængongui ingante apænegacāimpa.

Idægoidi ināmai ināni quēwēnānipa, ante

¹¹ Nōwo wæætē iimāi āmopa. Do oda cædāni incæ idægoidi iñōmō dicæ æmæwo tæ go wæænguīnāni inānitawogaa. Iñæmpa ayæ ate ængæ gantidinque tōmēnāni nē quēwēnguīnāni inānipa. Incæte Wængongui, Tömēnāni ēñēnāmai cædāni beyæ wadāni quēwēnāni adinque idægoidi wæætē. Mōnō quēwēngade impa, ante piinte wæcædānimpa, ante godō cæcā ate idægoidi edæ oda cægadānimpa. ¹² Iinque idægoidi ēñēnāmai cædinque ænāmai ināni beyæ mōnō ingui-poga tōmāmæ mōnō quēwēncabo wæætē edæ nanguī pōni æmompā. Tömēnāni ænāmai inte ōmæpodāni wædāni beyæmque mīnitō idægomīni ināmai imīni wæætē nanguī pōni æmīnipa. Iinque idægoidi nāni quēwēnguīmāmo iincayæ ate eyepæ pōni ænāni ate edæ æbānō baquīi. Edæ idægoidi iincayæ ate eyepæ pōni ænte entawēnāni beyæmque mōnō waocabo tōmāmō godōmenque nanguī pōni ænte entawengæimpa.

¹³ Idægomīni ināmai imīni imīnite apænebo ēñēedāni. Botō imote Codito, Idægoidi ināmai ināni inānite apænecebiimpa, ante da godongā gotabopa. Iinque botō, Mīnitō imite nē apænebo inte tobopa, ante nanguī tedebo. ¹⁴ Edæ, Idægoidi ināmai ināni incæ do quēwēnānipa, ante botō tedebo ēñēte wædinque botō guiddēnāni idægoidi wæætē, Mōnitō adobaī quēwēncæmōnimpa, ante piinte wæcædānimpa, ante tedebo. Ayæ adodāni pancadāniya godōmenque pōnēninque quēwēncædānimpa, ante cædinque botō edæ nanguī tedebo.

¹⁵ Idægoidi inānite Baa ante wido cædinque Wængongui wæætē ingui-poga tōmāmæ quēwēmo iñōmonte piyæñē cædinque edæ waadete pōnō cægacāimpa. Iinque tōmengā iincayæ ate idægoidi inānite Ao ante ængā ate edæ æbānō baquīi. Māñifedē ate edæ mōnō wænte ōfonte bai iñōmō inte edæ mōnō ñāni ōmæmonte quēwēngæimpa. ¹⁶ Iimāi ante pōngæimpa. Pāō pancaboga pancæte bai wædænque ināni inte tāno nāni pōnente quēwēncabo iñōmō tæiyæ waēmō ināni iinque iincayæ nāni pōnente quēwēncabo guiquēñē pāō babo bai adobaī ināni inte tōmēnāni adobaī tæiyæ waēmō inānipa, ante pōngæimpa. Tāno pōngæināni guiquēñē tæcæguinto bai iñōnāni inte tæiyæ waēmō ināni iinque edæ iincayæ pōnēnāni guiquēñē yæpænto bai iñōnāni inte adobaī tæiyæ waēmō inānipa.

¹⁷ Odibowæ ōnonque pæwæ incæ wainca incacæimpa, ante cædinque waocā tōmengā nānō mingāiwæ waa pōni incawæ adinque yæpængō nāmænte godō ōnonque pæwæ yæpæntoga mīne tūmongā amīnipa. Idægoidi iñōmō waocā nānō mīnte pæwæ bai iñōnānite Wængongui pancadāniya inānite yæpængō wæi ñæmænte bai wido cæcā wædānipa. Tömēnāni mānōmai wæyōnāni bitō guiquēñē ōnonque pæwæ yæpængō bai imitapa. Incæte Wængongui, Odibowæ yæpængocoo bai tæcæguinto beyænque oðæ yate bai pæte incacæimpa, ante odibowāa yæpæntoga godō mīni tinte bai cædinque bitō imite waadete pōnō cæcā ate bitō idægoidi beyænque mīmi inte ongōmipa. ¹⁸ Mānōmai i iinque bitō wæætē edæ, Wængongui botō imote pōnō cæcæte ante tōmēnāni inānite wido cæcampa, ante bitō nāmā ængō cæcæte ante cædinque Idægoidi inānite ante wīi piinte ancæbiimpa. Iñæmpa tæcæguinto ēwa bai ināni inte idægoidi iñōmō edæ bitō beyæ dicæ quēwēnāniyaa. Wæætē edæ tæcæguinto ēwa bai ināni beyænque bitō quēwēmipa, ante apænebo ēñēninque bitō piimi iinque, Mānōmai impa, ante tāno pōnēe.

¹⁹ Iinque bitō, “Oðæ yacæimpa, ante cædinque godō mīne tūmōnāni bai Wængongui botō imote pōnō cæcæte ante cædinque idægoidi inānite wæætē wido cæcampa,” ante pōnēmitawoo. ²⁰ Bitō pōnēnō edæ nāwangā impa. Incæte edæ tōmēnāni nāni pōnēnāmai inō beyænque Wængongui tōmēnāni inānite wido cægacāimpa. Bitō guiquēñē wede bitō pōnēnō beyænque mīmi inte ongōmipa. Iinque bitō guñēnte wædinque edæ nāmā ængō cædāmai inte edæ, Botō waēmō imo beyæ cæcantapa, ante pōnēnāmai imāwe. ²¹ Iñæmpa nāwā yæpængō bai ināni inānite Wængongui tapodāmai inongā inte bitō ōnōmīque iñōmite dicæ ata cæpoqingāa.

²² Iinque, Wængongui nē waadete

cædongā incæ cōwē nē apænte pangā ingampa, ante pōnē. Tōmengā iñōmō nē oda cædāni inānite pangampa. Wæætē bitō nē waadete cædongā nempo quēwēmi ininque tōmengā bitō imite waadete cæbaingampa. Incæte tōmengā nempo wīl quēwēmi ininque tōmengā wæætē bitō imite edæ wæi ñæmænte bai wido cæbaingampa. ²³ Idægoidi guiquēnē, Idæwaa pōnēnāmai inte awædō, ante ocaē ēmænte pōnāni adinque Wængongui nē tæi piñænongā inte tōmēnāni inānite wæætē ado awæ yæpæntoga godō mīni timonte bai pōnō cæcā ate mīlāni edæ ongōmāināni. ²⁴ Waodāni waa incawæ yæpængō nāmænte ōnonque pæwæ yæpæntoga godō nāni mīne timōnō bai Wængongui wī adobai cæcampa. Wæætē edæ bitō ōnonque pædiwæ yæpængō bai iñōmite tōmengā waadete pōnō nāmænte bai cædinque, Nāwā idægobi babipa, ante waa pæwæ yæpæntoga godō mīni timonte bai cæcampa. Bitō imite mānōmai waa cæcā inongā inte tōmengā idægoidi inānite æbānō godōmenque waa cæbaingāā. Tōmēnāni iñōmō waa pōni pæwæ yæpængoncoo tōmengā nānō wæi ñæmæncoo bai inte wæyōnānite adowænē yæpæntoga godō mīne timonte bai cædinque tōmengā tōmēnāni inānite, Nāwā idægōmīni inte mīnitō wæætē mīmīni ongoncæmīnīmpa, ante do cæcæcāimpa.

Idægoidi iinque bayonte quēwæncædānīmpa, ante

²⁵ Iñānāni ēñēedāni. Mīnitō nāmā ængō cædāmai incæmīnīmpa, ante cædinque botō wēēñēdē mīni ēñēnāmai ingainō ante edæ wææ āmopa. Mīnitō idægōmīni ināmai iñōmō mīni pōnencabo eyepæ pōni mīni yebænganca idægoidi iñōmō ñōwo mīmō ōmædēnāni inte wædōnāni inte edæ māninganca cōwē mīmō ōmædēnāni inte wæcædānīmpa. ²⁶ Iincayæ ate guiquēnē idægoidi tōmānāni quēwēngūnāni inānīpa. Edæ iīmai ante yewæmōnte ongompa.

“Mōnō ñā cæyænte bai tee mōnete bai wæwēñōmōnte nē Ñimpo Cæcā iñōmō Tiño iñōmō quēwente poncæcāimpa.

Aacobo wodi pæināni Wængongui ingante ēñēnāmai cæte quēwēnāni adinque nē Ñimpo Cæcā iñōmō tōmēnāni nāni ēñēnāmai entawēnō wadæ cæcā ate tōmēnāni wæætē ēñente cæte quēwæncædānīmpa.

²⁷ Iinque wēnæ wēnæ nāni cægāinō ante wadæ cæte wido cædinque Wængongui tōmēnāni inānite iīmai angampa.

Botō pōnō cæbo ate mīnitō Ao āmīni iinque edæ mōnō godongāmæ waa cæte quēwængæimpa, ante

Wængongui angampa,” ante yewæmongadānīmpa.

²⁸ Codito ingantedō ante watapæ ēñente pōnēninque mīnitō idægōmīni ināmai iñōmō do quēwēmīni beyæ idægoidi wæætē Wængongui ingante piinte adānīpa. Incæte tōmēnāni mæmæidi inānite nē apænte ængaingā inte Wængongui wæætē mæmæidi beyænque ante pōnēninque ñōwodāni inānite waadete pōnengampa. ²⁹ Edæ waomō imonte quincoomē pōnongā æñōmōnte Wængongui adodō ō ænāmai ingampa. Ayæ adobai waomō imonte aa pedinque tōmengā wadō ante anāmai inte edæ adodō ante edæ cōwē aa pecampa. ³⁰ Mīnitō wēēñēdē ēñēnāmai cæmīni incæte Wængongui iñōmō idægoidi ēñēnāmai cædāni beyæ mīnitō imīnite wæætē waadete cædinque pōnō ata cæpocā quēwēmīnīpa. ³¹ Ayæ adobai mīnitō imīnite pōnō waadete ata cæpocā quēwēmīni beyæ idægoidi ēñēnāmai cædāni iñōnānite Wængongui ñōwo tōmēnāni inānite adobai waadete cædinque godō ata cæpocā quēwēnānīmpa. ³² Iinque tōmengā, Mīni waocabo tōmāmīni imīnite botō waadete cædinque pōnō ata cæpocæboimpa, ante cædinque, Mīni ēñēnāmai cæcabo inōmīni inte mīnitō nāmā ēō toyænte aamō cædāmai incæmīnīmpa, ante tōmāmō imonte ñā cæyænte bai cæcā wæcongāmōimpa.

³³ Iinque Wængongui nangui pōni waadete entawēnongā iñongante tōmengā nānō pōnō cædōnō ante mōnō ædō cæte tee mante aquīl. Tōmengā tōmancoo do adongā inte nangui pōni ēñēnongā inte cæcā ingānō anguēnē. Tōmengā edæ, Æbānō I, ante do againgā inte edæ, Æbānō cæquīl, ante do apænte āñongante mōnō waocabo wæætē tōmengā nānō cædō ante ædō cæte ēñēngūl. Tōmengā ædōnō ponte ædōnō gocāā, ante pōnente wædinque mōnō tōmengā ōñōwa amompa diyæ taadō aquīl. ³⁴ Edæ iīmai ante nāni yewæmongainō bai impa. “Mōnō Awēnē æbānō pōngæāā, ante pōnente wædinque æcānō ēñēngāā. Ayæ, iīmai cæqui impa, ante mōnō tōmengā ingante edæ ædō cæte odōmōnte apænequīl. ³⁵ Wængongui ingante æcānō do godongā inte wæætē, Bitō debe imīpa, ante anguingāā. Iñæmpa tōmengā ingante godōmōmpa diyæ debe inguingāā,” ante Itaiya wodi nānō yewæmongainō bai impa. ³⁶ Edæ tōmengā nānō pōnongaincooque inte edæ tōmancoo ongompa. Mōnō waocabo iñōmō tōmengā badongā beyænque tōmengā quimō baquinque ongōmōmpa. Ayæ adobai edæ tōmengā badongā beyænque tōmancoo tōmengā quincooque edæ baquinque ongoncoopa. Edæ tōmengā adocanque pōni ñāō entawente edæ cōwē tæi ēmoncæcāimpa. Mānōmai impa, ante

mönö, Amëë, ante apænecæimpa.

12

Wængongui quimö imopa, ante cæte quëwengcæimpa

¹ Botö tönifamini ëñëedäni. Wængongui waadete pönö waa cæcä ængaimini inte munitö iimäi cæedäni, ante botö nangui ämopa. Wængongui qui, ante baö pædæ godönäni waa ængä bai munitö adobai edæ, Wængongui quimöni imönipa, ante mümini inte edæ tömengä ingante nämä pædæ godömini ængæedäni. Mänömai cædinque munitö tömengä önöwa inö müni ædæ wæænte nangui cæquënönö ante edæ do cæmini incæminipa. Mänömai godömini æninque tömengä wæætë edæ, Botö ayömo tæiyæ waemö pönömini æmopa, ante tocæcæimpa. ² Inguipogaque ante pönente müni cægalnö ante ñöwo ñimpo cædinque munitö mümini müni quëwenguinque ante edæ ocäi minque encate bai nöingä ante pönëedäni. Mänömai cædinque munitö, Wængongui waa pöni nänö önönö ante, Æbänö i, ante ædæmö ëñëninque, Tömengä nänö äno iñömö eyepæ pöni impa, ante ëñencæminipa. Mäninö ante ëñente cæte quëwëmö inte mönö tömengä tönö godongämæ waa tocæimpa.

³ Wængongui waadete pönö cæcä ate botö në apænebo badimo inte iimäi ante apænebopa. Munitö nämä pönëninque, Ñænæmo imopa, ante pönënamä iedäni. Wængongui pönö badongä ate munitö wede pönëmini badimini inte müni wede pönenganca mäningaquake pönëninque iimainö ante pönëedäni. Botö önömoque bai inömo imopa, ante ocäi encamini inte töö pöni pönëedäni. ⁴ Mönö baö adoyonque pöni ëñamö incæte wii adodonque mönö cæquënönö ante ëñamopa. Ìninque mönö aquinö ante awinca ëmöninque mönö dao dao goquinö ante önöwa ëwamopa. Ayæ wadö mönö cæquinö ante wayö ëñadinque mönö wæætë wadö mönö cæquinö ante wayö ëñadinque wayö wayö mönö ëñacoo ëñamopa. ⁵ Ìninque wayö wayö ëñamö incæ mönö baö pæ pagænguincoo adoyonque i bai mönö adobai Codito nempo mönö quëwencabo nangui pöni imö incæte adocabomö inömo imopa.

⁶ Ìninque mönö adocabomö iñömonte Wængongui waadete pönö cædinque mönö imonte wadö wadö mönö cæquinö ante tömänö pönongä æmopa. Ìninque mönö tömengä da pönongä mönö ænganca edæ adoganca wadö wadö cæmopa. Mänömai ænte cædomö iñömonte pancaminiya iminite Wængongui pönö apænecä ëñëninque munitö tömengä beyæ në apænemini do badinque wede müni pönenganca apæneedäni. ⁷ Wæætë wamini iminite Wængongui pönö

cæcä æninque munitö wadäni inänite në cæmini do badinque wadäni beyæ cæcæminipa. Wæætë wamini iminite tömengä pönö cædinque odömonte apænecä ëñëninque munitö në odömonte apænemini do badinque odömonte apænecæminipa. ⁸ Ayæ wæætë wamini iminite Wængongui pönö waadete apænecä ëñëninque në waadete apænemini badinque munitö iñömö wæntæye inte wædäni inänite ædæmö apænemini ëñëninque tömënanä wæætë edæ wampo pönëninque tæi piñænte cæcædänipa. Wamini iminite Wængongui pönongä æninque në nënempomini badinque munitö, Tömëmöni qui, ante wædämai inte wæætë wadäni nani ænguënönö ante eyepæ godömini æncædänipa. Wamini iminite Wængongui pönö angä ëñëninque munitö wæætë awënëidi bai në ämini badinque wadäni inänite nöingä cæte awënëidi bai ancæminipa. Wamini iminite Wængongui ædæmö waadete pönö waa cæcä æninque munitö wæætë ædæmö waadete cæmini do badinque wadäni inänite ædæmö waadete godö waa cædinque edæ wædämai inte tocæminipa.

Codito nempo quëwëninque iimäi cæcæimpa, ante

⁹ Botö waadete pönëmopa, ante tedemini ininque munitö nöinö cæte waadete pönencæminipa. Wiwa müni cædönö ante piinque wido cæedäni. Wæætë, Quinö waa cæquii, ante adinque mäninö ante ænte munitö mümönë ædæmö entawëninque cöwë waa cæte quëwëedäni. ¹⁰ Mönö waadete pönencabo imopa, ante pönëninque wacä ingä wacä ingä waadete pönente cæedäni. Wadäni ñænænäni inänipa, ante munitö tömënanä inänite ængö cæte bai cædinque wæætë, Botö wædämo imopa, ante nämä ængö cædämai iedäni.

¹¹ Tæi piñænte ëwocadinque mönö Awënë beyæ ante wæntædämai inte cæedäni.

¹² Watapæ bacæimpa, ante pönëninque tocæminipa. Caate wæwëmini incæte wæntæye badämai inte ee cæedäni. Ñimpo cædämai inte Wængongui ingante cöwë apæneedäni.

¹³ Wængongui quinäni ænguënënanä inte wædäni adinque munitö mäincoo wæætë nënempomini æncædänipa. Ayæ, Botö oncönë pö guite cænte möedäni, ante wadäni inänite waadete cæedäni.

¹⁴ Munitö iminite në piinte cædäni iñönänite munitö tömënanä inänite waadete godö apæneedäni. Edæ tömënanä inänite waadete apænedinque, Wængongui munitö iminite waa cæcæcæimpa, ante apænedinque wæætë piinte änämai iedäni.

15 Nē watapæ todāni tōnō godongāmæ watapæ toedāni. Nē Ca wædāni tōnō mīnitō godongāmæ Ca ca wædāni.

16 Mōnō pōnencabo ĩmōmpa, ante adoyōmō pōnente quēwēedāni. Ōnōnāni nāni nē ānōnāni tōnō godongāmæ cædinque, Botō ñæñæmo ĩmōpa, ante pōnēnāmai ĩedāni. Mīnitō, Wadāni pōnōmenque ocai encayōnāni botō godōmenque nangui pōni encabo ĩmōpa, ante nāmā ante pōnēnāmai ĩedāni.

17 Wadāni mīnitō ĩmīnite pōnō wēnæ wēnæ cædāni adinque mīnitō wæætē godō wēnæ wēnæ cædāmai ĩedāni. Ayæ, Quinō waa cæquīl, ante tōmānāni nāni waa adōnō ante adinque mīnitō mānīnonque ante cæedāni. 18 Eyepæ ĩmīni inte mīnitō cæganca cædinque tōmānāni tōnō godongāmæ piyænē cæte quēwēedāni. 19 Botō nē waademīni ēñēedāni. Mōnō Awēnē beyæ ĩlmai ante yewæmongatimpa. “Wēnæ wēnæ cædāni adinque botō wēnæ wēnæ nāni cædinō beyæ ante nē apænte panguēñemo inte tōmēmo eyepæ wæætē godō cæbo wæcædānimpa, ante Awēnē angampa,” ante yewæmonte ongōmpa cæmīni. Mīnitō ĩmīnite pōnō wēnæ wēnæ cædāni wæmīni ĩnīnque edæ wæætē godō cædāmai ee aedāni. Edæ nē āngā bate pānongā inte Wængongui incæ pancæcāimpa. 20 Wæætē, “Bitō ĩmite nē piinte cædongā incæ gæwænte wæcā adinque godōmi cængæ. Gue ænente wæcā adinque godōmi becæ. Edæ mānōmai waa cædinque edæ tōmengā guingo imonte nānō wænguinguine bitō tōmengā ingante waa cæcæbiimpa,” ante Wængongui beyæ yewæmonte ongō apa cæbii. 21 Tōmēnāni wēnæ wēnæ nāni cædō beyæ oda cædāmai inte wæætē mānīnō ante wido cæte bai cædinque bitō waa cædinque edæ tæi ēmonte gānā cæe.

13

1 Gobiedōno awēnē nempo waodāni ēñente cæte quēwencædānimpa, ante Wængongui incæ godō gō cæcā beyænque gobiedōno awēñēdi badānīpa. Edæ Wængongui mānōmai ante gō cædāmai ingā bai quingānō awēñē inguēngā. Edæ dæ ancædōnimpa. ĩnīnque gobiedōno awēñēdi ĩnānite mōnō tōmāmō Ao ānīnque ēñente cæcæimpa. 2 ĩnīnque awēñē ingante æcānō Baa ānaa tōmengā nānō apænte pante wæquinque Wængongui nānō goncægāinō ante ēñēnāmai inte edæ Baa angampa. 3 Nē waa cædāni guiquēñē awēñēdi ĩnānite waa ate todinque guñēnāmai ĩnānīpa. Wæætē wēnæ wēnæ cædāni guiquēñē awēñēdi ĩnānite guñēnte wædānīpa. Gobiedōno awēñē ingante guñēnāmai inte quēwencæboimpa, ante bitō āmitawoo. ĩnīnque bitō guñēnāmai inte quēwencæte ante waa cæcæbiimpa. Waa

cæbi adinque tōmengā, Bitō waa cæbi abopa, ante pōnō waa cæcā ĩnīnque bitō guñēnāmai ĩmaimīpa.

4 Botō ĩmote nē cædongā inte mīnitō beyæ waa cæcæcāimpa, ante Wængongui gobiedōno awēñē ingante godō gō cæcā ongongampa. Edæ Wængongui ingante nē cæcā ĩnongā inte tōmengā nē wēnæ wēnæ cæcā ingante nō cæte nē panguēngā ingampa. ĩnīnque awēñē yaēmē nē næængā inte wīl ōnonque næængampa cæbii. Wēnæ wēnæ cæbi ĩnīnque edæ guñēnte wæcæbiimpa. 5 ĩnīnque mōnō, Pangā wæcæ wæ, ānīnque awēñē ingante ēñente cæcæimpa. Ayæ pangā wæmō incæ wīl pangā wæmō incæ mōnō mīmō nē entawente nāmā apænte ānōmō inte mōnō awēñē ingante Ao ante ēñente edæ nōingā cæcæimpa. 6 Wængongui beyæ nē cædōnāni inte awēñēdi ĩñōmō tōmēnāni nempo quēwēnāni ĩnānite cōwē aadinque mānīnque cæte quēwēnānīpa. Mānōmai ĩ ĩnīnque mīnitō, Awēñēdi eyepæ ænīnque mōnitō beyæ cæcædānimpa, ante tōmēnāni nāni āinta pædæ godōmīni ænānīpa.

7 Æcāmenque ingante cæquēñēmīni ĩmīni inte mīnitō tōmānāni ĩnānite mīni cæquēnganca do godō cæmīni æncædānimpa. Awēñē nempo quēwēñōmonte tōmengā eyepæ ænīnque mōnō beyæ cæcæcāimpa, ante mīnitō awēñē nānō āinta godonguēñēmīni inte do godōmīni ængæedāni. Waocā ingante mīnitō guñēnte ēñēngūēñēmīni ĩmīni ĩnīnque tōmengā ingante guñēnte ēñēedāni. Waocā ingante mīnitō waa aquēñēmīni ĩmīni ĩnīnque edæ tōmengā ingante waa aedāni.

8 Wacā ingante mīni cæquēñēno ante edæ ee ongōnāmai inte godō cæmīni ængā ate abæ tawænte gocæbiimpa. Wæætē wacā ingā wacā ingā waadete mīni pōnenguēñēno ante edæ godongāmæ cōwē waadete pōnenguēñēmīni ĩmīnīpa. Wadāni ĩnānite nē waadete pōnengā ĩñōmō tōmengā ĩñōmō Wængongui nānō, ĩlmai cæedāni, ante nānō wææ angāinō ante do ēñente cæcā ingampa. 9 Tōmēmi nāmā bitō waadete pōnēnō ganca wacā ingante adoganca waadete pōnencæbiimpa, ante Mōitee wodi yewæmongacāimpa. Mānīne adodeque ante ēñente cædinque waocā Wængongui nānō wææ angāinō ante tōmānō do ĩnīnque cæcampa. Edæ, “Bitō nānōogængā ĩnāmai ĩñongante godō guēa mōnāmai ĩe. Wacā ingante godō wæñōnāmai ĩe. Wacā nānō ēadincoo adinque godō ænāmai ĩe. Wacā wēnæ wēnæ cæcā atabopa, ante godō babæ wapiticæ apænedāmai ĩe. Wacā quī ante æñente wædāmai ĩe.” Mānīncoo Wængongui nānō wææ angāincoo ante bitō waadete pōnēmi beyænque tōmāne do ĩnīnque

cætimpā. Ayæ quīnemē godōmenque wææ ante ī mānīne adobaī bitō waadete pōnēmi beyænque tōmāne do īinque cætimpā. ¹⁰ Nē waadete pōnengā īñōmō edæ wacā ingante cōwē wīwa cædāmaī ingampa. Mānōmaī beyæ nē ædæmō waadete pōnēnānique Wængonguī nānō wææ angaiñō ante īinque cædānīpa.

¹¹ Īinque, Nōwoyedē æbānō oo baquīī, ante do ēñēninque mīnitō waadete pōnente quēwēedāni. Edæ wēēñēdē mā mōnō wede pōñēdē mīnguipo mōnō quēwenguīmāmo īñōmō edæ māñīfēdē edæ oo bacæ cædāmaī ingatimpā. Nōwo guiquēñē, Oo pōñī bacæīmpā, ante pōnente wædinque mīnitō mōwocodē ōñōmīni inte edæ ñāni ōmæmōninque mīlmīni quēwēedāni. ¹² Wēmō īñōmō mōnō wæwēmāmo idæwaa edæ bapa. Mīnguipoga ñāo baī baquinque edæ oque pōnente impā cæmōō. Wēmō īñonte mōnō wēnæ wēnæ cædō æmæwo wido cædinque, mōnō wæætē ñāo īñōmō quēwēninque edæ wææ cæquincoo wēñate baī cædinque nāmā wææ gompotawengæīmpā. ¹³ Mānōmaī cædinque mōnō itædē quēwēnōmō inte nō pōñī cæcæīmpā. Baonque ante mōnō cæinēwēnō ante towēnāmaī inte mōnō tī nāmæ nanguī bete quidi quidi dowæñāmaī ingæīmpā. Mōnō wacā tōnō godō guēa mōnāmaī, cænguī eyepæ cæninque godōmenque nanguī cæñāmaī ingæīmpā. Wæætēdō wæætē piinte cædāmaī inte mōnō, Wacā baī bacæboīmpā, ante piinte adāmaī ingæīmpā. ¹⁴ Wæætē wææ cæquincoo entawente baī cædinque mīnitō nāmā wææ gompotawencæte ante cædinque mōnō Awēñē Ītota Codito ingante entawente quēwēedāni. Ayæ baonque ante mīni cæinēwēnō ante wido cædinque, Æbānō cæte wēnæ wēnæ cæquīmoō, ante cæcæte ante wædāmaī iedāni.

14

Mīnitō tōñīñadāni īñānīte piinte ānāmaī iedāni, ante

¹ Wacā wīī ædæmō pōnengā incæte mīnitō, Mōnō pōnencabo īmopā, ante pōñēninque tōmengā adocabōcā nānō baquinque āmīni pongæedāni. Tōmengā nānō pōñēnō ante wæætēdō wæætē ānāmaī iedāni. ² Pancadāniya wede pōñēnāni inte cænguī adinque, Nāwā cænguī impā, ante guīñēnāmaī inte quīēmē cænguī incæ edæ dobæ ade cæñānīpa. Wadāni guiquēñē æmæ pōnente beyæ, Tōmāā baō baacā impā, ante awente baī cædinque quingāmenque baō incæ cæñāmaī inte onguipoiya pæcooque edæ cæñānīpa. ³ Incæte tōmāā cænguī nē cæñongā īñōmō onguipoiya pæcooque nē cæñongā ingante piinte adāmaī

incæcæīmpā. Wacā ingante, Bitō ōñōmique baī īñōmi inte edæ awente cæñāmaī īmīpa, ante ānāmaī incæcæīmpā. Ayæ wæætē onguipoiya pæcooque nē cæñongā guiquēñē baō nē cæñongā ingante, Baacā apa cæwēe, ante apænte ante piñāmaī incæcæīmpā. Edæ nē cæñongā ingante Wængonguī Ao āninque, Botō quīmī īmīpa, ante do ængampa. ⁴ Īñæmpā tōmengā wacā awēñē ingante nē cæcā īñongante bitō ædō cæte apænte āmīi. Edæ tōmengā awēñē incæ, Waa cæbīpa, angā wædinque edæ tōmengā adiyæ tæī ongōmaingampa. Wæætē adocā tōmengā awēñē, Wēnæ wēnæ cæbīpa, angā wædinque edæ tæ go wææmaingampa. Incæte edæ tōmengā mōnō Awēñē ingante nē cæcā īñongante mōnō Awēñē adocā incæ tæī piñæñongā inte eyepæ cædinque edæ ææñnō gō cæcā tæī ongoncæcæīmpā.

⁵ Ayæ wacā guiquēñē, Pancaōnaa godōmenque waa ēōnæpa, ante cæcæīmpā, ante pōñēñongante wacā guiquēñē, Tōmāā itædē ōñōnæque impā, ante pōnengampa. Īinque mōnō pōnencabo wacā wadō wacā wadō pōñēmō incæte mōnō tōmāmō īñōmō edæ, Nāmā botō pōñēnonque ante botō nō pōnente cæcæboīmpā, ante edæ māñinonque ante cæcæcæīmpā. ⁶ Edæ, Pancaōnaa godōmenque waa ēōnæpa, ante nē pōnengā guiquēñē tōmengā mōnō Awēñē ingante waa adinque māñōmaīñō ante cæcampa. Pancaōnaa wīī godōmenque waa ēōnæpa, ante nē pōnengā guiquēñē tōmengā adobaī mōnō Awēñē ingante waa adinque māñōmaīñō ante cæcampa. Baō nē cæñongā guiquēñē Wængonguī ingante, Waa pōñōmi cæmopā, ante adobaī mōnō Awēñē ingante waa adinque cængampa. Baō ate nē awente cæñāmaī īnongā guiquēñē tōmengā adobaī Wængonguī ingante, Waa pōñōmi cæmopā, ante onguipoiya pæcooque cæñinque mōnō Awēñē ingante waa adinque baō cæñāmaī ingampa.

⁷ Mōnō pōnencabo īñōmōnte æcāmenque incæ nāmā beyænque dicæ quēwengāā. Dicæ nāmā beyænque wængāā. ⁸ Wæætē edæ quēwēmō īinque mōnō Awēñē beyænque quēwēmompā. Wæætē edæ wæmō īinque mōnō Awēñē beyænque wæmompā. Īinque quēwēmō incæ wæmō incæ mōnō Awēñē quīmō īñōmō inte quēwēninque tōmengā quīmō inte edæ wæmompā. ⁹ Edæ do wængāināni beyæ ante mīlmō quēwēmō beyæ ante Codito tōmāmō Awēñē nānō baquinque edæ wænte ñāni ōmæmongacæīmpā.

¹⁰ Bitō guiquēñē bitō tōñīñacā ingante ædō cæte apænte āmīi. Ayæ bitō tōñīñacā ingante, Ōñōmique baī īmīpa, ante quīnante āmīi. Edæ Wængonguī nānō apænte anguīmpāā gāāñē ongōñōmōnte tōmengā

tömāmō imonte apænte ancæcāimpa cæbii.
 11 Edæ Wængongui beyæ ante iīmaī ante
 yewæmonte ongompa.

“Mōnō Awēnē incæ, ‘Nē Quēwēmo Inōmō
 inte edæ āmo ēñēedāni,’ angampa.

Ayæ, ‘Mīnitō tōmāmīni botō ōnōwa inō da
 guicapodinque,

Bitō Wængongui inōmi īmipa, ante
 adoyōmō apænecæmīnimpā,
 angampa.”

12 Ante nāni yewæmongainō bai iīnque
 cædinque mōnō tōmāmō Wængongui weca
 ponte ongōninque mōnō pōnengainō ante
 mōnō apænegainō ante mōnō cægainō
 ante tōmēngā ingante edonque pōni
 apænecæiimpā.

*Wacā oda cæcæcāimpa, ante cædāmaī
 incæbiimpā, ante*

13 Mānōmaī beyæ mōnō wacā ingante
 apænte ānāmaī ingæiimpā. Wæætē
 mīnitō, Waa cæcæboimpā, ante nāmā wææ
 cædinque, Botō tōniñacā taadō nānō goquīnō
 ante ee acæboimpā, ante pōnēedāni. Tōmēngā
 tee tēwate bai oda cædāmaī incæcāimpa, ante
 nōingā cæquinque ante pōnecæmīnimpā.

14 Botō iñōmō Itota Codito nempo quēwēmo
 inte edæ nōingā pōnēninque, Tōmāā cængui
 nāmā incæ nāwāaquiringā impā, ante do
 ēñēmopa. Incæte wacā, Pancaā cængui
 baacā impā, ante nē pōnēngā inte tōmēngā
 beyæ baacā iñonte tōmēngā nānō, Baacā
 impā, ānō cæñāmaī inguēnēngā ingampa.

15 Bitō quingāmē cæmi adinque bitō
 tōniñacā, Baacā apa cæwēe, ante wæwente
 bacā iīnque bitō waadedāmaī inte
 godōmenque cæmaīmipa. Edæ bitō tōniñacā
 beyæ Codito wængacāi apa quēwēe. Bitō
 tōniñacā nānō pōnēnāmaī bate wænguinque
 baō cæmīpā, ante wædinque bitō tōmēngā
 ingante nāwangā waadete pōnēmi inte
 tōmēngā beyænque ante cōwē baō cæñāmaī
 incæbiimpā. 16 Botō mānōmaī cædinque waa
 pōni cæbopa, ante pōnēmi incæte wadāni
 bitō waa cædō ante, Wīwa cæbipa, ante
 pōnō babæ ante tedewēnāni ate wædinque
 bitō wæætē waadete pōnēninque wææ
 āmi tedewēnāmaī incædānimpā. 17 Wīi
 cænguinque ante wīi bequinque ante
 Wængongui nempo quēwēmōmpā. Wæætē
 Wængongui Tæiyæ Waēmō Ōnōwoca nempo
 quēwēñōmonte tōmēngā pōnō cæcā æninque
 mōnō nō entawenguinque impā. Ayæ
 mōnō gānē pōnēninque ante mōnō watapē
 tote quēwenguinque ante tōmēngā nempo
 quēwēmōmpā. 18 Edæ Codito nempo
 quēwēninque waocā mānōmaī cæcā adinque
 Wængongui tōmēngā ingante waa ate
 tocampa. Waodāni adobāi, Waa cæbipa,
 ante waa adānīpā.

19 Mānōmaī impā, ante adinque,
 Mōnō pōnecabo godongāmæ piyæñē

cæte quēwengæiimpā, ante, Ayæ mōnō
 godongāmæ wede pōnēninque tæi mānonte
 bai ongongæiimpā, ante mōnō nan-
 gui cæcæiimpā. 20 Iīnque cængui
 cæinente beyænque bitō Wængongui nānō
 nē badongaināni inānite bæ tadāmaī
 incæbiimpā. Tōmāā cængui edæ nāwāaquiringā
 impā. Incæte bitō cæñinō beyænque
 wacā ēñēnāmaī inte tee tēwate bai oda
 cæbaingampa, ante do ēñēmi inte bitō
 godōmenque cæmi iīnque wīwa cæbaīmipa
 tōō. 21 Waa cæcæte ante bitō iīmaī
 cæcæbiimpā. Bitō baō cæmi beyæ, biinōmæ
 nāni wædænque tī nāmæ bebi beyæ,
 quiēmē cæbi beyæ bitō tōniñacā oda cæte
 wæcantawo. Iīnque bitō iñōmō, Botō
 tōniñacā oda cædāmaī incæcāimpa, ante
 wææ cædinque ee cædāmaī iīmi iīnque waa
 imaimpā.

22 Mānīnō, Æbānō cæte waa inguiī, ante
 bitō pōnēnō beyænque wadāni inānite
 apænte ānāmaī inte bitō adobique inte
 Wængongui ayongante cæcæbiimpā. Waa
 cæqui impā, ante mīmōno bitō pōnēnonque
 ante māninonque cædinque bitō tente
 wæquinque cædāmaī inte waa tobaīmipa.
 23 Wæætē nē æmæ pōnēngā guiquēnē,
 Cæmo beyæ Wængongui pangā wæcæ wæ,
 ante wædingā inte tōmēngā nāmā nānō
 apænte pante wæquinque ade cængampa.
 Edæ æcānō wede pōnēnāmaī inte cæda
 tōmēngā nānō cædōnō tōmānō edæ wīwa
 cætimpā. Iīnque bitō cædō tōmānō wede
 pōnente cæcæbiimpā.

15

*Wadāni incæ watapē quēwēncædānimpā,
 ante cæe, ante*

1 Mōnō nē wede pōnēmō iñōmō tæi
 piñænte entawēmō inōmō inte nāmanque
 ante mōnō cæinēnō ante edæ wædāmaī
 ingæiimpā. Wæætē edæ nē æmæ pōnēnāni
 guiquēnē tōmēnāni aquīi pōni ināni inte,
 Ædō cæte cæquimoo, ante wædāni ad-
 inque mōnō tōmēnāni wædō ante ænte
 mongænte bai cædinque tōmēnāni tōnō
 iñacabo cæcæiimpā. 2 Godongāmæ godō
 cæmō æninque waa todinque tōmēnāni
 wæætē wede pōnēninque oncō tæi mānonte
 bai tæi ongoncædānimpā, ante mōnō
 ædæmō cæcæiimpā. 3 Edæ mōnō Codito
 incæ nāmanque ante nānō cæinēnō ante
 cæcæte ante edæ wædāmaī inte piyæñē
 cægacāimpā. Wængongui ingante do nāni
 apænegainō bai tōmēngā wadāni beyænque
 ante cægacāimpā. “Wængongui ēñēmi.
 Wadāni bitō imite piinte badete tocæte ante
 cædinque botō imote wæætē piinte badete
 todānīpā,” ante apænete bai Codito ee
 cægacāimpā. 4 Edæ mōnō imonte odōmonte
 apænecæte ante Wængongui angā ēñēninque

doḍāni tōmantaa yewæmongadānimpā. Īninqe māninta ædæmō adinque wampo pōnēninque wæntædāmaī inte ee cæmō Īninqe eḍæ mōnō, Watapæ bacæimpā, ante pōnente tocæimpā.

⁵ Īninqe Codito Itota mīñæ tee empote goyōmonte Wængonguī Īñōmō eḍæ, Mīnitō wampo pōnēninque wæntædāmaī inte ee cæcæmīnimpā, ante nē ædæmō cæcā ingampā. Tōmengā mānōmaī pōnō cæcā ate mīnitō Īñōmō adoyōmō ante mīni pōnencabo bacæmīnimpā, āmopa. ⁶ Mānōmaī bamīni Īninqe mīnitō ānque baī adodō ante pōnēninque Īmaī ante Wængonguī ingante apæncæmīnimpā. Mōnitō Awēnē Itota Codito Mæmpobi Īnōmi inte bitō tōmengā Wængonguī adobi Īmi Īñōmō bitō tæī ēmōmi inte ñāō apāite baī Īmi amōnipa, ante adoyōmō ante apæncæmīnimpā, ante botō mānōmaīnō ante yewæmōmopa.

Oodeoidi Īnāmaī Īnāni ēñencædānimpā, ante

⁷ Codito mīnitō Īmīnite Ao ante ængacāimpā. Īninqe tōmengā mīnitō Īmīnite nānō ængāī baī mīnitō adobaī wacā ingā wacā ingā godongāmæ Ao ante æedāni. Mānōmaī cæmīni adinque wadāni Wængonguī ingante apænedinque, Bitō waa pōni cæbi amōnipa, ante watapæ pōni apæncædānimpā. ⁸ Eḍæ apænebo ēñēedāni. Mōnitō mæmæidi Īnānite Wængonguī, Mīnitō beyæ pōnō waa cæcæboimpā, angacāimpā. Īninqe, Wængonguī tōmengā nānō angainō ante cōwē cæcæcāimpā, ante oodeoidi ēñencædānimpā, ante cædinque mōnō Codito tōmēnāni beyæ nē cæcā bagacāimpā. ⁹ Tōmengā Īñōmō, Idægoidi Īnāmaī Īnāni incæ Wængonguī ingante, Bitō ñāō baī ēmōmi inte pōnō waadete waa cæbi æmōnipa, ante apæncædānimpā, ante mānōmaī cægacāimpā. Īmaī ante Wængonguī beyæ nāni yewæmongainō baī impā.

“Botō mānōmaī beyæ, Bitō æbānō nē waa cæbi Īmi, ante idægo Īnāmaī Īnāni weca gote apæncæboimpā.

Bitō ēmōwo ante āmotamīni watapæ pōni ancæboimpā,” ante nāni yewæmongainō baī Codito cægacāimpā.

¹⁰ Ayæ wataa Īñōmō Īmaī ante yewæmongatimpā.

“Idægoidi Īnāmaī Īmīni incæ mīnitō Wængonguī quīnāni tōnō godongāmæ watapæ toedāni.”

¹¹ Ayæ wæætē,

“Idægoidi Īnāmaī Īmīni mōnō Awēnē ingante apænedinque, Bitō waa pōni cæbi amōnipa, ante watapæ pōni apæneedāni.

Wamīni mīni cabo mīni cabo tōmāmīni āmotamīni ante baī apænedinque, Waa pōni cæbi amōnipa, ante watapæ pōni apæneedāni.”

¹² Itaiya wodi adobainō ante yewæmongacāimpā. “Inguipoga quēwēnāni tōmānāni Awēnē baquinque

Awænguinto tā bocate baī cædinque Yæte Pæingā Īñōmō ængæ ganticæcāimpā.

Tōmengā cæcā beyæque watapæ bacæimpā, ante idægoidi Īnāmaī Īnāni incæ pōnencædānimpā,” ante Itaiya wodi yewæmongacāimpā.

¹³ Wængonguī Īñōmō, Watapæ bacæimpā, ante nē badongaingā Īngā inte Īmaī cæcæcāimpā, āmopa. Tōmengā Tæiyæ Waēmō Ōnōwoca tæī pīñænte cæcā ate mīnitō, Watapæ bacæimpā, ante godōmenque wede pōnencæmīnimpā. Mānōmaī cæcæte ante cædinque Wængonguī pōnō apæncæcā ēñēninque mīnitō tōmengā ingante wede pōnēninque eḍæ gānē entawēninque watapæ tocæmīnimpā, āmopa.

¹⁴ Botō tōñīfamīni ēñēedāni. Botō tōmēmo ayōmote mīnitō nē waa cæmīni Īmīni abopa. Ayæ, Æbānō waa cæquīlī, ante do ēñēmīni Īmīnimpā. Ayæ adobaī mīnitō eyepæ Īmīni inte wacā ingā wacā ingā do odōmonte apænemīni Īmīnimpā, ante pōnēmopa. ¹⁵ Īninqe botō, Mīnitō ēñēnīnō ante mīnitō ocaī encadōmīni inte eḍæ adodō ante pōnencæmīnimpā, ante baī cædinque pancadea ante yewæmontabopa. Botō Īñōmō Wængonguī waadete pōnō cæcā ænte nē entawēmo inte mānōmaīnō ante yewæmōninque eḍæ guīñēnāmaī inte nanguī ante yewæmōmopa. ¹⁶ Eḍæ tōmengā waadete pōnō cæcā ænte entawēninque botō Itota Codito beyæque ante idægoidi Īnāmaī Īnāni Īnānite nē cæbo badinque Wængonguī ingantedō ante watapæ apænebo ēñēnānimpā. Mānōmaīnō ante apænebo ēñēñōmīnite Wængonguī Tæiyæ Waēmō Ōnōwoca pōnō badongā ate idægoidi Īnāmaī Īnāni incæ tæiyæ waēmō ēwocate quēwēnāni badānimpā. Mānōmaī bayōnānite botō Īñōmō, Wængonguī quī, ante pædæ godōnāni baī cædinque tōmēnāni Īnānite ante eḍæ, Wængonguī quīmīni bacæmīnimpā, ante pædæ godōmo æninqe Wængonguī wæætē waa tocampa.

¹⁷ Mānōmaī beyæ botō Itota Codito nempo quēwēninque Wængonguī beyæ cædinque eḍæ nanguī tobopa. ¹⁸ Codito botō tōnō guēa cæcā beyæque botō nanguī apænedinque nanguī cæbo ate tōmengā Īñōmō tōō æmængā pōninque eḍæ idægoidi Īnāmaī Īnāni incæ eḍæ Wængonguī ingante ēñente cædāni badānitapa. Botō Codito mānōmaī botō tōnō nānō cædinō ante apænedinque eḍæ māninque ante apænedinque guīñēnete

wædinqe godömenque apænedāmai incæboimpa. ¹⁹ Wængongui Tæiyæ Waëmō Önöwoca tæi piñænongå inte botō tönō godongāmæ cæcā ate botō, Eñencædānimpa, ante bamönengæ cæbo ate nē pönēnāni badānitapa. Mänōmai Eedotadēē iñōmō mā cæte godinque Ildidiabæ ganca tōmāo godāmæ godinque botō Codito ingantedō ante watapæ apænedinque adodō adodō ante tōmānō ante apænebo eñēnānitapa.

²⁰ Botō, Codito emōwo ante wadāni nāni apænedāmai iñōmō gote tōmengā ingantedō ante watapæ apænebo eñencædānimpa, ante cōwē goinente wætabopa. Wacā onguitanca nānō tæñōnincōnē æmonga mæñōnāmai incæboimpa, ante bai cædinque botō, Wacā do nānō apænediñōmō botō wæætē apænedāmai incæboimpa, ante cætabopa. ²¹ Wæætē iñmai ante Itaiya wodi nānō yewæmongainō bai cætabopa.

“Tōmengā ingante ante eñēnāmai iñināni incæ edæ do ate bai ewocacædānimpa. Önöwoca eñēnāmai iñināni incæ edæ, ‘Æbānō i,’ ante do eñencædānimpa.” Ante nānō yewæmongainō bai botō, Eñencædānimpa, ante cætabopa.

Odömā iñōmō pōnēmopa, Pabodo angampa

²² Mänōmai beyæ botō mīnitō weca poncæ cæyōmote edæ, Wææ cæte i, ate wædinqe pönāmai intabopa. ²³ Iñōmō ömæ idæwaa cæbo inte botō æpomē wadepo iñonte mīnitō imīnite aīnente wædōmopa. ²⁴ Iñinque botō, Iñcayæ ate Epāñabæ gocæ cædinque wodo tebæ godinque mīnitō weca eñate aboque gocæboimpa, ämopa. Edæ botō wantæpiyæ eñate tote quēwente ate godömenque Epāñabæ gote cæyōmo mīnitō botō beyæ cædinque da godōmīni gocæboimpa.

²⁵ Nōwo guiquēnē botō tāno Eedotadēē iñōmō Wængongui quīnāni beyæ godō cæcæte ante gobopa. ²⁶ Wængongui quīnāni incæ Eedotadēē quēwēnāni pancadāniya ömæpodāni inte wædāniya, ante pönente wædinqe wabæca Mäatedōniabæ quēwēnāni tönō Acayabæ quēwēnāni tönō, Mönō da godō da godō cæcæimpa, ante pönēninque watapæ todinque tōmēnāni, Wængongui quīnāni qui, ante do godōnānitapa. ²⁷ Mänōmainō ante watapæ pönente cædāni incæte tōmēnāni Eedotadēē iñōmō quēwēnāni inānite nē godonguēnēnāni inte da godōnānimpa. Edæ Wængongui Önöwoca nānō pönongaincoo ante idægoidi pönō apænedāni eñente ænte ewocadināni inte wabæca quēwēnāni iñōmō tōmēnāni nāni eadincōo incæ idægoidi beyæ ante wæætē godonguēnēnāni badināni ināniya. ²⁸ Iñinque botō iñōmō mänincōo tōmēnāni

nāni da godōnincōo idægoidi weca ænte gocæboimpa. Godinque botō cōwā adinque, Nē ömæpodāni inte nē wædāniye æncædānimpa, ante wææ cæcæboimpa. Ædæmō cæbo ænāni ate botō māñiñedē ate Epāñabæ gocæte ante cædinque mīnitō ömæ wodo tebæ godinque mīnitō weca eñacæ poncæboimpa. ²⁹ Codito pönō waa cædinque da pönongā pöninque botō cōwē tōmengā tönō waa pōni botō cæquinque mīnitō weca poncæboimpa, ante do eñēmopa.

³⁰ Botō tōñiñamīni eñēedāni. Botō pæ pagænte bai nangui cæyōmote mīnitō iñacabo cædinque botō beyæ Wængongui ingante nangui apæneedāni, ante botō mönō Awēnē Itota Codito beyænque äninque ayæ Wængongui Önöwoca nē waadete pönengā beyænque äninque mīnitō imīnite nangui ämopa. ³¹ Oodeabæ pönēnāmai ināni iñōmō Pabodo ingante wēnæ wēnæ cædāmai incædānimpa, ante botō beyæ ante apæneedāni. Ayæ, Eedotadēē iñōmō botō gote cæbo adinque Wængongui quīnāni incæ botō cædō ate Ao ancædānimpa, ante apæneedāni. ³² Mänōmai i adinque botō, Awēnē Wængongui angā ate botō watapæ todinque mīnitō weca pōmo ate mönō godongāmæ guēmāninque wampo pönengæimpa, ämopa. ³³ Wængongui nē gānē pönengā inte mīnitō tönō godongāmæ ongōninque pönō cæcā ate gānē pönencæmīnimpa, ämopa. Mänōmai impa diyæ, ante botō, Amēē, ämopa.

16

Waa quēwencæmīnimpa, ante

¹ Botō iñmai ämopa. Mönō tōñiñacā tōmengā emōwo Pebe mīnitō weca nōwo poncæ cæcampa. Tencodea iñōmō Codito ingante nāni godongāmæ pönencabo iñōnānite tōmēnāni beyæ nē waa cæcā inte lingā onquiyængā iñōmō waingā pōni ingampa. ² Tōmengā nangui ināni beyæ wææ gompodinque waa cædongā inte botō beyæ adobai nangui cæcantapa. Iñinque edæ botō mīnitō imīnite iñmai ämopa. Wængongui quīmō inōmō inte mönō Awēnē nempo quēwēñōmote Pebe adocā inte adobai ingampa, ante adinque mīnitō tōmengā ingante waa adinque Ao ante æedāni. Ayæ tōmengā quēwēnē æīnente wæcā iñongante mīnitō wæætē edæ godō cæedāni ämopa.

³ Ayæ wada Piditida tönō Aquidæ nāna gæncaya iñōmō Itota Codito nempo quēwēninque edæ botō tönō godongāmæ cæda inapa. Iñinque mīnitō tōmēnā inate, Waa quēwencæmīnainya, ante botō beyæ ante apænemīni eñēcædaimpa. ⁴ Wadāni botō imote wænoncæ cædāni wæyōmote tōmēnā nāna wodo wænguinque edæ botō imote wææ cædatapa. Mänōmai cædapa, ante botō

tömëna inate waa ate pönente apænebopa. Ayæ idægoidi inämaï inäni Codito ingante nãni wayömö pönencabo wayömö nãni pönencabo adobaï tömänãni Aquidæda nãna cædinö ante ëñëningue tömëna inate waa ate pönëningue apænedänipa.

⁵ Ayæ Itota Codito ingante në pönënanï Aquidæda oncönë godongämæ pö guidäni inänite, Waa quëwëedäni, ante apænemini ëñencädänipa. Botö æmigo Epëneto botö në waadecä iñongante munitö botö beyæ apænedänipa, Waa quëwencæbiimpa, ante apæneedäni. Atiabæ iñömö Codito ingante wadäni pönënamäi iñönäni tömengä iñömö täno pönengantapa. ⁶ Ayæ Måadiya munitö beyæ nanguï cædingä iñongante munitö wæætë tömengä ingante Waa quëwencæbiimpa, ante apæneedäni. ⁷ Botö guidëna Antodönico tönö Nönïato iñömö botö tönö godongämæ tee mönete wædäna inapa. Tömëna iñömö botö pönënamäi iñömote wëñëñedë Itota Codito nempo quëwëna iñönate Codito incæ tömëna inate da godongacäimpa. Iñingue, Itota Codito nänö në da godongäina tänoda ina adinque munitö botö beyæ ante tömëna inate waa apæneedäni.

⁸ Ayæ wacä mönö Awënë nempo quëwëningue Ampidiato ingante waadete pönëmo inte edæ botö, Waa quëwencæbiimpa, ämopa. ⁹ Ayæ adobaï Odömåno mönitö tönö godongämæ Codito nempo quëwente në cæcä iñongante, Waa quëwencæbiimpa, ante botö beyæ ante apæneedäni. Botö në waadecä Etaquito ingante adobaï ante apæneedäni. ¹⁰ Ayæ Apede iñömö Codito nempo quëwëñongante tömengä æbänö cæcää, ante adinque Codito tömengä ingante wæætë, Waa cæbi abopa, angampa. Tömengä ingante botö beyæ ante waa apæneedäni. Ayæ Aditobodo nãni quëwencabo inänite adobaï waa apæneedäni. ¹¹ Botö guidengä Edodiyaönö ingante waa apæneedäni. Ayæ Nåadotito guidënanï incæ æcänö mönö Awënë nempo quëwëna tömënanï inänite adobaï, Waa quëwencæmïnimpa, äedäni.

¹² Ayæ wada mönö Awënë nempo quëwëna onquiyæna Tidipina tönö Tidipota iñömö në nanguï cæda inapa. Tömëna inate botö beyæ ante waa apæneedäni. Ayæ wacä onquiyængä mönö në waadecä Pedetida iñömö tömengä mönö Awënë nempo quëwëningue nanguï cæcantapa. Tömengä ingante adobaï, Waa quëwencæbiimpa, äedäni. ¹³ Ayæ mönö Awënë nänö në apænte ængaingä Odopo ingante waa apæneedäni. Tömengä badä incæ adobaï botö badä bai iñönante tömëna inate botö beyæ ante waa apæneedäni. ¹⁴ Ayæ adobaï Atincodito, Pedegonte, Edëme, Patodobato, Edëma

tömënanï nãni pönencabo tömänäni inänite, Waa quëwencæmïnimpa, ante apæneedäni. ¹⁵ Ayæ wadäni Pidodogo tönö Oodia, Nëdeeo tömengä mængä tönö, Odimpa tönö Wængonguï quïnäni tömänäni inänite, Waa quëwencæmïnimpa, ante apæneedäni.

¹⁶ Edæ, Waa quëwencæmïnimpa, ante mïnicabo incæ tömäni godongämæ waa waadete apænecæmïnimpa. Codito ingante wayömö nãni pönencabo wayömö nãni pönencabo tömänäni munitö iminite wæætë, Waa quëwencæmïnimpa, ante äänäipa.

¹⁷ Botö tönö iñamini ëñëedäni. Minitö adocabomini iñöminite wadäni æmæmoncadö æmæmonca pä cædäni inänite cöwä adinque edæ Baa äedäni. Doyedë munitö ëñëno ante ëñënamäi inäni inte tömënanï, Minitö tee tëwate bai oda cæcæmïnimpa, ante cædingue wadö ante edæ odömönänipa cæminii. Tömënanï inänite gomö aquënë cæminii. ¹⁸ Mänömaï cædäni iñömö mönö Awënë Codito ingante cædamäi inte nãmä nãni cæinënonque ante cæänäipa. Tömënanï ante, Minitö iminite waa amönipa, ante waa tedete bai tededäni ëñëningue pancadäniya quiquënë, Babæ wapiticæ impa, ante cöwä adamaï inäni inte, Nö impa, ante do pönënanäipa. ¹⁹ Minitö cöwë ëñente cæmini iminipa, ante tömänäni do ëñënanäipa. Mänömaï beyæ botö iñömö nanguï tobopa. Incæte, Quinö waa cæquii, ante munitö ædæmö ëñencæmïnimpa, ante ainëmopa. Quinö wënæ wënæ cæquii, ante edæ ædæmö ëñënamäi inte edæ gomö cæmïnimpa, ante ainëmopa. ²⁰ Wængonguï, Gänë pönente quëwëñongante munitö, ante në pönö cæcä iñömö edæ Tatäna ingante munitö önöwa gäänë wæantodongä ate munitö wæætë do pinä gäwate bai cæcæmïnimpa. Nöwo iñömö mönö Awënë Codito nänö waadete pönö cædö incæ entawencæmïnimpa, ämopa.

²¹ Botö tönö guëa cædongä Timoteo iñömö munitö iminite, Waa quëwencæmïnimpa, angampa. Ayæ botö guidënanï Dotio tönö Yatönö adobaï Totipatedo adobaï munitö iminite, Waa quëwencæmïnimpa, äänäipa.

²² Nöwo botö Tedetiyo bo iñömö Pabodo önöneque tedecä ëñëningue iï cadota ante në yewæmönimo inte botö adobaï, Waa quëwencæmïnimpa, ämopa.

²³ Gayo adobaï munitö iminite, Waa quëwencæmïnimpa, angampa. Tömengä oncönë Codito ingante nãni pönencabo cöwë godongämæ ponte apænedänipa. Ayæ tömengä botö imote adobaï, Pöe, angä ëñëningue edæ botö nöwo tömengä oncönë owobopa. Ayæ iñömö quëwënanï awënë nänö äinta æningue adocanque Edaato nãni äongä iñömö tömengä, Tömänäni beyæ æbänö cæquii, ante në angä iñömö tömengä

tönö mönō tōnīñacā Coadoto adobaī, Waa
quēwēedāni, ānapa.

²⁴ Mōnō Awēnē Itota Codito mīnitō īmīnite
pōnō waadete cæcæcāimpa. Mānōmaī impa,
ante botō, Amēē, ante āmopa.

*Wængonguī ingante waa ate apænecæimpa,
ante*

²⁵ Nōwo īñōmō Wængonguī ingantedō
ante watapæ botō apænedō ante ayæ Itota
Codito ingantedō ante mönō apænedō
ante nē pōnēmīni inte mīnitō tæi piñante
ongoncæmīnimpā. Wængonguī eyepæ inte
mānōmaī pōnō cæcæcāimpa. Tōmengā
māninō ante nōwo tæcæ nānō odōmōnō
ante wēēnēñedē pedæmāmo īñonte cōwē
wantæpiyæ wē wodonte baī cægacāimpa.

²⁶ Nōwo guiquēnē, Codito æbānō cægacāi,
ante inguipoga tōmāmæ quēwēnāni ēñente
wede pōnēnīnque botō īmote ēñente
cæcædānimpā, ante cædīnque Wængonguī
cōwē nē Quēwēnongā inte do odōmongā
acæimpa. Tōmengā angā ēñēnīnque tōmengā
beyæ nē apænegāināni wæætē edonque
pōni yewæmōnāni acæimpa.

²⁷ Īnīnque Wængonguī nō pōni ēñēnongā
inte adocanque Wængonguī ingampa,
ante adīnque mönō, Bitō adobique
ñāō baī ēmōmi inte edæ waa cæbi
amōnīpa, ante mönō Itota Codito ēmōwo
apænedīnque Wængonguī ingante edæ cōwē
apænecæimpa. Mānōmaī impa diyæ, ante
botō, Amēē, āmopa.

1 Coodintoidi inānite Pabodo cadota ante tānota nānō yewæmongainta

*Coodinto iñōmō Codito ingante nāni
pōnencabo*

¹ Wængonguī angā ēñēninque Itota Codito botō imote aa pedinque da godongā godōmo ante botō Pabodobo yewæmōmopa. Mōnō tōniñacā Totēnē tōnō guēa apænete ate yewæmōmo aedāni. ² Coodinto iñōmō mīnitō Codito ingante mīni godongāmæ pōnencabo iñōmīni inte ēñēedāni. Wængonguī, Botō quimīni badinque mīnitō Itota Codito nempo quēwēninque tæiyæ wæmō ēwocate quēwencæmīnimpā, ante cædinque āñecā pōnīmīni inte mīnitō acæmīnimpā, ante yewæmōmopa. Ayæ adobai, Mōnō Awēnē Itota Codito emōwo ante nē aa pedāni tōmāmæ quēwēnāni incæ acædānimpā, ante yewæmōmopa. Itota Codito iñōmō mōnō Awēnē ingā incæ tōmēnāni Awēnē adocā ingampa. ³ Mōnō Mæmpo Wængonguī tōnō mōnō Awēnē Itota Codito godongāmæ waadete pōnō cæda ate mīnitō gānē pōnente quēwencæmīnimpā, ante botō Totēnē tōnō āmōnāpa.

*Codito nānō entawēnō bai nangui
entawēmōmpa, ante*

⁴ Wængonguī waadete pōnō cæcā ate mīnitō Codito Itota nempo quēwēninque tōmengā nānō entawēnō bai nangui entawēmīnimpā, ante adinque botō mīnitō beyæ ante Wængonguī ingante waa ate pōnēninque cōwē apænebopa. ⁵ Edæ Codito nempo quēwēñōmīnite tōmengā nānō ate ēñengainō ante pōnō apæneccā ēñēninque mīnitō do entawēmīnimpā. Iñinque mānīnō nānō ate ēñengainō ante eyepæ entawēmīni iñinque mīnitō nō apænemīni bamīnimpā. ⁶ Edæ mōnitō, Itota iñōmō adocā mōnō Codito inongā ingampa, ante apænemōni ēñēninque mīnitō Ao āninque, Nāwangā impā, ante wede pōnēninque waa cæte quēwēmīni acæimpā.

⁷ Mānīnō beyæ, Mōnō Awēnē Itota Codito æyedēnō pōninque edonque pōni a ongonguingā, ante wānō cōninque mīnitō wæntæye badāmā incæmīnimpā, ante cædinque Wængonguī Ōnōwoca pōnō apæneccā ēñēninque mīnitō eyepæ inte waa cæquimīni imīnimpā. ⁸ Mīnitō cōwē iñinque baganca tæi ongonte oda cædāmā incæmīnimpā, ante Wængonguī pōnō cæcā ate mōnō Awēnē Itota Codito pōñedē māniñedē ate mīnitō wentamō ædō cæte entawenguimīni. Edæ dæ ampa. ⁹ Wængonguī, Botō Wengā Itota Codito iñōmō mīnitō Awēnē inongā

ingampa. Iñinque mīnitō tōmengā nempo quēwēninque tōmengā tōnō godongāmæ cæte quēwencæmīnimpā, ante mīnitō imīnite āñete aa pecantapa. Mānōmāi ante nē aa pecā iñōmō tōmengā nānō angainō bai edæ cōwē nē ædæmō cæcā ingampa cæmīnii.

*Wæætē godō wæætē godō cædāmāi iedāni,
ante*

¹⁰ Botō tōniñamīni, botō mōnō Awēnē Itota Codito emōwo apænedinque iīmāi ante āmo ēñēmaimīnimpā. Mōnō pōnencabo imōmpā, ante adodō pōnēninque mīnitō tōmāmīni godongāmæ Ao ante adodonque cædinque nāwæ godāmāi iedāni. ¹¹ Botō tōniñamīni apænebo ēñēedāni. Codoeidi mīnitō imīnitedō ante apænedinque, Coodintoidi nāni pōnencabo incæ wæætē godō wæætē godō tedewēnānimpā. ¹² Ante apænedāni ēñēninque botō, iīmāi impā, ante apænebo ēñēedāni. Pancamīniya, “Mōnitō Pabodo nānō nē emīñæmōni imōnimpā,” ante cæmīnimpā. Pancamīniya guiquēnē, “Apodo nānō nē emīñæmōni imōnimpā,” ante cæmīnimpā. Pancamīniya guiquēnē, “Pegodo nānō nē emīñæmōni imōnimpā,” ante cæmīnimpā. Ayæ wæætē pancamīniya guiquēnē, “Codito nānō nē emīñæmōni imōnimpā,” ante cæmīnimpā. Mānōmāinō ante mīnitō wadō wadō ante tedewēmīni awædō.

¹³ Iñæmpa Codito nāmā incæ ante dicæ wadō wadō ante apænecantawogaa. Incæte Codito nempo quēwēmīni inte mīnitō, Pabodo emīñæmōni imōnimpā, āmīni. Apodo emīñæmōni imōnimpā, āmīni. Pegodo emīñæmōni imōnimpā, āmīni. Ayæ botō Pabodobo iñōmote wadāni awæ ñænquedimæ gōnōninque mīnitō beyæ wænōnāni dicæ wæntawogaa. Ayæ botō Pabodobo emōwo apænedinque mīnitō dicæ æpænē guimīnitawogaa. ¹⁴ Botō mīnicabo weca quēwēninque Codipo tōnō Gayo inate mānīnaque inate æpænē guidōmo guidatapa, ante pōnēninque waa tobopa. ¹⁵ Mānōmāi i adinque mīnitō, Pabodo emōwo apænedinque æpænē guitamōnimpā, ante ædō cæte anguimīni, ante tobopa.

¹⁶ *Æ*, tæca pōnēmpa. Etepanāidi inānite adobai guidōmo guidānitapa. Wadāni inānite wabānō guidōmōi, ante wīi pōnēmpa. ¹⁷ Edæ Codito, Bitō æpænē guidōmi guicædānimpā, ante botō imote ānāmāi ingacāimpā. Wæætē, Tæi piñænongā inte Codito mōnō wædō ante teēmē mongænte ñænquedimæ wængæ beyænque mōnō quēwengæimpā, ante apænebi ēñæcædānimpā. Ayæ, Māline ante wadāni, Ōnonque impā, ante ānāmāi incædānimpā, ante wææ cædinque bitō waodāninque nāni nangui ēñente apænedō ante apænedāmāi incæbiimpā. Wæætē, Codito ingantedō ante

watapæ apænebi eñencædänimpa, äninque Codito botö imote da godongä gobo imopa.

Codito Wængongui nänö eñenö entawengampa

¹⁸ Itota ingante nāni timpogaiwæ ante apænemöni adinque nē wænguñāni guiquenē, Māniwæ ante apænete wædänitedö abi, ante badete todänipa. Codito ængä beyænque nē quewemöni guiquenē, Codito māniwā wængä beyænque Wængongui tæi piñænte pönö cæcampa, ante wede pönente apænemöni. ¹⁹ Edæ Wængongui, İmaï cæcæboimpa, angampa, ante yewæmonte ongompa.

“Nē adāni önonquedö ante eñenänipa, ante botö nangui nāni eñenö ante wido cæcæboimpa.

Nē nāmā mā pönente eñenāni guiquenē önonque eñenänipa, ante botö nāmā nāni eñenö ante Baa ancæboimpa,”

ante Wængongui cæcampa, ante yewæmonte

²⁰ Mänömaï cædinque Wængongui, Inguipogaque quewenāni nāni nangui eñenö incæ önonque impa, ante eñenguenē quewemini, ante do odömongampa. İninque adocanque ingante, Nangui eñemipa, ante Wængongui dicæ anguingāa. Dodāni nāni wææ angainö ante nē nō odömömi imipa, ante Wængongui dicæ anguingāa. Nāmā mā pönëninque nē nō apænebi imipa, ante Wængongui dicæ anguingāa. Edæ dæ ampa. ²¹ Edæ, Inguipogaque quewenāni ocaidē nangui eñenāni incæ önonque nāni eñenö beyænque botö imote ædö cæte ate bai pönenguñāni, ante Wængongui nē nō eñenöngä inte cæcampa. Codito nänö cægainö ante apænemöni adinque ināni inömö, Önonque tedewenänitedö abi, ante badete todänipa. İñæmpa Codito nänö cægainö ante badete nāni todö beyænque minitö wæætē nē wede pönemini inte quewencæminimpa, ante Wængongui nöngä pönëninque pönö cæcampa.

²² Oodeoidi, Öönædē nāni mā cæi bai bamönengæ cæmini ate eñëmaimöni, ante anewenänipa. Guidiegoidi guiquenē, Nāmā mā pönëninque eñëmaimöni, ante cædänipa. ²³ Mönitö guiquenē, Codito ingante awænemæ timpote wænönāni wængacäimpa, ante mäninonque ante apænemöni eñemini. Mänömaïnö ante apænemöni eñëninque oodeoidi guiquenē Baa ante tee tēwate bai oda cædänipa. Guidiegoidi guiquenē mänine ante eñëninque badete todänipa. ²⁴ Mönitö oodeomöni inömönite minitö guidiegomini inömönite ædänimē inānite Wængongui apænte ængä ingaimö inte mönö inömö edæ İmaï ante pönëmompā. Wængongui nänö nō eñenö incæ Codito encacampa, Wængongui nänö

tæi piñænö incæ Codito entawengampa, ante do edæ eñente pönëmompā.

²⁵ Wængongui önonque ante cæcampa, ante pöneweminitawoo. Mönö waocabo nangui eñemö imompa, ante pönëminitawoo. İñæmpa, Nangui eñemö, ante tedewemö incæ önonque wædämö inte cæmompā. Wæætē Wængongui guiquenē önonque cæte bai cæcä incæ godömenque gomonga nangui eñengä inte cæcampa. Ayæ, Wængongui aquingä inte cæcampa, ante pönëminitawoo. İñæmpa mönö waocabo tæi piñæmö imompa, ante tedewemö incæ mönö önonque aquimö inte cæmompā. Wæætē Wængongui guiquenē nē önonque cæte bai cæcä incæ godömenque gomonga tæi piñængongä inte cæcampa.

²⁶ İñänāni, æbänö inöminite Wængongui aa pecantapa, ante pönëdäni. Tömämini dicæ nangui eñemini ingaminiyaa. Inguipogaque quewenāni nangui nāni encadö bai minitö tömämini dicæ adobai nangui encamini ingaminiyaa. Tömämini dicæ nangui tæi piñæmini ingaminiyaa. Awenëidi pæingä nänö awenē baquinque eñacä bai minitö tömämini dicæ adobai awenē baquinque eñaminiyaa. Mänömaï inöminite Wængongui dicæ aa pecantawogaa. Incæte adocanque adocanque mänömaï inöminite Wængongui aa pegacäimpa.

²⁷ Wæætē, Nē nangui eñenāni incæ guifente wæcædänimpa, ante cædinque Wængongui İmaï cægacäimpa. Inguipoga quewenāni inānite cöwä adinque nē önonque cæi bai cædāni inānite apænte ængacäimpa. Ayæ, Nē tæi piñænāni incæ guifente wæcædänimpa, ante cædinque Wængongui inguipoga nē wæntæte cædāni inānite apænte ængacäimpa. İninque tömengä mänömaï cæcä ate waa cædänipa, ante adinque nē tæi piñænāni wæætē guifente wædänipa.

²⁸ Wængongui inguipoga quewenāni nāni waa pöni mäincoo ewente bai bacäimpa, ante cædinque, Inguipoga pancacooque wiwa incoo impa, ante adinque mänincooque æninque waa cægacäimpa. Ayæ, Önoncooque impa, ante mönö änoncoo adinque tömengä ingante do æninque nō cægacäimpa. Ayæ, Dæ ampa, mönö änoncoo incæ do adinque Wængongui mänincoo æninque nangui cægacäimpa. ²⁹ İninque Wængongui weca ongöninque waocä adocanque incæ, Waemö imopa, ante ædö cæte anguingāa.

³⁰ Wængongui pönö ængä beyænque minitö Codito Itota nempo queweminipa. Wængongui Codito Itota ingante da pönongä æninque mönö Codito nänö eñenö bai ænte entawëmompā. Tömengä nempo quewëninque mönö tömengä nänö nō cæte quewenö bai adobai ænte entawëmompā. Ayæ tömengä tæiyæ waemö nänö ewocadö

adobai pönongä æninque tæiyæ waëmō ēwocate quēwēmōmpa. Ayæ Codito ængä beyænque mōnō abæ tawænte gote bai quēwēmōmpa. ³¹ Ìninque Wængonguī beyæ nāni yewæmongainō bai iūmai ante bacæimpa. “Waocā, botō nanguī waëmō pōni imopa, ante nāmā waa ate apæneinente wædongä iñōmō tōmengä wæætē, Mōnō Awënē adocanque waëmō pōni ingampa, ante apænecā Ìninque waa cæbaingampa.”

2

Itota Codito ingante awāa timpodāni wængacāimpa, ante

¹ Ìñānāni botō mōnitō weca apænecæte ante mā pōninque nē nanguī ēñēnāni nāni waa ēñēnō bai ēñēnāmai imo inte bai pontabopa. Waodāni nāni waa tede bai tededāmai imo incæ pontabopa. Wæætē, Wængonguī nāwangä waa pōni cægacāimpa, ante mānīnonque ante apænecæte ante pontabopa. ² Itota Codito ingante do adīmo inte botō, Tōmenganque nānō cægainonque ante ēñente bai cædinque botō coodintoidi weca gote apænebote, ante godāmai iñedē do ānōmoimpa. Ìninque, Wadō nāni nanguī ēñēnō ante ēñēnāmai inte bai cædinque botō, Itota Codito ingante awāa timpodāni wængacāimpa, ante mānīnonque ante ēñente bai gote apænebote, ante pōnēninque mōnitō weca pontabopa. ³ Ayæ botō aquīmo pōni iñōmo inte mōnitō weca pōninque, Ædō cæte apænequīmo, ante guīñēnete wædinque nanguī do do wāate pōmo amīnitapa. ⁴ Pōninque botō, Mānōmai impa, ante dicæ tōmēmo nanguī ēñēnō ante tedetabogaa. Wængonguī beyæ apænebo ēñēdāni, ante ānimo incæ botō dicæ waa pōni tedete bai apænetabogaa. Wæætē Wængonguī Ònōwoca tōnō āawocaque bai ēwocadinque botō tōmengä nānō tæi piñænō beyænque apænebo amīnitapa. ⁵ Mānōmai cædinque botō, Waomō mōnō nanguī ēñēnō beyænque ante wīi pōnencæmīnimpa. Wæætē Wængonguī nānō tæi piñænō beyænque wede pōnēmīni bacæmīnimpa, ante cæcæte ante mānōmai ponte apænetabopa.

Wængonguī æbānō ēmongāa, ante tōmengä Ònōwoca odōmongä ēñēmōmpa, ante

⁶ Wæætē ædæmō pōnēnāni æmæwo pæte bai iñōnānite mōnitō tōmēnāni weca ongōninque mōni nanguī ēñēnō ante apænemōnipa. Incæte ñōwodāni nāmā nāni ēñēnō ante apænedāmai imōnipa. Ayæ imæca awēnēidi nāni dæ goquincabo tōmēnāni nāni ēñēnō ante apænedāmai imōnipa.

⁷ Wæætē Wængonguī awēmō iñonte nānō ēñengainō ante apænemōnipa. Tōmengä iñōmō, Botō nanguī ēñēnōmo inte pōnō

cæbo beyænque botō nē apænte ænānique ñāō apāite bai entawencædānimpa, ante inguipoga dæ āñedē wēñēñedē pōni incæ mōnō imonte ante pōnō cægacāimpa. Incæte, Mānōmai cæcæboimpa, ante tōmengä nānō ēñēnō ante wadāni ēñēnāmai incædānimpa, ante wææ cædinque wē wodonte bai cædinque tōmengä nānō ēñengainō ante ñōwo ganca awēmō iñōmō entawēnongāimpa. Ñōwo iñōmō tōmengä awēmō nānō ēñengainō ante tæcæ apænecā ēñēnimōni inte mōnitō wæætē mānīnō ante ñōwo apænemōnipa. ⁸ Inguipoga awēnēidi guīquēnē Wængonguī nānō wē wodonte ēñengainō ante dicæ ēñēnāniyaa. Edæ mānīnō ante ēñente bai tōmēnāni mōnō Awënē ñāō bai entawēnongä iñongante awāa timpote wæñōnāmai incædōnānimpa. ⁹ Wæætē iūmai ante yewæmongatimpa.

“Botō imote nē waadete pōnēnāni iñōmō watapæ quēwencædānimpa, ante Wængonguī do pōnō badongacāimpa.

Mānīnō nānō pōnō cægainō ante waocā dicæ acāa.

Mānīnō ante dicæ ēñengāa.

Edæ waocā nāmanque mā pōnēninque dicæ ēñengāa,”

ante nāni yewæmongai bai iñque bacæimpa, ante mōnitō apænemōnipa.

¹⁰ Wængonguī Ònōwoca guīquēnē tōmāa cōwā adinque Wængonguī awēmō nānō pōnō badongainō ante edonque adinque do ēñengampa. Ìninque mōnonga pō guīdinque tōmengä mōnō imonte edonque odōmongä ēñēmōmpa.

¹¹ Edæ mōnō waocabo incæ, Adocanque ònōwēnque pōnēē cōñongante wacā, Æbānō ante pōnēē congāa, ante ædō cæte ēñenguingāa. Edæ nē pōnēē congä guīquēnē, Botō æbānō ante pōnēē cōmo, ante tōmengä adocanque ònōwēnque pōnente ēñengampa. Wængonguī adobai ingampa. Wængonguī æbānō ante awēmō pōnēē congāa, ante waocā ædō cæte ēñenguingāa. Wængonguī æbānō ante pōnēē congāa, ante tōmengä Ònōwoca adocanque ēñēñongä wadāni ēñēnāmai inānipa. ¹² Wængonguī iñōmō, Botō æbānō pōnōmo æmīni, ante edonque acæmīnimpa, ante cædinque tōmengä Ònōwoca ingante da pōnongä ænte ēwocate amōmpa. Ìninque inguipogaque quēwēnāni nāni pōnēnō bai entawēnāmai iñōmō inte mōnō Wængonguī tōmengä Ònōwoca tōnō āawocaque bai ēwocamō inte do ēñēmōmpa.

¹³ Mōnitō iñōmō, Wængonguī mānōmai pōnō cæcampa, ante odōmoncæte ante mā pōnente mōni ēñēnō ante apænedāmai imōnipa. Wæætē Wængonguī Ònōwoca pōnō odōmōnte apænecā ēñente ēwocadinque

tömengä nänö odömönö möni eññē ante apænemōnipa. Edæ Wængongui Ōnōwoca nänö pönēnō ante eñencæte ante Wængongui Ōnōwocaque nänö apæne ante apænete eñente ewocacæimpa, ante pönēninque mōnitō māñineque ante apænemōnipa.

¹⁴ Edæ, Wængongui Ōnōwoca nänö pönēnō æbänō ī, ante tömengä Ōnōwoca tönō äawocaque bai nē ewocadānique pönente eññänānipa. Īninque nē ōmæwocacā bai ingā guiquēnē tömengä ædō cæte edonque eññingūngā. Edæ oda cæcampa. Māñinō ante apænemōni eññēninque tömengä, Ōnonquedō ante apænete wæcantedō abi, ante badete todinque edæ, Baa angampa. ¹⁵ Wængongui Ōnōwoca tönō äawocaque bai nē ewocacā guiquēnē, Tömää æbänō ī, ante cōwā adinque edonque pōni eññingampa. Wæætē edæ, Tömengä æbänō ewocacā, ante wadāni cōwā adāni incæte ædō cæte apænte anguināni. ¹⁶ Ayæ, “Wængongui Awēnē æbänō nangui eññente pönengā, ante æcänō eññingūngā. Edæ Wængongui ingante godōmenque odömōnānipa diyæ eññente baqingā,” ante yewæmōngatimpa. Mōnō guiquēnē Codito eññente nänö pönēnō ante entawēmōmpa.

3

Wængongui ingante nē cæmō mōnō godongāmæ cæcabo

¹ Īññāni eññēdāni. Codito Ōnōwoca tönō nē ædæmō ewocadāni Īññante botō Wængongui Ōnōwoca nänö apænedō ante do apænebopa. Mīnitō guiquēnē mempoga eññamīni inte Codito nempo quēwēmīni incæ tæcæ eññadāni bai pædāmai Īññmīni inte mīnitō inguipogaque ante pönēmīni awædō. Māñōmai beyæ botō adobainō ante ædō cæte mīnitō Īññite apænequimoo. ² Edæ tæcæ eññadāni Īññōmō tæēmō mōnō cængui capo capo cænāmai Īññāni. Mīnitō Īññōmō tōmēnāni bai adobai Īññi inte Wængongui Ōnōwoca nänö apænedō ante ædō cæte eññingūmīni. Īninque tæcæ eññadingā ingante goōmæ di godōnete bai cædinque botō mīnitō Īññite apænedinque adodeque adodeque apænebo eññēmīnitapa. Īññampa ñōwo ganca tæcæ eññadāni bai Īññmīni inte mīnitō æiquedō eññingūmīni. ³ Edæ cōwē inguipogaque ante pönēmīni inte pancamīniya, Wacā gomonga cæcampa, ante piinte wæmīnipa. Pancamīniya guiquēnē wæætē godō wæætē godō piinte añewēmīnipa. Māñōmai cæte quēwēninque mīnitō ōmæwocadāni bai Īññi inte inguipogaque ante pönente quēwēmīni abopa. ⁴ Edæ Īññāni ante tedewēmīnipa. Adocanque, “Botō Pabodo nänö nē emīññæmo Īmopa,” ante cæcampa. Wacā, “Botō guiquēnē Apodo

nänö nē emīññæmo Īmopa,” ante cæcampa. Māñōmainō ante mīnitō ōmæwocamīni inte bai cæmīni awædō.

⁵ Īññampa, Apodo æcänō ingā, ante pönēmīni. Pabodo æcänō ingā, ante pönēmīni. Edæ botō mōnō Awēnē nänö pönō anganca tömengä ingante nē cæbo bagaboimpa. Apodo adobai mōnō Awēnē nänö pönō anganca Awēnē ingante nē cæcā bagacāimpa. Īninque tömengä beyæ nē cæmōnaque Īmōna inte mōnatō mīnitō Īññite apænemōna eññente pönēmīnitapa. ⁶ Tömēmō minte bai cædinque botō mā apænebo ate mīnitō tæcæ eññēmīnitapa. Apodo guiquēnē, Cōñe bate pæcæimpa, ante æpæ gao caadāni bai cædinque mīnitō Īññite godōmenque nangui odōmōnte apæneca eññēmīnitapa. Incæte mōnatō apænemōna beyænque ædō cæte tā bocate bai pæwocauimīni. Wængongui adocanque nē apæneca beyænque mīnitō tā bocate bai pæwocate ewocamīnipa. ⁷ Īninque minte bai nē apænebo inte botō tönō Apodo æpæ gao cæte bai nē odōmōnte apæneca tönō mōnatō Īññōmō ōnōmōnaque Īmōnāni. Wængongui tömengānque, Pæe, ante nē añongā ingampa. Tömengä adocanque angā beyænque pæmīnitapa.

⁸ Botō nē apænebo tönō Apodo nē odōmōnte apæneca tönō mōnatō, Pæcæimpa, ante āanque bai Wængongui beyænque cæmōnāni. Īninque botō nē apænebo Īññōmōte tömengä nē odōmōnte apæneca Īññingante Wængongui Īññōmō, Mīnatō apænegainō beyæ æeda, ante eyepæ pōni pōnongā æncæmōnāimpa. ⁹ Mōnatō Īññōmō Wængongui tönō godongāmæ cæmōni inte mōni nē cæcabo Īmōnāni. Mīnitō guiquēnē Wængongui quimīni Īññmīni inte tömengä gōnea bai pæwocamīni Īññi.

Ayæ adobai tömengä nänö mæññōncō bai Īññi. ¹⁰ Nē eññente mæññongā Īññōmō, Wæññōmēnæca Īññō mæññongæimpa, ante cædinque dicacoo cō cō cæcampa. Botō Īññōmō Wængongui waadete pōnō cæcā ate nē eññente mæññongā bai adobai bagaimo inte botō mīnitō weca mā ponte apænebo eññēmīnitapa. Ñōwo guiquēnē botō māñōmai cō cæte bai mā apænebo eññēmīni ate wadāni ponte botō cō cædinca wæññōmēnæca mæññonte bai cædinque godōmenque odōmōnte apænedāni eññēmīnipa. Īninque edæ æcänō māññinca mæññonte bai odōmōna tömengä tōingā mæññonte bai nō eññente odōmōnte apænequēngā ingampa. ¹¹ Waodāni, Dica adocaa wæññōmēnæca Īññō mæññongæimpa, ante tāno nāni cō cædinca bai Ītota Codito adocanque Tānocā ingampa. Īninque, Wacā tānocā ingampa, ante bai cædinque mīnitō ædō cæte wacā

mīñæ gomīni. Īñæmpa, Dica wacaa wænōmēnæca ĩnō mænonte bai babaiŋpa.

¹² Ayæ tånoca nāni gō cædinca bai Itota Codito Tånocā ĩñongante mōnitō, Māninca adocaa wænōmēnæca mænongæiŋpa, ante bai cædinque odōmonte apænemōnīpa. Nē mænōnāni ĩñōmō oodo æninque padata æninque dica nāni waa pōni adinca æninque, Quincamē ēwēnāmai ĩnguīnca, ante æninque tōmēnāni nāni mænōnō bai cædinque pancamōniya nō pōni odōmonte apænemōni ate mōnitō apænedō wido cædāmai ĩngæiŋpa. Wadāni guiquēnē awæ æninque gaguimæ amīmō ĩ æninque ayawāa amiwæ æninque quincōomē ēwenguīncoo æninque godō mænōnāni bai cædinque tōmēnāni ōnonque odōmonte bai apænedāniya. ¹³ Edæ Wængongui nānō apænte anguiōnæ ĩnque ba ate gonga nāni angā nanguī bæcocæiŋpa. Māniñedē ate edæ, Mōnitō æbānō ñōwo odōmonte apænemōni, ante ñāō gongæ edonque acæiŋpa. Wængongui māniñedē mōnitō apænedō apænte ancæte ante cædinque nē tante bai cæcā ate pancadea æmæwo montæ gōne ate pancadea ongō æncæcæiŋpa.

¹⁴ Īninque, Æcānō mænongaincō montæ gōnāmai ĩ, ante adinque Wængongui eyepæ pōnongā æninque nē mænongaingā wæætē watapæ quēwēncæcæiŋpa. ¹⁵ Wacā guiquēnē tōmengā nānō mænongaincō do montæ gō adinque Wængongui mānincō nē mænongaingā ĩngante pōnōnāmai ĩncæcæiŋpa. Incæte māningā waocā gonga bæcōyōmō wodii tao winongā bai ōmæpocā wæyongante Wængongui ængā beyænque tōmenganque quēwēncæcæiŋpa.

¹⁶ Mīnitō ĩñōmō, Wængongui Ōnōwoca ĩngante do æninque tōmengā ĩngante ēwocamōmpa, ante ēñēnāmai ĩmīnitawo. Wængongui tæiyæ waēmō oncō bai mōnō baō ēñamōmpa, ante ēñēnāmai ĩnte bai cæmīni awædō. ¹⁷ Wængongui oncō tæiyæ waēmō oncō ĩ ĩñonte waocā bæ tate wido cæcā adinque Wængongui nāemæ tōmengā ĩngante edæ ōmæ ēwēncæcæiŋpa. Ayæ adobai Wængongui tæiyæ waēmō oncō bai baō ēñayōmīnīte waocā wapiticæ odōmonte apænecā beyæ mīni godongāmæ apænedincabo incæ oda cæte nāwæ gomīni adinque nē wapiticæ apænecā ĩngante Wængongui adobai wido cæcæcæiŋpa.

¹⁸ Mīnitō, Nōwodāni nāni ēñēnō ante do nanguī ēñēmōniya, ante pōnēmīnitawo. Īñæmpa mānōmaiñō ante mīnitō nāmā babæ pōnēwēninque apænemīni awædō. Nē nō ēñēmīni bacæte ante mīnitō ñōwodāni nāni nanguī ēñēwēnō ante wido cædinque ōmæcamīni badinque nē ēñēmīni bacæmīniŋpa. ¹⁹ ĩnguipogaque quēwēnāni

nanguī ēñēnāni incæte Wængongui, Ōnonquedō ante ēñēmīni awædō, angampa. Edæ Wængongui beyæ apænedinque ĩmai ante yewæmongadāniŋpa. “Ōmē nāmā nānō ñōnōmē incæ waocā nāemæ wīni wīni dawacā bai nē nanguī ēñēnāni adobai nāmā nāni ēñēnō beyænque nāemæ oda cædāniya, ante cæbopa,” Wængongui angampa. ²⁰ Ayæ adobai, “Nē ēñēnāni ĩñōmō tōmēnāni nāni nanguī ēñente pōnēnō incæ idiquibæ ĩmpa, ante edæ mōnō Awēnē do ēñengampa,” ante yewæmonte ongōmpa.

²¹ Īninque, Botō waocā adocanque nānō nē ēmīñæmo ĩnte tobopa, ante ānāmai ĩncæmīniŋpa. Īñæmpa mōnitō waomīni ĩnte tōmāmōni mīnitō beyæ ante cæte quēwēmōniya. ²² Botō Pabodobo ĩñōmo incæ Apodo ĩngā incæ Pegodo ĩngā incæ mīnitō beyæ ante cæte tōmāmōni quēwēmōniya. ĩnguipo incæ ĩnguipoga ongoncoo incæ mīnitō beyæ ongōmpa. Mōnō quēwēmāmo incæ mōnō wænguimāmo incæ mīnitō beyæ ongōmpa. Nōwopāmo incæ mīmāmo ĩncayæ pōnguimāmo incæ quincōomē incæ edæ mīnitō beyæ tōmancoo ongōmpa. ²³ Ayæ mīnitō wæætē Codito beyænque quēwēmīni ĩmīniŋpa. Codito wæætē Wængongui beyænque quēwēngā ĩngampa, ante āmo ēñēmaimīniŋpa.

4

Itota nānō nē da godongāmōni ĩnte ĩmai cæmōniya

¹ Īninque mōnatō Pabodobo tōnō Apodo ĩñōmōnate mīnitō ĩmai ante ēñēnguēnēmīni ĩmīniŋpa. Codito tōnō godongāmæ cædinque tōmengā beyæ ante Pabodo tōnō Apodo nē cæda ĩnāpa. Ayæ godōmenque, Wængongui tōmengā nānō awēmō ēñēngainō ante pōnō apænecā ēñēna ĩnte tōmēna mānīnō ante nē apæneda ĩnāpa, ante ēñēnguēnēmīni ĩmīniŋpa. ² Īninque Awēnē Wængongui ĩmai angampa. Botō waocā ĩngante quēmē pōnō cæbo æninque tōmengā botō pōnōnonque entawēninque nō pōnente ædæmō aaquēnēngā ĩngampa, ante Wængongui cōwā adinque, Æbānō botō beyæ wææ aabii, ante apænte angampa.

³ Īninque mīnitō, Pabodo æbānō cæcāā, ante apænte ancæte ante cōwā amīni incæte botō wædāmai ĩmaiŋpa. Nē apænte nāni ānoncabo incæ botō ĩmote adobai cōwā adinque apænte ānāni ēñēninque botō wædāmai ĩmaiŋpa. Tōmēmo incæ, Æbānō botō cōwē wede pōnente cæbo ĩmo, ante ædō cæte nāmā anguimoo. ⁴ Botō, Tōmēmo wēnæ wēnæ cædāmai ĩñōmo ĩmōpa, ante pōnēmōpa. Incæte, Wentamō mongænāmai ĩmōpa, ante ædō cæte botō nāmā anguimoo.

Mönö Awënë adocanque botö imote në apænte angä ingampa.

⁵ Mäninö beyæ minitö, Ìnque bayedé tömää apænte angæimpa, ante mönö Awënë ponganca ee adinque apænte änämaï iedäni. Tömengä ìñömö waomö mönö awëmö cægainö ante, Edonque pönï acæimpa, ante nãö ìñömö mäo odömoncæcäimpa. Ayæ, Æbänö cæcæboimpa, ante mönö önöwënenque pönengainö incæ edonque odömongä gongæ nãwæ acæimpa. Ayæ, Adocanque æbänö waa cægacäi, ante, Wacä æbänö waa cægacäi, ante watapæ apænedinque tömäö mönö cægainö ante Wængongui pönö apæncä ëñente mönö tocæimpa.

⁶ Ìñänäni ëñeedäni. Waocä adocanque ingante, Waingä ingampa, äninque wacä ingante wüi püncæminimpa, ante yewæmongatimpa. Ìnque botö minitö beyæ ante, Mönatö æbänö cæmöna, ante yewæmontabopa. Minitö, Apodo tönö Pabodo æbänö cæda ìnaa, ante pönëninque Wængongui beyæ nani yewæmongainonque ante mäninonque ëñente cædinque godömenque cædämaï incæminimpa, ante cætabopa. ⁷ Ìñæmpa tömäö önömonque ìñömonte Wængongui, Bitö gomonga waëmömi pönï imipa, ante dicæ apænte angantawogaa. Bitö entawënö ìñömö tömëmi ocaidë mä bitö pönëno beyænque dicæ entawëmitawogaa. Mönö Codito adocanque edæ pönö apæncä ëñente në ænte entawëmi ìnömi inte bitö, Tömëmoque nämä beyænque entawëmopa, ante ædö cæte änewëmi.

⁸ Minitö, Eyepæ pönï do entawëmönipa, ante bai cæmini awædö. Minitö waa quëwënginque ante do eyepæ ænte bai cæmini awædö. Edæ Pabodoidi mönitö beyæ cædämaï ìñönänite tömëmöni nämä beyænque awënë odeyemöni bamönipa, ante cæte bai cæmini awædö. Ìñæmpa minitö näwangä awënë odeyemöni bamöni bai mönitö adobai awënë odeyemöni badinque nanguï tocædömönimpa. ⁹ Wæætë Itota nänö në da godongaincabo ìñömonite Wængongui incæ, Yæmiñæ pönï gote nani wænginque godänitedö aminï, ante badete tote bai odömongä awædö. Mänömaï cæcä adinque waodäni incæ anquedoidi incæ Wængongui nänö në badongainäni tömänäni mönitö imönite adinque badete todänipa, ante awædö.

¹⁰ Edæ minitö adobai cædinque ìmaï püimöni wæmönipa. Mönitö Codito beyæ cæyömönite minitö, Ocai ömæcamini inte cæminipa, ante pönëminitawoo. Wæætë nämænque ante pönëninque, Codito nempo quëwëninque mönitö ocai encamöni inte nanguï ëñëmönipa, ante tedewëmini awædö.

Ayæ, Pabodoidi aquüi pönï ìñönänite mönitö wæætë tæëmö püñæmöni imönipa, ante pönëmini awædö. Wadäni adobai minitö imönite ante apænedinque, Waïmini pönï imönipa, äninque mönitö imönite ante wæætë, Önöminique ìminipa, ante püinänipa.

¹¹ Ayæ mönitö ñowo ganca cængui cænämaï inte gue ænente awædö. Tepæ bedämaï inte gæwænte awædö. Weocoo wää tëincoo mongænte awædö. Ayæ tæi tæi pänäni caate wæmönipa. Ayæ oncö ömaamöni inte ¹² mönitö önompoca nanguï cædinque ænte quëwëmönipa. Wënæ wënæ imönipa, ante püinäni wædinque mönitö wæætë, Minitö imönite Wængongui pönö waadete cæcæcäimpa, ante cæmönipa. Ayæ togænte pänäni ate wædinque mönitö wæætë püinämaï piyænë cæmönipa. ¹³ Mönitö imönite ante apænedinque, Wiwa cædänipa töö, ante babæ änäni ëñente wædinque mönitö wæætë waadete apænëmönipa. Edæ, Èwëmöimæ gadonguimæ bai imönipa. Ömæpocoo wido cæquincoo bai imönipa töö, ante püinique inguipogaque quëwënanï ìñömö mönitö imönite ñowo ganca cöwë wido cædäni wædömöni imönipa.

¹⁴ Mönitö beyæ cædinque Pabodoidi wæwente quëwënanipa, ante adinque minitö wæætë guingo imonte wæcæminimpa, ante botö dicæ mänömainö ante yewæmömogaa. Wæætë botö wëmini bai ìñöminite botö, Mänömaï cædinque mini wæquinque impa, ante wææ yewæmömopa. ¹⁵ Minitö imönite në aadäni ìñömö diete müdo ganca mänimpodäni ìñönänite mönitö minitö mämpoidi bai imöni guiquëñë mëmönipa pönï imönipa. Edæ, Itota Codito nempo quëwëninque botö, Itota Codito pönö cæcä beyænque mönö watapæ quëwængæimpa, ante apænebo ëñëminitapa. Mänömainö ante apænebo ëñëninque minitö mēmpoga ëñamini ate botö minitö mämpo bai bagaboimpa. ¹⁶ Mänömaï beyæ botö minitö imönite waadete apænedinque, Botö mämpobo cædö bai minitö adobai cæcæminimpa, ante nanguï ämpa.

¹⁷ Botö tömämaë godinque wayömö Codito ingante nani godongämæ pönencabo weca wayömö nani pönencabo weca go guidinque ìmaï ante apænebopa. Mönö Itota nempo quëwëninque nö ëñëninque waa cæte quëwængæimpa, ante odömonte apænebopa. Mänömainö ante botö odömonte apænedö bai botö tömëmo adodö ëñente quëwëmo abaimpa. Ìnque minitö, Pabodo mänömaï quëwëngampa, ante ëñencæminimpa, ante botö në waadecä Timoteo ingante da godömo minitö weca ponte apæncæcäimpa. Tömengä ìñömö botö wengä bai ìnongä inte Codito nempo quëwëninque cöwë nö pönente cæcä ingampa. Tömengä minitö

weca ponte apænedinque, Pabodo nânō odōmonte apænedō bai tōmengā nāmā adodōnque ante cōwē ēñente quēwengampa, ante apænecā ēñēninque adodō ante pōnencæmīnīmpa.

¹⁸ Pancamīniya, Pabodo wīi pongā awædō, ante, Tōmēmōnique wæætē nē ämōni incæmōnīmpa, ante botō imote piinte tedewēmīnīpa. ¹⁹ Incæte mōnō Awēnē Ao angā ate botō oo poncæboīmpa. Ponte adinque botō, Tōmēmōnique nē ämōni incæmōnīmpa, ante nē tedewēmīni æbānō tedewēmīni, ante änāmāi incæboīmpa. Wæætē adōmīni mīni tæi piñænō ante cōwā adinque apænte ancæboīmpa. ²⁰ Wængonguī Awēnē Odeye nempo nē quēwēmō iñōmō wīi ōnonque mōnō tedequīnō beyænque quēwēmōmpa. Wæætē edæ tæi piñænte mōnō quēwenguīnō ante mōnō tōmengā nempo quēwēmōmpa. ²¹ Mīnitō æbānō cæmīni ate mīnitō weca ponguīmo. Edæ mīni cædinō adinque botō panguēnēmo inguīmo, ämīnitawo. Wæætē waadete pōnēninque ædæmō cæquēnēmo inguīmo, ämīnitawo.

5

Nē wīwa towengā ingante apænte angæīmpa, ante

¹ Edæ, Nē wīwa towengā incæ coodintoidi nāni pōnencabo tōnō godongāmæ ongongampa, ante tededāni ēñentamōnīpa. Mīnitō weca ongongā adocanque tōmengā wæmpo nānōogængā incæ manguīwengampa tōō. Iñæmpa Wængonguī ingante nē ēñēnāmāi ināni incæ mānōmāi wēnæ wēnæ cædāmāi iñōnāni mīnitō weca ongonganque do cæcā apa cæmīni. ² Nē wīwa towengā tōnō godongāmæ ongōmīni incæte mīnitō, Tōmēmōnique waa cæmōni imōnīpa, ante tedewēmīni awædō. Incæte Ca ca wæmīni bai waa incædōnīmpa. Nē wīwa cæcā ingante, Mōnitō weca ongōnāmāi gobāwe, ante da godōmīni gocā bai waa incædōnīmpa. ³ Botō quiquēnē nānēnē quēwēmō incæte mīnitō weca owote bai ōnōwēnenque pōnēmo imōpa. Iñinque mīnitō weca owote bai botō nē wīwa cæcā ingante do apænte ämōpa. ⁴ Mīnitō Awēnē Itota ēmōwo apænedinque godongāmæ pōñōmīni botō nānēnē quēwēmō incæte adoyōmō owote bai pōnencæboīmpa. Ayæ Awēnē Itota tæi piñænongā inte mīnitō tōnō adoyōmō ongoncæcāīmpa. Iñinque mīnitō iīmāi cæedāni. ⁵ Awēnē nānō ponguīōnæ iñedē nē wīwa cædongā tōmengā ōnōwoca quēwencæcāīmpa, ante iīmāi cæedāni. Tōmengā nānō wīwa ēñayō ēwente bacæīmpa, ante cædinque mīnitō tōmengā ingante Tatāna nempo pædæ godōmīni æncæcāīmpa.

⁶ Mīnitō, Waa imōni imōnīpa, ante tededinque wīwa tedewēmīnīpa tōō. Edæ

dodāni nāni yewæmongainō ante adāmāi inte bai tedewēmīnīpa. “Pāō tōmāo yedæ æmpoquinque wædænque da wēnāni” bai mīnitō adobaī adocanque wīwa cæcā ingante mīni oda cæquinque ee amīni ongongampa. ⁷ Mīni pōnencabo waēmō pōni mīni entawenguinque pāō yedæ æmpoquī wido cæte bai cædinque nē wīwa cædongā ingante da tadōmīni gocæcāīmpa. Edæ mōnō Codito iñōmō wīwa mōnō cædinō ante ñā mēnongacæte ante nāmā wepæ godongacāīmpa. Edæ dodāni, Nē wænonguēnengā wænōnāmāi inte wodo pænta gocæcāīmpa, ante, Patowa, ante codotedo nāni nē wænongaingā bai mōnō Codito iñōmō adobaī inongā inte wængacāīmpa. ⁸ Iñinque mōnō pāō yedæ æmpoquī ōmæmō i cæte bai cædinque wīwa mōnō cædō ante wido cædinque mōnō piinte cædāmāi inte waa cæte quēwengæīmpa. Ayæ ææmæ watapæ bete bai cædinque, Quīnō nāwangā pōni i, ante Ao ante æninque mōnō nō pōnente quēwengæīmpa.

⁹ Nē wīwa towēnāni tōnō godongāmæ cædāmāi iedāni, ante botō cadota ante do yewæmōmo amīnitawo. ¹⁰ Mānōmāinō ante yewæmōninque botō, Inguipogaque quēwēnāni tōnō godongāmæ cædāmāi iedāni, ante dicæ antabogaa. Iñæmpa wīwa towēnānique, wacā qui nē æinente wædānique, wacā qui nē ō ænānique inguipoga quēwēnānīpa. Ayæ, Wængonguī impa, ante badōninque nē ædæ wæænte quēwēnānique mānīmpodānique inguipoga quēwēnānīpa. Iñinque ædō cæte tōmēnāni weca cædāmāi inguīi. Edæ inguīpo emō cæte gote bai tōmēnāni weca ongōnāmāi inguīi.

¹¹ Wæætē mānīnō ante yewæmōninque botō, Mīni pōnencabo incæ adocanque wīwa cæcā adinque mīnitō tōmengā tōnō godongāmæ cædāmāi iedāni, ante wææ ämōpa. Edæ, Nē pōnengā incæ wīwa towengantawo. Nē pōnengā incæ wacā qui æinente wæcantawo. Wængonguī impa, ante badonte nē pōnengā ædæ wæængantawo. Wacā ingante, Wēnæ wēnæ imīpa, ante angantawo. Tī nāmæ bete nē pōnengā incæ quidi quidi dowængantawo. Wacā qui æncæte ante babæ cædinque ō ængantawo. Iñinque tōmengā, Nē pōnēmo imōpa, ängongā incæ mānōmāi wīwa cæcā adinque mīnitō tōmengā tōnō godongāmæ cædāmāi inte godōmenque tōmengā tōnō godongāmæ contate cænāmāi iedāni, ante botō wææ ancæte ante ämōpa.

¹² Mīnitō Codito nempo mīni quēwencabo incæ nāēmæ apænte änāmāi imīni inte oda cæmīnīpa. Wadāni inānite Codito nempo quēwēnāmāi iñōnānite botō, Tōmēnāni æbānō wēnæ wēnæ cædāni, ante ædō cæte apænte anguīmo. ¹³ Wængonguinque

tömēnāni inānite apænte ancæcāimpa. Incæte mīni cabo incæ adocanque wīwa cæcā adinque mīnitō tömēmīni, Mōnitō weca ongōnāmaī gobāwe, ante da tadōmīni tao gocæcāimpa.

6

Nē pōnēnāmaī ingā apænte ancæcāimpa, ante ānāmaī lē

¹ Mīni pōnencabo iñōmīnite adocanque bitō imite wēnæ wēnæ cæcantawo. Inique bitō, Tōmengā ingante apænte ancæcānīmpa, ante cædinque ēñēnāmaī ināni weca ædō cæte ænte gobii. Wæætē Wængonguī quīnāni inānite angā ēñēnīnque tömēnāni wæætē, Tōmengā æbānō wēnæ wēnæ cæcāā, ante apænte adinque nō ancæcānīmpa. ² Edæ mōnō Wængonguī quīmō iñōmō edæ, Inguipoga tömāmæ quēwēnāni æbānō wēnæ wēnæ cædāni, ante nē apænte anguīmō imōmpa. Incæte mīnitō, Mānōmaī cæcæmōnīmpa, ante ēñēnāmaī inte baī cæmīni awædō. Tōmāmæ quēwēnāni inānite nē apænte anguīmīni inte mīnitō ñōwo wædænque mīni apænte anguēnēnō incæ quīnante ānāmaī imīni. ³ Mōnō iñōmō Wængonguī anquedoidi inānite nē apænte anguīmō inōmōimpā, ante ēñēnāmaī imīnitawo. Mānīnāni inānite nē apænte anguīmō inōmō inte mōnō pōnencabo ñōwo mōnō wædō ante mōnō godōmenque apænte angæimpā, ante pōnēmīniyāa.

⁴ Codito ingante mīni godongāmæ pōnencabo incæ mīni wædō ante apænte ancæcānīmpa, ante mīnitō ædānidō inānite āmīni apænte ānāni. Iñæmpa, Ōnōnānīnque inānīpa, ante mīni ānōnāni incæ mānīnō ante nē apænte ānāni badānitawo. ⁵ Mīnitō guingo imonte mīni wæquinque cæmīnīpa, āmo ēñēmālmīnīpa. Nāna pōnencaya incæ nāēmæ wæætēdō wæætē āna wædinque mīnitō, Mōnō pōnencabo incæ æcānō nē nō ēñēnōngā inte apænte anguīgāā, ante adinque tōmengā ingante anguēnēmīni imīnīpa. Iñæmpa mīnitō weca nē nō ēñēngā adocanque dæ angantawogaa. ⁶ Wæætē nāna pōnencaya incæ nāēmæ pīnīnque adocanque, Botō beyæ apænte ānīnque iingā ingante pancæcānīmpa, angampa. Ayæ godōmenque wēnæ wēnæ cædinque tōmengā nānō tōniñacā ingante nē pōnēnāmaī ināni weca ænte godinque, Apænte ānīnque pancæmīnīmpa, angā pānānīpa.

⁷ Iñæmpa mīni pōnencabo incæ nāēmæ pīnīnque, Apænte ante pangæimpā, ante dobæ oda cæmīnīpa tōō. Edæ wacā wīwa cæcā ate wædinque bitō wæætē piyænē cæbi waa imaimpa. Tōmengā babæ wapiticæ ānīnque ō ængā wædinque bitō piyænē cæbi waa imaimpa. ⁸ Incæte piyænē cæquēnēmīni incæ mīnitō wæætē babæ cædinque ō æmīni

awædō. Wacā ingante wīwa cæmīni awædō. Mānōmaī cædinque mīnitō mīni pōnencabo incæ wæætē godō wæætē godō wīwa cæmīnīpa tōō.

⁹ Wīi ēñēnte cædāni iñōmō Wængonguī Awēnē Odeye nempo cōwē guīdāmaī inguīnāni inānīpa, ante mīnitō iñōmō ēñēnāmaī inte baī cæmīnīpa tōō. Mānōmainō ante pōnēnīnque mīni oda cæquinque i apa cæmīni. Nōwo godōmenque āmo ēñēedāni. Pancadānīya towente cædānīpa. Pancadānīya guīquēnē, Wængonguī impa, ante nāni badōniñōmō gāānē ædæ wæænānīpa. Pancadānīya guīquēnē nānōogæ ināmaī iñongante godō guēa mōwēnānīpa. Pancadānīya guīquēnē nāna onguīñæncaya incæ nāna gæncaya inte baī cædinque guēa monte quēwēnāpa. ¹⁰ Pancadānīya guīquēnē awēmō ænānīpa. Pancadānīya guīquēnē wacā māincoo ante æīnente wædānīpa. Pancadānīya guīquēnē ti nāmæ bete quīdi quīdi dowæñānīpa. Pancadānīya guīquēnē wacā ingante, Bitō wēnæ wēnæ imīpa tōō, ante pīnīnque babæ ānānīpa. Pancadānīya guīquēnē babæ apænedīnque ō ænānīpa. Mānōmaī wīwa cædōnāni inte tömēnāni Wængonguī Awēnē Odeye nempo cōwē guīdāmaī inguīnāni inānīpa, āmo ēñēmālmīnīpa. ¹¹ Mīni pōnencabo incæ pancamīnīya mānōmaī ingāimīni inte ñōwo iñōmō æbānō imīni. Edæ mōnō Awēnē Itota Codito ēmōwo beyænque Wængonguī Ōnōwoca pōnō ñā mēnongacā ate mīnitō tæiyæ wæmō ēwocate quēwēmīni adinque Wængonguī, Botō ayōmo mīnitō waa cæmīni imīnīpa, angampa.

Baonga quēwēnīnque mōnō tæiyæ wæmō entawente quēwēngæimpā

¹² “Botō cæinēnonque ante cæbo incæ Wængonguī wææ ānāmaī ingampa,” ante apænedānīpa. Incæte botō cæinēnonque ante quēwēmo baī wīi botō waa quēwēngūnque incædōmoimpā. Botō cæinēnonque ante cæbo incæ Wængonguī wææ ānāmaī ingampa, ante nāni ānō iñōmō edæ nāwāngā impa. Incæte botō cæinēnonque ante cæbo baī botō ñā cæyænte baī wæwēngūnēmo inte awædō. ¹³ Ayæ cængūi iñōmō. “Mōnō cæncadē guīquīnque cængūi æmōmpa. Ayæ adobaī mōnō cæncadē cæī cængūi beyænque ēnēmōmpa,” āmīnitawo. Iñæmpa cængūi incæ cæinca incæ, Idæwaa impa, ante Wængonguī wo ēwencæcāimpā. Ayæ adobaī mōnō baō iñōmō wīi towēngūnque beyæ ēñamōmpa. Wæætē mōnō Awēnē beyænque mōnō baō ēñate quēwēmōmpa. Ayæ mōnō baō beyæ ante mōnō Awēnē pō guīcā ate tōmengā tōnō āawoacque baī ēwocamōmpa. ¹⁴ Inique edæ mōnō Awēnē ingante Wængonguī tæēmō pīñænīnque angā ñāni ōmæmongā baī

mönö imonte adobai tæemö piñæninque angä ñäni ömæmonguimö imompa.

¹⁵ Edæ, Codito qui, ante mönö baö incæ godömö ængä ate mönö tömengä baö bai eñamompa, ante eñëñamai iminitawo. Ìninque Codito baö bai eñabo inte botö iñömö edæ onquiyængä mäncoo beyæ ante nê towente quëwengä tönö edæ ædö cæte godö monguimoo. ¹⁶ Edæ, Æcänö mänömai godö möna tömengä nê tote quëwengä tönö adocanque bai bacampa, ante eñëñamai iminitawo. Edæ, “Mënaa ñina incæ tömëna wæætë nana gæncaya möninque adocanque bai bacædaimpa,” ante apænete yewæmonte ongompa. ¹⁷ Ayæ mönö Awënë nempo quëwengä tömengä iñömö mönö Awënë tönö äawoacque bai ëwocacampa cæminii.

¹⁸ Æcänö godö towëna tömengä nämä baö cædingä inte nämä baö nänö wæwenguinque wënæ wënæ cæcampa. Wæætë yabæque mönö wënæ wënæ cædö beyæ mönö baö ædö cæte wæwenguü. Mänömai i ñininque minitö iñömö wodii winonte towëñamai quëwëedäni. ¹⁹ Edæ Wængongui tömengä Tæiyæ Waëmö Öñowoca ingante munitonga da põngängä pö guite owocampa. Ìninque minitö, Botö baö tömëmo qui eñabopa, ante ædö cæte äminii. Ìñæmpa Wængongui Öñowoca tæiyæ waëmö oncö bai eñate apa änewëminii. ²⁰ Wængongui nangui põni godonte ængä beyæñque minitö baö tömengä qui eñapa. Mänömai beyæ minitö, Tömänäni Wængongui ingante waa ate eñæcædänimpa, ante cædinque minitö baonga quëwëninque edæ waa cæedäni.

7

Nana gæncaya inöna inte iimäi cæbainapa

¹ Nöwo iñömö mïni wædö ante yewæmömïni ænte adinque botö iimäi ämopa. Onguiñængä iñömö onquiyængä ingante möñamai ingä waa tobaimpa. ² Incæte, Wïi towëinente wæcæcäimpa, ante cædinque onguiñænäni tömänäni, Botö nänöögængä incæcäimpa, ante möñäni waa imaimpa. Ayæ onquiyænäni adobai tömänäni, Botö nänöögængä incæcäimpa, ante möñäni waa imaimpa. ³ Onguiñængä iñömö tömengä nänöögængä äñongante, Botö nänöögæmi imipa, ante Ao äninque ääodenque moncæcäimpa. Ayæ onquiyængä adobai, Botö nänöögæmi imipa, ante äninque tömengä nänöögængä äñongante ääodenque moncæcäimpa. ⁴ Monte ate nänöögængä tönö adocanque bai ba adinque onquiyængä wæætë, Onguiñængä qui, ante eñadinque, Tömëmo baonque eñabopa, ante ædö cæte anguingä. Ayæ adobai onguiñængä wæætë, Onquiyængä qui, ante eñadinque, Tömëmo baonque eñabopa, ante

ædö cæte anguingä. ⁵ Nänöögængä angä eñente edæ Baa änämai. Pancaguënä Wængongui ingante nangui apæñecæte ante guëa Ao äninque nänëneto nänëñë wantæ iñö möninque idæwaa. Edæ, Tatäna angä wacä ingante towëinente wæcæ wæ, ante wææ cædinque adodë iñömö wæætë moncædaimpa.

⁶ Incæte mänömai äninque botö, Minitö botö äñö bai cöwë cæcæminimpa, ante wææ änämai imopa. Wæætë, Minitö mänömai cæminii waa imaimpa, ante mäninonque ante apænebopa. ⁷ Onguiñænäni tömänäni botö bai wëmö cædäni quëwëñäni bai waa incædönimpa, ante põñëmopa. Incæte Wængongui pancadäniya inänite põñö apænedinque, Bitö möñamai inte adobique wëmö cæte botö beyæ cæcæbiimpa, äninque wadäni inänite, Bitö mömi ate mïna gæncaya botö beyæ cæcæminäimpa, angampa.

⁸ Botö, edëningä ingante apænedinque ayæ owæmpoingä ingante apænedinque, Botö bai wëmö cæbi waa imaimpa, ämopa.

⁹ Incæte adocanque, Onquiyængä ingante cöwë moncæboimpa, ante wacä adinque botö, Bitö cöwë moncæbiimpa, ämopa. Edæ tömengä towëinente wædämai incæcäimpa, ante wææ äninque botö, Tömängä godömenque waa quëwencæcäimpa, ante ee abo moncæcäimpa.

¹⁰ Do möningä ingante edæ botö iimäi ämopa. Æ, wadö ämopa. Wïi botö ämopa. Mönö Awënë incæ iimäi angampa. Onquiyængä incæ tömengä nänöögængä ingante ëmö cæte godämai incæcäimpa, angampa. ¹¹ Incæte ëmö cæte gocä ñininque wæætë adodö põninque adocä ingante mongä waa imaimpa. Wæætë adodö põñamai ingä ñininque tömengä ee quëwëninque wacä ingante cöwë möñamai incæcäimpa. Ayæ onguiñængä incæ nänöögængä ingante päñænte godämai incæcäimpa, ante mönö Awënë angampa.

¹² Wamïni iminitë guiquënë mönö Awënë änämai iñongä botö wæætë iimäi ämopa. Onguiñænganque nê põngängä inte, Botö nänöögængä põñëñamai ingä incæ botö tönö ee quëwengampa, ante adinque tömengä nänöögængä ingante päñænämai incæcäimpa. ¹³ Onquiyænganque nê põngängä inte, Botö nänöögængä põñëñamai incæ botö tönö ee quëwengampa, ante adinque tömengä nänöögængä ingante päñænämai incæcäimpa. ¹⁴ Onquiyænganque nê põngängä iñongante tömengä adocanque nänö põñëñö beyæñque Wængongui, Mïna gæncaya botö quimïna iminapa, ante onguiñængä ingante edæ do ængampa. Ayæ adobai onguiñænganque nê põngängä iñongante tömengä nänö põñëñö beyæñque Wængongui, Mïna gæncaya botö quimïna iminapa, ante onquiyængä ingante adobai do ængampa.

Wængongui mǎnōmaī cæcǎ beyænque mīnatō wēnāni nāni waa quēwēnguinque Wængongui quīnāni badānīpa. Wængongui wīī mǎnōmaī cæcǎ baī mīnatō wēnāni īñōmō Wængongui quīnāni īnāmaī inte nōwadāni baī nānēnē pæcædōnānīmpa.

¹⁵ Bitō adobique nē pōnēmi īñōmite bitō nānōogængǎ pāmænte gocǎ wædinque ee abi gocæe. Mǎnōmaī ēmō cæte gocǎ adīnque bitō tōmēngǎ īngante nānōnāmaī inte baī badīnque ee quēwēncæbiīmpa. Edæ, Piyænē cæte quēwēdāni, ante Wængongui tōmāmō īmōnte aa pegacāīmpa. ¹⁶ Bitō onquiyæmi tōmēmi waa cæbi adīnque bitō nānōogængǎ wabānō waa pōnente quēwēmaīngǎ, ante ædō cæte ēñēmīi. Edæ onguīñæmi adobaī tōmēmi waa cæbi adīnque bitō nānōogængǎ wabānō waa pōnente quēwēmaīngǎ, ante ædō cæte ēñēmīi.

¹⁷ Incæte mōnō Awēnē, īīmaī cæe, angǎ ate ēñente wædinque bitō tōmēngǎ nānō ānōnonque ante cæte quēwēncæbiīmpa. Ayæ, Æbānō botō nānōogængǎ ēayōmō mōnō Awēnē aa pecantapa, ante pōnēninque bitō māniñedē bitō nānōogængǎ ēagai baī adobi inte quēwēncæbiīmpa. Botō īñōmō Codito īngante nāni pōnencabo wayōmō nāni godongāmæ poncabo wayōmō nāni godongāmæ poncabo weca gote apænedīnque, Mǎnōmaī cæedāni, ante tōmānāni īnānite ante apænebopa.

¹⁸ Onguīñæmi īmi do ēō togæñīmi īñōmite Wængongui aa pecantawo. īnīnque bitō, Bagācǎ baī babote, ante cædāmaī īncæbiīmpa. Eō togæñīi inte ee quēwēe. Wæætē ēō togæñāmaī īñōmite Wængongui aa pecantawo. īnīnque bagāabi inte ee quēwēe.

¹⁹ Edæ ēō togæmō incæ bagāamō incæ waomō onōmonque īmōmpa. Wīī māniñō beyænque waa quēwēmō īmōmpa. Wæætē Wængongui nānō wææ angaiñō ēñente beyænque waa quēwēmōmpa. ²⁰ īnīnque, Æbānō engæñōmō Wængongui aa pecantawo, ante pōnēninque bitō adobi inte cōwē quēwēe. ²¹ Bitō wacǎ beyænque cæte nē quēwēmi īñōmite Wængongui bitō īmite aa pecantawo. īnīnque bitō nē cæbi inte piyænē cæte wædāmaī īncæbiīmpa. Incæte bitō īmite fīmpo cædinque, Abæ tawænte goe, angǎ ēñēninque ee goe.

²² Waocǎ beyænque cæte nē quēwēmi īñōmite mōnō Awēnē aa pecantawo. īnīnque mōnō Awēnē incæ pōnō fīmpo cædinque, Abæ tawænte goe, angǎ ēñēninque ee gote baī ēwocabīpa. Wæætē bitō waocǎ beyænque nē cæbi īnāmaī īñōmite mōnō Awēnē aa pecantawo. īnīnque Codito nē aa pete ængǎ beyænque bitō cæte nē quēwēmi babīpa. ²³ Edæ Wængongui tōmēngǎ nānō Tæiyæ Waēmō Wēngǎ īngante godongǎ beyænque mōnō wæætē tōmēngǎ quīmō bagamōīmpa,

ante pōnēninque mīnitō wæætē waocǎ beyænque nē cæte quēwēmi badāmaī īedāni. ²⁴ īñānāni īīmaī ante cæedāni. Botō Wængongui Awēnē nempo quēwēninque tōmēngǎ nānō ānonque ēñente cæcæboīmpa, ante cædinque mīnitō Wængongui nānō aa pēyedē mīni ēagai baī adomīni inte quēwēdāni.

²⁵ Ayæ, Mōnāmaī īnāni æbānō quēwēngūēnāni īnāni, ante mōnō Awēnē angampa diyæ ēñēngūmoo. Incæte Wængongui waadete pōnō apænecǎ ēñēninque botō nē ēñēnōmō bagaimo inte mā pōnēninque āmo ēñēmaīmīnīpa.

²⁶ Mōnō wæwēngūimāmo oo pōni īmpa, ante pōnēninque bitō, Nōwo botō nānōogængǎ īngante æbānō ēate quēwēmoo, ante pōnēninque fīwo bitō ēadō baī adobi inte cōwē quēwēngūēnēmi īmpa, ante pōnēmōpa. ²⁷ Onguīñæmi ēñēmī, Bitō nānōogængǎ īngante do mōmitawo. īnīnque, Pāmæncæboīmpa, ante ānāmaī īe. Wæætē wacǎ īngante āmōpa. Bitō wēmō cæbitawo.

īnīnque, Botō nānōogængǎ, ante diquī diquī mīnāmaī īmi waa īmaīmpa. ²⁸ Incæte fīwo mōmi incæ wēnæ wēnæ cædāmaī inte mōmīpa. Ayæ baquēcǎ adobaī do mongǎ incæ wēnæ wēnæ cædāmaī inte mongampa. Incæte æcānō mōna tōmēngǎ īnguīpoga quēwēnte nānō caate wæquinque mongampa. Mǎnōmaīnō ante yewæmōnīnque botō, Mīnitō caate wædāmaī īncæmīnīmpa, ante wææ āmōpa.

²⁹ īñānāni, Nōwopāmo wīī wantæpiyæ īngæīmpa, ante wædinque āmōpa. Edēningǎ nānō pōnēnō baī nē mangūiwēngǎ incæ adobaī pōnēngǎ baī waa īmaīmpa. ³⁰ Æcānō Ca ca wæda tōmēngǎ īñōmō wīī wæcǎ baī bacǎ īnīnque waa īmaīmpa. Æcānō Ca ca toda tōmēngǎ wīī tocǎ baī bacǎ īnīnque waa īmaīmpa. Æcānō godōnte æna tōmēngǎ ōmæpocǎ baī bacǎ īnīnque waa īmaīmpa.

³¹ Inguīpoga mōnō cædō ante æcānō cæda tōmēngǎ māniñō ante ānāmaī inte baī cæcǎ īnīnque waa īmaīmpa. Edæ īnguīpoga quēwēninque mōnō cædō oo pōni ēwente baquīnō angūēnē.

³² Edæ mīnitō, Æbānō cæquīmoo, ante wædāmaī īncæmīnīmpa, ante botō īīmaī ante wææ āmōpa. Nē wēmō cæcǎ guīquēnē, Æbānō cæbo ate mōnō Awēnē waa toquīngǎ, ante pōnēninque tōmēngǎ mōnō Awēnē beyænque ante quēwēngampa. ³³ Do mōīngǎ guīquēnē īnguīpoga nānō quēwēngūinō ante pōnēninque, Æbānō cæbo ate botō nānōogængǎ waa toquīngǎ, ante wæcampa.

³⁴ īnīnque tæcæ tæcæ pōnente cæcampa. Onquiyængǎ guīquēnē owæmpoīngǎ īngǎ incæ baquēcǎ īngǎ incæ mōnō Awēnē beyæ ante pōnēninque, Æbānō botō baō tæiyæ waēmō ēñāquīmoo, ayæ, Æbānō botō

önöwoca tæiyæ waëmö ewocaquimoo, ante cæcampa. Do möingä guiquenë, Æbänö cæbo ate botö nänöogængä waa toquingä, ante inguipogaque nänö quëwenguinö ante wæcampa.

³⁵ Mäninö ante botö wii munitö iminite wææ cæcæte ante ämopa. Wæætë munitö mini watapæ quëwenguinque ante botö, Mönö Awënë ingante æmæ pönënamai inte nöingä cæte quëwencæmilimpa, ante ämopa.

³⁶ Onguiñængä adocanque guiquenë, Botö wengä baquécä do picængä bacampa, ante adinque botö tömengä ingante godonguënemo imopa, angä ñinque tömengä nänö änö bai cædinque ee godongä moncæcäimpa. Edæ mänömai godöninque tömengä wii wënæ wënæ cæcä ingampa.

³⁷ Wacä guiquenë mimöno ædæmö nö pönëninque, Botö wengä baquécä picængä bacä incæte botö piyænë cæte godönämai incæboimpa, angampa. Ñinque wadäni tömengä ingante wææ änämai ññönäni tömengä, Tömëmoque botö änlö bai cæcæboimpa, ante nê ëñente pönëninque godönämai ingampa. Tömengä adobai waa cæcampa. ³⁸ Ñinque tömengä wengä baquécä ññongante edæ, Moncæcäimpa, ante nê godongä guiquenë waa cæcampa. Wæætë wacä, Mönämai incæcäimpa, ante wii godongä guiquenë tömengä godömenque waa cæcampa.

³⁹ Nänöogængä ayæ müingä quëwëñongante onquiyængä ññömö tömengä tönö cöwë quëwenguënengä ingampa. Wæætë nänöogængä wængä owæmpote ate tömengä abæ tawænte bai adocanque quëwengampa. Do owæmpoingä inte, Wacä ingante möinëmopa, angä ëñëninque munitö, Tömëna mönö Awënë nempo nana quëwencaya ñnapa, ante adinque möinente nänö wædö ante ee godömini moncædäimpa. ⁴⁰ Incæte botö, Owæmpoingä ee wëmö cædinque godömenque watapæ quëwëmaingampa, ante pönëmopa. Edæ Pabodo imo Wængongui Önöwoca tönö äawocaque bai ewocabo inte mänömainö ante pönëmopa.

8

Mönitö wængongui cængui, ante wadäni nani cönönï ante

¹ Wadäni, Mönitö wængongui cængui impa, ante nani cönönincoo ante adinque munitö, Önonque cængui impa, ante abaiimpa, ämunitawo. Näwangä tömämö mini änö bai do ëñëmopa. Incæte, Tömëmoque do ëñëmopa, ante nê angä ññömö tömengä nämä ængö cæte bai cædinque wadäni ñnänite piñte bai cæcampa. Wæætë nê waadecä guiquenë wadäni ñnänite ængö cæte bai cædinque tömënanï ñnänite waadete cæcampa. ² Waocä, Tömëmo do ëñëmopa, ante nê änewengä

guiquenë tömengä nö nänö ëñenguënënö ante ayæ ëñënamai inte cæcampa. ³ Wæætë Wængongui ingante nê waadedäni ñnänite do againgä inte tömengä tömënanï ñnänite pönengampa.

⁴ Ñinque, Mönitö wængongui cængui impa, ante wadäni nani cönönincoo ante ñöwo apænebo ëñëedäni. Tömënanï nani, Mönitö wængongui impa, ante nani cönöninca önoncaque impa, ante mönö do ëñëmopa. Ayæ adobai, Näwä Wængongui adocanque pönï ingampa, ante do ëñëmopa. ⁵ Wængonguïdi nani änonäni incæ awënëidi nani änonäni incæ nanguï pönï ñnänipa. Näwangä impa. Incæte tömënanï, Wængonguïdi ñnänipa, ante nani änonäni inguipoga incæ öönædë incæ ongönäni incæte, ⁶ Wængongui mönö Wæmpocä ññömö adocanque pönï ingampa. Öönæ incæ inguipo incæ öönædë ongoncoo incæ inguipoga ongoncoo incæ tömancoo incæ tömengä adocanque badonte aacä beyænque edæ ongoncoo. Ayæ adobai mönö tömengä nempoque quëwëmopa. Ayæ Itota Codito mönö Awënë adocanque pönï ingampa. Tömengä tönö godongämæ cædinque Wængongui tömancoo badongacäimpa. Adocä Codito tönö godongämæ cædinque Wængongui pönö cæcä ate mönö quëwëmopa.

⁷ Mäninö ante pancamonga guiquenë ëñëmopa. Pancadäniya guiquenë nê pönënanï incæ mäninö ante ëñënamai ñnänipa. Ññänï Codito ingante tæcæ pönënanï ññömö tömënanï wëenëñedë, Mönitö wængongui impa, ante badonte cönonte ædæ wæænte cægäñnani ñnänipa. Ñöwo ññömö tömënanï Codito ingante tæcæ pönente ate, Wadäni wængongui cængui incæ cæninque wentamö mongænte wæcæ wæ, ante guñente wædäni incæte do edæ cænänipa. Mänömai Codito ingante æmæ pönënanï inte tömënanï wadäni nani wængongui cængui cæninque nämänque nani æmæ pönëno beyænque nämä apænte do wentamö entawënanï ñnänipa. ⁸ Incæte cængui önonque ññonte mönö cænämai imö beyænque ædö cæte wïwa entawenguï. Wæætë mönö cæmö beyænque ædö cæte waa entawenguï. Edæ mönö imonte cængui beyænque Wængongui dicæ waa aqinggä.

⁹ Wængongui wææ änämai ingä adinque munitö do cæminitawoo. Ññæmpa mänömai cæmini adinque wadäni nê æmæ pönënanï adobai cænänï ñinque tömënanï tee tëwate bai oda cæbainäni. Mänömai impa, ante pönëninque munitö, Oda cædämai incædänimpa, ante cædinque ee cænämai imæwedäni ämopa. ¹⁰ Edæ, Mönitö wængonguïdi oncö impa, ante tömënanï nani äñincönë bitö nê ëñëmi inte

go guidingque cængōmitawo. ¹¹ Īnæmpa bitō mǎnōmaī go guī cængōmi adinque wacā nē æmæ pōnengā guiquēnē bitō cæbaī adobaī do cædinque nāmā apænte ānāmā inte tōmengā nānō oda cæuinquē do go guīte cæmaingampa. ¹² Codito tōmāmō beyæ wæninque nē æmæ pōnengā beyæ adobaī wængacāimpa cæbii. Bitō tōmēnāni nāni wængonguī oncō ante, Ōnonconque impa, ante nē ēñēni inte do guīte cæmi beyæneque bitō tōññacā nē æmæ pōnengā ĩñongante wapiticæ māobi oda cæte wæwente bacampa tōō. ¹³ Mǎnōmaī cædinque mūnitō tōññadāni ĩnānite mūnitō waadedāmāi inte wēnæ wēnæ cæmīnīpa. Tōmēnāni nāni nāmā apænte æmæ pōnēnō ante wido cæte baī cædinque mūnitō mōnō Codito ingante do wīwa cæmīni ĩmīnīpa. ¹³ Īnīnque botō cæmo beyæneque botō tōññacā oda cæcā adinque botō, Tōmengā oda cædāmāi incæcāimpa, ante cædinque baō incæ cōwē cæñāmāi incæboimpa.

9

Codito nānō da godongāināni ĩmāi cæquēñēnāni ĩnānīpa

¹ Botō Pabodobo æbānō ĩmoo, ante mūnitō æbānō ante pōnēmīni. Edæ, Botō Itota nānō nē da godongāimo ĩmopa. Tōmengā botō ĩmote pōnō ĩmīpo cæcā beyæneque quēwēmopa. Mōnō Awēnē Itota ingante do agāimo ĩmopa. Mūnitō guiquēnē, Pabodo mǎnōmaī ingampa, ante pōnēmīniyaa. Ayæ mōnō Awēnē nempo quēwēninque botō Pabodobo tōmengā beyæ apænebo ēñēmīni inte mūnitō wæætē, Pabodo apænebā beyæneque mōnitō nē pōnēmōni ĩmōnīpa, ante pōnēmīniyaa. ² Wadāni guiquēnē, Pabodo ingante Awēnē Itota da godōnāmāi ingacāimpa, ānānitawo. Tōmēnāni mǎnōmaīnō ante tedewēnāni incæte mūnitō guiquēnē, Pabodo ingante mōnō Awēnē Itota nāwangā da godongacāimpa, ante apænequēñēmīni ĩmīnīpa. Edæ botō pōnō apænebo beyæneque mūnitō wede pōnēninque mōnō Awēnē nempo quēwēmīnīpa, ante edonque abaiampa.

³ Pancamīniya botō ĩmote apænte ancæte ante cæyōmīni botō nāmā wææ cæcæte ante ĩmāi āmopa. ⁴ Mōnatō apænēmōna ēñēmīni incæte mūnitō ĩñōmō, Mīnatō eyepæ cæmīnīpa diyæ cænguī tōnō bequī ænguīmīnaa, ante wææ ante baī tedemīni awædō. ⁵ Wadāni mōnō Awēnē Itota nānō nē da godongāināni ĩñōmō nāna gæncaya nāna gæncaya godānīpa. Mōnō Awēnē tōññadāni adobaī Pegodo adobaī tōmēnāni nāna gæncaya nāna gæncaya godānīpa. Mōnatō ĩmōnate guiquēnē mūnitō, Mīnatō godinque nānōogængā ænāmāi inte goeda, ante wææ ante baī tedemīni awædō. ⁶ Wadāni

ōnompoca cædāmāi inte quēwēñōnāni botō tōnō Bedēnabee adomōnaque ōnompoca mōna cædō beyæneque ænte quēwenguēñēmōna ĩmōnatawo.

⁷ Tontadoidi guiquēnē dicæ tōmēnāni nāmā nāni godonte æinta beyæ quēwēnāniyaa. Ayæ æcānō yowementacoo mingā pæ inca ate nē mīningā ĩñōmō ædō cæte yowepæ ænte bedāmāi ĩnguñgāā. Edæ dobæ ade becampa. Cēnīnāni nē aacā guiquēnē dicæ goomæ yopænte ænāmāi ĩnguñgāā. Edæ do yopænte ænte becā apa ānewēmīni.

⁸ Mǎnōmaīnō ante apænedinque botō waodānique nāni ānōnō ante wīi āmopa. Wæætē Wængonguī nānō wææ angāinō ante mǎnīnonque ante āmopa. ⁹ “Wagada onguīñængā nē cæcā inte tōmentapo æ yacāimpa, ante āmi pīnā pīnā gāwate cægōñongā bitō tōmengā ōñōne wææ wodōnedāmāi inte ee abi cæncæcāimpa,” ante Mōitee wodi wææ yewæmongacāimpa. Īnīnque Wængonguī dicæ wagada beyæneque ante pōnēninque mǎnōmaīnō ante angantawogaa. ¹⁰ Wæætē mōnō beyæneque ante Wængonguī angampa, ante pōnengāimpa. Nāwangā mōnō beyæneque yewæmongatīpa. Waocā dicæ, Wadānique cæncædānīpa, ante onguīpoi mangæ mangæ tæñongāā. Wæætē, Mōnitō godongāmæ cæncæmōnīpa, ante mangæ mangæ tæñongampa. Ayæ tōmēmō nē æ yeyacā guiquēnē dicæ, Wadānique cæncædānīpa, ante æ yeyacāā. Wæætē edæ, Mōnitō godongāmæ cæncæmōnīpa, ante pōnengā inte æ yeyacampa. ¹¹ Īnīnque, Mūnitō mūmōno cænte baī ēwocacæmīnīpa, ante cædinque mōnatō tōmēmō mīnte pæ baī pōnō apænēmōna do ēñente ēwocamīnitapa. Incæte mōnatō ĩmōnate wæætē mǎincooque pōnōmīni wēnæ wēnæ ænguēñēmōna āmīnitawo. ¹² Īnæmpa wadāni ĩnānite mǎincoo ee godōmīni æñānīpa. Mōnatō ĩñōmō godōmenque apænedinque godōmenque ænguēñēmōna ĩñōmōnate mūnitō Baa āmīnitawoo.

Mōnatō nē ænguēñēmōna incæte cōwē æñāmāi ĩmōnapa. Edæ, Mōnō Codito ingantēdo ante watapæ apænedinque mōnatō mǎincoo æmōna baī wadāni, Pabodoidi mǎincoo æncæte ante apænedapa, ante pīnīnque wææ ancædōñānīpa. Īnīnque, Wææ ānāmāi incædānīpa, ante cædinque mōnatō, Cōwē æñāmāi incæmōnāimpa, ante piyæñē cæte ee apænēmōnāpa. ¹³ Nāwā Wængonguī cænguī, ante ænte māmō cōñōnāni ongō adinque Wængonguī oncōnē ñænæncōnē nē cædāni incæ pancaā ænte ade cænte quēwēñānīpa. Ayæ, Wængonguī quī, ante baō nāni iya tāimpaa nē cædāni adobaī iya tāimpaa nāni cōñōningā incæ

pancacāa ænte cænte quēwēnānīpa, ante pōnēmīniyaa. ¹⁴ Mōnō Awēnē adobaī, Botō īmotedō ante watapæ apænedāni ate nē ēñēnāni wæætē nē apænedāni īnānite cængui pædæ godōnāni ænte cænte quēwēncædānīpa, angampa. ¹⁵ Botō guiquēnē nē ænguēnēmō incæte cængui ante ānāmaī inte cōwē apænebo īnōmoīpa. Nōwo mīnitō īmīnite yewæmōnīnque botō dicæ, Pōnōmīni æncæboīpa, ante yewæmōmogaa. Cængui ante ānāmaī inte botō Wængongui beyænque apænebo ēñēmīnīpa, ante pōnēnīnque mānīnō beyænque tobopa. Mānōmainō ante todōmo inte botō, Gæwænte wædinque nāñe wæmo incæ wacā māincoo edæ ænāmaī incæboīpa.

¹⁶ Itota Codito ingantedō ante apænebi ēñencædānīpa, angā ēñente botō nē apænebo bagāimo inte edæ ædō cæte wadō cæquīmo. Īnīnque botō mānōmaīnō ante nē apænedōmo inte edæ, Tōmēmō waa cædinque apænebo, ante ædō cæte tedequīmo. Edæ botō Itota ingantedō ante mōni watapæ apænedō inte wīī apænebo bai edæ botō wæquinque incædōnīpa. ¹⁷ Edæ Itota Codito, Apænebi ēñencædānīpa, angā ēñēnīnque botō Ao ante watapæ todīnque apænebo adīnque tōmengā, Waa cæbi īmīpa, ante eyepæ pōnongā æmaīmopa. Wæætē, Wīī apæneīnente wæbo incæte botō cōwē apænebo īnīnque edæ tōmengā nānō angāinonque cæte apænebo. Edæ botō nē apænequēnēmō inte ædō cæte apænedāmaī īnguīmo. ¹⁸ Īnīnque botō ēñente cæbo beyænque quīnō ænguīmo. Botō Itota Codito ingantedō ante watapæ apænebo beyænque Wængongui īmaī pōnō cæcā ænīnque tocæboīpa. Botō apænebo beyæ mīnitō nē pōnonguēnēmīni incæte pōnōnāmaī īmīni īnīnque botō wæætē ænāmaī inte tocæboīpa.

¹⁹ Ayæ waodāni wīī botō awēnēidi īnānīpa. Ayæ botō wacā ingante nē cæbo īnāmaī inte abæ tawænte bai quēwēmopa. Incæte botō, Waodāni godōmenque nanguī īnāni Codito gāmæñō poncædānīpa, ante cædinque tōmānāni īnānite nē cæte quēwēmō bai botō baquinque nāmā pædæ godonte bai quēwēmopa. ²⁰ Godongāmæ cæbo ate oodeoidi incæ Itota gāmæñō poncædānīpa, ante cædinque botō oodeoidi nāni pōnēnō bai pōnēnīnque tōmēnāni nāni quēwēnō bai quēwēmopa. Pancadāniya, Mōitee wodi nānō wææ angāinō ēñēmō beyænque mōnō quēwengæīmpa, ante pōnēnīnque mānīnonque ante ēñente cædānīpa. Botō guiquēnē, Wīī Mōitee wodi nānō wææ angāinō ēñēmō beyænque mōnō quēwengæīmpa, ante pōnēmopa. Incæte, Godongāmæ cæbo ate mānīnonque ante nē ēñente cædāni adobaī Itota Codito gāmæñō

poncædānīpa, ante cædinque botō tōmēnāni ēñēnō bai adobaī ēñente bai cæbopa.

²¹ Wadāni guiquēnē Mōitee wodi wææ ante nānō yewæmongainta adāmaī īnānīpa. Botō guiquēnē, Wængongui, Īmaī cædāni, ante nānō wææ angāinō ante cōwē ēñenguēnēmō inte botō mōnō Awēnē Codito nempo quēwēnīnque tōmengā nānō angāinō ante cōwē ēñente quēwēmopa. Incæte godongāmæ cæbo ate nē adāmaī īnāni adobaī Itota Codito gāmæñō poncædānīpa, ante cædinque botō wadō pōnēmō incæ tōmēnāni adāmaī inte nāni quēwēnō bai adobaī inte bai quēwēmopa. ²² Ayæ, Godongāmæ cæbo ate æmæ pōnēnāni adobaī Codito gāmæñō poncædānīpa, ante cædinque botō tōmēnāni æmæ pōnente quēwēnāni bai æmæ pōnēmō inte bai quēwēmopa. Īnīnque, Godongāmæ cæbo ate pancadāniya Codito gāmæñō ponte quēwēncædānīpa, ante cæcæte ante botō æbānō cæquīmo, ante wædinque īmaī cæbopa. Wadāni nāni quēwēnō bai wadāni nāni quēwēnō bai wadāni nāni quēwēnō bai adobaī cædinque botō tōmānāni nāni quēwēnō bai adodō ante pōnēmō inte bai quēwēmopa. ²³ Edæ, Itota Codito watapæ pōnō cæcā beyænque tōmānō tōmengā nempo quēwēnīnque godongāmæ watapæ tocæīmpa, ante cædinque mānīnō wadāni nāni quēwēnō bai wadāni nāni quēwēnō adodō ante pōnēmō inte bai quēwēmopa.

²⁴ Edæ nē quingæ pogodo godāni īñōmō tōmēnāni nāni pogodo goīmancadē tōmānāni pogodo godānīpa. Incæte adocanque quingæ pogodo gōcā inte tāno gote næ gongængā adīnque edæ, Bitō adobīque quingæ pogodo gote gānā cæbīpa, ante pædæ pōnōnāni ængampa, amīnitawoo. Mīnitō guiquēnē quingæ pogodo gote bai gānā cæte æncæte ante tæī piñænte cædāni. ²⁵ Gānā cæcæīmpa, ante cædinque tōmēnāni wadō nāni cæīnēnō ante cædāmaī inte wæntæye īnāmaī inte mānīnonque ante cædānīpa. Tōmēnāni guiquēnē gānā cædinque poganta aquīī guīñē wænguīñabo nāni que cædīntaque ænte wencacæte ante mānōmaī cædānīpa. Mōnō guiquēnē poganta guīñē wænāmaī inta mōnō cōwē encāquinta æncæte ante mānōmaī cæmōmpa. ²⁶ Mānōmaī īmpa, ante pōnēnīnque edæ wīñatæ wīñatæ guīdāmaī inte pogodo godāni bai botō tōingā gobopa. Ayæ, Æcānō gānā cæcāā, ante tiyæmāa tamonte guēa cæda bai cædinque botō, Gānā cæcæboīpa, ante tæīmō piñænte nō cæbopa. ²⁷ Īnīnque godōmenque godōmenque apænebo ēñēnāni ate tōmēmō oda cædāmaī incæboīpa, ante cædinque botō, Tæī piñænte quingæ gobāwe, ante bai cædinque botō nāmā incæ da godō da godō godoncæte ante nāmā tæī tæī pante

baī cæbopa.

10

Wængonguī impa, ante nāni cōnōninca

¹ Botō tōnīnāmīni īīmaī ante apænebo ēñēedāni. Mōnō wæmæidi wodi tōmānāni boguīmā gānēñōmō quēwente cængogadānimpā. Ayæ tōmānāni gāwapæntibædē tæcæguedēmæ ti wææ tao gogadānimpā. ² Īnīnque æpænē guite baī cædinque tōmēnāni Mōitee wodi nempo tōmānāni nāni quēwengūnque edæ boguīmāmodē godinque gāwapæntibæ tæcæguidēmæ gogadānimpā. ³ Ayæ cænguī Wængonguī oōnædē da pōnogā wææ nāni cæ baī tōmengā Ōnōwoca nānō apænedō adobaī ēñēte ēwocate quēwengadānimpā. ⁴ Wængonguī Ōnōwoca apænecaī ēñēnīnque tōmānāni godongāmæ bete baī ēwocate quēwengadānimpā. Edæ dicabo tæēmonca īñonte Mōitee wodi ongonto tæi tæi āayongā æpæ ompade ba begadānimpā. Īncayæ Ponguingā mōnō Codito adobaī tæi piñænongā inte tōmēnāni tōnō godongāmæ godinque tōmengā Ōnōwoca ingante pōnogā æninque tōmēnāni ompade bete baī āāwocaque baī ēwocagadānimpā. ⁵ Incæte wodo tōmānāni ēñēnāmāi cædāni adinque Wængonguī wī togacāimpā. Edæ piīnīnque wæñōnīnque ōnōmæca yabæque wido cæcā ñōmængadānimpā.

⁶ Īnīnque, Tōmēnāni wēnæ wēnæ cæcæte ante nāni tōinente wædō baī mīnitō wī adobaī tōinente wæcæmīnimpā, ante mōnō imonte wææ odōmoncæte ante Wængonguī tōmēnāni nāni tōinēnō beyæ ante pangā wængadānimpā, ante abaimpā. ⁷ Pancadāniya nāni badonte cōnōninca weca ædæ wæænte, Wængonguī impa, ante babæ apænetete towengadānimpā. Edæ, “Cæncæte ante becæte ante tæ contadinque tōmēnāni Yæ yæ owempocæte ante ængæ gantidānitapā,” ante yewæmongatimpā cæmīni. Mīnitō īñōmō edæ, Wængonguī impa, ante nāni babæ towengāi baī wī adobaī cæedāni. ⁸ Pancadāniya guiquēnē nānōogængā īnāmāi īñongante wīwa towengadānimpā. Edæ bæintitodee mīido ganca īnāni mānimpodāni edæ mānōmaī towēnāni inte adōōnæque īñonte nāñe wængadānimpā, ante adinque pōnente wædinque mōnō wæætē towēnāmāi ingæimpā. ⁹ Pancadāniya guiquēnē, Quiēmē cæmō īñōmonte Awēnē dicæ pangā, ante ancaā wēnæ wēnæ cædāni adinque Wængonguī tæntæ angā pocæ wængadānimpā. Īnīnque tōmēnāni nāni wēnæ wēnæ cægālnō ante mōnō Baa ante wēnæ wēnæ cædāmāi ingæimpā. ¹⁰ Pancadāniya guiquēnē Wængonguī nānō pōnōnincoo

adinque, Wængonguī wī wæmō pōnogā awædō, ante piīnte tededāni ate Wængonguī anquedo nē wido cædongā īnogā inte tōmēnāni īnānite wæñonte edæ wido cægacāimpā. Mānōmaī cæcā ante adinque mīnitō, Pangā wæncæ wæ, ante wædinque tōmēnāni nāni piīnte tedewengāi baī adobaī piīnte tededāmāi īmæwedāni.

¹¹ Īnīnque, Wamīni mīni adobaī pan-guinque cæmīnīpā, ante wææ odōmoncæte ante pancadāniya īnānite Wængonguī mānōmaī pangacāimpā. Ayæ īīmāmo wodo īnīnque bayonte quēwēmō īñōmonte dodāni mōnō imonte wææ ancæte ante yewæmōninque, Wēnæ wēnæ cædāni ate Wængonguī æbānō pangacāi, ante aedāni, ante wææ yewæmongadānimpā. ¹² Mānōmaī impa, ante adīmīni incæte mīnitō, Mōnitō nāmā ongonte cōwē oda cædāmāi incæmōnimpā, ante pōnēmīnitawo. Edæ mīni ædocæ tæ go wæænguinque mānōmaī ānewēmīnīpā tōō. ¹³ Mīnitō wēnæ wēnæ cæinente wæmīnitawo. Edæ wī mīnitō adomīnique mānōmaī wēnæ wēnæ cæinente wæmīnīpā. Mōnō waocabo mōnō wēnæ wēnæ cæinente wæcabo tōmāmō imopā. Incæte mīnitō mīni oda cæquinque wēnæ wēnæ cæinente wæmīni adinque Wængonguī mōnō imonte cōwē nē pōnogā īnogā inte, Oda cædāmāi incæmīnīpā, ante wææ ānīnque edæ, Idæwaa, angampā. Ayæ wēnæ wēnæ cæinente wæmīni incæte tōmengā tōō æmænte ængā beyænque mīnitō eyepæ inte ate adiyæ næ gongæninque oda cædāmāi inguīmīni īmīnīpā.

¹⁴ Mānīnō beyænque botō nē waademīni, āmo ēñēedāni. Wængonguī impa, ante nāni babæ ante gōnōninca gomō adinque ocæmæ wodii wīnōedāni āmopā. ¹⁵ Mīnitō ocai encadōmīni īmīnīpā, ante adinque botō mānōmālnō ante yewæmōmopā. Īnīnque botō ānō ante, Nō intawo, babæ intawo, ante mīnitō nē encadōmīni inte apænte ante baī ēñēcæmīnīpā. ¹⁶ Mōnō pōnencabo owæta æninque Wængonguī ingante waa ate pōnente apænedinque, Mōnō Codito wepæ tōmāmō beyæ godonte impa, ante pōnēninque mōnō pōnencabo īñōmō godongāmæ bemopā. Ayæ pāo mōnō pā ænō æninque, Mōnō Codito tōnō godongāmæ caate wængāimō baī imopā, ante pōnēninque mōnō godongāmæ cæmopā. ¹⁷ Mōnō pāo adocaque æninque pā ænte godongāmæ cæninque mōnō, Pāo adocaque ī baī mōnō tæiyæmō pōni imō incæte adocabomō imopā, ante pōnengæimpā.

¹⁸ Idægoidi ēñagāināni īñōmō, Wængonguī quī, ante baō ænte mānō ñōnōninque iya tånānīpā. Mānī baō tōmēnāni nāni iya tāimpā ñōnōningā pancacā æninque

tömēnāni, Baō Wængonguī qui ī bai mōnō adobai Wængonguī quimō īmōmpa, ante bai cædinque godongāmæ cænānīpa, ante do ēñēmīnīpa. ¹⁹ Mānōmai ānīnque botō æbānō āmoo, ante pōnēmīni. Nē ēñēnāmai īnāni nāni babæ cōnōnīca īñōmō edæ nāwā Wængonguī ingampa diyæ tōmēnāni tōmēngā quīnāni īnāniyāa. Ayæ, Wængonguī cænguī impa, ante babæ nāni ānongā īñōmō nāwā Wængonguī cænguī impa diyæ tōmēnāni Wængonguī tōnō godongāmæ cænāniyāa. Botō īñōmō edæ mānōmaiñō ante dicæ āmogaa.

²⁰ Mānōmai ānāmai īmo inte botō īmai āmōpa. Tōmēnāni, Wængonguī qui, ante babæ cōnōnīnque dicæ nāwā Wængonguī ingante godōnāniyāa. Īñæmpa wēnæidi īnānīte godōnānīpa cæmīnī. Wēnæ tōnō cædāni awædō, ante mīnitō gomō adīnque godongāmæ cænāmai īmæwedāni, āmōpa. ²¹ Edæ mōnō Awēnē bepæ godongāmæ bemīni inte mīnitō wēnæidi bepæ ædō cæte godongāmæ bequīmīni. Mōnō Awēnē cæimpaa tæ contate godongāmæ cæmīni inte mīnitō wēnæidi cæimpaa ædō cæte godongāmæ tæ contate cænguīmīni.

²² Æmæ pōnēnte bai wēnæidi nāni bepæ bemō adīnque mōnō Awēnē piīnte badīnque pāmaingampa, ante ēñēmīnō inte mōnō ædō cæte wēnæidi bepæ bequīmōō. Tæī piñænte wææ cæmōmpa mōnō Awēnē pānāmai īngūingā.

Ñi cæyænte gote bai quēwente waadete pōngæīmpa

²³ Mīnitō īmai apænedīnque, “Mōnō quīēmē bai cæīnēmō incæ Wængonguī wææ ānāmai ingampa,” āmīnitawo. Īñæmpa mōnō cæīnēnonque cæte quēwēmō bai wīi mōnō waa quēwēngūinque incædōnīmpa. Ayæ adobai, “Mōnō cæīnonque cæmō incæ Wængonguī wææ ānāmai ingampa,” āmīnitawo. Īñæmpa mōnō cæīnēnonque cæte quēwēmō bai wacā, Botō adobai cæbote, ante oda cæcædongāīmpa cæmōō. Oda cædāmai īncæcāīmpa, ante wææ cædinque mōnō Wængonguī nānō ānōnonque ante ēñēnte cæcæīmpa. ²⁴ Edæ, Mōnō æbānō cæte eyepæ ænīnque quēwēngūīmōō, ante nāmā beyænque wædāmai inte wæætē wadāni beyæ ante pōnēnīnque, Tōmēnāni nōīngā ante ēñēnte waa quēwēncædānīmpa, ante mōnō nanguī cæcæīmpa.

²⁵ Īnīnque baō godonte æncæte ante nē mānāni nāni æī pancadē gote ænīnque mīnitō mīmō entawēmīni incæte, Baacā bai intawo, nāwāaquināgā intawo, ante apænte ānāmai inte guīñēnedāmai ade cæedāni. ²⁶ Edæ, Inguīpo Wængonguī qui impa. Īnīnque inguīpoga ongoncoo tōmancoo adobai Wængonguī qui inte

nāwāaquincoo impa, ante yewæmōngatūi apa guīñēwēmīni.

²⁷ Ayæ nē pōnēnāmai ingā mīnitō īmīnīte, Pō cæedāni, angā ēñēnīnque mīnitō goīnēmīni inte godīnque tæ contayōmīni cænguī pædæ pōnongā adīnque ee ō ænte cæedāni. Baacā intawo, Nāwāaquināgā intawo, ante nāmanque apænte ānāmai inte ade cæedāni. ²⁸ Wæætē wacā tōmēngā nānō mīmō pōnēnō beyænque ante wææ ānīnque, “Wadāni tōmēnāni, Mōnītō wængonguī cænguī impa, ante do nāni godōnī impa īñæmpa cæmīnī,” angantawo. Mānōmaiñō wææ angā ēñēnte wædinque mīnitō nē wææ ānīngā beyæ ante ayæ tōmēngā nānō nāmā apænte æmæ pōnēnō beyæ ante edæ cænāmai iedāni. Īñæmpa inguipo incæ inguīpoga ongoncoo tōmancoo incæ mōnō Awēnē qui impa cæmīnī. ²⁹ Wīi tōmēmīni mīmō entawēnō beyæ ante nāmā apænte ānīnque wæætē nē wææ ānīngā beyæ ante tōmēngā nānō nāmā apænte æmæ pōnēnō beyænque ante mīnitō cænāmai incæmīnīmpa.

Incæte bitō wabi īmai ante wæbitawo. “Mōite wodi nānō wææ angānō beyæ ñā cæyænte wægāimo bai inte botō ñōwo ñī cæyænte gote bai īmo adīnque wacā tōmēngā nānō nāmā apænte æmæ pōnēnō beyænque ædō cæte botō īmote apænte angūingā,” ante wæbitawo. ³⁰ Ayæ, “Wængonguī ōnonque pōnongā ænīnque botō tōmēngā ingante waa ate pōnēnte apænedīnque ade cæmo adīnque wadāni īñōmō edæ, Baacā incæ īñæmpa cæmīi, ante quīnante pōnō babæ ante tedewēnāni,” ante bitō wæbitawo. ³¹ Incæte mīnitō cæmīni incæ bemīni incæ quīēmē bai cæmīni incæ mīnitō cædīnō adīnque wadāni, Wængonguī ñāo apāite bai ēmōnongā ingampa, ante acædānīmpa, ante cædinque waa cæedāni. ³² Edæ mīnitō īñōmō, Waa cæmōni adīnque wadāni ōdeoidi incæ guidiegoidi incæ Codito ingante nē godongāmæ pōnēnāni incæ tōmānāni tee tēwadāmai inte oda cædāmai incædānīmpa, ante pōnēnīnque edæ waa cæedāni. ³³ Botō adobai, Botō tōmēmō ænguīnō ante wædāmai īmōpa. Wæætē, Botō waa cæbo adīnque wadāni Itota gāmæñnō pōnīnque tōmēngā ængā beyænque quēwēncædānīmpa, ante pōnēnīnque botō quīēmē cæbo incæ cōwē waa cæbōpa.

11

¹ Mōnō Codito tōmēngā nānō cæi bai botō adobai cæbo adīnque mīnitō botō cæi bai adobai cæbāīmīnīpa.

Īmai cæte Wængonguī ingante apæneccēīmpa

² Mīnitō botō īmote cōwē pōnēmīni adīnque botō mīnitō īmīnīte waa adīnque

apænebopa. Ayæ do pönengaināni nāni apænegainō ante botō adodō ante apænebo ēñēninque mīnitō, Nāwangā impa, ante ēñēnte cæmīnīpa, ante adinque botō mīnitō imīnite waa ate pönēninque apænebopa.

³ Nōwo iñōmō iīmaī āmo ēñēedāni. Mōnō Codito ñænængā inongā inte onguiñængā ingante nē angā ingampa. Waoda nāna gæncaya adinque onguiñængā ñænængā bai inongā inte onquiyængā ingante nē angā ingampa. Mæmpo Wængongui guiquēnē ñænængā pōnī inongā inte mōnō Codito ingante nē angā ingampa. ⁴ Īninque onguiñængā iñōmō Wængongui ingante apænedinque ayæ, Wængongui æbānō angāā, ante apænedinque wencadāmaī apænecæcāimpa. Edæ bee ocadinque tōmengā nāmā ocabo ante guīñcate bai apænebaingampa.

⁵ Onquiyængā guiquēnē bee ocadinque Wængongui beyæ apænecæcāimpa. Bee ocadinque tōmengā, Wængongui æbānō angāā, ante apænecæcāimpa. Edæ bee ocadāmaī inte nāmā ocamō ante guīñcate bai onquiyængā apænebaingampa. Mānōmaī cædinque tōmengā nē ēñēnāmāi cædingā ingante nāni ēō tocadingā bai inongā inte encabaingampa. ⁶ Edæ onquiyængā bee ocadāmaī ingā inte godōmenque ēō tocacā bai waa incædōnīmpa. Wæætē, Eō tocate wæcæ wæ, ante wæcā Īninque tōmengā iñōmō edæ bee ocabaingampa. ⁷ Edæ onguiñængā ingante badōninque Wængongui tōmengā nānō ēmōnō bai adobaī badongā ēmongacāimpa. Īninque Wængongui nānō ñāō apāidō bai adobaī ēmōnongā inte onguiñængā bee ocadāmaī incæcāimpa. Onquiyængā guiquēnē onguiñængā nānō ēmōnō māninque ēmōnongā ingampa. ⁸ Onguiñængā ingante tāno badōninque Wængongui ayæ onquiyængā ingante badoncæte ante onguiñængā iyapa ænte badongacāimpa. ⁹ Edæ wīī onquiyængā beyæ ante onguiñængā ingante Wængongui badongacāimpa. Wæætē, Bitō onguiñængā beyæ quēwencæbiīmpa, ante onquiyængā ingante badongacāimpa. ¹⁰ Īninque onquiyængā iñōmō, Botō nānōogængā beyæ Wængongui botō imote badongacāimpa, ante pōnente wædinque bee ocacæcāimpa. Ayæ, Bee ocabo adinque Wængongui anquedoidi incæ, Botō nānōogængā nē angā ingampa, ante ēñēncædānīmpa, ante cædinque onquiyængā waa cædinque bee ocacæcāimpa.

¹¹ Incæte mōnō Awēnē nempo quēwēninque onguiñængā dæ angā bai onquiyængā ōnonganque baquēnengainō anguēnē. Wæætē onquiyængā dæ angā bai onguiñængā wæætē ōnonganque

baquēnengainō anguēnē. ¹² Edæ onquiyængā ayæ dæ āñongante tōmengā ingante badoncæte ante Wængongui onguiñængā iyapa æninque badongacāimpa. Wæætē wēñængā onguiñængā ingante onquiyængā mangā beyænque ēñacampa. Incæte Wængongui beyænque tōmāmō quēwēmōmpa.

¹³ Onquiyængā bee ocadāmaī inte Wængongui ingante apænecā Īninque waa intawoo, ante mīnitō tōmēmīni godongāmæ pōnēē cōninque æedāni. ¹⁴ Edæ dodāni nāni cægai bai cæquēnēmō inte mōnō iīmaī ante pönengæiīmpa. Onguiñængā doyængui encadinque guīñcate wæquēnengā ingampa, ante edonque ate pōnēmaīmpa. ¹⁵ Onquiyængā guiquēnē tōmengā doyængui pæ Īninque edæ waa impa. Edæ, Doyængui bee ocacæbiīmpa, ante onquiyængā ingante Wængongui badongā encacampa. ¹⁶ Botō mānōmaīnō ante apænebo ēñēninque mīnitō pancamīniya wæætēdō wæætē āinēmīnitawo. Īñæmpa botō ānīnō bai mōnitō cōwē cæmōnīpa. Ayæ Codito ingante godongāmæ nāni pōnencabo adobaī Wængongui quīnāni inōnāni inte edæ cōwē mānōmaī cædānīpa cæmīni.

Awēnē ææmæ ante bedinque pancamīniya wīwa cæmīni

¹⁷ Mīnitō mīni waa quēwenguinque ante godongāmæ ponguēnēmīni incæte mīni godōmenque wīwa quēwenguinque godongāmæ pōmīni awædō. Īninque botō, Waa cæmīnīpa, ante ædō cæte anguīmoo. ¹⁸ Īmaīnō ante nōwo tāno apænebo ēñēedāni. Codito ingante mīni pōnencabo godongāmæ pōninque mīnitō iñōmō mīni caipæ incæ wæætē godō wæætē godō tedewēninque wacabo nānēnē wacabo nānēnē bamīnīpa. Ante apænedāni ēñēninque botō, Wabānō nōingā ante apænedānīpa, ante pōnēmopa. ¹⁹ Nāwangā impa, ante pōnēmopa. Edæ, Ædānidō inānite Wængongui waa acāā, ante edonque acæiīmpa, ante tōmengā angā ate mīnitō mīni cabo wadō ante mīni cabo wadō ante tedemīnīpa, ante awædō.

²⁰ Īninque, Awēnē ææmæ impa, ante godongāmæ pōninque mīnitō wīī mōnō Awēnē ææmæ bete bai cæmīni awædō. ²¹ Edæ mīni godongāmæ cæñēdē incæ mīnitō, Wadāni adobaī cæncædānīmpa, ante ee ongōnāmāi imīni inte tōmāmīni cængui ade cæmīnīpa. Pancadāniya ayæ gæwænte ongōñōnāni edæ pancamīniya do tōmo bete dowænte wæmīni awædō. ²² Īñæmpa oncō ōmaamīni bai inte mīnitō tōmēmīni oncōnē cænte wīī bemīni. Edæ Codito ingante mōnō godongāmæ pōnencabo Wængongui quīmō imō incæte mīnitō nāēmæ pīnte cæmīni awædō. Ōmæpodāni incæ tōmēnāni

nāni guingo imonte wæquinque ante mīnitō pæ gompote ade cæmīnīpa tōō. Mānōmaī cæmīni adinque botō dicæ, Waa cæmīnīpa, āmogaa.

Mōnō Awēnē cæcæmæ

(*Māteo 26.26-29; Mādoco 14.22-25; Odoca 22.14-20*)

²³ Edæ mōnō Awēnē botō imote pōnō apænetabopa. Mōnō Awēnē Itota ingante Codaa nānō odōmonte godongāiōnæ woyowotæ iñonte Itota pāō æninque, ²⁴ Wængonguī ingante waa ate pōnente apænedinque pāō pā æninque angacāmpa. “Iī pāō botō baō bai impa. Botō, Mīnitō quēwencæmīnīpa, ante botō baō godonte bai cædinque wæncæboīmpa. Botō pā ænte pædæ pōnōmo bai mīnitō adobai iñcayæ ate botō imote ante pōnēninque godongāmæ cædæni,” angantapa.

²⁵ Mānōmaī angā iñque cænāni ate owæta adobai æninque tōmēngā, “Botō wepæ iīmæ bai impa. Wængonguī do apænedinque, Botō pōnō cæbo ate mīnitō Ao āmīni iñique mōnō godongāmæ waa cæte quēwengæīmpa, angacāmpa. Nōwo adobai mīline āninque apænebopa. Botō wepæ ante Ao ante æmīni inte mōnō godongāmæ waa cæte quēwengæīmpa. Iñique mīnitō wantæ wantæ iñō bedinque botō imote ante pōnente becæmīnīpa.” Ante Itota angā begadānīmpa. ²⁶ Iñique Itota nānō ponguīōnæ ganca mīnitō mānōmaī pāō wæætē wæætē cænīnque mānīmæ bai wæætē wæætē bedinque, Mōnō Awēnē tōmāmō beyæ wængacāmpa, ante odōmonte bai cæmīni adinque wadāni ēñencædānīmpa.

Nōingā ante pōnēninque mōnō Awēnē cæcæmæ beccæīmpa

²⁷ Mānōmaī i iñique waocā pōnēnāmāi inte mōnō Awēnē pāō ōnonque cænīnque Awēnē nānō bequīmæ ōnonque bedinque tōmēngā nānō wentamō mongænguīnque mōnō Awēnē baō ante, Ōnonque impa, ante pīinte bai cædinque tōmēngā wepæ ōnonque wido cæte bai cæcampa. ²⁸ Iñique, Æbānō entawēmōō, ante mīnitō nāmā nāēmænte cōwā adinque nōingā ante pōnēninque pāō cænīnque mānīmæ bequēnēmīni iīmīnīpa. ²⁹ Edæ, Mōnō Awēnē baō bai impa, ante cæcānō pōnēnāmāi inte cænte beda iñōmō tōmēngā nāmā nānō apænte pante wæquinque mānōmaī cænte becampa. ³⁰ Edæ mānōmaī cæmīni beyænque pancamīniya aquīīmīni badinque wæntæye bamīnīpa. Pancamīniya wīl pōnente wæmīnīpa. Ayæ wadāni æpodānimē mānīnō beyænque do æmæwo wæxnānīmpa.

³¹ Incæte mōnō cōwā adinque nāmanque apænte āninque nōingā cæmō iñinque mōnō

Awēnē wæætē mōnō imonte apænte ante pīlīnāmāi i māingampa. ³² Mōnō Awēnē mīnitō iīmīnite apænte ante pīingantawo. Edæ mōnō Awēnē, Inguipogaque quēwēnāni iñānite apænte āninque botō pāñedē mīnitō wīl adobai pante wæquīmīni, ante wææ cædinque nōwo iñōmō edæ, Ēñenguēnē quēwēedāni, ante wædænque pangā wæmōmpa.

³³ Botō tōnīnāmīni ēñēedāni. Mānōmaī i, ante pōnēninque mīnitō cæncæte ante pōninque ee ongōñōmīni tōmānāni adoyōmō pōnāni ate godongāmæ cædæni. ³⁴ Godongāmæ pōninque mōnō wīl apænte panguēnēmō bacæīmpa, ante wææ cædinque mīnitō nē gæwænte wæcā ingante āmīni oncōnē tāno cæncæcāmpa. Nōwo māninque ante yewæmōninque botō mīnitō weca iñcayæ ate pōninque wadō mīni ānīnō ante godōmenque apænebo ēñencæmīnīmpa.

12

Wængonguī Ōnōwoca pōnō cæcā æninque cæcæīmpa

¹ Iñānāni ēñēedāni. Wængonguī Ōnōwoca mōnō imonte pōnō cæcā ate tōmēngā nānō pōnōnoncoo eyepæ ænte ēwocadinque mōnō æbānō cæquīi, ante ēñēninque mīnitō oda cædāmāi incæmīnīmpa, ante nōwo yewæmōmo aedāni.

² Doyedē iñōmō mīnitō ēñēnāmāi iñōmīnite wadāni, Mōnitō mīlīnæ pōedāni, ante æbāmē cæte ænte māodāni gogāmīnīmpa. Tōmēnāni mīlīnæ mānōmaī go go cædinque mīnitō do oda cædinque babetade nāni badōninca weca ædæ wææninque, Mōnitō wængonguī impa, ante cædinque quēwengamīnīmpa.

³ Iñique mīnitō iīmīnite botō nōwo, Ēñenguēnē quēwēmīni, ante iīmāi ante apænebopa. Æcānō Wængonguī Ōnōwoca tōnō āawocaque bai ēwocacā guiquēnē tōmēngā, Itota nānō panguīnque nē wentamō mongængā ingampa, ante ædō cæte tedewenguingāā. Ayæ wæætē Wængonguī Tæiyæ Wæmō Ōnōwoca tōnō ēwocadāmāi ingā guiquēnē tōmēngā, Itota Tæiyæ Awēnē ingampa, ante ædō cæte apænequingāā.

⁴ Adocanque ingante wadō pōnō cædinque Wængonguī Ōnōwoca wacā ingante wadō pōnō cædinque tōmēngā nānō pōnōincoo nēnempote bai cæcā æninque mōnō wadō wadō nē cæmō iīmōmpa. Wængonguī Ōnōwoca adocanque pōnī iñongā incæ mānōmaī wadō wadō pōnō cæcampa. ⁵ Ayæ mōnō Awēnē adocanque pōnī iñongā inte waocā adocanque ingante, Iīmāi cæe, āninque wacā ingante, Wadō bai cæe, angā ēñēninque mōnō tōmāmō wadō wadō nē cæmō iīmōmpa. ⁶ Ayæ Wængonguī adobai adocanque pōnī incæ tæī pīñængā iñongā inte waocā

adocanque ingante pönö cæcä æninque tömengä tæi piñængä badinque inte wadö cæcampa. Wacä ingante wadö pönö cæcä æninque tömengä tæi piñængä badinque wadö wadö cæcampa. Ìninque Wængongui mänömai wadö wadö pönö cæcä æninque mönö tömämö eyepæ badinque cæmompä.

⁷ Wængongui Öñowoca, Tömänäni waa quëwencædänimpa, ante cæedäni, ante tömämö ìmonte wadö wadö pönö odömönte apæñecä ëñëninque tömämö mönö waa quëwenguinque ante godongämæ cæmompä.

⁸ Ìninque Wængongui Öñowoca pancadäniya inänite, Wængongui nö nänö ëñëñö ante apæñecä ëñëninque tömëñäni nê nö ante apæñedäni badänipa. Ayæ adocä Öñowoca ìñömö Wængongui nänö cædö ante edonque odömöngä adinque pancadäniya nê adinäni badinque, Wængongui mänömai cæcampa, ante nö apæñedäni. ⁹ Adocä Wængongui Öñowoca apæñecä ëñëninque pancadäniya, Wængongui eyepæ pönö cæcampa, ante wede pönëñäni inte tömëñäni wede näni pönëñö beyænque nangui cædäniya. Ayæ Wængongui Öñowoca adocanque ìnogä inte pönö cæcä æninque pancadäniya wënæ wënæ inäni inänite gampote apæñedäni ate waa badänipa. ¹⁰ Pancadäniya inänite guiquënë Wængongui Öñowoca godö cæcä æninque tömëñäni tæi piñëñäni badinque nangui pönö cædäniya. Wængongui Öñowoca apæñecä ëñëninque wadäni Wængongui beyæ nê apæñedäni inänipa. Ayæ wacä yewænte bai tedecä adinque, Wængongui Öñowoca tedecantawo, wënæ tedecantawo, ante wæyönäni Wængongui Öñowoca pancadäniya inänite edonque odömöngä adinque tömëñäni, Æcänö öñowoca nê tedecä, ante do ëñëñäniya. Pancadäniya guiquënë Wængongui Öñowoca tönö apæñedinque wadäni näni tede bai nê tededäni inänipa. Ayæ ìñäni wadäni näni tede bai tededäni ëñëninque pancadäniya Wængongui Öñowoca apæñecä ëñëninque, Nê tededäni æbänö ante tededänii, ante do ëñëñäni inte wadäni inänite edonque pönö apæñedäni ëñëñäniya.

¹¹ Ìninque adocä Öñowoca adocanque ìnogä inte tömengä nänö nö angai bai cædinque mönö ìmonte apæñente æninque, Pancamüniya ìmai cæcæminimpa, wamüni ìmai cæcæminimpa, ante pönö cæcä æninque adocanque nänö cæquënëñö ante wacä nänö cæquënëñö ante edæ tömämö mönö cæquënëñö ante cæmompä.

Adocabomö bai ìmompä

¹² Mönö baö adoyonque pönö ëñamö incæ mönö wii adodonque cæquino ante ëñamö inte mönö pæ pagænguincöo watai watai ëñamompä. Edæ wadö mönö cæquino ante watai ëñadinque mönö wæætë wadö

cæquino ante watai watai ëñamompä. Ìninque watai watai nangui mönö ëñacoo ìñömö adoyonque pönö impä. Ayæ Codito nempo quëwëninque mönö adobai adocabomö ìmompä. ¹³ Mönö adocabomö mönö tömämö baquinque Wængongui Öñowoca mönongä pö guite owocampa. Ìninque oodeocä incæ guidiegocä incæ wacä ingante nê cæcä incæ abæ tawænte ee gote bai nämä beyænque nê cæcä incæ mönö tömämö adotaca bete bai Wængongui Öñowoca tönö äwocaque bai tömämö ëwocampä.

¹⁴ Mönö baö adoyonque pönö ëñamö incæ mönö wii adodonque cæquino ante ëñamö inte mönö ëñacoo watai watai nangui ëñamompä. ¹⁵ Ìninque mönö öñowa incæ, “Önompö ömæpobo inte botö waocä baö ömaabo ìmopa,” ante ædö cæte anguingä. Ìñæmpä mänömai wæte tedecä incæ öñowa cöwë waocä baö ëñate ëwacampä. ¹⁶ Ayæ mönö öñomonca incæ, “Awinca ömæmömo inte botö waocä baö ömaabo ìmopa,” ante ædö cæte anguingä. Ìñæmpä mänömai ante tedecä incæ öñomonca cöwë waocä baö ëñate ëmoncäcampa. ¹⁷ Ìñæmpä mönö baö tömäñö awincaque ëmömö bai edæ quimoncadö ëñenguënëi. Ëñëñämai incædömömpä. Ayæ mönö baö tömäñö öñomoncaque ëmoncamö bai quincadodö ongoncadoquënëi.

¹⁸ Incæte Wængongui ìñömö edæ, Waomüni müni cæquënëñö ante eyepæ cæcæminimpa, ante badoncaëboimpa, ante Wængongui angacäimpa. Ìninque tömengä nämä nänö angainö bai badöninque mönö pæ pagænguincöo adoyonque baquinque ante wadö cæquino ante wadö cæquino ante tömäñö badongacäimpa. ¹⁹ Edæ adodonque pönö mönö cæquënëñö ante Wængongui badongä bai mönö wadö mönö cæquënëñö ante quiodö pæ pagænte cæquënëi. ²⁰ Wængongui nänö nê badongaïmö ìñömö inte wadö mönö cæquino ante watai wadö mönö cæquino ante watai nangui mönö ëñacoo ëñamö incæ mönö baö adoyonque pönö ëñamompä.

²¹ Mänömai ëñamö ìñömönte edæ mönö awinca incæ önompö inte apæñedinque, “Bitö dæ ämi bai botö tömömo eyepæ cæcædömömpä,” ante ædö cæte angui. Ayæ wæætë mönö ocamö incæ öñowa inte apæñedinque, “Bitö dæ ämi bai botö tömömo eyepæ cæcædömömpä,” ante ædö cæte angui. ²² Wæætë mönö baö pancayonga pæ pagænämai i incæte mäniñö ante mönö godömenque waa adinque, Mönö quëwenguiñö impä, ante angæimpa. ²³ Wayö guiquënë, Wii wæmongä awædö, ante mönö ãñö ante, Waa acædänimpa, ante cædinque wæmoncöo pönö dadi ompogate mäniñö beyæ godömenque waa ate bai cæmompä. Wayö guiquënë mönö guiñëñate

wædō ante, Wīi edonque acæimpa, ante pōnō bee ogate cædinque mōnō guiñēñayō beyæ godōmenque waa cæmompā. ²⁴ Waēmō mōnō ayō guiquēnē, Edonque acæimpa, ante bee ogadāmai cæmompā.

Incæte, Adoyonque bacæimpa, ante mōnō baō wayō wayō badōninque Wængongui, Wīi waēmōngā, ante mōnō wæyō ante pōnēninque, Māniñō botō godōmenque waa abopa, ante badon-gacāimpa. ²⁵ Ininque, Minitō baoncoo nāēmæ piināmai incæminimpa, ante cædinque Wængongui mōnō baō adoyonque badon-gacāimpa. Wæætē mīnitō nāmā baoncoo incæ nāēmæ waadete waa cæcæminimpa, āninque Wængongui tōmāñō waa acampa. ²⁶ Ininque mōnō baō adoyōmonque nantate wæyōmō tōmāo wootæ wootæ nantate wæmompā. Ayæ wæætē adoyōmonque adinque, Waēmō impa, ānāni ēñente wædinque tōmāo watapæ tomompā.

²⁷ Minitō iñōmō, Wayō wayō ēñamō incæ adoyonque ēñamompā, ante dō pōnēninque, Mōnō adobai nānēnē nānēnē ingaimō inte ñōwo wæætē Codito nempo quēwēninque adocabomō imompā, ante pōnencæminimpa. ²⁸ Ininque Codito ingante godongāmæ mōnō pōnecabo imō adinque Wængongui angā ēñēninque iīmai cæmompā. Yæcadomōni imōni iñōmō Codito nānō da godongaimōni imōnīpa. Gao wæi ināni iñōmō Wængongui beyæ nē apænedāni inānīpa. Ayæ tæcæguedēnāni ināni iñōmō nē odōmonte apænedāni inānīpa. Wæænōmenque ināni iñōmō tæi piñænte entawente nē nangui cædāni inānīpa. Yæmiñæ gao æidinque ināni iñōmō Wængongui Ōnōwoca tōnō āwocadinque bai ēwocadinque iīmai cædānīpa. Pancadāniya, Wēnæ wēnæ ināni waa bacædānīpa, ante nē waa cædāni inānīpa. Pancadāniya wadāni beyæ nē waa cædāni inānīpa. Pancadāniya nē ānāni inōnāni inte awēñēidi inānīpa. Ayæ yæmiñæ pōni ināni iñōmō wadāni nāni tede bai nē tededāni inānīpa.

²⁹ Mānōmai imō incæte edæ Codito nānō nē da godongaimō dicæ tōmāmō imongaa. Ayæ Wængongui beyæ nē apæneimō dicæ tōmāmō imongaa. Nē odōmōmō dicæ tōmāmō imongaa. Nē tæi piñænte entawente nangui cædōmō dicæ tōmāmō imongaa. ³⁰ Ayæ Wængongui Awēñē pōnō cæcā incæte wēnæ wēnæ ināni nāni waa baquinque ante dicæ tōmāmō nē waa cæmongaa. Edæ wadāni nāni tede bai dicæ tōmāmō tedomongaa. Wacā mānōmai wadāni nāni tede bai tede cā ēñēninque tōmāmō dicæ mōnō tededō adodō edonque apænemongaa. ³¹ Incæte mīnitō Wængongui ingante, Bitō Ōnōwoca pōnō cæcā ate mōnitō eyepæ inte ate yæcado ongōnāni nāni cæi bai

adobai cæcæte ante nangui wæmōnīpa, ante apænedinque nangui cæedāni.

Mōnō waadete pōnente cæcæimpa, ante

Ñōwo iñōmō botō, Ēbānō godōmenque waa pōni cæquīi, ante yewæmonte odōmōmo aedāni.

13

¹ Botō waodāni nāni tede bai tede bopa, āmīnitawo. Wængongui anquedoidi nāni tede bai tede bopa, ante tomīnitawo. Ināmpa mōnō wadāni inānite waadedāmai inte tedomō ininque ampoincade ōnonque ampoi bai imaimpa. Waadedāmai inte tedomō ininque adoyōmō pōnō wo pōnō waa cæcānta bai mōnō adobai ōnonque tedewēmō imaimompā.

² Wængongui Ōnōwoca pōnōngā æninque botō tōmēngā beyæ nē apænebo imopa, ante tomīnitawo. Waodāni nāni wē wodonte ēñēngāñō tōmānō ante edonque pōni ate ēñēmopa, ante tomīnitawo. Waodāni nāni nangui ēñēnō ante adinque tōmānō ante ēñēmopa, ante tomīnitawo. Edæ nē wede pōnēmini inte mīnitō ānanquidi incæ āmīni ēñente cabænte gotawo. Ināmpa māniñō tōmānō waa pōni cæmō incæ mōnō wadāni inānite waadedāmai inte cæmō ininque wæætē ōnōmonque edæ mōnō babaimpa.

³ Ōmæpodāni inānite botō māincoo tōmāā nēnepote godōmopa, ante tomīnitawo. Wængongui beyæ ante cæyōmote wadāni botō baō botō ēñayō incæ iya tancæ cædāni ate wædinque botō piyænē cæbaimopa, ante mīnitō, Waa cæbopa, ante tomīnitawo. Ināmpa māniñō tōmāā waa cædinque mōnō waadedāmai inte cæmō ininque mōnō waa cædō beyæ ænāmāi imaimompā.

⁴ Nē waadete pōnēngā iñōmō tōmēngā piināmai inte edæ piyænē cædinque godō waadete cæcampa. Wadāni gomonga cædinque godōmenque nangui ænāni adinque nē waadecā wæætē waadete pōnēninque piinte wædāmai inte piyænē cæcampa. Nāmā nānō cædinō ante pōnēninque nē waadete pōnēngā iñōmō, Botō gomonga cæbopa, ante tededāmai ingampa. Tōmēmoque waēmō imopa, ante nāmā waa adāmai ingampa. ⁵ Wacā tæcæ cæyongante nē waadete pōnēngā iñōmō, Tāno cæbote, ante wææ cædāmai ingampa. Nāmā nānō æñēnō ante cædāmai inte tōmēngā wadāni beyænque cæcampa. Wæætē wīi iñontobæ ænguī bacampa. Wadāni wēnæ wēnæ cædāni ate wædinque tōmēngā nē waadecā inōngā inte wæætē piyænē cæcampa.

⁶ Ininque, Wacā wēnæ wēnæ cæcampa, ante tededāni ēñente wædinque nē waadete pōnēngā iñōmō māniñō ante todāmai ingampa. Wæætē, Wacā nōingā cæcampa, ante tededāni ēñēninque tōmēngā watapæ

pöni tocampa. ⁷ Æbämë cædäni incæ nê waadete pönengä iñömö piyænë cædinque tömänäni inänite wææ gom pocampa. Wæætë, Waa cædänipa, änäni ëñëninque tömengä, Näwangä impa, ante do ëñengampa. Æbämë ba incæte tömengä, Ayæ ate watapæ bacæimpa, ante cöwë pönëninque wæntædämaï inte ee cæcampa.

⁸ Mönö waadete pönëmämo iñömö cöwë dæ badämaï ingæimpa. Wæætë Wængongui iincayæ ate, Idæwaa, angä iñinque ingui poga tömengä beyæ mönö apænëdö guiquënë edæ dæ angæimpa. Wadäni näni tede bai mönö tededö incæ pæ wëñecæimpa. Ingui poga nanguï adinque mönö ëñënö ante Wængongui, Idæwaa, ancæcäimpa.

⁹ Nöwo mönö ëñënö iñömö pancaä ëñëninque pancaä wæætë oda cæmopma. Wængongui beyæ mönö apænëdö iñömö pancaä apænëdinque mäninque apænëmopma.

¹⁰ Iñinque bayedë guiquënë Wængongui näno apænëdö ædæmö ëñëninque mönö nöingä pöni odömonte apænecæmöimpa. Oda cæte mönö ëñënö ante, Idæwaa, äninque Wængongui mänifedë edæ mönö wï eyepæ apænëte wædö ante, Idæwaa, ancæcäimpa.

¹¹ Botö iñömö wëñæmoyedë wëñængä näno tede bai tededinque wëñængä näno ocai ëñënö bai ëñengäimo inte wëñængä, iïmaï impa, ante näno pönënö bai botö mänifedë adobai pönengaboimpa. Nöwo guiquënë picæmö badinque wëñæmoyedë botö cægäinö ante ñimpo cæbopa.

¹² Awocawænta wëmö ate bai cædinque mönö ñöwo Wængongui Önöwoca näno odömöno ante edæ wï edonque amopma. Ayæ ate guiquënë mönö awincadö awinca edonque pöni acæimpa. Botö ñöwo pancaä adinque oda cæte ëñëmö iïmpa. Ayæ ate guiquënë Wængongui pönö odömongä adinque tömengä botö imote edonque pöni acä bai botö adobai tömää eyepæ pöni acæboimpa.

¹³ Iñinque mönö entawënoncoo ante adinque mënonque go adodonque mänimpodonque ayæ ongopma. Mönö wede pönënö ante ædæmö entawengæimpa. Watapæ bacæimpa, ante mönö pönënö ante ædæmö entawengæimpa. Mönö waadete pönënö ante ædæmö entawengæimpa. Iñinque mänimpodonque ayæ ongö incæte mönö waadete pönënö iñömö edæ ñænænö pöni i iñinque mönö mäninö ante täno ædæmö entawengæimpa.

14

Wadäni näni tede bai æbänö tedequï, ante

¹ Iñinque munitö, Nê waadete pönëmö bacæimpa, ante mäninonque ante pogodo

gote bai nanguï cædäni. Ayæ adobai, Wængongui Önöwoca mönö imonte näno pönönö bai mönö eyepæ ewocadinque cæcæimpa, ante nanguï æinente wæedäni. Mäninö Wængongui Önöwoca näno pönönoncoo ate adinque munitö, Wængongui beyæ nê apænëmö mönö täno adodonque ante bacæimpa, ante godömenque æinente wædinque cæedäni. ² Edæ wadäni näni tede bai æcänö tededa tömengä wï waodäni inänite apænecampa. Wængonguinque ingante apænecampa. Edæ tömengä önöwocaque tedecä iñinque tömengä ingante Wængongui æbänö awëmö apænecäa, ante ædö cæte ëñenguinäni. ³ Wængongui beyæ nê apænecä guiquënë waodäni inänite waadete pönëninque iïmaï cæcæte ante apænecä ëñënanipa. Minitö tæi piñæmüni mini entawenguinque wede pönencæminimpa, ante apænecampa. Ayæ, Wæwente quëwëmüni incæ munitö wampo bawëmente tæi piñænte cöwë cæcæminimpa, ante tömengä Wængongui beyæ ante pönö apænecampa. ⁴ Wadäni näni tede bai nê tedecä guiquënë, Tömëmo tæi piñæmo botö entawenguinque ante nanguï ëñencæboimpa, ante nämä beyenque ante tedecampa. Wængongui beyæ nê apænecä guiquënë Cedito ingante näni godongämæ pönencabo beyæ ante apænëdinque, Minitö tæi piñænte mini entawenguinque ëñencæminimpa, ante apænecampa.

⁵ Iñinque munitö tömämini wadäni näni tede bai apænëmini adinque botö wædænque tobaïmopa. Wæætë tömämini Wængongui beyæ apænëmini adinque botö godömenque watapæ tobaïmopa. Wængongui beyæ nê apænecä iñömö ñænængä iñongä wacä tededö nê tedecä guiquënë wædangä ingampa. Incæte, Cedito ingante näni godongämæ pönencabo tæi piñænte entawencæminimpa, ante cædinque tömengä wacä tededö tedete ate, iïmaï ante tedetabopa, ante munitö tededö adodö ante edonque apænecä iñinque tömengä adobai ñænængä inongä imaingampa. ⁶ Iñänäni ëñëedäni. Wængongui näno wë wodönö incæ tömengä näno nö ëñënö incæ tömengä näno nö odömöno inçæ ante botö munitö weca pöninque odömonte apænëbo ëñëninque munitö godömenque pönëmaïminipa. Wængongui iïmaï cæcæcäimpa, ante apænëbo ëñëninque munitö guifente wædinque waa cæbaïminipa. Wæætë munitö weca pöninque botö wadäni näni tedebai tedete apænëbo bai munitö ædö cæte godömenque nê pönëmüni baquëñëni.

⁷ Edæ gobæ ongonate aa pedinque önonque ante pedäni ëñëninque mönö wæætë, Ædemë ante pedänipa, ante ædö cæte ëñenguï. Nê ampoinca ampodäni adobai ämotamüni inämaï önonquedö ante ampodäni

ēñēninque mōnō, Ædemē ante ampodānīpa, ante ædō cæte ēñenguīl. ⁸ Ayæ tontado adobaī, Wæætēdō wæætē cæcæīmpa, ante todompeta nāni ancadeca we ōōninque idiquibæ we ōōngā īninque wadāni, Æbāmē cæcæte ante we ōōngāā, ante wædinque oda cæte ee ongonde wæætēdō wæætē cædāmai īmānānīpa. ⁹ Ayæ mīni cabo adobaī wī edonque apænemīni ēñēninque wadāni, Æbāmē ante tedecāā, ante wædinque oda cæte wæbānānīpa. Woboyæ māmoque īñæmpa tedewēmaīmīnīpa.

¹⁰ Waodāni inguipoga tōmāo quēwēninque nanguī nāni tededoncoo tededānīpa. Nāwangā īmpa. Incæte wadāni nāni tededō wadāni nāni tededō tōmāā tedequinō ī īninque adodeque incæ ōnonque tedete īnāmai īmpa. ¹¹ Īninque wacā apænecā ēñēninque botō, Æbānō ante tedecāā, ante ēñēnāmai īmo adinque tōmēngā wæætē, Wabi inte wī ēñēmīpa, ancædongāīmpa. Tōmēngā ingante botō adobaī, Wabi inte botō tededō wī tedebīpa, ante ancædōmoīmpa. ¹² Īninque mīnitō, Wængonguī Ōnōwoca pōnō cæcā æninque mōnō eyepæ ēwocadinque cæcæīmpa, āmīnitawo. Mānōmaīnō āninque mīnitō, Wængonguī Ōnōwoca pōnō cæcā ænte ēwocadinque cædōmō inte mōnō Codito ingante mōnō godongāmæ pōnencabo godōmenque tæī piñænte entawengæīmpa, ante pōnēninque mīnitō, Mānīnonque ante botō ēwocate cæquinō ante pōnongā æncæboīmpa, ante tāno æīnente cædāni.

¹³ Mānōmai beyæ wadāni nāni tede bai nē tedemīni īñōmō mīnitō tōniñadāni adobaī ēñencædānīpa, ante cædinque Wængonguī ingante īmai ante ædāni. Wængonguī ēñēmī. Wadāni nāni tede bai do tededinque botō æbānō ante tetedawo, ante bitō odōmote apænēbi ēñēmoe. Mānōmaīnō ante apænēbi ēñēninque botō wæætē mōnitō tededō adodō ante edonque apænebo ēñēninque mīnitō Wængonguī ingante apænēte cædāni. ¹⁴ Wadāni nāni tede bai tededinque Wængonguī ingante apænebo inte botō ōnōwocaque pōnente apænedinque ocai ōmædæcabo bai inte apænebaīmpa.

¹⁵ Mānōmai īmpa, ante adinque æbānō cæquīmoo. Edæ ōnōwoca pōnente apænedinque botō ocai adobaī ēñente pōnēninque Wængonguī ingante apænecæboīmpa. Ayæ Wængonguī ingante waa pōni apænecæte ante ōnōwoca pōnente āmotamīni āninque adobaī ocai ēñente pōnēninque āmotamīni ancæboīmpa. ¹⁶ Bitō, Wængonguī ingante waa pōni cæcampa, ante ōnōwocaque pōnēninque apænēbitawoo. Īñæmpa Wængonguī ingante waa ate pōnēninque ōnōwocaque pōnente apænēbi ēñēninque wacā nē

ōnonganque ingā guiquēnē, Bitō æbānō apænēbīi, ante ēñēnāmai inte, Ædō cæte Ao anguīmoo, ante wæbaingampa. ¹⁷ Bitō waa ate pōnēninque ōnōwocaque waa apænēbi ēñēninque tōmēngā wæætē, Bitō æbānō ancæte ante tedebīi, ante ēñēnāmai inte ædō cæte godōmenque tæī piñænte entawengūngāā. ¹⁸ Botō īñōmō, Mīnitō wadāni nāni tede bai wædænque tede yōmīni botō godōmenque nanguī tede bopa, ante Wængonguī ingante waa ate pōnēninque apænēbopa. ¹⁹ Incæte Codito ingante mōnō pōnencabo tōnō godongāmæ pōninque botō wadāni nāni tede bai tæne tīnco mīdo ganca tedequī incæ wī tededinque wæætē, Wadāni ēñencædānīpa, ante mēnea pōni edonque apænedinque waa tobaīmpa.

²⁰ Īñānāni ēñēdāni. Tæcæ ēñadāni īñōmō wēnæ wēnæ mōnō cæpāmo ante ēñēnāmai īnānīpa. Mīnitō adobaī mānīnō wēnæ wēnæ mōnō cæpāmo ante ēñēnāmai inte bai pōnēdāni. Wæætē ocai mōnō pōnēnō guiquēnē mīnitō mānīnō ante wēñæñāninque wædænque nāni encadō bai wī pōnēninque wæætē picænāni nāni nanguī encadō bai adobaī nanguī encate pōnēdāni. ²¹ Dodāni mōnō Awēnē beyæ ante wææ āninque īmai ante yewæmongadānīpa. “Wadāni nāni tede bai nē tededāni īnānīte botō āmo ēñēninque tōmēnāni wæætē botō quīnāni īnānīte apænecædānīpa. Incæte īñāni guiquēnē botō imote cōwē ēñēnāmai inguīnāni awædō, ante mōnō Awēnē angampa,” ante yewæmongatīmpa.

²² Īninque, Wadāni nāni tede bai tedemīni ēñēninque nē pōnēnāni wædāmai īñōnāni nē pōnēnāmai īnāni guiquēnē mānōmai tedemīni ēñēninque guīñente wæcædānīpa, ante cædinque Wængonguī Ōnōwoca pōnō cægacāīmpa. Wæætē Wængonguī beyæ ante edonque apænemīni ēñēninque nē pōnēnāmai īnāni wædāmai īñōnāni nē pōnēnāni guiquēnē do ēñencædānīpa, ante cædinque Wængonguī Ōnōwoca pōnō cægacāīmpa. ²³ Codito ingante mīni pōnencabo godongāmæ pōninque tōmāmīni wadāni nāni tede bai wadāni nāni tede bai tedemīni adinque ayæ pōnāni guiquēnē nē ēñēnāmai īnāni incæ nē pōnēnāmai īnāni incæ æbānō anguīnāni. Mānōmaīnonque tedemīni ēñēninque tōmēnāni wæætē, Mīnitō ōmædæcamīni inte ōnonque tedewēmīnīpa, ante wæbānānīpa.

²⁴ Tōmāmīni wæætē Wængonguī beyæ edonque apæneyōmīni nē pōnēnāmai ingā incæ nē ēñēnāmai ingā incæ ponte ēñēninque tōmāmīni mīni apænēdō beyæ tōmēngā, Botō wēnæ wēnæ cætabopa, ante wæbaingampa. Ayæ Wængonguī beyæ āmīni ēñente wædinque tōmēngā, Botō nāwangā wēnæ wēnæ cædōmo inte

wentamō mongænte awædō, ante nāmā apænte āmaingampa. ²⁵ Ayæ tōmengā mīmōno nānō wentamō wē wodōnincoo da tadonte ate bai edonque ate wædinque tōmengā ædæ wæænte guidōmēmæ ñongæninque Wængongui ingante, Bitō adobique nē waa cæbi imipa, ante waa apænebaingampa. Ayæ mīnitō iminite, Nāwangā Wængongui Ōnōwoca tōnō āawocaque bai ēwocāmīnīpa, ante apænebaingampa.

Quiēmē cæmīni incæ nōingā pōnente ædæmō cæedāni

²⁶ Mānōmaī ī īninque iñānāni, mōnō æbānō cæquīlī. Wængongui Ōnōwoca pōnō cæcā æninque eyepæ inte mīnitō tōmāmīni godongāmæ pōninque iīmaī cæmīni incæmīnīpa. Adocanque āmotamīni adodeque angā ingampa. Wacā odōmoncæte ante adodeque apæneca ingampa. Wacā ingante Wængongui edonque odōmonte apæneca ēñēningā inte tōmengā adodō ante adodeque ante odōmonte apæneca ingampa. Wacā guiquēnē wadāni nāni tede bai adodeque tedecā ingampa. Tōmengā æbānō ante tedecā, ante wacā do ēñēninque mīnitō tededō wæætē edonque apæneca ingampa. Mānōmaī wade wade ante nē apænemīni inte mīnitō tōmāmīni, Godongāmæ tæī piñænte entawengæimipa, ante iīmaī cæte tedecæmīnīpa. ²⁷ Wadāni nāni tede bai te deyongā wacā adotedæ wææ tededāmaī incæcāimipa. Māningā īnque tedecā ate wacā tedecæcāimipa. Ayæ wæætē wacā, Tedecæboimipa, angā Ao āmīni tedecā ate idæwaa. Mānimpodānique tedete ñīne cædāni adinque wacā ēñēninque, Æbānō ante tededāni, ante mīnitō tededō edonque apæneca ēñēncæmīnīpa. ²⁸ Codito ingante mīni pōnencabo weca nē ēñente adodō apænequēnengā dæ angā īninque edæ wadāni nāni tede bai nē tedeinente wæcā iñōmō wæætē ee adinque tededāmaī inte pæ wēēnecæcāimipa. Tōmengā nāmā incæ ōnōwēnenque tedete Wængongui ingante tedecæcāimipa.

²⁹ Wængongui beyæ nē apænedāni adobai mengāa pōni apænedāni ate idæwaa. Mānimpodānique apænedāni ēñēninque mīnitō, Nō ante apænedāni, idi quibæ ante apænedāni, ante apænte ante ēñēncæmīnīpa. ³⁰ Ayæ adocanque tæcæ apænee gōñongā wacā nē ēñēe congā ingante Wængongui Ōnōwoca iñontobæ apæneca ēñēninque tōmengā, Botō apænecaæboimipa, angā ēñēninque nē apænedingā wæætē apocænē edæ ēamonca ēñēe concæcāimipa. ³¹ Edæ Wængongui beyæ apænedinque adocanque tāno apænete ñīne cæcā ate wæætē wacā wæætē wacā apænete ñīne cæcæcāimipa. Mānōmaī

cædinque mīnitō godongāmæ ēñente badinque wampo bawēnente ongocæmīnīpa. ³² Wængongui beyæ nē apænedāni iñōmō tōmēnāni nāmā ōnōwoca wææ āninque ōnōwēnenque wædāmaī inte ocai pōnente apænedāni. ³³ Edæ Wængongui incæ nē gānē pōnēnongā inte Yæ yæ wapiticæ godō tededāmaī ingampa cæmīni.

Wængongui quīnāni Codito ingante nāni pōnencabo tōmānāni wayōmō nāni cabo wayōmō nāni cabo godongāmæ pōninque nāni cæī bai cædinque, ³⁴ mīnitō adobai Codito ingante mīni pōnencabo godongāmæ pōñōmīni onquiyæñāni inānte āmīni tededāmaī incædānīpa. Edæ, Apocænē ēñēmæwedāni, ante Mōitēe wodi nānō wææ angā bai cædinque onquiyæñāni wæætēdō wæætē ānāmaī inte ongūiñæñāni nāni ānonque ēñēninque edæ ēñēe concædānīpa. ³⁵ Æbānō ante apænedāni, ante ēñencæte ante wædinque onquiyængā oncōnē gote ate angā ēñēninque tōmengā nānōogængā wæætē adodō apæneca ēñēncæcāimipa. Edæ Codito ingante mīni pōnencabo godongāmæ pōñōmīni onquiyængā iñōmō, Guīñēnete awædō, āninque ee tededāmaī incæcāimipa.

³⁶ Iñæmipa, Wængongui nānō angāinō ante mīnitō adomīnique dicæ mā pōnēninque odōmōmīnitawogaa. Wadāni ēñēnāmaī iñōnānite mīnitō dicæ adomīnique Wængongui nānō apænedō ante ēñēmīnitawogaa. ³⁷ Bitō, Wængongui beyæ nē apænebo imopa, āmitawo. Wængongui Ōnōwoca pōnō cæcā æninque botō eyepæ ēwocadinque nē nanguī cæbo imopa, āmitawo. Mānōmaī ēwocabi inte do ēñēni īninque bitō, Mōnō Awēnē nānō wææ angāinō ante Pabodo māñinonque ante yewæmongampa, ante, Nāwangā imipa, ante apænebaimipa. ³⁸ Wæætē māñinō ante æcānō ēñēnāmaī ina tōmengā ingante wæætē mōnō ēñēnāmaī ingæimipa.

³⁹ Iñānāni, Mānōmaī imipa, ante pōnēninque mīnitō, Wængongui beyæ apænecaimipa, ante cæcæte ante cōwē nanguī cæedāni. Ayæ, Pancadāniya wadāni nāni tede bai apænedāni, ante adinque mīnitō Baa ānāmaī iedāni. ⁴⁰ Incæte quīēmē cæmīni incæ mīni pōnencabo mīni godongāmæ watapæ quēwenguinque ante nōingā pōnente ædæmō cæedāni.

15

Codito ñāni ōmæmongacāimipa, ante

¹ Nōwo botō tōniñāmīni ēñēedāni. Codito ingantedō ante botō do watapæ apænebo ēñēninque mīnitō māñineque ante Ao ante wede pōnēninque edæ tæī ongōmīnitapa. Nōwo guiquēnē mīnitō, Māñine ante æbānō intawoo, ante oda cædāmaī incæmīnīpa, ante botō adodō ante ædæmō odōmonte

yewæmōmoi aedāni. ² Mānīne ante watapæ apænebo eñēninque edæ mīnitō adode ante wede pōnēninque tæi ongōmīni inte edæ mānīne beyænque quēwēmaimīnīpa. Wæætē mānīne botō watapæ apænedō ante æmæ pōnēmīni ininque mīni pōnēmīmāmo incæ ōnōmāmoque pōnī babaimpa.

³ Edæ mōnō Codito tōmengā nānō pōnō cægainō ante botō eñēnō ante botō doyedē, Mānīne ante mōnō tāno pōnengæimpa, ante pōnō apænebo eñēmīnitapa. Nōwo wæætē, Eñencæmīnīmpa, ante botō adode ante yewæmōmo acæmīnīmpa. Wængonguī angā eñēnte nāni yewæmongainō bai ininque cædinque mōnō Codito iñōmō wēnæ wēnæ mōnō cægainō ante teēmē mongænte wæætē wængacāimpa, ante impa.

⁴ Ayæ, Wængā ate tōmengā baō iñi ō ænte māo daga wengadānīmpa. Ayæ Wængonguī angā eñēnte nāni yewæmongainō bai cædinque Codito mēōnaa go adoōnæque iñonte do ñāni ōmæmōnte mīngā quēwengacāimpa, ante mānīne ante impa.

⁵ Ayæ ñāni ōmæmōnte quēwēnōngā inte tōmengā dobæ Pegodo weca ponte a ongongā acantapa. Ayæ ate tōmengā nānō nē ēmiñængaināni, Dote, nāni ānōnāni weca dobæ ponte a ongongā adānitapa.

⁶ Ayæ ate mōnō tōniñadāni quīniento ganca ayæ godōmenque nangui ināni godongāmæ ongōñōnāni tōmengā tōmēnāni weca do ponte edæ a ongongā adotedæ agadānīmpa. Iñāni iñōmō pancadāniya ñōwo do wengadānīmpa. Pancadāniya nangui ināni nē againāni incæ ayæ mīināni quēwēnānīpa. ⁷ Mānīnāni adāni ate Itota wæætē Tantiago weca a ongongā agacāimpa. Ayæ ate tōmengā nānō nē da godongaināni weca adocā Itota ponte a ongongā agadānīmpa. Itota mānōmai cægacāimpa, ante botō, Mānīne tāno pōnengæimpa, ante yewæmōmopa.

⁸ Botō guiquēnē nē wæmpodingā bai inte wæyōmote tōmengā ñōwo pōnī botō weca a ongongā atabopa. ⁹ Edæ Codito tōmengā nānō nē da godongaimo imo incæ botō wadāni tōmengā nānō nē da godongaināni bai wīi adobaī imopa. Edæ Itota ingante godongāmæ nāni pōnencabo inānite nē togænte pangaimo inte botō wædāmo pōnī imopa. ¹⁰ Edæ æbāmē imo incæte Wængonguī waadete pōnō cæcā beyænque botō mānōmai imopa. Edæ tōmengā nānō pōnō cædō ante botō wīi ōnonque cæcæte ante æmoimpa. Wæætē wadāni wædænque cæyōnāni tōmengā waadete pōnō cæcā ænīnque botō godōmenque nangui cætabopa. Incæte botō dicæ tōmēmoque adoboque cæbogaa. Wæætē Wængonguī nānō waadete pōnō cædō ænīmo inte botō tōmengā tōnō cædinque nangui cæbo imopa. ¹¹ Iñinque

botō apænebo incæ tōmēnāni apænedāni incæ mōnō Codito tōmengā nānō pōnō cægainōque ante tōmāmōni apænemōnīpa. Mānīneque ante apænemōni eñēninque mīnitō mānīneque ante pōnēmīnitapa.

Do wængaināni incæ ñāni ōmæmoncædānīmpa, ante

¹² Iñinque, Codito do ñāni ōmæmongacāimpa, ante apænemōni eñēmīni incæte pancamīniya, Nē wængaināni dicæ ñāni ōmæmōnāniyaa, ante ædō cæte ānewēmīni.

¹³ Iñæmpa, Cōwē ñāni ōmæmōnāmai ināni bai mōnō Codito incæ adobaī ñāni ōmæmōnāmai incædongāimpa. ¹⁴ Ayæ

Codito ñāni ōmæmōnāmai ingā bai tōmengā waa pōnī nānō pōnō cægainō ante quīnante apænequēnēmōnī. Edæ ōnonque pōnī bacædōnīmpa. Ayæ

ōnonquedō ante apænemōni bai mīnitō mānīne ante pōnēmīni incæ ædō cæte quēwenguēnēmīni. ¹⁵ Mōnitō godōmenque Wængonguī ingante ante apænedinque, Codito ingante Wængonguī incæ angā ñāni ōmæmongacāimpa, ante apænetamōnīpa.

Iñinque, Nē wængaināni cōwē ñāni ōmæmōnāmai inānīpa, ante mīni ānewēnō iñōmō nāwangā i bai mōnitō Wængonguī nānō cægainō ante babæ wapiticæ ante edæ apænecædōmōnīmpa. Edæ, Cōwē ñāni ōmæmōnāmai inānīpa, ante mīni ānewēnō nāwangā i bai Wængonguī, Ñāni ōmæmōe, ante ædō cæte anguēngæā.

¹⁶ Iñæmpa, Ñāni ōmæmōnāmai inānīpa, ante mīni ānewēnō nāwangā i bai Codito incæ adobaī ñāni ōmæmōnāmai incægacāimpa.

¹⁷ Ayæ Codito ñāni ōmæmōnāmai ingā bai mīnitō mīni wede pōnēnō incæ ōnonque pōnī pōnente incædōnīmpa. Iñinque wentamō mīni mongænō ædō cæte ñā mēnongaquēnēmīni. Mīni

wēnæ wēnæ cædinō beyæ wentamō mongænte wæcædōmīnīmpa. ¹⁸ Mānīnō ante mīni ānewēnō nāwangā i bai Codito nempo quēwēninque do wængaināni incæ do mempoga wæninque ædō cæte quēwenguēnēnāni. Quēwēnāmai incædōnānīmpa. ¹⁹ Codito pōnō ængā

beyænque mōnō adopoque wæninque wæætē wænāmai quēwengæimpa, ante mōnō inguipogaque pōnēninque wæmo bai wadāni wædænque wæwēñōnāni mōnō godōmenque nangui wæwenguēnē incædōnīmpa.

²⁰ Incæte Codito dobæ ñāni ōmæmongacāi apa ānewēmīni. Edæ waodāni tānomō amiñayonte tā pedāni bai cædinque Wængonguī adobaī, Do wængaināni inānite āmo ñāni ōmæmoncædānīmpa, ante cæcæte ante cædinque Codito Tānocā ingante do angā eñēninque ñāni ōmæmongacāimpa. Nāwangā impa, ante āmo eñēmaimīnīpa.

21 Edæ waocæ incæ adocanque eññēnāmaī cæcā beyænque mōnō wænguimāmo pongatimpa. Ayæ nē wænguēnēmō inte wæyōmonte Nōwocā Waocā eñgagāngā inte wæñninque ñāni ōmæmongā beyænque mōnō ñāni ōmæmonte quēwenguimāmo adobai pongatimpa. 22 Edæ mæmæ Adāō wodi tōmengā tōnō tōmāmō godongāmæ nē wænguēnēmō bagaimō inte mōnō tōmāmō adobai Codito tōnō godongāmæ nē ñāni ōmæmonguimō bagamōimpa. 23 Incæte to amiñayedē tānomō ñāni tā pedōmō bai ñonngā inte mōnō Codito adobai Tānocā ñonngā inte edæ tāno ñāni ōmæmongacāimpa. Codito nempo nē quēwēnōmō guiquēnē mōnō ayæmō ñōmō inte edæ tōmengā ñānō ponguionæ ñinque ba ate mōnō māniñedē ate nē ñāni ōmæmonguimō ñompa.

24 Māniñedē ate inguipoga awēnē odeyeidi nempo ongoncoo incæ Codito tōmancoo ō ænte ōmæe ewencæcāimpa. Ñæñæñāni ñāni ānōmāmo adobai tōmāmāmo ōmæe ewencæcāimpa. Tæī piñæñāni ñāni nangui cædoncoo incæ Codito adocā incæ tōmancoo wido cæcæcāimpa. Ayæ adocā nē Awēnē Odeye ñonngā inte tōmengā nempo ongoncoo wæætē edæ Mæmpo Wængongui nempo edæ pædæ godongā æninque Mæmpo Wængonguinque tōmenganque adocanque Awēnē Odeye ñonngā incæcāimpa. Māniñedē ate edæ ñōwo mōnō quēwēmāmo ñōmō edæ ñinque baquīnō anguēnē. 25 Incæte Wængongui Codito ingante, Bitō ñite nē piinte cægaināni tōmāñāni ñānite mō gongæncæbiimpa, ante cædinque tōmengā ōnōwā gāñē ñānō wææntodonganca edæ adocā Codito incæ māniñō ñānō ñinque cæganca nē Awēnē ñonngā ingampa.

26 Ayæ tōmengā ingante nē piinte cædāni ñānite æmæwo bæ tacā adinque adoque pōni mōnō wænguimāmo incæ ayæ ongō adinque Wængongui, Mānimāmo dæ bacæimpa, ante māo ōmæe ewencæcāimpa. 27 Tōmengā nempo Wængongui tōmancoo pædæ godongā æninque tōmengā nē Awēnē bacæcāimpa, ante do yewæmngatimpa. Māñōmāñō ante yewæmonte ongō incæte Wængongui nē pædæ godōnongā inte ædō cæte, Nāmā pædæ godōmopa, anguingā, ante edonque acæimpa. 28 Ayæ ate Wængongui Wengā incæ, Mæmpo Wængongui botō nempo tōmancoo nē pædæ pōnongā inte tōmengā adocanque pōni Tæiyæ Awēnē badinque tōmenganque tōmancoo ēnempocæcāimpa, ante cæcæcāimpa. Māñōmāi cæte ate tōmengā adobai Mæmpo Wængongui nempo quēwēninque Mæmpo ñānō ānonque ante eññente cæcæcāimpa.

29 Pancadāniya edæ, Do wængaināni

beyænque cæmōnipa, ante cædinque tōmēñāni beyæ æpæñē guidānipa. ñinque, Ñāni ōmæmōñāmaī ingæimpa, ante ñāni ānewēnō nāwangā i bai tōmēñāni æbānō cæquēñēñāni ñāni. Edæ, Ñāni ōmæmōñāmaī ingæimpa, ante nāwangā i bai edæ tōmēñāni nē wængaināni beyæ quīnante æpæñē guiquēñēñāni. 30 Ayæ ñāni ānewēnō nāwangā i bai mōnitō ññōmō quīnante mōni wantæ ññō wantæ ññō wodo wænguimō ante wæquēñēmōñi. 31 Botō ñimō ññō ñimō ññō do wæwocabo ññōmō ñmopa, ante nāwangā āmopa. Botō mōnō Awēnē Itota Codito nempo quēwēninque mīnitō ñmīnite ante pōñēninque watapæ tobopa, ante nāwangā antawoo. Edæ botō tōññāmiñi ññōmīnite botō māniñō ante nāwangā āñimo inte, Wæwocabo ñmopa, ante adobai, Nāwangā ñmopa, ante āmo eññēmañmīpa. 32 Waomō mōnō æññēnō æncæte ante botō epetoidi babæidi bai ññāni tōnō guēa wæætēdō wæætē cæbo bai ōnonque cæte incædōñmopa. Edæ, Do wængaināni ñāni ōmæmōñāmaī incædāñmopa, ante nāwangā i bai botō, “ñimō ate mōnō æmæwo wænguinque ante cænte bete tocæimpa,” ante ñāni ānewēnō bai ante ee quēwēncædōmōimpa.

33 ññæmpa māñōmāñō ante tedewēñāni eññēninque mīnitō wæætē oda cædāmaī ñmæwedāni. Edæ do yewæmōñinque, “Wīwa cædāni tōnō guēa cædinque bitō adobai wapiticæ quēwēnguinque godongāmæ cæbipa.” 34 Ante wææ āñāni eññēdāni. Edæ, mīnitō wēñæ wēñæ cæmīni adinque Wængongui ingante ante eññēñāmaī ññāni ññōmō oda cæbaināñmopa. Māñōmāi beyæ mīnitō guingo ñmōnte wæquēñēñmīni ññōmīni inte nō cæte quēwēninque edæ wēñæ wēñæ cædāmaī ñēdāni.

Do wængaināni ññāni ōmæmoncædāñmopa, ante

35 Bitō, Do wængaināni æbānō cæte ñāni ōmæmonguñāni, ante āmitawo. Ayæ, Ñāni ōmæmōñinque mōnō baō quīnō bai eññate ponguimōō, ante eññencæte ante wæbitawo. 36 ññæmpa ōnonquedō ante wæbi awædō. Edæ waocā tōmēmō quiyacā ate yabæque ññōmāate ate tā bocate pædimō bai mōnō baō adobai inte ññōmængæñmopa. 37 ññæmpa todigo incæ wawæ incæ bitō, Tā bocate pæcæñmopa, ante cædinque do pædiwæ tōmēwæ æññāmaī inte tōmēmonque ænte godō quiyabi ate tā bocate pæpa. 38 Incæte, Tōmēwæ æbānō ñwæ pæquiwæ, ante ñāmā ñānō angāññō bai cædinque Wængonguinque pōñō badongā ate tā bocate pæpa. Wamō tā bocate pædinque æbānō ññāquī, wamō æbānō ññāquī, ante do eññēngāngā inte Wængongui pōñō badongā ate wainca wainca ññāpa.

³⁹ Tömāñō baō wī adoyō bai ēñōmpa. Mōnō waomō baō wayō ēñamōmpa. Ööngāidi baō wayō ēñadānīpa. Ayamōidi baō wayō ēñadānīpa. Gæyæidi baō wayō ēñadānīpa. ⁴⁰ Ayæ öönæde quēwēnāni wayō mongæñōnāni inguipoga quēwēmō iñōmō wayō ēñamōmpa. İnīnque öönæde quēwēnāni waa nāni ēñadō wayō iñonte inguipoga quēwēmō waa pōnī mōnō ēñayō guiquēnē wī adobaī ēñamō İmōmpa. ⁴¹ Woyowotæ apāicā İñōmō İtæde nænque nānō apāi bai wī apāicampa. Pönōmenque pōnī apāicampa. Nēmōidi guiquēnē wadō bai apāidānīpa. Edæ nēmōidi incæ pancadānīya nāmōināni inte wædænque apāiyōnāni pancadānīya waa pōnī emōnāni inte guinæ nangui apāidānīpa.

⁴² Mānī quiyadīmō yabæque nōmāate ate tā bocate pædimō bai mōnō adopoque wæmō ate mōnō baō adobaī aquīñō inte nōmæmpa. Wæætē İncayæ ate mōnō baō nōmāadāmaī inguinque wæætē nāni ömæmonguimō İmōmpa. ⁴³ Ayæ mōnō guīñēñate wægaīñō wido cæte ate mōnō waa pōnī ēñaquinque nāni ömæmongæİmpa. Edæ mōnō aquīñō wido cædinque mōnō tæi pīñæñō baaquinque nāni ömæmongæİmpa. ⁴⁴ Edæ inguipogaque quēwēninque mōnō ēñayō wido cæte ate mōnō öönæde pōnīwoca ēñate ewocadinque mōnō waiñō pōnī ēñate nāni ömæmongæİmpa.

⁴⁵ “Adāō wodi tānocā İnongā inte nē ewocacā badinque quēwengacāİmpa,” ante yewæmongatİmpa. Ayæ adobaī Adāō wodi bai Nōwocā mōnō Codito incæ nē ewocacā inte quēwēninque mōnō İmote pōnongā æninque ewocate quēwēmōmpa. ⁴⁶ Inguipogaque nē quēwengā guiquēnē tāno pongacāİmpa. Mempoga nē Quēwēnongā guiquēnē nōwoque ayæ pōningā inte nē Quēwengā İngampa. ⁴⁷ Tānocā İngante badoncæte ante Wængonguī onguipoi guīdīmōi æninque badongacāİmpa. Nōwocā guiquēnē öönæde quēwengāİngā inte pongacāİmpa. ⁴⁸ Inguipogaque ante quēwēnāni guiquēnē inguipoga tāno quēwengāİngā bai adobaī İnānīpa. Öönæde mōnō goquincabo guiquēnē öönæde quēwente Pongāİngā bai adobaī İmōmpa.

⁴⁹ Inguipogaque quēwengā nānō ēñayō bai mōnō adobaī nōwo ēñamōmpa. İncayæ ate guiquēnē öönæde quēwente nē Pongāİngā nānō ēñayō bai mōnō adobaī ēñaquimō İmōmpa.

⁵⁰ Botō tōnīñamīni apænebo ēñēedāni. Adopoque ēñagaİngā inte Wængonguī Awēñe Odeye nempo ædō cæte guīte quēwengūgāā. Nē aquīñō nōmænguīñō ēñadongā incæ tōmengā mempoga ēñadāmaī inte ædō cæte baō nōmāadāmaī İñō ēñaquīngāā. ⁵¹ Mōnō waocabo wēñēñedē mōnō ēñēnāmaī İngāİnō ante botō tæcæ

ēñēnīmo inte nōwo edonque apænebo ēñēedāni.

Wī tōmāmō wænguimō İmōmpa. Incæte tōmāmō İñontobæ wayonque ēñaquimō İmōmpa. ⁵² Edæ todompeta mōnō ancadeca æmæwo pōnī nangui öönāni ate mōnō aw-İnca adopoque bomō cæyōmonte İñontobæ bacæİmpa. Edæ todompeta tæcæ we ööñōnāni do wængāİnāni incæ nōmæñamāi nāni inguinque nāni ömæmoncædānīpa. Mānīñedē edæ wayonque pōnī mōnō tōmāmō ēñacæmōİmpa. ⁵³ Edæ mōnō baō mōnō aquīñō nōmænguīñonque wido cæte ate mōnō nōmæñamāi İnguīñonque ēñaquinque İmpa. Ayæ mōnō aquīñō wænguīñō ewente ate waiñonque mōnō wæñamāi İnguīñō ēñacæİmpa. ⁵⁴ Mōnō nōmænguīñō ēñamō adinque Codito waiñō pōnongā ænte ēñadinque mōnō baō nōmæñamāi İngæİmpa. Ayæ mōnō wænguīñō ēñamō adinque tōmengā mōnō wæñamāi İnguīñō ante waiñō pōnī pōnongā ēñacæİmpa. Mānōmaī cæcā ate dodāni nāni yewæmonte angāİnō tōmāā İnque cæte İngæİmpa. Edæ İmaī ante yewæmongadānīpa. “Mōnō Codito nē tæi pīñænongā inte mōnō wænguīmāmo godō ömæte ewēninque gānā cæcæcāİmpa. ⁵⁵ İnīnque önonque bagāi İnte mōnō wænguīmāmo İñōmō dicæ tæi pīñænte cæpa æmæwo wænguīmōō. Mōnō wænguīmāmo incæ dicæ daapa emīñæmpa guī wænguīmōō.”

⁵⁶ Mōnō wēnæ wēnæ cægaİnō beyænque mōnō daapa guīte bai pante wæquinque nē wænguēñemō İngamōİmpa. Ayæ ēñēnāmaī cæyōmonte Wængonguī wææ angā beyænque mōnō nē pante wæquinque nē wænguēñemō bagamōİmpa. ⁵⁷ Wæætē mōnō Awēñe İtota Codito gānā cædinque mōnō wænguēñemāmo ante godō ömæte ewengā beyænque Wængonguī mōnō İmote pōnō cæcā ate gānā cæmōİmpa. İnīnque, Mānōmaī waa pōnī cæcampa, ante pōnēninque mōnō Wængonguī İngante waa ate pōnēninque apænecæİmpa.

⁵⁸ Mānōmaī beyæ botō nē waadete tōnīñamīni ēñēedāni. Mīnitō, Mōnō İmote bæ tadāmaī İncædānīpa, ante adiyæ tæi ongonde wææ cæedāni. Edæ, Mōnō Awēñe nempo quēwēninque nangui cæmō İnīnque mōnō cædinō İñōmō edæ cōwē ewēñamāi İngæİmpa, ante pōnēninque mīnitō mōnō Awēñe beyæ ante cōwē godōmenque gomonga cæcæmīnīpa, āmopa.

16

Wængonguī quīnāni beyæ İmaī cæte godongæİmpa, ante

¹ Nōwo İñōmō mīnitō godonte æİnta ante, Wængonguī quīnāni beyæ İmpa, ante mīni godonguēñēnō ante apænebo

ēñēdāni. Gadatiabæ iñōmō Itota ingante godongāmæ nāni pōnencabo inānite do ānimo inte botō mīnitō imīnite adobaī ante iimāi āmo cæedāni. ² Mīnitō tōmāmīni, Botō ænincoo æpodō i, ante adinque, Pancaæ Wængongui quīnāni quī baquimpa, ante cædinque Wængongui itædē iñō pancacooga nānēnē cō cædinque wacā Wængongui itædē iñō pancacooga nānēnē cō cædinque ee mæedāni. Ininque wæætē wæætē cō cæte eyepæ māmīni adinque botō mīnitō weca ponte adinque, Godōmenque cōō cæedāni, ante ānāmāi inguēnēmo imopa. ³ Edæ botō mīnitō weca ponte āñōmo mīnitō, iñāni nō cædōnāni inte mōnitō godōnincoo ænte māo godoncædānimpa, ante odōmōmīni adinque botō wæætē tōmēnāni beyæ cadota ante yewæmoncæboimpa. Ayæ cadota tōnō mīnitō pōnōnoncoo tōnō botō iñāni inānite pædæ godōninque da godōmo ænte māo Eedotadēē gote nēnemocædānimpa. ⁴ Ayæ Wængongui Ao angā ate botō tōmēnāni baī adobaī gobo adinque tōmēnāni botō tōnō godongāmæ edæ gobainānipa.

Iimāi gocæboimpa, ante

⁵ Cōwē Māatedōniabæ wodo pænta gocæboimpa. Ininque mānimæ tāno wodo pænta gote ate botō ayæ wæætē mīnitō weca poncæboimpa. ⁶ Ayæ mīnitō weca pōninque wabānō wantæ iñō quēwente goquīmo. Æbāmē cæcæboimpa. Edæ, Quēwente ate ædōmē gomonga gocæ cæyōmo mīnitō botō tōnō godongāmæ waa cæmīni ate waa gocæboimpa, ante pōnēninque botō wabānō godōmenque quēwēninque tōmāā mōnō yoguūntedæ incæ mīnitō weca quēwencæboimpa. ⁷ Edæ, Botō wodo pænta gocæ cædinque mīnitō weca ñōwo pōmo baī wantæ iñō ēñāquinque incædōnimpa, ante pōnente wædinque botō wīl ñōwo pōinēmo imopa. Wæætē, Wængongui Ao angā ate botō iincayæ ate mīnitō weca ponte wantæpiyæ quēwēninque tocæboimpa, ante pōnēmopa. ⁸ Wæætē mōni oodeocabo æāmæ Pentecotee mōni ānōmæ iinque beganca botō Epeto adoyōmō quēwencæboimpa. ⁹ Edæ Epeto iñōmō quēwēnāni wede pōnente bacædānimpa, ante botō guite apænequinque odemō baī wi ænete baī ongō abopa. Ayæ adobaī, Nē piinte cædāni nanguī ināni mæ ongōnānipa, ante adinque botō adoyōmō quēwēninque nanguī wææ apænecæboimpa.

¹⁰ Timoteo mīnitō weca wabānō ponguingā. Pongā iinque mīnitō wæætē, Mōnitō weca guiñēnāmāi inte quēwencæbiimpa, āninque tōmēngā ingante waa cæedāni. Edæ botō nē cæbo imo baī tōmēngā adobaī Wængongui beyænque nē cæcā ingampa. ¹¹ Ininque, Timoteo ōnonque cæcampa, ante tedewēnāmāi inte mīnitō tōmēngā ingante

Baa ānāmāi incæmīnimpa. Wæætē waadete cædinque da pōnōmīni ate tōmēngā piyænē cæte botō weca adodō poncæcāimpa, āmopa. Edæ, Mōnō tōniñadāni tōnō Timoteo godongāmæ poncæcāimpa, ante pōnēninque botō wānō cōmopa.

¹² Botō mōnō tōniñacā Apodo ingante guiquēnē, Mōnō tōniñadāni tōnō bitō coodintoidi weca ēñate pōe, ante ancaæ āmo incæte tōmēngā wæætē, Nōwo wīi goquīmo, ante Baa angantapa. Incæte Wængongui Ao angā ate tōmēngā iincayæ ate mīnitō weca cōwē poncæcāimpa.

Waa quēwencæmīnimpa, ante

¹³ Mīnitō guiquēnē cōwā ate nāmā wææ aaedāni. Wede pōnēmīni inte tæi gongæte ongōedāni. Æmæwo pægaimīni inte tæi piñænte entawēninque guiñēnāmāi inte ee cæedāni. ¹⁴ Ayæ tōmāā quīēmē cæmīni inte waadete pōnēninque cæedāni āmopa.

¹⁵ Botō tōniñamīni mīnitō iimāi ante do ēñēmīnipa. Acayabæ iñōmō tāno pōnengalnāni inte Etepanā nāni quēwencabo iñōmō, Wængongui quīnāni inānite nē cæmōni bacæmōnimpa, ante ñōwo cædānipa cæmīni. ¹⁶ Ininque mīnitō Wængongui quīnāni beyæ nē cædināni inānite Ao āninque piyænē cædinque tōmēnāni nāni ānō baī do ēñente cæedāni. Ayæ, Wadāni adobaī, Mōnō tōnō godongāmæ nanguī cædānipa, ante adinque mīnitō tōmēnāni nāni ānō baī do ēñente cæedāni.

¹⁷ Etepanā tōnō Podotōnato ayæ Acaico botō weca pōninque mīnitō botō beyæ mīni cæinēnō ante do cædāni ate nanguī totabopa. ¹⁸ Edæ tōmēnāni pōnō apænedāni ēñēninque mīnitō wampo pōnente tæi piñænte ēwocamīnitawo. Ayæ adobaī pōnō apænedāni ēñēninque mōnitō wampo pōnente tæi piñænte ēwocamōnipa. Mānōmāi nē pōnō cædināni inānite mīnitō wæætē waa ate pōnēninque cæquēnēmīni imīnipa.

¹⁹ Atiabæ iñōmō Codito ingante godongāmæ nāni pōnencabo nāni cabo nāni cabo tōmānāni mīnitō imīnite ante pōnēninque, Waa quēwencæmīnimpa, ante apænedānipa. Aquidæ tōnō Pidica nāna gæncaya adobaī ayæ tōmēna oncōnē Codito ingante pōnente godongāmæ pōninque nāni pōnencabo adobaī mīnitō imīnite waadete pōnēninque, Mōnō Awēnē nempo waa quēwencæmīnimpa, ānānipa. ²⁰ Mōnō tōniñadāni tōmānāni, Waa quēwencæmīnimpa, ante apænedānipa. Mīnitō guiquēnē mīni cabo godongāmæ pō bee tēninque waadete pōnente waa apænedāni, āmopa.

²¹ Botō Pabodobo iñōmō tæcæ tōmēmo ōnompoca yewæmōninque, Waa quēwencæmīnimpa, ante tōmēmo yewæmōmopa.

²² Æcānō mōnō Awēnē ingante waadete pōnēnāmaī ina iñōmō tōmengā nānō wænguinqe mǎnōmaī cæcampa tōō. Botō iñōmō wæætē, Mōnitō Awēnē īmi pōe, ante wæbopa.

²³ Mōnō Awēnē Itota waadete pōnō cæcā æninqe mīnitō tōmengā nānō waadete pōnō cædō entawēninqe waa quēwencæmīnīmpa. ²⁴ Codito Itota nempo mōnō quēwencabo īmōmpa, ante pōnēninqe botō mīnitō īmīnite waadete pōnēmōpa. Māninqe ante yewæmōmōpa.

2 Coodintoidi inānite Pabodo cadota ante ayænta nānō yewæmongainta

Waa quëwencæminimpa, ante

¹ Wængongui pōnō angā beyæ Itota Codito botō Pabodobo imote da godongā godongaimo inte botō mōnō tōniñacā Timoteo tōnō guæ apænemōna ate botō iīmai ante yewæmōmopa. Coodinto iñōmō quëwëmini inte munitō iñōmō Codito ingante mīni godongāmæ pōnencabo incæ acæminimpa, ante yewæmōmopa. Ayæ Acayabæ tōmāo iñōmō quëwente Wængongui quīnāni inte tōmēnāni adobaī adota acædānimpa, ante yewæmōmopa. ² Mōnō Awēnē Itota Codito tōnō Mæmpo Wængongui tōnō guæ waadete pōnō cæda adinque munitō gānē pōnente waa quëwencæminimpa, āmōnāpa, ante yewæmōmopa.

Codito iīmai waadete pōnō cæcampa, ante

³ Mōnō Awēnē Itota Codito Wæmpocā iñongante Itota iñōmō adocā ingante, Botō Wængongui iñongā ingampa. Ayæ Itota Wængongui adocā iñongā inte tōmēngā mōnō wæwēnō ante adinque godongāmæ wæte bai pōnō waadete apænecā ēñēninque mōnō wampo pōnēmō imopa. Mānōmai beyæ, Itota Mæmpo Wængongui cōwē waa cæcampa, ante mōnō watapæ apænecæimpa. ⁴ Adocā Wængongui mōnō imonte āninque, Wēnæ wēnæ wæwëmini adinque botō waadete pōnō apænebo ēñēninque munitō wampo pōnēmīnitapa. Iñinque wadāni wēnæ wēnæ wæwēnāni adinque munitō botō apænedō ante waadete godō apænemīni ēñēninque tōmēnāni wæætē wampo pōnencædānimpa, ante botō munitō iīnīte pōnō cætābopa, Wængongui angampa.

⁵ Edæ iīmai beyæ mānōmai angampa. Codito nē nantate wægaingā beyæ nantate wæwēninque mōnō tōmēngā tōnō ānque bai nantate wæwēmōmopa. Ayæ adobaī nantate wæwēmō adinque adocā Codito waadete pōnō apænecā ēñēninque mōnō tōmēngā tōnō ānque bai ēwocadinque wampo pōnēmōmopa. ⁶ Mōnitō nantate wæwēmōni amīnitawo. Edæ mōnitō nantate wæwente apænemōni beyæ Wængongui munitō iīnīte wæætē pōnō waadete apænecampa. Apænecā ēñēninque munitō wæætē wampo pōnēninque wæsnāmai quëwencæminimpa, ante Wængongui cæcampa. Ayæ mōnitō wæwēñōmōnīte tōmēngā pōnō waadete apænecā ēñēnte wampo pōnēmōni amīnitawo. Edæ munitō nantate wæwëmini inte wampo pōnencæminimpa, ante Wængongui mānōmai

cæcampa. Ayæ wampo pōnēmīni badinge munitō iīncayæ ate mōnitō nantate wæwēnō bai adobaī nantate wæwëmini incæte piyænē cæte ee cæte quëwencæminimpa, ante Wængongui pōnō cæcampa. ⁷ Ayæ mōnitō tōnō ānque bai munitō nantate wæwëmīnitawo. Edæ tōmēngā waadete pōnō apænecā ēñēmini ate munitō adobaī mōnitō tōnō ānque bai wampo pōnenguimīni iīmīnīpa. Ante do ēñēninque mōnitō, Nāwāngā munitō watapæ quëwencæminimpa, ante do pōnēmōnīpa.

⁸ Iñānāni, mōnitō Atiabæ quëwēninque æbānō wēnæ wēnæ bate wætāmōnī, ante ñōwo yewæmōmo aedāni. Tæi piñæmōni ināmai inte mōnitō godōmenque teēmē mongænte bai nangui wēnæ wēnæ bate wædinque, Nangæ bate wængui wæ, ante wætāmōnīpa. ⁹ Wængongui do angā wænguēnēmōni iīmōnīpa, ante nāmāneque pōnente wætāmōnīpa. Incæte mōnitō, Tōmēmōni nāmā tæi piñæñō beyænque quëwencæmōnīpa, ante pōnēnāmai incæmōnīpa, ante odōmoncæte ante Wængongui pōnō cæcā wætāmōnīpa. Wæætē tōmēngā, Do wængaināni quëwencædānimpa, ante botō nē āmo iñōmote munitō wæætē botō imote wede pōnente quëwencæminimpa, ante cæcæte ante Wængongui mānōmai pōnō cæcā wætāmōnīpa. ¹⁰ Mōnitō mānīnō mōni oo wænguīnque ante wæyōmōnīte tōmēngā do bæi ongote ængā beyænque quëwentāmōnīpa. Ayæ ate wæyōmōnīte tōmēngā ængā beyænque quëwencæmōnīpa. Ayæ, Adocā wæætē wæætē ængā beyænque quëwencæmōnīpa, ante pōnēninque mōnitō tōmēngā ingante wede pōnente tomōnīpa. ¹¹ Iñinque munitō iñacabo gongænte bai mōnitō beyæ Wængongui ingante apænemīni ēñēninque tōmēngā cōwē bæi ongote ængā beyænque quëwencæmōnīpa. Mānōmai cæcā adinque nangui iñāni wæætē Wængongui ingante waa ate pōnente iīmai ante apænecædānimpa. Wængongui ēñēmi. Nangui iñāni apænedāni ēñēninque bitō Pabodoidi beyæ pōnō waa cæbi amōnīpa, ante apænequīnāni iñānīpa.

Coodinto iñōmō quīnante pōnāmai imoi, Pabodo angampa

¹² Mōnitō iīmai ante nāmā waa ate pōnēninque apænemōnīpa. Wængongui quīmōni iñōmōni inte mōnitō tōmēngā, Tæiyæ wæmō ēwocacæminimpa, ante ænte entawēmōnīpa. Mānōmai beyæ Wængongui nō cæcā bai mōnitō adobaī inguiipoga quëwēninque nō cæte quëwēmōnīpa. Ayæ munitō weca pōninque mōnitō godōmenque waa cætāmōnīpa. Mānōmai cædinque mōnitō inguiipoga quëwēnāninque nāni ēñēnō beyænque dicæ cætāmōniyaa. Wæætē mīmō entawēmōni inte nāmā apænte

äninque mönitö Wængongui waadete pönö apæneçá eñëninque eyepæ cætamónipa, ante tomónipa. ¹³ Minitö acæminimipa, ante yewæmöninque mönitö dicæ idiquibæ ante yewæmömöniiyaa. Wæætê, Edonque adinque do eñencæminimipa, ante edonque yewæmömöni abaiminipa. Ayæ botö, Minitö nãwangã godömenque eñencæminimipa, ante iimã ante pönëmopa. ¹⁴ Mönitö æbãno imönii, ante minitö pancaã ante do eñëminipa. Ayæ, Mönö Awënë Itota tömengã nãno ponguionæ iinque bayonte mönitö minitö iminite adinque, Minitö nê wede pönegaimini iminipa, ante adinque tocæmönimipa, ante do eñëminitawo. Ayæ mænionæ bayonte mönitö imönite adinque minitö adobaï, Waa nê cægãimini iminipa, ante tocæminimipa, ante ämo eñëmaimimipa.

¹⁵ Mänömai impa, ante pönëninque botö, iimã cæcæboimipa, ante pönentabopa. Wayömö ayæ godãmai inte botö täno minitö weca ponte waadete apæneçæboimipa. Apænebo eñëninque minitö wæætê mem-poga tocæminimipa, ante iimã cædimo intabopa. ¹⁶ Minitö weca täno ponte eñadinque godömenque godinque botö Mäatedöniabæ gote pöninque wæætê minitö weca adodö ocæ emænte poncæ cædimo intabopa. Ayæ pömo ate minitö botö imote godongãmæ cædinque da godömini godömenque Oodeabæ gocæ cædimo intabopa. ¹⁷ Incæte botö, Mänömai cæquimo imopa, ante pönëninque dicæ önonque ante pönentawogaa. Mänömai pöinemo inte botö ñimpo cæte pönãmai imo adinque minitö, Pabodo æmæ pönente, Wii pönente wabãno wii pongã, ante pönëminitawo. Ñnæmpa inguipogaque quëwënanï mænömainö ante nãni æmæ pönëno bai botö ññömö edæ dicæ adobaï pönentawogaa.

¹⁸ Wængongui nãwangã mönö imonte cöwê pönëninque nê aacã ingampa, ante nö pönï impa. Mänömainö ante nö pönï i bai minitö iminite mönitö apænedö ññömö adobaï nö pönï impa. Ñninqe mönitö ædö cæte wadö ante apænequimönii. ¹⁹ Tidibãno tönö Timoteo botö tönö minitö weca pöninque, Wængongui Wengã Itota Codito ingampa, ante nö impa, ante apænemöni eñëminitawo. Ñninqe mönitö Itota Codito nempo quëwëninque nê Ao ämöni inte ædö cæte æmæ pönente bai wadö ante apænequimönii. ²⁰ Iimã impa. Wængongui, Cöwê cæcæboimipa, ante æpogamê wæætê wæætê angacãimipa. Wæætê wæætê angã incæte Codito ññömö edæ cöwê Ao äninque, Wængongui nãno angainö tömãno ñinque cæcæimipa, ante cæcampa. Ñninqe mönitö tömengã tönö cædinque, Wængongui ñão apãite bai emöñongante tömãnanï tömengã ingante waa acædänimipa, ante cædinque, Ao,

mänömai impa, ante, Amëe, ante watapæ apænemönipa. ²¹ Wængongui incæ mönitö imönite apænte æninque ayæ minitö iminite apænte æninque, Minitö Codito nempo quëwëninque nê tæï piñæmini bacæminimipa, ante mönö tömãmö imonte pönö öni pæte bai cædinque iimã cæcampa. ²² Tömengã emöwo yewæmonte bai cædinque, Botö quimini iminipa, ante pönö cæcampa. Ayæ, Ñncayæ ate mïni godömenque nanguï ænguinque minitö ñöwo botö Önöwoca ingante ænte ewocædäni, ante tömengã Önöwoca ingante ñöwo da pönongã ænte ewocaminipa.

²³ Ñninqe Coodinto ññömö botö quinante wæætê pönãmai ingaboï. Edæ wënæ wënæ cæmïni adinque minitö iminite nê panguënemö incæ botö, Wii päinente awædö, ante wii pontabopa. Wængongui ayongante botö, Mänömai impa, ante nö apænëbo eñëmaimimipa. ²⁴ Iimã ante wede pönencæminimipa, ante mönitö dicæ nê wææ ämöni imöniiyaa. Wæætê edæ, Minitö mïni wede pönëno beyænque tæï ongöninque edæ nanguï cæminipa, ante adinque mönitö wæætê, Minitö watapæ tocæminimipa, ante cædinque minitö tönö godongãmæ cæmönipa.

2

¹ Botö wëenënedê minitö weca eñacæ pöninque nanguï ämo wæminitapa. Ñninqe, Wii wæætê ämo wæcæminimipa, ante ñöwo eñacæ pönãmai incæboimipa, ante nãmãneque pönëninque antabopa. ² Edæ pïmo wæwëmini bai æcãno wæætê, Tocæbiimipa, ante botö imote waadete pönente apænequënegãã. Ñnæmpa botö pïmo beyæ nê wæwëmininque ongömini bai botö imote nê waadete pönente apænequënegã ññömö edæ dæ ancædongãimipa. ³ Botö quiemê beyæ tobo adinque minitö godongãmæ watapæ toquënemini iminipa, ante pönentabopa. Minitö botö beyæ äninque, Pabodo mönö weca pongã adinque mönö cæmö tocæcãimipa, ante nê cæquënemini iminipa, ante awædö. Ñninqe, Minitö weca pöninque botö minitö wæwëno ante wædãmai incæboimipa, ante cædinque botö, Botö cadota ante yewæmömö adinque minitö eñente cæcæminimipa, ante wæbopa. ⁴ Botö nanguï caate wædömo inte mïmönoque pönente wæwëninque yabæque adobaï Ca ca nanguï pönente wædinque mænömainö ante wæbopa. Incæte botö, Minitö wæwëncæminimipa, ante dicæ ämogaa. Wæætê, Botö æbãno minitö iminite nanguï waadete pönëmopa, ante eñencæminimipa, ante odömoncæte ante yewæmömopa.

Nê wïwa cæcã ingante æbãno godö waadete ñimpo cæquï

⁵ Adocanque wīwa cæcā adinque botō tōmengā nānō wīwa cædō beyæ wæwēmo incæte mīnitō tōmāmīni wædænque incæ nanguī incæ wæwēmīni adobaī īminīpa. Botō, Tōmengā ingante pīnāmaī incæboimpa, ante pōnēninque, Wædænque wæwēmīnīpa, ante apænebopa. ⁶ Nē ēñēnāmaī cædingā ingante mīnitō pancamīniya wodo tōmāmīni do pāmīnitapa. Īninque botō, Idæwaa pāmīnīpa, āmopa. ⁷ Tōmengā, Ancaa pāmīni awædō, ante godōmenque wæwente bacantawo. Īninque mīnitō pōnō űimpo cædinque tōmengā ingante, Idæwaa pāmōni wæbīpa, ante ædæmō waadete apænemīni ēñēninque tōmengā īnque wædinque wampo pōnencæcāimpa. ⁸ Mīnitō wæætē, Bitō īmite nāwangā waadete pōnēmōnīpa, ante adodō apænemīni ēñencæcāimpa, ante botō mīnitō īmīnite nanguī āmopa. ⁹ Botō ānō ante æbānō tōmānō ante ēñēnte cæmīnī, ante ēñencæte ante botō wēēñēdē yewæmōntabopa. Eyepæ cæmīni ate wædinque botō, Eyepæ cæmīnīpa, āmopa. ¹⁰ Nē ēñēnāmaī cæcā ingante mīnitō űimpo cæmīni ee gocantawo. Mānōmaī cæmīni īninque botō űowo adobaī űimpo cæbopa. Waocā æcāmenque ēñēnāmaī cæcā adinque godō pōnō űimpo cæbo īninque botō Codito ayongante mīnitō beyænque ante mānōmaī godō űimpo cæbo intabopa. ¹¹ Īñæmpa Tatāna incæ angā ēñēnte beyænque mōnō oda cæte wæquinque edæ godōmenque pīimāimompa, ante aquēnē quēwēdāni. Tatāna æbānō, Oda cæte wæcædānīmpa, ante cæcampa, ante edæ do ēñēmompa.

Tito beyæ ante Pabodo wæcampa

¹² Botō Todoa nāni quēwēñōmō tāno pōninque, Mōnō Codito ingantedō ante watapæ apæncæte ante cæyōmo mōnō Awēnē, Botō beyæ guīite apæne, ante odemō wi ænete baī do cæcā atabopa. ¹³ Incæte botō tōniñacā Tito dæ angā wædinque botō, Ædō cæte īñōmō a ongonte apænequīmoo, ante tōmēnāni īnānite, Gobopa, ante Māatedōniabæ gocæte ante wadæ gotabopa.

Codito nempo quēwēninque tæī ēmōmōnīpa, ante

¹⁴ Nē tæī ēmongā inte mōnō Codito īñōmō nē piinte cædāni īnānite gānā cæcampa. Īninque mōnitō Codito nempo quēwēñōmōnīte Wængonguī, Nē tæī ēmongā ingante waa acædānīmpa, ante cædinque mōnitō imōnite nē tæī ēmongā mīñæ ænte māocā dao dao godinque mōnitō tōmengā nānō ēmōnō baī adobaī tæī ēmōmōnīpa. Ayæ oguī wa woboyæ wodo wodo cædinque tōmāo māo oguī wa baī Wængonguī adobaī cædinque mōnitō imōnite angā ēñēninque mōnitō wæætē, Mōnō Codito æbānō ingāā,

ante wayōmō wayōmō māo apænemōni ēñēnānīpa. Wængonguī mānōmaī cæcā beyæ mōnō Wængonguī ingante waa ate pōnēninque apæncæcāimpa.

¹⁵ Īmaī edæ impa. Codito ængā beyænque nē quēwēnguīnāni weca quēwēmōni incæ nē wænguīnāni weca quēwēmōni incæ mōnitō Codito nempo quēwēninque tōmengā nānō oguī wamōnedō baī mōnitō adobaī, Wængonguī wē ongonte baī tocæcāimpa, ante oguī wamōnete baī apænemōnīpa. ¹⁶ Mōnitō ōō wa wamōnete baī cædinque nē wænguīnāni īnānite tōmēnāni nāni wænguīmāmo ante apænemōni ēñēninque tōmēnāni nāni wænguīnque wē ongonte ocado cæte baī ēñēnānīpa. Wæætē oguī wamōnete baī mōnitō nē quēwēnguīnāni īnānite guīquēnē tōmēnāni nāni quēwēnguīmāmo ante apænemōni ēñēninque tōmēnāni wæætē nāni quēwēnguīnque wē ongonte ocado cæte baī ēñēnānīpa.

Īninque mānīnō mōnitō cæquēnēnō ante æcānō eyepæ cæquingāā. ¹⁷ Edæ nanguī īnāni nāmā beyænque ante æncæte ante cædinque Wængonguī nānō apænedō ante apænewēnāni baī mōnitō wī adobaī wēnæ wēnæ cæcæte ante apænemōni imōnīpa. Wæætē Wængonguī mōnitō imōnite da godongā godinque māo nē apænemōni inte mōnitō Wængonguī ayongā mōnō Codito nempo quēwēninque nō pōnente apænemōnīpa.

3

Wængonguī mīne pōnō angā beyænque quēwēmompa

¹ Mōnitō imōnitedō ante pōnēninque mīnitō, Pabodoidi, Waa cæmōni aedāni, ante tedewēnānīpa, ante wēēñēdē āmīnitawo. Ayæ, Nōwo wæætē adodō ante tedewēnānīpa, ante pīimīnitawo. Mōnitō īñæmpa nāmanque ante, Waa cæmōni aedāni, ante dicæ āmōniyaa. Wadāni mōnitō imōnite waa acædānīmpa, ante cædinque pancadāniya guīquēnē mīnitō imīnite āninque, Cadota ante pōnō yewæmōdāni, ānāni ēñēninque yewæmōmīni ate tōmēnāni ænte māo odōmōnāni ānīnīpa. Ayæ wadāni īnānite adobaī, Cadota, ānāni ēñēnte yewæmōnāni æninque mīnitō imīnite odōmōnānīpa. Mōnitō guīquēnē, Cadota ante pōnō yewæmōdāni, ante dicæ āmōniyaa. ² Wæætē mīnitō guīquēnē waa quēwēmīni adinque wadāni, Pabodoidi tōmēnāni īnānite apænedāni beyænque coodintoidi wede pōnēnāni inte waa quēwēnāni amōnīpa, ante pōnēninque cadota ate baī do ēñēnānīpa. Mānōmaī pōnō cæmīni æninque mōnitō cadota næænte odōmonte baī cædinque, Coodintoidi

æbänö waa cædänii, ante tōmānāni inānite odōmōmōni adinque ēñēnānīpa. ³ Īnīnque, Pabodoidi apænedāni beyænque waa cædānīpa, ante edonque acædānīmpa, ante cædinque Codito iñōmō Wængonguī nē Quēwengā Ōnōwoca ingante da pōnongā ænte ēwocaminīpa. Mānōmaī cædinque Codito cadota ante yewæmonte bai pōnō cædinque wīi tōmengonca yewæmongampa. Wīi dicaboga yewæmōnīnque tōmengā Ōnōwoca ingante mīnitō baonga da pōnongā ænte ēwocaminīpa.

⁴ Codito godongāmæ cæcā beyænque mōnitō Wængonguī ayongā nōngā ante apænemōnīpa, ante pōnēnīnque mōnitō guīñēdāmāi inte do edæ apænemōnīpa. ⁵ Mōnitō nāmanque ante, Æbänö waa cæmōnīi, ante eyepæ imōnīpa diyæ apænte anguīmōnīi. Wæætē Wængonguinque pōnō godongāmæ cæcā ate mōnitō eyepæ badīnque cæmōnīpa. ⁶ Wængonguī, Botō pōnō cæbo ate mīnitō Ao āmīnī Īnīnque mōnō godongāmæ waa cæte quēwengæīmpa, ante cōwē angampa. Tōmengā doyedē iñōmō, Botō wææ angainō ante ēñēnte cædinque quēwencæmīnīmpa, ante nānō wææ angāīne ante ñōwo wæætē ānāmāi ingampa. Mānīne ante ñōwo ganca wææ angā bai mōnō wænguinque incædōnīmpa. Ñōwo guīquēnē Wængonguī wæætē, Botō Ōnōwoca ingante ænte ēwocadinque quēwencæmīnīmpa, ante mīne ante apæneccā ēñēnīnque mōnō quēwenguinque Wængonguī Ōnōwoca ingante ænte ēwocamōmpa edæ. Mōnitō iñōmō tōmengā Ōnōwoca ingante nē ēwocamōni inte eyepæ badīnque mīne Wængonguī ñōwo nānō pōnō apænedē ante nē apænemōni imōnīpa.

⁷ Wængonguī, Īmaī cæedāni, ante dicaboga wææ yewæmongā ate mōnō ēñēnāmāi imō beyænque mānīne tōmengā nānō wææ yewæmongāīne beyænque mōnō wænguīmāmo bagatīmpa. Incæte mānīne beyæ edæ ñāo nanguī apāīgatīmpa. Īnīnque mānīne ænte godōmenque wææ ānīnque Mōitee wodi awīnca ñāo apāite bai ēmongacāīmpa. Mānīi ñāo wodēmæmō ēmongā incæte idægoidi tōmengā awīnca adīnque, Ædō cæte Mōitee awīnca cōwā aquīmōnīi, ante wægadānīmpa.

⁸ Mōnitō guīquēnē, Wængonguī Ōnōwoca ingante ænte mōnō quēwengæīmpa, ante mōni apænedō beyænque quīēmē bai godōmenque nanguī apāite bai apāicæīmpa. ⁹ Mōnō apænte tente wænguinque edæ mānīne pedæne ante ēñēnāmāi cægāmōīmpa. Incæte mānīne ante nānō wææ angainō beyænque Mōitee wodi awīnca ñāo apāite bai ēmongacāīmpa. Īnīnque ñōwo iñōmō, Mōnō nō cæte quēwenguinque ante

Wængonguī Ōnōwoca ingante ængæīmpa, ante mōni apænedō guīquēnē ñāo quīēmē bai godōmenque nanguī nāwante bai ēnepa. ¹⁰ Wængonguī Tæiyæ Waēmō Ōnōwoca ingante ante mōni apænedō iñōmō godōmenque ñāo nānō apāidō beyænque Mōitee wodi nānō wææ angainō guīquēnē pōnōmenque apāīdīnque edæ wodēmāa badīnque edæ dæ bapa. ¹¹ Edæ mānīne mōnō wodēmāa baquēnēmāmo incæ ñāo apāite bai iñōnte Mōitee wodi ænte apænegacāīmpa. Wængonguī ñōwo nānō pōnō āne guīquēnē cōwē wodēmāa badāmāi ēne inte godōmenque nanguī guīnæ nāwante bai ēnepa.

¹² Īnīnque, Wængonguī Tæiyæ Waēmō Ōnōwoca pōnō cæcā beyænque mōnō nō cæte watapæ quēwengæīmpa, ante pōnente quēwēmōni inte mōnitō guīñēdāmāi inte do apænemōnīpa. ¹³ Mōitee wodi guīquēnē, Ñāo apāi bai botō ēmōnō incæ wodēmāa bamōñōmote idægoidi adāmāi incædānīmpa, ante cædinque weocoo ñāne cæmongacāīmpa. Mōnitō guīquēnē Mōitee wodi nānō ñāne cæmongāi bai cædāmāi imōni inte edonque apænemōnīpa. ¹⁴ Mānīnta, Botō wææ angainō ante ēñēnte cædinque quēwencæmīnīmpa, ante Wængonguī nānō pedænta ante adīnque idægoidi do nāni ñāne cæmongaincoo ñōwo ganca edæ ñāne cæmonte bai ēmōnānīpa. Īnīnque tōmēnāni ocaī ōmæcadāni bai bagadānīmpa. Edæ Codito nempo quēwēnānīque mānīncoo wī cæmonte bai ēmōnāni inte tōmēnānīque edonque adāni inānīpa. Īnīnque idægoidi wæætē Codito nempo quēwēnāmāi ināni inte ayæ edæ wī cæmōnāmāi inte wædānīpa. ¹⁵ Īnīnque idægoidi ñōwo ganca mīmō beē otawente bai inōnāni inte Mōitee wodi nānō yewæmongāīnta adīnque ēñēnāmāi inānīpa.

¹⁶ Incæte Awēnē gāmæñō æcānō pōna tōmengā Mōitee wodi nānō wī cæmōnō bai badīnque do wī cætawente bai bacampa. ¹⁷ Mōnō Awēnē incæ Wængonguī Ōnōwoca ingampa. Ayæ waocā mōnō Awēnē Ōnōwoca ingante ēwocacā Īnīnque tōmengā wī cætawente bai entawente quēwēnōngā inte wīi tee mōnete wæcā bai ingampa. ¹⁸ Mōnō tōmāmō iñōmō awīnca wī cæmonte bai ēmōnōmō inte mōnō awocawænta bai bamōmpa. Īnīnque wadāni mōnō imōnte adīnque, Mōnō Awēnē æbänō ñāo apāite bai ēmongāā, ante awocawænta ate bai edonque acædānīmpa. Ayæ godōmenque ayæ godōmenque mōnō ñāo apāidō mōnō ēwocāquinque mōnō Awēnē nānō ēwocadō bai mōnō ayæ godōmenque ayæ godōmenque ēwocamō imōmpa. Mōnō Awēnē incæ Wængonguī Ōnōwoca inōngā inte mānōmāi pōnō cæcā entawēmōmpa.

4

¹ Wængonguī, Botō pōnō cægainō ante mīnitō nē apænemīni incæmīnīmpa, ante waadete pōnō angā beyænque mōnitō mānīnō ante nē apænemōni bagaimōni inte nōwo wæ guemōnāmaī inte cōwē apænemōnīpa. ² Wadāni guiquēnē tōmēnāni nāni guingo imonte wæquinque awēmō cædānīpa. Mōnitō iñōmō tōmēnāni nāni cæwēnō bai cædāmaī incæmōnīmpa, ante do ānimōni inte babæ cædāmaī imōnīpa. Wængonguī nānō apænedō ante idiquibæ apænedāmaī imōnīpa. Wæætē Wængonguī ayongā mōnitō tōmēngā nō nānō apænēgainō ante edonque pōni odōmonte apænemōni ēñēnīnque tōmānāni mīmō entawēnāni īnīnque edæ, Pabodoidi nō ante cædānīpa, ante apænebainānīpa. ³ Incæte mōnō Codito ingantedō ante watapæ mōni apænedō iñōmō nāne cædete bai intawo. Iñæmpa nāne cædete bai i īnīnque nē wē womonte wænguīnāni beyænque nāne cædete bai īmpa. ⁴ Wængonguī nānō emōnō nē emōnongā inte mōnō Codito iñōmō mōnō beyæ nāō apāite bai cæcampa, ante watapæ mōnō ēñente pōnēnō ante apænemōnīpa. Nōwoguipogaque quēwēnāni beyæ guiquēnē tōmēnāni awēnē wængonguī bai Tatāna nē cæcā ingampa. Tōmēngā iñōmō mānīne watapæ mōni apænedō ante pīnīnque, Nē pōnēnāmaī ināni adāmaī incædānīmpa, ante tōmēnāni awīnca nāne cæmonte bai wææ cæcampa.

⁵ Mōnitō iñōmō, Nāmā incæ waa cæmōnīpa, ante tededāmaī imōnīpa. Wæætē, Itota Codito incæ mōnō Awēnē ingampa, ante mōnitō, Tōmēngā beyænque mōnitō mīnitō imīnite nē cæmōni imōnīpa, ante mānīnque ante apænemōnīpa. ⁶ Wēmō iñōmō nāō apāicæīmpa, ante Wængonguī incæ badongacāīmpa. Adocā nāō ante nē angaingā inte nōwo wæætē mōnitō mīmōno tīca ēnente bai cædinque īīmaī ante odōmongā amōnīpa. Tōmēngā iñōmō, Botō æbānō guīnæ nāwante bai emōmoo, ante mīnitō Codito awīnca adīnque edonque pōni acæmīnīmpa, ante pōnō tīca ēnente bai odōmongā amōnīpa.

Itota ingante mōnō wede pōnēnō beyænque quēwēmō

⁷ Nanguī nāō apāite bai ewocamōni incæ ōnocadedē mante bai edæ ewocamōnīpa. Edæ daigæñē cængæmōncadenque bai mōnitō baō mongæñōmōnīte Wængonguī, Wīi mīnitō nāmā tæī pīñænō beyænque ewocamīnīpa, wæætē botō tæī pīñænō beyænque ewocamīnīpa, ante acædānīmpa, ante badongampa. Iñīnque tōmēngā tæī pīñænte pōnō badongā ænīnque mōnitō nāō apāidō mōni mānō iñōmō ōnocadedē mante bai ewocamōnīpa. ⁸ Mōnitō imōnite tōmānō māmō mō ongonte bai cædāni wæmōni

incæ gueogæ godāmaī imōnīpa. Æbānō cæte quēwēmō imōō, ante wæmōni incæ mōnitō guīñente wædāmaī imōnīpa. ⁹ Ancaa togænte pānāni wæyōmōni Wængonguī mōnitō imōnite cōwē emō cæte godāmaī ingampa. Ayæ wænoncæte ante bæ tadāni incæte æmæwo wænāmaī imōnīpa.

¹⁰ Itota tōmēngā nānō quēwēnō pōnongā æmōni beyænque mōnitō, Baō ayæ mongænte quēwēmōni acædānīmpa, ante cæmōnīpa. Tōmēngā nānō wængainō bai mōnitō adobāi wæætē wæætē wænte bai baō mongæmōnīpa. ¹¹ Mōnitō nē quēwēmōni iñōmōnīte wadāni wæætē mōnitō imōnite bæi ongonte ænīnque, Itota beyænque wæncæmīnīmpa, ante nanguī cædānīpa. Iñīnque mōnitō baō fōmænguīñō ēñayōmōnīte wadāni, Itota tōmēngā nānō quēwēnō ēñate beyænque ayæ quēwēnānīpa, ante edonque acædānīmpa, ante mōnitō wæncæ cæte bai ēñate wæmōnīpa. ¹² Iñīnque mōnitō mōni wænguīmāmo beyæ ante wæyōmōni mīnitō wæætē mīni quēwenguīmāmo ēñate quēwēmīnīpa.

¹³ Docā do apænedīnque, Botō nē wede pōnēmō inte apænēnetabopa, ante yewæmongacāīmpa. Tōmēngā wede nānō pōnēngainō bai adobāi ewocadīnque mōnitō nē wede pōnēmōni inte adobāi apænemōnīpa. ¹⁴ Iīmānō ante ēñēnīnque wede pōnēmōni inte mōnitō apænemōnīpa. Itota ingante, Nāni ōmæmōe, ante nē cægāngā adocā mōnitō imōnite angā ate mōnitō Itota tōnō godongāmæ nāni ōmæmoncæmōnīmpa, ante do ēñēmōnīpa. Ayæ mīnitō tōnō mōnitō tōmāmō iñōmonte Wængonguī ænte māmō gōnongā ate mōnō tōmēngā weca godongāmæ gongænguīmō imōmpa. Mānōmaīnō ante do ēñēmōni inte mōnitō nē wede pōnēmōni inte apænemōni imōnīpa. ¹⁵ Wængonguī godōmenque nanguī ināni inānīte waadete pōnō cæcā ate tōmēnāni wæætē Wængonguī ingante waa ate pōnēnīnque apænecædānīmpa. Ayæ mānōmaī pōnō cæcā adīnque, Wængonguī nāō apāite bai emōnongā inte mānōmaī cæcampa, ante mōnō tōmāmō watapæ apænecæīmpa. Iñīnque, Mānōmaī bacæīmpa, ante mīnitō beyæ ante mōnitō tōmāā edæ cæmōnīpa.

¹⁶ Mānōmaī beyæ mōnitō, Æbānō cæquīmōnīi, ante wædāmaī imōnīpa. Edæ īīmō iñō īīmō iñō mōnō baō godōmenque wænguīñō bai mongæñōmō mōnō ōnōwoca wæætē īīmō iñō godōmenque īīmō iñō godōmenque mīīwoca badonte bai ewocamōmpa. ¹⁷ Iñæmpa wænæ wænæ mōnō wæwēnō incæ wantæ iñō wodēmāa pōni badīnque wodæī bai bapa. Incæte mānīi mōnō wæwēnō beyæ mōnō godōmenque nāō apāite bai ewocacæīmpa. Iñīnque mōnō

wæwēno wodæi pōni inte dæ bayō mōnō ñāo apāidō mōnō ēwocadō wæætē cōwē wodēmaa badāmai ingæimpa. Wæætē mōnō watapæ quēwenguinque godōmenque nanguī apāite bai bacæimpa. ¹⁸ Inguipogaque mōnō quēwēno guiquēnō wantæ iñō dæ gocoopa. Öönædē ñōwo mōnō adāmai incoo guiquēnē cōwē dæ badāmai inte ongongæimpa. Ìnque inguipogaque mōnō quēwēno ante mōnō adāmai inte bai pōnengæimpa. Wæætē öönædē mōnō adāmai incoo ante mōnō cōwē ate bai pōnengæimpa.

5

¹ Oncontai wido cæquintai bai mōnō æmontai mongænte quēwēmompa. Ìnque mānintai wido cæmō incæte Wængonguī wæætē, Öönædē miintai mīni cōwē owoquintai, ante do mænongacæimpa. Mānintai iñōmō waocā önopoca mænōnāmai intai iñonte mōnō öönædē æite owoquimō ìmompā, ante do ēñēmompā. ² Ñōwo iñōmō mōnō wido cæquintai mongæninque ö ö ante nantate wæwēmompā. Mānōmai beyæ mōnō öönædē æidinqe mōnō owoquintai ēñacæte ante wæwēmompā. ³ Edæ, Baö ömaamō inte wæcæ wæ, ante guñēwocate wædinque mōnō, Miintai ēñacæimpa, ante wæwēmompā. ⁴ Mōnō iintaique ēñadinque, Baö ömaamō inte wædāmai incæmōnimpā, ante guñēwocate wæwēmompā. Mōnō wænguintai mongænte nantate wæmō inte ö ö ante wæwēmompā. Wængonguī, Mīnitō ēñate quēwenguintaique, ante yabæque wīni caate bai pōnongā ēñayōmō mōnō wænguēnēñō edæ dæ bacæimpa, ante æncæte ante wæwēmompā.

⁵ Ñōwo ämo ēñēedāni. Wængonguī incæ edæ, Mīni miintai wēñate mongænguinque, ante mōnō ìmonte badongacæimpa. Ayæ, Mīnitō miintai cōwē pōnōmo æncæmīnimpā, ante, Nāwangā impā, ante odōmoncæte ante Wængonguī tōmengā Öönōwoca ingante ñōwo da pōnongā æmompā. Ìnque tōmengā Öönōwoca ingante ænte ēwocadinque mōnō, Miintai ēñate mongænguinque ēwocamompā, ante do ēñēmompā.

⁶ Mānōmai beyæ mōnitō cōwē, Wængonguī cæcæcæimpa, ante wede pōnente tomōnimpā. Oncōnē owote bai iintaidē mōnō quēwenganca mōnō Awēnē oncōnē owodāmai ìmompā, ante do ēñente wædinque, ⁷ mōnitō mānīnō ante ayæ adāmai ēmōmōni inte wīi mōni adīnō beyæ quēwēmōnimpā. Wæætē mōni wede pōnēnō beyænque quēwēmōnimpā. ⁸ Ìnque edæ, Wængonguī cōwē cæcæcæimpa, ante wede pōnēmōni inte mōnitō, Ìintaidē owodāmai inte wæætē mōnō Awēnē oncōnē gote owote waa tobaimpā, ante pōnēmōnimpā. ⁹ Ìnque oncōnē owote

bai tomōni incæ oncōnē owodāmai inte bai wæmōni incæ mōnitō, Mōnō Awēnē waa tocæcæimpa, ante cædinque cōwē nō cæte quēwēmōnimpā. ¹⁰ Codito tōmengā ñānō apænte anguimpā gāänē mōnō tōmāmō ponte edæ a ongonguēnēmō ìmompā. Mōnō edæ inguipoga iintai ēñate quēwēninque mōnō cædō ante do againgā inte tōmengā iñōmō apænte ancæcæimpa. Edæ waa cægāimō ìmō adinqe tōmengā mōnō ìmonte edæ eyepæ pōni pædæ pōnongā ænguimō ìmaimompā. Wæætē edæ wēnæ wēnæ cægāimō ìmō adinqe tōmengā wæætē eyepæ pōni pangā wæbaimpā.

Wængonguī piyēnē cædinque, Pōedāni, angampa

¹¹ Ìnque mōnō Awēnē ingante guñente wæmōni inte mōnitō waodāni inānite godō waadete apænemōnimpā. Codito gāmæñnō pōninque watapæ quēwengæimpa, ante pōnencædānimpā, ante mōnitō godō waadete apænemōnimpā. Edæ, Mōnitō æbānō ēwocāmōnii, ante Wængonguī do edonque acampa. Ayæ adobai mīnitō mīmō entawēmīni inte mōnitō ēwocadō ante edonque amīni ìnque botō waa tobaimpā. ¹² Mānōmainō ante apænedinque mōnitō, Wæmō pōni ìmōnimpā, ante nāmā ante dicæ ämōniyaa. Wæætē ìimai ante apænemōnimpā. Pancadāniya iñōmō mōnitō awincaque adinqe, Pabodoidi æbānō ēwocādāni, ante adāmai ināni inte tōmēñāni nāni adōnonque ante pōnēninque nāmā ængō cæte bai todānimpā. Mīnitō guiquēnē, Mōnitō æbānō ēwocāmōnii, ante do amīnitape. Ìnque tōmēñāni mōnitō ìmōnite ante piinte äñāni ēñēninque mīnitō wæætē edæ, Pabodoidi nō ēwocādāni inte waa cædāni amōnimpā, ante wææ apænecæmīnimpā, ante cæbopa. ¹³ Edæ ömæcamōni bai cæmōni incæte Wængonguī beyænque ante mānōmai cæmōnimpā. Wæætē nō pōnente cæmōni incæ mīnitō beyæ ante cæmōnimpā.

¹⁴ Ìmañnō ante pōnente wædinque edæ mānōmai cæmōnimpā. Tōmāmō beyæ adocanque wængacæimpa, ante adinqe mōnitō, Mōnō tōmāmō do wængamōimpa, ante edonque ēñēmōnimpā. Ìnque, Mōnō Codito nanguī waadete pōnengā inte pōnō cæcampa, ante pōnēninque mōnitō ædō cæte wapiticæ cæquimōnii. ¹⁵ Mōnō Codito iñōmō tōmāmō beyæ wæninque, Mīnitō idæwaa nāmā beyænque quēwēmīnimpā, ante wængacæimpa. Ayæ, Botō nē wænte ñāni ömæmongāimō iñōmote mīnitō botō beyæ ante quēwencæmīnimpā, ante cædinque tōmengā tōmāmō beyæ wængacæimpa. ¹⁶ Mānōmai impā, ante pōnēninque mōnitō ñōwo ìncayæ ate waodāni inānite adinqe, Inguipogaque ēñate quēwēñānimpā, ante pōnēñāmai ìmōnimpā. Edæ mōnō Codito

incæ inguipoga eñate quëwëñgante mōnitō mǎnōmǎinō ante pōngalmōni incæte mōnitō ñōwo wæætē mǎnōmǎinō ante wīl pōnēmōnipa. ¹⁷ Ìnque Codito nempo æcǎnō quëwënaa tōmengā ingante Wængongui mīngā badongā ate mīngā bate quëwëngampa. Tōmengā nǎnō inguipogaque nǎnō quëwënimāmo edæ dæ gotimpa. Ñōwo wæætē edæ mīimāmoque ewocacampa.

¹⁸ Mǎninō botō ānō ante tōmǎnō nē pōnō badongā ññōmō edæ Wængongui adocanque ingampa. Tōmengā ññōmō, Minitō eññēnāmaī cæmīni incæte Codito pōnō cæcā beyænque botō piyǎnē cæcæboimpa, angampa. Ìnque botō piyǎnē cæbo adinque mīnitō botō gāmǎnō pōedāni, angampa. Ayæ mōnitō imōnite pōnō angā eññēninque mōnitō wæætē edæ wadāni ññānite, Wængongui piyǎnē cædinque, Pōedāni, angampa, ante nē cæmōni batāmōnipa. ¹⁹ Ìnque ñmaī ante apænemōnipa. Codito tōnō godongāmæ cædinque Wængongui ññōmō piyǎnē cædinque, Inguipoga quëwëmīni tōmǎmīni botō gāmǎnō pōedāni, angampa. Pōmīni adinque botō, Æpogadō wënæ wënæ cæmīnitawo, ante tee mante adāmaī inte pīñāmaī incæboimpa, angampa.

Tōmengā mǎnōmaī angā eññēninque mōnitō wæætē mǎñine ante nē waadete apænemōni badinque edæ, Wængongui piyǎnē cæcā adinque pōedāni, ante apænemōnipa. ²⁰ Ìnque Wængongui mōnitō imōnite āninque, Minitō wæætē botō beyæ wadāni ññānite waadete apænemīni eññēninque poncædānimpa, angā eññēninque mōnitō wæætē Codito beyænque nē waadete apænemōni bamōnipa. Ìnque mīnitō imīnite waadete pōnō apænedinque mōnitō, Wængongui gāmǎnō pōedāni, ante Codito beyænque ante apænemōnipa. ²¹ Wængongui, Minitō Codito nō nǎnō ewocadō ænte ewocacæmīnimpa, ante pōnō cædinque Codito ingante angā eññēninque tōmengā ññōmō edæ wënæ wënæ ewocadāmaī inte wæætē edæ mōnō beyæ ante nē wënæ wënæ cæcā baī badinque mōnō wentamō ewocadō incæ mongængacāimpa. Ìnque mōnitō tōmengā nempo quëwëninque nō pōni tōmengā nǎnō ewocadō wæætē ænte ewocamompa.

6

¹ Tōmengā tōnō godongāmæ nē cæmōni inte mōnitō mīnitō imīnite ñmaī ante waadete apænemōnipa. Wængongui waadete pōnō cæcā æmīni inte mīnitō wīl ònonque oda cæcæte ante æncæmīnimpa, ante nangui āmōni eññēmaimīnipa. ² Edæ Wængongui do angacāimpa,

“Mīnitō imīnite botō waadete pōnō cæyedē mǎññedē mīnitō apænemīni eññentabopa.

Ayæ, Mīni quëwënguiōnæ impa, ante Codito nǎnō bæi ongonte æññedē botō mǎññedē mīnitō beyæ pōnō cægaboimpa.”

Ante yewæmongatimpa. Ìnque botō ñmaī āmo eññēdāni. Wængongui tōmengā nǎnō waadete pōnō cæyedē do ba apa quëwëmīni. Codito edæ ængā beyænque mīni quëwënguiōnæ ññōmō edæ do batimpa cæmīni.

³ Mōnō quëwënguiōnō ante adocanque incæ Wængongui beyæ mōni apænedō ante pīñāmaī incæcāimpa, ante wææ cædinque mōnitō ññōmō idiquibæ cædāmaī imōnipa. ⁴ Wæætē mīnitō, Pabodoidi Wængongui beyæ nē cædāni ññānipa, ante acæmīnimpa, ante odōmoncæte ante mōnitō cōwē ñmaī cæmōnipa. Cōwē nantate wæmōni incæ wënæ wënæ cædāni wæmōni incæ mō ongonte wææ cædāni wæmōni incæ æbāmenque wæmōni incæte mōnitō cōwē wæntæye badāmaī inte ee cæmōnipa. Ædō cæte quëwëngui, ante wæmōni incæ Wængongui beyæ nē cæmōni inte mōnitō godōmenque cæmōni aedāni. ⁵ Ayæ tæi tæi pǎnāni wæmōni incæ tee mōnedāni wæmōni incæ Yæ yæ ante mōnitō imōnite wido cædāni incæte mōnitō wæætē Wængongui ingante nē cæmōni inte edæ nangui cæmōnipa. Ayæ woyowotæ nangui cædinque mōnitō mōwo mōnāmaī inte cæmōni incæ cængui cænāmaī inte gæwænte wædinque cæmōni incæ mōnitō godōmenque cæmōni aedāni.

⁶ Mǎnōmaī cædinque mōnitō wentamō mongæñāmaī inte cæmōnipa. Ayæ wadāni æbāmenque cædāni incæ mōnitō nō eññēmōni inte edæ piyǎnē cæte pīinte ānāmaī imōnipa. Wæætē waadete cæmōnipa. Edæ Wængongui Tæiyæ Waëmō Òñowoca nempo quëwëninque nāwangā waadete pōnemōnipa. ⁷ Wængongui nǎnō tæi pīñǎnō ewocadinque mōnitō Wængongui nō nǎnō angainō ante apænemōnipa. Ayæ tontadoidi guëadō guëa wænoncæte ante tipæmāa nææñāni baī cædinque mōnitō nō pōni cæcæte ante Wængongui nǎnō tæi pīñǎnō ante eyepæ næænte baī cæmōnipa.

⁸ Mōnitō imōnite waa adāni incæ wīwa adāni incæte mōnitō Wængongui beyænque ante cæmōnipa. Pabodoidi waa pōni cædānipa, ante nō apænedāni incæ wæætē, Pabodoidi wënæ wënæ cædānipa, ante tedewëñāni incæ mōnitō cōwē godōmenque cæmōnipa. Pabodoidi babæ cædānipa, ante pīñāni incæte mōnitō nōingā pōnente Wængongui beyænque ante cæmōni aedāni. ⁹ Edæ tōmǎnāni mōnitō

imõnite do edonque põni adani incæ adamaï inte bai cædinque, Önõminique iminipa, ante tededänipa. Wæncæ cæmõni incæte ee quëwëmõnipa. Pänäni wæmõni incæte mõnitõ imõnite wæñõnåmaï inänipa. 10 Wæwëmõni incæte mõnitõ cõwë mímõno watapæ towocamõnipa. Mõnitõ mæincoo õmæpomõni incæ wadäni inänite godõ cæmõni æninque tõmënäni mæincoo nangui põni ænte bai eyepæ põni entawënänipa. Edæ nê õmæpomõni inte wæmõni incæte mõnitõ tõmancoo põni entawëmõni inte Wængongui ingante nê cæmõni imõni aedäni.

11 Coodintoidi ëñëedäni. Minitõ iminite mõnitõ edonque põni apænetamõnipa. Minitõ iminite nangui põni waadete põnëmõnipa. 12 Mõnitõ dicæ pæ gompote minitõ iminite waadedåmaï imõniyaa. Wæætë edæ tõmëmîni pæ gompodinqe edæ mõnitõ imõnite waadedåmaï imîni inte wæwëmînipa. 13 Æninque botõ wëñæmîni bai iñõmînite iïmaï åmopa. Minitõ iminite waadete põnëmõni adinque minitõ næëmæ waadete põnëedäni.

Wængongui nê Quëwengå nånõ owocõ bai imõmpa, ante

14 Guëa mangæ mangæ woquïna, ante wagada tõnõ bodo guëa goti wëmencadåmaï iedäni, ante do yewæmongatimpa cæminii. Põnënåmaï inäni tõnõ godongåmæ cædåmaï iedäni. Iñæmpa nê nõ cæcå tõnõ guëa åantawente bai nê ëñënåmaï cæcå guiquënë dicæ adobaï entawengåå. Ayæ ñåõ entawengå tõnõ guëa gocæte ante cædinque nê wëmõ entawengå iñõmõ mímõ ñåõ entawengampa diyæ guëa goquingåå. 15 Codito nånõ põnënõ ante edæ wënæ awënë Bediado iñõmõ edæ adodõ ante põnengampa diyæ guëa cæquingåå. Nê wede põnengå nånõ põnënõ ante nê põnënåmaï ingå iñõmõ edæ adobaï põnengampa diyæ adobaï quëwenguingåå. 16 Ayæ, Wængongui impa, ante waodäni nâni badõninca æninque edæ nåwå Wængongui tæiyæ waëmõ oncõnë ædõ cæte mangui cõ cæquïl. Mõnõ guiquënë Wængongui nê Quëwengå nånõ tæiyæ waëmõ owoquincõ bai iñõmonte tõmengå Önõwoca mõnonga põ guiite owocampa. Æninque tõmënäni tõnõ mõnõ ædõ cæte godongåmæ cæquïl. Wængongui incæ, Månõmaï impa, ante ancæte ante iïmaï angacåimpa.

“Wadäni weca owodinqe botõ tõmënäni tõnõ godongåmæ cægoncæboimpa. Botõ tõmënäni Wængongui iñõmote tõmënäni wæætë botõ quïnäni incædånimpa,” angacåimpa.

17 Månõmaïnõ ante apænedinqe mõnõ Awënë adobaï ante,

“Wadäni inänite taayænte põninque nånënë ponte quëwëedäni, angampa.

Wentamõ i adinque gampodåmaï iedäni. Månõmaï cæminii adinque botõ mõnitõ iminite, Põedäni, ante ee æncæboimpa.

18 Æninque, Minitõ Wæmpobo inõmo inte botõ,

onguiñæmîni incæ onquiyæmîni incæ, Botõ wëmîni imînipa, ante æncæboimpa, ante nê Tæi Piñænongå inte Awënë Wængongui angampa.”

Ante Wængongui beyæ yewæmongatimpa.

7

1 Æninque botõ nê waademini ëñëedäni. Mõnõ iñõmõ, Wængongui, Cõwë cæcæboimpa, ante nånõ angainõ ante do ëñengamõmpa. Æninque baonga wentamõ mõnõ ëñådõ tõnõ mímõ mõnõ wentamõ entawënõ adobaï ñå mënongate bai cædinque edæ mõnõ tæiyæ waëmõ ewocate quëwengæimpa. Ayæ, Wængongui ingampa, ante guïñente wædinque mõnõ, Cõwë nõ cæte waa quëwengæimpa, ante nangui cæcæimpa.

Coodintoidi Codito gamcënõ põnånipa

2 Mõnitõ dicæ wacå ingante wënæ wënæ cæmõniyaa. Wacå wentamõ nånõ mongænguinque mõnitõ dicæ wënæ wënæ cæmõniyaa. Dicæ wapiticæ apænedinqe wacå quï õ æmõniyaa. Æninque, Pa-bodoidi månõmaï cædåmaï inänipa, ante adinque minitõ wæætë mõnitõ imõnite waadete põnëninque ëñëedäni, åmopa. 3 Månõmaïnõ ante åmo incæte botõ, Mîni pante wæquinque, ante dicæ apænte åmogaa. Edæ botõ do antabopa. Minitõ tõnõ mõni quëwenguinque incæ minitõ tõnõ mõni wænguinque incæ mõnitõ minitõ tõnõ ånque bai entawente minitõ iminite cõwë waadete põnëmõnipa, antabopa. 4 Edæ, Minitõ nõ põnente cæminii iminipa, ante põnëmopa. Mõnitõ apænemõni ëñëninque minitõ nê waa cæminii bamînitapa, ante adinque botõ mõnitõ apænedõ ante nangui tobopa. Minitõ månõmaï cæminii iminipa, ante ëñente wædinque botõ gancæ põnëmopa. Æninque mõnitõ wënæ wënæ inte wæwëmõni incæte botõ wæætë godõmenque watapæ tobopa.

5 Iïmaï edæ Måatedõniabæ põninque cætamõnipa. Æmætæ æmætæ gote apæncæte ante cæyõmõnite wadäni bæ ta bæ ta cædäni wædinque mõnitõ ædõ cæte guëmanguimõnii. Edæ nangui piinte cædäni wædinque mõnitõ baonga nantate wædinque õnõwoca adobaï guïñente wæwocatamõnipa.

6 Incæte mõnitõ wæwëñõmõnitate, Nê wæwënäni gancæ bacædånimpa, ante nê põnõ cæcå inongå Wængongui iñõmõ Tito ingante da põnongå pongå adinque mõnitõ wæætë gancæ põnentamõnipa.

7 Tõmengå ponte a ongongå beyæ gancæ põnëñõmõnitate tõmengå, Coodintoidi botõ imote waa cædäni adinque botõ wæætë

gancæ pönentabopa, ante apænecä eñente mōnitō godōmenque totamōnipa. Ayæ botō imote ante apænedinque tōmengä, Bitō imite ante nangui ainente wædinque coodintoidi Ca ca wædänipa. Tömēnāni iñōmō, Mōnō ñōwo Pabodo beyæ ante nangui cæcæimpa, ante wædänipa, ante Tito tedecä eñēninque botō godōmenque nangui totabopa.

⁸ Botō doyedē cadota ante yewæmōninque da godōmo æninque mīnitō wæwente bamīnitawo. Nāwangä botō cadota beyæ wæwente bamīnitapa, ante wædinque botō, Quīnante mǎnōmaī yewæmōmoi, ante wætābopa. Incæte ayæ ate, Coodintoidi wantæ iñō wæwēninque ñōwo iñōmō edæ wæwēnāmaī inānipa, ante adinque botō ñōwo edæ, Nō cædinque yewæmōmoimpa, ante piyænē cæbopa. ⁹ Edæ mīnitō wæwēmīni beyæ todāmaī inīmo inte botō wæætē, Mīni wēnæ wēnæ cædinō ñimpo cædinque mīnitō Codito gāmæñō mīni ponguinque wæwente bamīnitapa, ante adinque mǎnōmaī beyænque totabopa. Edæ Wængongui nānō ānōnō mīni eñguingque wæwente bamīni ininque mōnitō cædō beyæ dicæ wæmīniyaa.

¹⁰ Edæ Wængongui nānō ānōnō ante wæwēmō bai mōnō ocæ ēmante ponte quēwenguingque impa. Ininque, Quīnante mǎnōmaī wæwēmōi, ante wædāmaī imōmpa. Wæætē inguipoga mōnō quēwenguiāmō ante wæwēmō bai mōnō wænguingque impa. ¹¹ Edæ Wængongui nānō ānōnō ante do wæwēnimīni inte mīnitō ñōwo, Māninō mōni wæwēnō beyæ æbānō entawēmōni, ante nāmā aedāni. Edæ mǎnōmaī wæwēmīni inte mīnitō, Mōnō ee ongōnāmaī inte cæcæimpa, ante do cæmīnitapa. Cædinque, Mōnō pōnencabo wentamō mongæñāmaī ingæimpa, ante nangui cædinque mīnitō nē wēnæ wēnæ cædingä ingante edæ do pūmīnitapa. Ayæ, Pabodo æbānō anguinggā, ante guīñente wæmīni incæte botō imote ante ainente wæmīnitapa. Ayæ, Nē wēnæ wēnæ cædingä ingante mōnō nō ante pangæimpa, ante do cæmīnitapa. Mǎnōmaī eyepæ cædimīni inte mīnitō wentamō mongæñāmaī imīnipa, ante edonque abaimpa.

¹² Ininque mīnitō imīnite yewæmōninque botō nē wēnæ wēnæ cædingä beyæ ante wīi yewæmontabopa. Tōmengä wēnæ wēnæ cæcä wædingä beyæ ante adobai yewæmōnāmaī intabopa. Wæætē mīnitō Wængongui ayongä nāmā adinque, Mōnitō Pabodoidi inānite waadete amōnipa, ante, Nāwangä impa, ante edonque acæmīnimpa, ante botō mīnitō beyænque ante yewæmontabopa. ¹³ Mīnitō mǎnōmaī cæmīni adinque mōnitō wēēñēdē nē wæwēmōni inte ñōwo iñōmō gancæ

pōnēmōnipa.

Mīnitō waa cæmīni beyæ wēēñēdē wæwēningä inte Tito adobai gancæ pōnente ñōwo watapæ pōnengampa, ante adinque mōnitō do gancæ pōnēmōni inte ñōwo godōmenque nangui tomōni imōnipa. ¹⁴ Botō do inōñēdē Tito ingante apænedinque, Coodintoidi waa cædāni abopa, antabopa. Ñōwo mīnitō waa cæmīni adinque botō, Tito ingante botō apænedinō nō impa, ante adinque botō guingo imōnāmaī imōpa. Edæ botō mīnitō imīnite nōinō ante apænetawo. Edæ mīnitō imīnite nōinō ante apænebo bai botō Tito ingante, Coodintoidi waa cædānipa, ante apænedinque adobai nōinō ante apænetabopa. ¹⁵ Ayæ Tito iñōmō, Coodintoidi tōmānāni botō imote waa adinque guīñente wædänitapa. Ayæ, Pōe, āninque tōmēnāni botō apænebo eñēninque Ao ante eñente cædānitapa, ante pōnēninque tōmengä mīnitō imīnite godōmenque waadete pōnengampa. ¹⁶ Ayæ, Mīnitō cōwē waa cæmīni imīnipa, ante pōnēninque edæ botō adobai watapæ tobopa.

8

Mōnō godōmenque nangui godongæimpa, ante

¹ Ñōwo botō tōñiñadāni apænebo eñēdāni. Māatedōniabæ iñōmō Codito ingante godongāmæ nāni pōnencabo wayōmō nāni cabo wayōmō nāni cabo ongōñōnānite Wængongui Ōñowoca pōnō apænecä eñēninque tōmēnāni wæætē waadete cædinque iūmaī cædānipa. ² Nangui wēnæ wēnæ nantate wæwēnāni incæ tōmēnāni cōwē piyænē cæte watapæ todānipa. Ininque omæpodāni incæte tōmēnāni nangui mǎnāni bai cædinque, Wængongui quīnāni quī, ante godōmenque todinque nangui gomonga godōnānitapa. ³ Tōmēnāni edæ nāni godonguēñēnō ganca do godōninque ayæ godōmenque nangui godōnāni adimo inte botō, Nāwangä impa, ante apænebopa. Ayæ edæ tōmēnāni nāni nāmā pōñēnō bai cædinque, ⁴ Wængongui quīnāni beyæ impa, ante mōnitō wadāni tōnō godongāmæ godoncæmōnimpa, ante tōmēnāni mōnitō imōnite nangui āninque ancaa ānānitapa. ⁵ Mōnitō guīquēñē, Māatedōniabæ quēwēnāni tōmēnāni nāni godonte æintaque godonguīnāni inānipa, ante edæ pōnentamōnipa. Incæte tōmēnāni, Wængongui quīmōni imōnipa, ante edæ Wængongui ingante nāmā godōninque ayæ, Mīnitō imīnite nē cæmōni bacæmōnimpa, āninque mōnitō imōnite edæ adobai nāmā pōñōnānitapa. Ayæ mōnitō pōñēnō ganca adobai godōninque tōmēnāni nāni godonte æinta ayæ godōmenque godōnānitapa.

6 Määtedöniabæ quëwënanî mánömaî cædâni adinque mõnitö Tito ingante iimaî antamöniþa. Bitö doyedë ämi ëñëninque coodintoidi waadete pönëninque tæcæ godoncæ cædânitapa cæbii. Nöwo wæætë ämi ëñëninque tõmënâni nê waadete godönâni badinque eyepæ godoncædânimpa, ante mõnitö Tito ingante nanguî antamöniþa. 7 Minitö iñömö wede pönëmini inte edæ nê waa pöni apænemini iminipa. Ayæ godömenque gomonga ëñëmini inte munitö, Mönö cöwë cæcæimpa, ante nanguî cædömini iminipa. Ayæ mõnitö imönite nê waadete pönëmini iminipa. Mänömaî tõmännö ante do cædömini inte munitö ñöwo adobaî, Wængonguî quî, ante mõnö nê waadete godömö bacæimpa, ante edæ nanguî cæedâni, ämopa.

8 Mänömaînö äninque botö, Cæedâni, ante wææ änämaî imopa. Wæætë, Minitö æbänö cæminii, ante ëñencæte ante cædinque botö wadâni nâni nanguî cædinö ante apænetaþopa. Mänömaînö ante apænedinque botö, Minitö adobaî tõmënâni nâni cæbaî nanguî waadete pönente cæminitawo, ante acæte ante cædinque, Nê godömini baedâni, antabopa. 9 Minitö do ëñëminipa. Mönö Awënë Itota Codito öönædë quëwëninque nanguî gomonga ënemþogaingä inte mõnö imonte waadete pönëninque iimaî ante pönö cægacäimpa. Botö ömæpobo babo beyænque munitö nanguî wæætë entawencæminimpa, ante cædinque tõmengä edæ munitö beyænque ante inguiþoga pöninque edæ ömæþocä bagacäimpa.

10 Ayæ, Mäninö mîni godonguinö ante æbänö cæquënemini iminii, ante botö nämä pönëninque iimaî ämopa. Wadepo inöðedë wadâni godönämaî iñönâni munitö iñömö edæ do täno godöminitawo. Mönö godongæimpa, ante edæ munitö cöwë täno cæinëmini iminitawo. 11 Ininque, Mönö godongæimpa, ante quingæ änimini inte ñöwo edæ iinque cæedâni. Mîni ëadincöo adinque munitö, Eyepæ inte botö panca-cooga godoncæþoimpa, ante mîni änincoo edæ godömini adinque, Eyepæ godöminipa, ante acæimpa. 12 Edæ æcänö godöinengä tõmengä nänö godonte æinta tõmanta adinque, Æpotadö botö godonguëñemo imoo, ante adinque mänimpotaque godöninque idæwaa. Godömenque nanguî mangampa diyæ nanguî godonguingää.

13 Mänömaî äninque botö, Wadâni pönömenque godöninque guëmäñönâni munitö wæætë mîni eyepote wæquinque godömenque nanguî godoncæminimpa, ante dicæ ämogaa. 14 Wæætë, Cöwë eyepæ bacæimpa, ante ämopa. Edæ mäincoo ñöwo eyepæ mäninque munitö

nê ænguënte wædâni inänite godömini ænânipa. Ininque iincayæ ate munitö wæætë nê ænguënemini bamini ate tõmënâni wæætë eyepæ mante ate munitö iminute pönönâni æñömini adopo adopo edæ eyepæ babaiþa. Mänömaînö ancæte ante ämopa. 15 Edæ do yewæmþongatimpa. “Cænguî gomonga wææmpo æningä incæ tõmengä nänö ænguënganca ænte bai mäninque godömenque mänämaî ingantapa. Wæætë edæ wædænque wææmpo æningä guiquëñë tõmengä nänö ænguënganca eyepæ ænte bai eyepæ mangantapa.” Ante nâni yewæmþongainö bai iinque bacæimpa, ante munitö iminute ämopa.

Minitö weca Titoidi þoncædânimpa, ante

16 Botö cöwë, Coodintoidi beyæ cæcæimpa, ante munitö iminute waadete pönëmopa. Ayæ, Wængonguî pönö apænecä ëñëninque Tito iñömö botö pönëmo bai adobaî pönente cæcampa, ante adinque botö wæætë Wængonguî ingante waa ate pönëninque apænëþopa. 17 Edæ mõnitö, Coodintoidi weca goe, ämöni ëñëninque edæ Tito do Ao ante þongä aedâni. Incæte wîi mõnitö äñinö beyænque þongampa. Wæætë namanque pönente wædinque tõmengä nanguî todinque munitö weca þongampa.

18 Ayæ Tito tõnö wacä mõnö tõniñacä ingante da pönömöni þongampa. Iingä Tito tõnö nê þongä iñömö tõmengä Codito ingantedö ante watapæ möni apænëdö ante nê apænecä ingampa. Ininque Codito ingante godongämæ nâni pönencabo wayömö nâni cabo wayömö nâni cabo tõmännâni tõmengä ingante waa ate waa apænëdânipa. 19 Codito ingante nâni pönencabo incæ adocä ingante apænte æninque, Pabodoidi tõnö gocæþimipa, ante da godönâni ate tõmengä mõnitö tõnö godongämæ goquingä ingampa. Edæ mõnitö, Mönö Awënë ñäö apaite bai ëmõngä ingampa, ante acædânimpa, ante cædinque ayæ, Mõnitö wadâni beyæ cæinëmönipa, ante acædânimpa, ante cædinque munitö da godonguincöo ænte goquimöni imönipa. Mänömaî cæcæte ante goyömöni, Tõmengä godongämæ gote cæcæcäimpa, ante da godönâni gocæcäimpa. 20 Edæ wadâni, Pabodoidi babæ cædânipa, ante änämaî incædânimpa, ante wææ cædinque mõnitö nõ pöni cædinque nanguî pöni mõnitö godonguincöo ænte godinque pædæ godoncæmönimpa. 21 Edæ, Mõnitö Wængonguî ayongä nõ cæmöni inte wadâni ayönâni adobaî edonque pöni cædinque nõ pöni cæcæimpa, ante cæmönipa.

22 Ayæ wacä mõnö tõniñacä iñongante mõnitö æþogamë cöwä ayömöni tõmengä cöwë tõmää nõ cæcä inþongampa. Ayæ ñöwo tõmengä, Coodintoidi nõ cædânipa, ante

pönengä inte godömenque waa cædongä ingampa. Mänömai ingampa, ante adinque mönitö ñowo tömengä ingante da godömöni godinque tömengä iñäna tönö munitö weca poncæcäimpa. ²³ Tito iñömö botö tönö godongämæ cöwë cæcampa. Ìninqe munitö beyæ guëa nè cæmöna imönäpa. Codito ingante näni godongämæ pönencabo incæ mönitö tönöñada Tito tönö wada inate da godönäni godinque tömënäni, Mönö Codito ingante waa acædänimpa, ante nangui cæda inäpa. ²⁴ Ìnänä inänite apænedinque mönitö, Coodintoidi nè waa cædäni inänäpa, ante do apænetamönäpa. Ìninqe munitö eyepæ godömöni adinque tömënäni, Näwangä impa, ante edonque acædänimpa. Ayæ adobai, Minitö waadete pönö cæmüni adinque Pabodoidi wæætë munitö imünite waa adänäpa, ante acædänimpa, ante cæedäni. Mänömai cæmüni adinque Codito ingante godongämæ näni pönencabo wayömö näni cabo wayömö näni cabo tömänäni adobainö ante edonque acædänimpa.

9

Mönö wædämai eyepæ pönö godongæimpa, ante

¹ Ñowo mäninö, Wængongüi quinäni beyæ munitö godoncæmünimpa, ante botö idæwaa yewæmömöpa. ² Edæ, Minitö wædämai inte do cæmüni, ante ëñëninque botö Mäatedöniabæ quëwënäni inänite apænedinque, Acayabæ quëwënäni iñömö wadepo inöñedë do godoncæte ante cædönänimpa, ante do apænetaböpa. Apænebo ëñëninque tömënäni wodo tömänäni, Æ Acayabæ quëwënäni näni quingæ cæbai mönö adobai cæcæimpa, ante cædänäpa.

³ Incæte botö ñowo mönö tönöñadäni inänite da godömo pöninque tömënäni munitö imünite apænedäni ëñëninque munitö wæætë eyepæ godoncæmünimpa. Mänömai cæmüni ate botö babæ apænedämai imöi, ante edonque ëñengæimpa. ⁴ Ìñæmpa Mäatedöniabæ quëwënäni botö tönö godongämæ ponte ayönäni munitö wii eyepæ cæmüni adinque tömënäni wæætë, Minitö dicæ cæmüniyaa, ante badete tobainäni. Ayæ mönitö guiquënë, Coodintoidi ñinque cæcædänimpa, ante nè änimöni inte odadete guingo imonte wæbaimönäpa. Minitö adobai, Möni cæquënëñö cædämai imönäpa, ante guingo imonte wæbaimünäpa.

⁵ Ìninqe munitö, Godoncæmönimpa, ante münü äninö bai eyepæ godoncæmünimpa. Ante cædinque botö mönö tönöñadäni inänite äninque, Minitö gote apænemüni ëñëninque coodintoidi ædæmö pönente cæcædänimpa, ante da pönömo pönäni aedäni. Ìninqe munitö tönö godongämæ

cædäni ate munitö ædæmö pönëninque, Botö wææ gompodämai inte waa todinque godömöpa, ante godoncæmünimpa.

⁶ Ìmai ante pönëedäni. Wædænque quiyadingä iñömö amiñaimö wædænque pete æncæcæimpa. Nangui quiyadingä guiquënë amiñaimö nangui pete æncæcæimpa. ⁷ Wadäni qui, ante æcänö watapæ todinque godönaa, ante adinque Wængongüi tömengä ingante waadete pönengampa. Ìninqe wadäni wææ änämai iñönäni munitö, Botö æpotadö godongüimoo, ante pönëninque tömäni wædämai inte münü änimpota adopota godöninque do godonguëñimüni imünäpa. ⁸ Ayæ, Eyepæ pönö ëamüni inte munitö quiemë cæmüni incæ tömänäni beyæ ante cöwë godö waa cæcæmünimpa, ante Wængongüi cæcampa. Ìninqe, Minitö eyepæ ænte ëadinque mänömai cæcæmünimpa, ante tömengä nangui cædongä inte cöwë eyede tate bai waadete pönö cæcæ ingampa. ⁹ Edæ docä ingante ante ñmai ante yewæmongatimpa. “Yepanca quiyacä bai inongä inte tömengä, Ömæpodäni qui, ante wayömö wayömö godongantapa.

Ìninqe tömengä nö nänö cædinö iñömö edæ cöwë ëwënämai ongongæimpa.”

¹⁰ Ante yewæmongatimpa. Nè quiyacä ingante Wængongüi, Tömëmö quiyaquimö, ante eyepæ pönöninque adobai, Cængüi, ante tömämo imonte eyepæ pönongä ænte cæmömöpa. Minitö iñömö eyepæ ëamüni inte wacä ingä wacä ingä quiyate bai nënemöcæmünimpa, ante cædinque Wængongüi münü godonganca da pönöninque godömenque gomonga da pönongä æncæmünimpa. Mänömai eyepæ da pönongä æninque munitö wæætë nö cædinque wadäni nangui inäni inänite nënemömüni æninque tömënäni wæætë amiñaimö tä pete bai watapæ quëwëncædänimpa. ¹¹ Minitö pæ gompodämai inte wadäni inänite cöwë pædæ godoncæmünimpa, ante cædinque munitö imünite Wængongüi nangui pönö pönongä æncæmünimpa. Æninque munitö pæ gompodämai inte pædæ godö pædæ godö cæmüni adinque mönitö wæætë, Coodintoidi mänömai cædänäpa, ante tedemöni ëñëninque wadäni wæætë Wængongüi ingante waa ate pönëninque apæncædänimpa.

¹² Wadäni qui, ante do godömüni æninque Wængongüi quinäni tömënäni näni ænguënëñö ante eyepæ pönö æncædänimpa. Ayæ münü godönö æninque tömënäni mümöno eyede tate bai Wængongüi ingante waa ate pönëninque nangui apæncædänimpa. ¹³ Mönö Codito ingantedö ante watapæ ëñëninque munitö Ao ante do pönëmünäpa. Ìninqe Wængongüi nänö

änönö ante do eñente cædinque munitö, Ömæpodäni quī, ante pædæ godömini æninque nē ænāni wæætē Wængonguī ingante, Bitö ñäö bai nö pōni cæbi ate coodintoidi bitö änönö ante eñente cædānīpa, ante watapæ apænecædānīpa. Ayæ nē ænīnāni inte adodāni godömenque apænedinque, Nē ömæpodāni tömānāni inānite da godöninque coodintoidi iñömö mönitö imönite adobai eyepæ pönönāni æmönīpa, ante Wængonguī ingante godömenque waa ate apænecædānīpa. ¹⁴ Ayæ, Coodintoidi inānite Wængonguī godömenque nanguī waadete pönö cæcā beyæneque tömēnāni waa cædāni inānīpa, ante pönēninque nē ænīnāni iñömö edæ munitö iminite waadete pönēninque munitö beyæ ante Wængonguī ingante apænecædānīpa.

¹⁵ Wængonguī iñömö godömenque waa cædinque mönö Codito ingante da pönongā ængamöimpa. Inique mönö, Wængonguī, bitö waa pōni pönö cægabiimpa, ante mönitö ædö cæte eyepæ inte waa ate pönente apænequimōnī, ante mönö Wængonguī ingante apænecæimpa.

10

Pabodo, Itota nānō nē da godönimo imopa, angampa

¹ Minitö, Wayömonque quēwēninque Pabodo nanguī piinte angampa, ante pönēmīnitawo. Wæætē mönitö weca pöninque awincadö awinca adinque tömengā guñēnete wædinque pæ wēñecampa, ante pönēmīnitawo. Iñæmpa mīni änömö mānīmotö inte iīmaī ämopa. Codito iñömö edæ gānē pönengā inongā inte pönö piyænē cæcantawo. Botö adobai ñowo piyænē cædinque munitö iminite pönö waadete apænebopa. ² Pabodoidi iñömö inguipogaque ante pönente cædānīpa, ante pancadāniya odadete änewēnānīpa. Tömēnāni inānite botö guñēnedāmaī inte nanguī ancæboimpa. Minitö guiquēnē adobai odadete ämīni inique botö munitö weca pöninque piinte anguēnēmo imāimopa. Inique, Wīi piinte anguimo bacæboimpa, ante wææ cæcæte ante botö ñowo munitö iminite, Ee aquēnē quēwēmīnī, ante waadete pönente yewæmömopa.

³ Edæ inguipoga quēwēmōni incæte mönitö Wængonguī beyæ ante wæætēdö wæætē cæcæte ante cædinque inguipogaque quēwēnāni nāni wæætēdö wæætē cæi bai cædāmaī imönīpa. ⁴ Wæætē edæ mönitö Wængonguī beyæ ante wæætēdö wæætē cæcæte ante cædinque inguipogaque quēwēnāni nāni wænoncaquincoo næænāmaī inte cæmönīpa. Wæætē Wængonguī tömengā nānō tæi piñæmāmo ænte mimōno entawēninque eyepæ næænte

bai badinque mönitö tömēnāni nāni tæi mænöincö bæ tate bai cædinque wæætēdö wæætē nāni godö änewēnö ante wido cæte bai cæmönīpa. ⁵ Wængonguī ingante pönēnāmaī ingæimpa, ante nē pönēwēnāni inte ængæ gætidinque tömēnāni iñömö, Wadāni tömānāni adobai Wængonguī ingante pönēnāmaī incædānīpa, ante cædinque babæ wapiticæ cædānīpa. Mānīi babæ wapiticæ nāni cædönö ante mönitö wæætē bæ tate wido cæmönīpa. Edæ, Codito ingante mönö eñengæimpa, ante nö apænemōni eñēninque wadāni idiquibæ pönēwēnāni iñönāni mönitö wæætē mānīnō nāni pönēwēnö tömānō ö ænte bai wido cæmönīpa. ⁶ Ayæ munitö ædæmō nē eñente cæmīni bamīni ate adocanque incæ eñēnāmaī cæcā adinque mönitö wæætē tömengā ingante do panguimōni imönīpa.

⁷ Eßänö i, ante edonque ongö abaīmīnīpa. Pancamīniya, Botö nāwangā Codito nempo quēwēmo imopa, ante pönēmīnitawo. Minitö mānōmaī pönēmīni inte godömenque iīmaī ante pönenguēnēmīni imīnīpa. Botö Codito nempo quēwēmo imo bai Pabodoidi adobai Codito nempo quēwēnāni inānīpa, ante nāwangā impa, ante pönenguēnēmīni imīnīpa. ⁸ Iñæmpa Wængonguī mönitö imönite äninque, Minitö nē ämīni badinque coodintoidi inānite bæ tate wido cædāmaī incæmīnīpa. Wæætē ædæmō ämīni eñēninque coodintoidi wæætē oncö tæi mænonte bai gongæncædānīpa, ante cædāni, ante Wængonguī pönö angā eñēninque mönitö nē ämōni batamönīpa. Inique botö, Nē ämo inte nāmā tocæboimpa, ante tedebo incæte guñēnedāmaī tedecæboimpa.

⁹ Botö, Cadota ante botö yewæmōinta adinque munitö guñēnte wæcæmīnīpa, ante dicæ ämogaa. ¹⁰ Pancamīniya, Pabodo tæi piñænongā bai inte cadota ante yewæmöninque nanguī angā awædö, ante wæmīnīpa. Wæætē edæ adocā incæ mönitö weca ponte ongöninque edæ aquīi ingā amönīpa. Tömengā nānō tedepāmo önomāmoque bai impa, ante pönēmīni awædö. ¹¹ Iñæmpa, Tæi piñæmōni inte cadota ante nē yewæmōmōni incæ mönitö adomōni inte munitö weca ponte ongöninque adobai tæi piñænte cæcæmönīpa, ämo eñēmaimīnīpa.

¹² Pancadāniya nāmā incæ, Waëmö pōni imopa, ante tededāni incæte tömēnāni nāmā nāni tede bai mönitö ædö cæte adobainö ante tedequimōnī. Tömēnāni iñömö, Eægancadö waa cæbo eyepæ inguīi, ante nāmā nāni cægancaque ante adinque edæ, Eyepæ cætabopa, ante pönēwēnānīpa. Tömēnāni nāni cædö ante, Waa cætawo, ante tee mancæte ante, Do botö cædinö bai adobai cæbopa, ante adinque, Eyepæ

impa, ante pönēwēnānīpa. Mānōmaī nāmā nāni pönēwēnōque ante cædinque tōmēnāni ēñēnāmāi inte oda cæte cædānīpa.

¹³ Mōnitō guiquēnē, Īngancaque goedāni, ante Wængonguī nānō angancaque cōwē gomōnīpa. Īnīnque tōmēngā, Coodintoidi ganca godinque apæneedāni, angā ēñēnīnque mōnitō do gote apænedīnque, Māningancaque waa cæmōnīpa, ante nāmā waa ate tedemōnīpa. Godōmenque ante tededāmaī ĩmōnīpa. ¹⁴ Mīnitō ganca pōnāmaī inte baī mōnitō, Coodintoidi weca gote do cætāmōnīpa, ante tedemōni baī babæ wapiticæ incædōnīpa. Incæte mīnitō ganca do pōnīnque Codito ingantedō ante mōnitō watapæ mōni ēñēnō ante apænetamōnīpa. Īnīnque edæ, Māninganca cætāmōnīpa, ante mānīnque ante tedemōnīpa. ¹⁵ Ayæ wadāni nāni cædinō ante adīnque mōnitō, Tōmēmōni cædinō impa, ante ānāmāi ĩmōnīpa. Wæætē mīnitō godōmenque godōmenque wede pōnēñōmīni mōnitō wæætē adodō mīnitō weca ponte quēwēnīnque godōmenque gomonga cæyōmōni mōnō watapæ bacæimpā, ante pōnēmōnīpa. ¹⁶ Ayæ mīnitō weca ĩnque cædinque mōnitō godōmenque gomonga godinque mōnō Codito ingantedō ante watapæ mōni ēñēnō ante apæneccæmōnīpa, ante pōnēmōnīpa. Mānōmaī cædinque mōnitō wacā nānō cædiñōmō ante, Mōnitō māniñōmō cætāmōnīpa, ante tededāmaī incæmōnīpa.

¹⁷ Æcānō, Botō waēmō pōni ĩnōmo inte waa cæbopa, ante toīnēna tōmēngā wæætē, Mōnō Awēnē waēmō pōni ĩnongā inte pōnō waa cæcampa, ante toquēnēngā ingampa. ¹⁸ Edæ, Waēmō ĩnōmo ĩmopa, ante nāmā ānongā ingante Wængonguī waa adāmāi ingampa. Wæætē, Īngā waēmō ĩnongā ingampa, ante mōnō Awēnē nānō ānongā ingante ante Wængonguī wæætē waa acampa.

11

Wængonguī beyæ, ante pancadāniya babæ apænedānīpa

¹ Nōwo botō adodeque ōnonque tedete baī yewæmōmo adīnque mīnitō ee amīni ĩnīnque botō waa tobāimopa. Wadō āmo, Mīnitō ee ayōmīni edæ botō ōnonque tedete baī do yewæmōmopa. Īnīnque ĩmaī ante odōmoncæte ante yewæmōmōi aedāni. ² Wængonguī wææ gompocā baī botō adobaī mīnitō beyæ ante wææ gompote āmopa. Mīnitō baquēcā mōnāmaingā baī ĩñōmīnite Codito ængā beyænque mīni pōnēncabo tōmēngā nempo nō cæte quēwēncæmīnīpa, ante pædæ godoncæte ante cædinque botō tōmēngā adocanque ingante, Bitō quīnāni ĩnānite æe, antabopa. ³ Mīnitō nōingā cædinque wacā miñæ godāmaī inte Codito

ingante waadete pōnēmīni incæte botō, Mīnitō oda cæmīni wææ wæ, ante guīfēnte wæbopa. Eba wodi ingante Tæntæbo nangui ēñēngā inte babæ cædinque apæneccā ēñēnīnque tōmēngā nānō oda cægāi baī mīnitō wīi adobaī oda cæcæmīnīpa, ante botō wææ ante apænebopa.

⁴ Mōnitō, Itota ingante pōnēngæimpā, ante do apænemōni ēñēmīnitapa. Incæte wacā mīnitō weca pōnīnque nāwā Itota ingante apænedāmaī inte, Wacā Itota ingante pōnēedāni, ante babæ apæneyongante mīnitō edæ ēñēē cōmīni awædō. Adobaī Wængonguī Ōnōwoca do ængaimīni ĩñōmīnite wacā ōnōwoca pō guīyongante mīnitō ee æmīni guicā awædō. Ayæ wadāni mōnō Codito ingante ante apænedāmaī ĩnāni inte, Wacā ængā beyæ quēwēngæimpā, ante babæ apæneyōnāni mīnitō edæ ēñēē cōmīni awædō. ⁵ Mānōmaīnō ante nē tededāni ĩñōmō nāmā ante pōnēnīnque, Nē gode āmōni inte mōnitō ñæñæmōni pōni ĩmōnīpa, ante edæ babæ ānewēnānīpa. Tōmēnāni nāwangā ñæñæñāni ĩnāni baī botō dicæ wædāmo inguēnēmogaa, ante pōnēmopa. ⁶ Botō æbānō tedeebo, ante ēñēnīnque mīnitō ĩñōmō, Ōnōnepāmoque tedecampa, ante pīimīnitawo. Incæte botō ædæmō adīmo inte nē ēñēnīmo inte apænebopa. Pabodo mānōmaī ĩnongā inte apæneccampa, ante acæmīnīpa, ante mōnitō cōwē mīnitō ĩmīnite edonque odōmōmōni amīnitapa.

⁷ Mīnitō ĩmīnite ængō cæte baī cæcæte ante botō Wængonguī ingantedō ante watapæ apænebo beyæ ænāmāi intabopa. Mānōmaī ænāmāi inte botō nāmā edæ pīinte baī cædinque dicæ wīwa cætābogaa. ⁸ Codito ingante godongāmæ nāni pōnēncabo wayōmō nāni cabo wayōmō nāni cabo da pōnōnāni ō ænīnque botō mānīntaque godonte ænte quēwēnīnque mīnitō beyæ cætābopa. ⁹ Ayæ mīnitō weca ongōnīnque botō quīēmē æīnente wæbo incæ edæ waa atabopa. Wadāni edæ mōnō tōniñādāni incæ Māatedōniabæ quēwente pōnīnque tōmēnāni botō ænguēnēnō ante eyepæ pōnōnāni æntabopa. Īnīnque coodintoidi botō ānō beyæ wædāmaī incædānīpa, ante wææ cædinque botō ĩñōmō edæ, Pōnōmīni æmoedāni, ante cōwē ānāmāi intabopa. Ayæ ĩncayæ ate cōwē ānāmāi incæboimpā. ¹⁰ Mōnō Codito nō nānō apænedō ante ēñēnte entawēmo inte āmopa. Botō, Mānōmaī cædinque waa cæbopa, ante cōwē edæ tedeyōmote mīnitō Acayabæ quēwēmīni inte edæ wææ cædāmaī incæmīnīpa. ¹¹ Quīnante mānōmaī ante tedeeboi. Mīnitō ĩmīnite waadete wædāmaī inte mānōmaī ante tedeeboi. Īñæmpa botō æbānō mīnitō ĩmīnite waadete pōnēmoo, ante do againgā inte Wængonguī tōmēngā ancæcāimpā.

¹² Wadāni guiquēnē, Mōnitō Codito nānō nē godongaimōni īmōnīpa, ante nē ānāni guiquēnē, *Æbānō* cæte odōmōmōni adinque wadāni Pabodoidi īnānite waa adō bai mōnitō īmōnite adobaī waa acædānīpa, ante wædānīpa. Īnīnque botō īñōmō, Īnāni mānōmaīnō ante odōmōnāmaī incædānīpa, ante mānōmaī tedete wææ cæbo inte edæ cōwē godōmenque wææ cæcæboīpa. ¹³ Tōmēnāni īñōmō edæ, Wadāni oda cæcædānīpa, ante awēmō cædāni īnānīpa. Mōnō Codito tōmēnāni īnānite da godōnāmaī ingā incæte tōmēnāni īñōmō edæ, Codito nānō da godongaimōni īmōnīpa, ante babæ apænēdānīpa. Ayæ edæ mōnitō Codito nānō da godongaimōni mōni ēmōnō bai ōnōmoque ēmōnīnque babæ cædānīpa. ¹⁴ Mīnitō, Tōmēnāni quīnante wacā bai ēmōnānīi, ante wæmīnitawo. Īñæmpa tōmēnāni awēnē Tatāna incæ babæ cædinque Wængonguī anquedoidi ñāō nāni ēmōnō bai ñāō ēmonte bai ēmongampa. ¹⁵ Īnīnque Tatāna beyæ nē cædāni īñōmō tōmēnāni awēnē Tatāna nānō babæ cædō bai adobaī babæ cædinque, Nē nō Cædongā ingante nē cæmōni īmōnīpa, ante ōnōmoque ēmōnānīpa. Īnīnque tōmēnāni nē ōnōmoque ēmōnāni inte ōnonque ēwente baquīnānidō anguēnē.

Æbānō caate wæboo, ante Pabodo yewæmongampa

¹⁶ Botō ñōwo adodō ante yewæmōmopa. Mīnitō, Pabodo ocai ōmædæcacā īnongā inte ōnonque tedecampa, āmīnitawo. Mānōmaīnō ante ānāmaī īmæwēdāni. Incæte wacā ocai ōmædæcacā tedeyongante mīnitō ee amīni tedecā bai botō adobaī ocai ōmædæcabo inte bai, Nāmā waa cæbo īmopa, ante adodeque tedebō īnīnque ee amīni tedebōedāni. ¹⁷ Botō ñōwo mānōmaī nāmā waa ate bai tedete yewæmōnīnque mōnō Awēnē nānō āmaī wīi yewæmōmopa. Wæætē ocai ōmædæcacā mā nānō pōnente tede bai adobaī ōnonque tedete bai yewæmōmopa. ¹⁸ Pancadāniya nanguī īnāni incæ, Mōnitō nāmā waa cæmōnīpa, ante edæ inguīpogaque quēwēnāni tededāni bai adobaī tededānīpa. Tōmēnāni mānōmaī tededāni īnīnque botō adobaī, Nāmā waa cæbopa, ante tedecæboīpa. ¹⁹ Nē ēñēmōni īmōnīpa, ante nē amīni inte mīnitō īñōmō ocai ōmædæcadāni ōnonque tedeyōnānite ee ēñēē cōmīnīpa tōō. ²⁰ Wacā edæ mīnitō īmīnīte bæi ongongā wædinque mīnitō tōmēngā ingante ee nē cæmīni bawēmīni awædō. Wacā babæ wapiticæ cædinque mīnitō quī inguēnē incæ ō ængā incæte mīnitō edæ ee amīnīpa. Wacā mīnitō awēnē bai nāmā ængō cæte angā incæ ee ēñēmīnīpa. Wacā mīnitō īmīnīte pōnō tamongā incæte mīnitō ee ate wæmīni awædō. ²¹ Botō wæætē aquīmo inte, Tōmēnāni nāni nanguī cædō

bai ædō cæte cæquīmo, ante botō guingo imonguinque ōnonque tedebopa tōō.

Tōmēnāni nānanque waa adinque edæ guīñēnāmaī inte tededānitawo. Botō adobaī nānanque waa adinque edæ guīñēnāmaī inte tedecæboīpa. Incæte mānōmaī tededinque botō ōnonque badete tede bai tedebopa. ²² Tōmēnāni guīquēnē ebēdeoidi īnānitawo, ante pōnēmīni. Botō īñōmō edæ tōmēnāni nāni īmaī adobo īmopa. Tōmēnāni idægoidi īnānitawo. Edæ botō tōmēnāni nāni īmaī adobo īmopa. Tōmēnāni Abadāō wodi pæīnāni īnānitawo. Edæ botō tōmēnāni nāni īnō bai adobo Abadāō wodi pæīmo īmopa. ²³ Mōnō Codito beyæ nē cædōnāni īnānīpa, ante pōnēmīni. Botō edæ tōmēnāni nāni īmaī inte edæ gomonga īmopa. Incæte mānōmaīnō ante tededinque botō ocai ōmædæcacā bai inte ōnonque tedebopa. Tōmēnāni īnānite adopoque adopoque wædænque cæyōnāni botō godōmenque nanguī cægaboīpa. Tōmēnāni īnānite wædænque tee mōnedāni wæyōnāni botō imote godōmenque wæætē wæætē tee mōnedāni wægaboīpa. Tōmēnāni īnānite wædænque tæi pānāni wæyōnāni botō imote godōmenque nanguī tæi pānāni wægaboīpa. Ayæ botō wæætē wæætē wodo wægaboīpa.

²⁴ Oodeoidi æmontaimenca wodo coadenta ganca adoyedē nāni cōwē tæi pāimpoga botō imote adoyedē mānīmpoga tæi tæi pānīnque ōnompō æmæmpogoncaque wæætē adopoga adopoga tæi tæi pānāni wægaboīpa. ²⁵ Ayæ cantaca mēmpoga go adopoque botō imote tæi tæi pānāni wægaboīpa. Ayæ adopoque botō imote dicaca tacadāni wangæ wægaboīpa. Ayæ wipodē wogaa godīnque mēmpoga go adopoque wipo tente tobæmpo wægaboīpa. Edæ wīi eyepæ gote botō tōmāā itædē tōmāā woyowotæ tæcæpæno pōni wæwogaboīpa. ²⁶ Wayōmō wayōmō botō ancaā godīnque wætabopa. Ōnō æpæmpo wodo bete wæntabopa. Nē ō ænāni incæ botō guīdēnāni incæ wadāni incæ wodo wæñōnāni wæmo adinque botō wænguinque ante wægaboīpa. Ayæ tōmēnāni nāni quēwēñōmō quēwēnīnque, Ōnōmæca quēwēnīnque, gāwapæno owodīnque botō wænguinque ante wægaboīpa. Ayæ wadāni incæ, Mōnō pōnencabo īmopa, ante babæ ānāni adinque botō īñōmō edæ, Babæ cædāni wæncæ wæ, ante wægaboī aedāni. ²⁷ Botō pancaōnaā tōmāā woyowotæ mīmo inte nanguī cædinque wægaboīpa. Tepæ pancaōnaā gæwænte wægaboīpa. Pancaōnaā cængūī dæ ā ate gue ænente wægaboīpa. Edæ æpogamē pōni cænāmaī inte wægaboīpa. Pancayedēña botō weocoo ōmaabo inte yoguite wægaboīpa.

²⁸ Mänömaï wædömo inte botö, Codito ingante godongämæ nāni pōnencabo tōmancabodāniya nāni wædö ante æbānō cæquimoo, ante wædinque ïmō ïfō ïmō ïfō nangui cæbopa. ²⁹ Edæ wacā aquilingā inte wæcā ïninque botö adobai aquimoo inte bai wæbopa. Ayæ, Wænæ wænæ cæe, ānāni ēñēninque adocanque oda cæcā ēñēnte wædinque botö ædö cæte wæwēnāmaï inguimoo.

³⁰ ïninque, Nāmā tæēmō inte cæbopa, ante tededāmaï incæboimpa. Wæætē, Æbānō aquimoo inte cæbopa, ante acædānimpā, ante botö māninonque ante tedeæboimpa. ³¹ Wængongui ïfōmō mōnō Awēnē Itota Wæmpocā ïnongā inte edæ tōmengā adocā ïfōmō Itota Wængongui ingampa. Tōmengā wæmō pōni ïnongā inte cōwē waa pōni cæcampa, ante mōnō tōmengā ingante cōwē apænecæimpā. Tōmengā ïfōmō edæ, Pabodo nō angampa, ante do ēñengampa. ³² Ayæ ïmaï cædāni wægaboimpa. Adeto Tidjabæ awēnē nānō ïnōñedē māniñedē botö ïmote bæi ongoncæte ante cædinque tōmengā nānō ēmiñængā wædænque awēnē ïfōmō ïmaï cæcantapa. Tōmengā wadāni ïnānite angā ēñēninque tōmēnāni wæætē Daāmaco ïfōmō tōmēnāni nāni wīni wææ cæincō boyæ yabædemō gāānē wānō cōñōnāni, ³³ botö tōnō cædāni guiquēnē Daāmaco nāni wīni wææ cæincō boyæ cæimpiticæ ïnō otodē ñā cædete botö ïmote pædæ wææñōnāni ti wææ aamō cæte wodii wīnongaboimpa.

12

Pabodo, ïmaï wīmonte bai atabopa, angampa

¹ Ōnonque tedebo incæte botö, Waa cætabopa, ante cōwē tedequēnēmo ïmopa. ïninque botö ñōwo edæ, Wīmonte bai ayōmo mōnō awēnē mā pōni odōmongā atabopa, ante yewæmoncæboimpa. Ayæ tōmengā, Æbānō ï, ante edonque pōni nānō odōmōnōnō ante godōmenque yewæmoncæ cæbopa. ² Codito nempo nē quēwēmo ïfōmote Wængongui do catodote wadepo ïfōnte botö ïmote oñædē wænōmēnæcāōnæ mæicā æigaboimpa. Incæte wacā æicā ate bai nāmā incæ agaboimpa. Wabānō ōñowacaque inte æigaboï. ïntai ēñate wabānō ïnque inte æigaboï, ante botö adāmaï ïmopa. Wængonguinque nē ænte mæigaingā inte tōmenganque ēñengampa. ³ Edæ baō ēñate æibo incæ baō ōmaabo inte æibo incæ Wængonguinque ēñēñongā botö, ïmaï ingatimpā, ante māninque ēñēmopa. ⁴ Wæmōnædē tōmengā ōmæ ïfōmō Wængongui ænte mæicā æigaboimpa. Māniñōmō waa pōni apænedāni ēñēmo incæte tōmengā, ïfōmō mōni apænedō ante

mīni waocabo apænedāmaï incæmīnimpā, ante wææ angā ēñēninque botö waobo inte ædö cæte apænēquimoo.

⁵ ïninque wacā mänömaï oñædē æite ēñengā ïninque botö, Tōmengā waa pōni cæcampa, ante do apænēbaïmopa. Wæætē nāmā botö waa cædōnō ante apænēdāmaï incæboimpa. Incæte, Tōmēmo aquimoo inte ōnonque cætabopa, ante māninonque ante botö nāmā waa ate bai apænecæboimpa. ⁶ Waa cægaboiimpa, ante tedebo ïninque botö wīi ocai ōmæcabo inte edæ tedebaïmopa. ïñæmpā nāwangā waa cægāimo ïnōmo inte botö nō ante edæ tedebaïmopa. Incæte botö wædænque apænēte pōnōmenque cæyōmote æcāmenque incæ, Pabodo godōmenque waa pōni cæcampa, ante ānāmaï incæcāimpā, ante wææ cædinque botö waa cægāinō ante tededāmaï inte edæ pæ wēēnebopa.

⁷ Wængongui mā nānō odōmongainō æbānō waa pōni ingateï, ante wadāni adāmaï ïñōnāni botö adoboque atabopa. ïninque, Pabodo, Botö adoboque nē agāimo ïmopa, ante nāmā waa adāmaï incæcāimpā, ante wææ cædinque Wængongui angā ate Tatāna botö ïmote pōnō da boo codongate ocæ ocæ coingā bai cæcā wætabopa. ⁸ Mänömaï cæcā wædinque botö mēmpoga go adopoque Wængongui Awēnē ingante apænēdinque, Botö daa cogate bai wæyōmote o tongate bai cæbi quēwēmo, ante nangui ante wætabopa. ⁹ Ca wæyōmote mōnō Awēnē wæætē, “Nē aquīi pōni ïnāni ïñōnānite botö tæi piñæmāmo eyepæ pōni pōnōmo æninque tōmēnānique wæætē tæi piñænte entawencædānimpā. ïninque bitō nē aquīimi ïmi beyænque botö waadete pōnō cædō ïfōmō edæ eyepæ pōni impa.”

ïninque mōnō Codito nānō tæi piñænte cæpāmo ænte entawencæte ante cædinque botö ïfōmō edæ, Nāmā aquimoo inte botö wædinō beyæ ante botö nāmā waa ate tobopa, ante tededinque godōmenque tocæboimpa. ¹⁰ Æyedēnō aquimoo ïmōi māniñedē edæ tæi ēwocaboimpa. Mänömaï beyæ aquimoo inte botö Codito beyænque nangui tobopa. Badete tote piñte cædāni wæbo incæte botö piyænē cædinque tobopa. Ancaā nangui caate wædinque nangæ babo incæ, togænte pānāni wæbo incæ, Ædō cæte quēwenguimoo, ante wæbo incæ māniñō tōmāā beyæ wædōmo inte botö Codito beyænque ante piyænē cæte nangui tobopa.

Coodintoidi æbāmē cædāni, ante wæbopa, Pabodo angā

¹¹ Ocai ōmædæcacā ingā bai Pabodo ōnonque tedete yewæmongampa, ante pōnēmīnitawo. ïñæmpā tōmēmiñi botö beyæ wææ apænēdāmaï ïmīni beyænque botö tōmēmo nāmā wææ cæcæte ante

cædinque mǎnōmai tedete yewæmōmopa. Wadāni nē gode ānāni guiquēnē nāmā nāni waa acabo inānīpa. Incæte tōmēnāni nāwangā ñænænāni ināni ininque botō iñōmō dicæ wædāmo imogaa. Ininque mīnitō tōmēmīni, Pabodo waa cæcā ingampa, ante tedequēnēmīni imīnīpa tōō.

¹² Wacā mīnitō weca pōninque æbānō cæcā ate mīnitō, Īngā iñōmō mōnō Codito nānō nē da godongaingā ingampa, ante ēñēmīni. Īmai impa. Tōmengā, Ēñencæmīnīpa, ante mā pōni cæcā ate do ēñēmīnīpa. Tōmengā bamōnengæ nangui odōmongā ate ēñēmīnīpa. Wadāni cædāmai iñōnāni tōmengā tæi piñænte cæcā ate wædinque mīnitō wæætē edæ, Codito nānō nē da godongaingā ingampa, ante do ēñēmīnīpa. Ininque botō mīnitō weca quēwēninque edæ Codito nānō nē da godongaingā mā cæte nāni odōmōnī bai adobai odōmōninque edæ wæntædāmai inte ee cæbo abaiimīnīpa.

¹³ Ininque wadāni Codito ingante nāni godongāmæ pōnencabo inānite waa cædinque botō mīnitō imīnite dicæ pōnōmenque cætabogaa. Wabānō mīnitō imīnite, Pōnōmīni æmoedāni, ante ānāmai inte botō mīnitō imīnite wīwa cæbopææ.

¹⁴ Botō do mīnitō weca mempoga pōnīmo inte ñōwo wæætē poncæ cæbopa. Pōninque botō mīnitō mǎincoo ante ānāmai incæboimpa. Wæætē, Mīnitō botō wēmīni bacæmīnīpa, ante cæbopa. Wēñænāni tōmēnāni mæmpoidi beyæ ante dicæ godonguēñænāni ināniyaa. Wæætē edæ mæmpoidi iñōmō wēñænāni beyæ ante nē godonguēñænāni inānīpa. ¹⁵ Ininque, Mīnitō quēwencæmīnīpa, ante botō mǎincoo tōmāncoo godōninque waa tocæboimpa. Ayæ, Mīnitō quēwencæmīnīpa, ante cæte wæmo ininque waa tobaīmopa. Botō mǎnōmai mīnitō imīnite gomonga waadete pōnēmo ininque mīnitō wæætē botō imote pōnōmenque waadete pōnēmīni imīnitawo.

¹⁶ Incæte edæ idæwaa āmopa. Mīnitō mǎincoo ante botō ānāmai intabopa. Incæte mīnitō, Pabodo nē wēnæ wēnæ pōnengā inte awēmō æncæte ante babæ cæcampa, ante pōñewēmīni awædō. ¹⁷ Wadāni inānite mīnitō weca da godōninque botō awēmō æntawo, ante pōñēmīnitawo. ¹⁸ Tito ingante, Coodintoidi weca ate pōe, nangui āninque botō wacā mōnō tōniñacā tōnō tōmengā tōnō da godōmo guēa godatapa. Ininque Tito mīnitō weca pōninque dicæ wīwa cædinque mǎincoo ō ængantawogaa. Īñæmpa tōmengā tōnō botō guēa āawocaque bai ēwocamōna inte mōnatō guēa cægōmōna adinque mīnitō adāmai inte bai tedewēmīni awædō.

¹⁹ Mīnitō, Pabodoidi nāmā wææ cæcæte ante apænedānīpa, ante pōñēmīni awædō.

Īñæmpa mōnō Codito nempo quēwēnōmo inte mōnitō Wængongui ayongante apænetamōnīpa. Edæ, Botō nē waademīni imīni inte mīnitō tæi piñænte bacæmīnīpa, ante cædinque mōnitō mǎnōmāinō ante apænetamōnīpa. ²⁰ Botō iñōmō edæ mīnitō waa cæmīni acæte ante ponte ayōmo mīnitō wadō cæmīni bai botō nangui wæcædōmoimpa, ante guñente wæbopa. Ayæ mīnitō wæætē, Pabodo waa cæcæte ante pongampa, ante pōñēñōmīni botō wadō cæbo bai mīnitō nangui wæcædōmīnīpa, ante pōnente wædinque botō, Mōnō mǎnōmai wædāmai ingæimpa, ante wææ cæcæte ante cæbopa. Edæ mīnitō wæætēdō wæætē piñte amīnitawo. Wacā ingante waa cædāni wædinque mīnitō godō piñte amīnitawo. Īñontobæ ængui bamīnitawo. Nāmanque pōnente cæmīnitawo. Wacā ingante piñinque godō babæ ante tedewēmīnitawo. Godō wæntaa wæntaa amīnitawo. Nāmā waa adinque cæmīnitawo. Wīi ēñente cædinque mīnitō Yæ yæ tedemīnitawo. Māinō tōmānō wabānō cæmīni, ante guñente wædinque botō mǎnōmāinō ante edæ yewæwæmontabopa.

²¹ Ininque botō ponte ayōmo pancamīniya wēñēñedē mīni cægai bai ñōwo adobai cæmīni adinque botō guingo imonte wæconguēnēmo ante awædō. Edæ pancamīniya wēñēñedē wentamō mīni mongæñō ee mongæmīni adinque botō Ca ca wæbaimopa. Wēñēñedē mīni godō towengainō ayæ towēmīni intawo. Wēñēñedē ēñēñāmai inte mīni wīwa cædinō ayæ cæmīni intawo. Edæ wentamō mongæmīni inte guingo imōnāmai imīni inte pancamīniya Wængongui gāmæñō ocæ ēmænte pōñāmai imīnīpa, ante guñente wæbopa.

13

Idæwaa mǎninque yewæmōmopa, ante

¹ Botō mīnitō weca mempoga do pōn-gaimo inte ñōwo wæætē poncæ cæbopa. Īmai ante do yewæmongatimpa. Nō nō æbānō cætimpā, ante ēñencæte ante waoda mēnaa incæ mengāa go adocanque incæ nē adināni inte adodō ante apænedāni ēñēninque do apænte angæimpa, ante nāni yewæmongainō ante ēñēninque cæcæboimpa. ² Wēñēñedē wēnæ wēnæ cædināni tōnō wadāni tōmānāni inānite botō mīnitō weca doyedē pōninque, Amo ēñēdāni, ante wææ āninque ñōwo wæætē wayōmō ongōninque adodō ante wææ ante yewæmōmopa. Ayæ ate wæætē mīnitō weca ponte ongōninque tōmanga apænte āninque adodāni inānite ata cæpōdāmai incæboimpa.

³ Pabodo wabānō mōnō Codito tōnō godongāmæ cæte apæñecāā, ante

wæmīnitawo. Mānīnō ante mīni wædō ante edæ, Nāwangā impa, ante odōmoncæte ante botō mānōmaī apænte ancæboimpa. Mōnō Codito incæ botō tōnō godongāmæ nē cædongā īñōmō tōmengā īñōmō aquīngā īnāmaī inte mīnitō īmīnite apænte angā abaiīmīnīpa. Tōmengā īñōmō nanguī tæī piñænongā inte mīnitō weca cæcā apa ānewēmīnīi. ⁴ Nāwangā impa. Mōnō Codito adocā incæ aquīngā bai inte cæyongante waodāni wæætē fænquedīmæ cæte māo timpodāni wængacāimpa. Incæte Wængonguī nānō tæī piñænō beyænque adocā fāni ōmæmonte quēwengampa. Mōnitō adobai tōmengā nempo quēwēnīnque aquīīmōni inte edæ Wængonguī nānō tæī piñænō beyænque mōnō Codito tōnō godongāmæ quēwēnīnque mīnitō beyæ ante cæquīmōni īmōnīpa.

⁵ Mīnitō tōmēmīni īñōmō, Æbānō wede pōnēmo imoo, ante nāmā waa aedāni. Mīni cædinō adīnque, Æbānō nōingā cæbo imoo, ante aedāni. Īñæmpa, Itota Codito ingante entawēmōmpa, ante ēñēnāmaī īmīnitawo. Wabānō mīnitō pancamīniya nāmā adīnque, Botō nōingā cædāmaīmo inte edæ wede pōnēnāmaīmo inte awædō, ante ēñēncæte ante aquēnēmīni īmīnīpa. ⁶ Ayæ nāmā mīni a bai mōnitō īmōnīte adobai apænte adīnque mīnitō, Pabodoidi guīquēnē nōingā cædōnāni inte nē wede pōnēnāni īnānīpa, ante edonque amīni waa tobaīmōpa. ⁷ Mīnitō beyæ ante mōnitō Wængonguī ingante apænedīnque, Coodintoidi cōwē wēnæ wēnæ cædāmaī incædānīmpa, ante apænemōnīpa. Incæte mōnitō, Mīnitō wēnæ wēnæ cædāmaī īmīni ate wadāni, Pabodoidi ædæmō cædāni beyænque impa, ante mōnitō īmōnīte waa acædānīmpa, ante wīī cæmōnīpa. Wæætē wadāni, Pabodoidi wīī eyepæ cædānīpa, ante piīnte ānāni incæte mīnitō wæætē nōingā cæcæmīnīmpa, ante mōnitō mānīnonque ante cōwē cæmōnīpa.

⁸ Edæ Wængonguī nōingā nānō ānō ante nē cæmōni inte mōnitō adode ante ædō cæte wido cæquīmōnīi. ⁹ Īnīnque mōnitō æyedēmē aquīīmōni īñōmōni mīnitō wæætē tæī piñænte cæmīni adīnque mōnitō nanguī tomōnīpa. Mīnitō beyæ edæ Wængonguī ingante apænedīnque mōnitō, Coodintoidi eyepæ entawēnīnque picænāni bai nō cæcædānīmpa, ante apænemōnīpa. ¹⁰ Botō imote apænedīnque Wængonguī, Bitō wadāni īnānīte bæ tadāmaī inte tæī mæñonte bai pōnō cæcæbiīmpa, ante pōnō cæcā ate botō tæī piñæmo badīnque nē āmo batābōpa. Nē āmo imo incæte botō mīnitō weca ponte ayōmo wīwa cæmīni adīnque piīnte panguēnēmo īnāmaī incæboimpa, ante wææ cædīnque botō fīwo wayōmō quēwēnīnque, Nāmā apænte æedāni, ante wææ yewæmōmōpa.

¹¹ Īñānāni, mānīnque ante fīwo yewæmōmōpa. Mīnitō eyepæ entawēnīnque, Mōnō picænāni bai badīnque nō cæcæimpā, ante nanguī cæedāni, āmōpa. Wæntædāmaī inte tæī piñænte cæedāni. Mīni cabo incæ adoyōmō pōnēnīnque gānē pōnēte quēwēedāni. Wængonguī incæ nē Waadecā inte nē gānē entawengā inte mīnitō tōnō cōwē quēwēncæcāimpa, āmōpa. ¹² Mīni cabo incæ godongāmæ pō bee tēnīnque waadete pōnēnte waa apæneedāni. ¹³ Wængonguī quīnāni eyequeī quēwēnāni īñōmō, Mīnitō waa quēwēncæmīnīpa, ante apænedāni ēñēnte yewæmōmōpa.

¹⁴ Mīnitō tōmāmīni mōnō Awēnē Itota Codito waadete nānō pōnō cægāinō ante entawēncæmīnīmpa, āmōpa. Mæmpo Wængonguī tōmengā nānō waadete pōnēnō ante entawēncæmīnīmpa, āmōpa. Wængonguī Tæiyæ Waēmō Ōnōwoca tōnō āāwocaque bai ēwocadīnque tōmāmīni godongāmæ waa quēwēncæmīnīmpa, ante botō Pabodobo mānīnque ante yewæmōmōpa.

Gadataidi inānite Pabodo nānō cadota ante yewæmongainta

*Gadataidi inānite Pabodo, Waa
quēwēdāni, angampa*

¹ Botō Pabodobo inōmo inte, Minitō acæminimpa, ante yewæmōmopa. Mæmpo Wængongui incæ Itota Codito ingante, Nāni ōmæmōe, angā nāni ōmæmongacāimpa. Mæmpocā iñōmō Itota Codito tōnō guēa cædinqe botō imote da godonga gotabopa. Ininqe botō dicæ waodānique ānāni ēñente gotabogaa. Botō imote edæ dicæ waocanque da godongā gotabogaa. ² Minitō Gadatiabæ wayōmō wacabo wayōmō wacabo quēwēmīni inte Codito ingante mīni godongāmæ pōnencabo inōmīni inte edæ ēñencæminimpa, ante mōnitō mōni pōnencabo tōmāmōni iīmaī ante apænemōnipa.

³ Wængongui mōnō Mæmpo tōnō mōnō Awēnē Itota Codito godongāmæ pōnō waadete cæda ate mīnitō gānē pōnente waa quēwencæminimpa, āmōnipa. ⁴ Adocā mōnō Mæmpo Wængongui iñōmō, Minitō pedænguipogaque wīwa cæte mīni wæwēñōmō edæ abæ tawænte ponte bai botō gāmānō ponte quēwēdāni, angampa. Ininqe, Wængongui nānō angaiñō bai cæcæminimpa, ante cædinqe mōnō Awēnē Itota Codito mōnō imonte ō æncæte ante cægacāimpa. Mīni wēnæ wēnæ cæpāmo mongæncæboimpa, ante tōmengā nāmā wepæ pædæ godonte bai cædinqe pōnō ængā beyænque mōnō wæætē quēwēmōmpa. ⁵ Edæ pedænguipoga iñonte mīnguipoga bayonte edæ, Mānōmaī bacæimpa, ante nē angaingā inongā inte mōnō Mæmpo Wængongui iñōmō edæ cōwē nāō apāite bai waēmō pōni ēmōnongā ingānō anguēnē. Mānōmaī impa, ante botō, Amēē, āmopa.

*Codito ingantedō ante watapæ
ēñengæimpa*

⁶ Minitō iñōmō æbāmē pōni cæmīni awædō. Mōnō Codito waadete pōnō cæcā beyænque mīnitō Wængongui āñecā pōmīnitawo. Nōwo guiquēnē nē āñecā iñongante quīmæ panguīmæ gomīni. Wadāni, Quēwengui taadō wadō inōmpa, ante tededāni ēñēninque mīnitō do Ao ānewēmīni awædō. ⁷ Iñæmpa wadō incæ wīi quēwenguiñō inōmpa. Wæætē edæ, Minitō oda cæcæminimpa, ante cædinqe wadāni pancadāniya, Codito ingantedō ante watapæ mōni apænedō ante edæ, Idiquibæ bacæimpa, ante cædāni apa ēñewēmīni.

⁸ Mōnitō Codito ingantedō ante watapæ apænemōni ēñēmīnitapa. Incæte mōnitō

adomōni incæ wadō ante apænemōni bai Wængongui wæætē pōnō piinte apænte angā wæquimōnidō anguēnē. Ayæ adobai Wængongui anquedo incæ dōnædē owod- inque wææ pōninque wadō ante apænecā bai Wængongui tōmengā ingante wæætē godō piinte apænte angā wæquingānō anguēnē. ⁹ Edæ doyedē mōni ānīnō bai botō nōwo wæætē adodō ante āmopa. Codito ingantedō ante watapæ apænemōni ēñēninque mīnitō Ao āmīnitawo. Ininqe mānīnō ante æcāmenque pōnēnāmaī inte wadō ante apænecā ēñēninque Wængongui tōmengā ingante wæætē godō piinte apænte angā wæquingānō anguēnē.

¹⁰ Botō dicæ, Minitō waomīnique botō imote Ao ancæminimpa, ante apænebogaa. Wængonguinque, Ao ancæcāimpa, ante apænebo aedāni. Ayæ, Waomīnique tocæminimpa, ante dicæ cæbogaa. Waomīnique tocæminimpa, ante cæbo inte bai edæ Codito ingante nē cædōmo ināmaī incædōmoimpa.

*Pabodo Wængonguinque da godongā
gotabopa, angampa*

¹¹ Botō tōniñamīni ēñēdāni. Codito ingantedō ante watapæ botō apænedō iñōmō edæ wīi waodānique nāni mā pōngaiñō impa, ante āmo ēñēdāni. ¹² Mānīnō ante waocanque dicæ pōnō apæneccā ēñente æntabogaa. Waocanque dicæ odōmonte apæneccā ēñēninque apænetabogaa. Wæætē Itota Codito edonque odōmonte apæneccā ēñēninque botō nē æmo inte adodō ante apænebopa.

¹³ Oodeobo inōmō inte botō iñōmō edæ mōni oodeocabo pōngaiñō ante wēenēñedē mānīnonque ante ēñēninque quēwengaboī aedāni. Botō māniñedē edæ Codito ingante nāni godongāmæ pōnencabo inānite wido cæcæte ante cædinqe an- caa togænte edæ nanguī pōni pāmo wægadānimpā, ante do ēñēmīnipa. ¹⁴ Ayæ botō tōnō guēa pægāināni incæ nanguī ināni guiquēnē mōni oodeocabo mōni ēñengaiñō ante wædænque ēñente cæyōnāni botō iñōmō godōmenque nanguī pōni ēñente cægaboimpa. Edæ mōnitō mæmæidi nāni odōmonte angaiñō ante botō, Mōnō Ao ante adodō ēñente cæte quēwengæimpa, ante nanguī cæbo ingaboimpa.

¹⁵ Incæte botō badā cæncadē ongōñōmote Wængongui, Botō beyæ cæcæbiimpa, āninque edæ māniñedē botō imote apænte ængaingā inte nōwo botō imote pōnō waadedinque āñecantapa. Ayæ nōwo pōni tōmengā nāmā nānō pōnēnō ante cæte todinque edæ, ¹⁶ botō imote pōnō angantapa. Bitō oodeoidi ināmaī ināni inānite apænebi ēñēninque tōmēnāni botō Wengā ingante edonque ate bai ēwocacædānimpā, ante tāno botō

imote edonque odömongä adinque botö tömengä Wengä ingante do ewocabo inte apænebo eñenänitapa. Ìninqe botö waocä ingante, Æbänö cæquimoo, ante edæ änämaï intabopa. ¹⁷ Botö imote da godongä ate botö Codito täno nänö në da godongainäni inänite apænecæte ante Eedotadëe iñömö æidämaï intabopa. Wæætë edæ wadæ godinque botö wayömö Adabiabæ do godinque ayæ ate Daämaco iñömö ocæ emænte gotabopa.

¹⁸ Ayæ wadepo mënepoga go adodepoque ìninqe go ate botö Pegodo weca mä eñacæte ante Eedotadëe æidinque mäa Wængongui itädë tömengä weca quëwentabopa. ¹⁹ Ayæ wadäni Itota nänö në da godongainäni iñönänite botö adocanque ingante mönö Awënë Itota biwi Tantiago ingante adinque wadäni inänite adämaï intabopa. ²⁰ Mänömainö ante botö Wængongui ayongä babæ änämaï inte näwangä ante yewæmömö aedäni.

²¹ Mänü gote eñate ate botö Tidiabæ godinque godömenque Tiditiabæ gotabopa. ²² Ìninqe Oodeabæ quëwente Codito ingante nani godongämæ pönencabo mönö Codito nempo në quëwënëni iñömö botö awinca cöwë adämaï inäni inte önöwënenque pönengadänimpa. ²³ Tömënëni iñömö iimainö ante önömoncaque eñengadänimpa. “Wëenëñedë mönö imonte në togænte pangaingä iñömö mönö pönente quëwenguine ante, Mänine ante wido cæcæimpa, angantawo. Nöwo guiquënë tömengä, Wido cæquine, ante nänö angaine incæ adode ante edæ watapæ apænecä eñenänitapa,” ante tededäni eñengadänimpa. ²⁴ Ìninqe, Pabodo ñöwo waa cæcampa, ante adinque tömënëni Wængongui ingante apænedinque, Bitö waëmö pöni emönömi inte në waa cæbi imipa, ante watapæ apænecadänimpa.

2

Itota nänö në da godongainäni Pabodo ingante Ao änäni

¹ Ayæ mänü pö godinque iincayæ ate catodote wadepo go ate botö Bedënabee tönö Eedotadëe iñömö adodö æidinque Tito ingante mäömöna gocantapa. ² Wængongui do botö imote apænete bai edonque odömongä adinque botö Eedotadëe iñömö æidinque iimäi ante apænetabopa. Botö iñömö oodeoidi inämaï inäni weca godinque, Codito ingantedö ante cöwë watapæ apænebopa, ante botö ñænænänique inänite awëmö apænebo eñenänitapa. Mänömaï cædinque botö, Æbänö cæboi, ante adodö adodö ante apænebo eñëninque tömënëni piinämaï incädänimpa, ante cætabopa.

³ Ayæ, Botö tönö guëa pöningä Tito ingante adinque pancadäniya, Ìngä iñömö Guidiego inongä iñongante ämüni ëö togæncädänimpa,

ante piinte änäni incæte në änäni guiquënë, Eö togætedäni, ante änämaï inänitapa. ⁴ Eö togængæimpa, ante në piinte änäni nani wææ angainö ante mönitö iñömö Codito Itota gä pe æempote æængä beyænque abæ tawænte ee gote bai quëwëmönipa. Mänömaï iñömönte pancadäniya, Æbänö quëwënëni, ante edæ awëmö acæte ante cædinque edæ, Mönö caipæ imopca, ante bai babæ cædinque mönitö weca pönäni wætämönipa. Ayæ edæ mönitö tömënëni nani wææ änö beyænque në cæte quëwëmöni bacæmönimpa, ante cædinque tömënëni godömenque, Cæedäni cæedäni, ante wææ änewënëni wætämönipa. ⁵ Incæte edæ, Mönö Codito ingantedö ante watapæ möni apænedö näwangä ante impa, ante münitö oda cædämaï incæmünimpa, ante wææ cædinque mönitö wantæ iñö incæ në wææ änewënëni inänite eñente cædämaï intämönipa.

⁶ Ñænænäni inänipa, ante wadäni nani në waa adönäni iñömö æbämë emönäni, ante botö iñömö edæ wædämaï imopca. Edæ Wængongui incæ waocä ingante apænte acæte ante cædinque adämaï ingampa. Mümönoque acampa. Ìninqe botö idæwaa apænebo ate iñäni incæ æödö cæte godömenque apænequinäni. ⁷ Ìnæmpa iñäni incæ edæ do eñenänitapa. Pegodo ingante mönö Awënë incæ pönö angä ate tömengä oodeoidi inänite mönö Awënë ingantedö ante në watapæ apænecä ingampa. Botö imote adobai mönö Awënë incæ pönö angä ate botö wæætë oodeoidi inämaï inäni inänite në apænebo imopca. Ìninqe botö mänömainö ante apænebo ate në änäni iñömö, Pegodo cæcä bai Pabodo adobai cæcampa, ante do eñenänitapa. ⁸ Pegodo oodeoidi weca gote cæyongante Wængongui tömengä tönö godongämæ cæcä bai botö guiquënë oodeoidi inämaï inäni weca edæ gote cæyömote adocä incæ botö tönö adobai edæ godongämæ cæcampa, ante do eñenänitapa.

⁹ Tantiago, Pegodo, Wäö iñömö në tæi emönäni inänipa, ante adinque wadäni, Gönöniwæ onguitanca bai inänipa, ante apænedänipa. Ìninqe botö apænebo eñëninque mäninäni, Onguitancaidi, nani änäni iñömö edæ, Pabodo ingante Wængongui mänömaï pönö waadete cæcampa, ante adinque botö imote ayæ Bedënabee ingante, Mönitö tönifämäna iminäpa, ante tömëmæ inö pædæ pompote bæi ongompodänitapa. Ayæ, Mönitö oodeoidi weca gote apæneyömöni münitö wæætë oodeoidi inämaï inäni weca gote apænecæmünimpa, ante godongämæ Ao änänitapa. ¹⁰ Ayæ, Münitö në ömadäni inte wädäni inänite ante cöwë pönëninque waa

cæcæminipa, āninqe māninqe ante wææ ānānitapa. Mānīnō nāni ānīnō incæ botō cōwē pōnēninqe edæ nangui cæinente wæbo intabopa.

Pegodo ingante Pabodo angā wæcampa

11 Ayæ Pegodo Antioquiya īñōmō pōninqe wīī nō cæcā adinqe botō tōmengā awınca waa adinqe, Bitō pante wæquinque wēnæ wēnæ cæbi īmipa, āmo wæcantapa. 12 Īīmaī edæ Pegodo cæcā Īngāīmpa. Tæcæ Antioquiya pōninqe tōmengā oodeoidi Īnāmaī Īnāni weca wæætē wæætē pō guī pō guī ongōninqe godongāmæ cænongāīmpa. Incæte Tantiago nānō da pōnōnīnāni pōnāni ate Pegodo īñōmō edæ, Mōnō ēō togængæīmpa, ante nē ānōnāni pīīnāni wæcæ wæ, ante guīñēnongā inte edæ oodeoidi Īnāmaī Īnāni weca nōwo cæñāmaī inte edæ gomonga gote cænongāīmpa. 13 Mānōmaī wadonque cædingā inte nōwo wadonque cæyongante tōmengā tōnō oodeoidi tōmānāni wadonque cædīnāni inte edæ nōwo wæætē wadonque cædānīpa, ante adinqe Bedēnabee incæ oda cæte wapiticæ cæcantapa.

14 Īninqe edæ Codito ingantedō ante wat-apæ mōnō ēñēnō nō pōnī ī incæte tōmēnāni nō cædāmaī inte wapiticæ cædānīpa, ante adinqe botō tōmānāni ayōnāni edæ Pegodo ingante īīmaī ante āmo wæcantapa. “Bitō īñōmō oodeobi Īnōmi inte edæ oodeo Īnāmaī Īnāni baī nīmpo cæte quēwēninqe edæ wīī oodeoidi nāni wææ angaiñō ante ēñente quēwēmīpa. Incæte bitō, Oodeo Īnāmaī Īnāni incæ oodeoidi nāni wææ angaiñō ante ēñente quēwēncædānīmpa, ante quīmæ wææ ānewēmīi,” āmo wæcantapa.

Mōnō pōnēnō beyænque mōnō tōmāmō quēwēmōmpa

15 Oodeoidi Īnāmaī Īnāni nāni ēñēnāmaī quēwēncabo baī Īnāmaī Īmōni inte mōnitō īñōmō edæ oodeomōni nē ēñagaīmōni Īmōnīpa. 16 Incæte edæ īīmaī ante do ēñēmōnīpa. Īīmaī cæedāni, ante Mōitee wodi nānō wææ angaiñō ante ēñente cæcā beyænque waocā dicæ Wængonguī ayongā edæ nō cæcā baqingāā. Wæætē Itota Codito ingante wede nānō pōnēnō beyænque waocā nō cæcā bacampa, ante mōnitō do ēñēmōnīpa. Īninqe, Waocā cæcāmenque incæ mānīnō Mōitee wodi nānō wææ angaiñō ante tōmengā nānō ēñente cædō beyænque edæ nō cæcā badāmaī incæcāīmpa, ante do ēñēmōni inte mōnitō adobaī, Ædō cæte mānīnō beyænque nō cæmōni baquīmōnīi, ante ēñēmōnīpa. Wæætē, Codito ingante mōni wede pōnēnō beyænque nō cæmōni bacæte ante mōnitō adobaī tōmengā ingante wede pōnēmōnīpa.

17 Īninqe mōnitō oodeoidi Īmōni īñōmō, Mōnō Codito nempo quēwēninqe Wængonguī ayongā mōnō nō cæmō bacæīmpa, ante cæmōnīpa. Mānōmaīnō ante cædinque mōnitō nē wēnæ wēnæ cæmōni inte wæmōni incæte dicæ Codito angā beyæ wēnæ wēnæ cætamōnīyaa. 18 Mānīnō Mōitee wodi nānō wææ angaiñō ante ēñente cæte quēwængæīmpa, ante botō pōnengaiñō ante do wido cægaboīmpa. Mānōmaīnō ante botō pōnengaiñō ante nē wido cægāimo inte botō ædō cæte wæætē adodō ænte baī cædinque, Mānīnō ante ēñente mōnō quēwængæīmpa, ante anguīmoo. Mānōmaīnō ante āmo inte baī botō Wængonguī nānō wææ angaiñō ante edæ nē ēñēnāmaī imo bacædōmoīmpa. 19 Edæ, Wængonguī nānō wææ angaiñō ante ædō cæte tōmānō ante ēñente cæquīmoo, ante botō wædō beyænque nē wæwocāimo bagaboīmpa. Īninqe botō nē wæwocāimo Īnōmo inte mānīne ante ēñente cæcæte ante quīnante wæquīmoo. Wæætē edæ Wængonguī beyænque ante botō quēwēnguinque īmopa.

20 Mōnō Codito ingante awāa tim-podāni wæñongante botō tōmengā tōnō godongāmæ wænte baī bagaboīmpa. Īninqe botō baonga ēñate quēwēmo incæte botō wīī tōmēmo quēwēngūimāmo ēwocate quēwēmōpa. Wæætē Codito nānō quēwēngūimāmo ēwocate quēwēmōpa. Īninqe adocā Codito Wængonguī Wengā botō Īmote waadete pōnēninqe nāmā tōmengā wepæ ante, Wængonguī quī, ante botō beyæ pædæ godongā adinqe botō baō ēñate quēwēninqe tōmengā ingante wede pōnēninqe quēwēmōpa. 21 Īninqe, Īīmaī cæedāni, ante Mōitee wodi nānō wææ angaiñō ante ēñente cædinque mānōmaīnō cæmō beyænque nā mānōngate nō entawēmō bamō baī mōnō Codito ōnonque pōnī wæncægacāīmpa. Mānōmaī beyæ Wængonguī nānō pōnō waadete cægaiñō ante botō Ao ante ō æninqe cōwē wido cædāmaī īmopa.

3

Mōnō pōnēnō beyænque mōnō quēwængæīmpa, ante

1 Gadataidi ōnonque pōnī mīni cæcabo Īnōmīni inte ēñēedāni. Æcānō wadō ante apæncæcā ēñēninqe mīnitō dowænte baī ōnonque tedewēmīnīpa. Īñæmpa botō doyedē, Itota ingante æbānō awāa tim-podāni wængacāī, ante botō edonque pōnī ōdomonte apænebo ēñēninqe mīnitō ōnōwēnēnque ante baī do pōnēmīnitapa. 2 Adodeque āmo ate apænemīni ēñēmoedāni. Mīnitō Wængonguī Ōnōwoca ingante æbānō cæte æmīnīi. Mōitee wodi wææ nānō angaiñō ante ēñente mīni cædō beyæ mīnitō

tömengä ingante æmīnitawogaa. Wæætē edæ mōnitō apænemōni ēñēninque wede pōnēmīni inte æmīnitawo.

³ Īñæmpa mīmō ōmædē ĩmīni inte ēñēnāmaī incædō. Mīnitō wēēñēñedē mā pōni pōnēninque Wængongui Ōnōwoca tōnō nē cægaimīni inte ĩŵowo wæætē edæ ōmæwocamīni inte bai edæ baonga ēñadinque nāmanque cædinque ĩnque cæmīnii.

⁴ Wængongui nangui pōni pōnō cæcā caete wædinque mīnitō ōnonque beyæ caete wæmīnitawo. Tömengä dicæ ōnonquedō ante cæcæte ante pōnō cæcā wæmīniyaa.

⁵ Wængongui tōmengä Ōnōwoca ingante da pōnōninque mīnitō weca bamōnengæ pōni cæcampa. Quinante mānōmaī cæcā. Edæ, Mōitee wodi nānō wææ angainō ante ēñente mīni cædō beyæ ante dicæ cæcā. Wæætē mōnitō apænemōni mīni ēñente pōnēnō beyæ Wængongui tōmengä Ōnōwoca ingante da pōnōninque mīnitō weca bamōnengæ pōni pōnō cæcā æmīnīpa.

⁶ Wængongui apænecā ēñēninque Abadāō wodi, Nōingā ante apænecampa, ante wede pōnengacāimpa. ĩnque tōmengä wede nānō pōnēnō beyænque Wængongui, Botō ayōmo Abadāō ĩñōmō nē nō cæte quēwēnongā ingampa, angacāimpa, ante yewæmongatimpa.

⁷ Mānōmaīnō ante adinque mīnitō ĩmaī ante ēñēdāni. Mōnō nē wede pōnēmō ĩñōmō Abadāō wodi pæīmō bai adomō ĩmōpa, ante ēñente pōñēdāni.

⁸ Wængongui, Oodeoidi ĩnāmaī ĩnāni incæ wede nāni pōnēnō beyænque botō ayōmo edæ nē nō cæte quēwēnāni bacædānīmpa, ante badoncæcāimpa, ante dodāni edonque adinque Wængongui beyæ yewæmongadānīmpa. Ayæ Abadāō wodi ingante apænēdinque tōmengä, “Botō bitō ĩmite pōnō waa pōni cæbo æmi ĩnque bitō beyænque wadāni nāni cabo wadāni nāni cabo tōmancabodāniya edæ watapæ quēwēngūñānidō anguēñē,” ante apænēgacāimpa. Mānōmaī ĩmpa, ante yewæmōninque dodāni wēēñēñedē pōni Wængongui waa pōni nānō cæquinō ante yewæmongadānīmpa.

⁹ Abadāō wodi cōwē ædēmō cæte pōnengāingā ĩñongante Wængongui pōnō waa pōni cægacāimpa. Mōnō nē wede pōnēmō ĩñōmonte tōmengä adobai pōnō waa pōni cæcā æninque mōnō ĩñōmō edæ Abadāō wodi tōnō godongāmæ watapæ quēwēmō ĩmōnō anguēñē.

¹⁰ Wæætē edæ, “Wææ ante botō yewæmongainta adinque æcānō tōmānō ante dicæ cæcā tōmengä ĩñōmō Wængongui piinte angā wæwocaingā ingānō anguēñē,” ante Mōitee wodi incæ do yewæmongacāimpa. ĩnque Wængongui edæ nānō wææ angainō ante waodāni, Botō ēñente cædō beyænque quēwencæboimpa,

ante nē ānewēnāni incæ wīi eyepæ ēñente cædāni ĩñōnāni inte tōmēnāni tōmānāni ĩnānite Wængongui piinte angā wæwocāñāni ĩnānidō anguēñē.

¹¹ Ayæ wacā Wængongui beyæ yewæmōninque, “Nē nō cæte quēwēnongā incæ tōmengä nānō wede pōnēnō beyænque quēwencæcāimpa,” angacāimpa. ĩnque ĩmaī ante mōnō edonque ēñengæimpa. Mōitee wodi nānō wææ angainō ante ēñente cæte beyænque waocā dicæ Wængongui ayongā nē nō cæcā badinque quēwēngūngā.

¹² Wængongui nānō wææ angainō ante ēñente quēwēngæimpa, ante nē cædōñāni ĩñōmō tōmēnāni dicæ nāni wede pōnēnō beyæ quēwēnāniyaa. Wæætē, “Mānīnō ante nē ēñente cæcā ĩñōmō tōmengä nānō ēñente cædō beyænque quēwencæcāimpa,” ante Mōitee wodi nānō yewæmonte angainō bai ĩmpa.

¹³ Ayæ adobai, “Æcānō ingante awāa wodoncædāni a ongōna tōmengä ingante Wængongui piingā wæwocaingā ingānō anguēñē,” ante Mōitee wodi yewæmongacāimpa. ĩnque Wængongui nānō wææ angainō ante wīi eyepæ ēñente cæmō beyæ mōnō wæwocāimō inte wæyōmonte mōnō Codito ĩñōmō, Abæ tawænte gote bai quēwencæmīnīmpa, ante cædinque mōnō beyæ wæætē wæwocaingā badinque edæ awāa wæninque a ongongacāimpa.

¹⁴ Abadāō wodi ingante Wængongui waa pōni pōnō cægacāimpa. Ayæ, mīnitō oodeoidi ĩnāmaī ĩñōmīnite Itota Codito pōnō cæcā beyænque Abadāō tōnō godongāmæ watapæ quēwencæmīnīmpa, ante Wængongui adobai pōnō waa cæcampa. Mānōmaī bacæimpa, ante cædinque Codito tōmāmō ĩmonte, Mīnitō wede pōnēninque botō Ōnōwoca ingante ænte ēwocacæmīnīmpa, ante cædinque mōnō ĩmonte æncæte ante nāmā wepæ godonte ængā beyænque quēwēmōpa.

Wængongui tāno, Cæquīmo, aninque ayæ ate wææ angacāimpa

¹⁵ Botō tōñīñāmīni ēñēdāni. Botō, Waomō mōnō cæi bai Wængongui mōnō beyæ wodo adobai cæcampa, ante odōmncæte ante ĩmaī ante yewæmōmo ædāni. Waoda, Mōna guēa cæcaya ĩmōnāpa, ante Ao āna ate adocanque inte ædō cæte wadō ante cæquēñengā. Ayæ, Mōnō godōmenque cæcæimpa, ante waocā adocanque inte ædō cæte edæ ante cæquēñengā. Nōwo edæ āmo ēñēdāni. Wængongui, Mōnō godongāmæ cæcabo bacæimpa, ante botō pōnō cæcæboimpa, angā ēñēninque mōnō Ao ante cæquēñēnō ĩñōmō edæ wodo adobai ĩmpa.

¹⁶ Mæmæ Abadāō wodi ingante apænēdinque Wængongui, Bitō Pæingā ingante botō cōwē pōnō waa cæcæboimpa,

angacäimpa. Mänömai äninque tömengä Abadäo wodi ingante, “Bitö päinäni,” ante änämai ingacäimpa. Wæætē, “Bitö Pæingä ingante pönö cæcæboimpa,” äninque Abadäo wodi Pæingä adocanque Codito ingante ante pönëninque angacäimpa.

¹⁷ Mänömainö ante apænedinque botö iimainö ante odömoncæte ante apænetabopa. Abadäo wodi ingante Wængongui, Botö pönö cæbo ate minitö Ao ämini ininque mönö godongämæ waa cæcæimpa, ante wëñëñedë cægacäimpa. Ayæ wantæpiyæ coatodo tiento todëinta wadepo go ate Möitee wodi ingante apænedinque adocä, iimäi cæedäni, ante pönö wææ ängängäimpa. Ininque Wængongui wantæpiyæ ate wææ äninque do nänö angäine ante wëä godönämai ingacäimpa. Edæ, Cöwë pönö cæcæboimpa, ante doyedë nê angaingä inte tömengä ñöwo wææ äninque mänine ante dicæ wëä godongantawogaa. ¹⁸ Möitee wodi nänö wææ angainö ëñente cæmö beyænque mönö ænguëncocoo do æmö bai Wængongui, Cöwë pönö cæcæboimpa, ante önonque ancægacäimpa. Incæte Wængongui pönö waadete cædinque mæmæ Abadäo wodi ingante apænedinque, Cöwë pönömo æncæminimpa, ante nänö angainö bai cædinque do cægacäimpa.

¹⁹ Ininque, Cöwë pönömo æedäni, ante nê angaingä inte Wængongui quinante ñöwo wæætē, iimäi cæedäni, ante wææ angacäi. Iñæmpa tömengä, Minitö botö äno ante ëñëñämai cædinque wënæ wënæ mini cædinö edonque bacæäimpa, ante odömoncæte ante wææ angacäimpa. Mänömai cædinque tömengä, Abadäo wodi Pæingä botö nê angaingä incæ tömengä nänö ponganca minitö ëñente cædinque quëwencæminimpa, ante wææ angacäimpa. Mänine nänö wææ angäine ëñente cæcæedäni, ante Wængongui tömengä anquedoidi inänite da pönongä pöninque tömëñäni Möitee wodi ingante mämö odömönäni agacäimpa. Tömengä iñömö tæcæguedë ongonte bai nê anguingä badinque Wængongui nänö angäine ante idægoidi inänite wæætē angä ëñengadäni. ²⁰ Nöwo apænebo ëñëedäni. Adocanque eyepæ cæcä adinque tömengä beyæ ancæte ante wacä tæcæguedë ongönämai imaingampa. Wængongui iñömö, Cöwë pönö cæcæboimpa, nê angaingä inte adocanque incæ eyepæ cædongä ingampa.

Iimäi cæedäni, ante quinante angacäi, ante

²¹ Ininque Wængongui, Cöwë pönö cæcæboimpa, ante nê angaingä inte wantæpiyæ ate, iimäi cæedäni, ante wææ äninque tömengä doyedë nänö angäine dicæ wëä godongantawogaa. Edæ tömengä mönö imonte apænedinque, Botö

wææ angainö beyæ quëwencæminimpa, ante mänine pönongä ænte quëwëmö bai mänine beyænque edæ nê nö quëwëmö bacæedömöimpa. Wæætē edæ wii mänömai impa. Wængongui, Cöwë pönö cæcæboimpa, angä ëñëninque mönö quëwënginque edæ nê nö cæmö bamompä. ²² Ininque Wængongui, Cöwë pönömo æncæedäni, ante nê angaingä inte iimäi ante cæcampa. Botö angaincoco ante Itota Codito ingante nê pönëñäni inänite da pönömo ate tömëñäni wede nani pönëñö beyænque ænte ëwocacæedäni, ante iimäi cæcampa. Tömengä mönö inguipoga tömæ quëwëmö mönö wënæ wënæ cædimämo adinque mönö imonte pönö tee mönete bai cæcä ongömompa. Mänömai pönö cæcä ongongaimö iñömönte Wængongui mönö wede pönencabo adomönque iñömönte tömengä nänö angaincoco ante pönongä ænte ëwocacompä. Wængongui, Mänömai cæbopa, ante apænecä ëñëninque yewæmongadäni.

²³ Doyedë iñömö mönö, Möitee wodi nänö wææ angainö tömännö ante mönö ædö cæte eyepæ cæquii, ante tee mönete bai wægämöimpa. Edæ Itota Codito mönö nê wede pönëñongä edonque pöni nänö ponte a ongonganca mönö tee mönete bai wægämöimpa. ²⁴ Ininque, Minitö Codito ingante wede pönëninque nê nö cæmini bacæminimpa, ante cædinque Wængongui Codito gämæñö töö æmænte bai cædinque wææ angacäimpa. Mänömai i ininque tömengä nänö wææ angainö beyænque mönö wapiticæ godämai inte Codito gämæñö pongämöimpa. ²⁵ Ayæ ñöwo iñömö, Mönö nê wede pönëñongä do pongäimpa, ante adinque Wængongui ñöwo wæætē wææ änämai ingampa.

²⁶ Minitö Itota Codito ingante wede pönëmini inte tömämäni Wængongui wëñæmini iminipa. ²⁷ Edæ tömämäni mönö Codito tönö godongämæ guite bai æpænë guidinque tömengä nänö ewocadö adodö ewocadinque tömengä nempo quëwëminipa. ²⁸ Tömengä nempo adocabomö inömö inte mönö adocanque ingantedö ante apænedinque, Oodeocä ingampa, ante änämai ingæimpa. Ayæ wacä ingantedö ante adobai, Guidiego ingampa, ante änämai ingæimpa. Ayæ, Waocä nänö nê ö æningä inte awënë beyænque cæte nê quëwëngä ingampa, ante mönö änämai ingæimpa. Wacä ingantedö ante, Abæ tawænte gocä ingampa, ante mönö änämai ingæimpa. Ayæ adocanque ingantedö ante, Onguiñængä ingampa, ante mönö änämai inte wacä ingantedö ante adobai edæ, Onquiyængä ingampa, ante änämai ingæimpa. Iñæmpa Codito Itota nempo

quëwëninque adocabomō ìmompā. ²⁹ Ayæ mînitō ìñômō Codito nempo quëwëmîni inte mæmæ Abadäō wodi præîmîni bai ìmînipā. Ìnînque Wængonguî nânō, Cōwë pônōmo æncæmînimpa, ante nânō angaincoo ante mînitō nê ænguîmîni ìmînipā.

4

¹ Mânîno ante yewæmōninque botō, Waodâni æbânō cædâni, ante odômōninque ìmaî ante apænecæte ante yewæmōmopa. Wæmpocâ wængâ ate tōmêngâ wengâ ìñômō wæmpocâ nânō éadincoo nê ænguingâ ingampa. Ìnînque wæmpocâ ayæ mîingâ quëwëngâñedë mânincoo tōmancoo do ænte bai tōmêngâ wengâ nê éacâ ingampa. Incæte tōmêngâ wengâ tōmancoo nê éacâ incæ edæ tōmêngâ wëñængâñedë guiquënë wæmpocâ beyænque cæte nê quëwëngâ bai ìnogâ ingampa. ² Ìnînque wæmpocâ do ânînque, Ìñônæ ìnque bayonte botō wengâ do picængâ badînque nâmâ nê angâ bacæcâimpa, ante nânō angaiñonæ ìnque baganca nê aadâni ìnânite wæmpocâ angâ ëñëninque tōmënâni wæætë wëñængâ ingante wææ aadânipā. Ayæ, Wëñængâ nânō manguincoo ante æbânō cæquî, ante nê aadâninque ânâni ëñente wëñængâ incæ cæcampa.

³ Mönō ìñômō doyedë mâniaingâ wëñængâ bai adobai picæmō ìnâmaî mönō ingaiñedë inguipogaque nâni wææ angaiñonque ante ëñente cægamōimpa. Waocâ beyænque cæte nê quëwëngâ bai mönō adobai inguipogaque nâni wææ angaiñonque ante ëñencæte ante cædinque mânîno beyænque cæte nê quëwëmō bai inte wægämōimpa.

⁴ Incæte Mæmpo Wængonguî ìñômō, Ìñônæ da pônōmo poncæcâimpa, ante doyedë nânō angaiñonæ ìnque bayonte tōmêngâ Wengâ ingante da pōnogâ pongacâimpa. Ìngâ Wëñængâ ingante onquiyængâ mangâ ëñadinque tōmêngâ Wængonguî nânō wææ angainō ante nê ëñente cæquënenngâ nânō baquinque pægacâimpa. ⁵ Ìnînque mönō Mōitee wodi nânō wææ angainō beyæ tee mönete bai wæyōmote adocâ Wængonguî Wengâ incæ, Mînitō abæ tawænte bai picæmîni badînque nâwâ wëmîni bate quëwëncæmînimpa, ante mönō ìmote ængâ beyænque mönō abæ tawænte bai quëwëmompā. ⁶ Mæmpo Wængonguî ìñômō, Mînitō nâwâ wëmîni ìmîni beyæ, ante tōmêngâ Wengâ Ònōwoca ingante mōnonga da pōnogantapa. Ìnînque tōmêngâ Ònōwoca ìñômō, “Mæmpo, botō Wæmpo,” ante nê apænecâ ìnogâ inte mönō mîmōnë owoðinque adodō ante mönō beyæ apænecampa. ⁷ Ìnînque bitō ìñômō bitō ìmite nê wææ angaingâ beyænque idæwaa

cæte quëwëngaimi inte ñōwo abæ tawænte bai æmæwo pæðimi inte nâwâ wëmi ìñomi ìmîpā. Ayæ nâwâ wëmi ìñomite Wængonguî pōnō cæcâ ate bitō tōmêngâ nânō éagaincoo ante nê ænguîmi babipā.

Nê pōnëmîni cæbamë cæte quëwëmîni, ante wæcampa

⁸ Wængonguîdi ìnâmaî ìñônânite wadâni ìñômō, Wængonguîdi ìnânîpā, ante babæ apænedânipā. Mînitō wëenëñedë Wængonguî ingante mîni adamaî ìfedë, Wængonguîdi, ante tōmënâni babæ ante nâni nê ânônâni beyænque cæte nê quëwëmîni inte ñæ cæyænte bai wægämînimpa. ⁹ Nōwo ìñômō mînitō Wængonguî ingante ate bai nê pōnëmîni ìmîni inte ædō cæte wapiticæ ante ëñëmîni. Æ wadō ante godōmenque ämo. Wængonguî incæ mînitō ìmînite do ate pōnengaingâ ingâ incæte mînitō ædō cæte inguipogaque quëwëñâni nâni ònonquedō ante wææ angainō ante ëñente quëwëmîni. Ìñæmpā, Mânîne nâni wææ angainō ante wæætë ëñængâimpa, ânînque mîni ñâ cæpote wæquinque ämîni awædō. ¹⁰ Edæ Wængonguî ânâmaî ìñongante mînitō mã pōnëninque, Wængonguî beyæ, ante mönō ìñônæ cædâmaî inte ongōninque ææmæ cæte becæimpa, änewëmînipā. Ayæ, Ìi apäicâ ìñonte adobai, ìntedæ ìñonte adobai, ìnepo ìñonte adobai, Wængonguî beyæ, ante mönō cædâmaî inte ææmæ cæte becæimpa, ante ònonque pōni ante cæmînipā tōō. ¹¹ Ìnînque, Mînitō ëñëñâmaî inte mîni wæquinque cæmînipā, ante adînque botō mînitō beyæ ante guîñente wæbopa. Botō pōnō nanguî cæbo incæte edæ ònonque wabânō cægaboimpa, ante wæbopa.

¹² Botō tōniñamîni ëñëdâni. Botō wëenëñedë mînitō bai Mōitee wodi nânō wææ angainō nê cæbo bai inte wæbo amînitawo. Wæætë botō nê wææ angaingâ ingante idæwaa ëñente cædinque abæ tawænte gobo bai mînitō adobai cæmîni waa tobaimopa. Mînitō dicæ botō ìmote wënæ wënæ cæmînitawogaa. ¹³ Wëenëñedë wënæ wënæ mânîmo inte botō mânōmaî beyæ mînitō weca pōninque mönō Codito ingantedō ante watapæ apænedinque mã apænebo ëñëmînitapā. ¹⁴ Ìnînque mânōmaî wënæ wënæ bate pōmo ate wæðimîni incæte mînitō guîñëñate wæðâmaî inte towæ tânongadâmaî ìmînitapā. Wæætë edæ botō ìmote adînque mînitō, Wængonguî anquedo ingampa, ante pōnente bai cædinque watapæ todînque, Pöe, ämînitapā. Ayæ edæ, Itota Codito ingampa, ante pōnente bai cædinque, Pöe, ämînitapā. ¹⁵ Mînitō mânîñedë watapæ mîni todîno bai ñōwo guiquënë quimæ todâmaî ìmîni. Mînitō mânîñedë edæ eyepæ inte bai nâmâ

awinca o togæmōninque botō imo pōnō mīne tūmoncædōmīnīmpa, ante pōnēninque apænebopa.

¹⁶ Īnæmpa mīnitō ĩmīnite nāwangā apænebo beyænque mīnitō ñowo wæætē botō imote piinte bamīnitawo. ¹⁷ Wadāni ĩñōmō, Mōnitō gāmæñō ponte ēñēedāni, ante nangū cædāni ĩñōmō mīnitō ĩmīnite wēnæ wēnæ cæcæte ante ānewēnānīpa. Tōmēnāni ĩñōmō, Pabodoidi ĩnānite ēñēnāmai ĩnte mīnitō wæætē mōnitō tōnō godongāmæ cædinque mōnitō cæinēnonque ante āmōni ēñēninque cæcæmīnīmpa, ante babæ cædānīpa.

¹⁸ Wacā nānō cæinēnō ante godongāmæ cæmīni cōwē waa ĩmaīmpa. Nāwangā ĩmpa. ĩncæte tōmēngā nānō waa cæquēnēnonque ante cæcā adinque mīnitō, Mānīnonque edæ cæcæīmpa, ante nangū cæquēnēmīni ĩmīnīpa. Ayæ edæ botō mīnitō weca quēwēmoyedē cæmīni bai mīnitō botō dæ āmo ĩñedē cōwē adobai cæmīni waa ĩmaīmpa. ¹⁹ Botō wēmīni ēñēedāni. Yædēmadā ĩnte nantate wædā bai botō ĩñōmō wæætē nantate wædinque edæ, Mīnitō mīmōnē Codito ĩngante ædæmō entawencæmīnīmpa, ante nangū pōni cædinque wæbopa. ²⁰ Edæ, Mīnitō æbāmē cæmīnīi, ante ēñēnāmai ĩmo ĩnte botō mīnitō weca pōninque wīi gobæ tedete botō ānō bai tēdedinque wæætē wadō bai tēdecæte ante pōinente nangūi wæbopa.

Tada wodi tōnō tōmēnā ĩnante nē cægaingā Agada

²¹ Mīnitō, Mōitee wodi nānō wææ angainō ante mōnō ēñengæīmpa, ante nē āmīni ĩnte apænēmīni ēñēmoedāni. Mīnitō wææ ante tōmēngā nānō yewæmongainta ĩncæ adāmai ĩnte ēñēnāmai ĩmīnitawo. ²² ĩmaī ante yewæmongatīmpa. Abadāō wodi ĩñōmō wēñænā onguīñænā mēnāa ĩnate tapæīgacāīmpa. Adocanque guiquēnē nānōogængā beyænque nē cæte quēwēngā wēñængā ĩñongā wacā guiquēnē nāwā nānōogængā wēñængā ĩngacāīmpa. ²³ Nē cæte quēwēngā wēñængā guiquēnē cōwē mōnō ēñadō bai adobai ōnonque ēñagacāīmpa. Nāwā nānōogængā wēñængā guiquēnē Wængongūi, Cōwē pōnōmo æncæbiīmpa, ante nānō ānīnō beyænque ēñagacāīmpa.

²⁴ Wængongūi ĩñōmō, Botō pōnō cæbo ate mīnitō Ao āmīni ĩnque mōnō godongāmæ waa cæcæīmpa, ante mem-poga apænægacāīmpa. ĩnque, Wængongūi mēnā nānō apænēgainō æbānō ĩnel, ante ēñēncæte ante mōnō mānīna onquiyænā ĩnate adinque pōnengæīmpa. Wængongūi ĩñōmō adopoque apænecæte ante Tinaiquidi wæænte ongōninque wææ angacāīmpa. Mānīneque tōmēngā nānō wææ angāineque

ante nē ēñente cædāni ĩñōmō Agada wodi wēnāni mānīne beyænque nē cæte quēwēnāni bai nāni baquinque ēñādānīpa.

²⁵ Māningā Agada tōmēngā nāni wencabo ĩñōmō wacā ĩngante nē cædōnāni ĩnte cæningā ñā cæyænte bai ĩnte wægādānīpa. ĩnque Adabiabæ ongonquidi Tinaiquidi ongōninque Wængongūi wææ angā ate mōnō ĩñōmō Agada bai wacā ĩngante nē cæmō bagamōīmpa. Edæ Agada wodi nāni wencabo wacā beyænque nē cæte quēwēnāni ĩnte nāni wægāinō bai ñowo Eedotadēē quēwēnāni adobai wacā beyænque nē cæte quēwēnāni bai ĩñōnāni ĩnte wæwente quēwēnānīpa. ²⁶ Eedotadēē ĩnguipoga ongōñōmō bai mōnō ōnædē æite Eedotadēē bai ĩñōmō ongongæīmpa. Mānīñōmō Eedotadēē nāni āñōmō mōnō badā Tada wodi bai ĩmpa. Tada ĩñōmō wīi wacā ĩngante nē cæcā bai ĩñōnante mōnō tōmēnā wēmō bai ĩmōmpa. ²⁷ Edæ ĩmaī ante Wængongūi beyæ yewæmongatīmpa, “Bitō owæntabi ēñēmi. Wēñæ mānāmai ĩnīmi ĩnte bitō, ĩncayæ ate mancæboīmpa, ante watapæ tocæbiīmpa.

Bitō wēñæ nantadāmai ĩnīmi ĩnte, Botō ĩncayæ ate toquinque ĩmpa, ante yedæ ancæbiīmpa.

Edæ nānōogængā ēmō cæte gocā ate adocanque ĩnte wēñæ mānāmai ĩñongante,

Wængongūi, Botō pōnōmo æncæbiīmpa, angā ēñengā ĩnte owæmpocā ĩñōmō godōmenque nangūi wēñænāni ĩnānite māñongā nānōogængā ēcā guiquēnē wēñænāni wædænque mancæcāīmpa,” ante yewæmongatīmpa.

²⁸ Botō tōnīñamīni, ēñēedāni. Wængongūi, Bitō wēñængā cōwē pōnōmo æncæbiīmpa, ante nānō angāinō beyænque Itæca wodi ēñagacāīmpa. Wængongūi, Cōwē cæcæboīmpa, ante mīnitō ĩmīnite adobai angā beyænque mīnitō mem-poga ēñadinque tōmēngā wēmīni bagamīnīpa. ²⁹ Mānīñedē ĩñōmō Wængongūi Ōnōwoca beyænque ēñacā ĩñongante Itæca ĩngante ōnonque nē ēñagāingā ĩtīmædo guiquēnē piinte cægacāīmpa. Mānōmai nānō piinte cægāi bai ĩnguipogaque quēwēnāni Wængongūi wēnāni ĩnānite ñowo adobai cædānīpa. ³⁰ ĩnque Wængongūi æbānō angā ēñente yewæmongadānīi. ĩmaī ĩmpa. “Nāwā nānōogængā wēñængā mæmpocā ēadincoo æñongā nānōogængā beyænque cæte nē quēwēngā wēñængā wæætē ænāmai ĩncæcāīmpa. ĩnque nē cæte quēwēngā nāna wencaya ĩnate mōnō wido cæcæīmpa.” Ante yewæmongatīmpa. ³¹ ĩnque botō tōnīñamīni ēñēedāni. Mōnō ĩñōmō nāwā nānōogængā wēñæmō bai ĩñōmō ĩnte mōnō nānōogængā beyænque nē cæte quēwēngā

wēñæmō bai wīi inōmō imompa, ante āmo ēñēdāni.

5

Abæ tawænte bai mōnō quēwēnō ante

¹ Mōnō iine Mōitee wodi nānō wææ angainō ante ēñente nē cæmō inte ñā cæyænte bai wæyōmonte Codito, Abæ tawænte bai inte quēwencæminimpa, ante pōnō ō ænte ñimpo cæcā beyænque mōnō abæ tawænte gote bai ee quēwēmō imompa. Ìninqe mīnitō iñōmō nē abæ tawænte gogaīmīni inte tæi ongōninque edæ wæætē mānīne beyænque ñā cæyænte bai badāmaī iedāni.

² Ìñānāni, botō Pabodobo apænebo ēñenguēnē quēwēmīnii. Mīnitō, Mōnō ēō togæīmō inte quēwengæimpa, ante cæmīni ñinque ædō cæte Codito ængā beyænque quēwenguēnēmīnii. Ìñæmpa mānōmaī cæmīni ñinque Codito mīnitō beyæ ædō cæte pōnō cæquingāā. ³ Bitō, Botō ēō togæīmō inte quēwencæboimpa, ante cæbitawo. Edæ botō bitō imite iīmaī ante apænebo ēñēe. Bitō quēwencæte ante cædinque ēō togæīmīnīnīnī ñinque Mōitee wodi nānō wææ angainō tōmānō ante bitō ēñente cæte quēwenguēnēmi babaīmīpa tōō. ⁴ Pancāmīniya, Nō cæmō mōnō baquinque Mōitee wodi nānō wææ angainō ante ēñente cæcæimpa, ante āmīnitawo. Ìñæmpa mānōmaī ante nē āmīni inte mīnitō mōnō Codito ingante do pango cæte bai cæminīpa tōō. Edæ pango cæte nānēnē goyōmīnīte tōmengā ædō cæte pōnō waadete cæquingāā. ⁵ Mōnitō guiquēnē, Wængonguī ayongā mōnō nē nō entawēmō bacæmōimpa, ante nanguī pōnī æīnente wānō cōñōmōnīte Wængonguī Ōnōwoca pōnō apæneca ēñēninque mōnitō, Mōnō nē nō entawēmō badinque watapæ bacæimpa, ante wede pōnēmōnīpa. ⁶ Edæ Codito Itota nempo quēwēninque ēō togæīmō imō incæ bagæmō imō incæ tōmāmō adobaī ōnōmonque inōmō imompa. Wæætē edæ Codito ingante wede pōnēninque nē waadete pōnēmō iñōmō mānīnō mōnō pōnēnō beyænque waa pōnī entawēmompa.

⁷ Mīnitō guiquēnē wēēñēdē godongāmæ pogodo gote bai nanguī cædinque waa cæmīnitapa. Edæ ñōwo guiquēnē mīnitō waa pōnī pogodo gote bai cæyōmīnī æcāmē wææ āna ēñēnīmīni inte wæætē Wængonguī nō ante nānō apænegainō ante ēñēnāmaī cæmīnitawo. ⁸ Wængonguī mīnitō imīnīte nē aa pegaingā inte tōmengā iñōmō edæ, Èñēnāmaī cæedāni, ante dicæ wææ angantawogaa. ⁹ Edæ, “Yedæ æmpocæimpa, ante cædinque guiyā pōnī da wente ate pāō cæquimo tōmāō guipæñō pāō yedæ æmpopa,” ante pōnēninque iīmaī ante ēñengæimpa. Adocanque wapiticæ wææ

angā ēñēninque nanguī ināni wæætē oda cæte wæcædānimpa. ¹⁰ Mōnō Awēnē nempo mōnō quēwencabo imompa, ante pōnēninque botō, Mīnitō botō pōnēnō bai pōnēmīni inte wīi wapiticæ ante pōnenguīmīni imīnīpa, ante pōnēmōpa. Wæætē edæ æcāmenque mīnitō imīnīte wapiticæ ante wææ angāā, ante adinque Wængonguī nē apænte angā ingante cōwē godō pangā wæcæcæimpa.

¹¹ Botō tōnīñamīni ēñēdāni. Botō Itota awāa wængacæimpa, ante apænebo ēñēninque, Èō togæīmīni baedāni, ante nē ānāni iñōmō botō imote cōwē pīninque pānāni wæbo aedāni. Incæte botō tōmēnāni nāni ānō bai, Èō togæīmīni baedāni, ante āmo bai tōmēnāni botō imote wīi bæi ongōninque pancædōnānimpa. Edæ mānōmaīnō āmo bai tōmēnāni wæætē pīnāmaī ināni inte, Pabodo Itota nānō wængaiwæ ante cædnecā awædō, ante tee tēwate bai oda cædāmaī incædōnānimpa. ¹² Mīnitō imīnīte nē wapiticæ ante wææ ānāni iñōmō nāmā wido togænte bai cædinque nāmā ta ñænte Codito ingante nē pōnēmīni weca pōnāmaī ināni inte waa imaimpa, ante awædō.

¹³ Mīnitō botō tōnīñamīni abæ tawænte gote quēwencæminimpa, ante mōnō Awēnē mīnitō imīnīte apænte aa pegacæimpa. Incæte mīnitō, Abæ tawænte godīmōni inte inguipogaque mōni cæīnēnō ante godōmenque cæcæmīnīpa, ante cædāmaī iedāni. Wæætē edæ wadāni inānīte godō waadete pōnēninque tōmēnāni beyæ ante cæedāni. ¹⁴ Edæ Itota, “Nāmā bitō waadete pōnēnō bai pōnēninque bitō wacā ingante adobaī edæ waadete pōnencæbīimpa,” angacæimpa. Ìine adodeque ēñente cæmō ñinque Wængonguī nānō wææ angainō incæ tōmānō ante do nē cæmō edæ babaīmompa. ¹⁵ Edæ babæidi bai nāemæ pocænte bai cædinque nāemæ gāwæi cænte bai cæmīni bai mīnitō nāemæ wido cædinque wantæ biquēnēmīnīdō anguēnē, ante apa quēwēmīnii.

Mōnō Wængonguī Ōnōwoca nempo quēwengæimpa, ante

¹⁶ Ñōwo āmo ēñēdāni. Wængonguī Ōnōwoca ewocadinque quēwēdāni. Mānōmaī quēwēninque mīnitō inguipogaque mīni cæīnēwēnō ante wīi ēñēninque nāmā beyænque ante cædāmaī inguīmīni imīnīpa. ¹⁷ Edæ inguipogaque mōnō cæīnēwēnō ante adinque Wængonguī Ōnōwoca iñōmō edæ Baa angampa. Ayæ wæætē æcānō inguipogaque mōnō cæīnēwēnō ante cæte quēwēna tōmengā Wængonguī Ōnōwoca ingante nāemæ Baa angampa. Ìninqe mōnō inguipogaque cæīnēwēnō ante wæyōmō Wængonguī Ōnōwoca guiquēnē, Wadō cæedāni, angampa. Mānōmaī beyæ

6

mīnitō mīmōnē wæætedō wææte ante bai entawēmini inte mīnitō nāmā mīni ānō ante ædō cæte cæquīmīni. ¹⁸ Incæte mīnitō imīnite Wængonguī Ōnōwoca nōinō tōō æmænte māocā gomīni inte mīnitō Mōitee wodi nānō wææ angaiñō ante do abæ tawænte gomīni imīnipa.

¹⁹ Inguipogaque mōnō cæinēwēnō ante ēñēninque nē cædāni iñōmō æbānō cædāni, ante edonque abaimpa. Edæ iīmaī impa. Tōmēnāni nānōogængā iñāmaī iñongante do godō guēa towēnānipa. Wēntamō pōnēwēninque cædānipa. Ōnonque guīñēñadāmaī inte nāmā baonque pōnēwēninque towēnānipa. ²⁰ Wængonguīdi iñānipa, ante badōninque ædæ wæænte waa adānipa. Idō bai yewæninque ōnonque tedewēnānipa. Piinte quēwēnānipa. Tiyæñō tiyæ tedewēnānipa. Wacā godōmenque ængā ate wædinque piinte awēnānipa. Ænguī bawēnānipa. Nāmā waa tobote, ante āwēnānipa. Wæætedō wææte āninque nāwæ godānipa. Wadō ante nāni cabo wadō ante nāni cabo badinque wæætedō wææte cædānipa. ²¹ Wacā gomonga ængā ingante godō piinte adānipa. Ti nāmæ nanguī bedinque dowænte badānipa. Ayæ nanguī pōni godōmenque bedinque nanguī pōni cæninque guīñēñadāmaī inte towēnānipa. Ayæ godōmenque quīēmē bai nē cæināni iñānipa. Mānōmaī cæte quēwēnāni iñōmō Wængonguī Awēñē Odeye nempo ædō cæte edæ guīquīnāni, ante do botō āniñō bai ñōwo wææte āmo ēñēdāni.

²² Wængonguī Ōnōwoca ingante ēñēnte nē cæmō guīquēñē mōnō waincawæ incate bai iīmaī cæmompā. Waadete pōnēmompā. Watapæ tomompā. Gānē entawente pōnēmompā. Ee cæte piināmaī imompā. Waadete cæmompā. Wadāni beyæ ante waa pōni cæmompā. Wæntædāmaī inte cōwē cæmompā. ²³ Gānē pōnēninque ædæmō cæmompā. Nāmā wææ āninque nō cæmō imompā. Wængonguī Ōnōwoca ingante ēñēninque mānōmaī cæmō adinque Wængonguī mōnō cædōnō ante wææ ānāmaī ingampā. ²⁴ Mōnō Codito quīmō iñōmō inte mōnō baō tōmēngā tōnō awæñēmæ timpote bai wængaimō iñinque inguipogaque mōnō cæinēwēngāiñō adobaī awæ timpote bai iñonte mōnō abæ tawænte bai godimo inte baonque ante mōnō cæinēwēnō ante ēñēnāmaī inte cæmompā. ²⁵ Edæ Wængonguī Ōnōwoca ængā beyænque quēwēmō inte mōnō tōmēngā Ōnōwoca tōnō guēa godongāmæ cægonte bai quēwēngæimpā. ²⁶ Mānōmaī quēwēninque mōnō nāmā waa adāmaī ingæimpā. Edæ wacā tōnō guēa wæætedō wææte ānāmaī ingæimpā. Wacā gomonga ængā ingante mōnō godō piinte adāmaī ingæimpā.

Mōnō wacā ingā wacā ingā iñacabo cæcæimpā, ante

¹ Botō tōniñamīni ēñēdāni. Wacā ēñēnāmaī cædinque oda cæte wæcantawo. Iñinque mīnitō Wængonguī Ōnōwoca ingante mīni ēwocacabo iñōmō, Māningā nē oda cædingā inte Wængonguī taadonque adodō pō gocæcāimpā, ante cædinque tōmēngā ingante ædæmō cædāni. Mānōmaī cædinque nē apæñecā guīquēñē, Botō adobaī ēñēnāmaī cæinente wīi bacæboimpā, ante pōñente wædinque nāmā wææ cædāni. ² Wacā teēmente mongænte bai entawēngā ate wædinque mīnitō mōnō Codito nānō, iīmaī cædāni, angaiñō ēñēnte cædinque tōmēngā nānō mongæncōo iñacabo mongænte bai cædinque waa cædāni.

³ Æcāñō ōnonganque ina inte, Botō ñæñæmo iñōmo imopa, ante pōñēna, tōmēngā iñōmō nāmā babæ apæñete bai oda cæte pōnēngampā. ⁴ Iñinque adocanque nāmā nānō cæinō cōwā adinque adocanque nāmā nānō cæinō cōwā adinque tōmāmīni, Tōmēmo æbānō cæboo, ante nāmā apænte anguēñēmīni imīnipa. Mānōmaī cædinque wacā nānō cæinō adāmaī inte waocā nāmā nānō cæinonque cōwā adinque apænte āninque, Tōmēmo nō cæbo imopa, ante adinque tobaingampā. ⁵ Edæ adocanque nāmā nānō cæquēñēnō ante teēmente mongænte bai cædinque adocanque nāmā nānō cæquēñēnō ante teēmente mongænte bai cædinque tōmāmīni eyepæ cæbaimīnipa.

⁶ Ayæ Wængonguī nānō apæñedō ante wacā apæñecā ēñēninque nē ēñēngā iñōmō tōmēngā māincōo pancacooga waincooga æninque nē apæñecā ingante eyepæ pædæ godongā æncæcāimpā.

⁷ Tōmēmō tā bocate pæte incayō waocā wānā adomō bai tā pete ængampā. Mānōmaī ingæimpā, ante nē angaiñā inte Wængonguī iñæmpā oda cæcampā diyæ waocā wamō ænguīgāā. Iñinque, Waocā æbānō cæcāā, ante adinque Wængonguī pōnō cæcā ate waocā nānō cægaī bai adobaī ænte wæcæcāimpā. Āmo ēñēninque mīnitō wīi wacā wapiticæ nānō apæñedō beyæ oda cæquēñēmīniñō anguēñē. ⁸ Edæ mīnte pædimō bai tā pete ængā bai cædinque imæcaque ante nāmā pōñente nē cæcā guīquēñē adobaī imæcaque nānō ñōmænguinque æncæcāimpā. Wææte Wængonguī Ōnōwocaque ante pōnēninque nē cæcā guīquēñē Wængonguī Ōnōwoca pōnō cæcā beyænque tōmēngā nānō cōwē wæñāmaī quēwēnguinque æncæcāimpā. ⁹ Iñinque mōnō wæntæye badāmaī inte wadāni beyæ godōmenque waa cæcæimpā. Ñimpo cædāmaī imō iñinque edæ Wængonguī,

Īñedē æncæmīnīmpa, ante nānō angaiñedē ĭnque bayonte māñīñedē mōnō edæ tā pete bai eyepæ pōñī æmāimōmpa. ¹⁰ Māñōmāi beyæ mōnō eyepæ ĭmō ĭñedē tōmāñāni ĭnānite mōnō waa cæcæīmpa. Ayæ wadāni nē wede pōñēñāni ĭñōñānite mōnō, Adomō ĭmōmpa, ante pōñēñinque tōmēñāni ĭnānite godōmenque nanguī cædinque waa cæcæīmpa.

Māñinque ante yewæmōmōpa, ante Amēē āmōpa.

Waa quēwencæmīnīmpa, ante

¹¹ Botō ōnōmpoca yewæmōñinque tōmēmo ñænæmōmo yewæmōmōi aedāni. ¹² Codito mōnō beyæ awāa wængacāīmpa, ante nē pōñēñāni incæ pancadāñiya, Māñine ante ēñēñinque oodeoidi pīñāni wæcæ wæ, ante nāmā wææ cæcæte ante cædāñipa. ĭnīnque tōmēñāni, Ēō togænte cæmōni ĭnīnque oodeoidi wæætē mōñitō ĭmōñite waa acædāñīmpa, ante cædinque mīñitō ĭmīñite, Ēō togæñīmīni bacæmīnīmpa, āñāñipa. ¹³ Nē ēō togæñīñāni incæ edæ Wængonguī nāñō wææ angaiñō ante dicæ ēñente cædāñiyaa. Incæte tōmēñāni, Mōñitō āñō bai mīñitō do ēō togæñīmīni bamīni ate wadāni mōñitō ĭmōñite waa acædāñīmpa, ante cædinque mīñitō ĭmīñite, Ēō togæñīmīni baedāni, ante cædāñipa.

¹⁴ Botō guiquēñē quēīmenque ante, Waa aedāni, ante dicæ āmogaa. Īñæmpa ĭmæcaque ante botō cæñēmāmo ante botō, Codito nāñō wængaiwāa tente bai wæñēmāmo ĭmpa, ante bai cædinque edæ māñīmāmo ante æmæwo wido cætabōpa. Ayæ tōmēmo adobai Codito tōñō āanque bai awāa wænte bai ingaiño inte edæ ĭmæcaque botō cæñēñō ante cædāmañ ĭñōmo ĭmōpa. ĭnīnque, Mōñō Awēñē Itota Codito awāa wæñinque mōñō beyæ waa pōñī pōñō cægacāīmpa, ante pōñente wædinque botō māñīwæñque tōmēngā nāñō wængaiwæñque ante waa ate apæñedinque edæ wade ante cōwē waa ate tededāmañ incæboīmpa, āmōpa. ¹⁵ ĭnīnque ēō togæñīmō incæ bagāamō incæ ōnonque pōñī edæ ĭmpa. Edæ Itota Codito badongā beyæñque mōñō mīñimō quēwēmōmpa. ¹⁶ Māñōmañō ante pōñente cæmīni ĭñōmīñite Wængonguī pōñō waadete piyæñē cæcā adinque mīñitō gāñē pōñente waa cæcæmīnīmpa. Idægoidi ĭmīñipa, ante Wængonguī nē nāñō angaiñīmīni incæ mīñitō māñōmañ cæte quēwencæmīnīmpa.

¹⁷ Botō Itota beyæ ante cæyōmō wadāni pāñāni wædīmo inte botō do baonga āmogate ee ēñābo ĭñōmote ñōwo ĭñcayæ ate mīñitō tōmāmīni edæ ee amīni quēwēmoedāni. ¹⁸ Botō tōñīñāmīni waa quēwencæmīnīmpa, āmōpa. Mōñō Awēñē Itota Codito pōñō waadete apæñecā ēñēñinque mīñitō mīñōñē adobai waadete entawencæmīnīmpa.

Epetoidi inānite Pabodo nānō cadota ante yewæmongainta

Waa quēwencæminimpa, ante

¹ Wængongui angā ēñēninque Itota Codito botō imote da godongā gogaīmo inte botō Pabodobo inōmō inte yewæmōmopa. Epeto iñōmō quēwēmīni incæ mīnitō Wængongui quīmīni inte Itota Codito nempo quēwēninque nē ædæmō cæte pōnēmīni iñōmīnite botō, Mīnitō acæmīnimpa, ante yewæmōmopa. ² Mōnō Mæmpo Wængongui tōnō mōnō Awēnē Itota Codito piyænē cæte waadete pōnō cæda ate mīnitō gānē pōnēninque waa quēwencæminimpa, ante yewæmōmopa.

*Codito nempo quēwēninque mōnō eyepæ
ēwocamōmpa*

³ Mōnō Awēnē Itota Codito Wæmpocā iñongante Itota iñōmō adocā ingantedō ante, Botō Wængongui iñongā ingampa, ante apænegacāimpa. Inique mōnō iñōmō Codito tōnō do oōnædē æite bai tōmengā nempo quēwēñōmonte adocā Itota Wængongui incæ tæiyæ waēmoncoo nē ēwocagāingā inte pōnō cæcā æninque mōnō tōmengā nānō ēwocadoncoo tōmancoo bai adobai eyepæ pōni ænte ēwocamōmpa. Mānōmai cæcā adinque mōnō tōmengā ingante apænedinque, Bitō waa pōni cæbi æmōnipa, ante watapæ apænecæimpa. ⁴ Tōmengā iñōmō edæ, Codito nempo quēwēninque mīnitō botō ayōmo edæ tæiyæ waēmō ēwocamīni inte edæ wentamō mongænāmai incæmīnimpa, ante tōmengā inguipoga nānō badōnāmai iñedē incæ mōnō imonte pōnō apænte ængacāimpa. Ayæ mōnō imonte waadete pōnēninque tōmengā, ⁵ Botō pæpogate bai æmo beyænque mīnitō iñōmō Itota Codito nempo quēwēninque botō wēmīni baquīmīni incæmīnimpa, ante cædinque tocæboimpa, angacāimpa. Inique tōmengā doyedē nānō angainō bai cædinque pōnō angā ate mōnō Wængongui wēmō cōwē baquēnēmō ingamōimpa.

⁶ Edæ nangui waadete pōnō cædinque tōmengā nānō nē Waadecā ingante da pōnongā æmōmpa. Mānōmai beyæ mōnō iñōmō tōmengā ingante, Bitō ñāo apāite bai ēmōnōmi inte mānōmai waadete pōnō cæbi æmōnipa, ante watapæ apænecæimpa.

⁷ Edæ tōmengā nānō nē Waadecā iñōmō mōnō imonte æncæte ante nāmā wepæ godonte ængā beyænque mōnō abæ tawænte quēwēmōmpa. Ayæ adobai tōmengā wepæ inte ñā mēnongacā beyænque ēñēnāmai mōnō cædō ante Wængongui nangui waadete pōnō cædinque ñupmo cæcā

quēwēmōimpa. ⁸ Tōmengā iñōmō edæ, Æbānō i, ante tōmānō ante nē ēñēnongā inte, Æbānō cæquīi, ante edæ nōingā ēñēninque mōnō beyæ ante godōmenque nangui pōnō cæcā æmōimpa. ⁹ Ayæ edæ, Codito tōnō guēa cædinque nāmā botō ānō bai cæte tocæboimpa, ante Wængongui angacāimpa. Tōmengā mānōmainō ante nānō wēmō iñōmō angainō ante mōnitō imōnite ñōwo edonque pōni odōmonte apænecā ēñēmōnipa. ¹⁰ Tōmengā, iñedē cæcæboimpa, āninque tōmengā nānō angaiñedē iñque ba ate tōmengā nānō angainō bai edæ iñque cæcæcāimpa. Edæ oōnædē ongoncoo tōnō inguipoga ongoncoo tōmancoo tē gæte māmō adocanque nempo Codito Awēnē nempo godōmo æncæcāimpa, ante cæcampa.

¹¹ Nāmā pōnente nānō angainō bai tōmānō ante adobai pōni nē cædongā inte Wængongui, ñimai cæcæboimpa, ante pōnente ate cōwē cæcampa. Inique tōmengā, Codito nempo quēwēnāni inānite æncæboimpa, ante nānō pōnente angainō bai cædinque, Mīnitō Codito nempo quēwēnguiīmīni incæmīnimpa, ante pōnēninque mōnitō imōnite apænte ængacāimpa. ¹² Mōnitō, Codito beyæ watapæ bacæimpa, ante tāno pōnēmōni iñōmōnite tōmengā, Botō ñāo ēmōnō ante watapæ apænemīni bacæmīnimpa, ante mōnitō imōnite pōnō apænte ængacāimpa.

¹³ Ayæ, Codito pōnō ængā beyænque mīnitō quēwencæminimpa, ante Wængongui watapæ nānō apænegainō ante ēñente pōnēninque mīnitō epeteomīni adobai Codito nempo quēwēmīni iñinipa. Wede pōnēmīni adinque Wængongui, Botō wēmīni iñinipa, ante edonque acæimpa, ante odōmoncæte ante tōmengā ēmōwo ante mīnitonga yewæmonte bai cædinque tōmengā Tæiyæ Waēmō Ōnōwoca ingante da pōnongā ænte ēwocamīnipa. ¹⁴ Edæ Wængongui, Botō quīmīni inōmīni inte mīnitō abæ tawænte mīni goyedē mīnitō ænguincōo māniñedē ate eyepæ pōni æncæmīnimpa, angampa. Inique tōmengā, Nō pōni impa, ante ēñencæmīnimpa, ante cædinque tōmengā Ōnōwoca ingante ñōwo da pōnongā ænte ēwocamōmpa. Inique pancacooga do ænte bai ēwocamō inte mōnō, ñincayæ ate mōnō tōmancoo ænguincōo impa, ante edonque ēñengæimpa. Tōmengā mānōmai cæcā adinque mōnō, Wængongui bitō godōmenque ñāo apāite bai bitō ēmounginque mānōmai cæbipa, ante watapæ apænecæimpa.

*Nō ēñēnāni bacædānimpa, ante Pabodo
apænecampa*

¹⁵ Botō iñōmō, Epeteoidi mōnō Awēnē Itota ingante wede pōnēnāni inānipa, ante tededāni ēñentabopa. Ayæ adobai, Wængongui quīnāni tōmānāni inānite

epeteoidi iñōmō waadete pōnēnāni inānīpa, ante ēñēnīmo inte, ¹⁶ botō ñimpo cædāmaī inte Wængonguī ingante cōwē waa ate pōnēninque apænebopa. Ayæ mīnitō beyæ ante cōwē apænebopa. ¹⁷ Itota Codito mōnō Awēnē iñongante Wængonguī iñōmō adocā Codito Wængonguī inongā ingampa. Ayæ nē Mæmpocā inongā inte tōmengā ñāō ēmōnongā ingampa. Tōmengā ingante apænedinque botō, Bitō Ōnōwoca ingante da pōnōmī æninque epeteoidi iñōmō nē ēñēnāni bacædānīmpa, ante apænebopa. Ayæ, Bitō Ōnōwoca pōnō odōmongā adinque epeteoidi wæætē Itota Codito ingante do ate bai ædæmō pōnecædānīmpa, ante botō mīnitō beyæ ante Wængonguī ingante cōwē apænebopa.

¹⁸ Wængonguī pōnō cæcā beyænque watapæ bacæīmpa, ante mīnitō pōnente tocæminīmpa, ante cædinque Wængonguī mīnitō imīnite aa pegacāīmpa. Ayæ adobaī, Mōnō tōmengā quīmō inte tæiyæ wæēmō bayōmonte tōmengā nānō godōmenque ñāō ēmonginque mōnō imonte ængacāīmpa. Mānīne mēnea edæ nāwangā inepa, ante mīnitō ēñecæminīmpa, ante botō, Wængonguī bitō tōmēnāni mīmōnē tica ēnente bai odōmonte apænebi ate do ēñecædānīmpa, ante Wængonguī ingante apænebopa. ¹⁹ Mōnō nē pōnēmō iñōmonte Wængonguī nānō pōnō cæquīnō ante tōmengā nānō tæī piñæmāmo æpodō ī, ante mōnō ædō cæte tee mante aquī. Incæte mīnitō, Mānīmāmo ante æpodō ī, ante epeteoidi ēñecædānīmpa, ante botō Wængonguī ingante apænebopa. Edæ, Tōmengā nānō tæī piñæmāmo iñōmō æbānō ī, ante ēñecæte ante mōnō, Tōmengā gomonga tæī piñænongā inte iīmaī cægacāīmpa, ante ēñengæīmpa.

²⁰ Nē tæī piñænongā inte Wængonguī angā ate mōnō Codito iñōmō do wæningā inte edæ do ñāni ōmæmongacāīmpa. Ayæ godōmenque tæī piñæninque Codito ingante ōōnædē ænte mæidinque Wængonguī tōmēmæ inō angā Codito tæ contagacāīmpa. ²¹ Edæ æcāmenque pedænguipoga iñonte mīnguipoga iñonte ñænanğā inte nē angā inaa, æcāmenque nē awēnē inaa, æcāmenque tæī piñænte onongā inaa, æcāmenque ingante, Awēnē ingampa, ante godō pemōnānī mānīnāni tōmānāni ōnōnānīque incædānīmpa. Mōnō Codito adocanque ingante ogæ æænonte bai cædinque Wængonguī angā ate tōmengā wæætē Tæiyæ Awēnē bacā acæīmpa. ²² Ayæ Wængonguī tōmāo iñōmō ongoncoo Codito ōnōwoca inō pōnō wææntodōninque edæ, Bitō edæ Tæiyæ Awēnē inōmi inte edæ æmonga pōnī ongoncæbiīmpa, angacāīmpa. Ayæ, Bitō imite godongāmæ nē pōnēnāni tōmēnāni Ocamō

bai iñōmite, ²³ tōmēnāni wæætē bitō baō bai adoyonque bai incædānīmpa. Codito ingante mānōmāinō ante apænedinque Wængonguī, Bitō nē Awēnē inōmi inte tōmāo iñōmō ongoncoo tōmancoo bitō nempo ongoncooque bacæīmpa. Ayæ bitō imite nē pōnēnāni iñōmō bacoo ināni yebæñāni iñinque bitō ēnempodō eyede pōnī bacæīmpa, ante Wængonguī Codito ingante pōnō cægacāīmpa.

2

Wængonguī nānō waadete pōnēnō beyænque quēwēmō

¹ Mīnitō guiquēnē wēēnēñedē ēñēnāmaī cæte quēwēmīni inte wēnæ wēnæ mīni cædō beyæ dobæ edæ wæwocāimīni ingaminīmpa. ² Nē inguipogaque ante pōnēnāni taadō adodō cægonte bai mīnitō māñīñedē edæ wēnæ wēnæ cæte quēwengaminīmpa. Ayæ wēnæidi tæī piñænte nāni owocabo awēmō iñōmō nāni cægōnō adodō gote bai mīnitō tōmēnāni awēnē mīñæ tee empote godinque wēnæ wēnæ cægaminīmpa. Nōwo incæ Wængonguī nānō ānō ante nē ēñēnāmaī cæte quēwēnāni guiquēnē adocā wēnæ awēnē nānō pōnēwēnō ante ēñente ēwocadinque cædānīpa. ³ Wēēnēñedē tōmēnāni tōnō godongāmæ quēwēninque mōnō tōmāmō adobaī imæcaque ante pōnēninque mōnō towēmāmoque ante quēwengamōīmpa. Quiēmenque ante townecæte ante mōnō cæinēwēnō ante cædinque mōnō ocaidē ædēmenque pōnēninque mōnō cæinēwēnonque cæte quēwengamōīmpa. Iñinque wadāni nāni tente wæquēñēnō bai mōnō adobaī imæcaque ante pōnente nē cæmō inōmō inte edæ Wængonguī nānō piinte panguēñēmāmo ante edæ do tente wæquēñēmō ingamōīmpa.

⁴ Mānōmaī ingaimō iñōmonte Wængonguī mōnō imonte nanguī waadete pōnēninque iīmaī nanguī waadedongā inte pōnō waa cægacāīmpa. ⁵ Mōnō ēñēnāmaī cægāinō beyæ ante wæwocate wæyōmonte tōmengā pōnō cæcā beyænque mōnō Codito tōnō godongāmæ quēwēmōmpa. Mīnitō edæ Wængonguī nānō waadete pōnō cægāinō beyænque quēwēmīni imīnīpa. ⁶ Wængonguī angā Codito ñāni ōmæmōñongā mōnō tōmengā tōnō godongāmæ ñāni ōmæmonte bai mīmō badinque quēwengamōīmpa. Ayæ mōnō tōmengā nempo quēwēmō iñōmonte Wængonguī iñōmō Itota Codito ingante ææntodōninque mōnō imonte ōōnædē ææntodonte Itota tōnō pōnō gōnongā tæ contate bai ongōmōmpa. ⁷ Mānōmaī Itota Codito nempo quēwēñōmonte Wængonguī iñōmō, Botō pōnō waadete cædinque godōmenque gomonga cæbo acædānīmpa,

ante cægacäimpa. Ayæ, Miinguipo badömo ate botó mänifedé ate odömömo adinque tömänäni, Wængongui nänö waadete pönö cæganca wadäni dicæ adoganca cædäniyaa, ante wæcædänimpa, ante cæcæte ante mänömai cægacäimpa.

⁸ Edæ Wængongui nänö waadete pönö cægainö beyænque minitö mini quëwënguinqe wede pönëmini baminitapa. Incæte minitö dicæ nämä mini cæinö beyænque nê wede pönëmini baminitawogaa. Wæætê edæ Wængongui pönongä æninque minitö nê wede pönëmini baminitapa. ⁹ Ìninqe, Nāmanque cæte quëwëmo aedäni, ante mönö edæ ānāmai ingæimpa. Ìnæmpa wīi mönö cædö beyæ quëwëmompä. ¹⁰ Edæ Wængongui nänö nê badongaimö ìnömö ìmopa. Ayæ, Codito nempo nê quëwënäni ìmai cædinque waa cæcædänimpa, ante tömengä wëenënedê mönö cæquënenö ante eyepæ badongacäimpa. Ìninqe mönö ìmonte badöningque tömengä, Codito Itota nempo quëwëninque minitö mini waa cæquënenö ante edæ cæte quëwëncæminimpa, ante pönö badongä bagamöimpa.

Codito beyænque ganccæ pönëmompä, ante

¹¹ Mänömai beyæ minitö, Doyedê ìmai ingatimpa, ante pönëdäni. Ood-eoidi ìnömö ònopoca æmontaique èö togæināni inte nāmanque ante edæ, “Nê èö togæimöni ìmönipa,” ante pemonte bai apænedänipa. Wæætê minitö ood-eomini ināmai nê èñagaimini ìñöminite, “Bagāamini ìminipææ,” ante mänināni pīwënäni wægaminimpa. Ìninqe minitö mänifedê æbānō ingaimini ìnömīni, ante yewämömo ate pönëdäni. ¹² Mänifedê edæ mönö Codito nempo quëwënāmai ingaimini inte minitö möni idægocabo nempo adobai edæ quëwënāmai inte nānēnê quëwëngaminimpa. Ìninqe Wængongui, Ìmai cōwê pönö cæcæboimpa, ante nänö angainö ante mönitö godongāmæ Ao ante èñente quëwëñöminite minitö wæætê gobæ nānēnê quëwëninque Wængongui nänö angainö ante edæ ænāmai ingaminimpa. Watapæ bacäimpa, ante mönitö pönēnō ante minitö ìñömö nānēnê quëwente ædö cæte watapæ pönente toquimīni. Gobæ quëwëninque minitö Wængongui nempo edæ quëwënāmai ingaminimpa. ¹³ Incæte minitö gobæ nê quëwënomini ìñöminite Itota Codito nämä wepæ godonte æninque minitö ìminite ænte māmongä eyequei pōni pōninque minitö ñowo tömengä nempo quëwëminipa.

¹⁴ Wëenënedê mönitö tönö minitö guëadó guëa cædömö ingaimö inte mönö, Nānēnê incæminimpa, ante wææ cæ impa tæcæguedê wææ gönonte bai cægamöimpa. Codito ìñömö nê piyænê cædongä inte, Wææ cæ impa, mönö ānopä bæ tate wido

cæte bai cædinque mönö ìmonte äāñömonque badongä bamöimpa. Ìninqe tömengä mīmönê nê piyænê cæte entawënongå ingä beyænque mönö adobai gānê pönëmompä. ¹⁵ Edæ Wængongui, Ìmai cæedäni, ante wade wade ante nänö wææ angainö ante èñëninque dodäni godömenque wææ angadänimpa. Mönö Codito ìñömö inguipoga pōninque mänine ante tömänö ante èñente cæte quëwëncäimpa. Ayæ, Idæwaa wææ ante impa, ante bai cædinque tömengä mänine ante nämä baonga mongænte wæninque tee moncate bai cægacäimpa.

Mänömai cædinque tömengä, Minitö mencaboga inte nānēnê quëwëmini incæte ñowo piyænê cæte botó nempo godongāmæ quëwëncæminimpa, ante cædinque mönö ìmonte ænte wempo cægacäimpa. Ìninqe mönö edæ piyænê cæte quëwënguinqe edæ äāñömonque bagamöimpa. ¹⁶ Itota Codito ingante awāa timpodäni wængä ìninqe tömengä mönö guëadó guëa pīinte cægaimāmo ante ænte mongænte wido cæte bai wængä beyænque mönö piyænê cæmō bagamöimpa. Ayæ ado tömengä awāa nänö wængainö beyænque mönö tömāmō adocabomō bamō adinque Wængongui wæætê piyænê cædinque mönö ìmonte Ao ãninque ængacäimpa. ¹⁷ Minitö guiquenê gobæ nānēnê quëwëñöminite mönitö guiquenê Wængongui weca eyequei quëwëñöminite Codito ìñömö inguipoga pōninque mönö tömāmō ìmonte apænedinque, Piyænê cæte gānê pönente quëwëedäni, ante pönö apæncæ èñentompä. ¹⁸ Tömengä nänö pönö cægainö beyænque möni oodeocabo adobai minitö wamini adobai mönö tömāmō Wængongui Òñowoca adowocaque ingante èwocamō inte mönö Wæmpocä weca tömāmō do pömompä.

¹⁹ Ìninqe mönitö Wængongui quimöni do bagaimöni inte Wængongui nempo quëwëmōni ingaimöni bai Codito nänö pönö cægainö beyænque minitö adobai mönitö tönö adocabomini do badinque edæ Wængongui nempo quëwëmini ìminipa. Ìninqe minitö ñowo idæwaa wamini ingaminimpa. Wīi wabæca quëwente bai edæ tömëmini oncönê ponte owote bai minitö ñowo Wængongui nempo quëwëminipa. ²⁰ Woadäni dica tāno gönöningque tānocca wænömënæca mænönāni bai Wængongui adobai cædinque Itota Codito ingante tāno gönongä ongöñongante tömengä godö mænonte bai cædinque mönö ìmonte ìmai cædinque pönö gönongä gongæmpompä. Codito nänö nê da godongaimöni tönö tömengä beyæ nê apænemöni tönö ìñöminite Wængongui mönitö ìmönite æninque wænömënæca gönongä gongæñöminite wadäni inānite gä æænö

tæi mænonthe bai gōnongā gongænanīpa. ²¹ Codito nempo quēwēñōmōnite Wængongui mōnitō imōnite adocooga gō cæte bai pōnō tæi mænongā ate mōnitō æicō bai bacō bai bamōnīpa. Edæ Wængongui Tæiyæ Wæmō Ōnōwoca ingante āanque bai ēwocadinque mōnitō godongāmæ Awēnē tæiyæ wæmō oncō bai bamōnīpa. ²² Bayōmōnite mīnitō adobai tōmengā nempo ongōñōmīnite Wængongui mīnitō imīnite æninque mōnitō tōnō godongāmæ māmō adocooga gō cæte tæi mænonthe bai cædinque, Mīnitō botō Ōnōwoca tōnō āawocaque bai ēwocadinque botō owoquincō bai bamīnīpa, ante pōnō badongacāimpa.

3

Oodeoidi ināmaī ināni inānite apæneccæ gotabopa, ante

¹ Mānīnō beyæ īlmaī ante apænebopa. Botō Pabodobo īñōmō Codito beyæ ante oodeomīni ināmaī imīni imīnite apæneccæte ante cæyōmote botō imote edæ tee mōnedāni wædōmo inte yewæmōmopa.

² Mīnitō oodeomīni ināmaī imīni īñōmō īlmaī ante wabānō ēñēmīnitawo. Wængongui pōnō angā ēñēninque botō mīnitō beyæ tōmengā nānō waadete cædōnō ante nē apænequēnēmo batabopa. ³ Mānīnō ante botō, Wængongui awēmō nānō cægāinō ante botō imote edonque odōmongā atabopa, ante do wædænque yewæmōmo amīnitawo. Edæ adodō ante ñōwo yewæmōmopa.

⁴ Īnīnque mānōmainō ante botō do yewæmōnīnta adīnque mīnitō, Mōnō Codito awēmō nānō cægāinō ante Pabodo do ate bai ēñengampa, ante ēñēmaīmīnīpa.

⁵ Mōnitō wæmæīdi nāni quēwēhedē nē quēwengānāni īñōmō, Mōnō Codito īncayæ ate pōninque æbānō awēmō cæquingāā, ante ēñēnāmaī inte wægādānīpa. Ñōwo guīquēnē Codito beyæ nē apænedāni tōnō mōnitō tōmengā nānō nē da godōnīmōni tæiyæ wæmō bamōni īñōmōnite Wængongui Ōnōwoca mānīnō ante edonque odōmōnte apæneccæ ēñēmōnīpa.

⁶ Īlmaī ante impa. Mōnitō Wængongui nānō pōnonguincō nē ænguīmōni īñōmōnite mīnitō oodeoidi ināmaī imīni inte mōnitō tōnō adocabomīni badīnque edæ mōnitō tōnō godongāmæ nē ænguīmīni adobai bamīnīpa. Ayæ, Itota Codito tōnō pōnō cædinque Wængongui nānō, Cōwē cæcæboimpā, ante angāinō do cægacāimpā, ante watapæ pōnēninque mīnitō mōnitō tōnō edæ godongāmæ quēwēncæmīnīpa.

⁷ Wængongui nē tæi piñænongā inte waadete pōnō nanguī cæcā adīnque edæ tōmengā beyæ nē cæbo badīnque botō Codito ingantedō ante nē watapæ apænebo batabopa. ⁸ Mōnō tōmāmō Wængongui

quīmō īñōmōnte botō īñōmō wamīni bai wīl īmopa. Botō adoboque wædāmo pōni imo incæte Wængongui waadete cædinque pōnō angā ēñēmo inte botō mīnitō imīnite nē apænebo batabopa. Codito nānō pōnō cægāinō ante æpodō ī, ante mōnō ædō cæte tee mante ēñenguī. Incæte Wængongui waadete pōnō cæcā beyænque botō īñōmō Codito waa pōni nānō pōnō cægāinō ante edæ oodeo ināmaī imīni imīnite nē apænequēnēmo batabopa. ⁹ Ayæ Wængongui tōmancoo nē badongāingā inte wēēñēhedē nānanque entawēninque awēmō nānō wē wodongāinō ante botō imote odōmōnte apæneccatapa. Ayæ, Pabodo mānīnō ante edonque odōmōnte apænequēnēngā ingampa, ante tōmānāni ēñēncædānīpa, ante pōnō apæneccæ æntabopa.

¹⁰ Codito ingante mōnō godongāmæ pōnencabo īñōmōnte tōmengā wadō wadō ante tōmānō ante nē ēñengāingā inte mōnō tōnō godongāmæ cæcampa. Mōnō tōnō mānōmaī cædinque tōmengā, Botō wadō wadō ante tōmānō ante botō ēñengāinō ante adīnque dōnædē quēwēnāni awēñēdi tōnō mānīñōmō nē ānāni tōnō wæcædānīpa, ante cægacāimpā. ¹¹ Wēēñēhedē pedæmāmo īñonte Wængongui, Cæbo ate awēñēdi incæ wæcædānīpa, ante cōwē pōnengacāimpā. Ñōwo īñōmō tōmengā mānīnō ante nānō pōnengāinō ante tōmengā mōnō Awēnē Itota Codito tōnō godongāmæ cædinque do cægacāimpā. ¹² Codito nempo nē quēwēmō inte mōnō tōmengā ingante wede mōnō pōnēnō beyænque guīñēnāmaī inte Wængongui weca do pōninque apænemopa. ¹³ Mānōmaī impa, ante edæ mīnitō do ēñēmīnīpa. Īnīnque botō mīnitō beyæ ante cædinque botō caate wædō ante pōnēninque mīnitō wæætē wædāmaī iedāni. Wæætē, Mōnitō godōmenque ñāō bai ēmoncæmōnīpa, ante Pabodo caate wæcampa, ante pōnēninque mīnitō wædāmaī incæmīnīpa āmopa.

Codito nānō pōnēnō ante

¹⁴ Mānīnō beyæ mōnō Awēnē Itota Codito Wæmpocā īñongante botō tōmengā ōnōwaca inō da guicapodīnque apænebopa.

¹⁵ Tōmengā īñōmō edæ adocanque nāwā Wæmpocā ingampa. Īnīnque inguīpoga quēwēmō incæ dōnædē quēwēnāni incæ tōmengā ingante, Mæmpo, ante nē tedemō īñōmō mōnō tōmengā tōnō mōnō wæmpocabo bai īmopā.

¹⁶ Īnīnque mōnō Wæmpocā ingante apænedīnque botō mīnitō beyæ ante īlmaī ante apænebopa. Wængongui bitō nē ñāō bai entawēmi inōmi inte bitō Tæiyæ Wæmō Ōnōwoca ingante epeteoidi inānite da pōnōmi æninque tōmēnāni wæætē edæ

mīmō tæi piñænte entawencædānīmpa, ante apænebopa. ¹⁷ Ayæ, Mōnō Codito adobai mīnitō weca pōñongante mīnitō mīmōnē wede pōnēninque tōmengā ingante ædæmō entawencæmīnīmpa, ante mōnō Wæmpocā ingante apænebopa. Ayæ, Awæ ædæmō guiwa inte tōmēmæ āwāate pæwæ bai cædinque mīnitō iñōmō adobai tōmengā nānō waadete pōnēmāmo entawēninque edæ mīmōnē tæi ongōmīni bacæmīnīmpa. ¹⁸ Ayæ mōnitō Wængonguī quīmōni tōnō mīnitō adocabomīni inte tæi piñæmīni badinque, Itota Codito nānō waadete pōnēnō ante ægancadō owoō, ante ēñencædānīmpa, āmopa. Ayæ, Tōmengā nānō waadete pōnēnō iñōmō edæ yepanca pōni owopa, oopānō pōni owopa, æibæ pōni owopa, wīncamō pōni owopa, ante ēñencædānīmpa, ante apænebopa. ¹⁹ Ayæ edæ, Mōnō Codito waadete nānō pōnēnō æbānō gomonga pōni owōō, ante mōnō ædō cæte ēñenguī, ante mōnō wædō incæte mīnitō mānīnō ante ēñencæmīnīmpa. Ayæ edæ, Mānīnō ante ēñēmīni inte mīnitō Wængonguī nānō nanguī entawēnō edæ eyepæ pōni entawencæmīnīmpa, ante botō mōnō Wæmpocā ingante apænebopa.

²⁰ Mōnō ānō ante ayæ mōnō pōnēnō ante eyepæ cædongā inte Wængonguī iñōmō mōnō imonte tæi piñænte nānō cæpāmo ganca cædinque nanguī gomonga cæcā ingampa. Īninque ñōwo iñōmō mōnō Wængonguī ingante waa ate pōnente apænecæīmpa. ²¹ Edæ do wænte ægāināni tōnō ayæ ate ēñate quēwenguīnāni tōnō mōnō tōmāmō Codito ingante godongāmæ mōnō pōnencabo iñōmō inte Itota Codito ingante ēwocadinque mōnō godongāmæ apænecæīmpa. Mæmpo Wængonguī ēñēmi. Bitō adobique ñāō ēmongāimi iñōmi ĩmpa, ante mōnō ñīmpo cædāmāi inte cōwē waa ate apænecæīmpa. Mānōmāi ĩmpa, ante botō, Amēē, āmopa.

4

Codito nempo quēwēninque adocabomō ĩmopa

¹ Waa cæte quēwencæmīnīmpa, ante Wængonguī aa pecantapa, ante ēñēmīni inte mīnitō tōmengā nānō ānonque ante ēñente cædinque quēwencæmīnīmpa. Botō mōnō Awēnē beyæ tee mōnete wæcōmo incæ āmo ēñēdāni. ² Mīnitō nāmā ængō cædāmāi inte, Ōnōmoque bai ĩmpa, ante pōnēninque wadāni inānite edæ ædæmō cæedāni. Æiquedō waa cæquināni, ante wædāmāi inte edæ piyænē cæte quēwēdāni. Ayæ wadāni mīnitō ĩmīnite wēnæ wēnæ cædāni wædinque tōmēnāni inānite wæætē piñāmāi inte ædæmō waadete cæedāni. ³ Mīnitō, Mōnō pōnencabo piyænē cædinque cōwē adodō ante pōnente edæ Wængonguī

Ōnōwoca tōnō ānque bai ee ēwocacæīmpa, ante nanguī cædinque wacā ingā wacā ingā edæ waa cæedāni.

⁴ Mōnō Awēnē pōnō cæcā ate watapæ bacæīmpa, ante mīnitō adodeque ante pōnente tocæmīnīmpa, ante Wængonguī mīnitō ĩmīnite edæ adodeque ante aa pegacāīmpa. Īninque mānīne, Watapæ bacæīmpa, ante mīni pōnēne adodeque ĩ bai Wængonguī Ōnōwoca edæ adobai adowocaque inte quēwengampa. Tōmengā adowocaque nempo quēwēnōmō inte mōnō adobai edæ adocabomonque iñōmō ĩmopa. ⁵ Mōnō Awēnē edæ adocanque pōni inongā ĩñongante tōmengā ingante mōnō wede pōnēnō adobai adodeque pōni ĩnepa. Ayæ adodō ante pōnēninque æpænē guīdinque mōnō adopænēnque guite bai guītamōmpa. ⁶ Wængonguī adocanque pōni inongā inte tōmengā tōmāmō Wæmpocā adocanque ingampa. Tōmengā iñōmō edæ Tæiyæ Awēnē pōni inongā inte tōmāmō imonte nē aacā ingampa. Tōmengā adocanque pōni nempo quēwēñōmōnte tōmengā wæætē mōnō tōmāmō mīmōnē quēwengampa.

⁷ Incæte mōnō Codito, Mīmōnē bitō entawenganca ænte cæe, ante tee mante bai cædinque adocanque ingante waadete pōnō cædinque wacā ingante waadete pōnō cædinque edæ tōmāmō imonte tōmengā nānō pōnō cæcōo eyepæ pōnongā ænīnque entawēmōmpa. ⁸ Codito mānōmāi cæcæcāīmpa, ante pōnēninque awēnē Dabii wodi ĩmāi ante yewæmōngacāīmpa.

“Tōmengā æibæ æicæ cædinque wadāni inānite bæi ongōnte ñā cæyænte tōmengā mīñæ ænte mæicā æigadānīmpa.

Ayæ æīdinque tōmengā mōnō waocabo ĩñōmōnte, Mīnitō entawenguīnō, ante eyepæ pædæ pōnongā ænte entawengamōīmpa,”

ante Dabii nānō yewæmōnte angāinō bai ĩmpa.

⁹ Mānīne, “Æigacāīmpa,” ante nāni angāine iñōmō quīnante yewæmōngatī. Edæ, Tōmengā ĩnguipoga tadōmengadē do wæænīngā inte æigacāīmpa, ante odōmoncæte ante yewæmōngatīmpa. ¹⁰ Nē wæænīngā inongā iñōmō adocā do ōdnædē gōmōga æīdinque ĩnguipoga tōmāo ōdnædē tōmāo tōmāo iñōmō edæ godōmenque æibæ pōni quēwēngā inongā ingampa. ¹¹ Tōmengā tōmancoo nē ēnemōcā inongā inte adocā mōnō waomō imonte pōnō angā ænte entawēninque mōnō ĩmāi cæmō bamōīmpa. Pancamōniya ĩmōnite tōmengā angā ēñēninque tōmengā nānō nē da godongāimōni batāmōniya. Pancamōniya guīquēnē Wængonguī waa pōni nānō pōnō

cægainō ante nē apænemōni batamōnīpa. Pancamōniya guiquēnē Wængonguī beyæ nē apænemōni batamōnīpa. Pancadāniya guiquēnē nē aadāni badānitapa. Ayæ pancadāniya guiquēnē nē odōmonte apænēdāni badānitapa. ¹² Mānōmaī pōnō cædinque mōnō Codito mōnō ocamō bai inōngā inte, Botō baō bai adoyonque bai ināni iñōmō ñancæ āate bai tæi piñænāni ēwocacædānīmpa, ante pōnō cægacāmpa. Mōnō imonte tōmengā, Mīnitō Wængonguī quimīni inōmīni inte tōmānāni inānite nē cæmīni inte godō cæcæmīnīmpa, ante pōnō cægacāmpa.

¹³ Mīni wede pōnēnō ante mīnitō tōmāmīni adoyōmō ante pōnencæmīnīmpa, ante mōnō Codito pōnō cægacāmpa. Ayæ, Botō Wængonguī Wēmō iñōmote mīnitō botō imote ate bai pōnencæmīnīmpa, ante tōmengā pōnō cæcampa. Ayæ æmæwo pæmīni bai mīni baquinque mīnitō botō entawēnō ædæmō entawencæmīnīmpa, ante Codito edæ da pōnōngā eyepæ æmōmpa. ¹⁴ Inīnque æmæwo pædimō inte wēñæmō ināmaī imō inīnque mōnō edæ oda cædāmaī ingæīmpa. Wadāni guiquēnē mā pōnēninque, Æbānō cæmō ate oda cæquināni, ante edæ nāmānæte tedewēnānīpa. Tōmēnāni iñōmō edæ babæ cæcæte ante cædinque waa cæte bai cædāni ataqeedāni. Woboyæ ædæ go ædæ go pæmænte bai cædinque tōmēnāni wadō ante odōmonte tedewēnānīpa. Mānōmaī wido piñænte bai cædāni incæte mōnō iñōmō Codito nānō entawēnoncoo ænte entawēninque āā mænāmaī ingæīmpa.

¹⁵ Wæætē Wængonguī, Nāwangā pōnī impa, ante nānō apænægāinō ante mōnō tōmānāni inānite waadete pōnēninque apænecæīmpa. Mānōmaī cædinque mōnō Codito baō bai iñōmonte tōmengā nē Ocamō bai inte pōnō angā beyænque mōnō ñancæ āadinque godōmenque picæmō bamōmpa. ¹⁶ Mōnō baonga wepæ eyepæ ēñadinque ñancæ āadinque tæi piñænte pæte quēwēmōmpa. Adobai mōnō Codito baō tōnō adoyonque bai inōmō inte mōnō tōmengā nānō apænēdō ante ēñēnōmo inte ñancæ āate pæte bai quēwēmōmpa. Ayæ wæætē ocai encamō inte mōnō pæ pagænguinque wangō tēnāmaī ougincāi bamē impa. Ayæ adobai mōnō Codito nānō waadete pōnēnō ante mīmōnē entawēmō inte mōnō wacā ingā wacā ingā godō aamō inte mōnō pōnencabo incæ edæ tæi piñænte entawēmōmpa.

Codito nempo mōnō iūmaī quēwēmōmpa, ante

¹⁷ Inīnque mōnō Awēnē nempo quēwēnōmo inte botō nō āmo ēñēdāni. Wadāni nē ēñēnāmaī ināni ōnonquedō ante pōnēninque quēwēnānīpa. Mīnitō

guiquēnē adobai quēwēngāimīni inte ñōwo wæætē ñimpo cædinque mānōmaī cædāmaī inguēnē quēwēmīni. ¹⁸ Tōmēnāni guiquēnē mīmō ēñēnānīpa diyæ Wængonguī weca ponguināni. Mīmō ōmædēnāni inte tōmēnāni ocai ēñēnāmaī badāni beyænque Wængonguī weca pōnāmaī inānīpa. Edæ wentamō mongæninque tōmēnāni ocai wēmō encadāni inte idiquibæ ante pōnēnānīpa. ¹⁹ Ināni iñōmō tōmēnāni nāni cæquēnēnō ante ñimpo cædinque ñōwo wæætē guñēnāmaī inte baō nāni towēinēnō ante cæcæte ante nāmā pædæ godonte bai edæ cædānīpa. Edæ, Quiēmē wīwa cæquī, ante māninonque cæcæte ante godōmenque cæinente wædānīpa.

²⁰ Wæætē mīnitō guiquēnē, Mōnō Codito æbānō ingāā, ante pōnēninque edæ wīl tōmēnāni nāni cæinēwēnō bai mīni cæquinque edæ pōnēmīnitapa. ²¹ Tōmengā apænecā edæ wīl ēñēmīnitawo. Ināmpa, Wængonguī nō pōnī nānō apænægāinō ēñēninque Itota iñōmō mīmōnē entawengampa, ante mīnitō tōmengā nempo quēwēñōmīnīte tōmengā mānōmaīnō ante adodō ante edæ do odōmonte apænecā ēñēmīnitapa. ²² Mīnitō wēñēñedē mīni cæte quēwēngāinō ante tōmengā iūmaī ante odōmonte apænecāīmpa. Babæ pōnente mīni cæinente wæwēnō beyæ mīnitō mīmōnē wentamō mongænte wæwēmīni inte do mīni entawēngāinō ante edæ wido cædāni, ante odōmonte apænecāīmpa. ²³ Edæ mempoga ēñagāimīni inte mīnitō ēñēnō do mīl pōnī encamīni inte mīlnonque ante pōnencæmīnīmpa, ante odōmonte apænecā ēñēmīnitapa. ²⁴ Ayæ, Botō pōnō badōmo ate mīnitō botō bai tæiyæ wæmō ēwocadinque nō pōnī cæte quēwencæmīnīmpa, ante Wængonguī pōnō badongā ate mīnitō mīmīni bagamīnīmpa. Inīnque tōmengā, Mānīnō Wængonguī nō pōnī nānō entawēnō æninque mīnitō ædæmō entawencæmīnīmpa, ante odōmonte apænecā do ēñēmīnitapa.

²⁵ Mānōmaī beyæ mīnitō tōmāmīni, Mōnō adocabomō imōmpa, ante adinque babæ mīni tedewēnīnō ante ñimpo cædinque wacā ingante wacā ingante nāwangā ante apænēdāni.

²⁶ Ænguī bamīni incæte mīnitō piyænē cædinque wacā ingante wēnæ wēnæ cædāmaī ee aedāni. Edæ gāwadecæ ganca nanguī piīninque edæ mīni wæquinque imaimpa. ²⁷ Mānōmaī cædinque mīnitō, Wēnæ incæ pōnō cæcā ate botō ænguī batabopa, ante pōnente wædinque ñōwo wæætē, Wēnæ botō weca pōnāmaī incæcāmpa, ante nāmā wææ cædāni.

²⁸ Nē awēmō æningā iñōmō ñōwo edæ ee cædinque awēmō ænāmaī incæcāmpa.

Wæætē, Botō ōnompoca nanguī cædinque ænte quēwēninque nē ænguēnēnāni Inānite adobaī godōmo æncædānimpā, ante cæcæcāimpā.

²⁹ Minitō nāmā ōnōne wææ aadinque wīwa ante tededāmaī iedāni. Wæætē edæ, Wadāni æbānō ante ēñguēnēnāni Ināni, ante pōnēninque mīnitō, Tōmēnāni tæī piñænte entawencædānimpā, ante cædinque nē ēñēnāni beyænque ante waadete godō cædinque apæneedāni. ³⁰ Wængonguī Tæiyæ Waēmō Ōnōwoca iñōmō mīnitonga pō guindinge, Botō āmo beyænque mīnitō iñcayæ ate æmæwo abæ tawænte gote bai quēwencæmīnimpā, ante odōmoncæte ante yewæmonte bai cægacāimpā. Inique mīnitō, Wēnæ wēnæ mōni cædō beyæ ante Wængonguī Ōnōwoca wæwente badāmaī iñcæcāimpā, ante wææ cædinque edæ ēñente cæedāni.

³¹ Ayæ, Wīi waēmō awædō, ante mīni piūwēnīnō ante edæ ñimpō cæedāni. Āimō ante mīni pōnēwēmāmo adobaī ñimpō cædinque ænguī pōni mīni badimāmo edæ ñimpō cæedāni. Yæ ante mīni piinte ogæ tedewēmāmo, wacā ingante ante mīni piinte tedewēmāmo edæ ñimpō cæedāni. Ayæ piinte cæquinque ante mīni entawēnīnō ante tōmānō edæ wido cæedāni. ³² Wæætē godongāmæ waadete cædinque wacā caate wæcā adinque mīnitō godongāmæ Ca ca wæcæmīnimpā. Ayæ Codito ængā beyænque Wængonguī mīnitō imīnite pōnō ñimpō cæcampa cæmīni. Tōmengā ñimpō cæcā quēwēmīni bai mīnitō adobaī cædinque wadāni wēnæ wēnæ cæyōnānite wacā ingā wacā ingā ñimpō cæmīni quēwēnāni.

5

Wængonguī wēmīni, iīmaī cæte quēwēedāni, ante

¹ Inique Wængonguī wēmīni iñōmō mīnitō tōmengā nānō nē waademīni inōmīni inte Wæmpocā nānō cæī bai ante cōwā adinque adobaī cæedāni. ² Baō, Wængonguī quī, ante godōninque, Oguī wacæimpā, ante iya tānāni bai cædinque Codito mōnō imonte waadete pōnēninque edæ adobaī cægacāimpā. Tōmengā iñōmō, Botō Wængonguī quīmo imopa, ante nāmā wepæ pædæ godōninque mōnō imonte wæætē ængacāimpā. Inique tōmengā nānō waadete pōnēnō bai mīnitō adobaī waadete pōnēninque quēwēedāni.

³ Wæætē edæ mīni pōnencabo iñōmīnite waocā adocanque incæ nānōogængā Ināmaī iñongante godō guēa mōnāmaī iedāni. Wentamō mongæ wææ wæ, ante edæ wīwa cædāmaī iedāni. Nanguī māincoo ante æinente wædāmaī iedāni. Mānīnō tōmānō cædāmaī imīni inte mānīnō ante edæ adopoque incæ tededāmaī imæwedāni.

Edæ Wængonguī quīmīni tæiyæ waēmō entawēmīni inte mīnitō mānīnō tōmānō cædāmaī incæmīnimpā. ⁴ Wentamō ante nāni pōnēwēnō bai mīnitō wæætē adobaīnō ante pōnēnāmaī iedāni. Ōnonque ante nāni tedewēnō bai mīnitō wæætē adobaī tededāmaī iedāni. Wēnæ wēnæ ante pōnente nāni badete towēnō bai mīnitō wæætē adobaī badete todāmaī iedāni. Iñæmpā Wængonguī quīmīni inōmīni inte mīnitō mānīnō ante wīi pōnenguēnēmīni imīnimpā. Wæætē Wængonguī ingante waa ate pōnēninque apænequēnēmīni imīnimpā.

⁵ Awēnē Odeye Wængonguī nempo ayæ Awēnē Odeye Codito nempo edæ ædānidō nē guite ænguīnāni ināni. Nānōogængā Ināmaī iñongante nē towēnāni tōnō wentamō pōnente nē cædāni iñōmō tōmēnāni edæ dicæ guite ænguīnāniyaa. Ayæ māincoo ante wacā qui nē æinente wæwēnāni iñōmō edæ, Māincoo incæ mōnītō wængonguī impā, ante bai cædāni inōnāni inte tōmēnāni adobaī edæ guite ænāmaī incædānimpā. Ante āmo ēñēedāni. ⁶ Wadāni, Mīnitō oda cæcæmīnimpā, ante ōnonquedō ante tedete cæyōnānite mīnitō wæætē tōmēnāni nāni tededō ante edæ ēñēnāmaī iedāni. Edæ tōmēnāni ēñēnāmaī inte nāni wēnæ wēnæ cædō beyæ Wængonguī ænguī badinque tōmēnāni Inānite pancæcāimpā. ⁷ Inique mīnitō gooque gomō adinque tōmēnāni tōnō godongāmæ cædāmaī iedāni.

⁸ Mīnitō iñōmō wēēñēfēdē wentamō mongæmīni ingaīmīni inte ñōwo wæætē edæ mōnō Awēnē nempo quēwēninque edæ ñāō bai entawēmīnimpā. Inique Mæmpo nānō ñāō ēmōnō bai entawēmīni inte mīnitō ñāō iñōmō cægonte bai edæ waa quēwēedāni. ⁹ Edæ waiwæ waincate bai cædinque mōnō wadāni Inānite godō waa cæquinque mōnō edæ ñāō iñōmō quēwēmompā. Ayæ nō pōni mōnō cæquinque nāwangā pōni ante mōnō apænequinque edæ ñāō iñōmō quēwēmompā. ¹⁰ Ayæ, Æbānō cæmō ate mōnō Awēnē, Waa cæmīni abopa, ante apænequingā, ante ēñencæte ante cædinque dō ēñēnīmi inte tōmengā nānō waa adonque cæedāni. ¹¹ Wadāni wēmo iñōmō ōnonque nāni cædō ante adinque mīnitō iñōmō edæ gooque gomō aedāni. Ayæ tica ēnente bai cædinque, Tōmēnāni nāni cædō wēnæ wēnæ impā, ante edonque odōmōmīni acædānimpā. ¹² Awēmō nāni cædō beyæ guingo imonte wæquēnēnāni iñōnāni mōnō iñōmō edæ guīñēnete wædinque mānīnō ante edæ tededāmaī ingæimpā. ¹³ Wæætē edæ, Awēmō iñōmō æbānō cædāni, ante tōmānō ante edæ tica ēnente edonque acæimpā. ¹⁴ Ñāō beyænque edæ edonque amompā. Mānōmaī i beyæ iīmaī ante āmotamīni ante bai apænedānimpā.

“Bitō wangæ möimi inte ñāni ömæmonte ængæ gantie.

Edæ ængæ gantiyömite

Codito incæ pönö tica ënente bai cæcä ate ñāö entawencæbiimpa,” ante apænedänipa.

¹⁵ Mänömai beyæ minitö ocai ömæcamini inämai inömini inte wæætê ocai në encamini inte cædinque, Æbänö waa cæte quëwenguimo, ante nämä waa ate waa cæedäni. ¹⁶ Wadäni ñöwo incæ godömenque wiwa cædänipa cæminii. Eyepæ iñonte mini cæquëñenonque ante edæ do cæedäni. ¹⁷ Edæ wëñænäni owempote cædäni bai minitö adobai cædämai iedäni. Wæætê, Wængongui æbänö angantawo, ante ëñëninque mäninonque ante ëñente cæedäni. ¹⁸ Waodäni biinömmæ näni ämæ bedinque dowænte badinque godömenque pönëñämai cædinque tömëñäni näni ewente wæwenguinque bewëñänipa. Ìninqe minitö iñömö bete dowænte badämai iedäni. Wæætê Wængongui Öñowoca ingante ædæmö ewocate quëwëedäni. ¹⁹ Ämotamini ante bai godongämæ watapæ ante tedeedäni. Awënë Dabii wodi nänö ämotamini angaintaa adinque edæ adodö äedäni. Ayæ minitö nämä mä pönëninque, Ìimai Wængongui beyæ mönö ämotamini angæiimpa, ante adodö äedäni. Wængongui Öñowoca angä ëñente ewocadinque tömengä ämotamini nänö äñönö ante adodö äedäni. Mímöno ämotamini ante bai pönëninque minitö mönö Awënë ingante watapæ pönente äedäni. ²⁰ Æbämê bayonte minitö tömänö beyæ ante edæ Mæmpo Wængongui ingante cöwê waa ate pönëninque mönö Awënë Codito emöwo ante apæneedäni.

Mæmpoidi näni wencabo ïimai quëwencædänimpa

²¹ Mönö Codito ingante guñente wædinque munitö wii nämä mini pönënonque bai cædinque wæætê edæ, Nê äñäni æbänö äñäni, ante Ao ate nöinö ante cæedäni.

²² Onquiyæmini ëñëedäni. Minitö, Mönö Awënë nänö angainö bai mönö ëñente cæcæiimpa, ante tömëmini nänöögænäni inänte Ao ante ëñente cæedäni. ²³ Edæ Codito ingante mönö godongämæ pönencabo iñömonte mönö Codito adocä iñömö, Quëwencæminimpa, ante në Ængaingä inongä ingampa. Tömengä tönö mönö adoyonque bai iñömonte tömengä iñömö mönö Ocamö bai inongä ingampa. Ayæ onquiyængä tönö onguiñængä adobai adoyonque bai iñömate onguiñængä iñömö në ocamö bai inongä ingampa. ²⁴ Ìninqe Codito ingante mönö godongämæ pönencabo incæ tömengä ingante Ao ante ëñente cæmö bai onquiyænäni adobai tömëñäni

nänöögænäni inänte cöwê edæ Ao ante ëñente cæquëñenäni inänipa.

²⁵ Wæætê onguiñæmini ëñëedäni. Minitö Codito nänö waadete pönëñö bai tömëmini nänöögænäni inänte adobai waadete pönëedäni. Tömengä ingante mönö godongämæ pönencabo iñömonte tömengä iñömö mönö imonte waadete pönëninque mönö imonte æncæte ante pönö cædinque nämä wepæ godongacäimpa. ²⁶ Ayæ, Wængongui nänö apænedö waëmömmæ imæ bai iñonte minitö iñömö mäninö ante ëñëninque tæiyæ waëmö ewocate quëwencæminimpa, ante mönö Codito adocä mönö imonte edæ ñä mënongate bai cægacäimpa. ²⁷ Mänömai tæiyæ waëmö badinque mönö wentamö mongænämai inte Codito ingante mönö pönencabo adocabomö iñömonte tömengä iñömö edæ nänöögængä ænte bai cædinque mönö pönencabo imonte, Bitö, ante apænegacäimpa. Ayæ mönö cabo iñömonte tömengä, Bitö idiquibæ entawëñämai iñömite ædö cæte bitö imite piinte angui, ante pönö cægacäimpa. Ayæ wæætê edæ, Nä mënongate bai tæiyæ waëmö emömi ininqe mönö edæ guëä ñāö apäite bai emongæiimpa, ante Codito nänöögængä ænte bai mönö imonte pönö ængacäimpa.

²⁸ Onguiñænäni iñömö adobai tömëñäni, Botö baö, ante näni pönê bai tömëñäni nänöögænäni inänte adobai waadete edæ pönenguëñenäni inänipa. Æcänö tömengä nänöögængä ingante waadete pönëna iñömö tömengä nämä baö ante waadete pönente bai edæ cæcampa. ²⁹ Ìñæmpa waocä nämä baö cöwê piinämai ingampa. Wæætê, Botö baö, ante edæ pæ gompodinque pönö aacampa. Ayæ adobai Codito ingante mönö godongämæ pönencabo iñömonte edæ tömengä adobai, Botö baö, ante bai cædinque mönö imonte wææ gompodinque pönö aacampa. ³⁰ Edæ mönö Codito në Ocamö bai inongä inte në angä iñongante mönö wæætê tömengä tönö adoyonque bai inte ëñente quëwëmompä. ³¹ “Mänömai beyæ onguiñængä mæmpo tönö badä inate emö cæte godinque onquiyængä ingante, Botö nänöögængä, ante æmæwo monte quëwencæcäimpa. Mënaa inäna incæ tömëna wæætê näna gæncaya badinque adocanque bai bacædäimpa,” ante yewæmongatimpa.

³² Mänömainö ante näni yewæmongainö ante edæ wê wodonte bai i iñonte wii tömänö ante ëñëmompä. Incæte, Codito ingante mönö godongämæ pönencabo iñömonte mönö tömengä tönö adocanque bai imöiimpa, ante minitö ëñencæminimpa, ante botö apænetabopa. ³³ Incæte onguiñæmi nämä bitö waadete pönënonganca tömëmi nänöögængä ingante edæ adoganca

waadete pönencæbiimpa. Onquiyæmi adobaī, Botō nānōgængā ingampa, ante adinque edæ ēñente cæcæbiimpa.

6

¹ Wēñæmīni guiquēnē ēñēedāni. Mīnitō mōnō Awēnē nempo quēwēnōmīni inte tōmēmīni mæmpoidi inānite edæ ædæmō ēñente cæedāni. Æcānō edæ mānōmai cædaa tōmengā edæ nō pōni cæcampa. ² “Wæmpocā ingante wāānā inante waa adinque tōmēna inate godō waadete cæe,” ante Wængonguī incæ wææ angacāimpa. Tōmengā wade nānō wææ angāinō āninque, Mīni waa quēwēnguīnque cæcæmīnimpā, ante apænedāmai ingaingā inte ñōwo īne ante wææ āninque, Mīni waa quēwēnguīnque cæcæmīnimpā, ante mā apænegacāimpa. ³ Edæ īne ante wææ āninque tōmengā, “Mānōmai cæmīni īninque mīnitō watapæ quēwēnīnque īmæca wantæpiyæ quēwēncæmīnimpā,” ante mā apænegacāimpa.

⁴ Wæmpomīni guiquēnē ēñēedāni. Mīnitō wēñāni wīl ālnāni bacædānimpā, ante wææ cædinque mīnitō tōmēnāni inānite pīinte cædāmai ledāni. Wæætē, Mōnō Awēnē wææ aadinque mōnō imonte pāninque odōmonte apænegacampa, ante adinque mīnitō tōmengā nānō cæi bai adobaī cædinque wēñæñāni inānite ædæmō wææ aadinque mōnō Awēnē nānō apænedō ante odōmonte apænemīni ate tōmēnāni waa pæcædānimpā.

⁵ Woadāni mīnitō imīnite ō ænāni inte tōmēnāni beyænque cæte nē quēwēmīni īñōmīnīte apænebo ēñēedāni. Īmæca mīnitō awēñēidi inānite mīnitō waa adinque guīñente wædinque tōmēnāni nāni ānō ante ēñente cæedāni. Mīnitō Codito angā ēñente mīmōnē nō pōnente cæmīnitawo. Īninque edæ īmæca awēñē angā ēñente edæ adobaī mīmōnē nō pōnente cæedāni. ⁶ Mīnitō edæ, Awēñē botō imote waa cacæcāimpa, ante tōmengā ayongante ēñente cæmīnitawo. Īñæmpa awēñē dæ goyongante adobaī cōwē ēñente cæedāni. Codito botō imote nē godonte Ængaingā ingante nē cæte quēwēmō imompa, ante pōnēninque mīnitō edæ Wængonguī nānō ānōnō ante mīmōnoque pōnente cæedāni.

⁷ Mīnitō mīmōno piyænē cædinque īmai ante pōnente cæedāni. Īmæca awēñē ingante cædinque botō wīl waocā beyænque ante cæbopa. Wæætē Wængonguī Awēñē beyænque ante botō īmæca awēñē ingante cæbopa, ante pōnēninque pæ piñænte bai cæedāni. ⁸ Mīnitō īmai ante edæ do ēñēmīnīpa. Mīnitō wacā nānō ō ænīmīni inte tōmengā beyænque nē cæte quēwēmīni incæ abæ tawænte ee gote bai nāmā beyænque cæte quēwēmīni incæ mīnitō imīnite mōnō

Awēñē īñōmō, Bitō ægancadō waa cæbii, ante adinque wæætē eyepæ pōni pædæ pōnongā ænguīmīni imīnīpa.

⁹ Waocā ingante nē ō æmīni guiquēnē ēñēedāni. Mīni nē ō ængaināni inānite adobaī waa cæedāni. Tōmēmīni Awēñē incæ tōmēnāni Awēñē adocā inongā inte ōōnædē owocampa cæmīni. Tōmengā īñōmō wacā ingante wadō wacā ingante wadō ate pōnente cædāmai ingampa. Mānōmainō ante do ēñēmīni inte mīnitō beyænque cæte nē quēwēnāni inānite edæ pīinte āninque edæ pæmēnēnāmai ledāni.

Tæinta wēñate bai mōnō tæi piñænte ēwocacæimpa

¹⁰ Nōwo īmai yewæmōninque botō idæwaa yewæmōmopa. Mīnitō mōnō Awēñē nempo nē quēwēnōmīni īñōmīnīte tōmengā nānō tæi piñæno pædæ pōnongā æninque tæi piñænte entawente quēwēedāni. ¹¹ Mīnitō wææ caaquincoo, ante Wængonguī eyepæ pōni nānō da pōnōnīncoo tōmancoo æninque wēñate bai cædinque tæi ongōedāni. Edæ mānincoo tōmancoo wēñate ongōñōmīni wēñæ awēñē, Oda cæcæmīnimpā, ante nanguī ēñente cæcā incæte mīnitō wæætē oda cædāmai inte edæ tæi ongongcæmīnimpā.

¹² Edæ wīl waodāni inānite mōnō guēadō guēa cæcæimpa. Wæætē wēñæidi awēñēidi tōnō wēñæidi inānite nē ānāni īñōnānīte mōnō tōmēnāni inānite wæætē guēadō guēa cæcæimpa. Inguipoga wēmō īñōmō tæi piñænte ēnempodāni tōnō ōōnædē īñōmō wēñæcoo nē wīwa ēwocate cædāni tōnō mānīmpodāni māmō ti gotodoncæ cæyōnānīte mōnō wæætē guēadō guēa cæcæimpa. ¹³ Īninque tōmēnāni pīinte māmō nāni wīwa cæōnæ īnque bayonte mōnō wodii wīnōnāmai inte tōmēnāni inānite wæætē da godongæimpa. Ante ayæ, Tōmāā edæ eyepæ cæte ate mōnō edæ tæ go wæænāmai inte adiyæ ongongæimpa, ante cædinque mīnitō Wængonguī nānō, Wææ caaquincoo, ante tæinta bai nānō da pōnōnīncoo edæ do eyepæ æninque tōmancoo edæ da wēñæedāni.

¹⁴ Wēñadinque edæ wodii wīnōnāmai inte edæ næ gongænte tæi ongōedāni. Edæ, Tæi wææ caaquincoo, ante pōnō tæi pacadeyænte bai cædinque mīnitō Wængonguī nānō nō pōñēnō entawēnīnque adobaī nō entawente quēwēedāni. Tæcætawē inō tæīneta mīni wææ wodontawēnta ante wēñate bai cædinque Wængonguī tæiyæ waēmō nānō cædō ante edæ entawente tæi cæte ongōedāni. ¹⁵ Mōnō Codito pōnō cæcā beyænque mōnō godongāmæ piyænē cæcæimpa, ante watapæ mōnō ēñēnō beyæ pogodo gote apænegacæte ante cædinque

mīnitō awæncata tæi wææ cæwainta wêwate
baī cædinque gānē pōnente cædāni.

¹⁶ Yabæque pōni wææ cæquinta tæinta
baī næænte baī cædinque mīni wede pōnēnō
ædæmō entawēninque quēwēdāni. Īninque
nē wīwa cædongā ponte gonga encado
baī to piyæncate baī cædinque, Mīnitō oda
cæcæmīnīmpa, ante cæcā ate mīnitō mīni
wede pōnēnō beyænque tōmengā wīwa
nānō ānō ante edæ ēñēnāmaī incæmīnīmpa.

¹⁷ Ayæ, Ocamō incainta tæinta baī
īmpa, ante wææ wencate baī cædinque
mīnitō Codito pōnō ængā beyænque mīni
quēwenguīnō ante ænte entawencæmīnīmpa.
Mīnitō yaēmē wææ næænte baī cædinque
Wængonguī Ōnōwoca apæneca ēñēninque
nāni yewæmongainta ate ædæmō ēñēninque
edæ cōwē entawēdāni.

¹⁸ Ayæ Wængonguī Ōnōwoca ingante
ēwocadinque mīnitō tōmengā ingante,
Wængonguī bitō cōwē cæcæbiīmpa, ante
godōmenque nanguī apænedīnque ñīne
cædāmaī iedāni. Mānōmaī cæcæte ante
mīnitō mīmīni ongōninque wæntæte
badāmaī inte Wængonguī quināni tōmānāni
beyæ ante cōwē apæneedāni. ¹⁹ Ayæ
botō beyæ ante adobaī apænemīni
ēñēninque Wængonguī pōnō cæcā ate botō
edonque tedecæboīmpa, āmopa. Edæ
Codito ingantedō ante wēnēñedē mōnō
ēñēnāmaī ingaine ante botō ñōwo watapæ
ēñēninque guīñēnedāmaī inte apænebo
ēñēncædānīmpa, āmopa. Mānōmaīnō ante
mīnitō Wængonguī ingante apæneedāni,
āmopa. ²⁰ Māñīne ante botō wadāni weca nē
gote apænebo beyænque ñōwo gæguīncamē
encaipobo inte wæbopa. Īninque, Māñīne
ante nē apænequēnengā inte Pabodo cōwē
guīñēnedāmaī inte apæneccāīmpa, ante
mīnitō botō beyæ ante apæneedāni.

Waa quēwencæmīnīmpa, ante

²¹ Botō Pabodo īñōmō æbānō quēwēmo,
ante, Quīnō baī cæboo, ante ēñēncæte ante
wæmīnitawo. Edæ Tiquico mōnō tōñīñacā
mōnō nē waadecā īngā inte tōmengā ñōwo
pōninque mīnitō īmīnite māñīnō tōmānō
ante apæneca ēñēncæmīnīmpa. Tōmengā
īñōmō mōnō Awēnē nempo quēwēninque
tōmengā beyæ nē cædongā inte cōwē nē
pōnengā inte ædæmō cæcā acæīmpa.

²² Īninque, Pabodoidi æbānō quēwēnāni,
ante tōmengā pōnō apæneca ēñēninque
mīnitō wampo pōnēninque tæi pīñænte
entawencæmīnīmpa. Ante cædinque botō,
Ædæmō apænebi ēñēncædānīmpa, ante
tōmengā ingante mīnitō weca da godōmo
pongā aedāni.

²³ Mæmpo Wængonguī tōnō mōnō Awēnē
Itota Codito mīnitō īmīnite waadete pōnō
cæda ate mīnitō mīni caipæ incæ gānē
entawēninque wede pōnēninque godongāmæ

edæ waadete pōnencæmīnīmpa, āmopa.
²⁴ Æcānō mōnō Awēnē Itota Codito ingante
cōwē waadete pōnente ñīmpo cædāmaī
īna īñōmō tōmengā ingante Wængonguī
pōnō waadete cæcæcāīmpa, ante botō
Wængonguī ingante apænebopa. Māñīnque
ante yewæmōmopa.

Pidipenteidi inänite **Pabodo nänö cadota** ante **yewæmongainta**

Waa quëwëedäni, ante

¹ Itota Codito ingante nê cæmõna inte botö tönö Timoteo guëa apænemõna ininque botö Pabodobo adoboque yewæmõmopa. Minitö Pidipoto inõmõ quëwëninque Wængongui quimini inõmini inte Itota Codito nempo nê quëwëmini inõminite botö, Acæminimpa, ante yewæmõmopa. Mini pönencabo beyænque ante pancaminiya nê aamini inõminite pancaminiya guiquenê nê cæmini inõminite pancaminiya guiquenê önõminique inõminite botö edæ, Tömämini edæ acæminimpa, ante yewæmõmopa. ² Mönö Mæmpo Wængongui mönõ Awenê Itota Codito tönö waadete pönö cæda ate gänê pönëninque waa quëwëedäni, ämopa.

Nê pönëmini beyæ Wængongui ingante apænebopa, ante

³ Eyedemê minitö iminute ante pönemo inte botö Wængongui ingante waa ate pönëninque apænebopa. ⁴ Ininque minitö beyæ ante Wængongui ingante wantæ inõ wantæ inõ apænedinque botö, Waa quëwëminipa, ante watapæ todinque apænebopa. ⁵ Edæ, Botö täno goyedê minitö godongämæ cæminitapa. Ayæ, Mönö Codito ingantedö ante minitö nõwo ganca godõmenque watapæ apæneminiipa, ante pönëninque botö, Wængongui bitö pönö cæbi ate pidipenteidi waa cædäniipa, ante apænebopa. ⁶ Minitö botö ayõmo tæiyæ waemõ entawencæminimpa, ante nê mä badongaingå inongä inte Wængongui nõwo Itota Codito nänö ponguinganca godõmenque pönö badõninque cõwê inque badongä ate minitö ædæmõ pæimini bacæminimpa. Mänõmai impa, ante botö, Næwangä impa, ante do ëñëniipa.

⁷ Mönö Codito ingantedö ante watapæ möni ëñëninö ante botö wææ äninque, Næwangä impa, ante apænebopa. Mänine botö apænedê beyænque pancayedëña botö imote tee mönedäni wæbopa. Incæte tee mönedäni wæbo incæ, Næwangä impa, ante wææ ämo incæ Wængongui nänö waadete pönö cægäinö ante ænte entawëñõmo minitö adobai mäninö ante æninque botö tönö godongämæ entawëminipa. Ininque, Mönö mäninö ante äanque bai entawëmö imoppa, ante minitö iminute waadete pönëninque botö, Minitö ædæmõ pæimini bacæminimpa, ante nõingä cæte pönëmopa. ⁸ Itota Codito mönõ imonte nanguï waadete pönengantawo. Edæ tömengä waadete nänö pönëno ante entawëninque botö minitö

iminite waadete pönëmopa, ante adinque Wængongui incæ, Pabodo næwangä minitö iminute nanguï waadete pönengampa, ante apænebaingampa.

⁹ Ininque minitö beyæ ante botö Wængongui ingante iimäi ante apænebopa. Mini waadete pönencabo inõminite Wængongui pönö cæcä ate godõmenque waadete pönencæminimpa. Ayæ waadete pönëmini inte minitö, Quinö wænæ wænæ i, Quinö waa i, ante edonque adinque nõ apænte ämini bacæminimpa. ¹⁰ Mönö æbänö cæte waa quëwengui, ante edonque adinque minitö Ao ante waa quëwëninque Itota Codito nänö ponguinganca wentamö mongænämai inte tee tewardämai imini incæminimpa. ¹¹ Ayæ Itota Codito pönö cæcä ate minitö nõ cædinque waa quëwëmini adinque wadäni Wængongui ingante waa ate pönëninque apænedänimpa, ante botö Wængongui ingante apænebopa. Ayæ minitö mänõmai inte waa cæmini adinque tömänäni wæætê Wængongui ingante apænedinque, Wængongui ëñëmi. Bitö næo bai ëmönõmi inte waa pönö cæbipa, ante apænedänimpa, ante cædinque botö minitö beyæ ante Wængongui ingante apænebopa.

Pabodo, Codito beyænque quëwëmopa, angampa

¹² Inänäni apænebo ëñëedäni. Mänõmai cædäni botö wædö incæ wii õnonque cætimpa. Wæætê, Codito beyænque Pabodo caate wæcampa, ante adinque wadäni godõmenque nanguï inäni Codito ingantedö ante watapæ möni apænedö ëñëninque wede pönënanäni badäniipa. ¹³ Edæ, Codito ëmõwo apænedä beyænque Pabodo ingante tee mönedäni, ante tededäni ëñëninque odõmäno tæiyæ awenê oncö wææ wänönäni incæ wadäni wayõmõ quëwënanäni incæ tömänäni do ëñënanäni. ¹⁴ Mönö Awenê nempo quëwënanäni incæ, Pabodo tee mönete wæcampa, ante wædinque wodo tömänäni godõmenque wede pönente badäniipa. Ininque wede pönëninque tæi piñænte entawëninque tömënanäni guinënanäni inte Wængongui nänö apænedö ante godõmenque apænedäniipa.

¹⁵ Pancadäniya, Pabodo miñæ tee godõmenque nanguï inäni godäniipa, ante pönö piinte adinque Codito ëmõwo ante apænedäni incæte botö imote guädö guëa piincæte ante apænedäniipa. Mänõmai i incæte wadäni guiquenê, Pabodo tönö mönõ godongämæ cæcæimpa, ante gänê pönëninque Codito ëmõwo ante apænedäniipa. ¹⁶ Nê gänê pönente apænedäni guiquenê, Codito ingantedö ante watapæ mini ëñëninö ante Pabodo wææ ancæcäimpa, ante botö imote godö gö cæcampa, ante do ëñënanäni. Ininque

tömēnāni botō imote waadete pōnēninque apænedānīpa. ¹⁷ Nē wæætēdō wæætē tededāni guiquēnē, Pabodo tee mōnete wæyongante mōnō apænete tomō wæcā tocæi, ante cædānīpa. Tömēnāni nāmā beyænque ante cædāni incæte waa cæte bai cædinque Codito emōwo ante apænedānīpa. ¹⁸ Incæte pancadāniya nāmā beyænque ante apænedāni incæ pancadāniya nō pōnente apænedāni incæ mānīnāni tōmānāni Codito nānō cægānō ante nāwangā ante do edæ apænedānīpa. Mānōmaī impa, ante pōnēninque botō watapæ tobopa.

Ayæ iīmaī ante pōnēninque cōwē godōmenque nanguī tocæboīmpa. ¹⁹ Mīnitō Wængonguī ingante botō beyæ nanguī apænemīni ēñēninque Itota Codito Ōnōwoca pōnō cæcæcāīmpa, ante ēñente tobopa. Īninque nōwo botō caate wædō ante edæ iīncayæ ate nīmpo cædāni ate edæ botō abæ tawænte gote quēwēngūinque edæ impa, ante do ēñēninque tobopa. ²⁰ Botō wēēnēdē botō cæbo bai nōwo adobaī cæinēmo īmopa. Īntai ēñate mīimō quēwēmo incæ baonque wænōnāni wæmo incæ, Mōnō Codito ingante waa acædānīmpa, ante cædinque botō cōwē guīñēnāmaī inte tæi ongōninque nanguī cædinque watapæ edæ hacæboīmpa, ante pōnēmopa. ²¹ Edæ inguipoga quēwēmo incæ botō Codito ingante entawēninque tōmēngā beyænque ante quēwēmopa. Wæætē wæmo incæ tōmēngā beyæ botō godōmenque nanguī entawēngūimo īmopa.

²² Incæte, Waiwæ nanguī incate bai botō cæquinque inguipoga ayæ quēwēngūenēmo īmopa, ante pōnēninque botō, Æbānō angūimoo, ante ēñencæte ante wæbopa. Edæ, Wæncæboīmpa, ante angūenēmo īmoo. Wæætē, Ayæ quēwēncæboīmpa, ante angūenēmo īmoo. Edæ, Æbānō angūenēmo īmoo, ante botō edæ ēñēnāmaī īmopa. ²³ Edæ wada bæi ongote æmatæ tōō æmatæ tōō godōna wæcā bai wædōmo inte botō, Ædōnō gāmæñnō goquīmoo, ante wæbopa. Codito weca godōmenque wæmō pōni quēwēncæboīmpa, ante botō wadæ goinēmo īmopa. ²⁴ Incæte inguipoga quēwēninque mīnitō beyænque ante cæquēnēmo inte botō ædō cæte wayōmō goquīmoo. ²⁵ Ante pōnente wædinque botō, Mīnitō mōnō pōnēnō ante godōmenque wede pōnēninque watapæ tote quēwēncæmīnīmpa, ante cæquīmo īmopa, ante ēñēmopa. Ayæ, Nōwo wænāmaī inte botō mīnitō weca quēwēngūimo īmopa, ante do ēñēmopa. ²⁶ Īninque botō mīimo inte mīnitō weca pōmo adinque mīnitō Itota Codito ingante waa adinque botō beyænque nanguī tocæmīnīmpa.

²⁷ Codito ingantedō ante watapæ mōnō ēñēnīnō beyæ ante mōnō waa cæquēnēmō

īmoppa, ante ēñēmīni inte mīnitō edæ waa cæte quēwēdāni. Mānōmaī cæmīni ĩninque botō ōnōmoncaque ēñēmo incæ mīnitō weca ponte abo incæ, Pidipenteidi adoyōmō pōnēninque tæi ongōnānīpa, ante tededāni ēñēninque tobaīmopa. Ayæ, Codito ingantedō ante watapæ mōnō ēñēnīnō ante wadāni ēñencædānīmpa, ante pidipenteidi iīnacabo cædinque nanguī cædānīpa, ante botō edæ ēñente tobaīmopa. ²⁸ Ayæ piinte cædāni incæte mīnitō wæætē guīñēnāmaī inte tæi ongōmīnīpa, ante adinque botō tobaīmopa. Mīnitō mānōmaī guīñēnāmaī inte tæi ongōmīni ate wædinque nē piinte ānāni wæætē, Mōnitō wængūinque impa, ante wæcædānīmpa. Nē pōnēmīni mīni quēwēngūinque impa, ante adinque tōmēnāni godōmenque wæcædānīmpa. Edæ Wængonguī ængā beyænque quēwēncæmīnīmpa.

²⁹ Wængonguī waadete pōnō cæcā ate mīnitō Codito ingante wede pōnēmīnitawo. Edæ adocā pōnō cæcā ate mīnitō Codito beyænque cædinque cōwē caate wæquīmīni ĩmīnīpa. ³⁰ Pabodobo doyedē Codito beyæ ante wææ ancæte ante caate wætabopa, ante amīnitawo. Nōwo godōmenque wææ cædinque caate wæbopa, ante ōnōmoncaque ēñēmīnitawo. Īninque botō wææ āninque caate wæbo bai mīnitō adobaī botō tōnō godongāmæ wææ āninque caate wæmīni ĩmīnīpa.

2

Codito ōnonganque bayongante Wængonguī da cæcnongā

¹ Mōnō Codito nempo quēwēninque mīnitō wampo pōnēmīnitawo. Tōmēngā waadete pōnēngā beyænque gancæ pōnēmīnitawo. Mōnō Codito Ōnōwoca tōnō āāwocaque bai ēwocadinque godongāmæ watapæ quēwēmīnitawo. Nē wæcā ingante godō waadete pōnēmīnitawo. Adocanque wæwēngā adinque mīnitō āanque bai wæwēninque tōmēngā beyæ cæmīnitawo.

² Mānōmaī ĩ ĩninque adodonque pōnēninque mīnitō waa waademīni adinque botō watapæ pōni tobaīmopa. Tōmāmīni āanque bai ēwocadinque, Mōnō adoyōmō cæcæīmpa, ante godongāmæ cæmīni adinque botō godōmenque nanguī watapæ tobaīmopa.

³ Īninque mīnitō nāmanque ante pōnēninque, Botō imote waa acædānīmpa, ante cædāmaī iedāni. Yæcado ongoncæboīmpa, ante cædāmaī iedāni. Wæætē, Botō ōnōmoque bai iñōmote wadāni wæætē waa pōni ĩnānīpa, ante pōnēninque wadānīque ĩnānīte ængō cæedāni. ⁴ Nāmā mīni cæinēnō ante cædinque mīnitō wīi mānīnonque ante cædinque wæætē edæ wadāni nāni cæinēnō adobaī ante cæedāni.

⁵ Mänōmai cædinque munitō Itota Codito nānō pōnengainō bai adodō ante pōnēdāni.

⁶ Tōmengā iñōmō cōwē nāwā Wængongui ñongā ingampa. Incæte, Botō nāwā Wængonguimo ingaimo inte

Mæmpo Wængongui ganca botō ingainō ante ñimpo cædāmai incæboimpa, ante tōmengā ānāmai ingacāimpa.

⁷ Wæætē edæ, Māninō botō ingainō incæ botō edæ ñimpo cæcæboimpa, āninqe wææ,

ōnonganque bai bagacāimpa.

Ayæ, Wængongui ingante nē cædōmo edæ bacæboimpa, ante badinqe wææ,

tōmengā waomō mōnō ēmōnō bai nānō ēmonguinque waocā ēñagacāimpa.

⁸ Mänōmai ēñate pæte wææ tōmengā ōnonganque inte bai cæyongā Wæmpocā,

Bitō wænguino taadō gocæbiimpa, angā ēñēninqe edæ Ao ante goyongante wææ,

tōmengā nānō guññēñāquinque awæ ñānquedimæ cæte māo timpodāni wææ tiwadāni ate tōmengā caate wægōninqe wææ bacaa edæ wængacāimpa.

⁹ Mänōmai cæcā adinqe Wængongui wæætē tōmengā ingante æmonga pōni da ææñongacāimpa.

Ayæ wadāni ēmōwo ōnōwoque ēmōnāni bai tōmengā Tæiyæ Awēnē ñongā inte wii adobai ōnōwoque bai ēmoncæcāimpa, ante cædinque Wængongui edæ, Itota Codito ingampa, ante pōnō pemongacāimpa.

¹⁰ Edæ ōnædē quēwēnāni incæ ingui-poga quēwēnāni incæ guimonga quēwēnāni incæ

tōmānāni edæ Itota ēmōwo ēñente waa adinqe

da guicapocædānimpa, ante Wængongui tōmengā ingante pōnō pemongacāimpa.

¹¹ Ayæ, Itota Codito ingante adinqe tōmānāni,

Mōnō Tæiyæ Awēnē ñongā ingampa, ante edæ Ao ancædānimpa, ante Wæmpocā cægacāimpa.

Mänōmai cæcā adinqe, Mæmpo Wængongui waa pōni cæcampa, ante mōnō edæ watapæ apæñecæimpa.

Nēmōncōo āo āo cædote bai nōinō cæte quēwēdāni

¹² Mänōmai beyæ botō nē waademini iñōminite botō apænebo ēñēdāni. Minitō weca botō quēwēnēdē munitō do ēñente cædimini inte ñōwo botō wayōmō quēwēmo incæ godōmenque ēñente cæmini abopa. Ñinque cōwē mīni ēñente cædinō bai adobai cædinque ñōwo mōnō watapæ quēwenguino

taadonque gocæte ante cædinque, Oda cæte wæcæ wæ, ante cōwā aquēnē quēwēmīni.

¹³ Wii cæinente awædō, ante wæmīnitawo. Edæ Wængonguinque apæñecā ēñente entawēninqe munitō tōmengā waa pōni nānō ānō ante nē ēñente cæinēmīni baminipa. Oda cæte awædō, ante wæmīnitawo. Adocā Wængonguinque mongæncadæ mongæncadæ cæcā ate tæi piñæmīni bate ate eyepæ cæminipa.

¹⁴ Ñinque, Wii cæinente awædō, ante ānāmai inte munitō piyænē cæte mīni cæquēnēnō ante do cædāni.

¹⁵ Edæ mänōmai cæmīni adinqe wadāni, Wentamō mongæñāmai iminipa, ante abainānipa. Ayæ ingui-pogaque quēwēnāni ēñēnāmai inte idiquibæ pōnente cæyōnāni munitō wæætē Wængongui wēñæmīni iñōmīni inte tōmēnāni weca quēwēninqe nēmōncōo āo āo cædote bai nōingā cæte quēwēncæmīnimp.

¹⁶ Edæ, Codito pōnō cæcā beyænque mōnō quēwēngæimpa, ante edonque apæñemīni ēñæcædānimp.

Ñinque, Doyedē botō apænedō ante munitō nē ēñente cæminipa, ante adinqe botō nangui todinqe iūmai ante pōnēmpo. Minitō beyæ pæ pagænte cædōmo incæte botō wii ōnonque cæboimpa.

Wæætē mōnō Codito nānō ponguiōnæ iñonte botō, Minitō nō apæñemīnitapa, ante adinqe botō tocæboimpa.

¹⁷ Ayæ, Wængongui qui, ante baō godōninqe waodāni baonga tepæ gao caadānipa. Minitō iñōmō wede pōnēmīni inte, Wængongui qui, ante nāmā godō cæyōmīni botō

quēwēngūimāmo incæ mīni godōninqe gao caate bai ba edæ waa tobaimpa. Minitō tōnō godongāmæ edæ tobaimpa.

¹⁸ Minitō adobai, Pabodo mōnō beyæ cæcampa, ante tocæmīnimp. Edæ mōnō edæ godongāmæ tocæimpa.

Timoteo tōnō Epapododito

¹⁹ Minitō æbānō quēwēmīni, ante ēñēninqe Timoteo wæætē apæñecā ēñente tocæboimpa, ante cædinque botō, Itota Codito Ao angā ate Timoteo ingante oo da pōnōmo munitō weca poncæcāimpa, ante pōnēmpo.

²⁰ Minitō æbānō quēwēmīni, ante wæyōmo tōmengā adocanque munitō beyæ ante botō tōnō guēa wæcampa. Wadāni guiquēnē munitō beyæ ante wædāmai inānipa.

²¹ Tōmānāni edæ nāmā beyænque ante cæinente wædinque Itota Codito nānō ānōnō ante wii cæinēnāni inānipa.

²² Cōwā ayōmīni, Timoteo iñōmō cōwē waa cæcampa, ante do ēñēmīnitapa. Ayæ mōnō Codito ingantedō ante watapæ apæñedinque Timoteo tōnō mōna wencaya bai guēa cæmōnapa, ante do ēñēmīnitapa.

²³ Ñinque, Botō imote awēnēidi æbānō apænte angūnāni, ante ēñente ate botō Timoteo ingante māñiñedē ate munitō weca do da pōnōmo poncæcāimpa, ante

pönēmopa. ²⁴ Ayæ mönō Tæiyæ Awënë Ao angä ate tömömo do pömaimopa.

²⁵ Ayæ Epapododito mönō tönĩñacä incæ botō tönō guëa cæmöna imönapa. Wadäni piinte cædäni adinque mönatō guëa wææ cæmönapa. Tömengä ingante minitō, Pabodo beyæ ante godō cæcæbiimpa, ante do da pönömĩni ponte cæcä æntabopa. Tömengä ingante ñowo wæætē adodō minitō weca edæ da pönömo ponguënegä ingampa, ante pönēmopa. ²⁶ Adocä Epapododito iñömō minitō pidipenteidi imĩnite acæte ante edæ nangui wæcampa. Ayæ, Epapododito daicawo gawængampa, ante apænedäni ëñëninque pidipenteidi do wædänipa, ante ëñente wædinque tömengä wæætē minitō beyæ ante nangui wæwente bacampa. ²⁷ Nawangä impa edæ. Tömengä daicawo gawænte wodo wængantapa. Incæte Wængongui tömengä ingante waadete pönō gampocä waa bacantapa. Mänömaï cædinque Wængongui botō beyæ adobaï ante pönëninque, Pabodo wii godömenque wæcæcäimpa, ante pönengä inte edæ Epa-pododito ingante gampocä waa bacantapa.

²⁸ Mänömaï beyæ, Epapododito wæætē pongä adinque tocæmiinimpa, ante cædinque ayæ, Minitō tomĩni adinque botō wæwënämaï bacæboimpa, ante cædinque botō tömengä ingante ñowo da godoncæboimpa, ämopa. ²⁹ Pongä ate minitō, Mönō Awënë nempo quëwënömi inte pöe, äninque Epapododito ingante waa adinque godongämæ watapæ tote cædäni. Ayæ wadäni tömengä bai adobaï waa cædänipa, ante adinque tömënäni inänite waa adinque waa cædäni. ³⁰ Minitō, Pabodo beyæ ædō cæte cæquimöni, ante, Gobæ awædō, ante wæyöminite Epapododito iñömō edæ, Wæmo incæ cöwë cæcæboimpa, ante minitō cæquëñenō ante cæcantapa. Codito beyæ ante cæcæte ante edæ tömengä wodo wængantapa cæmiinii. Tömengä ingante edæ waa cædäni, ämopa.

3

Tæi piñcæte cæcæimpa, ante

¹ Nöwo iñömō botō tönĩñamini ëñëedäni. Mönō Awënë nempo quëwëninque mini wat-apæ toquinque iminipa. Minitō oda cædämaï incæmiinimpa, ante botō adodō adodō ante anca yewæmōmo incæte wædämaï imopa.

² İmaï ämopa. Wadäni iñömō, Mönō ëö togænte quëwengæimpa, ante nē änewënäni inte guintaidi bai wënæ wënæ cædinque nämä baō ëö ëö towënanipa. Ante adinque minitō tömënäni inänite gomō adinque wææ cædäni. ³ Edæ tömënäni inänite ee adinque Wængongui mönō imonte wæætē pönō ëö togænte bai cædinque mönō wentamō mongænō do

wido cægacäimpa. Wængongui Önöwoca ingante ænte ewocamō inömō inte mönonque edæ, Wængongui ingampa, ante tömengä beyæ cæmompä. Itota Codito nempo quëwëmō inte mönonque wii inguipoga beyænque quëwëmō imoppa, ante mönō tömengä ingante waa ate apænemompä. ⁴ Tömënäni guiquëñë inguipogaque ante pönëninque, Mönitō cædō beyænque quëwencæmönimpa, ante pönëwënäni. Tömënäni nani pönëwënō bai adobaï pönente bai botō, Tömënäni wædænque cæyönäni botō godömenque nangui cædömō imopa, ante pönëwencædömoimpa. Edæ, Nangui botō cædō beyænque quëwencæboimpa, ante pönëwencædömoimpa.

⁵ Edæ tömënäni nē ëö togæinäni inänitawo. Botō iñömō adobaï imopa. Tæcæ ëñayömete önonpo æmmæpoque go mëönaa go adoönæque mänimpoönæ iñonte botō imote do ëö togænäni wægaboimpa. Tömënäni idægoidi inänitawo. Botō iñömō idægo wodi pæimo inömo inte tömengä nänömocä Beencaminō wodi pæimo inömo imopa. Tömënäni ebedeoidi inänitawo. Botō iñömō ebedeobo ëñagaïmo inte näwä ebedeobo inömo imopa. Tömënäni Paditeoidi inänitawogaa. Edæ botō Paditeobo inömo inte Möitee wodi nänō wææ angainō ante möni Paditeocabo wædō ante tömää ëñente cædömo imoi aedäni. ⁶ Ayæ tömënäni, Wængongui beyæ nangui cæcæimpa, ante apænedänitawo. Edæ, Wængongui beyæ cæbote, ante edæ botō iñömō doyedë Codito ingante nani pönëngaincabo inänite ancaa togænte pancæte ante cægaboï aedäni. Ayæ oodeoidi guiquëñë, Mönitō wææ angainō ante nē ëñente cædänique nē nō cædäni inänipa, ante änanitawo. Botō iñömō edæ mäninonque ante cöwë cædömo inte wentamō mongænämaï inömo imopa.

⁷ Doyedë iñömō botō mänömaï godömenque waa cædimo inte, Botō toquinque waa pönï cægaboimpa, ante pönëwentabopa. Nöwo guiquëñë botō waa cægainō ante, Önonquedō ante cægaboï, ante do ëñëmopa. ⁸ Ayæ wææ, Itota Codito botō Awënë ingante adimo inte botō tömengä ingante pönëninque tömengä tönō godömenque waa pönï quëwencæboimpa, ante botō, Wëenëñedë botō entawengaincoo botō waa againcoo incæ edæ ewenguincooque impa, ante pönëmopa. Edæ Codito beyæ ante cæyömo botō wëenë mänincoo tömancoo edæ dæ ba wætäbopa. İninque, Codito ingante godömenque ewocæboimpa, ante nangui cædinque botō, Wëenë botō entawengainō ompotacoo bai impa, ante wido cæbopa.

⁹ Edæ, İmaï cædäni, ante nani wææ angainō ante ëñente cæbo incæte Wængongui ayongante botō ædō cæte mäninō beyænque

nō entawēmo baquimoo. Wæætē Codito mōnō nē nō cædongā ingante wede pōnēmo inte tōmengā nempo quēwēñōmote Wængonguī pōnō badongā ate nō cæbo bacæboimpa, ante nanguī cæbopa. ¹⁰ Mōnō Codito ingante ate baī pōnencæboimpa, ante cæbopa. Ayæ tōmengā adocā nanguī tæī piñæninqwe ñāni òmæmongacæimpa, ante wede pōnēninque botō māninō tōmengā nē ñāni òmæmongaingā nānō tæī piñænō bai adobai entawencæboimpa, ante cæbopa. Ayæ adobai, Tōmengā caate nānō wængai bai botō tōmengā beyæ wæncæboimpa, ante pōnēninque botō tōmengā tōnō godongāmæ caate wænte bai tōmengā nānō ewocadō bai ewocacæboimpa, ante cæbopa. ¹¹ Mānōmai cædinque botō, Tōmengā wænte ate ñāni òmæmōnte nānō quēwengai bai botō adobai wænte ate ñāni òmæmoncæboimpa, ante nanguī cæbopa.

Mānōmai bacæboimpa, ante nanguī cæbopa, ante

¹² Mānōmainō ante apænedinque botō, Codito nānō entawēnō bai do entawēmopa, ante dicæ apænebogaa. Picænāni bai do badinque nō cædinque oda cædāmai imopa, ante dicæ apænebogaa. Incæte Itota Codito incæ edæ, Botō ewocadō bai adobai ewocacæbiimpa, ante botō imote do bæi ongoncæimpa. Ìninqwe botō wæætē, Tōmengā waa pōni nānō ewocadō bai adobai ewocacæboimpa, ante bæi ongoncæte ante nanguī cæbopa. ¹³ Ìñānāni ēñēedāni. Botō Codito nānō ewocadō ante dicæ eyepæ æmogaa, ante wæbopa. Incæte, Eyepæ ænāmai imopa, ante adinque wæwēnāmai imopa. Wæætē, Ìncayæ ate Codito nānō ewocadō bai ædæmō ewocacæboimpa, ante cædinque botō māninonque ante pōnēninque pogodo gote bai cōwē cæbopa. ¹⁴ Wængonguī do, Bitō Itota Codito nempo quēwēnōmi inte eyepæ cædinque æmonga ponte æe, ante botō imote aa pegacæimpa. Ìninqwe tōmengā, Pædæ pōnōmo æncæbiimpa, ante nānō angaincoo ante ænte ewocacæte ante botō gānā cæcæte ante pogodo gote bai edæ nanguī cæbopa.

¹⁵ Mōnō æmæwo picæmō badōmō Ìñōmō tōmāmō adobainō ante pōnenguēnēmō imopa. Pancamīniya guiquēnē mānōmainō ante wīi pōnēmīni adinque Wængonguī, Mīnitō æbānō nō pōnenguēnēmīni Ìmīni, ante pōnō odōmōngā ate ēñencæmīnīmpa. ¹⁶ Mōnō do ēñente quēwenganca māninganca mōnō cōwē nō cæte quēwengæimpa.

¹⁷ Ìñānāni ēñēedāni. Botō Pabodobo æbānō cæboo, ante adinque mīnitō botō cædō bai adobai godongāmæ cæedāni. Ayæ, Mōnitō cæmōni bai mīnitō adobai cæedāni, ante odōmōmōni bai pancadāniya adobai cædāni adinque mīnitō Ìñōmō, Adobai

cæcæimpa, ante tōmēnāni Ìnānite cōwā æedāni. ¹⁸ Mīnitō Ìmīnite wantæ wantæ Ìñō wantæ wantæ Ìñō apænedīmo inte botō ñōwo Ca ca wædinque adodō ante Ìlmai ante godōmenque apænebopa. Mōnō Codito awāa wængā incæte nanguī Ìnāni tōmengā ingante Baa āninqwe tōmengā nānō wængaiwæ ante piinte bai cædānīpa, ante awædō. ¹⁹ Tōmēnāni nāni òmæte ewente wæquinque mānōmai cædānīpa. Cænguī beyænque ante pōnente quēwēnānīpa. Wēnæ wēnæ nāni cædō beyæ guingo imonte wæquēñēnāni incæ tōmēnāni wæætē guñēñadāmai inte edæ, Waa pōni cæmōnīpa, ante nāmā incæ waa adānīpa. Edæ inguipoga beyænque ante cæinente wædānīpa.

²⁰ Mōnō Ìñōmō mempoga ēñagaimō inte mōnō òñædē òmæ do ēamō edæ imopa. Ìninqwe mōnō Awēnē Itota Codito, Quēwencæmīnīmpa, ante nē Ængaingā ingante nanguī āinente wædinque mōnō, Tōmengā æyedēnō òñædē edæ wææ ponguingāa, ante wānō cōmōmpa. ²¹ Tōmengā Ìñōmō tæī piñænongā inte tōmancoo edæ bæ tadinque ò æninqwe Tæiyæ Awēnē incæcæimpa. Ìninqwe, Mōnō quēwenguīnāmai aquīññō ēñamōmpa, ante adinque tōmengā tæī piñænongā inte, Botō baō bai tæīñō mongæncæmīnīmpa, ante badongā ēñaquimō imopa.

4

Mōnō Awēnē nempo quēwēninque watapæ tocæimpa

¹ Wængonguī botō imote poganta pōnō wencate bai cædinque, Bitō waa apænebi ēñente beyænque pidipenteidi ēñente waa cædāni abopa, angā ēñēninque botō mīnitō beyæ ante watapæ tobopa. Mīnitō Ìmīnite ædæmō waadedinque botō, Æyedēnō bee tenguimoo, ante wæbopa. Ìninqwe botō nē waademīni āmo ēñēedāni. Māninō botō ānīnō ēñente cædinque mīnitō mōnō Awēnē nempo quēwēninque tæī ongōedāni.

² Nōwo Eodia, Tintique, mīna onquiyæncaya Ìmīnate āmo ēñēeda. Mōnō Awēnē nempo quēwēninque mīnatō piyænē cæte adodonque ante cæbæweda, āmopa.

³ Botō mōnō Awēnē ingantedō ante watapæ apæncæte ante nanguī cæyōmote Codēmente tōnō wadāni botō tōnō Ìñacabo cædānitapa. Wængonguī, Nāni quēwenguinta, ante tōmengā nānō yewæmongaintaa tōmēnāni ēmōwo dobæ yewæmōnte mæ õñōmpa. Tōmēnāni botō tōnō cæyōnāni Ìina onquiyæna Eodia tōnō Tintique Ìñōmō botō tōnō adobai Ìñacabo nanguī cæda Ìnatapa. Ìninqwe bitō cōwē botō tōnō guēa cædōmi Ìñōmite bitō Ìmite āmopa. Ìina Ìnate bitō waadete apænebi ēñēninque piyænē cæte quēwencædaimpa.

⁴ Ayæ tōmāmīni īmīnite, Mōnō Awēnē nempo quēwēninque watapæ tote quēwēdāni, āmopa. Edæ, Watapæ pōni tote quēwēdāni, ante adodō ante āmo ēñēdāni.

⁵ Mōnō Awēnē edæ oo pōni poncæcāimpa cāmīni. Ee ædæmō cæte quēwēñōmīni tōmānāni waadete mīni cædōnō ante edonque acædānimpa.

⁶ Ayæ, Quiēmē bacæ wæ, ante mīni wædō ante guīfente wædāmaī īedāni. Wængonguinque ingante apæneedāni. Apænedinque, Wængonguī, bitō pōnō cæbi ate eyepæ inte quēwencæmōnimpa, ante quiēmē mīni æncæ wædō incæ ante apæncæmīnimpa. Ayæ tōmēngā pōnō cæcā adinque mīnitō, Bitō pōnō cæbi waa æmōnīpa, ante Wængonguī ingante wæætē waa ate pōnente apæneedāni.

⁷ Ayæ, Wængonguī piyænē cædinque pōnō aacā beyæ mīnitō Itota Codito nempo quēwēninque piyænē cædinque mīmōnē wædāmaī inte nō pōnēninque quēwencæmīnimpa. Edæ mōnō, Æbāmē cæte Wængonguī pōnō piyænē cæte aacā, ante mōnō waocodō ēñēnāmaī imō incæte tōmēngā cōwē godōmenque aacā ate wædāmaī inte quēwēmōmpa.

Quiñō waa ī, ante mānīnonque ante pōnēē cōedāni, ante

⁸ Īñānāni ēñēdāni. Mīnitō æbānō ante pōnēē congūēnēmīni īmīnīpa, ante yewæmōninque botō ñōwo æmæwo pōni yewæmōmōi aedāni. Nāwangā nāni apænedō ante pōnēē cōedāni. Æbānō waa cæquīī, æbānō nō cæquīī, ante pōnēē cōedāni. Quiēnō nō ī, ante mānīnō ante pōnēē cōedāni. Mōnō æbānō waadete pōnēngūī, ante pōnēninque mōnō waa adoncoo ante adobaī pōnēē cōedāni. Wadāni waa nāni cædīnō ante pōnēē cōedāni. Mānōmaī cædāni ate wadāni waa adānitawo. Īninque tōmēnāni nāni waa adīnō ante mīnitō mānīnō ante pōnēē cōedāni. Īninque, Quiēmē waa pōni ī, ante adinque mānīnonque ante pōnēē cōedāni.

⁹ Botō odōmonte apænebo ēñēmīnitawo. Īninque botō pōnō apænebo ēñēninque mīni ēñēnīnō bai tōmānō ante edæ cædāni. Botō pædæ pōnōmo æmīnitawo. Īninque botō pædæ pōnōmo mīni ænīnō incæ ee mædāni. Botō entawēnō ante, Æbānō entawēmoo, ante edonque amīnitawo. Īninque botō entawēnō mīni adīnō bai mīnitō adobaī entawēninque edæ waa cædāni. Mānōmaī cāmīni adinque Wængonguī nē gānē pōnēnongā inte mīnitō tōnō godongāmæ quēwēninque pōnō cæcā ate mīnitō wæætē gānē pōnēmīni bacæmīnimpa.

Pidipenteidi mīni pōnōni waa æntabopa, Pabodo angampa

¹⁰ Botō wædō ante mīnitō doyedē pōnō cædīmīni inte ñōwo wæætē tæcæ pōnente wædinque wæætē pōnō cāmīni æninque botō, Mōnō Awēnē beyænque pōnō cāmīnīpa, ante adinque nanguī waa tobopa. Edæ botō wædō ante cōwē waadete pōnēmīni incæte mīnitō da pōnōncæ cæyōmīnite wææ cæte ī æiquedō da pōnonguīmīni.

¹¹ Incæte mānōmaī apænedinque botō wīī ænguēnēmo inte apænetabopa. Edæ wædænque ēabo incæ nanguī ēabo incæ quiēmē ēabo incæ botō, Æbānō quēwēngūī, ante do ēñēmō inte edæ piyænē cæte wædāmaī cōwē quēwēmōpa.

¹² Ōmæpobo wædīmo inte botō, Ōmaadāni æbānō quēwēnāni, ante do ēñēmōpa. Adobaī nanguī ēate quēwēnīmo inte botō, Nanguī ēadāni æbānō quēwēnāni, ante do ēñēmōpa. Edæ tōmo cæmo incæ, gæwænte wæbo incæ, nanguī ēabo incæ, ōmæpobo incæ mānīnō tōmānō ante wægāimo inte botō mānōmaī ingāimo beyænque ēñente batabopa. Īninque æyōmōmē quēwēmō incæ quiēmē bai quēwēmō incæ piyænē cæte wædāmaī quēwēmōpa. ¹³ Edæ quiēmē beyæ wæbo incæ mōnō Codito pōnō cæcā ate botō wæætē edæ eyepæ entawēninque tōmāā edæ cæbopa.

¹⁴ Incæte botō ōmæpobo inte wæyōmote mīnitō pōnō cāmīni waa æntabopa. ¹⁵ Ayæ adobaī mōnō Codito ingatedō ante watapæ mōni apænedō ante tæcæ ēñēmīni ate botō Māatedōniabæ ĩnque apænedinque wadæ goyōmote wadāni Codito ingante nāni godongāmæ pōnencabo pōnōnāmaī ĩñōnānīte mīnitō adomīnīque da pōnōmīni æntabopa, ante mīnitō pidipenteidi do ēñēmīnīpa. ¹⁶ Edæ, Tetadōnica nāni quēwēñōmō quēwēninque Pabodo ōmæpocā bacampa, ante tededāni ēñente wædinque mīnitō wīī adopoque wæætē wæætē da pōnōmīni æntabopa.

¹⁷ Botō dicæ botō æncæ wædō ante apænetabopa. Wæætē, Pidipenteidi wadāni ĩnānīte nē godōnāni ĩnānīpa, ante adinque Wængonguī wæætē mīnitō ĩmīnite godōmenque pōnongā æncæmīnimpa, ante apænetabopa. ¹⁸ Īninque botō ĩñōmō idæwaa æntabopa. Botō ænguēnēnō æninque godōmenque nanguī ænte ēabopa. Edæ, Pabodo quī, ante mīni da pōnōnincoo Epapododito wæætē botō imote pædæ pōnongā æninque botō eyepæ pōni ēate quēwēmōpa. Mīnitō, Wængonguī quī, ante oguī waquī bai pōnō ĩya tante bai cædinque, Pabodo quī, ante da pōnōmīni adinque, Waa pōni pōnōmīnīpa, ante Wængonguī incæ waa acampa. ¹⁹ Botō Wængonguī ñāō bai entawēninque tæī ēmōngā ĩnongā inte tōmēngā nānō ēadoncoo ĩñōmō edæ bacoo pōni ongōmpa. Īninque, Mīnitō ænguēnēmīni

īmīnīpa, ante adinque tōmengā Itota Codito
beyænque cædinque eyepæ pōnī edæ da
pōnongā æncæmīnīpa.

²⁰ Mōnō Wængonguī mōnō Mæmpo
īñongante, Bitō waēmō pōnī inōmi īmīpa, ante
mōnō cōwē watapæ apæneceīmpa. Edæ
ñōwopāmo incæ mīimāmo incæ mōnō cōwē
mānōmaī apæneceīmpa. Mānōmaī impa,
ānīnque botō, Amēē, āmopa.

Mānīnque ante yewæmōmopa, ante

²¹ Wængonguī quīnāni Itota Codito
nempo quēwēnōnāni īñōnānite mīnitō,
Waa quēwencæmīnīpa, ante botō beyæ
ancæmīnīpa. Ayæ botō tōnō godongāmæ
ongōnāni incæ, Mīnitō æbānō quēwēmīnī,
ante wædānīpa. ²² Edæ Tæiyæ Awēnē
Tetædo oncōnē quēwēnāni tōnō wadāni
Odōmā īñōmō wayōmō quēwēnāni tōnō
Wængonguī quīnāni incæ tōmānāni adobai
mīnitō imīnite, Waa quēwencæmīnīpa,
ānānīpa.

²³ Mōnō Awēnē Itota Codito mīnitō
imīnite waadete pōnō cæcæcāmpa, āmopa.
Mānīnque ante yewæmōmopa.

Codotenteidi inānite Pabodo nānō cadota ante yewæmongainta

Waa quēwencæminimpa, ante

¹ Wængongui angā ēñēninque Itota Codito botō imote da godongā gogaīmo inte botō Pabodobo inōmo inte yewæmōmopa. Mōnō tōnīnacā Timoteo tōnō guēa tedete ate botō, Acæminimpa, ante yewæmōmopa. ² Mōnitō tōnīnamīni ēñēdāni. Codota iñōmō quēwēninque Wængongui quimīni inte mīnitō mōnō Codito nempo quēwēninque ædæmō cæte pōnēmīni iñōmīnite botō iīmaī ante yewæmōmopa. Mōnō Mæmpo Wængongui tōnō mōnō Awēnē Itota Codito waadete pōnō cæda ænte entawēninque mīnitō gānē pōnēninque watapæ quēwencæminimpa, āmpa.

Nē pōnēnāni beyæ Pabodo Wængongui ingante apænecā

³ Mōnō Awēnē Itota Codito Wæmpocā iñongante mōnitō mīnitō beyæ ante apænedinque Wængongui ingante waa ate pōnente apænemōnīpa. ⁴ Edæ, Mīnitō Itota Codito ingante wede pōnēmīni iiminīpa, ante do ēñēmōnīpa. Ayæ, Wængongui quīnāni inānite tōmānāni inānite mīnitō waadete pōnēmīnīpa, ante mōnitō do ēñēmōnīpa. ⁵ Edæ, Ōōnædē æidinque mīnitō watapæ quēwenguinque impa, ante edæ Codito do badongampa. Mānōmaīnō ante, Nāwangā impa, ante watapæ mīni ēñēnō ante mīnitō godōmenque wede pōnēmīni badinque godongāmæ waadete pōnēmīni iiminīpa. Ininque, Mīnitō mānōmaī iiminīpa, ante adinque mōnitō wæætē Wængongui ingante waa ate pōnēninque apænemōnīpa.

⁶ Doyedē mīnitō weca ponte apænedinque mōnitō, Mōnō Codito ingantedō ante watapæ apænemōnī ēñēninque mīnitō, Wængongui nāwangā waadete pōnō cæcampa, ante do ēñēmīnitapa. Mānōmaīnō ante mīni ēñēnōnæ incæ mīnitō waincawæ nanguī incawæ baī tæcæ badinque nōwo ganca nanguī apænemīni ēñēninque wadāni mīnitō weca nē pōnēnāni tæiyæñāni badānīpa. Ayæ tæiyæñāni badāni baī mōnō pōnencabo adobaī tōmāmæca tæiyæmō pōnī bamompa. ⁷ Erapada mōni nē waadedongā incæ, Codito waa pōnī nānō pōnō cægainō ante do odōmonte apænecā ēñēmīnitapa. Tōmengā iñōmō Itota Codito beyæ nē cæcā inongā inte mōnō imōnite pōnēninque ædæmō cæcā ingampa. ⁸ Ayæ mōnitō imōnite apænedinque tōmengā, Codotenteidi iñōmō Wængongui Ōnōwoca nempo quēwēninque nē waadete pōnēnāni inānīpa, ante do apænecā ēñentamōnīpa.

⁹ Mānōmaī beyæ mōnitō, Mīnitō æbānō imīnī, ante tæcæ ēñēninque mīnitō beyæ ante Wængongui ingante apænedinque iñimpo cædāmaī inte cōwē apænemōnīpa. Edæ, Wængongui æbānō angā, ante mīnitō ēñēnte ēwocacæminīpa, ante mōnitō, Wængongui ēñēmi. Bitō ēñēnō ante apænebi ēñēnte ēwocadinque Codotenteidi wæætē, Æbānō waa cæte quēwengui, ante ēñencædānīpa, ante apænemōnīpa. ¹⁰ Wængongui apænecā ēñēninque mīnitō, Mōnō Awēnē tocæcāimpā, ante cædinque tōmengā nānō waa cædō baī mīnitō adobaī waa pōnī cæcæminīpa, ante apænemōnīpa. Ayæ Wængongui ingante mīnitō doyedē æmæ ate baī æmæ pōnēnīmīni inte nōwo wæætē ædæmō ate baī ædæmō pōnencæminīpa. Ayæ waa incawæ baī mīnitō adobaī bate cædinque nō mīni waa cæquēnēnonque cæcæminīpa, ante apænemōnīpa. ¹¹ Wængongui nāō ēmōninque tæ pīñæñongā inte pōnō cæcā ate mīnitō edæ tōmengā nānō tæi pīñæñō baī adobaī tæi pīñæmīni ēwocacæminīpa, ante apænemōnīpa. Ayæ, Tōmengā mānōmaī pōnō cæcā ænte ēwocamīni inte mīnitō wæntæye badāmaī inte ee cædinque piyæñē cæte ee cæcæminīpa, ante āmōnīpa. Ayæ watapæ todinque, ¹² mīnitō mōnō Mæmpo ingante waa ate pōnēninque apænecæminīpa, ante mōnitō Wængongui ingante apænemōnīpa.

Edæ Wængongui quimōni imōni baī tōmengā mīnitō imīnite pōnō badongā ate mīnitō tōmengā quimīni do bamīnīpa. Ininque mīnitō tōmengā nāō ēmōmāmodē mōnitō tōnō godongāmæ pōñōmīnite tōmengā nanguī pōnī pōnongā æninque mīnitō mōnitō tōnō godongāmæ nē ēamīni incæminīpa. ¹³ Edæ nē wēmō ēnempodongā nempo wæwēñōmonte Wængongui wæætē mōnō imonte gā pe æmpote ō æninque, Botō Wengā botō nē Waadedongā iñōmō nē Awēnē Odeye iñongante mīnitō tōmengā nempo quēwencæminīpa, ante māmongā pongamōnīpa. ¹⁴ Tōmengā Wengā nāmā wepæ petæ petæ wææ beyæñque mōnō wēnæ wēnæ cægainō ante Wængongui pōnō iñimpo cæcā æninque mōnō abæ tawænte baī quēwēmōmpa.

Codito wængā beyænque Wængongui piyæñē cæcampa

¹⁵ Mōnō adāmaī ingaingā Wængongui æbānō emongā, ante adāmaī iñōmonte Wængongui Wengā iñōmō Mæmpocā baī nē emongā inte mōnō weca pōninque, Mæmpocā æbānō emongā, ante do odōmongacāimpā. Wēēñēñedē Wængongui nānō badōnāmaī ingāñedē adocā incæ Bamoncadengā baī inongā inte do quēwengacāimpā. ¹⁶ Ininque Mæmpocā pōnō angā ēñēninque tōmengā

Wengä incæ tōmancoo edæ badongacäimpa. Mönö në adincoo incæ mönö adāmai incō awēmō ongoncoo incæ adocä tōmancoo badongacäimpa. Awēñēdi incæ në ānāni incæ, awēñēdi nāni ēnempodō incæ në tæi piñænāni incæ, öönædē owodōnāni incæ inguipoga quēwēñōnāni incæ mänināni edæ tōmānāni inānite Mæmpocä pönō angä ēñēninque Wængongui Wengä iñōmō badongacäimpa. Badōñongante Wæmpocä, Bitō qui bacäimpa, angä Ao ante badongacäimpa. ¹⁷ Adocä Wængongui Wengä incæ Tānocä quēwengaingä ingampa. Tömengä pönō angä beyænque tömengä nānō badongaincoo iñōmō adoyōmō pönente bai cædinque tömengä nempo godongāmæ gongænte cægompa.

¹⁸ Ayæ tömengä në Önoncamō bai në angä iñongante mönö tömengä ingante mönö godongāmæ pönencabo wæætē tömengä tönō adoyonque bai inōmō imompa. Adocä tömengä nānō Tæiyæ Awēñē baquinque në badongaingä inongä inte tānocä pōni ingacäimpa. Ayæ æmonga pōni nānō ongonquinque tömengä wænte ate tānocä në ñāni ömæmongaingä inongä ingampa. ¹⁹ Edæ, Botō entawēñō incæ botō Wengä tōmānō entawencäcäimpa, ante pönō cædinque Mæmpocä iñōmō nangui togacäimpa. ²⁰ Ayæ tömengä Wengä wepæ awāa gowete wædinque wængä beyænque Wængongui mönö tōmāmō beyæ pönō cædinque piyænē cægacäimpa. Tömengä Wengä tönō mänōmai pönō cæcä beyænque mönö inguipoga tōmāo quēwēmō tönō öönædē tōmāo quēwēñāni tönō tömengä ingante Ao āninque tömengä tönō godongāmæ piyænē cæte quēwēmō adinque Wængongui iñōmō nangui togacäimpa.

²¹ Ayæ mīnitō guiquēñē Wængongui ingante nāwæ pämänte gogaīmīni inte wiwa cædimīni inte ocaidē në piinte bagaīmīni iñōmīnite, ²² Wængongui wæætē, Adocä Codito tömengä baō ēwēnente wængä beyænque mīnitō botō quīmīni badinque botō ayōmo tæiyæ wæmō entawencæmīnimpa, ante cæcampa. Īninque tömengä ñā nëmōngacä ante mīnitō tömengä ayongä wentamō mongæñāmai ĩmīni adinque, Wēnæ wēnæ cæbitapa, ante ædō cæte piinte anguii. ²³ Edæ mīnitō tæi mæñonte bai ongōninque do mīni wede pönēnonque ante cōwē godōmenque pönēmīni ĩninque tömengä weca ponte ongōmaīmīnipa. Mōnitō mönö Codito ingantedō ante mönö pönēñō beyæ mönö watapæ bacäimpa, ante apænemōni ēñēmīnitawo. Mānīne ante ñimpo cædāmai ĩmīni inte mīnitō tömengä weca cōwē ongōmaīmīnipa. Mānīne mīni ēñēñīne ante mōnitō ñōwo inguipoga tōmāo quēwēñāni inānite apænemōni ēñēñānipa.

Mānīne beyænque ante botō Pabodobo në cæbo batabopa.

Mönō pönencabo beyæ botō në cæbo batabopa, ante

²⁴ Mīnitō beyæ nanguī cædinque nantate wædimō incæte botō nanguī tobopa. Ayæ Codito beyæ ante godōmenque wæquēñēmō inte botō tömengä tönō guēa baonque nantate wæbopa. Codito mönö Önoncamō bai në angä iñongante mönö tömengä ingante mönö godongāmæ pönencabo iñōmō tömengä tönō adoyonque bai imompa. Botō iñōmō edæ mönö cabo beyænque caate wæbopa. ²⁵ Ayæ, Codito ingante në pönēñāni beyæ bitō në cæbi badinque botō angāine ante adodō adodō ante tōmānō ante edonque pōni apænēbi ēñencædānimpa, ante Wængongui angä ēñēninque botō mīnitō beyæ në cæquēñēmō do bagaboimpa.

²⁶ Mānīne Wængongui nānō angāine ante wantæpiyæ wē wodonte bai iñonte mönö mæmæidi cōwē ēñēñāmai ingadānimpa. Ñōwo guiquēñē Wængongui tömengä quimō iñōmonte mānīne ante edonque pōni odōmonte apænecä ēñēmompa. ²⁷ Īninque mōnitō imōnite āninque, Waa pōni botō angāine ante mīni waocabo wēñēñedē mīni ēñēñāmai ingāine ante mīnitō ñōwo tæcæ ēñēmīni inte oodeoidi ināmai ināni inānite odōmonte apænemīni ēñencædānimpa, ante Wængongui cæcampa. Mānōmai beyæ mānīne ante apænemōni ēñēninque mīni waa pōni ñāo bai entawenguinque ēñencæmīnimpa. Edæ, Mīnitō mönö Codito ingante ēwocadinque mīni ñāo emāmōdē æiyōmīni watapæ bacäimpa, ante mönö pönēñō ante mānīneque impa.

²⁸ Mönō Codito tömengä nānō ēñēñō ante entawēninque mōnitō adocä ingante mönö Codito ingante ante apænemōnipa. Tömengä nempo quēwēninque mīnitō picænāni bai në ēñēmīni bayōmīnite Wængongui mīnitō ĩmīnite waa acæcäimpa, ante mōnitō tōmānāni inānite waadete odōmonte apænemōnipa. Ayæ, Ēñenguēñē quēwēedāni, ante tōmānāni inānite wææ ante apænemōnipa. ²⁹ Mönō Codito nānō tæi piñænō pōnongä ænte entawēninque botō, Në ēñēmīni bacæmīnimpa, ante cædinque tæi pæ pagænte cōwē nanguī cæbo imopa.

2

¹ Botō mīnitō beyæ nanguī cædinque Daoditea iñōmō quēwēñāni beyæ adobaī nanguī cæbo aedāni. Ayæ wadāni botō awinca adāmai ināni beyæ adobaī tæi pæ pagænte cædinque nanguī cæbopa, ante apænēbo ēñēñedāni. ² Botō, Tōmānāni wæwēñāmai inte wampo pönēninque godongāmæ waadete pönēninque adocabodāni bai bacædānimpa, ante ædæmō

cæbopa. Edæ, Mänōmaī badinque tōmēnāni Codito nānō ēñēnō ædæmō pōni nāni entawenguinque impa, ante pōnēninque cæbopa. Ayæ, Mänōmaī badinque tōmēnāni Wængongui nānō nē wē wodongaingā ingante Codito ingante edonque acædānimpā, ante botō mänōmaī beyæ ante ædæmō pōni odōmonte apænebopa. ³ Edæ, Æbānō i, ante, Æbānō waa cæquūi, ante Wængonguinque nānō nō pōnēnō incæ mōnō Codito mānīnō tōmānō ante ēñēninque waēmō pōni incoo bai wē wodonte mante bai entawengampa. ⁴ Mänōmaīnō ante apænedinque botō, Mīnitō oda cædāmaī incæmīnimpā, ante yewæmonte apænebopa. Edæ wadāni waa pōni tededāni incæ babæ wapiticæ odōmoncæte ante tededāni ināni adinque ēñēnāmaī iedāni, ante wææ āmopa. ⁵ Edæ wayōmō quēwēmo incæ mīnitō weca owote bai botō ōnōwoca pōnēmopa. Ininque botō ayōmo mīnitō mōnō Codito ingante wede pōnente tæi piñænte ongōninque iñacabo cædinque tōingā pōni cæmīnimpā, ante pōnēmopa. Mänōmaī imīnimpā, ante ate bai adinque botō nangui tobopa.

Codito nempo quēwēninque mūimō quēwēmōmpa, ante

⁶ Mänōmaī beyæ botō iūmaī āmopa. Mīnitō Itota Codito ingante mōnō Awēnē ingante Ao ante do æmīnitawo. Ininque tōmengā ingante do Ao ante ænīmīni inte mīnitō ñōwo adobai tōmengā ingante cōwē Ao ante tōmengā nempo quēwēdāni. ⁷ Mīnitō waomīni incæ awæ tæimōwæ ædæmō guiwate pæwæ bai Codito nempo quēwēninque cōwē godōmenque picæmīni bacæmīnimpā. Ayæ mōnitō odōmonte apænemōni mīni ēñēnō bai cædinque godōmenque wede pōnēninque tæi piñænte ongōedāni. Ayæ Wængongui ingante waa ate pōnēninque watapæ apæneedāni.

⁸ Wadāni mā pōnente ōnonquedō ante apænedāni ēñente wædinque mīnitō, Mōnō imonte ō æncæte ante babæ apænedānimpā, āninque wææ cæedāni. Edæ tōmēnāni dicæ Codito nānō odōmonte apænegainō ante apænedāniyaa. Wæætē waodānique nāni odōmonte apænegainonque ante Ao āninque tōmēnāni inguipogaque ante nē pōnēnāni nāni pōnēnō bai nonque ante cædānimpā tōō.

⁹ Edæ Wængongui tōmengā nānō entawēnoncoo incæ mōnō Codito Waocā nē ēñagaingā inongā inte mānīncoo tōmancoo entawēninque nāmā baonga ēñacampa. ¹⁰ Ōönædē awēñēdi incæ inguipoga awēñēdi incæ nangui ināni iñōnāni mōnō Codito adocanque Næænægā pōni inongā inte Tæiyæ Awēnē inongā ingampa. Incæte tōmengā nempo quēwēmīni inte mīnitō tōmengā nānō entawēnō incæ ædæmō entawēmīnimpā. ¹¹ Ininque tōmengā nempo

quēwēninque mīnitō wao ōnonpoca ēō togænāmaī imīni incæte mōnō Codito iñōmō ēō togænte bai cædinque mīnitō baonque ante mīni wiwa cægāinō ante wido cæcā ate mīnitō tæiyæ waēmō entawente quēwēmīnimpā. ¹² Wængongui nē tæi piñænongā inte Itota ingante angā ñāni ōmæmongacāimpā, ante wede pōnēmīni inte mīnitō, Itota tōnō godongāmæ nāñe wænte bai imōmpa, ante æpænē guimīnitapa. Ayæ adobai adocā nē tæi piñænongā ingante wede pōnēninque mīnitō æpænē guidinque Itota tōnō ñāni ōmæmonte godongāmæ tao gongænte quēwēmīnimpā.

¹³ Doyedē ēñēnāmaī cædinque do wænguēñēmīni ingāimīni inte mīnitō inguipogaque ante mīni cæinēwēnō ante ee mongæñōmīnite Wængongui angā ate mīnitō Itota tōnō ñāni ōmæmonte quēwengāmīnimpā. Edæ wēnæ wēnæ mīni cægāinō ante adinque Wængongui pōnō ñimpo cæcā quēwēmīnimpā. ¹⁴ Mīnitō pante wæquinque ēñēnāmaī cæmīnimpā, ante Wængongui wade wade ante wææ angā ēñēninque dodāni adodō adodō ante yewæmōnāni ate wægāmōmpā. Mänōmaī mōnō imonte ancaa wææ ānāni wæmō adinque Codito iñōmō mānīnecoo mōnō wægāinecoo ante wēā godonte bai cæcā ate dæ batimpā. Edæ awæ timpodāni wæninque Itota Codito mānīnō ante do teēmente mongæ māo wido cægacāimpā. ¹⁵ Ayæ māniwāa wæninque adocā tæi ēmongā inte wēñæidi awēñēdi tōnō nē ānāni nāni wænonguēnencacoo gā pe æmpote ō æninque tōmengā, Wænoncaincoo nææmīnimpā wænonguimīnii, ante bai wadāni ayōnānite badete tote bai cægacāimpā.

Ōönædē mōnō entawēnō ante æncæte ante cæedāni, ante

¹⁶ Mōnō ee aquēñēnō incæ bitō quimæ cæmīi, Quimæ bebii, ante pōnō apænte piinte ānānitawo. Wængongui beyæ ante ææmæ cæcæimpā, ante apænte ancæ piinānitawo. Wacā māmō i ate becæimpā, ante wææ ānānitawo. Guēmanguilōnæ incæ quimæ cæbii, ante mīnitō imīnite apænte pancæ cædānitawo. Edæ æcāmenque mänōmaīnō ante apænte ancæ cæyōnānite mīnitō wæætē, Tōmēnāni nāni wææ ānīnō ante Codito wēā godonte bai cægacāimpā, ante pōnēninque guñente wædāmaī incæmīnimpā. ¹⁷ Cængui cænte bai bequi bete bai mōnō ōnōwoca beyæ Codito incæ mōnō guēmanguimāmo bai inongā ingampa. Ininque Codito ingante ænte entawēninque mōnō æbānō cænte bai guēmante bai quēwengui, ante odōmoncæte ante cædinque dodāni iñōmō ōwocodenganque odōmonte bai cædinque wææ angadānimpā.

Mänömaï beyænque tömënäni, İïmaï cæedäni, İïmaï beedäni, İïmaï guëmæedäni, ante wææ angadänimpa.

¹⁸ Pancadäniya mä pönëninque, Önömonque bai inömo inte mönō anquedoidi İnänite waa adinque waa cæcæimpa, ante babæ ante wææ ånewënäni. Ayæ mönitō ånō bai cædämaï İninqe edæ mïnitō ænte entawënō ænåmaï inte wæbåimīnīpa, ante ånewëñönäni mïnitō wæætë guïñente wædåmaï İedäni. Edæ, Mönitō ate bai do adimōni inte åmöni ëñeedäni, ante tömënäni Codito Önöwoca ingante ewocadåmaï İnåni inte mä pönëninque ånewënäni. Edæ, Nämåneque ante pönëninque tömënäni, Mönitō adomönique waa cæmöni İmönīpa, ante nāmå waa adänīpa. ¹⁹ Mönō ocai encamō inte cængui cæninque mönō baonga wepæmë tömåo gogadinque pæmompā. Ayæ adobai mönō ocai encadinque oguëmë tönō baō beyæ cōñe pō cōñe pō cæmompā. Mönō pönencabo adobai Codito tönō adoyonque bai İñömonte tömengä Önöncamō bai İnongå inte nē angå ingampā. Mönō mänömaï İmō incæte tömënäni wæætë nē Önöncamō bai İnongå ingante Baa åninqe nāmå wido tote wææİñō bai edæ wadæ godänīpa. İninqe wææİñō bai İnåni incæ mïnitō İmīnīte wææ ånäni apa quëwëmīnī.

²⁰ Wëëñëfedë Inguipogaque ante näni wææ angaiñō ante nē ëñengåimīni incæte ñöw wæætë Codito tönō godongåmæ wænīmīni inte mïnitō wænte bai İmīni inte mänīne ante ædō cæte ëñenguiimīni. Inguipogaque quëwëmīni İmīnīpa diyæ mänīne ante ëñente cæquëñëmīni Inguimīnī. ²¹ “Gampodåmaï, Yædæ bedåmaï, Bæi ongönåmaï,” ante tömënäni näni wææ ånewënō ante quīnante ëñente cæmīnī. ²² İñæmpā waodånīque edæ, Gampodåmaï, ante näni ånoncoo İñömö tæcæ ænte cæyömīni edæ dobæ wote ba apa ëñëwëmīnī. Inguipogaque quëwënäni näni ånewengaiñō ante ëñëninque tömënäni wææ ånäni. Dodäni näni odömonte apænegaiñō ante ëñëninque wææ ånäni. ²³ Tömënäni, Önömonque bai inömo inte mönō anquedoidi İnänite waa adinque waa cæcæimpa, ante wææ ånewënäni. Ayæ mä pönëninque, Cædåmaï, Cædåmaï, ante nāmå baō incæ pånänīpa. İnåni ocai encadönäni inte wææ ånäni, ante pönëninque wadäni edæ wæætë oda cædänīpa. İñæmpā, Cædåmaï, Cædåmaï, ante näni wææ ånewënō wī eyepæ İ Ininqe nē ëñëñäni Inguipogaque näni cæinëwënō ante godömenque wīwā cædänīpa, ante åmo ëñëmaïmīnīpa.

3

¹ İninqe mönō Codito nē ñäni ömæmongaingå tönō nē ñäni ömæmongåimīni

inte mïnitō æmonga ongoncoo edæ æinente pönëedäni. Codito ñöwō Mæmpo Wængongui tömëmængä İñō æi tæ contate ongongampā, ante pönëninque edæ mïnitō, Åmonga pönī nē quëwengå tömengä nånō entawënō bai adobai entawengæimpa, ante æinente wædinque quëwëedäni. ² Inguipogaque mönō quëwëmåmo ante edæ wædåmaï inte wæætë æmonga mönō quëwenguiñō ante cöwë pönente quëwëedäni. ³ Edæ do wænte bai ingåimīni inte mïnitō ñöwō Codito tönō Wængongui nempō awëmō quëwëñöminite mïnitō quëwenguiñō ante wī edonque acæimpa. ⁴ Mönō Codito mïnitō quëwenguiñō ante nē pönongaingå inte ponte a ongöñongå mänīfedë tömengä ñåo entawëninque nånō tæi ëmömåmodë mïnitō adobai tömengä tönō a ongöminī acæimpa.

Inguipogaque ante wægaïmō inte mönō mīmō quëwëmō

⁵ Mänömaï İmpā, ante wædinque mïnitō Inguipogaque ante mīni cæinëwënō ante wænonte bai æmæwi wido cæedäni. Nånöogængä İnåmaï İñongante godō mönåmaï ee aedäni. Wīwā mīni pönëwënō ante æmæwo wido cæedäni. Wacå ingante mīni toñente wædō ante æmæwo wido cæedäni. Wīwā mīni cæinëwënō ante æmæwo wido cædinque ee ate quëwëedäni. Mīni mæincooqe ante æinëwënō ante æmæwo wido cæte ñimpo cæedäni. Edæ mæincoo ante æinente nē wæcå İñömö tömengä, Mæincoo incæ botō wængongui İmpā, ante bai wæcå apa cæmīnī. ⁶ Nē ëñëñåmaï cædäni Inguipogaque näni cæinëwënonque ante cæyönånite Wængongui nånō pīnguiñåmo oo ponguiñō angüënë. ⁷ Mïnitō incæ doyedë Inguipogaque ante quëwëninque adobai mīni cæinëwënonque ante cægaïmīni İmīnīpa. ⁸ Nöwō guiquënë ængui badåmaï İedäni. Åimīni badåmaï İedäni. Pīnte cædåmaï İedäni. Babæ godō wænæ wænæ ånewënåmaï İedäni. Wīwā apænedåmaï İedäni. Wæætë, Idæwā wænæ wænæ cæte awædō, ante mänīñō tömånō ñimpo cæte ee aedäni. ⁹ Wëëñëfedë mīni entawengåimåmo ante wido cædinque mänīfedë mīni cægaïñō ante adobai nē wido cædīmīni inte ñöwō İñömö edæ wacå ingå wacå ingå babæ wapiticæ apænedåmaï İedäni.

¹⁰ Wæætë mīlmīni edæ quëwencæmīnīmpā, ante Wængongui do pönō badongå entawëmīnīpa. Ayæ mänīñō ante nē Badongaingå İñömö cöwë pönō odömonte apæñecå ëñëninque mïnitō mīlmīni quëwëmīni inte tömengä nånō entawënō bai godömenque godömenque adobai entawëmīni bamīnīpa. ¹¹ Mönō Codito nempō adoyömō pönī İñömö inte mönō guidiegoidi incæ odeoidi incæ

adomō inōmō imōmpa. Nē ēō togæināni incæ bagādāni incæ adomō inōmō imōmpa. Waodāni incæ cowodēidi incæ adomō inōmō imōmpa. Wacā beyænque nē cæte quēwēnāni incæ abæ tawænte ee gote bai nāmā beyænque nē cæmōni incæ mōnō tōmāmō adomō pōni inōmō imōmpa. Edæ mōnō tōmāmō Codito adocanque nempo quēwēninque tōmengā adocanque ingante nē ēwocāmō imōmpa.

¹² Wængonguī, Minitō botō quīmīni badinque tæiyæ waēmō bacæminimpa, ante mīnitō imīnite waadete pōnēninque do apænte ængacāimpa. Īninque tōmengā nānō nē apænte ængaimīni inte mīnitō wadāni inānite waadete pōnente godō waa cæedāni. Nāmā ōnōmoque bai imōpa, ante pōnēedāni. Wadāni inānite ædæmō cæedāni. Æiquedō waa cæquīnāni, ante wædāmai inte piyænē cæte quēwēedāni. ¹³ Ayæ wacā nānō cæinēnō ante cæcā adinque mīnitō pīnāmai ee amīni cæcæedāni. Wacā adobai mīnitō imīnite wīwa cæcā ate wædinque mīnitō godō ĩmpo cæmīni quēwencæcāimpa. Edæ mōnō imonte mōnō Awēnē nānō ĩmpo cægai bai mīnitō adobai pīnāmai inte godō ĩmpo cæedāni. ¹⁴ Ayæ, Adocabomō mōnō baquinque mōnō waadete pōnengæimpa, ante pōnēninque mīnitō tāno wadāni inānite waadete pōnēninque ayæ tōmēnāni inānite mīni godōmenque cæquēnēnō ante cæedāni. ¹⁵ Minitō adocabomīni badinque piyænē cæte quēwencæminimpa, ante Wængonguī mīnitō imīnite aa pegacāimpa cæmīni. Mōnō Awēnē Codito nānō piyænē cædō pōnongā æninque mīnitō piyænē cæte quēwēedāni. Ayæ Wængonguī ingante cōwē waa ate pōnente quēwēedāni.

¹⁶ Mōnō Codito nānō apænegaimō ante ēñēninque mīnitō ædæmō entawēninque nanguī ēñente baedāni. Īninque nanguī ēñēmīni badinque mīni cabo incæ wacā ingā wacā ingā godongāmæ odōmonte apæneedāni. Ayæ nanguī ēñēmīni inte mīnitō wacā ingā wacā ingā waadete pōnēninque, ĩmaī cæcæimpa, ante apæneedāni. Ayæ dodāni Wængonguī ingante waa adinque āmotamīni ante nāni yewæmongainta adinque mīnitō wæætē adodō tee empote æedāni. Ayæ Itota Codito nānō cægainō ante pōnēninque āmotamīni æedāni. Ayæ adobai Wængonguī Ōnōwoca pōnō apænecā ēñente ēwocadinque mīnitō āmotamīni ante adodō tee empote æedāni. Mānōmai āmotamīni āninque Wængonguī ingante cōwē waa ate pōnēninque æedāni. ¹⁷ Ayæ æbāmenque ante apænemīni incæ æbāmenque cæmīni incæ mīnitō, Mōnō Awēnē Itota ēmōwo beyæ impa, ante tōmāā cæedāni. Ayæ tōmengā pōnō cæcā beyænque mīnitō eyepæ inte Mæmpo Wængonguī weca pōninque tōmengā

ingante waa ate pōnēninque apæneedāni.

Mōnō godongāmæ quēwencabo ĩmaī cæte quēwengæimpa

¹⁸ Onquiyæmīni ēñēedāni. Mōnō Awēnē nempo quēwēninque mōnō ēñente cæcæimpa, ante wædinque mīnitō nānōogænāni inānite Ao ante ēñente cæedāni. ¹⁹ Onguīñæmīni ēñēedāni. Minitō nānōogænāni inānite ædæmō waadete pōnēninque tōmēnāni inānite piinte cædāmai iedāni.

²⁰ Wēñæmīni ēñēedāni. Minitō mæmpoidi inānite ædæmō ēñente cæedāni. Edæ mānōmai cæmīni adinque mōnō Awēnē, Waa pōni cæbi abopa, ancæcāimpa. ²¹ Wæmpomīni ēñēedāni. Minitō, Ancaa āmo bai botō wēñængā ænguī badinque guingo imonte wæquēnengā, ante pōnente wædinque wæætē wēñænāni inānite nanguī ānāmai inte waadete pōnō cæedāni.

²² Wacā nānō nē ō ænimīni inte tōmengā beyænque nē cæte quēwēmīni ĩñōmō ēñēedāni. Minitō imīnite nē ō ængaingā ingante nē cæmīni inte mīnitō tōmengā nānō ā bai tōmāā ēñente cæedāni. Edæ, Awēnē Wængonguī incæ botō imote cōwē acampa diyæ, ante guīñente wædinque mīnitō imīnite nē ō ængaingā nānō ayedē incæ tōmengā nānō adāmai ĩñedē incæ cōwē ēñente cæedāni. Waodānique botō imote waa acædānimpa, ante pōnēnāmai inte mīnitō nō pōnēninque cōwē ēñente cæedāni. ²³ Æbāmenque cædinque mīnitō, Wīi waocā beyænque ante cædinque botō Wængonguī Awēnē beyænque ante cæcæboimpa, ante pōnēninque tæī ēwocadinque ee cæedāni. ²⁴ Mōnō Awēnē ĩñōmō tōmengā do nānō angainō bai cædinque mīnitō cægainō beyæ ante eyepæ pōni pōnongā æncæminimpa. Mānōmainō ante pōnente cæedāni. Edæ, Mōnō Awēnē Codito ingante adocanque ingante nē cæmīni ĩminpa, ante āmo ēñēmāimīnīpa. ²⁵ Nē wēnæ wēnæ cæcā guiquēnē tōmengā nānō wēnæ wēnæ cægainganca eyepæ æncæcāimpa. Edæ Wængonguī ĩñōmō wacā ingante wadō wacā ingante wadō ate pōnēnāmai inte tōmāmō imonte apænte āninque pōnō nō pōni paga cæcæcāimpa.

4

¹ Awēnēidi ēñēedāni. Minitō waocā ingante nē ō ænimīni inte ēñēedāni āmopa. Edæ mīnitō Awēnēidi imīni bai mīnitō imīnite nē Ængaingā incæ adobai mīnitō Awēnē ĩnongā inte dōnædē quēwengampa cæmīni. Minitō beyænque cæte nē quēwēnāni inānite mīnitō nōingā cædinque tōmēnāni nāni ænguēnēnō ante adinque eyepæ pædæ godōmīni æncædānimpa.

² Wængongui ingante cōwē apænedinque, Tōmengā æbānō cæcāā, ante cōwā adinque tōmengā ingante waa ate pōnēninque apæneedāni. ³ Codito æbānō cæcāā, ante dodāni nāni ēñēnāmai ingaine incæ botō mānīne ante do ēñēnīmo inte apænebo beyænque botō imote tee mōnedāni wæbopa. Incæte mōnitō mānīne ante apæneyōmōni mīnitō wæætē mōnitō beyæ ante Wængongui ingante apænedinque iīmai ante apæneedāni āmopa. Wængongui ēñēmi. Bitō wi ænete bai cæbi ate Pabodoidi nāni apænebe wadāni mīmōnē guicæimpa, ante apæneedāni. ⁴ Codito æbānō cæcāā, ante botō edonque apænequēnēmo iīmopa. Iīnque mīnitō botō beyæ ante apænedinque, Pabodo edonque apænecæcāimpa, ante Wængongui ingante apæneedāni āmopa. ⁵ Wadāni iñānite bee tēninque mīnitō ocāi encāmīni inte ēñēnte cæedāni. Pōnēnāmai iñāni do ēñencædānimpa, ante waa apænete cæedāni. ⁶ Ayæ Wængongui waadete pōnō apæneca ēñēninque mīnitō adobaī wadāni iñānite waadete pōnō apænedinque waa pōni apæneedāni. Wadāni, Æbānō iī, ante ēñencæte ante wæyōnānite mīnitō wæætē nō pōni ēñēmīni inte nōingā apænemīni ēñencædānimpa.

Waa quēwencæmīnimpa, ānānīpa

⁷ Botō Pabodobo æbānō quēwēmo, ante nē ēñēngā inte Tiquico nōwo mīnitō weca pōnīnque mānīnō ante apæneca ēñencæmīnimpa. Tōmengā mōnō tōniñacā bai iñongante mōnitō tōmengā ingante waa waadete pōnēmōnīpa. Tōmengā mōnō Awēnē nempo quēwēninque mōnitō tōnō godongāmæ cæcā iñongā inte mōnō pōnencabo tōmāmō imonte pōnēninque mōnō beyæ cōwē ædæmō cæcā ingampa. ⁸ Mīnitō, Pabodoidi æbānō quēwēnāni, ante ēñencæte ante wæmīnitawo. Edæ, Tiquico mānīnō ante apænedinque mīnitō iīnīte ædæmō apæneca ēñēninque mīnitō wampo pōnencæmīnimpa, ante cædinque botō nōwo tōmengā ingante mīnitō weca da godōmo pongā aedāni. ⁹ Tiquico goyongā tōmengā tōnō Ōnetīmo mīni cabo nē iñongā incæ guēa gocæcāimpa. Ōnetīmo cōwē ædæmō cæte nē pōnengā ingampa, ante adinque mōnitō tōmengā ingante waadete pōnēmōnīpa. Iīnque tōmēna iñōmō, Pabodoidi weca æbānō cæedāni, ante tōmānō ante apæneda ēñencæmīnimpa.

¹⁰ Botō tōnō guēa tee mōnete ongongā Aditadoco iñōmō tōmengā mīnitō iīnīte, Waa quēwēedāni, angampa. Ayæ Bedēnabee nānō wænquicā Māadoco adobaī, Waa quēwencæmīnimpa, angampa. Tōmengā ingante æbānō waa cæquī, ante do āmo ēñēmīnitapa. Iīnque tōmengā pongā adinque

waa cæedāni. ¹¹ Ayæ wacā Itota Yoto nāni ānongā adobaī, Waa quēwencæmīnimpa, angampa. Botō Wængongui Awēnē Odeye nempo quēwēnāni beyæ cæyōmo oodeoidi incæ wadāni cædāmāi iñōnānite mānīnānique botō tōnō godongāmæ cædinque pōnō ædæmō cædāni æninque botō wampo pōnentabopa.

¹² Ayæ mīni cabo iñongā inte Epapada iñōmō tōmengā Itota Codito ingante nē cædongā inte adobaī, Waa quēwēedāni, angampa. Tōmengā Wængongui ingante nanguī apænedinque, Codotenteidi iñānite bitō godō cæbi ate tōmēnāni picēnāni bai bacædānimpa. Ayæ bitō angainō tōmānō ante ēñēnte cædāni inte tōmēnāni tæi piñænte ēwocacædānimpa, ante tōmengā mīnitō beyæ ante cōwē apænecampa. ¹³ Mīnitō beyæ tōmengā nanguī cæcampa. Daoditea iñōmō nāni pōnencabo beyæ adobaī Yedapodi iñōmō nāni pōnencabo beyæ adobaī tōmengā nanguī cæcampa, ante botō nāwangā apænebo ēñēedāni. ¹⁴ Ayæ, Waa bacædānimpa, ante mōnō nē cædongā tōmengā emōwo Odoca tōmengā iñōmō mōnō nē waadecā ingampa. Tōmengā tōnō Deēma, Waa quēwencæmīnimpa, ante adobaī ānapa. ¹⁵ Ayæ botō Pabodobo beyæ ante wæætē Daoditea iñōmō mōnō tōniñadāni iñānite mīnitō, Waa quēwēedāni, ædāni. Diimpa iñante, Waa quēwēedā, ædāni. Ayæ Codito ingante nāni pōnencabo tōmēnā oncōnē godongāmæ ponte apæneyōnānite mīnitō wæætē botō beyæ apænedinque, Pabodo, Waa quēwēedāni, angampa, ædāni.

¹⁶ Ayæ iīnta botō cadota ante yewæmōinta iīnque adinque mīnitō, Daoditea iñōmō Codito ingante nāni godongāmæ pōnencabo adobaī acædānimpa, ante cædinque da godōmīni ænte acædānimpa. Ayæ daoditeaidi iñānite botō cadota ante yewæmōnīnta adobaī āmīni da pōnōnāni æninque aedāni.

¹⁷ Ayæ Adoquipo ingante apænedinque, Bitō mōnō Awēnē pōnō angā ēñēnīni inte bitō cæquēnēnō ante tōmāā ædæmō cæe, ædāni. ¹⁸ Botō Pabodobo tōmēmo ōnompoca yewæmōninque, Waa quēwēedāni, ante tōmēmo emōwo ante yewæmōmopa. Botō æbānō yæguincamē encapote wæboī, ante pōnēninque mīnitō Wængongui ingante apæneedāni āmopa. Wængongui waadete nānō pōnō cædō ænte entawencæmīnimpa, ante māninque ante yewæmōmopa.

1 Tetadönitenteidi inänite Pabodo cadota ante tänota nänö yewæmongainta

*Pabodo, Waa quëwëedäni, ante
apæneçäimpa*

¹ Botö Pabodobo inömo imopa. Mönö töninada Tidibänö tönö Timoteo tönö godongämæ apænete ate yewæmömo aedäni. Mönö Mæmpo Wængongui nempo ayæ mönö Awënë Itota Codito nempo quëwëningue münitö Tetadönica iñömö quëwëningue Codito ingante godongämæ müni pönencabo ëñeedäni. Mönö Wængongui waadete pönö cæcä ate münitö gänë entawencæminimpa, ante yewæmömönipa.

Tetadönitenteidi nani wede pönëno

² Mönitö möni apæneyedë münitö tömämüni beyæ ante Wængongui ingante cöwë waa ate pönëningue apænemönipa. ³ Münitö Itota ingante æbänö wede pönente cæminüni imünipa, ante ayæ tömengä ingante waadete pönëningue æbänö cæminüni imünipa, ante cöwë apænemönipa. Ayæ münitö wæwëminüni incæ, Mönö Awënë Itota Codito pongä ate watapæ bacæäimpa, ante pönëningue æbänö wæntæye inämaï ee cæminüni imünipa, ante adinque mönitö Wængongui mönö Mæmpo weca æyedëmë ponte apænedinque cöwë mäninö ante pönëningue apænemönipa. ⁴ Mönitö töninämüni, münitö Wængongui nänö në waademüni inöminüni inte ëñeedäni. Tömengä münitö imünite apænte ængacäimpa, ante do ëñëmönipa. ⁵ Edæ Itota ingantedö ante mönitö watapæ möni apænedö ante wii önonquedö ante apænetamönipa. Wæætë Wængongui nämä tæï piñænte në angä beyænque mönitö münitö imünite apænedinque Awënë inte bai apænetamönipa. Wængongui Önöwoca mönitö tönö godongämæ cæcä beyænque mönitö mäninö möni watapæ apænedö ante, Nö impa, ante ædæmö pönëningue apænetamönipa. Mänömaï apænemöni ëñëmüni adinque mönitö, Wængongui münitö imünite apænte ængacäimpa, ante do ëñëmönipa. Ayæ münitö weca quëwëningue mönitö æbänö münitö beyæ ante quëwentamönii, ante do ëñëmünipa.

⁶ Wængongui Önöwoca watapæ nänö topämo ante pönongä ænimüni inte münitö nanguï caate wæminüni incæte Wængongui nänö angainö ante ëñëningue Ao ante æmünitapa. Mönitö æbänö cæmönii, ante adinque Awënë Itota Codito æbänö cæcää, ante adinque münitö adobai möni cæbai cæminüni bamünitapa. ⁷ Ininque Mäatedöniabæ quëwënanüni tönö Acayabæ quëwënanüni

iñömö Itota Codito ingante në pönënanüni inönänüni inte tömënanüni tömänänüni müni cædi adinque müni cæbai adobai cædänitapa. ⁸ Münitö wede pönëningue apænemüni beyænque Wængongui nänö angainö ante Mäatedöniabæ quëwënanüni tönö Acayabæ quëwënanüni ëñënanüni incæte wii mänii mëñömongaque iñömö quëwënanüni ëñënanüni. Wæætë ædömë quëwënanüni iñönänite wadäni münitö Wængongui ingante müni wede pönëmämo ante tededäni do ëñënanüni.

Ininque mönitö mänii beyæ quünante godömenque apænequü. ⁹ Edæ, Mönitö münitö weca ëñacæ pöninque apænemöni ëñëningue münitö æbänö watapæ ëñëmünitapa, ante mäninüni në pönënanüni incæ apænedäni ëñëmönipa. Ayæ adodäni münitö imünitedö ante iïmaï ante apænedänipa. Münitö, Mönitö Wængonguiidi impa, ante müni cönönincacoo incæ ëmö cæte wadæ pöninque mönö Wængongui gämænö pömünitapa, ante apænedäni ëñëmönipa. Ayæ, Näwä Wængongui në Quëwëngongä ingante ëñente cæcæmönimpa, ante pömünitapa, ante apænedäni ëñëmönipa. ¹⁰ Ayæ tömengä Wengä öönæde në quëwëngongä inte ocæ ëmænte poncæcäimpa, ante münitö wänö cömününi imünipa, ante apænedäni ëñëmönipa. Tömengä do wængaingä iñongante Wængongui, Nani ömæmöe, angä në fiani ömæmongaingä ingampa. Ininque Wængongui mönö imonte nänö piinte panguimämo ante wæyömonte tömengä Wengä iñömö ængä beyænque quëwënguimö imoppa.

2

Pabodo Tetadönica iñömö nänö cædö

¹ Mönitö töninämüni ëñeedäni. Mönitö münitö weca möni ëñacæ pönedë möni cædinö wii önonque impa, ante münitö do ëñëmünimpa. ² Mönitö do müni ëñëninö bai mönitö wëenëñedë Pidipoto iñömö quëwëñömonite mäniiñömö quëwënanüni mönitö imönite wænæ wænæ cædäni beyænque wæwente intamönipa. Adodäni mönitö imönite, Münitö wænæ wænæ cæminüni imünipa, ante tedewënanüni ëñëningue wætamönipa, ante münitö adobai ëñëmünipa. Ayæ münitö weca ponte quëwëñömonite woadäni tæiyænanüni mönitö imönite Baa ante, Münitö apænedämaï incæminimpa, ante wææ anäni incæte Wængongui mönitö tönö godongämæ cæcä beyænque tömengä ingantedö ante watapæ möni apænedö ante münitö imünite guñënanämaï apænetamönipa.

³ Edæ mönitö, Wængongui ingante pönëmüni ininque waa imaimpa, ante münitö imünite nanguï apænemöni inte wii babæ wapiticæ pönëningue apænemönipa. Wii wentamö entawëningue pönente

apænemõnipa cæminii. Ayæ adobaï, Minitõ oda cæcæminipa, ante cædämaï inte mõnitõ wii wapiticæ apænemõnipa. ⁴ Wæætë Wængongui mõnitõ imõnite apænedinque, Waa cæmini abopa, äninque, Minitõ Itota ingantedõ ante botõ watapæ apænedõ ante nê apænemõni ëñencædänipa, ante angä ëñëninque mõnitõ nê apænemõni imõnipa. Mõnitõ, Waodäni mõnitõ imõnite waa acædänipa, ante cædämaï inte wæætë, Wængonguinque mõnitõ imõnite waa acæcäimpa, ante cædinque apænemõnipa. Edæ tömengä, Æbänõ entawëmïni, ante mõnõ entawëñõmõ ante nê acä ingampa. ⁵ Wadäni nämä beyænque ante, Waa tedemõni ëñëninque mõnitõ imõnite wæætë pönõ cæcædänipa, ante babæ cædäni bai mõnitõ iñõmõ dicæ mänõmaïnõ ante mõnitõ imõnite babæ cætamõniyaa. Mänõmaïnõ ante do ëñëmïnipa. Ayæ, Mõnitõ wii mõnitõ godonte æinta ante beyæ apænetamõnipa, ante do ëñëmïnipa. Æbänõ cætamõnipa, ante Wængongui nê acä ingampa. ⁶ Waodäni mõnitõ imõnite waa acædänipa, ante mõnitõ dicæ ämõnitawogaa.

Ayæ, Minitõ incæ wadäni incæ mõnitõ imõnite waa acædänipa, ante dicæ ämõnitawogaa. ⁷ Edæ, Itota Codito nänõ da godongäimõni iñõmõni inte mõnitõ mõnitõ imõnite, Pönõmïni æninque quëwencæmõnipa, ämõni bai waa incædõnipa. Wæætë mõnitõ weca quëwëninque mõnitõ wäänä nänõ wëñænäni guiyänäni inänite ædëmõ cædä bai adobaï mõnitõ imõnite cætamõnipa. ⁸ Minitõ imõnite nanguï põni waadete pönemõni inte mõnitõ, Itota ingantedõ ante Wængongui nänõ watapæ apænedõ ante mõnitõ imõnite apænedinque watapæ totamõnipa. Ayæ mõnitõ nõ mõni nê waademini iñõmõnite mõnitõ mõnitõ beyæ quëwentamõnipa. Ayæ mõnitõ beyæ wæmõni incæ adobaï watapæ tobaïmõnipa. ⁹ Mõnitõ tönïñamini ëñëedäni. Nanguï põni mõni cædinõ ante mõnitõ do ëñëmïnipa. Itota ingantedõ ante Wængongui nänõ watapæ apænedõ ante mõnitõ mõnitõ weca quëwente apænedinque, Mõni quëwengäimpa, ante wii eyepæ godõ wædõ ante dicæ antamõniyaa. Wæætë edæ, Minitõ wædämaï incæminipa, ante mõnitõ itædë incæ woyowotæ incæ tömëmõni nanguï cædinque ænte quëwentamõnipa.

¹⁰ Minitõ nê wede pönëmïni weca quëwëninque mõnitõ tæiyæ waëmõ ewocamõni inte nõ cæte quëwëñõmõnite mõnitõ, Wënæ wënæ cæminipa, ante ædõ cæte anguiimïni. Wæætë mõnitõ cædinõ adinque mõnitõ, Mõnitõ æbänõ quëwëmõni imõni, ante do amõni inte nê apænemõni imõnipa. Wængongui adobaï ante do acä ingampa. ¹¹ Edæ waocä mæmpocä tömengä wëñænäni iñõnänite tömengä,

Minitõ ëñenguimõni, ante odõmongä bai mõnitõ adobaï mõnitõ tömämini iñõmõnite adocanque adocanque ingante, Bitõ ëñenguimõni, ante odõmonte apænetamõnipa. Mänõmaï cætamõnipa, ante mõnitõ do ëñëmïnipa. ¹² Mïni quëwëñõ adinque Wængongui tocæcäimpa, ante cædinque mõnitõ tæiyæ waëmõ quëwencæminipa, ante mõnitõ nanguï apænetamõnipa. Ayæ, mõnitõ mänõmaï cæte quëwencæminipa, ante waadete apænetamõnipa. Ayæ adobaï mõnitõ wæætë wæætë apænedinque mõnitõ imõnite adodõ ante ancaa apænetamõnipa. Wængongui iñõmõ, Botõ Awëñë Od-eye nempo quëwëninque mõnitõ botõ ñäõ ëmõñõmõ botõ tönõ godongämæ quëwencæminipa, ante tömengä mõnitõ imõnite aa pëdinque apænte ængampa.

¹³ Ayæ adobaï mõnitõ Wængongui nänõ angainõ ante mõnitõ imõnite apænemõni ëñëninque mõnitõ õ ænte do pönëmïnitapa. Nāwangä Wængongui nänõ angainõ impa, ante adinque mõnitõ, Wii waodäninque nāni angainõ impa, ante pönëninque wæætë, Nāwangä Wængongui nänõ angainõ impa, ante pönëninque õ æmïnitapa. Ìninque mõnitõ nê wede pönëmïni inte Wængongui nänõ angainõ entawëmïni beyænque nanguï cæmini imõnipa, ante ëñëninque mõnitõ Wængongui ingante cõwë waa ate pönente apænemõnipa. ¹⁴ Oodeabæ iñõmõ Wængongui ingante godongämæ nāni pönencabo iñõmõ tömengä nempo quëwëñõnänite oodeoidi tömënäni inänite togænte pänäni wadäni bai mõnitõ mõnitõ tönïñamini iñõmõni mõnitõ õmæ iñõmõ nê quëwëñäni incæ mõnitõ imõnite adobaï cædäni wæminitapa. Mänõmaï cædäni wædinque mõnitõ Oodeabæ iñõmõ Wængongui ingante godongämæ nāni pönencabo wædäni bai adobaï wæmïni bamïnitapa.

¹⁵ Oodeoidi iñõmõ Wængongui beyæ nê apænegaïnäni inänite wænõnāni wængadānipa. Ayæ ate tömënāni pæïnāni iñõmõ Itota Codito ingante wænõnāni wængacäimpa. Ayæ ñiwodāni adocabodāni incæ mõnitõ imõnite adobaï togænte wido cædänitapa. Mänināni nāni cædinõ adinque Wængongui tömënāni inänite ædõ cæte waa aquingää. Adodāni incæ waodāni tömānāni inänite piinte quëwëñõnānipa töõ. ¹⁶ Edæ oodeoidi ināmaï ināni inänite, Codito ængä beyænque mõnitõ quëwencæminipa, ante apænedāmaï incæminipa, ante cæcæte ante mänināni oodeoidi incæ mõnitõ imõnite Baa äninque wææ cædānipa töõ. Mänõmaï cõwë wënæ wënæ cædinque tömënāni wæætë wæætë nāni wënæ wënæ cædincoo idæwaa cædānipa. Idæwaa i Ìninque Wængongui nänõ ænguï bate piñmāmo

tömēnāniya do pongatimpa.

Tetadönitenteidi weca Pabodo ēñacē pōiente wæcampa

¹⁷ Incæte mōnitō tōniñamīni ēñēedāni. Tömēnāni ānāni beyæ mōnitō mīnitō imīnite ēmō cæte godinque wīi wantæpiyæ ante gotamōnipa. Godinque mīnitō imīnite adāmai imōni incæte mōnitō mīnitō beyæ ante cōwē pōnentamōnipa. Mīnitō imīnite nanguī aīnente wæmōni inte mōnitō, Æbānō cæte goquimōnii, ante pōnēninque nanguī cætāmōnipa. ¹⁸ Edæ mīnitō weca pōiente wætāmōnipa. Botō Pabodobo inōmo inte wæætē wæætē nō pōinēmo intabopa. Mōnitō pōinēmōni incæte Tatāna wæætē mōnitō imōni wææ cæcā wætāmōnipa. ¹⁹ Mōnō Itota Codito nānō ponguionæ tōmengā weca ongōninque mōnitō æbānō ante beyæ watapæ bacæimipa, ante pōnēmōni imōnii. Wīi mīnitō beyænque toquimōnii. Edæ nē pōnēmīni inōmīni inte mīnitō do mōni nē watapæ todōmīni imīnitapa. Ayæ waodāni tæi ēmonte gānā cædinque poganta ænte todāni bai mīnitō beyænque ante mōnitō nē toquimōni imōnipa. ²⁰ Nāwangā impa. Waa pōni cæmīni inique mīnitō mōni nē waa amīni inōmīni inte mōni nē watapæ todōmīni imīnipa.

3

¹ Mānōmai beyæ mōnitō, Mīnitō imīnite adāmai inte awædō, āninque, Ædō cæte godōmenque wānō cōmōni inguimōnii, ante pōnēninque mōnatō adomōnaque Atēna iñōmō ongonguēnēmōna imōnapa, ante pōnente wætāmōnapa. ² Ayæ Timoteo nē mōnō tōniñacā ingante mīnitō weca ante da pōnōmōna pongantapa. Tōmengā iñōmō Wængonguī tōnō godongāmæ cædongā iñongante Itota mōnō Codito ingantedō ante mōnō watapæ apænedō ante ēñencædānimpa, ante odōmonte apænedongā ingampa. Tōmengā mīnitō imīnite, Mīni wede pōnēnō ante tæi ongonte quēwēedāni, ante ayæ, Wampo pōnēninque tæi piñænte cæedāni, ante ædæmō apæncæcāimipa, ante mōnatō tōmengā ingante da pōnōmōna pongantapa. ³ Wadāni mīnitō imīnite quiēmē cædāni caate wæmīni incæte tōmāmīni wadō pōnēnāmai inte ñimpo cædāmai incæmīnimpa, ante cædinque Timoteo ingante da pōnōmōna pongantapa. Mōnō imonte cōwē mānōmai cædāni caate wæquēnēmō imompa, ante mīnitō do edonque pōni ēñēmīnipa. ⁴ Ayæ mīnitō weca mōni quēwēñedē mōnitō mīnitō imīnite apænedinque,

Mōnō imonte quiēmē bai togænte pan-guīnānidō anguēnē, ante wæætē wæætē apænetamōnipa. Edæ mīnitō ēñēnō bai mānīnō do batimpa. ⁵ Mānōmai beyæ

botō, Ædō cæte godōmenque wānō cōmo inguimoo, ante, Mīni wede pōnēnō æbānō impa, ante botō ēñencæboimipa, ante Timoteo ingante da pōnōmo pongantapa. Wēnæ awēnē, Oda cæe, ante nē ānewēnongā iñōmō mīnitō imīnite, Oda cæedāni, angā ēñēninque mīnitō wabānō ēñēmīnimpa, ante botō ancai guīñente wætabopa. Mānōmai ēñente cæmīni inique mōnitō cædinō wo ēwente babaimpa, ante pōnentabopa.

⁶ Incæte Timoteo mīnitō weca quēwēninque ñōwoque mōnitō weca ocæ ēmænte pongantapa. Mīni wede pōnēnō ante apænedinque tōmengā, Wede pōnēnānipa, angantapa. Ayæ, Nē waadete pōnēnāni inānipa, ante apæncēcā ēñentamōnapa. Mīnitō mōnatō beyæ cōwē waa pōnēmīni imīnipa, ante tōmengā apæncēcā ēñentamōnapa. Ayæ mōnatō mīnitō imīnite aīnēmōna inte wæmōna bai mīnitō adobai mōnatō imōnate aīnēmīni inte wæmīni imīnipa, angantapa. ⁷ Mānōmai beyæ mōnitō tōniñamīni ēñēedāni. Quiēmē beyæ wæmōna incæ ayæ mōnatō imōnate togænte pānāni wæwēmōna incæte mōnatō mīni wede pōnēnō beyænque wæætē wampo pōnente batāmōnapa. ⁸ Mīnitō mōnō Awēnē ingante ñimpo cædāmai pōnēmīni beyænque mōnatō ñōwo wampo pōnente bai quēwēmōna imōnapa. ⁹ Mōnatō mōnō Mæmpo Wængonguī weca ongōninque mīnitō beyæ nanguī watapæ tomōna inte wæætē apænemōnapa. Incæte mīnitō beyæ ante Wængonguī ingante ædō cæte waa ate pōnente eyepæ apænequimōnaa. ¹⁰ Mīnitō mīni wede pōnēnō ante æbānō ayæ wīi eyepæ pōnēmīni, ante wæmōnipa. Inique, Mīnitō imīnite wæætē adinque mōnitō odōmonte apænemōni ēñēninque mīnitō eyepæ pōncæmīnimpa, ante cædinque mōnitō woyowotæ itadē Wængonguī ingante nō nanguī pōni apænemōni imōnipa.

¹¹ Wængonguī mōnō Mæmpo incæ mōnō Awēnē Itota Codito tōnō mōni goquīnō ante tōinō pīnonte bai cæda ate mīnitō weca gocæmōnimpa. ¹² Mōnitō mīnitō imīnite godōmenque waadete pōnēmōni bai mōnō Awēnē Itota pōnō cæcā ate mīnitō adobai mīnitō weca wacā ingā wacā ingā godōmenque godōmenque waadete pōncæmīnimpa, āmōnipa. Ayæ waodāni tōmānāni inānite godōmenque waadete pōncæmīnimpa, āmōnipa. ¹³ Tōmengā pōnō cæcā beyænque mīnitō tæimō entawente incæmīnimpa, āmōnipa. Edæ mōnō Awēnē Itota quīnāni nē tæiyæ wæmō ēwocadāni tōmānāni tōmengā tōnō godongāmæ pōncædānimpa. Tömēnāni nāni pōñedē mīnitō iñōmō Wængonguī mōnō Mæmpo weca pōmīni adinque tōmengā ædō cæte, Wēnæ wēnæ cæmīni imīnipa, ante anguingā. Mīnitō tæiyæ wæmō ēwocāmīni

incæminimpa, ämönipa.

4

Wængongui waa acæcäimpa, ante mönō quëwëno ante

¹ Mönitō tönñamini ëñëedäni. Adodeque ayæ apænequimōni imönipa. Mini quëwëno ante Wængongui waa acæcäimpa, ante mönitō, İmaï quëwëedäni, ante do wææ odömonte apænemōni ëñëeminitawo. İninque mīnitō Ao ante quëwënomini iminipa. Nōwo İñömō mönitō Awënë Itota ëmōwo ante apænedinque mīnitō iminite, Mäninonque ante gomonga cæte quëwencæminimpa, ante ancaa apænemönipa.

² Awënë Itota nänō äno ante ëñente cædinque mönitō mīnitō iminite wææ äninque, İmaï cæedäni, antamönipa. Mäninō möni wææ ante odömonte apænedō ante mīnitō do ëñëniminipa. ³ Wængongui nänō äno İñömō İmaï impa. Mīnitō İñömō tæiyæ waëmō ewocate quëwenguënemini iminipa. Wacä nänöögæ ingante godō towente cædämaï inte edæ önonque mīni nänöögæque quëwenguënemini iminipa. ⁴ Onguiñæmīni tömämīni İñömō, Botō moncæboimpa, ante cædinque mīnitō, Æbänō cæte nänöögæ æmo ate Wængongui tönō waodäni waa aquinänii, ante ëñenguënemini iminipa. Mīnitō, Tæiyæ waëmō ewocadinque ængæimpa, ante ëñenguënemini iminipa. ⁵ Wīi wadäni bai, Wængongui ingante æbänō ingangä ingää, ante ëñënämaï İnäni bai onquiyæque ante näni towenonque ante pönënamäi quëwencæminimpa. ⁶ Mäninō ante nē pönengä İñömō, Botō tönñacä nänöögængä ingampa, ante pönëninque tömengä nänöögæ ingante towente cædämaï İninque tömengä ingante wënæ wënæ cædämaï incæcäimpa.

İmaï wënæ wënæ cædäni İnänite Awënë Itota pancæcäimpa. Wëëñëñedë mäninō ante mīnitō iminite apænedinque do wææ angamönimpa. ⁷ Edæ Wængongui mönō İmonte wīi, Towencæminimpa, ante apænte ængacäimpa. Wæætë, Mīnitō tæiyæ waëmō ewocate quëwencæminimpa, ante tömengä mönō İmonte apænte ængacäimpa. ⁸ Mänömaï beyæ æcänō mäninō ante Pabodo nänō, İmaï cæedäni, ante nänō wææ odömonte apænedō ëñëninque Baa äna İñömō tömengä wīi waodänique İnänite ëñënämaï inte Baa angä ingampa. Wæætë Wængongui mīnitō iminite nänō Tæiyæ Waëmō Önowoca nē pönongä ingante ëñënämaï inte Baa angä aca quëwëminii.

⁹ Mīni pönencabo mīni tönñadäni İñönänite mīni waadete pönëno ante mönitō quīnante yewæmonguimōnii. Edæ mīnitō tömëmini iminite, Wacä ingä wacä ingä waadete

pönencæminimpa, ante Wængongui odömonte apæneçä ëñëeminitapa tōö. ¹⁰ Nō İmpa. Mäatedöniabæ tömämæ İñömō mönō pönencabo mönō tönñadäni tömänäni İnänite do waadete pönëmini iminipa. Incæte möni tönñamini, Mīnitō mäninō ante gomonga cæte quëwencæminimpa, ante ancaa apænemönipa. ¹¹ Mīnitō piyænë cæte quëwencæminimpa. Wadäni, Æbänō cæquëñänäni İnänii, ante cöwë änamäi incæminimpa. Ayæ, Wæntæye İnämaï inte mīni önopoca cæte quëwencæminimpa. Mäninō do möni apænedō bai mīnitō, Cæinëmönipa, ante cæcæminimpa, ämönipa. ¹² Mänömaï cæmīni bai İimō İñō İimō İñō mīni quëwëno adinque wadäni nē pönënamäi İnäni wæætë mīnitō iminite waa acædänimpa. Ayæ adobaï mīnitō waodäni İnänite, Pönömīni æncæmönimpa, ante änewënämaï quëwencæminimpa.

Mönō Awënë Itota nänō occë ëmænte ponguionæ

¹³ Mönitō tönñamini ëñëedäni. Nē æmæwo wængainäni İñömō æbänō baquänäni, ante mīnitō ëñencæminimpa, ante yewæmömönipa. Wadäni, Mönō näni ömæmongæimpa, ante pönënamäi İnäni inte wæwënäni bai mīnitō wīi adobaï wæwëmini incæminimpa, ante yewæmömönipa. ¹⁴ Itota æmæwo wæningä incæ näni ömæmonte İnogäimpa, ante pönëmō İmopa. Itota ingante pönente nē wængainäni İñönänite Wængongui İñömō mäninäni İnänite Itota tönō tömengä weca æte mämongä poncædänimpa, ante adobaï pönëmopa.

¹⁵ Wængongui nänō apænedō bai mönitō İmaï ante mīnitō iminite apænemönipa. Awënë Itota nänō ponguionæ mönō nē mīimō quëwëmō inte ayæ ongömō İñömō mönō wīi täno tömengä weca gocæmöimpa. Wæætë tömengä ingante pönëninque nē æmæwo wængainäni inte mäninäni İñömō täno goquänänidō angüënë. ¹⁶ Edæ mönō Awënë Wængongui nänō wææ änonque ante yedæ äñongä Wængongui anquedoidi tæiyæ awënë aa pecæcäimpa. Wængongui todompeta näni ancadeca adocanque we we öncæ cæyongä mönō Awënë Codito incæ öönædë quëwente pō wææncæcäimpa. Pō wææñongä tömengä ingante nē pönente wængainäni tömënäni täno näni ömæmoncædänimpa. ¹⁷ Ayæ ate Wængongui cæcä beyænque mönō nē mīimō quëwëmō inte ayæ ongömō İñömō mönō tömënäni tönō godongämæ boguimancodë æicæmöimpa. Boguimancodë æidinque mönō Awënë öönædë İno wææ pöñongante mönō tömengä ingante bee tencæmöimpa. İninque cöwë Awënë weca quëwencæmöimpa. ¹⁸ Mänömaï beyæ, Mönō Awënë Codito

incæ öönæde quewente pö wææncæcäimpa, ante pönëninge wampo pönencædänimpa, ante cædinqe mīnitō wacā ingā wacā ingā ædæmō apæneedāni.

5

1 Nōwo mōnitō tōniñamīni ēñēedāni. Ædōnædō māniū baquīl, ante mīnitō imīnite ædō cæte yewæmonguimōnii. ² Edæ mōnō Awēnē Itota nānō ponguionæ iñōmō nē awēmō ængā woyowotæ iñontobæ pō guicā bai iñontobæ baquīnō anguēnē, ante mīnitō tōmēmīni waa ēñēmīnīpa edæ. ³ Waodāni, Mōnō piyænē cæte guīñēnāmaī quēwēmōmpa, ante nāni tedeyedē ēnengā iñontobæ wēñæ nantate wæcā bai tōmēnāni adobai iñontobæ nāni ōmæ ēwenguīnō baquīnō anguēnē. Inīnque ædō cæte wodii wīnonguīnānii.

4 Incæte mīnitō mōnitō tōniñamīni ēñēedāni. Māniōnæ nāni wæwente ēonæ nē awēmō ænongā pō guicā bai iñontobæ iñnque bayante mīnitō wīl wēmō iñōmō quēwēmīni inte guīñēnāmaī incæmīnīmpa. ⁵ Mīnitō Wængonguī wēñæmīni imīni iñnque ñāō iñōmō tōmāmīni quēwēmīni imīnīpa. Mōnō cōwē wentamō iñōmō cædōnāni bai wīl imōimpa. ⁶ Mānōmaī beyæ mōnō wīl wadāni mō ñōnāni bai mongæimpa. Wæætē mōnō ñāni ōmæmōnīnque nāmā wææ ante quēwēmō ingæimpa. ⁷ Edæ tōmēnāni nē mōnāni iñōmō woyowotæ mōnāni inānīpa. Ayæ wadāni tī nāmæ bedīnque nē quidi quidi dowænte ināni iñōmō woyowotæ bete badānīpa. ⁸ Incæte mōnō ñāō iñōmō cægōmō inte nāmā wææ ante quēwēmō ingæimpa. Tæīneta wææ wēñate bai cædīnque Itota ingante mōnō wede pōnēnō ante mōnō waadete pōnēnō ante mōnō entawente quēwengæimpa. Tæīneta ocabogata wææ encate bai cædīnque mōnō edæ, Wængonguī ængā beyænque quēwæncæmōimpa, ante pōnēnō ante mōnō ēwocate quēwengæimpa. ⁹ Edæ Wængonguī nānō ænguī bate piñguīlāmō ante tōmēngā, Wīl wæwæncæmīnīmpa, ante mōnō imonte apænte ængacāimpa. Wæætē mōnō Awēnē Itota beyæ tōmēngā mōnō imonte ængā beyænque quēwæncæmōimpa. ¹⁰ Tōmēngā, Botō tōnō quēwæncæmīnīmpa, ante mōnō beyæ wængacāimpa. Inīnque mīl imō incæ wænte imō incæ mōnō cōwē tōmēngā wæcā quēwæncæmōimpa. ¹¹ Mānōmaī beyæ mīnitō iñōmō do cæmīni bai gomonga cæedāni. Wampo pönencædänimpa, ante cædīnque mīnitō wacā ingā wacā ingā ædæmō apænedīnque, Æmæwo pægaimīni inte tæī piñænte cæedāni, ante odōmonte apæneedāni.

Mōnō tōniñadāni inānīte Pabodo nānō ānō

¹² Nōwo mōnitō tōniñamīni ēñēedāni. Mīnitō imīnite iīmaī apænemōnīpa. Mīnitō wæcā nē nangui odōmonte apænedāni iñōnānīte mīnitō tōmēnāni inānīte waa acæmīnīmpa, āmōnīpa. Edæ Awēnē Itota apænte nānō ænīnāni inte tōmēnāni, Mīnitō iīmaī waa quēwēedāni, ante mīnitō imīnite nē aadāni inānīpa. ¹³ Tōmēnāni nāni cædō beyænque mīnitō tōmēnāni inānīte godōmenque nangui waa amīni inte waadete pōnēedāni. Mīnitō wacā ingā wacā ingā piyænē cæte quēwēedāni.

¹⁴ Mōnitō tōniñamīni ēñēedāni. Mīnitō imīnite iīmaī ante ancaā āmōnīpa. Wæntæye ināni inānīte wææ ante apæneedāni. Guīñente ināni wampo pönencædänimpa, ante tōmēnāni inānīte ædæmō apæneedāni. Æmæ pönēnāni tōnō godongāmæ cæedāni. Wadāni tōmānāni inānīte mīnitō waadete ee cæedāni āmōnīpa.

¹⁵ Æcāmenque ingante wadāni wēnæ wēnæ cædāni adīnque mīnitō Baa āmīni beyænque māniñāni wæætēdō wæætē nāēmæ wēnæ wēnæ cædāmaī incædänimpa. Wæætē wacā ingā wacā ingā cōwē waa cæcæmōnīmpa, ante pönēnīnque cæedāni. Ayæ wadāni tōmānāni inānīte adobai cæedāni.

¹⁶ Mīnitō cōwē watapæ tote quēwēedāni. ¹⁷ Wængonguī ingante woyowotæ itædē apænete quēwēedāni. ¹⁸ Mīni quēwenganca quīēmē bai ba incæte mīnitō cōwē Wængonguī ingante waa ate pönēnīnque apæneedāni. Edæ Itota Codito nempo nē quēwēmīni inte māniñō ante mīnitō beyæ ante Wængonguī nānō ānō impa.

¹⁹ Wængonguī Ōnōwoca nānō cæinō adīnque mīnitō tōmēngā ingante ædō cæte, Cædāmaī ie, ante wææ anguīmīnii. ²⁰ Wængonguī beyæ nē apænedāni nāni apænedō ēñēnīnque mīnitō badete todāmaī quēwēedāni. ²¹ Wæætē waodāni nāni apænedō tōmānō ante ēñēnīnque, Æbānō ī, ante edonque ēñengæimpa, ante cædīnque mīnitō, Nō nāni ānō ī, Babæ nāni ānō ī, ante pönēnīnque do ēñencæmīnīmpa. Waa ānō impa, ante ēñēnīnque mīnitō māniñō ante ō ænte bai quēwēedāni. ²² Quīēmē wēnæ wēnæ cæquīi, ante adīnque mīnitō Baa ante gomō ædāni.

²³ Wængonguī incæ nē piyænē cædongā inte pōnō cæcā beyænque ædæmō tæiyæ wæmō entawēmīni incæmīnīmpa. Awēnē Itota mōnō Codito tōmēngā nānō ponguīnganca mīnitō iñōmō Wængonguī pōnō cæcā ate mīnitō mīmō incæ ōnōwoca incæ baonga incæ wēnæ wēnæ cædāmaī incæmīnīmpa. ²⁴ Wængonguī nānō nē apænte ænīmīni iñōmīnīte tōmēngā mīnitō imīnite cōwē pönēnīnque tōmēngā nānō ānō bai ædæmō cæcæcāimpa.

*Pabodo, Waa quëwencæminimpa,
angampa*

²⁵ Mönitö tönĩĩamĩni iĩömö ëñëedáni.
Minitö mönitö beyæ ante Wængonguí
ingante apæneedáni. ²⁶ Minitö
pönencabo iĩömĩnite mönitö tãmãmĩni
waa quëwencæminimpa, ante waadete
pönëningue âmönipa. ²⁷ Edæ Awënë
Itota ëñëñongä botö munitö imĩnite wææ
ante, İi yewæmõinta adinque munitö mĩni
pönencabo iĩömĩnite adocanque ingante
ãmĩni tãmãnãni ëñëñõnãni tãmengä adotaa
adinque apænecä ëñencædãnimpa, âmopa.
²⁸ Awënë Itota mönõ Codito munitö imĩnite
waadete pönõ cæcæcãimpa, ante botö
mãninque ante yewæmõmopa.

2 Tetadönitenteidi inänite Pabodo cadota ante ayänta nänö yewæmongainta

*Pabodo, Waa quëwëedäni, ante
apænecampa*

¹ Botö Pabodobo inömo imopa. Mönö töninada Tidibänö tönö Timoteo tönö godongämæ apænete ate yewæmömo aedäni. Tetadönica inömo quëwëmini inte Codito ingante godongämæ mini pönencabo inömini inte ëñëedäni. Minitö mönö Mæmpo Wængongui nempo ayæ mönö Awënë Itota Codito nempo quëwëmini iminipa. ² Mönö Mæmpo Wængongui tönö mönö Awënë Itota Codito waadete pönö cæda ate minitö gänë entawencæminimpa, ante yewæmömönipa.

*Itota Codito pongä ate Wængongui apænte
pancæcäimpa*

³ Mönitö töninämäni ëñëedäni. Mini wede pönëno godömenque pæte bai impa, ante ayæ tömämäni wacä ingä wacä ingä mini waadete pönëno waa pönü pæte bai iminipa. Mänömai beyæ mönitö minitö beyæ ante Wængongui ingante cöwë waa ate pönëninque apænequënmöni imönipa. ⁴ Wadäni minitö iminite quïëmë togæwëninque wënæ wënæ cædäni caate wæmini incæ quïëmë beyæ wæwëmini incæ mönitö wëntæye inämai inte ee cæminipa. Mänömai beyæ Wængongui ingante godongämæ nani pönencabo wayömö wayömö quëwëñönanite mönitö incæ mini cæinö ante waa adinque cöwë apænemönipa. Ayæ mini wede pönëno ante cöwë apænemönipa. ⁵ Mäninö ante beyæ Wængongui apænte nänö panguinö ante, Tömengä cöwë nö panguingänö anguënë, ante do ëñëmompä. Mänömai beyæ mönitö Wængongui Awënë Odeye nempo guicæte ante eyepæ waa pönü bacæminimpa. Minitö do mäninö Wængongui nempo mini öönædë quëwëguinö beyæ wæwente quëwëminipa.

⁶ Wængongui në nö cædongä ingampa. Edæ wadäni minitö iminite wënæ wënæ cædäni ate wæwëmini inömini tömengä wæætë tömënanäni inänite wënæ wënæ cæcä ate wæwencædänimpa. ⁷ Ayæ minitö në wæwëmini inöminite pönö cædinque tömengä mönitö imönite adobai pönö cæcä ate tömämö mönö wæwënamai baquimö imompä.

Mönö Awënë Itota tönö tömengä anquedoidi në tæi piñænte cædäni tönö öönædë ongonte pö gonga bæcote bai godongämæ wæññönäni tömämö ayömö mänömai bacæimpa. ⁸ Mönö Awënë Itota ingantedö ante mönö watapæ apænëdö ante në ëñënamai cædäni inömo,

Wængongui æbänö ingaingä ingä, ante ëñënamai inäni inönanite tömengä mäninäni inänite pante cæcæcäimpa. ⁹ Wængongui adodäni inänite päningue æmæwo wo ewencæcäimpa. Tömënanäni inömo Awënë Itota weca tömengä nänö tæi piñæmämo wæmö pönü nänö emöñömo mäninömo pö guidämai incædänimpa, ante Wængongui wææ cæcæcäimpa. ¹⁰ Awënë Itota nänö ponguionæ Wængongui mänömai cæcæcäimpa. Mänionæ Itota quinäni inömo në tæiyæ wæmö ewocate quëwënanäni inte tömengä ingante waa acædänimpa, ante pancæcäimpa. Ayæ tömengä në pönënanäni weca pönongante tömënanäni tömänäni, Tömengä waa pönü cæcä amönipa, ante watapæ ancædänimpa, ante cæcæte ante pancæcäimpa. Ayæ minitö adobai mönitö apænëdö ante ëñëninque pönëmini inte tömengä quimäni inömo mönitö tönö adobai cæcæminimpa, ante cæcæte ante pancæcäimpa.

¹¹ Mänömai beyæ mönitö minitö beyæ ante woyowotæ itædë Wængongui ingante apænemönipa. Wængongui, Mini quëwëguinö ante quëwencæminimpa, ante mönitö iminite apænte ængä inique mönitö, Minitö eyepæ waa pönü bacæminimpa, ante mönö Mæmpo Wængongui ingante apænemönipa. Minitö, Mönitö waa cæcæmönimpa, ante mini änö bai tömänö ante Wængongui nänö tæi piñæmämo inte inique cæcæcäimpa, ante apænemönipa. Ayæ mini wede pönëno beyæ mönitö cæquino tömänö ante tömengä adobai inique cæcæcäimpa. ¹² Mönö Awënë Itota pönö cæcä beyænque mönitö waa pönü cæmini adinque wadäni tömengä emöwo ante waa ate apænecædänimpa. Ayæ tömengä mänömai cæcä beyænque wadäni, Minitö waa quëwëmini iminipa, ante minitö iminite waa acædänimpa. Mönö Mæmpo Wængongui tönö mönö Awënë Itota waadete pönö cæda bai mänömai bacæimpa, ante mönitö mäninö ante Wængongui ingante apænemönipa.

2

*Mönö Awënë Itota nänö ponguionæ
æbänö baquü, ante*

¹ Mönitö töninämäni ëñëedäni. Mönö Awënë Itota Codito nänö ponguionö ante amönipa. Ayæ tömengä æbänö, Botö weca pödäni, ante gæcä goquimö imompä, ante apænëdinque minitö iminite ilmai amönipa. ² Minitö weca quëwënanäni pancadänäni inömo, Mönö Awënë nänö ponguionæ do batimpa, ante änäni ëñëninque minitö idiquibæ pönënamai bacæminimpa, amönipa. Edæ mönitö Wængongui beyæ në apænemöni inte möni apæneyedë

incæ möni odömönte apæneyedē incæ möni yewæmōintaa yewæmōñedē incæ æyedēmē incæ apænemōnipa, ante mänināni iñōmō mōnitō imōñitedō ante apænedinque, Pabodoidi mäninō ante apænedāni inānipa, ante dededāni ēñēninque mīnitō guīñente wædāmaī iedāni ämōnipa. ³Æcāmenque angā æbāmē nānō äñō ēñēninque mīnitō oda cæte godāmaī iedāni.

Edæ waodāni tæiyæñāni Wængongui ingante Baa ante wadæ godāni ate wacā nē wiwa cæcā inte pongā acæīmpa. Ayæ tōmengā pongā ate mōñō Awēñē nānō ponguīōnæ bacæīmpa. Māningā nē wiwa cædongā iñōmō Wængongui æmæwo nānō nē wo ewenguingā ingampa. ⁴Æcāmenque ingante, Wængongui ingampa, ante waodāni waa adinque ædæ wææñinque apænedāni incæ ayæ quiēmē adinque, Wængongui impa, ante waa adinque apænedāni incæ māningā nē wiwa cædongā iñōmō wængonguīdi nāni nē äñōñāni tōmāñāni ināñite Baa äñinque nāmā ængō cæte bai cæcā inongampa. Wængongui oncō tæiyæ waēmō oncōñē adocā pō guīte tæ contadinque, Botō tōmēmō wængonguīmo inōmō imopa, angā ingampa.

⁵Botō mīnitō weca quēwēñedē mäninō ante mīnitō imīñite apæneta bopa. Wī ēñēmīnitawo. ⁶Adocā nē wiwa cædongā iñōmō Wængongui nānō äñōnæ māñiñōnæque edonque pongā acædāñimpa. Inique quīñō beyæ ante māningā ayæ pōñāmaī ingāā, ante mīnitō ñōwo do ēñēmīnipa. ⁷Adocā awēmō nānō wiwa cæpāmo incæ do ēñente cædāni inte waodāni tæiyæñāni quiēmē wiwa i, ante do cædāñipa. Incæte tōmēñāni ināñite, Wīwa cædāmaī iedāni, ante nē wææ cædongā iñōmō adodō ante godōmenque wææ cæcā ingampa. Nē wææ cæcā ingante guīquēñē wacā wæætē, Māninganca idæwaa, äñinque o ængā wadæ gocæcāimpa. ⁸Māñiñedē nē wiwa cædongā iñōmō edonque pongā acædāñimpa. Incæte Awēñē Itota pōñinque tōmengā nānō oō guēmāmāmo inte māningā ingante wæñongā wænguingā ingampa. Tōmengā ñāō apāite emōñongā inte pongā adinque nē wiwa cædongā guīquēñē æmæwo wo ewente bacæcāimpa. ⁹Wīwa cædongā ingante Tatāna nānō tæi piñæmāmo inte da pōñongā ponguingā ingampa. Tōmengā nānō mā cæ bai quiēmē bamōñengæ cæcā adinque waodāni, Æbāñō cæcāā, ante oda cæte gocædāñimpa. ¹⁰Ayæ quiēmē wēñæ wēñæ nānō cæpāmo beyæ nē æmæwo wo ewente baquīñāni iñōmō oda cæte godāñipa. Edæ Wængongui nāwangā nānō angaiñō ante waadete pōñēñāmaī iñōñāñite Wængongui tōmēñāni ināñite, Quēwencæmīñimpa, ante ædō cæte ænguingāā. Māñōmaī beyæ

tōmēñāni æmæwo wo ewente bacædāñimpa.

¹¹Māñōmaī beyæ, Tōmēñāni nē wiwa cædongā wapiticæ nāñō angaiñō ante pōñencædāñimpa, ante cædinque Wængongui tæi piñænte cæcā beyænque tōmēñāni babæ ante pōñente oda cædāñipa. ¹²Edæ Wængongui nāwangā nāñō angaiñō ante nē pōñēñāmaī ināñāni inte wæætē, Mōñō wentamō mongæmāmo incæ waa impa, ante watapæ todināni iñōñāñite Wængongui mänināni tōmāñāni ināñite apænte ante pancæte ante māñōmaī cæcampa.

Wængongui, Quēwencæmīñimpa, ante nē apænte æñināni

¹³Mōñitō tōñiñāñini mīnitō mōñō Awēñē Itota nāñō nē waademīni inte ēñēdāni. Inguipoga badōñāmaī iñedē Wængongui mīnitō imīñite do, Quēwencæmīñimpa, ante apænte ængacāimpa, ante mōñitō mīnitō beyæ ante tōmengā ingante waa ate pōñēninque cōwē apæñequēñēmōni imōnipa. Tōmengā iñōmō, Botō Öñowoca pōñō cæcā ate tæiyæ waēmō ewocamīni inte mīnitō nāwangā botō angaiñō ante pōñēmīni beyæ quēwencæmīñimpa, ante mīnitō imīñite ængacāimpa. ¹⁴Itota ingantedō ante mōñitō watapæ apænedō beyæ Wængongui, Quēwencæmīñimpa, ante mīnitō imīñite apænte ængacāimpa. Tōmengā, Awēñē Itota Codito ñāō nāñō emōñō bai mīnitō adobai ñāō bai entawencæmīñimpa, ante cædinque mīnitō imīñite apænte ængacāimpa.

¹⁵Mōñitō tōñiñāñini ēñēdāni. Māñōmaī beyæ tæi ongonte quēwēdāni. Edæ mōñitō öñone inte tedemōni ēñēmīñini incæ yewæmōintaa yewæmōmōni adinque ēñēmīñini incæ mīnitō mōñitō odömönte apænediñō ante ñimpo cædāmaī quēwēdāni. ¹⁶Mōñō Mæmpo Wængongui mōñō imonte nē waadecā inte pōñō ædæmō cæcā ate mōñō, Tōmengā weca cōwē quēwenguiñō imoppa, ante pōñēninque wampo pōñēmō inte quēwēmoppa. Ayæ, Waa bacæimpa, ante mōñō pōñēmoppa. Inique tōmengā tōñō mōñō Awēñē Itota Codito, Iñāñi cæcædāimpa, ante ämōnipa. ¹⁷Tōmēna ædæmō apæñeda beyænque mīnitō wampo pōñēninque tæi ongonte quēwencæmīñimpa. Ayæ tōmēna cæda beyænque mīnitō æmæwo pægañimīni inte tōmāā mīni waa cædō ante mīni waa äñō ante tæi piñænte cæcæmīñimpa.

3

Mīnitō mōñitō beyæ ante Wængongui ingante apæñeedāni

¹Adodeque ante inique yewæmōmōñimpa. Mōñitō tōñiñāñini ēñēdāni. Mīnitō mōñitō beyæ ante Wængongui ingante iñāñi apæñeedāni. Mōñitō wayōmō wayōmō gote möni apæneyōmō mōñō Awēñē nāñō angaiñō ante nanguī ināñi quingæ ēñencædāñimpa, ante apæñeedāni. Ayæ,

Minitö bai wadäni adobai ii äno ante Wængongui ingante waa ate pönëninque æncædänimpa, ante mäninö ante Wængongui ingante apæneedäni. ² Wadäni në wënæ wënæ cædäni inte wiwa cædäni iñomö tömënäni mönitö imönite wënæ wënæ cædämai, ante mänii beyæ ante munitö adobai Wængongui ingante apæneedäni. Edæ wii waodäni tömänäni pönënäni inänipa.

³ Incæte mönö Awënë cöwë ædæmö aacä inongä ingampa. Tömengä pönö cæcä ate munitö æmæwo pægälmäni inte tæi piñænte cæcæminimpa. Ayæ, Tatäna munitö imönite wënæ wënæ cædämai incæcäimpa, ante Wængongui adobai aacä incæcäimpa. ⁴ Minitö imönite möni wææ äno ante ëñëninque do cæminä incæ godömenque adodö cæcæminimpa, ante Wængongui pönö cæcæcäimpa, ante mönitö do pönëmönipa. ⁵ Wængongui nänö waadete pönëno ante ëñencæminimpa, ante mönö Awënë taadö ëñente odömönte bai pönö odömongä ate munitö mïmönë ëñencæminimpa. Itota Codito pönö cæcä beyænque munitö wæntæye inämai inte ee cæcæminimpa.

Cæcæte ante mönö cæquëñëno

⁶ Mönitö töniñamäni ëñëedäni. Mönitö mönö Awënë Itota Codito ëmowo ante munitö imönite wææ ämönipa. Mönö töniñadäni pancadäniya wæntæye inäni adinque ayæ möni odömönte apænedö möni ëñente æninö bai quëwëñämai inäni adinque munitö iñomö mäninäni tömänäni inänite gomö aedäni.

⁷ Mönitö cægäi bai munitö æbänö adobai cæquëñëmïni imönipa, ante edæ tömëmïni do ëñëmïnipa. Mönitö munitö weca quëwëñedë wæntæye inämai quëwentamönipa. ⁸ Ayæ adobai æcämenque cængui ante nani pönöni æninque mönitö önonque ænämai inte wæætë paga cæte cæntamönipa. Ayæ, Minitö cænguinque ante pönëninque wædämai incæminimpa, ante mönitö, Tömëmönäni cængui cæncæmönimpa, ante woyowotæ itædë nangui cædinque quëwentamönipa. ⁹ Mönitö munitö imönite, Möni quëwengæimpa, ante, Cængui tönö mönitö owoquincö pönömïni æncæmönimpa, ante änämai intamönipa. Mönitö mänömai ante bai waa incædönimpa. Wæætë æbänö mönitö cætamönii, ante adinque munitö adobai cæcæminimpa, ante cætamönipa. ¹⁰ Edæ möni munitö weca quëwëñedë incæ mönitö munitö imönite, iñimai cæedäni, ante wææ antamönipa. Adocanque në mönö cæquëñëno ante, Wii cæinëmo, angä iñongante munitö tömengä ingante cængui godönämai inguëñëmïni imönipa.

¹¹ Minitö weca pancadäniya önonque cædämai a ongonte quëwëñäni inänipa, ante änäni ëñëmönipa. Adodäni në Baa äninque cædämai inäni inte wæætë, Wadäni

æbänö quëwëñänii, ante godö wæntæ godö wæntæ tededäni inänipa. ¹² Mönitö mäninäni inänite mönö Awënë Itota Codito ëmowo äninque, Minitö iimö iñö iimö iñö nangui cæte quëwëedäni, ante wææ ämönipa. Tömëmïni cæte beyænque munitö cængui ænte cæncæminimpa, ante ancaa apænëmönäni imönipa.

¹³ Mönitö töniñamäni munitö guiquëñë, Quiëmë waa impa, ante wæntædämai inte cöwë cæedäni. ¹⁴ Mönitö munitö imönite ii yewæmöninta möni yewæmongainö ate adocanque ëñëñämai cæcä ininque, Tömengä æcänö ingäa, ante aedäni. Ayæ tömengä guingo imonte wæcæcäimpa, ante tömengä ingante gomö aedäni. ¹⁵ Minitö adocä ingante, Wii wacä ingampa, ante pönëninque wæætë tömëmïni biwidi inänite ante bai tömengä ingante wææ ämïni ëñencæcäimpa.

Waa quëwencæminimpa, ante Pabodo angampa

¹⁶ Mönö Awënë Itota në piyænë cædongä incæ tömengä pönö cæcä ate munitö æbämenque bamini incæ cöwë piyænë cæte quëwencæminimpa. Mönö Awënë munitö tömämïni weca a ongoncæcäimpa, ämopa. ¹⁷ Botö Pabodobo nöwo tömëmö önonpoca yewæmöninque, Minitö imönite waa pönëmopa, ante yewæmömö aedäni. Pabodo nänö yewæmöninta impa, ante ëñencæminimpa, ante cædinque botö tömanta yewæmöninque mänömai bai yewæmömopa. ¹⁸ Mönö Awënë Itota Codito munitö imönite waadete pönö cæcæcäimpa, ante botö mäninque ante yewæmömopa.

1 Tímoteo ingante Pabodo cadota ante tänota nänö yewæmongainta

Tímoteo ingante Pabodo yewæmongampa

¹ Botö Pabodobo inömo imopa. Itota Codito nänö në da godongaïmo imopa. Itota Codito waa pöni nänö inö bai mönö adobai bacæmõimpa, ante pönëmompä. Ininque Itota Codito mönö në pönënongå tönö Wængongui mönö imonte në Ængaingä tönö botö imote äna eññömote da godöna godïmo imopa. ² Tímoteo eññemi, Bitö acæbiimpa, ante bitö imite yewæmõmopa. Edæ mönö wede pönëno ante apænebo në eññimi inte bitö Itota Codito quimi badinque näwä botö wëmi bai inömi imipa. Ininque botö, Mæmpo Wængongui tönö Awënë Itota mönö Codito tönö bitö imite waadete pönö waa cæda ate bitö gänë entawencæbiimpa, ämopa.

Wadäni wapiticæ nani odõmonte apænedö

³ Botö Mäatedöniabæ iñömö pöninque bitö imite, Epeto iñömö ee ongöe, nangui antabopa. Mäniñömö wadäni babæ wapiticæ nani odõmonte apænedö ante në odõmonte apænedönäni inänite bitö, Minitö godõmenque mäniñö ante odõmonte apænedämäi iedäni, ante ämi eññecædäniimpa. Mänõmainö ante do botö äniñö bai ñowo adodö ante bitö imite ämopa. ⁴ Ayæ, Dodäni õnonque ante nani tedegainö ante pönënamai quëwëedäni, ante bitö ancæbiimpa. Ayæ adobai tömënanäni wæmæidi tæiyæñnani ante pönëninque, Æmonänidö ingainäni, ante ancaa änewëñnani bitö tömënanäni inänite, Minitö mäniñö ante pönënamai iedäni, ancæbiimpa. Edæ mäniñö nani tedewëno beyæ tömënanäni, Æbänö i, ante nangui wæætédö wæætë änewëñnani töö. Wæætë edæ, Wængongui nänö cædö ante wede pönëninque mönö cæquëñenö guiquëñë tömënanäni nani tedewëno beyæ pönõmenque cætimpa.

⁵ Mänõmainö ante äninque botö, Tömënanäni mïmö iimäi entawëninque waadete pönencædäniimpa, ante ämopa. Edæ mïmö waëmö pöni entawëninque tömënanäni Wængongui ingante wede nani pönëno beyæ waadete pönencædäniimpa. Ayæ adobai nämä apænte adinque wentamö mongæñnamai entawënanäni inte tömënanäni waadete pönencædäniimpa. ⁶ Inæmpa pancadäniya mäniñö ante eññëninque Baa ante ñimpo cæte wadæ godinque õnonque ante quëwëñnani. ⁷ Mõitee wodi nänö wææ yewæmongainö ante odõmonte

apæneinëmõnipa, ante në änanä incæ tömënanäni nani odõmonte apæneyedë quinö apænedänii, ante eññënamai inänipa töö. Adobai quïëmë ante apænedinque tömënanäni, iimäi impa, iimäi impa, ante apænedäni incæte eññënamai inäni inte apænedänipa.

⁸ Mõitee wodi nänö wææ yewæmongainö ante adinque nõngä cæmõ ininque mäniñö tömengä nänö wææ angainö iñömö waa ante imaimpa, ante do eññëmompä. ⁹ Mõitee wodi nänö wææ yewæmongainö ante Wængongui wii në nõ cædäni beyæ pönö wææ angacäimpa. Wæætë në eññënamai cædäni tönö wadäni mäniñö ante eññënanäni incæ në godõmenque wënæ wënæ cædäni tönö tömënanäni beyæ pönö wææ angacäimpa, ante do eññëmompä. Ayæ adobai Wængongui ingante Baa ante në quëwëñnani tönö wënæ wënæ cædäni beyæ wææ angatimpa. Në tæiyæ waëmö entawëñnamai inönäni beyæ ayæ adobai Wængongui ingante në badete todönäni beyæ wææ angatimpa. Mæmpocä ingante wäänä inante në wæñonäni beyæ ayæ adobai waocä ingante në piinte wæñonäni beyæ wææ angatimpa. ¹⁰ Nänõogængä inämaï iñongante në towënanäni beyæ ayæ adobai onguinæñnani nana onguinæncaya guëa towënanäni beyæ wææ angatimpa. Në cæte quëwengä bacæcäimpa, ante waocä ingante në godonte æñnani beyæ ayæ adobai në babæ änanäni beyæ wææ angatimpa. Wadäni inänite, Nö ämõnipa eññëedäni, ante në babæ änewëñnani beyæ ayæ adobai nõ odõmonte apænedö incæ në wadö ante cædäni beyæ wææ angatimpa. Mäniñäni tömënanäni eññecædäniimpa, ante Wængongui mäniñö ante pönö wææ angacäimpa, ante eññëmompä.

¹¹ Edæ Wængongui ñäo apäite ëmongampa, ante odõmonte apæñecæbiimpa, ante tömengä në waa inongä inte edæ tömengä watapæ nänö apænedö ante pönongä æntabopa. Ayæ nõ nänö odõmonte apænedö ante Wængongui nänö pönö angainö ante adodö äno impa.

Wængongui waadete nänö pönö cædö ante

¹² Itota Codito mönö Awënë pönö cæcä beyænque botö tæi ewocabo batabopa. Tömengä iñömö botö imote waa adinque, Bitö në pönëmi inte cöwë ædæmõ cæbi imipa. Ininque bitö botö beyæ wadäni inänite në cæbi bacæbiimpa, ante pönö cægacäimpa. Mänõmai beyæ botö tömengä ingante waa ate pönente apænebopa. ¹³ Botö wëñëñedë Itota Codito ingante në godö babæ ante änewengaiïmo imopa. Tömengä ingante në pönënanäni inänite wënæ wënæ cæquïmo, ante në togæñnomo inte botö në piinte quëwengaiïmo imopa. Incæte botö në

pönēnāmai inōmo inte, Quinō cæquīi, ante ēñēnāmai inte cæbo adinque Wængongui, Quēwencæbiimpa, ante pönō waadete waa cægacäimpa. ¹⁴ Mönō Awēnē botō imo nanguī waadete pönō cæcä adinque botō Itota Codito nempo quēwēninque nē wede pönēmo badinque nē waadete pönēmo bagaboimpa.

¹⁵ Iīmai ante nō pōni nāni ānō nāwangā ante impa, ante āmo ēñēmaimīnīpa. Itota Codito iñōmō, Wēnæ wēnæ cæmīni imīnite æmo beyænque quēwenguimīni, ante inguipoga wææ pongacäimpa. Tömengä mänōmai cæcä incæte wadāni wēnæ wēnæ cædāni iñōnāni botō tōmēmoque godōmenque wēnæ wēnæ nē cægāimo imopa. ¹⁶ Mänōmai beyænque tōmēmoque godōmenque wēnæ wēnæ cægāimo iñōmote Itota Codito pönō waadete angä beyænque quēwengaboimpa. Wēñēñedē botō bai nē wēnæ wēnæ cægāināni inānite adinque Itota Codito, Botō weca cōwē wantæpiyæ nāni quēwenguinque pancadāniya botō imote pönenguināni inānīpa, ante do ēñengacäimpa. Ininque tōmengä, Botō nē waadete cædinque ee abo imopa, ante tōmēnāni inānite odōmoncæte ante cædinque tōmengä botō Pabodobo imote mänōmai pönō waadete waa cægacäimpa.

¹⁷ Mönō Wængongui iñōmō cōwē wænāmai nē quēwengāingä inongä inte tōmengä iñcayæ ate adobai cōwē wænāmai inte Awēñē Odeye inongä ingampa. Tömengä awēmō iñōmō quēwēnongä iñongante mönō waocabo tōmengä ingante ædō cæte aquīi. Tömengä wæætē tōmää nē ēñengāingä inongä ingampa. Ininque tōmengä adocanque Wængongui inongä iñongante mönō tōmengä ingante cōwē waa aquimō anguēñē. Tömengä ingante, Bitō ñāō bai ēmōmi inōmi imīpa, ante apænedinque mönō ñine cædāmai inte cōwē watapæ angæimpa. Cōwē iīmai babaiimpa, ante Amēē, āmopa.

¹⁸ Timoteo, botō wēmi ēñēmi. Nē pönēnāni wēñēñedē Wængongui beyæ apænedinque bitō imitedō ante nāni angāinō bai adobainō ante apænedinque botō iīmai āmopa. Edæ tōmēnāni nāni angāinō ante ēñente cædinque bitō tontadoidi nāni cæbai adobai bitō cæquēñēñō ante guñēñāmai inte wæætē tæi ēwocate nanguī cæcæbiimpa. ¹⁹ Wængongui ingante cōwē wede pōnente incæbiimpa. Adobai mīmō entawēmi inte nāmā apænte pönēninque wentamō mongænāmai inte bitō cōwē quēwencæbiimpa. Edæ mīni pönencabo iñōmīnite pancadāniya nāmā apænte ānāmai ināni inte Codito ingante nāni pönēñinō ante dobæ ñimpo cæte wadæ godānīpa. ²⁰ Iimēneo tōnō Adecantodo adobai Wængongui ingante ñimpo cædinque wadæ godatapa. Ininque, Tōmēna, Wængongui ingante mönō wēnæ wēnæ ante babæ

ānāmai ingæimpa, ante ēñencædaimpa, ante cædinque tōmēna inate Tatāna nempo pædæ godontabopa.

2

Wængongui ingante mönō iīmai apæneccæimpa

¹ Mīni pönencabo iñōmīnite botō tāno iīmai āmopa. Wængongui ingante mīni apæneyedē quīēmē mīni æñinēñō ante apæneccæmīnīpa. Tömengä ingante waa ate pōnente apænedinque waodāni tōmānāni beyæ ante apæneccæmīnīpa āmopa. ² Awēñē odeyeidi incæ pönōmenque awēñēidi tōmānāni incæ mönō imonte waa aayōnāni mönō piyæñē cæte quēwengæiimpa, ante cædinque mīnitō tōmēnāni beyæ ante Wængongui ingante apæneccæmīnīpa. Edæ Wængongui ingante mönō cæquēñēñō ante ayæ waodāni inānite mönō cæquēñēñō ante mönō waa cæte quēwencæmōimpa, ante Wængongui ingante awēñēidi beyæ ante apæneccæmīnīpa. ³ Mänōmainō ante mönō apænedō iñōmō waa impa. Wængongui mönō imonte nē Ængāingä inongä inte mäninō mönō apænedō ante waa acampa. ⁴ Waodāni tōmānāni nāwangä botō angāinō ante ēñencædānīpa, ante Wængongui pönō ængä beyænque quēwencædānīpa, ante nē waa cæinēñongä ingampa.

⁵ Edæ adocanque Wængongui inongä ingacäimpa. Tömengä waodāni inānite adinque, Wadāni bai inānīpa, ante nāñēñē quēwengacäimpa. Ininque Itota Codito nē Waocä ēñagāingä inte tæcæguedē adocanque nē pongä inte, Waodāni Wængongui guidēñāni badinque adoyōmō bee tente godongāmæ quēwencædānīpa, ante pönō cægacäimpa. ⁶ Tömengä iñōmō mönō imonte ante godonte æncæte ante cædinque nāmā wepæ incæ godoncæte ante nē pongä ingacäimpa. Wængongui, Iiōnæ, ante nāñō angaiōnæ incæ iñque bayonte mäninō Codito nāñō cægāinō ante, Nō impa, ante tōmānāni inānite nē odōmongä ingacäimpa. ⁷ Mäninō ante bitō nē apænebi bacæbiimpa, ante Wængongui botō imote angä ēñēninque botō tōmengä nāñō nē da godōmo batabopa, ante nāwangä āmopa. Edæ babæ ānāmai imopa. Ayæ nāwangä mönō pönēñō ante Wængongui, Wadāni oodeoidi ināmai ināni adobai pönencædānīpa, ante cædinque botō imote angä ēñēninque botō tōmengä nāñō nē odōmonte apænedōmo imopa.

⁸ Wayōmō wayōmō godongāmæ mīni pönencabo ongonte mīnitō onguñæmīni iñōmō nē piñāmai imīni inte Wængongui ingante apænemīni adinque botō waa tobaīmopa. Wadāni inānite nē piñte wæætēdō wæætē ānāmai inte wæætē tæiyæ waēmō entawēmīni inte Wængongui ingante

pædæ æmpote apænecæmīnīmpa, ante ainēmopa.

⁹ Ayæ onquiyæmīni iñōmō waēmō weocoo mongæmīni incæte mīnitō, Botō waēmō weocoo mongæmo adinque wadāni botō imote waa acædānīmpa, ante ānāmaī inte nāmā baō ante guīñēñate pōnēnīnque weocoo ædæmō wēñate mongæncæmīnīmpa. Mīnitō ocagui que que cæmīni incæte oodo badōi tōnō pededamō nāni āmō wente cædāmaī incæmīnīmpa. Waēmoncoo nāni nanguī godonte ænīncoo nāni waa acoo ante mīnitō mongænāmaī incæmīnīmpa. ¹⁰ Wæætē edæ Wængonguī ingante, Bitō Wængonguī Awēnē imidō anguēnē, ante nē watapæ apænemīni imīni īnīnque mīnitō mīni apæneī bai cædinque mīni waa cæquēnēnō ante pōnencæmīnīmpa. Mānōmaīnō ante pōnente quēwencæmīnīmpa, ante adobai ainēmopa. ¹¹ Wadāni apæneyōnāni mīnitō onquiyæmīni tededāmaī inte ēamonca ongonte ēñencæmīnīmpa. Ayæ nē āmōni mōni ānō ante ēñēnīnque wadō pōnēnāmaī inte do ēñente cæcæmīnīmpa, āmopa.

¹² Godongāmæ mīni pōnencabo weca ongonte mīnitō onquiyæmīni iñōmō odōmonte apænedāmaī incæmīnīmpa, ante botō wææ āmopa. Ayæ adobai onguīñæmīni imīnite onquiyæmīni iñōmō, īīmaī cædāni, ante ānāmaī incæmīnīmpa, ante wææ āmopa. Wæætē tededāmaī ēñencæmīnīmpa. ¹³ Wængonguī edæ onguīñængā Adāo ingante tāno badōnīnque ayæ onquiyængā Eba ingante badongacāīmpa. ¹⁴ Ayæ Tatāna wīī Adāo ingante wapiticæ māocā oda cægacāī. Wæætē Eba ingante æpiticæmē māocā oda cædinque do wēnæ wēnæ cæcā bagacāīmpa. ¹⁵ Incæte onquiyænāni Wængonguī ingante godōmenque pōnēnīnque cōwē waadete pōnēnāni inōnāni inte nē nō pōnente tæiyæ waēmō entawēnāni īnīnque tōmēnāni wēñænāni inānite māñōnānīte Wængonguī wææ aacā beyænque quēwencædānīmpa, āmopa.

3

Godongāmæ mōnō pōnencabo iñōmonte nē aadāni

¹ īīmaī ante nāni ānō nō pōni ante īīmpa. Godongāmæ mōnō pōnencabo iñōmonte, Aacæboīmpa, ante nē angā iñōmō tōmēngā waa cæquinō ante pōnō cæinēngā ingampa. ² Incæte wadāni, Wēnæ wēnæ cæcā ingampa, ante ānāmaī incædānīmpa, ante cædinque nē aacā wæætē waa quēwenguēnēngā ingampa. Edæ tōmēngā nānōogæñā adodanque nē manguiwēngā incæcāīmpa. Tōmēngā tōō pōnente nō quēwēngā incæcāīmpa. Nōīnō cæcæīmpa, ante pōnēnīnque nāmā wææ

ante nē cæcā incæcāīmpa. Waodāni botō imote waa acædānīmpa, ante cædinque waa quēwencæcāīmpa. Waodāni inānite, Botō oncōnē pō cædāni, ante cōwē nē watapæ angā incæcāīmpa. Ayæ tōmēngā nē waa odōmonte apænecā incæcāīmpa. ³ Nē aacā tī nāmæ bete beyæ quidi quidi dowænāmaī quēwenguēnēngā ingampa. Wacā ingā do pīinte cædāmaī inōngā inte wæætē ædæmō cæcā inte quēwencæcāīmpa. Tōmēngā piyænē cæcā incæcāīmpa. Tōmēngā godonte nāni æinta ante waadete pōnente wædāmaī incæcāīmpa āmopa.

⁴ Nē aacā tōnō godongāmæ quēwēnāni inānite tōmēngā waa aaquēnēngā ingampa. Tōmēngā wēñænāni inānite ædæmō aacā beyæ tōmēnāni wæætē tōmēngā ingante waa adinque tōmēngā nānō ānō ante ēñente cæte quēwencædānīmpa. ⁵ Edæ nē aacā tōnō godongāmæ quēwēnāni inānite tōmēngā wīī waa aacā īnīnque Codito ingante godongāmæ mōnō pōnencabo iñōmonte ædō cæte waa aacā inguingāā.

⁶ Itota Codito ingante nōwo tæcæ pōnēnīngā wīī nē aacā baquēnēngā ingampa. Edæ mānōmaī inōngā īñongante mīnitō, Nē aabi īīmpa, āmīni īnīnque tōmēngā nāmā incæ, Adoboque waa cæbo īmopa, ante pōnēngā īmaingampa. Wēnæ awēnē mānōmaī pōnēngā beyænque Wængonguī tōmēngā ingante apænte nānō panguīnō bai nē aacā ingante adobai apænte pāmaingampa. ⁷ Ayæ adobai Itota Codito ingante nē pōnēnāmaī ināni nē aacā ingante adinque, Tōmēngā nē waa cæcā ingampa, ante acædānīmpa, ante cædinque tōmēngā waa quēwenguēnēngā ingampa. Tōmēngā waa cædāmaī ingā adinque tōmēnāni wæætē, Tōmēngā wēnæ wēnæ cæcā ingampa, ante pīīmaīnānīpa. Tōmēngā waa cædāmaī ingā pīīnāni īnīnque wēnæ awēnē iñōmō, Tōmēngā oda cæcæcāīmpa, ante godō cæcā ate tōmēngā do wēnæ wēnæ cæcā babaingampa.

Mōnō pōnencabo tōnō godongāmæ nē cædāni

⁸ Mōnō pōnencabo tōnō godongāmæ nē cædāni iñōmō adobai, Mōnō eyepæ cæte quēwēmō īnīnque wadāni mōnō imonte waa acædānīmpa, ante cædinque waa quēwenguēnēnāni nānīpa. Nē cædāni nāmā nāni ānō bai ante nō cæcædānīmpa. Tōmēnāni yowepæ wædænque tī nāmæ bīīnōmæ nāni āmæ wīī nanguī becædānīmpa. Babæ cæmōni incæte godonte nāni æinta cōwē godōmenque æncæmōnīmpa, ante wadāni nāni pōnēwēnōnque ante īīnāni wæætē mānīnō ante pōnēnāmaī incædānīmpa. ⁹ Edæ nāmā apænte pōnēnīnque wentamō mongænāmaī entawēnāni inte tōmēnāni Wængonguī nānō

wē wodonte angainō ante tæcæ ēñēninque tōmēnāni, Nō pōnī mōnō pōnēnō impa, ante cōwē wede pōnenguēñēnāni inānīpa. ¹⁰ Ayæ mānīnāni inānite mīnitō, Quīnō cæmīni imīnīi, ante ēñencæte ante cōwā acæmīnīmpa. Ayōmīni tōmēnāni cōwē waa cæte quēwēnāni adīnque mīnitō wæætē tōmēnāni inānite, Mīnitō mōnō pōnencabo tōnō godongāmæ nē cæmīni bacæmīnīmpa, ante āmīni bacædānīmpa.

¹¹ Tōmēnāni nānōogæidi inānite wadāni waa acædānīmpa, ante cædinque adobai eyepæ cæte waa quēwenguēñēnāni inānīpa. Mānīnāni iñōmō wadāni inānitēdō ante babæ ānāmai incædānīmpa. Wæætē adodāni cōwē tōō pōnente nō quēwēnāni incædānīmpa. Tōmēnāni cōwē pōnēninque, īlīmai cæcæmōnīmpa, ante nāni ānīnō bai ædæmō cæcædānīmpa. ¹² Mōnō pōnencabo tōnō godongāmæ nē cæcā iñōmō tōmēngā nānōogæñā adodanque nē manguiwengā incæcāmpa. Tōmēngā wēñæñāni inānite ayæ tōmēngā tōnō godongāmæ quēwēnāni inānite tōmēngā nē waa aaquēngā ingampa. ¹³ Mōnō pōnencabo tōnō godongāmæ nē cædāni iñōmō, Nē waa cædināni inānīpa, ante adīnque mōnō tōmēnāni inānite waa āmōmpa. Ayæ mānōmai waa cædināni inte mānīnāni, Itota Codito ingante pōnēdāni, ante guīñēnāmai apæñecædānīmpa.

Wē wodonte nāni angainō edonque pōni batīmpa, ante

¹⁴ Quīngæ bitō weca acæ poncæboīmpa, ante pōnēmo iycæte botō, īlīmai cæe, ante bitō imite yewæmōmopa. ¹⁵ Botō wæætē wī quīngæ pōmo īnīnque bitō, Mōnō Wængonguī tōnō godongāmæ quēwēncabo inōmō inte mōnō æbānō cæquīlī, ante bitō ēñencæbiīmpa, ante yewæmōmopa. Edæ Wængonguī nē Quēwēngāngā quīmō inōmō inte mōnō Codito ingante godongāmæ mōnō pōnencabo iñōmō mōnō cobacadewæ tæi ongō bai tōmēngā nō nānō angainō ante īnīmpa cædāmai inte wæætē wæcæ cæmō īmōmpa. ¹⁶ īlīmai ante nō pōnī impa. Wængonguī ayongā mōnō æbānō waa cæte quēwēngūlī, ante Wængonguī wē wodonte nō nānō angainō incæ fīwoyedē edonque pōnī mōnō ēñēnō iñōmō waa pōnī impa. īlīmai impa. Wængonguī inguīpoga iñōmō ponte ēñadinque Waocā bacā agadānīmpa. Tōmēngā ingantēdō ante Wængonguī Ōnōwoca, Māningā waēmō quēwēnōngā ingampa, angacāmpa. Tōmēngā ingante Wængonguī anquedoidi do agadānīmpa.

Wabæca wabæca nāni quēwēncabo inānite Itota nānō cægainō ante apænegatīmpa.

Tōmāmæ quēwēnāni pancadāniya tōmēngā ingante pōnente bagadānīmpa.

Ayæ tōmēngā nāō bai ēmōninque oōnædē iñōmō ocaē ēmænte gogacāmpa. Mānōmainō ante nāni āmotamīni ānō bai impa.

4

Nē pōnēnāni pancadāniya wadæ goquīnāni inānīpa, ante

¹ Wængonguī Ōnōwoca īlīmai ante edonque pōnī apæñecampa. īnīnque iñōnædi bayonte Codito ingante nē pōnēnāni incæ pancadāniya īnīmpa cæte tōmēngā ingante pōnēnāmai bacædānīmpa. īnīnque ōnōwocaidi incæ nē, Wapitīcæ oda cæcædānīmpa, ante nē wēnæ wēnæ cædōnāni mīñæ tee empo gocædānīmpa. Goyōnāni wēnæidi nāni odōmonte apæñewēnō ēñente cæquīnāni inānīpa. ² Nē babæ ānāni nē wadō tedete wadō cædāni iñōmō tōmēnāni mānīnō wēnæidi nāni odōmonte apæñewēnō ante nē odōmonte apæñedāni inānīpa. īnāni guīquēñē tōmēnāni nāmā nāni apænte pōnēnō ante ōmætawēnāni inte wēnæ wēnæ nāni cædinō ante wædāmai quēwēnānīpa. ³ Mānīnāni iñōmō waodāni inānite wæcæ ānīnque, Mīnitō, Botō nānōogængā, ante onquīyēngā ingante mōnāmai iedāni, ānānīpa. Ayæ adobai mōnō waa cængūi adīnque pancaā ante, Cæñāmai iedāni, ante wæcæ ānānīpa. īñæmpa Wængonguī edæ tōmāā cængūi badongacāmpa. Tōmēngā, Botō imote waa ate pōnente apæñedinque nē pōnēnāni iñōmō botō nō angainō ante ēñēñōnāni inte cængūi ante cæncædānīmpa, angampa.

⁴ Edæ Wængonguī nānō badongaincoo tōmancoo waa pōnī iñōnō mōnō Wængonguī ingante waa ate pōnente apæñedinque tōmāā cængūi æmō īnīnque pancaā ante ædō cæte Baa ante æñāmai inguīlī. ⁵ īñæmpa Wængonguī nānō angainō beyænque ayæ tōmēngā ingante waa ate pōnente apæñemō beyænque tōmāā cængūi iñōmō tæiyæ waēmō cængūi bapa.

Itota Codito ingante nē waa cæcā

⁶ Bitō godongāmæ mīni pōnencabo iñōmīnīte bitō mānīnō botō ānō ēñēñīnque bitō tōñīñadāni inānite wæætē odōmōmī īnīnque Itota Codito beyæ nē waa cæquīmī incæbiīmpa. Ayæ Wængonguī nānō angainō ante mōnō pōnēnō ante ēñente quēwēñīnque bitō waa mōnō odōmonte apæñedō ante nē ēñente cædīmī inte edæ tōmo cænte bai nē nō cæbi incæbiīmpa.

⁷ Babæidi bai nē tedewēnāni inānite ēñēñāmai inte bitō onquīyæñāni picæñāni incæ ōnonquedō ante nāni tedewēñīnō ante ēñēñāmai incæbiīmpa. Wæætē, Wængonguī ayongā mōnō waa cæte quēwēncæte ante cædinque bitō iñōmō tæi ēwocabo bādīnque

cæcæboimpa, ante godömenque godömenque cæcæbiimpa. ⁸ Mönö baö tææmö bacæimpa, ante cædinque mönö ñimpo cædämaï inte adodö adodö cæmompä. Mäninonque ante mönö cædö guiquenê wædænque waa impa. Wæætê Wængonguï ayongä mönö waa cæte quëwëmö ñinque mönö ñöwoyedê waa quëwëninque adobaï ñincayæ ate waa quëwenguimö ñincæmöimpa. Ñinque mäninö ante mönö cæquino ñïömö tömäa beyæ nö waa pöni i ñinque, Mönö tæï ewocauimö, ante cædinque mönö ñimpo cædämaï inte adodö adodö cæcæimpa.

⁹ Mänömaïno ante nö pöni nani äno näwangä ante impa, ante ämo ëñëmaïminipa. ¹⁰ Mänömaï beyæ tæï piñæninque nanguï cæmö ñmompä. Edæ, Wængonguï nê Quëwengängä beyænque mönö watapæ quëwengæimpa, ante pönengälmö ñmompä. Tömengä ñïömö mönö waocabo tömämo ñmonte, Quëwenguimini, ante nê Ængängä incæ tömengä ingante nê pönëmö ñïömönte nö ængä beyænque mönö quëwengæimpa.

¹¹ Mäninö botö äno ante bitö tömënanï ñänite, ñimaï cædäni, ante odömönte apænecæbiimpa, ämopa. ¹² Bitö wïi picæmi incæte æcämenque ñlongante bitö, Botö ñmonte piñte adämaï incæcäimpa, ante pönente quëwencæbiimpa. Wæætê edæ bitö Wængonguï ingante nê pönënanï beyæ ante, Botö cæbaï tömënanï adobaï cæcædänimpa, ante ñimaï cæcæbiimpa. Apænëbi incæ waa cæte quëwëmi incæ waadete pönëmi incæ wede pönëmi ñmi incæ nö pönente waa cæbi incæ bitö, Botö bai bacædänimpa, ante cædinque bitö cædö ante odömömi adinque tömënanï adobaï cæcædänimpa. ¹³ Botö pönämaï inguinganca bitö ongöñömö ñïömö Wængonguï angä ëñente nani yewæmönainö adinque adodö ante ædæmö apænëbi ëñencædänimpa. Ayæ Wængonguï ingantedö ante apænëbi ñnte odömönte apænëbi ëñencædänimpa. Mäninonque cæte ongoncæbiimpa. ¹⁴ Mïni pönencabo ñïöminite nê aadäni nani Picæncabo ñïömö bitonga gampo cædinque Wængonguï beyæ apænëdninge bitö ñmite, Bitö nê aabi badinque nê odömönte apænëbi bacæbiimpa, ante pönö apænëdänitapa. Ñinque bitö do nê aabi badinque nê odömönte apænëbi bagaimi ñnte godömenque godömenque cæcæbiimpa.

¹⁵ Edæ waodäni tömänanï bitö æbänö godömenque waa cæbi ñmi adinque ëñencædänimpa, ante cædinque bitö mäninonque ante pönëninque godömenque godömenque cæcæbiimpa. ¹⁶ Bitö quëwëno ante, Æbänö quëwëmoo, ante nämä wææ aacæbiimpa. Ayæ bitö odömönte apænëdö ante, Botö nö pönëninque odömönte apænecæboimpa, ante wææ cæcæbiimpa.

Edæ mänömaï cæte wæntædämaï ñnte cöwê cæcæbiimpa. Bitö mänömaï cæbi ñinque tömëmi nämä incæ wantæpiyæ quëwencæbiimpa. Bitö odömönte apænëyömi nê ëñënanï ñïömö adobaï bitö cædö beyænque wantæpiyæ quëwencædänimpa.

5

Nê pönënanï ñänite æbänö cæcæbiimpa, ante

¹ Onguïñængä picængä wënæ wënæ cæcä incæte tömengä ingante piñte änamä incæbiimpa. Wæætê tömëmi mæmpocä ingante ante bai tömengä ingante waadete ämi ëñencæcäimpa. Edënnäni ñïömö tömëmi biwïidi ñänite ante bai tömënanï ñänite waadete ämi ëñencædänimpa. ² Onquiyænänï picænänï ñïömö tömëmi wäänä ñante ante bai bitö tömënanï ñänite adobaï waadete ämi ëñencædänimpa. Ayæ baquedäni ñïömö tömëmi biwinqueidi ñänite ante bai tömënanï ñänite waëmö mïmönê waadete ancæbiimpa.

³ Owæmpoinäni nê näwangä ömæpodäni ñnte quëwënanipa, ante tömënanï ñänite waa adinque pönö cæcæbiimpa. ⁴ Incæte owæmpoingä wëñænänï næængä ñinque nänömoidi næængä ñinque mäninäni wæætê tömengä beyæ cæquënnänipa. Edæ mäninäni täno tömënanï tönö godongämæ quëwënanï ñänite waa adinque näëmæ nani cæquënnö ante, Æbänö cæquï, ante ëñente cæcædänimpa. Mänömaï cædinque tömënanï mæmpoidi tönö mæmæidi tömënanï ñänite waadete nani cædi bai ñinäni adobaï mæmpoidi tönö mæmæidi ñänite näëmæ waadete cæcædänimpa. Edæ mänömaï cædäni adinque Wængonguï waa acæcäimpa. ⁵ Nê nö ömæpocä ñongä ñnte adodanque quëwängä ñinque tömengä nê owæmpoingä ñongä ñnte Wængonguï beyænque watapæ quëwengæimpa, ante pönengä ñngampa. Itædê incæ woyowotæ incæ tömengä ñimpo cædämaï ñnte, Botö beyæ cæquimö, ante Wængonguï ingante apænëte quëwengampa. ⁶ Wæætê owæmpoingä tote quëwengæimpa, ante nämanque pönente nê quëwënongå guiquenê tömengä mïi quëwängä ñcæte do wænte bai ñngampa töö.

⁷ Tömënanï ñänitedö ante wënæ wënæ änamä incædänimpa, ante wææ cædinque bitö mäninö botö äno ñnte adodö ante ämi ëñencædänimpa. ⁸ Æcänö guidënanï ñänite pönö cædämaï ñnaa ayæ tömengä nani wencabo ñänite pönö cædämaï ñnaa tömengä ñïömö Wængonguï nänö angainö mönö pönëno ante do Baa ñinque wïi ëñente cæcampa. Ayæ nê pönënamä ñngä wënæ wënæ cæcä ñlongante mäningä ñïömö godömenque wënæ wënæ cæcä ñngampa töö.

⁹ Owæpoinā do tetenta wadepo ganca godōmenque nē picænā inōnā inte tōmēnā nānōogængā wodi ingante nē mōinānque quēwēnā ingadāimpa, ante adinque bitō, Wængonguī qui, ante mōnō godonte æninta māninā owæpoinā nē ænguīnā incædāimpa, ante tōmēnā ēmōwo ante yewæmoncæbiimpa. ¹⁰ Edæ tōmēnā wēñænāni inānite waa cædā pædāni inānitawo. Wadāni inānite tōmēnā, Botō oncōnē pō beedāni, ante waa apænedā inantawo. Wængonguī quināni iñōnānite tōmēnā nāmā pōnēnāmai inte waa cædantawo. Nē wæwēnāni inānite adinque tōmēnā tōmēnāni tōnō godongāmæ cædantawo. Ayæ, Quiēmē waa cæcæiimpa, ante māninonque ante pōnēninque cæte quēwēnantawo. Mānōmai quēwēnā adinque waodāni, Māninā nōinā waa cædā inōnampa, ante do ēñēnāni inānitawo, ante adinque bitō wæætē tōmēnā ēmōwo ante yewæmoncæbiimpa. Ayæ wadāni māninā bai iñōnānite bitō, Wængonguī qui, ante mōnō godonte æninta mānimpodānique nē ænguīnāni incædāniimpa, ante tōmēnāni ēmōwo ante yewæmoncæbiimpa.

¹¹ Wæætē edæ owæpoināni wī picænāni iñōnānite bitō tōmēnāni ēmōwo ante yewæmōnāmai inte Baa ancæbiimpa. Ayæ tōinente wæwēninque Codito ingante ñimpo cæte wadæ godinque wæætē, Wacā nānōogængā ingante mōinēmopa, ante quēwēnāni. ¹² Edæ tōmēnāni Codito ingante, Botō bitō beyæ nque cæboiimpa, ante tāno nāni angainō ante ñimpo cædāni beyæ Wængonguī apænte pangā wæcædāniimpa. ¹³ Ayæ godōmenque iīmai cædāni. Tōmēnāni cædāmai inte wæntæye badinque adobaī wacōnē wacōnē acæte ante ōnonque godāni inānipta tōō. Ayæ wī ōnonque wæntæyedānique badinque tōmēnāni, Wadāni æbānō cædāni, ante gote adinque wadāni nāni cædōnō ante godō wæntæ godō wæntæ tededāni inānipta. Edæ wī nāni anguēnō ante do ānewēnānipta. ¹⁴ Mānōmai beyæ botō owæpoināni wī picænāni inānite iīmai āmopa. Mīnitō wæætē mōninque wēñænāni māedāni. Ayæ oncōnē mīni cæquēnō ante cædāni. Wadāni edæ mōnō imōtedō ante wēnæ wēnæ nāni tedewēnō ante tededāmai incædāniimpa, ante mīnitō mānōmai cæte waa quēwēdāni, āmopa. ¹⁵ Iñampa owæpoināni pancadāniya do Itota Codito ingante ēmō cæte godinque Tatāna mīñæ tee empocæ godānitapa tōō.

¹⁶ Onquiyængā nē pōnængā iñōmō tōmēngā guidēnāni owæpoināni næængā ininque tōmēngā tōmēnāni beyæ cæcæcæiimpa. Codito ingante godongāmæ mīni pōnencabo iñōmīnite tōmēngā, Botō guidēnāni inānite godōmīni æncædāniimpa, ante ānāmai

incæcæiimpa. Mānōmai cædinque Codito ingante mīni godongāmæ pōnencabo wæætē, Owæpoināni nāwangā ōmæpodāni inānipta, ante adinque tōmēnāni inānite godōmīni æncædāniimpa, āmopa.

¹⁷ Wængonguī ingante godongāmæ mīni pōnencabo iñōmīnite nē aadāni nāni Picæncabo iñōmō nō waa aadāni iñōnānite mīnitō tōmēnāni inānite waa aquēnēmīni imīnipta. Mānināni Wængonguī nānō angainō ante nē apænedāni inte ayæ nē odōmonte apænedāni iñōnānite mīnitō godōmenque nanguī waa acæmīniimpa. ¹⁸ Edæ Wængonguī iīmai ante apænedāni ēñēninque yewæmongadāniimpa. “Wagada onguīñængā nē cæcā inte tōmentapa æ yacæiimpa, ante āni pinā pinā gāwate cægōñongā bitō tōmēngā ōnōne wææ wodōnedāmai inte ee abi cæncæcæiimpa,” ante yewæmongatimpa. Ayæ godōmenque iīmai ante impa. “Nē cæcā iñōmō tōmēngā nānō cædīnō beyæ ante nē ænguēnēngā ingampa.” Mānōmai yewæmongadāniimpa.

¹⁹ Godongāmæ mīni pōnencabo iñōmīni waocā adocanque iñōmō bitō imite apænedinque, Māningā nē acā Picængā iñōmō wēnæ wēnæ cæcantapa tōō, ante āñongante bitō ēñēnāmai incæbiimpa. Wæætē waoda mēnaa nē babæ wapiticæ ānāmai ina inte bitō imite apænedinque, Tōmēngā nē wēnæ wēnæ cæcantapa, ante adodō apænedāni ēñēninque bitō nē āna inate ēñencæbiimpa. Ayæ waodāni mēngāa go adocanque adobaī adodō apænedāni ēñēninque bitō nē ānāni inānite ēñencæbiimpa.

²⁰ Nē wēnæ wēnæ cædōnāni incæ ñimpo cædāmai inānipta, ante adinque bitō wæætē godongāmæ ongōnāni ēñēñōnāni mānināni inānite nanguī ancæbiimpa. Godongāmæ ongōnāni ēñēñōnāni bitō mānōmai āni ininque tōmēnāni wæætē guīñēninque, Wēnæ wēnæ mōnō cæquīnō ante cædāmai incæmōiimpa, ante pōnencædāniimpa.

²¹ Mōnō Wængonguī ayongā Itota Codito ayongā Wængonguī nānō apænte ænināni anquedoidi ayōnāni botō iīmai āmopa. Māninō botō āninō ante ēñente cædinque bitō, Adoyōmō pōni inānipta, ante tōmānāni inānite adoyōmō godō cæbi incæbiimpa. Wī adocanque ingante, Botō nē waa adīmī imīnipta, ante tōmēngā ingante wadō cædāmai incæbiimpa. ²² Æcāmenque ingante, Mōnō pōnencabo beyæ bitō nē cæbi baquīmi, ante pōnēmi inte bitō tōmēngāa quingæ gampo cædāmai ie. Edæ quingæ gampo cæbi nē cæcā badinque edæ tōmēngā wēnæ wēnæ cæcā ininque bitō adobaī tōmēngā tōnō wēnæ wēnæ cæbi baquēnēmī imīnipta. Bitō tōmēni mēni godōmenque wēnæ wēnæ nāni cæpāmo ante tōmānō ante Baa ante waa cæte quēwēe.

²³ Bitō cæinca cædente wæbitawo. Ayæ wantæ wantæ iñō wantæ wantæ iñō wænæ wænæ inte wæbitawo. Inique wīl æpænque bee ämopa. Wæætē biinōmæ wædænque bete quëwencæbiimpa.

²⁴ Wængongui nānō apænte anguiōnæ badāmai iñedē incæ waodāni pancadāniya wænæ wænæ nāni cægaiñō do edonque pōni impa. Wadāni guiquēnē wænæ wænæ nāni cægaiñō wē wodonte i incæ mānīfedē edonque pōni baquīnō anguēnē. ²⁵ Ayæ adobaī waodāni waa nāni cægaiñō do edonque pōni impa. Ayæ ñowoyedē pancaa waa nāni cægaiñō wīl edonque pōni i incæte wīl cōwē wē wodonte ingæimpa. Wæætē edonque pōni aquinō anguēnē.

6

¹ Waodāni awēnēidi nāni nē ō ænināni inte awēnēidi beyænque cæte ñā cæyænte bai nē quëwēnāni iñōmō tōmēnāni tōmānāni awēnēidi iñānite waa ēñente cæcædāniimpa. Iñæmpa tōmēnāni nē pōnēnāni inte wīl waa ēñente cædāni bai wadāni wæætē Wængongui ēmōwo ante wænæ wænæ ante babæ anguēnēnāniimpa. Adobaī mōnō odōmonte apænedinō ante, Wænæ wænæ impa, ante anguēnēnāniimpa. ² Tōmēnāni awēnēidi iñōmō nē pōnēnāni iñāni beyænque nē cædāni iñōmō, Botō tōniñacanque iñongā inte botō awēnē iñōmō ōnonganque ingā awædō, ante piināmai incædāniimpa. Wæætē edæ nē cædāni iñōmō, Botō cæbo nē ængā iñōmō nē pōnengā iñongā inte Wængongui nānō nē waadecā ingampa, ante adinque tōmēnāni awēnēidi iñānite godōmenque waa ēñente cæcædāniimpa.

Nāwā mǎincoo ante

Inique Timoteo ēñēmī. Māniñō ante tōmēnāni iñānite odōmonte apænedinque bitō adodō adodō ante ancaa ancæbiimpa, ämopa. ³ Pancadāniya wadō ante odōmonte apænedinque mōnō Awēnē Itota Codito nō pōni nānō angaiñō ante Baa ānāni. Ayæ mōnō odōmonte apænedō ante tōmēnāni Wængongui ayongā mōnō waa cæte quëwenguēnēnō ante Baa ānāni. Iñinque æcānō mānōmai Baa āna iñōmō ⁴ tōmengā nāmā incæ, Botō gomonga waa ēñēmopa, ante nē pōnēnongā ingā incæte tōmāā ēñēnāmaingā ingampa. Tōmengā nānanque nānō pōnēwēnō ante wæætēdō wæætē tededinque, Ædedō i, ante wacā tōnō guëadō guëa äinēwente wæcampa. Tōmengā mānōmai tedecā beyænque wadāni nē gomonga ēñengā ingante godō piinte adāni. Godongāmæ wadodō wadō piinte tedewēnāni. Wacā ingā wacā ingā, Bitō wænæ wænæ cæbi imipa, ante ānewēnāni. Nāmā nāni wænæ wænæ pōnēnongue ante, Wadāni wænæ wænæ

cædāni, ante pōnēwēnāni. ⁵ Ayæ ocaidē pōnente wentamō encadāni inte tōmēnāni Wængongui nāwangā nānō angaiñō incæ ēñēnāmai badāni. Inique nāni cabo incæ wacā ingā wacā ingā guëadō guëa apænete nāni piincabo iñāni. Ayæ māniñāni adobaī, Wængongui ayongā waa cæte quëwēnō beyænque nanguī ēate baquīmō, ante pōnēwēnāni.

⁶ Iñæmpa mǎincoo quincōmē ēacā incæte, Māniñque ēabopa, ante piyænē cæte quëwēnongā iñōmō tōmengā Wængongui ayongā waa cæte quëwengā beyænque watapæ quëwēnongā inte nō nanguī ēacā ingampa. ⁷ Edæ mōnō iñ inguiþoga iñōmō ōmaamō pontamōmpa. Adobaī ōmaamō inte tao goquīmō imōmpa. ⁸ Incæte mōnō cængui tōnō weocō ēamō inte māniñque beyæ mōnō watapæ quëwenguinque imōmpa. ⁹ Wadāni guiquēnē, Mǎincoo nanguī ēainēmōni, ante quëwēnāni inte tōmēnāni wænæ wænæ nāni cæinēmāmo badinque oda cæte goquīnānidō anguēnē. Mānōmai cædinque tōmēnāni, Quinō ōnonque impa, ante æinente badāni. Ayæ wænæ wænæ nāni baquinque edæ æinēwēnāni inte quīēmē incæ tōmēnāni æmæwo ōmāe nāni ēwenguinonque gocædāniimpa. ¹⁰ Waodāni nāni godonte æinta waadete pōnente nāni wædō beyæ wadō wadō nāni wænæ wænæ cæpāmo pompa. Edæ pancadāniya, Mōnō godonte ænguinta ængæimpa, ante pōnēniñque tōmēnāni nāni wede pōnenguēnēnō ñimpo cæte wadæ godinque nāmā nāni cædō beyænque nanguī wæwente badānitapa.

Mōnō wede pōnēnō ante mōnō tæi ēwocate cæcæimpa

¹¹ Bitō guiquēnē Wængonguinque ingante nē cædōmi inte māniñō tōmānō ante ñimpo cæte wodii gote bai quëwencæbiimpa, ämopa. Wæætē mōnō nō cæquēnēnō ante cæte quëwencæbiimpa. Wængongui ayongā mōnō waa cæte quëwengæimpa, ante cæcæbiimpa. Mōnō wede pōnēmāmo, ante godōmenque pōnente quëwencæbiimpa. Waodāni iñānite godōmenque waadete pōnencæte ante cæcæbiimpa. Ayæ tæi piñænte entawēniñque wæntæye badāmai inte ee cæcæbiimpa. Cōwē ædæmō cæte quëwencæbiimpa. ¹² Wængongui ingante mōnō wede pōnēnō ante mōnō cæquēnēnō ante bitō tæi ēwocate cæcæbiimpa. Mōnō wæñāmai quëwenguinō goquīmō, ante pōnente ñimpo cædāmai incæbiimpa. Edæ waodāni tæiyænāni ēñēñōnāni, bitō, Wængongui ingante wede pōnente babopa, ante āñōmi Wængongui edæ, Māniñō quëwenguinō gocæbiimpa, ante bitō imite apænte aa pecantapa. ¹³ Wængongui pōnō cæcā beyænque quingāmenque incæ tōmānāni quëwēnāni

inānīpa. Itota Codito iñōmō Pontio Pidato ingante apænedingue, Quinō nō impa, ante edonque pōni apænegaingā ingampa. Edæ Wængongui tōnō Itota Codito mǎnōmǎinō ingaina iñōna botō tōmēna ayōna bitō imite, iimāi cæe, āmopa. ¹⁴ Mōnō Awēnē Itota Codito nānō ocæ ēmænte ponguinganca bitō mǎninō botō wææ ānō tōmānō ante waa ēñente cæcæbiimpa, āmopa. Bitō ēñente cædō adinque wadāni ædō cæte, Wēnæ wēnæ impa, ante anguinānii, ante pōnente cōwē waa pōni cæcæbiimpa. Mǎnōmāi ante āmopa.

¹⁵ Wængongui nānō aingeuionæ bayonte Itota ocæ ēmænte poncæcāimpa. Mōnō Awēnē Wængongui iñōmō tōmengā adocanque Wængonguinque ingaingā inte nē waa pōni inongā ingampa. Tōmēnāni awēnē odeyēidi iñōnānīte tōmengā Tæiyæ Awēnē Odeye inongā ingampa. Ayæ tōmengā iñōmō awēnēidi tōmānāni Awēnē inongā ingampa. ¹⁶ Tōmengā adocanque nē wantæpiyæ wænāmāi inongā inte nē Quēwengā ingaingā ingampa. Tōmengā tōmāā nāō iñōmō quēwēnongā iñongante waodāni ædō cæte tōmengā weca goquinānii. Tōmengā mōnō waocabo mōnō nē adāmāi ingaingā ingampa. Edæ tōmengā ingante mōnō ædō cæte aquī. Tōmenganque ingante waodāni tōmānāni waa aquinānidō anguēnē. Tōmenganque cōwē nē tæi piñænongā inte quingāmenque quēwēnāni iñōnānīte tōmengā tōmānāni Awēnē inguingānō anguēnē. Mǎnōmāi babaiimpa, ante, Amēē, āmopa.

¹⁷ Inguipogaque mǎincoo nē nangui ēadāni inānīte bitō iimāi ancæbiimpa. Nanguī ēamōni inte mōnitō godōmenque waa pōni imōnīpa, ante pōnēnāmāi iedāni. Iñæmpa mǎincoo mōnō ēadincoo iñōmō quingæ dæ ā apa quēwēnānii. Inique mīni mǎincooque ante wīi mǎincooque ante pōnēedāni. Wæætē, Wængonguinque beyænque watapæ quēwengæimpa, ante pōnēedāni, ancæbiimpa, āmopa. Edæ, Mōnō qui quinō dæ ā, ante wæmō adinque tōmengā mōnō imonte, Mīni watapæ quēwenguinque, ante tōmāā nē pōnongā ænguiimō imopa. ¹⁸ Mǎnināni nē nangui ēadāni inānīte bitō, Mīnitō quinō waa cæquī, ante mǎninonque cæcæmīnīpa, ancæbiimpa. Waa mīni cæquinō ante mīnitō nangui cæte quēwencæmīnīpa. Ayæ do Ao ante mīnitō mǎincoo mīni ēadincoo pancacooga pædæ godōmīni æncædānie, ancæbiimpa, āmopa. ¹⁹ Mǎninō bai nē cædōnānique, Mōnō nāmā beyæ ēaquincoo, ante oōnæde iñōmō do cō cæte bai cædānīpa. Mǎnōmāi cædinque tōmēnāni, Nō pōni mōnō quēwenguinque impa, ante iincayæ ate æncædānīpa.

²⁰ Timoteo ēñēmi. Wængongui, Wææ aacæbiimpa, ante bitō imite quinō pōnongā bitō ō æninō ante wææ ae. Tæiyæ waēmō ēwocadāmāi inte wadāni ōnonquedō ante nāni ānōnō ante ēñēnāmāi iē. Adobai wadāni, Mōnitō ēñente ate nangui encalmōni imōnīpa, ante nē babæ ānāni iñōnānīte bitō wadodō wadō nāni ānewēnō ante ēñēnāmāi iē. ²¹ Tōmēnāni nāni ānewēnō ante pōnēninque waodāni pancadāniya Wængongui ingante nāni pōnēnīnō ante do iimpo cædinque wadæ godināni inānīpa.

Wængongui bitō imite waadete pōnō cæcæcāimpa, ante botō mǎninque ante yewæmōmopa.

2 Timoteo ingante Pabodo cadota ante ayenta nānō yewæmongainta

Timoteo ingante Pabodo yewæmongampa

¹ Botō Pabodobo inōmo imopa. Wængongui nānō ānō bai Itota Codito nānō nē da godongaimo imopa. Itota Codito nempo quēwēnōnāni iñōnānite Wængongui, Minitō wantæpiyæ mini quēwenguinō ante pōnōmo ænguimīni iminipa, angacāimpa. Mānōmai beyæ tōmengā botō imo, Māninō ante apænebi ēñencādānīmpa, angā ēñēninque botō tōmengā nānō nē da godongaimo imopa. ² Timoteo ēñēmi. Bitō botō wēmi bai inōmi inte botō nē waadebi inōmi imipa. Bitō acæbiimpa, ante bitō imite yewæmōmopa. Mōnō Mæmpo Wængongui tōnō Awēnē Itota mōnō Codito tōnō bitō imite waadete pōnō waa cæda ate bitō gānē entawencæbiimpa, āmopa.

Itota Codito waa pōni nānō ingainō ante

³ Wēēnēdē botō wæmæidi nāni cægai bai botō adobai nāmā apænte pōnente adinque wentamō mongænāmai entawēmo inte Wængongui beyæ nē cæbo imopa. Botō itadē incæ woyowotæ incæ bitō beyæ ante māningā Wængongui ingante botō apæneyedē adocā ingante cōwē waa ate pōnente apænebopa. ⁴ Botō bitō æbānō wēñapæ tamōmitapa, ante pōnēninque, Botō watapæ tocæboimpa, ante bitō imite ainente imopa. ⁵ Bitō Wængongui ingante nō wede pōnēmi imipa, ante adimo inte botō adodō ante wæætē pōnēmopa. Edæ bitō ñæñæ Doida bitō wāānā Eōnita tōnō tōmēna tāno Wængongui ingante nō wede pōnente nāna ingai bai bitō iñōmō ñōwo adobai imipa, ante do ēñēmopa.

⁶ Mānōmai beyæ bitō imite iīmai āmopa. Wængongui nānō cædōnō ante bitō cæcæbiimpa, ante botō bitonga gampo cæyōmo Wængongui pōnō cæcā æninque ewocabi imipa. Inique māninō bitō ewocadō beyænque bitō godōmenque godōmenque cæcæbiimpa. ⁷ Wængongui tōmengā Tæiyæ Waēmō Onōwoca ingante mōnō imonte pōnongā æmō inique mōnō wīi tōmengā beyæ guñfente ewocamōmpa. Wæætē māniwoca beyæ tæi ewocamō imōmpa. Ayæ adowoca ingante ewocadinque waodāni inānite waadete pōnēmō imōmpa. Adowoca beyæ mōnō, Nōinō cæcæimpa, ante pōnēninque nāmā wææ ante cæmō imōmpa.

⁸ Mōnō Awēnē Itota Codito nānō angainō bitō ēñēninō ante bitō guingo imōnāmai inte apænecæbiimpa. Botō adobai, Tōmengā nānō angainō botō ēñēninō ante botō apænebo beyæ bitō imote tee mōnedāni

wæyōmote bitō māninō adinque guingo imōnāmai inte apænecæbiimpa. Wæætē botō tōnō Itota ingantedō ante mōna watapæ apænedō ante apænedinque bitō Wængongui nānō tæi piñæmāmo ante ewocadinque botō tōnō adobai guēa caate wæcæbiimpa. ⁹ Wængongui, Quēwencæminīmpa, ante mōnō imonte æninque, Minitō tæiyæ waēmō entawente quēwencæminīmpa, ante mōnō imonte aa pegacāimpa. Mānōmai cædinque tōmengā wīi mōnō waa cædinō beyænque wæætē tōmengā nānō ainēnō ante cægacāimpa. Ayæ wēēnēdē inguipoga badōnāmai iñedē tōmengā, Itota Codito beyænque, ante pōnēninque mōnō imonte waadete pōnō cægacāimpa. Māninō nānō waadete pōnō cægainō beyænque tōmengā mōnō imonte æninque aa pegacāimpa. ¹⁰ Incæte ñōwoyedē mōnō imonte, Quēwenguimīni, ante nē Ængaingā Itota Codito pongā inique tōmengā waadete nānō pōnō cægainō ante edonque odōmongantapa. Ayæ Itota ingantedō ante mōnō watapæ apænedō beyæ tōmengā, Minitō mempoga wænāmai incæminīmpa, ante cædinque wantæpiyæ wænāmai mōnō quēwenguimāmo ante edonque odōmongacāimpa.

¹¹ Wængongui botō imote apænedinque, Itota ingantedō ante watapæ botō apænedō ante bitō apænebi ēñencādānīmpa, angantapa. Angā ēñēninque botō adobai tōmengā nānō nē da godōmo imo inte ayæ nē odōmonte apænebo imopa. ¹² Māniī beyæ botō mānōmai wæwente quēwēmpo. Incæte, Æcānō ingante nē wede pōnēmo imopa, ante do ēñēmo inte botō guingo imōnāmai imopa. Edæ botō quīnō tōmengā ingante godōnīmo incæ tōmengā māninō æninque nangui tæi ewocacā inongā inte tōmengā nānō apænte anguiñōnæ ganca wææ cæcæcāimpa. Māninō ante botō ædæmō ēñēmopa.

¹³ Botō bitō imite odōmonte apænebo bitō ēñēninō ante bitō ñimpo cædāmai ee nææncæbiimpa. Wæætē, Māninō nō ante mōnō adodō adodō ante odōmonte apænedō impa, ante bitō adobai adodō ante odōmonte apænecæbiimpa. Mōnō Itota Codito nempo quēwēmi inte wede pōnēninque waadete pōnente odōmonte apænecæbiimpa. ¹⁴ Wængongui, Wææ aacæbiimpa, ante bitō imite pōnongā ænīmi inte bitō tōmengā waa pōni nānō pōnongainō ante wææ aacæbiimpa. Edæ mōnō Wængongui Onōwoca tōnō ewocate quēwēmpo. Inique bitō tōmengā tōnō cædinque wææ aacæbiimpa.

¹⁵ Atiabæ quēwēnāni iñōmō tōmānāni botō imote emō cæte godānitapa, ante bitō do ēñēmipa. Edæ Piguēdo tōnō Edōmogænxæ incæ tōmēnāni tōnō botō imote emō cæte godatapa. ¹⁶ Onetipodo

guiquënë botō wæwēmo adinque tōmengā wæætē wæætē pōnō cæcā beyænque botō wampo pōnentabopa. Ayæ adobai botō imote yæguincamē inte ñā cæyænte tee mōnedāni wæyōmote tōmengā guingo imōnāmai ingacāimpa. Īninque tōmengā tōnō godongāmæ quēwēñāni inānite mōnō Awēnē Itota Codito waadete pōnō waa cæcæcāimpa, āmopa. ¹⁷ Edæ Odōmā nāni quēwēñōmō ĩñōmō pōninque Ōnetipodo botō imo ante nanguī diqui diqui mīninque ate ate ĩnque mingacāimpa. ¹⁸ Botō Epeto nāni quēwēñōmō māññōmō quēwēñōmote tōmengā æbānō botō beyæ pōnō nanguī cæcantapa, ante bitō do ædæmō ēñēmipa. Mānōmai beyæ botō ĩnque baquīōnæ ĩñonte Wængonguī tōmengā ingante pōnō waadete waa cæcæcāimpa, āmopa.

2

Itota Codito beyæ waa tontado bai cæcæcāimpa

¹ Ayæ bitō botō wēmi bai ĩnōmi inte ēñēmi. Itota Codito nempo quēwēñōmote tōmengā waadete pōnō cæcā beyænque bitō tæī ēwocabi incæbiimpa, āmopa. ² Waodāni tæiyæñāni ēñēñōnāni botō æbānō ante apænebo bitō ēñēñinō ante bitō wæætē wadāni nē pōnēñāni inte cōwē ædæmō cædāni ĩñōñānite adodō ante odōmote apænebi ēñencædāniimpa. Ēñēninque tōmēñāni nē nō cædōñāni inte adobai wadāni inānite odōmote apænequīñāni ĩñānīpa, ante tōmēñāni ĩñānite āmi gocædāniimpa.

³ Bitō Itota Codito beyæ waa tontado bai ĩnōmi inte bitō wæwēmi incæ ee ongote godōmenque cæcæbiimpa, āmopa.

⁴ Waocā tontado badinque nānō cæyedē tōmengā, Botō awēnē botō imote waa acæcāimpa, ante tōmengā nānō ānonque ante ēñente cæcæboimpa, āninque wadāni tontado ĩnāmai ĩñāni nāni cæbai cædāmai ĩnongā ingampa. ⁵ Gānā cæcæte ante nē owempocā ĩñōmō, Cōwē nāni cægai bai owempodāni, ante nāni wææ angaiñō ante ēñente cæcā ĩnque tōmengānque godōmenque waa owempodinque gānā cædinque poganta æmaingampa. ⁶ Amiñā bayedē pancamonga pancamonga æññōñāni gōnea ante nē nanguī cæcā ĩñōmō tōmengā tāno ænguēnengā ingampa. ⁷ Māññō ĩmæca quēwēñāni nāni cæ bai ante mēnea go adodeque botō āñinō ante pōnēñōmi mōnō Awēnē edæ bitō ĩmite odōmongā ēñēninque bitō edonque pōñi ēñencæbiimpa.

⁸ Itota Codito awēñē Dabii wodi nānō pæingā ĩnongā inte do wæñinque nē ñāni ōmæmongaingā ingante ante pōnencæbiimpa. Māññō ante watapæ botō apæñedō impa. ⁹ Māññē beyænque botō

caate wæwēmo ĩmopa. Edæ nē wēnæ wēnæ cæcā ingante tee mōnecōñē ñā cæyæñāni bai botō imote adobai māññē botō apæñedō beyænque ñā cædāni wæbopa. Incæte Wængonguī nānō angaiñō ædō cæte ñā cæyænte nguī. ¹⁰ Māññōmai beyæ Wængonguī nānō apænte æññāni beyænque ante cæyōmote wadāni anca wēnæ wēnæ cædāni wæbo incæte botō ĩmopo cædāmai inte godōmenque cæbopa. Edæ Wængonguī nānō ñāō apāiyōmō nāni cōwē quēwēnguinque māññāni Itota Codito ængā beyænque tōmengā nempo quēwēncædāniimpa, ante cædinque botō wæwēmo incæte godōmenque cæbopa.

¹¹ ĩmai ante nāni āñō nāwangā ante impa. Mōnō Itota Codito tōnō godongāmæ wængaimō inte adobai tōmengā tōñō cōwē wæñāmai quēwēncæmōimpa.

¹² Mōnō tōmengā tōñō ĩmopo cædāmai inte ee cæte wæwēmō inte adobai tōmengā tōñō nē awēñēdi badinque godongāmæ aacæmōimpa.

Mōnō, Tōmengā ingā dicæ abogaa, āmō ĩnque tōmengā adobai nāēmæ mōnō imonte, Dicæ abogaa, āmaingampa.

¹³ Mōnō wede pōnēñō ante ædæmō cædāmai ĩmō incæte tōmengā guiquënë mōnō imonte cōwē pōnēninque cōwē ædæmō cædongā ingampa.

Īñæmpa tōmengā ĩñōmō nāmā nānō ingaiñō ante ĩmopo cædāmai ĩnongā inte tōmengā wadō ante pōnēñāmai ingampa.

Wængonguī bitō ĩmi, Waa cæbi abopa, anguingā, ante

¹⁴ Waodāni ĩñānite apænedinque bitō, Māññō ante pōñēdāni, ante wæætē wæætē ancæbiimpa. Mōnō Wængonguī ayongā ĩmai ante wææ ante nanguī apænebi ēñencædāniimpa. Mīnitō, Ædedō ĩ, ante wadodō wadō ante piinte tededāmai incæminimpa. Īñæmpa māññōmai bai āninque mōnō āñō ĩñōmō ōnonque ante impa. Ayæ māññōmai ante tedemō ēñēninque nē ēñēñāni ĩñōmō æmæ pōnente babaiñānīpa, ante bitō wææ ancæbiimpa, āmopa. ¹⁵ Bitō Wængonguī ayongā, Botō nē waa cæbo incæboimpa, ante nanguī cæcæbiimpa. Nē cæbo inte guingo imōñāmai incæboimpa, ante cædinque Wængonguī nō nānō angaiñō ante tōmēmi nē ædæmō ēñente entawēñinque māññinque ante tōñō ante wadāni inānite waa odōmote apæñecæbiimpa. ¹⁶ Tæiyæ wæmō ēwocadāmai inte wadāni ōnonquedō ante tedeyōñāni bitō tōmēñāni inānite ēñēñāmai inte nāñēñē wadæ goe. Edæ māññāni Wængonguī ingante ēmō cædinque cōwē godōmenque wīwa nāni cæquinque wadæ godānīpa. ¹⁷ Baō ñōmæññōmō aca podinque nanguī godōmenque baayō

bai mānināni nāni odōmonte apænewenō adobaī wodo wodo go īnīnque wadāni tæiyænnāni ēñēninque oda cæcædānīmpa.

Mānināni nāni tedewencabo īñōnāni īimēneo tōnō Pideto adodaque īnapa. 18 Tōmēna Wængonguī nāwangā nānō angainō ante fīmpo cæte wadæ godīna īnapa. Ayæ, Mōnō nāni ōmæmōnō īñōmō īnīnque bagatīmpa, ante tedewēna ēñēninque wadāni pancadāniya nāni wede pōnēnō incæ wido cæte bai quēwēnānīpa. 19 Incæte Wængonguī nāwangā nānō angainō mōnō pōnēnō īñōmō tæī gōnonte bai cōwē ongōmpa. Māninō ante mēnea ante īīmaī yewæmonte bai ongōmpa. Edæ Wængonguī Awēnē tōmēngā quīnāni ædānidō īnānī, ante do ēñēngāmpa. Ayæ tōmēngā ēmōwo ante, Botō Awēnē īnongā īngāmpa, ante nē ānāni īñōmō tōmēnāni tōmānāni, Mōnō wīwa cædīmāmo ante wæte wædinque wadæ goquēnēnāni īnānīpa.

20 Nē eacā oncōnē nīænæncōnē tōmēngā nānō waa waa cō cæincade īñōmō oodo inte padata inte nāni badōincade mæ ongōmpa. Adobaī wacade awæmpaincade daicade incade mæ ongōmpa. Panca-cadea īñōmō wæmoncooque da wēincade incadepa. Wacade guiquēnē ōmæpocooque da wēincade incadepa. 21 Waocā wēnæ wēnæ nānō entawēnō ante fīmpo cædinque nāmā nā mēnongate bai quēwēngā īnīnque tōmēngā īñōmō wæmoncooque da wēincade bai īnongā inte Wængonguī beyæ waa cæcā īmaingāmpa. Tōmēngā tæiyæ wæmō ēwocate quēwēngā babaingāmpa. īnīnque tōmēngā Awēnē nānō ānō ante do cæcā īmaingāmpa. Ayæ, Quīnō waa cæquīnō ī, ante tōmēngā do cæcā īmaingāmpa.

22 Edēnīnāni wīwa nāni cæinēnō ante bitō fīmpo cæte wodīi gote bai quēwēncæbiīmpa. Wæætē waodāni mīmō nā mēnongate entawēnāni inte Wængonguī īngante nē apænedāni tōnō bitō nō cæquēnēnō ante cæte quēwēncæbiīmpa. Mōnō wēde pōnēnō ante godōmenque pōnente quēwēncæbiīmpa. Waodāni īnānite godōmenque waadete pōnencæte ante cæcæbiīmpa. Ayæ mōnō piyænē cæte quēwēnguīmāmo ante pōnēninque cæcæbiīmpa. 23 Ōnonquedō ante apænedīnque nē, Ædedō ī, ante wacā tōnō guēadō guēa tedewēngā mānōmaī tedecā beyænque wadodō wadō piinte tedewēnānīpa, ante do ēñēmīpa. īnīnque tōmēnāni nē pōnēnāmaī īnāni inte ōnonquedō ante apæneyōnāni bitō tōmēnāni tōnō godongāmæ apænedāmā incæbiīmpa.

24 Mōnō Awēnē īngante nē cæcā īñōmō tōmēngā wadāni tōnō wadodō wadō piinte tededāmā incæcāīmpa. Wæætē tōmānāni īnānite ædæmō cæcæcāīmpa. Ayæ wadāni tōmēngā īngante wēnæ wēnæ cædāni

adinque tōmēngā wæætē pīināmaī inte piyænē cæcæcāīmpa. Ayæ tōmēngā nē waa odōmonte apænecā incæcāīmpa. 25 Tōmēngā apænecā ēñēninque nē ēñēnāni īñōmō Baa ante wadō ānāni īnānite tōmēngā ædæmō cæte, īīmaī īmpa, ante odōmonte apænecā ēñēncædānīmpa. Edæ Wængonguī pōnō cæcā ate tōmēnāni nāmā incæ, Wēnæ wēnæ cæmō awædō, ante wædinque tōmēngā nāwangā nānō angainō ante ēñēncædānīmpa, ante pōnente cæcæcāīmpa. 26 Ayæ tōmēnāni ēñēnāmaī encadāni incæ nē ēñēnguīnāni wæætē bacædānīmpa, ante pōnente cæcæcāīmpa. Wēnæ īñōmō tōmēnāni īnānite bæi ongōninque tōmēngā, Botō ānō ēñēnte quēwēncæmīnīmpa, ante godō cæcā ate tōmēngā nānō nē bæi ongōnāni wæætē aamō cæte wodīi gocædānīmpa, ante adobaī pōnente cæcæcāīmpa.

3

īnīnque bayedē waodāni cæbānō quēwēnguīnānī, ante

1 Timoteo ēñēmī. īnīnque ēōnæ bacæ cæyedē wēnæ wēnæ ba wæquīnō anguēnē. 2 Māniñedē edæ waodāni nāmanque waadete pōnēnguīnāni īnānīpa. Tōmēnāni nāni godonte ænīnta waadete pōnente nāni wædō ante quēwēnguīnāni īnānīpa. Tōmēnāni nāmanque, Botō gomonga waa cæbo īmpa, ante pōnēnguīnāni īnānīpa. Wængonguī īngante godō wēnæ wēnæ ante babæ anguīnāni īnānīpa. Wadāni īnānite badete toquīnāni īnānīpa. Wēñænāni incæ wæmpoda īnate ēñēnāmaī cæquīnāni īnānīpa. Wadāni pōnō waa cædāni incæte tōmēnāni nē waa cædāni īnānite wæætē waa cædāmā īnguīnāni īnānīpa. Ayæ tæiyæ wæmō entawēnāmaī īnguīnānīmpa. 3 Adobaī waadete pōnēnāmaī quēwēnguīnāni īnānīpa. Mānīnāni īnānite wēnæ wēnæ cædāni adīnque tōmēnāni wæætē pīīnīnque fīmpo cædāmā inte wēnæ wēnæ cæquīnāni īnānīpa. Wadāni īnānītedō ante babæ ante ānewēnguīnāni īnānīpa. Tōmēnāni nāni cæinēwēnō ante nāmā wææ ānāmā inte do cæquīnāni īnānīpa. Ayæ wadāni īnānite ædæmō cædāmā inte piinte cæquīnāni īnānīpa. Wadāni, Quīnō waa īmpa, ante pīīnguīnāni īnānīpa. 4 Tōmēnāni nāni guīdēnāni incæ, Wēnæ wēnæ bate wæcædānīmpa, ante godō odōmonguīnāni īnānīpa. Tōmēnāni pōnēnāmaī inte do wēnæ wēnæ cæquīnāni īnānīpa. Tōmēnāni nāmā incæ, Botō gomonga waa ēñēmōpa, ante pōnēwēnguīnāni īnānīpa. Wængonguī īngante waadete pōnēnāmaī īnguīnāni inte wæætē tote quēwēngæīmpa, ante nāmanque waadete pōnēnguīnāni īnānīpa. 5 Tōmēnāni Wængonguī ayongā waa cæte quēwēnāni bai adobaī cædāni incæte Wængonguī nānō

tæi piñæmāmo piūwēninque nāmanque cæte quēwēnānīpa tōō.

Īninque bitō mānināni inānite gomō ae. ⁶ Mānōmaī bai cædāni ĩñōmō waa apænedinque waodāni oncōnē wāānē guidiānīpa. Onquiyæñāni wīi tæimō entawēnāni inte tōmēnāni nāni wēnæ wēnæ cædi teēmēmō mongænte bai ināni ĩñōnānite oncōnē nē guidiāni ĩñōmō, Onquiyæñāni mōnitō apænedō ante ēñente cæcædānīpa, ante cædāni ate onquiyæñāni wæætē oda cæte godānīpa. Mānināni onquiyæñāni ĩñōmō, Quiēmē nāni wēnæ wēnæ cæinēmāmo, ante wadō gote wadō gote oda cædānīpa. ⁷ Tōmēnāni cōwē ēñencæte ante cædāni incæte wapiti wapiti cædāni ĩninque Wængonguī nāwangā nānō angāinō ante cōwē ēñente badāmaī inānīpa. ⁸ Wēēñēdē Mōitee wodi Equitobæ tæiyæ awēnē ingante apæneyongā Aānee tōnō Aāmodee nē idōna inte Mōitee ingante piūninque, Ononque angampa, āna ingadāimpa. Īninque bayedē nē wēnæ wēnæ cædāni guiquēnē ĩina inōna nāna cægāi bai adobaī cædinque Wængonguī nāwangā nānō angāinō ante Baa ante wadō ānāni inānīpa. Tōmēnāni ocaidē pōnente wentamō encadāni inte oda cæte godānīpa. Īninque Wængonguī ingante mōnō pōnēmāmo incæ dicæ pōnēnāniyaa. Wængonguī tōmēnāni inānite Baa ancæcāimpa. ⁹ Īñæmpa ædō cæte godōmenque cæquīnāni. Mānīna nē idōna nāna ononque cægāinō ante edonque agadāni bai tōmēnāni nāni ononque cædinō ante waodāni tōmānāni adobaī edonque pōni acædānīpa.

Timoteo ingante Pabodo ĩnque wææ angampa

¹⁰ Bitō ĩñōmō, Æbānō botō odōmonte apæneboo, ante, Æbānō waa quēwēmo, ante, Æbānō pōnente ante, Īmaī cæcæboimpa, ante cæboo, ante bitō tōmānō ante do ēñēmīpa. Ayæ Wængonguī ingante botō pōnēmāmo ante waodāni inānite botō ee cæpāmo ante botō waadete pōnēmāmo ante botō wæntædāmaī inte cæpāmo ante bitō adobaī do ēñēmīpa. ¹¹ Ayæ botō ĩmote togænte pānāni botō wæpāmo ante ayæ botō wæwēmāmo ante bitō do ēñēmīpa. Wadāni quiēmē wēnæ wēnæ cæcæte ante botō ĩmote togænte pānāni wæbo incæ botō wæntæye ĩnāmāi intabopa. Antioquiya ĩñōmō ĩcōnio ĩñōmō adobaī Ditada nāni quēwēñōmō māniñōmō wēnæ wēnæ cædāni wæbo incæte mōnō Awēnē ō ængā beyænque ayæ quēwēmo ĩmopa. ¹² Nō ante ĩmopa. Æcānō, Botō Itota Codito nempo quēwēmo inte Wængonguī ayongā waa cæte quēwencæboimpa, ante āna tōmengā ingante togæwēninque wēnæ wēnæ cædāni wæquingā ingampa. ¹³ Waodāni wēnæ

wēnæ cædāni tōnō, Oda cæcædānīpa, ante nē cædāni ĩñōmō tōmēnāni nē wēnæ wēnæ cædināni inte godōmenque wēnæ wēnæ cæquīnāni inānīpa. Edæ mānināni inānite wapiticæ māodāni oda cæte cædināni inte tōmēnāni wæætē wadāni inānite adodō, Æpiticæmē oda cæquīnānidō, ante cæcædānīpa.

¹⁴ Bitō guiquēnē æbānō ēñēnīmi inte, Nō ĩmopa, ante pōnēninque cōwē ĩmopa cædāmaī incæbiimpa. Edæ bitō ĩmi ædānidō odōmonte apænedāni, ante do ēñēmīpa. ¹⁵ Wængonguī angā ēñente tæiyæ wæmō nāni yewæmongāinō ante bitō wēnæmiyedē mā ēñēninque ũōwo ganca do ēñēmitawo. Māninō ante nāni yewæmongainta ate ēñēninque bitō Itota Codito ingante pōnēñōmi tōmengā ængā beyænque quēwencæbiimpa.

¹⁶ Wængonguī pōnō apæneccā ēñēninque waodāni tōmēnāni nāni ēñēnonque ante Wængonguī beyæ yewæmongadānīpa. Tōmēnāni Wængonguī nānō odōmonte apænegāinō ante nāni yewæmongainta adinque mōnō, Æbānō waa ĩmopa, ante ēñēninque mōnō odōmonte apæneccāimpa. Wængonguī angā ēñente nāni yewæmongainta adinque, Quīnō mōnō wēnæ wēnæ cædinō ĩi, ante mōnō do ēñēninque nē wēnæ wēnæ cæcā ingante mōnō wææ angæimpa. Ayæ Wængonguī angā ēñente nāni yewæmongainta adinque nē oda cæte wæcā ingante, Mōnō nōinō cæquēnēnō ĩmaī ĩmopa, ante mōnō odōmonte apæneccāimpa. Nō cæte quēwencæmīnīpa, ante odōmonte apænete ongō ate mōnō ēñēnō ante mōnō waodāni inānite odōmonte apæneccāimpa. ¹⁷ Edæ Wængonguī beyæ nē odōmonte apæneccā ĩñōmō eyepæ ēñengā inte tōmengā nānō waa cæquīmāmo tōmāmāmo ante cæcæcāimpa, ante odōmonte apæneccæte ante yewæmongadānīpa.

4

¹ Waodāni mīnāni quēwēnāni incæ do wængāināni incæ tōmānāni inānite mōnō Itota Codito nē apænte angungā inte tōmengā Awēnē Odeye badinque ponte a onongā acæimpa. Tōmengā ayongā ayæ mōnō Mæmpo Wængonguī ayongā botō bitō ĩmote, Īmaī cæe, āmopa. ² Wængonguī nānō angāinō ante apænebi ēñencædānīpa. Waodāni Ao ante, Ēñēimōni ante ānāni incæ Baa ante ēñēnāmāi ināni incæ bitō cōwē apænebi ēñēnānie. Wængonguī nānō angāinō ante oda cæte wædāni adinque bitō, Mōnō nōinō cæquēnēnō ante cæcæmīnīpa, ancæbiimpa. Wēnæ wēnæ cædāni inānite, Ædō cæte mānōmaī cæmīnīi, ante nangūi ancæbiimpa. Ayæ adobaī, Wampo pōnencædānīpa, ante ædæmō

apænebi eñencædânimpa. Mâninô tömänô cædinque nanguï waadete ee cædinque adodô adodô ante odömonte apænebi eñencædânimpa.

³ Ìncayæ ate nö odömonte mönö apænedö ante waodâni Baa anguïnâni ìnânipa. Mâninô ante eñênâmai incæmônimpa, ante ânâni inte tömênâni wæætê, Mönö eñêinênonque ante odömonte apæneedâni, ante në odömonte apænedônâni nanguï ìnâni ìnânite diqui diqui minte acædânimpa. Mâninuedö ante eñencæmônimpa, ante anguïnâni ìnânipa. ⁴ Mâninâni nâwangâ angainô ante eñênâmai inte wadæ godinque wæætê önonquedö ante dodâni nâni angainô ante eñente cæquïnâni ìnânipa. ⁵ Bitö guiquênê tömêmi quëwenganca æbâmê baquï incæ godömenque cæcæbiimpa. Caate wæbi incæte bitö ñimpo cædâmai inte godömenque cæcæbiimpa. Wængonguï waa pöni nânö apænedö ante apænebi eñencædânimpa. Bitö cæquênênö tömäâ ìnque cæcæbiimpa.

⁶ Wængonguï qui, ante nâni godönö bai botö adobai ìñömote wantæ ìñonte wænönâni wæncæboimpa. Edæ botö wænguïönæ oo pöni ìmpa. ⁷ Botö tæi ewocabo inte Awênê Itota beyæ botö cæquênênö waa pöni ìnque cætabopa. Gânâ cæcæte ante në pogodo godâni næ gongænâmai nâni ìnque goganca godâni bai botö adobai tömêmo quëwenganca wæntæye ìnâmai inte ìnque cætabopa. Mönö wede pönênö ante botö ñimpo cædâmai inte cöwê pönentabopa. ⁸ Mönö Awênê në nö apænte anguïönæ ìñöte tömengâ, Bitö nö pönente waa cædimi inte bitö waa cædinta ante poganta æncæbiimpa, ante botö ìmote pönongâ æncæboimpa. Wü botö adoboque ìñömote pönongâ æncæboimpa. Wadâni adobai tömengâ nânö pongâ aquïönæ ante nanguï ainente në wânö cönâni ìnâni adinque tömengâ, Minitö nö cæte quëwênimîni inte mînitö waa cædinta ante poganta æncæmînimpa, ante tömênâni tömänâni ìnânite pönongâ æncædânimpa.

Timoteo quïnö cæcæcäimpa, ate

⁹ Bitö eyepæ inte botö weca quingæ pöe, ämopa. ¹⁰ Deëma ìñömö inguipogaque ante botö ìmote emö cæte Tetadönica nâni quëwêñömö gocantapa. Ayæ Quedetente ìñömö Gadatiabæ ìñömö gocantapa. Adobai Tito Dadâmatiabæ ìñömö gocantapa. ¹¹ Odoca adocanque botö weca ongongampa. Mäadoco ingante adinque tömengâ ingante botö weca ænte mämömi pongâi. Edæ botö cæquênênö ante cæyömote tömengâ botö tönö guëa nanguï cæcä ingampa. ¹² Ayæ Tiquico ingante botö Epeto ìñömö da godömo gocantapa. ¹³ Botö yacoo

ocoi ä weocoo Todoa ìñömö Cadopo oncönê botö emö cæte pönicoo bitö ponte ate ænte pöe. Adobai botö dibodocoo ænte mämömi æmoe. Botö tæinetacoo yewæmointacoo, ante godömenque wæbopa. Mâninta cöwê mämömi æncæboimpa, ämopa.

¹⁴ Adecantodo tæineta në badongâ ìnogâ ìñömö botö ìmote nanguï wênæ wênæ cæcä wætabopa. Mänömai cæcä adinque Wængonguï edæ tömengâ nânö wênæ wênæ cædinganca mânanganca tömengâ ingante wæætê pancæcäimpa, ämopa. ¹⁵ Mânigâ bitö ìmite adobai wênæ wênæ cædâmai incæcäimpa, ante bitö adobai wææ cæcæbiimpa. Edæ mönö odömonte apænedö ante tömengâ cöwê Baa ante wadö ante quëwênongâ ingampa.

¹⁶ Botö ìmote në apænte änogâ weca ænte mäodâni gote ongöninque botö nâmâ incæ wææ ancæte ante mä apæneyömo æcänö botö tönö godongämæ äna edæ dæ ânâni wætabopa. Tömânâni edæ botö ìmote emö cæte wadæ godânitapa. Mänömai nâni cædinö beyæ Wængonguï tömênâni ìnânite pîñâmai incæcäimpa, ämopa. ¹⁷ Incæte, Wadâni wü oodeoidi ìnâni tömämæ quëwênâni Wængonguï waa pöni nânö apænedö ante eñencædânimpa, ante cædinque mönö Awênê ìñömö botö gäänê ongöninque botö tönö godongämæ cæcä beyænque tæi ewocabo inte apænetabopa. Ìmæca awênê nempo wæwente quëwêñömote mönö Awênê wæætê gâ pe æmpote ö ængâ beyænque quëwêmpopa. ¹⁸ Mänömai bai cædinque botö ìmote quïemê wênæ wênæ cædâni wæbo incæ mönö Awênê Odeye botö ìmote ænguingâ beyænque quëwænæboimpa. Adobai tömengâ öönædê nânö aayömö botö ìmote adimongâ ænte mæxicä æite goquïmo ìmpa. Wængonguï ñäö apâte bai emönongâ ingante mönö cöwê waa acæimpa, ämopa. Mänömai babaiimpa, ante Amêê, ante ämopa.

Timoteo ingante Pabodo, Waa quëwæncæbiimpa, angampa

¹⁹ Pidica tönö Aquidæ nâna gæncaya waa quëwæncædäimpa, ämopa. Bitö tömêna inate adodö apænebi eñênæe. Adobai Önetipodo tönö godongämæ quëwênâni waa quëwæncædânimpa, ämopa. Bitö tömênâni ìnânite adodö apænebi eñênâni. ²⁰ Edaato Coodinto ìñömö ayæ a ongongantapa. Ayæ Todopimo në wênæ wênæ ìñongâ botö tömengâ ingante Mîideto ìñömö emö cæte gotabopa. ²¹ Bitö eyepæ inte cöönædepo badâmai ìñedê botö weca quingæ pöe, ämopa. Eobodo ìñömö tömengâ, Bitö waa quëwæncæbiimpa, angâ eñêninque botö bitö ìmite adodö ämo eñêe. Podænta tönö Diino ayæ Codaodia tönö möni pönencabo

tömämöni bitö imite, Waa quëwencæbiimpa,
ämönipa.

²² Mönö Awënë Itota Codito bitö tönö on-
gonte incæcäimpa, ämopa. Ayæ Wængongui
bitö imite waadete pönö cæcæcäimpa, ante
mäniñque ante yewæmömopa.

Tito ingante Pabodo cadota ante nänö yewæmongainta

Tito ingante Pabodo yewæmongampa

¹ Botö Pabodobo inömo imopa. Wængongui ingante nê cæbo iñömete Itota Codito, Bitö Wængongui nänö nê apænte æninäni inänite apænebi eñencædänimpa, ante da godongä ate botö tömengä nänö nê da godonga imopa. Tömengä, Tömänäni botö imote nani wede pönönö ante godömenque wede pönencædänimpa, ante cæcæbiimpa, ante da godongä gotabopa. Ayæ, Wængongui näwangä nänö angainö ante eñente entawëninque tömönäni tömengä ayongä waa cæte quëwencædänimpa, ante cædinque Itota Codito botö imote da godongä godimo imopa. ² Edæ, Iincayæ ate mönö wænämäi quëwenguinö gocæmöimpa, ante eñëninque pönencædänimpa, ante Wængongui nê babæ änämaï inongä inte wëñëñedë inguipoga badönämaï iñedë iimaï angacäimpa. Mini wænämäi quëwenguimämo ante pönömo æninque minitö wæætë wantæpiyæ cöwë quëwencæminimpa, ante cægacäimpa. ³ Mänömaï cædinque tömengä, iñedë cæcæboimpa, ante nänö angaiñedë iinque bayedë tömengä nänö angainö ante edonque pöni odömonte apænecäimpa. Edæ, Quëwencæminimpa, ante mönö imonte nê Ængaingä inte Wængongui mäninö nänö angainö ante, Bitö odömonte apænebi eñencædänimpa, ante botö imote angä eñëñömete da godongä godimo imopa.

⁴ Tito eñëmi. Bitö cæbiimpa, ante yewæmömopa. Edæ godongämæ mönö wede pönönö ante apænebo nê eñëmi inte bitö Itota Codito quimi badinque botö näwä wëmi bai inömi imopa. Iinque botö, Mæmpo Wængongui tönö Itota Codito mönö imonte nê Ængaingä tönö waadete pönö cæda ate bitö gänë entawencæbiimpa, ämopa.

Cædeta nani änowænë iñömo Tito nänö cædö ante

⁵ Cædeta nani änowænë iñömo botö cæquënenö ante wii eyepæ cæbo adinque botö, Bitö godömenque quëwëninque tömänö iinque cæcæbiimpa, ante botö bitö imite emö cæte gotabopa. Adobai wayömö wayömö nani quëwëñömo godinque bitö botö äninö bai cædinque, Mini pönencabo iñöminite iinäni nê aadäni Picænäni bacædänimpa, ante cæcæbiimpa, ante cædinque botö bitö imite mäniñömö emö cæte gotabopa. ⁶ Wadäni, Nê aacä Picængä wënæ wënæ cæcä ingampa, ante änämaï incædänimpa, ante wææ cædinque nê aacä Picængä wæætë waa

quëwenguënenä ingampa. Edæ tömengä nänöogænä adodanque nê manguiwengä incæcäimpa. Tömengä wëñænäni Itota Codito ingante nê pönänäni incædänimpa. Ayæ tömönäni inänite adinque, Babæidi bai quëwënanä inänipa, ante ayæ, Eñëñämaï cæte quëwëñänipa, ante wadäni änämaï incædänimpa, ante nê aacä Picængä iñömo wææ aacæcäimpa.

⁷ Mönö pönencabo iñömonte nê aacä ingante Wængongui, Botö cædö ante cæcæbiimpa, ante pönö angä eñëninque tömengä Wængongui beyæ ante nê cæcä ingampa. Iinque waodäni, Nê aacä wënæ wënæ cæcä ingampa, ante änämaï incædänimpa, ante wææ cædinque nê aacä wæætë cöwë waa quëwenguënenä ingampa. Wadäni tömengä ingante apænädäni incæ tömengä wæætë, Botö ædö cæte eñënguimoo, ante änämaï incæcäimpa. Tömengä wii quingæ piinte bacæcäimpa. Tömengä ti nämæ nê nanguï bewengä inämaï incæcäimpa. Tömengä piyænë cæcä incæcäimpa. Babæ cæbo incæte godonte nani æinta cöwë godömenque æncæboimpa, ante wadäni nani pönëwënonque ante nê aacä iñömo mäninö ante pönänämaï incæcäimpa. ⁸ Wadäni inänite, Botö oncönë pö cædäni, ante cöwë nê watapæ angä incæcäimpa. Ayæ, Quinö waa impa, ante mäninonque cæinengä incæcäimpa. Nöinö cæcæiimpa, ante pönëninque nämä wææ ante cæcä incæcäimpa. Wængongui nänö cædö ante cöwë cædongä inte nê aacä wæætë nämä wææ äninque nämä nänö cæinëwëñö ante cædämaï incæcäimpa.

⁹ Ayæ adobai Wængongui nö pöni nänö angainö ante möni odömonte apænegaïnö bai adobai entawëninque tömengä ñimpo cædämaï quëwenguënenä ingampa. Edæ mönö pönencabo iñömonte tömengä ædæmö apænëdinque nö pöni mönö odömonte apænëdö ante odömonte apænecæcäimpa. Tömengä odömonte apænecä eñëninque pancadäniya, Baa ante wadö änäni incæ tömengä wæætë tömönäni inänite, Mäninö ante mini odömonte apænëdinö wapiticæ i pa quëwëminii, ante nê aacä inongä inte wææ ancæcäimpa, ämopa.

¹⁰ Edæ nê odömonte apænëdäni inänite, Mönitö eñëñämaï cæinëmönipa, ante nê änäni tæiyænäni inänipa. Tömönäni iñömo önonquedö ante tedewëñönanäni inte, Wadäni oda cæcædänimpa, ante nê cædönäni inänipa töö. Pancadäniya, Mönö ëö togænte quëwengæimpa, ante nê pönänäni nani cæcabo iñömö godömenque nanguï pöni mäñömaï babæ cæte quëwëñänipa. ¹¹ Tömönäni, Babæ cæmöni incæte mönitö odömonte apænëdö beyænque godonte nani æinta cöwë æncæmönimpa, ante pönente

cædånipa. Mönö odömönte apænedåmai inguënönö ante odömönte apænedåni ëñëninque nê ëñëånani pancadånिया tömënåni nånï godongåmæ quëwencabo tönö oda cæte wædånipa cæbii. Edæ mäninö tömënåni babæ cæte nånï odömönte apænewënönö ante odömönte apænedåmai incædånimpa, ante bitö, Apocænë inguënë quëwëedånï, ante wææ ante cæquënëmi ïmipa.

¹² Edæ Cædetabæ ïñömö nånï quëwencabo incæ adocanique tömënåni wængonguïdi beyæ nê apænecå ïñömö ïlmai ante apænegacåimpa. “Cædetabæ quëwënåni ïñömö cöwë babæ ante quëwënånï inte babæidi bai wiwa cædånipa. Tömënåni wæntæye inånï incæ cæowæodånï inte cænånipa töö.” ¹³ Måninö ante tömengå nånö angainö nåwangå ante impa. ïniquë Itota ingante nê pönënåni incæ oda cæte wædånï adinque bitö, Nö pönënåni incædånimpa, ante tömënåni inånite nanguï ancæbiimpa. ¹⁴ Ayæ, Oodeoidi dodånï nånï önonquedö ante angainö ante pönënåmai incædånimpa, ante bitö tömënåni inånite nanguï ancæbiimpa. Ayæ wadånï Wængonguï nåwangå nånö angainö ante Baa ante ëñëånåmai inönånï incæ wadö ante wææ ånewëñönånï bitö wæætë nê pönënåni inånite, Måninö tömënåni nånï wææ ånewënö ante minitö ëñente cædåmai ïedånï, ante nanguï ancæbiimpa, åmopa.

¹⁵ Edæ nê wæmö entawente quëwënåni ïniquë edæ tömënåni ayönånï quincoomë ï incæ tömancoo edæ wæmoncoo ïmipa. Wadånï guiquënë nê wentamö entawente quëwënåni inte Itota ingante pönënåmai inånï ïniquë edæ tömënåni ayönånï quincoomë ï incæ tömåancoo edæ wiwæmoncoo ïmipa. ïñæmpa adodånï nånå nånï apænte pönënö incæ wentamö entawente quëwënåni inte tömënåni nånï ocaidë pönënö adobai wentamö encadånï inånipa töö. ¹⁶ ïnånï ïñömö Wængonguï ingante, ate bai pönëmönï ïmönipa, ante ånånï incæte tömënåni cædö beyænque, ïnånï Wængonguï ingante nê Baa ånånï inånipa, ante edonque pönï bapa. Måninånï Wængonguï ingante ëñëånåmai cædönånï inte edæ mönö waa cæquënënö ante ædö cæte cæquånånii. ïniquë tömënåni mönö nê baacå bai inönånï inånipa.

2

Nö pönï mönö odömönte apænedö

¹ Bitö wæætë nö pönï mönö odömönte apænedö ante odömönte apænecæbiimpa. ² Onguïñænånï picænånï inånite ïlmai ante odömönte apænebi ëñencædånimpa. Tömënåni tí nånæ nanguï bete quidi quidi dowænte badåmai incædånimpa. Waodånï mönitö ïmönite waa acædånimpa,

ante onguïñænånï picænånï ïñömö nê eyepæ cæte quëwenguënënånimpa. Nöinö cæcæimpa, ante pönëninque nånå wææ ante cæte quëwencædånimpa. Itota ingante mönö pönënö ante waodånï inånite mönö waadete pönënö ante tömënåni nöingå cædinque quëwencædånimpa. Wæntædåmai inte ee mönö cædö ante tömënåni adobai nöingå cædinque quëwënånï incædånimpa, ante bitö odömönte apænebi ëñencædånimpa, åmopa.

³ Ayæ onquiyænånï picænånï inånite adobai ïlmai ante odömönte apænebi ëñencædånimpa. Tömënåni, Wængonguï nånö angainö bai mönö tæiyæ wæmö entawengæimpa, ante quëwencædånimpa. Wadånï inånitedö ante babæ ånånåmai incædånimpa. Wadånï nanguï yowepæ wædænque tí nånæ biñömæ nånï åmæ ante, Beboe beboe, ante nê bedånï bai ïnånï ïñömö adobai cæte quëwënåmai incædånimpa. Adodånï, Quinö waa impa, ante mäninö ante odömönte apænecædånimpa, ante bitö onquiyænånï picænånï inånite odömönte apænebi ëñencædånimpa, åmopa.

⁴ Månömai cæte quëwënåni inte tömënåni wæætë onquiyænånï wiwï picænånï inånite, ïlmai cædånï, ante åninque, Minitö nånöögæidi inånite waadete pönëninque minitö wëñænånï inånite adobai waadete pönente quëwëedånï, ante odömönte apænedånï ëñencædånimpa. ⁵ Ayæ adobai onquiyænånï wiwï picænånï inånite odömönte apænedinque, Nöinö cæcæimpa, ante pönëninque minitö nånå wææ ante cæte quëwencæminimpa. Minitö oncönë mini cæquënënö cöwë cædinque wadånï inånite ædæmö cæte quëwencæminimpa. Ayæ, Minitö nånöögæidi nånï ånö ante ëñente cædånï, åmi ëñente odömönte apænecædånimpa. Edæ onquiyænånï picænånï månömainö ante odömönte apænedånï ëñëninque onquiyænånï wiwï picænånï wæætë waa cæte quëwënåni adinque wadånï Wængonguï nånö angainö ante ædö cæte, Wënæ wënæ impa, ante babæ anguånånii.

⁶ Onguïñænånï wiwï picænånï inånï ïñömö adobai tömënåni, Nöinö cæcæimpa, ante pönëninque nånå wææ ante cæte quëwencædånimpa, ante ædæmö apænebi ëñencædånimpa. ⁷ Bitö tömënåni beyæ ante, Botö cæbai tömënåni adobai cæcædånimpa, ante bitö quïëmë cæbi incæ cöwë waa cæe. Ayæ bitö odömönte apænedö incæ nöingå ante odömönte apænedinque bitö önöneque ånånåmai incæbiimpa. ⁸ Ayæ bitö ïmite nê Baa ante wadö ånånï wæætë mönö ïmante ante apænedinque, Mönitö ædö cæte wënæ wënæ anguïmönii, ante wædinque

edæ guingo imonte wæcædānīmpa, ante cædinque bitō tōmēnāni inānite nōingā ante odōmonte apænecæbiīmpa. Edæ mǎnōmaī nōinō odōmonte apænebi ēñēninque nē ēñēnāni wæætē, Wēnæ wēnæ odōmonte apænedinō impa, ante ānāmaī incædānīmpa.

⁹ Waodāni inānite ō ænāni ate awēnēidi beyænque cæte nē quēwēnāni bate wæyōnānite bitō tōmēnāni inānite iīmaī ante odōmonte apænebi ēñencædānīmpa. Edæ tōmēnāni awēnēidi nāni ānō ante tōmānō ēñente cæcædānīmpa. Adobaī tōmēnāni, Mōnitō imōnite adinque awēnēidi tocædānīmpa, ante cæcædānīmpa. Ayæ tōmēnāni awēnēidi ānāni ēñēninque wæætēdō wæætē ānāmaī incædānīmpa. ¹⁰ Adodāni iñōmō awēmō ænāmaī quēwēnāni inte wæætē, Mōnitō cōwē nō ēñente cæmōni imōnīpa, ante adinque mōnitō awēnēidi wæætē, Waa cæmīni iīmīnīpa, ante pōnencædānīpa, ante nē cædāni iñōmō waa cæcædānīmpa. Tōmēnāni quīēmē cædāni incæ cōwē waa cædāni adinque wadāni Wængonguī mōnō imonte nē Ængaingā ingante nāni odōmonte apænegainō waa impa, ante pōnencædānīmpa, ante bitō nē cædāni inānite mǎnōmaīnō ante odōmonte apænecæbiīmpa, āmopa.

¹¹ Edæ waodāni quīnānidō ināni incæte mōnō Mæmpo Wængonguī tōmānāni inānite waadete pōnō cædinque, Botō æmo beyænque quēwenguīmīni, ante odōmongā iñinque edonque pōni ba agadānīmpa. ¹² Tōmengā nānō waadete pōnō cædōnō ante edonque pōni adinque mōnō iīmaī ante ēñēmō imōmpa. Wængonguī ingante wapiticæ pōnēninque mōnō cædō ante mōnō Baa ante ñimpo cæte quēwengæīmpa. Ingui-poga ante nāni wēnæ wēnæ cæinēwēnō ante mōnō Baa ante ñimpo cæte quēwengæīmpa. Nōwoyedē mōnō, Nōiñō cæcæīmpa, ante pōnēninque nāmā wææ ante cæte quēwengæīmpa. Wængonguī ayongā waa cæte quēwēninque ¹³ mōnō Itota Codito nānō pōōnæ watapæ mōnō toquīōnæ ante wānō cōmō imōmpa. Edæ Itota Codito adocā mōnō Wængonguī mōnō nē tæi pīñænogā inongā inte mōnō imonte nē Ængaingā ingacāīmpa. Tōmengā iñōmō nē ñāō apāite baī ēmōnogā inte poncæcāīmpa, ante wānō cōmōmpa. ¹⁴ Mōnō wīwa cægainō tōmānō adinque tōmengā iñōmō, Botō æmo beyænque quēwenguīmīni, ante nāmā wepæ godōninque wængacāīmpa. Ayæ tōmengā, Botō tōmēmo beyæ ante mīnitō imīnīte ñā mēnongate baī cæyōmote mīnitō botō quīīmīni badinque, Quīnō waa impa, ante cæinente bacæmīnīmpa, ante cæagacāīmpa.

¹⁵ Ayæ mǎnīnonque ante odōmonte apænedinque bitō waodāni inānite, ædæmō apænebi ēñencædānīmpa. Wadāni wēnæ wēnæ cædāni iñōnānite tōmēnāni inānite,

Ædō cæte mǎnōmaī cæmīni, ante nan-guī āninque awēnē baī inte apænebi ēñencædānīmpa. Bitō imite, Ædō cæte awēnē baī cæbiī, ante pīnte anguīnāni, ante pōnente quēwengæbiīmpa.

3

Nē pōnēmō, Quīnō waa impa, ante mōnō cæquēnēnō

¹ Bitō weca nē pōnēnāni iñōnānite do mōnitō angainō nāni ēñēnīnō incæ bitō tōmēnāni inānite adodō ante apænebi ēñencædānīmpa. Nē aadāni tōnō gobiedōno beyæ nē ānāni inānite ēñēninque mīnitō tōmēnāni nāni ānō ante ēñente cæcæmīnīmpa, ante apænebi ēñencædānīmpa. Ayæ, Quīnō waa i, ante mǎnīnō do cæcæmīnīmpa, ante apænebi ēñencædānīmpa. ² Ayæ æcāmenque ingante wēnæ wēnæ ante babæ ānāmaī incæmīnīmpa. Piyænē cæte quēwēninque mīnitō wadāni tōnō wadodō wadō tedete pīñāmaī incæmīnīmpa. Waodāni tōmānāni inānite mīnitō ædæmō cæte quēwengcæmīnīmpa, ante bitō mǎnōmaīnō ante apænebi ēñencædānīmpa.

³ Edæ wēēñēdē mōnō adobaī ocaī ōmædæca ingaimō inte ēñēnāmaī cæte quēwengamōīmpa. Mōnō wapiticæ pōnēninque oda cæte quēwengamōīmpa. Quīēmē mōnō wēnæ wēnæ cæinēnō ante cæte quēwengamōīmpa. Quīēmē nāmanque pōnente, Waa tote quēwengæīmpa, ante cædinque mōnō cōwē ñimpo cædāmaī inte quēwengamōīmpa. Waodāni inānite cōwē wīwa pōnente quēwengamōīmpa. Wadāni godōmenque ēadāni adinque godō plinte agamōīmpa. Wadāni mōnō imonte pīñōnāni mōnō wacā ingā wacā ingā plinte quēwengamōīmpa. ⁴ Incæte mōnō Wængonguī mōnō imonte, Quēwenguīmīni, ante nē Ængaingā pōninque tōmengā nānō waadete pōnēmāmo ante ayæ tōmengā nānō ædæmō cædōmāmo ante do odōmongacāīmpa. ⁵ Tōmengā wīl mōnō nō cægainō beyænque, Quēwenguīmīni, ante mōnō imonte ængacāīmpa. Wæætē tōmengā nānō waadete pōnō waa cæinēnō beyænque mōnō imonte, Quēwenguīmīni, ante ængacāīmpa. Mīnitō mempoga ēñacæmīnīmpa, ante Wængonguī mōnō mīmō mēnongacā entawēmōmpa. Ayæ Wængonguī mōnō imonte æñongā tōmengā Tæiyæ Waēmō Ōnōwoca pōnō cæcā beyænque mōnō mīmō entawente quēwēmōmpa. ⁶ Itota Codito mōnō imonte, Quēwenguīmīni, ante nē Ængaingā beyænque Wængonguī iñōmō mōnō imonte eyepæ pōni pōnō cædinque tōmengā Ōnōwoca ingante angā pō guicā ate entawente quēwēmōmpa. ⁷ Iñinque Wængonguī waadete pōnō cæcā ate mōnō

tömengä ayongä nö cæte quëwengaimö ïmopa. Ayæ tömengä nänö waadete pönö cægainö beyæneque nê ænguimö inte mönō, Wænāmaï quëwengæïmpa, ante ee pönente quëwëmopma.

⁸ Mänōmaïno ante nö ante impa. Edæ Wængonguï ingante do pönēnāni ïñōmō, Quinō waa ï, ante nāni pönēnonque cōwē cæcædānimpa, ante bitō mǎninō ante wæætē wæætē adodō ante apænebi ēñencædānimpa, ämopa. Mǎninō ante waa pōni ï ïninqe tōmǎnāni beyæ adodō ante waa ingæïmpa. ⁹ Wæætē, Æbānō ï, ante nanguï wæætedō wæætē ònonquedō ante tedewēnāni bai bitō ïñōmō tōmēnāni bai tededāmaï incæbiïmpa. Dodāni, Æmōnānidō ingaināni, ante anca nāni ānewēnō ante pönēnāmaï incæbiïmpa. Ayæ wæætē godō wæætē godō tedewēnāni ēñēninqe bitō wæætē tededāmaï incæbiïmpa. Ayæ idægoidi nāni wææ angainō ante godongāmæ wadodō wadō plinte tedewēñōnāni bitō ïñōmō ïnāni tōnō tededāmaï incæbiïmpa. Edæ mǎnōmaï nāni tededō ïñōmō ònonque tedete ï ïninqe edæ æcāmenque beyæ waa impa, ante dæ ampa cæbii.

¹⁰ Mīni pōnencabo incæ adocanque mǎnōmaï tedewengä beyænque wadāni nānēneto nānēnē godinque wacabo wacabo badāni adinque bitō wæætē nē tedewēnongä ingante adopoque wææ ämi ēñencæcāïmpa. Adopoque wææ ämi ate tömengä ēñēnāmaï inte gomonga adobai cæte tedewengä adinque bitō tömengä ingante wæætē wææ ämi wæcæcāïmpa. Mǎnōmaï mempoga wææ ämi ēñēninqe tömengä ñimpo cædāmaï inte gomonga tedewengä ate wædinque bitō tömengä ingante Baa āninqe gomō ae. ¹¹ Edæ mǎnōmaï cædongä ïñōmō tömengä idiquibæ pönēnongä inte nē wēnæ wēnæ cæcā ingampa. Tömengä nāmā nānō apænte panguinque mǎnōmaï cæcampa, ante do ēñēmipa.

Tito quinō cæcæcāïmpa, ante

¹² Botō cōönædepo ïñonte Nincopodi nāni quëwēñōmō quëwencæboïmpa, ante pönentabopa. ïninqe Adotēma incæ Tiquico incæ æcānō bitō weca goquīnaa, ante pönēninqe botō adocanque ingante ämo go pōñongä bitō eyepæ inte botō weca quingæ pōe, ämopa. ¹³ Abogado inte nē cæcā Teēna tōnō Apodo gocæ cæyōnate tōmēna nāna goquīnō ante nāna ænguēñēnō wī eyepæ éada adinque bitō pædæ godōmi ænte godæ. ¹⁴ Mōnō tōnō godongāmæ nē pönēnāni ïñōmō wī ònonque cæte quëwencædānimpa. Wæætē edæ wadāni wī eyepæ éadāni adinque tōmēnāni pædæ godōnāni æncædānimpa, ante cædinque bitō apænebi ēñēninqe tōmēnāni wæætē, Quinō

waa ï, ante adinque mǎninonque ante cæte quëwencædānimpa.

Waa quëwencæmīnimpa, ante Pabodo yewæmongampa

¹⁵ Botō tōnō nē ongōnāni tōmǎnāni bitō imite, Waa quëwencæbiïmpa, ante apænedānipa, ante botō, Bitō acæbiïmpa, ante yewæmōmopa. Mōnitō imōnite nē waadete pönēnāni ïnānite bitō, Waa quëwencæmīnimpa, ante mōnitō beyæ ante apænebi ēñencædānimpa. Wængonguï mīnitō tōmāmīni imīnite waadete pönō cæcæcāïmpa, ante mǎninqe ante botō yewæmōmopa.

Pidemö ingante Pabodo cadota ante nänö yewæmongainta

Pidemö ingante Pabodo yewæmongampa

¹ Botö Pabodobo inömo inte Itota Codito ingantedö ante apænebo beyænque botö imote tee mönedäni tee mönegaimo imopa. Mönö töninacä Timotoe tönö yewæmömönapa. Pidemö möna nê waadebi inömi inte monatö tönö godongämæ cædömi inömite monatö, Bitö acæbiimpa, ante yewæmömönapa. ² Bitö oncönê inömo Itota Codito ingante mîni pönencabo godongämæ pönöminite monatö mînitö iminite adobaï yewæmömöna acæminimpa. Ayæ mönö mængä Apia tönö Adoquipo mönitö tönö godongämæ nê tontado bai cædongä tönö tömëna acædaimpa, ante yewæmömönapa. ³ Mönö Mæmpo Wængongui tönö Awënë Itota Codito tönö godongämæ waadete pönö cæda ate mînitö ganê entawencæminimpa, ämönapa.

Pidemö nê waadete pönengä inte wede pönengä ingä

⁴⁻⁵ Bitö Awënë Itota ingante wede pönëmi imipa, ante tömengä quinäni inönäni inänite waadete pönëmi imipa, ante bitö imitedö ante änäni êñënimö inte botö bitö beyæ ante Wængongui ingante botö apæneyedê adocä ingante cöwë waa ate pönente apænebo. ⁶ Mäninö Itota Codito ingante bitö wede pönënö ante wadäni inänite cöwë apænebi êñëninque tömënäni, Mönö tömengä waa pönî nänö entawënoncöo incæ quincöodö entawëmö imöö, ante ædæmö êñente bacædänimpa, ante nanguï cæcæbiimpa, ante botö bitö beyæ ante Wængongui ingante apænebo. ⁷ Botö töninabi êñëmi. Itota Codito quinäni inönäni inänite bitö waadete pönente cæbi ate tömënäni gancæ entawente todänitapa, ante apænedäni êñëninque botö nanguï watapæ todinque wampo pönentabopa.

Pabodo Önetimo beyæ ante Pidemö ingante angampa

⁸ Mänömai beyæ mönö Awënë Codito botö imote angä êñëninque botö awënë bai äninque bitö cæquënënö ante, Iïmai cæe, ante guïñënamäi inte bitö imite wææ ämo bai waa incædönimpa. ⁹ Incæte botö wææ änämai inte wæætê mönö waadete pönëmämo beyænque ædæmö apænebo. Botö Pabodobo inömo inte nê picæmo imopa. Ayæ nōwo botö Itota Codito ingantedö ante apænebo beyænque botö imote tee mönedäni tee mönegaimo inte ämopa. ¹⁰ Inique botö wengä onguïñengä Önetimo beyæ ante

bitö imite ædæmö apænebo. Edæ tee mönecönê botö quëwëñedê Önetimo ingante apænebo êñëninque tömengä nê pönengä badinque botö wengä bai bacä æntabopa cæbi.

¹¹ Wëenëñedê tömengä bitö beyæ waa cædämai inte önonque quëwengacäimpa. Incæte tömengä nōwo inömo bitö beyæ incæ botö beyæ incæ nê waa cæcä bacäimpa. ¹² Tömengä botö nê waadecä ingä incæte tömengä ingante botö bitö weca ocæ ëmænte da godömo poncæcäimpa. ¹³ Itota ingantedö ante mönö watapæ apænedö beyænque botö imote tee mönedäni ongöninque botö, Pidemö dæ äñonte Önetimo inömo tömengä beyæ botö weca ongöninque botö tönö guëa cæcæcäimpa, ante pönëninque äinentabopa. ¹⁴ Incæte æbämenque pönö waa cæbi incæ wïi botö wææ äno beyænque cæcæbiimpa. Wæætê tömëmique pönente cæcæbiimpa, ante cætabopa. Bitö êñënamäi inte Ao änämai inömite botö ædö cæte Önetimo ingante, Bitö botö weca ongoncæbiimpa, ante angümo. ¹⁵ Önetimo bitö imite wantæyö wodii godingä inte nōwo adodö pönongante bitö tömengä ingante wæætê æñömi tömengä cöwë bitö tönö quëwencæcäimpa. Wabänö mänüi ante beyænque wantæyö wodii gocantawo. ¹⁶ Tömengä ingante bitö godonte ænte mämi ate tömengä bitö beyænque cæte nê quëwëningä ingä incæte tömengä nōwo wïi nê cæte quëwënanique bai inongä ingampa. Wæætê edæ Itota Codito ingante pönengä badinque tömengä nōwo godömenque bitö töninacä inongä inte bitö nê waadecä ingampa. Edæ tömengä botö nê nanguï waadecä ingampa. Ayæ wïi bitö nê cædonganque inongä inte tömengä wæætê mönö Awënë quingä ingampa. Mänömai beyæ tömengä godömenque bitö nê waadecä inongä ingampa.

¹⁷ Inique bitö, Pabodo tönö guëa cæmöna imönapa, ante pönëmi ininque bitö botö imote æmi bai Önetimo ingante adobaï æmäimipa. ¹⁸ Bitö imite wënæ wënæ cæcantawo. Bitö imi quïëmê ante æninque wæætê pönönämai ingantawo. Inique tömengä nänö pönönämai ininö ante bitö botö imote wæætê, Pönömi æmoe, ämi êñëninque botö pædæ pönömo æmäimipa. ¹⁹ Botö Pabodobo inömo inte tömëmo önonpoca inte imainö ante yewæmömöpa. Tömengä quïnö nänö pönönämai ininö ante botö wæætê tömänö pönömo æncæbiimpa. Botö edæ bitö imite wïi Itota Codito ingantedö ante odömonte apænebo bai bitö ayæ pönënamäi inte quëwencædömiimpa. Inique botö apænedö beyæ bitö botö imote wæætê pönönämai ingä bai inömi imipa. Incæte botö mänömai beyæ bitö imite wïi ancæboimpa. ²⁰ Botö töninabi êñëmi. Mönö Awënë beyænque bitö

botō beyæ pōnō cædinque Ōnetimo ingante waadete pōnencæbiimpa, ante wæbopa. Edæ mōnō Codito nempo quēwēmōna īinque bitō waadete pōnente cæbi ate botō gancæ entawente tocæboimpa, āmopa.

²¹ Bitō cōwē ēñente cæquīmi īimipa, ante do ēñēnimo inte botō, Bitō acæbiimpa, ante yewæmōmopa. Edæ botō ānō ēñente cædinque bitō godōmenque cæquīmi īimipa, ante ēñēmopa. ²² Īinque adodeque ayæ āinēmopa. Mīnitō botō beyæ ante Wængonguī ingante mīni apænedō beyæ botō īmote nīmpo cædāni ate bitō weca acæ poncæboimpa, ante pōnēmopa. Īinque bitō oncōnē adocōnē botō owoquincō ante tōmāā ædæmō cō cæquīmi, āmopa.

Pidemöö ingante Pabodo, Waa quēwencæbiimpa, angā

²³ Epapada botō bai adobaī Itota Codito beyænque nāni nē tee mōnegaingā īñōmō tōmengā botō īmote, Pidemöö waa quēwencæcāimpa, ante angā ēñēninque botō bitō īmite yewæmōmopa. ²⁴ Māadoco tōnō Aditadoco ayæ Deēma tōnō Odoca botō tōnō godongāmæ cædāni īñōmō adobaī botō īmote, Pidemöö waa quēwencæcāimpa, ante ānāni ēñēninque botō bitō īmite yewæmōmopa.

²⁵ Mōnō Awēnē Itota Codito bitō īmite waadete pōnō cæcæcāimpa. Māninque ante botō yewæmōmopa.

Ebedeoidi inānite cadota ante nāni yewæmongainta

*Wængongui beyæ tōmengā Wengā pōnō
apænegacāimpa*

¹ Wængongui wēēnēñedē wantæ wantæ iñō apænedinque wantæ iñō wadō bai cædinque wantæ iñō wadō bai cædinque tōmengā beyæ nē apænedāni inānite tæmpo pōnō apænegā ēñengadānimpa. Ēñēninque tōmēnāni wæætē adodō ante mōnō mæmæidi inānite tæmpo apænegadānimpa.

² Nōwo guiquēnē mānīnō ante Wængongui dodāni inānite nānō apænegaiōnæ idæwaa bayonte tōmengā apænegā ēñēninque tōmengā Wengā wæætē mōnō imonte pōnō apænegacāimpa. Wēēnē pōni inguipoga dæ ii ēmōnæ dæ ñāonte Wæmpocā tōmengā Wengā ingante, Badōe, angā ēñente cæyongā tōmengā nānō cædō beyæ Wæmpocā tōmancoo badongacāimpa. Mānōmai beyæ nē badongā iñongante Mæmpo Wængongui wæætē, Tōmancoo nē ænguingā iñōmō botō Wengā adocanque nē ænguingā ingampa āmopa, angacāimpa. ³ Mæmpocā nē tæi ēmōnongā inte ñāō ēmongā iñongā tōmengā Wengā iñōmō adobaī nē tæi ēmōnongā inte ñāō ēmongā ingampa. Ininque, Wængongui Wengā nō pōni entawēninque nānō quēwengaiñō bai Mæmpocā iñōmō edæ adobaī pōni entawēnongā inte edæ nōingā cæte quēwengā ingampa, ante mōnō edonque ēñengæimpa. Iinguipo incæ ii ēmōnæ incæ a ongoncoo incæ awēmō iñōmō ongoncoo incæ tōmengā Wengā adocā tæi piñænte nānō angaiñō beyænque tōmancoo edæ ñōwo ganca cōwē ongoncoo incoopa. Ayæ nāmā wepæ godonte wæninque adocā iñōmō wēnæ wēnæ mōnō cæpāmo ante ñā mēnongagacāimpa. Mānōmai nē ñā mēnongaingā inongā inte tōmengā do æidinque Wængongui nē tæi ēmongā tōmēmængā inō tæi contadinque ongongampa.

*Tōmengā ñæñængā iñongā anquedoidi
pōnōmenque ināni*

⁴ Mānōmai æi contadinque tōmengā nē ñæñængā iñongante Wængongui iñōmō, Bitō ēmōwo bitō cōwē ænguēñengaiwo, ante pemongacāimpa. Wængongui anquedoidi guiquēnē wii adobaī ñæñæñāni iñōnānite Wængongui tōmēnāni inānite adobaī ante pemōnāmai ingacāimpa. ⁵ Edæ anquedoidi iñōnānite æcāmenque ingante Wængongui dicæ,

“Botō Wēmi inōmi imipa.
Ñōwoñæ bitō Mæmpobo babopa,”

Ante angantawogaa. Ayæ adobaī,
“Botō tōmengā Mæmpobo incæboimpa.

Ininque tōmengā botō Wengā incæcāimpa,”
ante anquedo ingante ānāmai
ingacāimpa.

⁶ Wæætē tōmengā Wengā Tānocā iñongante inguipoga da pōnōninque Wængongui,
“Botō anquedoidi tōmānāni iingā ōnōwa inō
ædæ wææninque, Bitō Wængongui
Wēmi imidō anguēnē, ante wat-
apæ apænegadānimpa,” ante
apænegacāimpa.

⁷ Ayæ wæætē anquedoidi inānitedō ante
apænedinque,

“Tōmengā godō cæcā ate tōmengā anque-
doidi iñōmō woboyæ nangui pæmæ
bai quingæ pōni cæcædānimpa.

Ayæ tōmengā godō cæcā ate tōmengā
beyæ nē waa cædāni iñōmō
gonga bæcoguēñewate bai nangui
cæcædānimpa.”

⁸ Ante apænedinque tōmengā Wengā in-
gante guiquēnē Wængongui incæ iimai an-
gacāimpa.

“Bitō nē Wængongui inōmi inte ēñēmi.
Awēnē Odeye badinque Awēnē
contaimpa tæ contagaiimi inte bitō
ñimpo cædāmai inte cōwē Awēnē
Odeyebi inōmi inte ongoncæbiimpa.

Ininque Awēnē Odeyebi inōmi inte bitō
nempo quēwēnāni inānite nō pōni
cæte aadinque yaēmē tōēmē pōni
næænte bai nē āmi incæbiimpa.

⁹ Nē Wængonguimo inōmo inte botō
iñōmō bitō Awēnē Wængonguimo
imopa. Ininque botō, Nō cæte mōnō
quēwenguiñō ante nē waadebi inōmi
inte bitō ēñēnāmai nāni cæinō ante
edæ wii ainēmi imipa.

Mānōmai imi ante adinque botō iimai
pōnō cæbopa. Bitō tōnō godongāmæ
ongōnāni Awēnē badinque bitō
watapæ tocæbiimpa, ante cædinque
botō,

oguinguipæ pōnō gao caate bai nangui
cægaboimpa.”

¹⁰ Ante Mæmpo Wængongui angacāimpa.
Ayæ adobaī tōmengā Wengā ingante
apænedinque,

“Bitō Tæiyæ Awēnē inōmi inte wēēnēñedē
pōni inguipo mā cō cæte bai cædinque
tōmēmi badongabiimpa, angacāimpa.

Ayæ ōñædē ongoncoo adobaī tōmēmi
bitō ōnompoca badongaincoo inte
ongoncoopa.

¹¹ Mānincoo guiquēnē iincayæ ate wido cæte
bai bayonte

Bitō guiquēnē cōwē ongonguimi imipa.

Mānincoo guiquēnē mōnō weocoo pedæncoo
woincoo bai bayonte,

¹² waocā yacooque æninque topo cæcā bai cædinque bitō wæætē bitō badongaincoo ænte topo cæte bai cæcæbiimpa.

Wæætē müncoo wēñacā bai cædinque bitō wæætē tōmancoo müncoo badōmi on-gonggæimpa.

Bitō iñōmō do bitō ingai bai adobai cōwē inguimi imipa.

Bitō quēwenguimāmo cōwē inguinō an-guēnē.”

¹³ Æninque Wængongui tōmengā Wengā ingante iimāi angacāimpa.

“Botō tōmēmæ inō tæ contate ongōñōmite, botō bitō imite nē piinte cædāni inānite bæ tabo tæ wæænāni ate bitō tæi emōmi inte pinā gāwate bai godō cæbi wæcædānimpa,” angacāimpa.

Tōmengā Wengā ingante mǎnōmāinō ante nē angaingā inte Wængongui dicæ anquedoidi inānite adobai angantawogaa. ¹⁴ Iñæmpa Wængongui anquedoidi iñōmō baō ōmaadāni inte Wængongui beyæ nē waa cædāni inānipa. Mǎnōmāi iñōnānite tōmengā, Botō æmo beyænque nē quēwēnāni beyæ mīnitō godō cæcæmīnimpa, ante da pōnongā pōninque tōmēnāni mōnō beyæ pōnō waa cædānipa.

2

Wængongui ængā beyænque quēwēmōmpa, ante

¹ Mǎnōmāi beyæ mōnō Awēnē apænecā ēñēninque mōnō ēñengainō ante mōnō ñimpo cædāmai inguinque ante mōnō wede pōnente ædæmō ēñente cæcæsiimpa.

² Edæ anquedoidi incæ Wængongui beyæ apæneyōnāni tōmēnāni nāni ānō ante dodāni wæætē nē ēñente cæquēnēnāni ingadānimpa. Æninque æcānō wīi ēñēninque wapiti cæda tōmengā nē tente wæquēnengā iñongante dodāni nō cædinque pangadānimpa.

³ Iñānāni ēñēdāni. Wængongui nānō, Quēwencæmīnimpa, ante angainō ante æcānō mōnō imonte tāno apænecantawo, ante pōñēdāni. Wængongui Awēnē inongā incæ tānocā apænegaingā inte, Botō tōmēmō æmo beyænque quēwencæmīnimpa, ante apænegaicāimpa. Ayæ Wængongui nānō apænegañō ēñente Ao æninque wadāni godōmenque mōnō imonte, Nāwangā impa, ante apænēdāni ēñēnimō inte mōnō ædæmō ēñengæsiimpa. Edæ ēñēnāmāi inte bai ñimpo cæmō iñinque Wængongui dicæ pānāmāi inte ata cæpocampa quēwenguimōō.

⁴ Æninque, Quēwencæmīnimpa, ante nāwangā botō ānō ante ēñēncædānimpa, ante cædinque Wængongui godōmenque cægacāimpa. Tōmengā, Æcānō tōnō cæquimoo, ante, Æyōmōnō cæquimoo, ante, Æyedēnō cæquimoo, ante nāmā nānō angainō bai cædinque iimāi pōnō cægacāimpa.

Tōmengā, Botō mā cæbo ate waodāni ēñēncædānimpa, ante nangui cægacāimpa. Ayæ, Æbānō cæcāā, ante wæcædānimpa, ante tæi piñæninque wadō wadō cædinque bamōnengæ edæ nangui cægacāimpa.

Tōmengā Ōnōwoca ingante da pōnongā pōninque tōmengā wæætē Wængongui nānō angaināni inānite pōnō cæcā æninque tōmēnāni tōmānāni Wængongui Ōnōwoca nānō pōnongā ænganca cægadānimpa. Æninque Wængongui mǎnōmāi pōnō cæcā adimō incæ mōnō ēñēnāmāi cæmō bai tōmengā wæætē mōnō imonte ædō cæte ata cæpoquēnengāā.

Itota Codito tōmengā tōññadāni bai adobai bagacāimpa

⁵ Ayæ mīnguipoga Awēnē nempo mōnō quēwenguimāmo ante apænēmōnipa. Æninque mīnguipoga mōni ānonguipoga Wængongui, Æcāmenque ingante āmo awēnē baquingā, ante cædinque, Anquedoidi incæ awēñēidi bacædānimpa, ante dicæ angantawogaa. ⁶ Wacā wataa yewæmōninque iimāi ante Wængongui ingante āmotamīni ante bai yewæmōngacāimpa.

“Wængongui ēñēmi. Waomōni ōnōmōninque iñōmōnite bitō ædō cæte waadete cæbii.

Wao wēmōni ēñagaīmōni iñōmōnite bitō ædō cæte pōnō waadete cæbii.

⁷ Anquedoidi inānite æmonga ææntodōninque bitō waocā ingante gao wænō gō cæbi ate tōmengā wantæ iñō pōnōmenque on-gongantapa.

Ayæ, Waocā nē tæi emōnongā inte ñāō emōñongante wadāni tōmengā ingante waa acædānimpa, ante pōnō badongabiimpa.

⁸ Edæ bitō badongaincoo tōmancoo waocā nempo pōnōmi æninque

waocā tæi emōngā inte nē angā bagacāimpa.” Ante nānō yewæmōngaine bai cædinque Wængongui tōmengā nānō badongaincoo tōmancoo Waocā nempo pōnongā æninque Waocā nē angā bayongā wacoo wayōmō ongoncoo edæ dæ ampa. Incæte, Tōmengā nempo tōmancoo do ongompa, ante mōnō ñōwo ganca ayæ adāmāi imōmpa. ⁹ Doyedē mōnō waocabo iñōmōnte Wængongui waadete pōnō cædinque Itota ingante angā ēñēninque tōmengā wæætē mōnō tōmāmō wænguimāmo beyæ ante cōwē wæwocate wæquingā bagacāimpa. Mǎnōmāi cædinque Wængongui anquedoidi inānite æmonga ææntodōninque, Itota wæætē caate wæncæcāimpa, ante cædinque tōmengā ingante gao wænō iñōmō gōnongā on-gongacāimpa. Incæte Itota caate wængā beyæ Wængongui poganta tæiyæ waēmō da wencate bai cædinque, Itota nē tæi emōnongā inte ñāō emōngā adinque wadāni tōmengā ingante waa acædānimpa, ante pōnō

cægacäimpa. Ìninque Itota Tæiyæ Awënë wencate ongongå ingante do amompa.

¹⁰ Tömancoo nê badongaingä ìnongä inte Wængongui tömancoo nê ênempodongä inte ìimai angacäimpa. Botö Wëmi êñëmi. Wadäni incæ botö wënäni nangui ìnäni quëwencädänimpa, ante nê badömi bitö baquinque caate wæcæbiimpa. Mänömaï caate bitö wædö beyænque ædæmö picæmi bate nê êñëni inte bitö botö wënäni ìnänite ñäö ìñömö ænte mämömi poncädänimpa. Pöniñque tömënäni botö ñäö ëmömö bai adobai ñäö ëmoncädänimpa, ante Wængongui nõ pöni cægacäimpa. ¹¹ Itota mönö ìmonte, Tæiyæ waëmö ewocate quëwencæminimpa, ante nê badongä ìñongä mönö tömengä tönö adomö mönö cabo ìmomba. Mänömaï ìmö beyæ tömengä mönö ìmonte ante apænedinque, Botö tönifamini ìminipa, ante guifñenedämaï tedecampa. ¹² Ìimai ante apæneccampa.

“Wængongui êñëmi. Bitö ëmowo ante botö tönifadäni ìnänite apænebo êñencädänimpa.

Tömënäni godongämæ ongonde êñëñönäni botö, Wængongui ìñömö Tæiyæ Wæmö ìnongä inte waa pöni cæcä abopa, ante ämotamini ante bai ancæboimpa.”

¹³ Ayæ adobai apænedinque,

“Wængongui ingante botö wede pönente quëwencæboimpa,” angacäimpa.

Ayæ wæætë adobai apænedinque,

“Wængongui botö ìmote apænedinque, Bitö wënäni, ante pönongä ænömö inte botö, Möni wencabo mæ ongomöni aedäni, ämopa.”

Itota incæ Wængongui beyæ näni yewæmôngaiñö bai adobai apæneccampa.

¹⁴ Mönö wænguimämo ante wënæ awënë incæ nê angä ìñongante Itota, Botö näñe wæninque tömengä ingante edæ ömæe ewencæboimpa, ante ìimai cægacäimpa. Mönö Itota wëñæmö ìñömö inte mönö baö tönö wepæ ñömænguifñö ëñamö bai tömengä nänö wænguinque adobai ñömænguifñö ëñagacäimpa. Ìninque tömengä nämä nänö wænö beyænque wënæ awënë ingante bæ tacä ate tömengä wæætë piñænämaï aquüi bate nê angä ìnämaï ingampa. ¹⁵ Ayæ wënæ awënë nempo ñä cæyænte bai quëwëninque mönö wænguimämo ante guifñente wæyömönte Itota mönö beyæ ante wæætë wæninque mönö ìmonte gä pe æmpote ö ængä beyænque quëwëmompa.

¹⁶ Edæ wü anquedoidi ìnänite ænte pæ mancæte ante cædinque tömengä wæætë Abadäö wodi pæimö ìñömönte mönö ìmonte pönö æninque pæ mangampa. ¹⁷ Mäninö beyæ Wængongui, Bitö tönifadäni bai adobai badinque bitö, Wængongui qui, ante nê nõ

Pönömi Ñænæmi pöni incæbiimpa. Ayæ bitö tönifadäni ìnänite cöwë pönëninque waadete pönö waa cædinque ædæmö aacæbiimpa, ante tömengä ingante da pönongä pongacäimpa. Ayæ adobai, Bitö tömënäni wënæ wënæ nani cædö beyæ nämä wepæ godoncæbiimpa, ante cædinque Wængongui Itota ingante da pönongä pöniñque tömengä mönö ëñamö bai adobai ëñadinque waomö mönö ìñömö bai adobai badinque Waocä ìnongä ingacäimpa. ¹⁸ Mönö inguipoga quëwëninque wënæ wënæ mönö cæinënö beyæ wæwëmompa. Wënæ awënë, Itota oda cædinque Wængongui ingante êñëñamäi cæcæcäimpa, ante cæyongä Itota ìñömö mönö wæwënö bai adobai wæwengä incæte oda cædämaï ingacäimpa. Ìninque wënæ wënæ cæinente wæwëñömönte tömengä adobai do wægaingä inte, Minitö tæi piñænte ongoninque oda cædämaï incæminimpa, ante pönö töö æmænte cæcampa.

3

Itota Ñænængä ìñongä Möitee wodi wæcdangä ingacäimpa

¹ Minitö ìmönite aa pedinque Wængongui munitö ìminite adobai aa pedinque, Tæiyæ waëmö entawencæminimpa, ante badongacäimpa. Ìninque botö tönifamini êñëedäni. Itota ìñömö Wængongui nänö nê da pönongaingä ingacäimpa, ante mönö pönënö ante mönö, Näwangä impa, ante apænemompa. Ayæ, Wængongui qui, ante nê Godongä Ñænængä pöni ìñömö Itota adocä ingampa, ante mönö pönënö ante, Näwangä impa, ante apænemompa. Ìninque munitö guiquënë, Itota æbänö ingacäimpa, ante önowënenque pönente quëwënguëñëmini ìminipa. ² Wængongui angä êñëninque Möitee wodi guiquënë tömengä ingante cöwë pönente cædinque Wængongui tönö nani godongämæ quëwencabo ìnänite ædæmö cæte aagacäimpa. Tömengä nõ cæte nänö aagai bai adobai cædinque Itota ìñömö Wængongui angä êñëninque tömengä ingante cöwë pönente cædinque tömengä tönö mönö godongämæ quëwencabo ìmonte ædæmö cæte aacantapa.

³ Edæ, Oncö waa ongompa, ante waa amö incæ mönö oncö nê badöningä ingante godömenque waa ate apæneccäimpa. Adobai, Möitee wodi nê waa aacä ingacäimpa, ante tömengä ingante waa amö incæ mönö edæ Itota nê badongaingä ingante godömenque nanguï waa ate apæneccäimpa. ⁴ Waocä oncö guiquënë wü tömenque ongompa. Edæ waocä mænongä ate oncö edæ ongö aminipa. Inguipo incæ adobai öönædë ongoncoo adobai wü tömenque ongoncoopa. Mänincoo tömancoo

Wængongui nânō badongaincooque on-goncoo acæſimpa. ⁵ Mōitee wodi guiquēnē Awēnē Wængongui ingante nē cæcā inongā inte tōmengā tōnō nāni godongāmæ quēwencabo inānite cōwē pōnēninque ædæmō cæte aagacāſimpa. Mānōmai cædinque tōmengā, Wængongui æbānō iincayæ ate apænequingāā, ante odōmōninque, Nāwangā impa, ante apænegacāſimpa. ⁶ Mōnō Codito guiquēnē Wæmpocā Wengā Onguiſiſengā inongā inte Wæmpocā tōnō nāni godongāmæ quēwencabo inānite cōwē pōnente nōingā pōni cæte pōnō aacampa. Edæ mōnō guiquēnē, Codito waa pōni pōnō cæcā beyænque watapæ bacæſimpa, ante mōnō pōnēnō ante wadāni ēñēñōnāni waa tote apænemompa. Ininque mōnō guiñēnāmai inte mānīnō mōnō pōnēnō ante ædæmō entawēninque iinque baganca ſimpō cædāmai iimō iinque tōmengā tōnō mōnō godongāmæ quēwencabo iimaimompa.

Wængongui quīnāni nāni guēmanguimāmo ante

⁷ Mānōmai beyæ Wængongui Tæiyæ Waēmō Ōnōwoca nānō angainō ante mōnō ēñente cæcæſimpa. Tōmengā nānō apænegainō ante iimainō ante yewæmongatimpa.

“Nōwoōnæ incæ tōmengā apænecā ēñēninque,

⁸ mūnitō, Mīmō ōmædē bawēnāmai incæmōnimpa, ante cædinque Baa ānāmai iedāni.

Dodāni iñōmō, Wido cæcæſimpa, ante nāni ōnōmæca quēwente cæyedē, Wængongui ingampa diyæ panguingāā, ante pōnēninque wīwa cægadānimpa. Mānōmai cædinque tōmēnāni Baa ante mīmō ōmædēnāni nāni bawengai bai mūnitō adobai bawēnāmai iedāni.

⁹ Mūnitō mæmæidi māniñōmō quēwēninque botō imote wīwa cædāni wægaboimpa. Incæte botō māniñedē coadenta wadepo iñonte waa cæbo agadānimpa.

¹⁰ Māniñedē quēwēnāni mānōmai cædāni beyæ botō tōmēnāni inānite piīninque iimā angaboimpa.

‘Botō taadō goquēnēnāni incæ taadō cōwē adāmai ināni inte

tōmēnāni ancaa oda cædinque mīmō ōmædēnāni inte bai wadō godānipa.’

¹¹ Āninque botō ængui badinque, Botō nē Quēwēmo ingaimo inte nōingā āmopa, āninque,

Guēmædāni, ante botō angaiñōmō tōmēnāni cōwē guiite guēmānāmai incædānimpa, angaboimpa.”

Ante Wængongui nānō angainō ante yewæmongadānimpa.

¹² Iñānāni ēñēdāni. Mini pōnencabo iñōmīnite mūnitō wacā ingā wacā ingā waa adinque adocanque incæ mīmō ōmædengā badāmai incæcāſimpa, ante wææ aadāni. Ayæ adocanque incæ wēnæ wēnæ entawengō badinque wīwa æmænte Wængongui nē Quēwengā ingante ēmō cæte godāmai incæcāſimpa, ante wææ aadāni. ¹³ Nōwoōnæ, ante nē angā nānō angaiñōnæ iñōmō ayæ nōwo ganca ēōnæpa. Ininque mūnitō nōwoōnæ incæ wacā ingā wacā ingā ædæmō apænedinque, Æcāmenque incæ wīwa nāni cædō beyænque oda cæte wædinque mīmō ōmædengā badāmai incæcāſimpa, ante cædinque iimō iñō iimō iñō godongāmæ iñacabo cædinque tæi ongōdāni. ¹⁴ Edæ mōnō wēēñēdē wede pōngamōimpa. Nōwo adobai pōnēninque iinque baganca wede pōnēnō iinque mōnō Codito nempo godongāmæ quēwēmaimompa.

¹⁵ Ininque adode ante pōnente cæcæſimpa.

“Nōwoōnæ incæ tōmengā apænecā ēñēninque mūnitō, Mōnitō mīmō ōmædēmōni bawēnāmai incæmōnimpa, ante wææ cædinque Baa ānāmai iedāni.

Edæ dodāni, Wido cæcæſimpa, ante cædinque edæ Baa ante mīmō ōmædēnāni nāni bawengai bai mūnitō adobai bawēnāmai iedāni.”

¹⁶ Wængongui angā ōnōmoncaque ēñēninque, Wido cæcæſimpa, ante ædānidō cægadāni. Edæ Mōitee wodi Equitobæ nānō nē ænte gogaināni adodāni incæ, Wido cæcæſimpa, ante cægadānimpa. ¹⁷ Ayæ adobai Wængongui coadenta wadepo iñonte ædānidō inānite piīninque ængui bagacāi. Edæ nē ēñēnāmai inte wēnæ wēnæ cædāni inānite Wængongui piīnte ængui bacā ate tōmēnāni baō ingai ōnōmæca yabæque wæænte oñongatimpa. ¹⁸ Ayæ, Pō guiite guēmædāni, ante botō angaiñōmō cōwē guiite guēmānāmai incædānimpa, ante Wængongui, Botō nē Quēwēmo inōmo inte nōingā angaboimpa, angacāſimpa. Edæ ædānidō inānite mānōmai angacāi. Edæ nē ēñēnāmai cædāni inānite mānōmai angacāſimpa. ¹⁹ Ininque nē pōnēnāmai ināni inte tōmēnāni nāni pōnēnāmai inō beyænque guidāmai ingadānimpa.

4

¹ Botō nempo guiddinque guēmancæmīnimpa, ante wēēñēdē nānō angainō ante Wængongui nōwo incæ adodō ante cōwē angampa. Mānōmai beyæ mīni pōnencabo tōmāmīni tōmengā nempo guiddinque guēmanguēnēmīni iñōmīnite adocanque incæ oda cædāmai incæcāſimpa, ante cædinque mōnō godongāmæ waa adinque

wææ aacæimpa. ² Edæ dodāni inānite Wængongui ingantedō ante watapæ nāni apænegainō bai mōnō imonte adobai ante watapæ apænedāni ēñēmōmpa. Incæte dodāni guiquēnē ōnōmoncaque ēñēninque wede pōnēnāni beyænque guēmānāmai inte wægadānimpa. ³ Mōnō nē wede pōnēmō imō guiquēnē Wængongui nempo guiidinque mīmōnē do guēmāmōmpa. Edæ Wængongui nempo mōnō guēmanguēnēnō ante botō āninta adotaa iimainō ante yewæmonte ongō bai batimpa.

“Botō ængui badinque, Botō nē Quēwēmo ingaimo inte āmopa, āninque, Pō guite guēmædāni, ante botō angaiñōmō tōmēnāni cōwē guidāmai incædānimpa, angaboimpa.”

Ante Wængongui beyæ ante yewæmongadānimpa. Incæte doyedē inguipoga iī ēmōnæ badōninque Wængongui tōmengā nānō cæquēnēnō ante iinque badōninque, Idæwaa, angacāimpa. ⁴ Wængongui ōnomo æmæmpoque go adoōnæque iifonte iinque cædinque iimō wæiyō nānō guēmangaiōnæ ingatimpa, ante iimāi ante wataa yewæmonte ongōmpa.

“Ōnomo æmæmpoque go adoōnæque iifonte iinque cædinque iimō wæiyō ñimpo cædinque Wængongui guēmangacāimpa.”

⁵ Ayæ botō āninta adotaa iimāi ante yewæmonte ongōmpa.

“Pō guite guēmædāni, ante botō āñōmō tōmēnāni cōwē guidāmai incædānimpa,” angampa, ante yewæmongatimpa.

⁶ Iinque Wængongui nānō pōnō cædō ante watapæ ante apænecā ēñēninque dodāni iñōmō ōnōmoncaque ēñēnāni inte tōmēnāni nāni ēñēnāmai cægainō beyæ guidāmai ingadānimpa. Iinque, Wængongui tōmengā nānō angainō iinque cæcæimpa, ante cædinque iincayæ quēwēnāni pancadāniya cōwē guiquēnēnāni inōnānimpa. ⁷ Mānōmai beyæ, Æōnædō ēñenguēnēmīni imīni, ante odōmoncæte ante cædinque Wængongui, “Ñōwoōnæ,” ante awēnē Dabii ingante wantæpiyæ ate apænecā ēñengacāimpa. Iinque māniñō botō do ante yewæmōmo mīni adinō bai ante Dabii wodi iimainō ante yewæmongacāimpa.

“Ñōwoōnæ incæ tōmengā apænecā ēñēninque mīnitō, Mīmō ōmædēmōni bawēnāmai incæmōnimpa, ante cædinque Baa ānāmai iedāni,” ante yewæmongacāimpa.

⁸ Edæ docā Ootowee wodi tōmēnāni inānite doyedē manguicā guiidinque Cānāāmæ quēwengadānimpa. Incæte tōmēnāni māniōmæ do guidāni inte nāwangā guēmānāni bai Wængongui

iincayæ ate, Ñōwoōnæ guēmancæmīnimpa, ante wæætē ānāmai incædongāimpa.

⁹ Iinque mōnō Wængongui quimō iñōmō edæ guēmanguiōnæ guēmante bai mōnō tōmengā nempo quēwēninque mīmōnē guēmāninque cætawente wædāmai ingæimpa. ¹⁰ Wængongui iinque badōninque tōmengā nānō cæquēnēnō tōmāā cædinque ñimpo cædinque guēmangacāimpa. Tōmengā nānō ñimpo cæte guēmangāi bai waocā iñōmō Wængongui nempo guiidinque nē guēmangā iñōmō adobai tōmengā nānō cæquēnēnō ante, Tōmānō do cætimpa, ante adinque ñimpo cædinque guēmangampa. ¹¹ Dodāni nāni ēñēnāmai cægai bai ñōwodāni adobai cædāni iinque tōmēnāni nāni tæ go wæænguinque cæbainānipa. Mānōmai pāininque, Adocanque incæ mānōmai cæte tæ go wææñāmai incæcāimpa, ante wææ cædinque mōnō tōmāmō, Wængongui nempo guite mīmōnē guēmangæimpa, ante nangui cæcæimpa.

¹² Wængongui nānō ānō iñōmō mīine quēwēne inte tæi piyænē ēnepa. Edæ yaēmē yægāmē tipængaa engamē bamenca guuibæ watii co bai Wængongui nānō ānō iñōmō adobai cædinque mōnō ōnōwoca incæ do cote bai guiipa. Ayæ bamē tadōmengadæmē tæi guifænte bamii edonque a bai Wængongui nānō ānō iñōmō adobai mōnō mīmō incæ tadōmengadæ tæi guifænte bai cædinque mōnō pōnēnō ante mōnō cæinēnō ante do edonque ba adinque adode incæ apænte bai ampa. ¹³ Wængongui nē apænte ānongā iifongante mōnō nāmā incæ, Æbānō cægāmōni, ante tōmengā ingante tōingā apænequēnēmō imōmpa. Edæ, Wængongui ayongā tōmengā nānō badongaincoo tōmancōo edæ gā ængate ōmægacōo bai inte wodōnāmai ongōmpa.

Wængongui ingante nē Godongā Ñæncængā Itota ingampa

¹⁴ Mōnō beyæ, Wængongui qui, ante nē Godongā Ñænængā pōni iñōmō Wængongui Wengā Itota ingampa. Tōmengā iñōmō nāmā wepæ godonte do wængaingā inte ñāni ōmæmōninque oōnædē æite ongongampa. Iinque mōnō, Tōmengā ingante wede pōnēmōnipa, ante nē apænēmō inte mōnō wede pōnēnō ante ædæmō pæ mangæimpa. ¹⁵ Wængongui qui, ante mōnō beyæ nē Godongā Ñænængā pōni inongā iñōmō wænæ wænæ cædāmai ingacāimpa. Incæte aquii imō inte wæmō adinque tōmengā wæætē, Botō Waobo ēñadinque aquii bate wægaimo inte, Aquii mīni wædō æbānō i, ante do edæ ēñēmōpa, angampa. Edæ wænæ awēnē tōmengā ingante, Wænæ wænæ cæe, angā do wægāingā inte tōmengā mōnō wænæ wænæ cæinēnō, Æbānō i, ante do ēñengampa. ¹⁶ Iinque mōnō Awēnē

iñomō nanguī waadete pōngā inte Awēnē contaimpaa ongongampa cæmōō. Mōnō wēnā wēnā cædinō ante tōmengā pōnō ñimpo cæcæcāimpa, ante cædinque mōnō tōmengā weca ponte apænecæimpa. Mōnō caate wæyede tōmengā pōnō tōō æmænte cæcæcāimpa, ante mōnō tōmengā weca ponte apænecæimpa. Mānōmaī Awēnē ongompaa gāānē pōninque mōnō guññēnāmaī inte apānemō ēñēninque tōmengā waadete pōnō waa cæcā ængæimpa.

5

¹ Wængonguī qui, ante bitō botō imote nē pōnōmi ñænæmi pōni bacæbiimpa, ante æcānō ingante Wængonguī angā bacāā.

Edā waocā adocanque ingante apænte æninque Wængonguī angā ate tōmengā iñomō nē waocā inongā inte waodāni beyæ Wængonguī weca cæcampa. Ìninque waodāni ñingā weca pōninque, Wængonguī qui, ante pædæ pōnōnāni æninque tōmengā wæætē Wængonguī ingante godongampa. Ayæ, Wēnā wēnā cæmōni incæte Wængonguī waadete pōnō ñimpo cæcæcāimpa, ante cædinque waodāni, Wængonguī qui, ante cæningā ænte pōninque pædæ pōnōnāni ængampa. Æninque nē godongā ñænængā iñomō nē waocā inongā incæte cæningā ingante ænte wænōninque nē ænte pōnāni nāni wēnā wēnā cædinō beyæ ante baō iya tangampa. ² Ìninque wadāni, Æbāmē impa, ante ēñēnāmaī nāni wædō ante nē godongā ñænængā iñomō nē waocā inongā inte adobaī pancaā ēñēnāmaī inte wæcampa. Ayæ oda cæte nāni wædō ante tōmengā adobaī oda cæte wæcampa. Ìninque wadāni baī aqūingā inongā inte tōmengā gānē pōñēninque wadāni ñānīte ædæmō cæte odōmongā adānīpa. ³ Mānōmaī inongā inte tōmengā wadāni wēnā wēnā nāni cædinō beyæ ante, Wængonguī qui, ante iya tāninque adobaī, Botō nāmā wēnā wēnā cædinō beyæ godōmopa, ante iya tante Wængonguī ingante godongampa.

⁴ Waocā nāmā incæ, Botō, Wængonguī qui, ante nē godōmo ñænæmo bayōmote wadāni botō imote waa acædānīpa, ante ædō cæte anguingāā. Ìñæmpa Wængonguī angā beyænque Aadōō wodi nē godongā ñænængā bacā baī wadāni adobaī Wængonguī angā beyænque nē godōnāni ñænænāni badānīpa. ⁵ Codito incæ, Nē godōmo ñænæmo badinque nē tæī emōmo inte ñāō emōmo acædānīpa, ante nāmā ante wīī angacāimpa. Wængonguī incæ tōmengā ingante,

“Bitō botō Wēmi ñnōmi ñimpa.

Ñōwoōnæ bitō Wæmpoba babopa.”

⁶ Angacāimpa. Ayæ godōmenque Wængonguī nānō angainō ante wataa yewæmongatimpa.

“Wængonguī qui, ante nē pōnongā Mēequitedeco nānō cōwē ingai baī, bitō adobaī ñimpo cædāmaī inte nē Pōnōmi cōwē incæbiimpa,” ante Codito ingante angacāimpa.

⁷ Codito iñomō Waocā ēñate quēwēninque Ca ca wædinque Yæ yæ āninque Wængonguī ingante nanguī apænecæcāimpa. Wængonguī bitō adobique eyepæ ñmi inte wææ āmi ñninque botō wænāmaī ñmaimopa, angacāimpa. Incæte, Bitō, Wææ, āmi ate botō wæncæboimpa, ante nānō Ao āñinō beyænque Wængonguī tōmengā ingante do ēñengacāimpa. ⁸ Wæmpocā Wēñængā inongā incæte Itota nānō caate wæwēmāmo beyænque Wængonguī nānō ānō ante ædæmō ēñente cædinque picængā bagacāimpa. ⁹ Tōmengā nānō ānō ante nē ēñente cædōmō iñōmote tōmengā ædæmō ēñēninque picængā bagaingā inte edā mōnō imonte ængā beyænque mōnō cōwē wænāmaī inte quēwēmopma. ¹⁰ Tōmengā ingante Wængonguī apænte æninque, Mēequitedeco nē pōnongā ñænængā pōni nānō ingai baī bitō adobaī botō imote nē Pōnōmi ñænæmi pōni ñnōmi ñimpa, angacāimpa.

Mōnō wede pōnēnō ante Baa ānāmāi ingæimpa, ante

¹¹ Māñinō ante botō mīnitō ñmīnite godōmenque nanguī apænequēnēmo ñimpa. Incæte, Æiquedō ēñenguimīni, ante pōnente wædinque botō, Æbānō cæte apænebo ēñenguimīni, ante wæbopa. ¹² Ìñæmpa mīnitō doyedē ñmīni ēñengainō ante ñōwo nē odōmōmīni baquēnēmīni ñmīnīpa. Incæte wacā wæætē mīnitō ñmīnite Wængonguī nānō angainō ante adodeque adodeque ante odōmote apænecā ēñenguēnēmīni adodō bamīni awædō. Edā wēñænāni nē goōmæ gānāni baī wæætē bamīni ññōmīnite botō ædō cæte tæēmō cængui godonte baī apænebo ēñenguimīni. ¹³ Goōmæ nē gangā baī ingā iñomō tōmengā wēñængā baī ññongante mōnitō, Æbānō nō cæquīī, ante odōmote apænemōni incæte tōmengā iñomō cōwē ēñēnāmaī ingampa. ¹⁴ Wæætē æcānō cōwē waa cæda ñna iñomō tōmengā, Quñō waa ñi, ante, Quñō wēnā wēnā ñi, ante wæætē wæætē ante cædinque do ēñente badinque picængā baī bacampa. Ìninque ædæmō picænāni nē badāni beyænque mōni nō odōmote apænedō iñomō cængui tæēmō baī ongompā.

6

¹ Mōnō Codito inguipoga quēwēninque æbānō cægacāi, ante do ēñēmopma. Mōnō wænguñō goquinque wēnā wēnā

cæmomba, ante wædinque, Idæwaa wænæ wænæ cætabopa, ante mōnō Wængongui gāmænō æbānō cæte ocæ ēmænte ponguū, ante do ēñēmomba. Tōmengā ingante æbānō cæte pōnenguū, ante do ēñēmomba. Īninqe mānīnō tōmānō ante do ēñēmō inte mōnō mānīnō ante idæwaa tetedāmōpa. Wæætē, Æbānō cæte godōmenque picæmō bai ēñente baquū, ante mōnō nōwo apænecæimpa. ² Adobai, Æpænē quīnante guīquū, ante, Ōnompoca quīnante godō gampoquū, ante do ēñēmō inte mōnō mānīnō ante godōmenque tededāmai ingæimpa. Ayæ, Wænte ate nāni mōnō ōmæmongæimpa, ante do ēñēmō Īninqe, Wængongui cōwē apænte ancæcæimpa, ante do ēñēmō Īninqe mōnō mānīnō ante nōwo godōmenque tededāmai ingæimpa. ³ Īninqe Wængongui Ao angā ate botō mānīnō mīnitō do ēñēnīnō ante tededāmai incæboimpa. Mīnitō ēñēnāmai Īnīnō ante wæætē nanguī apænebo ēñencæmīnīmpa.

⁴ Wængongui mōnō mīmōnē pōnō tīca ēnente bai cædinque edonque odōmonte apænecā ēñēnīnque mōnō nāo bai entawēmōmpa. Tōmengā ōnædē waa pōnī nānō da pōngaincoo do ænte quēwēmōmpa. Ayæ tōmengā Tæiyæ Wæmō Ōnōwoca ingante da pōngā ænīnque mōnō tōmengā tōnō ānque bai ēwocamōmpa. Mānōmai ēwocamō incæte pancadāniya wadæ godāni inte edæ ædō cæte, Wænæ wænæ cæte awædō, ante ocæ ēmænte ponguīnānī. ⁵ Tōmēnāni Īñōmō, Wængongui nānō ānō waa pōnī impa, ante do ēñēnīnāni inte ayæ, Wængongui mīnguiipo nānō badōfēdē mānīfēdē mīmāmoque ba ate tæī piñænte cæcæimpa, ante do ēñēnānīpa. ⁶ Incæte mānīnō nāni wede pōnēnīnō ante Baa ante wadæ godāni bai tōmēnāni edæ ædō cæte ĩncayæ ate, Idæwaa wænæ wænæ cæte awædō, ante ocæ ēmænte ponguīnānī. Īñæmpa dodāni Wængongui Wengā ingante awæ timpote wænōnāni bai cædinque ĩnāni wæætē tōmengā ingante adodō wænonte bai cædānīpa. Ayæ tōmēnāni nāni æmæwo ēwente wæquinque tōmānāni ayōnāni Wængongui Wengā ingante badete tote bai cædānīpa.

⁷ Edæ cōonæ wantæ wantæ cæ ate waodāni cōñe inguipoga tōmēmō quiyadāni wææ pæte incapa. Incate amīmō ba ate nē quiyadīnāni nanguī tā pete eyepæ ænāni Īninqe Wængongui wæætē onguipo tōmenguiipo waa pæ ate adīnque, Waa pæguipo abopa, angampa. Adobai tōmengā nānō ānō ante wantæ wantæ ĩñō apænedāni ēñēnīnque waodāni gānē pōnēnāni badīnque wadāni ĩnānite waadete cædāni ate Wængongui mānīnāni ĩnānite, Mīnitō waa ēñente cæmīni abopa, ante pōnō

waa cæcampa. ⁸ Ōmentacooque pæguipo daacamenque pæguipo guīquēnē nānō æmæwo tante ēwenguinque ōnonguiipoque impa. Māninguipo iya tanguī bai waocā adobai Wængongui nānō ānō ante nē Baa angā ĩñōmō tōmengā nānō æmæwo ēwenguinque Baa angampa.

Watapæ bacæimpa, ante pōnēnīnque tæī ongōmōmpa

⁹ Īñānāni ēñēdāni. Wadāni mānōmai ĩnānīpa, ante yewæmōmōni incæte mōnitō ayōmōni mīnitō wīl tōmēnāni bai ĩmīni amōnīpa. Wæætē Codito ængā beyænque nē quēwengui mīni ĩmōmīni inte mīnitō cōwē waa cæmīni ĩmīni amōnīpa. ¹⁰ Edæ mīnitō cōwē waa cædinque Wængongui ingante waadete pōnēnīnque tōmengā quīnāni beyæ godō waa cægaimīni inte nōwo godōmenque cæmīnīpa, ante adingā inte Wængongui dicæ mīni cædō ante pōnēnāmai ĩnguīgāā. Wæætē nē nō cædongā inte tōmengā mīni cædō ante cōwē pōnengampa. ¹¹ Codito beyænque watapæ bacæimpa, ante mīnitō wede pōnēnīnīpa. Īninqe mīnitō mānīnō mīni wede pōnēnō ante ĩnque baganca wede pōnencæte ante cædinque mīni waadete pōnō cægainō bai adobai ĩnque baganca cōwē cædāni, āmōnīpa. ¹² Edæ nē wede pōnēnāni wæntæye ĩnāmai ĩnāni ĩñōmō edæ Wængongui, Pōnōmo ædāni, ante nānō angaincoo cōwē æncædānīmpa. Mīnitō ĩñōmō, Tōmēnāni æbānō cædānī, ante adīnque tōmēnāni nāni cædō bai adobai cædinque wæntæye ĩnāmai inte Wængongui nānō angaincoo adobai æncæmīnīmpa, āmōnīpa.

¹³ Wængongui, Botō ānō bai cōwē cæcæboimpa, ante Abadāo wodi ingante angacāimpa. Mānōmainō ante nāwangā impa, ante Abadāo ēñencæcāimpa, ante cædinque tōmengā, Wacā ēmōwo godōmenque tæī piñængā ēmōwo ante apænebo ēñēnīnque do ēñencæcāimpa, ante cæyongante wacā nē tæī piñængā guīquēnē edæ dæ angacāimpa. Īninqe Wængongui ĩñōmō nāmā ēmōwo ante apænedīnque, Wængonguimo nē Quēwēmo inte nōingā ante āmo ēñē, ānīnque ĩlmai angacāimpa. ¹⁴ “Botō bitō ĩmite pōnō waa cæbo ate bitō pæñāni nanguī yebænīnque bacoo bacædānīmpa. Botō Wængonguimo nē Quēwēmo inte āmopa.” ¹⁵ Ante do angā ēñēngāingā inte Abadāo wodi wantæpiyæ æñāmai inte wānō cōñongante Wængongui tōmengā nānō angainō bai pōnō cæcā ængacāimpa.

¹⁶ Waodāni guīquēnē, Nāwangā āmopa, ante ēñencædānīmpa, ante cædinque wacā ēmōwo godōmenque tæī piñængā ēmōwo apænedīnque ānānīpa. Mānōmai cædinque waocā, Botō godōmenque nē tæī piñængā tōnō guēa cæte bai ānimo inte ædō cæte

babæ ante wadö cæquimoo, ante bai apæneyongante wacä Ao angä ate tömëna nänä guëa cæcaya badapa.

¹⁷ Wængongui ïñömö, Botö wadö bai änamai ïnomo inte mänü botö angainö bai cöwë cæcæboimpa, angacäimpa. Ayæ, Mänömai impa, ante botö angaincoo nê ænguïnani ædæmö ëñencæðänimpa, ante cædinque Wængongui nämä ëmowo apænedinque, Botö Wængonguimo nê Quëwënömo inte näwangä ämopa, angacäimpa. ¹⁸ Tömengä, Botö pönö cæbo beyænque watapæ bacæimpa, ante nänö angainö ante æncæte ante mönö Wængongui gämænö do wodii winonte pömöimpa. Ìninqe tömengä weca do pönimö ïñömonte tömengä wæætë, Mënea beyæ mönö watapæ bacæimpa, angampa. Ayæ, Minitö wampo pönëninque edæ botö tönö edæ godömenque cæcæminimpa, ante tömengä ædæmö apæncempa. Mënea ante apænebo ëñëedäni. Botö Wængonguimo ïnomo inte nämä Wængongui ëmowo apænebo beyæ nê ëñëmini inte minitö mänine beyæ pönencæminimpa. Ayæ godömenque wade ante, Wængongui incæ ædö cæte babæ wapiticæ anguingä, ante pönencæminimpa. Mänömai Wængongui mënea ante cægacäimpa.

¹⁹ Ìninqe wipo gæguincamë inte tæi ñanoncadodäni ate wäi wocæ bai mönö ïñömö edæ, Mänine mënea beyæ watapæ bacæimpa, ante mönö wede pönëno beyæ tæi ongömö inte mönö ædö cæte wadæ goquü. Mönö wede pönëno beyænque edæ Wængongui oncönë wecoo wææ owoyömo tadömengadæncönë guü öönæde ñä cæte bai ï ïninqe mönö öñowoca ïñömö edæ tæi ongonte bai ëwocamopa. ²⁰ Itota ïñömö täno beyænte öönæde æidinque mönö beyæ ante mänincönë do wäänë guigacäimpa. Ìninqe Mëequitedeco nê godongä ñæxnængä nänö ingai bai badinque Itota, Wængongui qui, ante nämä wepæ nê Godongä Ñæxnængä pönï inongä inte edæ cöwë ongongampa.

7

Mëequitedeco bai Itota nê Godongä Ñæxnængä ingampa

¹ Mëequitedeco guiquënë Tadëë nani äñömö quëwënani awënë odeye inongä inte tömengä, Wængongui Æibæ pönï nê Quëwëngä qui, ante nê godongä ingacäimpa. Ìñongante Abadäo wodi wadäni awënë odeyëidi inänite wænonte pöñongante Mëequitedeco eyepæ pö bee téninque, Abadäo ëñëmi, angantapa. Bitö ìmite Wængongui pönö waa cæcæcäimpa. ² Ante pönö waa apæneyongante Abadäo ïñömö awënëidi wodi nani mangaincoo tömengä nänö ö ænincoo bacoo pönï incoo adinque

önompo tipæmpoga mänimpocato cabo ti gæte cö cædinque, Wængongui qui, äninque Mëequitedeco ingante adocatoque pædæ godongä ængacäimpa.

Mëequitedeco nê awënë odeye ïñongante tömengä ëmowo pemonte bai cædinque wadäni, “Awënë inongä inte tömengä nê nö cæcä ingampa,” ante angadänimpa. Ayæ, Tadëë “Gänë pönëñömö” nani angaiñömö quëwënani awënë odeye ingampa, ante pönëninque tömënani, “Awënë odeye inongä inte tömengä nê gänë pönengä ingampa,” ante wawo pemongadänimpa. ³ Tömengä badä ömaacä ingä bai, tömengä wæmpocä ömaacä ingä bai, tömengä nänö ëñagaiönæ ömaacä ingä bai, tömengä nänö wængaiönæ ömaacä ingä bai ante dodäni tömengä ingantedö ante yewæxmongadänimpa. Mänömai ï ïninqe mönö, Wængongui Wengä nänö cöwë ingai bai Mëequitedeco adobai, Wængongui qui, ante nê cöwë godongä ingampa, ante pönængäimpa.

⁴ Tömengä ñæxnængä pönï ingacäimpa, ante botö ïmai ante apænebo pönëedäni. Wængongui qui, ante nê godongä ñæxnængä pönï Mëequitedeco ingampa, ante pönëninque mönö wæxmæ Abadäo wodi incæ tömengä nänö ö ænincoo önompo tipæmpoga mänimpocato ongö adinque adocatoque æninque Mëequitedeco ñæxnængä ingante pædæ godongä ængacäimpa. ⁵ Mönö Abadäo wodi pæimö ïñömö tömancabomö inömö incæte adocabodäniya mönö tönifadäni Debiidi pancadäniya guiquënë, Wængongui qui, ante nê godönäni bagadänimpa. Bayönänite Möitee wodi tömënani inänite ïmai angacäimpa. Minitö tönifadäni inänite ämini ëñëninque tömënani wæætë tömënani nani ænincoo önompo tipæmpoga mänimpocato ongö adinque adocatoque pædæ pönönäni æncæminimpa, ante wææ angä ëñëninque tömënänique, Wængongui qui bacæimpa, ante nê ænäni inänipa. ⁶ Mëequitedeco guiquënë Debi wodi pæingä inämai ingaingä incæte adocatoque angä ëñëninque Abadäo wodi pædæ godongä ængacäimpa. Do ïñömö Wængongui incæ Abadäo ingante apænedinque, Bitö qui, ante botö cöwë pönömo æncæbiimpa, angacäimpa. Incæte wantæpiyæ ate Wængongui nänö nê angaingä ïñongante Abadäo ingante apænedinque Mëequitedeco ïñömö, Wængongui bitö ìmite pönö waa cæcæcäimpa, ante pönö waa apænegacäimpa.

⁷ Mönö ayömö guiquënë, Ñæxnænäni inönäni ïñömö tömënänique önönänique inänite nê godö waa apænedäni inänipa, ante do ëñënimö inte mönö wadö ante ædö cæte pönenguü. Ìninqe, Abadäo wodi önonganque ïñongante Mëequitedeco nê ñæxnængä inongä inte edæ mänömai

waa apænegacäimpa, ante mönō edonque ēñēmompā. ⁸ Mānīnāni Debiidi guiquēnē nē ñōmæintai ēñādāni īnānīpa. Incæte tōmēnāni īnānite wadāni, Wængonguī quī bacæimpa, ante adocatoque cōwē pōnōnāni ænānīpa. Īngā Mēequitedeco guiquēnē ñōmæintai ēñādāmāi bai ingaingā inte nē quēwengā ingampa, ante yewæmongatimpa. Tōmengā mānōmāi nē quēwengā bai īñongante Abadāō wodi tōmengā ingante, Wængonguī quī, ante adocatoque godongā ængacäimpa.

⁹ Mānōmāi impa, ante pōnēninque botō, ēñencæminimpa, ante ñōwo godōmenque yewæmōmo aedāni. Tōmēnāni nāni ænīnō ōnompō tipæmpoga ganca mānimpcato ongō adinque, Wængonguī quī, ante adocatoque pædæ godōñōnāni Debiī nāni pæincabo incæ nē ænāni īnōnānimpa. Incæte Debiī wodi wæmpocoo ingaingā īngā inte Abadāō wodi adocatoque do godongā Īninque tōmengā pæingā inguingā Debiī īñōmō wæmpocoo tōnō ānque bai adocatoque do godonte bai ayæ ate ēñate quēwengacäimpa. ¹⁰ Edæ Abadāō wodi nānō pæināni Debiidi īnānīpa. Īninque Debiī ayæ ēñādāmāi īñongante tōmengā wæmpocoo Abadāō wodi ingante Mēequitedeco pō bee tente adocatoque æninque Debiī nānō ænguēnencoo incæ pancacooga adobai ængacäimpa.

¹¹ Wængonguī doyedē angā ēñēninque Debiidi pancadāniya, Wængonguī quī, ante nē godōnāni bagadānimpa. Ayæ Wængonguī, Īmāi cædāni, ante angā ēñēnte yewæmōninque Debiidi wæætē wadāni īnānite odōmonte apænedāni ēñengadānimpa. Incæte Debiidi, Wængonguī quī, ante nāni godōnō beyænque mōnō Wængonguī ayongā mōnō ædæmō pædāni bai edæ dicæ entawente bamongaa. Īnæmpa mānīnāni nāni godōnō beyænque nē picænāni bai bamō bai ñōwo wacā nē Godongā ingante Wængonguī da pōnōnāmāi incædongäimpa. Ayæ, Wængonguī quī, ante nē Pōnongā incæcäimpa, ante Codito ingante da pōnōninque Wængonguī, Debiī wodi pæingā Aadōō nānō pōnongai bai Codito adobai pōnōncæcäimpa, ante ānāmāi inte wæætē, Mēequitedeco nānō pōnongai bai cædinque Codito pōnongā beyænque waodāni botō ayōmō nē nō cædāni bacædānimpa, angacäimpa. ¹² Ayæ, Wængonguī quī, ante nāni godoncabo īñōnānite Wængonguī, Idæwaa cæminīpa, āninque wacā ingante, Bitō wæætē botō imote nē Pōnōmi bacæbiimpa, angacäimpa. Ayæ wacā mānōmāi nē Godongā bacā beyæ Wængonguī, Īmāi cædāni, ante nānō wææ angainō ante wēā godonte bai cædinque wade āninque wææ angā ingacäimpa.

¹³ Īninque Wængonguī ñōwo, Nē Pōnōmi

bacæbiimpa, ante nānō nē angaingā īñōmō Debiidi nāni cabo īnāmāi inte wæætē wacabocā īngā ingampa. Incæte ñōwocā Codito guidēnāni īñōmō, Wængonguī quī, ante nāni iya tāimppa cōwē godōnāmāi īnōnānimpa. ¹⁴ Edæ, Wængonguī quī, ante oodaaidi nāni cabo nē godōnāni incædānimpa, ante Mōitee wodi dicæ angacäiñaa. Incæte, Mōnō Awēnē īñōmō Oodaa wodi pæingā ingacäimpa, ante edonque acæimpa. ¹⁵ Īninque Mēequitedeco nānō ingai bai wacā wæætē, Wængonguī quī, ante nē Godongā bacā adimō inte mōnō godōmenque edonque ēñengäimpa.

¹⁶ Edæ Ñōwocā tōmengā mæmæidi wīi nē godōnāni ingadānimpa. Īninque, Bitō mæmæidi nāni godongai bai bitō adobai godonte ēñēe, ante ædō cæte anguiī. Wīi tōmengā mæmæidi nāni cægai bai cædinque tōmengā nē Godongā bagacäimpa. Wæætē cōwē nē wænāmāi Quēwenguingā inte tōmengā nāmā nānō tæi piñæñō beyænque nē Godongā bagacäimpa. ¹⁷ Edæ tōmengā ingante apænedinque Wængonguī,

“Mēequitedeco, Wængonguī quī, ante nē pōnongā cōwē nānō ingai bai, bitō adobai ñimpo cædāmāi inte nē Pōnōmi cōwē incæbiimpa,” ante apænegacäimpa.

¹⁸ Īninque, Īmāi cædāni, ante Mōitee wodi wēnēñedē nānō wææ angaine incæ aqūiīne inte ōnōneque bai īñonte wēā godonte bai bagatimpa. ¹⁹ Edæ Mōitee wodi, Īmāi cædāni, ante nānō wææ angainō ēñēnte beyænque mōnō Wængonguī ayongā ædæmō pædāni bai dicæ entawente baquimōō. Wængonguī wæætē, Codito pōnō cæcā beyænque watapæ quēwencæminiīpa, ante ñōwo pōnō apænegacäimpa. Īninque, Mānōmāi impa, ante pōnēninque mōnō Wængonguī weca pōmompā.

²⁰ Wængonguī wīi ōnonque angacäimpa. Wæætē tōmengā nāmā emōwo apænedinque, Botō Wængonguīmo nē Quēwēnōmo inte nāwangā āmopa, āninque Codito ingante angā ate tōmengā wæætē, Wængonguī quī, ante nē Godongā bagacäimpa. Wæætē wadāni īnānite guiquēnē tōmengā wīi nāmā emōwo apænedinque, Nāwangā āmopa, ante ānāmāi ingā incæte tōmēnāni ōnonque, Wængonguī quī, ante nē godōnāni bagadānimpa. ²¹ Codito ingante guiquēnē Wængonguī Īmāi ante apænegacäimpa.

“Bitō ñimpo cædāmāi inte, Wængonguī quī, ante nē Pōnōmi cōwē incæbiimpa.

Ante botō nē Tæiyæ Awēnē īnōmo inte nōingā āninque

īncayæ ate wadō ante cōwē ānāmāi incæboimpa.”

22 Wængongui, Itota botō imote nē Pōnongā inongā inte mīnitō beyæ cæcā ate mīnitō Ao āmīni īninque mōnō godongāmæ waa cæcæiŋpa, āninque Wængongui mōnō imonte nōwo godōmenque waa pōni apænecacaiŋpa. Inique Wængongui mānōmai nāmā ěmōwo apænedinque, Nāwangā āmopa, āninque Itota nānō nē angāingā īnongante mōnō Itota ingante pōnēninque, Wængongui nānō angainō bai cōwē cæcæcāiŋpa, ante do ěnēmōmpa. 23 Mānīnāni guiquēnē nē nōmæintai ěnāgāināni inte ædō cæte nīmpo cædāmai inte Wængongui ingante nē godōnāni cōwē inguīnāni. Inique wīi adocanque nē godongā ingacāiŋpa. Wacā wacā nē godōnāni bagadāniŋpa. 24 Itota īnōmō nē wænāmai quēwēnongā inte tōmengā, Wængongui qui, ante nē Godongā inongā inte cōwē quēwēngampa. 25 Edæ tōmengā nē wænāmai Quēwēnongā inte Wængongui ingante mōnō beyæ ante cōwē apænedinque, Botō bitō gāmænō nē māmōmo pōnāni inānite bitō pōnō waa cæcæbiŋpa, ante nīmpo cædāmai inte cōwē apænecampa. Wængongui ingante cōwē apænecā inongā inte tōmengā cōwē quēwēninque ædæmō pōnō ængā beyænque mōnō wæætē cōwē wænāmai quēwēnguiŋmō inōmpa.

26 Wadāni nāni ěnēnāmai cæcabo bai wīi inongā inte Itota īnōmō tæiyæ waēmō inongā ingampa. Wentamō mongænāmai inongā īnongante tōmengā ingante ædō cæte piinte apænte anguīnāni. Mānōmai ingā adinque Wængongui tōmengā ingante oōnædē æmōnga pōni ængō cæcā on-gongampa. Inique tōmengā adocanque pōni, Wængongui qui, ante nē nō Godongā Nænængā pōni inongā inte mōnō wædō ante eyepæ pōni pōnō cæcampa. 27 Wadāni nē godōnāni nænænāni pōni ināni guiquēnē tōmēnāni tāno godōninque nāmā nāni wēnæ wēnæ cædō beyæ ante, Wængongui botō imote waa acæcāiŋpa, ante cæningā wepæ iimō īnō iimō īnō godōnāniŋpa. Ayæ ate wadāni nāni wēnæ wēnæ cædō beyæ adobai godōnāniŋpa. Itota guiquēnē wēnæ wēnæ nāni cædō bai cædāmai inongā inte nāmā beyænque godōnāmai ingacāiŋpa. Ayæ wamō mōnō wēnæ wēnæ cædō beyæ wæætē wæætē godōnāmai inte tōmengā eyepæ inongā inte adopoque pōni godongacāiŋpa. Inique tōmengā nāmā wepæ godōninque eyepæ pōni godongā adinque Wængongui wæætē mōnō imonte waa acampa.

28 Mōitee wodi nānō wææ angainō ante ěnēnte cædinque waodāni aquīi ināni nāni cabo īnōnānite pancadāniya inānite ānāni Wængongui ingante nē godōnāni nænænāni do badāniŋpa. Wængongui guiquēnē īncayæ

ate nāmā ěmōwo apænedinque, Botō Wengā ædæmō Picængā nē ěnēngā bagaingā ingante āmo ate tōmengā nē Pōnongā Nænængā bacæcāiŋpa. Botō Wængonguiŋmo nē Quēwēnōmo inte nāwangā āmopa, angacāiŋpa.

8

Wængongui nōwo nānō angainō ante Itota iinque cæcā

¹ Mānōmainō ante quīnante yewæmōmōni. Edæ, Mōnō wædō beyæ ante, Wængongui qui, ante nē Godongā Nænængā pōni inte ongongampa, ante, Nāwangā impa, ante edonque ěnēcæmīniŋpa, ante yewæmōmōniŋpa. Tōmengā īnōmō oōnædē æidinque Awēnē Wængongui tōmēmængā inō tæ contadinque Tæiyæ Awēnē inte ongongampa, ante yewæmōmōni adinque ěnēcæmīniŋpa. ² Mānōmai inongā inte tōmengā wīi waocā nānō mænongaincōnē cæcampa. Wæætē Wængongui, Owocæboiŋpa, ante tæiyæ waēmō nānō mænongaincōnē Itota īnōmō mōnō beyæ ante, Wængongui qui, ante nē Godongā Nænængā pōni inte cæcampa.

³ Inguipoga quēwēnāni guiquēnē adocanque ingante, Wængongui qui, ante bitō nē godōmi nænæmi pōni bacæbiŋpa, ānāni badinque tōmengā nē tā nē tā cædinque māincoo cōwē godonguēnēngā ingampa. Inique māningā Itota guiquēnē adobai nē Godongā Nænængā pōni inongā inte adobai godonguēnēngā ingampa. ⁴ Edæ, īncooque godoncæmīniŋpa, ante Mōitee wodi wææ angā ěnēnte cædinque inguipoga nē godōnāni guiquēnē do eyepæ pōni godōnāni ināniŋpa. Inique tōmēnāni nāni godō bai Itota īnōmō ædō cæte godonguēnēngā inguīngā. Inguipogaque quēwēngā inte bai tōmengā īnōmō edæ Wængongui ingante nē godongā ināmai īncædongāiŋpa.

⁵ Tōmēnāni guiquēnē, Wængongui oōnædē nānō owocō cōwē ongō bai inguipoga adobai mænonte mānincō owocodenganque bai īnōnte acæiŋpa, ante adobai pōni mænongadāniŋpa. Mānōmai mænōninque tōmēnāni mānincōnenque, Wængongui qui, ante nē godōnāni inte cædāniŋpa. Inique Wængongui, Adobai pōni mænōincō ongongæiŋpa, ante cædinque Mōitee wodi nē mænonguīngā ingante doyedē angacāiŋpa. “Mōitee ěnēmi. Bitō, ěbānō mænonguii, ante, ěbānō badonguii, ante botō onquiyabo īnōmō bee tente odōmōmo adinque badoncæbiŋpa. Bitō cōwā adinque botō odōmōnō bai īncō adobai mænōninque īncōnē ongoncoo tōmancoo adobai pōni badoncæbiŋpa,” angacāiŋpa. ⁶ Wængongui, Botō Mōitee tōnō wææ āninque, īmai

cæedāni, āmo ate Ao āmīni īninque mōnō godongāmæ waa cæte quēwengæimpa, ante wēēnēfēdē nānō angainō wædænque waa ingatimpa. Nōwo guiquēnē tōmengā, Itota ængā beyænque quēwēmīni inte Ao āmīni īninque mīnitō botō tōnō godongāmæ waa cæte quēwencæmīnimpā, ante nānō ānō īñōmō godōmenque waa pōnī impa. Edæ Wængonguī nānō ānō īinque bacæimpa, ante Itota incæ nō cægacāimpa. Ayæ adobai māninō nē godōnāni nāni cædō guiquēnē wædænque waa īñonte Itota nānō nō cædō guiquēnē godōmenque waa pōnī impa.

⁷ Mānīne edæ, Mōnō godongāmæ waa cæte quēwengæimpa, ante Wængonguī wēēnēfēdē nānō angaine īñōmō mōnō quēwenguīnō ante eyepæ i bai Wængonguī nōwo wade ante ānāmai incædongāimpa.

⁸ Incæte waodāni wentamō mongænāni adinque Wængonguī doyedē apænedinque, “Botō pōnō cæbo ate mīnitō Ao āmīni īninque mōnō godongāmæ waa cæte quēwengæimpa,

Ante botō nē Awēnē īñōmo inte idægoidi īnānite oodaaidi īnānite īincayæ ate mūine ante mā pōnī apænecæboimpa.

⁹ Mæmæidi doyedē Equitobæ quēwēñōnānite botō tōō æmænte ænte poncæte ante cædinque,

tōmēnāni īnānite, Mōnō godongāmæ waa cæcæimpa, āñōmote tōmēnāni wæætē pango cæte gogadānimpā.

Pango cæte godāni ate botō wæætē dadi ēmæmonte tōmēnāni īnānite adāmai ingaboimpa.

Mānōmai beyæ botō wēēnēfēdē botō angainō bai

nōwo wæætē adobainō ante ānāmai incæboimpa, ante botō nē Awēnēmo īñōmo inte āmopa.

¹⁰ Māniñedē ate edæ idægoidi īnānite botō, īīmai pōnō cæbo ate mīnitō Ao āmīni īninque mōnō godongāmæ waa cæte quēwengæimpa, āninque edæ īīmai cæcæboimpa.

īīmai cæedāni, ante botō wææ ānō ante godō apænēbo ēñēninque

mānīne ante mīmōnē yewæmonte bai entawēninque

tōmēnāni nē wede pōnēnāni incædānimpā.

Tōmēmo tōmēnāni Wængonguīmo īñōmote tōmēnāni wæætē botō quīnāni incædānimpā.

¹¹ Māniñedē botō angaiñedē ba ate edæ waocā tōmengā guidengā ingante ayæ wacā ingante odōmote apænedinque, Bitō Wængonguī ingante ate bai pōnencæbiimpa, ante quīnante anguingā.

īñæmpa māniñedē ate guiyanga pōnī īnongā incæ nænængā pōnī īnongā incæ

tōmēnāni tōmēnāni botō imote do adinque pōnencædānimpā.

¹² Edæ tōmēnāni ēñēnāmai nāni cædō ante botō pānāmai inte waadete godō nīmpo cæcæboimpa.

Ayæ tōmēnāni wēæ wēæ nāni cægainō wae ante adāmai inte bai botō pōnēnāmai incæboimpa,” ante Wængonguī apænecacāimpa.

¹³ Āninque nōwo, Āmo beyænque quēwēmīni inte mīnitō Ao āmīni īninque mōnō godongāmæ waa cæte quēwengæimpa, ante mā pōnī āninque Wængonguī wēēnēfēdē, īīmai cæedāni, ante nānō wææ angaine ante, Woīne inte eyepæ īnāmai ingaine ēnepa, ante bai cæcampa. Woīne īñōmō oo dæ baquīne ēnepa.

9

Wængonguī Tæiyæ Waēmō oncō bai æmontaicō impa

¹ Wængonguī wēēnēfēdē dodāni īnānite, Botō pōnō cæbo ate mīnitō Ao āmīni īninque mōnō godongāmæ waa cæte quēwengæimpa, angacāimpa. īninque tōmengā nānō wææ angainō bai cædinque tōmēnāni, Wængonguī ingampa, ante tōmengā beyæ cæquēnēnāni ingadānimpā. Ayæ inguipoga tōmengā owoquincō tæiyæ waēmō oncō mænōninque tōmengā weca pōninque cæquēnēnāni ingadānimpā.

² Angā ēñēninque dodāni, Wængonguī nānō owoquincō, ante æmontaicō badōninque weocoo odemontai wodōnedinque mencōnea badongadānimpā. Yabæcōnē, Tæiyæ Waēmō Oncō impa, ante nāni ancōnē īñōmō māniñōmō gongapæncade doyæncade tæiyæ ti wodōnoquī encadocade ongongatimpa. Ayæ awæmpaa badōninque tōmēnāni, Wængonguī beyæ tæiyæ waēmō pāō ōñongæimpa, ante cædinque mānimpaa pāō nō cædāni ōñongatimpa.

³ Weocoo wacoo nāni guimongademō wodōñōmō guimongacō īñōmō Tæiyæ Waēmōncō Pōnī nāni angaincō ingatimpa.

⁴ Mānincōnē oguī wacæimpa, ante cædinque, Oguī waquī iya tangæimpa, ante awæmpa oodo nāni pōnō tee bæimpa badonte cō cædāni ongongatimpa. Ayæ, Mōnō godongāmæ waa cæcæimpa, ante wææ āninque Wængonguī nānō yewæmongainca Tæiyæ Waēmōncōnē Pōnī ongongæimpa, ante cædinque awæmpa badōninque oodo yabæpa tee baadinque cæncadempa adobai tee baate nāni cōnōimpa ongongatimpa. Ayæ oodo æninque aca podonte wamoncade bai bædinque tōmēnāni ōnōmæca nāni cængaimō Mānāā nāni angaimō æninque oodo nāni bædicadedē da wēninque mānincade wæætē oodo ēmoppaa cæncadē inō da wente cō cæte mangadānimpā. Ayæ

adobai Aadöo wodi nänö ongoto tä boca-gainto æninque ado oodo emoppaa cæncadê inö da wente ñö cædäni öñongatimpa. Ayæ Wængonguï dicaboga nänö, Ìimaï cædäni, ante yewæmongaine adoyömö ongongæimpa, ante cædinque mäninca æninque ado oodo emoppaa cæncadê inö da wëninque cö cædäni ongongatimpa.

⁵ Mänimpaa yædoppa waomüni müni wënæ wënæ cædö beyæ wepæ godonte impa, ante Wængonguï, Botö pönö waadeimpa impapa, angacäimpa. Ayæ Wængonguï nê ñäö emongä weca nê owoda inömö adobai ñäö bai emöna inönte tömëna nana emönö bai dodäni adobai badonte oodo emoppaa æmatæ æmatæ tæi goncædäni ongongatimpa. Ayæ tömëna öömä tiyæmäa pömæna gänê inömö Wængonguï, Botö pönö waadeimpa, ante nänö angaimpa öñongatimpa. Mänimpacoo æbänö impaa, ante mäninque ñöwo yewæmömönipa.

⁶ Tömancoo mänömaï cöö cædäni ongöñonte, Wængonguï qui, ante nê godönäninque iimö inö iimö inö yabæcönê pö guidinque, Wængonguï ingampa, ante cægadänimpa. ⁷ Guimongacönê guiquënë nê godongä ñænængä inömö wadepo inö adopoque wadepo inö adopoque pö guidinque tömengä adocanque guidongäimpa. Incæte tömengä nê godongä ñænængä pönï inongä incæ wepæ næænämäl inte ædö cæte guiquingä. Edæ wepæ cöwê ænte guidinque tömengä nämä beyæ godö pipo pipo cædinque, Wadäni ëñenämäl inte nani wënæ wënæ cægainö incæ ñä mënongacæimpa, ante tömënanï beyæ adobai godö pipo pipo cædongäimpa. ⁸ Mänincö æmontaicö ayæ ongöhedê Tæiyæ Waëmoncönê Pönï wii önonque guigadänimpa. Wængonguï nänö owodö æidö mäniñedê adobai wii edonque ingatimpa, ante odömoncæte ante Wængonguï Tæiyæ Waëmö Önöwoca angä guidämäl ingadänimpa.

⁹ Mänömainö ante odömöninque tömengä mönö ñöwomö imonte wæætê, Ìimaï ante ëñencæminimpa, ante cægacäimpa. Waocä, Wentamö mongænte awædö, ante nê wædongä inte waëmö inömö pöninque, Wængonguï qui, ante baö iya tanguï tönö bequi cænguï godongampa. Mänömaï ancaa godongä incæte tömengä mïmö nämä nänö apænte entawëno ñä mënongadämäl inte wentamö ayæ mongænte entawënongäimpa. ¹⁰ Mänömaï cænguinque bequinque ante wææ æninque, Æbänö cæte godonguï, ante ayæ, Æpænenque æbänö cæte mënongaquï, ante dodäni mänincooque ante nani wææ angainö ante ëñente cægadänimpa. Ìininque, Waguipo Ìinque bayonte önöwoca ædæmö mënongate quëwengæimpa, ante münguipo

Ìinque bagancaque tömënanï mänincooque ante cædönänimpa.

¹¹ Wapämo müni waa quëwenguinque pömämo, ante badoncæte ante mönö Codito inömö, Wængonguï qui, ante nê Godongä Ñænængä pönï inongä inte do pongacäimpa. Pöninque tömengä waodäni önompoca nani mænongaincönê guidämäl inte Wængonguï nänö badongainguipoga cædämäl ingacäimpa. Wæætê adodö go æidinque tömengä öönædê Wængonguï nänö owocönê ñænæncönê guidinque näwä owocönê cægacäimpa. ¹² Caboda wepæ næænte guidämäl inte wagada wê wepæ næænte guidämäl inte mönö Codito inömö edæ nämä wepæ godöninque öönædê Tæiyæ Waëmoncönê Pönï æmæwo guigacäimpa. Ìininque tömengä ængä beyænque mönö æmæwo pönï abæ tawænte bai cöwê quëwëmoppa.

¹³ Nömæi incæ gampodinque, do wæningä baö incæ gampodinque waocä näate bai wædongä inte edæ Wængonguï weca ædö cæte ponguingä. Wæætê, Tömengä waiñacä bate poncæcäimpa, ante cædinque, Wængonguï qui, ante nê godönänï inömö caboda wepæ tönö wagada onguinængä wepæ æninque nê näadingä baonga pipo pipo cædänipa. Ayæ wagada baquécä ingante wænonte nê täninque gönaique adobai æninque tömengä baonga pipo pipo cædinque, Bitö nê näadimi inte waiñabi babipa, ante cægadänimpa.

¹⁴ Mönö Codito guiquënë Tæiyæ Waëmö inongä inte nê cöwê Quëwengä Önöwoca tönö guëa cædinque Wængonguï ingante, Bitö quïmo imopa, ante nämä wepæ godongacäimpa. Tömengä wepæ inömö wii cæningä wepæ bai inte godömenque eyepæ pönï wepæ imæmpa. Ìininque mönö wænguinque wënæ wënæ cæyömönte tömengä, Minitö mïmö entawëminï inte ñä mënongate entawente nämä apænte pönente quëwencæminimpa, ante nämä wepæ do godongacäimpa. Ayæ mönö wënæ wënæ cægainö ante wadæ cædinque godömenque pönö cæcä ate mönö Wængonguï nê Quëwengä ingante nê cæmö badinque cæmoppa.

¹⁵ Wængonguï müne ante apænedinque, Mönö godongämæ waa cæte quëwengæimpa, æñongante mönö waocabo wæætê ëñenämäl inte wënæ wënæ cæmö adinque Codito inömö mönö wënæ wënæ cægainö beyæ ante wæætê wængä beyænque mönö abæ tawænte bai quëwëmoppa. Nöwo inömö Wængonguï müne ante apænedinque, Botö pönö cæbo ate munitö Ao ämïni Ìininque müni ænguincoo æmæwo æninque munitö cöwê mante quëwencæminimpa, ante aa pecä pongamönimpa. Ìininque mönö

Codito wæætē, Wængongui nānō angaincoo æncæmīnīmpa, ante cædinque īnque cæcā ate mōnō nē pōnīmō inte do ænte quēwēmōmpa.

¹⁶ Waocā, Nāñe wæmo adinque botō māincoo īni īnānīque æncædānīmpa, ante ēmōwo ēmōwo yewæmōngæ adinque wadāni wæætē, Nāwāngā æmæwo wængāīmpa, ante ēñente ate, Nē wængāingā nānō ante yewæmōngāīnō bai bacæīmpa, ante īnque cædānīpa. ¹⁷ Īñæmpa, Īnāni quī bacæīmpa, ante yewæmōngā incæte nē yewæmōningā mīngā quēwēñongante tōmēngā māincoo ædō cæte tōmēnāni quī baquī. Wæætē tōmēngā æmæwo wængā ate māñīfēdē ate tōmēngā nānō yewæmōngāī bai īnque cædānīpa.

¹⁸ Mānōmāi beyæ wēēñēfēdē Wængongui, Mōnō godongāmæ waa cæcæīmpa, ante yewæmōngā ate dodāni cæningā wænonte ate wepæ gowete ate godongāmæ Ao ānīnque īnque cægadānīmpa. ¹⁹ Wængongui, Īmāi cædāni, nānō wææ angāinō tōmanta adinque Mōitee wodi īñōmō tōmānāni īnānīte apānecā ēñēñāni ate wepæ gowete ate cægacāīmpa. Wagada wēnāni wepæ tōnō caboda wepæ ænīnque æpæ tōnō ænte wempe cædēnīnque īitopowæ nāni āwæ yæpængō ænīnque obega ocagui opatawæmæ nāni guipæningui ænte pæ dacadinque wepæ nāni wempe cædēnīmæ nē bee podonte Mōitee īñōmō, Mānīnta adinque ēñengæīmpa, ante cædinque mānīntaa wepæ pīpo pīpo cægacāīmpa. Ayæ nē ēñēñānī tōmānāni baonga wepæ pīpo pīpo cædinque tōmēngā Īmāi angacāīmpa. ²⁰ "Wængongui, Botō pōnō āmo ēñēñānī mīnītō Ao ante ēñente cæmīni īnīnque mōnō godongāmæ waa cæcæīmpa, ante nānō wææ angāinō beyænque īi wepæ īmpa. Īnīnque īi wepæ ēmontaa adinque mōnō Ao ante mānīne ante ēñente cæcæīmpa," ante Mōitee wodi apānecacāīmpa. ²¹ Ayæ æmontaīcongā wepæ pīpo pīpo cædinque tōmēngā mānīncōnē Wængongui beyæ nāni cæincooga wepæ pīpo pīpo cægacāīmpa. ²² Ayæ wodo tōmancooga ante Wængongui, Wepæ tōnō nā mēnongacæīmpa, ānīnque wææ angā cægadānīmpa.

Īñæmpa wepæ gowedāmāi īñonte mōnō wēnæ wēnæ cæmō adinque Wængongui nē pangūēnēngā inte ædō cæte pōnō ata cæpoquingāā.

Codito wepæ beyænque mōnō mīmō mēnongacæīmpa

²³ Ōönædē ongoncoo bai ingui-poga nāni adobaī badongaincoo incæ cæningā wænonte ate wepæ tōnō nā mēnongaquēñēñāni ingadānīmpa. Wæætē nāwā ōönædē Wængongui weca gote mōnō ongonquinque mōnō adocanque nē wæmō pōni īnongā wepæ beyænque nā mēnongaquēñēmō īmōmpa. ²⁴ Edæ

ōönædē Wængongui nānō owocōnē bai ante waodāni ōnompoca nāni tæiyæ wæmō pōni badongaincōnē mōnō Codito guidāmāi ingacāīmpa. Wæætē ōönædē incæ æidinque tōmēngā mōnō beyæ ante Wængongui weca guidinque a ongoncampa.

²⁵ Wængongui quī, ante ingui-poga nē godongā nāñængā pōni īnongā guiquēñē wīi nāmā wepæ ænte pōnīnque cæningā wepæ incæ ænte pōnīnque wadepo īñō adopoque wadepo īñō adopoque Tæiyæ Waēmōncōnē Pōni guicampa. Mōnō Codito guiquēñē ingui-poga nē quēwēngā bai wīi adobaī īnongā inte wīi wæætē wæætē godoncæte ante ōönædē æi guigacāīmpa. Wæætē ōönædē adopoque æi guidinque tōmēngā nāmā wepæ adopoque godongacāīmpa. ²⁶ Edæ ingui-poga nē quēwēñāni nāni cæi bai cæcā bai tōmēngā Wængongui ingui-poga nānō badōñēdē mā caate wædinque wantæ wantæ īñō cædinque nōwo ganca tæmpo caate wæcædongāīmpa. Wæætē mōnō waocabo tōmāmō pedænguipoga mōnō quēwēñō wodo īnque bayante tōmēngā nōwo pōni adopoque pōni pōnīnque wēnæ wēnæ mōnō cædō ante æmæwo wido cæcæte ante nāmā wepæ godongacāīmpa.

²⁷ Mōnō waocabo guiquēñē nē wænguīmō īnōmo inte adopoque wænte ate Wængongui weca pō gongæñōmōnte tōmēngā apænte ancæcāīmpa. ²⁸ Mōnō waocabo nangui īmō īñōmōnte mōnō Codito īñōmō wēnæ wēnæ mōnō cædō ante mongæñinque adopoque nāmā godōnīnque wængacāīmpa. Ayæ wæætē pōnīnque tōmēngā wīi mōnō wēnæ wēnæ cædō mongæncæte ante poncæcāīmpa. Wæætē tōmēngā nānō ponguīnō ante nē wānō cōmō īñōmōnte tōmēngā, Quēwēncæmīnīmpa, ante mōnō īmōnte æncæte ante poncæcāīmpa.

10

¹ Īncayæ ate nē Ponguingā īñōmō, Wængongui quī, ante nāmā wepæ eyepæ godoncæcāīmpa, ante odōmōncæte ante cædinque Wængongui, Īmāi cæte cæningā wepæ pōñōedāni, ante do wææ angacāīmpa. Incæte māñī wepæ Wængongui nānō wææ angāīmæ īñōmō wīi eyepæ godongui ængui īmpa. Īnīnque māñīmæ tōmēngā nānō wææ angāīmæ beyænque waocā ædō cæte ædæmō ēñente picængā bai baquingāā. Īñæmpa idægoidi īñōmō wadepo īñō wadepo īñō wepæ anca godōnīnque Wængongui weca pō ædæ wææñinque, Bitō Tæiyæ Waēmō īmidō angūēñē, ante apānecæte ante pōnāni incæte tōmēñāni tōmēngā nānō wææ angāinō beyænque picæñāni bai dicæ badāniyaa. ² Tōmēngā nānō wææ angāinō eyepæ ī bai tōmēñāni adopoque godōnīnque idæwaa godoncædōñānīmpa.

Edæ, Wængongui ingampa, ante nē cædāni iñōmō māninque godōninque ædæmō fīa mēnongate bacædōnānimpā. Ayæ iincayæ ate tōmēnāni, Wentamō entawente wængui wæ, ante nāmā apænte wædāmā incædōnānimpā.

³ Edæ wīi mǎnōmāi impā. Wæætē, Botō wēnæ wēnæ cæte awædō, ante wæætē wæætē nāni pōnente wæquinque tōmēnāni wadepo iñō wadepo iñō godōnōnānimpā.

⁴ Edæ, Mōni wēnæ wēnæ cægāinō ante mēnongacæimpā, ante godōñōnāni wagada onguinæ wepæ tōnō caboda wepæ eyepæ iimpā diyæ mēnongaquīi.

⁵ Cæningā wepæ wīi eyepæ impā, ante wædinque Codito inguipoga pōninque iimāi ante apænegacāimpā.

“Wængongui ēñēmi. Cæningā baō nāni wænonte pōnōnō tōnō cængui bequī nāni, Wængongui quī, ante pōnōnō adinque bitō edæ wīi æinēmi ingabiimpā.

Wæætē botō Waobo baquinque bitō botō baō ante badongabiimpā.

⁶ Waodāni, Wængongui quī, ante iya tāmōni ate Wængongui waa acæcāimpā, ante tāñōnāni bitō wīi tobi ingabiimpā. Tōmēnāni, Wēnæ wēnæ mōni cædō ante Wængongui pōnō wido cæcæcāimpā, ante pōnōñōnānite bitō Baa angabiimpā.

⁷ Ante adinque botō, “Wængongui ēñēmi. Dodāni botō imotedō ante yewæmōninque, Tōmengā inguipoga pōninque iimāi cæcæcāimpā,

ante nāni yewæmongainō bai cædinque botō bitō ānō ēñente cæcæte ante pōninque a ongōmōi ae,’ antabopa,”

⁸ Mōitee wodi guiquēnē, Cænināni inānite wæñōninque munitō, Wængongui quī, ante pædæ godōninque cængui tōnō bequī godoncæminimpā, ante wææ angacāimpā. Incæte mōnō Codito Mæmpocā ingante tāno apænedinque, Waodāni cæningā nāni wænonte pōnōnō tōnō cængui bequī nāni, Wængongui quī, ante pōnōnō adinque bitō wīi æinēmi ingabiimpā. Wængongui quī, ante iya tāmōni ate Wængongui waa acæcāimpā, ante ayæ, Wēnæ wēnæ mōni cædō ante Wængongui pōnō wido cæcæcāimpā, ante pōnō tāñōnāni bitō Baa ante wīi tobi ingabiimpā, ante Codito apænegacāimpā. ⁹ Ayæ, “Bitō ānō cæcæte ante pōninque a ongōmōi ae,” angacāimpā.

Āninque tōmengā, Īne botō angainō iñōmō ædæmō ēñenguine bate ongongæimpā, ante cædinque Mōitee wodi wēñēñēdē nānō angaine ante da godonte bai cægacāimpā.

¹⁰ Ayæ Wængongui nānō ānō ante nē ēñente cæcā inte Itota Codito, Wængongui quī, ante baonga ēñadinque adopoque wæninque

nāmā wepæ eyepæ godongā beyænque mōnō wæætē Wængongui ayongā tæiyæ waēmō ewocamō bate quēwēmompā.

¹¹ Wængongui quī, ante nē godōnāni guiquēnē tōmānāni iimō iñō iimō iñō adiyæ gongænte Wængongui beyæ ante cædānimpā. Mānōmāi wæætē wæætē godōninque ado ado godōnāni beyænque tōmēnāni wēnæ wēnæ nāni cædō ante ædō cæte wido cæte baquīi. ¹² Māningā mōnō beyæ nē nō Godongaingā guiquēnē adopoque godōninque iinque baganca eyepæ pōni godōninque Wængongui tōmēmængā iñō æi tæ contate ongongampa. ¹³ Mānōmāi ongōninque, Botō imote piinte cædāni inānite Wængongui æyedēnō botō nempo pōnongā æninque botō tæi emōmō inte nē āmo baquīmoo, ante Codito fīwo ganca wānō congampa. ¹⁴ Edæ tōmengā pōnō badongā ate mōnō tæiyæ waēmō ewocate quēwēmō bayōmonte tōmengā adoque pōni nānō godongainō beyænque, Edæmō picæmīni bacæminimpā, ante do badongacāimpā.

¹⁵ Mānīnō ante Wængongui Tæiyæ Waēmō Ōnōwoca mōnō imote adobai apænecampa. Tōmengā tāno apænegacāimpā.

¹⁶ “Mōnō Awēnē iimāi angacāimpā. Māniñēdē ate iincayæ ate,

botō pōnō cæbo ate Ao ānāni iinque mōnō godongāmæ waa cæte quēwengæimpā,

ante iinque cæcæte ante iimāi cæcæboimpā, angacāimpā.

Botō pōnō apænebo ēñēninque tōmēnāni, iimāi cæedāni, ante botō wææ angainō incæ mīmōnē entawencædānimpā.

Botō pōnō apænebo ēñēninque mānīne ante ocai encate ēñencædānimpā.

¹⁷ Ayæ, Wēnæ wēnæ nāni cædō ante fīmpo cædinque botō pōnēnāmāi inceboimpā. Ēñēnāmāi nāni cædō ante botō wæætē wæætē ānāmāi inceboimpā,” angampa.

¹⁸ Īninque tōmengā pōnō fīmpo cæcā ate mōnō edæ, Wēnæ wēnæ mōnō cædō beyæ pānāmāi incæcāimpā, ante quīnante godōmenque godonguii. Īñæmpā tōmengā do bæ fīmpo cægacāimpā.

Mōnō Wængongui weca pongæimpā, ante

¹⁹ Īñānāni ēñēdāni. Tæiyæ Waēmō Pōni Oncōnē pō guite bai mōnō Itota wepæ beyænque guifēnāmāi inte Wængongui weca do guiquēnēmō imompā. ²⁰ Weocoo mānincōnē nāni wææ cægaincoo wægo tē bai Itota baō adobai wangō cote ingatimpā. Mānōmāi beyæ odemō mīnemō wi ænete bai i adinque mōnō quēwenguinēmō guidinque Wængongui weca edæ do guimompā. ²¹ Wængongui nānō godongāmæ owocabo iñōmonte, Wængongui quī, ante nē Godongā

Ñænængä pöni inongä iñömö adocä Itota iñömö mönō imonte nē aacä inongä ingampa. ²² Mänōmai beyæ mönō Wængongui weca pō guicæimpa. Wēēñēdē wentamō mönō entawēnō ante Itota nāmā wepæ inte ñā mēnongacä ate mönō nāmā apænte nō cæinēmō inte guicæimpa. Ayæ mönō baō waēmōmæ åate bai ēmōmō ininque mönō, Wængongui tōmēngä nānō ånō bai cōwē ædæmō cæcæcäimpa, ante wede pōñēninque mönō guiñēnāmai inte tōmēngä weca do guicæimpa. ²³ Botō cōwē pōnō cæcæboimpa, ante nē angaingä iñömō nē ædæmō cæcä ingampa, ante adinque mönō, Tōmēngä nānō ånō bai cæcä beyænque watapæ bacæimpa, ante mönō pōñēnō ante cōwē wido cædāmai inte mönō pōñengæimpa.

²⁴ Ayæ, Mönō pōñencabo tōmāmō waadete pōñēninque waa cæte quēwēngæimpa, ante cæcæte ante pōñente adinque mönō wacä ingä wacä ingä iimai godō cæcæimpa. ²⁵ Pancadāniya Wængongui ingante godongāmæ apæñecæte ante pōñāmai inte wadæ godāni incæte tōmēnāni nāni cæi bai mönō adobai cædāmai ingæimpa. Wæætē, Codito nānō ponguionæ oo pōni impa, ate pōñente wædinque mönō pōñencabo iñōmōte mönō wacä ingä wacä ingä edæ waadete apæñedinque, Wængongui gāmænō pōninque watapæ quēwēmini incæminimpa, ante apæñecæimpa.

²⁶ Wængongui nō nānō ånō ante do ēñēnimō inte mönō, Wii ēñēinēwædō, åninque godōmenque wēnæ wēnæ cæmō ininque edæ wēnæ wēnæ mönō cædō ante mēnongauimæ ante edæ wepæ dæ å bai babaimpa. ²⁷ Wæætē mänōmai ancaa ēñēnāmai cæmō ininque mönō Wængongui nānō apænte ante panguimāmoque ante guiñente wæcōmaimompa. Edæ mönō Baa ante godōmenque wēnæ wēnæ cæmō ininque Wængongui ingante nē piñāni nāni gonte wænguimāmoque ante, Mönō adobai gonte wæncæ wæ, ante guiñente wæcōmaimompa. ²⁸ Mōitee wodi nānō wææ angainō ante, Wii ēñēinēwædō, ante adocanque nē angä iñongante Waoda mēnaa ina incæ waodāni mēngāa go adocanque ināni incæ, Mänōmainō ante apæñecä ēñentamōnipa, ante apæñedāni ēñēninque nē åningä ingante waadedāmai inte godō wæñongadānimpā.

²⁹ Ininque adocanque Wængongui Wēngä ingante piñā gāwate bai cædinque Baa angä adinque tōmēngä ingante Wængongui ædō cæte pānāmai inguingāa. Wængongui, Botō pōnō æmo ate mīnitō Ao åmini ininque mönō godongāmæ waa cæte quēwēngæimpa, ante nānō angainō inque bacæimpa, ante cædinque Itota nāmā wepæ inte mönō imonte ñā mēnongacä beyæ tōmēngä ayongä

tæiyæ waēmō ewocamō bagamōimpa. Incæte adocanque Itota nānō nē ñā mēnongadingä inongä inte, Itota wepæ wii waēmō i awædō, ante piñgä adinque Wængongui ædō cæte apænte ante pānāmai inguingāa. Ayæ Wængongui Önōwoca nē waadete pōnō cædongä iñongante adocanque badete tocä adinque Wængongui tōmēngä ingante ædō cæte pānāmai inguingāa. Edæ Mōitee wodi nānō wææ angainō ante Baa ånāni inānite wædænque pāninque Wængongui iñāni inānite godōmenque nangui pōni pancæcäimpa, ante pōñēminiyaa.

³⁰ Wængongui, “Botō tōmēmō nē panguimo imopa. Wiwa nāni cædinō beyæ eyepæ pōni godō pāmo wæcædānimpā,” angacæimpa. Ayæ, “Botō nē Awēñē inōmo inte botō quināni inānite apænte ancæboimpa,” angacæimpa. Mönō iñömō, Mänōmainō ante nē apænte pancæ angaingä ingante æbānō ingāa, ante do ēñēmompa. ³¹ Edæ Wængongui nē Quēwēngä inongä inte edæ ængui badinque bæi ongonte pangä wæcæ wæ, ante mönō nangui guiñēñate wæcæimpa.

³² Wēēñēdē Wængongui apæñecä ēñēmini inte mīnitō tæcæ ñāō bai entawēmini ate wadāni pō piñte guædō guæa cæyōnāni mīnitō mini caate wæquinque tæi ongōninque godōmenque cæminitapa. Mänōmai mīni cædinō ante ñowo pōñēdāni. ³³ Pancayedēña iñömō nē piñte cædāni tōmānāni ayōnāni mīnitō imīnite badete todinque pāñānitapa. Pancayedēña guiñēñē mīnitō tōñiñadāni adobai caate wæyōñānite mīnitō, Adocabomōni imōnipa, ante bai cædinque nē caate wædāni tōnō godongāmæ ongōminitapa. ³⁴ Wadāni inānite tee mōñedāni adinque mīnitō tōmēnāni tee mōñete nāni wædō ante pōñēninque tōmēnāni tōnō godongāmæ wæminitapa. Ayæ, Mönō māncoo oōnædē godōmenque waa pōni ongōncoo inte cōwē ongongæimpa, ante ēñēmini iñōminite wadāni inguipoga mīnitō æadincoo o ænāni adinque mīnitō wædāmai inte watapæ tomīnitapa. ³⁵ Ininque, Mönō wede pōñēnō beyænque eyepæ pōni ænguimō imompa, ante ēñēninque māñinō mīni wede pōñēnō ante wido cædāmai iedāni. ³⁶ Ayæ, Wængongui nānō ånō ante ēñente cæmōni ate tōmēngä, Pōñōmo æncæminimpa, ante nānō angaincoo ante cōwē pōnongä æncæmōnimpā, ante cædinque mīnitō wæntædāmai inte ee cæquēñēmini imīnipa. ³⁷ Edæ Wængongui beyæ ante do yewæmongatimpā.

“Wantæ wantæ ate nē Ponguingä mönō ånongä iñömō do poncæcäimpa. Edæ tōmēngä nānō angaiñæ inque bayonte tōmēngä eyepæ pōni poncæcäimpa.

³⁸ Nē nō cæte quēwēnongā incæ tōmengā nānō wede pōnēnō beyænque quēwencæcāimpa.

Adocā wæætē guifēnte wædinque wodii winongā adinque,

botō tōmengā ingante adinque wīl to-baïmopa,” ante Wængongui beyæ yewæmongatimpa.

³⁹ Mōnō guiquēnē tōmēnāni nāni cæi bai cædāmai inōmō inte wīl guifēnte wædōmō inte wodii winōnāmai ïmopa. Edæ wodii winonte bai mōnō æmæwo ēwente baquēnēmō ïmopa. Wæætē edæ tōmengā ængā beyænque mōnō quēwenguinque tōmengā ingante wede pōnēmō ïmopa.

11

Mōnō wede pōnēnō ante

¹ Wængongui pōnō cæcā ate watapæ bacæïmpa, ante mōnō pōnēnō ante mōnō, Wængongui ayæ cædāmai ingā incæte cōwē cæqingā ingampa, ante wede pōnēmopa. Awinca adāmai ēmōmō incæ mōnō mīmōno wede pōnēninque awinca do ate ēmonte bai ēwocamō inte mōnō, Nāwangā bacæïmpa, ante do ēfēmō ïmopa. ² Dodāni wede pōnēnāni ïfōnānite Wængongui, Mīni wede pōnēnō beyænque botō mīnitō ïmīnite waa abopa, ante apænegacāimpa.

³ Wængongui inguipo tōnō ïmōnæ tōmāo badoncæte ante cæyngā quiēmē impa ænte badonguingā. ïlæmpa dæ angatimpa. ïninque mōnō nē acoo dæ ãfōnte mānincoo ænāmai inte tōmengā wæætē mā pōnēninque angā beyænque mōnō nē acoo do bagatimpa. Mānōmai ingatimpa, ante wede pōnēninque mōnō Ao ãmopa.

Dodāni nāni wede pōnēngānō

Abedo wodi

⁴ Abedo wodi ïfōmō Wængongui nānō angānō ante wede pōnēninque, Wængongui qui, ante nō cæte godōninque Caiñō wodi wæætē ònōmonque nānō godōnō bai wīl godongacāimpa. Tōmengā mānōmai wede pōnente cæcā adinque Wængongui, Abedo bitō nō cæte pōnōmi æmopa, ante apænegacāimpa. ïninque do wænte gogaingā ïnongā incæte Abedo wodi, Botō wede pōnente cægāi bai adobai wede pōnente cæedāni, ante ñwo ganca ayæ apænete bai apænecampa.

Ēnoco wodi

⁵ Ēnoco wodi guiquēnē nē wede pōnengā ïfōngante Wængongui, Ēnoco ēfēmi. Bitō botō nē waa adōmi inte bitō wænguēnēmāmo ante wædāmai inte pōe, ãninque inque ïfōngante ō ænte wo ææntodongā æigacāimpa. Æite gocā ate wadāni ancaā diqui diqui mīninque Wængongui nānō nē

wo æntodongā ingante adāmai ingadānimpā. Edæ tōmengā ingante Wængongui ayæ ææntodōnāmai ïfōngante wadāni, Ēnoco wede pōnengā ingante Wængongui waa acampa, ante do ēfēnōnānimpā. ⁶ Edæ Wængongui weca poncæte ante cædinque waocā, Wængongui nē Quēwengā ingampa, ante wede pōnenguēnengā ingampa. Ayæ adobai, Wængongui ingante nē diqui diqui mīmō ïfōmonte tōmengā, Pōe, ãninque pōnō waa cæcampa, ante wede pōnēninque nē poncæ cæcā pongampa. Mānōmānō ante nē wede pōnēnānque Wængongui weca pōnānīpa. Mānīnō ante nē wede pōnēnāmai ingā guiquēnē tōmengā ingante Wængongui ædō cæte waa aquingā. Edæ waa adāmai ingampa.

Docā Nōwee wodi

⁷ Nōwee wodi Docā nāni ãnongā guiquēnē, Ēbānō baquī, ante adāmai ïfōngante Wængongui, Nōwee ēfēmi. Bitō adāmai ïmāmo oo pongæïmpa cæbii. Angā ēfēnte guifēnte wædinque nē wede pōnengā inte tōmengā nāni wencabo nāni guite quēwenguinque wipo ñænængade impo incæ ñænæ oncō bai badongā ate guite quēwengadānimpā. Nē wede pōnēnānque nāni nē entawēnō bai adobai nō nānō entawenguinque Nōwee wodi wede pōnente cægacāimpa. ïninque tōmengā adocanque wede pōnēninque mānōmai cædingā ïfōngante wadāni guiquēnē nāni apænte wænguinque Baa angadānimpā.

Abadāo wodi

⁸ Abadāo wodi guiquēnē tōmengā wede pōnengā ïfōngante Wængongui, Abadāo ēfēmi. Botō pōnōmo bitō ængulmæ ante botō odōmōmo goe. Angā ēfēninque, Ēbæmē impa, ante adāmai ïnongā inte Abadāo wede pōnēninque ēfēnte cædinque do gogacāimpa. ⁹ Mānōmai wede pōnēninque wadāni nēmæ gote wacā ïnongā inte wantæ ïfō quēwengā bai inte æmontaicōnē owogacāimpa. Ayæ Wængongui nānō angālmæ nē ænguina ïnōna inte tōmengā wengā Itæca wodi adobai tōmengā wengā Acobo wodi adobai wantæ ïfō quēwente bai æmontaicōnenque owote quēwengadāimpā. ¹⁰ Wængongui doyedē pōni, Waodāni nāni oōnædē quēwenguifōmō ante botō ïmai badoncæboïmpa, ante nāmā nānō pōnēnō bai tæi gōnonte mānongacāimpa. Abadāo ïfōmō, Botō mānīl ïfōmō owocæboïmpa, ante nē wædongā inte wede pōnēninque piyænē cædinque æmontaicōnenque owote inguipoga quēwengacāimpa.

¹¹ Mōnō ïmonte pōnēninque nē ædæmō aacā ïnongā inte Wængongui ïfōmō tōmengā nānō ãnīnō bai cōwē cæcæcāimpa, ante nē wede pōnēnā ïfōmō Tada wodi ingadāimpā. Mānōmai beyæ tōmēnā owæntadā ïfōnante

Wængongui pönö cæcä æninque tömëna picængadeda inöna inte tæi piñæninque yædemada bate wëñængä mangadäimpa. ¹² Abadäo wodi wede pönëninque tæi piñænte tapæica ate wëñængä ëñagacäimpa. Ininque adocanque picængadecä inte nê wænte bai inongä inte wede pönengä beyænque mönö tömengä nänö pæimö yebæninque nemoncoo öönädë owocoo nangui pöni i bai mönö iñömo adobai nangui pöni imompa. Ëmönaicoo gäwapæ yawedeca öñoncoo nangui pöni i bai mönö tömengä pæimö imö adobai nangui pöni iñömonte mönö, Mänimpomö imompa, ante ædö cæte angui.

¹³ Mäninäni tömänäni wede pönente quëwëñänäni inte wængadänimpa. Wængongui nänö, Pönö cæcæboimpa, angaincoo ayæ ænäma iñäni inte tömënäni gobæ ongoncoo gomö ate bai, Cöwë æncæmönimpa, ante wede pönente piyæne cæte quëwængadänimpa. Wadäni nëmæ wabæca quëwente bai quëwëñinque tömënäni, Wii mönitö ömæ iñonte mönitö wamöni inte quëwëmonipa, ante ingui-poga owogadänimpa. ¹⁴ Mänömainö ante nê änäni iñömo, Tömëmöni ömæ ante diqui diqui mëmöni imönipa, ante quëwëñänipa. ¹⁵ Dodäni iñömo do nani ëmö cæte pongaimæ ante pönente wädäni inte bai tömënäni do adodö gocædönänimpa. ¹⁶ Wæætë adodö mänömmæ nani quëwængaimæ wii goinëninque tömënäni, Mönö öönädë godömenque wæmömæ pöni gote quëwængæimpa, ante goinente wægadänimpa. Ininque wadäni Wængongui ingante, Bitö nê wæmömæ goinente wädäni tömëñäni Wængonguimi imipa cæbii, ante änäni incæ tömengä wæætë, Iñæmpa nê wædönäni tömëñäni quëwëñiñömo nani wædö ante botö do eyepæ mænongaboimpa, äninque quüñänäma iñte nangui tocampa.

Abadäo tönö Itæca

¹⁷ Wængongui, Abadäo æbänö botö imote ëñente cæquiringä, ante acæte ante angä ëñëninque Abadäo wodi nê wede pönëngä inte tömengä wengä Itæca ingante, Wængongui qui, ante godongacäimpa. Edæ Abadäo ingante doyedë apænedinque Wængongui, Bitö pæinäni nangui inäni inte iimæ æncædänimpa, ante do angä ëñengacäimpa. Incæte Wængongui mänömainö angä ante nê ëñëningä incæ tömengä wengä adocanque pöni inongä inte Abadäo, Wængongui quingä ingampa, ante godoncæ cægacäimpa. ¹⁸ Adocä tömengä wengä ingantedö ante Wængongui doyedë Abadäo ingante apænedinque, Bitö wengä Itæca pæinäninque inänitedö ante botö, Abadäo pæinäni inänipa, angacäimpa.

¹⁹ Incæte Itæca wodi adocanque pöni iñongante Abadäo wodi, Botö wengä do wängä incæte Wængongui, Nani ömæmmöe, angä ininque do nani ömæmmömaingampa, ante wede pönëninque godoncæ cægacäimpa. Wængongui quiquënë, Ee ae, ante wææ angä beyænque tömengä wengä ingante wænönäma iñagacäimpa. Ininque Itæca wodi do wæningä inte bai nani ömæmonte bai ayæ quëwængacäimpa.

Itæca, Aacobo, Ootee

²⁰ Itæca wodi adobai, Wængongui æbänö cæquiringä, ante wede nänö pönëno beyænque ëñëningä inte edæ picængadecä badinque Aacobo wodi tönö Etawoo wodi inate apænedinque, Wængongui minatö iminate iimäi pönö waa cæcæcäimpa, ante waa apænegacäimpa.

²¹ Aacobo wodi iñömo, Wængongui æbänö cæquiringä, ante wede nänö pönëno beyænque do ëñëningä inte wæncæ cæte öñöninque tömengä nänömoda Ootee wodi wëna inate, Minatö iminate Wængongui pönö waa cæcæcäimpa, ante waa apænegacäimpa. Ayæ ongontoca da cæte ongote ædæ wææninque, Wængongui bitö wæmö pöni inömi inte cæquimidö angüënë, ante watapæ apænegacäimpa.

²² Ootee wodi quiquënë, Wantæ iñö wæncæboimpa, äninque, Mönö idægocabo mönö pæinäni incæ Equitobæ wantæpiyæ quëwëñäni ate Wængongui ænte mäocä wadæ gocædänimpa, ante tömengä nänö wede pönëno beyænque ëñëninque iimäi angacäimpa. Godinque botö bayetoca ingai ee ænte næænte godinque da wæncæminipa, angacäimpa.

Möitee wodi

²³ Möitee wodi mæmpoda quiquënë wëñængä ëñacä ate, Wii önonganque ingampa. Wæmö wëñængä awædö, ante adinque iimäi cægadäimpa. Mänifedë Equitobæ awënë odeye iñömo, Onguiñængä ëñacä adinque do wæñongæimpa, angä incæte tömëna quüñänäma iñte tömëna wede nana pönëno beyænque wëñængä Möitee ingante apäicä mengäa go adocanque nämonque wë wodontë mangadäimpa.

²⁴ Möitee wodi quiquënë picængä bayongante wadäni, Awënë Padaönö wengä wææ Möitee badä ingampa, ante Möitee ingante waa ayönäni tömengä wæætë Wængongui ingante nê wede pönëngä inte edæ Baa angacäimpa. ²⁵ Wæætë edæ, Botö caate wæquinque botö Wængongui quinäni tönö godongämæ cæcæboimpa, ante cædinque Möitee wodi, Equitoidi nani wiwa cæte töinö adinque botö wantæ iñö incæ wii toinente awædö, ante wido cægacäimpa. ²⁶ Wængongui iincayæ ate eyepæ pöni pönongä æncæboimpa, ante wede pönëninque

tömengä mäninö ante mímöno gomó ate bai pönengacäimpa. Ayæ Equitobæ quëwëñäni waëmoncoo põni nani mäincoo ante adinque, Önconcoque ëwenguincooque i awædö, ante Mõitee edæ Baa angacäimpa. Wæætë edæ piinte badete todäni wæcä incæte tömengä, Codito beyænque impa, ante pönëninque godömenque waa põni togacäimpa.

²⁷ Tömengä iñömö, Awënë odeye Padaönö ænguï badinque piling wæcæ wæ, ante guñente wædämai inte wæætë wede pönëninque Equitobæ ëmö cæte gogacäimpa. Ayæ Wængongui nê Quëwengä mönö awinca adämai inongä ingante Mõitee wodi iñömö nê awinca gomó acä bai ëmongä inte wæntæye badämai inte godömenque cægacäimpa. ²⁸ Ayæ, Bamoncadë ëñadäni inänite nê ëwënongå incæ godö wænoncæcäimpa, ante Wængongui angä ëñëninque Mõitee wodi wæætë, Nê ëwënongå nänö wodo pænta goquï ingæimpa, ante wede pönëninque cægacäimpa. Tömengä wadäni idægoidi tönö Patowa ææmæ mönö cæmæ bai mä cængacäimpa. Ayæ, Nê ëwënongå incæ mönö idægocabo bamoncadë ëñadäni inänite wæñönämai incæcäimpa, ante wææ cæcæte ante cædinque Mõitee nê wede pönënongå inte wadäni tönö godongämæ odemompaa wepæ öni paagacäimpa.

²⁹ Idægoidi guiquënë wede pönëninque gäwapæ Opatawæmæ nani ämæ goyæ go næ gongæmæ ate tæcæguedëmæ põni tao gogadänimpa. Equitoidi guiquënë, Taadö bapa, mönö taocæimpa, ante cæyönänite æpæmpo becadote wængadänimpa.

Adacaba wodi

³⁰ Idægoidi nani wede pönëno beyænque Eedicoo nani quëwëñömö yabæque nani wææ cægainca incæ näwæ cabænte wæængatimpa. Edæ idægoidi önomp æmæmpoque go mëönaa mänimpoönæ iñonte yabæque godongämæ cægönte godäni ate cabænte wæængatimpa. ³¹ Onquiyængä Adacaba iñömö mäincoo beyæ ante nê towente nê quëwengä inongä incæte tömengä wede nänö pönëno beyænque iïmai cæte milingä quëwengacäimpa. Idægoda mënaa, Eedicoo iñömö æbänö quëwëñäni, ante acæte ante awëmö põ guida adinque Adacaba wodi, Ee pöeda, angä beyænque idægoidi wæætë ëñëñämai inäni inänite wæñöninque tömengä ingante ata cæpodäni quëwengacäimpa.

Wadäni nani wede pönengainö

³² Quinante godömenque ante apænequimoo. Iñäni nê wede pönëñäni nani cægainö ante botö æiquedö apænequimoo. Guedeönö wodi tönö Badaco wodi ingadäimpa. Ayæ wææ Tantöo wodi tönö Yepetee wodi ingadäimpa. Ayæ wææ Awënë Dabii wodi tönö Tämoedo wodi ingadäimpa. Mäninäni

tönö Wængongui beyæ nê apænegainäni wodi tönänäni wede nani pönëno beyænque iïmai cædinque nangui cægadänimpa.

³³ Nê wede pönëñäni iñömö tæi ëmonte badinque wabæca awënë odeyeidi nempo quëwëñäni inänite bæ tadinque wido cægadänimpa. Pancadäniya wede pönëninque wadäni beyæ wææ äninque nõ cægadänimpa. Wacä, Cæcæboimpa, äninque do cæquënegä incæ wii cæcä ininque nê pönëñäni pancadäniya, Bitö änö cæcæbiimpa, äñäni ëñëninque do cægacäimpa. Pancadäniya nani wede pönëno beyænque mëñeidi incæ ecadämai inäni bagadänimpa. ³⁴ Gongä nangui wo bæco adinque pancadäniya wede nani pönëno beyænque mönæ ëmongatimpa. Wadäni yaëmenca tamencacæ cædäni wædinque nê pönëñäni pancadäniya aamö cædinque münäni quëwengadänimpa. Aquüi põni inänäni inte nê wede pönëñäni pancadäniya tæi piñænte bagadänimpa. Wabæca tontadoidi wænoncæ pönäni adinque nê pönëñäni pancadäniya wæætë tæi piñæninque wido cædäni gogadänimpa. ³⁵ Tömëñäni guidëñäni näñe wænäni ate onquiyænäni wede nani pönëno beyænque do wæninäni quëwëñäni ate ængadänimpa.

Näni caate wægainö

Ayæ adobai nê pönëñäni inänite wiwa cædäni caate wæyönänite wacä, Ata cæpobo goquimi, angä incæte nê caate wædönäni pancadäniya wæætë, Ee abi caate wæwëmoe, äñänitapa. Tömëñäni, Botö iñcayæ ate iñäni ömæmöninque caate botö wædö beyænque godömenque waa quëwencæboimpa, ante wææ äninque Ao äñämai ingadänimpa. ³⁶ Tömëñäni nani wede pönëno beyæ pancadäniya inänite wadäni badete togadänimpa. Wadäni inänite wæætë tæi tæi pangadänimpa. Wadäni inänite wæætë tæi tæi pangadänimpa. Wadäni inänite wæætë tæi tæi pangadänimpa. ³⁷ Pancadäniya inänite dicaca tacadäni wængadänimpa. Pancadäniya inänite ta wiyænäni wængadänimpa. Pancadäniya inänite yaëmenca yedäni wængadänimpa. Pancadäniya obega æmontai tönö caboda æmontai badöninque mäninque wëñate mongæninque ömæpodäni inte wæyönänite wadäni togænte päninque wiwa cægadänimpa. ³⁸ Tömëñäni nê wede pönëñäni inte waa põni inäni iñönäni inguipogaque quëwëñäni wæætë wii tömëñäni bai inäni inte wænæ wænæ cægadänimpa. Nê pönëñäni iñömö pancadäniya, Äyömömë gote quëwenguimoo, ante pönente wædinque wodi wiñonte önömæca wayömö godinque änanquidi wayömö godinque oncontatodë guidinque pancadäniya wë womöñönäni pancadäniya onguipodë ææ wote wë womongadänimpa.

³⁹ Ìninque Wængongui tòmènanì inànite, Wede mìni pònèno adinque botò waa tobopa, ante apænecäïmpa. Incæte tòmengä nänö, Pönö waa cæcæboïmpa, angainö ante tòmènanì mánifedé ayæ ænãmaï ingadänïmpa. ⁴⁰ Edæ tòmènanì adodänïque wii æncædänïmpa, angacäïmpa. Wæætë Codito godömenque pönongä æninque mönö watapæ quëwëñömönte tòmènanì mönö tönö godongãmæ æninque ædæmö picænãni bai bacædänïmpa, ante Wængongui mönö ìmonte waa cædinque tòmènanì beyæ adobaï waa cægacäïmpa.

12

Itota ingante mönö cöwë adinque quëwengcäïmpa, ante

¹ Ìninque boguimã bacoo owo bai máninãni ìñömö, Wængongui cöwë pönö cæcæcäïmpa, ante nè wede pönengainãni ìñömö adobaï bacoo ongönänïpa. Edæ, Mönitö wede pönente möni cægai bai münitö adobaï wede pönëninque ìmaï cæedäni, ante a ongonite bai apænedänïpa cæmöö. Tömènanì quingæ pogodo gocæte ante cædäni teëmencoo gä äadäni bai cædinque mönö adobaï oda caate mönö wædoncoo ante ñimpo cæcæïmpa. Wënæ wënæ mönö cægaincoo ante, Ancaa cæte awædö, äninque mönö wido cæcæïmpa. Ayæ taadö ante Itota nänö odömongainonque ante mönö edæ wæntædãmaï inte tæï piñænïnque pogodo gocæïmpa. ² Mönö wede pönente æite godö taadö ante tömengä ìñömö nè tãno beyænte gogaingä ingampa. Tömengä adocã incæ mönö wede pönèno ante, Cöwë mánömaï bacæïmpa, ante ædæmö badongaingä ingampa. Tömengä ìñömö wadäni tömengä ingante awæ timpodäni wæyongante badete todäni adinque tömengä, Mánömaï cædäni botö caate wædö beyænque botö ìincayæ ate watapæ tocæboïmpa, ante nè ëñëningä inte piyænë cædinque caate wædinque wængacäïmpa. Tömengä ñöwo ìñömö ñãni ömæmonte æite godinque Awënë Wængongui nänö contaimpaa tömëmængä ìnö tæ contate Awënë bate ongöñongä mönö adocã Itota ingante æmö ate bai pönëninque edæ tömengä miñæ tee empote pogodo gocæïmpa.

³ Tömengä ìñömö nè wïwa cædäni nangui pünite cædäni wæcä incæte piyænë cægacäïmpa. Ìninque münitö ìñömö, Wæntædãmaï inte mímö nangæ batawënãmaï ingæïmpa, ante cædinque, Tömengä æbãno cægacäï, ante pönëedäni. ⁴ Nöwo ganca münitö wënæ wënæ münì cæinente wædö ante wido cæcæte ante münitö wængui beyæ wepæ dicæ gowete cæminiyaa. ⁵ Ayæ Wængongui mönö wampo pönencæmöïmpa, ante mönö ìmonte, Botö

wëmini godömenque cæcæminïmpa, ante æbãno pönö angacäï, ante münitö dicæ pönëminiyaa. ìmaï angacäïmpa, ante yewæmongatimpa.

“Botö wëmi ëñëmi. Mönö Awënë bitö ìmite, Ëñente cæcæbiïmpa, ante pangä wædinque,

bitö wæætë badete todãmaï incæbiïmpa.

Bitö ìmite, Ëñenguënë quëwëe, angä ëñente wædinque wæwënãmaï incæbiïmpa.

⁶ Ìñæmpa tömengä nänö nè waadete pönënanique inänite päninque

mönö Awënë ìñömö, Ëñencæminïmpa, ante cæcampa.

Botö wëmini, ante nänö nè ængainänique inänite tömengä pangampa.”

⁷ Ante yewæmongatimpa cæminii. Münitö caate wëmini ìminitawo. Ìñæmpa wëñænãni inänite wæmpoidi dicæ pänãmaï inguinãniyaa. Mæmpo Wængongui ìñömö adobaï, Botö wëmini ìminipa, ante edonque acæïmpa, ante nangui äninque pangä caate wëminipa. Ìninque tömengä pangä wædinque münitö wæætë, Mönö ëñente quëwenguinque ante Mæmpo Wængongui pangampa, ante piyænë cæte ee amini pancæcäïmpa. ⁸ Tömengä wëñæmö ìñömönte tömengä tømãmö ìmonte edæ nangui pante angampa. Incæte münitö pancaminïyaa ìminite tömengä pante änämaï ingantawo. Ìninque münitö, Wii Wængongui wëmöni imönipa. Wacä wëmöni imönipa, ante wæquënëmini ìminipa.

⁹ Mönö mæmpoidi waodänique inönäni inte nangui äninque pänäni adinque mönö, Mæmpocã ìnogä inte tömengä nänö cæquënënonque cædinque mönö ìmonte waa cæte pangantapa, ante tømènanì inänite waa atamompa. Mönö Mæmpo Wængongui adobaï mönö ìmonte nangui äninque pangä adinque mönö quëwenguinque mönö tömengä ingante godömenque Ao ante ëñente cæcæïmpa. ¹⁰ Mönö mæmpoidi guiquënë, Æbãno pönö waa cæquimoo, ante pönente ate mönö ìmonte edæ, Ëñencæminïmpa, ante wantæ ìñö nangui änäni ëñente cætamompa. Wængongui ìñömö edæ, Tæiyæ waëmö botö ëwocabo bai münitö adobaï tæiyæ waëmö ëwocadinque watapæ quëwencæminïmpa, ante cædinque mönö waa quëwenguinque ante pönö pangampa. ¹¹ Æcãmenque mönö ìmonte nangui äninque pãna incæ tömengä pangä ate mönö caate wædinque dicæ quingæ watapæ tomongaa. Ìñæmpa, Caate awædö, ante cöwë ämompaa. Wæætë ìincayæ ate edæ doyedë nãni pãno beyænque mönö nè ëñente badömo ate mönö nõ cæmö badinque ganë pönente entawëmompaa.

Mönö wæquinque Wængongui apænecä ëñënanãmaï ìmompaa

¹² Ìninque mìnító guepænte wædīmīni inte edæ tæi piñæninque wæntædāmaī inte nanguī cæedāni. Ōnoncapo nanguī guecapote wædīmīni inte edæ guecapodāmaī inte ængæ gantite pogodo gote bai nanguī cæedāni. ¹³ Mōnō godonguinō, ante mìnító taadó ante enga womini mæmō ba ate nē podā cædināni incæ podā cædāmaī inte tōmēnāni nāni waa baquinque māninōnō tōinō gote waa wægoncædānimpā, ante godō waadete cæedāni.

¹⁴ Mōnō godongāmæ piyænē cæte quēwengæimpā, ante mìnító nanguī tæi piñæninque waodāni tōmānāni inānite gānē pōnente cæedāni. Ayæ, Æcānō tæiyæ waēmō ewocadāmaī ingāā tōmengā iñōmō mōnō Awēnē ingante cōwē adāmaī incæcāimpā, ante pōnente wædinque mìnító, Mōnō tōmāmō Wængonguī ayongā tæiyæ waēmō ewocate quēwengæimpā, ante nanguī cæedāni. ¹⁵ Wængonguī pōnō waadete nānō cædō ante mōnō tōmāmō æte entawengæimpā, ante cædinque mìnító cōwā adinque, Adocanque incæ ōmætawengā ināmaī incæcāimpā, ante wææ cæedāni. Adocanque wæwente nānō quēwēnō beyæ piinte bate tedecā ēñēninque mìnító, Wadāni nāni wentamō mongænguinque adobaī piinte badāmaī incædānimpā, ante wææ cædinque nē piingā ingante godō wææ æedāni. ¹⁶ Ayæ mīni cabo incæ, Nānōogængā ināmaī iñongante adocanque incæ godō mōnāmaī incæcāimpā, ante cōwā adinque wææ cæedāni.

Etawoo wodi iñōmō tōmengā bamoncadengā inongā inte nānō nanguī ænguēnecoo ante piinte bai cædinque cænguinque æncæte ante tōmancoo godonte beyæ adopoque æte cængacāimpā. Mìnító guiquēnē, Inguipogaque ante ænte to wædō, ante Etawoo wodi nānō pōnēwente cægainō bai adocanque incæ cædāmaī incæcāimpā, ante edæ wææ cæedāni. ¹⁷ Bamoncadengā inte nānō ænguēnecoo ante do piinte bai godōningā inte Etawoo wodi iñcayæ ate, Pōnōmi æmoe, ãfongante mæmpocā wæætē Baa angacāimpā, ante do ēñēmīnīpā. Edæ Ca ca wædinque tōmengā, Æbānō cæte ænguimoo, ante ancaā angā incæte mæmpocā do Baa āningā inte ñōwo wæætē wadō ante ædō cæte anguingāā.

¹⁸ Onquiyabo Wængonguī nānō gonga tånongā bæcobo ñænoque dodāni ponte godongāmæ ongonte cægōnāni bai mìnító wīi onquiyabo ñænoque pōmīnīpā. Tōmēnāni wēmō mæ māmōnte bai iñōmō wīni cai pæmæmāmo iñōmō nāni ponte wægainōmō bai mìnító wīi pōmīnīpā. ¹⁹ Todompeta nāni ancadeca nanguī we ōōmāmo dodāni nāni ēñente wægaināmō bai mìnító wīi adopāmo ēñēmīnīpā. Wængonguī

wææ ante nānō tedepāmo tōmēnāni nāni ēñente wægaināmō bai mìnító wīi adopāmo ēñēmīnīpā. Mānimāmo ēñente guñente wædinque tōmēnāni, Idæwaa āmīpā. Ædō cæte godōmenque ēñenguimōnīi, ante wægadānimpā. ²⁰ Edæ “Cæningā incæ onquiyaboga ponte cægongā adinque mìnító tæi tacamīni wæncæcāimpā,” ante wææ ãfongante tōmēnāni ancaī guñente wædinque, Wængonguī nānō wææ angāinō ante mōnító ædō cæte ædæmō ēñente cæquimōnīi, ante wægadānimpā. ²¹ Onquiyaboga nāni ate guñēmāmo adinque Mōitee wodi incæ, “Ancaī guñente botō do do wāate bai wæbopa,” angacāimpā.

²² Mìnító guiquēnē Tiōnoquidi nāni ānonquidi do ponte bai ewocamīnīpā. Edæ Wængonguī nē Quēwengā ōōnædē Eedotadēē bai nānō waēmō pōni owoyōmō mìnító māniñōmō do ponte bai ewocamīnīpā. Wængonguī anquedoidi æpodō mīdo ganca inōnāni inte nanguī pōni ināni godongāmæ pō bee tente tōmēnāni nāni watapæ ongōñōmō mìnító māniñōmō do ponte bai ewocamīnīpā. ²³ Mōnō Codito ingante godongāmæ mōnō pōnencabo iñōmō bamoncadēnāni nē ængūimō bayōmōnte mōnō emōwo ante ōōnædē yewæmōintaa do yewæmonte ongompā. Ìninque mìnító adocabomīni badinque Wængonguī weca mōnō waocabo tōmāmō imonte nē apænte anguingā weca do pōmīni imīnīpā. Nē nō cæte quēwengāināni wænte goyōnānite Wængonguī iñque badongā ate do ædæmō picænāni bai badānīpā. Tōmēnāni ōñowoca weca mìnító do ponte bai ewocamīnīpā. ²⁴ Wængonguī, Botō pōnō cæbo ate mìnító Ao āmīni ñinque mōnō godongāmæ waa cæte quēwengæimpā, ante nānō angāinō ante Itota, iñque bacæimpā, ante ædæmō badongacāimpā. Mìnító iñōmō nē badongaingā weca do pōmīni imīnīpā. Abedo wodi wepæ onguipoiya gowecā adinque Wængonguī wæætē nē wæñōningā ingante, Botō weca ongōnāmaī gobāwe, angacāimpā. Itota wepæ wīi Abedo wodi wepæ bai imæ adinque Wængonguī wæætē, Itota wepæ petæ petæ gowedimæ beyæque botō weca pōdāni, ante cægacāimpā. Mānimæ Itota wepæ nānō petæ petæ gowegāinōmō mìnító do ponte bai ewocamīnīpā.

²⁵ Mānōmaī waēmō pōni iñōmō do pōmīni inte mìnító nē apænecā ingante Baa ānāmaī iedāni. Onquiyabo godongāmæ ongōnāni guiquēnē inguipoga wææ angaingā ingante Baa ānānāni iñōnānite tōmengā ata cæpodāmaī inte pangacāimpā cæmīnīi. Ōōnædē ongonte nē wææ angaingā ingante ēñēnāmaī inte dadi emænte wadæ gomō bai mōnō godōmenque pante wæquēnēmō iñōmonte tōmengā cōwē ata cæpodāmaī

incæcäimpa.

²⁶ Mäniñedē tōmengä nänō tedepāmo beyænque inguiipo wancæ wancæ cægatimpa. Nōwo iñōmō tōmengä, “Botō iñcayæ ate inguiipo adopoque pōni wancæ wancæ cædinque öönædē adobaï wancæ wancæ edæ cæcæboimpa,” angacäimpa.

²⁷ Tōmengä, “Iñcayæ ate adopoque pōni cæcæboimpa,” angacäimpa, ante pōnēninque mōnō iïmai ante eñengæimpa. Tōmengä adopoque wancæ wancæ cæcä ate tōmengä nänō badongaincoo oo pōni ongoncoo iñōmō tōmancoo adoyedē ewente bacæimpa. Quincodō oo ongōnāmai tæi ongoncoo i mānincooque ayæ a ongonçæimpa,²⁸ Iñique mōnō Awēnē Odeye nempo quēwēmō iñōmō wancæ wancæ cædāmai inte tæi ongonguimō imompa, ante pōnēninque mōnō Wængongui ingante waa ate pōnente apænecæimpa. Mänōmai cædinque Wængongui ñāo bai nänō tæi emōmāmo ate guñente wædinque tōmengä beyæ cæcæimpa.²⁹ Edæ mōnō Wængongui iñōmō edæ gonga wo bæcoqui bai ingānō anguēnē, ante amo eñēmāimñipa.

13

Iïmai cæmō adinque Wængongui waa tocæcäimpa, ante

¹ Minitō iñōmō, Mōnō caipæ imompa, ante mini waadete pōnēnō bai cædinque cōwē godongāmæ waadete pōnente cæedāni.² Tōmānāni inānite edæ, Pōedāni, ante waadete cæedāni. Mänōmai cædinque pancadāniya, Botō weca ædānidō eñacæ pōnāni, ante eñēnāmai ināni incæte do waa cædāni ate edæ, Æ, Wængongui nänō da pōnōnāni anquedoidi incæ botō weca pōnānitapa, ante tæcæ abopa, ante todānipa.

³ Tee mōnete ongōnāni tōnō botō godongāmæ tee mōnete wæcōmo bai imopa, ante pōnēninque mīnitō tōmēnāni inānite ante cōwē pōnēedāni. Pancadāniya inānite wadāni wiwa godō cædāni ate caate wæwēñōnāni mīnitō adobaï pōnēninque, Mōnō baō adobaï eñamō inte tōmēnāni tōnō godongāmæ caate wæmō bai imompa, ante tōmēnāni inānite cōwē pōnēedāni.

⁴ Nänōgængä ināmai iñongante waocä nē godō guëa mongä tōnō nē godō wiwa towēnāni iñōnānite Wængongui māñināni tōmānāni inānite do apænte ante pancæcäimpa cæmīni. Mīna gæncaya adomīnaque guëa moncæmīnaimpa. Ayæ ñānōnāni mōninque nāna gæncaya quēwēna ate, Waa impa, ante mōnō waa acæimpa.

⁵ Wængongui incæ, “Mīnitō iñinīte cōwē emō cæte godāmai inte botō cōwē aacæboimpa,” angacäimpa. Mänōmai beyæ mīnitō godonte æinta ante æinente wædāmai inte mīni æadincooque æadinque piyænē cæte

quēwēedāni.⁶ Iñique Wængongui beyæ iïmai ante nāni yewæmongainō bai ante mōnō wede pōnente apænemompa.

“Mōnō Awēnē botō tōnō godongāmæ cæcä adinque botō,

Waocä ædō cæte botō imote wēnæ wēnæ cæquiringā, ante eñēmo inte guñēnāmai incæboimpa.”

⁷ Nē aadāni iñōmō mīnitō imīnite Wængongui nänō änō ante nē apænēdāni inānite ante pōnēninque mīnitō, Tōmēnāni iñōmō waa cædinque edæ watapæ quēwēnānipa, ante pōnēedāni. Ayæ tōmēnāni nāni wede pōnēnō bai adobaï wede pōnēedāni.

⁸ Itota Codito iñōmō wēēnēñedē nänō ingāi bai ingā ñōwōnæ adobaï ingā inte tōmengä adocä iñcayæ ate cōwē adobaï incæcäimpa.

⁹ Wadāni, Wacä taadō odōmonte apænēbo eñē, añōnānite tōmēnāni mīñæ godāmai iedāni. Iñæmpa tōmēnāni cænguinque ante, Æbānō waa pōni cō cæquii, ante wææ anāni incæte māñi cænguincoo beyæ tōmēnāni wii godōmenque watapæ quēwēnānipa. Iñique mānincoo cænte beyæ mōnō mīmō ædō cæte tæi piñante entawenguii. Wæætē edæ Wængongui nänō waadete pōnō cædō beyænque mōnō tæi piñante entawengæimpa.¹⁰ Æmontaicōnē cædinque, Wængongui qui, ante nē godōnāni iñōmō tōmēnāni nāni iya tāimpaa godōninque pancaa cængui ænte nē cænguēñēnāni inōnāni incæte tōmēnāni mōnō Codito mōnō beyæ nāmā nänō wepæ godongainō guiquēñē ædō cæte ænguñāni.

¹¹ Cæñināni inānite wænōnāni ate nē godongä ñæñængä pōni inongä iñōmō wepænque æninque, Wēnæ wēnæ mōni cædinō ante Wængongui pōnō ñā mēnongacæcäimpa, ante cædinque Tæiyæ Waēmō Pōni Oncōnē wāänē guidinque godongampa. Godongä ate baonque, Wentamō mongænte awædō, ante æninque tōmēnāni nāni quēwēñōmō yabæque māo iya tangadānimpa.¹² Itota adobaï, Botō wepæ pōnō mēnongabo ate botō quimīni iñōmō tæiyæ wæmō ewocate quēwencæmīnimpā, ante cædinque wentamō mōnō entawēnō ænte teēmē mongænte godinque tōmēnāni quēwēñōmō wææ cædinemō tao godinque yabæque pōni guñēñate wædinque caate wængacäimpa cæmōō.¹³ Tōmengä yabæque pōni guñēñate wædinque nänō tao gogaï bai mōnō adoyōmō tōmengä weca tao gote ado guñēñate wæcæimpa.¹⁴ Iñæmpa inguiipoga mōnō quēwēñōmō tæi ongompa diyæ wantæpiyæ quēwenguii. Wæætē öönædē iñcayæ ate edæ mōnō cōwē quēwenguiñōmō ante æinente wædinque wānō cōmopma.

¹⁵ Ìninque, Wængonguì quì, ante cænguì godônāni bai cædinque mōnō ìñōmō edæ, Itota emōwo beyærique quëwēmōnīpa, ante nē apænemō inte tōmengā emōwo ante Wængonguì ingante apænedinque, Bitō tæi emōi inte waa pōni cæbīpa, ante watapæ apænecæïmpa. ¹⁶ Ayæ ñimpo cædāmaì inte mīnitō wadāni inānite cōwē waa cæedāni. Ayæ wadāni inānite mīni mānincoo godō nēnempomīni æncædānīmpa. Mīnitō mānōmaì, Wængonguì quì, ante godonte bai cædinque nēnempomīni adinque Wængonguì mīni godōno ante waa acampa. ¹⁷ Mīnitō, Mōnō imonte nē ānāni inānite mōnō Ao ante eñengæïmpa, ante pōnēninque nē aadāni inānite cōwē eñente cæedāni. Tōmēnāni, Æbānō cæboo, ante adinque Wængonguì apænte ancæcāïmpa, ante eñēninque guñente wædāni inte nō cædinque aadānīpa cæmīnīi. Tōmēnāni mānōmaì aadinque watapæ tote quëwencædānīmpa, ante mīnitō wæætē tōmēnāni nāni ānōno ante eñente cæedāni. Mīnitō wæætē eñēnāmaì ìmīni adinque tōmēnāni wæætē edæ, Ædō cæte aaquimōnīi, ante wæwente badāni ìninque mīnitō adobai todāmaì ìmaìmīnīpa.

¹⁸ Mōnitō beyæ ante Wængonguì ingante apænēdāni. Mōnitō mīmō entawēmōni inte wentamō entawēnāmaì imōnīpa, ante nāmā apænte pōnēmōnīpa. Edæ, Quiēmē cæmō incæ mōnō cōwē nō cæte quëwengæïmpa, ante cæmōnīpa. ¹⁹ Botō mīnitō weca ocæ emænte pōinēmopa. Ìninque mīnitō Wængonguì ingante apænedinque, Wængonguì, bitō pōnō cæbī ate Pa-bodo mōnitō weca poncæcāïmpa, ante apænēdāni, ante nangui āmopa.

Mīnitō ìmīnite Wængonguì waa cæcæcāïmpa, ante

²⁰ Wængonguì inguipoga nānō badōnāmaì ìñedē wēenēñedē pōni āninque edæ, Mōnō godongāmæ waa cæte quëwengæïmpa, ante tōmengā nānō angaiñō bai cōwē nē badongāingā inte ìmaì pōnō cægacāïmpa. Edæ mōnō obegaidi bai ìñōmonte Awēnē Itota ìñōmō mōnō imonte nē Aacā ñænængā ìnongā inte tōmengā wepæ gowegaimæ eyepæ pōni godongā ate Wængonguì tōmengā ingante, Eyepæ i, āninque, Ñāni omæmōe, angā ñāni omæmongacāïmpa. Mānōmaì gānē pōnente nē cægāingā inte Wængonguì ìñōmō, ²¹ waa pōni pōnongā ænte eyepæ entawēninque mīnitō ìñōmō tōmengā nānō ānō bai cæcæmīnīmpa. Tōmengā Itota Codito tōnō godongāmæ cædinque pōnō cæcā æninque mōnō tōmengā nānō waa adoncooque entawengæïmpa, āmopa. Itota Codito ìñōmō ñōwopāmo incæ ìncayæmāmo incæ cōwē nē tæi emōnongā inte ñāō emongā amōnīpa, ante mōnō tōmengā ingante

cōwē watapæ apænecæïmpa. Mānōmaì ingæïmpa, ante botō, Amēē, āmopa.

²² Ìñānāni eñēdāni. Botō mānīnō tōmānō ante apænecæte ante wædænque pōni yewæmōmopa. Ìninque mānīnō botō ædæmō apænēdīno ante mīnitō piyænē cædinque eñēdāni, āmopa. ²³ Mōnō tōniñacā Tīmoteo tee mōnete wæyongante ñōwo ñimpo cædāni gocantapa, ante apænebo eñēdāni. Tōmengā botō weca quingæ pongā ìninque botō tōmengā tōnō guëa mīnitō weca eñacæ pōmaimōnāpa. ²⁴ Mōnitō beyæ apænedinque mīnitō ìmīnite nē aadāni inānite, Waa quëwencæmīnīmpa, ante apænēdāni. Ayæ adobai Wængonguì quīnāni tōmānāni inānite, Waa quëwencæmīnīmpa, ante mōnitō beyæ æedāni. Ayæ, Mīnitō ìmīnite ante apænedinque Itadiabæ quëwēnāni adobai, Mīnitō waa quëwencæmīnīmpa, ante apænēdānīpa, ante āmo eñēdāni. ²⁵ Mīnitō tōmānīni ìmīnite Wængonguì pōnō waadete cæcæcāïmpa. Māninque ante yewæmōmopa.

Tantiago cadota ante nānō yewæmongainta

Tantiago īmaī yewæmongacāimpa

¹ Botō Tantiagobo iñōmō Mæmpo Wængonguī tōnō mōnō Awēnē Itota Codito inate nē cædōmo īmopa. Idægoidi mīni cabo tipæmpoga go mencabomīniya inte wabæca nāni quēwencabo wabæca nāni quēwencabo weca pangocæte godimīni iñōmīnite botō waa pōnēmo inte īi yewæmōintaa yewæmōmopa.

Wængonguī nānō ēñēmāmo ante mōnō ængcēimpa, ante

² Botō tōniñamīni ēñēedāni. Quiēmē beyæ wæwente bamīni incæ mīnitō æyedēmē mānōmaī bamīni īninque edæ māniñedē incæ cōwē, Mōnō watapæ toquinque impa, ante pōnēedāni. ³ Mīni wede pōnēnō æbānō ī, ante edonque acēimpa, ante cædāni ate caate wæmīni incæte mīnitō, Mōnō caate wædō beyænque mōnō godōmenque pædinque wæntæye ināmaī inte ee cæquimō īmopa, ante do ēñēmīnīpa. ⁴ Īninque, Mōnō æmæwo pæcēimpa, ante cædinque mīnitō wæntæye ināmaī inte ee cædāni. Mānōmaī cæte pæmīni īninque, Mīni cædimāmo æbānō cæmīni imīniī, ante adinque edæ, Tōmānō wæmō cæmīni imīnīpa, ante abaiṃpa.

⁵ Mīnitō weca æcānō nānō ēñēmāmo wī eyepæ īna adinque tōmengā, Pōnōmi ēñēmoe, ante Wængonguī ingante apænequēngampa. Apæneyongā Wængonguī wæætē pōnō cæcā æncæcāimpa. Edæ Wængonguī iñōmō nē, Pōnōmi æmoe, ante ānongā ingante wæætē piinte ānāmaī inte godōnongā ingampa. Ayæ tōmānāni inānite pōnō cædinque tōmāā godōnongā ingampa. ⁶ Īnæmpa nē angā iñōmō wede pōnenguēngā inte wīi æmæ pōnēninque apænecæcāimpa. Edæ nē æmæ pōnengā iñōmō gāwapæ æpæ woboyæ pæmæninque mæ conta mæ conta gopæ ocæmæ pō cæpæ nānō cægālmæ bai tōmengā adobaī gocā ingampa. ⁷ Māningā iñōmō Wængonguī pōnongā æncæboimpa, ante ædō cæte īmaī ante pōnenguīgāā. Wængonguī edæ tōmengā ingante tōmāā godōnāmaī incæcāimpa. ⁸ Tōmengā mēnongā pōnente quēwengā ingampa. Æbānō cæcāā, ante ēñēnāmaī īnongā inte ædō cæte waa cæquīgāā.

⁹ Adocanque mōnō tōniñacā incæ īmæca quēwēnāni nāni ēadincōo nē wīi eyepæ ēacā incæte tōmengā Wængonguī pōnō cæcā beyænque, Æbānō ēaboo, ante pōnēninque watapæ toquēngā ingampa. ¹⁰ Wacā mōnō tōniñacā guiquēnē īmæca quēwēnāni nāni ēadincōo nē ēacā incæte

tōmengā wæætē, Botō ōnōmoque īmopa, ante pōnēninque watapæ toquēngā ingampa. Edæ ongai ōnonque pododinqe guīñē wæmpa bai tōmengā adobaī wæncæcāimpa. ¹¹ Edæ nænque tamō tī nāwāñonte awæ guingo icate to aminte æmæwo wæmpa. Ongai yædōi gæuo odote wæninque nānō wæmō ēnodī wo ēwente bapa bai nē ēacā iñōmō adobaī ingampa. Tōmengā godonte æ godonte æ tæcæ cædinque quingæ wæninque edæ dæ anguīgā.

Mōnō caate wæpāmo

¹² Wængonguī ingante nē waadedāni inānite tōmengā wæætē, Mīni cōwē quēwenguinta, ante poganta bai mīnitō imīnite pōnōmo æncæmīnīpa, ante angacāimpa. Mānīnta Wængonguī weca cōwē mōnō quēwenguinō impa. Īninque waocā caate wæcā incæte tōmengā wæntæye badāmaī ingā iñōmō tōmengā nānō toquinque. Wæntæye ināmaī inte ee cæcā adinque Wængonguī, Mīni cōwē quēwenguinta, ante tōmengā nānō angāinō bai māningā ingante pōnongā æncæcāimpa. ¹³ Waocā nānō cæinēwente wædō beyæ, Wēnæ wēnæ cæboe, ante cædinque tōmengā, Wængonguī botō imote, Wēnæ wēnæ cæcæbiṃpa, ante ingampa, ante wīi anguēngā ingampa. Edæ Wængonguī ingante, Wēnæ wēnæ cæcæbiṃpa, ante waocā ædō cæte anguīgāā. Wængonguī wæætē wadāni inānite, Wēnæ wēnæ cæcæmīnīpa, ante ānāmaī īnongā ingampa cæmīniī. ¹⁴ Æcāmenque incæ, Wēnæ wēnæ botō cæinente wædō incæ ante wæmō impa, ante pōnēninque tōmengā do wēnæ wēnæ mōnō cæinente wædō beyænque wēnæ wēnæ cæinengā ingampa. ¹⁵ Yædēmadā wēñægā pæcā adinque ēñauingā bai mōnō cæinēwente wæpāmo adobaī entawente pætawēmō īninque mōnō do wēnæ wēnæ cæmōmpa. Ayæ wēnæ wēnæ mōnō cæpāmo beyæ mōnō æmæwo wænguinque impa.

¹⁶ Botō nē waadete tōniñamīni ēñēedāni. Mīnitō nāmā incæ oda cædāmaī incæmīnīpa. ¹⁷ Ōnonque mōnō ænō ante mōnō wæmō nāō ēmōnoncoo tōmancoo incæ mōnō Mæmpo Wængonguī ōōnædē owote nē pōnōnongā ingampa. Mæmpo Wængonguī ōōnædē owodinqe apāidāni ināni badongacāimpa. Adocā nænque wēmō cæbaī wayōmō wayōmō go bai entawēnāmaingā ingampa. Tōmengā wæætē adodonque ingaingā ingampa. ¹⁸ Botō cæinēmopa, ante nē angaingā inte Wængonguī, Nāwangā botō angāinō beyænque mīnitō botō wēñæmīni bacæmīnīpa, ante wāānā mangā bai cædinque mōnō imonte pōnō badongacāimpa. Tōmengā nānō badongaincoo tōmancoo īñonte mōnō tānōmō inōmō īmopa.

Wængonguī ingante mōnō nō ēñente cædō

¹⁹ Botō nē waadete tōniñamini ēñēedāni. Wacā āñongā mīnitō tōmāmīni quingæ ēñenguēñēmīni imīnīpa. Mīnitō wæætē quingæ apænedāmai inte adobaī quingæ piinte ināmai inguēñēmīni imīnīpa.²⁰ Wængonguī, Nō cæte quēwēedāni, ante waa nānō cæinēmāmo ante waocā nānō piimāmo beyæ wīi edæ cæcampa.²¹ Mānōmai beyæ mīnitō wentamō entawēninque mīni wīwa cædō tōmāā ñimpo cæedāni. Adobaī quiēmē mīni wēnæ wēnæ cæpāmo tōmāmāmo ñimpo cæte iedāni. Ayæ Wængonguī nānō angainō ante mīnitō mīmōnē nānō mingainō ante Ao ante gānē pōnente æncæmīnīmpa. Edæ īi angainō beyænque mīnitō quēwencæmīnīmpa.

²² Mīnitō, Nāmā incæ oda cædāmai ingæimpa, ante cædinque Wængonguī nānō angainō ante wīi ōnonque ēñēmīniūte inte wæætē, Æbānō ante ī, ante ēñente cæedāni.²³⁻²⁴ Waocā nāmā awinca awocawēntaa adinque nāmā ate ate wadæ godinque, Quīnō bai intawo, ante nānō adinca do oda cæte wæcampa. Mānōmai oda cæte wæcā bai Wængonguī nānō angainō ante nē ēñenganque wīi ēñente cæcā īñōmō tōmengā adobaī oda cæte wæcā ingampa.²⁵ Wængonguī nōingā nānō wææ angainō ante nāni yewæmongainō ante nē ædæmō cōwē acā guiquēnē tōmengā īñōmō nānō ēñēnīnō ante wīi pōnente badāmai inte wæætē cōwē ēñente cæcā īninque tōmengā mānōmai cædinque nānō toquinque cæcampa. Wængonguī nōingā nānō wææ angainō beyænque waocā ñimpo cæte quēwengā ingampa.

²⁶ Wængonguī ingante botō nē ēñente cæbo imopa, ante pōngēngā incæte tōmengā ōnonguēñēwa ñā cæguēñēwate bai cædāmai inte wæætē wīwa tedecā īninque tōmengā nāmā incæ oda cæte gobaingampa. Ayæ Wængonguī ingante botō ēñente cæbo imopa, ante tōmengā nānō ānō ante ōnonque angā īmaingampa.²⁷ Nōwadāni tōnō owæmpoīnāni nāni wæwēñedē mōnō tōmēnāni tōnō godongāmæ cæcæimpa. Ayæ adobaī īmæcaque ante quēwēnāni nāni wēnæ wēnæ cædīmāmo bai mōnō, Wentamō badāmai ingæimpa, ante wææ cæcæimpa. Mānōmai cæmō īninque mōnō Mæmpo Wængonguī ayongante mōnō wapiticæ cædāmai inte wæætē nō ēñente cæmō imopma.

2

Wacā ingante wadō wadō ate pōnente cædāmai ingæimpa

¹ Botō tōniñamini ēñēedāni. Mōnō Awēñē Itota Codito ñāō ēmonte nē apāigaingā ingante nē pōñēmīni inte waodāni inānite wadō wadō ate pōnente cædāmai iedāni.² Īmai nāni cæbai ante ōñōwēnque

pōñēedāni. Edæ onguīñængā nē ēcā īñōmō tōmengā nānō ōnongompo timpōi oodo badōi wempocā īninque waēmoncoo mongængā inte mīni a ongōñōmō guī pongampa. Ayæ onguīñængā nē wīi eyepæ ēcā īñōmō pedæncoo mongængā inte mīni a ongōñōmō adobaī pongampa.³ Adinque mīnitō waēmoncoo mongængā ingante, “Bitō īñōmō waa tæ contaimpaa tæ contae,” ante apænēmīni imīnitawo. Wæætē wīi eyepæ ēcā ingante, “Bitō māniñōmō adiyæ ongōe. Botō ōñōwa īñōmō tepataa tæ contae,” ante apænēmīni imīnitawo.⁴ Mānōmai apænēdinque mīnitō weca wīi godongāmæ wadō wadō ate pōnente cæbaimīnitawo. Ayæ wēnæ wēnæ pōñēninque apænte āmīni babaimīnitawo.

⁵ Botō nē waadete tōniñamini ēñēedāni. Wængonguī Awēñē Odeye ingante nē waadedāni inānite tōmengā, Botō pōnō cæbo ate mīnitō botō nempo cōwē quēwencæmīnīmpa, angacāimpa. Īmæca quēwēnāni weca māincoo wīi eyepæ ēadāni īñōñānite tōmengā, Mīni wede pōñēñō nanguī ēwocadinque mīnitō botō angainō bai botō nempo quēwencæmīnīmpa, ante tōmēnāni inānite wīi apænte ængantawo.⁶ Mīnitō wæætē wīi eyepæ ēcā ingante piinte tedemīni ate tōmengā guingo imonte badingā ingampa. Īñæmpa nē ēadāni guiquēnē mīnitō imīnite nāni wēnæ wēnæ cædinō beyænque wīi wæmīnitawo. Ayæ adodāni mīnitō imīnite apænte anguināni weca godoncæte ante wīi ænte godānitawo.⁷ Ayæ mīnitō, Coditoidi imōnīpa, ante Codito waa pōni ēmōwo ante ēmōmīni īñōmīnite tōmēnāni adodāni incæ māniwo ante babæ āninque nē wēnæ wēnæ ānāni wīi inānitawo.

⁸ Wængonguī angā ēñēninque nāni yewæmongainō ante adinque mīnitō waa pōni Awēñē nānō wææ angainō ante nō ēñente cæmīni īninque waa cæbaimīni imīnīpa. Īmai ante yewæmonte impa. “Bitō nāmā ante pōnente, Nāmā waadebo imopa, ante nāmā bitō waadete pōngenganca wadāni inānite adoganca waadete pōñēe.”⁹ Mānōmai cædinque mīnitō māincoo ēcā ingante waa cæmīni incæte wīi eyepæ ēcā ingante wadō wadō ate pōñēmīni inte wīwa āmīni īninque wēnæ wēnæ cæmīni imaimīnīpa. Ayæ Wængonguī nānō wææ angainō ōnonque wido cæte bai cædīmīni inte mīnitō wentamō mongæmīni imaimīnīpa.¹⁰ Wængonguī beyæ Mōitee wodi nānō wææ yewæmongainō ante tōmānō ante æcāmenque nē ēñente cæcā incæte māniñō adodonque pōni incæ ēñēñāmāi cæcā inte tōmengā māniñō tōmānō ante ōnonque wido cæte bai cædingā inte wentamō mongængā ingampa.¹¹ Edæ Wængonguī, “Nānōogæ īnāmā īñongante godō guæa mōnāmā iedāni,”

ante nē angaingā inte tōmengā adocā godōmenque īlmaī angacāimpa, “Wacā ingā wænōnāmaī iedāni.” Mīnitō wacā nānōogæ īfongante godō guēa mōnāmaī īlmi incæte wacā ingante wænōmīni īninque mīnitō Wængonguī nānō wææ angainō ōnonque wido cæte bai cædimīni inte wentamō mongæmīni īlmaīmīnīpa.

¹² Wængonguī nānō apænte anguiōnæ mōnō īmōnte tōmengā nānō wææ angainō bai cæcæcāimpa. Māninō nānō wææ angainō beyænque waocā fīmpo cæte quēwengā ingampa. īninque mīnitō tedemīni incæ cæmīni incæ, Cōwē mānōmaī impa, ante pōnēninque tedecæmīnīmpa. Adobai ante cæcæmīnīmpa. ¹³ Wadāni wæwēnāni īfōnānite æcāmenque wīl waadete godō waa cædingā ingāā, ante Wængonguī wæætē tōmengā ingante godō waadete waa cædāmaī inte apænte āninque pancæcāimpa. Wadāni wæwēnāni īnānite æcāmenque guiquēnē nē godō waadete waa cædingā īfōngante Wængonguī wæætē tōmengā ingante nānō apænte anguiōnæ godō waadete waa cæcæcāimpa.

Wængonguī ingante pōnēninque mōnō cæquēnēnō

¹⁴ Botō tōniñamīni ēñēedāni. Waocā, Botō Wængonguī ingante wede pōnēmo īmopa, angā incæte tōmengā nānō waa cædinō wæætē dæ ā īninque tōmengā māninō, Wede pōnēmopa, ante nānō ānō beyænque ædō cæte wænāmaī quēwengingāā. ¹⁵ īlmaī nāni cæbai ante ōnōwēnenque pōnēedāni. Wængonguī ingante wede pōnengā īfōmō onguīñengā incæ onquiyængā incæ æcāmenque incæ tōmengā weocoo tōnō cænguī ōmaacā ingampa, ¹⁶ adinque mīnitō weca adocanque tōmengā ingante, “Waa goe, āmopa. Bitō, Yoguidāmaī, ante weocoo wēñae, cænguī eyepæ æninque cæe,” ante angā incæte nē ōmaacā nānō ænguēnēnō ante edæ tōmengā ingante godōnāmaī īninque tōmengā waa cæcantawogaa. ¹⁷ Adobai īlmaī impa. Mōnō waa cædinō dæ ā īninque Wængonguī ingante mōnō wede pōnēnō incæ ōnonque bapa.

¹⁸ Incæte wacā īlmaī anguingā. “Bitō Wængonguī ingante tōmēmi wede pōnēnō ēabi īmpa. Botō guiquēnē tōmēmo waa cædinō ēabo īmopa,” ante āfōngā botō wæætē, Bitō nē cædāmaī īnōmi inte Wængonguī ingante bitō wede pōnēnō ante botō īmote odōmōmi aboe, āmopa. Odōmōmi adinque botō guiquēnē botō cædinō ante odōmōmo adinque bitō wæætē botō wede pōnēnō edonque pōni abaiimpā. ¹⁹ Wængonguī nāwangā adocanque ingaingā ingampa. Bitō mānōmaīnō ante pōnēmi inte waa pōni pōnēmi īmpa. Wēnæidi diyæ adodō ante pōnēnānīpa tōō. Incæte ancai

guīñente do do wāate wædānīpa. ²⁰ Bitō mānōmaīnō ante nē ōnonque tedebi īmi ēñēe. Botō, Mōnō waa cædāmaī īmō īninque Wængonguī ingante mōnō wede pōnēnō incæ ōnonque īmaimpā, ante odōmōmo ate bitō edæ Ao ante ēñēnguīmiyaa. ²¹ Edæ mōnō docā Abadāō wodi Wængonguī nānō āmaī cædinque tōmengā wengā onguīñengā Itæca ingante æninque iya tāimoga cōnōninque wænōncæ cæyongante Wængonguī adinque, Bitō nō cæte entawēmi āmopa, ante apænegacāimpa. Abadāō wodi nānō cædinō beyænque Wængonguī mānōmaī angacāimpa. ²² Bitō ēñēnāmaī īmitawo. Abadāō wodi edæ Wængonguī ingante wede pōnēninque ēñēte cægacāimpa. Wīl ēñēte cægaingā inte bai tōmengā Wængonguī ingante nānō wede pōnengainō ōnonque pōnēmaingā incægacāimpa. Ayæ waa nānō cægaīnō beyæ Abadāō wodi nānō wede pōnengainō eyepæ pōni bagatimpā. ²³ Wængonguī angā ēñēte nāni yewæwōngainō bai īnque batimpā. īlmaī ante impa. “Abadāō īfōmō Wængonguī, Botō īlmaī pōnō cæcæboimpā, ante nānō angainō ante pōnengacāimpa. īninque Wængonguī, Mānōmaī pōnēmi beyæ bitō botō ayōmo nō cæte entawēmi īmpa,” ante tōmengā ingante wæætē pōnō angacāimpa. Ayæ Abadāō, Wængonguī æmīgo ingampa, ante angadānīmpa.

²⁴ Bitō ēñēnāmaī īmitawo. Waocā Wængonguī ingante wīl nānō wede pōnēnō beyænque wæætē, Tōmengā æbānō waa cæcāā, ante adinque Wængonguī tōmengā ingante, Bitō nō cæte entawēmi abopa, ante cæcā ingampa. ²⁵ Idægoidi, Ōmæ awēmō ate pōeda, ante mēnaa īnate da godōnāni gote pōñōnate Adacaba wodi nē towente quēwengā incæ, Botō oncōnē guīieda, ante tōmēna īnate wē wodongacāimpa. Ayæ, Wadāni tōmēna īnate bæi ongōnāmaī incædānīmpa, ante, Wadō taadō goeda, ante da godōngā gogadāimpā. Mānōmaī cæcā adinque Wængonguī, Bitō cædinō beyænque bitō botō ayōmo nō cæte entawēmi īmpa, ante Adacaba ingante adobainō ante pōnō angacāimpa. ²⁶ Mōnō baō ōmæwocacā inte do wænte ī bai Wængonguī ingante mōnō waa cædāmaī wede pōnēnō adobai do wæningā bai inte edæ ōnonque impa.

3

Mōnō ōnonquēnēwa

¹ Botō tōniñamīni ēñēedāni. Mīnitō weca wīl tæiyænāni, Nē odōmōnte apænemōni bacæmōnīmpa, ante bāinente wæquēnēnāni incædānīmpa. Edæ wadāni īnānite pōnōmenque apænte āninque Wængonguī wæætē mōnō nē odōmōnte apænemō īfōmōnte, Ēbānō odōmōnte apænemīni, ante mōnō īmōnte godōmenque apænte

āninque pancæcāimpa. Minitō do ēñēmīnīpa.
 2 Mōnō tōmāmō nanguī ægodawate tæī go
 wæninque bai oda cæmō īmōmpa. Nē tedecā
 īñōmō tōmengā, Æbānō ante tedebōo, ante
 tōmengā ōnonguēnēwa cōwē wææ aadinque
 tōmengā wēnæ wēnæ ānāmaī īninque nōingā
 cæbaingā ingampa. Ayæ wēnæ wēnæ
 cædāmaī incæboimpa, ante nāmā baonga
 tōmāo wææ aate quēwēnōngā ingampa.

3 Cabayo mōnō īmonte ēñente cæcæcāimpa,
 ante tæinta badōinta ōnōne da wēnemō
 ate, Cabayo baō tōmāñō incæ īñāimæ
 īñāimæ gocæcāimpa, ante cæmō īninque
 cabayo do ēñente gocampa. 4 Īmaīnō
 ante ñænængade wipo ante adobaī ante
 pōnēedāni. Nænængade pōnī wipo incæ
 woboyæ nanguī pæmænte gopa incæte
 wipo nē dadongā nānō cæinēnō bai, Ædōnō
 dadūimæ ædōnō dadūimæ wiyate goquī,
 ante guiyā awæpāmaī inte wiyate cæcā gopa.
 5 Ayæ adobaī mōnō baō tōmāo ēñayōmō
 mōnō ōnonguēnēwa guiyā enguēnēwamō
 īmōmpa. Incæte mōnō ōnonguēnēwa inte
 tededīnque, Mōnō nanguī cæmōmpa, ante
 tedewēmōmpa. Nænængade pōnī ōmædē
 incæ amīmō bayedē guiyā gonga beyæ
 ōmædē tōmāo gonga bæcodote bapa. 6 Ayæ
 mōnō ōnonguēnēwa adobaī gonga bæcodote
 bai tedepa. Mōnō baō tōmāo ēñayōmō mōnō
 ōnonguēnēwa tōmāo mōnō wīwa tedewen-
 guinque wēnæ wēnæ enguēnēwamō īmōmpa.
 Waomō incæ māninguēnēwa beyænque
 mōnō baō tōmāo inte ēñēnāmaī cæmōmpa.
 Ayæ gonga wacæ tæñōmonte bæcododāni bai
 ado ōnonguēnēwa beyæ mōnō quēwengā
 tōmanganca wo ēwente īmōmpa. Edæ īi gonga
 tadōmengadēnguipodē ōñonte ō ænte wacæ
 tæñōmonte bæcodote bai cædīnque wēnæ
 incæ mōnō īmonte cæcā beyænque mōnō
 wīwa tedewēmō īmōmpa.

7 Babæidi incæ ōōmā ēadāni incæ
 tæntæidi incæ æpænē quēwēnāni incæ
 quingānōidi incæ tōmānāni inānite waocā,
 Botō pæpogate cæñināni bacæmīnīpa,
 ante cæcā ingampa. Waocā doyedē
 nānō cægāi beyænque cæñināni bate
 quēwengadānīpa. 8 Īñæmpa æcānō, Mōnō
 ōnonguēnēwa pæpogate bai bacæimpa, ante
 cædaa edæ dæ angampa. Edæ, Babæidi cōwē
 incæmōnīpa, ante cæñināni badāmaī īnāni
 bai mōnō ōnonguēnēwa adobaī wēnæ wēnæ
 īi īninque ædō cæte waa tedemōō. Wæætē
 mōnō ōnonguēnēwa nanguī wænguimæ
 enguēnēwamō bai īmōmpa.

9 Māninguēnēwa inte mōnō Mæmpo
 Wængonguī ingante, Bitō tæiyæ waēmō
 imidō anguēnē, ante waa apænemōmpa.
 Wæætē waodāni Wængonguī tōmengā nānō
 ingai bai nānō nē badongaināni īñōnānite
 tōmēnāni inānite ante mōnō adoguēnēwa
 inte wēnæ wēnæ apænemōmpa. 10 Ado

ōnōne incæ wade wade ante mēnea ante
 apænemōmpa. Adodeque ante waa impa.
 Adodeque ante wēnæ wēnæ impa. Botō
 tōñīñamīni ēñēedāni. Mānīnō bai mōnō
 edæ wīi cæquēnēmō ingæimpa. 11 Æpæ
 tayōmō ado tayōmō ædō cæte waēmōmæ
 wentamōmæ āññōmonque ta goquimææ.
 12 Botō tōñīñamīni ēñēedāni. Īgowæ nāni
 āwæ incayō odibomō nāni ānōmō ædō cæte
 incaquīī. Yowewæ incayō īigo mæñeca ædō
 cæte incaquīī. Adobaī ado tayōmō ædō
 cæte waēmōmæ wentamōmæ āññōmonque
 ta goquimææ.

Mōnō nō ēñēmāmo

13 Minitō weca æcānō nō ēñengā in-
 gantawo. Tōmengā īñōmō, Nō ēñēmo
 īmopa, ante wadāni ēñēncādānīpa, ante
 cædīnque tōmengā nānō waa quēwēnō
 inte odōmoncæcāimpa. Ayæ tōmengā
 nō ēñengā incæ, Botō ōnōmoque īmopa,
 ante pōnēninque tōmengā nānō cædīnō
 beyæ odōmongā acædānīpa. 14 Minitō
 guiquēnē wacā quincōo adīnque pīnte
 entawēmīni ayæ nāmanque ante, Mōnō
 ñænæmō badīnque waa quēwengæimpa,
 ante pōnente entawēmīni īninque mīnitō nō
 ēñēmīni incæ, Mōnō waa cæmōmpa, ante
 ædō cæte anguimīni. Ayæ mānōmaī bai
 godōmenque entawēmīni īninque nāwangā
 mīni anguēnēnō ante edæ Baa ānāmaī ledāni.
 15 Mānīnō ēñēmāmo wīi Wængonguī nānō nō
 ēñēmāmo ī. Wæætē īi inguipogaque ante
 quēwengā inte waocā mā pōnēninque wēnæ
 nānō ēñēmāmo ante entawengā ingampa.
 16 Edæ waocā æyedēmē wacā quincōo
 adīnque pīnte entawengā ayæ nāmanque
 ante, Botō ñænæmo badīnque waa
 quēwencæboimpa, ante pōnente entawengā
 īñōmō tōmengā ædō cæte tōingā pōnente
 cæcāā. Īñæmpa quēmē nāni wēnæ wēnæ
 cæpāmo ante cæcampa.

17 Waocā Wængonguī nānō nō ēñēmāmo
 ante nē entawengā guiquēnē waēmō
 entawengā ingampa. Ayæ wacā ingante
 cōwē piyænē cæte quēwēnōngā ingampa.
 Tōmengā nē waadete pōnengā inte wacā
 ingante waa ēñēnōngā ingampa. Wacā
 ingante ēñente cædongā ingampa. Tōmengā,
 Wæwēnāmaī incæbīimpa, ante wacā ingante
 godō waadete waa cædongā ingampa.
 Ayæ, Quīnō waa inguīī, ante mānīnō ante
 cædongā ingampa. Nē waodāni inānite
 wadō wadō ate pōnente cædāmaī inte
 tōmengā nō pōnente quēwēnōngā ingampa.
 18 Wadāni inānite, Botō piyænē cæcæboimpa,
 ante nē cæcā īñōmō tōmengā nānō piyænē
 cædīnō beyæ tōmēmō nē mīnongā bai
 ingampa. Tōmengā nānō piyænē cædīnō
 beyæ waodāni wæætē, Quīnō nō cæte impa,
 ante cædāni īninque tōmengā edæ amīñayedē
 tōmēmō tā pete ængā bai incæcāimpa.

4

Inguipoga nāni quincōo ante pōnēnāmai incēmōimpa

¹ Mini cabo quīnō beyæ ante guēa wæætedō wææte pīnīnque wææte godō wææte godō ānewēmīnitawo. Mīnitō nāmā wadō wadō mīni cæīnēnō ante entawente guēa cæte quēwēmīni beyædō cōwē godongāmæ mīni pīnte quēwēngīnque īmīnīpa tōō. ² Mīnitō æīnente wæmīni incæte ænāmāi īmīnīpa. Īnīnque nē ēacā ingante wænōmīni incæ tōmēngā nānō quincōo ante æīnēmīni incæte mīni æīnēnō, ante ænāmāi īmīnīpa. Mānōmai beyæ mīnitō wææte godō wææte godō ānewēnīnque guēa wæætedō wææte pīnīnque guēadō guēa cæte quēwēmīni īmīnīpa. Mīni ānō ante mīnitō, Pōnōmī æmōnīe, ante mīnitō Wængonguī ingante apænedāmāi īmīni inte mīni ænāmāi quēwēngīnque īmpa. ³ Mīnitō Wængonguī ingante mīni ānō ante apænēmīni incæte wēnæ wēnæ ante pōnēnīnque apænēmīni beyæ ænāmāi īmīnīpa. Edæ Wængonguī nānō pōnōnī ænīnque mōnō edæ nāmanque pōnente tote quēwēngæīmpa, ante æīnente wæmīni inte ænāmāi īmīnīpa tōō.

⁴ Waocā nānōogæ ingante wīdō cæcā bai mīnitō adobai Wængonguī ingante wīdō cæmīni īmīnīpa. Mīnitō ēñēnāmāi īmīnitawo. Inguipoga nāni quincōo ante mōnō pōnēnō beyæ mōnō Wængonguī ingante pīnte īmōmpa. Incæte, Inguipoga nāni quincōo ante nē pōnencæboīmpa, ante æcānō angā Wængonguī ingante pīnte bacæcāīmpa. ⁵ Wængonguī angā ēñēnīnque nāni yewæmongāīnō īlmai ante ōnonquedō ante intawogaa. “Wængonguī cæcā beyænque mōnō tōmēngā Ōnōwoca ingante ēwocate quēwēmō īmōmpa. Īnīnque mānīwoca mōnō īmōnte waadete pōnēnīnque, Botō īmote waadete pōnēngūēnēmīni īmīnīpa, ante wææte edæ godō pīnte acā ingampa.” ⁶ Incæte tōmēngā mōnō īmōnte godōmenque waadete pōnō cædīnque mōnō tōnō godongāmæ cædongā ingampa. Mānōmai beyæ Wængonguī angā ēñēnte nāni yewæmongāīnō īlmai ante īmpa. “Nāmanque ante, Mōnītō gomonga waa cæmōnī īmōnīpa, ante nē pōnēnāni īnānīte Wængonguī Baa angampa. Wææte edæ, Mōnītō ōnōmōnīque bai īmōnīpa, ante nē nānīni īnānīte tōmēngā pōnō waadete cæcampa.”

⁷ Mānōmai beyæ mīnitō Wængonguī ingante ēñēnte cæedāni. Wēnæ ingante Baa ante quēwēedāni. Baa āmīni īnīnque tōmēngā nānēnē wodīi wīnōmaīngampa. ⁸ Wængonguī gāmænō pōedāni. Pōmīni ate tōmēngā wææte mīnitō weca poncæcāīmpa. Mīnitō wēnæ wēnæ cæmīni īnōmīni inte ōnōmpo mempote bai waēmō pōnī quēwēedāni. Ayæ,

Wængonguī ingante waadete pōnēmpo, ante āmīni incæ adobai inguipoga nāni quincōo pōnēmīni inte mīnitō mēnonga ante pōnente quēwēnōmīni īmīnīpa. Īnīnque edæ mīmō nā mēnongate bai cædīnque tōīngā pōnente entawēmīni baedāni. ⁹ Mīni nāmā wēnæ wēnæ cædīnō ante pōnēnīnque mīnitō, Ancaa wæwente awædō, ante wæedāni. Mīnitō Ca ca tote quēwēnō nīmpo cædīnque Ca ca wædīnque edæ wæwente quēwēedāni. ¹⁰ Mīnitō incæ, Wēnæ wēnæ cæmōnīpa, ante ōnōmōnīque īmōnīpa, ante Wængonguī ingante āñōmīni tōmēngā wææte, Wadāni mīnitō īmīnīte waa cæedānīmpa, ante mīnitō īmīnīte ængō cæte bai cæquīngānō angūēnē.

Mōnō tōnīñacā ingante apænte ānāmāi incēmōimpa

¹¹ Botō tōnīñāmīni ēñēedāni. Mīnitō wacā ingā wacā ingā wēnæ wēnæ ante apænedāmāi īedāni. Ēcānō tōmēngā tōnīñacā ingantedō ante wēnæ wēnæ āna ayæ tōmēngā ingante, Wēnæ wēnæ cæbīpa, ante æcānō apænte āna īna mānīngā Wængonguī nānō wææ angāīnō incæ wēnæ wēnæ ante apænecampa. Ayæ Wængonguī nānō wææ angāīnō ante wēnæ wēnæ īmpa, ante apænte angampa. Wīi tōmēngā nānō ēñēnte cæquīnque Wængonguī nānō wææ angāīnō ante apænte angampa. Wææte edæ, Mānīnō ante nē apænte āmo īmōpa, ante bai cæcampa. ¹² Wængonguī tōmēnganque nānō wææ angāīnō ante nē angāīngā ingampa. Mānōmai beyæ tōmēngā adocanque nē apænte angūīngā īnongāīmpa. Adocā pōnō cæcā beyænque, Botō æmo beyænque quēwēngūīnāni, ante cædongā ingampa. Adobai tōmēngā apænte angā beyænque, Wadāni wo ēwente bacæedānīmpa, ante cædongā ingampa. Bitō guīquēnē nē angāīmi īmpa diyæ wacā ingante apænte angūēnēmi īmīi.

Baānæ ate cæbānō baquīi, ante Wængongūnīnque ēñēngā

¹³ Mīnitō nōwo botō īmote ēñēedāni. Mīnitō nē īlmai ante tedēmīni īmīnīpa. “Nōwoōnæ incæ baānæ ate incæ mōnītō īi wadāni quēwēñōmō goquīmōnī īmōnīpa, ante mānīñōmō godīnque adoque wadepo īīnōnte mōnītō godōnte ængūīnta æncæte ante cæquīmōnī īmōnīpa,” ante āmīni īmīnīpa. ¹⁴ Īñæmpa, Baānæ ate cæbānō bacæīmpa, ante tōmāā ēñēnāmāi īmīnīpa. Cōwē quēwēngūīmōmpa diyæ ēñēngūīmōō. Awæñæcæque owo bogūīmā nænque tamōnīnque quīngæ dæ ba bai mōnō quēwēnō adobai do dæ bacæīmpa. ¹⁵ Mīnitō guīquēnē īlmai ante angūēnēmīni īmīnīpa. “Wængonguī Ao angā īnīnque mōnītō quēwēngūīmōnī īmōnīpa. Ayæ Ao angā īnīnque mōnītō īi waa cæquī cæcæmōnīmpa.”

16 *Iñæmpa* mīnitō, Tōmēmōnique ānīnque cæcæmōnīmpa, ante pōnēninque tedete quēwēnōmīni īmīnīpa. Mānīnō ante tōmānō wēnæ wēnæ impa. 17 *Waocā*, *Ēbānō* waa impa, ante ēñengā incæte cædāmaī ingā inte māningā wēnæ wēnæ cæcā ingampa.

5

Māincōo nē ēadāni nāni pōnenguēñēnō

1 Mīnitō māincōo nē ēamīni īñōmō ñōwo ēñēedāni. Mīnitō nanguī Ca ca wæedāni. Edæ, Mōnō caate wæquinque nanguī ingæimpā, ante tedecōnīnque Ca ca wæcæmīnīmpa. 2 Mīnitō māincōo ēadīncōo do wote batīmpa. Ayæ mīnitō waēmōncōo tōmancōo cayæ ade cænīmpa. 3 Mīnitō oodo tōnō padata tæīnta to tamōnīnque baī batīmpa. Mānīī to tamōnī beyæ mīni wēnæ wēnæ cædīnō edonque pōnī odōmonte ingæimpā. Ayæ quīncōomē gonga bæcodōñōmō concædīnque æmæwo gonte ba baī mīnitō īī to tamōnī beyæ mīni baō incæ adobaī æmæwo gonte ba baī bacæimpā. *Iñæmpa* īīmæca wodo īīnque bayedē incæ tōmēmīni māincōo ēadīncōo do wote baquincoo gæte da wente cæmīnīpææ.

4 *Aedāni*. Wadāni edæ tōmēmīni quēwēncodēncōo cædīnāni īñōnānīte mīnitō, Paga, ante mīni godonguēnenta pæ gom-podīnque godōnāmaī īmīnitapa. Īnīnque ænāmaī īnāni mīnitō īmīnītedō ante pīnte wædīnque, Nē ēadāni īñōmō, Mōnītō cædīnō beyæ ante dicæ pōnōnāni æntamōnīyaa, ante wædōnānīmpa. Mōnō Awēnē nē adocānque Tōmāā Cægaingā īñōmō nē cædīnāni nāni wædīnō do ēñēningā ingampa.

5 *Īīmæca* quēwēñedē mīnitō quīncōo waēmōncōo tōmancōo mante quēwēmīni inte mīnitō cōwē, Nāmā mōni watapæ tote quēwēngæimpā, ante quēwēmīnīni īmīnīpa. *Waocā* nānō wængōngā wænguōnæ īñōnte cæningā nānō wængūnque oguīmo pōnī ba baī mīnitō cæningā baī adobaī oguīmo pōnī bamīni īmīnitapa tōō. Mānīōnæ edæ do batīmpa. 6 Wadāni nō cæte quēwēnāni mīnitō īmīnīte Baa ānāmaī īñōnānīte mīnitō īñōmō, Mīni pante wæquinque wēnæ wēnæ cædānīpa, ante wapīticæ apænte āmīni inte tōmēnāni īnānīte wæñōmīni wæñānītapā.

Mōnō ee cæpāmo ayæ Wængonguī ingante mōnō apæñedō

7 Mānōmaī beyæ botō tōnīñamīni ēñēedāni. Mīnitō mōnō Awēnē nānō ponguinganca ante wæntædāmaī inte ee cæte wānō cōñōedāni. Aedāni, Nē quīyacā tōmēmō wæænte ate onguīpo cōñe ba ate, Tā bocate pæquī, ante cōōnæ tedænque ee ongongampa. Cōōnæ tedæ īīnque baganca amīña bayedē waēmō pōnī nānō tōmēmōncōo tā pete gæcæte ante wīī ee ongongantawo. 8 Mōnō Awēnē nānō

ponguōnæ oo pōnī impa, ante mīnitō adobaī ee cæte wānō cōñōedāni.

9 Botō tōnīñamīni ēñēedāni. Mīnitō wacā ingā wacā ingā wæætedō wææte, Wīwa cæcampa, ante godō ānāmaī iedāni. Mīnitō mānōmaī cæmīni īnīnque Wængonguī wææte mīnitō īmīnīte apænte ante pāmaingampa. Edæ mōnō Apænte Anguīngā oo poncæcāmpa cæmīnīi. 10 Botō tōnīñamīni ēñēedāni. Wēēñēñedē Wængonguī beyæ nē apænegaināni īñōmō tōmēngā ēmōwo apænedīnque wæwēnāni incæte wæntædāmaī inte ee cæte quēwēngadānīmpa, ante pōnēninque mīnitō tōmēnāni nāni cægai baī adobaī cædāni. 11 Wadāni wæwēnāni incæte wæntæyē īnāmaī inte ee cædāni īnīnque nāni toquinque impa, ante mōnō pōnēnō ante do ēñēmīnīpa. Docā Cōba wodi īñōmō tōmēngā nanguī pōnī wæwēngā incæte wæntædāmaī inte pīnāmaī ingacāimpā. Mānīnō ante do ēñēmīnīni inte ayæ tōmēngā nānō wæwēñedē īīnque ba ate Wængonguī æbānō tōmēngā ingante nanguī godongā ængaingā ingacāimpā, ante adobaī ēñēmīnitawo. Edæ waodāni wæwēnāni īñōnānīte mōnō Awēnē Wængonguī ædāmō waadete waa cædōngā ingampa.

12 Botō tōnīñamīni ēñēedāni. Wadō mīni pōnēnō ante pōnōmenque pōnēninque mīnitō īīmaī ante godōmenque pōñēedāni. Mīnitō ānō nāwangā impa, ante wadāni pōnencædānīmpa, ante cædīnque, Botō ānō nōīngā baquīnō anguēñē, ante ānāmaī iedāni. Edæ, Ōōnæ beyænque īmæca beyænque quīēmē beyænque mōnō apæñemōnō nāwangā baquīnō anguēñē, ante tōmānō ante edæ apæñedāmaī iedāni. Mīnitō wææte Ao āñēmīni inte “Ao” ante mānīnque æedāni. Ayæ mīnitō Baa āñēmīni inte “Baa” ante mānīnque æedāni. Edæ wīī mānōmaī cæmīni īnīnque Wængonguī wææte mīnitō īmīnīte apænte ante pāmaingampa.

13 Mīnitō wæwēmīni īnīnque Wængonguī ingante apæñequēñēmīni īmīnīpa. Mīnitō watapæ tomīni īnīnque Wængonguī ingante, Bitō tæiyæ waēmō īmidō anguēñē, ante āmotamīni ancæmīnīmpa. 14 *Æcānō* mīnitō weca wēnæ wēnæ īna īñōmō tōmēngā Codito ingante mīni godongāmæ pōñencabo īñōmīnīte nē aadāni nāni Picæncabo mīni ānāni īnānīte, Pōedāni, ante aa pequēñengā ingampa. Aa pecā pōnāni ate tōmēnāni Awēñē Itota ēmōwo ante apænedīnque wædænque oguī wapæ ænīnque nē wēnæ wēnæ īnōngā ingante oo paacædānīmpa. Ayæ adoyedē wēnæ wēnæ īnōngā ingante nāni oo paayedē tōmēngā beyæ ante Wængonguī ingante apæñecædānīmpa. 15 Ayæ, Wængonguī ingante apæñeyōmonte tōmēngā ēñengampa, ante wede pōnēninque apæñemō beyænque waocā nē wēnæ

wēnæ īningā incæ edæ gancaæ bacæcäimpa. Wængongui tõmengä ingante pönö cæcä ate waa ba ñāni òmæmoncæcäimpa. Ayæ adocä nānō wēnæ wēnæ cædinō beyæ wēnæ wēnæ ingä īnīnque Wængongui tõmengä nānō wēnæ wēnæ cædinō adīnque ñimpo cæcä quēwēmaingampa. ¹⁶ Mānōmai beyæ mīnitō wacä ingante wacä ingante apænedīnque, Botō wīwa cædimō inte wæbopa, ante æedāni. Mānōmai cædinque mīnitō, Gancaæ bacæmōnimpa, ante wacä beyæ ante wacä beyæ ante Wængongui ingante apæneedāni. Waocä nē nō cæte quēwēnongä īñōmō Wængongui ingante apænedīnque edæ tæi piñænte apænecä ingampa. Māningä nānō apænedō beyænque Wængongui cæcæcäimpa. ¹⁷ Ediya wodi mōnō waomō imō bai tõmengä adobai ingacäimpa. Incæte tõmengä Wængongui ingante, Cōönæ āmi cædāmai ingæimpa, ante ædæmō apænecä ate mēa go adoque tæcæ wadepo ganca edæ cōönæ cædāmai ingatimpa. ¹⁸ Ayæ ate tõmengä, Cōönæ āmi cæcæimpa, ante Wængongui ingante wæætē apænegacäimpa. Apænecä ate oönæde īnō wææ cōönæ cægatimpa. Cōönæ wææ cæ ate onguipoga tõmēmō do tā bocate pægatimpa.

¹⁹ Botō tōniñamīni ēñēedāni. Mīnitō weca æcāmenque nō taadō oda cæte gocä adīnque wacä tõmengä ingante ocæ ēmænte māmōngä ponguēnengä ingampa. ²⁰ Īimai pōnēedāni. Nē wēnæ wēnæ cæcä wapiticæ taadō gocä adīnque æcāmenque tõmengä ingante nō taadō īnō ocæ ēmænte nē māmōngä ingäa tõmengä māmōngä beyænque nē wapiticæ gocä īñōmō æmæwo nānō wænguēnēnō ñimpo cæte edæ quēwēncæcäimpa. Ayæ nangui pōni nānō wēnæ wēnæ cædinō incæ wadæ cæte ingæimpa, āmopa. Mānīnque ante yewæmōmopa.

1 Pegodo cadota ante nānō tānōta yewæmongainta

Waa quēwencæminimpa, ante

¹ Botō Pegodobo Itota Codito nānō nē da godongaimo inōmo inte nē yewæmōmo impa. Minitō iñōmō tōmēmīni ōmæ quēwēnāmaī imīni inte nāwæ godinque wadāni nēmæ ponte quēwēmīni inte pancamīniya Pontobæ quēwēñōmīni wamīni guiquēnē Gadatiabæ quēwēmīnīpa. Wamīni Capadotiabæ quēwēñōmīni wamīni guiquēnē Atiabæ quēwēmīnīpa. Wamīni guiquēnē Bitīniabæ quēwēmīnīpa. Mānōmaī wayōmō wayōmō quēwēmīni iñōmīnite botō, Acæminimpa, ante yewæmōmopa. ² Mæmpo Wængongui iñōmō mīnitō imīnite wēēnēdēdē pōni do adinque, Mīnitō Itota Codito ingante nē ēñente cæmīni bacæminimpa, ante apænte ængacāimpa. Ayæ, Botō ayōmo mīnitō tæiyæ waēmō ēwocamīni bacæminimpa, ante cædinque Wængongui Ōnōwoca incæ Itota wepæ inte pōnō ñā mēnongacāimpa. Mānōmaī cæcā bagaimīni iñōmīnite botō ñōwo iñōmō edæ, Wængongui nangui waadete pōnō cæcā ate mīnitō nē gānē pōnēmīni bacæminimpa, ante yewæmōmopa.

Watapæ bacæimpa, ante pōnēninque quēwēmōmpa, ante

³ Itota Codito Wæmpocā iñongante Itota incæ, Botō Wængongui mīni inōmi impa, ante Wængongui ingante waa apænecampa. Adocā iñōmō mōnō Awēnē Itota Codito wænte ōñōñongante, Nāni ōmæmōe, angā ñāni ōmæmongacāimpa. Tōmēngā ñāni ōmæmōngā beyænique Wængongui mōnō imonte adobaī pōnō cæcā ate mōnō mēmpoga ēñate baī inōmō inte edæ, Mōnō mīimō quēwēninque watapæ quēwēngæimpa, ante pōnente quēwēmōmpa. Ininque mōnō iñōmō Wængongui ingante apænedinque, Bitō tæī ēmōnōmi inte waa pōni cæbi æmōnīpa, ante edæ watapæ apænecāimpa.

⁴ Ayæ Wængongui, Īncayæ ate mīni ænguincoo, ante ōōnædē do edæ cō cæte mangampa. Mānincoo iñōmō ñōmāadāmaī incoo ininque cōwē wentamō badāmaī incoo inte edæ wodāmaī inguincoo ingæimpa.

⁵ Īnguipo pedænguipo ĩnque bayedē edæ Wængongui pōnō ængā beyænque mōnō cōwē quēwēnguīnō ante edonque pōni acæimpa. Ininque mīnitō wede pōnēmīni beyænque mīnitō quēwēnguīmāmo ĩnque baquinganca Wængongui nē tæī piñænongā inte edæ mīnitō imīnite wææ gompocampa.

⁶ Mīnitō ñōwo wantæ iñō incæ quiēmē beyænque wēnæ wēnæ bate wæmīni incæte

Wængongui pōnō wææ gompocā beyænque edæ watapæ tomīni imīnīpa. ⁷ Oodo waēmō bamongæimpa, ante waodāni gongapamō godō aca podōñāni ate oodoque badinque waēmōnca pōni ongoncāpa. Incæte oodo iñōmō ĩncayæ ate ōmæxe ēwente ate edæ dæ bacæimpa. Oodo mīni æñēnonca waēmōnca ĩ iñōnte mīni wede pōnēnō iñōmō edæ godōmenque waēmō pōni impa. Ininque mīni wede pōnēnō iñōmō wīi wido cæqui impa. Cōwē edæ ongongæimpa. Wæætē, Mīni wentamō entawēñinō edæ dæ go ate mīni wede pōnēnonque edæ waēmō pōni entawencæminimpa, ante cædinque Wængongui pōnō angā ate mīnitō gonga gonte caate baī wæmīnīpa. Mānōmaī mīni caate wædō beyænque edæ godōmenque wede pōnēmīni bamīnīpa. Ininque Itota Codito mōnō weca ponte a ongōñongante mīnitō cōwē wede pōnēmīni inte tōmēngā ōnōwa gāānē ædæ wæænte apænedinque, Nē tæī ēmōnōmi inte bitō waa pōni cæbi æmōnīpa, ante watapæ apænecæminimpa, ante Wængongui cæcampa.

⁸ Itota Codito ingante mīnitō awinca adāmaī ĩmīmīni incæte tōmēngā ingante cōwē waadete pōnēmīnīpa. Edæ ñōwo ganca adāmaī ĩmīmīni inte mīnitō tōmēngā ingante wede pōnēninque mīni ñāō baī entawēnginque watapæ todinque æbāmē ante tomīni imīnīpa. ⁹ Ōnōwoca mīni ēwocate quēwēnguīnō ante æncæte ante wede pōnēmīni inte mīnitō ñōwo iñōmō edæ do æmīni imīnīpa.

¹⁰ Wængongui beyæ nē apænegaināni iñōmō, Īncayæ ate quēwēnguīnāni ĩnānite Wængongui pōnō cæcā beyænque quēwencædānīpa, ante ñōwomīni imīnitedō ante apænegadānīpa. Mānōmaīnō ante apænedāni incæte tōmēñāni, Ēdānidō ĩnānite ante Wængongui apænecāā, ante ēñēnāmaī inte ēñencæte ante nangui cægadānīpa. ¹¹ Codito Ōnōwoca tōmēñāni ōnōwoca quēwēninque pōnō apænedinque, Īncayæ ate Codito nangui caate wæcæcāimpa, angacāimpa. Ayæ, Caate wædingā inte tōmēngā wæætē ñāō baī entawēngā inte tæī ēmōngā edæ bacæcāimpa, ante pōnō apænecā ēñēninque tōmēñāni wæætē adodō ante apænegadānīpa. Incæte tōmēñāni, Ēyedēnō Codito mānōmaī cæquingāā, ante ēñencæte ante wægadānīpa. Ēbānō ba ate mānōmaī cæquingāā, ante ēñencæte ante edæ nangui cægadānīpa.

¹² Ñōwo iñōmō Wængongui ōōnædē quēwēninque tōmēngā Tæiyæ Waēmō Ōnōwoca ingante mōnitonga da pōnongā pōninque apænecā ēñēninque mōnitō wæætē Codito ingantedō ante mīnitō imīnite watapæ apænemōni ēñēmīnitapa.

Mānīne adode ante Wængongui beyæ nê apæneganāni iñōmō, Codito waa cæcæcāimpa, ante apæneganānīmpa. Incæte Wængongui tōmēnāni inānite apænedinque, Wīi tōmēmīni beyæ ante apænemīnīpa, angacāimpa. Incayæ ate quēwēnāni beyæ ante apænemīnīpa, ante tōmēnāni inānite angacāimpa. Mānīnō ante Wængongui beyæ ante æbānō apænedānīi, ante ēñēnāmai iñāni inte Wængongui anquedoidi incæ, Waodāni beyæ Wængongui æbāmē waa pōni cæcāā, ante ēñēinente wædānīpa.

Wængongui, Tæiyæ waēmō ewocadēni, angampa

¹³ Mānōmai beyæ mīnitō, Mōnō nanguī cæcæcāimpa, ante edæ tāno pōnente ate cæedāni. Nāmā wææ gompotawente bai ēñente cæedāni. Itota Codito ponte a ongōnīnque mōnō imonte waadete pōnō cæcā ate watapæ bacæcāimpa, ante edæ mānīnonque ante cōwē pōnente cæedāni. ¹⁴ Wēñænāni wæmpoidi inānite nāni ēñente cæbai edæ mīnitō adobai ēñente cæedāni. Mīnitō ēñēnāmai iñedē mīni cæinēwēnō ante do cægaminīmpa. Nōwo iñōmō nē ēñēmīni badīnque mīni ēñēnāmai iñedē mīni cæinēwēnō ante edæ cædāmai iedāni. ¹⁵ Mīnitō imīnite nē apænte aa pegaingā iñōmō edæ tæiyæ waēmō ewocadongā ingampa cæmīnīi. Quiēmē cædinque edæ tōmēngā bai adobai tæiyæ waēmō ewocadinque edæ tōmāā cæedāni. ¹⁶ Wængongui incæ, “Botō tæiyæ waēmō ewocabo imopa cæmīnīi. Botō ewocabo bai mīnitō adobai edæ tæiyæ waēmō ewocacæmīnīmpa,” angampa, ante yewæmongatīmpa.

¹⁷ Tōmāmō imonte adoyōmō pōni cædinque mōnō Mæmpo iñōmō mōnō cædinō ante cōwā adīnque nōingā pōni ante apænte angampa. Inīnque, Botō Wæmpo, ante nē apænemīni inōmīni inte mīnitō iñōmō edæ nē nōingā ante apænte angā ingante edæ guīñente wædinque quēwēedāni. Inguipoga quēwēnīnque mīnitō, Wabæca bai ongonte awædō, ānīnque, Wængongui weca edæ mōnō omæ ingæcāimpa, ante pōnente quēwēedāni. ¹⁸ Edæ, Dodāni nāni quēwēngai bai adobai quēwēngæcāimpa, ante ānāni ēñēnīnque mīnitō Ao ante ōnonque pōni cæte quēwēngamīnīmpa. Mānōmai quēwēñōmīnite Codito wæætē, Mīnitō abæ tawænte bai quēwēncæmīnīmpa, ante cædinque edæ, Quīnō godongantawo, ante mīnitō do ēñēmīnīpa. Inæmpa oodo incæ padata incæ mōnō, Woquincoo, ancoo iñonte tōmēngā dicæ mānīncooque godongantawogaa.

¹⁹ Wæætē quipi wē, Codotodo, nāni ānongā iñōmō quenta mongæñāmai wentamō ēñādāmai imāi Codito adobai inongā inte edæ tōmēngā nāmā wepæ tæiyæ

waēmō wepæ godonte ængā beyænque quēwēmīnīpa. ²⁰ Inguipoga badoncæte ante cædinque Wængongui ayæ gō cædāmai ingāñedē wēēñēfedē pōni incæ Codito ingante edæ, Mānōmai cæcæcāimpa, ante do apænte ængacāimpa. Codito mīnitō beyæ ante edæ ñōwo pōni incæ inguipoga pōnīnque ongongantapa. ²¹ Inguipoga pōnīnque tōmēngā do wænte ōñōñongante Wængongui, Nāni ōmæmōe, angā ñāni ōmæmongacāimpa. Ayæ tōmēngā ingante godōmenque godō ææntodongā ate tōmēngā ñāo entawēnongā inte tōmēngā nānō tæi emonguinque edæ æite gogacāimpa. Wængongui mānōmai nē cægāingā iñongante Codito mīnitō imīnite pōnō cæcā beyænque mīnitō wæætē Wængongui ingante pōnēmīnitapa. Mānōmai beyæ mīnitō, Wængongui pōnō cæcā beyænque watapæ bacæcāimpa, ante pōnēnīnque tōmēngā ingante wede pōnēmīni bamīnitapa.

²² Wængongui nō nānō ānō ante ēñente cædinque mīnitō mīmō ñā mēnongate bai badīnque mīnitō tōñīñādāni inānite nē waadete pōnēmīni bagamīnīmpa. Nōwo iñōmō mīmōno nō pōnēnīnque mīnitō godongāmæ ædæmō waadete pōnēnīnque wacā ingā wacā ingā godō waa cæedāni. ²³ Edæ waomō mōnō yate pōniwoca wæwocaqui iñonte wīi mānīnō beyænque mempoga ēñagamīnīpa. Wæætē Wængongui nānō ānōnō mīi quēwēguīnō iñōmō edæ wodāmai inte cōwē ongongæcāimpa. Mānīnō Wængongui nānō ānōnō beyænque mīnitō mempoga ēñagamīnīpa. ²⁴ Edæ,

“Waomō gaguimænque bai iñōmōte gaguimæ do to aminca bai mōnō adobai aquīi pōni inōmō inte wæwocamōmpa.

Waēmō pōni mōnō emōnō iñōmō edæ ongai waēmō ængado bai iñonte

ongai edæ do guīñē wæno bai mōnō emōnō adobai bacæcāimpa.

²⁵ Incæte Wængongui nānō ānō iñōmō edæ cōwē wodāmai ongongæcāimpa.”

Ante edæ āmotamīni ante bai Wængongui beyæ nāni yewæmongainō bai impa. Mānīnō Wængongui nānō ānōnō ante mīnitō imīnite do watapæ apænemōni ēñēmīnitapa.

2

¹ Mānīnō beyæ mīnitō piinte mīni pōnēwēnō edæ ñīmpo cæedāni. Wacā adāmai iñongante babæ mīni cædō ante edæ cædāmai ñīmpo cæedāni. Mīnitō wadō apænete wadō mīni cædō ante ñīmpo cæedāni. Mānōmai cæte mīni quēwēnīnō ante edæ æmæwo ñīmpo cæedāni. Wacā gomonga ængā ingante godō piinte adāmai iedāni. Wacā ingantedō ante babæ ante mīni piinte ānewēnō ante edæ ñīmpo

cædæni. ² Wēñænāni tæcæ ēñadināni inte goōmæ gālnente wædāni bai mīnitō adobai Wængongui nānō apænedonque ante ēñencæte ante wædæni. Edæ tōmengā ængā beyænque mīnitō nē quēwēmīni inte mīnitō ōñōwoca ædæmōni picæmīni mīni pæquinque edæ tōmengā nānō apænedō ante edæ goōmæ waēmōmæ beinente bai ēñencæte ante wædæni. ³ Waēmepæ impa, ante adinque wēñægā goōmæ wæætē wæætē becā bai mīnitō adobai, Mōnō Awēnē waingā pōni ingampa, ante do adīmīni inte tōmengā weca wæætē wæætē ponte bete bai edæ ēñēdæni.

Nē quēwengā inongā inte Codito wainca bai ingampa, ante

⁴ Oncō dicaca mænoncæte ante cædinque waodāni, Wiwa inca awædō, ante pancacaa wido cædāni bai waodāni pancadāniya mōnō Awēnē ingante adobai wido cædāniya. Wængongui guiquēnē mōnō Awēnē nē quēwengā ingante waa adinque, Botō owocō mænonguinca wainca pōni bai tōmengā ingampa, ante tōmengā ingante apænte æninque ee mangampa. Ininque mīnitō iñōmō tōmengā weca pōñōmīnite tōmengā, ⁵ Mīnitō mīlīmīni quēwēñōmīni Wængongui mīnitō imīnite ænte cabo tingæte adoconque mænonnte bai cædinque edæ, Botō Ōñōwoca owoquincō, ante badongā quēwēmīnīpa. Quēwēñōmīnite godōmenque tæiyæ waēmō badongā badīmīni inte edæ mīnitō iñōmō edæ Wængongui Ōñōwoca tōnō āawocaque bai ēwocadinque, Wængongui quī, ante nē godōmīni bamīnīpa. Ininque mīnitō Itota Codito emōwo ante apænedinque, Wængongui quī, ante godōmīni ate tōmengā edæ waa ængampa. ⁶ Edæ Wængongui apænecā ēñēninque iīmai ante do yewæmongadānīpa.

“Tiñoquidi dægūimonga mænoncæte ante cædinque dica tånoca gō cæte bai cædinque,

Botō nē waa adongā ingante ænte pōnō Tānocā pōni gōnōmo gongæncæcāimpa.

Tōmengā ingante nē wede pōngēngā ingante wadāni ædō cæte bæ taquīnāni guingo imonte wæquingāā,” an-gacāimpa.

⁷ Mīni pōnencabo iñōmō, Tānocā nē ongongā iñōmō waingā pōni ingampa, ante adinque tōmengā ingante æninque ee māmīnīpa. Wīi pōñēnāni guiquēnē tōmengā ingante Baa ānānīpa.

“Nē mænonāni nāni wido cædinca incæ ñænænca pōni gōnōninca bate tånoca inte tæi gongæncapa,”

ante Wængongui beyæ nāni yewæmongainō bai cædānīpa. ⁸ Ayæ adobai,

“Dicaa nē tao tencawa tæ go wæængā bai ināni inte

tōmēnāni nē Tānocā ingante pīinte adinque tæ go wæænte bai oda cædānīpa.”

Ante yewæmongatimpa. Tōmengā nānō angainō ante ēñēnāmai nāni cædō beyæ oda cædinque tæ edæ go wæænānīpa. Tōmēnāni edæ mānīnonque cædinque nē tæ go wæænguēñēnāni cōwē ingadānīpa.

⁹ Wængongui nānō nē apænte ængaimīni guiquēnē wēmō iñōmō quēwēñōmīnite tōmengā aa pedinque, Botō weca botō waēmō pōni ñāō emōñōmō pōdāni, ante cægacāimpa. Mānōmainō cægaingā iñongante mīnitō, Bitō Wængongui Waēmō pōni emōñōmīni inte waa pōni cæbi edæ æmōnīpa, ante anguēñēmīni imīnīpa. Mānōmainō ante watapæ ancemīnīpa, ante cædinque tōmengā mīnitō imīnite do apænte ængacāimpa. Ininque mīnitō Awēnē wēmīni inōmīni inte, Wængongui quī, ante mīnicabo nē godōmīni bai bamīnīpa. Wængongui, Botō quīmīni imīnīpa, āninque tæiyæ waēmō badongā bagaimīni inte mīnitō Wængongui nempo nē quēwēmīni imīnīpa. ¹⁰ Mīnitō wēēñēdē adocabomīni ināmai ingaminīpa. Nōwo guiquēnē Wængongui tōnō godongāmæ quēwēmīni inte edæ adocabomīni imīnīpa. Wēēñēdē guiquēnē tōmengā mīnitō imīnite pōnō waadete cædāmai ingacāimpa. Nōwo guiquēnē tōmengā pōnō waadete waa cæcā ate quēwēmīnīpa.

Wængongui ingante nē cæmō imōmpa, ante quēwēdæni

¹¹ Botō nē waademīni edæ ēñēdæni. Mīnitō inguipoga quēwēmīni incæte inguipo wīi tōmēmīni ōmæ bai impa. Wæætē wabæca quēwente bai quēwēmīni inte mīnitō ōñōwoca wentamō mongænāmai ingæimpa, ante edæ wææ cædinque mīnitō baonque ante mīni cæinēwēnō ante ñimpo cædinque edæ cædāmai iedāni āmopa. ¹² Nē ēñēnāmai ināni weca quēwēninge mīnitō wæætē waa cæte quēwēdæni. Tōmēnāni guiquēnē mīnitō imīnite pīininque, Wēnæ wēnæ cæmīnīpa, ante babæ ānānitawo. Incæte mīnitō waa cæmīni ininque tōmēnāni, Waa cæcampa, ante do abaīnānīpa. Ininque Wængongui Awēnē nānō apænte āñedē tōmēnāni do agāināni inte Wængongui ingante, Bitō ñāō bai emōmīni inte cæbi ate bitō wēnāni waa cædāni amōnīpa, āmānānīpa. Ininque tōmēnāni waa adinque waa apænecædānīpa, ante cædinque mīnitō ñōwo incæ waa cæte quēwēdæni.

¹³ Waodāni inānite wadāni edæ, Awēñēdi inānīpa, ante godō gōnōnāni ongōnānīpa. Æcāmē ingante ānāni bayōnānite mīnitō wæætē Wængongui Awēñē beyænque ante cædinque tōmēnāni inānite edæ ēñente

Ao ante cæedāni. Adocanque ingante, Awēnē Odeye, āninque godō gōnōnāni ate mīnitō iñōmō, Tōmengā tæiyæ awēnē inte nē angā inongā ingampa, ante adinque tōmengā ingante ēñente cæedāni. ¹⁴ Ayæ pancabaa awēnēidi gobedōnadodoidi mīni ānōnāni inānite godō gōnōninque awēnē odeye wæætē iīmaī angampa. Mīnitō wēnæ wēnæ cædāni inānite edæ godō pædāni. Ayæ waa cædāni adinque mīnitō, Waa cæmīni iīnīpa, āninque edæ godō waa cæedāni, ante gobedōnadodoidi inānite godō gōnongā ongōnānīpa cæmīni. Mīnitō tōmēnāni inānite adobaī ēñente cæedāni. ¹⁵ Ēñēnāmaī ināni wīwa tedeyōnānite mīnitō waa cæmīni ate wædinque tōmēnāni ædō cæte godōmenque wīwa tedequīnāni. Īnīnque, Tōmēnāni pæ wēenedinque tededāmaī incædānīpa, ante cædinque mīnitō iñōmō edæ waa cæte quēwēdāni, ante edæ Wængonguī angampa cæmīni.

¹⁶ Tōmengā ñīmpo cæcā quēwēmīni inte mīnitō, Wacā wææ ānāmaī iñongante botō æbānō cæte waa quēwenguīmoo, ante adinque nāmā wææ ante cæedāni. Incæte mīnitō wacā wææ ānāmaī ingā beyænque awēmō wēnæ wēnæ cæmīnitawo. Edæ cædāmaī iedāni. Wæætē Wængonguī ñīmpo cæcā quēwēmīni inte mīnitō tōmengā ingante nē cæmīni inte edæ ēñente cæte quēwēdāni. ¹⁷ Tōmānāni inānite mīnitō, Waodāni inānīpa, ante edæ waa aedāni. Mīni pōnencabo iñōmīnite edæ godongāmæ waadete pōnēdāni. Wængonguī ingante, Wængonguī ingampa, ante guīñente wæedāni. Awēnē odeye ingante, Tæiyæ awēnē ingampa, ante edæ waa aedāni.

Codito cæbānō caate wægacū, ante pōnēdāni, ante

¹⁸ Pancamīniya iīnīnite wadāni ō ænāni wædīmīni inte mīnitō tōmēnāni beyænque cæmīni bamīnīpa. Īnīnque nē ō ænāni iñōmō pōnō waa cædāni incæ pōnō piinte cædāni incæ mīnitō wæætē, Botō awēnē ingampa, ante piyænē cædinque tōmēnāni nāni anganque edæ ēñente cæedāni. ¹⁹ Edæ waocā wēnæ wēnæ cædāmaī inongā inte quīēmē beyænque wæwente caate wæcā incæte tōmengā, Wængonguī acampa, ante pōnēninque nangæ batawēnāmaī ingā iñīnque edæ waa iīmaīpa.

²⁰ Wæætē mīnitō wēnæ wēnæ cæmīni beyæ pānāni ate mīnitō piyænē cæmīni iñīnque Wængonguī mānīnō beyænque dicæ waa aqūngāa. Waa adāmaī iīmaingampa. Wæætē waa cæmīni beyænque pānāni caate wædinque mīnitō piyænē cæte e cæmīni adinque Wængonguī edæ, Waa cæbīpa, āmaingampa. ²¹ Botō caate wædōnō adodō taadō tee empote pōedāni, āninque mīnitō beyæ Codito caate wægacūpa cæmīni.

Botō caate cængōgainō adodonque cægonte wæcæmīnīpa, ante mīnitō iīnīnite do aa pecā pongamīnīpa. ²² Tōmengā iñōmō edæ cōwē wēnæ wēnæ cædāmaī ingacāīpa. Ayæ cōwā ayōnāni tōmengā dicæ babæ ante cæcā agadānīyaa. ²³ Tōmengā ingante piinte badete toyōnāni tōmengā wæætēdō wæætē piīnāmaī ingacāīpa. Caate wædinque tōmengā wæætē piinte ānāmaī ingacāīpa. Wæætē, Nē nō apænte ānongā Wængonguī incæ botō beyæ cæcæcāīpa, ante pōnēninque piyænē edæ cægacāīpa. ²⁴ Mīnitō wēnæ wēnæ mīni cægāincoo ante Baa āninque mongæñāmaī inte nō pōni cæte quēwencæmīnīpa, ante cædinque tōmengā nāmā baonga teēmē mongæñongante tōmengā ingante awāa timpodāni edæ wængacāīpa. Īnīnque tōmengā mongæte nānō wængainō beyæ mōnō wæætē mānīnō wēnæ wēnæ mōnō cægāinō ante wænte baī iñōmō inte nō pōni cæcæte ante quēwēmō inguēnēmō iīmpo. Tōmengā ingante tæi pānāni nānō āmogate wægainō beyænque mīnitō wæætē gancaē bamīnīpa. ²⁵ Edæ obegaidi pāmænte godāni baī ingāīmīni inte mīnitō ñōwo nē aacā weca adodō ocæ ēmænte pōmīni adinque tōmengā iñōmō edæ mīnitō ōnōwoca beyæ ante wææ aacā ēwocāmīnīpa.

3

Mīna gæncaya iīmaī quēwencæmīnīpa, ante

¹ Onquiyæmīni ēñēdāni. Mīnitō nānōogæñāni nāni ānonque ante Ao ante ēñente cæedāni. Mīni nānōogæñāni pancadānīya Wængonguī nānō ānō ante pōnēnāmaī inānitawo. Mānōmaī i Īnīnque mīnitō iñōmō, Wīi mōnitō tededō beyæ pōnāni inte tōmēnāni wæætē ēñente mōni cædinō ante adinque Wængonguī gāmæñō poncædānīpa, ante cædinque piyænē cæte edæ tōmēnāni inānite ēñente cæedāni. ² Mīnitō Wængonguī ingante guīñente wædinque waēmō entawēmīni inte ēñente cæte waa quēwēmīni adinque tōmēnāni wæætē Wængonguī ingante Ao ante pōmaīnānīpa. ³ Mīnitō, Waēmō pōni bacæboīpa, ante cædinque ocaguī waa pōni wao wincate oodo mongænte wamoncoo mongænte weocoo waēmoncoo wēñate mongæmīnitawo. Īñæpma mānōmaī cæmīni beyænque mīnitō dicæ waīmīni bamīnīyaa. ⁴ Wæætē tōmēmīni waa entawēnō beyænque waīmīni pōni baquēnēmīni iīnīpa. Mīnitō ōnōwoca gānē pōnēninque ædæmō cæmīni beyæ mīni waa entawēnō edæ wōdāmaī inte godōmenque waēmō pōni ongongæīpa. Mānīnō mīni waēmō entawēnō baī ante æncæte ante edæ quīēmē impa diyæ godonte ænguī. Incæte Wængonguī mānīnō

ante adinque, Waemō pōni entawēmi abopa, ante nangui tocampa.

⁵ Dodāni pōni mōnō wəngānāidi iñōmō, Wəngongui pōnō cēcā beyənque waa bacæimpa, ante wede pōnēninque tæiyæ waemō entawengadānimpa. Tōmēnāni waemō pōni bacæte ante tōmēnāni ōnōwoca gānē pōnēninque ædæmō waadete cægadānimpa. Tōmēnāni nānōogæidi nāni ānonque ante ēñēninque Ao ante cægadānimpa. ⁶ Dodā ñæñæñā Tada wodi iñōmō Abadāō wodi ingante ēñente cædinque tōmengā ingante, Nē āni imipa, angacāimpa. Mīnitō iñōmō tōmēnā nānā cægāi bai waa cædinque mīni guiñente wæpāmo æbāmē ba incæte guiñente wædāmai imīni ininque nāwangā nō tōmēnā nānōmomīni babaimīnīpa.

⁷ Onguiñæmīni guiquēnē ēñēdāni. Mīnitō gæñāni tōnō quēwēninque tōmēnāni beyæ ante cōwē pōnēninque waa cædāni. Botō gængā onquiyængā inongā inte aqūingā ingā incæte mōna guēa cæcaya imōnāpa, ante ēñente wædinque mīnitō gæñāni inānite edæ cōwē waa aedāni. Ayæ, Mōna gæncaya Wəngongui ingante apæneyōmōna tōmengā do ēñencæcāimpa, ante cædinque iimāi pōnente cædāni. Wəngongui iñōmō, Mīna quēwenguimāmo, ante waadete pōnō cēcā beyənque mōna guēa ængucaya imōnāpa, ante edæ ēñente cædāni.

Mīni waa cædō beyənque caate wæquimīni, ante

⁸ Tōmāmīni guiquēnē ēñēdāni. Mīnitō adoyōmō pōnēninque Ao ante cædāni. Nē Ca ca wæcā tōnō edæ adoyōmō Ca ca pōnente wædāni. Mōnō pōnencabo imōmpa, ante cædinque godongāmæ waadete pōnēdāni. Wacā caate wæcā adinque mīnitō tōmengā tōnō guēa wæte bai pōnēdāni. Nāmā ængō cædāmai imīni inte mīnitō wæætē edæ, Ōnōmonque bai iñōmō imōmpa, ante piyænē cæte quēwēdāni.

⁹ Wēnæ wēnæ cædāni wæmīni incæte, Botō wæætē wēnæ wēnæ cæbo wæcā tocæi, ante cædāmai iedāni. Wiwa ānāni wæmīni inte, Botō wæætē wiwa āmo wæcā tocæi, ante cædāmai iedāni. Wæætē edæ, Tōmēnāni waa quēwencædānimpa, ante cædinque mīnitō tōmēnāni inānite waa apænēdinque godō waa cædāni. Mānōmai cæcæmīnimpa, ante Wəngongui mīnitō imīnite waa cædinque pōnō aa pegacāimpa cæmīnīi. ¹⁰ Edæ iimāi ante Wəngongui beyæ ante yewæmongatimpa,

“Waacā tōmengā nānō quēwenguimāmo ante nangui æinente wædinque,

Tæōnæ waa quēwente tocæi, ante nē angā iñōmō

tōmengā iñōmō wēnæ wēnæ tededāmai inte babæ wapiticæ ānāmai inte tæōnæ quēwente tocæcāimpa.

¹¹ Tæōnæ quēwencæte ante cædinque tōmengā wēnæ wēnæ nānō cæinō ante emō cædinque dadi emæninque waa edæ cæquēngā ingampa.

Ayæ tōmengā piyænē cædinque, Mōnō tōmāmō godongāmæ gānē pōnente quēwengæimpa, ante nangui cæquēngā ingampa.

¹² Mōnō Awēnē awinca emongā inte nē nō cædāni gāmæñō adinque tōmēnāni inānite cōwē aacampa.

Ayæ, Botō imote æbānō ante apænēdāni, ante tōmengā æamonca ongonce cōwē ēñengampa.

Wēnæ wēnæ cædāni inānite guiquēnē tōmengā piīninque awincaque acampa,”

ante yewæmongatimpa cæmīnīi.

¹³ Mīnitō waa cæcæte ante edæ nangui cæinēmīni bamīni adinque æcānō wæætē mīnitō imīnite wēnæ wēnæ cæquingā.

¹⁴ Incæte mīnitō nō pōni mīni cædō beyənque caate wæmīni ininque edæ mīni waa quēwente toquinque imaimpa. Ininque iimāi ante nāni yewæmongainō bai cædāni. Tōmēnāni nāni guiñente wæpāmo beyæ ante mīnitō iñōmō edæ guiñente wædāmai iedāni. Edæ guiñēñate wædāmai iedāni.

¹⁵ Wæætē, Tæiyæ Waemō Awēnē inongā ingampa, ante wede pōnēninque edæ Codito ingante mīmōno entawēdāni. Ayæ, Watapæ bacæimpa, ante mīnitō quīnante pōnēmīnīi, ante ēñencæte ante wadāni āñōnānite mīnitō wæætē a ongōnāmai inte iīnonque ante edæ do apænēmīni incæmīnimpa. Codito mōnitō Awēnē pōnō cēcā beyənque mōnitō, Watapæ bacæimpa, ante wede pōnēmōnīpa, ante mānīnonque ante do apænēmīni edæ ēñencædānimpa. ¹⁶ Iñāni iñōmō ēñencæte ante ānānīpa, ante pōnēninque mīnitō, Botō wentamō entawēnāmai incæboimpa, ante nāmā apænte cædinque guiñente wædinque tōmēnāni inānite ædæmō apænēmīni ēñencædānimpa. Mānōmai cæyōmīni wadāni guiquēnē mīnitō Codito nempo quēwēninque mīni waa cædōnō ante piīninque babæ ante todānitawo. Ininque mīnitō wentamō entawēnāmai inte ædæmō apænēmīni adinque tōmēnāni wæætē, Mōnitō babæ ante tetedamōnīpa, ante ēñēninque guiñēnete wæcædānimpa.

¹⁷ Mīnitō wēnæ wēnæ cæmīni beyæ caate wæmīni ininque ōnonque imaimpa. Wæætē, Wəngongui, Caate wæcæmīnimpa, angā ininque mīnitō waa pōni mīni cædō beyənque caate wæmīni ininque edæ godōmenque waa imaimpa. ¹⁸ Mīnitō

nō cædāmaī iñōmīnite Codito iñōmō mōnō nē nō cædongā inte mīnitō iñinite Wængonguī weca ænte poncæte ante cædinque wënæ wënæ mīni cædō beyænque adopoque caate wægacāimpa. Tōmengā baō ēñayongante tōmengā ingante wænōnāni wængā ate Wængonguī Ōnōwoca angā ate ñāni ōmæmonte edæ mīngā quēwengampa. ¹⁹ Ayæ adobaī Wængonguī Ōnōwoca tōmengā ingante ænte māocā godinque tōmengā nē wænte gogaināni ōnōwocao tee mōnete ongoncoo weca gote apænecā ēñengadānīmpa. ²⁰ Mānīnāni nē tee mōnete ongōnāni inānite Nōwee wodi Docā ñāni ānongā doyedē ancaa apænecā incæte tōmēnāni ēñēnāmaī inte cægadānīmpa. Mānīnāni nē ēñēnāmaī cægānāni iñōnānite Codito ñōwo tōmēnāni weca gote apænecāimpa. Wængonguī iñōmō, Wīpo ñænængade pōni impo incæ oncō baī mænoncæbiimpa, ante Nōwee ingante do angaingā inte, iñque mænoncæcāimpa, ante ee wānō congacāimpa. Incæte mānīnāni ēñēnāmaī cæyōnāni ocho ganca iñāni mānimpodānique æpæno yædopāa wogaa gote quēwengadānīmpa.

²¹ Mānīmæno edæ wogaa godinque tōmēnāni nāni quēwengā baī mīnitō adobaī æpænē guīdinque quēwēmīnīpa. Incæte wīi baonque mēnongate beyæ quēwēmīnīpa. Wæætē mīnitō, Wængonguī ayongā botō mīmō ñā mēnongate entawēmo inte quēwēmōpa, ante nāmā apænte pōnēninque æpænē guīmīnīpa. Edæ guīdinque mīni ængæ gantidō baī Itota Codito ñāni ōmæmonte quēwengā beyænque mīnitō adobaī ñāni ōmæmonte quēwēmīnīpa. ²² Tōmengā iñōmō do ōonædē æite Awēnē badinque Wængonguī tōmēmængā Inō edæ tæ contayongante anquedoidi incæ nē ānāni incæ nē tæi piñænte cædāni incæ tōmēnāni tōmānāni edæ tōmengā nānō ānō ante ēñente cædānīpa cæmīnīi.

4

Wængonguī nānō pōnō cægānca mōnō cæcæīmpa

¹ Nē caate wædingā iñōmō, Botō idæwaa wënæ wënæ cæte awædō, ante tōmengā wīwa nānō cædinō ante do wido cæcampa. Iñique mīnitō, Codito incæ baonga quēwēninque caate wægacāimpa, ante pōnēninque, Botō baonga caate wædinque ēñente badinque botō wënæ wënæ cædinō ante wido cæcæboimpa, ante piyænē cæte tæi ongōedāni. ² Edæ nē caate wædingā iñōmō, Mōnō waocabo baonque ante mōnō cæinēwēnō ante botō iñōmō cædāmaī incæboimpa, ante pōnēninque edæ ñimpo cædinque inguipoga tōmengā nānō quēwenguīngānca Wængonguī nānō

ānōnonque ante ēñente quēwengampa. ³ Eñēnāmaī iñāni cæinente wæwente nāni ānōnō ante ēñente mīnitō wēēñēdē adobaī quingāmē baī cæte quēwengāmīnīmpa. Edæ baonque ante mīni tōinente wæwēnonque ante do cædinque mīnitō tōmēnāni nāni cæi baī cædinque edæ tī nāmæ bete quidi quidi dowæninque beowæo inte cæowæo inte Yæ yæ angāmīnīmpa. Ayæ mīnitō tōmēmīni badōnīnca incæ adinque, Mōnitō wængonguī ingampa, ante ædæ wænte tedewengāmīnīmpa. Ñōwo iñōmō mīnitō mānōmaī cæte idæwaa cæmīni awædō.

⁴ Tōmēnāni iñōmō baonque ante nāni godō tōinēwēnō ante cæcæte ante pogodo gote baī cædinque mīnitō iñinite, Ponguēnē quēwēnāni, ante ancaa ānānīpa. Mīnitō gomō adinque tōmēnāni tōnō godongāmæ godāmaī iñini adinque tōmēnāni wæætē, Quimæ awincaque gomō awēmīnīi, ante edæ piñte ānewēnānīpa. ⁵ Incæte mōnō waocabo mīmō quēwēmō incæ do wænte gogaināni incæ tōmāmō imonte nē oo apænte anguingā iñōmō edæ Wængonguī iñongā ingampa. Iñique tōmengā, Ebnō cægāmīnīi, ante angā ēñente wædinque mānōmaī cægānāni wæætē aamō cædāmaī inte tōmēnāni nāni cægāinō ante edæ do apænequināni iñānīpa. ⁶ Mānōmaī beyæ do wægānāni inānite mōnō Codito ingantedō ante watapæ apænecatīmpa. Tōmēnāni baō ēñate quēwēñōnānite waodāni apænte āninque pānāni incæte Wængonguī wæætē, Tōmēnāni ōnōwoca ēwocadinque quēwēncædānīmpa, ante tōmengā waa pōni nānō cægāinō beyænque nāni quēwēnguīnō ante godō apænecā ēñengadānīmpa.

⁷ Ñōwo iñōmō tōmancoo edæ oo iñque baquīnō anguēnē. Mānōmaī impa, ante ēñente wæmīni inte mīnitō, Mōnō tōingā pōnente Wængonguī ingante apænecāīmpa, ante cædinque nāmā wææ aadinque ocai encate pōnēdāni. ⁸ Wënæ wënæ cæmō incæte waadete pōnēmō iñique mōnō waadete cædō beyænque wadāni piyænē cæte piñāmaī iñānīpa. Mānōmaī impa, ante pōnēninque mīnitō nē wede pōnēmīni iñōmīni inte cōwē waadete pōnente cædāni. ⁹ Edæ wadāni inānite, Pōedāni, āninque wacā ingā wacā ingā pædæ godōninque edæ, Tōmēmo quī impa, ante wædāmaī iedāni.

¹⁰ Wængonguī, Botō pōnō waadete cæbo ate mīnitō ado botō waadete cædōnō ante ænte ēwocadinque godō waadete cædāni, ante adocanque ingante wadō wacā ingante wadō pōnō waadete cæcā ænte ēwocāmīnīpa. Iñique mīnitō tōmāmīni mīni ænte ēwocaganca cædinque mīni pōnencabo beyæ godongāmæ waa cæquēnēmīni iñinīpa. ¹¹ Wængonguī pōnō cæcā æninque æcānō nānō apænequīngānca ēwocacā tōmengā

Wængonguī nānō apænedonque ante apænequēnengā ingampa. Æcānō wadāni beyæ ante nānō nē cæquinganca ēwocacā tōmengā Wængonguī nānō tæī piñænonque entawēninque waa cæquēnengā ingampa. Mānōmaī cædinque mīnitō waa cæmīni adinque mōnō tōmāmō Itota Codito ēmōwo apænedinque Wængonguī ingante, Bitō waēmō pōni inōmi inte waa cæbipa, ante apænecæimpa. Tōmengā iñōmō nē tæī ēmōnongā inte ñāō ēmōninque nē nanguī cædongā ingampa, ante mōnō pedænguipoga quēwēmō incæ iincayæ ponte mīnguipoga quēwēmō incæ cōwē watapæ pōni apænecæimpa. Mānōmaī baquīnō anguēnē, ante botō, Amēē, āmopa.

Codito nempo quēwēninque caate wæcæmīnimpā, ante

¹² Botō nē waademīni ēñēedāni. Mīnitō ñōwo incæ gonga gonte caate bai wæmīni incæte, Quiēmē beyæ mānōmaī caate wæboī, ante guīñente wædāmaī iedāni. Edæ wīī ōnonque caate wæmīnīpa. ¹³ Wæætē, Codito nānō caate wægāinonque godongāmæ ñōwo caate wæmōnīpa, ante pōnēninque watapæ toedāni. Mānōmaī caate wædinque tomīni iñinque Codito ñāō apāite bai nānō pōñedē godōmenque gomonga watapæ toquimīni imāimīnīpa. ¹⁴ Mīnitō imīnite wadāni piinte āninque, Codito ēmōwo ōnonquedō waa adinque wæcantedō abi, ante badate todāni iñinque Wængonguī wæætē, Watapæ quēwencæmīnīpa, ante pōnongā æninque mīnitō tōmengā Ōnōwoca nē ñāō ēmōnongā ingante ēwocamīni beyæ toquēnēmīni imīnīpa. ¹⁵ Wacā ingante nē godō pōnongā ingante do pānāni wæcampa. Wacā qui nē awēmō ængā ingante nē wēnæ wēnæ cæcā ingante adobaī pānāni wæcampa. Adocanque nē cæquēnengā inte ānāmaī iñongante wacā iñontobæ godō ōnonque cæcā ate nē ōnonque cæcā ingante pānāni wæcampa. Mīnitō wæætē nāmā wææ aadinque tōmēnāni nāni cædō bai cædāmaī imīni iñinque caate wæmīni incæte ædō cæte mīni wīwa cædō beyæ pānāni caate wæquēnēmīnī. Edæ dæ anguēnē.

¹⁶ Wæætē wadāni mīnitō imīnite, Wææ, Codito ēmiñæmī impææ, ante piinte cædāni caate wæmīni incæte mīnitō guingo imonte wædāmaī iedāni. Wæætē edæ Wængonguī ingante apænedinque edæ, Bitō ñāō ēmōmi inte pōnō pemonte bai cæbi æninque mōnitō Codito ēmōwo ēmonte bai adobaī ēmōmōnīpa, ante waa apæneedāni.

¹⁷ Edæ iīmaī impa. Wængonguī tōnō mōnō godongāmæ owocabo iñōmonte tōmengā oo apænte ancæcāimpa. Iñinque mōnō imonte tāno apænte angā iñinque tōmengā wadāni inānite guīquēnē æbānō cæquingāā. Tōmengā ingantedō ante watapæ apænedāni ate nē

ēñente cædāmaī ināni inānite apænte āninque Wængonguī quingāmē bai nanguī pangā wæquīnānī. ¹⁸ Ayæ Wængonguī beyæ nāni yewæmongainō bai impa. Nē nō cæcā wodo wænguēnengā iñongante Wængonguī tingæ ængā beyænque quēwēñongā Wængonguī ingante ēñēnāmaī ingā guīquēnē tōmengā ædō cæte quēwengingāā. Nē wēnæ wēnæ cæcā adobaī edæ ædō cæte quēwengingāā. ¹⁹ Mīnitō iñōmō Wængonguī nānō ānīnō beyænque caate wæmīnitawo. Iñinque mānōmaī beyænque mīnitō, Mōnō imonte nē badongaingā cōwē pōnēninque ædæmō aaquingā ingampa, ante pōnēninque nāmā mīnitō ōnōwoca tōmengā nempo godōninque piyænē cæte godōmenque waa cæquēnēmīni imīnīpa.

5

Mīni pōnencabo cæbānō cæte quēwengæimpa, ante

¹ Mīni pōnencabo iñōmīnite pancamīniya nē aamīni Picæmīni mōnō āmīni imīnīpa. Botō iñōmō adobaī nē aabo Picæmo iñōmo inte, Mōnō nē Picæncabo, ante mīnitō imīnite ædæmō apænedinque āmopa. Codito caate wæcā nē agāimo inte botō edæ waadete āmopa. Ayæ Codito ñāō bai nānō ēmōnō edonque pōni nānō odōmonguīnō ante botō tōmengā tōnō ñāō bai entawēmo iñōmo inte edæ, Æñencæmīnīpa, ante nanguī āmopa. ² Codito ingante nē pōnēnāni iñōmō mīnitō nempo cænināni bai ongōñōnānite mīnitō tōmēnāni inānite nē aamīni imīnīpa. Wængonguī, Nē pōnēnāni inānite aacæmīnīpa, angā ēñēninque mīnitō wæætē Baa āmōni iñinque Wængonguī pangā wæcæ wæ, ante guīñente wæmīnitawo. Iñæmpa wīī guīñente beyænque aacæmīnīpa. Wæætē Wængonguī, Mīnitō do Ao ante aacæmīnīpa, ante tōmengā nānō ānōnonque ante edæ ēñente cæte edæ tōmēnāni inānite ædæmō aadedāni. Ayæ edæ godonte æinta ante æīnente wæmīnitawo. Iñæmpa wīī æncæte ante wædinque mīnitō edæ, Nē pōnēnāni beyænque nanguī cæinente wædinque cæcæboimpa, ante piyænē cæte aadedāni. ³ Waodāni nē cænināni bai mīnitō nempo ongōñōnānite mīnitō wæætē imæca awēñēidi nāni piinte āmaī wīī adobaī piinte æedāni. Wæætē edæ, Mōnō waa cæte quēwēmō adinque tōmēnāni mōnō bai adobaī waa cæte quēwencædānīpa, ante cædinque edæ waa cæedāni.

⁴ Mānōmaī cæmīni iñinque mōnō nē Aadongā Ñænængā pōni inongā iñōmō iincayæ ponte a ongōninque poganta ñāō ēmonta cōwē wodāmaī inta pædæ pōnonte bai cædinque mīnitō imīnite, Mīnitō nē aamīni

inte botō ñāō ēmonte ongōñōmō ponte quēwencæminimpa, ancæcāimpa.

⁵ Tæcæ æmæwo pæimīni guiquēnē ēñēedāni. Godōmenque picæñāni nāni ānīnō ēñēnīnque edæ Ao ante cæedāni. Ayæ gānē entawente pōnēnīnque, Ōnōmōnique bai mōnitō imōnipa, ante pōnēnīnque wacā nānō ānīnō ante ēñēnīnque Ao ante cæedāni. Edæ iīmai ante yewæmonte ongompa.

“Nāmanque ante, Mōnitō gomonga waa cæmōni imōnipa, ante nē pōnēnāni inānite edæ Wængonguī Baa angampa. Wæætē edæ, Mōnitō ōnōmōnique bai imōnipa, ante nē ānāni inānite tōmengā pōnō waadete cæcampa.”

⁶ Ante yewæmongatimpa cæminīi. Iīncayæ ate eyepæ pōni bayonte Wængonguī incæ mōnitō imōnite ængō cæcā ongoncæmōnimpa, ante cædinque mīnitō ñōwo iñōmō nē tæi piñængā ōnōnempo ongōnīnque nāmā ængō cædāmai iedāni. ⁷ Codito mōnō imonte waadete pōnente cæcampa, ante ēñente wædinque mīnitō guīñente mīni wædō ante tōmengā wo cæmīni mongængā ate mīnitō guīñēnāmai iīnīnque wæætē guēmancæminimpa.

⁸ Nāmā incæ edæ wææ aaedāni. Wēnæidi awēnē iñōmō edæ mēnebo nē piinte angā bai inongā inte, Æcānō ingante ecate cænguūmoo, ante nē piinte cædongā inte awēmō diqui diqui mingampa cæminīi. Ee aedāni. ⁹ Mīnitō caate wæmīni incæte, Mōnō tōniñadāni inguipoga tōmāmæ quēwēnīnque adobaī edæ caate wædānipa, ante do ēñēmīni inte Codito ingante wede pōnēnīnque adiyæ næ gongænīnque wēnæ awēnē ingante cōwē Baa æedāni. ¹⁰ Mānōmai cædinque wantæ iñō caate wæmīni ate Wængonguī nē waadete pōnō cædongā inte mīnitō imīnite pōnō cæcā ate edæ gancæ bacæminimpa. Ayæ godōmenque pōnō cædinque tōmengā mīnitō imīnite pōnō tæi gōnongā ate mīnitō tæi piñænte entawēnīnque wæntædāmai inte edæ cōwē tæi ongoncæminimpa. Tōmengā adocā iñōmō ñāō bai cōwē ēmōnongā inte mīnitō imīnite aa pedīnque, Mīnitō Codito nempo nē quēwēnōmīni inte botō ñāō ēmonte ongōñōmō pō guite quēwēedāni, angacāimpa. ¹¹ Tōmengā iñōmō cōwē tæi ēmōnīnque nē nanguī cædongā ingampa, ante mōnō pedænguipoga quēwēmō incæ iīncayæ ponte mīnguipoga quēwēmō incæ cōwē watapæ pōni apænecæminimpa. Mānōmai baquīnō anguēnē, ante botō, Amēē, āmopa.

Waa quēwencæminimpa, ante

¹² Botō tōniñacā bai inongā inte Tidibānō iñōmō cōwē pōnēnīnque ædæmō cæcā ingampa, ante adīnque botō tōmengā tōnō godongāmæ cædinque, Mīnitō acæminimpa,

ante cadota ante ocanta yewæmōmopa. Iī cadota adīnque mīnitō gancæ pōnēnīnque nanguī cæcæminimpa, ante cædinque botō Pegodobo iñōmō, Wængonguī nāwangā mānōmai pōnō waadete cæcampa, ante yewæmōmopa cæminīi. Tōmengā nānō waadete cædonque ante entawēnīnque edæ mīnitō adiyæ tæi gongænte ongōedāni, āmopa.

¹³ Mīnitō imīnite apænte ænīnque Codito iñōmō Babidōnia iñōmō tōmengā ingante nāni godongāmæ pōnencabo inānite adobaī apænte ængacāimpa. Tōmēnāni iñōmō mīnitō imīnite, Waa quēwencæminimpa, ante apænedānipa. Botō wengā bai inongā inte Māadoco adobaī, Waa quēwencæminimpa, angampa. ¹⁴ Mīni pōnencabo adobaī godongāmæ waadete pōnēnīnque, Wængonguī bitō imite waa cæcæcāimpa, ante wacā ingā wacā ingā apæneedāni.

Codito nempo quēwēmīni inte tōmāmīni gānē pōnente quēwencæminimpa, ante botō Pegodobo imo yewæmōmopa.

2 Pegodo cadota ante nānō ayænta yewæmongainta

Wængonguī mīnitō īmīnite waa
cæcæcāimpa, ante

¹ Botō Timōnō Pegodo īnōmo inte Itota Codito ingante nē cædōmō īfōmote tōmengā botō imote da godongā godinque botō tōmengā beyæ nē apænebo bagaboimpa. Mōnō Wængonguī īnongā inte Itota Codito īfōmō mōnō imonte, Quēwencæmīnimpa, ante nē Ængaingā ingampa. Tōmengā īfōmō mōnitō īmōnite pōnō cædinque, Mīni wede pōnēnō ante waa pōni entawencæmīnimpa, ante pōnongā ænimōni inte entawēmōnīpa. Ayæ adobaī tōmengā nē nō pōni cædongā inte mīnitō īmīnite pōnongā æninque mīnitō mōnitō entawēnō baī ado mīni wede pōnēnō ante edæ waa pōni entawēmīnīpa. Īninque mīnitō īmīnite botō, Acæmīnimpa, ante yewæmōmopa. ² Mīnitō Wængonguī ingante pōnēninque Itota Codito mōnō Awēnē ingante adobaī pōnēninque tōmēna īnate edæ ate baī pōnencæmīnimpa, āmopa. Ayæ tōmēna godōmenque pōnō cæda ate mīnitō tōmēna nāna gānē pōnēnō ante edæ eyepæ pōni entawencæmīnimpa, ante botō yewæmōmopa.

*Codito nānō nē ēmīnēmō inte mōnō īmaī
entawēmōmopa*

³ Itota Codito īfōmō, Nē waa cæbo inte botō fāō ēmōmo īfōmote pōedāni, ante mōnō imonte do aa pecā pōmopa. Mānōmaī Itota Codito weca pōfōmōnte tōmengā Wængonguī nānō tæī pīfæmāmo entawēnongā inte, Quēwēedāni, āninque eyepæ pōnō cæcā ænte quēwēninque mōnō tōmengā awınca ate baī pōnēninque tōmengā nānō waa cædō baī edæ adobaī mōnō waa cæmō bamopa. ⁴ Tōmengā nē waa cædongā inte edæ fāō baī ēmōninque, Botō godōmenque nanguī cædinque waa pōni edæ pōnō cæcæboimpa, ante edæ wæætē wæætē angacāimpa. Īninque mīnitō īfōmō tōmengā nānō angāinō ante wede pōnēfōmīnite Wængonguī tōmengā nānō entawēnō pōnongā æninque mīnitō Wængonguī nānō entawēnō baī adobaī entawencæmīnimpa. Ayæ mānīne ante wede pōnēninque mīnitō inguipoga quēwēninque wēnæ wēnæ mōnō cænīnte wægāinō ante, Nōmænte bacæ wæ, ante wædinque Baa ante edæ aamō cæcæmīnimpa.

⁵ Codito mānōmaī pōnō cæcā beyæ mīnitō wede pōnēmīni inte nē waa cæmīni bacæte ante cōwē edæ pæ pagænte cæedāni. Ayæ wææ nē waa cæmīni badinque Æbānō cæte

nō cæquīi, ante ēfēmīni bacæte ante nanguī cæedāni. ⁶ Ayæ wææ mānōmaīnō ante mīnitō nē ēfēmīni badinque godōmenque nanguī cædinque nāmā wææ aamīni bacæte ante cæedāni. Ayæ wææ nāmā wææ aamīni badinque wæætē nē wæntædāmaī inte ee cæmīni bacæte ante cæedāni. Ayæ wææ nē wæntædāmaī inte ee cæmīni badinque mīnitō wæætē Wængonguī nānō ante entawēnō baī entawēninque tōmengā nānō cædō cæte quēwencæte ante cæedāni. ⁷ Ayæ wææ Wængonguī nānō cædō baī cæte quēwēmīni badinque mīnitō ayæ, Mōnō caipæ, ante godongāmæ mīni waa cæcabo bacæte ante cæedāni. Ayæ wææ mīni godongāmæ waa cæcabo bamīni inte mīnitō ayæ waodāni tōmānāni īnānite waadete pōnēninque godō waa cæmīni bacæte ante cæedāni.

⁸ Mānōmaī wede pōnēninque tæī ongōninque waadete pōnēninque Wængonguī nānō cædō ante godōmenque godōmenque entawente cæmīni Īninque mīnitō mōnō Awēnē Itota Codito ingante ate baī nē pōnēmīni inte edæ tōmengā beyæ mīni cæquēnēnō ante oda cæte wædāmā īmaīmīnīpa. Wæætē edæ awæ nanguī inca baī mīnitō adobaī mīni cæquēnēnō ante do cæcæmīnimpa. ⁹ Wæætē mānīnō tōmānō ante entawēnāmaī ingā guiquēnē tōmengā mōwoyata baī ēmōnongā inte inguipogaque waa adinque oōnædē īfōmō gobæ ī ædō cæte aqinggā. Tōmengā nānō wēnæ wēnæ cægāinō fā do mēnongate impa, ante pōnēnāmaī inte oonque quēwengampa. ¹⁰ Īnānāni ēfēedāni. Wængonguī mīnitō īmīnite do apænte æninque aa pegacāimpa cæmīnī. Mīnitō, Wængonguī nānō ānōnonque ante ēfēnte entawēninque mōnō cōwē tæī gongænte ongongæimpa, ante nanguī cæedāni. Edæ mānōmaīnonque ante cæmīni inte mīnitō oda cædāmā inte tæī ongoncæmīnimpa. ¹¹ Ayæ īncayæ ate nāfē wæmīni ate mōnō Awēnē Odeye Itota Codito īfōmō mīnitō īmīnite ææntodongā goyōmīnite tōmengā, Pō guīdāni, ante watapæ æmæwo manguicā guīte cōwē quēwencæmīnimpa.

¹² Mīnitō mānīnō ante do ēfēninque mīni nō pōni ēfēnō ante ædæmō entawente tæī ongōmīni incæte botō, Godōmenque cōwē pōnencæmīnimpa, ante cædinque adodō adodō ante apænebo ēfēncæmīnimpa. ¹³ Edæ botō, Mīnitō oda cædāmā inte cōwē pōnencæmīnimpa, ante cædinque botō baonga botō quēwenganca wæætē wæætē apænedīnque nō cæte apænebopa, ante pōnēmopa. ¹⁴ Edæ mōnō Awēnē Itota Codito botō imote edonque apænedīnque, Bitō oo pōni wæninque botō weca ææ poncæbiimpa, angacāimpa. ¹⁵ Angā ēfēngaīmo inte botō, Nōwo botō

yewæmöninö ante adinque entawëmini inte minitö iñömö botö gobo ate cöwë pönencæminimpa, ante cædinque fiwo incæ tæi piñæninque nangui cæcæboimpa.

Itota Codito Tæiyæ Awënë nänö emönö atamönipa

¹⁶ Mönö Awënë Itota Codito iñömö tæi piñængä ingä inte oo poncæcäimpa, ante minitö iminite apænedinque mönitö dicæ wadäni nani mä apænewënö ante apænetamöniiyaa. Wæætë edæ, Tömengä nê Awënë inongä inte mönö Tæiyæ Awënë nänö emönö incæ emongampa, ante nê agaimöni inte mönitö. Nāwangä agamönimpa, ante apænemöni eñëminitapa. ¹⁷ Edæ Awënë nänö fiäo apäite bai ongöñömö ongonde apænedinque Mæmpo Wængongui incæ, “Iingä botö Wengä inongä inte botö nê waadecä ingampa. Tömengä ingante adinque botö waa tobopa,” ante apænegacäimpa. Ayæ Itota ingante waa adinque tömengä nê fiäo emongä ingante odömongä agamönipa. ¹⁸ Änanquidi tömengä tæiyæ waemö emonte nänö ongöñömö godongämæ ongöninque mönitö mäninö ante Wængongui oönædë tedecä eñentamönipa.

¹⁹ Wængongui beyæ nê apænegainäni nani yewæmongainö bai mönitö adobai edonque agaimöni inte, Nāwangä iñonte yewæmongadänimpa, ante apænemöni eñenguënemini iminipa. Mäninö nani angainö wëmö iñömö fiäo apäite tica ënente bai i apa quëwëminii. Oque pönente iñonte, Wadaamö sængæimpa, ante wänö cönäni bai minitö adobai muni fiäo entawenguinque ante Itota Codito nänö ponguionæ ante edæ wänö cöninque wede pönëmini ininque waa imaimpa. ²⁰ Iñänäni eñëedäni. Dodäni Wængongui beyæ nê apænegainäni incæ, Wængongui sæbänö ante apænegä eñente yewæmonguimoo, ante pönëninque dicæ mä pönëninque adodeque incæ yewæmongadäniyaa. ²¹ Wi namanque pönëninque yewæmongadänimpa. Wæætë Wængongui Tæiyæ Waemö Önöwoca nempo quëwëñönänite tömengä pönö apænegä eñëninque Wængongui nänö apænedonque ante apænegadänimpa, ante ämo eñëmaiminipa.

2

Nê babæ odömonte apænedäni iimäi cædänipa, ante

¹ Doyedë pancadäniyaa, Wængongui beyæ apænebopa, äninque babæ apænegadänimpa. Nöwo iñömö wadäni adobai awëmö cædinque, Mini cabo oda cæte ewente wæcæminimpa, ante cædinque babæ ante odömonte apænequinäni minitö

weca do ongönänipa. Mönö Tæiyæ Awënë incæ tömënanäni inänite æncæte ante nämä wepæ nê godongaingä iñongante tömënanäni wæætë nani quingæ omæte ewenguinque edæ Baa änanäni cæminii. ² Pancaminiyaa nangui imini incæ mini guifente wæquinque tömënanäni nani wentamö mongænte goquino incæ tee empote goquimini iminipa, ante awædö. Mäninö godinque mönö nöingä eñënönö ante piinte cæyömini wadäni adobai mänii taadö nöinö iñonte godö babæ äninque wënæ wënæ änanäni baquünänimpa, ante awædö. ³ Nê babæ odömonte apænedäni iñömö minitö mäincoo ante ö æinewente wæwënanäni inte nämæneque nani pönëwënö ante tededäni eñëninque minitö do oda cæyöminite tömënanäni wæætë ö sæmainänipa, ante awædö. Mönö nê pangä önoncadopo do ongongainäni inänipa. Mönö nê pangä iñömö, Oo nani ewenguinque mänömai cædänipa, ante apænte ancæte ante piinque edæ möwo mönämai milingä inte a ongongampa.

⁴ Anquedoidi incæ eñënamäi cædäni ate Wængongui ata cæpodämai ingacäimpa. Wæætë, Tömënanäni nani apænte tente wæquinganca ontatodë wëmö mæ mämonte bai iñömö guii tee mönete ongongadänimpa, ante cædinque tömengä angä eñente tömënanäni nani owogaiñömö tadömgadæ pöni dobæ go guiligadänimpa. ⁵ Ayæ doyedë tömengä nänö nê badongainäni inguipoga quëwëñönänite Wængongui tömënanäni inänite ata cæpodämai inte angä ate nê eñënamäi inäni iñömö edæ æpæmpo bete wængadänimpa. Wæætë Nöwee wodi Docä nani änongå guiquënë, Mönö nê cæte quëwengæimpa, ante nê apænegaingä iñongante Wængongui tömengä tönö tiæte ganca inäni mänimpodänique inänite wææ aacä quëwengadänimpa. ⁶ Ayæ, Todömä tönö Gömoda iñömö quëwënanäni inänite, Mini apænte wido cæquinque, ante tömënanäni quëwëñömö iya täninque wido cæcä gönaiبوque bate contagatimpa. Mänömai cædinque Wængongui, Botö imote eñënamäi imini muni adobai tente wæquinque cæminipa, ante wadäni inänite odömoncæte ante cægacäimpa. ⁷ Ayæ eñënamäi inte cædäni baonque towente quëwënanäni adinque Dooto wodi iñömö nê nö cægaingä inte, Wentamö pöni mongænte quëwënanäni awædö, ante wædongä inte adoyömö quëwëñongante Wængongui tömengä ingante töö sæmænte ö ængä beyænque quëwengacäimpa.

⁸ Tömengä waa cæquinque nö entawënongå inte tömënanäni weca quëwente ayongä iimö iñö iimö iñö eñënamäi cædäni adinque tömengä, Ancaa ate awædö, Ancaa eñente awædö, ante wæwëñongante Wængongui tömengä ingante do ö ængä beyænque

quëwengacäimpa. ⁹ Mänömaï cædinque Wængongui, Botö miñæ nê pönäni caate wædäni adinque botö do ëñente cædinque æmo ate quëwënänipa. Wæætê wiwa cædäni inänite botö apænte anguiönæ ganca mö ongonte bai mäinque ñowo incæ wæætê wæætê pämo wædänipa, ante Wængongui cæcampa. Ìninqe, Nö ëñente Wængongui cæcampa, ante mönö edonque ëñengæimpa. ¹⁰ Mänii babæ ante nê odömönte apænewënäni iñömö tömënäni baonque ante towëinente nani entawëmämo ante nê cædäni inönäni inte edæ awëñëdi inänite, Wiï ëñëinê wædö, ante piñänipa. Mänömaïno ante nê piñte änäni inänite godömenque pancæte ante Wængongui mö ongonte bai mangampa. Tömënäni iñömö nämä ængö cædinque guïñenedämaï inte edæ nê ñäo entawente tæi ëmönäni inänite godö wënæ wënæ apænedinque edæ babæ ante tedewënänipa. ¹¹ Ìñæmpa anquedoidi tæi piñænäni inte godömenque ñænænänäni inönäni incæ Wængongui ayongante guïñënete wædinque nê ñäo entawente tæi ëmönäni inänite piñte apænte änämaï inäni.

¹² Nê babæ ante odömönäni guiquënë tömënäni nani nê adämaï inö ante mä pönëninque wënæ wënæ apænedinque babæ ante tedewënänipa. Babæidi ömæwocädäni inte nani togænte ecate ëwenguinque önonque pöni cægonäni bai nê babæ odömönäni iñömö edæ adobaï ëñënamäi inäni inte tömënäni nani wænguinque babæ cædinque quingämê bai quëwënänipa. ¹³ Tömënäni wadäni inänite godö wiwa cædäni ìninqe iñäni wæætê näëmæ godö cædäni wæcædäni. Tömënäni iñömö, Itædê incæ mönö baonque pönente towengæimpa, ante cædäni. Minitö waadete pönëninque godongämæ cæñömöni tömënäni adoyömö pöninque cæowæo incædö beowæo incædö inte cæyönäni wentamö nani mongænö beyænque mini cabo wæætê baate bai ëñamini badinque wentamö tæ enca tæ enca ëmonte bamini awædö.

¹⁴ Wacä onquiyængä awinca adinque cöwê godö towëinente wædäni inte tömënäni iñömö ñimpo cædämaï cöwê wiwa cæinente wædänipa. Wacä aquii piñænämaï ingä adinque tömënäni, Mönitö tönö godongämæ ponte wënæ wënæ cæcæcäimpa, ante cædinque godö waa cæte bai babæ cædäni. Botö qui botö qui, ante nê æinente wædäni iñönänite Wængongui iñömö, Tömënäni nani wæwocaincabo inäni, ante piñte angampa. ¹⁵ Taadö töinö oda cædinque edæ docä Beodo wodi wengä Badäo wodi miñæ tömënäni tee empote godänipa. Tömengä Badäo iñömö, Nö cædämaï imo

incæte botö mäincooque ænte tobote, ante bai cægacäimpa. ¹⁶ Tömengä Wængongui beyæ nê apæñecä incæ ocäi ömæcacä bai inte wapiticæ ëñënamäi cæyongante babetadecä ìningä incæ bodo incæ iñontobæ wao bai tededinque Badäo ingante wææ angacäimpa.

¹⁷ Mänii ñowodäni nê babæ odömönäni iñömö æpæ taquëñëñömö æpæ dæ ä bai edæ önonänique inte odömönäni. Boguimancoo wini cai mongænte önonque ænte poncoo bai tömënäni adobaï inäni inte önonque cædäni. Mänömaï cædäni beyæ Wængongui, Tömënäni nani ongonte wæquïñömö, ante mæ mämönte bai iñömö badongacäimpa.

¹⁸ Edæ tömënäni ogæ tededinque, Botö godömenque waa pöni cæbo aedäni, ante önonquedö ante tedewënänipa. Wadäni wapiticæ cæte quëwënäni nempo adocanque wodo aamö cæyongante mäinänäni nê babæ odömönäni iñömö, Bitö mönitö miñæ wæætê pöningque baonque bitö cæinëwëñö ante guïñëñadämaï inte cæte tocæbiimpa, ante waa cæte bai godö babæ cædäni. ¹⁹ Mini ædæmö aamö cæte mönedämaï quëwënguinque mönitö miñæ pödäni, ante babæ änewënäni. Incæte nê babæ odömönäni incæ tömënäni nani wiwa cædonque beyænque cæte quëwënäni beyænque näëmæ ñä cæyænte bai inte wædänipa. Edæ quïëmënte ante waocä ëñente cæcäa tömengä mäinö nänö ëñente cædö beyænque nê cæte quëwëngönte inte näëmæ ñäo cæyænte bai inte wæcampa.

²⁰ Inguipoga ñömænguëñëmämo beyæ tee mönete bai quëwëñänäni inte tömënäni mönö Awënë Itota Codito mönö imonte nê Ængängä ingante do ate bai pönëninque edæ abæ tawænäni inänitapa. Mänömaï abæ tawænte godänäni inte tömënäni inguipoga ante nani cæinente wæpämö beyænque wæætê adodö go goyo cæte ægodawate tæ wææntodonte bai wædäni ìninqe tömënäni godömenque nani wënæ wënæ wæwënguinque imäimpa. ²¹ Nöinö taadö do adinäni inte tömënäni nani godömenque wæwënguinque ëmö cæte godänipa. Wængongui tæiyæ waëmö nänö wææ angainö ante odömönäni nani do ëñëñinö ante Baa ante wadæ godäni iñömö godömenque wënæ wënæ nani wæquinque impa. Ìninqe mäinö taadö ante tömënäni cöwê adämaï inäni inte bai tömënäni beyæ godömenque waa incædönimpa. ²² Tömënäni nöinö taadö ëmö cæte godänäni nani cædö bai ante ñimainö ante näwangä ante badete todänipa. “Guinta awæ wëningä adodö cængampa. Odæ wængänä iñömö æpæ pantate ate onguipoipæ wëngo wëngo nangampa.”

3

Mönö Awënë wæætē adodō poncæcāimpa, ante

¹ Botō nē waadedōmīni ēñēedāni. Mīnitō mōwo mōnāmaī inte nōingā ante pōnencāmīnīmpa, ante botō, Mānōmaī impa, ante mentaa yewæmōningue adodō adodō ante yewæmōmo aedāni. ² Tæiyæ waēmō entawēnāni Wængonguī beyæ ante apænedīnque nāni yewæmongaīnō ante nē adīmīni inte mīnitō wæætē pōnencāmīnīmpa, ante cæbopa. Mönö Awënë mōnō īmōnte nē Ængaingā inte adobaī ante wææ angacāimpa. Tōmengā nānō da godongaimōni īñōmō tōmengā nānō wææ angaīnō ante apænemōni ēñēmīni inte mīnitō wæætē adodō ante pōnencāmīnīmpa, ante cædīnque yewæmōmopa.

³ Īmaī ante tāno apænebo ēñencāmīnīmpa. Mönö waocabo inguipoga mōnō quēwēmāmo wodo īnque bayōnte nē badete todāni cōwē poncædānīmpa. Pōnīnque tōmēnāni badete todīnque nāmā nāni wēnæ wēnæ cæinēnō ante edæ do cæquīnāni īnānīpa. ⁴ Tōmēnāni īmaī ante badete tocædānīmpa. “Codito nānō ponguīnque impa, ante wædānītedō abi. Īñæmpa Wængonguī nānō badongāñēdē īngūipo nānō cægai baī mæmæīdi wodi wænte godāni ate ñowo ganca adobaī inte cæ apa guīñēwēmīni.” ante badete toquīnāni inte poncædānīmpa. Apænebo ēñēedāni. ⁵ Wængonguī īñæmpa adodeque angā beyænque oōnædē owocoo edæ do bagatīmpa. Adodeque angā beyænque onguipo æpæ tæcæpæno odæ yate ongōñonte tōmengā æpæ tōnō badongā ongōmpa. Mānōmaī impa, ante edonque ī incæte tōmēnāni, Mönö Baa angæīmpa, ante beyænque adāmaī inte baī pōnēnāmaī īnānīpa. ⁶ Ado æpæ inguipoga mæ ā beyænque Nōwee wodi quēwēgāñēdē māninguipo nānō ingaī dæ badīnque waguipo baī bagatīmpa, ante edæ ñōwodāni īñōmō adobaī pōnēnāmaī īnānīpa. ⁷ Ayæ adobaī Wængonguī adodeque angā beyænque oōnædē owocoo tōnō īnguipo ñōwo mīni cægonguipo edæ iya tanguīnque ongōmpa. Tōmengā, Botō īmōte nē Baa ānāni īnānīte botō apænte pante wido cæquīōnæ ganca māñī oōnæ tōnō īnguipo ongōmpa, angāmpa.

⁸ Botō nē waademīni edæ ēñēedāni. Mönö Awënë ayongante adoōnæque incæ edæ, Mīdo ganca wadepo baī impa, ante acāmpa. Mīdo ganca wadepo īñōnte mōnō Awënë ayongante, Adoōnæque baī impa, ante acāmpa. Mānōmaīnō ante adodeque incæ mīnitō cōwē ēñēte pōñēedāni, āmopa. ⁹ Mönö Awënë, Cōwē pōnō cæbo æncāmīnīmpa, ante nānō angaīnō

ante pancadāniya, Æiquedō mōnō Awënë cæquīngāā, ante wædānīpa. Mönö Awënë īñæmpa wīī wæntæye ingāmpa. Wæætē, Adocānque wæñāmaī incæcāimpa. Wæætē tōmānāni, Idæwaa wēnæ wēnæ cæte awædō, ante botō gāmæñō poncædānīmpa, ante cædīnque tōmengā māñīnō beyænque ee cædāmaī ingāmpa. Īnīnque tōmengā, Mīnitō wæætē botō gāmæñō æiquedō ponguīmīni, ante wānō cōnīnque edæ ee pōñāmaī ingāmpa.

¹⁰ Incæte nē awēmō o ængā īñōntobæ nānō pōmaī mōnō Awënë nānō poncæ cæōnæ īñōmō adobaī īñōntobæ ponguīnō anguēnē. Nanguī tæi tæi tēnīnque oōnædē owocoo incæ īñōntobæ dæ goquīnō anguēnē. Gongā nāni angā nanguī pōñī bæco īnīnque edæ Wængonguī nānō badongāncōo tōmancoo edæ aca podīnque edæ ēwente bacāīmpa. Inguipoga tōmāo ongōncōo dæ ba īnīnque inguipo oñōmæca pōñī baquīnō anguēnē. ¹¹ Tōmancoo edæ māñōmaī ēwēnguīncōoque impa, ante adīnque edæ mīnitō īñōmō, Æbānō quēwēnguīlī, ante pōñēmīni. Wængonguī nānō cædō baī cōwē cædīnque tæiyæ waēmō quēwēnguēñēmō īmōmpa. ¹² Wængonguī nānō ponguīōnæ īñōmō edæ æyēdēnō ponguīlī, ante wānō cōnīnque, Quīngæ pōñī pongæīmpa, ante mōnō nanguī cæcæīmpa. Māñīōnæ īñōnte edæ oōnæ incæ gonga bæcote ēwente bayōnte Wængonguī nānō badongāncōo incæ nanguī ocoī ānīnque tōmancoo aca podīnque ēwente baquīnō anguēnē. ¹³ Picæōnæ tōnō pedænguipo oñmæe ēwēnīnque Wængonguī wæætē, Botō mīñōnæque tōnō mīnguīpoque pōñō badoncæboīmpa, ante nānō angaīnō baī do badoncæcāīmpa. Īnīnque mōnō īñōmō, Mīñōnæ tōnō mīnguipo īñōmō mōnō nō pōñī cæte quēwēngæīmpa, ante nanguī aīnente wæmōmpa.

¹⁴ Botō nē waadedōmīni ēñēedāni. Māñōmaī bacāīmpa, ante nē aīnente wæmīni inte mīnitō īñōmō edæ, Mönö māñīñēdē wentamō entawēnāmaī īmō adīnque Wængonguī pīñāmaī incæcāīmpa, ante nanguī cædīnque edæ nāmā wææ aadedāni. Ayæ tōmengā, Botō ayōmo waēmō ēwocāmīni īnīnque edæ mōnō godongāmæ piyænē cæte quēwēngæīmpa, ante pōñō cæcæcāīmpa, ante edæ nanguī cæedāni. ¹⁵ Mönö quēwēnguīnque ante mōnō Awënë edæ ee ongōnte pōñāmaī ingāmpa, ante pōñēedāni. Wængonguī pōñō cæcā ate ocaī nē encacā bate pōñēnīnque mōnō tōñīñacā Pabodo mōnō nē waadedā inte adobaīnō ante mīnitō īmīnīte edæ, Acāmīnīmpa, ante yewæmongantapa. ¹⁶ Wængonguī mōnō quēwēnguīnque ante ee pōñāmaī ingāmpa, ante cadota ante yewæmōnīnque Pabodo adobaīnō ante edæ cōwē yewæmongāmpa.

Tömengä nänö yewæmöninta pancataa wīl edonque i adinque nē ēñēnāmaī ināni tönö aquīl pīñænāmaī ināni iñömö edæ oda cædinque wapiticæ odömönānīpa. Tömēnāni edæ Wængonguī angā ēñente nāni yewæmongainta tōmantaa adobai adinque tōmēnāni nāni æmæwo ewenguinque edæ wapiticæ odömönānīpa.

¹⁷ Botö nē waademīni ēñēedāni. Mänōmaī impa, ante do ēñēmīni iñōmīnite Wængonguī nänö wææ angainö ante ēñēnāmaī cædāni ināni guiquēnē mīnitō imīnite tōō æmænte wapiticæ ænte gocæ cædāni ate wædinque mīnitō wæætē tōmēnāni mīñæ godāmaī iedāni. Wæætē edæ Tæiyæ Awēnē

nempo quēwēmīni inte, Tæi gowæænāmaī incæboimpa, ante nāmā wææ aaedāni.

¹⁸ Mönö Tæiyæ Awēnē Itota Codito ængā beyænque mönö quēwēmōmpa. Inique tōmengä waadete pönö cæcā ate mīnitō tōmengä ingante ate bai pönēninque wadāni inānite godōmenque waadete godō cæmīni baedāni. Tōmengä iñömö edæ ñōwopāmo iñonte wapāmo mīlmāmo iñonte edæ cōwē tæi emongā inongā inte ñäö apāite bai emongampa, ante adinque mönö ñimpo cædāmaī inte tōmengä ingante cōwē waa acæimpa. Mänōmaī baquinö anguēnē, ante botö, Amēē, amopa.

1 Wäo cadota ante nänō tānota yewæmongainta

Mini quëwenguinō ante nē pönongä

¹ Æcänō wëñëñedë Wængongui nänō badongaiñedë do ingacäimpa, ante mäninō ante apænemōnipa. Wængongui nänō Angainō ante nē ëmongaingä iñomō Itota adocä, Mini quëwenguinō ante nē pönongä ingacäimpa. Mönitō iñomō mäningä apænecä ëñëningue tömengä ingante awinca inte nē adimōni imōnipa. Adocä ingante cewä adinque mönitō tömengä ingante nē gampodimōni imōnipa. Ìniquë möni nē ëñëningä ingante ante, awinca inte möni nē adingä ingante ante, möni nē cōwä adingä ingante ante, möni nē gampodingä ingantedō ante apænemōnipa. ² Edä Itota nē quëwengaingä iñomō edonque pōni a ongongacäimpa. Mönitō tömengä ingante nē adimōni imōnipa. Mäningä ingante ante, Näwangä quëwengaingä ingampa, ante apænemōni imōnipa. Ayæ mönō Mæmpo Wængongui tönō guëa cōwë quëwengaingä iñomō tömengä mönō weca ponte a ongongä atamōnipa. Ìniquë mīnitō Ìminite mäningä ingante ante apænemōni ëñencæminimpa. ³ Ayæ mönō Mæmpo Wængongui tönō tömengä Wengä onguñængä Itota Codito tönō mönitō godongämæ cæmōni imōnipa. Ìniquë, Mīnitō adobai mönitō tönō godongämæ cæcæminimpa, ante cædinque mönitō möni nē adingä ingante ante, möni nē ëñëningä ingante ante mīnitō Ìminite apænemōni ëñencæminimpa. ⁴ Mönō eyepæ watapæ toquinque ante mäninō ante mīnitō Ìminite yewæmōmōnipa.

Wængongui ñäo apäite bai ñongä ingampa

⁵ Tömengä nänō angainō möni ëñëninō æbänō ì, ante mönitō ìmai ante mīnitō Ìminite apænemōni ëñencæminimpa. Wængongui ñäo apäite bai ñongä ingampa. Ìniquë tömengä wentamō nänō entawënō edä dæ ampa. ⁶ Wentamō iñomō nē cægōmō Ìniquë mönō, Tömengä tönō godongämæ cæmōnipa, ante ämō Ìniquë mönō edä nē babæ ämō ìmaimompa töö. Ayæ mänōmai cæmō Ìniquë mönō, Quinō nōingä impa, ante cædämai ìmaimompa. ⁷ Wængongui ñäo apäiyōmō mäniñōmō ongongä bai mönō adobai ñäo iñomō cægōmō Ìniquë mönō wacä ingä wacä ingä godongämæ cæbaimompa. Ayæ ñäo iñomō cægōmō Ìniquë mönō wënæ wënæ cægainō tömää adinque tömengä Wengä Itota nämä wepæ inte mönō imonte mënongacä ate mënongate ìmaimompa.

⁸ Mönō, Botō wënæ wënæ cæpämō dæ ampa, ante ämō Ìniquë mönō nämä incæ oda cæte wapiticæ go bai cæbaimompa. Ayæ mänōmai äninque mönō, Quinō nōingä ì, ante ëwocadämai quëwëmaimompa töö. ⁹ Wæætë edä Wængongui mönō imonte cōwë pönëningue nē ædæmō cæcä ñongä ingampa. Ayæ nē nō cæcä ñongante mönō tömengä ingante, Botō nämä wënæ wënæ cædimo inte awædō, ante ämō ëñëningue tömengä wæætë pūināmai inte mönō imonte pönō ñimpo cæcä quëwencæmōimpa. Ayæ wiwa mönō cæte quëwënō tömää adinque tömengä wæætë mönō imonte mënongacæcäimpa. ¹⁰ Mönō, Botō cōwë wënæ wënæ cædämai ingaimo imopa, ante ämō Ìniquë Wængongui ingantedō ante, Babæ änongä ingänō, ante ämaimompa. Ayæ mänōmai ämō Ìniquë tömengä nänō angainō ëwocadämai quëwëmaimompa töö.

2

Mönō Codito wææ angä beyænque mönō quëwenguinque

¹ Botō wëñæmīni bai ìmini ëñëedäni. Mīnitō wënæ wënæ cædämai incæminimpa, ante ìmai ante cædinque yewæmōmopa. Incæte adocanque wënæ wënæ cæcantawo. Tömengä beyæ wacä, Mæmpo Wængongui pänāmai incæcäimpa, ante mönō nē wææ änongä incæ mä ongongampa. Mäningä iñomō nē Nō Cæcä ñongä inte Itota Codito ñongä ingampa. ² Ayæ idægoidi, Mönō wënæ wënæ cægainō ante mönō imō Wængongui pūināmai incæcäimpa, ante cædinque cæningä wænōñäni nänō wængai bai mäninganque adobai mönō wënæ wënæ cægai beyæ wængacäimpa. Ayæ wīi ononque mönō wënæ wënæ cægainonque beyænque wæætë tömäæ quëwënäni nāni wënæ wënæ cægai beyæ adobai wængacäimpa.

³ Mönō Wængongui ingaingä ingante ate bai pönëmōö, ante æbänō cæte ëñenguī. Edä, ìmai cæedäni, ante Wængongui nänō wææ angainō ante ëñente cæmō Ìniquë mönō edä, Wængongui ingante ate bai nē pönëmō ìmopa, ante do ædæmō ëñëmaimompa. ⁴ Waocä iñomō, Wængongui ingaingä ingante ate bai pönëmō ìmopa, ante nē angä incæte tömengä Wængongui nänō, ìmai cæedäni, ante wææ nänō angainō ante ëñëñämäi cæcä Ìniquë mäningä nē babæ änongä ingampa. Ayæ Wængongui nōingä nänō angainō ante ëwocadämai quëwengampa töö. ⁵ Wæætë, Wængongui nänō angainō ante æcänō ëñente cæda iñomō mäningä ingante Wængongui pönō cæcä beyænque tömengä Wængongui waadete nänō pönënō ante eyepæ entawente quëwengampa. Ìniquë Wængongui nänō angainō ante ëñente cæmō inte mönō, Tömengä nempo

quëwëmö imompa, ante ædæmō ēñēmompa. ⁶ Ìniquë æcämenque, Botō tōmengä nempo nē quëwëmō imopa, ante nē angä ìñömō tōmengä Itota nänō quëwente cægōni bai adobaï quëwente cægonguēñ ingampa.

Itota, Ìimai cæedäni, ante ñowo nänō wæce äno

⁷ Botō nē waademini ēñeedäni. Minitō iminite, Ìimai cæedäni, ante wii botō tōmëmo wææ äno ante ñowo yewæmōmopa. Wæætë Itota do nänō wææ angainō ante wëñēñedë mïni ēñente ængainō ante adodō ante yewæmōmo aedäni. Ìi tōmengä do nänō wææ angainō ìñömō munitō iminite möni apænedō mïni ēñëñinō impa. ⁸ Incæte munitō iminite Itota, Ìimai cæedäni, ante ñowo nänō wææ äno yewæmōmopa. Tōmengä tönō munitō quëwente cædinō beyænque, Mäninō nō pōni impa, ante edonque pōni acæimpa. Edæ mönō wëmō ìñömō wodëmäa tæcæ bacæ cæyō nō ñäo ìñömō tatodonte do apæite impa.

⁹ Botō ñäo ìñömō quëwëmō imopa, ante nē angä incæte tōmengä nänō tōniñacä ingante nē piingä ingä ìniquë tōmengä wëmō ìñömō ayæ quëwengampa. ¹⁰ Æcänō guiquënë nänō tōniñacä ingante nē waadete pōngengä tōmengä ñäo ìñömō nē quëwengä ingampa. Tōmengä ñäo ìñömō quëwënnique quïëmë beyænque edæ tëwate goquingä. Edæ dæ ampa. ¹¹ Wæætë æcänō nänō tōniñacä ingante nē piingä wëmō ìñömō quëwengampa. Tōmengä wëmō ìñömō cægongä inte compocæ compocæ gocä ingampa. Wëmō ìñömō quëwënnique babetamongä bagainga inte tōmengä ædönō gocäa, ante ëñëñämaï ingampa.

¹² Wëñæmïni ëñeedäni. Edæ Itota Codito ëmōwo beyænque mïni wënæ wënæ cægainō ante ñimpo cæte quëwëmmïni ìminipa, ante adinque botō munitō iminite yewæmōmopa. ¹³ Mæmpomïni ëñeedäni. Minitō edæ, Wëñëñedë nē ingaingä ingante do ate bai pōngaimïni ìmïni beyænque botō munitō iminite yewæmōmopa. Onguiñæmïni tæcæ pæmïni ëñeedäni. Minitō edæ godōmenque tæï ëmōmïni ìmïni inte wënæ awënë ingante Baa ante gänä cæmïni beyænque botō munitō iminite yewæmōmopa. Wëñæmïni ëñeedäni. Minitō edæ mönō Mæmpo Wængongui ingante do ate bai pōngaimïni ìmïni beyænque botō munitō iminite yewæmōmopa.

¹⁴ Mæmpomïni ëñeedäni. Minitō edæ wëñëñedë nē ingaingä ingante do ate bai pōngaimïni ìmïni beyænque botō munitō iminite yewæmōmopa. Onguiñæmïni tæcæ pæmïni ëñeedäni. Minitō edæ tæï ëmōmïni inte ayæ Wængongui nänō angainō cōwë ewocate quëwëmmïni ìminipa. Adobaï munitō edæ wënæ ingante godōmenque tæï ëmōmïni

inte Baa ante gänä cæmïnipa. Mänōmaï beyæ botō munitō iminite yewæmōmopa.

¹⁵ Inguipogaque ante nani quëwëmämō ante waadete pōñëñämaï ìedäni. Inguipoga quëwëñäni quïëmë wënæ wënæ nani cæpämō ante tōmämämō ante adobaï waadete pōñëñämaï ìedäni. Ayæ æcänō ìi inguipogaque ante nani quëwëmämō ante waadete pōñente ìna mäningä mönō Mæmpo Wængongui nänō waadete pōñëñō ewocadämäi quëwengä ingampa. ¹⁶ Ìi inguipoga ìñömō æbänō ì, ante acæimpa. Edæ wënæ wënæ cædäni quïëmë beyæ nani æñinente wædō ì, awinca inte adinque nani æñinente wædō ì, ante wii mönō Mæmpo Wængongui pōñō cæcä ate æñinëñäni. Tömëñäni, Mäincoo nanguï ëamōni imōni aedäni, ante cædäni. Ayæ, Nanguï cæmōni aedäni, ante cædäni. Incæte tōmäa mäñi nani æñinëñō wii mönō Mæmpo Wængongui pōñō cæcä ate æñinente badäni. Wæætë inguipoga ìñömō nē mä cædäni inte quïëmë wënæ wënæ nani cæpämō ante adinque wadäni dobæ wënæ wënæ cæinëñäni badäni. ¹⁷ Inguipoga mönō quëwëñömō incæ mäninguipogaque ante quëwëñäni nani cæinëñō incæ oo pōni dæ baquinō angüënë. Wæætë waocä, Wængongui nänō angainō ante nē ëñente cæcä inte wantæpiyæ wëñämaï quëwëncæcäimpa.

Quinō noingä ante impa, quinō babæ ante impa

¹⁸ Wëñæmïni ëñeedäni. Ìinque baquiönæ mönō äönæ oo batimpa. Mänïönæ ìñonte Codito ingante wacä nē piinte cæcä ìñömō, Botō Codito imopa, ante nē anewëñongä pōnguingä, ante ëñëminitapa. Edæ mäñinō mïni ëñëñinō bai ñowoönæ incæ nanguï ìnani Codito ingante nē piinte cædäni ìñömō, Botō Codito imopa, ante nē anewëñönäni inte edæ do pōñänitapa. Mänōmaï ìi ìniquë edæ, Ìinque baquiönæ do bapa, ante mönō ëñengæimpa. ¹⁹ Mäninäni ìñömō mönō imonte ëmō cæte godänitapa. Incæte tōmëñäni wii nō mönō pōñencabo adocabo ìnämaï ìñänitapa. Edæ mönō pōñencabo adocabodäni ìñänäni inte bai tōmëñäni edæ wadæ godämaï inte mönō tönō ayæ a ongoncædönänitapa. Wæætë do godäni adinque mönō, Mäninäni tōmänäni mönō cabo ìnämaï ìñänitapa, ante edonque pōni acæimpa.

²⁰ Edæ ogui wapæ gadoncadäni encadäni bai mönō Tæiyæ Waëmō ìnogä ìñömō edæ tōmengä Önōwoca ingante munitonga angä pō guicä ate munitō tōmämmïni tōmengä ingante entawënnique, Quinō nō ì, ante ëñëminipa. ²¹ Minitō iminite yewæmōninque botō dicæ, Minitō, Quinō nō ì, ante ëñëñämaï ìminipa, ante yewæmōmogaa. Wæætë edæ, Minitō, Quinō nō ì, ante ëñëminipa, ante adinque

botö mänömai beyæ ante yewæmömopa. Ayæ babæ nani äninö tönö Wængongui nöingä nänö angainö tönö ædö cæte guëa inguinaa, ante ëñëmini adinque botö mänömai beyæ ante yewæmömopa. ²² Babæ ante në änewënongå æcänö ingantawo. Edæ Itota incæ wii mönö Codito ingaingä ingampa, ante në angä iñömö tömengä në babæ änewënongå ingampa. Mäningä wæætë, Botö Codito inömo imopa, ante Codito ingante në piinte cæcä ingampa. Tömengä edæ mönö Mæmpo Wængongui tönö tömengä Wengä Itota Codito nana Mæmpocaya inate Baa angampa. ²³ Ii Wengä onguiñængä ingante Baa äninque, Itota incæ wii mönö Codito ingaingä ingampa, ante në änanö iñömö ædö cæte Mæmpo Wængongui nempo quëwënonäni inguinäni. Wæætë tömengä Wengä ingante æcänö Ao äninque, Itota mönö Codito ingaingä ingampa, ante në angä guiquënë tömengä Mæmpo Wængongui nempo në quëwënongå ingampa.

²⁴ Minitö guiquënë, Quinö angainö, ante wëñëñedë mini ëñengainö ante ñowo godömenque minitö mimönë entawente quëwëedäni. Mäninö ante godömenque entawëmini inte minitö Itota Codito tömengä Mæmpo Wængongui nana Mæmpocaya tömëna nempo cöwë quëwëngüimäni iminipa. ²⁵ Mönö imonte Wængongui, Cöwë cæcæboimpa, ante cædinque iimäi angacäimpa. Minitö wantæpiyæ cöwë wænämai quëwëncæminimipa.

²⁶ Wadäni, Minitö incæ oda cæcæminimipa, ante në cædäni iñönänite botö minitö iminö mäninö ante yewæmömopa. ²⁷ Codito tömengä Önöwoca ingante do pönongä ewocaminipa. Tömengä ingante cöwë ewocaminö iñöminite wacä ædö cæte minitö iminö odömonte apænequingä. Tömengä Önöwoca incæ tömänö ante odömonte apæncä ëñencæminimipa. Ayæ tömengä nänö odömonte apænedö iñömö nö pöni i inique edæ wii babæ äninö impa. Inique minitö tömengä mänömai nänö odömonte apænedinö bai cædinque godömenque mönö Itota Codito nempo quëwëedäni.

²⁸ Mänömai beyæ botö wëñëmini bai imini ëñëedäni. Tömengä nempo godömenque quëwëedäni. Edæ, Tömengä pongä mönö aquionæ mönö guññënamäi ingæimpa, ante cædinque ayæ, Tömengä ponguionæ mönö tömengä weca ongöninque guingo imönämai ingæimpa, ante cædinque godömenque tömengä nempo quëwëedäni. ²⁹ Edæ minitö, Itota Codito nö nänö cæte ingainö ante ëñëmini inique edæ minitö iimäi ante adobai do ëñëmaiminipa. Quinö waa impa, ante në cædönäni tömänäni mempoga ëñagainäni inte Wængongui wëñäni inäni.

3

Wængongui wëñäni

¹ Mönö Mæmpo Wængongui incæ æbänö mönö imonte nangui pöni në waadete pönënongå inte cægacäimpa, ante apænebo ëñëedäni. Edæ mönö imonte, Botö wëmini imini ämopa, ante angacäimpa. Inique näwangä mänimönö imopa. Inguipogaque quëwëñäni iñömö, Mönö Mæmpo Wængongui ingante wii adinque pönënamäi inänitapa. Mänömai beyæ mönö imonte adobai adämai inäni inte bai pönënamäi inäni. ² Botö në waademini ëñëedäni. Nöwoyedë Wængongui wëmö inömo inte mönö ayæ ate æbänö baquimöö, ante ayæ wii edonque amompa. Wæætë, tömengä nänö pöönæ mönö aquionæ tömengä nänö ingai bai mönö adobai bacæimpa, ante ædæmöö ëñëmompa. Edæ tömengä æbänö ingaingä ingäa, ante mönö edonque acæimpa. ³ Edæ, Tömengä beyæninge mänömai bacæimpa, ante në pönente todäni tömänäni, Itota Codito tæiyæ waëmö nänö ingai bai mönö adobai tæiyæ waëmö bacæimpa, ante nämä incæ cædänipa.

⁴ Në wënæ wënæ cædäni tömänäni Wængongui nänö, iimäi cædäni, ante nani yewæmongainö ante Baa ante në ëñënamäi cædäni inäni. Edæ wënæ wënæ nani cægainö incæ Wængonguinque ingante Baa ante nani angainö impa. Mäninö ante nö ante impa. ⁵ Minitö do ëñëminipa. Tömengä edæ mönö wënæ wënæ cægainö ante mönö imonte, Nimpö cæbo quëwëngüimäni, ante cæcæte ante cædinque ëñagacäimpa. Ayæ tömengä wënæ wënæ cædö entawëñëmaingä ingampa. ⁶ Ayæ edæ tömengä nempo në quëwëñönäni tömänäni wii godömenque wënæ wënæ cædäni inäni. Godömenque në wënæ wënæ cædönäni guiquënë tömengä ingante adämai inönäni inte pönënamäi inänäni inäni töö. ⁷ Wëñëmini ëñëedäni. Wacä minitö iminö, Wapiticæ gote oda cæquimäni, ante në mäocæ cæcä ingante gomö aedäni. Wæætë, Quinö waa impa, ante në cæcä guiquënë tömengä Itota Codito nö nänö cæte ingai bai adobai nö cædongä inongampa. ⁸ Në wënæ wënæ cæcä guiquënë wënæ pëingä bai inte adocä nempo quëwëngampa. Edæ wëñëñedë wënæ awënë nänö wënæ wënæ cægai bai cöwë wënæ wënæ cæcampa. Mänömai beyæ Wængongui Wengä iñömö wënæ awënë nänö wënæ wënæ cægainö ante wo ewencæte ante inguipoga ponte ëñagacäimpa.

⁹ Wængongui wëñäni tömänäni wii godömenque wënæ wënæ cæquinäni inäni. Edæ tömëmö guidimö bai minte bai cædinque Wængongui nänö quëwëñö ante da pönongä æninque tömëñäni cöwë entawente quëwëñäni. Tömëñäni edæ Wængongui

wēnāni inte ædō cæte godōmenque wēnæ wēnæ cæquinānii. ¹⁰ Æcānō, Quinō waa impa, ante nō cædāmai īnaa tōmengā wīl Wængonguī wengā ingampa. Ayæ æcānō tōmengā nānō tōniñacā ingante nē waadete pōnēnāmai īnaa tōmengā adobai wīl Wængonguī wengā ingampa. Wængonguī wēnāni ædānidō īnānii, ante ayæ, Wēnæ wēnāni ædānidō īnānii, ante mōnō mānōmai beyænque edonque pōni ēñēmōmpa.

Wacā ingā wacā ingā mōnō waadete pōnengæīmpa, ante

¹¹ Minitō mā mīni pōnēñedē mīni ēñengainō īlmai ante impa. Wacā ingā wacā ingā mōnō waadete pōnengæīmpa. ¹² Minitō Cāinō wodi bai wīl iedāni. Māningā edæ wēnæ nānō pæingā bai ingaingā inte tōmengā nānō tōniñacā ingante nāēmæ wæñongā wængacāīmpa. Ayæ quīnante tōmengā ingante wæñongacāī. Edæ tōmengā nāmā nānō cæinō wēnæ wēnæ cæinonque īñonte, Tōmengā tōniñacā nānō cæinō wæætē nō cæinonque ī, ante adinque mānōmai beyænque Cāinō wodi tōmengā nānō tōniñacā ingante wæñongacāīmpa.

¹³ Botō tōniñamīni ēñēedāni. Ingui-pogaque quēwēnāni mīnitō īmīnite ancaa pīnāni adinque mīnitō wæætē, Quīnante pīnāni, ante wædāmai iedāni. ¹⁴ Mōnō tōniñadāni īnānite nē waadete pōnēmō beyænque, Mōnō nē wænguēñēmō inte mōnō wæætē mīl quēwēmō īmōmpa, ante edonque ēñēmōmpa. Nē waadete pōnēnāmai ingā guiquēñē tōmengā īñōmō mōnō wænguēñēmāmo cōwē ēmō cædāmai ingampa tōō. ¹⁵ Æcānō tōmengā tōniñacā ingante pīna tōmengā īñōmō nē wæñongā bai ingampa tōō. Ayæ, Nē wæñongā īnongā inte tōmengā nānō wantæpiyæ wæñāmai quēwenguīmāmo ante ædō cæte entawente quēwenguīgāā, ante do ēñēmīnīpa. ¹⁶ Nāwangā waadete pōnēninque æbānō cæquīl, ante mōnō īlmai ante ēñengæīmpa. Edæ, Itota Codito nāmā incæ mōnō beyænque wængacāīmpa, ante adinque mōnō, Mānōmai waadete pōnente cæquī impa, ante ēñēmōmpa. Īninque mōnō adobai mōnō tōniñadāni beyænque ante mōnō nāmā incæ Ao āninque wænguēñēmō īmōmpa. ¹⁷ Māincoo nē ēacā īñōmō tōmengā tōniñacā nānō quēwenguīnō ante wīl eyepæ ēacā acā incæte tōmengā ingante waadete cædāmai ingantawo. Edæ nē ēacā incæ ædō cæte Wængonguī nānō waadete pōnēnō entawengā ingantawogaa. ¹⁸ Wēñāmīni ēñēedāni. Mōnō, Waodāni īnānite botō waadete pōnēmō īmōpa, ante tedemō incæte wīl māninō ōnōne mōnō tededō beyæ mōnō nōingā cæte waadete pōnēmō īmōmpa. Wæætē edæ waodāni beyæ godō cædinque mōnō nōingā waadete pōnengæīmpa.

Wængonguī weca ongonte mōnō guīñēnāmai ingæīmpa

¹⁹ Mānōmai cæmōmpa, ante adinque mōnō, Wængonguī nōingā nānō angainō bai quēwēmō īmōmpa, ante do ēñēmōmpa. Ayæ adobai, Tōmengā weca mōnō a ongōñedē nāmā guīñēnāmai incæmōīmpa, ante ēñēmōmpa. ²⁰ Botō pante wæquinque wēnæ wēnæ cæbopa, ante mīmōnē nāmā apænte āmō incæte īlmai ante adobai ēñēmōmpa. Wængonguī edæ wīl mōnō mīmōnē ēñēñō bai īnongā inte tōmengā godōmenque nē ēñēñongā ingampa. Ayæ tōmengā tōmāā ēñengaingā ingampa.

²¹ Botō nē waademīni ēñēedāni. Botō pante wæquinque wēnæ wēnæ cæbopa, ante mīmōnē nāmā apænte ānāmā īmō īninque mōnō Wængonguī weca ongōñinque guīñēnāmai īmaīmōmpa. ²² Ayæ tōmengā, īlmai cæedāni, ante nānō wææ angainō ante ēñente cæmō īninque ayæ, Cæmō adinque tōmengā tocæcāīmpa, ante cæmō īninque tōmengā ingante quīēmē beyæ ante āmō tōmengā wæætē pōnō cæcā æmaīmōmpa. ²³ Tōmengā nānō wææ angainō īlmai impa. Botō Wengā Itota Codito ēmōwo ante pōñēedāni. Ayæ tōmengā mōnō īmōnte, Botō wææ angainō bai wacā ingā wacā ingā waadete pōñēedāni. ²⁴ Mānōmainō ante Wængonguī nānō wææ angainō ante nē ēñente cædāni īñōmō tōmēnāni tōmengā nempo quēwēñōnāni īnānīpa. Ayæ adobai tōmēnāni tōmengā ingante entawēñānīpa. Wængonguī tōmengā Ōñōwoca ingante pōnongā æñimō inte mōnō māningā tōmengā nānō pōnongāiwoca beyæ, Wængonguī ingante entawēmō īmōmpa, ante do ēñēmōmpa.

4

Æcānō ōñōwoca ingante ēwocadāni, ante

¹ Botō nē waademīni ēñēedāni. Wadāni, Wængonguī Ōñōwoca incæ mōnitonga pō guīicā īninque ēwocamōni īmōnīpa, ante nē ānāni incæte mīnitō wīl tōmēnāni nāni ānō pōñēedāni. Wæætē, Tōmēnāni ōñōwoca Wængonguī weca owodīnque pōwocacantawo, ante ēñencæte ante apænte aedāni. Edæ Wængonguī beyænque nē apænēmōnīpa, ante nē babæ ānewēñōnāni nangūl īnāni īmæca quēwēñāni weca godānīpa. ² Mīnitō edæ, Mānīwoca nāwangā Wængonguī Ōñōwoca ingantawoo, ante ēñencæte ante īlmai ante edonque pōni ēñencæmīnīmpa. Edæ, Itota Codito Waocā ēñate pongaingā ingacāīmpa, ante ānāni adinque mīnitō, Tōmēnāni tōmānāni Wængonguī weca nē pōwocacā ingante nē ēwocadāni īnānīpa, ante ēñencæmīnīmpa. ³ Wæætē Itota ingantedō ante adodō ante nē ānāmā īnāni guīquēñē tōmēnāni tōmānāni

edæ Wængongui weca pôwocacä ingante êwocadämai inänipa. Tömênäni nâni nê êwocadongä iñômô tömengä, Itota Codito Waocä êñate pongaingä ingacäimpa, ante ânämai ingampa. Mäningä iñômô Codito ingante nê piinte cædongä iñômô tömengä poncæcäimpa, ante mîni nê êñëningä ingampa. Nôwoönæ incæ tömengä do inguipoga mônô quëwëñômô iñômô pongä атакедäni.

⁴ Wëñæmîni êñëedäni. Wadäni, Codito ingante nê piinte cædönäni iñônänite mînitô Wængongui quimîni imîni inte godömenque tæi êmömîni imînipa. Edæ Wængongui Ôñowoca mîni nê êwocadongä iñômô tömengä godömenque nangui tæi êmongä iñongante wënæ inguipogaque quëwënäni nâni nê êwocadongä guiquënë wædænque tæi êmongä ingampa. Inique mînitô mänînäni nê babæ änewëñönäni inänite Baa ante cædinque godömenque tæi êmömîni inte gänä cædimîni imînipa. ⁵ Mänînäni inguipoga beyænque quëwënäni inte mänömai beyæ inguipoga quëwënäni nâni pönente äno bai tededäni iñônänite inguipogaque ante quëwënäni adodäni inte tömênäni inänite êñëñänipa töö. ⁶ Mönitô Wængongui quimöni imöni iñômönite, Wængongui ingante nê ate pönengä iñômô tömengä mönitô imönite êñengampa. Wæætê Wængongui wengä inämai Inongä guiquënë tömengä mônô imonte êñëñämai ingampa. Mänömai i inique edæ waocä adocanque önöwoca nöingä angä ingante êwocadongä incæ wacä önöwoca babæ angä ingante êwocadongä incæ mônô mänînö beyænque, Æwocadö ii, ante edonque pöni êñëmompä.

Wængongui waadete pönengaingä inte

⁷ Botö nê waademîni êñëedäni. Mônô wacä ingä wacä ingä waadete pönengäimpa. Edæ mônô waadete pönëno incæ Wængongui nänö da pönongainö impa. Tömänäni, Nê waadete pönënanî iñômô Wængongui wëñænäni nâni mempoga êñagaincabo inönäni inte Wængongui ingaingä ingante ate bai pönënanîpa. ⁸ Wæætê nê waadete pönëñämai inäni guiquënë tömênäni Wængongui ingante wii ate bai pönënanî inänipa. Edæ Wængongui nê waadete pönengaingä ingampa. ⁹ Mônô imonte Wængongui nänö waadete pönëmämö iimäi cæte odömongacäimpa. Tömengä edæ, Botö Wengä beyænque quëwëncæmînipa, ante cædinque tömengä Wengä adocanque ingante inguipoga mônô quëwëñômô da pönongä pongacäimpa. ¹⁰ Æbänö waadete pönenguii, ante iimäi impa. Mônô wii Wængongui ingante waadete pönënimö imompä. Wæætê tömengä mônô imonte waadete pönengä ingaingä ingampa. Ayæ, Mônô wënæ wënæ cægäinö ante mônô

imonte Wængongui piinämai incæcäimpa, ante idægoidi cæningä ingante wëñönäni nänö wængai bai Wængongui adobai mônô wënæ wënæ cægäinö beyænque tömengä Wengä ingante da pönongä pöninque mônô beyæ wæætê wængacäimpa.

¹¹ Botö nê waademîni êñëedäni. Wængongui edæ mônô imonte mänömai nê waadete pönengaingä ingampa, ante adinque mônô adobai wacä ingä wacä ingä waadete pönenguëñëmö imompä. ¹² Mônô waocabo tömämö Wængongui ingante cöwë adämai imompä. Incæte mônô wacä ingä wacä ingä waadete pönëmö inique Wængongui ingante entawente quëwëmaimompä. Ayæ adobai wacä ingä wacä ingä waadete pönëmö inique tömengä pönö cæcä beyænque mônô tömengä nänö waadete pönëno ante eyepæ entawente quëwëmompä. ¹³ Mônô tömengä nempo quëwëmö inte tömengä ingante adobai mônô entawente quëwëmompä. Wængongui tömengä Önöwoca ingante mônô imonte pönongä ængamöimpa. Mänömai beyæ mônô mänînö ante do êñëmompä. ¹⁴ Mæmpo Wængongui tömengä Wengä ingante äninque, Inguipoga quëwënäni tömänäni inänite bitö æmi beyænque quëwëngüinäni, ante cæcæbiimpa, ante da pönongä pongantapa. Pongä adinque mönitô nê adimöni inte wadäni inänite mänînö ante apænemöni êñëncædäniimpa. ¹⁵ Æcänö, Itota Codito Wængongui Wengä ingaingä ingampa, ante äna iñômô tömengä Wængongui ingante entawente quëwengampa. Tömengä adobai Wængongui nempo quëwëngä ingampa.

¹⁶ Ayæ mänîi beyæ Wængongui mônô imonte waadete pönengampa, ante mônô nê êñëñômö inte edæ ædæmö pönëmö imompä. Wængongui iñômô nê waadete pönengaingä ingampa. Tömänäni nê waadete pönente quëwënäni iñômô tömênäni Wængongui nempo quëwënänîpa. Wængongui ingante adobai tömênäni entawente quëwënänîpa. ¹⁷ Wængongui nänö waadete pönëno ante ædæmö entawëmö inique mônô godongämæ waadete pönëmö beyæ tömengä apænte angüionæ iñonte guñëñämai inguimö imompä. Edæ Mæmpo Wængongui nempo Itota nänö quëwëngä bai mônô imæca quëwëninque adobai quëwëmö inte mänîñedë guñëñämai inguimö imompä. ¹⁸ Nê waadete pönengä iñômô tömengä guñëñämai ingampa. Wæætê edæ tömengä nänö waadete pönëno æmæwo pæte bai eyepæ ba inique tömengä nê waadete pönengä Inongä inte ædö cæte guñëngüingäa. Nê guñëngä guiquënë tömengä nänö pante wæwëngüinö incæ do pante bai wæwëngä ingampa. Tömengä nänö waadete pönëno ante wii eyepæ ba inique tömengä æmæwo

pædämaï bai ingampa.

¹⁹ Wængongui edæ mönō imonte täno waadete pönengacäimpa. Mänōmaï beyæ mönō wæætē waadete pönēmō imompa. ²⁰ Botō Wængongui ingante nē waadete pönēmō imopa, ante nē angä iñōmō tömängä wæætē tömängä tōniñacä ingante nē piinte ingä ininque tömängä babæ änewēnongä ingampa. Edæ mäningä nänō tōniñacä ingante nē adingä incæ tömängä ingante waadete pönēnāmaï ingä incæte adocä Wængongui ingante nē adāmaï iningä incæ ædō cæte tömängä ingante waadete pönengugää. ²¹ Ayæ, Iïmaï cæedäni, ante Itota Codito mönō imonte Iïmaï angacäimpa. Tömämīni Wængongui ingante nē waadete pönēmīni inte mīnitō tōniñadäni inänite adobaï waadete pönenguēnēmīni imīnīpa.

5

Inguipogaque nāni quēwēnō ante mönō Baa angcäimpa

¹ Tömänāni Itota ingantedō ante, Mönō Codito ingaingä ingampa, ante nē pönēnāni inte Wængongui wēnāni nāni mempoga ēñagaincabo inānīpa. Ayæ tömānāni Mæmpocä ingante nē waadete pönēnāni iñōmō tömēnāni adobaï tömängä Wengä ingante waadete pönēnānīpa. ² Mönō Wængongui wēnāni inänite waadete pönēmō imōō, ante ēñencæte ante Iïmaï ante do ēñēmompa. Wængongui ingante waadete pönēmō ininque ayæ tömängä, Iïmaï cæedäni, ante nänō wææ angainō ante ēñente cæmō ininque mönō, Nē waadete pönēmō imompa, ante ēñēmaïmompa. ³ Wængongui ingante mönō waadete pönēnō iñōmō Iïmaï ante impa. Wængongui, Iïmaï cæedäni, ante nänō wææ angainō ante mönō ēñente cæcæimpa. Edæ mänīnō ante, Iïmaï cæedäni, ante nänō wææ angainō ante ēñente cædinque mönō wīi teēmē mongænte bai baquinque cæmompā. ⁴ Edæ Wængongui wēmō mempoga mönō ēñagaincabo iñōmō mönō tömāmō inguipogaque ante nāni quēwēnō ante Baa äninque godōmenque tæï emonte gänä cæmompā. Inguipogaque ante nāni quēwēnō ante mönō godōmenque tæï emōmāmo iñōmō Iïmaï ante impa. Wængongui ingante mönō wede pönēnō beyænque mönō godōmenque tæï emōmō inte gänä cæmompā. ⁵ Inguipogaque ante nāni quēwēnō ante Baa ancæte ante æcänō godōmenque tæï emongä inte gänä cæcantawoo. Edæ Itota Wængongui Wengä ingaingä ingampa, ante nē pönenganque tömängä godōmenque tæï emōnongä ingampa.

Wængongui Wengä ingantedō ante nō ante impa

⁶ Nē æpænē guiite pongaingä iñōmō nāmā wepæ petæ petæ wæænte nē gogaingä iñōmō mäningä iñōmō Itota Codito inongä ingacäimpa. Tömängä wīi æpænenque inte pongacäi wæætē æpænē inte ayæ nāmā wepæ inte pongacäimpa. Ayæ Wængongui Önōwoca incæ tömenganque mänīnō ante, Nō ante impa, ante nē apæneca ingacäimpa. Edæ Wængongui Önōwoca nē nōingä inongä ingampa. ⁷ Edæ mēa go adoque inäni mänimpodäni, Nō impa, ante apænete bai nē änäni inänīpa. ⁸ Edæ Wængongui Önōwoca incæ æpæ incæ wepæ incæ mēa go adoque mänimpodäni incæ, Nō impa, ante nē apænedäni mæ õiompa. Mänimpodäni iñōmō quiēmē äninque adodō ante nē apænedäni inänīpa. ⁹ Quiēmē ante waocä incæ, Nō impa, ante nänō apænedinō ante do ēñēmompa. Quiēmē ante, Nō impa, ante Wængongui nänō apænegainō guiquēnē godōmenque waa pōni impa. Edæ Wængongui tömenganque nänō apænegainō impa. Edæ tömängä Wengä ingantedō ante Wængongui, Nō pōni impa, ante nänō apænegainō impa töō. ¹⁰ Æcänō Wængongui Wengä onguñængä ingante nē wede pönēna iñōmō tömängä, Nō impa, ante Wængongui nänō apænegainō ante entawente quēwengampa. Wæætē edæ æcänō Wængongui nänō apænegainō ante wīi pönēna guiquēnē tömängä Wængongui ingantedō ante, Babæ änogä ingänō, ante nē angä ingampa. Edæ Wængongui tömängä Wengä ingantedō ante, Nō impa, ante nänō apænegainō ante mäningä iñōmō pönēnāmaï ingampa töō. ¹¹ Ayæ mänīnō ante tömängä, Nō impa, ante nänō apænegainō ante Iïmaï ante impa. Mönō imonte Wængongui, Mīni wantæpiyæ cōwē quēwenguinō, ante pönongä æntamompa. Mänīnō mönō quēwenguinō ante tömängä Wengä nē quēwēnongä inte mönō imonte pönongä ænīmō inte entawente quēwēmompa. ¹² Tömängä Wengä nempo nē quēwängä iñōmō tömängä wantæpiyæ nänō quēwenguinō do entawente quēwengampa. Wængongui Wengä nempo nē quēwēnāmaï ingä guiquēnē tömängä wæætē wantæpiyæ nänō quēwenguinō ænāmaï ingampa.

Wäo inque nänō angainō

¹³ Mīnitō Wængongui Wengä emōwo ante nē pönēmīni iñōmīnite botō mänīnō ante yewæmōmo aedäni. Mīnitō edæ wantæpiyæ cōwē mīni quēwenguinō do entawente quēwēmīni iñōmīnite botō, Æñencæmīnimpa, ante yewæmōmopa.

¹⁴ Iïmaï beyænque Wængongui weca guñēnāmaï pōmō imompa. Mönō quiēmē æncæte ante tömängä ingante apænedinque tömängä nänō äno bai ante apænemō ininque tömängä mönō imonte ēñēmaingampa.

¹⁵ Ayæ, Mönö imonte nē ēñēnongä ingampa, ante ēñēmō inique mönö, Quiēmē ante apænemō ēñēninqe tōmengä mäninö mönö äninö ante do pōnongä æmō imompa, ante ēñēmaimompa.

¹⁶ Minitö mīni tōniñacä wēnæ wēnæ cæcä incæ wīi tōmengä nänö æmæwo wænguinqe wēnæ wēnæ cæcä amīnitawo. Mänömaī cæyongante nē adingä iñōmō mäningä beyæ ante Wængonguī ingante apænecæcäimpa. Apænecä ēñēninqe Wængonguī tōmengä ingante wantæpiyæ nänö quēwenguīnō pōnongä æncæcäimpa. Edæ pancadāniya wēnæ wēnæ nāni cædincoo mongæñāni incæ wīi tōmēnāni nāni æmæwo wænguinqe wēnæ wēnæ cædānīpa, ante botō mēnānīnīque inānitedō ante apænebopa. Wæætē edæ waocä Wængonguī Tæiyæ Waēmō Önōwoca ingante ancaa Baa Baa äninque tōmengä nänö æmæwo wænguinqe nē wēnæ wēnæ cæcä ingampa. Inique botō, Mänömaī Baa äninque nē wēnæ wēnæ cædingä beyæ ante Wængonguī ingante apænecæimpa, ante änämaī imopa. ¹⁷ Quiēmē wīwa cæmō mēnānō tōmānō wēnæ wēnæ mönö cædō impa. Wæætē wēnæ wēnæ cæmō incæte wīi tōmānō mönö wēnæ wēnæ cædō beyæ mönö nē wænguēnēmō bamompa. Pancaa beyænque nē wænguēnēmō bamompa.

¹⁸ Wængonguī wēnāni nāni mempoga ēñagaincabo iñōmō godōmenque wēnæ wēnæ cædāmaī inānīpa, ante ēñēmompa. Edæ Wængonguī Wengä ēñagaingä inte tōmēnāni inānite wææ cædongä ingampa. Ayæ wēnæ incæ tōmēnāni inānite gampodāmaī inongä ingampa. ¹⁹ Wængonguī wēmō imō imompa, ante ēñēmompa. Wæætē wadāni edæ inguipogaque ante nē quēwēnāni guiquēnē tōmēnāni tōmānāni wēnæ awēnē nempo quēwēnānīpa, ante ēñēmompa. ²⁰ Wængonguī Wengä do pongä ingacäimpa. Ayæ Wængonguī nē nōingä ingaingä ingante ate bai pōnencæminīmpa, ante cædinque tōmengä mönö imō pōnō odōmongä ate ēñēmompa. Tōmengä mänömaī cæcampa, ante adobai ēñēmompa. Ayæ tōmengä nē nōingä ingaingä iñongante mönö tōmengä Wengä Itota Codito nempo quēwēmompa. Itota Codito nō Wængonguī ingaingä ingampa. Ayæ tōmengä wantæpiyæ cōwē nē quēwengä ingaingä inte pōnō cæcä beyænque mönö adobai wantæpiyæ quēwēmō imompa. ²¹ Botō wēñæmīni bai imīni ēñēedāni. Wadāni, Mōnitō wængonguīdi impa, ante nāni cōnōnincoo weca godāmaī iedāni, ämopa. Mänīnque ante yewæmōmopa.

2 Wäo cadota ante nänö ayænta yewæmongainta

Nöinö mönō äno ante ayæ mönō waadete pönēnō ante

¹ Minitō Wængonguī ingante mīni pönencabo iñōmīnite botō nē aabo Picæmo mīni äno mo inte yewæmōmopa. Minitō badā nāni wencabo bai iñōmīnite tōmengā mīnitō imīnite apænte ængacāimpa. Botō mīnitō imīnite nō waadete pönēmopa. Wīi botonque waadete pönēmīni inte wæætē mönō Codito nōingā nāno waa pōni angaiñō ante nē ēñēnīnāni adobai tōmēnāni tōmānāni nāni nē waadete pönēmīni iñōmīnite yewæmōmo aedāni. ² Edæ mönō nē Nōingā nāno waa pōni angaiñō ante entawente quēwēmō inte mönō cōwē iñmpo cædāmaī entawencæmōimpa. ³ Nē Mæmpocā Wengā Itota Codito tōnō Mæmpo Wængonguī tōmēna godongāmæ waadete pōnō cædinque, Quēwencæmīnimpa, ante mönō imonte waadete waa cæda beyænque mönō gānē entawencæmōimpa. Iñinque mönō nē nō pönēmō inte mānīnō ante cōwē entawente quēwēnōmō inte mönō wacā ingā wacā ingā waadete pönēmō incæmōimpa.

⁴ Mæmpo Wængonguī mönō imonte nāno, Iīmaī cæedāni, ante nāno wææ angaiñō bai ēñente cædinque mīni pönencabo iñōmīni botō, Pancadāniya nōinō cægonte bai quēwēnānipa, ante ēñēnīmo inte nanguī tobopa. ⁵ Nōwo iñōmō mīnitō imīnite ämo ēñēedāni. Minitō Wængonguī ingante mīni pönencabo iñōmō wacā ingā wacā ingā waadete pönēedāni ämopa. Botō nōwo mānōmaī äninque wīi tōmēmo wææ äno ante yewæmōmopa. Wæætē Awēnē do wææ nāno angaiñō ante wēēnēñedē mönō ēñente ængaiñō ante adodō ante yewæmōmo aedāni. ⁶ Nē pönēnāni inānite mönō waadete pönēnō iīmaī impa. Mönō Codito, Iīmaī cæedāni, ante nāno wææ angaiñō ante ēñente cædinque mönō quēwengæiñmpa. Minitō wēēnēñedē do mīni ēñēnīnō bai wææ äninque tōmengā, Minitō cōwē waadete pönente quēwēedāni, angacāimpa.

Waadāni oda cæcæedānimpa, ante nē cædāni

⁷ Waodāni edæ oda cæcæedānimpa, ante nē cædāni nanguī ināni imæca quēwēnāni weca gote mæ ongōnānimpa. Mānīnāni iñōmō Itota Codito Waocā ēñate pongaingā ingampa, ante änāmaī nē ināni inānipa. Æcānō tōmēnāni bai nē ingā, Waodāni edæ nāni oda cæquinque, ante nē cæcā ingampa. Ayæ, Botō Codito imopa, ante Codito ingante

pīinte cædongā ingampa. ⁸ Minitō iñōmō nāmā wææ aaedāni. Quiēmē cæcæte ante mīni cædinō ante mīnitō, Wē womōnāmaī ingæiñmpa, ante cædinque wææ cæedāni. Wæætē mīni cædinō beyæ Wængonguī nāno pōnonguincoo tōmancoo eyepæ pōnongā æncæte ante cæedāni.

⁹ Nē pönengā Itota Codito nāno odōmonte apænegaiñō ante nē ēñēningā incæ wīi godōmenque ēñente cædinque wadō ante wadæ gocā iñōmō tōmengā ædō cæte Wængonguī tōnō godongāmæ quēwenguingā. Wæætē Itota Codito nāno odōmonte apænegaiñō ante godōmenque nē ēñente cædongā iñōmō tōmengā iñōmō Mæmpocā tōnō ayæ tōmengā Wengā tōnō godongāmæ quēwengampa. ¹⁰ Wacā mīnitō weca pōninque mānīnō Codito odōmonte apænedīnō ante odōmonte apænedāmaī ingampa, ante adinque mīnitō tōmengā ingante, Botō oncōnē pō guīie, ante änāmaī iedāni. Ayæ, Waa quēwente pōmi, ante änāmaī iedāni. ¹¹ Edæ adocā ingante æcānō, Waa quēwente pōmi, ante äna tōmengā māningā wēnæ wēnæ cæyongante tōmengā tōnō guēa cæte bai cæcampa.

Wäo iñinque nāno angaiñō

¹² Botō mīnitō imīnite godōmenque nanguī äinente wæbo incæte mīncayonta inte wentamōmæ yewæmōimæ inte wīi yewæmōinēmopa. Wæætē mīnitō weca ēñacæ pōinēmo imopa. Ayæ mīnitō tōnō awincadō awinca adinque botō apæneinēmo imopa. Mānōmaī cædinque botō, Mönō godongāmæ eyepæ pōni watapæ tocæmōimpa, ante cæbopa. ¹³ Mōnitō tōnīñamīni ēñēedāni. Wængonguī ingante mōni pönencabo tōmengā nāno nē ængaiñmōni inte mōnitō iñōmō mīni pönencabo iñōmīnite, Waa quēwēedāni, ämōnipa, ante yewæmōmopa.

3 Wäo cadota ante nänö tömanta yewæmongainta

Gayo ingante Wäo nänö waa apænedö

¹ Gayo botö nê waadebi eñëmi. Bitö botö nê nō waadete pönëmi iñömite botö nê aabo Picæmo mini änömo inte, Acæbiimpa, ante yewæmömopa.

² Botö nê waadebi eñëmi. Tömëmi önowoca incæ waa êwocate quëwëmi bai bitö baonga adobai waa eñabi quëwencæbiimpa, äninque ayæ, Bitö quëwenguinö ante bitö cöwë waa pöni quëwencæbiimpa, ämopa.

³ Mönö tönifadäni pancadäniya iñömö pöningue, Gayo iñömö Itota Codito nō pöni nänö angainö ante cöwë nō pönëninque cæcampa, ante apænedänitapa. Ayæ, Gayo ñowo godömenque nöinö cægonte bai quëwengä ingampa, ante apænedäni eñëninque nangui pöni totabopa. ⁴ Botö wëmini bai imini iminitedö ante, Itota Codito nō pöni nänö angainö bai tömënäni nöinö cægonte bai quëwënäni inänipa, ante apænedäni eñëninque botö godömenque watapæ toquinque impa.

⁵ Botö nê waadebi eñëmi. Mönö tönifadäni incæ bitö nê tæcæ adinani inäni incæte bitö quinö tömënäni beyæ ante cædinque cöwë pönëninque ædæmö cæbi imipa. ⁶ Codito ingante godongämæ möni pönencabo iñömönite mäninani wæætë, Gayo nê waadete pönengä ingampa, ante mönitö imönite apænedäni eñentamönipa. Tömënäni Wængongui ingante nê cædäni inänipa cæbi. Bitö tömënäni inänite godö cæbi æninque gomonga godäni iñinque waa imaimpa. ⁷ Edæ tömënäni iñömö Itota emöwo beyænque tao godänitapa. Mänömai goyönänite nê eñënamai cædäni dicæ pönönäni ænänitawogaa. ⁸ Mänömai beyæ mönö Wængongui nöingä nänö angainö ante tömënäni tönö godongämæ cæcæimpä, ante cædinque mäninani bai inäni mönö oncö pönäni adinque mönö, Pö guuite cænte möedäni, angüenëmö imopä.

Diotedepeto tönö Deëmetedio

⁹ Codito ingante mini pönencabo iñömönite botö munitö iminite do yewæmontabopa. Incæte Diotedepeto iñömö, Botö nê awënë imopä, ante nê cæinëngä inte mönitö imönite Baa äninque nänënë cæcä ingampa.

¹⁰ Munitö weca botö pöningue tömengä quinö nänö cædö ante edonque pöni apænebo eñencæminimpa. Edæ tömengä mönitö imönitedö ante önonquedö ante wënæ wënæ apænecampa. Ayæ mäninö ante wii eyepæ impä, ante pönente ingä iñinque tömengä edæ mönö tönifadäni pönäni adinque, Pö

guuite cænte möedäni, änämai ingampa töö. Wädäni guiquënë, Pö guuite cænte möedäni, ancæte ante nê cæinënäni inänite tömengä adobai, Cædämai iedäni, ante wææ angä ingampa. Ayæ mänömai cædäni adinque tömengä, Mönitö Codito ingante möni godongämæ pönencabo iñömönite munitö gobæwedäni, angampa cæbi.

¹¹ Botö nê waadebi eñëmi. Quinö wënæ wënæ i adinque bitö adodö cædämai ie. Wæætë quinö waa i adinque adodö cæe. Quinö waa impä, ante nê cædäni iñömö Wængongui wënäni inänipa. Quinö wënæ wënæ impä, ante nê cædäni guiquënë Wængongui ingante adämai inänipa.

¹² Deëmetedio ingantedö ante tömänni waa apænedänipa. Wængongui nöingä nänö quëwënö bai Deëmetedio adobai nöinö cæte quëwëngä ingampa, ante acæimpä. Mönitö adobai tömengä ingante ante waa apænemöni imönipa. Ayæ tömengä ingantedö mönö äninö nō impä, ante do eñëmipa.

Wäo iñinque nänö yewæmongainö

¹³ Munitö iminite godömenque nangui äinente wæbo incæ yewæmöingö inte wentamömæ yewæmöimæ inte wii yewæmöinëmopa. ¹⁴ Wæætë bitö weca wantæ iñö pöningue botö ainëmö imopä. Pömo ate botö bitö tönö awincadö awinca adinque apænecæmönaimpa.

¹⁵ Bitö piyænë cæte quëwencæbiimpa, ämopa. Mönö æmigoidi iñömö quëwënäni bitö imite, Waa quëwencæbiimpa, ante apænedänipa. Mönö æmigoidi bitö weca quëwënäni tömänni inänite wæætë bitö adocanque ingante adocanque ingante apænedinque, Waa quëwencæbiimpa, ante botö beyæ apænëbi eñencædänimpa, ämopa. Mäninque ante yewæmömopa.

Codaa cadota ante nānō yewæmongainta

*Waa quēwencæminimpa, ante Codaa
yewæmongampa*

¹ Botō Itota Codito ingante nē cædōmo inte Tantiago tōniñabo Codaabo inōmo imopa. Mæmpo Wængongui mīnitō iminite waadete pōnēninque aa pecā pōmīni ininque mīnitō Itota Codito nempo nē ongōmīni iñōmīnite botō, Acæminimpa, ante yewæmōmopa. ² Wængongui waadete pōnō piyæñē cæcā ininque mīnitō tōmengā nānō gāñē entawēnō ædæmō entawēninque nanguī waadete pōnente waa cæte quēwencæminimpa, ante yewæmōmopa.

*Babæ ante nē odōmonte apænedāni
(2 Pegodo 2.1-7)*

³ Botō nē waadedōmīni eñēedāni. Botō, Codito ængā beyæñque mōnō quēwēmāmo æbānō ī, ante quingæ yewæmoncæte ante cæyōmote wadāni wēnæ wēnæ cædāni ate wædinque botō, Mīnitō wææ cædāni, ante yewæmonguēnēmo batabopa. Wængongui quimō iñōmonte tōmengā iñōmō, Wede mīni pōnēnō ante pōnōmo æninque mīnitō cōwē wææ aædāni, ante æmæwo pōnī pædæ pōnongā ænte entawēmōmpa. Ininque botō wæætē, Wede mīni pōnēnō ante wææ cæcæminimpa, ante yewæmonguēnēmo intabopa. ⁴ Wængongui, Botō imote nē Baa ānāni nāni pante wæquinque wentamō mongænānīpa, ante tōmēnāni inānite apænte āninque piingampa, ante do yewæmongatimpa. Tōmēnāni iñōmō mīnitō weca do awēmō pōnānīpa cæmīnīi. Wængongui pōnō waadete nānō cægāinō ante tōmēnāni wapiticæ cædinque, Mīnitō baonque towenque mīni cæinēnō ante ōnonque cæcæminimpa, ante cædinque Wængongui waadete pōnō cæcampa, ante babæ ante odōmonte apænedānīpa. Ayæ Itota Codito adocanque mōnō Tæiyæ Awēñē iñongante tōmēnāni iñōmō tōmengā ingante Baa ānānīpa.

⁵ Mīnitō wæætē tōmānō ante eñēnimīni iñōmīnite botō, Do mīni eñēnīnō ante wæætē wæætē adodō ante pōnencæminimpa, ante cædinque adodō ante yewæmoncæ cæbo aedāni. Dodāni Equitobæ quēwēñōnānite mōnō Awēñē ænte māocā godāni ate tōmengā nē wede pōnēnāmaī ināni inānite edæ, Ōmæ, ante capo wæñongā wængadānīpa. ⁶ Ayæ anquedoidi nē awēñēidi inōnāni incæ pancadāniya tōmēnāni nāni aagāinō incæ ñimpo cædinque tōmēnāni nāni quēwengāiñōmō emō cædinque wadæ gogadānīpa. Adinque Wængongui, Botō

apænte anguiōnæ iinque bayonte tōmēnāni inānite botō pancæboimpa, ante ñōwo iñōmō gæguincamenca wodāmaī inguimenca tæī goti wīnīnque tōmēnāni inānite wēmō iñōmō mangui tee mōnete wææ cæcampa. ⁷ Ayæ Todōmā iñōmō quēwengāinī tōnō Gōmoda iñōmō quēwengāināni eyequeī godongāmæ nāni quēwengāincabo nāni quēwengāincabo tōnō adobai wēnæ wēnæ cædinque nānōogængā ināmaī iñongante godō mōninque ayæ godōmenque quingāmē bai wīwa tote quēwengadānīpa. Mānōmaī cæte quēwēnāni ate Wængongui angā gonga wæætē tī wocæno gonte æmæwo wængadānīpa. Mānōmaī godō pangā nāni wængaī bai ante odōmōninque Wængongui, Nē wēnæ wēnæ cædāni adobai gonga cōwē yædæ yædæ bæcōyōmō caate wæquinānidō anguēñē, ante mōnō imonte odōmoncæte ante cægacāimpa.

⁸ Ayæ wīlīmonte bai mā pōnente nē odōmonte apænedāni iñōmō ñōwo mīnitō weca pōninque dodāni nāni cægāī bai adobai pōnī cædānīpa. Wīwa cædinque tōmēnāni wentamō mongænte bai edæ baō ñōmængui eñadānīpa. Awēñēidi inānite edæ Baa ānānīpa. Ayæ anquedoidi ōñædē ñāō iñōmō quēwēnāni inānite edæ babæ āninque wēnæ wēnæ ante tedewēnānīpa. ⁹ Incæte anquedo awēñē Miiguedo incæ tōmēnāni piinte nāni tedewēnō bai adobai tededāmaī ingacāimpa. Mōitee wodi baō inī adinque anquedo Miiguedo tōnō wēnæ awēñē iñōmō edæ, Æbānō cæquī, ante guædō guæa angadāimpa. Añōnate Miiguedo iñōmō, Botō nē apænte anguēñēmo imopa diyæ anguimoo, ante pōnēninque guīfente wædinque wēnæ awēñē ingante, Wēnæ wēnæ cæbīpa tōō, ante piinte ānāmaī ingacāimpa. Wæætē, “Wængongui incæ bitō imite Baa angā eñencæbīimpa,” angacāimpa. ¹⁰ Nōwodāni iñōmō tōmēnāni adāmaī inte nāni eñēnāmaī inōnō ante edæ piīninque do wīwa tedewēnānīpa. Wæætē babæidi nāni eñēnonque ante eñēninque tōmēnāni māninonque ante nāni cædō beyæ wænte nāni ñōmænguinque godōmenque quingāmē bai cædānīpa.

¹¹ Tōmēnāni edæ nāni Ca ca wæquinque baquīnō anguēñē. Cainō wodi nānō gogāinō incæ edæ do godānīpa. Ayæ Badāō wodi, Nanguī æncæboimpa, ante cædinque tōmengā nānō oda cægāinō incæ tōmēnāni iñōmō adodō ante pogodo godinque, Godōmenque nanguī æncæboimpa, ante oda cædānīpa. Ayæ Codee wodi, Awēñēidi inānite wido cæcæimpa, ante nānō cægāinō bai cædinque ñōwodāni nāni wænguinque adobai cædānīpa.

¹² Mīnitō waadete pōnēninque godongāmæ ponte cæñōmīni iñāni iñōmō guīñēnāmaī inte adoyōmō ponte cænānīpa. Mīnitō

tönö godongämæ ongönäni beyænque mīni cabo wentamō baate bai ēmōmīni awædō. Tömēnāni, Nē aawēmōni imōnīpa, ante babæ apænedinque nē cænināni bai ināni inānite pædæ godōnāmai ināni inte tōmēnāniq̄ ade cænte bai cædinque wīi nōinō ante odōmonte apænedānīpa tōō. Ayæ waodāni, Cōōnæ cæ tobaimpa, ante wæyōnānite boguimancoo cōōnæye ēmōñonte woboyæ pō wido cæ bai cædinque tōmēnāni nāni, Pōnōmōni æncæmīnīpa, ānīnō ante pōnōnāmai inte edæ babæ cædānīpa. Ayæ awæ incayedē ōmæcawæ i adinque do bæ wite mēmpoga wæniwæ bai ināni inte tōmēnāni mēmpoga wænte bai ināni inte, Pōnōmōni cæncæmīnīpa, ante nē babæ ānewēnāni inānīpa. ¹³ Ayæ gāwapæno tadōmēngadæ ompota ōñōñō mængonta mængonta cædinque ompota yabæ tayōnōi edonque ōñō ai bai tōmēnāni wīwa cæyōnāni wentamō nāni entawēnō adobai edonque pōni ongō acæīmpa. Ayæ nēmō adodonque goquēnē incæ oo tobæ wæænte wēmō ba bai tōmēnāni adobai oda cæte wapiticæ godāni inte edæ tōmēnāni nāni cōwē tadāmai wæwēnguinque mæ māmonte bai iñōmō edæ godāni inānīpa.

¹⁴ Ayæ Adāō wodi nānō mōmōidi wææ nānō mōmōidi wææ nānō mōmocā ingaingā inte Ēnoco iñōmō tōmēngā Wængonguī beyæ apænedinque dodāni babæ ante nē odōmonte apænedāni inānitēdō ante iīmāinō ante apænegacāīmpa. “Mōnō Awēnē pongā apa quēwēnānīi. Ayæ tōmēngā quīnāni tæiyæ waēmō ināni adobai mūido ganca mānimpodāni pōñōnānite adopo edæ pō pō cædinque ōnōmpo tipæmpoga mānimpoga pōnāni inte bacoo ināni mōnō Awēnē tōnō godongāmæ poncædānīpa. ¹⁵ Tōmēngā mānōmai pōninque edæ tōmāmō i Monte apænte ancæcāīmpa. Wængonguī ingante nē Baa ānāni inānite tōmēngā, Mīnitō mīni wæwente baquinque botō i Monte Baa ānīnque edæ ēñēnāmai cæmīnīpa tōō, ancæcāīmpa. Ayæ, Mīni nē Baa ānōncabo inōmīni inte mīnitō mīni wæwente baquinque edæ botō i Monte pīinte ānīnque wīwa āmīnīpa. Āmo ēñēmāimīnīpa, ante edonque apænecæte ante mōnō Awēnē poncæcāīmpa.” Mānōmāinō ante Ēnoco wodi wēñēñedē pōni angacāīmpa. ¹⁶ Nōwodāni æbāmē cædāni incæ nē babæ ante odōmonte apænedāni iñōmō, Quimæ quēwēē, ante pīinīnque piyænē cædāmai inānīpa. Taadō ante tōmēnāni nāmā nāni cæinēwēnonque ante tee empote godānīpa. Botō godōmēnque waa pōni cæbo aedāni, ante nāmā ængō cædinque tedewēnānīpa. Ayæ, Wadāni mōnitō wædō ante pōnō cæcædānīpa, ante babæ cædinque tōmēnāni wadāni inānite waa ate bai tededinque waa pōni cæte bai godō

apænedānīpa cæmīnīi.

Nē pōnēmīni iñōmō iīmāi cæcæmīnīpa, ante

¹⁷ Mīnitō guiquēnē botō nē waademīni ēñēedāni. Mōnō Awēnē Itota Codito nānō nē da godongaināni incæ, Ēbānō baquīi, ante nāni apænegainō ante iīmāinō ante pōnēedāni. ¹⁸ Tōmēnāni iñōmō mīnitō iīmīnīte apænedinque, “Wodo iīmæca iinque bayonte edæ wadāni nāmā nāni tōinēwente godōnō ante goquīnāni incæ Wængonguī ingante Baa ante badete toquīnāni inōnāni inte edæ do poncædānīpa,” ante apænedāni ēñēmīnitapa. ¹⁹ Iināni nē badete todāni iñōmō Wængonguī Ōnōwoca ingante ēwocadāmai ināni inte edæ nāmā nāni cæinēnō ante ēñēnte cædānīpa. Mīnitō adocabomīni iñōmīnīte tōmēnāni, Nānēneto nānēnē gocæmīnīpa, ante cædinque pā cæte bai cædāni inānīpa.

²⁰ Botō nē waadedōmīni edæ iīmāi cæedāni. Mīnitō mōnō Tæiyæ Waēmō pōni inongā ingante wede pōnēmīni inte mānīnō mīni wede pōnēnō incæ dica tæi gō cæte ongonca bai impa. Ante adinque mīnitō oncō dicaboga mænonte bai edæ tæi pīñæninque godōmēnque cæedāni. Ayæ Wængonguī Tæiyæ Waēmō Ōnōwoca ingante ēwocadinque mīnitō, Tōmēngā æbānō angāā, ante ēñēninque mānīnonque ante Wængonguī ingante apæneedāni. ²¹ Mīnitō, Mōnō Awēnē Itota Codito pōnō waadete waa cæcā beyænque mōnō wæñāmai inte cōwē wantæpiyæ quēwēngæīmpa, ante æncæte ante wānō cōmīnitawo. Iinīnque Wængonguī nē waadete pōnēngā nēmpo cōwē waadete pōnēninque ongōedāni.

²² Pancadānīya guiquēnē, Wabānō quēwēngūimoo, ante guīñente wæyōnānite mīnitō tōmēnāni inānite pīinte adāmai inte godō waadete waa cæedāni. ²³ Pancadānīya guiquēnē gonga bæcōyōmō oo goquīnāni iīmāi impa, ante adinque mīnitō wæætē, Quēwēncædānīpa, ante odōmonte apænedinque tōmēnāni inānite ō æmīni beyænque quēwēncædānīpa. Wadāni guiquēnē wīwa cædāni inte nāmā baō wentamō mongænte bai ēñāyōnānite mīnitō, Nāate wæcæ wæ, ante guīñente wædinque tōmēnāni weocoo nāni nāadincoo incæ gampodāmai inte tōmēnāni beyæ wæætē waadete godō waa cæedāni.

Wængonguī waēmō pōni ēmōnongā ingampa, ante

²⁴ Mīnitō tæ go wæænte bai oda cædāmai incæmīnīpa, ante Wængonguinque eyepæ pōni inongā inte tōō æmængā ate mīnitō adiyæ ongonca bai wede pōnencæmīnīpa. Ayæ tōmēngā adocanque eyepæ pōni cædongā inte pōnō badongā ate mīnitō

waīmīni bamīni īnīnque mūnitō nangūi pōnī
 mīni watapæ toquinque tōmengā nānō
 ñāō ēmōñōmō ænte mæicā æicæmīnīmpa.
 25 Wængonguī adocanque pōnī īnongā inte
 mōnō īmonte, Quēwencæmīnīmpa, ante nē
 Ængaingā ingampa. Īnīnque Itota Codito
 mōnō Awēnē nānō cægainō beyænque eyepæ
 bate quēwēmō īñōmō mōnō īimainō ante
 apænecæīmpa. Wængonguī ēñēmi. Bitō
 badongaincoo dæ āñonte wēēnē īmāmoque
 īñonte ñōwopāmo īñonte wapāmo mīmāmo
 īnīnque bayonte bitō adobique cōwē ñāō
 entawente tæi ēmōnīnque Awēnē nē tæi
 pīñæmi īnōmi inte tōmāo īñōmō quēwēnāni
 īnānite nē Ānōmi īmidō anguēnē, ante mōnō
 apænecæīmpa. Mānōmai baquīnō anguēnē,
 ante botō, Amēē, āmopa.

Wäo ingante Itota Codito Nänö Odömongainö

Wäo wüimonte bai nänö adi, ante yewæmongainö

¹ Wëenënedë quinä wë wodonte bai ingatimpa, ante Itota Codito nänö odömongainö ante yewæmonte impa. Wængongui iñömö, Wantæ iñonte quinä bai baquüi, ante, Itota tömengä ingante në cædäni inänite odömoncæcäimpa, ante cædinque Itota Codito ingante edonque odömongä agacäimpa. Ayæ Itota Codito wæætë tömengä anquedo ingante, Bitö Wäo botö në cæcä weca godinque odömöi acæcäimpa, ante da pönongä ponte odömongä atabopa. ² Botö Wäömo guiquënë, Quinä botö adinö tömänö incæ nō impa, ante yewæmömopa. Mäninö Wængongui nänö angainö ante Itota Codito incæ botö imote edonque odömongä adimo inte botö adobai wüimonte bai tömänö botö adinö ante, Nō impa, ante yewæmömopa.

³ Wængongui beyæ botö apænedö ante i yewæmōintaa yewæmōmopa. Mänintaa adinque në apænedäni nani toquinque. Ayæ mäninta botö yewæmōninö ante ëñente cædäni nani toquinque. Edæ iimai baquüionæ wantæ iñö o baquüinö angüënë.

Godongämæ nani pönencabo tiæte ganca inäni beyæ Wäo yewæmongampa

⁴ Botö Wäömo inömo impa. Atiabæ iñömö wayömö wayömö incæ Codito ingante godongämæ mini pönencabo önonpo æmæmpoque go mencabomüniya acæminimpa, ante botö yewæmōmopa.

Mönö Mæmpo Wængongui wëenënedë në quëwengainä inte ñöwo quëwengä incæ ayæ wantæpiyæ quëwencæcäimpa. Tömengä Önöwoca incæ önonpo æmæmpoque go mëwoga önöwocaidi bai ëwocadongä inte Wængongui nänö aacæ tæ contayömö tæcætawë inö në ongongampa. Ininque Mæmpocä tönö tömengä Önöwoca waadete pönö cæda ate münitö gänë entawencæminimpa.

⁵ Ayæ adobai Itota Codito edæ Wængongui ingantedö ante cöwë ædæmö pöni apænedongä inte wængä ate täno ñäni ömæmongainä ingampa. Tömengä tömämæ awënë odeyedi nani Tæiyæ Awënë Odeye inongä ingampa. Tömengä adobai mönö imonte në waadete pönënongä inte mönö wënæ wënæ cægainö adinque tömengä wepæ inte mënongacäimpa. Tömengä adobai waadete pönö cæcä ate münitö gänë entawencæminimpa, ämopa. ⁶ Ayæ Itota, Botö Awënë Odeyebö nempo quëwëninque münitö botö tönö godongämæ

aamüni bacæminimpa, ante pönö badon-gacäimpa. Ayæ, Botö Mæmpo Wængongui ingante cæcæminimpa, ante Itota pönö cæcä ate mönö Wængongui quü, ante në godömö bagaimö imompa. Tömengä ñäo bai ëmöñongante mönö waocabo tömenganque ingante waa acæimpa. Tömenganque cöwë në tæi piñænongä inte quingämenque quëwënanä iñönänite tömengä tömänäni Awënë inongä ingampa, ante mönö cöwë angæimpa, ante Amëë, ante ämopa.

⁷ Eñeedäni, tömengä edæ boguimancodë wææñongante,

tömänäni tömengä ingante acædänimpa.

Tömengä ingä në timpongänäni incæ adobai tömengä ingante acædänimpa.

Ayæ tömämæ quëwënanä tömänäni tömengä ingante adinque Ca ca wæcædänimpa.

Mänömai baquüinö angüënë, ante

botö, Amëë, ämopa.

⁸ Wængongui Awënë adocanque Tömää në Cægaingä inte iimai angampa. “Botö Tänobö ingaimo inte Tömämö inguimo impa.” Mänömainö ante në angä iñömö tömengä wëenënedë do quëwengainä inte ñöwo quëwengä incæ ayæ wantæpiyæ quëwencæcäimpa.

Itota Codito në ñäo bai ëmongainä ingante Wäo nänö adö

⁹ Botö Wäömo inömo impa. Münitö tönüñabo inte botö münitö tönö Awënë Odeye Itota nempo quëwëninque mönö tömengä tönö godongämæ aamö inömo imompa. Botö münitö tönö godongämæ wæwëmö imö incæte mönö wæntæye inämai inte ëc cæmopæ. Wængongui nänö angainö ante apænedinque ayæ, Itota mönö Codito inongä ingampa, ante, Nō impa, ante botö apænedö beyænque botö wää tæiwænë Patömoto iñömö tee mönete bai quëwentabopa.

¹⁰ Wængongui Awënë itädë iñonte Wængongui Tæiyæ Waëmö Önöwoca incæ botö imote bæi ongonte bai cæyongä botö önöñabæ inö adocanque tedepämo todompeta nani ancadeca we öonte bai yedæ tē ëñentabopa. ¹¹ Iimai angantapa.

“Bitö quinä wüimonte bai abii, ante yewæmōintaa yewæmöe. Yewæmōinque wayömö wayömö incæ Codito ingante godongämæ nani pönencabo önonpo æmæmpoque go mencabodäniya iñönänite tömënanä inänite da godöe,” ante angantapa. “Epeto quëwëñömö quëwënanä Etämüdöna quëwëñömö quëwënanä Pedegämo quëwëñömö quëwënanä Tiatida quëwëñömö quëwënanä Tadoditi quëwëñömö quëwënanä Pidadedepia quëwëñömö quëwënanä ayæ Daoditea quëwëñömö quëwënanä Codito ingante godongämæ nani pönencabo nani cabo nani cabo iñönänite bitö tömënanä

inänite i bitö yewæmöninta da godömi æncædänimpa.”

¹² Äñongante botö, Æcänö äna eñëmoo, ante dadi emænte atabopa. Dadi emæñömote yædo concædi ti wodönoincade oodo inte badöincade önompo æmæmpoque go mä ganca ongoncade atabopa. ¹³ Ayæ yædo concædi ti wodönoincade ongöñömö adoyömö tæcæguedë adocanque në Waocä eñagaingä bai inte ongangä atabopa. Tömengä doyxæcoo önöwa ganca incoo mongæninque ayæ tæcæenëmæ inö pacadeyænta oodo inte badöi eñëmængä ingantapa. ¹⁴ Tömengä ocabo tönö ocaguü iñömö dayö näämænta pöni emö bai adobai encadinque yoguimö ñäö pönö emö bai adobai ñäö bai encacä ingantapa. Ayæ tömengä awinca incæ gonga wo bæcote bai emongä ingantapa. ¹⁵ Tömengä önöwa incæ yæmænta bodonte nani äno gongapamö guii ocoi äñonte ñäö emö bai tömengä adobai ewacä ingantapa. Tömengä tedeyongä æpæ mæ conta goyonte æpæ tæ bai adobai tæ eñentabopa. ¹⁶ Tömengä önönemppo tömempo incæ nëmöidi æmæmpoque go mä ganca næængantapa. Ayæ tömengä önöne inö yæmë tipængaa waingamë engamë ënedinque yædæ tadete ongongantapa. Ayæ tömengä awinca incæ nænque nanguü tamonte bai ñäö bai emongantapa.

¹⁷ Tömengä ingä adinque botö tömengä önöwa inö wænte bai tæ gowææntabopa. Tæ gowææñömo tömengä önompo tömempo inte botö imote gampodinque “Bitö guinänämai incæbiimpa,” ante äninque edæ, “Tömää badönämai iñedë botö Do Quëwengaimo imopa. Ayæ tömää iinque bayedë incæ botö Ayæ Pönö në Quëwëmo incæboimpa,” ante angantapa. ¹⁸ Edæ “Botö në Quëwengaimo inömo inte në wænimo incæ ñani ömæmonte cöwë wantæpiyæ quëwëmo inömo imopa. Waodäni në wænte godinani nani wænte ongöñömö ongöñönänite botö, Cöwë wænämäi quëwæmëminimpa, ante botö tæi piñæmämö inte në æmo imopa.

¹⁹ “Mänömai beyæ bitö wüimonte bai bitö adinö ante quinö ñöwo i, ante quinö iincayæ ate baquü, ante yewæmöe ämopa. ²⁰ Mänü nëmöidi önompo æmæmpoque go mä ganca botö önönemppo tömempo incæ mæ önöncoo bitö adincoo ante, Æbänö i, ante bitö eñänämai inönö ante botö edonque pönö apænebo eñencæbiimpa. Botö imote godongämæ nani pönencabo önompo æmæmpoque go mencabodäniya iñönänite tömënäni inänite në aadäni bai nëmöidi inänipa. Ayæ yædo concædi ti wodönoincade oodo inte badöincade önompo æmæmpoque go mä ganca ongoncadecoo bitö adincoo ante, Quinö bai inäni, ante botö adobai bitö imote edonque pönö apænebo ate në eñëmi bacæbiimpa. Wayömö wayömö incæ botö

imote godongämæ nani pönencabo önompo æmæmpoque go mencabodäniya iñömö tömënäni yædo concædi ti wodönoincade bai adobai inänipa,” ante Waocä në eñagaingä iñömö botö imote apænegacäimpa.

2

Godongämæ nani pönencabo tiæte ganca inäni inänite Itota nänö äno

Epeto iñömö quëwënäni inänite Itota nänö äno

¹ Ayæ adocä godömenque apænecantapa.

“Epeto iñömö Wængongüi ingante godongämæ nani pönencabo inänite në aacä acæcäimpa, ante botö äno ante iimäi yewæmöe ämopa. ‘Botö edæ nëmöidi önompo æmæmpoque go mä ganca botö önönemppo tömempo në nææmo imo inte botö adobai yædo concædi ti wodönoincade oodo inte badöincade önompo æmæmpoque go mencadea incade ongöñömö adoyömö tæcæguedë në cægömo imopa.

² “Minitö æbänö cæminii, ante do eñëmopa. Edæ nanguü pönö cædinque minitö wæntæye inämai inte ee cæminipa. Minitö wiwa cædäni inänite Baa ante quëwëminipa, ante do eñëmopa. Ayæ Wængongüi nänö në da godongaimöni imönipa, ante në änäni incæte inämai iñönänite minitö, Näwangä inäni, ante eñencæte ante apænte adinque, Tömënäni babæ änäni, ante eñente wæminitapa. ³ Minitö wæntæye inämai inte ee cæmini iminipa. Ayæ botö emöwo apænete beyænque wæwëmini incæte godömenque godömenque cædinque minitö mimönë nangæ badämai iminipa, ante do eñëmopa.

⁴ “Incæte adoque pönö mini cædinö wüi waa abopa. Minitö edæ wüi wëenëhedë bai ædæmö waadete pönëmini iminipa, ante awædö. ⁵ Edæ minitö waa cædimini imini incæte ñöwo wæætë wænæ wænæ cæmini bamini awædö. Mäninö ante pönëedäni. Mänü mini wænæ wænæ cædinö ante, Ancaa wæwente awædö, ante pönente iinpo cædinque minitö wëenëhedë mini waa cægäi bai adobai cæte quëwëedäni ämopa. Ämo eñënque minitö mini wænæ wænæ cædinö ante wædämai imini adinque botö minitö weca pömaimopa. Pöninque mini yædo concædi ti wodönoincade nänö ongöñömö ongöñonte botö ö ænguimodö angüenë. ⁶ Incæte adoque mini cædinö guiquenë waa abopa. Minitö edæ Nincodaitaidi nani änäni nani cædö ante adinque piinte iminipa. Botö adobai tömënäni nani cædö ante adinque piinte imopa.

⁷ “Wayömö wayömö incæ botö imote godongämæ nani pönencabo inänite

Wængongui Ōnōwoca quīnō angāā, ante tōmengā nānō ānō ante nē ēamonca imīni inte ēñēedāni. Wængongui waa gōnea iñōmō māniñōmō adowænque quēwenguiwæ pædiwæ iwæmpa. Tæi ēmonte nē gānā cædāni inānite botō iñōmō, Māniwæ inca cæncæminimpa, ante pædæ godoncæboimpa, ante māninque āmopa,” ante Waocā nē ēñagaingā iñōmō botō imote apænecacāimpa.

Ētāmidōna iñōmō quēwēnāni inānite Itota nānō ānō

⁸ Ayæ adocā godōmenque apænecantapa. “Ētāmidōna iñōmō Wængongui ingante godongāmæ nāni pōnencabo inānite nē aacā acæcāimpa, ante botō ānō ante iīmai yewæmōe āmopa. Tōmāā badōnāmai iñedē botō Do Quēwengaiñō imopa. Ayæ tōmāā iñque bayedē incæ botō Ayæ Pōni nē Quēwēmo incæboimpa. Botō nē wænimo incæ nōwo wæætē nāni ōmæmongaiñō imopa.

⁹ “ Mīnitō wæwēmīni inte adobai ōmæpomīni imīnīpa, ante botō do ēñēmopa. Incæte mīnitō nō ēamīni imīnīpa. Ood-eoidi pancadāniya, Mōnitō Wængongui ingante mōni pōnencabo imōnīpa, ante nē ānāni incæte wīi mānōmai inānīpa. Tōmēnāni mīnitō imīnite ancaa pīinte babæ ānewēnāni inānīpa, ante botō do ēñēmopa. Māniñāni iñōmō Tatāna ingante nāni ēñencabo inte mānōmai cædānīpa tōō. ¹⁰ Mīnitō quīnō beyæ wæwencæ cæmīni imīni incæte guīñēnāmai iedāni. Tatāna incæ, Ēbānō cæmīni, ante acæte ante cæcā beyænque waodāni pancamīniya imīnite tee mōnecædānīpa. Ōnompō tipæmpoga eōnæ iñonte wæwenguimīni imīnīpa. Iñique mīnitō mīni wænguinque wæmīni incæ cōwē pōnēninque ædæmō cæedāni. Mānōmai nē cæmīni iñque botō, Mīni cōwē quēwenguinta, ante poganta bai mīnitō imīnite pōnōmo æmaimīnīpa.

¹¹ “ Wayōmō wayōmō incæ botō imote godongāmæ nāni pōnencabo inānite Wængongui Ōnōwoca quīnō angāā, ante tōmengā nānō ānō ante nē ēamonca imīni inte ēñēedāni. Wadāni adopoque wænīnque nāni mempoga wænguimāmo bai tæi ēmonte nē gānā cædāni iñōmō wæætē mempoga wænāmai incædānīpa, ante māninque āmopa,” ante Waocā nē ēñagaingā iñōmō botō imote apænecacāimpa.

Pedegāmo iñōmō quēwēnāni inānite Itota nānō ānō

¹² Ayæ adocā godōmenque apænecantapa. “Pedegāmo iñōmō Wængongui ingante godongāmæ nāni pōnencabo inānite nē aacā acæcāimpa, ante botō ānō ante

iīmai yewæmōe āmopa. ‘Botō edæ yaēmē tipænga waingamē engamē nææmo imopa.

¹³ “ Ēdōnō quēwēmīni, ante botō do ēñēmopa. Tatāna contaimpa on-gonte nānō aayōmō adoyōmō mīnitō quēwēmīni imīni incæte botō imo edæ ñimpo cædāmai quēwēmīni imīnīpa. Mīni quēwēñōmō Tatāna adoyōmō quēwengā iñique, Antipato edæ botō ānō ante cōwē pōnēninque ædæmō apænecadōngā iñongante māniñōmō quēwēnāni tōmengā ingante wænōnāni wængantapa. Tōmengā wæñedē incæ mīnitō botō imote edæ, Dicæ pōnēmogaa, ānāmai imīnīpa.

¹⁴ “ Incæte pancaa mīni cædīnō wīi waa abopa. Edæ pancamīniya docā Badāō nānō odōmonte apænecaiñō ante ēñēwēmīni awædō. Tōmengā iñōmō, Badaco godō cæcā beyænque idægoidi tee tēwate bai oda cæcædānīpa, ante cædinque adocā Badaco ingante odōmonte apænecā ēñente cægacāimpa. Wadāni, Mōnitō wængongui cængui impa, ante nāni cōnōni ante, Mīnitō cæedāni, ante Badaco iñōmō idægoidi inānite odōmonte apænecacāimpa. Ayæ onquiyæñāni tōnō godō towente cæedāni, ante odōmonte apænecacāimpa. ¹⁵ Ayæ pancamīniya adobai Nincodaitaidi nāni odōmonte apænecadō ante ēñēwēmīni awædō. ¹⁶ Mānōmai beyæ mīni wēnæ wēnæ cædīnō ante, Ancaa wæwente awædō, ante pōnente ñimpo cæedāni. Mīnitō mīni wēnæ wēnæ cædīnō ante wædāmai imīni adinque botō wantæ iñonte mīnitō weca pōmaimopa. Pōninque tōmēnāni nāni odōmonte apænecadō ante nē ēñēwēnāni iñōnānite botō ōnōne incæ yaēmē ēnedinque yædæ tadedinque guēadō guēa cæcæboimpa.

¹⁷ “ Wayōmō wayōmō incæ botō imote godongāmæ nāni pōnencabo inānite Wængongui Ōnōwoca quīnō angāā, ante tōmengā nānō ānō ante nē ēamonca imīni inte ēñēedāni. Tæi ēmonte nē gānā cædāni inānite cængui mānāā nāni angaiñō botō wē wodōni cængui iñonte godōmo ænte cæncædānīpa. Adodāni inānite adobai dica nāāmæntaca godōmo cæncædānīpa. Wa ēmōwo ante pemōninque mānincaa yewæmonte ingæimpa. Nē ænānique māniwo ēñēnāni inānīpa, ante māninque āmopa,” ante Waocā nē ēñagaingā iñōmō botō imote apænecacāimpa.

Tiatida iñōmō quēwēnāni inānite Itota nānō ānō

¹⁸ Ayæ adocā godōmenque apænecantapa. “Tiatida iñōmō Wængongui ingante godongāmæ nāni pōnencabo inānite nē aacā acæcāimpa, ante botō ānō ante iīmai

yewæmōe āmopa. ‘Botō edæ Wængonguī Wēmo inōmo ĩmopa. Botō awınca incæ gonga wo bæcote bai nē ēmōmo ĩmopa. Botō ōnōwa incæ yaēmenta bodonte nāni ānō bai nāō bai nē ēwabo ĩmopa.

19 “ ‘Mīnitō æbānō cæmīni, ante mīni waadete pōnēnō ante mīni wede pōnēnō ante wadāni inānite mīni waa cædō ante botō do ēñēmopa. Mīnitō wæntæye ināmai inte ee cædinque godongāmæ cæmīni ĩmīnīpa, ante ayæ, Wēēñēdē do waa cædimīni inte nōwo godōmenque waa cæmīni ĩmīnīpa, ante adobaī do ēñēmopa. 20 Incæte adoque pōni mīni cædinō wīi waa abopa. Onquiyængā Etabete nē ēmongā ĩñōmō edæ, Wængonguī beyæ nē apænebo, ante nāmā incæ nē angā ingante wido cædāmai ĩmīni inte wæætē tōmengā ingante ayæ godōmenque Ao āmīnīpa tōō. ĩñæmpa tōmengā ĩñōmō botō imote nē cædāni inānite nānō odōmonte apænedō beyænque oda cæte gocædānīpa, ante cæcā beyæ tōmēnāni onquiyæñāni tōnō godō towente cædānīpa. Wadāni, Mōnitō wængonguī cænguī ĩmpa, ante nāni cōnōni cænānīpa tōō. Mānōmai cæcædānīpa, ante māningā onquiyængā odōmonte apæñecāmpa.

21 “ ‘Tōmengā nānō towente cædimāmo ante, Botō wēnæ wēnæ cæbo inte ancaa wæwente awædō, ante pōnente wabānō nīmpo cæquingāā, ante botō tōmengā ingante ee pānāmai intabopa. Incæte tōmengā nānō wēnæ wēnæ cædō ante wædāmai quēwengā ingampa. 22 ĩnīnque botō, Tōmengā ingante cæbo beyænque wēnæ wēnæ bate wæwencæcāmpa, ante cæcæboīmpa. Ayæ tōmengā nānō odōmonte apænedīnō bai nē ēñente cædāni ĩñōmō tōmengā tōnō nāni guæ godō mōwēñinō ante, Mōnitō wēnæ wēnæ cæmōni inte ancaa wæwente awædō, ante pōnente nīmpo cædāmai ĩnāni ĩnīnque tōmēnāni inānite adobaī botō cæbo beyænque nanguī wēnæ wēnæ bate wæwēmañnīpa.

23 Tōmengā wēnāni inānite wæñōmo wæncædānīpa. ĩnīnque wayōmō wayōmō incæ botō imote godongāmæ nāni pōnencabo tōmancabodāniya ĩñōmō, Botō incæ tōmēnāni nāni mīmōno tōnō ocaidē, Æbānō pōnēnāni, ante nē ēñēmo ĩnōmo ĩmopa, ante ēñencædānīpa. Ayæ mīnitō cædi bai ante adīnque botō wæætē adobaī mīnitō tōmāmīni ĩmīnīte cæcæboīmpa.

24 “ ‘Wamīni pancamīniya guiquēnē Tiatida ĩñōmō quēwēmīni inte māningā onquiyængā nānō odōmonte apænedō ante mīnitō nē pōnēnāmai ĩmīnīpa. Ayæ Tatāna wē wodonte nānō angainō ante ēñēnāmai ĩmīnitāpa. ĩnīnque botō mīnitō

īmīnīte ĩmai āmopa. Mīnitō teēmē mongæncōo mongante gote bai wædāmai incæmīnīmpa, ante wadō ante ānāmai incæboīmpa. 25 Wæætē botō ocæ ēmænte wæænganca mīnitō edæ do mīni pōnēnō ante nīmpo cædāmai ĩedāni. Mānīnque āmopa.

26 “ ‘Inguipoga ĩnīnque baganca ædānīdō botō ānō nē cædōnāni inte tæi ēmonte nē gānā cædāni inānite botō pōnō cæbo ate tōmēnāni nāmā tæi pīñænāni badīnque tōmāmæ quēwēnāni inānite nē ānāni bacædānīmpa. 27 Botō Mæmpo botō imote pōnō cæcā beyænque Awēñē badīnque nāmā tæi pīñænte inte nē āmo bai botō adobaī tōmēnāni inānite pōnō cæbo beyænque awēñēdi badīnque aacædānīmpa. Tæiyæ awēñē tōmengā nempo quēwēnāni inānite aacā bai tōmengā ĩñōmō tōmāmæ quēwēnāni inānite, ĩmai cædāni, ante aacæcāmpa. Dai inte bæte cængæmō tæi ænacā nancate bai cædinque tōmengā adobaī wabæca wabæca quēwēnāni inānite nanguī pante cæcæcāmpa. 28 Mānīnāni inānite botō adobaī wadaamō nāō bayonte apāimō incæ godōmo æncædānīmpa.

29 “ ‘Wayōmō wayōmō incæ botō imote godongāmæ nāni pōnencabo inānite Wængonguī Ōnōwoca quīnō angāā, ante tōmengā nānō ānō ante nē ēamonca ĩmīni inte ēñēedāni,’ ante mānīnque āmopa,” ante Waocā nē ēñagaingā ĩñōmō botō imote apæñegacāmpa.

3

Tadoditiidi inānite Itota nānō ānō

1 Ayæ adocā godōmenque apæñecantāpa.

“Tadoditi ĩñōmō Wængonguī ingante godongāmæ nāni pōnencabo inānite nē aacā acæcāmpa, ante botō ānō ante ĩmai yewæmōe āmopa. ‘Wængonguī Ōnōwoca incæ ōnomo æmæmpoqe go mēwoga ōnōwocaidi ēwocadongā ingampa. Botō ĩñōmō tōmengā ingante nē ēwocate quēwengāimo inte nēmōidi ōnomo æmæmpoqe go mēa ganca ĩnāni nē næænte ingāimo ĩmopa.

“ ‘ĩnīnque, Mīnitō æbānō cæmīni, ante do ēñēmopa. Mīnitō mīmīni quēwēmīnīpa, ante wadāni apænedāni incæte mīnitō wīi waa cæte quēwēmīni inte do wængaināni bai ĩmīnīpa tōō.

2 Edæ, Botō Wængonguī ayongā mīni cædinō wīi eyepæ cæmīnīpa, ante adīnque botō, Nāni ōmæmōedāni, ante āmopa. Nāni ōmæmōnīnque mīnitō, Ayæ mīnāni quēwēnāni incæ nē wæncæ cædāni bai badāni incæte tōmēnāni wæñāmai inte wæætē tæimō bacædānīpa, ante cædāni. 3 Mānōmai beyæ, Quēmē

do ænimini bai imini, quiemē ante do eñēmīni, ante mānīnō ante wæætē adodō ante pōnēedāni. Pōnēninque mīnitō mānīnō ante eñente cædāni. Ayæ mīni wēnæ wēnæ cædinō ante, Ancaa wæwente awædō, ante pōnēnte ñimpo cædāni. Wæætē mīnitō wīi ñāni ömæmonte bai imini ate wædinque botō incæ mīnitō weca awēmō nē ængā bai pōmaimopa. Ayæ, Awēmō nē ængā æyedēnō ponguingāā, ante eñēnāmai ināni bai botō adobai mīnitō eñēnāmai iñōmīni mīnitō weca awēmō ponguimo apa quēwēmīni.

⁴ “ ‘Incæte Tadóditī iñōmō mīni quēwencabo iñōmīnite pancadāniya tōmēnāni weocoo wentamō nāmōnāmai bai iñināni inte nē waa cæte quēwēnāni. Mānīnāni waa cæte quēwēnāni beyæ eyepæ iñōnāni inte weocoo nāāmæntacoo mongænte botō miñæ gocædānimpa. ⁵Nē tæi emonte gānā cædāni iñōmō adobai weocoo nāāmæntacoo mongæncædānimpa. Ayæ, Quēwenguinta, ante Wængongui nānō yewæmongaintaa mānīnāni emōwo do yewæmōi iñinque botō cōwē wadæ cædāmai incæboimpa. Wæætē botō Mæmpo Wængongui weca ayæ tōmengā anquedoidi weca botō, iñāni botō miñæ gogaīnāni ināni, ancæboimpa.

⁶ “ ‘Wayōmō wayōmō incæ botō imote godongāmæ nāni pōnencabo iñānite Wængongui Önōwoca quīnō angāā, ante tōmengā nānō ānō ante nē éamonca imini inte eñēedāni,’ ante māninque āmopa,” ante Waocā nē eñagaingā iñōmō botō imote apænegacāimpa.

Pidadedepiaidi iñānite Itota nānō ānō

⁷ Ayæ adocā godōmenque apænecantapa. “Pidadedepia iñōmō Wængongui ingante godongāmæ nāni pōnencabo iñānite nē aacā acæcāimpa, ante botō ānō ante iīmai yewæmōe āmopa. ‘Botō edæ nē Tæiyæ Waēmō ingaīmo imopa. Nō ante cægaīmo inte botō docā Awēñē Dabii nānō wi ænequī nē næængaīmo imopa. Iñinque quīnō odemō botō wi ænebo incæ mānīnemō wacā ædō cæte tee mōnequingāā. Ayæ quīnō odemō botō tee mōnebo incæ mānīnemō wacā ædō cæte wi ænequingāā.

⁸ “ ‘Mīnitō æbānō cæmīni, ante do eñēmopa. Mīnitō cæcæmīnimpa, ante botō odemō wi ænete bai cæbo aedāni. Æcānō mānīnemō wæætē tee mōnequingāā. Edæ dæ angampa. Mīnitō wīi tæi piñæmīni imini incæte botō angaiñō ante eñente cæmīni inte botō emōwo ante, Dicæ eñēmōniyaa, ante ānāmai iñimīni iñinipa. Botō do eñēmopa. ⁹Mōni oodeocabo imōni incæ pancadāniya,

Mōnitō Wængongui ingante mōni eñencabo imōnīpa, ānāni incæte iñāmai iñāni. Wæætē tōmēnāni iñōmō babæ ānewēnāni iñāni. Tatāna ingante nāni eñencabo iñāni. Botō godō cæbo ate adodāni mīnitō weca ponte mīnitō önōwa gāānē ædæ wææncædānimpa. Ayæ, Botō mīnitō imīnite nē waadete pōnengāimo imopa, ante botō godō odōmōmo eñencædānimpa. ¹⁰ Mīnitō imīnite, Ee cædinque wæntæye iñāmai iedāni, ante botō angaiñō ante eñente nē cædimīni imini adinque botō wæætē mīnitō imīnite wææ aacæboimpa. Inguipoga quēwēnāni tōmānāni nāni wæwenguiāmō ancaa baquīnō anguēnē. Edæ Tatāna, Æbānō quēwēnāni, ante acæte ante cæcā ate nāni wæwēñedē botō iñōmō, Mīnitō wæwēnāmai incæmīnimpa, ante mīnitō imīnite wææ aacæboimpa.

¹¹ “ ‘Botō oo ocæ emænte ponguimo imopa. Wængongui poganta nānō godonguinta, ante mīnitō imīnite godongā æncæmīnimpa. Mānīnta mīni ænguinta iñōmō wacā ænāmai incæcāimpa, ante mīnitō mīni entawēnō ante godōmenque godōmenque ñimpo cædāmai iedāni. ¹² Botō cæbo ate waodāni tæi emonte nē gānā cædāni iñōmō tōmēmo Wængongui tæiyæ waēmō oncōnē wantæpiyæ quēwenguiānidō anguēnē. Tōmēnāni Wængongui weca cōwē quēwente taodāmai incædānimpa.

Tōmēnāniya botō Wængongui emōwo yewæmoncæboimpa. Mīi Edotadēē nāni āñōmō iñōmō botō Wængongui nānō quēwēñōmō iñonte māni tōmengā nānō quēwēñōmō incæ öönædē iñō da pōnongā wæængæimpa. Māni Wængongui nānō quēwēñōmō emōwo botō adobai tōmēnāniya yewæmoncæboimpa. Ayæ botō wawo botō ñōwo pemongaiwo adobai tōmēnāniya yewæmoncæboimpa.

¹³ “ ‘Wayōmō wayōmō incæ botō imote godongāmæ nāni pōnencabo iñānite Wængongui Önōwoca quīnō angāā, ante tōmengā nānō ānō ante nē éamonca imini inte eñēedāni,’ ante māninque āmopa,” ante Waocā nē eñagaingā iñōmō botō imote apænegacāimpa.

Daoditeaidi iñānite Itota nānō ānō

¹⁴ Ayæ adocā godōmenque apænecantapa. “Daoditea iñōmō Wængongui ingante godongāmæ nāni pōnencabo iñānite nē aacā acæcāimpa, ante botō ānō ante iīmai yewæmōe āmopa. ‘Botō emōwo Amēē, ante pemongaīmo inte botō cōwē, Nāwangā impa, ante nē cōwē ædæmō apænegaiimo imopa. Wēñēñedē Wængongui nānō badongāñedē māniñedē botō tōmengā tōnō godongāmæ badongaīmo beyænque

tömengä nänö badongaincoo tömancoo Awënë badinque botö nê ämo imopa.

¹⁵ “ Minitö æbänö cæminii, ante do ëñemopa. Yoguiþæ bai inämai imini incæte ocoi ämæ bai adobai inämai iminipa töö. Inæmpa yoguiþæ bai iminipa diyæ waa aquimoo. Edæ ocoi ämæ bai iminipa diyæ waa aquimoo. ¹⁶ Minitö yoguiþæ bai inämai imini incæte ocoi ämæ bai inämai imini inte wæætê wii eyepæ cæminii inte gänê ämæ bai iminipa töö. Mänömai beyæ botö edæ tömêmo önönê towæ tänonte bai minitö iminite adobai wido cæcæ cæbo apa quëwëminii. ¹⁷ Minitö, Mönitö nangui ëamöni imönipa, ante äminipa. Edæ, Tömëmöni mäincoo gæte da wëninque eyepæ ëamönipa, ante äminipa. Inæmpa mäninö ante wapiticæ pönente äminipa. Minitö mini wæwëno incæ ëñënamai iminipa töö. Minitö æbänö bate cæminii, ante adinque wadani, Minitö wodi, ancædänimpa. Ömæpodäni bai imini inte minitö babetamönäni bai imini inte ömaadäni bai imini incæte, Mänömai imönipa, ante ëñëminiyaa.

¹⁸ “ Mänömai beyæ botö, Iimaï cæedäni, ante waadete ämopa. Botö pönö cæbo beyænuque minitö wæætê waa bate bai nangui cæcæminimpa, ämopa. Mäninö botö pönö cædö iñömö oodo gongapamö aca podonte ate wæmö oodo bate bai impa. Ininque minitö, Mönitö nangui ëamöni bacæmönimpa, ante cædinque botö weca ponte tömêmo oodo ante godonte æedäni. Ayæ, Ömaamöni inämai incæmönimpa, ante guingo imönämai incæmönimpa, ante minitö botö weocoo näamæntacoo godonte ænte mongæedäni. Ayæ minitö, Awinca waa acæimipa, ante cædinque tömêmo awinca cönömöimæ godonte æninque cönömöedäni.

¹⁹ “ Botö nê waadete pönënanäni inänite botö piinte ämo inte adobai pante cæbo imopa cæminii. Minitö nangui cædinque mini wënæ wënæ cædinö ante, Ancaa wæwente awædö, ante pönente ñimpo cæedäni. ²⁰ Eamonca ëñëedäni. Botö incæ odemö yabæ inö ongonte bai waomini mímöno a ongöninque, Wi ænequï, ante aa peyömo waocä æcämenque incæ ëñëninque odemö wi ænete botö imo, Pö guiie, angä Ininque botö iñömö edæ tömengä mímönê pó guicæboimpa. Tömengä mímö botö oncö bai iñonte botö tömengä tönö cænte bai cöwê quëwëncæboimpa. Ayæ tömengä wæætê botö tönö cænte bai cöwê quëwëncæcäimpa. ²¹ Botö tæi emonte nê gänä cægaimo inte botö Mæmpo nänö aacæ tæ contaimpaa tömengä tönö guëa tæ contagaimo bai nê tæi emonte nê gänä cædäni iñömö adobai botö tömêmo aacæ

tæ contayömo botö tönö godongämæ tæ contacædänimpa, ante ämo adopaa tæ contaquinäni.

²² “ Wayömo wayömo incæ botö imote godongämæ nani pönencabo inänite Wængongui Önöwoca quino angäa, ante tömengä nänö äno ante tömënanäni nê ëamonca imini inte ëñëedäni, ante mäninque ämopa,” ante Waocä nê ëñagangä iñömö botö imote apænegacäimpa.

4

Öönædê iñömö Wængongui ingante wat-apæ apænedäni

¹ Botö Wäömo inömo inte ayæ ate æmö ayömute öönædê inö odemö wi ænete atabopa. Todompeta nani ancadeca we öonte yedæ tē bai tedepämo täno botö ëñëninö iñömö ñowo wæætê adopämo botö imote iimaï äninque, “Iñömö pó æe. Æñömite botö, Ayæ ate quino baquënë inguii, ante bitö imite edonque odömömo acæbiimpa,” angantapa.

² Mäninö ante äñongä Wængongui Önöwoca incæ botö imote bæi ongonte bai cæyongä botö wüimonte bai adinque iimaï atabopa. Öönædê inö Awënë tæ contaimpa ayömo adocanque mäniñömö tæ contacä atabopa. ³ Mäningä adoyömo nê tæ contadongä iñömö dica ñäo bai ëmonca bai adobai ëmongä ingantapa. Aatape nani äninca bai codönädina nani äninca bai mäninca mencaa ñäo bai inca bai tömengä adobai ëmongä ingantapa. Awënë tæ contaimpa iñömö daimê dica bai etëmedada nani äninca ëmonca bai inte æidämæ waimê pönï gongæmënimpa. ⁴ Mänimpa Awënë nänö aacæ tæ contaimpa waimpacoo bæinticoatodo ganca mänimpopacoo mäniñömö godämæ a ongompapa. Adopacoo iñömö nê aadäni nê Picænäni bæinticoatodo ganca mänimpodäni tæ contadinque näamæntacoo mongæninque poganta oodo inte badöinta da wencate a ongönänitapa. ⁵ Awënë tæ contaimpa inö näinte yædæ yædæ ta gote detæbo tæi tæi tēñonte yedæ pönï änimpa. Ayæ Awënë tæ contayömo tæcætawê inö ti wodönoincade önompo æmæmpoque go mencadea wocædöincadecoo a ongönimpa. Wængongui Önöwoca incæ önompo æmæmpoque go mëwoga öñöwocadi bai ewocadongä inte mänincadecoo bai ingampa.

⁶ Ayæ Awënë tæ contaimpaa tæcætawê inö adobai gäwapæntibæ bai iñonte awocawænta bai inimpa. Ayæ Awënë tæ contaimpa iñömö münäni quëwënanäni mënaa go mënaa inäni godämæ a ongönänitapa. Mäninäni iñömö tæcætawê inö öñöñabæ inö tömäo awinca ëmönäni atabopa. ⁷ Täncä

mīngā quēwengā botō adingā iñōmō
 nēōō bai ēmongampa. Ayæ wacā mīngā
 quēwengā botō adingā iñōmō wagada
 mæmpo bai ēmongampa. Wacā mīngā
 quēwengā botō adingā iñōmō tōmengā
 awinca waocā awinca bai ēmongampa. Ayæ
 tōmangā mīngā quēwengā botō adingā
 iñōmō guingāmōwæ pao pao gocā bai
 atabopa. ⁸ Mēa go mēa mīnāni quēwēnāni
 incæ adocanque adocanque ōnōmpo
 æmæmpoque go adoguēnepænque ēmænte
 quēwēnāni inānīpa. Ayæ adodāni inte
 tōmēnāni baonga godāmæ tōmanga nangui
 pōni awinca ēmonte ænōmengadænguēnepæ
 incæ awinca adobai ēmōnānīpa. Mānīnāni
 edæ itædē woyowotæ ñimpo cædāmai inte
 iūmai ante āmotamīni ānānīpa.

“Bitō Tæiyæ Waēmō Awēnē imidō, bitō
 Tæiyæ Waēmō Awēnē imidō, ante
 āmōnīpa.

Wængongui Awēnē bitō adobique Tōmāā nē
 Cæbi inte

wēnēñedē do nē quēwengaimi imi ñōwobi
 adobi inōmi inte ayæ wantæpiyæ
 cōwē quēwencæbiimpa.”

Ante āmotamīni ante cōwē ānānīpa.

⁹ Awēnē tæ containpaa nē tæ contadongā
 inte nē wantæpiyæ cōwē quēwengaingā
 ingante apænedinque mēa go mēa mīnāni
 quēwēnāni iñōmō iūmai ante apænedānīpa.
 Bitō ñāō ēmōmi imīpa, ante apænedinque
 tōmēnāni, Bitō imite waa amōnīpa. Mōnitō
 bitō imi waa ate pōnente apænemōnīpa,
 ante apænedānīpa. ¹⁰ Mānōmai ante
 apæneyōnāni nē aadāni nē Picænāni iñōmō
 bæinticoatodo ganca mānimpodāni Awēnē
 tæ containpaa nē tæ contadongā inte
 nē wantæpiyæ cōwē quēwengaingā weca
 ædæ wæænīnque tōmengā ingante, Bitō
 Wængongui Awēnē imidō anguēnē, ante
 watapæ apænedinque tōmēnāni poganta gā
 æncadinque Awēnē tæ containpaa gāānē cō
 cædinque iūmai ante āmotamīni ante ānānīpa.

¹¹ “Bitō iñōmō mōnitō Wængongui Awēnē
 imidō, āmōnīpa. Bitō badōinēnō,
 ante pōnente ingaimi inte ōnōnædē
 ongōnāni tōnō inguipoga ongōnāni
 tōnō tōmānāni inānite badongaimi
 imīpa.

Bitō wū badōmi bai tōmānāni badongaināni
 quēwēnāmai dæ ancædōnānīmpa.

Mānōmai beyæ bitō eyepæ inōmi iñōmite,
 Bitō ñāō ēmōmidō anguēnē, ante
 mōnitō bitō imite waa amōnīpa.

Bitō nāmā tæi piñænte nē cæbi imidō, ante
 bitō imite āmōnīpa,”

ante āmotamīni ante ānānīpa.

5

*Wængongui Codotodo yewēmōinta wi
 cæmpocampa*

¹ Ayæ Awēnē nänō aacæ tæ containpaa
 nē tæ contacā iñōmō tōmengā ōnōnōmpo
 tōmempo incæ yewæmōinta dadi ompointa
 næængā atabopa. Mānīnta tipāataa
 yewæmōinta impa. Adotaa yæwedeta
 iñōmō guītenca bai inte tee bædinta ōnōmpo
 æmæmpoque go mentaa inīmpa. ² Ayæ
 Wængongui anquedo adocanque nē tæi
 ēmongaingā inte yedæ aa pecā atabopa.
 “Mānīnta dadi ompointa wi æmpoquūi, ante
 æcānō nō waa pōni inongā inte eyepæ
 inte tee bædedinta wāa wāa ænete wi
 æmpoquingāā,” angantapa. ³ Ayæ ōnōnædē
 incæ inguipoga incæ tadōmengadænga
 incæ cōwā ayōnāni, Æcānō mānīnta wi
 æmpoquingāā, cæncadenta inō æcānō
 aqingūgāā, ante edæ dæ angantapa. ⁴ Æcānō
 nō waa pōni inongā inte eyepæ inte dadi
 ompointaa wi æmpoquingāā iñōmō edæ dæ
 angampa. Cæncadenta inō æcānō aqingūgāā
 ante dæ angampa, ante adinque nangui
 pōni Ca ca wætabopa. ⁵ Ca ca wæbo adinque
 nē aadāni nē Picænāni iñōnāni adocanque
 nē Picængā incæ botō imo, “Wædāmai ie.
 Wæætē cōwā ae, angantapa. Adocanque
 onguīfængā iñōmō mānīnta wi æmpoquingā
 a ongongampa. Awēnē Dabii Pæingā incæ
 tōmengā iñōmō docā Oodaa pæināni nāni
 cabo iñonte nē nēōō bai tæi ēmōnongā inte
 nē gānā cæcā ingaingā ingampa. Tōmengā
 iñōmō edæ eyepæ inte tee bædedinta ōnōmpo
 æmæmpoque go mentaa wi æmpodinque dadi
 ompointa wi æmpocæcāimpa,” angantapa.

⁶ Ayæ Wængongui Codotodo nāni
 wænōnāni nē wæningā bai ingā atabopa.
 Tōmengā Awēnē Wængongui nänō aacæ
 tæ contayōmō tæcæguedē ongōfōngā
 mīnāni quēwēnāni mēnaa go mēnaa ināni
 tōnō nē aadāni nē Picænāni godāmæ
 a ongōnāni atabopa. Tōmengā iñōmō
 ōnōmoncawæncōo ōnōmpo æmæmpoque
 go mēwāa ēmoncadinque awinca ōnōmpo
 æmæmpoque go mēmōnga ēmongacāimpa.
 Edæ Wængongui Ōnōwoca incæ ōnōmpo
 æmæmpoque go mēwōca ōnōwocaidi bai
 nänō ēwocadō bai mānīi awincacōo inānīpa.
 Adodāni ōnōwocaidi inānite inguipoga da
 pōnongā pōninque tōmēnāni inguipoga
 tōmāmæ gote cæwodāni inānīpa. ⁷ Ayæ
 Wængongui Codotodo iñōmō Awēnē tæ
 contayōmō pōninque nē tæ contadongā
 ōnōnōmpo tōmempo inō dadi ompointa nänō
 næænīnta ō angantapa. ⁸ Tōmengā mānīnta
 ō ængā ate mēa go mēa mīnāni quēwēnāni
 tōnō nē aadāni nē Picænāni bæinticoatodo
 ganca mānimpodāni Wængongui Codotodo
 weca pōnte ædæ wæænīnīntapa. Ināni
 tōmānāni ampoquūi adapa nāni ānō
 næænīnque owæta oodo inte nāni badōinta
 ogui waaquūi eyede enga næænīnīntapa.
 Wængongui quīnāni tōmengā ingante nāni

apænedö iñömö mänii ogui waaquï bai impa. ⁹ Tömënanï mä äninque iimaï ante ämotamïni ante änanitapa.

“Bitö imite wænönäni nê wænïmi inte bitö nö waa pöni inömi imipa.

Iñinque bitö eyepæ inte dadi ompointaa ænte tee bædedinta waa waa ænete wi æmpoquïmi imipa.

Waadäni näni cabo waodäni näni cabo incæ wadö näni tedecabo wadö näni tedecabo incæ

wacä awënë näni cabo wacä awënë näni cabo incæ wabæca näni quëwencabo wabæca näni quëwencabo incæ waodäni inänite bitö,

Wængonguï quimïni bacæmïnimpa, ante cædinque nämä wepæß godonte ængabiimpa.

¹⁰ Bitö nempo quëwëninque tömënanï bitö tönö godongämæ aadäni bacædänimpa, ante badongabiimpa.

Mönö Wængonguï ingante cæcædänimpa, ante bitö pönö cæbi ate tömënanï,

Mönö Awënë Odeye Wængonguï quï, ante nê godönäni bagainäni inänipa.

Mäninäni edæ awënëidi badinque inguipoga quëwënanï inänite aacædänimpa.” ante ämotamïni änanitapa.

¹¹ Ayæ ayömo Wængonguï anquedoidi iñömö bacoo inäni inte ämotamïni änanï eñëninque, Tömënanï æpodö müido ganca inänii, ante botö ædö cæte tee mampote eñngüimoo. Edæ müinäni quëwënanï tönö nê aadäni nê Picænäni tönö Awënë tæ containpa gäänê tæcæguedë ongönönänite Wængonguï anquedoidi iñömö yabæque godämæ gongænte ongönänitapa. ¹² Mäniiñömö godämæ ongöninque tömënanï yedæ äninque iimaï ante ämotamïni änanitapa.

“Wængonguï Codotedo ingante wænönäni nê wæningä inte tömengä nö waa pöni inongä inte eyepæ ingampa.

Tömengä edæ tæi piñængä ingänö anguënë. Tömengä quincodö incæ tömancoo nê eacä inte tömänö ante eñënogä ingänö anguënë.

Tömengä tæi piñænte inte tömää nänö cæinënö cædongä ingampa.

Tömengä ingante, Bitö imite waa amönipa. Bitö ñäö emömidö anguënë, ante bitö imite watapæß apænemönipa,” änanitapa.

¹³ Ayæ Wængonguï nänö badongainäni öönæde quëwënanï incæ inguipoga quëwënanï incæ tadömengadæ quëwënanï incæ gäwapæntibæde quëwënanï incæ tömänäni adoyedë iimaï ante ämotamïni ante änanï eñentabopa.

“Awënë tæ containpaa nê tæ contadongä ingante ayæ Wængonguï Codotedo ingante tömëna inate iimaï ämönipa.

Minatö iminate watapæß amönipa. Minatö iminate waa amönipa.

Minatö ñäö emöminadö anguënë. Minatö tæi piñæmïna iminadö anguënë.

Wantæpiyæ iñonte mäninö ante cöwë ancæmönimpa,” ante änanitapa.

¹⁴ Ante äñönäni mäa go mäa müinäni quëwënanï adobai, “Iimaï baquinö anguënë,” ante, “Amëe,” änanitapa. Ayæ nê aadäni nê Picænäni iñömö ædæ wææninque watapæß änanitapa.

6

Tee bædinta önonpo æmæmpoque go mentaa

¹ Ayæ Wængonguï Codotedo iñömö tee bædinta önonpo æmæmpoque go mentaa incæ yewæmöinta dadi ompointa tee bædedinta tänota wi æmpoyongä atabopa. Ayæ mäa go mäa müinäni quëwënanï incæ adocanque iñömö tömengä nänö tedepämo detæbo tê bai inte botö imote, “Pöe,” ante yedæ angä eñentabopa. ² Tæcæ ayömo cabayo näämænta eñacä do a ongongä atabopa. Cabayo inte nê tæ contacä iñömö to piyæncaimpa næængantapa. Tömengä iñömö wadäni inänite guëadö guëa cæte tæi emongä inte gänä cædongä iñongante Awënë poganta pönönäni æninque tömengä wæætë guëadö guëa cæcæte ante cabayo mongænte gocantapa.

³ Ayæ Wængonguï Codotedo wæætë tee bædedinta wataa wi æmpoyongante mäa go mäa müinäni quëwënanï incæ wacä iñömö botö imote, “Pöe,” angä eñentabopa.

⁴ Ayæ wacä cabayo opatawæß gonga emö bai eñacä pongantapa. Waodäni incæ wacä ingä wacä ingä wænönædänimpa, ante cædinque Wængonguï godö angä beyænque cabayo inte nê tæ contacä iñömö, Inguipoga quëwënanï piyænë cædämaï incædänimpa, ante nê cæcä bacantapa. Ayæ, tömengä ingante ñænæß yaemë bai pönönäni ængantapa.

⁵ Ayæ Wængonguï Codotedo wæætë tee bædedinta wataa wi æmpoyongante mäa go mäa müinäni quëwënanï incæ ayængä iñömö botö imote, “Pöe,” angä eñentabopa. Tæcæ ayömo cabayo wentamö eñacä do a ongongä atabopa. Cabayo inte nê tæ contacä iñömö tee manguï önonnempo næængä ingantapa.

⁶ Ayæ mäa go mäa müinäni quëwënanï weca tedepämo bai eñëñömo, “Todigomö tönö tebadamö näni cængüimö, ante nangui näni godonte æimö impa, ancæte ante iimaï angä eñentabopa. Tömää itæde cædäni ate näni cæganca beyæ todigomö mäa diboda pöni tee manguï ganca mäninque godonte

æncædänimpa. Adobaï tömää itædê cædäni ate nâni cæganca beyæ tebadamö önomp æmæmpoque go adoque diboda tee mangui ganca mäninque godonte æncædänimpa. Ayæ oginguipæ ante odibomö nâni ämö eyepæ pæcæimpa, ante ee aedäni. Bînömæ ante yowe eyepæ pæcæimpa, ante ee aedäni.”

7 Ayæ Wængongui Codotedo wæætê tee bædedinta wataa wi æmpoyongante mæa go mæa münâni quëwënâni incæ tömangä iñömö botö imote, “Pöe,” angä ëñentabopa. 8 Tæcæ ayömö cabayo nämënäa ëñacä do a ongongä atabopa. Cabayo inte nê tæ contacä iñömö tömangä ëmowo, Nê Wænöninengä, ante pemonte ëmongantapa. Waodäni nâni wænte ongönömö awënë tömangä müñæ tee empo pongantapa. Wængongui Codotedo pönö cæcä beyænque tömëna inguipoga quëwënâni inänite adinque mënäa go mënäa iñönänite adocanque ingante wænöninque ayæ wadäni mënäa go mënäa iñönänite adocanque ingante wænöninque nangui inâni inänite nê wænöna badatapa. Tömëna pancadäniya inänite yaëmenca nê wænöna badatapa. Ayæ tömëna godö cæda beyænque waodäni pancadäniya gue ænente nâni wænguimämo pö wæncædänimpa. Ayæ tömëna godö cæda beyænque pancadäniya quingæ wodonte nâni wænguimämo pö wæncædänimpa. Ayæ tömëna godö cæda beyænque pancadäniya babædi wænönäni beyæ wæncædänimpa.

9 Ayæ Wængongui Codotedo wæætê tee bædedinta wataa wi æmpoyongante botö, Wængongui qui, ante nâni wëmonca iya täimoga ænömengadæ inö waodäni önowocaidi owodäni atabopa. Mäninâni Wængongui nänö angainö ante nê ëñente cædäni inte, Itota monö Codito inongä ingampa, ante, Nö ante impa, ante apænedäni beyæ tömënâni inänite wænönäni wængainâni inänitapa. 10 Adodäni yedæ äninque iimäi änänitapa, “Awënë Wængongui bitö tömänâni inänite nê Aabi inömi imipa. Edæ tæiyæ waëmö inömi inte bitö nê nö ante apænebi imipa. İninque inguipoga quëwënâni monitö imönite nê wænöninâni inänite æiquedö apænte anguimii. Ayæ monitö wepæ möni gowepæ beyæ ante tömënâni inänite æiquedö panguimii ämönipa.” 11 Mäninâni tömänâni inänite tömangä doyæncoo näämæntacoo pönongä ænänitapa. Æñönänite, “Wædænque ayæ ee ongöedäni,” äninque tömangä, “Minitö iminite do wænönäni wæmîni bai wadäni mîni toniñadäni ayæ müñâni quëwënâni inte mînitö tönö Wængongui ingante nê cædönâni inänite wænoncædänimpa. İñâni inänite wænonguëñänâni inänipa, ante Wængongui nänö äno bai tömënâni inänite İnque nâni

wænonganca ee ongöedäni,” ämopa, ante angantapa.

12 Ayæ Wængongui Codotedo wæætê tee bædedinta wataa wi æmpoyongä atabopa. Mänifinedê tæimö goinque ocæ ocæ gotimpa. Waodäni tömënâni guidengä wængä ate wæwente beyænque wentamoncoo mongænâni bai nænque iñontobæ adobaï wentamö pönî ëmö batimpa. Apäicä pæibo iñedê incæ wepæ bai opatawæ ëmö batimpa. 13 Ayæ nëmoncoo öönædê inö owocoo iñömö wææ tæ ayæ waa wææ tæ ayæ waa wææ tæ inguipoga iñömö tæ wææninque iigowæmö ayæ icadämäi iñonte nangui woboyæ pæmæñonte woga woga cædinque tæ wæænte bai adobaï tæ wæænänitapa. 14 Ayæ öönæ incæ mincay-onta dadi ompote bai dæ ä batimpa. Ayæ tömanquidi tömää wää tæiwænê iñontobæ wayömö gote dæ ä bai İnimpa.

15 Ayæ awënë odeyedi incæ ñænænâni inte nê cædönâni incæ tontadoidi awënëidi incæ nê nangui ëadäni incæ tæi piñænte cædäni incæ tömënâni guifente badänitapa. Ayæ awënë nê godonte æningä beyænque nê cæte quëwënâni incæ nämanque cæte quëwënâni incæ tömënâni tömänâni guifente badänitapa. Guifente badinque tömënâni änanquidi æite ontatodê iñömö wê womönänitapa. Ayæ onquiyaboga dicabocodê tæcæguedê go guite wê womönänitapa. 16 Ayæ waodäni inänite aa pete bai tömënâni, “Onquiyaboidi ëñëedäni, dicaboidi ëñëedäni, Awënë tæ contaimpaa nê tæ contadongä monitö imönite adämäi incæcäimpa, ante cædinque mînitö mönitonga tæ wæænte beocaedäni,” ante aa pedänitapa. Ayæ, “Wængongui Codotedo ængui badinque monitö imönite pänämäi incæcäimpa, ante cædinque tæ wæænte beocaedäni,” ante aa pedänitapa. 17 “Edæ tömëna nâna nangui pönî ængui baquionæ do ba İnince æcänö ayæ quëwënguigäa. Edæ dæ ä inguinö anguënë,” ante wædänitapa.

7

Wængongui anquedo nänö nê yewæmöinâni

1 Ayæ ate Wængongui anquedoidi mënäa go mënäa ongönâni atabopa. Adocanque yædæcapæ inö ongönongante wacä yæwainö ongönongante wacä imatæ betamonca inö ongönongante tömangä æmatæ betamonca inö a ongongantapa. İninque, Woboyæ mæa go mæa iñonte monö a ongönö inö inguipoga go pæmæñämäi, ante cædinque cædänitapa. Tömënâni ömaa iñömö incæ gäwawæntibæ iñömö incæ adobaï tömäo awæncoo pæyömö incæ woboyæ pæmæñämäi ingæimpa, ante cædänitapa. 2 Wacä anquedo nænque tamönö inö pongä atabopa.

Tömengä Wængongui nē Quēwengaingä nänö yewæmöingö næænte pongä atabopa. Wængongui anquedoidi mänaa go mänaa inäni iñömö ingui-poga incæ gäwäpæntibæ incæ wo ewente cæcædänimpa, ante cædinque Wængongui godö cæcä beyanque tæi piñænäni badänitapa. Mäninäni inänite Wængongui anquedo ñowo põningä yedæ aa pecantapa. ³ “Ee ongöedäni. Edæ minitö ingui-poga incæ gäwäpæntibæ incæ awæncoo incæ ee wo ewänämaï iñöminite mönitö Wængongui ingante nē cædäni nani önönemö inö tömengä nänö yewæmöi ante täno yewæmoncæmönimpa. Yewæmömöni ate minitö mäniñedë ate wo ewente cædäni.”

⁴ Ayæ yewæmönäni æpodänidö badänitapa, ante apænecä eñentabopa. Tömänäni yewæmönäni inte tiento coadenta i coatodo müido ganca inänitapa. Idægoidi nani cabo tipæmpoga go men-cabodäniya iñönänite iimaï yewæmönäni badänitapa.

⁵ Wëenëñedë Oodaa wodi pæinäni nani cabo iñönänite nē yewæmönäni iñömö tipæmpoga go mä müido ganca inänitapa.

Ayæ Odobeë wodi pæinäni nani cabo iñönänite nē yewæmönäni wææ tipæmpoga go mä müido ganca inänitapa.

Ayæ Gado wodi pæinäni nani cabo iñönänite nē yewæmönäni wææ tipæmpoga go mä müido ganca inänitapa.

⁶ Ayæ Atedo wodi pæinäni nani cabo iñönänite nē yewæmönäni wææ tipæmpoga go mä müido ganca inänitapa.

Ayæ Nempadaii wodi pæinäni nani cabo iñönänite nē yewæmönäni wææ tipæmpoga go mä müido ganca inänitapa.

Ayæ Mänatee wodi pæinäni nani cabo iñönänite nē yewæmönäni wææ tipæmpoga go mä müido ganca inänitapa.

⁷ Ayæ Timeönö wodi pæinäni nani cabo iñönänite nē yewæmönäni wææ tipæmpoga go mä müido ganca inänitapa.

Ayæ Debii wodi pæinäni nani cabo iñönänite nē yewæmönäni wææ tipæmpoga go mä müido ganca inänitapa.

Ayæ Itacado wodi pæinäni nani cabo iñönänite nē yewæmönäni wææ tipæmpoga go mä müido ganca inänitapa.

⁸ Ayæ Tabodö wodi pæinäni nani cabo iñönänite nē yewæmönäni wææ tipæmpoga go mä müido ganca inänitapa.

Ayæ Ootee wodi pæinäni nani cabo iñönänite nē yewæmönäni wææ

tipæmpoga go mä müido ganca inänitapa.

Ayæ adobai Beencaminö wodi pæinäni nani cabo iñönänite nē yewæmönäni wææ tipæmpoga go mä müido ganca inänitapa.

Tæiyænäni näämæntacoo mongænte a ongöninque

⁹ Ayæ ate wæætë ayömö tæiyænäni inäni a ongönäni atabopa. Æpodänidö inänii, ante æcänö tee mampote anguingä. Mäninäni wabæca nani quëwencabo wabæca nani quëwencabo inte tæiyænäni incæ woadäni nani cabo woadäni nani cabo inte tæiyænäni incæ wacä awënë nani cabo wacä awënë nani cabo inte tæiyænäni incæ wadö nani tedecabo wadö nani tedecabo inte tæiyænäni incæ mänömaï inönäni inte ongönänitapa. Inäni iñömö näämænta weocoo doyæncoo mongæñäni inte yædëmæmäa önönempe nææninque Awënë nänö aacæ tæ containpa gäänë ongöninque Wængongui Codotedo weca a ongönänitapa. ¹⁰ Ayæ tömëñäni yedæ äninque iimaï änanitapa.

“Mönö Wængongui iñömö tömengä nänö aacæ tæ containpaa nē tæ contacä inongä inte

tömengä adocä mönö imonte, Quëwencæminimpa, ante nē Ængä inongä ingampa.

Ayæ Wængongui Codotedo adobai mönö imonte, Quëwencæminimpa, ante nē Ængä inongä ingampa,” änanitapa.

¹¹ Nē aadäni nē Picænäni tönö mäa go mä müinäni quëwänäni Awënë tæ containpa gäänë ongöñönänite Wængongui anquedoidi tömänäni iñömö yabæ inö godämæ ongönänitapa. Wængongui nänö aacæ tæ contayömö gäänë guidömæmä ædæ wææninque tömëñäni Wængongui ingante, Bitö Wængongui Awënë imidö anguënë, ante watapæ apænëdänitapa. ¹² Ayæ änanitapa.

“Amëë. Mönö Wængongui ingante watapæ apænëmönipa.

Ayæ tömengä ñäö emongänö anguënë. Tömengä tömänö ante eñënongä ingänö anguënë.

Tömengä ingante waa adinque mönitö tömengä ingante waa ate põnente apænëmönipa.

Ayæ tömengä tæi piñængä ingänö anguënë. Tömengä tæi piñængä inte tömäa nänö cæinënö cædongä ingampa.

Wantæpiyæ iñonte cöwë mäninö ante ancæmönimpa.

Mänömaï baquinö anguënë, ante, Amëë,” änanitapa.

¹³ Ayæ nē aadäni nē Picænäni incæ adocanque botö imo äninque, “Inäni näämæntacoo doyæncoo nē mongæñäni iñömö æmönänidö inänitawo. Edæ ædönö

quëwëninäni inte pönänitawo,” angantapa. ¹⁴ Äñongante botö tömengä ingante, “Awënë bitö tömëmi do ëñëmpa,” antabopa. Äñömote tömengä wæætë, “Mäninäni nangui nani wæwengalmämo ñinque baganca incæ ayæ müinäni quëwënanäni ñänipa. Edæ tömënanäni weocoo doayëncoo, Wæëmö pöni bacæimpa, ante Wængongui Codotedo wepænë yamongainäni ñänipa,” ante në aacä në Picængä apænecantapa.

¹⁵ Ayæ adocä godömenque apænecantapa. “Mänömai beyæ Wængongui nänö aacæ tæ contaimpa gäänë a ongöninque tömënanäni itädë incæ woyowotæ incæ Wængongui oncö tæiyæ waëmö oncönë tömengä ingante cöwë cædanäni.

Ñinque oncontai bai tömënanäni wænö mönænæca wo cæcä bai cædinque mänimpaa në tæ contadongä ññömö tömënanäni ñänite ante wææ aacæcäimpa.

¹⁶ Tömënanäni cöwë gue æñëñämaï tepæ gæwæñnämaï incædanäimpa.

Nænque tömënanäniya ti näwänämaï i ñinque tömënanäni göñämaï incædanäimpa.

Quiëmë ocoi ä beyænque tömënanäni gonte ñänämaï inguinäniðo angüënë.

¹⁷ Edæ Wængongui Codotedo Wængongui nänö aacæ tæ contayömo gäänë në a ongongä ññömö

tömengä ññömö mäninäni näämæntacoo në mongæñäni ñänite në aacä incæcäimpa.

Tömengä edæ tömënanäni ñänite quëwengulmæ tapæññömö ññömö ænte mäocä goquänäni.

Ayæ Wængongui tömënanäni wëñapæ nani tamonte wædi tömämæ wadæ cæmoncæcäimpa,” angantapa.

8

Tee bædedinta tömanta wi æmpocampa

¹ Ayæ Wængongui Codotedo tee bædedinta tömanta wi æmpoyongante öönæðë ññömö mëedia ooda ganca nöwæ ongonte batimpa.

² Ayæ anquedoidi önonpo æmæmpoque go mëa ganca ñänäni Wængongui weca në a ongönäni ñänite atabopa. Mäninäni ñänite tömengä todompeta nani ancade önonpo æmæmpoque go mencadea ganca pædæ godongä æñänitapa. ³ Ayæ wacä anquedo ññömö ogui waaquï iya täincade oodo inte nani badöincade nææñinque, Wængongui qui, ante nani iya täimpa gäänë ponte a ongongantapa. Mänimpa oodo inte nani badöimpa Wængongui nänö aacæ tæ contaimpa gäänë ongönimpa. Ayæ, Wængongui quänäni tömengä ingante apæneyönäni bitö ogui waaquï tancæbiimpa, ante cædinque adocä anquedo ingante wacä pöninque nanguï ogui waaquï godongä ængantapa.

⁴ Ænte önonpo næænte ogui waaquï iya tangä ñinque tëëmämämo Wængongui weca æipämoyedë Wængongui quänäni tömengä ingante nani apænepämo guëa adoyömo æipämotimpa. ⁵ Ayæ adocä anquedo ññömö ogui waaquï iya täincade æñinque iya täimoga gonga ænte eyede wëñinque inguipoga ññömö wææntodongantapa. Wææntodongä ate detæbo tæi tæi të goyö yedæ pöni äñimpa. Yædæ yædæ näñimpa. Ayæ goinque gotimpa.

Todompeta nani ancade

⁶ Ayæ Wængongui anquedoidi önonpo æmæmpoque go mëa ganca ñänäni todompeta nani ancade önonpo æmæmpoque go mencadea ganca në nææñinäni inte todompeta öñone gö cædedinque we we öoncæ cædanitapa.

⁷ Wængongui anquedo tänocä ññömö tömengä todompeta inte we we öongä ate yoguica gonga tönö wepæ adoyömo wempodente bai inguipoga ññömö tæ tæ wææñimpa. Tæ tæ wææ ate inguipoga ññömö pancabaa nanguï ömæ ññömö gonte batimpa. Awæncoo ññömö pancacooga incæ adobai nanguï incoo gonte wænimpa. Gaguimæncoo ññömö tömancoo gonte batimpa.

⁸ Wængongui anquedo ayængä ññömö tömengä todompeta inte we we öongä ate ñænæ onquiyabo ëmö bai gonga bæcodote bai ññonte wææntodönäni gawapæntibaa tæi tæi guitimpa. Tæi tæi guï ate gawapæntibæ ññömö pancatibaa incæ nanguï pöni æpæ ññömö wepæ batimpa. ⁹ Ayæ gawapæntibæ cæncadëmæ inö quëwënanäni ññömö pancadäniya incæ nanguï ñänäni wænänitapa. Ayæ ñænæ wipocoo pancacooga incæ nanguï wo cæwodincoo ññömö wo ëwente guitimpa.

¹⁰ Wængongui anquedo ayængä ññömö tömengä todompeta inte we we öongä ate ñænæ nëmö ññömö cadentato tica wodönote bai öönæðë inö owodëmö incæ tæ wææñinque önoncooga ññömö pancacooga incæ nanguï æpænë ññömö tæi tæi guitimpa. Æpæ tayömo adobai cæncadëmæ inö tæi tæi guitimpa ¹¹ Mäninëmö ëmowo ññömö, Ti Nänëmö, ante nani äñëmö impa. Nëmö tæi guiyonte nanguï æpæ ññömö moncapæ bai ti nämæ batimpa. Wadäni tæiyænäni ññömö imæ ti nämæ bagaimæ bete wænänitapa.

¹² Wængongui anquedo ayængä ññömö tömengä todompeta inte we we öongä ate nænque pancayömonga tente ba ate apäicä adobai pancayömonga tente ba adinque nana apäidinö ññömö pancaa wëmö batimpa. Nëmnoncoo ññömö pancadäniya incæ nanguï ñänäni wo ëwente badäni ate nani apäidinö ññömö pancaa wëmö batimpa. Itädë ññonte

tipæmpoga go mēa ooda ganca iñō mēa go mēa ooda ganca nænque ñāō apāidāmaī inimpa. Ayæ woyowotæ iñonte tipæmpoga go mēa ooda ganca iñō mēa go mēa ooda ganca apāicā tōnō nēmōncōo apāidāmaī inānitapa.

¹³ Ayæ ayōmote guingāmōwæ ōōnædē gāmæñō pao pao godinque iīmaī ate aa pecā ēñentabopa. “Inguipoga quēwēnāni nāni wæquinque. Nāni wæquinque. Nāni wæquinque impa, angantapa. Edæ Wængonguī anquedoidi mēnaa go adocanque ināni inte tōmēnāni todompeta inte we we ōōncæ cædāni beyænque inguipoga quēwēnāni iñōmō nanguī pōni wæwenguināni bacædānimpā,” ante guingāmōwæ angantapa.

9

¹ Wængonguī anquedo ayængā iñōmō tōmēngā todompeta inte we we ōōngā ate wa nēmō ōōnædē inō owodinque inguipoga tæ wæængainēmō ongō atabopa. Māniī nēmō ingante tadōmengadænguipo ontatodē wi ænequī godonte inimpa. ² Wi ænequī æninque ontatodē wi ænecā ate tēēmancoo ta æitimpā. Māniī tēēmancoo ñænæ gongapamō tēēmancoo bai inimpa. Iinque iī tēēmancoo tadōmengadænguipo ontatodē ta æiyonte nænque tōnō ōōnæ wentamō pōni badaimpā. ³ Tēēmancodē inō ñāwāi ta pōninque inguipoga iñōmō wææñōnānite wacā godō cæcā beyænque tōmēnāni tæimō badinque emēñe inguipoga quēwēnāni bai tæ guidiāni badaitimpā. ⁴ Ayæ tōmēnāni inānite, Inguipoga gaguimæncōo incæ gæpæñabocōo incæ awæncōo incæ pæcōo wo ēwēnāmaī iedāni. Wæætē waodānique ōnōnemō inō Wængonguī nānō yewæmōi inte nē yewæmōnāmaī ingaināni inānite adinque mīnitō tōmēnāni inānite godō cæmīni beyænque nantate wæcædānimpā, ante wacā angantapa. ⁵ Ayæ ñāwāiidi inānite edæ, Wænōedāni, ānāmaī ingā inte tōmēngā, Mīnitō wæætē tōmēnāni inānite ōnompō æmæmpoqe apāicā ganca cæmīni beyæ nanguī pōni wæwæncædānimpā, angantapa. Iinque emēñe tæ guī waocā nantate wæcā bai tōmēnāni nanguī pōni nantate wæwēnāni inānitapa.

⁶ Māniñedē waodāni, Æbānō cæte wænguimoo, ante ancaa cædinque wæñāmaī incædānimpā. Wæinēmōnīpa, ante ānāni incæte ædō cæte wæmāināni.

⁷ Ayæ ñāwāiidi iñōmō tontadoidi cabayoidi guēadō guēa cæte nē godāni bai adobai emōnānitapa. Tōmēnāni ocaboga awēñe poganta oodo inte badōninta bai wæncadānitapa. Ayæ māniñāni awinca iñōmō waodāni awinca bai emōnānitapa. ⁸ Tōmēnāni ocaguī iñōmō onquiyængā

ocaguī bai encadinque tōmēnāni bagacoo iñōmō nēōō бага bai engadānitapa. ⁹ Tōmēnāni tæcætawē inō tæineta inte badōinta bai wææ mongæñānitapa. Ayæ tontadoidi guēadō guēa wænoncæte ante cædinque ānāni ate cabayoidi pogodo gote awoto bai wēa pōnonte nanguī pōni ā bai ñāwāiidi iñōmō adobai ōnonguēnepæ pao pao godinque āmæ godānitapa. ¹⁰ Tōmēnāni ōnōmīñæ incæ emēñe ōnōmīñæmpā bai emīñæñānitapa. Tōmēnāni nāni tæi pīñæmāmo ōnōmīñæ inō emīñæñāni inte ōnompō æmæmpoqe apāicā ganca godō cædāni beyæ waodāni nanguī pōni wæwēnānitapa. ¹¹ Māniī ñāwāiidi iñōmō awēñe odeye ingante ēñente quēwēnānitapa. Māningā tōmēnāni awēñe iñōmō tadōmengadænguipo iñōmō quēwēnāni inānite nē aacā anquedo inongā inte tōmēngā emōwo ebedeo tededō, Abadoō, nāni āwo i ayæ, Nē Wo Ēwēngā, ante emōngā iinque guidiego tededō, Apodiōō, ante pemōnānipa.

¹² Tāno nāni wæquinque do iinque batimpā. Incæte godōmenque mempoga ganca nanguī pōni nāni wæquinque ayæ baquinō anguēñe.

¹³ Wængonguī anquedo ayængā iñōmō tōmēngā todompeta inte we we ōōngā ate tedepāmo tēñō ēñentabopa. Oguī waquī iya tāimpā oodo inte badōimpā Wængonguī weca mæ ongompā. Mānimoga ōnōmoncawæ bai mēa go mēa mæ ongōñōmō māniñōmō tedepāmo tēñō ēñentabopa. ¹⁴ Wængonguī anquedo ayængā todompeta nē næængā ingante iīmaī angantapa. “Ñænæ ōnonga Eopadatedō nāni ānonga iñōmō anquedoidi mēnaa go mēnaa ināni iñōmō nē ñā cæyæñināni inānite bitō iimpo cæe,” angantapa. ¹⁵ Edæ māniñāni anquedoidi mēnaa go mēnaa ināni iñōmō tōmēnāni māniñepo iinque ba ate māniī apāicā iñonte māniñōnæ incæ māniī ooda iñonte do bæ nāni cæquinque ante a ongōñōnānite iīmaī angantapa. Waodāni tōmānāni iñōmō mencabodāniya go adocabodānique quēwēñōnāni adocabodānique inānite mīnitō wænoncæmīnimpā, angantapa. Ayæ ñōwo tōmēnāni inānite iimpo cæcā ate tōmēnāni wænoncæte ante tao godānitapa. ¹⁶ Ayæ tontadoidi iñōmō cabayo mongæñāni ināni æpodānidō ināni, ante tee mampute doo-tiento miñōō cabaya inānitapa. Māniñpodāni inānipa, ante ēñentabopa.

¹⁷ Botō wūimonte bai ayōmo cabayoidi tōnō nē mongæñāni iñōmō iīmaī emōnāni atabopa. Cabayo nē mongæñāni iñōmō tæcætawē inō tæineta nāni wææ mongæntacoo pancataa opatawæ gonga gonte bai emontapa. Pancataa wentamō emontapa. Pancataa atopode nāni ā bai wiñadæ emō bai emontapa. Cabayoidi

ocabo iñömö nëöo ocabo bai encadänitapa. Tömänäni önöne inö gonga tönö tëemä tönö atopode näni öo waadö tadedänitapa. ¹⁸ Mänii gonga tönö tëemä tönö atopode iñömö mëmämoque go adopämoque näni wänönämocoo në tadedäni inte cabayoidi iñömö waodäni tömänäni mencabodäniya go adocabodänique quëwëñönäni adocabodänique inänite wänönäni wänänitapa. ¹⁹ Mäninäni cabayoidi tömänäni önöne inte tæi piñänte wänöninque adobai tömänäni önömiñä inte tæi piñänte wänönänipa. Edæ tömänäni önömiñä iñömö tæntæ ocabo bai ëmiñänäni inte waodäni inänite pocänäni wänänitapa.

²⁰ Mänimämo wodonte näni wængäimämocoo beyæ ayæ wänämai quëwëñäni inte wëwëñäni incæte tömänäni näni wënæ wënæ cægäinö ante, Ancaa wæwente awædö, ante pönänämai inäni inte ñimpo cädämai inänitapa. Wæætë oodo inte padata inte bodonte inte dica inte awëmpa inte tömänäni näni badonte cönönincoo iñömö adämai incoo incæte ëñänämai incoo incæte dao dao godämai incoo incæte tömänäni, Mönitö wængonguiidi inänipa, ante ædæ wæænte apænëdinqe ñimpo cädämai inänitapa. Ayæ adobai wënæidi inänite ædæ wææninque, Minitö mönitö wængonguiidi iminidö angüënë, ante ñimpo cädämai inte apænëdänitapa. ²¹ Ayæ mäninäni godömenque waodäni inänite plinte wänönäni inte tömänäni miu bete yewänäni inänipa. Nänöogængä inämai iñongante towente cädönäni inte tömänäni awëmö ö ænänäni inänipa. Mänömai godömenque cædinque tömänäni näni wënæ wënæ cægäinö ante, Ancaa wæwente awædö, ante pönänämai inäni inte ñimpo cädämai inänitapa.

10

Wængongui anquedo dadi ompointa guiyanta næængä

¹ Ayæ wacä anquedo në tæi ëmongä inte öönædë inö wæængä atabopa. Tömengä weocoo mongænte bai boguimancodë pöninque tömengä ocaboga tæædæca inö daimë godämæ owotapa. Tömengä awinca incæ nænque bai apäidinque tömengä önömënë incæ cobacadewæ gonga gonte ëmö bai ëmënëngä ingantapa. ² Tömengä önömpo inö dadi ompointa ininta näni wi æmpodinta guiyanta næængä ingantapa. Tömengä önöwa tömëwa gäwapæntibaa cö cæwadinque tömengä dipæwa guiquënë ömaa cö cæwacantapa. ³ Mänömai cö cæwadinque tömengä nëöo ii pepa bai nangui pöni yedæ aa pecantapa. Aa peyongä detæbo önömpo æmæmpoque go mëa ganca wæætë tæi téninque tededänitapa. ⁴ Detæbo önömpo

æmæmpoque go mëa ganca inäni iñömö tededäni ëñëninque botö yewæmoncæ cætabopa. Tæcæ yewæmoncæ cæyömo öönædë inö tedepämo iimaï ante tedecä ëñentabopa. “Iñæmpa önömpo æmæmpoque go mëa detæbo näni tededö æbänö ante tededänii, ante wiï ëñingui i ininque bitö yewæmönämai ië,” angantapa.

⁵ Wængongui anquedo botö adingä iñömö gäwapæntibaa tönö ömaa në a onongä iñömö tömengä önömpo tömpo öönædë inö pædæ æmpocantapa. ⁶ Tömengä tömpo pædæ æmpodinique, Wængongui ëñëñongä botö äno ante nöingä baquino angüënë, ante iimaï angantapa. Edæ në wantæpiyæ cöwë quëwëngäingä inte öönædë tömää inguipoga tömää gäwapæntibæ tömää badöninque tömengä adobai öönædë owodäni tömänäni inguipoga quëwëñäni tömänäni gäwapäa quingänö owodäni tömänäni inänite në badongäingä inte tömengä ëmöwo apænëdinqe, Botö apænëdö nöingä baquino angüënë, ante në apænecä iñömö, “Mönö ee ongöñedë do iinque batimpa, angantapa. ⁷ Edæ Wængongui anquedo tömangä pöni iñömö tömengä todompeta we we öoncæ cæyongante Wængongui näni cæinënë ante wë wodonte bai näni angäinö ante ñöwo iinque cæcæcäimpa. Wængongui ingante në cægäinäni tömengä beyæ në apænëgäinäni iñönänite mäninö näni cæinënë ante do apænëgäingä inte Wængongui mäninö bai ñöwo iinque cæcæcäimpa,” angantapa.

⁸ Ayæ öönædë inö tedepämo adopämo do botö ëñënë ñöwo wæætë botö imote iimaï angä ëñentabopa. “Wængongui anquedo në gäwapæntibaa tönö ömaa iñömö a onongä weca godinque bitö tömengä önömpo dadi ompointa ininta näni wi æmpodinta näni nææininta æe,” angantapa. ⁹ Angä ëñëninque Wængongui anquedo weca godinque botö tömengä ingante, Dadi ompointa guiyanta pönömi æmoe, ante äñömo tömengä wæætë botö imo, “Æe. Æninque cæe. Bitö önöne da wëneyömi guñëmæ bai waëme pöni ingæimpa. Incæte yo mongænte ate cæncadë guidinque ti nä bacæimpa. Ininque cædente wæcæbiimpa,” angä ëñentabopa.

¹⁰ Wængongui anquedo önömpo dadi ompointa guiyanta æninque botö ade cæntabopa. Önöne guñëmæ bai waëme pöni i incæte yo mongænte ate cæncadë guidinque ti nä badinque cædente wætabopa. ¹¹ Ayæ botö imote angantapa. “Wacä awënë näni cabo wacä awënë näni cabo incæ wabæca näni quëwëncabo wabæca näni quëwëncabo incæ wadö näni tedecabo wadö näni tedecabo incæ wabæca wabæca näni awënë odeye cabo iñönänite bitö,

Mānīnāni Inānite æbānō baquīi, ante wæætē Wængonguī beyæ apæncæbiimpa,” ante angantapa.

11

Wængonguī æbānō cæcāā, ante mēnaa apænedapa

¹ Wacā botō imote, Tee manguimpa impa, ante cæwipa bai pædæ pōnōnque ayæ botō imote, “Goe, angantapa. Wængonguī oncō tæiyæ waēmō oncōnē godinque mānincō tōnō, Wængonguī qui, ante nāni iya tāimpa tee mæ. Ayæ waodāni adoyōmō ædæ wææninque Wængonguī ingante, Bitō Wængonguī Awēnē imidō anguēnē, ante watapæ apænedāni iñōmō æpodānidō inānii, ante tee mampote cæe. ² Wængonguī oncō tæiyæ waēmō oncōnē tee māninque yacō boyāa iñōmō tee mānāmaī iē. Edæ mānincō boyāa wadāni oodeoidi ināmaī ināni inānite do godonte itapa. Mānīnāni edæ coadenta i doo apāicā ganca mānimpoga iñonte Wængonguī nānō tæiyæ waēmō quēwēñōmō incæ wo ewente cæcædānimpā. ³ Ayæ botō imotedō ante, Botō æbānō cæboo, ante nē, Nō ante impa, ante apænedā iñōnate botō godō cæquimo beyænque tōmēna tæi piñænte badinque mūdo dootiento tetenta ēonæ mānimpoñæ iñonte botō beyæ apæncædānimpā. Waodāni wæwente beyænque gōmæ ēmoncoo mongæñāni bai tōmēna adobai gōmæ ēmoncoo mongæninque apæncædānimpā,” ante apæncæcā ēñentabopa.

⁴ Wængonguī æbānō cæcāā, ante nē, Nō ante impa, ante apænedā iñōmō tōmēna iñōmō Wængonguī inguipoga Awēnē iñongante tōmengā weca odibowæ nāni āwæ mēwāa ongōwæ bai inapa. Ayæ tōmengā weca yædo concædi tī wodōnincade mencædea ongoncade bai mānīna iñōmō adobai inōna inapa. ⁵ Wadāni, Tōmēna inate wēnæ wēnæ cæinēmopa, ante cædāni iñinque tōmēna wæætē nē piñte cædāni inānite gonga wo tadete bai cædinque wæñōna wæncædānimpā. Edæ, Tōmēna inate wēnæ wēnæ cæinēmōnipa, ante nē cædāni tōmānāni mānōmaī wæncædānimpā. ⁶ Wængonguī godō cæcā beyænque tōmēna tæi piñæna badinque, Wængonguī beyæ mōna apæneyedē cōōnæ cædāmaī ingæimpā, ante cædinque oōnædē tee mōnete bai cæcædānimpā. Ayæ tæi piñæna inōna inte tōmēna æyedēmē cæinēna incæ wæætē wæætē cæyōnate æpæncōo tōmancoo wepænque bacæimpā. Adobai inguipoga tōmāma quēwēnāni inānite tōmēna cæda ate quīēmē wæñōmāmocoo incæ pō wēnæ wēnæ bacædānimpā.

⁷ Ayæ tōmēna, Wængonguī æbānō cæcāā, ante iñinque apænedā ate babæcā bai mōnō

guīñēnongā inte tadōmengadænguipo iñō tadinque tōmēna inate guēadō guēa cædinque tæi ēmongā inte gānā cædinque wæñongā wæncædānimpā. ⁸ Wæna ate tōmēna baonque iñæñængade nāni quēwēñōmō taadō iñōmō oñoncædānimpā. Edæ Todōmā iñōmō quēwēnāni wīwa cædāni bai ayæ Equitobæ quēwēnāni wēnæ wēnæ cædāni bai mānīi iñæñængade nāni quēwēñōmō nē quēwēnāni iñōmō adobai wēnæ wēnæ cædānimpā. Mānīi quēwēñōmō adoyōmō tōmēna Awēnē ingante awāa timpote wæñōnāni wængacāimpā. ⁹ Mēōnaa go adoōnæque go tæcæ itædē iñonte tōmēna baō iñi acæte ante pōnque wacā awēnē nāni cabo wacā awēnē nāni cabo incæ waodāni nāni cabo waodāni nāni cabo incæ wadō nāni tedecabo wadō nāni tedecabo incæ wabæca wabæca nāni quēwēncabo incæ waodāni nanguī ināni ponte tōmēna baō acædānimpā. Ayæ, Da wēnāmaī ingæimpā, ante wæcæ cæcædānimpā. ¹⁰ Tōmēna iñōmō Wængonguī beyæ nē apænedāna inōna inte inguipoga quēwēnāni inānite nanguī āna wædināni inte tōmēnāni ñōwo wæætē watapæ tocædānimpā. Iñinque tōmēna mānōmaī wænte oñōna ate tōmēnāni nanguī Yæ yæ todinque wacā ingā wacā ingā, Ōnonque æe, ante pædæ godōnāni æncædānimpā.

¹¹ Mēōnaa go adoōnæque go tæcæ itædē iñinque go ate Wængonguī edæ, Quēwēncæmīna, ante tōmengā nānō guēmāmāmo quēwēngūimāmo woo ōngacā ate tōmēna iñōmō wæætē mīlna badinque ængæ ganticædānimpā. Ængæ gantiyōna nē adāni guiquēnē ancaī guīñente wæcædānimpā. ¹² Ancaī guīñente ayōnāni tōmēna oōnædē iñō tedepāmo yedæ ante ēñencædānimpā. “Iñōmō pō æeda,” angā ēñēninque tōmēna oōnædē iñō boguimāncodē æiyōna tōmēna inate nē piñte cædināni edonque acædānimpā. ¹³ Tōmēna æiyedē māniñedē goinque nanguī ocæ ocæ goquimpā. Tōmēnāni nāni quēwēñōmō onconcoo bacoo iñonte pancaconga incæ nanguī onconcoo acapowate bogocæ tæ gowæænguimpā. Ado goinque goyedē waodāni tiæte mūdo ganca wæncædānimpā. Ayæ mīlnāni quēwēnāni ancaī guīñēninque, Wængonguī oōnædē nē quēwēmi imi inte bitō nō tæi piñænte imidō anguēnē, ante wæcædānimpā.

¹⁴ Ayæ mēmpoga nāni wæquinque do iñinque batimpa. Incæte godōmenque adopoque nanguī pōni nāni wæquinque oo pōni bacæimpā.

Todompeta æmæwoya

¹⁵ Wængonguī anquedo tōmengā iñōmō tōmengā todompeta we we ōngā ate

öönædē inö wadāni nāni tedepāmo yedæ tededinque īmaī ānānitapa.

“Mönö Awēnē Wængongui tömengä Codito tönö

ingui-poga Tæiyæ Awēnē Odeyeda badingue wantæpiyæ cōwē aacædaipa,” ānānitapa.

¹⁶ Nē aadāni nē Picænāni īñömö bæinticoatodo ganca īnāni mānimpodāni īñömö Wængongui weca tömēnāni awēnē tæ contai-paa nē tæ contadāni inte ñowo guidömēmæ ædæ wææninque Wængongui ingante, Bitö Awēnē Wængongui imidö anguēnē, ante watapæ apænedānitapa.

¹⁷ Ayæ īmaī apænedinque,

“Awēnē Wængongui bitö adobique Tömää nē Cædömi inte

wēēñēdē do nē quēwengāimi īmi ñowobi īñömi īmipa.

Bitö nāmā tæi pīñæmi inte ñowo ædæmō nē aabi īñömi īmipa,

ante adinque bitö īmite waa ate pönente apænemōnipa.

¹⁸ Wabæca wabæca nāni quēwencabo incæ tömānāni quēwēnāni ængui badānitapa.

Ayæ bitö ængui babi īninque

nē wængaināni īnānite bitö apænte pan-guiönæ do batimpa.

Ayæ bitö beyæ nē apænedōnāni īñömö bitö īmite nē cædōnāni īñōnānite

tömēnāni īnānite bitö, Minitö cædi beyæ paga cæbo æncæminimpa, ante bitö godonguiönæ dobæ batimpa.

Ayæ bitö quīnāni īñōnānite bitö emōwo ante bitö īmite nē ēñente cædōnāni īñōnānite

awēnē bai īnāni incæ önōnānique īnāni incæ tömānāni īnānite bitö, Minitö cædi beyæ paga cæbo æncæminimpa, ante bitö godonguiönæ dobæ batimpa.

Ayæ ingui-poga quēwēnāni īnānite wadāni nē wo ewente cædōnāni īñōnānite bitö wo ewente cæquiönæ do batimpa.”

¹⁹ Ayæ öönædē inö Wængongui tæiyæ waēmō oncö odemō wibænetapa. Wibæneyö Wængongui, Waodāni æbānō cæte botö tönö godongāmæ waa cæte quēwencædānimpa, ante odömoncæte ante nānō yewæmongainca nāni da wencaincade īñömö māincōnē mæ ongoncade atabopa. Ayómote yædæ yædæ nānimpa. Yedæ pōni ānimpa. Detæbo tæi tæi tēñö yedæ pōni ānimpa. Goinque gotimpa. Ayæ yoguica cōönæ bai nangui cæte wæænimpa.

12

Onquiyængä tönö dadagöö nāni ānongä

¹ Wængongui, Mä pōni odömömo adinque ēñencædānimpa, ante cædinque öönædē inö waēmō pōni badongä a owo atabopa.

Edæ onquiyængä īñömö nænque inte weocoo wēñate bai mongæñongä apæicāmo incæ tömengä cæncædēwa æñömengædæwa inö impa. Tömengä, Awēnē poganta, ante tipæmpoga go mēa nēmōidi inte godāmæ badōinta wencacantapa. ² Māningä onquiyængä yædēmadä ēnengä īñongante wēñængä ēñacæ cæcä wæte wædinque wēñæ nantate Yæ yæ wæcantapa.

³ Īninque Yæ yæ wæyongante öönædē inö mä pōni Wængongui nānō badōi wadö bai badōi a owo atabopa. Edæ ñænængade obe bai dadagöö nāni ānongä opatawæ ēñacä inte tömengä ocabocoo önömpo æmæmpoque go mēcaac encacä inte māñi ocabocooa awēnē pogantacoo önömpo æmæmpoque go mentaa wencacä ingantapa. Tömengä önömoncawæ adobai önömpo tipæmpoga ocabocooa encacä ingantapa. ⁴ Tömengä önöncaimiñænca picæ cæmiñæninque öönædē owodāni nēmōidi incæ pancadāniya incæ nangui īnāni īnānite wææntodongä ingui-poga tæ wæænānitapa. Onquiyængä oo pōni īñongante dadagöö, Wēñængä ēñacä ate cæncæboimpa, ante tömengä weca a ongongantapa.

⁵ Onquiyængä wēñængä onguiñængä ingante mangä Īninque tömengä īñömö nānō Awēnē baquinque pæcantapa. Tömengä īñömö tæiyæ awēnē tömengä nempo quēwēnāni īnānite aacä bai adobai tömāmæ quēwēnāni īnānite, Īmaī cæedāni, ante aacæcäimpa. Māningä onquiyængä wēñængä ingante wacä ö ænte Wængongui weca ayæ tömengä nānō aacæ tæ contayömö māñiñömö ænte mæicä æicantapa. ⁶ Māñinö bayonte wānā īñömö önömæca īñömö wodii gocantapa. Tömengä beyæ ante Wængongui nānō eyepæ cæyömö māñiñömö wodii gocantapa. Māñiñömö mliido dootiento tetenta eönæ mānimpoönæ īñonte tömengä quēwente beyæ cængui eyepæ pönōnāni cæncæcäimpa, ante Wængongui tömengä nānō owoyömö ante do badongantapa.

⁷ Māñiñedē edæ öönædē īñömö guæadö guæa cæte wæñōnānitapa. Wængongui anquedo Mliguedo nāni angaingä īñömö tömengä wadāni anquedoidi awēnē inongä ingampa. Tömengä tömēnāni tönö dadagöö ingante wido cæcæte ante cæyōnāni dadagöö wæætē tömengä anquedoidi tönö wæætēdö wæætē guæa cædāni incæte ⁸ tömēnāni ædö cæte gānā cæquīnāni. Edæ ædö cæte öönædē īñömö ayæ quēwēnguiñāni, ante tömēnāni īnānite wido cædānitapa. ⁹ Tömēnāni īñömö ñænængade dadagöö ingante wido cæte wææntodōnānitapa. Māningä dadagöö īñömö wēēñēdē tæntæ ingaingä inte tömengä emōwo Wēnæ Tatāna mēwoga

ëmongä ingampa. Adocä, Inguipoga quëwënanî tömänäni oda cæcædänîmpa, ante nê wapiticæ ænte mäocä ingampa. Tömengä ingante ayæ tömengä anquedoidi inänite inguipoga iñömö wido cæte wææntodönänitapa.

¹⁰ Ayæ ate öönædê inö tedepämo yedæ ante iimäi ä ëñentabopa.

“Nöwoönæ mönö Wængongui mönö imonte, Minitö botö æmæwo æmo beyænque quëwëngüimîni, ante tömengä nänö cæönæ batîmpa.

Ayæ tömengä nänö tæi piñænö nïwoönæ ba inique

tömengä adobai Tæiyæ Awënë Odeye nïwoönæ bacäîmpa.

Ayæ tömengä nänö apænte ængaingä mönö Codito adobai nämä tæi piñænongå inte nê angä bacäîmpa.

Wënæ guiquënë mönö töniffadäni inänitedö ante, Wënæ wënæ cædänidö angüënë, ante wapiticæ apænete änewënongå ingampa.

Woyowotæ incæ itædê incæ mönö Wængongui weca a ongöningque tömengä mäninäni inänitedö ante nê wapiticæ änewënongå iñongante tömengä ingante inguipoga iñömö wææntodönäni wæængantapa.

¹¹ Wængongui Codotedo wepæ tömengä nänö wænte godongaimæ beyænque tæi ëmönäni badinque mönö töniffadäni iñömö wënæ ingante gänä cædänitapa.

Ayæ, Wængongui æbänö cæcää, ante tömënäni nâni apænedö beyænque tömënäni tæi ëmönäni badinque wënæ ingante gänä cædänitapa.

Wadäni tömënäni inänite Wængongui beyæ wænoncæ cæyönäni tömënäni,

Mönitö guiffänämai wæncæmönîmpa, ante nê änäni inänitapa.

¹² Mänömai beyæ munitö öönædê iñömö nê quëwëmîni inte watapæ tocæmînimpa.

Wamîni guiquënë inguipoga iñömö æpæntibædê iñömö nê quëwëmîni inte mîni wæquinque ingæîmpa.

Edæ wënæ munitö weca wææ pö quëwëngäîmpa.

Tömengä nänö wo ëwënguîno oo pönî impa, ante ëñente beyænque äingä pönî bacampa.

Mänömai beyæ munitö guiffënguimämo baquinque impa.”

Mänömai ante yedæ angä ëñentabopa.

¹³ Ayæ dadagöö, Botö imote inguipoga iñömö wido cæte wææntodönäni adi wædö, ante wædinque onquiyængä ingante wëñængä onguiffængä nê mäningä ingante bæi ongoncæte ante togængantapa. ¹⁴ Incæte Wængongui, Önömæca iñömö bitö beyæ botö

cæyömö pao pao gocæbiimpa, ante cædinque iñænængade guingämöwæ önonguënepæ bai tipænguënepäa pönö badongä enguënepænte bai onquiyængä bacantapa. Inique onquiyængä, Tæntæ botö imote bæi ongönämai incæcäîmpa, ante Wængongui önömæca tömengä beyæ nänö cæyömö pao pao gocantapa. Mëa go adoque tæcæ wædepo iñonte tömengä mäniñömö quëwente beyæ nänö cænguî eyepæ ænte cænguiffömö gocantapa. ¹⁵ Ayæ, Onquiyængä ingante æpæ quingæ mangui bai bæ ta tæi guicæcäîmpa, ante cædinque dadagöö tömengä önöne inö önö bai æpæ towæ tadonte bai tao godecantapa. ¹⁶ Dadagöö towæ tadonte bai nänö tao godepæ quingæ pönö onguipo incæ onquiyængä beyæ ante cædinque wi ænete cæyö ada guipæntapa. ¹⁷ Ada guipæ adinque dadagöö iñömö onquiyængä ingante godömenque ænguî badinque wadæ godinque, Mäningä onquiyængä wënäni incæ wadäni inänite guëa cæte wænonguimo, ante gocantapa. Tömënäni Wængongui nänö, iimäi cædäni, ante wææ angainö ante nê ëñente quëwënanî inte, Itota æbänö cæcää, ante nê apænete quëwënanî inönäni iñömö mäninäni mäningä onquiyængä wënäni iñönänite dadagöö, Wænoncæboimpa, ante gocantapa.

13

Mënaa mönö guiffënöna

¹ Ayæ dadagöö æpæntibæ yæwedeca ëmönaiya iñömö ponte a ongongantapa.

Ayæ babæcä bai nê guiffënongä iñömö æpæntibædê quëwente ta pöñongä atabopa. Mönö guiffënongä tömengä ocabocoo önompo æmæmpoque go mencaa encacä inte tömengä önömoncawæ önompo tipæmpoga ocabocoo inö encacä ingantapa. Awënë pogantacoo tipæmpoga ganca tömengä önömoncawäa da da wencate encacantapa. Ayæ Wængongui ëmöwo incæ wiwa babæ wapiticæ ante äniwoi tömengä ocabocooa tömancooga inö yewæwente encacä ingantapa. ² Mäningä mönö guiffënongä botö nê adingä iñömö mëne bai ëmönongä incæte tömengä önöwa oto önöwa bai ëwacä inte tömengä önöne nëö önöne bai ëwecä atabopa. Ayæ dadagöö nämä nänö tæi piñænö ante mönö guiffënongä ingante pædæ godöningque tömengä nänö aacæ tæ contaimpa pædæ godongä ænte tæ contadinque mönö guiffënongä nê awënë badinque, iimäi cædäni, ante nanguî angä bacantapa. ³ Ayæ mönö guiffënongä adoque ocaboga ämocate wæncæ cæcä bai ingaingä incæte gämæ cæcate ingantapa.

Tömämæ quëwënanî mönö guiffënongä ingante adinque ancai guiffëningque tömänäni tömengä miñæ godänitapa. ⁴ Dadagöö godö

cæcä beyænque mönö guiññongä iñömö awënë badinque dadagöö bai në angä do bacä impa, ante adinque tömänäni dadagöö ingante, Bitö Awënë Wængongui bai imidö anguëñë, ante apænedänitapa. Adobai mönö guiññongä ingante, Bitö Awënë Wængongui bai imidö anguëñë, ante apænedänitapa töö. Mäninö ante godömenque ïimai äninque, “Æcänö mönö guiññongä bai ingä iñömö edæ dæ angampa. Æcänö tömengä ingante guëadö guëa cædinque tæi emonte gänä cæquiringä.”

⁵ Dadagöö godö cæcä beyænque mönö guiññongä iñömö nämanque pönente änewëñongä badinque Wængongui ingantedö ante babæ wapiticæ ante änewëñinque, Botö Wængongui bai imopa cæminii, änewëñongantapa. Ayæ awënë badinque në angä badingä inte mönö guiññongä iñömö coadenta i doo apäicäa mänimpoga iñonte, ïimai cæedäni, ante aacantapa. ⁶ Ayæ tömengä mäniñedë Wængongui ingantedö ante wënæ wënæ babæ wapiticæ ante änewëñongä inte Wængongui emöwo ante tömengä nänö quëwëñömö ante babæ wapiticæ ante änewëñongantapa. Tömëñäni öönädë në quëwëñäni inänitedö ante adobai babæ wapiticæ ante änewëñongantapa. ⁷ Tömengä Wængongui quinäni inänite guëadö guëa cæcæcäimpa, ante cædinque dadagöö godö cæcä beyænque tömengä nämä tæi piñængä badinque tömëñäni inänite tæi emongä inte gänä cæcantapa. Ayæ dadagöö godö cæcä beyænque mönö guiññongä iñömö waodäni näni cabo waodäni näni cabo incæ wacä awënë näni cabo wacä awënë näni cabo incæ wadö näni tedecabo wadö näni tedecabo incæ wabæca näni quëwencabo wabæca näni quëwencabo iñönänite tömengä tömänäni awënë badinque tömëñäni inänite, ïimai cæedäni, ante në angä bacantapa.

⁸ Mänömai beyæ tömämæ quëwëñäni iñömö tömengä ingante, Bitö Awënë Wængongui bai imidö anguëñë, ante apæñecädänimpa. Wængongui ingui-poga nänö badöñedë, Botö Codotodo ingante do wænönäni wæncæcäimpa, ante do angacäimpa. ïngä Codotodo, Näni quëwenguinta, ante nänö yewæmongaintaa ædänidö emöwo yewæmönämai inäni iñömö tömëñäni mönö guiññongä ingante, Bitö Awënë Wængongui bai imidö anguëñë, ante apæñecädänimpa.

⁹ Në äamonca imini inte ëñëedäni.

¹⁰ “Æcämenque ingante ante apænedinque Wængongui, Ao bæi ongonde tee mönete bai cæedäni, angä ïinque tömengä ingante do bæi ongonde tee möñecädänimpa.

Æcämenque ingante ante apænedinque Wængongui, Ao yaëmenca wænömüni wæncæcäimpa, angä ïinque tömengä ingante do yaëmenca wænönäni wæncæcäimpa.”

Mänömai beyæ munitö Wængongui quimüni iñömö wæntæye inämai inte ee cæcæminimpa. Edæ tömengä ingante godömenque wede pönencæminimpa.

¹¹ Ayæ ate wacä babæcä bai në guiññongä guiquëñë onguipodë quëwente ta pönongä atabopa. Codotodoidi önömoncawæ mëwäa näni emoncadö bai tömengä adobai encacä ingantapa. Incæte tömengä dadagöö bai tedecantapa. ¹² Mönö guiññongä tänocä pöningä nänö äno beyænque ayængä pöningä iñömö awënë badinque tänocä beyænque äninque, ïimai cæedäni, ante në aacä ingantapa. Tänocä pöningä mönö guiññongä ämocate beyæ në wæncæ cæcä incæ wæætë gämæ cæcädinängä iñongante ayængä pöningä iñömö tömämæ quëwëñäni inänite angä ëñëñinque tömänäni tänocä pöningä ingante, Bitö Awënë Wængongui bai imidö anguëñë, ante apænedänitapa. ¹³ Mäningä mönö guiññongä ayængä pöningä, Mä pöni cæbo adinque ëñëcädänimpa, ante cædinque badongampa. Ayæ godömenque mä pöni cæcä beyænque waodäni edonque pöni ayönäni öönädë inö incæ gonga ingui-poga wæætë adänitapa.

¹⁴ Mönö guiññongä tänocä pöningä nänö äno beyænque tömengä weca mä cædinque ayængä pöningä iñömö tömämæ quëwëñäni inänite oda cæte näni goquino ante mäocä godänitapa. Edæ tömëñäni inänite äninque, Mönö guiññongä yaëmenca guiiyömö wæætë gämæ cæcate në müngä quëwængä nänö emönö bai adobai badöedäni, angä ëñente badonte concæädänitapa. ¹⁵ Mönö guiññongä ayængä pöningä iñömö eyepæ cædinque mönö guiññongä tänocä pöningä nänö emönö bai näni badöñinca incæ, Tedecæcäimpa, ante cæcä änte mäninca incæ oo guëmangantapa. Tömëñäni näni badöñinca ante waodäni Baa äninque, Bitö Awënë Wængongui bai imidö anguëñë, ante apæñedämai inäni inänite mäninca incæ ä beyænque wænönäni wænänitapa.

¹⁶ Ayæ awëñëidi bai inäni incæ önöñänique incæ mänincoo eadäni incæ mänincoo ömæpodäni incæ wacä godonte æningä beyænque në cæte quëwëñäni incæ nämanque cæte quëwëñäni incæ mäninäni tömänäni inänite tömengä nänö äno beyænque önonpo tötempo inö yewæmönäni badänitapa. Wæætë önonpo tötempo inö yewæmönämai inäni inte tömëñäni önöñemö inö yewæmönäni badänitapa. ¹⁷ Tömengä nänö yewæmöi

yewæmōnāmai ināni guiquēnē tōmēnāni māincoo ædō cæte godonte ænguīnāni. Ædō cæte godonte ænāni weca gote tōmēnāni māincoo inī godonte ænguīnāni. Ayæ mānīnō ante yewæmōi iñōmō mōnō guīñēnongā tānocā pōningā ěmōwo impa. Wīi tōmēngā ěmōwo yewæmonte i bai tōmēngā ěmōwo ante beyæ, Æpodō i, ante yewæmonte impa.

¹⁸ Mānīnō ante ěñencæte ante nāni ěñēnō ante eyepæ encadāni inte ěñencædānimpā. Ocai nē encacā ininque, Mōnō guīñēnongā tānocā pōningā nānō, Æpodō i, ante ěñencæte ante cæcæcāimpā. Edæ tōmēngā, Æpodō i, ante waocā, Æpodō i, ante adopo impa. Tōmēngā nānō, Æpodō i, ante teitiento teitenta i tei impa.

14

144.000 ganca ināni nāni āmotamīni āinō

¹ Ayæ botō ayōmote Wængonguī Codotedo ānanquidi iñōmō Tiōno nāni anquidi māniñōmō a ongongā atabopa. Tōmēngā weca waodāni tiento coadenta i coatodo mīdo ganca ināni inte Wængonguī Codotedo ěmōwo adobai tōmēngā Mæmpo Wængonguī ěmōwo nāni ōnōnemō inō nē yewæmōināni inte a ongōnāni atabopa. ² Ayæ botō ěñēñōmote ōnōædē inō tedepāmo ante ñænæ tēñabo ante bai detæbo eyequei tē bai ěñēñinque adobai waodāni nāni adapate nāni ampoque inte tæiyænāni ampoynāni ante bai tedepāmo tē ěñentabopa. ³ Tiento coadenta i coatodo mīdo ganca ināni iñōmō mā āninque waa āmotamīni ante ānānitapa. Wængonguī nānō aacæ tæ containpa gāānē āmotamīni āñōnāni mīnāni quēwēnāni mēa go mēa ganca ināni nē aadāni nē Picænāni tōnō ěñēñānitapa. Tiento coadenta i coatodo mīdo ganca ināni inguipoga quēwēnāni tōnō adoyōmō quēwēñōnāni, Godonte æmo beyænque quēwēnguimīni, ante Wængonguī nānō nē æninānique iī āmotamīni āinō ante ěñente ancædānimpā. Wadāni guiquēnē ædō cæte ěñente anguīnāni.

⁴ Iināni iñōmō Wængonguī ingante ante waēmō quēwēncæmōnimpā, ante cædinque, Onquiyængā, ante nē towēnāmai ingaināni inānipa. Ininque tōmēnāni Wængonguī Codotedo ædōnō gocā tōmēngā mīñæ cōwē godānipa. Tōmēnāni waodāni tōnō adoyōmō quēwēñōnāni Itota, Botō wepæ beyænque quēwēnguimīni, ante tōmēnāni inānite ængacāimpā. Tāno amiña bayedē tā pedinque mīnitō, Wængonguī qui baquimpā, ante mīni cōnōni bai mānināni adobai Wængonguī quīnāni badinque Wængonguī Codotedo quīnāni inānipa. ⁵ Adodāni cōwē babæ ānāmai ināni ininque wadāni ædō cæte tōmēnāni inānitēdō ante, Babæ ānānipa, ante

anguīnāni. Tōmēnāni edæ cōwē wēnæ wēnæ cædāmai inānipa tōō.

Wængonguī anquedoidi mēnaa go adocanque nāni ānō

⁶ Ayæ Wængonguī anquedo wacā iñōmō ōōnædē inō pō pao pao gocā atabopa. Inguipoga nē quēwēnāni inānite wabæca nāni quēwencabo wabæca nāni quēwencabo incæ waodāni nāni cabo waodāni nāni cabo incæ wadō nāni tedecabo wadō nāni tedecabo incæ wacā awēnē nāni cabo wacā awēnē nāni cabo iñōñānite anquedo tōmānāni inānite Wængonguī wantæpiyæ cōwē nānō watapæ apænedō ante ěñencædānimpā, ante apænecæte ante pongantapa. ⁷ Māningā Wængonguī anquedo iñōmō yedæ iūmai āninque, “Wængonguī apænte nānō anguīōnæ do iinque bayonte māniōnæ tōmāmīni mīni cægāinō ante tōmēngā apænte ancæcāimpā. Ininque tōmēngā ingante guīñēninque ee aedāni. Adobai tōmēngā ingante waa aedāni. Tōmēngā edæ ōōnædē incæ inguipoga incæ æpæntibæ incæ æpæ tayōmō incæ tōmāā nē badongaingā ingante mīnitō, Bitō Awēnē Wængonguī imidō anguēnē, ante ædæ wææninque watapæ apænedāni. Māninque āmopa,” angantapa.

⁸ Māningā Wængonguī anquedo gocā ate wacā Wængonguī anquedo ayængā pōninque iūmai angantapa. “Babidōnia nāni āñōmō do wo ěwente batimpa. Babidōnia nāni waēmō quēwēñōmō i incæte do wo ěwente ba aedāni. Māniñōmō nē quēwēnāni wēnæ wēnæ cædināni iñōmō onquiyængā nē towēngā bai cædinque biñōmæ bete quidi quidi dowæninque towencædānimpā, ante tū nāmæ godonte bai cædānipa. Tōmēnāni mānōmai godō cædāni beyænque wabæca nāni quēwencabo wabæca nāni quēwencabo wæætē wēnæ wēnæ cædānitapa. Māninque āmopa,” angantapa.

⁹⁻¹⁰ Ayæ māningā Wængonguī anquedo gocā ate wacā Wængonguī anquedo tōmangā pōninque yedæ iūmai angantapa. “Mōnō guīñēnongā tānocā pōningā ingante æcānō, Bitō Awēnē Wængonguī bai imidō anguēnē, ante apænecāā. Ayæ tōmēngā nānō ěmōnō bai nāni badōninca gāānē ædæ wææninque æcānō apænecāā. Wængonguī tōmēnāni inānite nanguī piincæcāimpā. Tōmēnāni ōnōmpo incæ ōnōnemō incæ mōnō guīñēnongā nānō yewæmōi nē yewæmōināni adinque Wængonguī adobai tōmēnāni inānite nanguī piincæcāimpā.” Āninque Wængonguī anquedo godōmenque apænecantapa. “Mānināni Wængonguī biñōmæ nānō piimæ becædānimpā. Mānimænque æninque tōmēngā nānō piinte owætadē pe ñiñængantapa. Mānimænque nē bete bai ināni iñōmō nanguī pōni

wæwencædānimpa. Wængonguī tæiyæ waēmō anquedoidi weca ayæ Wængonguī Codotedo weca gonga bæcōyōmō atopode nāni ōō wadō gonga bæcōyōmō ōō wayōmō māniñōmō iñāni æmæwo gonte ba bai nanguī wæwencædānimpa,” angantapa.

¹¹ “Ayæ tōmēnāni gonga bæcōyōmō māniñōmō wæwēñōnāni nāni wæwēmāmo tēemā bai cōwē æicōmpa. Woyowotæ incæ itædē incæ māniñāni edæ guēmānāmai incædānimpa. Tōmēnāni iñōmō, Mōnō guīñēnongā tānocā pōningā weca ædæ wææñinque, Bitō Awēñē Wængonguī bai imidō anguēñē, ante nē apænedāni iñāni. Ayæ tōmēngā nānō ēmōnō nāni badōninca gāānē ædæ wææñinque nē apænedāni adobai tōmēngā ēmōwo nānō yewæmōi nē yewæmōiñāni inte māniñāni tōmēnāni wantæpiyæ mānōmai guēmānāmai inte wæwencædānimpa. Māniñque āmopa,” angantapa.

¹² Mānōmai beyæ mīnitō Wængonguī quimīni iñōmō tōmēngā nānō, iīmai cæedāni, ante nānō wææ angaiñō ante ēñente cædōmīni inte ayæ Itota ingante godōmenque wede pōnēmīni inte mīnitō wantæye iñāmai inte ee cæcæmīnimpa.

¹³ Ayæ ate botō ōōnædē iñō tedepāmo iīmai ante ēñentabopa. “Bitō iīmai yewæmōe,” angantapa. “Nōwo ganca ayæ ate Awēñē Itota ingante pōnente nē wæñāni inte tōmēnāni nāni toquinque.”

Ante āñongā Wængonguī Tæiyæ Waēmō Ōnōwoca, “Ao āmopa, angampa. Nāni toquinque ingæimpa. Tōmēnāni nāni nanguī cægaiñō ñimpo cæte guēmancædānimpa. Edæ tōmēnāni nāni waa cægaiñō ōōnædē iñōmō edonque pōni acæimpa,” ante angantapa.

Inguipoga quēwēñāni beyæ amiña bai bacæimpa

¹⁴ Ayæ botō ayōmo nāāmænta boguimā mæ owo atabopa. Adocanque Waocā ēñagaingā ingā bai iñōmō māniñō boguimā tæ contacā atabopa. Tōmēngā ocaboga awēñē poganta oodo inte badōinta encacā inte tōmēngā nānō ōnōnempo yaēmē bai waingamē idāmæ engamē næængā atabopa. ¹⁵ Ayæ ate wacā anquedo Wængonguī oncō tæiyæ waēmō oncōnē ta pōningque boguimā nē tæ contacā ingante iīmai yedæ ante aa pecantapa. “Inguipoga quēwēñāni botō imote nē wede pōnente waa cædōnāni iñōmō nē minte pæmō bai iñāni inte tōmēnāni nāni to amiña bayedē bai impa. Wadæ wadæ pinōningque nāni ō æñedē bai do bayonte bitō yaēmē bai bitō nææi ænte gote māniñāni iñānite wadæ wadæ pinonte bai cædinque ō æe.” ¹⁶ Angā ēñēnīnque boguimā nē tæ contacā gote inguipoga iñōmō tōmēngā yaēmē bai nānō nææi inte wadæ wadæ pinonte bai cædinque

tōmēnāni nē minte pæmō bai iñāni iñānite ō ængantapa.

¹⁷ Ayæ ōōnædē iñōmō Wængonguī oncō tæiyæ waēmō oncōnē ongonte ta pōningque wacā anquedo adobai yaēmē bai waingamē idāmæ engamē næænte pongantapa. ¹⁸ Tōmēngā pongā ate Wængonguī anquedo wacā pongantapa. Wængonguī oncō tæiyæ waēmō oncōnē, Wængonguī quī, ante iya tæe, ante nē ānongā inte nāni iya tālmoga gāānē ongōningque ta pōningque yaēmē bai waingamē idāmæ nē engamē næængā ingante iīmai yedæ apænecantapa. “Inguipoga tōmāo nē wēnæ wēnæ cædāni iñōmō yowecoo bai iñāni. Māniñāni yowe ite bayedē bai iñāni adinque bitō yaēmē bai bitō nææi ænte gote yowecoo wangō tadampote gæte bai cædinque tōmēnāni iñānite cæe.”

¹⁹ Angā ēñēnīnque Wængonguī anquedo inguipoga iñōmō tōmēngā yaēmē bai nānō nææi inte wangō tadampote cædinque yowecoo gædāni bai tōmēngā nē wēnæ wēnæ cædāni iñānite adobai cæcantapa. Ayæ yowepæ ante ñænængade nāni pinā pinā gāwate cæincadedē yowecoo wææntodonte bai cædinque tōmēngā wēnæ wēnæ cædāni iñānite Wængonguī pīnte nānō pāiñōmō wido cæcantapa. ²⁰ Māniñō tōmēnāni yowecoo ænte pinā pinā gāwate cæincade iñōmō tōmēnāni nāni quēwēñōmō yabæca ongompā. Māniñōmō tōmēnāni iñānite pinā pinā gāwate bai cædānitapa. Cæyōnāni tōmēnāni wepæ nanguī pōni gotimpa. Cabayo goto winediñōmō æi ganca tōmēnāni wepæ māninganca æi godinque todee tiento quidōmetodo ganca māninganca nanguī pōni wepæ gotimpa.

15

Tiæte ganca nāni wæwenguimāmo pompa

¹ Ayæ botō ayōmote Wængonguī ñōwo wæætē mā pōni odōmōmo adinque ēñencædānimpa, ante cædinque ōōnædē iñō hamōnengæ pōni badongā a owo atabopa. Wængonguī anquedoidi ōnompō æmæmpoque go mēnaa iñāni iñōmō ōōnædē ongōñōnānite tōmēnāni iñānite, Mīnitō cæmīni beyænque waodāni nāni wæwenguimāmocoo ōnompō æmæmpoque go mempoga pongæimpa, angā ēñente ænte pōnānitapa. Māniñō wæwēmāmocoo æmæwo ba adinque Wængonguī nānō ængui panguimāmo eyepæ bapa.

² Ayæ æpæntibæ iñōmō awocawænta ēmō bai adinque botō māntibæ tōnō gonga guæa wempodente bæco atabopa. Adotibæ yæwedeca waodāni mæ ongōnāni. Māniñāni iñōmō mōnō guīñēnongā ayæ pōningā ingante ante ayæ tōmēngā nānō ēmōnō bai nāni badōninca ante Baa āninque

tömënanî tæi emonte gänä cædäni inänitapa. Adodäni tömengä emöwo ante, Æpodö i, ante Baa ante yewæmönämaï inäni atabopa. Wængongui tömënanî inänite adapate nani ampoqui godongä ænte nææante a ongönänipa. ³ Tömënanî an gôninque Wængongui ingante në cægaingä Möitee wodi ämotamini nänö angainö ante ayæ Wængongui Codotedo ämotamini nänö againö ante ïmaï ämotamini änanipa.

“Awënë Wængongui bitö adobique Tömää Cægaïmi inte

bitö mä cædö ïñömö waëmö pöni inönö angüenë.

Bitö tömämæ quëwënäni Tæiyæ Awënë Odeyebi imidö angüenë.

Quiëmë cædinque bitö në nö cæbi ïmipa.

⁴ Awënë ëñëmi, Æcämë bitö imite guiñëñämaï ingüngää.

Ayæ bitö emöwo ante pönente æcämë waa adämaï ingüngää.

Edæ bitö adobique tæiyæ waëmö ïmipa.

Tömää bitö nö cædinö edonque pöni ba ad-inque

wabæca wabæca nani quëwencabo tömänäni bitö weca ponte ædæ wææninque

bitö ïmi, Bitö Awënë Wængongui imidö angüenë, ante ancædänipa.”

⁵ Ayæ ate botö ayömote öönædë ïñömö Wængongui tæiyæ waëmö oncö incæ æmontaicö bai inte tömengä nänö nanëñë owocö ïñömö wi ænete bayö atabopa. ⁶ Wængongui anquedoidi önopmo æmæmpoque go mënaa inäni mänincönë ongonde ta pönänitapa. Tömënanî cædäni ate waodäni nani wæwenguimämo ïñömö önopmo æmæmpoque go mem-poga pongæïmpa. Tömënanî weocoo waëmoncoo nino nani ancoo ñäö bai ëmoncoo mongæñäni inänipa. Tömënanî tæcætawë ïñö pacadeyænta oodo inte nani badöinta mongæñëñmæñäni inänipa.

⁷ Ayæ müñäni quëwënäni mënaa go mënaa ïñönäni adocanque Wængongui anquedoidi önopmo æmæmpoque go mënaa inäni ïñönänite owætacoo adotaque adotaque pædæ godongä æñänitapa. Mänintacoo önopmo æmæmpoque go mentacoo ïñömö oodo inte nani badöintacoo inte Wængongui në wantæpiyæ cöwë quëwengainä ingä nänö ænguï pämämo eyede ënentapa. ⁸ Wængongui nänö ñäö apäidö beyæ ayæ tömengä nänö tæi piñæmämo beyæ tömengä tæiyæ waëmö oncönë ïñömö tëëmämämo eyede mæ ongompa. Ayæ Wængongui anquedoidi önopmo æmæmpoque go mënaa inäni cædäni ate waodäni nani wæwenguimämo ante önopmo æmæmpoque go mem-poga nani wæwenguiganca ïnque baganca æcämenque incæ Wængongui tæiyæ waëmö oncönë guidämaï incædänipa.

16

Wængongui nänö ænguï panguintacoo

¹ Ayæ ate Wængongui tæiyæ waëmö oncönë ïñö tedepämo yedæ të ëñentabopa. Në angä ïñömö Wængongui anquedoidi önopmo æmæmpoque go mënaa inäni inänite, “Goedäni, äninque, Wængongui owætacoo nänö ænguï panguintacoo önopmo æmæmpoque go mëna ganca incoo nææante gote inguipoga ïñömö gao cædäni,” angä ëñentabopa.

² Wængongui anquedo tänocä godinque tömengä owætadë ëñë incæ inguipoga gao cæcantapa. Gao cæcä ate mönö guiñëñongä ayæ pöningä nänö yewæmöö në yewæmöinäni inte tömengä nänö emönö bai nani badöinca gäänë ædæ wææninque apæñedäni ïñönänite tömënanî ayaa nantai ñömæi tömäo baadinque nantate wædänitapa.

³ Wængongui anquedo ayæ në gocä tömengä owætadë ëñë incæ æpæntibæ cæncadëmæ gao cæcä ate mänimæ ïñömö do wænänäni wepæ bai mänte mäntibædë quëwënäni tömänäni wænänitapa töö.

⁴ Wængongui anquedo ayæ në gocä tömengä owætadë ëñë incæ æpæñë tömänonga gao cædinque æpæ tayömö tömäñömö gao cæcä ate mänimæ tömämæ wepæ batimpa. ⁵ Ayæ ate Wængongui anquedo æpæ tömämæ beyæ në angä inte ïmaï apæñecä ëñentabopa.

“Mönö Tæiyæ Waëmö inömi ëñëmi, bitö wëñëñedë do në quëwengämi ïmi ñöwobi adobi inömi ïmipa.

Mänömaï tömënanî inänite apænte ante päninque bitö nö cædinque apænte päni ïmipa.

⁶ Edæ bitö quinäni tönö bitö beyæ në apænegäñäni inänite wænönäni ate tömënanî në wænäni wepæ näate bagadänimpa.

Bitö wæætë në wænonte näate badäni nani cægai beyæ

wepæ godömi bagadänimpa,” angantapa.

⁷ Ayæ Wængongui qui, ante nani iya täimoga ïñö tedepämo të ëñentabopa. “Ao ämopa. Awënë Wængongui bitö adobique Tömää Cægaïmi inte, ïmaï pancæboimpa, ante bitö apænte angainö bai cædinque tömënanî inänite päninque bitö cöwë nö cæte waa pämpa.”

⁸ Wængongui anquedo ayæ në gocä tömengä owætadë ëñë incæ nænque mæ owoyömö mäniñömö gao cæcantapa. Ayæ waodäni æmontaiya montæ gongate wæcædänimpa, ante cædinque në godö angä beyænque nænque nangui ti näwä batimpa.

⁹ Mänü nangui ti näwante beyæ waodäni montæ gongate badäni incæte tömënanî nani wënæ wënæ cædinö ante, Ancaa

wæwente awædö, ante ayæ pönênämaï inäni inte ñimpo cædämaï inte Wængongui ingante waa adämaï inänitapa. Tömênäni, Wængongui cæcä beyænque mönö wæwëmämocoo pönimpa, ante wædinque Wængongui ingante piïninque tömengä ëmowo ante wënæ wënæ babæ ante tedewênänitapa.

¹⁰ Wængongui anquedo ayæ në gocä tömengä owætadë ënë incæ mönö guiñhëngä tänocä pöningä nänö aacæ tæ contaimpaa gao cæcä ate tömengä awënë odeye inongä inte nänö aayömö mä mämonte bai batimpa. Waodäni nantate wædinque öngüenëwa æo pocænguënëwate wædänitapa. ¹¹ Mänömaï wædäni incæte tömênäni nani wënæ wënæ cædinö ante, Ancaæ wæwente awædö, ante godömenque pönênämaï inäni inte ñimpo cædämaï inänitapa. Wæætë nantai baate nantate wædinque Wængongui öönædë quëwëhongä ingante piïnte badinque wënæ wënæ babæ ante tedewênänitapa.

¹² Wængongui anquedo ayæ në gocä tömengä owætadë ënë incæ ñænæ önonga Eopadatedö nani änonga mäninonga gao cæcä ate awënë odeyeidi nænque tamönö quëwente nani ponguüno taadö ante önö tömäo amimö batimpa.

¹³ Ayæ wënæidi wentamö nani ëwocacabo mënaa go adocanque inäni iñömö weque bai inäni ta pönäni atabopa. Dadagöö öönë inö adocanque wënæ ta pongantapa. Mönö guiñhëngä tänocä pöningä öönë inö wacä wënæ ta pongantapa. Ayæ Wængongui beyæ në apænëdömo imopa, ante në babæ apænëdongä öönë inö wacä wënæ pongantapa. ¹⁴ Mäninäni wënæidi öñowocaidi inäni inte mä cædäni inänipa. Iñäni iñömö tömämaæ awënë odeyeidi weca äñecæ godinque tömênäni inänite apænëdinque, Awënë Wængongui adocanque Tömää në Cægaingä inte nänö apænte angüönæ iñonte nunitö godongämæ ponte guëadö guëa cæcæminimpa, ante cædänipa.

¹⁵ “Mönö Awënë nämä incæ iïmaï angantapa. Aedäni. Në awëmö ængä iñontobæ pongä bai botö adobai änämaï inte poncæboimpa. Æyedëno ponguingä, ante në mönämaï ongongä iñömö tömengä wänö cönongä bai inongä inte nänö toçuinque. Edæ tömengä, Ömaabo inämaï incæboimpa, ante ayæ, Guiñhëñate wædämaï incæboimpa, ante tömengä weocoo tömë weca ee mangä inongä ingampa,” angantapa.

¹⁶ Mänii wënæidi öñowocaidi tömämaæ awënë odeyeidi inänite äñecæ gote änäni ëñëninque awënë odeyeidi iñömö tömênäni tontadoidi tönö Adämaügedö ebedeo tededö nani äñömö adoyömö godongämæ pönänitapa.

¹⁷ Ayæ Wængongui anquedo tömengä në gocä tömengä owætadë ënë incæ woboyæ owoyömö mäniiñömö gao cæcä ate öönædë inö Wængongui tæiyæ wæmö oncönë tömengä nänö aacæ tæ contayömö mäniiñömö tedepämo yedæ tededinque, “Ñöwo iinque batimpa,” angantapa.

¹⁸ Ayæ ate yædæ yædæ näninimpa. Detæbo tæi tæi tæ goyö yedæ pönii äninpa. Ayæ goinque nangui pönii ocæ ocæ gotimpa. Waodäni inguiopga nani quëwenganca tömanganca mänii goinque bai wa goinque cöwë godämaï inimpa. ¹⁹ Goinque ocæ ocæ goyonte tömênäni nani ñænæ quëwëñömö incæ tænguimæ tænguimæ godinque mëñömonga go adoyömonque batimpa. Ayæ wabæca nani quëwencabo wabæca nani quëwencabo incæ tömäo nani quëwëñömö onconcoo acapowate bogocæ tæ gowæænimpa. Wængongui adobai, Babidönia nani wæmö quëwëñömö quëwëñäni wënæ wënæ cædänipa, ante pönente wædinque ængui badinque, Mini wæwenguinque impa, ante owæta biinömæ nänö piimæ eyede ënë godonte bai cædinque tömênäni inänite nangui piïninque pangantapa. ²⁰ Tömää wää tæiwænë iñömö yogæ guitimpaa. Ayæ onquiyabocoo adobai dæ bibitapæ batimpa. ²¹ Ayæ öönædë inö yoguica cöönæ bai waodäniya tæi tæi wæænimpa. Mäninca tæi tæi wææninca adocaque incæ wodo tiëë diboda tee mä ganca enca impa. Yoguica wënæ wënæ incapa, ante adinque waodäni, Mäninca mönö wënæ wënæ wæwëmämö impa, äninque Wængongui ingante piïnte badinque wënæ wënæ babæ ante tedewênänitapa.

17

Onquiyængä mänincoo beyæ në towente quëwëhongä

¹ Wængongui anquedoidi öñompo æmämpoque go mä ganca inäni öñompo æmämpoque go mä ganca owætacoo në næænäni iñönänite adocanque botö weca ponte, “Pöe, angantapa. Onquiyængä mänincoo beyæ në towente quëwëhongä iñömö æpäncoo yædöpäa në tæ contacä apænte nänö panguinö ante botö ödömö acæbiimpa. ² Inguipoga awënë odeyeidi incæ tömengä tönö towengadänimpa. Waodäni inguiopga quëwëñäni incæ adobai tömengä towëinënö beyæ tömengä biinömæ bete bai quidi quidi dowænë bai pönênämaï cægadänimpa,” ante apænëcæ ëñentabopa.

³ Wængongui Öñowocæ incæ botonga pö guiyongä botö wiimonte bai iïmaï atabopa. Wængongui anquedo adocä iñömö botö imote ö ænte mäo öñömæca iñömö cönongä ongontabopa. Mäniiñömö ongöininque botö

onquiyængä babæcä bai në guiñëngongäa mongænte a ongongå atabopa.

Mäningä mönö guiñëngongä opatawæ ãnadongä inte emöwocoo tömengä baonga godämæ tömengä yewæmõi ãnacä ingantapa. Mäniwocoo Wængongui ingantedö ante wënæ wënæ babæ wapiticæ äniwocoo inönimpa. Mäningä mönö guiñëngongä nänö ocabocoo önompö æmæmpoque go mäa encacä inte tömengä nänö önömoncawæncoo önompö tipæmpoga emoncacä ingantapa. ⁴ Onquiyængä iñömö tömengä weocoo awënëidi waemoncöo nani mongæncöo tönö opatawæ emoncöo mongængantapa. Tömengä, Botö waemö incæboimpa, ante oodo badöincoo tönö dicamö nani nangui godonte ænincoo tönö pededamö nani ämö mänimoncöo mongænte ingantapa. Tömengä önönempö owætadë oodo inte badöintadë quimæmë baapæ bai i eyede engapæ næængantapa. Mäningä onquiyængä quiëmë nänö wënæ wënæ cæpämö nänö towente quëwënö bai mänintadë næængantapa. ⁵ Adocä onquiyængä tömengä önönemö inö emöwo yewæmõi emongä ingantapa. Mäniwo wë wodonte bai i incæte iimäi ante impa.

“Babidönia nani waemö quëwëñömö i incæte onquiyængä në towengä bai impa.

Waodäni në godö towëñäni wäänä bai mäningä onquiyængä ingampa.

Ayæ adobai inguipoga quëwëñäni wiwa nani cæinënö ante në cædäni wäänä bai adocä onquiyængä ingampa.”

Mänömai tömengä önönemö inö yewæmonte emongantapa. ⁶ Wængongui quinäni ingainäni tönö Itota ingante ante apænëdäni beyæ në wængainäni tömëñäni wepæ bete bai mäningä onquiyængä quidi quidi dowænte bai ingä botö atabopa. Tömengä ingante adinque botö ancai guiñente wætabopa.

⁷ Ancai guiñente wæyöмотe Wængongui anquedo botö imote iimäi angantapa. “Quinante ancai guiñente wæbii. Mönö guiñëñongä iñömö tömengä ocabocoo önompö æmæmpoque go mencaa encacä inte tömengä önömoncawæncöo önompö tipæmpoga emoncacä inongä inte onquiyængä ingante në mongængä ingampa. Onquiyængä ingante në mongængä mönö guiñëngongä tönö onquiyængä tömëna nana wë wodonte ini æbänö i, ante apænëbo ëñëe.

⁸ Adocä mönö guiñëngongä bitö adingä iñömö wëñëñedë quëwëngaingä inte ñöwo dæ angä incæte ayæ ate tadömengadænguipodë inö ææ ta poncæcäimpa. Ta pöniñque tömengä nänö æmæwo ömäe ewënguinque ingæimpa. Wængongui, Quëwënguinta, ante inguipoga badönämai iñedë nänö yewæmongaintaa inguipoga quëwëñäni tömëñäni emöwo në yewæmönämai inäni iñömö tömëñäni iñömö mönö guiñëngongä do quëwëngaingä ñöwo dæ

angä incæte ayæ ate pongä adinque ancai guiñente wæcædänimpa,” ante Wængongui anquedo apænecantapa.

⁹ Ayæ tömengä wæætë apænecantapa. “Mäninö inte ëñencæte ante ocäi ëñëñö në encacä inte ëñencæcäimpa. Mönö guiñëngongä tömengä önompö æmæmpoque go mäa ocabocoo iñömö önompö æmæmpoque go mäa änanquidi bai inänipa. Mänii änanquidiboga onquiyængä tæ contacä ingampa. Mänii ocabocoo adobai önompö æmæmpoque go mäa awënë odeyeidi bai inänipa. ¹⁰ Mänimpodäni iñönänite önompö æmæmpoque awënë odeyeidi inänite wido cædänitapa. Adocanque awënë odeye iñömö ñöwo aacä ingampa. Wacä awënë odeye ayæ pönämai ingä incæte tömengä pöniñque wantæ iñö ongonte aacæcäimpa.

¹¹ Önompö æmæmpoque go mäa ganca awënë odeyeidi nani cabo iñönänite mönö guiñëngongä adocä inongä incæte tömëñäni beyæ ponguingä ingampa. Tömengä iñömö wëñëñedë në quëwëngaingä incæ ñöwo dæ angä inongä inte tömengä nänö æmæwo ömäe ewënguinque poncæcäimpa,” ante Wængongui anquedo apænecantapa.

¹² Ayæ tömengä wæætë apænecantapa. “Ayæ önompö tipæmpoga önömoncawæncöo bitö adimoncawæncöo iñömö önompö tipæmpoga awënë odeyeidi bai inäni incæte ayæ aadämai inänipa. Incæte ayæ ate tömëñäni inänite äñäni ate awënë odeyeidi badinque tömëñäni, iimäi cæedäni, ante äñäni bacædänimpa. Ayæ mönö guiñëngongä tönö tömëñäni adoque ooda ganca godongämæ aacædänimpa. ¹³ Tömëñäni adodö ante pönëñäni inte, Mönö tæi piñænö ante guiñëngongä ingante godömö æncæcäimpa. Ayæ awënë odeyeidi inömö inte mönö, iimäi cæedäni, ante në ämö imö bai mönö tömengä ingante ämö në angä bacæcäimpa.

¹⁴ “Mäninäni Wængongui Codotedo ingante guëadö guëa cæcædänimpa. Incæte tömengä iñömö awënëidi tömëñäni Awënë inongä ingampa. Ayæ waodäni awënë odeyeidi iñönänite tömengä Tæiyæ Awënë Odeye inongä ingampa. Iñinque tömengä tæi emönongä inte tömëñäni inänite gänä cæcæcäimpa. Tömengä, Botö miñæ tee empo goquimini, ante waodäni inänite aa pedinque apænte nänö në ængainäni inte tömengä miñæ cöwë ædæmö cæte tee empo godäni inänipa. Mäninäni adobai tömengä tönö godongämæ guëadö guëa cæte wænonguinäni inte tæi emonte gänä cæcædänimpa,” ante Wængongui anquedo apænecantapa.

¹⁵ Ayæ tömengä wæætë botö imote iimäi apænecantapa. “Onquiyængä mäincoo beyæ towente quëwëngongä inte æpæncöo

yædopäa tæš contacä abitapa. Mänü æpæncoo iñömö tæiyænäni waodäni bai inänipa. Wabæca näni quëwencabo wabæca näni quëwencabo incæ wadö näni tedecabo wadö näni tedecabo incæ waodäni tæiyænäni inänipa. Mäninäni tömänäni mänü æpæncoo bai inänipa. ¹⁶ Ayæ önonpo tipæmpoga önoncawæncoo bai awënë odeyeidi tönö mönö guññenongä iñömö tömänäni bitö nē adinäni inönäni inte onquiyængä mäincoo beyæ nē towente quëwëningä ingante plincädänimpa. Piinique, Tömengä ingante æmæwo ömæ ewengæimpa, ante cæcädänimpa. Tömengä mäincoo tōmancoo ö ænāni ate ömaacä inte wæyongante tōmengä baö cæninque tōmengä ingante æmæwo iya tancädänimpa. ¹⁷ Wængongü, Botö angai bai lingue baganca tōmēnāni botö pōnēnō ante cæcädänimpa, ante godö cæcä beyænque mäninäni awënë odeyeidi näni mimönē adodö ante pōnēnānipa. Pōnēnque tōmēnāni godongämæ Ao äninque, Mönö guññenongä aacæcäimpa, ante tōmengä ingante, Mönö tæi piñænö ante godömö ængungä, ante godönäni ængantapa.

¹⁸ “Mäningä onquiyængä bitö adingä bai Babidönia näni waemö quëwëñömö adobai impa. Mäniñömö awënëidi iñömö tōmämæ awënë odeyeidi inänite nē aadäni inänipa,” ante Wængongü anquedo apænecantapa.

18

Babidönia näni quëwëñömö do wo ewente batimpa

¹ Ayæ ate Wængongü anquedo wacä inte öönædē inö wææ pongä atabopa. Tömengä tæi piñængä inte nangui angä ingä inte nämä nänö ñäö apäite emönö inte inguipoga iñömö ñäö apäicä atabopa. ² Tömengä nänö tedepämo inte iimaï yedæ aa pedinque, “Babidönia näni äñömö do wo ewente batimpa. Babidönia näni waemö quëwëñömö i incæte do wo ewente ba aedäni.

Badinque wënæidi näni owoyömö batimpa. Wënæidi wentamö ewocädäni tōmānāni mänñömö tee mönincönē bai quëwëñänipa.

Ayamöidi baacäidi tōmānāni adobai mänñömö wææ cæte bai owodänipa.

³ Wabæca näni quëwencabo wabæca näni quëwencabo incæ tōmānāni

babidöniaidi wīwa näni towëinēnō beyæ tōmēnāni biñömæ bete quidi quidi dowænte bai wädänipa.

Inguipoga awënë odeyeidi incæ babidöniaidi tönö towëñänipa.

Babidönia iñömö quëwëñäni nämanque ante pōnente tocæte ante mäincoo nangui pōni ænte eädäni beyænque

inguipoga nē godonte ænāni iñömö mäincoo nangui pōni eädäni badänipa,” ante Wængongü anquedo aa pecantapa.

⁴ Ayæ öönædē inö wacä tedepämo tedecä eñentabopa.

“Botö guiddēmini eñeedäni. Minitö tōmēnāni weca quëwëmini incæte,

Tömēnāni tönö godongämæ wënæ wënæ cædämaï incæmönimpa, ante cædinque wadæ tao pōedäni.

Ayæ, Wængongü tōmēnāni inänite päninque mönitö imönite pänämaï incæcäimpa, ante pōnente wædinque wodii winonte pōedäni.

⁵ Tömēnāni wënæ wënæ cædimämo iñömö cabo ti gæte cōnōninque bacoo pōni ongompa.

Incæte Wængongü mäninäni näni wīwa cædimämo cōwē pōnente wæcampa.

⁶ Tömēnāni näni pōnōni bai mīnitö tōmēnāni inänite adobai godoncæminimpa.

Tömēnāni näni pōnōni cædinö beyæ mīnitö wæætē adopo godö cædinque mem-poga ganca godōmenque godö cæmini wæcädänimpa.

Ti nämæ godönäni bete bai wädänitawo. Minitö wæætē tōmēnāni owætadē ti nämæ adopopæ pe fiñænte wempe cædinque,

mempoga pe fiñænte wempe cædente bai cædinque godōmenque ti nämæ godömini bete wæcädänimpa, angantapa.

⁷ Edæ tōmēnāni nämä incæ, Mönö ñænæmō imompa, ante pōnente nangui waemö mäincoo eate quëwëñäni iñönänite mīnitö wæætē, Tömēnāni ægancadö waemö quëwëñänii, ante adinque

tōmēnāni inänite adoganca piinte cæmini nantate wædinque tōmēnāni wæwente quëwëncädänimpa.

Mäninäni iñömö, ‘Awënë odeye nänöogængä bai contate ongōmompä. Edæ watapæ quëwëmö imompa.

Wii owæmpoingä bai inömö inte wæwëñämaï cōwē incæmönimpa,’ ante öñöwënenque pōnente änewëñänipa.

⁸ Mänömañö ante nē äñäni inte adoque itädē iñonte tōmēnāni näni wæwëmämo iñontobæ pö ate nangui wæcädänimpa.

Mänionæ tōmēnāni näni wænguimämo näni wæwënguimämo näni gue ængënguimämo pö wæcädänimpa töö.

Tömēnāni onconcoo gonga bæcodocæimpa.

Edæ Wængongü Awënë iñömö Babidönia iñömö quëwëñäni inänite nē apænte ante pangä iñömö edæ tōmengä tōmäa cægaingä ingampa,” ante apænecantapa.

⁹ Inguipoga awënë odeyeidi incæ Babidönia quëwëñäni tönö towëñäni inte

tōmēnāni adobai Babidōnia quēwēnāni tōnō nanguī waēmō māincoo godongāmæ ænte ēate quēwēnānīpa. Ininque Babidōnia nāni quēwēñōmō gonga bæcododīnque tēēmancoo baca baca æi adinque tōmēnāni wæwente Ca ca wæcædānīpa. ¹⁰ Babidōnia iñōmō quēwēnāni nanguī pōni nāni wæwēnō adinque awēnē odeyēidi ancai guiñēninque, Mānināni tōnō godongāmæ wæwēnāmai incæmōnīpa, ante gomonga a ongōninque wæcædānīpa.

“Babidōnia mīni waēmō quēwēñōmō nē quēwēmīni mīni wæquinque ingæīpa.

Māniñōmō quēwēmīni māincoo nanguī ēate iñimīni inte mīni wæquinque.

Wēnæ wēnæ cæmīni iñōmīnīte adoque ooda iñonte Babidōnia mīni quēwēñōmō do apænte pante wo ēwente batīpa.” ante wæcædānīpa.

¹¹ Inguipoga māincoo ænte mante nē godonte ænāni iñōmō, Edæ æcānō mōnō godonguēncoo godonte ænguīnaa. Nōwo dæ ā, ante wæwente Ca ca wæcædānīpa.

¹² Iincoo iñōmō nāni godonguēncoo impa. Oodo tōnō padata, dica nāni nanguī godonte ænincacoo tōnō pededamō nāni āmoncoo mæ ongoncoopa. Adobai wæmoncoo nīno nāni ancoo tōnō awēnēidi wæmoncoo nāni mongæncoo ayæ teda nāni ancoo tōnō opatawæincoo mæ ongoncoopa. Quiwæmē oguī wawæque i māniwæ mæ ongoncoopa. Edepante бага inte nāni badōnincoo tōnō awænque nāni nanguī godonte æniwæ inte nāni badōnincoo mæ ongoncoopa. Yaēmenta bodonte nāni āni inte nāni badōnincoo tōnō iædo nāni āni inte nāni badōnincoo tōnō mānōmodo nāni anca inte nāni badōnincoo iñōmō mānincoo tōmancoo mæ ongoncoopa, ante wæcædānīpa. ¹³ Cāneda nāni antapo tōnō oguī waa ōni pæcaqui, oguī waqui nāni iya tāimō tōnō tī nā ōni pæqui ayæ oguī wapæ ōni pæquimæ, biñōmæ tōnō oguinguipæ, waēmō ædīna tōnō todigomō mānincoo mæ ongoncoopa. Cæningāidi tōnō obegaidi cabayoidi tōnō cabayo inte ñā cæte nāni wēa godō awotocoo mæ ongoncoopa. Mānincoo tōmancoo mæ ongoncoopa, ante wæcædānīpa. Ayæ adobai, Waodāni incæ nē cæte quēwēcædānīpa, ante cæningāidi bai godonguēnēmō intamōmpa, ante wæcædānīpa. ¹⁴ Mānināni Babidōnia quēwēnāni inānite iīmai ancædānīpa.

“Quincamē ante beīnente wæmīni incæ mānīna tōmanca mīnitō weca ñōwo dæ ancapa.

Mīni ēadincoo tōnō quīnō waēmō mīni māincoo iñōmō mānincoo tōmancoo ñōwo dæ ā līnque mīnitō

ōmæpomīni inte cōwē wæætē ænāmai incæmīnīpa,” ante ancædānīpa.

¹⁵ Tōmēnāni māniñōmō quēwēnāni inānite mānincoo nāni godōnincoo beyæ nē ænināni inte nē nanguī ēadināni incæ Babidōnia iñōmō quēwēnāni nāni wæwēnō adinque, Mānināni tōnō godongāmæ wæwēnāmai incæmōnīpa, ante gomonga a ongōninque ancai guiñencædānīpa. Ayæ wæwente Ca ca wæcædānīpa. ¹⁶ Ayæ iīmai yedæ ancædānīpa.

“Babidōnia mīni waēmō quēwēñōmō nē quēwēmīni incæ mīni wæquinque ingæīpa.

Edæ māniñōmō quēwēmīni tōmēmīni weocoo wæmoncoo nīno nāni ancoo tōnō awēnēidi wæmoncoo nāni mongæncoo tōnō opatawæncoo mānincooque mongæmīni imīnitapa.

Mīnitō, Mōnō waēmō incæmōmpa, ante oodo inte badōincoo tōnō dicamō nāni nanguī godonte ænincoo tōnō pededamō nāni āmō māniñoncoo mongæmīni imīnitapa.

¹⁷ Incæte adoque ooda iñonte mānincoo mīni ēadincoo incæ edæ æmæwo ōmæ ēwente batīpa, ante nē ænte godōnāni edæ wæcædānīpa,” ante angantapa.

Æpæntibædo wipocoo nē tōō tōō cædōnāni tōnō, Wipodē nē godāni, wipodē nē cædōnāni tōnō, Wipo inte māincoo godonte ængæīpa, ante nē mào godāni tōmānāni mānināni gomonga a ongoncædānīpa.

¹⁸ Babidōnia nāni quēwēñōmō gonga bæcododīnque tēēmancoo baca baca æi adinque iīmai yedæ ancædānīpa, “Ii Babidōnia nāni waēmō quēwēñōmō bai wayōmō nāni waēmō quēwēñōmō edæ dæ ampa, ante wæcædānīpa,” ante angantapa. ¹⁹ Nē wæwēnāni inte nāni cæi bai onguipo guidimō ænte ocaboga wo ææntodontē wææ guicadinque Ca ca wædinque iīmai yedæ ancædānīpa,

“Babidōnia nāni waēmō quēwēñōmō nē quēwēnāni nāni wæquinque ingæīpa.

Māniñōmō æpæntibædo wipocoo nē ēadāni inte

tōmēnāni nāni godōnincoo māniñōmō quēwēnāni inānite godonte æninque tōmānāni nanguī ēadāni badānitapa.

Ayæ adoque ooda iñonte Babidōnia nāni quēwēñōmō tōmāo æmæwo ōmæ ēwente batīpa, ante ancædānīpa,” angantapa.

²⁰ Māniñō ante ānāni ate, Tōmāmīni ōōnædē iñōmō quēwēmīni māniñōmō wo ēwente i adinque watapæ tocæmīnīpa.

Wængonguī quimīni adobai

Itota nānō nē da godongāmīni tōnō

Wængonguī beyæ nē apænēmīni tōnō

münitö tömäini mäniñömö wo ewente i ad-
inque watapæ tocæminimpa.

Edæ, Münitö iminite æbänö wænæ wænæ
cædäni, ante adinque

Wængongui tömënäni nani quëwëñömö
quëwëñäni inänite apænte äninque
pangä ate tocæminimpa, ante angan-
tapa.

²¹Ayæ Wængongui anquedo në tæi emongä
iñömö dicabo nani mö mö equinca bai
ñænængade dicabo æninque æpæntibæ
cæncadëmæ wo guütodöninque iimaï angan-
tapa.

“Mäninca æpæntibæ cæncadëmæ tæi wo gui-
itodömo guï bai

Babidönia nani waëmö quëwëñömö
wo ewente dæ ba ate cöwë adämaï
incædänimpa.

²² Ìninque, Adapate nani ampogainö incæ
ämotamli nani angainö incæ

ööña bai nani we we öongainö incæ
todompeta nani ancadeca nani we
we öongainö incæ mäniñömö cöwë
ëñëñämaï ingæimpa.

Quiëmë badönäni incæ në badongainäni
mäniñömö cöwë dæ ancædänimpa.

Tömënäni nani dicabo mö mö equinca
inte cæyönäni dicabo dadi dadi
cæyedë ä bai mäniñömö cöwë wii
ëñenguinänidö anguënë.

²³ Do nani ti wodönoincade mäniñömö cöwë
tica ëñëñämaï ingæimpa.

Onquiyængä ingante në monguingä
mäniñömö cöwë dæ ä mönämaï
inguinänidö anguënë.

Mäniñömö mäincoo ænte mante në godonte
æñäni iñömö inguipoga ñænænäni
inte ongongadänimpa.

Ayæ idödi yewænte bai cædinque mäniñömö
quëwëñäni, Waëmö mäincoo, ante
wapiticæ anewëñäni beyænque
wabæca nani quëwencabo wabæca
nani quëwencabo incæ tömänäni nani
quëwencabo oda cæte gogadänimpa,”
angantapa.

²⁴ Wængongui beyæ në apænegañäni
inänite wænöninque mäniñömö quëwëñäni
incæ Wængongui quinäni inänite
godömenque wænönäni wængadänimpa.
Edæ inguipoga wænönäni në wængainäni
tömänäni mäniñömö wænönäni wænte bai
ingadänimpa.

19

¹ Babidönia wo ewente ba ate öönädë
iñömö waodäni tæiyëñäni adotedæ ogæ
tededäni bai ëñentabopa.

“Mönö Awënë ingante watapæ apænecæimpa, Onquiyængä tömengä ingante monguingä
ante, Adedoya, äninque,

Mönö Wængongui mönö imonte, Quëwencæminimpa,
ante në Ængä inongä ingampa.

Tömengä ñäö emongä inongä ingampa.
Ayæ tömengä tæi piñængä inongä
ingampa.

² Edæ, Wængongui, iimaï pancæboimpa,
ante nänö apænte angainö bai
cædinque tömengä cöwë nö cæte waa
pangampa.

Babidönia iñömö onquiyængä mäincoo beyæ
në towente quëwëñongä bai impa.
Mäniñömö quëwëñäni në wüwa cædäni
beyænque

inguipoga quëwëñäni wæætë në wüwa
cædäni badäni adinque

Wængongui mäniñömö quëwëñäni inänite
apænte ante pangantapa.

Wængongui ingante në cædinäni inänite
adodäni wænönäni adinque tömengä
wæætë tömënäni inänite wæñongä
wænänitapa,” ante äñänitapa.

³ Ayæ wæætë ogæ tededinque,
“Adedoya,” äñänipa.

“Mäniñömö tæemancoo cöwë baca baca
æicöömpa,” ante äñänitapa.

⁴ Mäniñedë Wængongui nänö tæ con-
taimpaa tæ contayongante në aadäni në
Picænäni bænticoatodo ganca inäni tönö
müñäni quëwëñäni mënaa go mënaa inäni
iñömö ædæ wææñinque, Bitö Wængongui
Awënë imidö anguënë, äninque “Amëe,
Adedoya,” ante aa pedänitapa. ⁵ Wængongui
nänö tæ contaimpa inö tedepämo iimaï
tededinque,

“Wængongui ingante në cæmäni inte
tömengä ingante në guifente ëñente cæmäni
iñömö

në awënëidi imüni incæ öñöminique incæ
münitö tömäini,

Mönö Wængongui ingante watapæ
apænecæimpa, ante apænecædäni,”
angantapa.

Wængongui Codotedo monguingä æcëmæ

⁶ Ayæ adobai waodäni tæiyëñäni
adotedæ ogæ tededäni bai ëñentabopa.
Ñænæ tēñabo ä bai detæbo eyequei tē bai
ëñentabopa.

“Adedoya,

Mönö Wængongui Awënë Tömää në Cægäimi
inte

bitö në Awënë badinque aabipa.

⁷ Mönö watapæ pöni entawëninque waa
tocæimpa.

Edæ tömengä ingante apænedinque
mönö, Bitö ñäö emömi imüni, ante
angæimpa.

Edæ Wængongui Codotedo nänö monguino
oo bacæ cæpa cæminii.

Edæ Wængongui Codotedo nänö monguino
oo poncæcäimpa, ante nämä incæ eyepæ
cæte a ongongampa.

⁸ Tömengä ingante weocoo nino nani ancoo waemö näämæntacoo nänö wēñaquincoo, ante pönönäni ængä ingampa.

Wængongui quinäni nani nō cægaincoo incæ nino nani ancoo waemö näämæntacoo bai impa.”

⁹ Ayæ Wængongui anquedo botö imote angantapa. “Iimaï ante yewæmōe. ‘Wængongui Codotedo monguingä ææmæ pō becädänimpa, ante wente ængä nē ponguinäni nani toquinque.’ ” Tömengä ayæ godömenque äninque, “Mäninö Wængongui nänö nō angainö impa,” ante angantapa.

¹⁰ Ante äñongä botö tömengä önöwa inö ædæ wææninque tömengä ingante watapæ apæneæte ante cæyömote tömengä wæætē, “Mänömaï cædämaï imæwe, angantapa. Botö önonque bitö bai Wængongui ingante nē cæbo imopa. Edæ bitö töninädäni Itota nänö apænegainö nē ëñente cædäni bai botö adobai Wængongui ingante nē cæbo imopa cæbii. Edæ Wængonguinque ingante ædæ wææninque, Bitö Wængongui Awënë imidö anguënë, ante apænee,” ante angantapa.

Itota godö odömongä beyænque Wængongui beyæ nē apænedäni iñömö tömengä nänö apænegainö ante ëwocadinque apænedänipa.

Näämænta cabayoga nē tæ contacä mongænte pongampa

¹¹ Botö ayæ ayömote öönædē wi ænete bai bayö cabayo näämænta ëñacä a ongongå atabopa. Cabayo nē tæ contacä mongænte pongä iñongante, Tömengä cöwē pönëninque nē Ædæmō Cædongä inte, Näwangä impa, ante nē Apænegaingå ingampa, ante pemonte ingampa. Wænæ wænæ cædäni inänite tömengä nō apænte ante pänongä ingampa. Ayæ guëadö guëa cædinque tömengä nē nō cædongä ingampa. ¹² Tömengä awinca gonga bæcodote bai ëmongä inte tömengä ocaboga pogantacoo encacä ingampa. Tömengäa ëmōwo yewæmōnte iï incæte mäniwo tömenganque nänö ëñëwo impa. Wadäni ædö cæte ëñenguinänii. ¹³ Tömengä weocoo yacoo wepænē guipænente mongængampa. Tömengä ëmōwo iñömö, Wængongui nänö Angainö, ante pemonte ingampa.

¹⁴ Öönædē iñömö tontadoidi tömengä miñæ tee empote godänipa. Tömënäni nino nani ancoo waemö näämæntacoo mongæninque cabayoidi näämænta ëñadäni yabæ tæ contate mongænte godänipa. ¹⁵ Cabayoga nē tæ contacä iñömö wabæca nani quëwencabo wabæca nani quëwencabo incæ waodäni inänite yaëmenca pancæte ante äninque tömengä öñönē inö yaëmē tipængaa waingamē engamē ënedinque yædæ tadete ongongantapa. Tömengä

iñömö nē tæiyæ awënë tömengä nempo quëwënanäni inänite aacä bai adobai tömämæ quëwënanäni inänite, Iimaï cæedäni, ante aacæcäimpa. Yowepæ ante yowecoo nani pinä pinä gäwate cæincadedē pinä pinä gäwate bai cædinque cabayoga nē tæ contacä Wængongui ængui nänö angainö beyænque iñömö tömënanäni inänite pñinte pancæcäimpa. Wængongui adocanque Tömää nē Cægaingä ingampa. ¹⁶ Cabayoga nē tæ contacä iñömö weocoo yacooa adobai tömengä önoniya iï ëmōwo yewæmōnte ëñacampa. “Ayæ waodäni awënë odeyeidi iñönänite tömengä Tæiyæ Awënë Odeye inongä ingampa. Tömengä iñömö awënëidi tömënanäni Awënë inongä ingampa,” ante pemonte ingampa.

¹⁷ Ayæ wacä Wængongui anquedo nænque cæncædëmö inö a ongongå atabopa. Tömengä öönædē gämænö nē cæwodäni tömënanäni inänite yedæ ante aa pedinque, “Adayömö godongämæ pödäni. Edæ Wængongui tæiyæ ææmæ ante pō cæedäni. ¹⁸ Awënë odeyeidi incæ tontado capitäoidi incæ onguinænäni tæi piñænäni incæ cabayoidi incæ cabayocooga inte nē tæ contate godäni incæ iinäni tömënanäni wænäni ate tömënanäni baö cæncæte ante pödäni. Waodäni awënë beyænque nē cæte quëwënanäni incæ nē nämä cæte quëwënanäni incæ awënëidi incæ öñönäninque incæ tömënanäni baö pō cæedäni,” ante aa pecantapa.

¹⁹ Ayæ botö ayömö mönö guinënogä tönö inguipoga awënë odeyeidi tönö tömënanäni tontadoidi tönö adayömö godongämæ pöninque, Cabayoga nē tæ contacä ingante ayæ tömengä tontadoidi inänite mönö guëadö guëa cæcæimpa, ante cædäni atabopa. ²⁰ Incæte guëadö guëa cæyönänite tömënanäni næmæ mönö guinënogä ingante bæi ongöninque, Wængongui beyæ nē apænebo, ante nē babæ äningä ingante adobai bæi ongönänitapa. Nē babæ änogä iñömö mönö guinënogä beyænque mä pönii cæcä inongäimpa. Iinque mönö guinënogä tömengä nänö yewæmōi nē yewæmōinäni iñömö tömengä nänö ëmönö bai nani badöninca gäänē ædæ wææninque nē apænedäni inte tömënanäni nē babæ änogä nänö mä cædö adinque guinente wædinque oda cædönänipa. Iinque mönö guinënogä tönö nē babæ änogä ayæ müna quëwëñönate atopode nani änonitabæ gonga bai nani bæcodotibæ cæncædëmæ wido cædänitapa. ²¹ Tömëna miñæ pönäni inänite guiquënë cabayoga nē tæ contacä tömengä öñönē inö yaëmenca yædæ tadete ongöninque do wænongä wænänitapa. Iinque nē cæwodäni baö ade cænäninque tömënanäni nē wænünäni baö tömo pönii cæwëñönäni inänitapa.

20

Miido wadepo ifionte æbänö baquii

¹ Wængongui anquedo wacä ifiömo tadömengadænguipo ontatodemö wi ænequi tönö nänömencaimë nænæmë önönempe næængä inte öönæde inö ta wæængä atabopa. ² Ta wææninqe tömengä dadagöö ingante bæi ongönniqe tömengä nänö miido wadepo ganca nã cæyænte ongonguinque ante nã cæyængantapa. Mäningä dadagöö wëenëhedë tæntæ në ingaingä inte wënæ awënë Tatäna ingacäimpa. ³ Mäningä ingante nã cæyæninqe tadömengadænguipodë wido cædinque ontatodemö wi ænequi inte tee mönedinqe tömengä dæca ontatodemö ædæmö tee moncäntapa. Woadäni wabæca nãni quëwencabo ayæ wabæca nãni quëwencabo ifionänite tömengä, Oda cæte gocædänimpa, ante miido wadepo ganca cædämaï incæcäimpa, ante Wængongui anquedo dadagöö ingante wido cæcäntapa. Mänimpodepo iinque ba ate tömengä ingante, Wantæ ifiö nimpö cæte goquingä, ante nimpö cæcä gocæcäimpa.

⁴ Ayæ awënëidi tæ containpacoö botö atabopa. Wængongui Awënë godö angä beyænque awënëidi badinque apænte ante në änäni badinäni inte mänimpaa tæ contadäni inänitapa. Ayæ Itota ingante ante apænedinqe Wængongui nänö angainö ante apænedäni beyænque tömënanäni inänite wangö tamencadäni wængadänimpa. Wangö tamencadäni wængainäni nãni önöwocaidi botö nöwo atabopa. Mäninäni ifiömo mönö guifnongä ayæ pöningä ingante adinque, Bitö Wængongui Awënë bai imidö angüenë, ante apænedämaï inte ayæ tömengä nänö emöno bai nãni badöninca gäänë ædæ wæænte apænedämaï ingadänimpa. Ayæ tömënanäni nãni önönemö inö nãni önompo inö mönö guifnongä ayæ pöningä nänö yewæmöi yewæmönämaï ingadänimpa. Adodäni nãni ömæmöninqe adoqne miido wadepo ganca Itota Codito tönö godongämæ aadänitapa.

⁵ Mäninäni täno nãni ömæmönäni incæte wadäni guiquenë në wængainäni incæ miido wadepo iinque go ate nãni ömæmoncædänimpa. ⁶ Täno nãni ömæmönäni ifiömo në tæiyæ waëmö inäni inte nãni toquinque. Edæ wadäni në wængainäni mempoga ganca nãni wænguimämo ifionte mäninäni ifiömo wænämäi incædänimpa. Wæætë, Wængongui qui, ante në godönäni bai tömënanäni adobai, Wængongui beyæ, ante ayæ, Itota Codito beyæ, ante cæcædänimpa. Ayæ miido wadepo ifionte Itota Codito tönö godongämæ aacædänimpa.

Tatäna nänö æmæwo ömæ ewengüinö ante

⁷ Tadömengadænguipodë tömengä nänö tee möneconë nã cæyænte quëwënongä ifiongante Tatäna ingante miido wadepo iinque go ate ifi cæyænäni ta gocæcäimpa. ⁸ Ta godinque tömengä inguipoga æmatæ go æmatæ go godinque Gogobæ nãni ämæ ganca go Mäogobæ nãni ämæ ganca gocæcäimpa. Inguipoga tömão godinque tömengä, Wabæca nãni quëwencabo ayæ wabæca nãni quëwencabo nãni oda cæte goquimämo ante cædinque tömënanäni inänite, Mönö guëadö guëa cæquinque gocæcäimpa, ante, Adoyömo godongämæ pöedäni, ante ancæcäimpa. Æpodänidö inänii, ante tömënanäni æpæ wedeca emönai bai tæiyænäni inguinänidö angüenë.

⁹ Mäninäni bogænxæ tömão godäni bai tömënanäni adobai inguipoga tömão gocædänimpa. Wængongui nänö waadete quëwëñömo tömengä quinäni quëwëñömo godämæ gocædänimpa. Goyönäni öönæde inö gonga bæcodote gao wææfionte gonte wæncædänimpa. ¹⁰ Ayæ wënæ tömënanäni inänite, Oda cæte gocædänimpa, ante në cægaingä ingante Wængongui bæi ongonde atopode nãni änotibæ gonga bai nãni bæcodotibæ cæncadëmæ wido cæcæcäimpa. Edæ mönö guifnongä tönö, Wængongui beyæ në apænebo, ante në babæ äningä tönö tömëna do bæ mäniñömo wido cæte ingadäimpa. Iinque mäninäni itæde woyowotæ mäniñömo quëwente cöwë wantæpiyæ nãni wæwenguimämo ingæimpa.

Wængongui Awënë tæ containpa näämæntapa

¹¹ Ayæ awënë tæ containpa nænæmpa näämæntapa adinque botö mänimpaa në tæ contacä ingä adobai atabopa. Inguipoga tönö öönæ ifiömo tömengä ingante ate bai cædinque wodii godinque nana ongöñömo edæ ædömë gote dæ änimpa.

¹² Ayæ në wængainäni tömännäni awënëidi incæ önönäni que incæ mänimpa gäänë a ongönäni atabopa. A ongönönäni mincayontacoö wataa wataa wi æmpote ongoncoopa. Ayæ mincayonta wataa Wængongui, Quëwenguinta, ante tömengä yewæmongaintaa wi æmpote acan-tapa. Mänii mincayontacoö ifiömo, Në wængainäni tömännäni æbänö cægainäni inänii, ante Wængongui mänintacoö nänö yewæmongainö ante wataa wataa tömanta adinque në wængainäni nãni cægai ganca, ante tömënanäni inänite adoganca apænte ante pangantapa. ¹³ Ayæ æpæntibæ cæncadëmæ do wængainäni wæætë ta pönänitapa. Æmæwo wængainäni incæ ta pönänitapa. Tömënanäni nãni wænte ongöñömo në ongongainäni inte wadæ ta pönänitapa. Ta pönäni ate, Æbänö cægainäni inänii, ante

adinque Wængongui adocanque adocanque nänö cægai ganca, ante tömengä ingante adoganca apænte ante pangantapa.

¹⁴ Mäniñedē ganca ayæ baganca wænāmai quēwencædänimpa, ante ayæ, Wængaināni nāni ongōñomō adobai dæ bacæiñpa, ante cædinque mönō Awēnē wængaināni æmæwo nāni wængaimāmo tönō nāni wænte ongōñomō æpæntibæ gonga bai nāni bæcodotibæ cæncadēmæ wido cæcantapa. Mänintibæ mempoga ganca æmæwo nāni wænguimāmo bai impa. ¹⁵ Wængongui, Quēwenguinta, ante nänö yewæmongaintaa adinque, Æcänö emōwo mänintaa yewæmönāmai i, ante adinque nē yewæmönāmai ingaināni inānite mänintibæ cæncadēmæ wido cæcantapa.

21

Inguipoga münguipo öönæ müönæ

¹ Ayæ öönæ müönæ inguipoga münguipo atabopa. Edæ öönæ picæönæ inguipoga picænguipo dæ iinque batimpa. Ayæ æpæntibæ adobai dæ äñimpa. ² Ayæ godömenque botö ayömote Wængongui nänö tæiyæ waēmō quēwēñomō müi Eedotadēē nāni añomō öönædē inō ta wææ atabopa. Onquiyængä nē moncæ cæcä iñomō, Botö nänöogængä inguingä waa acæcäimpa, ante waēmō weocoo nē mongængä bai i quēwēñomō adobai waēmō pōni emō inte ta wææ atabopa.

³ Ayæ Awēnē tæ containpa inō tedepāmo yedæ ä eñentabopa. “Nōwo Wængongui nänö owoquincō waodāni weca ongō iinque tömengä tömēnāni tönō quēwenguingä ingampa. Tömēnāni tömengä guidēnāni bacædänimpa. Ayæ Wængongui incæ, Botö tömēmo mīnitō Wængonguimo incæboimpa, ante tömēnāni weca ongoncæcäimpa.

⁴ Tömēnāni wēñapæ tamonte wædi tömāmæ Wængongui wadæ cæmoncæcäimpa. Mäniñedē æmæwo mönō wænīmāmo incæ mönō wæwēñimāmo incæ Ca ca mönō wædimāmo incæ nantate mönō wædimāmo incæ tömää mänīmāmo dæ angæiñpa. Edæ wēñēñedē iñimāmo incæ iinque batimpa,” angantapa.

⁵ Ayæ Awēnē tæ containpaa nē tæ contacä iñimāmo angantapa. “Tömää iñimāmo botö ñowo müi cæcæboimpa,” angantapa. Ayæ, “Mänömainō ante botö äñinō edæ nō pōni i iinque mäninō ante wede pönengæiñpa. Mänömai beyæ bitō iñimāmo ante yewæmōe,” angantapa.

⁶ Ayæ tömengä wæætē botö imote iñimāmo äñinque, “Dobæ iinque batimpa. Botö Tānobo ingaimo inte Tömāmo inguimo imopa. Wēñēñedē tömää nē Badongaimo inte tömää nē iinque Cæbo incæboimpa. Edæ nē gæwæñnāni, Æpæ beinēmōñipa, ante nē

änāni inānite botö æpæ tapæ quēwenguiñmæ önonque godōmo becædänimpa. ⁷ Tæi emonte nē gänä cædāni inānite botö mänincoo botö nē godonguincōo godōmo æncædänimpa. Ayæ botö incæ tömēnāni Wængonguimo incæboimpa. Tömēnāni wæætē botö wēñænāni bacædänimpa. ⁸ Wæætē guñfente awædō, ante nē änāni tönō nē pönēñāmai ināni guiquēñē, nē wiwa cædāni tönō wacä ingante nē wænōñāni guiquēñē, nē towente quēwēñāni tönō idōidi nē ināni guiquēñē, Wængongui impa, ante nāni badōninca gäänē ædæ wææñinque nē apæñedāni tönō nē babæ änāni tömāñāni guiquēñē, mänināni iñōñānite atopode nāni äñontibæ gonga bai nāni bæcodotibæ incæ tömēnāni nāni wæcōñomō bacæiñpa. Mänii nāni wænguimāmo iñomō mempoga ganca nāni æmæwo wænguimāmo impa,” angantapa.

Mü Eedotadēē quēwēñomō

⁹ Wængongui anquedoidi önonpo æmæmpoque go mēa ganca ināni önonpo æmæmpoque go mēa ganca owætæcōo waodāni iinque nāni wæwenguiñmācōo eyede engate intacoo nē næænāni iñōñānite adocanque botö weca pōninque, “Pōe,” angantapa. “Wængongui Codotedo nänöogængä nē baqingä nē monguingä iñongante botö bitō imite odömōmo acæbiimpaa,” angantapa. ¹⁰ Ayæ Wængongui Öñowoca incæ botö imote bæi ongonte bai cæyongante botö wīmonte bai iñimā atabopa. Wængongui anquedo botö imote ö ænte māo onquiyaboga tæcædæca pōni cōnongä ongonte ayōmo Wængongui tæiyæ waēmō nänö quēwēñomō Eedotadēē nāni añomō öönædē inō ta wææññonte tömengä botö imote odömongä atabopa.

¹¹ Mänii quēwēñomō Wængongui ñāö emōnongä bai apaitimpa. Ayæ dica aatapeca nāni anca emō bai awocawænta bai waëmonca iñimpa. Waodāni nāni nangui godonte æninca bai ñāö apāite bai Eedotadēē iñimpa. ¹² Mänii quēwēñomō godamæ tæimō wææ cædi æñowæmō ongōñimpa. Ayæ wææ cædi odemoncoo iñomō önonpo tipæmpoga go mēnemonga wææ cædinemō iñimpa. Önonpo tipæmpoga go mēa ganca wææ cædinemō incæ wayōmō adodemonque Wængongui anquedo adocanque a ongōñongä wayōmō adodemonque Wængongui anquedo a ongōñongante anquedoidi önonpo tipæmpoga go mēa ganca ongōñānitapa. Mäninēmō önonpo tipæmpoga go mēnemonga odemoncooga idægoidi nāni cabo tipæmpoga go mencabodāniya iñōñānite tömēnāni emōwocoo yewæmōnte iñimpa. Wayōmō odemonga adocaboque emōwo wayōmō odemonga adocaboque emōwo yewæmōnte iñimpa. ¹³ Nænque tamōñ inō mēa go adoque odemō iñimpa.

Nænque wæidö inö mäa go adoque odemö inimpa. Betamonca inö mäa go adoque odemö inimpa. Adobai æmatæ inö mäa go adoque odemö inimpa. ¹⁴ Mänii quëwëñömö wænömënæca mænonte wææ cæqui, ante nani ñönöncacoo iñömö önompo tipæmpoga go mencaa inimpa. Mänincacoo önompo tipæmpoga go mencaa incæ Wængongui Codotodo nänö da godongainäni önompo tipæmpoga go mënaa inäni tömënäni ëmowo incæ adocanque ëmowo wacaa adocanque ëmowo wacaa yewæmante ëñacaimpa.

¹⁵ Wængongui anquedo botö imote në apæningä iñömö tee manguimpa oodo inte badöimpa në næængä atabopa. Mänii quëwëñömö tee mancæte ante mänii wææ cædinemoncoo adobai tee mancæte ante mänii wææ cædi adobai tee mancæte ante tömengä tee manguimpa næængantapa. ¹⁶ Mänii quëwëñömö æmatæ adoganca æmatæ adoganca mænonte inimpa. Doyæ inö betamonca inö adoganca inimpa. Tömengä mänii quëwëñömö tee manguimpa inte tee mante doyæ inö ænówæmö inö doo müdo dootiento quidömetodo ganca inimpa. Ayæ betamonca iñömö adobai doo müdo dootiento quidömetodo ganca i atabopa. ¹⁷ Wængongui anquedo waodäni nani tee mänö bai tee mangä ayongä mänii quëwëñömö wææ cædi tæinebo inö tetenta i coatodo mëetodo ganca inimpa.

¹⁸ Mänii wææ cædi aatapeca nani änonca inte mænöni inpa. Mänii quëwëñömö guiquënë oodo inte awocawænta bai waëmö inte mænöni inpa. ¹⁹ Mänii quëwëñömö wænömënæca mænonte wææ cæqui, ante ñönöncacoo iñömö, Waëmö ëmongæimpa, ante tömënäni quincacoo nani nangui godonte ænincacoo ænte mämö ñönöncacooga bewodö bewodö cædänitapa. Tånoca ñönöncinca aatapeca nani anca inimpa. Waca ñönöncinca guiquënë tapidoca nani anca inimpa.

Waca ñönöncinca guiquënë aagataca nani anca inimpa.

Waca ñönöncinca guiquënë etemënaotaca nani anca inimpa.

²⁰ Waca ñönöncinca guiquënë oöninteca nani anca inimpa.

Waca ñönöncinca guiquënë codönadinaca nani anca inimpa.

Waca ñönöncinca guiquënë coditooditoca nani anca inimpa.

Waca ñönöncinca guiquënë bedidoca nani anca inimpa.

Waca ñönöncinca guiquënë topatioca nani anca inimpa.

Waca ñönöncinca guiquënë coditopatataca nani anca inimpa.

Waca ñönöncinca guiquënë aatintoca nani anca inimpa.

Waca tömanca guiquënë amatitaca nani anca inimpa.

Mänimpoca inimpa.

²¹ Mänii wææ cædinemö iñömö önompo tipæmpoga go mënemonga iñömö pededamö nani ämö önompo tipæmpoga go mëmonga inte mænonte inimpa. Wææ cædinemö incæ wææ cædinemö incæ pededamö adomonque adomonque inte mænöni inemö inimpa. Mänii quëwëñömö taadö ñænænö godö oodo inte mænöwate taadö awocawænta bai waëmö inimpa.

²² Mönö Wængongui Awënë adocanque Tömää në Cægaingä tönö Wængongui Codotodo tönö mäniiñömö cöwë ongöna ininque godongämæ quëwënäni guiquënë, Mönö Wængongui oncönë guicæimpa, ante quinante anguinäni. Edæ Wængongui tæiyæ waëmö oncö mäniiñömö dæ ä atabopa. ²³ Wængongui në ñäö bai ëmönongä inte ñäö apäiquingä bai inongäimpa. Ayæ Wængongui Codotodo iñömö nani ti wodönoincade bai i ininque mänii quëwëñömö iñömö nænque incæ apäicä incæ quinante godömenque ñäö apäiqui. ²⁴ Wabæca nani quëwencabo ayæ wabæca nani quëwencabo inänite Wængongui ængä beyænque në quëwënäni inte mäninänique mänii ñäö apäiyömö cægoncædänimpa. Adobai inguiipoga awënë odeyeyidi waëmoncoo nani ëadincoo mäniiñömö ænte poncædänimpa.

²⁵ Mänii quëwëñömö woyowotæ inämaï ingæimpa. Ininque mäniiñömö wææ cædinemoncoo iimö iñö iimö iñö iñönte cöwë tee mönedämaï ingæimpa. ²⁶ Wabæca nani quëwencabo ayæ wabæca nani quëwencabo incæ tömënäni waëmoncoo nani ëadincoo mäniiñömö ænte poncædänimpa. Mänii quëwëñömö waa quëwëñömö inpa, ante waa ate apænecædänimpa. ²⁷ Quiëmë wænæ wænæ i mäniiñömö cöwë guidämaï ingæimpa. Në wiwa cædäni incæ në babæ änäni incæ mänii quëwëñömö guidämaï inguinänidö angüënë. Wæætë Wængongui Codotodo, Quëwenguintaa, ante nänö yewæmointaa në yewæmönäni guiquënë tömënänique guicædänimpa.

22

¹ Ayæ Wængongui anquedo botö imote önö quëwengulimæ odömongä atabopa. Mänimæ awocawænta bai waëmömmæ inpa. Wængongui tönö Wængongui Codotodo nana aacæ tæ contaimpa inö tapæmpa. ² Mäniiñömö tadinque mänii quëwëñömö taadö ñænænö godö tæcæguedë inö ta gopæmpa. Mäninö æmæ wedeca incæ imæ wedeca incæ awæ quëwenguiwæ pæwæ atabopa. Mäniwæ iñömö tömenca wacä apäicä iñönte wacä apäicä iñönte incapa. Ininque adoque

wadepo iñedē önopmo tipæmpoga go mēa ganca mānimpoga māniwæ incayedē impa. Wabæca nāni quēwencabo ayæ wabæca nāni quēwencabo incæ mānimæca quēwēnāni tōmānāni māniwæ öñabocoo beyæ ganca bæcædānimpa, ante ēñabocoo. ³ Wængongui pante nänö angainö beyæneque quincoomē wēnæ wēnæ bagatī māninö māniñedē dæ angæimpa. Wængongui tönö Wængongui Codotedo nāna aacæ tæ contaimpa māni quēwēñömö mæ ongoncæpaimpa. Tömengä ingante nē cædönāni iñömö tömengä ingante watapæ apænedinque tömengä ingante cæcædānimpa. ⁴ Tömengä awinca acædānimpa. Ayæ tömengä emöwo tömēnāni öñönemö inö yewæmonte incædānimpa. ⁵ Māniñömö woyowotæ ināmai ingæimpa. Edæ māniñömö quēwēnāni beyæ Wængongui Awēnē nē ñäö emönongä inte apāiquingä inongampa. Ininque næneque ñäö apāidö incæ ti wodönoincade enēnö incæ quinate ayæ apāiquī. Ayæ māniñömö quēwēnāni adodāni cōwē wantæpiyæ aacædānimpa.

Itota Codito oo poncæcäimpa

⁶ Ayæ Wængongui anquedo botö imote apænedinque, “Māninö bitö ēñenö nö pōni i ininque māninö ante wede pönengæimpa. Wængongui beyæ nē apænedönāni tömengä Öñowoca ingante ewocadinque apænedānipa. Tömēnāni nāni nē ewocadongä Wængongui Awēnē iñömö tömengä anquedo ingante apænedinque, Bitö botö imote nē cædönāni weca godinque, Ebānö oo pōni baquimpa, ante odömöni cædānimpa, ante da pönongä pongantapa,” ante botö imote apænecantapa.

⁷ Itota Codito, “Aedāni. Botö oo ocæ emænte ponguimo imopa. Ii mincayontaa Wængongui beyæ apænedinque nāni yewæmonte angainö ante nē ēñente cædāni iñömö nāni toquinque,” ante apænecantapa.

⁸ Botö Wäömo inömo imopa. Māninö Wængongui anquedo nänö āninö ante nē ēñēnimo inte botö māni tömengä nänö odömöninö ante nē adimo inömo imopa. Wængongui anquedo angä ēñēninque ayæ odömongä adinque botö nē odömöningä önowa inö ædæ wæænte tömengä ingante watapæ apænecæte ante cætabopa. ⁹ Cæyömote tömengä wææte, “Mānōmai cædāmai imāwe, angantapa. Botö önonque bitö bai Wængongui ingante nē cæbo imopa. Ayæ bitö tōniñadāni Wængongui beyæ nē apænedönāni tönö ii yewæmointaa nāni angainö ante nē ēñente cædāni tönö botö tömēnāni bai adobai Wængongui ingante nē cæbo imopa cæbii. Edæ Wængonguinque ingante ædæ wææninque, Bitö Wængongui

Awēnē adobique imidö angüenē, ante apænee,” angantapa.

¹⁰ Wængongui anquedo godömenque botö imote iimai angantapa. “Edæ mānōmai baquionæ oo pōni ingæimpa cæbii. Ii yewæmointaa Wængongui beyæ apænedinque nāni angainö ante bitö wē wodönāmai inte do apænee. ¹¹ Nē wēnæ wēnæ cædönāni inānite ee abi godömenque wēnæ wēnæ cæcædānimpa. Tömēnāni nāni pönēnö wentamö bai nē entawēnāni inānite ee abi godömenque nāni pönēnö wentamö bai entawencædānimpa. Nē nö cædāni inānite ee abi godömenque nö cæte quēwencædānimpa. Nē tæiyæ wæmö entawēnāni inānite ee abi godömenque tæiyæ wæmö entawencædānimpa.”

¹² Itota Codito, “Aedāni. Botö oo ocæ emænte ponguimo imopa. Ocæ emænte pöninque botö tömēmo godömo nāni ænguincoo, ante næænte ponguimo imopa. Tömānāni æbānö cædāni, ante adinque botö tömēnāni nāni cægä ganca ante adonganca godömo æncædānimpa. ¹³ Botö Tānobo ingaimo inte Tömāmo inguimo imopa. Tömāā badönāmai iñedē botö Do Quēwengaimo imopa. Ayæ tömāā inique bayedē incæ botö Ayæ Pōni nē Quēwēmo incæboimpa. Wēēñēñedē tömāā nē Badongaimo inte tömāā nē Iinque Cæbo incæboimpa.”

¹⁴ Weocoo yamonte bai mīmönē nē mēnongate ināni iñömö tömēnāni nāni toquinque edæ māni quēwēñömö wææ cædinemö iñömö go guiquināni inānipa. Go guidinque tömēnāni quēwenguwæ quēwenguinca bequināni inānipa. ¹⁵ Wiwa cædāni guiquēnē māni quēwēñömö yabæque iñömö ongonte wæquināni inānipa. Idöidi nē ināni, nē towente quēwēnāni, wacä ingante nē wæñönāni yabæque ongönānipa. Wængongui impa, ante nāni badöninca gāänē ædæ wææninque nē apænedāni, nē babæ ānāni tönö, Babæ ānēmönipa, ante nē ānāni tönö tömēnāni tömānāni māni quēwēñömö yabæque iñömö quēwenguināni inānipa.

¹⁶ “Botö Itotabo ingaimo imopa. Māninö botö angainö ante nö impa, ante botö imote godongāmæ nāni pönecabodāni tömānāni inānite apænecä ēñencædānimpa, ante cædinque botö do botö anquedo ingante munitö weca da pönömo pongantapa. Botö docä Awēnē Dabii nänö Wæmæncoo ingaimo inte adobai nänö Pæimo inömo imopa. Botö wadaamö bai ñäö bayö apāimö bai imopa.”

¹⁷ Wængongui Tæiyæ Wæmö Öñowoca tönö Wængongui Codotedo nänöogæwängä nāni ānongä, “Pödāni,” ānapa. Añōna tömēnāni tömēna inate nē ēñēnāni inte adobai, “Pödāni,” ancædānimpa, āmopa. Nē gæwænte ināni tömānāni pö becædānimpa, āmopa. Nē beinēnāni iñönānite, Minitö

quëwenguimæ, ante önonque pönonguimæ incæ pö ænte becæminimpa, ante ämopa.

¹⁸ Ii yewæmöintaa Wængongui beyæ nê apænedäni nâni angainö ante nê ëñênâni tömänâni inänite, Ee aedâni, botö wææ ämopa. Edæ mäninö nâni angainö ante godömenque wadö änâni inänite Wængongui pancæcäimpa. Ii yewæmöintaa quïémê nâni pante wæwenguincoo, ante yewæmonte adinque Wængongui nê wadö änâni inänite mänincoo bai godömenque pancæcäimpa. ¹⁹ Ayæ ii yewæmöintaa Wængongui beyæ nê apænedäni nâni angainö incæ pancadea æninque nê wëä godonte bai cædâni inänite Wængongui quëwenguimæ quëwenguinca

godönämaï incæcäimpa. Tömengä adobaï, Botö tæiyæ waëmö quëwëñömö mäninömö guidämaï incæminimpa, ante ancæcäimpa. Mänii quëwenguimæ ante mänii quëwëñömö ante ii yewæmöintaa yewæmonte impa.

²⁰ Mäninö ante, Nö impa, ante nê apæ necä inömö tömengä inömö, “Ao, botö oo ocæ ëmænte ponguimo imopa,” angantapa. Äñongante botö,

Mänömaï baquinö anguënë, ante, Amëë, äninque, Awënë Itota pöe, ämopa.

²¹ Awënë Itota Wængongui nänö guidënâni inänite waadete godö cæcæcäimpa. Mänömaï baquinö anguënë, ante botö, Amëë, ante mäninque ämopa.